


Ac'aj testamento (El Nuevo testamento in Mam de
Todos Santos)



New Testament in Mam Todos Santos; mam (GT:mam:Mam)

Ac'aj testamento (El Nuevo testamento in Mam de Todos Santos)

New Testament in Mam Todos Santos; mam (GT:mam:Mam)

copyright © 2000 Wycliffe Bible Translators, Inc.

Language: Mam

Dialect: Todos Santos

Translation by: Wycliffe Bible Translators, Inc.

Mam (Todos Santos) [mam], Guatemala

Copyright Information

© 2000, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mam

© 2000, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
359e148d-ed45-5e5e-b7c0-e74b8b7b1504

Contents

SAN MATEO	1
SAN MARCOS	44
SAN LUCAS	74
SAN JUAN	122
LOS HECHOS	158
ROMANOS	204
1 CORINTIOS	221
2 CORINTIOS	239
GÁLATAS	250
EFESIOS	256
FILIPENSES	262
COLOSENSES	266
1 TESALONICENSES	270
2 TESALONICENSES	274
1 TIMOTEO	276
2 TIMOTEO	281
TITO	285
FILEMÓN	288
HEBREOS	289
SANTIAGO	304
1 PEDRO	308
2 PEDRO	313
1 JUAN	316
2 JUAN	320
3 JUAN	321
JUDAS	322
APOCALIPSIS	324

T-xi'len tchunk'lal Jesús tz'i'ben tu'n San Mateo

Ke tcyman Jesucristo ootxa

(Lc 3:23-38)

¹ Ejee' tzunj lu tz'i'ben cybi tiy'jil Jesucristo. Ja Jesucristo t-xe'chel David, bix jatzen David t-xe'chel Abraham.

² Yaltzen te Abraham, tman Isaac. Jatzen te Isaac, tman Jacob. Bixsen te Jacob, cyman Judá cyuyax ke ttzicy bix ke titz'en. ³ Bixsen te Judá, cyman Fares tuyax Zara, tal Tamar kej lu. Bix te Fares, tman Esrom. Bix te Esrom, tman Aram. ⁴ Bix te Aram, tman Aminadab. Bix te Aminadab, tman Naasón. Bix te Naasón, tman Salmón. ⁵ Bix te Salmón, tman Booz, tal Rahab. Bix te Booz, tman Obed, tal Rut. Bix te Obed, tman Isaí. ⁶ Bix te Isaí, tman jrey David. Bix te David, tman Salomón, tal jxuj xuuj t-xu'l jxin Uriás.

⁷ Yaltzen te Salomón, tman Roboam. Bix te Roboam, tman Abías. Bix te Abías, tman Asa. ⁸ Bix te Asa, tman Josafat. Bix te Josafat, tman Joram. Bix te Joram, tman Uzías. ⁹ Bix te Uzías, tman Jotam. Bix te Jotam, tman Acáz. Bix te Acáz, tman Ezequías. ¹⁰ Bix te Ezequías, tman Manasés. Bix te Manasés, tman Amón. Bix te Amón, tman Josías. ¹¹ Bix te Josías, tman Jeconías cyuyax ke ttzicy bix ke titz'en. Ete' ke Jeconías tej cyxi' k'i'n xjal aj Israel tuj Babilonia.

¹² Yaltzen te Jeconías, tman Salatiel. Otk chi pon k'i'n aj Israel tuj Babilonia tej titz'j Salatiel. Bix te Salatiel, tman Zorobabel. ¹³ Bix te Zorobabel, tman Abiud. Bix te Abiud, tman Eliaquim. Bix te Eliaquim, tman Azor. ¹⁴ Bix te Azor, tman Zadoc. Bix te Zadoc, tman Aquim. Bix te Aquim, tman Eliud. ¹⁵ Bix te Eliud, tman Eleazar. Bix te Eleazar, tman Matán. Bix te Matán, tman Jacob. ¹⁶ Bix te Jacob, tman José, tchmil María. Bix ja te María, ttxu Jesús, jaj Cristo tbi, jaj xjal scy'o'n tu'n Dios te cawel tibaj cykilca.

¹⁷ Ju' tzunj, at cyaajlaaj cloj cyiy'jil xjal e tzaj xe't ti'j Abraham ul ti'j David. Bix at cyaajlaaj cloj cyiy'jil xjal e tzaj xe't ti'j David ul tej k'ij tej cyxi' k'i'n aj Israel tuj Babilonia. Bix at cyaajlaaj cloj cyiy'jil xjal e tzaj xe't tej k'ij tej cytzyet cyu'n aj Babilonia ul baj tej titz'j Cristo. Ju'tzen tten oc Jesucristo t-xe'chel jrey David.

Tej tul itz'j Jesucristo

(Lc 2:1-7)

¹⁸ Bix ja te Jesucristo, Tcwal Dios. Tej tul itz'j, ju' e baj cyjulu. Ttxu Jesús, jaj txin María, otk yolen tuyaj xin José tu'n tmajetxin tuyaxin. Pero te mitkna'x majetxin tuyaxin, bix te mitkna'x toc ipan José ti'jtxin, ya atl taltxin tuj tc'u'jtxin. Preñadatltxin tu'n Espíritu Santo. ¹⁹ Yaltzen te José, jxin xjal tu'n tmaje tuya María, jun xjal e tnima tley Dios. Ju' tzunj, tej tel tniy'xin ti'j otk tz'oc María preñada, e tajbexin tu'n tcyaj ttzokpi'nxin María, pero yaa'n cywitzt nejenel tuj tja Dios, cuma tcy'ixin tu'n tcub tch'ixew María. ²⁰ Tajxin tu'n el tpaan tiibxin ti'jtxin, pero ul jlet jun tsanjel Dios tuj cya'j tuj twitziy'xin, bix e tkba texin:

—José, tiy'jil David, mi'n tzaj tzi'ja tu'n tmajey tuya María, cuma tu'n tipemal Espíritu Santo ma tz'oc jlet taltxin. ²¹ Bix q'uitz'jel jun taltxin, bix c'oquel tk'o'na tbi te Jesús, jatzen japeninaj “Clol xjal.” Jatzen tbi c'oquel tk'o'na, cuma chi cletel xjal tu'n tuj cyil—tzi ángel te José.

²² Cykilcatzen jlu e baj tu'ntzen tjapan baj tyol Dios e cyaj tkba'n cye xjal tu'n jun tyolel. E tkba tyolel Dios cyjulu:

²³ —Cycye'yenc, c'oquel preñada jun txin mitkna'x toc ipan jun xinak ti'j, bix q'uitz'jel jun taltxin, bix c'oquel k'o'n tbi te Emanuel, jatzen japeninaj “At Dios kuya”—tzi Dios te jun tyolel.

²⁴ Bix el twatl José. Bix e tcuya tuyaj yol e tkba tsanjel Dios texin tuj twitziy'xin, bix e majexin tuya María. ²⁵ Pero min oc ipanxin ti'jtxin tejxe tul itz'j taltxin. Bix oc tk'o'nxin tbi'ka te Jesús.

2

Tej cypon jxin at cynaabl tu'n t-xi' cyyee'axin nimbil twitz nee' Jesús

¹ Itz'jtzen Jesús tuj tnom Belén tuj departamento te Judea, bix ja tzunj jxin Herodes rey tej titz'jk'a. Tej titz'j Jesús, e pon juun xjal nim cynaabl tuj Jerusalén. Otk chi tzaj te jun tnom te ocne. ² Bix e xi' cykanenxin cye xjal:

—¿Jaa' ta' jxjal at tu'n tcawen cyibaj xjal judío? Jaxte ma tz'itz'j, cuma ma kila jun che'w ocne tzin tyee'c'an ma tzul cawel cye xjal judío. Kaja tu'n t-xi' kyyee'c'ana knimbila twitz—tzi ke jawnex xjal te juntl tnom ocne.

³ Tejtzen tbinte rey Herodes otk tz'itz'j juntl rey cye xjal judío, bi'x e tzaj ttzi ti'jxin, bix e tzaj ttzi cyi'j aj Jerusalén. ⁴ Oc tchmo'n Herodes cykilca nejenel cye pala cyuyax ke tx'olbal ley, bix e xi' t'kanenxin cyexin jaa' tu'n titz'ja Cristo, jxjal Scy'o'n tu'n Dios te Cawel. ⁵ Bix aj cytzak'be'nxin texin:

—Tu'n titz'j tuj tnom te Belén tuj departamento te Judea, cuma e cyaj tz'i'bet tu'n jun tyolel Dios cyjulu: ⁶ “Tzi Dios, 'Jay, tnom Belén, amale ch'ineta cyoxl tnom te Judá, pero nintzaja, cuma tuyey tzula itz'ja jun Cawel tu'n tajben te Cylel te ntanema Israel,' tzi Dios,” tzi jun tyolel Dios—tziike.

⁷ Tej tel tniy' Herodes ti'j otk tz'itz'j jun cawel, bix e tzaj ttxco'nxin kej xjal nim cynaabl, pero tuj ewjel, bix e xi' t'kanenxin cyexin:

—¿Jtoo ul jlet che'w te ocne?—tzi rey.

⁸ Tej tbaj yolen Herodes cyuya aj naabl te ocne, e xi' t'sma'nxin ejee'xin tuj tnom Belén, bix e xi' tkba'nxin cyexin:

—Cyuxca cyey tuj tnom te Belén, bix chebe chebe chi jyona ti' nee'. Ojtzten tcnet cyu'na, cykbantza weya, tu'ntzen jax ju'x weya tu'n nxi'ya yec'l nnimbila twitz—tzi Herodes, pero xtak' yol.

⁹ Tej cybintexin tyol rey, exkexin, bix tujx naj tul jlet che'w juntl maj otk cyilxin tej cytenxin ocne. Bix e cub nej che'w cywitzxin, bix tej tpon che'w tibaj jaa' jaa' ta' nee', e we' che'w. ¹⁰ Tejtzen cylontexin che'w, nimxsen e jaw tzalajkexin. ¹¹ Bix ocxkexin tuj jaa', bix e cyilxin nee' tuya ttxu, ja María, bix e cub mutzk'ajkexin twitz nee' tu'n tjaw cynimsa'nxin ja. Otk txi' cyii'nxin ch'in ti'j cyk'inemalxin, bix e jaw cyjko'nxin. E jatz cyii'nxin cyoybilxin, bix e xi' cyk'o'nxin tek'a oro tuya incienseo tuya jun wik c'oc'sbil mirra tbi. ¹² Pero tej tpon tumel tu'n cyajxin, e tzaj tkba'n Dios cyexin tuj cywitziy'xin tu'n mi'n chi aj meltz'ajxin tuya Herodes. Ju' tzunj, ajkexin tuj cytanemxin tuj junxilt be.

Tej cyxi' ok José tuj Egipto tu'n min cub byet nee' tu'nj rey Herodes

¹³ Cyajlenxiltzen ke aj naabl, at jun e baj. Ul jlet jun tsanjel Dios tuj cya'j tuj twitziy' José, bix e xi' tkba'n te José:

—Wey'tztzen, bix k'inxa nee' tuyax ttxu, bix ju' txi'y tuj Egipto, bix ajkelbilx tu'na, bix jatzzen ctemeley ojxe t-xi' nkba'na tey tu'n tul meltz'aja, cuma tzul Herodes jyolte nee' tu'n tcub tbyo'nxin—tzi ángel.

¹⁴ Bix e jaw we' José, bix tex koniyan e xi' tii'nxin nee' tuya ttxu, bix e xi' okxin tuj Egipto. ¹⁵ Bix e tenkexin tuj Egipto tejde tcyim Herodes. Ju'tzen e'la jaxxix tyol Dios. E cub ttz'i'ben jun tyolel Dios cyjulu: “Tuj Egipto q'ueletz ntxco'na Ncwala,” tzi Dios tej xin tyolel.

¹⁶ Yaltzen te Herodes, tej tbintexin otk cub sbu'nxin cyu'n aj naabl te ocne, nimxsen e tzaj tk'oixin, bix e xi' t'sma'nxin tsoldadoxin tu'n tcub cybyo'nxin cykilca cwal xinak tuj Belén bix cyuj ke aldeia tuj tcwent Belén. E xi' tkba'nxin tu'n ccyub byet cykilca cwal nitz'j hasta te ca'ba jnabk'ike, cuma el tniy'xin ti'j tu'n ccyol aj naabl otk bint ca'ba jnabk'i tej tul jlet jawnex che'w te ocne. ¹⁷ Ju'tzen e'la jaxxix tyol Dios e tkba tyolel Dios Jeremías. E cyaj ttz'i'ben Jeremías cyjulu: ¹⁸ “Chijel jun sitz'bil tuj Ramá, jatzen k'aj'ajel cywi' xuuj te nimxsen bisbajil. Chi ook'el ke cyiy'jil Raquel cyi'j ke cyal, bix mlay bint tu'n tcyiwsaj cyc'u'j, cuma min-alt cyal,” tzi Jeremías jatxe ootxa.

¹⁹ Tejtzen tcyim Herodes, at juntl e baj. Juntl maj ul jlet jun tsanjel Dios tuj cya'j tuj twitziy' José tuj Egipto. Bix e xi' tkba'nxin te José:

²⁰ —Wey'tztzen, bix k'inxa nee' tuyax ttxu, bix cu txiy tuj tx'otx' te Israel, cuma o chi cyim kej xjal e cyajbe tu'n tcub byet nee'—tzi ángel.

²¹ Ju' tzunj, e jaw we' José, bix e xi' tii'nxin nee' tuyax ttxu, bix e ponkexin tuj tx'otx' te Israel. ²² E tajbexin tu'n tnajanxin tuj departamento te Judea, pero tej tbintexin otk tz'oc Arquelao te cawel te t-xel Herodes tuj Judea, e tzaj ttzi ti'jxin tu'n tnajanxin tuj Judea. E tzaj tkba'n Dios texin tuj twitziy'xin tu'n mi'n pon meltz'ajxin tuj Judea. Ju' tzunj, e xi'kexin tuj departamento te Galilea, ²³ bix e ponkexin tuj jun tnom Nazaret tbi. Ju'tzen e'la jaxxix jtyol Dios e cub ttz'i'ben jun tyolel Dios ti'j jxjal Scy'o'n tu'n Dios. Tzi cyjulu: “Jun aj Nazaret c'oquelt tbi.”

3

Tej tk'umen Juan Bautista tyol Dios

(Mr 1:1-8; Lc 3:1-9, 15-17; Jn 1:19-28)

¹ Mas yaj, ultzen junxin xjal Juan Bautista tbi tuj jun lugar tuj Judea jaa' yaa'n nim xjal najl tuj. E tk'ume Juan tyol Dios, bix tzi cyjulu:

² —Cyk'oncja cyila bix chi meltz'aja tuya Dios, cuma tzul lk'e tcawbil Dios kxol—tzi Juan Bautista.

³ Ju' e tyole Juan, cuma jaxin jxjal e yolen Isaías ti'j, jxin tyolel Dios te ootxa. E tkba Isaías cyjulu: “C-yolel jun tyolel Dios jaa' yaa'n nim xjal najl tuj. Tzitzen tbel cyjulu: ‘Cybincham cyiiba twitz Taaw twitz tx'otx'. Cyjkom tbexin tuj cyanema,’ tzi tbel jxjal c-yolel,” tzi Isaías.

⁴ Yaltzen te Juan, jatzen t-xbalen toc ttzmal camello, bix tz'u'n tq'uelbilxin toc. Yaltzen twaxin, cuchi'kejil, bix tc'a'xin ta'l xii' e cnet tu'nxin tuj c'ul.

⁵ Bix e pon nim xjal te nin tnom Jerusalén tuya Juan, cyuyax xjal te niy'tl tnom tuj Judea, cyuyax jxjal najl ttzii' nima' Jordán. ⁶ Bix e bautizarj ke xjal tu'n Juan tuj nima' Jordán tej tjtaz cykba'n cyil.

⁷ Pero tej tlonte Juan otk chi ul nim xjal tej cloj fariseo bix tej cloj saduceo, tu'ntzen cybautizarj tu'nxin, e xi' tkba'nxin cye:

—Ke cyey cynaabla tisen lbaj. ¿Tikentzen cycy'iy tu'n tcyaj cyk'o'na cyila? Cyaj cyey tu'n cybautizarja wu'na nuk tu'n mi'n cub castiwa cyibaja tu'n Dios. ⁸ Ka cycy'iy tu'n cub castiwa tu'n Dios cyibaja, cybinchamtzen alcey ba'n, tu'ntzen tchic'ajax ka otk cyaj cyk'o'na cyila bix ka otk chi meltz'aja tuya Dios. ⁹ Bix mi'n cub cyimana tuj cyanema: ‘Cuma tiy'jil Abraham ko'ya, mlay tzaj kcastiwiya tu'n Dios, cuma t-xjal Dios ko'ya,’ tzi key. Pero yaa'n ju'wa. Cxe'l nkba'na cyey, ka ma chi oc xjal te t-xjal Dios nuk tu'nj tiy'jil Abrahamke, ba'ntzenle tbint tu'nxin tu'n cyoc ke xak te t-xjal Dios. ¹⁰ Tzul castiwa cyibaj kej xjal yaa'n ba'n twitz Dios. C'oquél cyc'u'ja ti'j ja tumel lu. Taaw cab tken lo'pj c'oquél tcyeyen cyi' cyken lo'pj. Kej min cyak' cywitz ba'n, chi jawel tx'omet ttzi tx'otx', bix nuk te tuj k'ak' chi ajbela. ¹¹ Weya, nuk jun xjal kena tu'n cybautizarj xjal wu'na, ka cyaj xjal txi' cyyeeec'an ma tz'ajtz ti' cynaabl twitz Dios. Pero at jun xjal lepch wi'ja jawnexssen nwitz. Mintlpetii' woclena tu'n tel npju'na tak'el t-xaab. Ja tzunj xjal tzul, yaa'n nuk jun techel ctk'a' tisen weya, sino ctzaal tk'o'nxin Espiritu Santo te cyej cyey ma cyaj cyk'o'na cyila, bix ctzaal tk'o'nxin tu'n cyxi'y tuj k'ak' te cyej cyey min cyaj cyk'o'na cyila bix min ma tz'ajtz ti' cynaabla. ¹² Jun awal triwa q'uelel tpa'n jtwitz triwa tuya t-xc'omel. Jtwitz triwa c'oquex tuj tx'utx', pero tzunj t-xc'omel c'oquex tuj jk'ak' mlay yubtz'aj. Ju'tzen ctemel pjel tpa'n jxjal tzul kej xjal at tu'n cyclet cyuyaj xjal at tu'n cyxi' tuj k'ak'—tzi Juan cye aj fariseo bix cye aj saduceo.

Tej tbautizarj Jesús

(Mr 1:9-11; Lc 3:21-22)

¹³ Ertzen Jesús tuj departamento te Galilea, bix ulxin tuya Juan ttzii' nima' Jordán, tu'ntzen tbautizarjxin tu'n Juan. ¹⁴ Pero tuj twitz Juan, yaa'n tumel tu'n tbautizarj Jesús tu'nxin. E xi' tkba'nxin te Jesús:

—Il ti'j tu'n nbautizarja tu'na, yaa'n tu'n tbautizarja wu'na—tžixin.

¹⁵ Pero e xi' tkba'n Jesús texin:

—Jax tu'na, pero ja'lewe waja tu'n tbint jwajbila tu'na, tu'ntzen tbint jma tkba Dios—tzi Jesús.

Bix e tcuya Juan.

¹⁶ Tejzen tbautizarj Jesús tu'n Juan, e jatz Jesús tuj nima', bix e jket cya'j, bix e tilxin tcu'tz Espiritu Santo tisen junjil cucu', bix e cub licy'pajjil tuj twi' Jesús. ¹⁷ Bix e tzaj jun yol tuj cya'j. E tkba cyjulu:

—Ja tzunj xjal lu Ncwala n-oc tak' weya. Nchin tzalaja ti'j—tzi Dios.

4

Tej toc niy'bet Jesús

(Mr 1:12-13; Lc 4:1-13)

¹ Yajc'adtzen bix e xi' k'i'n Jesús tu'n Espiritu Santo tuj jun lugar mintii' cynajbil xjal tuj, tu'ntzen toc tk'o'n taaw il tipen ti'jxin tu'n tyeec'ante Jesús tnimbil texin. ² E cub tpa'n weyaj cya'wnak k'ij tuyax cya'wnak koniyan, bix tej tjapan baj cya'wnak k'ij, otkssen bajxin tu'n weyaj. ³ Bix e pon taaw il tuya Jesús tu'n tbint tajbil taaw il tu'n Jesús. E xi' tkba'n texin:

—Ka Tcwal Diosa, binchanc'a tzunj xaka te tway te yec'bil—tzi taaw il.

⁴ Pero e xi' tkba'nxin te taaw il:

—Tzin tkba'n tuj tyol Dios cyjulu: “Yaa'n nuk o'cx tu'n twa jun xjal i'tzen. Ja te mas il ti'j, tu'n tnimante cykilca yol tzin tkba'n Dios,”—tzi Jesús.

⁵ Bix e xi' tii'n taaw il ja Jesús tuj Jerusalén, ja tnom nintzaj, bix e jaw tii'n taaw il jaxin maa twi' tja Dios. ⁶ Bix e xi' tkba'n taaw il texin:

—Ka jay Tcwal Dios, xoo'nx tiiba twitz tx'otx'. Mlay cyima, cuma tzin tkba'n tyol Dios cyjulu: “Chi tzaal tk'o'n Dios tsanjel tuj cya'j te clol tey. Ejee' chi tzyulte tey tuj cyk'ab, tu'ntzen mi'n tzak' tkena cywi' xak,” tzi tyol Dios—tzi taaw il.

⁷ Pero aj ttzak'be'n Jesús te:

—Pero jax tzin tkba'n tyol Dios cyjulu: “Mi'n tz'oc ccyakwusa'na Cyaawey Dios tu'nj toc cyk'o'na tuj malbil te, ka jax tu'n,”—tzi'xin.

⁸ Bix e xi' k'i'n Jesús juntl maj tu'n taaw il. E pon k'i'nxin twi' jun witz te nimxsen twe', bix e xi' tyeec'an taaw il texin cykilca tnom twitz tx'otx' tuyax cyk'inemal tnom nimxix. ⁹ Bix e xi' tkba'n taaw il texin:

—Cykilca ke tnom lu cxe'l nk'o'na tey ka ma cub majey nwitz te yec'bil ka inayena taawa tuj twitza—tzi taaw il texin.

¹⁰ Bix e xi' tkba'nxin te taaw il:

—¡Min! Cutxey, Satanás, cuma tzin tkba'n tyol Dios cyjulu: “Nuk o'cx ja Dios cjawel cynimsa'na, bix nuk o'cx te texin ba'n cyajbe'ney,”—tzi Jesús.

¹¹ Bixsen e cyaj tk'o'n taaw il jaxin, bix ul ke tsanjel Dios tuj cya'j onlte texin.

Tej ttzyet taak'en Jesús

(Mr 1:14-20; Lc 4:14-15; 5:1-11; 6:17-19)

¹² Tejtzen tbinte Jesús otk tz'ocx Juan tuj tzee', e xi'xin tuj departamento te Galilea, ¹³ tu'n tzen tponxin tuj ttanemxin Nazaret. Pero etzxin tuj Nazaret, bix e ponxin tu'n tnajanxin tuj tnom te Capernaum. Tcub Capernaum ttzii' jun tnijabel a', jaa' najle kej tchmanxin Zabulon bix kej tchmanxin Neftali. ¹⁴ Tej tak'anaxin tuj taak'en Dios jatzewe, el jax j-e tkba jxin tyolel Dios Isaías. E cub ttz'i'ben Isaías cyjulu: ¹⁵ “Kej xjal tuj tx'otx' te Zabulon bix kej xjal te Neftali, cyuyax xjal ttzii' tnijabel a' bix jlajxe nima' Jordán, bix kej xjal yaa'n judío tuj Galilea, ¹⁶ ejee'j tzunj xjal lu chi temel tuj klotj. Nuk chi ayol ccyamecy, pero cxe'l ccyey'en jun spi'yen nintzaj. Kej xjal lu najlke tuj jun tx'otx' jaa' ta' nuk klotj bix cyamecy, pero cwel koptz'aj jun spi'yen cyibaj,” tzi Isaías jatxe ootxa.

¹⁷ Tponlenixiltzen Jesús Capernaum, ak'xin k'umlte tyol Dios. E txbaxin cyjulu: “Chi meltz'aja tuya Dios, cuma ma pon tumel tu'n tul tcawbil Dios tuj cya'j,” tzi'xin.

¹⁸ At jun k'ij e bet Jesús ttzii' jnintzaj tnijabel a' te Galilea, bix e tilxin ca'ba xjal cyitz'en cyiib. At jxin Simón, bix juntl tbixin Pedro, bix at jxin Andrés. Bix e cu'x cyxoo'nxin jun xiy'pa tuj a', cuma tzyul quiskexin. ¹⁹ Bix e xi' tkba'nxin cyexin:

—Chi lpetza wi'ja. Ja'lewe lu key nchi chmona quisk. Pero chi oquel nk'o'na te chmol xjal tu'n cyxi' lpe wi'ja—tzi Jesús cyexin.

²⁰ Bix ncyaj cyk'o'n najtlxin cyxiy'paxin, bix oc lpekexin ti'jxin.

²¹ Tejtzen t-xi' tbet-xin juntl tkiy', e tilxin ca'batl xjal cyitz'en cyiib, jaj jxin Jacobo, bix jxin Juan. Tcwal jxin Zebedeo ejee'xin. Ete'c'axxin tuj jun barc tuya Zebedeo, cymaxin, nchi remenyaxin cyim'paxin. Bix e tzaj ttxco'nxin ejee'xin. ²² Bix e cyaj cyk'o'nxin najtlxin cybarcxin tuyax cymaxin, bix oc lpekexin ti'j Jesús.

²³ Bix e bet Jesús tuj cykilca ke tnom tuj Galilea. Tuj jaca juun camon jaa' te xnak'tzibil tyol Dios, e xi' t-xnak'tza'nxin cye xjal, bix e xi' tk'umexin jtbanel yol ti'j tcawbil Dios. Bix oc tk'anexin kej xjal yaab. El tii'nxin nuk alcyexja cyyabel xjal. ²⁴ Bix el tpochal Jesús tuj cykilca ke tnom tuj Siria. Ju' tzunj, ul k'i'n twitzxin nimxsen xjal yaab cyu'n aj Siria. Ul kej xjal nim q'uixc'aj ete' tu'n yabbil, bix kej nchyon cyi'j, bix kej xjal otk chi oc biman cyi'j, bix kej e tzaj tuj cywi', bix kej mintii' tanem cyxumlal. Bix e k'anjke tu'nxin. ²⁵ Nimxsen xjal oc lpe ti'jxin. E tzajke tuj Galilea, bix cyuj ke tnom te Decápolis, bix tuj Jerusalén, bix cyuj tnom te Judea, bix at e tzaj jlajxe nima' Jordán.

5

Tej t-xnak'tza'n Jesús cye xjal twi' witz

(Lc 6:20-23)

¹ Tejtzen toc tcyey'en Jesús nim xjal oc lpe ti'jxin, e jaxxin twi' jun witz. Tej tcub kexin, e pon lk'e ke t-xnak'atzxin ti'jxin. ² Bix ak'xin yolel cyuyaxin. E xi' t-xnak'tza'nxin cye t-xnak'atzxin cyjulu:

³ —At t-xtalbil Dios cyibaj kej xjal n-el cyniy' ti'j mintii' cyipemal tu'n cyclet cyu'nx, cuma ck'ojel cye tu'n cyocx tuj cya'j.

⁴ At t-xtalbil Dios cyibaj kej xjal nchi bisen ti'j cyil, cuma ccywixel cye'u'j.

⁵ At t-xtalbil Dios cyibaj kej xjal min jaw cyniman cyiib, cuma ck'ojel twitz tx'otx' te cyakab.

⁶ At t-xtalbil Dios cyibaj kej xjal nimxsen cyaj tu'n cyoc jiquenxix twitz Dios, cuma ctzaal tk'o'n Dios cyajbil.

⁷ At t-xtalbil Dios cyibaj kej xjal n-oc cyk'o'n lastim cye cabtl xjal, cuma c'oquel tk'o'n Dios lastim cye.

⁸ At t-xtalbil Dios cyibaj kej xjal sakxix tuj cyanem, cuma c'oquel ccyey'en Dios.

⁹ At t-xtalbil Dios cyibaj kej xjal n-oc cyipen tu'n twe' k'oj cyxol xjal bix tu'n cyten xjal tuj ttzjal cyuya juntl, cuma c'oquel k'o'n cybi tcwal Dios.

¹⁰ At t-xtalbil Dios cyibaj kej xjal nchi baj yaset cyu'n xjal nuk tu'nj jiquen ete' twitz Dios, cuma ck'ojel cye tu'n cyocx tuj cya'j. ¹¹ At t-xtalbil Dios cyibaja oj nchi xmucchan xjal cyi'ja bix oj nchi oc yaseta cyu'n bix oj nchi yolen xjal ka' cyi'ja tuya xtz'imj yol nuk wi'ja. ¹² Chi tzalaja, cuma ctzaal k'o'n cyey nim cycotza tuj cya'j, bix cuma juniy' cytena cyuya ke tyolel Dios te ootxa. Oc cyyasen xjal ejee' nuk ti'j tyol Dios—tzi Jesús cye t-xnak'atz.

Jun ocslal twitz tx'otx' ju' tisen atz'en

¹³ Bix e xi' tkba'ntlxin cyexin:

—Tisen tzin tk'o'n atz'en ttzyal waabj, bix tu'n mi'n k'ey waabj, jax ju'x nchi ajbena cyxol xjal tu'n cyten xjal ba'n. Katzen ma tz'el baj tik'bil atz'en, ziti tten tu'n tcub meltz'ajtl ttzyal? Mintii' c'ajbelet. O'cx nuk tu'n tex xe't, bix tu'n t'bjaj wa'ban cyu'n xjal.

Jun spi'yen cyxol xjal

¹⁴ Ejee'y tisen spi'yen cye xjal. Bix chic'aj cynaabla tisen jun tnóm tcub twi' jun witz. Yaa'n ba'n tu'n tcub cyewena cynaabla cywitzt xjal. ¹⁵ Oj toc t-xket cantil tu'n jun xjal, yaa'n tu'n tocx ewet tjak' jun alma, sino cwel tk'o'n twi' mes, tu'ntzen tk'onte spi'yen cye kej xjal at tuj jaa'. ¹⁶ Jax ju'x cyey, cyii'nxa cychunk'lala cywitzt xjal tuj tumel, tu'ntzen tchic'ajax cybinchbena ba'n, tu'ntzen tjaw cynimsa'n xjal Cymana Dios at tuj cya'j. ¹⁷ Mi'n cub cybisen ka ma chin ula tu'n tel wii'na tajwalel tley Moisés bix ti'j j-e cub cytz'i'ben tyolel Dios. Min in ula tu'n nk'ojla ti'j, sino tu'n t'japan baj wu'na. ¹⁸ Jaxxix cxe'l nkba'na cyey, cbinel cykilcaj e cub tz'i'bet tuj tyol Dios. Mlay xitj twitz cya'j bix twitz tx'otx' hasta ojxe t'btint cykilcaj yol e cub tz'i'bet tuj tyol Dios. ¹⁹ Ju' tzunj, alcyej xjal ma tziy' tibaj jun ley tuj tyol Dios, amale ch'int jun mandamyent, bix ma txi' t-xnak'tza'n cye cabtl tu'n cyiy' tibaj ley, c'oqueltzen te ch'in cyxol t-xjal Dios. Pero alcyej xjal nbint tyol Dios tu'n, bix ma txi' t-xnak'tza'n cye cabtl tu'n cyniman tyol Dios, jatzen xjala c'oquel tk'o'n Dios jawnex cyxol t-xjal Dios tuj cya'j. ²⁰ Jaxxix cxe'l nkba'na cyey, ka min ma chi oca mas jiquen twitz Dios cywitzt ke tx'olbal ley bix kej xjal cyiwxix tuj ley, ejee'j aj fariseo, mlay chi oca tuj tcawbil Dios tuj cya'j.

Tej tyole Jesús ti' k'oj
(Lc 12:57-59)

²¹ O cybiy nejl e cykba kej xjal crinsipal: “Mi'n cub cybyo'na xjal. Alcye jun xjal ma byon, cwel castiwa tibaj cyu'n juez,” tzi'ke. Pero o'cx jlu e cykba. ²² Pero jatzen weya, cxe'l nkba'na cyey, alcye jun xjal ma tzaj tk'oj ti'j juntl xjal, cwel castiwa tibaj tu'n Dios. Tzin cykba'n cyxnak'tzala alcye jun xjal ma tz'oc t-xmuccha'n juntl xjal, c'oqueltzen cywitzt juez mas jawnex. Pero jatzen weya, cxe'l nkba'na cyey, alcye jun xjal ma tz'oc t-xmuccha'n juntl xjal, cxe'l'tzen tuj k'ak'. ²³ Ju' tzunj, oj t-xi'y k'ol te toybila twi' altar tuj tja Dios, pero q'u'iyel tuj t'u'ja ka at jun tila tuj twitz juntl xjal, ²⁴ cyjel tk'o'na toybila twi' altar, bix cutxey tuyaj xjal tu'n t'btint ttena tuya. Oj'tzen tcuba tuj ttzyal tuya, ba'ntzen tu'n t-xi' tk'o'na toybila.

²⁵ Ka at jun t'asbena te jun xjal, bix taj xjal txi' ti'n jay twitz juez, cxe'l naja yolel tuyaj xjal, tu'ntzen t'btint ttena tuya te mitkna'x tpon k'i'na twitz juez tu'n, cuma ka ma cub tz'aka tuj tila twitz juez, cxe'l k'i'na cyu'n ke policia tuj tzee'. ²⁶ Jaxxix cxe'l nkba'na cyey, mlayx tz'etza tuj tzee' ojxe tchjet cykilca t'asbena.

Tej tyole Jesús ti'j aj pajlel

²⁷ O cybiy nejl e cykba nejenel cye xjal: “Mi'n chi jyona juntl xuuj te pajabaj.” Pero o'cx jlu e cykba. ²⁸ Pero jatzen weya, cxe'l nkba'na cyey, alcye jun xjal ma txi' cye'yente juntl xuuj bix taj tu'n toc ipan ti'j, ya ma t'bincha aj pajlel tuya tuj tanem. ²⁹ Ju' tzunj, ka ma cub tz'aka tuj il tu'n t'bjaj t'bjaj twitz tuj tmank'aba, k'imatza bix xomaxa, cuma mas ba'n tu'n t'etz jun t'bjaj twitz tuj twitz tu'n t-xi' xe't cykilca t-xumlala tuj k'ak'. ³⁰ Bix ka ma cub tz'aka tuj il tu'n t'bjaj t'bjaj twitz tuj twitz tu'n t-xi' xe't cykilca t-xumlala tuj k'ak'.

Nyole Jesús ti'j paxjlenel

³¹ Nejl, e cykba nejenel cye xjal: “Alcye jun xjal taj tu'n tcub tpa'n tiib tuya t-xu'l, ba'n tu'n tex tlojo'n nuk tu'nj cxe'l tk'o'n te xuuj jun tu'l tyol xinak otk chi pax.” ³² Pero jatzen weya, cxe'l nkba'na cyey, jaca juun xjal ma cub tpa'n tiib ti'j t-xu'l, ka min e t'bincha t-xu'l pajlel, nbinchantzen jun ka' ti'j, cuma cwel maje t-xu'l tuya juntl xjal, bix c'oquel te aj paj. Bix c'oquel aj paj alcye jun xjal ma cub maje tuyaj xuuj aj paj.

Nyole Jesús ka' txi' kkba'n tzkinn Dios tu'n tcywix kyol

³³ Jax o cybiy e cykba ke crinsipal xjal nejl: “Oj nxi' cyk'o'na cyyola te Dios tuya jun jurament tu'n t'btint jun ak'untl twitz, ka'xsen ka min ma japan baj cyyola. Il ti'j tu'n t'japan baj cyyola oj t-xi' cykba'na 'tzkinn Dios,' ” tzi'ke. Pero o'cx jlu e cykba. ³⁴ Pero jatzen weya, cxe'l nkba'na cyey, mi'n txi' cykba'na “tzkinn Dios” tu'n tcywix cyyola. Tuj cywitzt nejenel

cye xjal, at mas tipemal jyol “tzkinn Dios” twitzj jyol “tstiwa cya’j wi’ja”³⁵ bix twitzj yol “tstiwa twitz tx’otx’ wi’ja” bix ja yol “tstiwa Jerusalén wi’ja.” Pero yaa’n il ti’j lu, cuma tuj cya’j ncawen Dios, bix najben twitz tx’otx’ tu’n tcub tk’o’n Dios tken, bix Jerusalén jtnom jaa’ ccawel Dios tisen rey.³⁶ Bix mi’n txi’ cykba’na tu’n tel tx’omet cywi’ya ka min ma chi japan baja ti’ cyyola, cuma o’cx te Dios ncawen tibaj cywi’y. C’oquel cyc’u’ja ti’j mlay bint cyu’na tu’n toc ttymal cywi’y sak bix ka k’ek.³⁷ Ju’ tzunj, mi’n txi’ cykba’na jun yol te jurament tu’n tcywix cyyola. Nuk o’cx tu’n cyyolena tuya jun yol jaxxix. Ka ma tz’oc cyk’o’na juntl yol tibaj, ka’ tzunj lu.

T-xnak’atz Jesús ti’j tu’n toc cyak’ cye xjal nchi k’ojl cyi’j
(Lc 6:27-36)

³⁸ O cybiy e cykba kej xjal crinsipal nejl: “Ka ma txi’ thak’ twitza bix ka twitz tey tuj il tu’n juntl xjal, ba’n tu’n tjiyona tcastiwa twitz ley, tu’ntzen t-xela junx.”³⁹ Pero jatzen weya, cxe’l nkba’na cyey, mi’n chi k’ojla cyi’j xjal nchi binchan ka’ cyi’ja. Ka ma txi’ ttz’ajen jun xjal tk’o’txa tuj tmank’aba, k’onxa juntl plaj tu’ntzen t-xi’ ttz’ajen.⁴⁰ Ka taj jun xjal txi’ tii’n jay twitz juez tu’n tel k’i’n tcamisa, k’onxtla tcapxeyena te.⁴¹ Ka ma tz’oc tffwersen jun xjal jay tu’n t-xi’ tii’na tiketz jun ajlabl, k’onx tiiba te tu’n t-xi’ tii’na juntl ajlabl mastl.⁴² Ka at jun xjal ma tkane jun tiixja tey, k’onxa te. Bix ka at jun xjal ma tkane pwak tey te tc’asben, mi’n cub t-xq’ueyena.

⁴³ O cybiy e cykba kej xjal crinsipal nejl: “C’oquel cyak’ cyuyey cyey, bix q’uelel cyiij’uena cyaj k’oja cyi’ja.”⁴⁴ Pero jatzen weya, cxe’l nkba’na cyey, il ti’j c’oquel cyak’ cyey kej xjal nchi k’ojl cyi’ja, bix chi na’na Dios cyi’kej nchi yasen cyi’ja,⁴⁵ tu’ntzen tchic’ajax ka tcwal Cymana tuj cya’j ejee’y. Tu’nxin njawelen k’ij cyibaj kej xjal yaa’n ba’n bix kej xjal ba’n, bix ntzaj tk’o’nxin jbal cyibaj kej xjal jiquen bix kej xjal yaa’n jiquen.⁴⁶ Ka ma tz’oc cyak’ cyey nuk ejee’j xjal n-oc cyak’a cye, ¿alcyetzen cycotza ctaaal k’o’n cyeey? Jax ju’x kej chmol chojentj alak’ n-oc cyak’ cyuya cye.⁴⁷ Bix ka ma txi’ cyk’olbe’na nuk ejee’j cyuyey, ¿alcyetzen nchi binchana mas cywitz mastl xjal? ¿Yaa’mpatzen tzin cybincha’n kej xjal yaa’n ttanem Dios ju’wa? ⁴⁸ Ju’ tzunj, chi ocxa tz’aklxix, tisen te Cymana tuj cya’j tz’aklxixte—tzi Jesús.

6

Nyole Jesús ti’j onbil

¹ Bix e xi’ tkba’ntl Jesús cye t-xnak’atz:

—C’oquel cycwenta ti’j tu’n mi’n cybinchana ba’n nuk o’cx tu’n cyoc cye’yena cyu’n xjal. Ka ma cybinchaya nuk tu’n tchic’ajax cybinchbena cywitz xjal, mlay tzaj k’o’n cycotza tu’n Cymana Dios tuj cya’j.² Ju’ tzunj, oj t-xi’ cyonena ke mebe, mi’n txi’ cyk’o’na tumel cye xjal tuya xux ti’ nbaj cyey, tisen nbint cyu’n xmeletz’ xjal cyuj camon jaa’ bix cyuj be, tu’ntzen cyjaw nimsa’n cyu’n xjal. Jaxxix cxe’l nkba’na cyey, o’cx cycotz nuk tu’n cyjaw nimset cyu’n xjal.³ Jatzen cyey, oj t-xi’ cyonena ke mebe, mi’n txi’ cykba’na cye cyuyey ti’ nbint cyu’na.⁴ Ka ju’ nbint cyu’na tuj ewjel, cxe’l tk’o’n Cymana Dios t-xel cyey, cuma ncyeyen Dios ti’j cykilca nbint cyu’na tuj ewjel.

Nxi’ t-xnak’tza’n Jesús ke xjal ti’ naj Dios
(Lc 11:2-4)

⁵ Ojtzen cyna’na Dios, mi’n chi binchana tisen nbint cyu’n xmeletz’ xjal. Cyaj tu’n cyten wal’ cyuj camon jaa’ bix cyuj be tu’n cyna’n Dios cywitz xjal. Jaxxix cxe’l nkba’na cyey, oj nchica’jax cynabl Dios ju’wa, ya otktzen cyiik’ cycotz. Mintii’l t-xel cye mas yaj.⁶ Jatzen cyey, oj cyna’na Dios, cyocxa cyjunala tuj cyjay, bix tz’etz cylomo’na tlemel cyjay, bix chi na’na Cymana Dios min chic’aj. Ncyeyen ti’j cykilcaj yaa’n chic’aj cyu’n xjal, bix cxe’l tk’o’n t-xel cyey.

⁷ Ojtzen cyna’na Dios, mi’n txi’ cymeltz’u’na nimc’a maj jax cyyola tisen nbint cyu’nj xjal yaa’n ocslal oj nchi na’n cydios. Tuj cywitz, cybi’ cydios cyool tu’n nim tken cyool, pero yaa’n ju’wa.⁸ Ju’ tzunj, mi’n chi binchana tisenj cye, cuma te mitkna’x txi’ cykanena te Cymana Dios, ya ttzki’ntlxin ti’ cyaja.⁹ Chi na’na Dios tisen ja yec’bil lu: “Kman Dios ata tuj cya’j, nimsajit tbiy cyxol xjal.¹⁰ Kaja tu’n tul tcawbila twitz tx’otx’.” Chi nimanzit cykilca xjal twitz tx’otx’ tyola tisenx nnimja tuj cya’j.¹¹ K’ontza kwaya ja’lewe.¹² Bix najsanq’uey ja il o cub kbincha’na twitza, tisen keya ncub knajsa’na jka’ o tz’oc cybincha’n xjal ki’ja.¹³ Mi’n ko cub tk’o’na tuj kni’ya, sino cloma ko’ya tuj tk’ab taaw il, cuma jay cawel tibaj cykilca twitz tx’otx’ bix tuj cya’j, bix at mas tipemala cywitz cykilca, bix jawnex tey tibaj cykilca te junx maj. Ju’xit ttena,” tzi cybela oj cyna’na Dios.¹⁴ Ma che’x nxnak’tza’na ju’wa, cuma ka ma cub cynajsa’na cyil ke xjal o tz’oc cybincha’n ka’ cyi’ja, jax ju’x te Cymana Dios tuj cya’j cwel tnajsa’nxin cyey cyil.¹⁵ Pero ka min ma cub cynajsa’na cyil xjal, jax ju’x mi’n cub tnajsa’n Cymana Dios cyila.

T-xnak'atz Jesús ti'j oj ncub cypa'n xjal weyaj

¹⁶ Bix oj ncub cypa'na weyaj, mi'n txi' cyyeec'ana cywitzat tisen nchi bisena, tisenx nbint cyu'n xmeletz' xjal. Cyaj tu'n tchic'ajax ka ncub cypa'n weyaj, bix ju' tzunj min nxi' cybincha'n cywitz, tu'ntzen bis cyye'nc. Jaxxix cxe'l nkba'na cyey, mintii't t-xel cye, cuma o'cx t-xel cye ma tz'oc cyye'yen xjal ejee'. ¹⁷ Jatzen cyey, ka ma cub cypa'na weyaj, cyk'onwexa c'oc'sbil cywi'y bix cytxjomela cywitzat tisex cytena, ¹⁸ tu'ntzen mi'n txi' cyyeec'ana cye xjal ka ncub cypa'na weyaj. Nuk o'cx twitz Cymana Dios min chic'aj cwel cypa'na weyaj. Bix cuma tzin tcyey'en Dios cykilcaj nbint tuj ewjel, ctzaal tk'o'nxin t-xel cyey.

Jun kk'inemabl tuj cya'j
(Lc 12:32-34)

¹⁹ Mi'n nuk tz'oc cyipena ti'j tchmoj k'inemala twitz tx'otx'. Nuk o'cx c'oquex poc' tuj te xitlte, bix pjel acumax, bix chi oquex alak' cyjay te k'ilbetzte. ²⁰ Mas ba'n tu'n tbaj cychmo'na cyk'inemala te tuj cya'j, jaa' mlay tz'oc poc' tuj te xitlte bix mi'n baj acumax bix min-al alak' ba'n tocx ti'j. ²¹ Ka n-oc cyipena ti'j cyk'inemala te tuj cya'j, ja tzunj lu tzin tyee'c'an at jcyajbila tuya ti taj Dios, pero ka nuk o'cx n-oc cyipena ti'j cyk'inemala te twitz tx'otx', ja tzunja nyee'c'ante mintii' cyanema tuya Dios.

Ntzaj tk'o'n Dios knaabl tu'ntzen kten tuj spi'yen
(Lc 11:33-36)

²² Yaltzen te cynaabla, tisen tbak' cywitzat. Nchi ajben tbak' cywitzat tu'n cyye'yena. Ka ba'n tbak' cywitzat, ba'ntzen cyye'yena alcyej cchic'ajaxel tu'n tken luz. ²³ Pero ka yaa'n ba'n tbak' cywitzat, ete'y tuj klolj. Jaxse ju'x cynaabla. Ju' tzunj, ka tcy'i cynaabla tu'n cyela ba'n twitz Dios, tisen tuj nimxsen klolj ete'y.

Dios bix jun k'inemabl
(Lc 16:13)

²⁴ Mlay tz'ajben jun ak' anal te ca'ba patrón. Ka ma tjoy tu'n tajben te jun patrón, cyjeltzen tk'o'n juntl. Bix ka jatz ma tak'a tiib tuya tcab patrón, cyjeltzen tk'o'n jxin tneel. Ju'tzen tten tuya Dios bix k'inemal. Ka tuya cykil cyc'u'ja nche'x lpey ti' k'inemal, mintzentii' cyaja tu'n cyajbena te Dios.

Mi'n ko labt mi'n baj kc'u'j ti'j ti jilel tu'n kitz'j
(Lc 12:22-31)

²⁵ Cuma ma tzaj tk'o'n Dios cychunk'lala, ju' tzunj cxe'l nkba'na cyey, mi'n chi labta ti'j cyway bix cya'y tu'n cyitz'ja bix ti'j cyxbalena te cyxumlala. ¿Mimpa o tzaj tk'o'n Dios cychunk'lala ti'j mas nuk nchi waa'na? ¿Bix mimpa o tzaj tk'o'n Dios cyxumlala ti'j mas nuk n-oc cyxbalena? ²⁶ Cyye'yenc ke ch'it twitz cya'j. Min nchi awanjil, bix min nchi jtx'onjil, bix min nchi chmonjil twitz awal tuj cytx'utx'jil. Pero nchi itz'jil, cuma ntzaj tk'o'n Cymana Dios tuj cya'j cywajil. Yajzen cyey, ¿yaa'mpa mas jawnexkey cywitz ch'it? ²⁷ ¿C'ajbelpa oj nchi labta ti' jun tii'? Mi nuket jun k'ij ba'n txi' cyk'o'na te cychunk'lala tu'nj nchi labta ti'j. ²⁸ ¿Tikentzen nchi labta ti' cyxbalena? Cyye'yenc kej abech. Ntz'iy, amale mint nchi chkon bix min nchi t'zmon. ²⁹ Pero amale mint nchi labt ti'j cyxmaquel, pero cxe'l nkba'na cyey, mas cyeca cyye'nc twitz jawnex t-xbalen jrey Salomón. ³⁰ Ntzaj tk'o'n Dios cyxmaquel c'ul, amale nuket ca'ba oxo k'ij nten bix n-el tz'ak bix ncub patet. Yaltzen cyey, ¿yaa'mpa mas jawnexkey cywitz c'ul? Ejee'y yaa'n nimxix n-oc ke cyc'u'ja ti'j Dios. Ka ma tzaj tk'o'nxin cyxmaquel c'ul, jax ju'x ctzaal tk'o'nxin cyxbalena. ³¹ Ju' tzunj, mi'n chi labta ti'j ti tten tu'n cyitz'ja. Mi'n txi' cykba'na: “¿Ti cxe'l kwaa'na?” bix ka “¿Ti cxe'l kc'a'na?” bix ka “¿Jaa' ctzaal kxbalena?” ³² Mi'n chi tena tisen kej xjal yaa'n ttanem Dios, cuma nuk o'cx nchi labt ti'j cykilcaj lu. Mi'n chi labta, cuma ttzki'n Cymana Dios tuj cya'j najben cykilcaj lu cyey. ³³ Mas il ti'j tu'n t-xi' cyk'on cyiiba ti'j tajbil Dios bix tu'n cytena jiquen twitzxin. Ka ma che'x lpey ti'j jlu, cykilcatzen najben tu'n cyitz'ja cxe'l k'o'n cyey. ³⁴ Ju' tzunj, mi'n chi labta ti'j ti pjel nchi'j, cuma oj tpon nchi'j, otktzen pon tumel tu'n tiy'x jq'uixcaj te nchi'j cyu'na. O'cx tu'n tiy'x jn-oc cyi'ja ja'lewe—tzi Jesús.

7

Mi'n chi yolena ka' cyi' xjal
(Lc 6:37-38, 41-42)

¹ Bix e xi' tkba'ntl Jesús cye t-xnak'atz:
—Mi'n tz'oc cyye'yena ke xjal tu'n t-xi' cykba'na ka ka'ke xjal, tu'ntzen mi'n cub castiwa tu'n Dios cyibaja, ² cuma ka ma chi yolena cyi' xjal tuya cyiw yol, jax tzul tk'o'n Dios cyiw yol cyey. N-oc tcyey'en Dios la' ti cyey nxi' cyk'o'n cye xjal, bix ctk'a' t-xel cyey. ³ ¿Tikentzen nyoleney ti'j jun tuye' tocx jun ni' tz'is tuj tbak' twitz, pero min tz'el tni'ya ti'j tuj tey tbak'

twitz tocxe jun tzee'? ⁴ ¿Tikentzen nxi' tkba'na te tuyey: "Hermano, q'ueletz wii'na ni' tz'is tuj thak' twitza," tziy, pero jey', lu jun tzee' tocx tuj tuj twitza? ⁵ Jay at tpalta, pero nbint tu'na tisenca' mintii' tila. K'imetz jtey nejl jtzee' tocx tuj twitza, tu'ntzen ba'n tetz tii'na jte tuyey tocx tuj twitz.

⁶ Mi'n txi' cyk'o'na tyol Dios te cyej xjal min tz'oc tak' cye. Ka ma txi' cyk'o'na tyol Dios ju'wa, tisenzen nxi' cyk'o'na cye txay jnajben te Dios, bix ka tisen ma txi' cyk'o'na cyk'inemala cywitz boch. Nuk pjel cywa'ben boch tu'n cyken, bix chi aal meltz'ajjil tu'n cybaj tzakena cyu'njil.

Cxe'l kka'na te Dios tu'n tbint ba'n ku'n chi cobtl xjal
(Lc 11:9-13; 6:31)

⁷ Cykanenx te Dios tu'n ttzaj tk'o'n jnajben cyey, bix ctzaal k'o'n cyey. Cycubsanx cywitza te Dios, bix tzul thi'n. Bix cytco'ncx tlemel tjaxin, tu'ntzen tjket cywitza. ⁸ Jaca juun xjal nxi' tkanen te Dios, ctzaaltzen tk'o'n Dios te, bix jaca juun xjal ncubsan twitz te Dios ti' onbilte, ctiik'eltzen, bix jaca juun xjal n-oc cytco'n tlemel jaa', cjketel twitz. ⁹ Ka ma txi' tkanen tcwal jun xjal twa, ¿tapa jun mambaj cyxola cxe'l tk'o'n jun xak te tcwal? Min. ¹⁰ Bix ka ma txi' tkanen jun quis, ¿bajpa cxe'l tk'o'n tman te? Min. ¹¹ Mlay cybinchay ju'wa. Amale aj iletkey, pero jaj ba'n cxe'l cyk'o'na cye cywala. Yajtzen te Cymana tuj cya'j, ¿yaa' mpale masxsen jaj ba'n ctzaal tk'o'n cyey oj t-xi' cykanena? ¹² Ju' tzunj, ka cyaja tu'n tbint jun ba'n cyey cyu'n xjal, cybinchay jun ba'n cye, cuma ju' tzin tkba'n tley Moisés bix ju' e cykba tyolel Dios tuj tyol Dios.

Jun ch'in twitz ttzii' tcawbil Dios
(Lc 13:24)

¹³ Ch'in twitz ttzii' tcawbil Dios, pero cyk'o'nc cyipena ti'j tu'n cyocxa tuj, cuma nim twitz ttzii' jbe nxi' tii'n ke xjal tuj k'ak', bix te nim twe' ja be'we, bix nim xjal nchi ocx tuj, cuma yaa'n cyiw tu'n cyocx. ¹⁴ Pero ttzii' jbe nxi' tii'n ke xjal tu'n cypon tuj cychunk'lal tuya Dios, ch'in twitz, bix yaa'n nim xjal ncnet ja be lu cyu'n.

Tu'nj cybinchben q'uelel cyni'ya cyi'j
(Lc 6:43-44)

¹⁵ Cyc'ojlam cyiiba cye kej xnak'tzal tyol Dios xtak' chi lu cyuyey. Cyeeec'a cyiib tisenca' carnelle, pero xo'jke, bix cyaj tu'n cyxitja. ¹⁶ Tu'nj cybinchben q'uelel cyni'ya ti'j ti tten cyanem. ¿Jac'apa tz'el lo'pj te uva ti' jun skman ch'i'x, bix lo'pj te higo ti' jun tzee' at ch'utel? ¹⁷ Mlay. Jun tzee' ka' tzin tk'o'n twitz ka', bix jun tzee' ba'n tzin tk'o'n twitz ba'n. ¹⁸ Jun tzee' ba'n, mlay tak' twitz yaa'n ba'n. Bix jun tzee' yaa'n ba'n, mlay tak' twitz ba'n. ¹⁹ Jaca juun tzee', ka yaa'n ba'n twitz tzin tk'o'n, cjawel tx'omet bix c'oquex tuj k'ak'. ²⁰ Cxe'l nkba'na cye, q'uelel cyni'ya ti'j ka ba'n jun xjal bix ka yaa'n ba'n la' tii'n tbinchben.

Min ntzki'nkey
(Lc 13:25-27)

²¹ At nim xjal tzin cykba'n weya, "Kaaw, Kaaw." Pero yaa'n cykilcake chi oquex tuj cya'j. Nuk o'cx kej xjal tzin cybincha'n tajbil Nmana tuj cya'j chi oquex tuj tcawbilxin. ²² Tuj jk'ij tzul oj cyoc cykil xjal tuj xkela, nim xjal ctzaal tkba'n weya: "Taat, Taat, ¿mimpatzen e xi' kk'umena tyol Dios tu'n tipemal tey thi? ¿Bix mimpatzen el kii'na biman cyi' xjal tu'n tipemal tey thi? ¿Bix mimpatzen e kbinchaya nim ak'untl jawnex tuj taak'en Dios tu'n tipemal tey thi?" tzi cybel. ²³ Cxe'ltzen nkba'na cye: "Min ntzki'nkey. Cypa'mel cyiiba wi'ja, key binchal il," tzi nbela.

Tej tyole Jesús ti'j ca'ba tk'uklel jaa'
(Lc 6:46-49)

²⁴ Tu'n tpon baj twi' nyola, cxe'l nkba'na cyey jun techel. Jaca juun xjal tzin thi'n nyola bix nbint tu'n, ja tzunja tisen jun xjal at tnaabl e jaw tbinch'a'n tja twi' xak cyiw. ²⁵ Bix e cub nintzaj jbal, bix e jaw noj nima', bix e tzaj nim cyk'i'k, bix oc punntz'aj a' tuyax cyk'i'k ti' jaa'. Pero min iy' tz'ak jaa', cuma ba'nxix e cub k'ukbet twi' xak. ²⁶ Pero jaca juun xjal tzin thi'n nyola pero min tniman, ja tzunja tisen jun xjal mintii' tnaabl e jaw tbinch'a'n tja tuj ttxa tz'a'n. ²⁷ Bix e cub nintzaj jbal, bix e jaw noj nima', bix e tzaj nim cyk'i'k, bix oc punntz'aj a' tuyax cyk'i'k ti' jaa', bix iy' tz'ak jaa', bi'x e cub xitj cykilca—tzi Jesús cye t-xnak'atz.

²⁸ Tejten thaj yolen Jesús, cykilca xjal e jaw klee' ti'j t-xnak'tzibilxin, ²⁹ cuma e xnak'tzanxin tisen jun xjal tuya tipemal, yaa'n tisenj cyej xin tx'olbal ley.

¹ Tejzten tcu'tz Jesús twi' witz, nimxsen xjal oc lpe ti'jxin. ² Bix ul junxin xjal yaab. Otk tzej k'ey t-xumlalxin tu'nj yabel lepra. Bix e cub majexin twitz Jesús, bix e xi' tkba'nxin:

—Taat, ka taja, at tey tipemal tu'n tel tii'na jyabela wi'j—tízixin.

³ Bix e xi' tnukpa Jesús tk'ab tibaj yaab, bix oc tmoco'nxin, bix e xi' tkba'nxin:

—Wajwe. Cyajtey ba'n—tízixin.

Bix tujx naj t-xi' tk'umenxin, tzin ncyajtl jxin xjal ba'n.

⁴ Bix e xi' tkba'n Jesús texin:

—Mi'n txi' tkba'na cye xjal ti ma baj ti'ja, sino cutxena tey, bix yeec'anx tiiba twitzj xin pala tu'n tel tniy' ti'j ka ma tzul tnaabla. Bix k'oncx jtoybila texin tisen o tkba Moisés, tu'ntzen t-xi' tkba'n pala cywitz xjal ya ma cyaja ba'ntla—tízixin.

*Tej tk'anj t-ak'anal capitán tu'n Jesús
(Lc 7:1-10)*

⁵ Bix e xi' Jesús tuj tnom te Capernaum, bix tej tocxxin tuj tnom, e pon twitz Jesús junxin capitán cye soldado te Roma. Bix e cubsanxin twitz te Jesús:

⁶—Taat, at jun wak'anala nim tajbel weya, pero ma yeht. Attzen njaya, bix min yucchtl t-xumlal. Nimxsen nchyon te—tízixin.

⁷ Bix e xi' tkba'n Jesús texin:

—Chin xe'la te k'anlte—tízixin.

⁸ Pero e xi' ttzak'be'n capitán te Jesús:

—Taat, mintii' wajbela twitza. Ju' tzunj, yaa'n tumel tu'n tocxa tuj njaya. Bix yaa'n il ti'j tu'n tula njaya tu'n tk'anj wak'anala. Nuk kbantza jjol, bix cyjel wak'anala ba'n. ⁹ N-el nni'ya ti'j o'cx tu'n tyola ba'n tbint tajbila, cuma jax ju'x weya o k'oj woelena te cawel. At nim soldado tjak' ncawbila. Ka ma txi' nkba'na te jun soldado, “Cutxey,” ka ntziya, il ti'j cxe'l. Bix ka ma txi' nkba'na te juntl soldado, “Cyixtey,” ka ntziya, jax il ti'j c'ulel. Jax ju'x ka ma txi' nkba'na te jun wak'anala, “Bincham jlu,” ka ntziya, jax il ti'j cbinel tu'n—tízixin.

¹⁰ Tejzten tbinte Jesús tyol capitán, e jaw klee'xin ti' capitán, bix e xi' tkba'nxin cyej xjal lephec ti'jxin:

—Jaxxix cxe'l nkba'na cyey, bajxsen wila jun aj Israel n-oc ke tc'u'j wi'ja tisen ja capitán lu yaa'n te Israel pero ma tz'oc ke tc'u'j wi'ja. ¹¹ Bix cxe'l nkba'na cyey, cyxolj xjal chi temel cyxol tnanem Dios tuj tcawbil, at xjal te cykilca twitz tx'otx'. At te ocne bix at te elne, bix chi cwel ke ti' mes ttxlaj Abraham tuya Isaac bix tuya Jacob. ¹² Pero kej xjal te Israel, amale tnanemet Dios ejee' tuj cywitz, pero chi xe'l xoo'n tuj k'olj te junx maj, jatztzen chi jawel ok', bix jatztzen cjawele kitx'itx'in t-xee' twitz cye—tzi Jesús.

¹³ Bix e xi' tkba'n Jesús te capitán:

—Cu txiy. Cbinel tey tisenj ma tocslay—tízixin.

Bix jaxj hora e k'anj t-ak'analxin.

*Tej tk'a'na Jesús ti'j jxuj tjii' Pedro
(Mr 1:29-34; Lc 4:38-41)*

¹⁴ Bix e xi' Jesús tja Pedro. Tej tponxin, e xi' tcyey'nenxin otk yeht jxuj tjii' Pedro tu'n cyak. Tjaxxuj twi' wetbil. ¹⁵ Bix oc tmoco'nxin tk'abxuj, bix e chewex cyak tuj t-xumlalxuj. Bix e jaw we'tlxuj, bix ak'xuj k'olxte waabj texin.

¹⁶ Tejzten tcu'x k'ij, e pon cyii'n xjal nim xjal otk tz'oc licy'paj biman cyi'j, bix el tlojo'nxin biman cyi' xjal nuk tu'nj tyolxin. Bix oc tk'a'nenxin cykilca xjal yaab e pon. ¹⁷ Ju'tzen tten el jaxxix jtyol Dios e tz'i'bet tu'n Isaías nbyan cyjulu: “Jaj xin Scy'o'n tu'n Dios q'uelel k'inte kyabel, bix q'uelel tii'nxin q'uix'aj ki'j,” tzi tyolel Dios Isaías.

*Kej cyajbe tu'n cyoc lpe ti'j Jesús
(Lc 9:57-62)*

¹⁸ Tejzten tlonte Jesús nimxsen tajlal xjal oc chmet ti'jxin, e xi' tkba'nxin cye t-xnak'atzxin tu'n cyiy'x jlajxe tnijabel a'. ¹⁹ Pero attzen junxin tx'olbal ley e xi' tkba'nxin te Jesús:

—Xnak'tzal, chin xe'la tuyená nuk jaa'xja tu'n t-xi'y—tzi xjal.

²⁰ Pero e xi' tkba'n Jesús texin:

—Kej xiwel at cyja t-xol xak bix kej ch'it at cyk'u'sem, pero jatzten tey, ka taja tz'oc lpey wi'ja, ilxix ti'j q'uelel tni'ya ti'j mintii' njaya bix nchin wutana te koniyan jaa' nchin poniya, inayena, ja Sma'n tu'n Dios tu'n ntena cyuya xjal—tzi Jesús.

²¹ Cyxol xjal chmo'n ti'j Jesús at juntl xjal e tajbe tu'n toc lpe ti'j Jesús. Pero e xi' tkba'nxin te Jesús:

—Taat, najsama, waja nejl cwelex nmaku'na nmana—tízixin.

²² Pero e xi' tkba'n Jesús texin:

—Lpe'c'a wi'ja, bix k'oncja tu'n tcu'x cymaku'n cyimne cycyimne—tzi Jesús.

Tej twe' cyk'i'k tu'n Jesús

(Mr 4:35-41; Lc 8:22-25)

²³ Tejtzen tocx Jesús tuj barc, jax ju'x ocx ke t-xnak'atzxin tuj barc tuyaxin. ²⁴ Bix jey', e cub pok'ch naj jun nintzaj jbal bix cyk'i'k tibaj a'. Nimxsen oc punntz'aj a' tu'n cyk'i'k ti' barc, bix e noj barc tu'n a'. Pero te Jesús, nwtanxin. ²⁵ Bix ul lk'e ke t-xnak'atzxin ttxlajxin, bix oc cyc'asenxin jaxin, bix e xi' cykba'nxin texin:

—Taat, jko tcla'y, cuma at tu'n kcyima!

²⁶ Bix e xi' tkba'nxin cyexin:

—¿Tikentzen cutzexsen ttzi cyi'ja? ¿Tiken min s-oc ke cyc'u'ja wi'ja?—tžixin. Bix e jaw we'xin, bix e xi' tkba'nxin te cyk'i'k bix te tnijabel a' tu'n cywe'. Bi'x tzinenxsen e cyja'.

²⁷ Bix e jaw we' ke t-xnak'atzxin, bix e xi' cykba'nxin:

—¿Altzen loj jxjal lu? Hasta cyk'i'k bix a' ma tz'oc tilenxin, bix ma cybi—tžikexin.

Ca'ba xinak aj Gadara otk tz'oc biman cyi'j

(Mr 5:1-20; Lc 8:26-39)

²⁸ Tejtzen cyiy'x bajkexin juntl jlay tnijabel a' tuj tnom te Gadara, etz ca'ba xinak tuj camposant bix oc nojkexin twitz Jesús. Otk chi oc nimxsen biman cyi'jxin, bix tu'n cypemal biman, e k'ojlkexin ti' cykilca. Ju' tzunj, tu'n ttzi cyi'j aj Gadara, min e betke tuj be tcub ttzi camposant. ²⁹ Tej toc cycye'yenxin Jesús, e jawxsen cyši'nxin, bix e xi' cykba'nxin:

—¿Ti jilel tbinchaya ki'ja, jay Tcwal Dios? ¿Mapa tzula tu'n t'bj tyajla'na ejoo'ja te mina'x tpon tumel tu'n kxi'ya tuj q'uixc'aj?—tž ke biman.

³⁰ Nakchtzen ch'in ete' nimjil boch nchi waa'n. ³¹ Bix ak' ke biman cubsal cywitz twitz Jesús:

—Ka ma tz'ex tlojo'na ejoo'ya cyuj xjal lu, ko ttzakpi'cxa cyxol jil boch luwe—tž ke biman.

³² Bix e xi' tkba'nxin cyexin:

—Cyucxey.

Bix el ke biman cyi'j xin xjal, bixsen ocxke tuj cyxumlal boch. Bix jey', e xi' ajkelkejil tc'u'j witz tuj tnijabel a', bix e jaw jik'bekejil.

³³ Yal tzunkej xjal cylel boch, bix e xi' okke tuj tnom. Bix e xi' cyk'umen cykilca otk baj, bix ti e baj cyej xjal otk chi el biman cyi'j. ³⁴ Bix cykilca xjal tuj tnom etz te cyey'lte Jesús, bix tej t-xi' cycye'yen jaxin, ak'kexin cubsal cywitzxin te Jesús tu'n tiy'xin tuj cytanemxin.

9

E k'anj jun xjal tu'n Jesús min yucchtl t-xumlal

(Mr 2:1-12; Lc 5:17-26)

¹ Bix ocx Jesús tuj barc, bix iy'x jlajxe tnijabel a', bix e ponxin tuj jtnom jaa' e najanxin.

² Tejtzen tponxin tuj ttanemxin te Capernaum, ul jun cloj xjal iken jun yaab twi' jun wetbil. Mintii' tanem t-xumlal. Tej tzunj toc tcye'yenxin k'uklec cyc'u'j xjal ti'jxin, e xi' tkba'nxin tej xin yaab:

—Ncwal, nimsam tc'u'ja. Ma najset tila—tžixin.

³ Tejtzen cybinte ke tx'olbal ley ja yol ka otk najset til yaab tu'n Jesús, ak'kexin yolel cyxolxxin:

—Ja xjal lu n-oc tk'on tiib te Dios. Ncub t-xniy'be'nxin ka Diosxin—tžikexin.

⁴ Pero el tniy' Jesús ti'j jka' iy' tuj cyc'u'jxin, bix e xi' tkanenxin:

—¿Tikentzen nxi' cyximana tuj cyanema ka' kena bix mlay bint wu'na tu'n tnajset cyil xjal? ⁵ Tuj cywitza, ¿alcyey yol mas secy tyol jilj tu'n t-xi' nkba'na tej yaaba, japaj “Ma najset tila.” bix ma jaj “We'wetzen tey bix cutzetzen t'jay”? ⁶ Te weya, junx ta'. Tu'n tel cyni'ya ti'j at wipemala tu'n tcub nnajsa'na cyil xjal, cwel nk'anena ja yaab lu—tž Jesús cye tx'olbal ley.

Bix e xi' tkba'nxin te yaab:

—We'wetzen tey, k'inx twetbila, bix cutzetzen t'jay—tžixin.

⁷ Bix e jaw we' yaab, bix e jaw tii'n twetbil, bix aj tja. ⁸ Yaltzen kej xjal otk chi chmet ti'jxin, tej cylonte ti e baj, nimxsen e jaw klee'ke, bix e jaw cynimsa'n tbi Dios, cuma otk tzaj tk'o'nxin tipemalxin te jun xjal tu'n t'btint jlu tu'n.

Tej ttzaj txquet Mateo tu'n Jesús

(Mr 2:13-17; Lc 5:27-32)

⁹ T'bjalenzittzen ju'wa, bix e xi' t'beten Jesús juntl tkiy'. Bix tej texxin twitz jun jaa' jaa' ete'c'a kej xin chmol chojentj, e xi' tcye'yenxin tunwen k'uklec jxin Mateo. Bix e xi' tkba'nxin te Mateo:

—Lpetz tey wi'ja, tu'ntzen toca te nrxnak'atza.

Bix e jaw we' Mateo, bix oc lpe ti'jxin.

¹⁰ Mas yaj, tej tcub ke Jesús cyuya t-xnak'atz lepch ti'jxin ti' mes tuj tja Mateo, jax nim chmol alcabala bix nim xjal yaa'n ba'n tuj cywitz aj fariseo e pon te waa' cyuyaxin. ¹¹ Tej toc cycye'yen fariseo nwa'a'ncx Jesús cyuya kej xjal yuwin tuj cywitz fariseo, e xi' cykanenxin cye t-xnak'atzxin:

—¿Tikentzen nwa'a'ncx jxin xnak'tzal cyey cyuyaj chmol alcabala bix tuya mastl aj il?—
tžikexin.

¹² Pero e tbi Jesús ja yol lu, bix e xi' tkba'nxin cye fariseo:

—Kej xjal ba'n min che'xcye tuya k'anel. Nuk o'cx kej xjal yaab nche'x tuya k'anel. ¹³ At jun tyol Dios tzin tkba'n cyjulu: “Waja tu'n toc k'ak'en cyc'u'ja cyi' xjal, yaa'n nuk o'cx cyoybila,” tzi Dios tuj tyol. K'o'nc cyipena ti'j tu'n tel cyni'ya ti'j ti japenina ja yol lu, cuma min ma chin ul weya te txcolte cyej xjal minti' cyil tuj cywitz, sino te cyej xjal aj il tuj cywitz tu'n cymeltz'aj—tžixin cye fariseo.

Jun kanbil ti'j epaj weyaj

(Mr 2:18-22; Lc 5:33-39)

¹⁴ Yajc'atl, bix e pon tuya Jesús cab xjal lepchech ti'j Juan Bautista, bix e xi' cykba'nxin texin: —Ncub kpa'na weyaj bix ncub cypa'n aj fariseo weyaj. Pero kej tey t-xnak'atza, ¿tikentzen min ncub cypa'n weyaj?—tžikexin.

¹⁵ Bix aj ttzak'be'n Jesús:

—Oj nchi pon xjal ti' mejoblenel, ¿cwel'pa cypa'n weyaj? Min, cuma tumel tu'n cyiy'san xjal tuya chmilbaj. Ju'tzen cye nxnak'atza. Tisen nchi tzalaj ke xjal tuya chmilbaj, ju'xse nchi tzalaj ke nxnak'atza wuyena, cuma ntiina cyuya. Mas yaj, oj wel k'i'na cyi'j, chi cyjeltzen tuj bis, bix cweltzele cypa'n weyaj. ¹⁶ Min-al jun xjal jac'a jat'z tii'n jun tkiy' remyent ti' jun ac'aj xbalen tu'n tcu'x te remyent ti' jun xbalen k'anak, cuma mas q'uelex rotj k'anak tu'n ac'aj oj toc yut'paj. ¹⁷ Jax min-al jun xjal cwel tk'o'n vino ac'aj tuj jun tz'u'n k'anak, cuma ka ma cub tk'o'n ju'wa, q'uelex rotj tz'u'n tu'n vino oj tel ipc'aj, bix q'uelex koj' vino, bix cxe'l tz'u'n tuj il. Cwel cyk'eysa'n xjal ac'aj vino tuj ac'aj tz'u'n, tu'ntzen mi'n tz'ex rotj tz'u'n, bix tu'n mi'n tz'el koj' vino. Jaxse ju'x weya nxnak'tzabila. Ac'aj nxnak'tzabila, bix mlay tz'ocx k'anak nxnak'tzabil te ootxa tuj—tži Jesús.

Tej tjatz itz'j jun txin tuj cyamecy tu'n tyol Jesús

(Mr 5:21-43; Lc 8:40-56)

¹⁸ Mitkna'x tbaj yolen Jesús tej tpon twitz junxin xjal cawel cyxolj xjal e chmet tuj camon jaa' xnak'tzibil tyol Dios. E cub mejtz'ajxin twitz Jesús, bix e xi' tkba'nxin te:

—Ja'lecuwe xcyim nmeela. Najsama, quixta wuyena bix k'a'ca tk'aba tibajtxin tu'n titz'jtłtxin—tžixin.

¹⁹ Bix e tcuya Jesús bix oc lpe ti'j cawel cyuya t-xnak'atzxin. ²⁰ Pero jey', at junxuj xuuj e pon lk'e tzalti'jxin, bix oc tmoco'nxuj ttxa'n t-xbalenxin. Otk bint cablaaj jnabk'i tak'lenxuj tu'n cyak a' ti'jxuj. ²¹ Bix iy' tuj tc'u'jxuj:

—Nuketle oj toc nmoco'na t-xbalenxin, ya tzultzen nnaabla—tži tzunxuj.

²² Pero aj meltz'aj Jesús, bix e xi' tcye'yenxin jaxuj, bix e xi' tkba'nxin texuj:

—Tey xuuj, nimsam tc'u'ja. Tu'nj s-oc ke tc'u'ja wi'ja, ma tzul tnaabla—tži tzunxin. Bix texsen hora e we'tl tyabelxuj.

²³ Tejtzen toc Jesús tuj tja cawel tuj camon jaa', bix tej t-xi' tcye'yenxin n-oc xux cyu'n xjal bix nim ook'el nbaj, ²⁴ e xi' tkba'nxin cye xjal:

—Cyexa, cuma min ma cyim tej txin cwala. Nuk nwtantxin—tžixin.

Bix e jaw tze'n ke xjal ti'jxin, cuma el cyni'j ti'j otk cyimtxin. ²⁵ Pero tej cyetz lojo'n xjal pe'n, ocxxin tuj cwart jaa' tocxe nee', bix e tzaj tzyu'nxin tk'abtchin, bix e jaw twa'bxin jatxin. ²⁶ Bix eltzen tpochal jlu tuj cykil lugar.

Tej tk'anj tbak' cywitz ca'ba moš

²⁷ Tejtzen tex Jesús tuj ja jaa' lu, oc lpe ca'ba xjal moš ti'jxin. Bix e jaw ši'nke:

—jJay tiy'jil jrey David, k'ak'entz tc'u'ja ki'ja!

²⁸ Bix ocx Jesús tuj jun jaa', bix oc lpekexin tuyaxin tunwen. Bix e xi' tkba'nxin cyexin:

—¿Mapa tz'oc ke cyc'u'ja wi'ja ka ba'n wu'na tu'n tcub nk'anena eje'e'y?

Bix aj cytzak'be'nxin:

—Ma tz'oc ke kc'u'ja ti'ja, Taat.

²⁹ Octzen tmoco'nxin tbak' cywitzxin, bix e xi' tkba'nxin:

—Chi k'anxita tu'nj n-oc ke cyc'u'ja wi'ja—tži Jesús.

³⁰ Bix ul tnaabl tbak' cywitzxin. Bix tuya cyiw yol e xi' tkba'nxin cyexin:

—Ten cycwenta ti'j tu'n mi'n cybi xjal ti ma baj cyi'ja—tžixin.

³¹ Pero tej cyexxin tuj jaa', el cyk'umenxin tuj cykil lugar tpochal ti otk bint tu'n Jesús cyi'jxin.

Tej bintl tyolen men tu'n Jesús

³² Matkxsen cyexlen ca'ba moš, tpon k'i'n jun xjal men twitz Jesús. Min bintl tyolen tu'nj biman otk tz'oc ti'j. ³³ Tej tel tlojo'n Jesús biman ti' xjal men, nbintlzten tyolen xinak. Bix e jawxsen klee' cykilca xjal ti'j, bix e xi' cykba'n:

—Bajxsen tz'oca kcyeyen jun maj tisenj lu kxol aj Israel—tzikexin.

³⁴ Pero ejee'tzen kej xjal fariseo e xi' cykba'n:

—Tipemal jxjal luwe tu'n tel tlojo'n biman yaa'n te Dios, sino o k'oj te tu'n cawel cye biman—tzi ke fariseo.

Nimxsen twitz awal

³⁵ E baj thete Jesús tuj cykilca tnom bix aldea, bix e xi' tk'o'nxin t-xnak'tzibil cyuj camon jaa' bix e xi' tk'umenxin jtbanel tpochal tcawbil Dios. Bix jaa'xja e ponaxin, e cub tk'anexin cykilca wik cyyabel xjal bix nuk alcyexja q'uixc'aj toc cyi'j. ³⁶ Tuj cykilcugar, tej toc tcyeyenxin ke xjal, oc k'a'ben tc'u'jxin cyi'j, cuma cyiw ta' cychunk'lal bix mintii' onbil cye, tisen jun cloj carnal min-al cyel cye. ³⁷ Bix e xi' tkba'nxin cye t-xnak'atzxin:

—Jtaak'en Dios cyi' xjal tisen jun jaatx'en. Nimxsen jaatx'en, pero yaa'n nimxix ak'anal at te chmolte. ³⁸ Ju' tzunj, cykanenx te Taaw ak'untl tu'n t-xi' tsm'a'nxin ak'anal te chmolte twitz awal—tzi Jesús.

10*Tej tjaw jyet cablaaj t-xnak'atz Jesús*

(Mr 3:13-19; Lc 6:12-26)

¹ Bix e cub tchmo'n Jesús kej cablaaj t-xnak'atz, bix e xi' tk'o'nxin tipemalxin cye tu'n tel cylojo'n biman cyi' xjal bix tu'n cyk'anexin ti' cykilca wik cyyabel xjal. ² Ejee'tzen xinj e tsicy' Jesús te t-xel, ejee'j xin lu: Tneel, ja Simón, jxjal oc tbi te Pedro tu'n Jesús, bix tuyax Andrés, titz'en Simón, tuya Jacobo, tcwal jxin Zebedeo, tuya Juan, titz'en Jacobo, ³ tuya Felipe, tuya Bartolomé, tuya Tomás, tuya Mateo, jxin chmol alcabala, tuya Jacobo, tcwal jxin Alfeo, tuya Tadeo, ⁴ tuya Simón, jxjal tocx te jun cloj Cananeo tbi, tuya Judas Iscariote, jxjal e xi' tq'ueyen Jesús mas yaj.

Taak'en cablaaj t-xnak'atz Jesús

(Mr 6:7-13; Lc 9:1-6)

⁵ Ejee' tzunj cablaaj xjal e xi' tchk'o'n Jesús te binchalte taak'en. Pero tneelxix, e xi' tkba'nxin cyexin:

—Mi'n che'xa cyxol kej xjal yaa'n judío, bix mi'n chi ocxa tuj cytanem aj Samaria. ⁶ Nuk o'cx chi xe'la cyxol kej aj Israel o chi tzpet. ⁷ Ojzten cyxi'y, cyk'umenx cye xjal cyjulu: "Tzul lk'e tcawbil Dios tzul tuj cya'j," tzi cybela. ⁸ Cyk'anenx kej xjal yaab. Chi jawetz cyitz'jsa'na kej xjal cyimne tuj cyamecy. Cyk'anenx kej xjal ma tz'el k'e'y cyk'ab bix cyken tu'nj yabel lepra. Q'uelel cylojo'na biman cyi'j xjal ma chi oc biman cyi'j. Bix mi'n chi kanena pwak cye xjal oj tcub cyk'anena, cuma nuk cotz jwipemala ma cyiik'a. ⁹ Mi'n txi' cyii'na pwak, mi nuket oro bix ka plata bix ka cobre tu'n cyitz'ja. ¹⁰ Bix mi'n txi' cyii'na cypay tuj be, mi nuket cych'ixpubla cyi'ja, mi nuket juntl moj cyxaaba, mi nuket juntl cybardona te tcab, cuma il ti'j tu'n tk'oj twa jun t-ak'anal Dios. ¹¹ Oj cyocxa tuj jun tnom bix ka tuj jun aldea, cykanenx cye xjal ka at jun xjal at tajbil tu'n tk'on posada cye t-ak'anal Dios, bix chi cyjela tuya ojxe cyi'ya tuj ja tnom. ¹² Oj cyocxa tuj jaa' jaa' tumel chi wutala, nejl cxe'l cyk'o'na jun k'olbebl te cykilca xjal tuj jaa'. ¹³ Ka ma tiik' taaw jaa' ejee'y tuya cykilc' u'j, tzajxit cyk'o'na cyxtalbila te. Pero ka tcy'i' ejee'y, mi'n txi' cyk'o'na cyxtalbila te. ¹⁴ Ka at xjal ccyi' ejee'y bix ka ma tz'el cyxoo'n cyyola, oj cyi'ya tuj cyja bix ka tuj cytanem, cytz'ontcjtzen kuk ti' cyxaaba cywitzt, te yec'bil min chi k'umentla tyol Dios cyxol. ¹⁵ Jaxxix cxe'l nkba'na cyeey, tuj jk'ij te castiwa tzul, mas castiwa tzul tk'o'n Dios cyej tnom n-el cyiiq'uen tk'umj tyolxlin twitzj e cub tk'o'nxin cyibaj ka' tnom te Sodoma tuyax tnom te Gomorra jatxe ootxa.

Tzul q'uixc'aj cyi' ocslal

¹⁶ Q'uelelzen cyni'ya ti'j ejee'y nuk cyisen tal carnal bix chi xe'l nsma'na cyxolj xjal cyisen xo'j. Ju' tzunj, chi tena xbi'l tisen lbaj, pero jax chi tena tisen cucu'. Mi'n cybinchay ka' cyi' xjal. ¹⁷ Cyc'ojlamxix cyiiba cye xjal, cuma chi xe'l k'o'na cywitzt juez nuk wi'jc'a, bix cxe'l cyk'o'na tz'u'n cyi'ja cyuj cycamon jaa'. ¹⁸ Hasta cywitzt gobernador bix cywitzt rey chi xe'l chk'eta nuk wi'jc'a, tu'ntzen tk'umj nbi'ya cyexin bix cyej xjal yaa'n judío. ¹⁹ Pero oj cytz'yeta, mi'n chi labta ti'j ti tten tu'n cyclon cyiiba bix ti'j alcyey yol tu'n t-xi' cykba'na cywitzt cawel, cuma oj tpon tumel, chi xe'l onet cyeey ti' cyyola. ²⁰ Yaa'n ti' cywi'y ctzaala cyyola, sino ja te Espiritu Santo k'o'n cyeey tu'n Cymana Dios cxe'l k'onte cyyola.

²¹ Tzul jun k'ij at xjal cyitz'en cyiib bix jun cxe'l q'ueyente juntl tuj cyk'ab cawel tu'n cybyet, bix jax cxe'l cyq'ueyen cyman ke cycwal tu'n cybyet. Bix ke cwal chi oquel k'ojl cyi'

cyman, bix chi oquel cyipen ti'j tu'n cybyet cyman. ²² Cykilca xjal q'uelel cyiiq'uen ejee'y tu'nj cyk'on cyiiba wuyena. Pero alj xjal mi'n cyaj tcyey'en inayena, amale n-oquet cyiw q'uixc'aj ti'j, cleteltzen tu'n Dios.

²³ Ka ma chi yajlaja tuj jun tnóm, cyii' oka tuj juntl tnóm. Pero jaxxix cxe'l nkba'na cyey, mitkna'x t-xi' cyk'umena tyol Dios tuj cykilca tnóm te Israel oj wul meltz'aja, inayena, jxjal Sma'n tu'n Dios tu'n ntena cyuya xjal.

²⁴ Yaa'n ejee'y mas jawnex nwitzta, tisen jun xjal nxnak'tzan yaa'n mas jawnex twitz tmaystro, bix jun ak'anal yaa'n mas jawnex twitz tpatrón. ²⁵ Jnbaj ti' jun maystro, jax nbaj ti' t-xnak'atz. Bix jnbaj ti' jun patrón, jax nbaj ti' t-ak'anal. Ju' tzunj, jcbinel wi'ja cyu'n xjal, jax cbinel cyi'ja. Ma tz'oc cyk'o'n xjal nbi'ya te Cyaaw biman. Katzen ju' ma cykba xjal wi'ja, jaxse ju'x c'oquel cyyasen xjal ejee'y.

*Mas il ti'j tu'n ttzaj ttzi Dios ki'j twitzj tu'n ttzaj cytzi ki'j kej xjal cyq'ui Dios
(Lc 12:2-9)*

²⁶ Ju' tzunj, tu'n cyajbena weya, mi'n tzaj cytzi kej yasel xjal cyi'ja. Jjaxxix yol e'wen ja'lewe, ilxsen ti'j tu'n tk'umj. ²⁷ Jnxi' nkba'na cyey oj nko tena kjunal, q'uelex cypocha'na tuj cykil lugar. Bix jnxi' njasena cyey ja'lewe tuj ewjel, cyk'umenx te cykil xjal. ²⁸ Mi'n tzaj cytzi cyi'ja kej xjal pjel cybyo'n cyxumlala. O'cx jlu cbinel cyu'n, pero mintii' cypemal tu'n tcub cyanema cyu'n. Mas il ti'j tu'n ttzaj ttzi Dios cyi'ja, jaj xjal at tipemal tu'n tcu'x tk'o'n cyxumlala tuyax cyanema tuj k'ak' te junx maj. ²⁹ Ncyeyen Dios cykilcaj nbaj cyi'ja. C'oquel cye'ja cyi'j tal ch'it. ¿Mimpatii' nq'ueyj ca'ba tu'n nuk jun centavo? Pero amale yaa'nt nim cywi', mi nuk jun cwel tz'ak twitz tx'otx' bix mint n-oc tcyey'en Dios. ³⁰ Yajtzen cyey, ¿chi elelpey tuj tc'u'j Dios? Min. Hasta ttzmal cywi'y ttzki'n Dios jte'. ³¹ Ju' tzunj, mi'n tzaj ttzi jcbinel cyi'ja, cuma at mas cyajbela cywitz nim ch'it.

³² Kej xjal tzin cykba'n cywitz xjal ka lepchecke wi'ja, cxe'l'tzen nk'umena twitz Nmana tuj cya'j ka ejee'tzen nxjalja. ³³ Pero kej xjal ccyey'i cykba cywitz xjal ka lepchecke wi'ja, cxe'l'tzen nkba'na twitz Nmana tuj cya'j ka yaa'n ejee'ja weya.

*Tej tyole Jesús ti'j tpabl kiib
(Lc 12:49-53; 14:26-27)*

³⁴ Mi'n cub cybisena in ula twitz tx'otx' tu'n twe' cykil k'oj wu'na. Yaa'n ju'wa, sino in ula k'ol k'oj cyxol xjal. ³⁵ In ula k'ol k'oj jk'a cwal tuya tmank'a, bix jtxin cwal tuya ttxutxin, bix jtxin elibj tuya tliibtxin. ³⁶ Kej tuj tja jun xjal, chi oqueltzen te aj k'oj ti'j.

³⁷ Alcyey xjal taj tz'oc lpe wi'ja, pero mas n-oc tak' tman bix ka ttxu te nwitzta, mlay tz'oc te nxnak'atza. Bix alcyey xjal mas n-oc tak' tcy'aal te bix ka tmeel, mlay tz'oc te nxnak'atza. ³⁸ Bix alcyey xjal yaa'n binne tten tu'n tiy'x q'uixc'aj bix ch'ixbajil tu'n tu'n toc lpe wi'ja, mlay tz'oc te nxnak'atza. ³⁹ Ja tzunj xjal tcy'i tz'oc lpe wi'ja cuma at cytzi kej xjal ti'j cyaj tu'n tcub, cxe'l t-xoo'n tchunk'lal. Pero ja tzunj xjal cyjel tk'o'n tchunk'lal te twitz tx'otx' tu'nj lepchech wi'ja, ctcamantzen tchunk'lal te junx maj.

*Chojbil
(Mr 9:41)*

⁴⁰ Chi xe'la te nxela, bix alcyey xjal c'oquel thi'n cyyola, jax n-oc thi'n jweya. Bix alcyey xjal c'ocslal wi'ja, jax n-ocslan ti'j Dios e tzaj tasma'n inayena. ⁴¹ Alcyey xjal ctk'a' posada cyey cuma jaxxix tyolel Dioskey tuj twitz, ctzaaltzen k'o'n te jaxj cotz ntzaj k'o'n cye tyolel Dios. Bix alcyey xjal ctk'a' tk'olbebl cyey cuma jiquenkey tuj twitz, ctzaaltzen k'o'n te jaxj cotz ntzaj k'o'n cyej xjal jiquen. ⁴² Bix alcyey jun xjal ctzaal onente cyey cuma nxnak'atzkey tuj twitz, amale nuket jun vas a' tzaj tk'o'n te cyey, bix ka ma tzaj tk'o'n te jun mas ch'in cyxola, il ti'j ctzaal k'o'n tcotz—tzi Jesús cye t-xnak'atz.

11

*Kej tsanjel Juan Bautista
(Lc 7:18-35)*

¹ Tej'tzen t'bj tkba'n Jesús ja xnak'tzibil lu cyey cablaaj t-xnak'atzxin, iy'tzen tuj ja lugar lu bix e xi'xin xnak'tzal cyuj cytanem judio.

² Yaltzen te Juan Bautista tocx tuj tzee', tej t'binde cykilcaj e bint tu'n Cristo, e xi' tasma'nxin ca'ba xjal lepchech ti'j t-xnak'tzibilxin, tu'n cypon tuya Cristo. ³ Bix e xi' cykanenxin te Jesús: —¿Japa tey Jscy'o'n tu'n Dios tu'n tul te cawel, bix ka at juntl ko ayola ti'j tu'n tul? —tzikexin.

⁴ Bix aj ttzak'be'n Jesús cyexin:

—Cyucxey tuya Juan bix cykbanx texin jaj ma cybiy bix jaj ma cyila nbint wu'na. ⁵ Kej moš ya lutlke nchi cye'yena. Kej cox ya lutlke nchi bete. Kej xjal ma k'ey cyk'ab bix cyken tu'nj yabel lepra, ma k'anj. Kej chquint ya niy'xtl tuj cywi'. Kej cyimne ma chi jaw itz'j juntl

maj. Bix kej mebe lu n-oc cybi'n ba'n tpočbal colbil cye. ⁶ Cyk'umenx te Juan ctzaal tk'o'n Dios t-xtalbil cyej xjal min baj cye' u'j wi'ja, bix min cyaj cyk'o'n tu'n cyxi' lpe wi'ja—tzi Jesús cyexin.

⁷ Tej cyex tsanjel Juan, ak'tzen Jesús yolel cye xjal, bix nim ba'n yol e xi' tkba'nxin ti' Juan. E xi' tkba'nxin:

—Tej cyxi'y te cyeylecte Juan ttzii' nima' Jordán, ¿e pompakey cuma e cyajbey tu'n toc cybi'na jun xjal yaa'n cyiw tnaabl, tisen jun ptz'unt nbaj lajpaj tu'n cyk'i'k? Min. ⁸ ¿Bix e pompakey nuk te cyeylecte t-xbalen jawnex? Min. Cykilcakey cytzki'na nuk ejee' cyej xjal k'ina tuj nin tja cawel n-oc jawnex xbalen cyi'j. ⁹ ¿Bix e pompakey te cyeylecte jun tyolel Dios? Jaxte jun tyolel Dios Juan, bix cxe'l nkba'na cyej, yaa'n nuk o'cx jun tyolel Dios Juan, sino atl mas. ¹⁰ Tzin tkba'n tyol Dios cyjulu: “E tkba Dios te Tcwal: ‘Cxe'l nsma'na nsanjela nejl twitza, tu'ntzen binne cyten xjal oj tpona twitz tx'otx',’ tzi Dios te Tcwal,” tzi tyol Dios. Ma japan baj twi'ja tyol Dios lu tu'n Juan. ¹¹ Jaxxix cxe'l nkba'na cyej, cyxol tyolel Dios o ten twitz tx'otx', min-al jun mas jawnex twitzj Juan. Pero jxjal mas ch'in tuj tcawbil Dios mas jawnex twitzj Juan. ¹² At nim tajbel taak'en Juan Bautista, cuma jatxe tej tak' Juan kbalte hasta ja'lewe, ma tz'oc cyipen nim xjal ti'j tu'n cyocx tuj tcawbil Dios, bix tuya cykil cye' u'j nchi ocx xjal tuj. ¹³ Cykilca tyol Dios te ootxa e tkba at tu'n tul Elías juntl maj, bix ja Juan ul. ¹⁴ Ka cyaja tu'n cyocslana tyol Juan, ja Juan tisen Elías, jtyolel Dios at tu'n tul. ¹⁵ Cyjkom cyxquina tu'n tel cyni'ya ti'j nyola, bix cybisenx ti'j.

¹⁶ Key xjal n-el cyiiq'uen a j-e tk'umen Juan bix jnxi' nk'umena, ¿ti techel c'ajbel tu'n tel cyni'ya ti'j ti cytena? Ejee' tzuna tisen kej nee' tuj be cye'yi tu'n cykxan cyuya kej nchi kxan. Oj cykxan kej nee' tisen ti' jun mejoblanel, cxe'l cykba'n cyekej cye'yi chi kxan cyjulu: ¹⁷ “Keya, n-oc kxuxen. Cyej, ¿ti min chi tzaja te bixel kuyena?” tzikey. Bix oj cykxan kej nchi kxan tisen oj ncu'x maket jun cyimne, cxe'l cykba'n cyekej cye'yi tu'n cykxan cyjulu: “Keya, nko ook'a. Cyej, ¿ti min chi tzaja te ook'el kuyena?” tzikey. ¹⁸ Ejee'y tisenj kej nee' cye'yi chi kxan, cuma tej tul Juan bix min ex tk'ij nwaan bix nc'an, e xi' cykba'na, “Jxjal lu ma tz'oc jun biman ti'j, cuma min bint tu'n tisenj nbint cyu'n cykilca. Min tz'ajben tyol,” tzikey. ¹⁹ Pero tej tul jxjal Sma'n tu'n Dios tu'n ntena cyuya xjal, bix min e cub npa'nwe weyaj tisen Juan, sino in waa'nwe bix in c'anwe tise x tten, tzin cykba'na, “Jey', jxjal lu min cub tpa'n weyaj tisen tten xkol, sino nuk nwaan bix nc'an vino bix nbet cyuya chmol alcabala bix cyuya niy'tl aj il. Il ti'j q'uelel kiiq'uen tyol,” tzikey. Pero cchic'ajaxeltzen alcye kej xjal at cynaabl tu'nj alcyej chi ocslal tyol Juan bix weya nyol—tzi Jesús cyej xjal el cyxoo'n jaxin bix tyol Juan.

*¡Ayxsen kej tnom o tz'el cyiiq'uen tyol Dios!
(Lc 10:13-16)*

²⁰ Bix oc ten Jesús ilel ti'j kej tnom min e meltz'aj tuya Dios, amale nimxsen otok tyeec'anxin tipemalxin cyuj. ²¹ E xi' tkba'nxin:

—¡Ayxsen kej judío te Corazín! ¡Bix ayxsen kej judío te Betsaida! O tz'el cyiiq'uen tyol Dios, amale nimet e yec'j wipemala cyuj tzunjen tnom lu. Nuket e yec'j jwipemala cyej aj il yaa'n judío cyuj tnom te Tiro bix Sidón, ya otetle tz'oc cyk'o'n cyxbalen te bisbajil bix otetle chi cub ke tuj tza'j te techel ete'tzen tuj bis tu'n cyil. ²² Jaxte min e meltz'aj tuya Dios, pero cxe'l nkba'na cyej, tuj jk'ij te castiwa tzul, mas castiwa tzul tk'o'n Dios cyej xjal aj Corazín bix cyej xjal aj Betsaida twitzj tzul tk'o'nxin cyej xjal te Tiro bix cyej xjal te Sidón. ²³ Yaltzen cyej xjal te tnom te Capernaum, tuj cywitz ba'nxsen chi elel twitz Dios bix chi camal jun jawnex lugar tuya Dios tuj cya'j, pero yaa'n ju'wa. Chi cwel baj tuj ch'ixbajil tuj k'ak'. Nuket e yec'j jwipemala cyej xjal tuj tnom te Sodoma tisen ma yec'j cyxola, at-xetle tnom te Sodoma ja'lewe. ²⁴ Jaxte min e meltz'aj tuya Dios, pero cxe'l nkba'na cyej, tuj jk'ij te castiwa tzul, mas castiwa tzul tk'o'n Dios cyej twitzj tzul tk'o'nxin cyej xjal te Sodoma—tzi Jesús.

*Tej tna'n Jesús Dios
(Lc 10:21-22)*

²⁵ Tuj ja tyem lu, e na'n Jesús Dios. E xi' tkba'nxin:

—Taat Nmana, jay taaw tibaj cykilca tuj cya'j bix tibaj cykilca twitz tx'otx'. Bix nxi' nk'o'na chjonte tey ti'j e cub tninc'u'na ti'j tcawbila e'wen tu'na te cyej xjal nimxsen ba'n cyu'n tuj cywitz, pero te cyej xjal ajnintz cynaabl tisen ke nee', o txi' tk'o'na tu'n tel cyni'yi' ti'j ti tten tcawbila. ²⁶ Ju'tzen o bint tu'na, cuma ju' tajbila—tzi Jesús te Tman.

²⁷ Bix e xi' tkba'n Jesús cye xjal:

—O tzaj tk'o'n Nmana cykilca at tuj nk'aba. Min-al ttzki'n inayena, Tcwal Dios. Nuk o'cx Nmana ttzki'n inayena. Bix min-al ttzki'n Nmana. Nuk o'cx inayena ntzki'na Nmana, bix kej xjal waja tu'n t-xi' nyee'c'ana Nmana cye, tu'n tel cyni'yi' ti'jxin. ²⁸ Key xjal ma chi sicta tjak' cyiketza te cyiw ley, chi ocslana wi'ja, bix cxe'l nk'o'na cyajlabla te junx maj. ²⁹ Chi eletza tjak' cyiketza al, bix cyii'nxa nrxnak'tzbila. Cyxnak'tzamel cyiiba wi'ja, cuma yaa'n

cyiw nxnak'tzbila bix maans kena, bix ctemeltzen cyajlabla. ³⁰ Yaa'n cyiw nxnak'tzbila, bix yaa'n al cyiketza oj t-xi' cyii'na nxnak'tzbila—tzi Jesús cye xjal.

12

Tej cyak' ke t-xnak'atzxin piçc'ulbilte twitz triwa tuj k'ij te ajlabl
(Mr 2:23-28; Lc 6:1-5)

¹ Te jun k'ij te ajlabl, ex bet Jesús tuj triwa cyuya t-xnak'atzxin. Oc tak' weyaj cye t-xnak'atzxin, bix ak'kexin piçc'ulbilte twitz triwa, bix e xi' cywaa'nxin. ² Pero tej toc cye'ye'nen kej aj fariseo jlu, e xi' cykba'n te Jesús:

—Tzin tkba'n ley yaa'n tumel tu'n kak'anan tuj k'ij te ajlabl, pero kej tey t-xnak'atza, ma tz'el cyii'n twitz triwa—tzikexin.

³ Pero e xi' tkba'n Jesús cyexin:

—¿Bajxpatzen txa' cye'ye'nen tuj tyol Dios ti e baj te jxin kiy'jil David cyuya ke tuyaxin tej toc nim tak' weyaj cyexin jun maj? ⁴ Ocx David tuj nin tja Dios, bix e xi' twaa'n jpan k'o'n te Dios. Amale tzint tkba'n ley ja xjan pan lu o'cx te cyej xin pala ba'n t-xi' cywaa'nxin, pero e xi' cywaa'n David. ⁵ Bix at juntl. ¿Bajxpa txa' cye'ye'nen tuj ley ke pala tuj tja Dios nchi ak'anan tuj k'ij te ajlabl bix mintii' cyil ti'j? ⁶ Cxe'l nkba'na cyej, mas nintzaj inayena twitz tja Dios. Bix yaa'n tjak' ley te ajlabl tja Dios. ⁷ Tzin tkba'n tyol Dios cyjulu: “Waja tu'n tk'ak'en cye' u'ja cyi' cabtl, yaa'n nuk o'cx cyoybila weya,” tzi Dios tuj tyol. Nuket tz'el cyni'ya ti'j ti japenina ja yol lu, mintle e tzaj cyk'o'ja cyi'j nxnak'atza mintii' cyil. ⁸ Inayena, jaj xjal Sma'n tu'n Dios tu'n ntena cyuya xjal, kbalte ti chinel tuj jk'ij te ajlabl—tzi Jesús cye fariseo.

Junxin xjal otk tz'el tanem tk'abxin
(Mr 3:1-6; Lc 6:6-11)

⁹ Iy'tzen Jesús tuj ja lugar lu, bix tuj tzunj k'ij te ajlabl ocxsin tuj jun camon jaa' xnak'tzibil tyol Dios. ¹⁰ Bix at junxin xjal otk tz'el tanem tk'abxin. Bix ete'c xsunj xjal fariseo tuj camon jaa', bix e xi' cykanenxin te Jesús:

—¿K'o'n'pa tu'n ley tu'n tcub tk'anj jun xjal tuj k'ij te ajlabl?—tzikexin. E xi' cykanenxin texin ju'wa tu'n tcub tz'axxin tuj cyexin cyley.

¹¹ Bix e xi' ttzak'be'nxin cyexin:

—Ka ma cu'x tz'ak jun carnal tuj jun jul tuj k'ij te ajlabl, ¿alcye jun cyej mlaypale tjatz tii'n, amale nuket jun carnal? ¹² Yajtzen jun xjal, ¿yaa'm'pale mas tajbel twitz jun carnal? Ju' tzunj, k'o'n tu'n ley tu'n tcub nk'anena jun xjal tuj k'ij te ajlabl—tzi Jesús cye fariseo.

¹³ Tej thaj yolen Jesús ju'wa, e xi' tkba'nxin tej xin min yucchtl tk'ab:

—Nukpinx tk'aba.

Bix e xi' tnuqpi'nxin tk'abxin, bix ul tnaabl tk'abxin tisen juntl tk'abxin.

¹⁴ Pero yaltzen cye fariseo, etzkexin, bix e yolenkexin cyoxolxin tu'n ti tten tu'n tcub cybyo'nxin ja Jesús.

Tej tyole Isaías ti'j Jesús ka ja tscy'o'n tu'n Dios

¹⁵ El tniy' Jesús ti'j ti e cub cyninc'u'n fariseo ti'j, bix el lk'exin tuj ja lugar lu. Nim xjal oc lpe ti'jxin, bix e cub tk'a'nexin cykilca yaab cyxol. ¹⁶ Pero e tkbaxin cye xjal tu'n mi'n txi' cyk'umen ka otk chi k'anj. ¹⁷ E tk'anexin ke xjal tu'ntzen tbint tisen e tkba Dios te tyolel Isaías jatxe ootxa. Tzi Dios cyjulu: ¹⁸ “Lu jxjal ma nsicy'a tu'n tajben weya. A wanema ti'j, bix nim nchin tzalaja ti'j. Cwel nk'o'na jweya Espiritu tibajxin. Bix cxe'l tk'umenxin cyej xjal te cykil tnom ti tten tu'n cyten jiquen nwitz. ¹⁹ Mi'n jaw k'o'jlxin cyi' xjal bix mi'n jaw š-inxin cye xjal. Mi'n k'ajt-xin cyiw tu'n cyoc lpe xjal ti'jxin. ²⁰ Jun xjal yaa'n cyiw tisen jun ptz'unt ncub toket, cxe'l tyee'c'anxin tk'ak'bil tc'u'jxin te. Bix jun xjal yaa'n nimxix toclabl, tisen oj ch'itk tcub yubtz'aj jun tken cantil, cxe'l tyee'c'anxin tpa'sensyaxin ti'j. Ju' chinel tu'nxin ojxe tcamanxin ti'j cykil ka'. ²¹ Ti'jxin c'o'quel ke cyc'u'j xjal te cykil tnom,” tzi Dios tuj tyol tu'n Isaías.

Tej cykbante fariseo ja taaw il k'ol tipemal Jesús
(Mr 3:20-30; Lc 11:14-23)

²² Yajc'atltzen, bix e xi' k'i'n twitz Jesús junxin xjal toc ten jun biman ti'j. Mošxin, bix min e bintl tyolenxin. Pero tej tel tlojo'n Jesús biman ti'jxin, nbintltzen tyolen xinak bix nbintl tu'nxin tu'n tcy'e'yenxin. ²³ Bix e jaw klee' cykilca xjal, bix e xi' cykba'nxin:

—¿Japatzen loj ja xjal lu Tcwal David at tu'n tul te cawel?

²⁴ Pero cye fariseo, tej cybinte ti toc cyu'n xjal, e xi' cykba'nxin:

—Min. Nuk tu'nj tipemal k'o'n te tu'n Beelzebú, cawel cyibaj biman, ba'n tu'n tel tlojo'n ja xjal lu biman cyi' xjal—tzi ke fariseo.

²⁵ Pero el tniy' Jesús ti'j ti iy' tuj cyc'u'jxin, bix e xi' tkba'nxin cyexin:

—Tzin cykba'na nchin ak'anana te taaw il, Satanás. ¿Pero ti tten ju'wa? Cytzki'nntla ka ma tz'el tpa'n tiib jun tnom bix pjel cyk'ojlen cyiib xjal, mlay cyaj tnom ba'n. Jax ju'x ke te jun jaa', ka ma chi jaw k'oj, bi'x cxe'l cynajle'n tuj il. ²⁶ Ju'tzen tten tuya taaw il. Ka ma tz'el tlojo'n Satanás kej biman ete' tjak' tcawbil, nk'ojl tzunxin ti'jxxin, bix tu'n t-xi' tcawbilxin tuj il. ²⁷ Oj tel cyii'n ke cyxnak'atza biman, min txi' cykba'na tu'n tipemal Beelzebú nbint cyu'n. Ju' tzunj, mi'n txi' cyyolena n-el wii'na biman tu'n tipemal Beelzebú, cuma cytzki'nntla mi nuk cyu'n bix mi nuk wu'na bixet tz'el biman tu'n tipemal Beelzebú. ²⁸ Ju' tzunj, tu'nx tipemal Espíritu Santo te Dios n-el wii'na biman. Bix cuma tu'n tipemal Dios, q'ueletzen cyni'ya ti'j tu'nj wul-lena o tzul tcawbil Dios cyibaja.

²⁹ ¿Ba'mpa toc jun alak' tuj tja jun xjal cyiw te k'ilbetz tk'inemal ka min ma cub t'xpo'n alak' taaw jaa' nejl? Min. Pero ka ma cub t'xpo'n, ba'ntzen tetz talk'a'n tk'inemal. Weya, at wipemala tu'n tel wii'na j-at tuj tk'ab taaw il. ³⁰ Ejee'y, ka min ma tz'oc cyk'on cyiiba wuyena, nchi k'oj tzuna wi'ja. Kej xjal min cyak' cyiib wuyena tu'n cyclet xjal tuj tk'ab Satanás, ju'tzen chi onen ti' Satanás tu'nx cyxi' xjal tuj il. ³¹ Ju' tzunj, cxe'l nkba'na cyey, ba'n tcub tnajsa'n te Dios tixja ilel bix tixja xmucchabl yol wi'ja. Pero kej xjal tzin cykba'n ka junx Espíritu Santo tuya taaw il, mlay najset cyil. ³² Kej xjal yaa'n oclslal wi'ja, ka ma chi yolen ka' wi'ja, inayena, jxjal Sma'n tu'n Dios tu'n ntena cyuya xjal, ba'n tnajsset cyil. Pero kej xjal tzin cykba'n jnbint tu'n tipemal Espíritu Santo, tu'n tipemal Satanás, mlay najset cyil, yaa'n nuk tuj ja tyem lu, sino jax ju'x tuj jtyem tzul.

³³ Tu'nj tbinchben jun xjal q'uelet cyni'ya ti'j ti tten tnaabl jun xjal. Jun tzee' ba'n mi'n tak' twitz ka', bix jun tzee' k'eynen mlay tak' twitz ba'n. Ju' tzunj, mi'n txi' cykba'na ka ba'n nbinchbena pero ka' nnaabla. ³⁴ Ejee'y, tisen lbajkey, cuma nuk ka' n-el tuj cytziy. Kej xjal ka', chi yolel ka', cuma ti' tyol jun xjal tzin tyeeec'an ti tten tuj tanem. ³⁵ Kej xjal ba'n nchi yolen ba'n, cuma tuj cyanem ta' ba'n. Pero kej xjal yaa'n ba'n, nchi yolen ka', cuma tuj cyanem ta' ka'. ³⁶ Cxe'l nkba'na cyey, jaca yol min tz'ajben nxi' tkba'n jun xjal, cxe'l tk'o'ntzen tcwent te Dios oj tul k'ij te xkelbil twitz Dios. ³⁷ Cyyola te ja'lewe kbalte ti pjel cyey tuj tzunj k'ij tzul, cuma ka ba'n yol n-etz tuj cytziy ja'lewe, cchic'ajaxeltzen ka ba'nkey twitz Dios. Pero ka ka' yol n-etz tuj, cweltzen cytziy tk'o'n Dios cycastiwiya—tzi Jesús cye fariseo.

*Kej xjal ka' tzin cykana tu'n tbintl jun techel
(Lc 11:29-32)*

³⁸ Bix e xi' cykba'n juun tx'olbal ley bix juun fariseo texin:

—Xnak'tzal, kaja tu'n ttzaj tyeeec'ana jun yec'bil jawnex keya tu'ntzen tchic'ajax ka ju' otk tzaja tuya Dios—tzikexin.

³⁹ Pero aj ttzak'be'nxin cyexin:

—Key xjal judío te ja'lewe, ka'key bix ma tz'el cypa'n cyiiba ti' Dios. Min chin cyiik'a, sino nuk ete'c'a kanlte we mastl yec'bil. Pero jtechel tzin cykanena, mlay k'oj cyey. Oj t'bjaj wi'ja tisenxj e baj ti'j tyolel Dios Jonás, jatzen c'ajbel te yec'bil cyey. ⁴⁰ Tisenxj e ten Jonás oxo k'ij bix oxo koniyon tuj te'u'j jun tij quíis tuj mar, jaxse ju'x chin temela oxo k'ij bix oxo koniyon tuj tx'otx'. ⁴¹ Oj tpon tumel tu'n cyoc cykil xjal tuj xkelbil tu'n Dios, ejee'j aj Nínive chi jawel yolel cyi'j ejee'y judío te ja'lewe, cuma tej t-xi' tk'umen jxin tyolel Dios Jonás cye aj Nínive tu'n taajtz ti' cyanem, aajtztzen ti' cyanem. Pero cyey, amale nxi't tk'umen jun xjal mas jawnex twitz Jonás cyey, pero min cynimey. ⁴² Jax ju'x cjawel yolel jxuj xuuj e cawen cyuj tnom te jawne jatxe ootxa cyi'ja judío te ja'lewe tuj jk'ij te xkelbil tzul. E xi'xuj nakch te ebilte tnaabl rey Salomón, bix oc tbi'nxuj bix e t'nimanxuj. Pero cyey, n-oc cybi'na tyol jun xjal mas jawnex twitz Salomón, pero min txi' cynimana.

*Jun biman najtz meltz'aj
(Lc 11:24-26)*

⁴³ Oj tel lojo'n jun biman ti' jun xjal, nbettzen biman tuj tzkij tx'otx' jaa' min-al xjal. Njyon tu'n tajlan, pero min cnet jaa' tu'n twe'ban. ⁴⁴ Ju' tzunj, nxi' tkba'n: “Chin aal meltz'aja tuyaj xjal jaa' ntiniya nejl,” tzi. Oj taj meltz'aj biman tuyaj xjal, oj toc tcyey'en xjal, tisenc'a jun jaa' min-al xjal tuj, bix tz'isen tten tuj, bix binne tten. ⁴⁵ Oj toc tcyey'en min-al xjal tuj, n-eltlitz biman jyolte mas tuya, bix cpomel meltz'aj tuya wuukt' biman mas ka' twitz. Enteraxseke chi oquex tunwen tu'n cynajan, bix ju' tzunj yal tzunj xjal masxsen tuj il ta' twitz nejl. Ju'tzen pjel cyi'ja judío ka' te ja'lewe—tzi Jesús.

*Ttxu bix ke titz'en Jesús
(Mr 3:31-35; Lc 8:19-21)*

⁴⁶ Mitkna'x t'bjaj yolen Jesús cye xjal tej tpon ttxuxin cyuyax ke titz'enxin. Wa'lc'akexin pe'n, bix e cyajbexin tu'n cyyolencin tuyaxin. ⁴⁷ Bix at jun xjal e xi' tkba'n texin:

—Jey', lu ttxuy cyuya ke titz'ena wa'lc'a pe'n, bix cyaj tu'n cyyolencin tuyey—tzi xjal te Jesús.

⁴⁸ Pero e xi' tkba'nxin tej xjal otk k'umen jlu:

—Tuj twitza, ɶal twitzi weya ntxu bix al tzunji weya witz'en? —tɶizin. ⁴⁹ Bix e xi' tch'iguxin tk'abxin cye t-xnak'atzxin, bix e xi' tkba'nxin:

—Ejee' tzunji luwe weya ntxu bix weya witz'en. ⁵⁰ Aljxe xjal binchante tajbil Nmana tuj cya'j, ejee' tzunja witz'ena bix waneba bix ntxuya—tɶi Jesu's.

13

Jun techel ti'j jun awal

(Mr 4:1-9; Lc 8:4-8)

¹ Tujx jk'ij lu, etztzen Jesu's tuj jaa'wa, bix e cub ke ttzii' tniabel a'. ² Bix e pon cychmon cyiib nimxsen xjal ti'jxin. Ju' tzunji, ocxxin tuj jun barc bix e cub kexin tuj tu'n t-xnak'tzan cye xjal. Yaltzen cye xjal, e cyaj we'ke ttzii' a'. ³ Bix ak' Jesu's xnak'tzalcye. Nim xnak'tzbil e xi' tk'o'nxin cyexin, pero tuya nim ttxolen yol. E cub tk'o'nxin ja techel lu cyexin:

—Attzen junxin xjal e xi'xin te awal triwa. ⁴ Tejzen tak'xin tɶitlxte iyaj, at tiyajxin e cub tz'ak tuj be. Bix ul noj ke ch'it ti'j bix e jaw cywaa'njil. ⁵ Cabtl twitzi iyaj e cub tz'ak twitzi pc'at tx'otx'. Yaa'n nimxix tx'otx', bix ju' tzunji, tuj jun rato e jaw pok'chke, cuma mintii' t-xee' tx'otx'. ⁶ Pero tu'n tcykal k'ij, bix oc woch'paj tejxe ttzkij, cuma yaa'n nim tloc' otk txi' tuj tx'otx'. ⁷ At cabtl twitzi iyaj e cyaj tz'ak tuj tik'ch ch'i'xel. Pero nuk e jaw xcy'ilpaj tjak' ch'i'x, tejxe tetz cyim. ⁸ Pero at cabtl twitzi iyaj e cyaj tz'ak tuj tbanel tx'otx', bix e tak' nim twitzi. At juun tken e tak' syent twitzi, at cabtl e tak' oxc'al twitzi, bix at cabtl e tak' winaklaaj twitzi. ⁹ Ka cyaja tz'el cyni'ya ti'j ja techel lu, cyikom cyxquina bix cybisenx ti'j—tɶi Jesu's.

Alcye cyxi'len kej techel

(Mr 4:10-12; Lc 8:9-10)

¹⁰ Bix ul lk'e ke t-xnak'atzxin ti'jxin, bix e xi' cykanenxin texin:

—ɶTu'n tikentzen nyolena cye xjal tuj yaa'n tzinen yol?

¹¹ Bix aj ttzak'be'nxin cyexin:

—Te cyey, ejee'y nrxnak'atza, ma txi' tk'o'n Dios cyey tu'n tel cyni'ya ti'j ti tten tcawbil Dios min e yec'j nejl. Pero te cyej niy'tl xjal, min o k'oj cye. ¹² Jxjal n-oc tipen tu'n tniimante nyola, cxe'l k'o'n tu'n tel tniy' ti'j mastl, bix ctemel nim te. Pero jxjal min tz'oc tipen tu'n tniimante nyola, q'uelel k'i'n alcyej ch'in otk bint tu'n. ¹³ Ju' tzunji, yaa'n chic'aj jnxi' nyolena cye xjal, cuma amale n-oquet ccyey'yen bix amale n-oquet cybi'n, pero min tz'el cyniy' ti'j. ¹⁴ Ejee' tzunja tisen e tkba Dios tu'nj tyolel Isaias tuj tyol Dios cyi'j xjal min e cybi Dios. E tkba Dios tu'n Isaias cyjulu: "Amale c'oquelet cybi'n bix amale c'oquelet ccyey'yen, pero mi'n tz'el cyniy' ti'j. ¹⁵ Cyiwxsen cyanem jxjala, bix ccyey'ix tz'oc cybi'n nyola. Cwel cymutz'ba'n cywitzi ti'j jaxxix yol, cuma ccyey' i tz'el cyniy' ti'j. Cyiw cyten, cuma ccyey' i chi meltz'aj wyuena, tu'n'tzen cyclet wu'na," tɶi Dios jatxe ootxa. ¹⁶ Pero cyey, jun nintzaj xtalbil o k'oj cyey, cuma ete'y tuyaj xjal Sma'n tu'n Dios, bix nxi' cybi'na nyola. ¹⁷ Cxe'l nkba'na cyey, nim tyolel Dios bix nim xjal jiquen te ootxa e cyajbe tu'n toc ccyey'yen jxjal Scy'o'n tu'n Dios, tisenj cyey n-oc ccyey'yen ja'lewe, pero mix oca ccyey'yen. Bix e cyajbe tu'n toc cybi'n kej tyol jxjal Scy'o'n tu'n Dios, tisenj cyey n-oc cybi'n ja'lewe, pero mix oca cybi'n.

Tej t-xi' ttx'olba'n Jesu's jtechel ti'j awal

(Mr 4:13-20; Lc 8:11-15)

¹⁸ Ja'lewe cxe'l ntx'olba'na jtechel ti'j awal. ¹⁹ Oj nxi' thi'n jun xjal yol ti'j tcawbil Dios, pero min tz'el tniy' ti'j, n-ultzen taaw il tu'n tjatz tii'n ja yol lu otk cu'x awa'n tuj tanem. J-iyaj e cub tz'ak tuj be, ju'tzen japenina tisenj xjal lu min e cyaj tyol Dios tuj tanem. ²⁰ J-iyaj e cub tz'ak tibaj pc'at tx'otx', ju'tzen japenina tisenj xjal n-oc thi'n tyol Dios tuya cykil tc'u'j tuj tneel. ²¹ Pero min cywix tuj tanem. Nuk ca'ba k'ij ncyaj ten, cuma oj n-oc jun q'uixc'aj bix ka jun pena ti'j tu'n tlaj tyol Dios, ncub bajtl tc'u'j ti' tyol Dios. ²² Ja tzunji iyaj e cub tz'ak cyxol twitzi ch'i'x bix e cyim tjak' ch'i'x, ju'tzen japenina tisenj xjal n-oc thi'n tzunji lu ncaman te xitbil tyol Dios tuj tanem. Tchun'k'lal tisen jun tken triwa mintii' twitzi. ²³ Pero j-iyaj e cub tz'ak tuj tbanel tx'otx', ju'tzen japenina tisenj xjal n-oc thi'n tyol Dios bix n-el tniy' ti'j. Tchun'k'lal cyisen tken triwa tzin cyk'o'n twitzi. At juun nchi k'on syent twitzi. At cabtl nchi k'on oxc'al twitzi. Bix at cabtl tken nchi k'on winaklaaj twitzi—tɶi Jesu's cye t-xnak'atz.

Techel ti'j triwa bix ka' c'ul

²⁴ Bix e xi' tk'o'n Jesu's jun'tl techel cye xjal:

—Oj ttz'iy tcawbil Dios twitzi tx'otx', tisenj ti nbaj oj ncu'x tawa'n jun xjal iyaj tuj tcojbil. At junxin xjal e cu'x tawa'n iyaj ba'n tuj tx'otx'. ²⁵ Pero at jun koniyan ul t-enemiwa, bix tej cywutan cykil xjal, tuj ewjel e cu'x tawa'nxin ka' c'ul t-xol triwa, bix ajxin. ²⁶ Lwewa, tej tjaw

pok'ch triwa bix e tak' twitz, jax ju'x e jaw pok'ch ka' c'ul tuj. ²⁷ Tej tjaw pok'ch triwa tuyax ka' c'ul, ul ke t-ak'anal jxin taaw cojbil twitzxin, bix e xi' cykba'nxin texin: "Taata, zyaa'mpa nuk iyaj ba'n e cu'x tawa'na tuj tcojbila? ¿Ti tten ma jaw pok'ch nim ka' c'ul t-xol triwa?" tzikexin. ²⁸ Bix aj ttzak'be'nxin cyexin: "Tu'n jun xjal at tk'oj wi'ja ma bint jlu," tžixin. Bix e xi' cykanen t-ak'analxin texin: "¿Tajpey tu'n kxi'ya tu'n tjatz kbako'na ka' c'ul?" tžikexin. ²⁹ Pero aj ttzak'be'nxin: "Min, cuma ka ma jatz cybako'na ka' c'ul, tuyax triwa cjawetz bakl cyu'na. ³⁰ E ttž'iy ka' c'ul junx tuya triwa ojxe tpon tumel tu'n tjtx'et. Ojtzen tpon tumel tu'n tjaw chmet triwa, cxe'l nkba'na cye chmol awal: 'Tneelxix, cjawetz cychmo'na ka' c'ul bix cwel cymanoja tu'n tocx tuj k'ak'. Jatzente triwa, cychmo'ncx tu'n tocx tuj ntx'utx'a,' ntžiya," tži taaw cojbil—tži Jesús.

Jun techel ti'j iyaj te mostaza
(Mr 4:30-32; Lc 13:18-19)

³¹ Bix e xi' tk'o'n Jesús juntl techel cye xjal:
—Oj ttž'iy tcawbil Dios, ctž'iyel tisen tten oj ncu'x tawa'n jun xjal iyaj te mostaza tuj ttx'otx'xin. ³² Ja tzunj twitz mostaza, jatzen jun iyaj mas xmutž' twitz cykilca twitz tiy'jil itzaaj. Pero oj toc te tžee', mas twe' cywitz cykilcatl itzaaj tuj tcojbil, bix najben tu'n cyajlan ke ch'it tuj tk'ab—tžixin.

Techel ti'j levadura
(Lc 13:20-21)

³³ Bix e xi' tk'o'nxin juntl techel cye xjal:
—Tcawbil Dios ctž'iyel tisen tten oj ntž'iy k'otj tu'n levadura. Ocx tk'o'n jun xuuj levadura tuj k'otj te pan, bix e xi' tk'o'nxuj oxe malbil k'otj tuj jun tcublel. Bix e jaw tž'iy k'otj te pan tu'n levadura hasta tejxe tjaw punntž'aj—tži Jesús.

Tej tkbante Jesús nimc'a techel tu'n t-xi' tyeec'axin cye xjal
(Mr 4:33-34)

³⁴ Cykilcaj lu e tkbaxin cye xjal. Minxix e ttx'olbaxin, sino tuya techel yol tyolxin. ³⁵ Tej t-xi' tk'o'nxin techel cye xjal ju'wa, el jaxxix j-e tkba jun tyolel Dios jatxe ootxa. Tži cyjulu: "Chin yolela tuya techel. Cxe'l nk'umena j-e'wen ta' jatxe tej mitkna'x tbint twitz tx'otx'," tži Dios," tži jun tyolel Dios.

Tej t-xi' ttx'olba'n Jesús ti' elpenina jtechel ti'j ka' c'ul

³⁶ E cyajtzen tcyeyen Jesús ke nimxsen xjal, bix ocxxin tuj jun jaa'. Bix ul lk'e ke t-xnak'atzxin ti'jxin, bix e xi' cykba'nxin:

—Najsama, tx'olbantž' keya ti elpenina jtechel ti'j ka' c'ul tuj cojbil—tžikexin.

³⁷ Bix aj ttzak'be'nxin:

—Jxjal e cu'x tawa'n j-iyaj ba'n, jatzen xjalja Sma'n tu'n Dios tu'n tten cyuya xjal. ³⁸ Jcojbil, jatzen cykilca twitz tx'otx'. Yaltzen kej iyaj ba'n, ju'tzen japenina tisen kej xjal cyaj tcawbil Dios. Kej iyaj ka' c'ul, ju'tzen japenina tisen kej xjal nche'x lpe ti'j taaw il. ³⁹ Jxjal enemiwa e cu'x tawa'n ka' c'ul, jatzen japenina tisen taaw il. Bix jaatx'en, jatzen japenina tisen manc'bil k'ij twitz tx'otx'. Kej chmol awal, ejee'tzen kej tsanjel Dios tuj cya'j. ⁴⁰ Tisenj njaw chmet ka' c'ul bix cxe'l tuj k'ak', ju'tzen pjel tuj manc'bil k'ij. ⁴¹ Cweletž' nsma'na ke n-ángela, bix q'uelex cyii'n tuj nacawbila cykilca kej xjal n-oc cyipen ti'j tu'n cybinchantl niy'tl xjal il, bix xsunj cykilca kej xjal ccy'yi tley Dios. ⁴² Cxe'l nxoo'na tuj k'ak' te junx maj, jatztzen chi ook'el bix cjawel kitz'itx'in t-xee' twitz cye. ⁴³ Jatzen kej xjal jiquen, chi koptž'ajel tuj tcawbil Cyman Dios tisen tken k'ij.

Cyjkom cyxquina tu'n tel cyni'ya ti'j nyola, bix cybisenx ti'j—tži Jesús cye t-xnak'atzxin.

Jun techel ti'j k'inemabl e'wen

⁴⁴ Bix e xi' tkba'ntl Jesús:

—Jtajbil jun xjal ti'j tcawbil Dios tisenj tajbil jun xjal ti'j jun jawnex k'inemal. Ka ma cnet tu'nj xjal ak'anal jun k'inemal maku'n ta' tuj jun cojbil cwelex te'wenxin juntl maj, bix tuya cykil tc'u'j cxe'l tq'ueyen cykilca at texin, tu'ntzen tlok'onte ja cojbil lu tuya k'inemal otk tilxin tuj.

Jun techel ti'j perla wi'yelxsen

⁴⁵ Jax jtajbil jun xjal ti'j tcawbil Dios tisenj tajbil jun q'ueyel cyi'j perla. ⁴⁶ Ka ma cnet jun perla wi'yelxsen tu'n, cxe'l tq'ueyen cykilca at texin, tu'ntzen tlok'ontexin ja perla lu.

Jun xiy'pa

⁴⁷ Jax ju'x, jnbaj oj tul tcawbil Dios tisenj nbaj oj nxi' cyxoo'n tzyul quiš cyxiy'pa tuj tñijabel a'. Cykilca wik quiš ntzyet cyu'n. ⁴⁸ Ojtzen tnoj cyxiy'pa, cjawetz cyii'n cyxiy'pa tuj a' bix cxe'l k'i'n cyu'n ttžii' a'. Chi cwel ke bix cjawetz cyscy'o'n quiš ba'n tu'n tcub cyk'o'n cyuj chi'l. Pero kej quiš yaa'n ba'n, q'uelex cyxoo'n. ⁴⁹ Ju'tzen pjel cyuj manc'bil k'ij. Chi

tzaal tsanjel Dios tuj cya'j, bix q'uelel cypa'n kej xjal ka' cyi'j xjal jiquen. ⁵⁰ Bix chi xe'l cyxoo'n kej ka' tuj k'ak' junx maj, jatztzen chi ook'el bix cjawel kitx'itx'in t-xee' twitz cye tu'n tak'.

Jxnak'tzbil ac'aj bixj-ootxa

⁵¹ ¿Mapa tz'el cyni'ya ti'j cykilca kej yol lu?—tzi Jesús cye t-xnak'atz.

—Ma tz'el kni'ya ti'j, Taat—tzikexin.

⁵² Bix e xi' tkba'nxin cyexin:

—Ka ju' ma tz'el cyni'ya ti'j nxnak'tzbila ti'j tcawbil Dios, matzen chi oca te xnak'tzal. Ejee'y tisen jun taaw jaa' ba'n tu'n t-xi' tk'o'n cykilca ba'n cye ke te tja. Ba'n t-xi' cyxnak'tza'na jaxxix yol te ootxa, bix ba'n tu'n t-xi' cyxnak'tza'na kej jaxxix yol ac'aj yaa'n telniy' nejl—tzi Jesús.

Tej tpon Jesús tuj tnóm Nazaret

(Mr 6:1-6; Lc 4:16-30)

⁵³ Tejtzen thaj tkba'n Jesús kej techel lu, iy'tzen tuj ja tnóm lu, ⁵⁴ bix ulxin tuj ttanemxin. Bix tej tocxxin tuj camon jaa' te xnak'tzbil tyol Dios, ak'xin xnak'tzal cye xjal. Bix e jaw klee' kej xjal te ttanemxin ti'jxin, bix e xi' cykba'nxin:

—¿Jaa'tzen ma tzaa' tcno'n jxjal lu nimxsen tnaabl? ¿Bix jaa'tzen ma tzaa' tipemal te k'anl xjal? ⁵⁵ ¿Yaa'mpatzen nuk tcwal carpintero? ¿Yaa'mpatzen ja María ttxuxin, bix yaa'mpatzen Jacobo bix José bix Simón bix Judas ke titz'enxin? ⁵⁶ ¿Bix yaa'mpa najl cykilca ke tanebxin kxol tzalú? Ju' tzunj, ¿jaa'tzen ma tzaa' tcno'n jxjal lu jtípemal?—tzi ke xjal. ⁵⁷ Ju' tzunj, min ooxix cybi'n xjal aj Nazaret tyolxin.

Ju' tzunj, e xi' tkba'n Jesús cyexin:

—Jun tyolel Dios jaa'xja tumel n-oc ocslette. Ja tzunj tuj ttanem bix tuj tja min tz'oc ocslet—tzi'xin.

⁵⁸ Cuma min e cyyocsla ke aj ttanemxin ti'jxin, ju' tzunj yaa'n nimxix e tyeec'axin tipemalxin cyxolxin.

14

Tej tcyim Juan Bautista

(Mr 6:14-29; Lc 9:7-9)

¹ Cyujtzen ja k'ij lu, e tbi jxin gobernador Herodes tpochal jnbint tu'n Jesús. ² Bix e xi' tkba'nxin cye xjal ajben texin:

—Ja te Juan Bautista ja xjal lu. Ma jatz itz'j juntl maj cyxol cyimne, bix ju' tzunj at nim tipemal tu'n tbint cykilcaj lu tu'n—tzi gobernador.

³ Tzitzen Herodes ju'wa cuma nejl otk cub cytzyu'n tsoldadoxin ja Juan bix otk cub cyxpo'nxin bix otk tz'ocx cyk'o'nxin tuj tzeel'. E bint tu'n Herodes ju'wa cuma otk tz'el tikenxin t-xu'l titz'enxin Felipe, Herodías tbixuj. ⁴ Nuk tu'nj otk txi' tkba'n Juan texin: “Yaa'n tumel tu'n toc t-xulena t-xu'l titz'ena.” ⁵ Otk tajbexin tu'n tcub byet Juan, pero min e xi' tkba'nxin cye tsoldadoxin tu'n tcub byet, cuma tcy'ixin tu'n tjaw cyk'oj xjal ti'jxin. Tuj cywitzt xjal, jun tyolel Dios ja Juan.

⁶ Pero manc'biltzen, otk cub byet Juan tu'n tlaj t-xu'l Herodes. Tjapantzen bajxin tu'n tiy' tk'ijxin, bix ocx jtxin tal Herodías bixel twitzxin bix cywitzt xjal ttxlajxin. Ba'nxsen e'la bixentxin tuj twitzxin. ⁷ Ju' tzunj, e xa' tkba'nxin tetxin: “Alcyexja ctzaal tkanena weya, jac'a txi' nk'o'na. Tzinn Dios,” tzi'xin. ⁸ Nejl, e xi'txin kanlte te ttxutxin ti taj ttxutxin tu'n t-xi' tkanentxin texin. Tej tul meltz'aj twitz Herodes, e xi' tkba'nxin texin: “Waja tu'n ttzaj tk'o'na twi' Juan Bautista weya tuj jun lak,” tzi tzuntxin. ⁹ Otk tz'el ka' tkanbiltxin twitzxin, pero cuma ya otk cyaj tk'o'nxin tyolxin tuya jun jurament bix cuma ya mix e cwa' tch'ixbe'nxin tyolxin cywitzt ttxocanxin, e tcuyaxin tu'n tk'oj twi' Juan tetxin, ¹⁰ bix e xi' tch'k'o'nxin junxin tsoldadoxin te k'ilbel twi' Juan. Bix el ttx'omanxin twi' Juan, ¹¹ bix e pon tii'nxin tuj jun lak. Bix e xi' tk'o'nxin tetxin, bix e xi' tk'o'ntltxin te ttxutxin.

¹² Bix otk pon cab xjal lepchech ti'j Juan k'ilbetz t-xumlal Juan bix e cu'x cymaku'n, bix e xi' kbalte tpochal tcyimlen Juan te Jesús.

Tej cywaa'n jwe' mil xjal tu'n Jesús

(Mr 6:30-44; Lc 9:10-17; Jn 6:1-14)

¹³ Tejtzen toc tbi'n Jesús otk cub byet Juan, el lk'exin cyuya t-xnak'atzxin bix e xi'kexin tuj jun barc jaa' min-al xjal najl. Pero oc cybi'n xjal jaa' e xa' Jesús, bix txolen etz ke xjal tuj cytanem tu'n cypon ti'jxin. ¹⁴ Tej tetzxin tuj barc, e tilxin nimxsen xjal, bix oc k'a'ben te'u'jxin cyi' xjal, bix ak'xin k'anl kej yaab cyxol. ¹⁵ Tejtzen ch'itk tex k'ij, oc lk'e ke t-xnak'atzxin tuyaxin, bix e xi' cykba'nxin texin:

—Taat, tzalu mintii'xse waabj ba'n tcnct bix ya kalatltzen. K'umenx cye xjal tu'n cyxi' lok'ol cywa tuj kej coc' tnama—tzikexin.

¹⁶ Pero e xi' tkba'n Jesús cyexin:

—Yaa'n il ti'j tu'n cyxi' xjal. Ejee'x cyey cyk'onx cywa xjal.

¹⁷ Bix e xi' cykba'nxin texin:

—Nuk jwe' mukan tuya ca'ba quiš at kuyena—tzikexin.

¹⁸ —Cyii'ntza nwitzza—tzixin.

¹⁹ Bix e xi' tkba'nxin tu'n cycub ke ke xjal tuj polen tuj chk'ajlaj. Bix e xi' ttzyu'nxin jjwe' pan tuyaj ca'ba quiš, bix e jaw tcyey'xenxin twitz cya'j, bix e xi' tk'o'nxin chjonte te Dios ti' waabj. Bix e cub tpiixen pan bix e xi' tk'o'nxin cye t-xnak'atzxin, tu'ntzen t-xi' cypa'nxin cyxol xjal. ²⁰ Bix cykilca xjal e waa'nke tejxe tnoj cyc'u'j. Tej cybaj waa'n xjal, bixsen e jaw chmet ttx'akan waabj otk cyaj, bix e noj cablaaj chi'l. ²¹ Atle jwe' mil xinak e waa'n, bix yaa'n cyuyax ke xuuj bix cyuyax ke cwalbaj oc te tajlal.

Tej tbet Jesús tibaj tñijabel a'

(Mr 6:45-52; Jn 6:15-21)

²² Tejtzen tbaj ju'wa, bix e xi' tkba'n Jesús cye t-xnak'atz tu'n cycu'xxin tuj barc tu'n cyiy'x nejlxin twitzxin jlajxilt tñijabel a'. Jatzen te Jesús, e cyaj tenxin kbalte cye xjal tu'n cyaj cyja. ²³ Tej tzunj tpon baj tyolxin cyuya xjal, bix e jaxxin tjunal twi' witz te yolel tuya Dios. Tcubtzen klotj, bix e tenxin tjunalxin. ²⁴ Pero ke t-xnak'atzxin, e tunc'xin tuj barc tñijabel a' nakch tzi' a'. Bix cyiw tkitj barc tuj a', cuma nimxsen oc punntz'aj a' tu'n jun nintzaj cyk'i'k. ²⁵ Te ch'itk cyskixxin, bix e xi' bet-xin tibaj a' tu'n tponxin cyi'jxin. ²⁶ Tej cylontexin nbet-xin tibaj a', e jawxsen sey'pajkexin, bix e xi' cykba'nxin:

—Jun t-xneq'uetz'il biman nbet tibaj a'—tzikexin, bix ak'kexin š-il tu'n ttzi cyi'j.

²⁷ Pero lwewa naj e xi' tkba'n Jesús cyexin:

—Cynimsam cyc'u'ja. Inayen weja. Mi'n tzaj ntziya cyi'ja—tzixin.

²⁸ Aj ttzak'be'n Pedro texin:

—Taat, ka jaxxix ka jay, kbantza weya tu'n nxi'ya tuyey tibaj a'.

²⁹ Bix e xi' tkba'nxin te Pedro:

—Cu ttzaja.

Ju' tzunj, e cu'tz Pedro tuj barc bix ak' betel tibaj a' tu'n tpon tuya Jesús. ³⁰ Pero tej tna'nte Pedro tipemal cyk'i'k, e tzaj ttzi tu'jxin, bix n-ak' xe'l bajltxin tjak' a', bix e jaw š-in:

—Taat, jchin tcla'y!

³¹ Bix e xi' tñukpi'n naj Jesús tk'ab te tzyulte te Pedro, bix e xi' tkba'nxin:

—Yaa'n nimxix ma tz'oc ke te'u'ja wi'ja. ¿Tiken xbaj te'u'ja wi'ja?—tzixin.

³² Tej tjaxxin tuj barc tuya Pedro, nwe'tl cyk'i'k. ³³ Ejee'j t-xnak'atzxin e ten tuj barc, e cub majekexin t-xee' tkenxin te nimsalte texin. Bix e xi' cykba'nxin:

—Tzinen ta' Tcwal Diostey.

Tej tul cynaabl ke yaab tu'n Jesús tuj Genesaret

(Mr 6:53-56)

³⁴ Tejtzen cyiy'xin jlajxe a', e ponkexin tuj ttx'otx' Genesaret. ³⁵ Tej tel cyniy' xjal aj Genesaret ka ja Jesús otk pon, e xi' cysma'n cysanjel kbalte tuj tnom bix cyuj coc' tnom. Bix e xi' cyii'n xjal ke yaab twitzxin. ³⁶ Bix oc cycubsa'n xjal cywitz texin tu'n tucyanxin tu'n toc cymoco'n yaab amatle nuk ti' ttxa'n t-xbalenxin. Bix aljxe xjal oc moconte texin, ul cynaabl.

15

Alcyej ctz'ilelxix xjal tu'n twitz Dios

(Mr 7:1-23)

¹ Attzen jun k'ij bix e pon tuya Jesús cab xjal nimalxsen te ley, ejee'j xjal fariseo, tuya cabxin tx'olbal ley. Otk chi tzajxexin maa Jerusalén. E xi' cykanenxin texin:

² ¿Tikentzen min tzin cyniman tey t-xnak'atza ley cye xjal te ootxa? Nchi waa'n pero min ma txjet cyk'abxin tisex tten te mitkna'x toc waa'n—tzi ke fariseo.

³ Bix aj ttzak'be'n Jesús cyexin:

—¿Tiken n-el cyiiq'uena tley Dios tu'n cyoc lpey ti'j jcyexa cyleya? ⁴ E tkba Dios cyjulu: “Cybi'ng'uey cymana bix cytxuy. Alcyje ma txi' tkba'n ka' ti'j tman bix ka ti'j ttxu, il ti'j tu'n tbyet,” tzi Dios. ⁵ Pero cyey, tzin cyxnak'tza'na cye xjal: “Amale atet il ti'j tman jun xjal bix ka ttxu, pero ka ma txi' toyen tpwak te tja Dios, ⁶ mas il ti'j jlu twitzj tu'n t-xi' tk'o'n onbil cye tman,” tzikey. Ju' tzen tten n-el cyiiq'uena jtzin tkba'n Dios tu'n toc cyc'ojla'na jcyexa cyleya. ⁷ ¡Xmeletz' xjalkey! Jaxxix toc tu'n tyol tyolel Dios Isaías tej tcyaj ttz'i'ben cyi'ja cyjulu: ⁸ “Kej xjal lu nchi na'n Dios nim tuya cytzi, perotzen cyanem nakch ta' wi'ja. ⁹ Mintii' ba'n tajbe'na

oj nchi na'n nbi'ya. Bix xnak'tzibil cye yaa'n wu'na, sino nuk cyu'nx,' tzi Dios," tzi Isaías—tzi Jesús cye fariseo.

¹⁰ Yajc'atltzen bix e ttxoc Jesús ke xjal, bix e xi' tkba'nxin cyexin:

—Chin cybi'tzen, bix tz'elx cyni'ya ti'j nyola. ¹¹ Yaa'n jc'oquex tuj ttzi jun xjal cchucjalet tu'n, sino ja tej ctzaal ti' tanem xjal, jatzente teja ctz'ilaxix xjal tu'n twitz Dios—tžixin.

¹² E pontzen lk'e ke t-xnak'atzxin ttxlajxin, bix e xi' cykba'nxin texin:

—¿Mapa tz'el tni'ya ti'j ka' s-ela tyola tuj cywitz fariseo?

¹³ E xi' ttzak'be'nxin:

—Mi'n baj cyc'u'ja cyi'j, cuma mi'n cyaj cybinchben cyu'n. Cykilca awal min ma cu'x tawa'n Nmana at tuj cya'j, cjawetz lequet cyloc'. ¹⁴ Ju' tzunj, mi'n che'x lpey cyi'j aj fariseo. Ejee' cyisen moš, bix kej xjal nchi oc lpe cyi'j, jax cyisen moš. Ka ma txi' tyeeca'n jun moš be te juntl moš, junx chi xe'l tz'ak tuj jun jul—tži Jesús.

¹⁵ E xi' tkba'n Pedro te Jesús:

—Kbantz keya ti elpenina tyola cye xjal ti'j waabj.

¹⁶ Bix aj ttzak'be'nxin:

—¿Mina'xpatzen tel cyni'ya ti'j? Ejee'y tisen ke niy'tl xjal. ¹⁷ ¿Mimpa ma tz'el cyni'ya ti'j ka ti jilel ma tz'ocx tuj ttzi jun xjal, cxe'lte tuj tc'u'j, tu'n tiy' tc'u'n? ¹⁸ Jaj ctzaal itz'j ti' tanem xjal bix n-etz tuj ttzi, jatzente teja ctz'ilelxix xjal tu'n twitz Dios, ¹⁹ cuma tujxe tanem ntzaa' itz'ja tka'yel, bi'yen, aj pajlel, tu'n toc ipan ti' juntl xuuj, alk'al, xtak'el, bix tu'n tyolen ka' ti' juntl xjal. ²⁰ Cykil tzunj lu ntz'ilaxix xjal twitz Dios. Pero oj t-xi' twaa'n jun xjal bix min ma tz'el ttxjo'n tk'ab, mlay chucj te xjal tu'n—tži Jesús.

Jaj tocslabl xuj xuuj te Canaán

(Mr 7:24-30)

²¹ Yajc'atltzen, bix etz Jesús tuj lugar lu, bix e xi' tuj tnóm te Tiro tuyax tnóm te Sidón.

²² Attzen junxuj xuuj yaa'n judío najl tuj lugar lu, aj Canaánxuj. Etxxuj tuj ttanemxuj tu'n tponxuj tuya Jesús, bix ak'xuj š-il:

—Taat, jaj Tcwal Rey David, k'ontz tc'u'ja wi'ja, cuma nimxsen nyajlan jun biman ti'j txin wala—tžixuj.

²³ Pero te Jesús, min aj ttzak'be'nxin texuj. Bix e pon lk'e ke t-xnak'atzxin ti'jxin, bix e xi' cykanenxin texin:

—Kbanxa te xuuj lu tu'n taj, cuma nuk lepcheč š-il ki'j.

²⁴ Pero aj ttzak'be'nxin cyexin:

—Nuk cyej xjal aj Israel o che'x tz'ak cyisen carnel e tzaj tsma'n Dios inayena—tžixin.

²⁵ Pero te xuuj, e cub majexuj twitz Jesús, bix e cubsanxuj twitzxuj texin:

—Taat, chin tonentza.

²⁶ Bix aj ttzak'be'nxin texuj:

—Yaa'n tumel oj tel k'i'n cywa nee' tu'n t-xi' k'o'n cye txyan—tžixin.

²⁷ Pero e xi' tkba'nxuj:

—Jax toc tu'na, Taat. Pero tzintlpe cyyo'n txyan tjak' mes niy' q'uelel tz'ak ttx'akan cywa cyaawjil ttxa'n mes—tžixuj.

²⁸ Bix aj ttzak'be'n Jesús texuj:

—Naa, nimxix tocslabla wi'ja. Cbinel tajbila—tžixin. Bix jaxj hora e k'anj talxuj.

Tej tul cynaabl nim xjal tu'n Jesús

²⁹ Yajc'atltzen, bix etz Jesús cyuj tnóm lu, bix aj meltz'ajxin ttzii' tñijabel a' te Galilea. Bix e jaxxin twi' jun witz, bix e cub kexin. ³⁰ E pontzen nimxsen xjal tuyaxin. E xi' cyii'n kej xjal xt'unc, kej xjal cox, kej moš, kej men, bix kej xjal yaab, bix e cub cyk'o'n t-xee' tkenxin. Bix cykilca e k'anj tu'nxin. ³¹ Tejtzen cylonte xjal nbintl cyyolen men bix e cyaj ba'n ke xt'unc bix nchi bet ke cox juntl maj bix nbintl cycye'yen ke moš, e jaw klee'tzen ke xjal, bix e jaw cynimsa'n tbi Dios ncawen cyibaj aj Israel.

Tej t-xi' tk'o'n Jesús cywa cyaja mil xjal

(Mr 8:1-10)

³² Bixse e tzaj ttxco'nxin ke t-xnak'atzxin, bix e xi' tkba'nxin cyexin:

—Ma tz'oc k'a'ben nc'u'ja cyi'j xjala, cuma ma bint oxe k'ij cyten wuyena tzalu, bix mintzentii'tl cywa. Ncy'ya tu'n t-xi' nsma'na cye cyja mitkx nchi waa'n, cuma kape yaa'n yaj chi tzaj yumtz'aj tuj be tu'n weyaj—tžixin.

³³ Bix aj cytzak'be'n t-xnak'atzxin texin:

—¿Pero titzen tten tu'n tcnet waabj ku'na tu'n cynoj cykilca xjal lu? Min-al xjal najl tzalu—tžikexin.

³⁴ Bix e xi' tkba'nxin cyexin:

—¿Ite' mukan k'i'n cyu'na?

E xi' cykba'nxin:

—Wuuk k'i'n ku'na, cyuyax cab quis coc'—tzikexin.

³⁵ Bixse e xi' tkba'nxin tu'n cyncub ke cykil xjal twitz tx'otx'. ³⁶ Bixse e tzaj ttzyu'nxin jwuuk pan cyuyax quis, bix e xi' tk'o'nxin chjonte te Dios cyi'j, bix e cub tpa'nxin, bix e xi' tk'o'nxin cye t-xnak'atzxin tu'ntzen t-xi' cypa'nxin cyxol xjal. ³⁷ Cykilca xjal e waa'n tejxe cynoj. Bix e jaw cychmo'n ttx'akan waabj ya min otk baj cyu'n xjal, bix e noj wuuk chi'l. ³⁸ Kej e waa'n, cyaja mil xinak, bix at nimtl xuuj cyuya ke cyal e waa'n. ³⁹ Tej cybaj waa'n xjal, bix e xi' tkba'nxin cye tu'n cyaj cyja. Bix e cu'xxin tuj jun barc, bix e ponxin tuj tx'otx' te Magdala.

16

Ke xjal ncykane jun yec'bil te Jesús

(Mr 8:11-13; Lc 12:54-56)

¹ E pontzen tuya Jesús tzunkej xjal nimalxse tuj cyley, ejee'j xjal fariseo, cyuya jun cloj xjal saduceo, bix ak'kexin niy'belecte tnaabl Jesús tu'ntzen tcub tz'akxin tuj cywolxin. E xi' cykanenxin tu'n t-xi' tyee'c'axin tipemalxin tu'n tchic'ajax ka ju' otk tzajxin tuya Dios tuj cya'j. ² Pero aj ttzak'be'n Jesús cyexin:

—Oj n-ex k'ij, bix cyak t-xee' cya'j, tzin cykba'na: “Mintii' jbal nchi'j, cuma chic'aj t-xee' cya'j,” tzikey. ³ Bix oj kskix, ka cyak t-xee' cya'j, tzin cykba'na: “Tzul jbal ja'lewe, cuma cyak t-xee' cya'j, bix at k'ek muj,” tzikey, bix jax cyu'na. At cynaaba tu'n tel cyni'ya ti'j techel twitz cya'j, ¿pero titzen tten min n-el cyni'ya ti'j ti nbaj te Dios cyxola tuj tyem te ja'lewe? ⁴ Key xjal judío te ja'lewe, ka'key bix ma tz'el cypa'n cyiiba ti'j Dios. Min chin cyocslay, sino nuk ete'c'a kanlte weya mastl yec'bil. Pero jtechel tzin cykanena, mlay k'oj cyey. Oj pjel wi'ja tisenxj e baj ti'j tyolel Dios Jonás, jatzen c'ajbel te yec'bil cyey—tzi Jesús, bix exxin cyxolxin.

Cyxnak'tzbil fariseo yaa'n tuj tumel

(Mr 8:14-21)

⁵ Iy'xtzen Jesús cyuya t-xnak'atzxin jlajxe tnijabel a'. Pero tej cyponxin, min e cyna'n t-xnak'atzxin tu'n t-xi' cyii'nxin cywaxin. ⁶ Bix e xi' tkba'nxin cyexin:

—Cyc'ojlam cyiiba tuyaj cypan aj fariseo bix xsunj cypan aj saduceo—tzixin tuj ewjel ch'in ti'j cyxnak'tzbil fariseo bix saduceo.

⁷ Pero min el cyniy'xin ti'j tyolxin, bix ak'kexin yolel cyxolxxin:

—Min sul kii'n kwa, pero tcy'ixin tu'n lk'et pan cye fariseo oj ttzaj klok'o'n—tzikexin.

⁸ Pero el tniy' Jesús ti'j ti otk tz'e'la tyolxin tuj cywitzxin, bix e xi' tkba'nxin cyexin:

—Key xjal nuk ch'in n-oc ke cye'u'ja wi'ja, ¿tiken nchi yolena cyxolxa ti'j mintii' cyway?

⁹ ¿Mimpa ma tz'el cyni'ya ti'j ba'n t-xi' nk'o'na cyway? ¿Mimpa na'n cyu'na tej tcub npa'na jwwe' pan t-xol jwe' mil xinak, bix jte' chi'l ttx'akan pan e jaw cychmo'na tej cybaj waa'n xjal? ¹⁰ ¿Bix mimpa na'n cyu'na tej tcub npa'na jwuuk pan t-xol cyaja mil xinak, bix jte' chi'l ttx'akan pan e jaw cychmo'na? ¹¹ ¿Tikentzen min s-el cyni'ya ti'j yaa'n ti'j cyway xi' nkba'na cyey? Juntl maj cxe'l nkba'na cyey, cyc'ojlam cyiiba tuyaj cypan aj fariseo bix xsunj cypan aj saduceo—tzixin.

¹² Eltzen cyniy' t-xnak'atzxin ti'j min e tkbaxin tu'n cyc'ojlam cyiibxin tuyaj cypan aj fariseo bix aj saduceo, sino tuya tej cyxnak'tzbilxin.

Tej tkbante Pedro kaja Jesús Tcwal Dios, Jscy'o'n tu'n Dios

(Mr 8:27-30; Lc 9:18-21)

¹³ Tejtzen tpon Jesús tuj tnom te Cesarea te Filipino, e xi' tkanenxin cye t-xnak'atzxin:

—¿Alcye kena tuj cywitz xjal? ¿Ti toc cyu'n xjal ti'j xjal Sma'n tu'n Dios tu'n ntena cyuya xjal?

¹⁴ Bix aj cytzak'be'nxin:

—At xjal nkbante ka jay Juan Bautista. At juntl wik nkbante ka jay jtyolel Dios Elías. At juuntl tzin cykba'n ka jay Jeremías. Bix at juuntl tzin cykba'n ja loy juntl tyolel Dios te ootxa—tzikexin.

¹⁵ Bix aj tkanen Jesús:

—Yajtzen cyey, ¿altzen kena tuj cywitzza?

¹⁶ Bix aj ttzak'be'n jxin Simón Pedro:

—Ja teja Scy'o'n tu'n Dios te cawel, jay Tcwal Dios i'tz—tzixin.

¹⁷ Bix e xi' tkba'n Jesús te Pedro:

—Dios ma tzaj tk'o'n t-xtalbil tey, Simón, tcwal Jonás, cuma ja tumel lu yaa'n ma k'oj tey cyu'n xjal. Nuk o'cx Nmana tuj cya'j ma tzaj tyee'c'an jlu tey. ¹⁸ Cxe'l nkba'na tey, jay Pedro, bix “xak” japenina tbiy. C'oquela tisen jun xak c'ajbel te t-xee' jun jaa', bix ja jaa' lu kej xjal chi oquel lpe wi'ja. Bix mlay caman taaw il cyi'j nxjala. ¹⁹ Cxe'l nk'o'na tey tal jaa' tzi tcawbil Dios tuj cya'j. Jay kbalte ti pjel cyxol ntanema. Alcyej ctkba'y yaa'n ba'n tu'n tbiint

cyxol ntanema twitz tx'otx', q'ueleltzen ba'n tuj nwitzza tuj cya'j. Jax ju'x alcyey ctkba'y ba'n tu'n thint cyxol ntanema twitz tx'otx', chin cuyalazten tuj cya'j—tžixin te Pedro,²⁰ bix e xi' tkba'nxin cye t-xnak'atzxin tu'n mi'n jaa' tz'oca cykba'nxin ka jaxin Jscy'o'n tu'n Dios.

Tej tyole Jesús ti'j tcyamecy
(Mr 8:31–9:1; Lc 9:22-27)

²¹ Cyi'j ja tyem lu, ak' Jesús xnak'tzalec cye t-xnak'atzxin il ti'j tu'n t-xi'xin tuj Jerusalén, tu'ntzen tiy'x nim q'uixc'aj tu'nxin cyu'n nejenel cye xjal bix cyu'n nejenel cye pala bix cyu'n tx'olbal ley. E tkbaxin tu'n thyet-xin, bix cjawetz itz'jxin te toxen k'ij thyetlenxiltxin.

²² Pero min el tyol Jesús ba'n tuj twitz Pedro, bix ex ttxco'nxin ja Jesús cyjunalxin, bix ak' Pedro ocsalec tc'u'j Jesús tu'n mi'n tyolenxin ju'wa. E xi' tkba'nxin:

—Taat, mi'nxit tbyeta. Cutžit ka mi'n bint jlu ti'ja—tži Pedro.

²³ Pero aj tcyeyen Jesús bix e xi' tkba'nxin te Pedro:

—iCtela nwitzza, Satanás! Pedro, n-oc tona tey ja Satanás. Tcy'i Satanás japan baj waak'ena twitz tx'otx'. Jatzen tyolja tuyaj cyajibil xjal lepchec ti'j Satanás, yaa'n tuyaj tajbil Dios—tži Jesús texin.

²⁴ Bix e xi' tkba'ntl Jesús cye t-xnak'atz:

—Alcyey taj tz'oc lpe wi'ja, cyk'oncjtzen tik'ch cyaja, ojxe tcyaj cyk'o'na tzalu twitz tx'otx'. Cyk'a'y cyiiba te cyamecy tu'n lepchec wi'ja, tisenj weya twitz cruz chin byetela. ²⁵ Ja tzunj xjal tcy'i tz'oc lpe wi'ja cuma taj tz'oc tk'on tiib ti'j ti taj, cxe'l t-xoo'n tchunk'lal. Pero ja tzunj xjal cyjel tk'o'n tchunk'lal te twitz tx'otx' tu'nj lepchec wi'ja, ctcamantzen tchunk'lal te junx maj. ²⁶ ¿Ti c'ajbela cykilca twitz tx'otx' te jun xjal ka ma cyaj tk'o'n tchunk'lal te junx maj tu'n ttzyet tu'n? ¿Bix ma jte'tzen ctchja' jun xjal twi' tchunk'lal te junx maj, nuket jac'a tlók'? ²⁷ Chin ul meltz'aja twitz tx'otx' tuya tipemal Nmana bix cyuya tsanjel Dios tuj cya'j, bix ctzaal nk'o'na, inayena, jxjal Sma'n tu'n Dios tu'n ntena cyuya xjal, teeylex juun la' alcyey xbint tu'n. ²⁸ Jaxxix cxe'l nkba'na cyey, at juun cyey tcub tzalu min otk cyim ojxe toc ccyey'ena techel ti tten oj tul xjal Sma'n tu'n Dios tu'n tcawen—tži Jesús.

17

Tej tcub meltz'aj tcyey'nc Jesús
(Mr 9:2-13; Lc 9:28-36)

¹ Eltzen wukak k'ij, bix e xi' tii'n Jesús ja Pedro, tuya Jacobo, bixse Juan twi' jun witz nim. Cyjunalxin e xi'kexin. ² Cywytz tzunxin tej tcub meltz'aj tcyey'nc Jesús. E koptz'aj twitz tisen tken k'ij, bix tzinxsen ntxakakan t-xbalenxin. Otk tz'oc sak tilbil t-xbalen te junx maj. ³ Bix tujx naj ul jlet Moisés tuya Elías cywytzxin, bix e yolenkexin tuya Jesús. ⁴ Bix e xi' tkba'n Pedro te Jesús:

—Taat, jaxsen tbanel eto' tzalu! Ka ba'n tuj twitzza, cjaweltzen kbincia'na oxe ni' pach, jun te wey, juntl te Moisés, bix juntl te Elías—tži Pedro.

⁵ Mitkna'x thaj yolen Pedro tej tcub jun muj nkoptz'aj, bix e cyaj bajkexin tuj muj. Bix jey', tuj muj etztzen jun yol. Tži cyjulu:

—Jatzen xinj lu Ncwala n-oc tak' weya, bix nimxsen nchin tzalaja ti'j. K'o'nc cyc'u'ja ti' tyol—tži Dios tuj muj.

⁶ Tej cybinte t-xnak'atzxin ja yol lu, bi'xsen e cub ttži cyibaj, bix e cub mutzk'ajkexin twitz tx'otx'. ⁷ E tzajtzen lk'e Jesús cytxlaj, bix oc tmoco'nxin ejee'xin, bix e xi' tkba'nxin:

—Chi wey'tzen, bix mi'n tzaj ttži cyi'ja.

⁸ Tejzen toc ccyey'yenxin, ya min-alt ke xjal e cyilxin, nuk o'cx tjunal Jesús.

⁹ Cyajcatzzen meltz'ajkexin twi' witz, bix e xi' tkba'n Jesús cyexin:

—Mi'n txi' cykba'na te jun xjal ti jilel ma cyila, ojxe tjatz itz'j tuj cyamecy jxjal Sma'n tu'n Dios tu'n ntena cyxol xjal—tžixin.

¹⁰ Bix e xi' cykanen t-xnak'atzxin texin:

—i Tikentzenle nbyana cyu'n tx'olbal ley ka il ti'j tzul meltz'aj jxin Elías twitz tx'otx' nejl twitzj xin Sma'n tu'n Dios?—tži tzunkexin.

¹¹ Bix aj ttzak'be'nxin cyexin:

—Jax cyu'n tx'olbal ley nejl tzul meltz'ajte Elías te ninc'ul xjal. ¹² Pero cxe'lxixse nkba'na cyey, ya ma tzul Elías, pero min el cyniy' xjal ti'jxin, bix ju' tzunj e cub cybyo'n jaxin. Bix ju' pjel weya. Q'uuyelx nim q'uixc'aj wu'na cyu'n xjal—tžixin.

¹³ Bix el cyniy'xin ti'j e yolenxin ti'j Juan Bautista.

Tej tel tii'n Jesús biman ti'j junk'a cwal
(Mr 9:14-29; Lc 9:37-43)

¹⁴ Tej tzunj cypon meltz'ajkexin jaa' ete'j ke nimal xjal, ul junxin xjal tuya Jesús bix e cub maje twitzxin. Bix e xi' tkba'n texin:

¹⁵—Taat, k'ak'entz tc'u'ja ti'j ncwala, cuma ntzaj tuj twi'k'a bix nim niy'x q'uixc'aj tu'nk'a. Nim maj nxi' tz'ak tuj k'ak' bix tuj a'. ¹⁶ Xi' wii'na cyuya t-xnak'atza, pero mix xk'anjak'a cyu'n—tzi tmank'a otk tz'oc biman ti'jk'a.

¹⁷ Bix e xi' tkba'n Jesús:

—¿Mimpatzen-al xjal n-oc ke cyc'u'j wi'ja? ¿Cykilpakey min tz'el cyni'ya ti'j? ¿Jaa'tzen ta' cyocslabla? ¿Jte'ltzen maj cxe'l nyee'c'ana wipemala tu'ntzen toc ke cyc'u'ja wi'ja? Cyii'ntzna wuyena—tzi Jesús.

¹⁸ Bix oc cawenxin ti' biman, bix ex biman tex hora, bix e k'anj nee'.

¹⁹ Yajc'atltzen tej cycyajxin cyjunalxxin, e xi' cykanen t-xnak'atzxin texin:

—¿Tikentzen min xko xcyeya tu'n tel klojo'na biman?—tzikexin.

²⁰ Bix aj ttzak'be'nxin cyexin:

—Tu'nj yaa'n nimxix cyocslabla, mix s-etza biman cyu'na. Jaxxix cxe'l nkba'na cyey, nuket tz'oc ke cyc'u'ja ti' Dios, ikchetle ju' ch'in cyocslabla tisen jun twitz mostaza, jac'atzen txi' cyk'umena tej witz lu tu'n tjaw k'ukpaj tu'n t-xi' maa chix, ctcuyate witz. Ka min ma baj cyc'u'ja, cykilca ba'n tbint tu'n Dios cyey. ²¹ Pero tej jun wik biman lu mlay tz'el ka mitkx nchi na'ney Dios bix ka mitkx ncwa' cypa'na weyaj—tzi Jesús.

Tej tyole Jesús ti'j tcyamecy

(Mr 9:30-32; Lc 9:43-45)

²² Bix iy'kexin tuj departamento te Galilea, bix tej toc cychmon cyiibxin, e xi' tkba'n Jesús cye t-xnak'atzxin:

—Inayena, Jsma'n tu'n Dios tu'n ntena cyuya xjal, chin xe'l k'o'na tuj cyk'ab xjal. ²³ Chin byetela cyu'n, bix chin jawetz itz'ja te toxen k'ij nbyetlenixtla—tzixin. Bix nim e tzaj cybixxin tej cybintexin ja yol lu.

Jaj jun chojentj tu'n tajben tuj tja Dios

²⁴ Tejten cyponxin tuj Capernaum, ul kej xin chmol chojentj te nin tja Dios tuya Pedro, bix e xi' cykanenxin texin:

—Yajtzen cyey Cyxnak'tzal, ¿mi'mpale tzaj tk'o'nxin jchojbil tu'n tajben tuj tja Dios?—tzikexin.

²⁵ E xi' tkba'n Pedro:

—Tzin tk'o'nxin.

Tejten toc Pedro tuj jaa' jaa' e ten Jesús, e tzaj yolen Jesús nejl te Pedro:

—¿Ti toc tu'na, Pedro? Ke cawel at twitz tx'otx', ¿te alej chojentj tzin cykanen? ¿Cyepale cycwalxin, bix ka cyej niy'tl xjal?—tzi Jesús.

²⁶ Aj ttzak'be'n Pedro:

—Min. Nuk cye cyej niy'tl xjal n-el cykanen.

Bix e xi' tkba'n Jesús:

—Ju' tzunj, mintii' il ti'j tu'n t-xi' tk'o'n Tcwal Cawel twitz tx'otx' alcabala. ²⁷ Pero kcy'i tu'n koc ten cyakwusalte ke chmol chojentj. Ju' tzunj, cutxa tey ttzii' tnijabel a', bix xoo'nx tuj a' jun ganch te tzyul quí. Jtneel quí ctzyetel tu'na, jkonwa ttzijil. Cneteltzen jun pwak tuj ttzijil tu'na. K'intza, bix k'onxa cye chmol chojentj, tu'ntzen tchjet chojentj te weya bix te tej—tzi Jesús te Pedro.

18

jAyksen tej xjal ncub tk'o'n tzpetsabl tuj the juntl!

(Mr 9:42-48; Lc 17:1-2)

¹ Cyuj ja k'ij lu, e pon lk'e ke t-xnak'atz Jesús ti'jxin, bix e xi' cykanenxin texin:

—Oj tul tcawbil Dios tzul tuj cya'j, ¿alcyexjal mas jawnex tuj?—tzikexin.

² Tu'ntzen taj ttzak'be'nxin, e tzaj ttxco'nxin jun nee' ttxlajxin tu'n toc we' cywitzxin. ³ Bix e xi' tkba'nxin cyexin:

—Jaxxix cxe'l nkba'na cyey, ka min ma cub cych'ixpu'na cynaabla tu'n cyoca tisen ja nee' lu, mlay chi ocxa tuj tcawbil Dios tzul tuj cya'j. ⁴ Alj xjal ma tz'oc tk'on tiib tu'n toc te jun xjal maans tisen ja nee' lu, ja tzunja mas jawnex tuj tcawbil Dios. ⁵ Alj ma tkba ka il ti' jun nee', jaxse weya il wi'ja. ⁶ Pero alj xjal ncub tk'o'n tzpetsabl tuj the juntl yaa'n cyiuj tuj tocslabl tu'n t-xi' tzpet tuj the Dios, masetlpele ba'n oj tcub ye' jun xak al tkul, tu'n t-xi' xe't tuj mar. ⁷ jAyksen cyej xjal twitz tx'otx', cuma ncub cyk'o'n tzpetsabl tuj cybe juntl! Mlay we' at ocsabl c'u'j baj tu'n t-xi' tzpet jun xjal tuj the Dios. jPero ayksen tej xjal ncub tk'o'n tzpetsabl tuj the juntl!

⁸ Yaltzen ka ma chi cub tz'aka tuj il tu'n cyk'aba bix ka tu'n cykena, cytx'omela bix cyxoomexa. Mas ba'ntetpele oj tel tx'omet jun cyk'aba bix ka jun cykena tu'n cycyaja cox pero tu'n cyocxa tuj cya'j twitzj tu'n cyxi'y tuj k'ak' te junx maj tuya ca'ba cyk'aba bix ka ca'ba cykena. ⁹ Bix ka nchi jyona il tuya tbak' cywitzza, cyimetz bix cyxoomexa. Mas

ba'ntetpele tu'n cytena tuya junx tbak' cywitza twitz tx'otx' pero tu'n cyocxa tuj cya'j twitzj tu'n cyxi'y tuj k'ak' te junx maj tuya cyca'bel tbak' cywitza.

Jaj jun techel ti'j jun carnel e xi' tz'ak
(Lc 15:3-7)

¹⁰ Mi'n tz'el cyiiq'uena ke nee', cuma jaxxix cxe'l nkba'na cyey, n-oc cycye'yen tsanjel Dios tuj cya'j ti nbaj cyi'j, bix nchi pon kej ángel lu twitz Dios te kbalte texin ti nbaj.

¹¹ Il ti'j q'uelel cyni'ya ti'j o chin u'la te jyol cyej xjal o che'x tzpet, tu'ntzen cyclet wu'na, inayena, jxjal Sma'n tu'n Dios tu'n ntena cyuya xjal. ¹² ¿Ti toc cyu'na? Ka at jun cyel carnel, ka at syent tcarnelxin, bix ka ma txi' tz'ak junjil, ¿mi'mpa cya'j tk'o'nxin jnoventa y nuevejil jaa' ete'jil, tu'n t-xi'xin jyol tej jil otk cya'j tz'ak, tu'n tcnetjil? ¹³ Bix ka ma cnetjil tu'nxin, jaxxix cxe'l nkba'na cyey, mas ctzalajelxin ti'j ja jil lu twitzj noventa y nuevejil min e che'x tzpet. ¹⁴ Ju' tzunj, tzinen ta' tcy'i Cymana tuj cya'j tu'n t-xi' jun nee' tuj il.

Ti tten tu'n tcub knajsa'n til kermano
(Lc 17:3)

¹⁵ Ka at jun k'i'n tyol Dios tu'n bix ka ma tbincha il, cutxetey tuya tu'n t-xi' tkba'n te tu'n mi'n binchantl il, pero cyjunala tuya. Ka ma cya'j tk'o'n til, ma camana tu'n mi'n cyaj j-ocslala tuj til. ¹⁶ Pero ka min ma cya'j tk'o'n til, k'i'nx juntl ocslal bix ka ca'ba ocslal tuyey, tu'ntzen at ca'ba oxo tstiwa tu'n toc cycye'yen tii'n tnaabl j-ocslala. ¹⁷ Ka tcy'i binchal il tu'n toc tbi'n cyyola, kbanx cye cykilca ocslal tuj tja Dios. Ka ma tz'el tiiq'uen cyyol cykilca ocslal, yaa'ntlzen ocslal tuj cywitza, sino tisenca jun xjal yaa'n te ttanem Dios bix ka jun chmol alcabala.

¹⁸ Jaxxix cxe'l nkba'na cyey, ejee'y kbalte ti pjel cyxol ocslal twitz tx'otx'. Alcyej cxe'l cykba'na yaa'n ba'n tu'n tbin, ba'ntzen q'uelel cyyola tuj cya'j. Bix alcyej cxe'l cykba'na ba'n tu'n tbin cyxol ocslal, jax ba'ntzen q'uelel cyyola tuj cya'j.

¹⁹ Juntl maj cxe'l nkba'na cyey, ka at ca'ba cyey twitz tx'otx' junx ta' cykanbila te Dios, ctzaal k'o'n cyey tu'n Nmana Dios tuj cya'j. ²⁰ Chinel tu'n Nmana, cuma jaa' nchmet ca'ba oxo ocslal tu'n cyajben weya, ntii'n tzuna cyxol—tzi Jesús cye t-xnak'atz.

²¹ Bix e pon lk'e Pedro ti' Jesús, bix e xi' tkanenxin te:

—Taat, ¿jte' maj cwel nnajsa'na til jun xjal ka ma tbincha jun ka' wi'ja? ¿Yaa'mpa wuuk maj?—tzi Pedro.

²² Aj ttzak'be'n Jesús:

—Min nxi' nkba'na tey ka o'cx wuuk maj. Jatzen nxi' nkba'na tey tu'n tcub tnajsa'na cykilca maj, seya wuuk maj setenta. ²³ Jnbaj cyej xjal ttanem Dios tisenj e baj cyej xjal jun maj tjak' tcawbil junxin rey twitz tx'otx'. E tajbe rey tu'n tchjet texin cykilca cyc'asben t-ak'analxin. ²⁴ Tej cypon t-ak'analxin twitzxin tu'n tchjet cyc'asben, e pon k'i'n twitzxin jun t-ak'analxin nimxsen tc'asben. Laaj mil talento tc'asben. ²⁵ Pero mintii' tpwak. Ju' tzunj, e tkba rey tu'n t-xi' q'ueyet, tuyax t-xu'l, cyuyax tcwal, tuyax cykilca'j at te, tu'ntzen tk'oj pwak te rey. ²⁶ Tej tbinde t-ak'analxin jlu, bi'xsen e cub mutzk'ajxin twitz tx'otx' twitz rey, bix e xi' tcubsa'n twitz texin: “Taat, ten tpsensyia wi'ja, bix cxe'l nchjo'na cykilca nc'asbena tey,” tzi t-ak'analxin. ²⁷ Bix oc q'uiuxbe tc'u'j rey ti' t-ak'analxin, bix e xi' ttzakpi'nxin, bix e cub tnajsa'nxin cykilca tc'asben.

²⁸ Pero tej tetz jxin el libre, bix e xi'xin jyolte tej jun tuyaxin c'asbenel twitzxin. At ch'inee' tc'asben twitzxin. Bix e xi'xin tzyulte, bix oc t'xk'o'nxin tkul, bix e xi' tkba'nxin te: “K'ontz jtey tc'asbena jun syent denario weya.” ²⁹ Bix e cub mutzk'aj tuyaxin twitz tx'otx' twitzxin, bix e xi' tcubsa'n twitz texin: “Ten tpsensyia wi'ja, bix cxe'l nchjo'na nc'asbena tey,” tzi. ³⁰ Pero ja tzunj texin min e xi' tbi'nxin tuyaxin. Nuk o'cx ocx tk'o'nxin tuj tzee', tu'n mi'n tz'etz ojxe tchjet cykil tc'asben.

³¹ Tejzen toc cycye'yen niy'tl t-ak'anal rey ti otk baj, ka'xsen el tuj cywitzxin, bix e xi'kexin kbalte te rey ti otk baj. ³² Tbinetzen rey, bix e tzaj ttxco'n rey jaj xin ak'analxin otk najsaxin tc'asben, bix e xi' tkba'nxin te: “Jay ak'anal yaa'n ba'n, e cub nnajsa'na cykilca tc'asbena weya cuma e tzaj tcubsa'na twitza weya. ³³ ¿Yaa'mpatzen tu'n toc q'uiuxbe tc'u'ja ti' tuyey, tisen e xi' nk'o'na lastim tey?” tzi rey. ³⁴ Bix e tzaj tk'oj rey, bix e xi' tk'o'nxin tuj cyk'ab pjul xjal tu'n tq'uibaset nim ojxe tchjet cykilca tc'asben texin.

³⁵ Jax ju'x ctbincha' Nmana tuj cya'j cyi'ja ka min x cub cynajsa'na ke cyuyey tuya cykil cye'ja—tzi Jesús cye t-xnak'atz.

19

Tej tyole Jesús ti'j paxlenel
(Mr 10:1-12; Lc 16:18)

¹ Tejzen tbaj tkba'n Jesús kej yol lu cye t-xnak'atz, etzxin tuj Galilea, bix e xi'xin tuj jun lugar nka departamento te Judea jlajxe nima' Jordán. ² Bix nimxsen xjal oc lpe ti'jxin, bix e

cub tk'a'nexin kej xjal yaab jatzewe. ³Bix e pon cabxin fariseo tuyaxin. Nuktzen ti cyajaxin tu'n tcub tz'akxin tuj tyolxin. Ju' tzunj, e xi' cykanenxin texin:

—¿K'o'npale tu'n ley tu'n tel tpa'n tiib jun xinak ti' t-xu'l nuk tu'n tlaj jun tiixjati'?—
tzikexin.

⁴Bix aj ttzak'be'nxin cyexin:

—¿Bajxpa jaw cyši'na tuj tyol Dios ti toc tu'n Dios ti'j jun moj xjal tej tbint tu'n? Tzin tkba'n tyol Dios cyjulu: “E cub tbincha'nte Dios xinak tuya xuuj. ⁵Ju' tzunj cyjela tk'o'n xinak tman bix ttXu tu'n toc maje tuya xuuj. Cyca'beltzen chi elel tisen junx xjal bix tu'n cyel junx.” tzi tyol Dios. ⁶Ju' tzunj, yaa'n ca'batl cybet, sino tisen jun xjal mlay tz'el pax. Ju' tzunj, j-o tz'oc tmojba'n Dios te junx, yaa'n tu'n tcub cypa'n cyiib—tzi Jesús cyexin.

⁷E xi' cykba'nxin texin:

—¿Tikentzen e tcuya te Moisés tu'n t-xi' tk'o'n xinak jun u'j te xuuj tzin tkba'n otk chi cub pax?—tzikexin.

⁸Bixse aj ttzak'be'n Jesús cyexin:

—Ju'tzen tcyajlen tkba'n Moisés tu'n tex cylojo'na cyxu'la, pero tu'n cyyuwinela. Pero tuj tneel yaa'n ju' tewa. ⁹Jatzen weya, cxe'l nkba'na cyey, alj ma tz'el tpa'n tiib ti' t-xu'l, bix ka mintii' nbint tu'n t-xu'l, bix ma maje tuya juntl xuuj, tzin tbincha'n pajle—tzixin.

¹⁰E xi' cykba'n t-xnak'atz Jesús te:

—Ka ju' tten xinak tuya xuuj, masetpele ba'n tu'n mi'n maje jun xjal tuya jun xuuj—
tzikexin.

¹¹Pero aj ttzak'be'nxin cyexin:

—At juun xjal mas ba'n tu'n mi'n chi maje tuya jun xuuj. Pero mlay bint tu'n cykilca xjal tu'n mi'n maje, nuk o'cx kej xjal ma k'oj tu'n Dios tu'n mi'n chi maje. ¹²At juun xjal mlay tu'n cymaje cuma cyitz'jlenx mixbe tu'n cyoc ipan cyi' xuuj. At juuntl xjal mlay tu'n cymaje cuma ma chi cpet cyu'n xjal. Bix at juuntl xjal ma tz'oc cyk'on cyiib tu'n mi'n chi maje nuk tu'n cyajben te Dios tu'n ttz'iy tcawbil Dios. Alcyej xjal jac'a bint jlu tu'n, e tbinchante—tzi Jesús.

Tej tcub tcy'iwla'n Jesús ke nee'

(Mr 10:13-16; Lc 18:15-17)

¹³Yajc'atltzen, bix e xi' cyii'n xjal ke cynee' twitz Jesús, tu'ntzen tcub tk'o'nxin tk'abxin cyibaj, bix tu'n tna'nxin Dios cyi'j. Pero bix ak' ke t-xnak'atzxin te cawlec cye xjal.

¹⁴Pero e xi' tkba'n Jesús:

—Cytzakpi'nctz kej nee'wa tu'n cytzej wi'ja, cuma nuk ka ju' tanem jun xjal tisen ejee' nee'wa, ba'ntzen tocx tuj tcawbil Dios—tzixin.

¹⁵Bix e cub tk'o'nxin tk'ab cyibaj nee', bix exxin.

Tej tyole junk'a cwal k'ina tuya Jesús

(Mr 10:17-31; Lc 18:18-30)

¹⁶Ultzen junk'a xjal tuya Jesús, bix oc tkanenk'a te:

—Xnak'tzal ba'n, ¿alcyce ba'n cbinel wu'na tu'n ncamana nchunk'lala te junx maj?—tzik'a.

¹⁷Aj ttzak'be'n Jesús tek'a:

—¿Tikentzen nchin oca tk'o'na te ba'n? Min-alte jun xjal ba'n. Nuk ja te Dios ba'n. Yal tzunj tkanbila, ka taja tu'n tcamana tchunk'lala te junx maj, nimanx kej mandamyent e cyaj tk'o'n Dios—tzi Jesús.

¹⁸Bix e xi' tkanenk'a:

—¿Alcyetzen ke mandamyent tu'n tbint wu'na?

Bix e xi' tkba'n Jesús:

—Mi'n chi byona xjal. Mi'n chi jyona juntl xuuj te pajbaj. Mi'n chi alk'ana. Mi'n chi xtak'ena. ¹⁹Chi nimala twitz cymana bix cytxuy. Bix c'oquelxix tak' jun xjal cyey tisen n-oc cyey cyak' cyey—tzi Jesús.

²⁰Bix e xi' tkba'n jk'a xjal te Jesús:

—Cykilcaj lu o bint wu'na. ¿Alcyetzen juntl mina'x tbint wu'na?—tzik'a.

²¹E xi' tkba'n Jesús tek'a:

—Ka taja tu'n toca tz'aklxix, q'ueyex tik'ch tey, bix k'onxse twi' cye mebe. Ju'tze cnetela tk'inemala tuj cya'j. Ojtzen tbint tu'na, lpetztzen wi'ja—tzi Jesús.

²²Tej tbintek'a jyol lu, e tzaj tbsik'a bix exk'a, cuma k'ina xsunk'a.

²³Bix e xi' tkba'n Jesús cye t-xnak'atzxin:

—Jaxxix cxe'l nkba'na cyey, cyiwxsen tu'n tocx jun k'ina tuj tcawbil Dios. ²⁴Cxe'l nkba'ntl cyey, mas cyiw tu'n tocx jun k'ina tuj tcawbil Dios twitzj tu'n tex junjil tzej tuj txyo'p bak—tzixin.

²⁵Toctzen cybi'n t-xnak'atzxin jlu, e jaw klee'kexin, bix e xi' cykanenxin:

—Ka ju' ttena, ¿titzen ten tu'n tclet jun xjal?—tzikexin.

²⁶ Toctzen tcyeyenxin ejee'xin, bix e xi' ttzak'be'nxin:

—Cye xjal, mlay bint cyu'nx tu'n cyocx tuj tcawbil Dios. Pero jatzen te Dios, cykilca ba'n tbint tu'n—tzixin.

²⁷ Bix ak' Pedro kbalxte texin:

—Taat, ttziki'na o cyaj kk'o'na tik'ch keya tu'n koc lpeya ti'ja. ¿Alcyetzen ctzaal k'o'n keya? —tzi Pedro.

²⁸ Aj ttzak'be'n Jesús:

—Jaxxix cxe'l nkba'na cyey, oj toc cykilca te ac'aj, bix oj ncub keya tuj nk'ukbila jawnex tu'n ncawena tibaj cykilca, jax ju'x cyey, ejee'y ma chi oc lpeya wi'ja, ck'ojel cyey tu'n cycub key tuj cyk'ukbila tu'n cycawena cyibaj jcablaaj cloj tiy'jil Israel. ²⁹ Bix alcyey nuk wi'ja ma cyaj tk'o'n tja, bix ma titz'en, ttzicy, tman, ttxu, ke tcwal, ttx'otx', nimxsen ctzaal k'o'n te, bix ctiik'eltzen tchunk'lal te junx maj. ³⁰ Pero nim xjal nintzaj ja'lewe, ejee' tzunj chi oquela te ch'in tuj tcawbil Dios. Bix nim xjal yaa'n nintzaj ja'lewe, ejee' tzunj chi oquel te nintzaj tuj tcawbil Dios tzul—tzi Jesús.

20

Jun techel cyi'j ke ak'anal

¹ Bix e xi' tkba'ntl Jesús cye t-xnak'atz:

—Jpjel oj tul tcawbil Dios tisenj e baj jun maj tuj tawal jun xjal taaw tx'otx'. Ex taaw tx'otx' te kskix jyol ak'anal tu'n cyak'anan tuj tawal. ² E binttzen ti'j tu'nxin cyuya t-ak'analxin jun denario pwak twi' cyc'u'j jun k'ij. E cycuya ak'anal, bix e xi' tsmá'nxin ejee' tuj tawalxin.

³ Tej tpon beljaj hora te klax, ex taaw tx'otx' juntl maj, bix e tilxin cab xjal ete' tuj plaza mintii' cyaak'en. ⁴ Bix e xi' tkba'nxin cye: “Jax ju'x cyey, cyucxa cyey tuj wawala tu'n cyak'anana, bix oj tex k'ij, cxe'l nk'o'na cyk'ija,” tzixin.

Bix exkexin ak'anal.

⁵ Tej tpon chil k'ij, juntl maj ex taaw tx'otx' jyol ak'anal. Bix te oxe hora te kale, e jyonxin ak'anal tu'n cyak'anan tuj tawalxin. Bix te cykilca ak'anal, e xi' tkba'nxin tu'n t-xi' tk'o'nxin cyexin cyk'ijxin.

⁶ Tejtzen tpon tajlal jwe' hora te kale, juntl maj e xi'xin cyxol xjal, bix e cnet juun xjal tu'nxin mintii' cyaak'en. Bix e xi' tkba'nxin cyexin: “¿Tu'n tiken nuk n-ex cyk'ija wa'lkey tzalu?” tzixin.

⁷ E xi' cytzak'be'nxin: “Min-al jun xjal ma tzaj tk'o'n kaak'ena,” tzikexin.

E xi' tkba'nxin: “Cyucxa cyey cyuya juntl wak'anala tuj wawala, bix oj tbaj k'ij, cxe'l nk'o'na cyk'ija,” tzixin.

⁸ Tejtzen tex k'ij, e xi' tkba'n taaw tx'otx' te tmayordomo: “Txcontza ke ak'anal bix k'onxa twi' cyc'u'j. Nejl, k'onxa twi' cyc'u'j kej ak'anal e xi' ak'anal te yaj. Ja tzunj kej xi' ak'anal nejl, manc'biltzen cxe'l tk'o'na twi' cyc'u'j,” tzixin.

⁹ Tejtzen cyul kej ak'anal otk chi ak'anal te jwe' tajlal te kale, teeyle juun e cyiik' jun denario. ¹⁰ Ju' tzunj, tej cyul kej ak'anal otk chi ak'anal te klax, tuj cywitz at tu'n cychjet mas twi' cyc'u'j. Pero ju'x e chjeteke tu'n junx denario. ¹¹ Tej cyiik'ente twi' cyc'u'j te jun denario, e jaw yolenke ti' taaw tx'otx'. ¹² E xi' cykba'nxin: “Kej xjal lu xi' pon ak'anal te manc'bil, nuk junx hora xi' ak'anan. Pero ma txi' tk'o'na jun twi' cyc'u'j tisenx keya, bix ma ko sicta tuj ak'untl bix ma tziy'x ti' k'ij cykil k'ij ku'na,” tzikexin.

¹³ Pero aj ttzak'be'nxin te jun cyxolxin: “Jay wuyena, mintii' ka' tzin nbincia'na cyey. ¿Yaa'mpatzen xbint ti'j ku'n tu'n jun denario pwak twi' tc'u'ja? ¹⁴ K'inxa twi' tc'u'ja, bix cutxey. Cyey ak'anal xi' pon ak'anal te manc'bil, waja txi' nk'o'na jun twi' cyc'u'j junx tuyey. ¹⁵ Inayena taaw ntx'otx'a bix taaw npwaka. ¿Yaa'mpa tumel tu'n nbinchantiya alcyey waja ti'j jweya? ¿Tiken ma tzaj tk'o'ja tu'n ma txi' nk'o'na wanema cyey xjal lu?” tzi taaw tx'otx' te jun ak'anal.

¹⁶ Ju' tzunj, nim xjal nintzaj tuj cywitz ja'lewe, chi oqueltzen te ch'in tuj manc'bil k'ij. Bix nim xjal yaa'n nintzaj ja'lewe, chi oqueltzen te nintzaj la' alcyey jun k'ij—tzi Jesús cye t-xnak'atz.

Tej tyole Jesús juntl maj ka tu'n tcyim

(Mr 10:32-35; Lc 18:31-34)

¹⁷ Tej ch'itk tpon tumel tu'n t-xi' Jesús tuj Jerusalén, ex ttxco'nxin ke cablaaj t-xnak'atzxin cyjunalxxin tuj be, bix e xi' tkba'nxin cyexin:

¹⁸—Cybintz nyola. Ko xe'l tuj tnóm te Jerusalén, jaa'j chin xe'la k'o'n tuj cyk'ab ke nejenel cye pala bix ke tx'olbal ley. Ejee' tzunxin chi kbalte tu'n nbyeta, ¹⁹ bix cxe'l cykba'n tu'n nxi' k'o'na tuj cyk'ab nmak xjal te Roma. Ejee'tzen xinj chi oquel xmucchante weya, inayena, jxjal Sma'n tu'n Dios tu'n ntena cyuya xjal. Cxe'l cyk'o'n kej xjal yaa'n judío lu tz'u'n wi'ja,

bix chin cwel cybyo'na twitz cruz. Pero te toxen k'ij ncyimlena oj njaw itz'jla juntl maj—tzi Jesús.

Tej t-xi' tkane cytxu Juan bix Jacobo jun xtalbil te Jesús
(Mr 10:35-45)

²⁰ E pontzen twitz Jesús t-xu'l jxin Zebedeo cyuya talxuj, Juan bix Jacobo. E tajbexuj tu'n t-xi' tkanenxuj jun xtalbil, bix e cub majexuj twitzxin. ²¹ Bix e xi' tkba'nxin texuj:

—¿Alcye taja?

Aj ttzak'be'nxuj:

—Oj toc tey te cawel, waja tu'n cycawen kej ca'ba wala lu tuyey, jun tuj tmank'aba bix juntl tuj tneña—t'zixuj.

²² Pero aj ttzak'be'n Jesús:

—Min tz'el cyni'ya ti'j ti jilel ntzaj cykanena weya. ¿Jac'apatzen tziy'x cyey cyu'n oj tiy' a' cyc'u'ja tisenj at tu'n tiy'x wu'na?—t'zixin.

Bix aj cytzak'be'nxin:

—Chinel ke ku'n—t'zi tzunkexin.

²³ E xi' tkba'nxin cyexin:

—Jax cyu'na q'uiyal a' cyc'u'ja cyu'na tisenj weya. Yaltzen cykanbila weya, yaa'n inayenwe chin kbalte al ccawel wuyena oj woca te cawel. Jatzen ma txi' k'o'n tu'n Nmana te alcyekej tu'n cymbu oc cyi' xjal tjak' cycawen wuyena—t'zixin.

²⁴ T'octzen cybi'n jlaajtlxin t-xnak'atz Jesús tyol Jacobo tuya Juan, bix oc chi'l ch'inkexin. ²⁵ Pero e tzaj ttxco'n Jesús cykilcaxexin, bix e xi' tkba'nxin cyexin:

—Cytzki'ntl tzuna kej cawel te twitz tx'otx' nchi cawen tu'n t-xi' cyyee' an nim cyajwalel cye xjal. Bix cyiw nchi oc cyi' xjal tjak' cycawbil. ²⁶ Perotzen cyey cyxol, yaa'ntzen ju' ctemela tewa. Al tzun'j taj tu'n tten nintzaj cyxola, c'oquél tipen ti'j tu'n tajben cyey. ²⁷ Bix alcye taj tu'n toc te nejenel cyxola, nejl c'oquél te tajbel te cykilcatl cyey. ²⁸ Chi oquela tisen weya. Min in ula tu'n cyajben xjal weya. Nuk o'cx in ula tu'n wajbena cye xjal, bix tu'n t-xi' nk'o'na nchun'lala tu'n cyco'pj nim xjal tuj tk'ab il—t'zi Jesús.

Tej tul tnaabl cywitz ca'ba moš tu'n Jesús
(Mr 10:46-52; Lc 18:35-43)

²⁹ Yajc'atltzen, bix e pon Jesús cyuya t-xnak'atz tuj tnom te Jericó. Tejtzen cyetz Jesús tuj Jericó, nimxsen xjal oc lpe ti'jxin. ³⁰ Attzen ca'ba xjal moš k'uklc'a tzii' be. Tej cybintexin t'z'ul Jesús, e jawxsen š-inkexin:

—Taat, tiy'jil David, k'ontza lastim keya—t'zixexin.

³¹ Kej xjal ete' tuya Jesús, oc ilente ke moš tu'n mi'n tz'el cywi'. Pero mas el cyši'nxin cywi'xin, bix e xi' cykba'nxin juntl maj:

—jTaat, tiy'jil David, k'ontza lastim keya!—t'zixexin.

³² Tej toc tbi'n Jesús ke moš, bix e we'xin, bix e xi' tsma'nxin xjal tu'n t-xi' cyii'n ke moš twitzxin, bix e xi' tkba'nxin cyexin:

—¿Ti cyaja tu'n t'bhint wu'na cyi'ja?—t'zixin.

³³ Bix aj cytzak'be'nxin texin:

—Taat, k'ontza keya tu'n kcyey'ena—t'zixexin.

³⁴ Bix e jaw tlastim Jesús cyi'jxin, bix oc tmoco'nxin tbak' cywitzxin. Bix n-ultl tnaabl tbak' cywitzxin, bix ak' xe'l lpekexin ti'jxin.

21

Tej tocx Jesús tuj tnom Jerusalén

(Mr 11:1-11; Lc 19:28-40; Jn 12:12-19)

¹ Tejtzen cypon Jesús tuj tnom te Betfagé, jun coc' tnom tcub t-xee' jwitz Olivos tbi bix nka Jerusalén, e xi' tsma'n Jesús ca'ba t-xnak'atz. ² E xi' tkba'nxin cyexin:

—Cyucxatzen tuj jni' tnom n-oc kcyey'en jatze. Oj cypona, c'oquél ccyey'ena junjil bur yo'lecjil, bix tuyax jun taljil ttxlajjil. Cypjumeltzen cyca'beljil, bix cyii'ntz t'zalu. ³ Katzen al ma tz'oc kanente cyey tiken n-el cypju'na ke jila, cxe'l cykba'na: “Ejee' jilja chi c'ajbel te Kaawa,” t'zi cybela, bix chi t'zaal tk'o'n naj texin ejee'jil—t'zixin.

⁴ E baj jlu tu'ntzen tel jax j-e tkba Dios tu'nj tyolel jatxe ootxa. E tkba Dios te tyolel cyjulu: ⁵ “Khanx cye xjal te Israel aj Sión cyjulu: ‘C'ulel Cycawela cyuyey. Maansxin, bix tjaxxin tibaj jun tal bur ikel iktz'oj tulxin,’ t'zi t'zela,” t'zi Dios te tyolel.

⁶ Bix e xi'kexin, bix e cybinchaxin tisen e xi' tkba'n Jesús cyexin. ⁷ Bix e xi' cyii'nxin bur tuyax taljil te Jesús, bix e jax cyk'o'nxin cyxbalenxin tuj tzalcyi'jil te jun k'ukbil, bix e jax cyk'o'nxin Jesús tibaj xbalen. ⁸ Bix e xi' bet bur, bix nimxse xjal e bet tuyaxin, bix e cub cyk'o'n cyxbalen tuj tbexin. Atl xjal el cytx'omen tk'ab xa'j tu'n tcub cyk'o'n tuj tbexin. ⁹ Bix cykilcaxsen xjal nejl twitzxin bix lephc tzinxsen nchi š-in:

—¡Tcy'iwlaxit tchman David, jaj Kcawel! ¡Chjonte te Dios ti'j ja xjal lu o tzul sma'n tu'nxin te cawel! ¡Jawxit nimset tbi Kaaw Dios tuj cya'j!—tzi ke xjal.

¹⁰ Tejtzen tocx Jesús tuj Jerusalén, e jaw klee' ke xjal ti'j tñimal xjal nchi ocx lpe ti'j Jesús, bix e xi' cykba'n:

—¿Alcey ja xjal lu?

¹¹ Bix aj cytzak'be'n kej xjal lepchech ti'j Jesús:

—Ja te Jesús tyolel Dios, aj Nazaret tuj Galilea—tzi ke xjal.

*Tej tetz tlojo'n Jesús ke q'ueyel tuj tja Dios
(Mr 11:15-19; Lc 19:45-48; Jn 2:13-22)*

¹² Bix ocx Jesús tuj nin tja Dios bix etz tlojo'nxin kej xjal ete'cx lok'ol bix q'ueyel tuj tja Dios. Bix e jaw tpa'ctz'enxin kej mes cyej xjal ch'ixpul twitz pwak tuyax cyk'ukbil cyej xjal nchi q'ueyen cucu'. ¹³ Bix e xi' tkba'nxin cyexin:

—Tzin tkba'n tyol Dios cyjulu: “Il ti'j tu'n tajben njaya te nablte nbi'ya,” tzi Dios. Pero cyej, ma tz'oc cyk'o'na te jun cyja alak'—tžixin.

¹⁴ Bix ultzen kej xjal moš bix kej xjal cox tuya Jesús tuj tja Dios, bix e cub tk'a'nexin cykilca. ¹⁵ Pero cyej nejenel cye pala bix cyej tx'olbal ley, tej cylonte jjawnex tipemal e xi' tyeec'an Jesús, bix tej cylonte hasta ke nee' nchi š-in tuj tja Dios: “¡Tcy'iwlaxit tchman David, jaj Kcawel!” e tzaj cyk'oj ti' Jesús. ¹⁶ Bix e xi' cykba'nxin texin:

—¿Tzimpa tbi'na jnxi' cykba'n kej nee' lu?—tžikexin.

Bix aj ttzak'be'nxin:

—Tzin. Yajtzen cyej, ¿bajxpa jaw cyši'na tuj tyol Dios ti toc tu'n ti'j lu? Tzin tkba'n cyjulu: “Te cyej nee' bix žlak nchi ch'u'n, o txi' tk'o'na tu'n tjaw cynimsa'n tbi'ya,” tzi jun xjal te Dios—tzi Jesús.

¹⁷ Bix e cyaj tk'o'nxin ke xjal, bix etzxin cyuya t-xnak'atzxin tuj tnom te Jerusalén, bix e ponxin tuj tnom te Betania, jatztzen e cyja'xin te koniyan.

*Tej ttzkij tken higo tu'n tyol Jesús jaj mintii' twitz
(Mr 11:12-14, 20-26)*

¹⁸ Tetzen juntl k'ij te klax, tej cypon meltz'aj Jesús tuj Jerusalén, oc tak' weyaj texin tuj be. ¹⁹ E xi' tcyeyenxin jun wi' lo'p'j higuera tcub ttzii' be. Pero tejtzen tpon lk'exin ti' tken higuera, mintii' twitz e cnet tu'nxin. Nuk o'cx t-xaak at. Ju' tzunj, e xa' tkba'nxin te tken higuera:

—Junxse maj mlayx tz'octl twitza—tžixin. Bix tujx naj e tzkij jtken higuera.

²⁰ Tej cylonte t-xnak'atzxin ti otk baj, e jaw klee'kexin, bix e xi' cykanenxin:

—¿Titzen tten xtzkij tken higuero tujx naj?—tžikexin.

²¹ Bix aj ttzak'be'n Jesús cyexin:

—Jaxxix cxe'l nkba'na cyey, ka ma ke cye'u'ja ti' Dios, bix ka min ma baj cye'u'ja, yaa'n nuk o'cx jac'a bint tu'n ttzkij tken higuera cyu'na, pero oj t-xi' cykba'na tej witz lu tu'n tjaw k'ukpaj tu'n t-xoo'n tiib tuj mar, ctcuyate witz. ²² Bix cykilcaj cxe'l cykanena te Dios, ka ma ke cye'u'ja ti'j, ccyiik'ela—tzi Jesús.

*Tej cyjyo'n nejenel cyepala jun k'oj tuya Jesús
(Mr 11:27-33; Lc 20:1-8)*

²³ Tej tocx Jesús tuj nin tja Dios, ak'xin xnak'tzal. Bix e pon lk'e kej nejenel cye pala bix kej nejenel cye xjal ti'jxin, bix e xi' cykba'nxin texin:

—¿Titzen jilel toclena tu'n tbinchantiya cykilcaj lu? ¿Bix al ma tz'oc k'onte tajwalela tu'n tex tlojo'na ke q'ueyel tuj tja Dios ewe?—tžikexin.

²⁴ Bix aj ttzak'be'nxin cyexin:

—Jax ju'x weya cxe'l nkanena cyey. Ka ma tzaj cykba'na weya alcey nkanbila cyey, jaxse jac'a txi' nkba'nwe cyey tuya alcey wajwalela ncwa' nbincha'na cykilcaj lu. ²⁵ Tej cybautizarj xjal tuj a' tu'n Juan Bautista tu'n binne cyten xjal tej tul jxjal Scy'o'n tu'n Dios, ¿jaa' e tzaa' tajwalelxin, tu'npa Dios tuj cya'j, ma tu'npa xjalj?—tžixin.

Bix ak' kej xin pala bix kej tx'olbal ley yolel cyxolx ti tten tu'n taj cytzak'be'nxin:

—Katzen ma txi' kkba'n ka ja Dios e tzaj k'onte taak'en Juan, bixse c'aaltz tkba'nxin ka tu'n tiken min oc kbi'na tyol Juan. ²⁶ Pero ka ma txi' kkba'n e tk'umen Juan nuk txxin tyolxin, q'uelel cyiik'uen xjal ejoo', cuma tuj cywitz xjal, tyolel Diosxin—tžikexin.

²⁷ Ju' tzunj, e xa' cykba'nxin te Jesús:

—Min ktzki'nke—tzi tzunkexin te Jesús.

Bix aj ttzak'be'nxin cyexin:

—Jaxne mlay txi' nkba'na cyey al e tzaj k'onte weya woclen.

Jun techel cyi'j ca'ba cwal

²⁸ Pero cxe'l nkanena cyey, ¿ti toc cyu'na ti'j ja techel lu? At junxin xjal at ca'ba tcwal. E ponxin tuyaj tcwalxin mas nim bix e xi' tkba'nxin: "Ncwala, waja tu'n tak'anana tuj wawala ja'lewe." ²⁹ Bix aj ttzak'be'nk'a: "Min chixa." Pero yajxiltzen, ajtztl ti' tanemk'a, bix e xi'k'a. ³⁰ Jax ju'x e ponxin tuya juntl titz'enk'a, bix e xi' tkba'nxin: "Ncwala, waja tu'n tak'anana tuj wawala ja'lewe." Aj ttzak'be'n tcwalxin: "Cu, taat." Pero min e xi'k'a. ³¹ Tuj cywitza, ¿alcyetzen cyxol cyca'bel k'a e cybinchak'a tajbil cymank'a?—tzi Jesús.

Aj cytzak'be'nxin:

—Jaj k'a tzicbaj.

Bix e xi' tkba'n Jesús cyexin:

—Jaxxix cxe'l nkba'na cyey, mas cyiw tu'n cyocxa tuj tcawbil Dios cywitzj kej xjal chmol chojentj bix kej xuuj aj paj. ³² Tzin nkba'na jlu cyey cuma tej tul Juan Bautista kbalte ti tten tu'n cyoca jiquen twitz Dios, min e cyocslay jaxin. Pero kej chmol chojentj bix kej xuuj aj paj, tej cybinte jaxxix tyolxin, e cyocsla tyolxin. Pero cyey, amale e cyileta ncyaj cyceye'yen xjal cyil, pero min ajtz ti' cyanema tu'n cyocslana tyol Juan Bautista.

Jun techel cyi'j ak'analyaa'n ba'n

(Mr 12:1-12; Lc 20:9-19)

³³ Cybinxa juntl techel. At junxin xjal e cu'x tawa'nxin cab tken uva bix oc tk'o'nxin penwen ti'j. Bix e jaw tbincha'nxin jun ttemlel uva tu'n tel vino ti'j, bix e jaw tbincha'nxin jun jaa' nim twe' te c'o'jlablte tawalxin. Bix e cub tninc'u'nxin cyuya manal tx'otx' tu'n t-xi' cyceye'yen ti'j tawalxin. Bix exxin tuj tbexin. ³⁴ Tejtzen tpon tumel tu'n t-xilj uva, e xi' tsma'nxin cab tsanjelxin cyuya manal tx'otx' te k'ilte jun tk'iy' twitz uva. ³⁵ Pero tejtzen cypon tsanjelxin, bix oc cypju'n manal tx'otx' jun tsanjelxin, bix e cub cybyo'n juntl, bix toxen oc cyxoo'nxin tuya xak. ³⁶ Bix e xi' tsma'n taaw tx'otx' juntl cloj tsanjelxin cyuya t-ak'analxin, mas cybet cywitzj kej e tzaj tsma'nxin nejl. Pero juntl maj e cybincha t-ak'analxin cyi'j tisen e cybincha nejl. ³⁷ Manc'biltzen e xi' tsma'nxin tcwalxin, bix e xi' tkba'nxin: "Il ti'j cybi' manal tx'otx' ncwala oj tpon," t'zixin tuj tanemxin. ³⁸ Pero tej t-xi' cyceye'yen ke manal tx'otx' tcwalxin, e xi' cykba'nxin cyxolx'in: "Lu jk'a tcwal jxin taaw tx'otx' tzule. Tele tek'a cyjele ja tx'otx' e te tkabk'a. Ko kbya'c'ak'a, tu'ntzen tcyaj te ke," t'zixekin. ³⁹ Bix e tzaj cytzyu'nxin jak'a, bix ex cyii'nxin tuj cojbil, bix e cub cybyo'nxin. ⁴⁰ Cxe'l nkanena cyey, ¿ti ctse' jxin taaw awal kej t-ak'analxin oj tulxin?—tzi Jesús cye pala bix tx'olbal ley.

⁴¹ Bix aj cytzak'be'nxin te Jesús:

—Chi cwel tbyo'n taaw tx'otx' kej ka' manal tx'otx', bix cninc'ulxin ti'j cyuya cabtl xjal tu'n t'cub cypa'nxin cyawalxin tuyaxin oj tpon tumel—t'zixekin.

⁴² E xi' tkba'n Jesús cyexin:

—Tisen el iiq'uet tcwal taaw tx'otx', ju'xsen q'uelel iiq'uet jxjal Scy'o'n tu'n Dios. ¿Bajxpa cyila tuj tyol Dios ti toc tu'n ti'j jlu? Tzin tkba'n cyjulu: "Jxak el cyiiq'uen ke binchal jaa', c'o'quel xak tej xak mas nintzaj te t-xee' jaa'. Jatzen Dios cwel meltz'unte xak te tbanel xak. Ju' tzunj, axse q'uelela tuj kwitz," t'zi tyol Dios. ⁴³ Cxe'l nkba'na cyey, cuma ma tz'el cyiiq'uenta Tcwal taaw tx'otx', ju' tzunj, q'uelel k'i'n tcawbil Dios cyi'ja, ejee'y tnom te Israel, tu'ntzen t-xi' k'o'n te jun wik xjal cyaj txi' cyk'o'n te Dios cuma t'exin. ⁴⁴ Ja xak ma tz'el iiq'uet, jatzen xak kbalte ti' p'jel cyi' xjal. Alj xjal ncub tz'ak twi'j xak lu, bi'x cwel buchj tu'n, bix oj ttzaj tz'ak jxak lu tibaj jun xjal, bi'x cwel patz'ex—t'zi Jesús cye nejenel xjal te Israel.

⁴⁵ Tej cybinte nejenel cye pala cyuyax ke fariseo ke techel e tkba Jesús, el cnyiy' ti'j ka cyi'jxin otk yolena Jesús. ⁴⁶ Pero tej toc cyipenxin ti'j tu'n ttzyet Jesús cyu'nxin, mintzen e cytzyuxin jaxin tu'n cytzi jxjal lepchech ti'jxin, cuma tuj cywitz xjal, tyolel Diosxin.

22

Jun techel ti'j mejoblenel

(Lc 14:15-24)

¹ Bix e xi' tkba'ntl Jesús tuya yol min e tx'olbaxixxin ti tten cye nejenel cye xjal. E xi' tkba'nxin:

² —Jp'jel tuj tcawbil Dios tisenj e baj jun maj tej tbincha junxin rey jun nim waabj tu'n tiy'sanxin jmejoblenel tej tmaje tcwalxin. ³ E xi' tsma'nxin ke tsanjelxin te txcol cyej xjal otk txi' tkba'nxin cye tu'n cyul tuj mejoblenel. Pero ccyi' tu'n cyul. ⁴ Ju' tzunj, e xa' tsma'nxin cabtl tsanjelxin, bix e xi' tkba'nxin cyexin: "Cykbanxa cyej xjal e nttxoca: 'Lu ma bint jun nin waabj wu'na te cyey. Ma chi cub wacx' wu'na cyuyax juntl alimaj tbanelxix. Cykilca ma bint tten. Cytzaj tzuna tuj mejoblenel,' t'zi cybela," t'zi cawel cye tsanjelxin. ⁵ Pero min e xi' cybi'n xjal. Nuk o'cx e xi' cyii'n cychunk'lal tisex tten. At jun e xi' ak'anal tuj tawal. At juntl e xi' ak'anal tuj tq'ueybil. ⁶ Bix ke niy'tl xjal, e tzaj cytzyu'n ejee' sanjel, bix oc ten yasel cyi'j, bix e cub cybyo'n ejee'. ⁷ Tej thinte cawel ti otk baj, e tzaj nimxsen tk'oj, bix e

xi' tsuma'nxin ke tsoldadoxin tu'n t'cub cybo'n kej byol xjal bix tu'n t'cub cypaten cytanem.
⁸ Bix e xi' tkba'nxin cye tsanjelxin: "Binne tten nin waabj te mejoblenel. Pero kej xjal e ntxoca, yaa'n ba'nke. ⁹ Ju' tzunj, cyucxa cyey tuj cojbil tu'n t'cnet xjal nchi bet cyuj be cyu'na, bix cykbanxa cye tu'n cyul tuj mejoblenel," t'zixin. ¹⁰ Bix e xi' ke tsanjelxin cyuj be ti'jxe tnom, bix e tzaj cytxco'nxin cykilca xjal e cnet cyu'nxin, kej xjal ba'n cyuyax kej xjal yaa'n ba'n tuj cywitzt xjal, bix e noj jaa' te mejoblenel cyu'n xjal otk chi tzaj txco'n. ¹¹ Pero tej tocx cawel tuj jaa' cyey'lte cye xjal otk chi chmet, e tilxin junxin xjal yaa'n t-xbalena toc jnajben te mejoblenel. ¹² Bix e xi' tkba'nxin te: "Jay wuyena, zti ma t'z'octzey bix yaa'n toc t-xbalena te mejoblenel?" t'zi cawel. Pero jatzen te xjal, mintii' aj t'z'ak'be'n. ¹³ Bix e xi' tkba'n cawel cye tsanjelxin: "Cy'po'nc ke tk'ab cyuyax tken, bix cyxoomex tuj kloj, jatzen cok'ela bix kkitx'itx'il t-xee' twitz te," t'zixin. ¹⁴ Tzin nkba'na cyey, cykilca xjal o tzaj txco'n tu'n Dios tu'n cyocx tuj tcawbil, pero yaa'n te cykilca k'o'n tu'n cyocx—t'zi Jesús cye nejenel cye xjal.

Jun tumel ti'j chojentj te César
 (Mr 12:13-17; Lc 20:20-26)

¹⁵ Yajc'atltzen, bix e chmet ke aj fariseo, bix e yolen cyxolx ti tten tu'n t'cub t'z'ak Jesús tuj jun tyolxin. ¹⁶ Bix e xi' cysma'nxin cab cyxnak'atz yaa'n ba'n tuj cywitzt tu'n cychjet chojentj tej rey Cesar, cyuyax cab xjal tej cloj Herodes ba'n tuj cywitzt tu'n cychjet chojentj te Cesar. Bix e xi' cykanen kej sanjel lu te Jesús:

—Taat Xnak'tzal, ktzki'na jax tey tyol. Mintii' cytzi ti'ja te kbalte cye cykilca xjal ti taj Dios. Min t'z'aj tk'on tey tiib tuya juntl xjal. Min t'z'oc t'cye'yen tey ti'in ke xjal oj n-ak'a ninc'ul xjal. ¹⁷ Ju' tzunj, kbantz keya, zt'ajpa Dios tu'n t-xi' kk'o'n te cawel te Roma jchojentj tzin t'kanen ke, bix ka min?—t'zixekin.

¹⁸ Pero el tniy'xin ti'j ka' iy' tuj cyc'u'j, bix aj t'z'ak'be'nxin:

—Ke cyey xjal ca'ba twi' cyanema, ztikentzen ncwa' cyk'o'na c'o'bil tuj nbe'ya tuya cyyola?

¹⁹ Cyk'ontza jpwak chojentja weya—t'zixin.

Bix e xi' cyk'o'nxin jun pwak texin.

²⁰ Bix e xi' t'kanenxin cyexin:

—zAle jwitzbaj bix ale jbiybaj t'cub twitzj pwaka?—t'zixin.

²¹ Aj cytzak'be'nxin:

—Te cawel te Roma—t'zixekin.

Bix e xi' tkba'nxin cyexin:

—Kane ju'wa, cyk'onxne te cawel te Roma alcey te, bix cyk'onx te Dios alcey te Dios—t'zixin.

²² Tej cybintexin jlu, e jaw klee'kexin, bix e cyaj cyce'yenxin, bix exkexin.

Jun kanbil ti'j itz'jlenel tuj cyamecy
 (Mr 12:18-27; Lc 20:27-40)

²³ Tujx k'ij lu e pon tuya Jesús juntl cloj xjal, saduceo tbi cycloj. E cykbaxin ka oj t'cyim jun xjal, mintii' tu'n t'jatz itz'j. Bix e xi' cykanenxin texin:

²⁴ —Taat Xnak'tzal, e cyaj t'z'i'ben Moisés cyjulu: "Ka ma cyim jun xinak, bix ka min-al t'cwal, il ti'j tu'n t'maje jun t'zicy ma t'z'en tuya t-xu'l, tu'ntzen t'z'j'en jun tiy'jil, tu'ntzen mi'n naj tiy'jil," t'zi tley Moisés. ²⁵ Atzen jun maj at wuuk xjal cyitz'en cyiib e ten xkola. E maje cytzicy tuya jun xuuj, pero e cyimxin. Pero min-al t'cwalxin e cyaj. Ju' tzunj, e maje tneel t'z'enxin tuya t-xu'lxin. ²⁶ Pero jax ju'x e cyimxin, bix min-al t'cwalxin e cyaj. Ju'x e baj te toxen. Cykilcaj wuuk e maje tuya junx cyxu'lxin, bix cykilcakexin e cyimkexin, bix min-alx jun cyexin itz'j t'cwal tuya xuuj. ²⁷ Manc'biltzen, bix e cyim xuuj. ²⁸ Ojzen cyjatz itz'j ke cyimne juntl maj tuj cyamecy, zaltzen cyxolj wuuk xinak c'o'quel te tchmil ja xuuj? Tzinen ta' mintii' t' kchunk'lam oj kcyim, cuma ka at, iletle ti'j tu'n cyoc cykilcaj wuuk xinak te tchmilxuj, bix yaa'n tumel jlu—t'zixekin.

²⁹ Pero aj t'z'ak'be'n Jesús cyexin:

—Junxse maj tzpetpajninkey. Min cytzki'na ti toc tu'n tyol Dios, bix min cytzki'na at nim tipemal Dios tu'n t'jatz t'z'jsa'ntl t-xumlal jun xjal cyimne. ³⁰ Oj cyjatz itz'j cyimne juntl maj, mlay chi maje xjal juntl maj, sino chi ouel tisen ke ángel tuj cya'. ³¹ Tuj cywitzt, oj c'cyim xjal, cyimneke te junx maj. zPero bajxpa t'z'oca cyc'u'ja ti'j ti toc tu'n Dios? E xi' tkba'n cyjulu: ³² "Inayena Tdios Abraham bix Tdios Isaac bix Tdios Jacob," t'zi Dios. Kej yol lu tzin cyyee'c'an i'tz kej xjal o chi cyim, cuma yaa'n Cydios cyimne texin, sino Cydios i'tz texin—t'zi Jesús cye saduceo.

³³ Tej cybinte t'nimal xjal jlu, e jaw klee'xsen ti' t-xnak'tzibilxin.

Jmandamyent mas il ti'j tuj tcawbil Dios
 (Mr 12:28-34)

³⁴ Pero tej cybinte fariseo otk caman Jesús cyibaj saduceo, e baj cychmon cyiib te yolel cyxolx ti tten tu'n tel cyii'n tipemal Jesús tuj cywitz xjal. ³⁵ At junxin tx'olbal ley cyxolxin e pon tuya Jesús, bix tu'n tcub tz'akxin tuj tyolxin, e xi' tkanen tx'olbal ley texin:

³⁶ —Taat Xnak'tzal, ¿altzen cyej mandamyent tuj tcawbil Dios mas il ti'j?—tzi tx'olbal ley texin.

³⁷ Bix aj ttzak'be'nxin:

—C'oquelix tak' Cyaawey Dios cyey tu'n cykil cyc'u'ja bix tu'n cykil cyanema bix tu'n cykil cynaabla. ³⁸ Jatzen mandamyent lu ja mas nintzaj. ³⁹ Bix tcab tmandamyent Dios tisen tneel. Tzin tkba'n: "C'oquelix tak' jun xjal cyey tisenx n-oc cyak' cyiiba cyey," tzi ley te Dios. ⁴⁰ Tu'nj tzin cynimana kej ca'ba mandamyent lu, tzin cynimana cykilcatl mandamyent tuj tley Moisés bix tuj tyol Dios tz'i'bet cyu'n tyolel Dios—tzi Jesús.

¿Ale cwalbaj Cristo tuj cywitza?

(Mr 12:35-37; Lc 20:41-44)

⁴¹ Jooc'tzen cychmonx cyiib fariseo, e xi' tkanen Jesús cyexin:

⁴² —¿Ti toc cyu'na ti'j jxjal Scy'o'n tu'n Dios? ¿Ale cwalbaj tuj cywitza?

Bix aj cytzak'be'nxin:

—Te David.

⁴³ E xi' tkba'nxin cyexin:

—Ka nuk tcwal David Jscy'o'n tu'n Dios, ¿titzen tten jax David e kbante tu'n tipemal Espíritu Santo ka Jscy'o'n tu'n Dios Taawxin? E xi' tkba'n David cyjulu: ⁴⁴ "E tkba Dios te Waaweya: 'Kequey tuj nmank'aba te tneel xjal. Tcyaja tzalu hasta ojxe cyocx k'ojlel ti'ja tjak' tkena wu'na,' tzi Dios te Waaweya," tzi David. ⁴⁵ Katzen jax David oc k'onte Scy'o'n tu'n Dios te Taaw at-xxe k'ij, ¿titzen tten ka tcwalxin jxjal Scy'o'n tu'n Dios?—tzi Jesús.

⁴⁶ Min-al jun cye e cnet yol tu'n tu'n t-xi' ttzak'be'n texin. Bix ya min-al juntl e tnimsa tiib tu'n tbaj t-xkelelnt texin.

23

Tej tyole Jesús ti'j cymodo tx'olbal ley bix kej fariseo yaa'n ba'n

(Mr 12:38-40; Lc 11:37-54; 20:45-46)

¹ Bix e xi' tkba'n Jesús cye t'nimal xjal bix cye t-xnak'atzxin:

² —Ke tx'olbal ley bix ke fariseo, cye cyaak'en tu'n cyk'onte xnak'tzibil ti'j tley Moisés.

³ Ju' tzunj, cykilcaj ntzaj cykba'n tu'n tbint cyu'na, cynimanx bix cybinchanx. Pero mi'n cybinchay tisenj cye tzin cybincha'n, cuma min nbint cyu'n tisenj tzin cykba'n. ⁴ Nimssen ley cyiw nbint cyu'n tu'n tjaw cyiken xjal, pero mintii' nbint cyu'n tu'n t-xi' cyonen ke xjal tu'n tbint ley cyu'n. ⁵ Cykilcaj nbint cyu'nxin, nuk o'cx tu'n toc ccyey'en xjal. Ncub cytz'i'benxin tyol Dios twitz jun piix tz'u'n bix n-oc cyxpo'nxin ti' twi' cywitz bix ti' cyk'ab, tu'ntzen toc ccyey'en xjal cynimbil ti' ley. Bix n-oc cyk'o'nxin punc ttxa'n cyxbalenxin tu'n tchic'ajax ka jiquenkexin tuj ley. ⁶ Bix cyajxin tu'n ccyub kexin tuj tneel k'ukbil tuj nin waabj. Oj cyponxin tuj camon jaa', nuk jaj k'ukbil mas jawnex nche'xxin jyolte. ⁷ Ju'x oj nche'xxin tuj plaza, cyajxin oj cyoc k'olben ke xjal cyexin tuya nim nimbil, bix tu'n toc cyk'o'n xjal cybixin Xnak'tzal. ⁸ Pero cyey, mi'n tz'oc cyk'o'na cyiiba tu'n toc cyk'o'n xjal cybiy Xnak'tzal, cuma junx Xnak'tzal cyey at, jaj Scy'o'n tu'n Dios, bix cykilcakey cyitz'en cyiiba tjak' tcawbilxin. ⁹ Bix mi'n tz'oc cyk'o'na tbi jun xjal te cymana tzalu twitz tx'otx', cuma junx Cymana at tuj cya'j. ¹⁰ Bix mi'n tz'oc cyk'o'na cyiiba tu'n toc cyk'o'n xjal cybiy tneel te cye, cuma junx nejanel cyey at, jaj Cristo. ¹¹ Kej xjal n-oc cyk'o'n cyiib ti'j tu'n cyajben cye niy'tl, ejee'tzen mas jawnex cyxola. ¹² Alj xjal njaw tniman tiib, c'oquel te ch'in. Bix alj xjal n-oc tk'on tiib te ch'in, ck'ojel te tu'n toc te nim.

¹³ Yaltzen cyey tx'olbal ley bix aj fariseo, jay xsunkey! Xmeletz'key. Tzin cylomo'na tlemel jaa' cywitz xjal cyaj tu'n cyocx tuj tuj tcawbil Dios. Ccy'iy tu'n cyocxa, pero amale cyajat niy'tl xjal tu'n cyocx, pero n-oc cyipena ti'j tu'n mi'n chi ocx.

¹⁴ ¡Ay xsunkey tx'olbal ley bix fariseo! Xmeletz'key, cuma nchi kanena nim chojbil jaa' cye viuda, tu'ntzen ka min xchjet cyu'n viuda, n-eltzen cyii'n tla cyjaxuj, tzinxsen chi na'na Dios nim tyem cywitz xjal nuk tu'n tcub naj cybinchbena cywitz xjal. Ju' tzunj, mas cycastleiwa cwel cyibaja cywitz cwel cyibaj niy'tl xjal.

¹⁵ ¡Ay xsunkey tx'olbal ley bix fariseo! Xmeletz'key, cuma nbaj cybetena mar bix twitz tx'otx' cyxol jun wikxtil xjal tu'n tocx jun xjal tuj cyxnak'tzbila, bix oj tocx xjal tuj cyxnak'tzbila, mas aj il n-oca cywitza, bix mas nxi' tuj il cyu'na tu'n t-xi' tuj k'ak'.

¹⁶ ¡Ay xsunkey k'ol tumel cye xjal pero tisen mo'skey! Tzin cykba'na ka yaa'n nimxix tajben nin tja Dios te jurament tu'n tcywix tyol jun xjal. Pero ka ma tzaj k'o'n tipemal tyol jun xjal tu'n oro tuj tja Dios te jurament, iltzen ti'j tu'n tjapan baj ti' tyol, tzikey. ¹⁷ ¡Mintii' cynaabla, bix mo'skey! ¿Alcye mas xjan? ¿Japa oro, bix ka nintzaj tja Dios jaa' ta' Dios? Mas

il ti'j Dios, bix xjan oro nuk o'cx cuma tocx tuj tja Dios. ¹⁸ Jax ju'x tzin cykba'na ka yaa'n nimxix tajben altar te yol te jurament tu'n tcywix tyol jun xjal. Mas tipemal oybil tibaj altar tu'n tcywix tyol, bix ju' tzunj, ka ma tzaj k'o'n tipemal tyol jun xjal tu'nj oybil te jurament, iltzen ti'j tu'n tjapan baj ti' tyol, tzikey. ¹⁹ Moškey! ¿Alcye mas il ti'j? ¿Japa altar te Dios, bix ka oybil tibaj altar oyet te Dios? Mas il ti'j Dios, bix xjan altar nuk o'cx cuma tocx tuj tja Dios. ²⁰ Ju' tzunj, yaa'n il ti'j ka ma cywix tyol jun xjal tu'nj altar te Dios te jurament bix ka tu'nj oybil, cuma tu'n Dios te altar tzin tk'o'n tipemal tyol. ²¹ Bix ka ma cywix tyol jun xjal tu'n tja Dios te jurament, tu'n Dios tuj tja Dios tzin tk'o'n tipemal tyol. ²² Bix ka ma cywix tyol jun xjal tu'n yol ti'j cya'j te jurament, tu'n Dios ncub ke tuj tk'ukbil tzin tk'o'n tipemal tyol.

²³ Ay xsunkey tx'olbal ley bix fariseo! Xmeletz'key, cuma nchi k'ona tlajan pa' te alwent bix anís bix comino, pero min tz'oc cyk'on cyiiba tu'n tbint ja mas il ti'j tz'i'ben tuj ley cyu'na. Min tz'oc cyk'on cyiiba te onlte cye xjal bix tu'n toc cyk'ak'en cyc'u'ja cyi'j bix tu'n cybeta ba'n tuya Dios. Tumel tu'n t-xi' cyk'o'na tlajan pa' te Dios, pero yaa'n tumel ma cyaj ccyce'yena jniy'tl tz'i'bet tuj ley. ²⁴ Amale mint tz'el cni'ya ti'j ti' jilel mas il ti'j tu'n tbint, pero tzin cykba'na cye xjal alcye tu'n tbint cyu'n. Tisen moš k'il xjalkey. Ejee'y tisen jun xjal nxi' twaa'n, bix ka ma cnet jun us tuj twa, n-eltzen ti'i'n. Pero ka at jun tzej tuj twa, min tz'el tniy' ti'j.

²⁵ Ay xsunkey tx'olbal ley bix fariseo! Xmeletz'key, cuma ejee'y tisen jun xjal n-oc tk'o'n ti'j tu'n tel ttxjo'n ti'jxe jun vaso bix ka jun lak. Pero yajtzen tuj tc'u'j lak, ncyaj tz'il. Jax ju'x cyey, nim nbint cyu'na cywitz xjal tu'n tchic'ajax ka sakkey. Pero tuj cyanema, nuk alak' xjalkey, bix nuk ka' cyaja tu'n tbint. ²⁶ Ejee'y fariseo moš, il ti'j tu'n ttxjet cyanema, tu'ntzen tsaxix te junx maj.

²⁷ Ay xsunkey tx'olbal ley bix fariseo! Xmeletz'key. Tisen cyajayel anemkey. Tocse txun cyi'j panteón, bix cyeca cyi'jxe. Pero tuj cyc'u'j, nuk nojne tu'n cybake anem, bix nuk k'eyne at cyuj. ²⁸ Jax ju'x cyey, tzin cyyeec'an cyiiba cywitz xjal tisenc'a jiquenkey. Pero tuj cyanema, nojnekey tuya xmeletz'bil bix jyaa'n ba'n.

²⁹ Ay xsunkey tx'olbal ley bix fariseo! Xmeletz'key, cuma njaw cybincha'na cypanteón tyolel Dios te ootxa, bix nbaj cybincha'na cypanteón tu'n tcyaj mejor ccyce'nc. ³⁰ Tzin cykba'na: "Nuket eto' tuj tyem tej cyten kiy'jil, mindle e tzaj konen cye kiy'jil tu'n tcub cybyo'n ke tyolel Dios," tzikey. ³¹ Pero oj nxi' cykba'na ka cychmana kej xjal e byonte ke tyolel Dios, tzin cykba'na ka junx cynaabla cyuyaj cyiy'jila byol tyolel Dioske. ³² At-x ch'intl tu'n tpon baj twi' j-ak'untl e tzyet cyu'n cyiy'jila te ootxa. Ju' tzunj, japanx baj twi' cyu'na jmin o japan baj cyu'n cyiy'jila. ³³ Lbajkey! Mlay chi co'pja tu'n mi'n che'xa tuj k'ak'. ³⁴ Tu'n tpon baj twi' j-ak'untl e tzyet cyu'n cyiy'jila, jey', cxe'l nsma'na mas tyolel Dios cyuyey, cyuyax kej at cynaabl, cyuyax ke tz'ibel tyol Dios. Cyxoltzen kej lu at juun cwel cybyo'na twitz cruz. At juuntl cxe'l cyk'o'na tz'u'n cyi'j tuj camon cyjay, bix at juuntl pjel yaset cyu'na tuj cykilca tnom. ³⁵ Bix oj tbint cyu'na ju'wa, cwel cych'o'na cykilca cycublen xjal jiquen, jatxe tcublen Abel, hasta tejece tcub Zacarias, tchman Berequias, jtyolel Dios e cub cybyo'na tuj tja Dios ti'jxe altar twitz tneel xjan cwart. ³⁶ Jaxxix cxe'l nkba'na cyey, ejee'y judío te ja'lewe chi iklte nim castiwa tu'n tlaj kej il lu—tzi Jesús cye fariseo.

*Oc q'uixba tc'u'j Jesús cyi'j xjal aj Jerusalén
(Lc 13:34-35)*

³⁷ Bix e xi' tkba'ntl Jesús:

—Key aj Jerusalén, aj Jerusalén, ¿tikentzen nchi cub cybyo'na ke tyolel Dios? ¿Bix tiken nchi cub cybyo'na tu'n xak kej xjal nxi' tsm'a'n Dios cyuyey? Nim maj o waje'ya tu'n nclonteya ejee'y, tisen nchi ocx clet tal jun ttxu ey' tjak' t-xiicy', pero ccy'iy inayena. ³⁸ Jey', cyjel tcyey'en Dios cytanema, bix min-al xjal cyjel tuj. ³⁹ Cxe'l nkba'na cyey, oj ncyima, mi'n tz'oc ccyce'yena nwitzta juntl maj hasta ojxe tpon jk'ij oj t-xi' cykba'na: "Chjonte te Dios ti'j ja xjal lu tzul sma'n tu'n Dios te cawel," tzi cybela—e xi' tkba'n Jesús.

24

*Tej tkbante Jesús tu'n tcub xitj tja Dios
(Mr 13:1-2; Lc 21:5-6)*

¹ Tej tbaj yolen Jesús, etzxin tuj tja Dios, bix e xi'xin. Bix e xi' cych'i'quen t-znak'atzxin tja Dios texin, ti'i'n tcyey'nc. ² Bix e xi' tkba'nxin cyexin:

—Ccyce'yenx cykilcaj lu, cuma jaxxix cxe'l nkba'na cyey, mi nuket jun xak bix cyjel tibaj juntl. Cykilca pjel xitj—tziixin.

*Kejyec'bil cyi'j manc'bil k'ij
(Mr 13:3-23; Lc 21:7-24; 17:22-24)*

³ Yajc'atltzen, bix e cub kexin twi'j witz Olivos tbi. Cyjunalxin cyuya t-znak'atzxin. Bix e pon lk'e ke t-znak'atzxin ti'jxin, bix e xi' cykanenxin:

—Taat, kbantz keya, ¿jtojzen pjel cykilca kej lu ma tkbay? ¿Bix titzen jilel techel tzul oj ch'itk tul meltz'aja bix oj ch'itk tpon manc'bil k'ij?—tzikexin.

⁴ Bix aj tzak'be'nxin:

—Cyc'ojlam cyiiba cywitz kej xjal chi ul tzpetsal cyey. ⁵ Cyuj jk'ij chi ul, tzul nim xjal te kbalte ka ejee' Scy'o'n tu'n Dios te clol xjal, bix cwel cysbu'n nim xjal. ⁶ Cxe'l cybi'na nbajtl k'oj tuj ttanema bix jak'ch tumel. Pero mi'n chi jaw sey'paja, cuma il ti'j at k'oj te mitkna'x wula. Pero kej k'oj lu yaa'nja te yec'bil ch'ixc'a tpon manc'bil k'ij.

⁷ Cyuj jk'ij chi ul, chi jawel nmak tnomo te k'ojlel cyuya juntl nmak tnomo, bix ju' pjel tuj cykilca twitz tx'otx'. Bix tzul nim weyay tuj nim lugar twitz tx'otx'. Bix nuk jak'ch q'uiyela xcyaklajn. ⁸ Pero kej tchyonel lu nuk ch'in teja cywitz q'uixc'aj nim tzul mas yaj oj tul manc'bil k'ij. ⁹ Cyuj k'ij chi ul, chi xe'l k'o'na tuj cyk'ab cawel, bix chi yasjela cyu'n, bix chi cwel byo'na cyu'n. Bix chi elel iig'uena tuj cykilca tnomo tu'nj lepcheckey wi'ja. ¹⁰ Tu'n tlaj q'uixc'aj lu, nim xjal cyjel cyk'o'n cyocslabl wi'ja, bix cxe'l cyq'ueyen ke ocslal tuj cyk'ab aj k'oj wi'ja, bix q'uelel cyiig'uen cyiib. ¹¹ Chi ul nim xjal tzin cykba'n ka tyolel Dioske, pero nuk tenx cyu'n, bix nim xjal chi tzpetel cyu'n. ¹² Tz'inyen tjaw tz'iy il twitz tx'otx', bix ju' tzunj, nim xjal mi'n tz'octl cyak' ke cyuya cye. ¹³ Pero alcyey xjal min xcyaj cye'yente weya hasta ojxe tcyim, cleteltzen tu'n Dios. ¹⁴ Jba'n tpochal tcawbil Dios cxe'l pocbet tuj cykilca twitz tx'otx', tu'ntzen cybinte cykilca wik xjal tyol Dios. Bix oj tbint lu, tzultzen manc'bil k'ij.

¹⁵ Cykilcatzen jlu il ti'j pjel cyuj k'ij chi ul. Pero mas yaj tzul manc'bil k'ij. Ju' tzunj, ilxsen ti'j q'uelel cyniy' kej xjal n-oc cybi'n cyyola ti'j ti pjel oj ch'itk tul manc'bil k'ij. Jatxe ootxa, e tkba jtyolel Dios Daniel tzul jun k'ij oj tocx jun xjal ka'xsen te junx maj tuj nin tja Dios tu'n ttz'illex bix tu'n ttzpet bix cxitjel tja Dios tu'n. Oj toc cyce'yena otk tz'ocx ja xjal lu tuj xjan cwart tja Dios, tz'ocxix cyc'u'ja ti'j. ¹⁶ Tu'n tlet cychunk'lal, chi elel ok kej xjal ete' tuj Judea tuj c'ul cyxol witz. ¹⁷ Alcyekej xjal ete'wex tuj tcab cxo'la cyja, mi'n chi ocxlt k'ilbetz te tik'ch cye tuj cyja, sino txucl chi elex ok tuj c'ul tu'n cyajkelbil. ¹⁸ Bix alj nak'anant tuj tcojbil, mi'n tz'ajtz meltz'aj tja, mitetpe te k'ilbex ke ti'j. ¹⁹ Pero lastim kej xuuj p'efada, bix ma nch'u'n cyal, oj tul ja ila, cuma mlay bint tu'n cyel ok. ²⁰ Cykanenx te Dios nuket mi'n baj ju'wa tuj tyem te tchewel, bix ka tuj jun k'ij te ajlabl, cuma cyiw tu'n cyel ok xjal. ²¹ Bajxse pja' jun maj ju'wa jatxe tcublen itz'j twitz tx'otx' tu'n Dios, bix mi'n baj juntl maj ju'wa oj tbaj ja lu. ²² Nuket mi'n cub tbajsa'n Dios twi' kej k'ij te q'uixc'aj lu, milen-al jun xjal jac'a cyaj itz'j. Pero cwel tbajsa'nxin twi' tu'n tk'ak'bil tc'u'jxin cyi'j texin ttanem scy'o'n tu'n nxin. ²³ Katzen at jun xjal ma tz'oc kbante cyey: "Cycye'yentzen, lu tzunj xin Scy'o'n tu'n Dios lu," ka tzi cyesja, mi'n tz'oc cybi'na, ²⁴ cuma tzultzen nim xjal xtak' kbalte ka ejee' Scy'o'n tu'n Dios te cawel, bix tzul xjal xtak'el ka ejee' tyolel Dios. Ejee' tzunj xjal lu chi cwel binchante jawnex techel bix nuk tik'ch cbinel cyu'n tuya cyipemal, tu'ntzen cysbun ke xjal, bix ch'innch'e oj tcub sbu'n jun te Dios t-xjal. ²⁵ Cykil tzunja lu ma txi' nkba'na cyey nejl. ²⁶ Ju' tzunj, ka ma cykba xjal: "Lu Cristo at tuj lugar min-al xjal tuj," ka cytzike ju'wa, mi'n che'xa. Bix ka ma cykba xjal: "Lu Cristo tocx tuj cwart lu, cyjyo'nx," ka cytzike ju'wa, mi'n txi' cyocsla'na cyyol. ²⁷ Min chin ula tuj ewjel. Oj wula, cchic'ajaxel cywitz cykilca xjal, tisenj oj tcub koptz'aj jun tken k'ancyok te ocne bix niy'tl koptz'aj twitz cya'j tu'n tex te elne. ²⁸ Jaa' tcwa' t-xumlal cyimne, jatzzen chi chmetel ke c'utz. Mintii' il ti'j tu'n toc cykanenjl jaa' tcwa'.

*Ti tten oj ch'itk tul meltz'aj Jesucristo juntl maj
(Mr 13:24-37; Lc 17:26-30, 34-36; 21:25-33)*

²⁹ Ojzen tbaj kej k'ij te cyiwxsen q'uixc'aj lu, c'oquel kloj twitz k'ij, bix ya mi'ntl txakentl xjaw. Chi c'ul tz'ak che'w twitz cya'j, bix nuk clu'l cykilca twitz cya'j tisen jun xlok'laj cya'j. ³⁰ Oj tbaj lu, cchic'ajaxel jun yec'bil twitz cya'j te techel at tu'n tul jxjal Sma'n tu'n Dios tu'n ntana cyuya xjal. Bix chi jawel ok' xjal tuj cykilca tnomo twitz tx'otx', cuma cyla' xjal inayena oj ncu'tza tuj muj tuya nim wipemala bix nchin txakakan xsuna. ³¹ Tuj tzunj k'ij lu oj wula, ctaaltzen nsma'na nsanjela tuj cya'j tu'nj tk'ajt tk'aj'aj jun jawnex xux, bix chi chmol ke n-angela ke nxjala tyaxe cykil jaa' pommna baj twitz tx'otx'.

³² Cyncomtzen. Ko nk'a'c'atzen jun techel ti tten oj wula. Ju' tten tisenj oj ntzaj xulan jun wi' higuera. Oj ntzaj alajin tk'ab higuera bixsen n-ak' eletz muxk'aj t-xul, ya telniy'tzen tuj cywitz ka ch'itk toc coresma. ³³ Jaxse ju'x oj wula. Tisen tzunj t-xul higuera n-etz te ch'itk coresma, q'uelelc'atzen cyni'ya ti'j oj tbaj cykilca ma txi' nkba'na cyey twitz tx'otx', jatzen techel ka ch'itk wetza tuj cya'j. ³⁴ Jaxxix cxe'l nkba'na cyey, kej xjal cyla' cykilca kej yec'bil ma txi' nkba'na cyey, min otk chi cyim oj tul tcawbil Dios. ³⁵ Il ti'j ju' pjela. Te cya'j bix te twitz tx'otx' cwel xitj, pero ke weya nyol, mlay baj twi'. ³⁶ Yaltzen tej tu'n alcyey k'ij bix niy' hora oj wula, min-al eбилte. Mitetpe ejee' tsanjel Dios tuj cya'j itzkilte, bix mitetpe inayena. Nukxix ja te Nmana itzkilte niy' hora pjel jlu.

³⁷ Yal cyej xjal at twitz tx'otx' oj ch'itk wul meltz'aja, min n-oc cye' u'j ti'j alcyej at tu'n t'bay, tisenx kej xjal e ten tuj t'iyem Noé min oc cye' u'j ti'j alcyej at tu'n ttzaj cyibaj. ³⁸ Tuj k'ij te mitkna'x t'cub cyaastiwa a' cyibaj xjal, tej t'jaw t'z'iy a', nuk ex cyk'ij nchi waa'n, nchi c'an, bix nchi maje, nuk cytenx. Pero nuk tisen tii' tej t'pon jk'ij tej cyocx Noé tuj barc. ³⁹ Min e cyocsla aj il ka at tu'n t'cub jun castiwa cyibaj hasta te'jxe ttzaj jun nintzaj j'bal cyibaj, bix e baj cykilca xjal. Jax ju'x nuk q'uelex cyk'ij xjal oj wul meltz'aja twitz tx'otx' j'untl maj. Bix cwel castiwa cyibaj. ⁴⁰ Tuj tzun'j k'ij oj wul meltz'aja, at ca'ba xinak tuj co'jbil. Jun c'jawel k'i'n, pero j'untl cyjel ten tu'n t'cub t'castiwa. ⁴¹ At ca'ba xuuj chi t'zee'l junx ti'j jun cyaa'. Jun c'jawel k'i'n, pero j'untl cyjel ten. ⁴² Ju' tzun'j, cuma min cytzki'na jtoj chin ula, inayena Cyaawa, cye'ojlam cyiiba tu'ntzen binne cytena. ⁴³ Cybima ja yol lu. Nuket e bi'n tu'n taaw jun jaa' niy' hora te koniyan tzul alak', jac'ale cub ten c'ojlam, tu'ntzen mlay txi' tk'o'n amle'n te alak' tu'n tocx tuj tja. ⁴⁴ Jax ju'x cyej, cykil hora cyitz'lem cyiiba, cuma chin ul meltz'aja tuj jun k'ij min nayona ti'j, inayena, Jsma'n tu'n Dios tu'n ntena cyuya xjal.

⁴⁵ Ju' tzun'j, ba'nxit chi e'la tuj cyaak'ena, tisen jun t-ak'anal patrón at tnaabl bix cuyan tu'n tuj taak'en k'o'n tu'n t'patrón tu'n t-xi' tk'o'n cywa kej te tja patrón oj t'pon hora. ⁴⁶ At nim xtalbil tibaj jun ak'anal ka cuyan tu'n tuj taak'en oj tul meltz'aj t'patrón. ⁴⁷ Jaxxix cxe'l nkba'na cyey, cxe'l tk'o'n patrón tej ak'anal tu'n toc te ninc'ulte cykilca at te patrón. ⁴⁸ Pero ka ma txi' tkba'n ak'anal ka': "Yaj tzulwe n'patróna," ka tzi, ⁴⁹ bix ma tz'oc ten pjul cye mastl ak'anal bix ma tz'oc ten waa'l bix c'al cyuya ke c'al k'e'n, ⁵⁰ tzultzen meltz'aj t'patrón tuj jun k'ij min nayon ti'j bix tuj jun hora min t'zki'n. ⁵¹ Bix cwel k'o'n nim castiwa te ak'anal, bix cxe'l t-xoo'n t'patrón cyxol ke xmeletz' xjal, jatzzen chi jawela ok'ja, bix jaa' c'jawela kitx'itx'in t-xee' twitz cye—tzi Jesús cye t-xnak'atz.

25

Ti tten tu'n binne cyten xjal oj tul t'cawbil Dios

¹ Bix e xi' tkba'ntl Jesús cye t-xnak'atz:

—Yaa'n cykilca xjal binne cyten oj tul t'cawbil Dios. Oj wul meltz'aja tuj cya'j, j'pjel tisenj e baj tuj jun mejoblanel. Mitkna'x tul chmilbaj tuj mejoblanel. At laajtxin xuuj. E xi' cyii'ntxin c'ycantiltxin bix exk'etxin te clulte texin tuj be, tisenx tten. ² Cyxoltzen laaj txin xuuj, jwe'txin at c'ynaabltxin ti'j, pero jwe'tltxin mintii' c'ynaabltxin ti'j, ³ cuma min e xi' cyii'ntxin aseyt tu'n tajben tuj c'ycantiltxin. ⁴ Jatzen kej txin at c'ynaabl, e xi' cyii'ntxin ch'intl aseyt tuj t'cubel t'uyax c'ycantiltxin.

⁵ Pero e yajt te chmilbaj tu'n tul, bix ul cywatltxin, bix iy' wutanketxin. ⁶ Pero te chil ak'bil, e jaw si'n jun xjal: "jey', lu chmilbaj tzula! jQui c'yetza te clulte texin!" tzi xjal.

⁷ Bix e jaw we' ke laaj txin, bix oc cytxko'ntxin c'ycantiltxin. ⁸ Bix e xi' cykba'n kej jwe' txin mintii' c'ynaabltxin ti'j cyej jwe'tltxin: "Cyk'ontz ch'in kaseyta, cuma ch'ix c'ycub yu'btz'aj kcantila," tziketxin. ⁹ Pero aj cytzak'be'n jtxin at c'ynaabltxin: "Min. Mas ba'n tu'n cyxi'y cyuya ke q'ueyel te lok'ol cyaseyta, tu'ntzen mi'n baj naj keya," tziketxin. ¹⁰ Bix exk'etxin lok'ol. Pero jooc'tzen nche'xtxin lok'ol aseyt, ul chmilbaj. Jatzen kej txin binne cyten e bet tuya chmilbaj, bix ocxk'etxin t'uyaxin tuj mejoblanel. Bi'x lmet tzi jaa'.

¹¹ Te yajxetzen, ul kej jwe'tltxin, bix e xi' cykba'ntxin: "jTaat, taat! jkom jaa' kwitza!" tziketxin. ¹² Pero aj tzak'be'n chmilbaj: "Jaxxix cxe'l nkba'na cyey, min ntzki'na cywitza," t'zixin.

¹³ Ju' tzun'j, cye'ojlam cyiiba tu'n binne cytena oj wula, cuma mintii' tumel cyuyey jtoj chin ula bix niy' hora—tzi Jesús.

Jun t'echel ti'j pwak xi' tk'o'n xjal cye t-ak'anal

¹⁴ Bix e xi' tkba'ntl Jesús:

—j'pjel tuj t'cawbil Dios t'ul tuj cya'j tisenj e baj tej tex junxin xjal tuj jun t'nom nakch. Nejl, e z'aj t'xco'nxin ke t-ak'analxin, tu'ntzen t-xi' tk'o'nxin pwak cyexin, tu'n cyak'anaxin ti'j. ¹⁵ Te jun t-ak'analxin e xi' tk'o'nxin jwe' talento. Te j'untl t-ak'analxin e xi' tk'o'nxin ca'ba talento, bix te j'untl, jun talento. Te teylex juun e xi' tk'o'nxin pwak, la' ti' ba'n t'bin cyu'n ti'j. Bix e t'zyet be tu'nxin.

¹⁶ Jt-ak'analxin e tiik' jwe' talento, texj k'ij ak' lok'ol bix q'ueyel tuya t'pwak, bix e caman jwe'tl talento. ¹⁷ Jax ju'x jt-ak'analxin e tiik' ca'ba talento, texj k'ij ak' tu'n tak'anaxin ti' t'pwak, bix e caman ca'batl talento. ¹⁸ Pero jt-ak'analxin e tiik' jun talento, e xi'tzen bix e cu'x t'lu'cu'nxin tx'otx', bix e cu'x tewenxin j'pwak t'patrón tuj tx'otx'.

¹⁹ T'ba'jlenxiltzen nim k'ij, ul meltz'aj c'ypatrón ak'anal, bix e xi' t'kanenxin jte' pwak otk t'caman jaca juun t-ak'analxin. ²⁰ Bix e pon jt-ak'analxin otk tiik' jwe' talento twitzxin, nxi' ti'n jwe'tl talento otk t'caman. Bix e xi' tkba'n: "Taat, jwe' talento e z'aj tk'o'na weya. Lu jwe'tl talento ma ncamana," tzi. ²¹ E xi' tkba'n t'patrón te: "Ba'n ma bint tu'na, jay ak'anal ba'n. Ba'n toc ke nc'u'ja ti'ja. Ma tz'ak'anana ba'n ti'j ch'in e xi' nk'o'na t'ey. Ju' tzun'j, cxe'l

nk'o'na nim tey tu'n tcawena tibaj. Tzalaja wuyena," t'zixin. ²² Jax ju'x jt-ak'analxin otk tiik' ca'ba talento e pon twitz tpatrón, bix e xi' tkba'n texin: "Taata, ca'ba talento e tzaj tk'o'na weya. Cye'yenc. Lu ca'batl talento ma ncamana," t'zi. ²³ E xi' tkba'n tpatrón te: "Ba'n ma bint tu'na, jay ak'anal ba'n. Ba'n toc ke nc'u'ja ti'ja. Ma tz'ak'anana ba'n ti'j ch'in e xi' nk'o'na tey. Ju' tzunj, cxe'l nk'o'na nim tey tu'n tcawena tibaj. Tzalaja wuyena," t'zixin. ²⁴ Jax ju'x jt-ak'analxin otk tiik' jun talento, e pon twitz tpatrón, bix e xi' tkba'n texin: "Taata, ntzi'na jay jun xjal cyiw tnaabla. Nuk taja tu'n ttz'iy t'pwaka. Ntz'iy t'pwaka nuk tu'n cyak'mal juntl xjal, bix njtx'ona nuk tuj tawal juntl. ²⁵ At t'zizi wi'ja. Ju' tzunj, in xi'ya ewlte t'pwaka tuj tx'otx'. Cye'nca. Lu t'pwaka lu," t'zi ak'anal. ²⁶ Aj ttzak'be'n tpatrón te: "Jay ak'anal yaa'n ba'n bix cy'aj, ka tu' twitz inayena jun xjal il ti'j tu'n ttz'iy n'pwaka, bix tu'n ncamana tu'n cyak'mal juntl wik xjal, ²⁷ ¿tikentzen min e xi' tk'o'na n'pwaka tuj banco, tu'ntzen ttz'iy tuj tk'ab juntl xjal? Nuket e bint tu'na ju'wa, otefle t'z'iy tuya tal tej x'in ul meltz'aja," t'zi patrón. ²⁸ Bix e xi' tkba'nxin cyej xjal ete'c'a twitzxin: "Cyimel j'pwak tej xjal lu, bix cy'onx tej xjal e caman jwe' talento tibaj. ²⁹ Jxjal e caman ti'j e k'oj te, mastl ck'ojel te, pero ja tzunj xjal mintii' e tcaman, ti'j e k'oj te, q'uelel k'i'ntl te. ³⁰ Bix ja ak'anal lu min tz'ajben, q'uelex xoo'n tuj klolj te junx maj, jatztzen chi jawela ook' xjal, bix jatztzen chi jawela kitx'itx'in t-xee' twitz cye," t'zi patrón—t'zi Jesús cye t-xnak'atz.

Cykilca xjal chi oquel chmet tuj xkel twitz Jesús oj tul meltz'aj twitz tx'otx'

³¹ Bix e xi' tkba'ntl Jesús cye t-xnak'atz:
—Ojtzen wul meltz'aja, inayena, jxjal Sma'n tu'n Dios tu'n ntena cyuya xjal, chin ula te cawel, bix cyuyax cykilca nsanjela tuj cya'j, bix chin cwel keya tuj nk'ukbila jawnex tu'n ncamana tibaj cykilca. ³² Bix chi oquel chmet n'witza cykilca xjal te cykilca tnom twitz tx'otx'. Bix q'uelex n'pa'na juun cyxol ke niy'tl, tisen jun cyel nchi el t'pa'n ke carnal cyxol ke chiva. ³³ Cwel nk'o'na ke carnal tuj nmank'aba, bix ke chiva cwel nk'o'na tuj nneña. ³⁴ Bix cxe'l nkba'na, inayena Cawel, cyej xjal ete' tuj nmank'aba: "Cytzaja, ejee'y ma cyiik'a t-xtalbil Nmana, bix cyocxa tuj cawbil o bint te cyej jatxe tej t'bint twitz tx'otx'. ³⁵ Ntzaj nt'xco'na tu'n cyocxa, cuma tej ttzaj tak' weyaj wi'ja, e tzaj cyk'o'na n'waya, bix tej ttzaj tak' a' wi'ja, e tzaj cyk'o'na a' weya. Jun wikxilt xjal kena, pero e tzaj cyk'o'na n'posadiya. ³⁶ Tej mintii' n'xbalena, e tzaj cyk'o'na n'xbalena. Tej nyebta, ulkey cyej'l weya. Tej tocx cyxoo'n xjal inayena tuj t'zee', ulkey wuyena," t'zi nbela. ³⁷ Bix ctzaal cykba'n kej xjal jiquen weya: "Taata, ¿j'otoo kila at tak' weyaj ti'ja bix e xi' kk'o'na t'way? ¿Bix j'otoo kila at tak' a' ti'ja bix e xi' kk'o'na t'c'ay? ³⁸ ¿Bix j'ootzen tzul aaja tisen jun wikxilt xjala bix e xi' kk'o'na t'posadiya? ¿Bix j'ootzen kila mintii' t-xbalena bix e xi' kk'o'na t-xbalena? ³⁹ ¿Bix j'ootzen kila ka yaaba bix ka tuj t'zee' bix ul ko'ya cyej'lte tey?" t'zi cybel. ⁴⁰ Bix cxe'l ntzak'be'na, inayena Cawel, cye: "Jaxxix cxe'l nkba'na cyey, tej cybinchantiya cykilcaj lu cyej ocslal yaa'n jawnex, tisenca' weya e cybinchay jlu," t'zi nbela.

⁴¹ Jax ju'x cxe'l nkba'na cyej xjal tuj nneña: "Cypa'mel cyiiba wi'ja, key xjal cwel castiwa cyibaja. Chi xe'la tuj k'ak' te junx maj o bint te taaw il bix cye t'hiban. ⁴² Il ti'j tu'n cyxi'y tuj k'ak', cuma tej ttzaj tak' weyaj wi'ja, min e tzaj cyk'o'na n'waya, bix tej ttzaj tak' a' wi'ja, min e tzaj cyk'o'na a' weya. ⁴³ Jun wikxilt xjal kena, pero min e tzaj cyk'o'na n'posadiya. Tej mintii' n'xbalena, min e tzaj cyk'o'na n'xbalena. Tej nyebta, min ulkey cyej'lte weya. Tej tocx cyxoo'n xjal inayena tuj t'zee', min ulkey wuyena," t'zi nbela. ⁴⁴ Bix ctzaal cykba'n kej xjal lu weya: "Taata, ¿j'ootzen kila at tak' weyaj ti'ja, bix j'ootzen kila at tak' a' ti'ja, bix j'ootzen tzula tisen jun wikxilt xjal, bix j'ootzen kila mintii' t-xbalena, bix j'ootzen kbi'ya ka yaaba bix ka tuj t'zee', bix min e xi' kk'o'na onbil tey?" t'zi cybel. ⁴⁵ Bix cxe'l ntzak'be'na cye: "Jaxxix cxe'l nkba'na cyey, tej min e cybinchay cykilcaj lu cyej ocslal yaa'n jawnex, tisenca' min e cybinchay jlu te weya," t'zi nbela. ⁴⁶ Bix kej xjal aj il lu chi xe'l tuj k'ak' te junx maj. Jatzen kej xjal jiquen, ck'ojel cye cychunk'lal te junx maj—t'zi Jesús cye t-xnak'atz.

26

Tej cyjyon xjal tumel ti tten tu'n ttzyet Jesús

(Mr 14:1-2; Lc 22:1-2; Jn 11:45-53)

¹ Tejzen t'bjak tkba'n Jesús cykilca yol lu, e xi' tkba'nxin cye t-xnak'atzxin:
² —Cytzki'na cabj tzul j'nink'ij te Pascua bix ma pon tumel tu'n nk'o'ja tuj cyk'ab xjal tu'n n'byeta twitz cruz, inayena, jxjal Sma'n tu'n Dios tu'n ntena cyuya xjal—t'zixin.
³ Bix e baj cychmon cyiib ke nejenel cye pala cyuyax nejenel cyej twitz pe'n t'ja Caifás, j'pala mas jawnex cyxol pala. ⁴ Bix e yolenkexin cyxolxxin ti tten tu'n ttzyet Jesús tuj ewjel, tu'ntzen t'byet-xin. ⁵ Pero e xi' cykba'nxin cyxolxxin:
—Yajtzen yaa'n cyuj k'ij te Pascua, tu'ntzen mi'n jaw cyk'oj xjal ki'j—t'zikexin.

Tej t'jax ko'n c'oc'sbil tuj twi' Jesús

(Mr 14:3-9; Jn 12:1-8)

⁶ Yaltzen te Jesús, e ponxin tuj tnom te Betania, tuj tja jxin Simón otk tzaj k'ey tchu'l tu'n lepra. ⁷ Nchi waa'nxin ttxa'n mes tuj tja Simón tej tpon junxuj xuuj tuya jun ni' cyeca lmet nojne tuya c'oc'sbil cyi' xjal bix wi'yxlxen. Bix e jax tko'nxuj c'oc'sbil cyi' xjal tuj twi' Jesús.

⁸ Yaltzen cye t-xnak'atzxin, tej toc cycye'yenxin ti otk tse xuuj, e jaw yolenkexin:

—¿Tikentzen ma pja' tyaa'n jxuujja jc'oc'sbila? ⁹ Yaa'n tumel. Ba'ntetpele xi' q'ueyet, matle jaw nim pwak ti'j, bixetle s-ajben te onl cye mebe—tzikexin.

¹⁰ Pero el tniy' Jesús ti'j ti iy' tuj cyc'u'jxin, bix e xi' tkba'nxin cyexin:

—¿Tikentzen ete'quey ya'l texuj? Jtexuj ma tz'oc tbincha'n wi'ja, ba'n teja. ¹¹ Ka cyaja txi' cyeeec'ana cyanema cye mebe, attzen mebe cyxola cykil k'ij. Pero weya, nuk ch'intl chin temela cyxola. ¹² Ma tz'oc tko'nxuj c'oc'sbil wi'ja teja mitkna'x ncyima, tu'ntzen t'bj bint nxumlala tu'n nmaketa. ¹³ Jaxxix cxe'l nkba'na cyey, jaa'xja cpomela baj tumel jba'n t'pocbal co'pbil cye xjal, cbyal t'pocbal ti ma tbinche jxuj xuujja wi'ja. Ju'tzen cna'jalewe—tzixin.

Tej t-xi' toye Judas tiib tu'n t-xi' tk'o'n ja Jesús

(Mr 14:10-11; Lc 22:3-6)

¹⁴ T'bjalen yolenxilt tzunxin, bix el Judas Iscariote, jun t-xnak'atz Jesús t-xol cablaajxin. Bix e xi' Judas te yolel cyuya nejenel cye pala. ¹⁵ Bix e xi' tkba'n Judas cye:

—¿Jte' pwak ctzaal cyk'o'na weya ka ma txi' nk'o'na Jesús tuj cyk'aba?—tzi.

Bixsen e bint cyyolxin tu'n toc cyk'o'nxin winak laaj pwak te plata te. ¹⁶ Bix ak' Judas jyolte ti tten tu'n t-xi' tk'o'n ja Jesús tuj cyk'ab nejenel cye xjal.

Tej twaa'n Jesús cyuya t-xnak'atzxin tuj xjan k'ij

(Mr 14:12-25; Lc 22:7-23; Jn 13:21-30; 1 Co 11:23-26)

¹⁷ Tetzen tneel k'ij te nink'ij te Pascua, jnink'ij tej cywaa'n xjal pan mintii' levadura tuj, e pon lk'e t-xnak'atz Jesús ti'jxin, bix e xi' cykanenxin texin:

—¿Jaa' tumel taja tu'n t'bj kbincha'na jwaabj te xjan k'ij?—tzikexin.

¹⁸ Bix aj ttzak'be'nxin:

—Cyucxa tuj tnom te Jerusalén, bix oj toc noj junxin xjal cywitza, cykbanx te: “Taata, tzi Xnak'tzal tey cyjulu: ‘Ch'ix tpon tumel tu'n ncyima. Q'uiy'setel Pascua wu'na cyuya n'xnak'atza tuj tjay, tzi Jesús,” tzi cybela tej xin lu—tzixin.

¹⁹ Bix e cybincha t-xnak'atzxin tisen e tkbaxin, bix ak'kexin binchal cywaxin te Pascua.

²⁰ Tetzen n-ak' cwelc'a kloj, e cub ke Jesús ti'j mes cyuyax kej cablaaj t-xnak'atzxin.

²¹ Maantktzen nchi waa'nxin, e xi' tkba'n Jesús:

—Jaxxix cxe'l nkba'na cyey, at jun cyxola cxe'l tq'ueyen inayena tuj cyk'ab kej xjal cyaj tu'n ncuba—tzixin.

²² Toctzen cybi'nxin tyol Jesús, e tzajtzen nim cybisxin. Bix juun n-ela cyexin ak' kanlecte te Jesús:

—¿Inayenpatzen weya, Taata?—tzi tzunkexin.

²³ Bix aj ttzak'be'nxin:

—Alcye tzunj cyey cwelex mu'n'te tpan junx wuyena tuj lak, ja tzunja cxe'l k'onte weya tuj cyk'ab byol xjal. ²⁴ Jxin xjal Sma'n tu'n Dios tu'n tten cyuya xjal, amale tzint tkba'n tyol Dios tu'n t'byet-xin, pero ayxsen tixsen tna'x jcxel k'onte weya. Masetlpele ba'n minxit itz'j xjala—tzixin.

²⁵ Bix e xi' tkba'n Judas, jxjal otk ninc'un tu'n t-xi' tq'ueyen Jesús:

—Xnak'tzal, ¿japatzen kena?

Bix aj ttzak'be'n Jesús:

—Pjel tisenj ma tkbay.

²⁶ Maantktzen nchi waa'nxin, tej t'jw ttzyu'n Jesús jun pan, bix e xi' t'kanenxin xtalbil te Dios ti' pan. Bix ak'xin pi'xlcate, bix e xi' tk'o'nxin cye t-xnak'atzxin, bix e xi' tkba'nxin:

—Cytzyunxa bix cywaa'nx, cuma ja tzunja pana techlal nxumlala cwel yuchj bix cbyetel—tzi Jesús.

²⁷ Bix e jaw tii'nxin jun vaso nojne tuya vino, bix e xi' tk'o'nxin chjonte te Dios ti'j, bix e xi' tk'o'nxin cye t-xnak'atzxin, bix e xi' tkba'nxin:

—Cyc'anx cykilcakey ja vino lu, ²⁸ cuma techel ntz'q'uela q'uelel c'ala. Cxe'l oyet ntz'q'uela tu'ntzen tnajset cyil nim xjal. Tu'nj ntz'q'uela q'uelel c'ala, ctemeltzen jun ac'aj ttrat Dios cyuya xjal. ²⁹ Cxe'l nkba'na cyey, mi nuket juntl maj cxe'l nc'a'na vino ti'j lux kena ini'tza texe jk'ij oj woca te cawel tuj tcawbil Nmana, maxetzen cxe'l nc'a'ntla, bix cyuyax xsuna—tzi Jesús.

Tej t-xi' tkba'n Jesús te Pedro, jay cwel e'wente we oxo maj

(Mr 14:26-31; Lc 22:31-34; Jn 13:36-38)

³⁰ Cybajlen waa'n tzunkexin, bix ak'kexin bitzel. Cybajlentsen bitzenxin, bix e xi'kexin tc'u'j witz te Olivos. ³¹ Bix e xi' tkba'nxin cyexin:

—Cykilca key cyjel cycye'yena inayena te koniyan ja'lewe, cuma tzi Dios jun maj tuj tyol cyjulu: “Cwel nbyo'na cylel, bix chi elel tziitj ke carnel,” tzi Dios jatxe ootxa. ³² Pero ojzten njatz itz'ja tuj cyamecy, chin xe'l neja cywitzat tuj departamento te Galilea—tziixin.

³³ Pero e xi' tztzak'be'n Pedro:
—Amale cykilcatlet cyjel cycye'yen jay tu'nj tzi cyi'j, pero weya, mlayx cyaj ncyey'ena jay—tzi Pedro.

³⁴ E xi' tkba'n Jesús:

—Jaxxix cxe'l nkba'na tey, te ja koniyan ja'lewe, te mitkna'x kskix, oj took' coo', tu'n tzi ti'ja otktzen txi' tkba'na oxe maj min tztzi'na nwitzat—tziixin te Pedro.

³⁵ E xi' tkba'n Pedro texin:

—Mi'n txi' nkba'na min ntzki'na twitza. Ka at il ti'j, chin cymela tu'n woc lpeya ti'ja. Mlay cyaj ncyey'ena jay—tzi Pedro. Jax ju'x e xi' cykba'n cykilcatlet t-xnak'atz Jesús.

Tej tna'n Jesús Dios tuj Getsemani

(Mr 14:32-42; Lc 22:39-46)

³⁶ Yajc'atltzen ch'intl tex koniyan, bix e cu'xkexin tuj jun lugar Getsemani tbi. Bix e xi' tkba'nxin cye t-xnak'atzxin:

—Chi kequetzen cyey tzalu, matzen chixwe ma chixa yolel tuya Dios—tziixin.

³⁷ Bix e xi' tii'nxin Pedro cyuyax ca'ba tcwal Zebedeo, bix e tzaj nim tbisxin bix ak' cwel talelxin. ³⁸ Bix e xi' tkba'nxin cyexin:

—May'xsen tz'oc jun bis ti' wanema. Mlayxsen npawe. Chi tenc'atzen cyey tzalu. Cyimeltzen ch'in cywatla—tziixin, ³⁹ bix el lk'exin ch'intl cyi'jxin.

Bix e cub mutzk'ajxin twitz Dios, bix e xi' tcubsa'nxin twitzxin te Dios. E xi' tkanenxin:

—Nmana, ka ba'n tuj twitza, chin tco'pa tzuna ti'j tu'n tiy'x jniy' jlu wu'na. Pero yaa'n tej weya waj bint chinel, sino ja tej alcyey tey taj bint, jatzen wej waja—tziixin.

⁴⁰ Tbjatzen yolenxin tuya Dios, bix e pon meltz'ajxin cyi' Pedro. Nchi wutanxin tej tponxin cyi'jxin. Bix e xi' tkba'nxin cye Pedro:

—¿Nchi wutanpa tzuna? ¿Mitetpa jun hora ma cypay watl? ⁴¹ Cyimelxix ch'in cywatla, bix chi na'n Dios, tu'n mi'n chi cub tz'aka tuj jun il. Taj cyey cyanem tu'n t'bit jba'n, pero mintij' tipen cyxumlala tu'n t'binchet alcyey taj cyanema—tziixin cye Pedro.

⁴² Bix elxin juntl maj te yolel tuya Dios. Bix juntl maj e xi' tcubsa'nxin twitzxin te Dios:

—Taat Nmana, ka yaa'n ba'n tuj twitza tu'n mi'n tziy'x jqu'ixc'aj lu wu'na, bint-xit jtajbila—tziixin.

⁴³ Tejzen tpon meltz'ajxin, nchi wutan t-xnak'atzxin juntl maj cyoxelxin, cuma ntzajxe mtz'e cywitzxin tu'n nim watl. ⁴⁴ Bix elxin cyi' t-xnak'atzxin juntl maj te yolel tuya Dios toxen maj. Ejee' xsunj tyolxin te tneel maj bix tcab maj, ejee' xsunja e xi' tkba'nxin te Dios te toxen maj. ⁴⁵ Tbjalen yolen tzunxin te toxen maj tuya Dios, e pon meltz'ajxin cyuya t-xnak'atzxin, bix e xi' tkba'nxin cyexin:

—¡Jey'! ¿Nchi wutanxpa tzuna? ¿Tzinxpatzen chi ajlana? Matzen pon tumel tu'n nxi' k'o'na tuj cyk'ab aj il. ⁴⁶ Chi we'wa. Lu jxin ma txi' k'onte weya tzula. Ko'ke clul texin—tziixin.

Tej ttzyet Jesús

(Mr 14:43-50; Lc 22:47-53; Jn 18:2-11)

⁴⁷ Tzinx yolen Jesús tej tpon Judas, jun t-xnak'atzxin t-xolj tcablaajxin, tuya nim xjal binne cyten tuya espada bix tuya tze'e. Chk'o'n tzunkexin cyu'n nejenel cye pala bix cyu'n nintzaj xjal. ⁴⁸ Otktzen txi' tkba'n Judas jun techel cye tzuyel ti tten oj ttzyet Jesús. Ju'tzen toc tu'n Judas cyjulu: “Al tzunj ma tz'el ntz'u'ban twitz, ja tzunja. Cytzyumetzzen,” tzi Judas. ⁴⁹ Ju' tzunj e xi' lk'e Judas ti' Jesús, bix e xi' tkba'n texin:

—Jey' Xnak'tzal—tzi tzunxin, bix el ttz'u'banxin twitzxin.

⁵⁰ Bix e xi' tkba'n Jesús te Judas:

—Jay wuyena, binchanx jtsanlala—tziixin.

Bix e xi' cyk'abxin te tzyultzte Jesús. ⁵¹ Pero cyxol cyey ete' tuya Jesús, at jun e jatz tii'n tspada bix e xi' t'jubic tspada ti' twi' jun t-ak'anal jpala mas jawnex, bix el ttx'oman jun t'xquin. ⁵² Bix e xi' tkba'n Jesús te:

—K'onc'ax tspadiy tuj tjayel. Kej xjal nchi k'on cyiib tu'n cyk'o'jl cyi' juntl, chi cymeltzen tuj k'o'j. ⁵³ ¿Mimpa tz'el tni'ya ti'j ka jac'a txi' nkanena te Nmana tu'n ttzaj t'sma'n mas te setenta mil tsanjel tuj cya'j tu'n cyco'pan weya? ⁵⁴ Pero nuket ma txi' nkanena tu'n mi'n chin cyima, ¿titzen tten tu'n tel jax jtyol Dios e tkba il ti'j tu'n ntzyeta?—tziixin.

⁵⁵ Bix e xi' tkba'n Jesús cyey nim xjal otk chi ul tzyulte:

—¿Alak'pa kena, tu'ntzen at il ti'j tu'n cyula tuya cyspadiy bix cytze'e'y te tzyul weya? Cykilca kej k'ij lu ma chin tena cyxola te xnak'tzal cyey tuj nin tja Dios, pero mintlpe in

cytzuya. ⁵⁶ Pero cykil tzunja nbaja tetzen tu'n tjapan baj twi'j tyol Dios o cyaj tz'i'bet cyu'n tyolel Dios—tzi Jesús.

Bix cykilca ke t-xnak'atxin e cyaj cycye'yen jaxin, bix e baj pjel okkexin.

Tej tpon k'i'n Jesús cywitz aj cawel

(Mr 14:53-65; Lc 22:54-55, 63-71; Jn 18:12-14, 19-24)

⁵⁷ Bix e xi' cytzyu'n xjal ja Jesús, bix e xi' cyii'nxin jaxin twitz tneel pala Caifás, jatzten otk txi' cychmon cyiib ke tx'olbal ley cyuyax nejenel cye xjal.

⁵⁸ Nakhtzen e xa' lpete Pedro ti' Jesús, tejxe tpon Jesús tja tneel pala. Ocxtzen Pedro twitz pe'n, bix e cub kexin cyuya ke c'ojal nin tja Dios, tu'ntzen tlontexin ti pjel.

⁵⁹ Tunwentzen nchi jyona jxin nejenel cye pala cyuyax cawel cyxol xjal judío cab tstiwa xtak' ti' jun til Jesús tu'n tbyet-xin cyu'nxin. ⁶⁰ Pero min e cnet jun tilxin cyu'nxin, amale nimet xjal e pon cywitz cawel te xtak'el.

Pero manc'biltzen, e pon ca'ba xjal cywitzxin, ⁶¹ bix e xi' cykba'n:

—E tkba ja xjal lu cyjulu: “Jac'a bint tu'n tcub xitj tja Dios wu'na, bix tu'n tjaw nbincha'na juntl maj tuj oxe k'ij,” tzi xjal lu—tzi ke ca'ba tstiwa.

⁶² Ju' tzunj, e jaw we' tneel pala, bix e xi' tkanen te Jesús:

—¿Mimpatii' ctzaal ttzak'be'na cyi'j yola? ¿Ti toc cyu'na ti'j cyool jxjal lu?—tžixin.

⁶³ Pero min ak' Jesús. Bix e xi' tkba'n tneel pala te:

—Cxe'l ncubsa'na nwitza twitz Dios i'tz, kbantz keya ka jay jxjal Scy'o'n tu'n Dios te cawel, ka jay Tcwal Dios—tžixin.

⁶⁴ E xi' tkba'n Jesús texin:

—Jax ma tkbay. Jax ju'x, cxe'l nkba'na cyey, cyla' tzuna inayena k'uklec tuj tman'ab Dios nim tipemal, bix cyla' tzuna oj ntzaj twitz tx'otx' tuj muj twitz cya'j—tzi Jesús.

⁶⁵ Toc tbi'n tneel pala kej yol lu, bix el ttzakenxin ti'jxin tu'n tk'ojxin, bix e xi' tkba'nxin:

—Njuben yol ti' Dios ka junxxin tuya Dios. ¿Titzen kaj te mas tstiwa? ¡Jey', ejee' xsuna ma chi oc ebinte lu tzunxin njuben yol ti' Diosa! ⁶⁶ ¿Ti toc cyu'na?—tžixin.

Bix aj cytzak'be'nxin:

—At til. Il ti'j tu'n tbyet—tžikexin.

⁶⁷ Bix ak'kexin tzublecte ti' twitz Jesús, bix oc cypju'nxin, bix at juuntl oc cytz'ajenxin.

⁶⁸ Bix e xi' cykba'nxin:

—Jay Scy'o'n tu'n Dios, kbantz keya, ¿alj xjal kxola s-oc pjunte tey?—tžikexin.

Tej tel tii'n tiib Pedro ti'j Jesús

(Mr 14:66-72; Lc 22:55-62; Jn 18:15-18, 25-27)

⁶⁹ Yaltzen te Pedro, tcub xsunxin pe'n. Bix e pon juntxin xuuj tk'opaj tneel pala, bix e xi' tkba'ntxin te Pedro:

—Jax ju'x jaan tey tuya Jesús te Galilea—tžixin.

⁷⁰ Pero tcy'i Pedro jtyoltxin ju'wa, bix e xi' tkba'nxin cywitz cykilca xjal:

—Mintpe n-el nni'ya ti'j ali'j nyoleney—tzi Pedro.

⁷¹ Tej tetz Pedro ttzi penwen tu'n ttzyet be tu'nxin, at juntl tk'opaj tneel pala e til jaxin, bix e xi' tkba'ntxin cyej xjal ete' pe'n:

—Ja xjal lu e ten tuya Jesús aj Nazaret—tžixin.

⁷² Juntl maj elx tii'n tiibxin. E xi' tkba'nxin:

—Tzkinn Dios min ntzki'nwe twitz xjal lu—tžixin.

⁷³ Yajc'atltzen ch'intl bix oc cyumla'n jxjal ete'c'a pe'n ja Pedro:

—Jaxxix jaanxix tey cyxol kej xjal lepchech ti' Jesús, cuma ti'j tyola n-el kni'ya ti'ja junxtil xjal tey—tžikexin.

⁷⁴ Bix ak' Pedro k'ilbel tiib:

—Tzkinn Dios yaa'n jaan kenwe tuya. Min ntzki'nwe twitzj xjal lu—tzi Pedro.

Tzinx yolen Pedro tej took' coo', ⁷⁵ bix ul tuj tc'u'jxin ti otk tkba Jesús: “Te mitkna'x took' coo', otktzen txi' tkba'na oxe maj min ttzki'na nwitza,” otk tkba Jesús te Pedro.

Bix ex Pedro bix e jaw ok' xsunxin nim.

27

Tej tpon k'i'n Jesús twitz Pilato

(Mr 15:1; Lc 23:1-2; Jn 18:28-32)

¹ Tejzen tcub spi'yen te klax, oc cychmon cyiib cykilca nejenel cye pala cyuyax nintzaj xjal, te ninc'ul ti tten tu'n tcyim Jesús cyu'n. ² Bix e cub kx'po'n, bix e xi' cyii'n twitzj xin gobernador, Pilato thi.

Tej tcyim Judas

³ Yaltzen te Judas, jxjal e xi' q'ueyente ja Jesús tuj cyk'ab byol xjal, tej tlonte otk cub cyninc'u'n nintzaj xjal tu'n tcub cybyo'n ja Jesús, e tzaj thixxin. Bix aj tk'o'nxin jwinak laaj pwak te plata cye nintzaj pala bix cye nintzaj xjal. ⁴ E xi' tkba'nxin cyexin:

—Ma chin binchana jun jawnex il, cuma ma txi' nk'o'na tuj cyk'aba jun xjal mintii' til—tzi Judas.

Pero aj cytzak'be'nxin texin:

—Mintii'ke kaj ti'j. Ti'j tey toca—tzikexin.

⁵ Ju' tzunj e cub t-xoo'n Judas pwak te plata tuj tja Dios, bix etzxin, bix e jawtyo'ben tiibxin ti' tk'ab jun tzee', bix e tzaj t-xoo'n tiibxin twitz tx'otx' tu'n tcyimxin.

⁶ Jatzen cye nejenel cye pala, e jaw cyii'nxin pwak te plata, bix e xi' cykba'nxin:

—Yaa'n k'o'n tu'n ley tu'n tcu'x kk'o'n tuj tcublel oybil tu'n tajben tuj tja Dios, cuma ja pwak lu ma tz'ajben te chojbil twi' tcyimlen jun xjal—tzikexin.

⁷ Bix ak'kexin yolel cyxolxxin ti' pwak, bix el cylok'o'nxin jun tx'otx' ti' pwak Xcab Tx'otx' tbi, tu'ntzen tajben tu'n cycu'x maket kej xjal yaa'n aj Jerusalén tuj. ⁸ Ju' tzunj, hasta ja'lewe o tz'oc cyk'o'n xjal tbi ja tx'otx' lu te Jcamposant Tlok'aj Tu'n Pwak Twi' Tziy'. ⁹ Tej tel cylok'o'nxin ja tx'otx' lu, el jaxxix j-e tkba jtyolel Dios Jeremías jatxe ootxa. Tzi cyulu: “Cxe'ltzen cyii'n winaklaaj pwak te plata, jatzen twi' jun ajnintz xjal tuj cywitz aj Israel, ¹⁰ bix cxe'l cyk'o'n ja pwak lu tu'n cylok'onte jtx'otx' Xcab Tx'otx' tbi. Ju'tzen e tzaj tkba'n Dios weya,” tzi Jeremías.

Tej toc Jesús tuj xkel tu'n Pilato

(Mr 15:2-5; Lc 23:3-5; Jn 18:33-38)

¹¹ Yaltzen te Jesús, tej wa'leccxin twitz gobernador, e xi' tkanen gobernador texin:

—¿Japa tey rey cye xjal judío?

Bix aj ttzak'be'nxin:

—Jay ma scy'onte ja yol rey cye judío, yaa'n inayena—tzixin.

¹² Bixsen nimxsen oc cyumla'n nejenel cye pala cyuyax nintzaj xjal jaxin twitz Pilato, pero mintii' ak'xin. ¹³ Bix e xi' tkanen Pilato texin:

—¿Mimpa tzin tbi'na tik'ch cyool xjal ti'ja?

¹⁴ Pero mi nuketpe jun yol aj ttzak'be'n Jesús, bi'xsen e jaw klee' gobernador.

Tej tbint ti'j tu'n tbyet Jesús

(Mr 15:6-20; Lc 23:13-25; Jn 18:38-19:16)

¹⁵ Atzen jun costumbre. Jaca jnabk'i tuj tzunj nink'ija te Pascua, tz'etz ttzakpi'n gobernador jun xjal aj Israel tuj tzee', la' alj cyaj xjal aj Israel tu'n tetz. ¹⁶ Te tzunja jnabk'i lu, tocxse tuj tzee' junxin ka'xsen xjal, Barrabás tbi. ¹⁷ Ju' tzunj, tej t'aj cychmon cyiib nim xjal, e xi' tkanen Pilato cye:

—¿Alcyej xjal cyaja tu'n tex nntzakpi'na cyey? ¿Cyajpey tu'n tex nntzakpi'na jxin Barrabás, bix ka ja Jesús, jxjal Scy'o'n tu'n Dios tbi?—tzi gobernador. ¹⁸ Ju'tzen toc tu'nxin cye xjal cuma at tumel tuyaxin ka nuk tu'n tchi'lel cyc'u'j ke nintzaj xjal otk pon cyii'nxin ja Jesús twitzxin.

¹⁹ Cubtzen ke Pilato tuj k'ukbil tu'n tcawen, e tzaj sma'n jun xjal tu'n t-xu'lxin kbal texin: “Mi'n tz'oc tk'on tiiba ti'j ja xjal lu jiquenxix, cuma sulxin tuj nwitz'i'ya te koniyan, bix nim siy' tuj nc'u'ja tu'n tlajxin,” tzi t-xu'lxin.

²⁰ Pero kej nejenel cye pala bix kej nintzaj xjal, e cub cyi'j xjal cyu'n tu'n t-xi' cykanen tu'n tetz Barrabás tuj tzee', bix tu'n t-xi' cykba'n tu'n tbyet Jesús. ²¹ Pero e xi' tkanen gobernador juntl maj cye xjal:

—¿Alcyej xjal cyaja tu'n tetz nntzakpi'na cyey?

Bix aj cytzak'be'n xjal:

—Ja te Barrabás tu'n tetz ttzakpi'na—tzikexin.

²² E xi' tkba'n Pilato cyexin:

—Jey', ¿tine cyaja tz'oc nbincha'na ti'j Jesús, ja xjal Scy'o'n Tu'n Dios tbi?—tzixin.

E cykba cykilca xjal:

—¡K'onwexin twitz cruz tu'n tcyimxin!—tzikexin.

²³ Bix e xi' tkba'n Pilato:

—¿Tiken? ¿Tine jilel ka' ma cub tbinchexin?—tzixin.

Pero bix aj cytzak'be'n xjal juntl maj mas cyiw:

—¡E t'jaw twitz cruz!—tzikexin.

²⁴ Tejtzen tlonte Pilato mintii' tu'n tcub cyi'j xjal tu'nxin, bix nuk e jaw cyšitz'bil xjal, e jatz tii'nxin ch'in a', bix el ttxjo'nxin tk'abxin cywitz xjal te techel mintii' tilxin ti'j, bix e xi' tkba'nxin cyexin:

—Mintii' wila ka ma cyim jaj jiquen lu. Te cyeya cyila ka ma cyim—tzixin.

²⁵ Bix aj cytzak'be'n cykilca xjal:

—¡Ejoo'ya at kila ka ma cyim, bix jax ju'x at cyil kcwala!—tzi ke xjal.

²⁶ Bix etz ttzakpi'n Pilato ja Barrabás cye xjal. Pero e xi' tchk'o'nxin ke tsoldadoxin te k'olx tz'u'n tocsen ch'ut twi' ti'j Jesús, bix tu'n tjaw cyk'o'nxin twitz cruz.

²⁷ Bix e xi' cyii'n tsoldado gobernador tuj cuartel, bix e xi' cychk'o'nxin cykilca soldado tu'n toc cychmon cyiib ti' Jesús. ²⁸ Bix el cyii'nxin t-xbalen Jesús, bix oc cyk'o'nxin jun t-xbalen cyak tisen t-xbalen jun rey, te tzeblte Jesús. ²⁹ Bix e cub cybincha'nxin jun teorona nuk ch'i'xc'a, bix e cub cylo'mo'nxin tuj twi'xin. Bix oc cyk'o'nxin jun ptz'unt tuj tmank'abxin te techel bara nuk te cytzeblxin, bix e cubxe majekekin twitzxin nuk te cyxmucchablxin. Bix e xi' cykba'nxin:

—¡Axse Cycawel xjal judío!—tzikexin.

³⁰ Bix ocx cytzubanxin tuj twitzxin, bix etz cyii'nxin ptz'unt tuj tk'abxin tu'n tcu'x cyjubenxin tuj twi'xin. ³¹ Tbaillen cyxmuccha'nxilt tzunxin Jesús, bix el cyii'nxin jt-xbalenxin otk tz'oc cyk'o'nxin, bixsen oc cyk'o'nxin jtexin t-xbalen tocx. Bix e xi' cyii'nxin jaxin tu'n tjawxin twitz cruz ttxa'nxe tnóm Jerusalén.

Tej tjaw k'o'n Jesús twitz cruz bix e cyim

(Mr 15:21-41; Lc 23:26-49; Jn 19:17-30)

³² Tejtzen cyetzxin tuj tnóm, oc noj junxin xjal Simón tbi, aj Cirene, cywitzxin. Bix e cub cymako'nxin, bix e jaw cyk'o'nxin cruz ti' tkul jxin xjala.

³³ Tejtzen cyponxin tuj jun lugar Gólgota tbi, jatzen elpeninaj Tbakel Wi'ybaj, ³⁴ e xi' cyk'o'nxin tc'a'xin vino smo'n tuya jun wik remeda c'axsen. Pero tej tniy'bentexin, tcy'ixin tu'n t-xi' tc'a'nxin.

³⁵ Bixse e jaw pjet Jesús tuya clavos twitz cruz cyu'n soldado. Bix e cub cypa'n soldado t-xbalen Jesús cyoxolxin. E cub cyk'o'nxin suerte ti'j tu'n al ccamal ti'j. ³⁶ Bix e cub kekexin te c'ojlacte. ³⁷ Bix e jaw cyk'o'nxin cab letra tibaj twi'xin tzin tkba'n tilxin. Tzi cyjulu: “Ja xjal lu Jesús, cawel cye xjal judío,” tzi letra.

³⁸ Te xsunj k'ij tjaw ca'bxin alak' junx tuya Jesús. Jun cyexin e jaw twitz jun cruz tuj tmank'ab Jesús, bix juntlxin e jaw twitz cruz tuj tneñ Jesús.

³⁹ Yal tzunkej xjal exc'a' ttxlaj cruz jaa' tjawa Jesús, n-ocxetzen cytze'n xjal jaxin, bix nxi'xe cyyucan xjal cywi', ⁴⁰ bix njawxetzen yolen:

—Jatzen teja tcublel xitente nin tja Dios bix tu'n tjaw tbincha'na tuj oxo k'ij, co'pacatz tiiba. Katzen Tcwal Diosa, tcu'tztzen twitz cruz—tzikexin.

⁴¹ Ju'tzen tten cyoc ten nejenel cye cawel bix ke tx'olbal ley bix ke nintzaj xjal xmucchalec te Jesús. E xi' cykba'nxin:

⁴² —E tco'paxin nim xjal, pero yaltzen texin, mlay bint tco'pa tiibxin. Ka Cycawel aj Israelxin, e tcu'tz tzunxin twitz cruz ja'lewe, tu'ntzen kocslan ti'jxin. ⁴³ Oc ke tc'u'jxin ti' Dios. Bix e tkbaxin ka Tcwal Diosxin. Ju' tzunaj, il ti'j cclatelxin tu'n Dios ja'lewe. Pero la' ka taj Dios—tzi ke nintzaj xjal.

⁴⁴ Hasta jaan kej xin alak' otk chi jaw pjet twitz cruz, e xoo'n yol te Jesús.

⁴⁵ Tejtzen tpon chil k'ij, bix e cub jpet jun nintzaj klotj entera twitz tx'otx', bix e ten klotj oxo hora. ⁴⁶ Tej tpon tajlal oxo te kale, bix e jaw s-in Jesús cyiw tuj tyol:

—Elí Elí, ¿lama sabactani?—tziixin, jatzenj elpenina jyola “¡Ndios! ¡Ndios! ¿Tiken ma chin cyja' tcyeyena?”

⁴⁷ Attzen cab xjal oc ebinte tyol Jesús, pero min el cyniy' xjal ti'j. Bix e jaw yolenkexin:

—Cybinx. Luxin ntxcon jtyolel Dios Elías—tzikexin.

⁴⁸ Toctzen tbi'n junxin xjal cyxolxin, bix e xi' ajkelenxin k'ilbetz jun esponja, bix e cu'x tmu'nxin ch'in brat vino tuj, tx'om ch'in, bix oc t'xpo'nxin twi' jun ptz'unt, bix e jax toyenxin te Jesús. ⁴⁹ Pero e xi' cykba'n niy'tlkexin cyxol:

—Kokcye'yectzen la'tzen ka tzul Elías k'ilcatz texin—tzi tzunkekin.

⁵⁰ Cwa tel jun cyiw twi' Jesús, bix aj baj t-xewxin.

⁵¹ Tujxse naj tej tel tanem Jesús, jnintzaj xbalen tjaw tuj nintzaj tja Dios te maksbil twitzj mas jawnex xjan cwart jaa' u'la Dios, bi'x e cub rotj tmij. Bix tuyax jun xcyaklajnab, bi'x e baj cub c'abch ke xak. ⁵² Bi'x e jket cyjayel anem. ⁵³ Mas yaj, tej tjatz itz'j Jesús juntl maj tuj cyamecy, nim cyxumnl ocslal otk chi cyim e jatz itz'j tuj cyamecy, bix etzke tuj camposant bix ulke tuj xjan tnóm te Jerusalén tu'n t-xi' cyyee'c'an cyiib cywitz nim xjal.

⁵⁴ Yal tzunaj xin capitán cye soldado e jaw k'onte Jesús twitz cruz, cyuyaj xin c'ojlalte Jesús, tej toc cyce'yenxin xcyaklajnab bix cykilcaj otk baj, e tzaj ttzi cyi'jxin, bix e xi' cykba'nxin:

—Jaxnete tej xin xinak lu Tcwal Dios texin—tzikexin.

⁵⁵ Bix jax at nim xuuj ncyeyentz nakch. Otk chi oc lpe ke xuuj lu ti' Jesús tej ttzaj tuj Galilea, kej otk chi ajben te onel tuyaxin tuj be. ⁵⁶ Cyxol tzunxuj tocxe jxuj María Magdalena, tuyax juntlxuj María, ttxu Jacobo tuya José, bix xsunj xuj cytxu tcwal jxin Zebedeo.

*Tej tocx k'o'n Jesús tuj mukbil**(Mr 15:42-47; Lc 23:50-56; Jn 19:38-42)*

⁵⁷ Tejtzen ch'itk tex k'ij, ul junxin k'ina, José tbi, aj tnom te Arimatea. Otk tz'oc lpexin ti' t-xnak'tzibil Jesús. ⁵⁸ Jatzen José e xi' tuya Pilato te kanlte t-xumlal Jesús. E tcuya Pilato, bix e tkba tu'n t-xi' k'o'n t-xumlal Jesús texin. ⁵⁹ Bix e cu'tz tii'n José t-xumlal Jesús, bix oc thalk'i'nxin jun xbalen sak ti'j. ⁶⁰ Bix ocx tk'o'nxin tuj jun ac'aj tjayel anem twitz xak, tex texin tjayelxin otk tz'oc thinch'a'nxin. Bix oc tlomo'nxin ttzii' tuya jun tij xak, bix etzxin. ⁶¹ Yaltzen te María Magdalena tuya juntl María, k'uklkexuj twitz tjayel anem.

Kej c'ojlal ti'j tjayel anem

⁶² Tetzen juntl k'ij, jk'ij te ajlabl, e baj cychmon cyiib kej nejenel cye pala cyuyax aj fariseo twitz Pilato. ⁶³ E xi' cykba'nxin texin:

—Taat, n-ul tuj kc'u'ja j-e tkba ja x'tak' xjal lu tej mitkna'x tcyim. E tkbaxin: “Te toxen k'ij chin jawel itz'ja juntl maj tuj cyamecy,” t'zixin. ⁶⁴ Ju' tzunj, kbanx cye soldado tu'n tcyiwset tlemel tjayelxin cyuj ja oxo k'ij lu, tu'ntzen mi'n chi ul t-xnak'atzxin te koniyan tu'n tetz cyalk'a'nxin t-xumlalxin, bix cxe'l cykba'n cye xjal ka ma jatz itz'jxin juntl maj tuj cyamecy. Ka ju' pjel, mas chi pjel sbu'n ke xjal twitzj nejl—t'zixekin.

⁶⁵ E xi' tkba'n Pilato cyexin:

—Lu jun cloj soldado te cyey. Cyucxa cyey, bix cycyiwsum tjayelxin tisenj tzin cye'sna —tzi Pilato.

⁶⁶ Exkexin, bix e baj cycyiwsa'nxin tjayel Jesús. Oc cyk'o'nxin jun techel ti'j tij xak ttzii', tu'ntzen tchic'ajax ka otk tz'aj lk'e xak, bix e cyaj cyk'o'nxin ke soldado te c'ojlal.

28*Tej tjatz itz'j Jesús**(Mr 16:1-8; Lc 24:1-12; Jn 20:1-10)*

¹ Tbalenxitzen jk'ij te ajlabl, tej ch'itk kskix tuj tneel k'ij te smant, ja tzunj xuj María Magdalena, tuya juntlxuj María, ul cye'yelte tjayel Jesús. ² Tisen tii' tej ttzaj jun nintzaj xcyaklajnab, bix e cu'tz jun tsanjel Dios tuj cya'j, bix el tii'n jxak ttzii' tjayel anem, bix e cub ke ángel tibaj xak. ³ Tzinxsen ntxakakan, tisen jun tken k'ancyok, bix sakxix t-xbalen tisen skbaken. ⁴ Jatzen ke soldado, e tzaj lu'lenkexin tu'n ttzi ángel c'ij'jxin, bix ya min e yucchexin, tisen ke cyimne. ⁵ Bix e xi' tkba'n tsanjel Dios cye xuuj:

—Mi'n chi jaw sey'paj cyey. Ntzki'na nchi jyon cyey t-xumlal Jesús, jxin e jaw twitz cruz. ⁶ Pero ya min-alt texin tzalu, cuma ma jaw itz'jxin juntl maj, tisen e tkbaxin. Cycye'yenctz. Min-alxin jaa'j ocxexin. ⁷ Cyucxa naja cykba'xsen cye t-xnak'atzxin ma jatz itz'jxin juntl maj tuj cyamecy, bix cxe'l nej texin cywitz tuj Galilea, jatztzen c'oquel cycye'yen jaxin. Lu ma txi' nkba'na cyey—tzi ángel.

⁸ Entonces bix etz ajkelen kej xuj xuuj. E tzaj ttzi c'ij'jxuj, pero jax ju'x e tzalajkexuj. E xi'kexuj tuj ajkelbil kbalte tyol ángel cye t-xnak'atz Jesús. ⁹ Pero jey', oc nojtl Jesús cywitzxuj, bix e xi' tk'o'nxin jun k'olhebl cyexuj. Bix e pon lk'ekexuj ti'jxin, bix e cub majekexuj twitzxin tu'n cysukenxuj t-xee' tkenxin.

¹⁰ Bix e xi' tkba'nxin cyexuj:

—Mi'n tzaj ttzi c'ij'ja. Cyucxa cykba'x xsuna cye n'xnak'atza tu'n cyxi' tuj Galilea, jatztzen c'oquel cycye'yen inayena—tzi tzunxin.

Tej tul tumel cyu'n c'ojlal ti otk baj

¹¹ Maatktzen xi'ne cyxi' kej xuuj lu, at juun cyxol soldado c'ojlal tjayel Jesús e xi' tuj Jerusalén, bix e xi' cyk'umen cye nejenel cye pala ti otk baj. ¹² Tejtzen cybinte pala cyyol soldado, e baj cychmon cyiib cyuya nintzaj xjal tu'n cyyolen ti'j cyxolx. E xi' cyk'o'n nim cyppwak ke soldado, ¹³ bix e xi' cykba'n cye:

—Cykbanx cye xjal: “Ul ke t-xnak'atz Jesús te koniyan bix etz cyalk'a'n t-xumlalxin tej nko wutana,” tzi cybela. ¹⁴ Bix ka ma tbi gobernador etz k'i'n Jesús jooc'tzen nchi wutana, cbinel ti'j ku'na tuyaxin tu'ntzen mi'n chi byeta—tzi nejenel cye judío cye soldado te Roma.

¹⁵ E xi' cyii'ntzen soldado ppwak, bix e cybincha tisenx e tzaj cykba'n cye. Ja x'tak' yol lu el t'zitj cyxol judío, bix hasta ja'lewe at xjal tzin cybi'n.

*Manc'bil tyol Jesús cye t-xnak'atz**(Mr 16:14-18; Lc 24:36-49; Jn 20:19-23)*

¹⁶ Yaltzen cye junlaaj t-xnak'atz Jesús, e ponkexin tuj Galilea, twi' witz jaa' otk tkba Jesús. ¹⁷ Bix tej cylvontexin Jesús, e jaw cynimsa'nxin jaxin. Pero at cab cyxolxin e baj cyc'u'jxin ka yaa'n jaxin.

¹⁸ Bix e xi' tkba'n Jesús cye t-xnak'atz:

—Ma tzaj k'o'n weya wipemala tu'n ncawena tibaj cykilca tuj cya'j bix twitz tx'otx'. ¹⁹ Ju' tzunj, cyucxa tuj cykilca tnom twitz tx'otx' te kbalte cye xjal tu'n cyoc nxnak'atza. Bix cybautizara cye te techel cywitz xjal ma txi' cyk'on cyiib te Dios Mambaj bix te Dios Cwalbaj bix te Espíritu Santo. ²⁰ Cyxnak'tzanx cye tu'n tbint cyu'n cykilcaj ma txi' nkba'na cyey. Bix chin temela cyuyey cykilca k'ij, hasta ojxe tul manc'bil k'ij—tzi Jesús cye t-xnak'atz.

T-xi'len tchunk'lal Jesús tz'i'ben tu'n San Marcos

Tej tk'umen Juan Bautista tyol Dios

(Mt 3:1-12; Lc 3:1-9, 15-17; Jn 1:19-28)

¹ Ja libro lu ma tzak' yolel ti' tbanel tpochal Jesús, tcwal Dios, jaj junxin xjal e tyole Dios jatxe tuj tneel.

² Jatxe nejl, bix e cyaj ttz'i'ben Isaiás, jaj jxin tyolel Dios cyxol xjal te Israel, ti toc tu'n Dios te Tcwal. Tzitzen Dios cyjulu te Tcwal, tzi Isaiás: "Cxe'l nchk'o'n jun nyolel nejl twitza te yolel cyuya xjal nejl tu'ntzen cych'ixbente xjal cyanem. ³ Cjawal yolen jxjala jaa' yaa'n nim xjal najl. Tzitzen tbel cyjulu: 'Cybincham cyiiba twitz Taaw twitz tx'otx'. Cyjkom tboxin tuj cyanema,' tzi tbel jxjal cjawal yolen,'" tzi Dios te Tcwal, tzi Isaiás tcyajlen ttz'i'benxin.

⁴ Yaa'ntzen ti e baj. Eltzen cab jnabk'i ba'nxix. Cwatzen tul itz'j jxin xjal e tkba Dios. Bix oc tbixin te Juan Bautista. Tej tzunj toc Juan ma' xjal, bix e xi' Juan tuj jun lugar jaa' yaa'n nim xjal najl. Bix nim xjal e pon tu'ntzen cybautizarj xjal tuj nima' te Jordán. Bix e xi' tkba'n Juan cye xjal cyjulu:

—E cybautizarj tzuna tu'ntzen telniy' ka otk tz'ajtz ti' cynaabla twitz Dios, tu'ntzen tcub tnajsa'n Dios cyila—tzi Juan Bautista cye xjal. ⁵ Bix e pon nim xjal tej tnóm Judea bixsen tuj nin tnóm te Jerusalén te ebil tyol Juan. Bix e jatx cykba'n cyil, bixse e bautizarjke tu'n Juan tuj nima' te Jordán. Jatzen techel ka otk tz'oc cyk'on cyiib xjal tuya Dios.

⁶ Yaltzen te Juan t-xbalen, binne tuya ttzmal camello, xpo'ntzen tcy'itzxin tuya jun gamús. Yaltzen twaxin, bix e cnet tchi'xin ni' coc'kejl tisen jun cuchi', bix te'a'xin ta'l xii'. ⁷ Yaltzen tyolxin cye xjal, tzi tzunxin cyjulu:

—Tzul juntl xjal lepchxe wi'ja mas nintzaj nwitzá. Nintzaj xsunxin, yal weya mitetpe tak'el t-xaabxin ba'n tel npju'na. ⁸ Matzen chi bautizarja wu'na nuk tuya a', pero tzunj xjal tzul cxe'l'tzen tk'o'n Espíritu Santo cyey—tzi Juan Bautista cye xjal.

Tej tbautizarj Jesús

(Mt 3:13-17; Lc 3:21-22)

⁹ Nk'ontzen Juan ke xjal tuj a', tej tetz Jesús tuj Nazaret, jun tnóm te Galilea, bix e ponxin ti' Juan ttzii' jnima' te Jordán, bixsen e tbautizaran Juan Jesús tuj a'. ¹⁰ Njatzcaxix Jesús tuj a' tej t-xi' t'cye'yenxin tej tjket cya'j, bix e tilxin tej tetz Espíritu Santo tuj cya'j tisen junjl cucu'. Bix e cub licy'paj tuj twi' Jesús. ¹¹ Bix e tbi Jesús ttzaj tyol Dios tuj cya'j. Tzitzen cyjulu:

—Jay Ncwal a wanem ti'j. Jay ma nsicy'a—tzi jyol ttzaj tuj cya'j.

Tej toc niy'bet Jesús

(Mt 4:1-11; Lc 4:1-13)

¹² Yajc'atltzen, bix e xi' k'i'n Jesús tu'n Espíritu Santo tuj jun lugar yuman. Min-al xjal najl tuj. ¹³ E ten Jesús cya'wnak k'ij tuj ja lugara. E tenxin cyxol talen c'ul. Bix jatztzen oca ten taaw il niy'belte ti'n tipemal Jesús. Tbjalxenitl tzunj ju'wa, bixse ul ke tsanjel Dios onlte Jesús.

Bix ocx Juan Bautista tuj tzee' tu'n cawel tuj Judea cuma tajxin e we' t-xnak'tzibil Juan Bautista.

Tej ttzyet taak'en Jesús

(Mt 4:12-17; Lc 4:14-15)

¹⁴ Tocxlxenitl'tzen Juan tuj tzee', bix e xi' Jesús tuj tnóm te Galilea te k'umlte tumel cye xjal ti' tpochal jtbanel Dios. ¹⁵ Tzi tzunxin cyjulu:

—Ya matzen pon tumel tu'n tul tcawbil Dios cyxola. Matzen pon tumel tu'n t-xi' t'yeec'an Dios cyey ti tse'xa ejee'y tu'n cyco'pja tuj cyila. Ya lutzen ma tzula. Cyimaltzen cyiiba ti' il. Ccyajtzen meltz'aj tuya Dios, bix cybim'tzen tumel jtbanel tyol Dios—tzi Jesús cye xjal.

Tej ttzaj ttxco'n Jesús cyaja xjal quišel

(Mt 4:18-22; Lc 5:1-11)

¹⁶ At jun maj t-xi' Jesús betel ttzii' jun tnijabel a', tcub tuj Galilea, bix oc noj Jesús ti'j jxin Simón, bix yajc'atl oc juntl tbixin Pedro, bix titz'enxin Andrés. Tzyul quišexin tuj a'. Tej toc noj Jesús cyi'jxin, nxi' cyxoo'nxin cyxiy'paxin tuj a' te tzyul quiš. ¹⁷ Bix e xi' tkba'n Jesús cyexin:

—Chi lpetz wi'ja. Ja'lewe lu key nchi chmon quiša. Pero inayenxse chin oquel k'onte cyey te txcol xjal tu'n cybinte nyola—tzi Jesús te Simón tuya Andrés.

¹⁸ Tejtzen cybinte xinj ju'wa, bixse tcyaj cyk'o'nxin cyxiy'paxin tu'n cyoc lpexin ti' Jesús. ¹⁹ Bix e xi' cybetexin juntl tkiy', bix oc nojkexin ti'j jxin Santiago tuya titz'enxin Juan, junxitl Juan, tcwal jxin Zebedeo tbi. Ete'c'axxin tuj jun choc, nchi binchanxin cyxiy'paxin. ²⁰ Bix

e tzaj ttxco'n Jesús ejee'xin. Bix e cyaj cyk'o'nxin cyxi'y'paxin te cymanaxin bix cye ke onl cyexin, bix e xi'kexin tuya Jesús.

Jun xjal otk tz'oc biman ti'j
(Lc 4:31-37)

²¹ Bix e ponkexin tuj jun tnom Capernaum tbi. Tec'atzen jun k'ij cynimbil xjal tej tocx Jesús tuj jun camon jaa', jaa' nchi na'na xjal Dios, sinagoga tbi, bix ak'xin xnak'tzal cye xjal. ²² Bix e baj jaw klee' ke xjal ti'j t-xnak'atz Jesús cuma e xnak'tzanxin tisen jun xjal tuya tipemal, yaa'n ju' yolexin tisen kej xin tx'olbal ley.

²³ Nxnak'tzantzen Jesús tuj camon jaa' te xnak'tzabl tyol Dios, tej tocpa jun xjal otk tz'oc licy'paj biman ti'j. Bix e jaw s-in:

²⁴ —Jey! ¿tu'n tikentzen ma tzuley yajlalec keya, Jesús te Nazaret? ¿Mapa tzula te xitlc'a keya? Ntzki'nwe al cyey, bix ntzki'nwe ka jay jxjan te Dios—tzi biman otk tz'oc ti' xjal.

²⁵ Bix aj ttzak'be'n Jesús te biman:

—jC'oll! jBix k'oncj xjal lu!—tzi Jesús.

²⁶ Bi'xse e tzaj cyim jxin xjal tu'n tipemal biman tej tel ok ti'jxin tu'n Jesús. Tzinxse nš-in biman tej tel. ²⁷ Bix cykilca ke xjal e jaw klee' bix ak' ke xjal kanle tie' cyxol:

—¿Titzen xjalel jxin lu? Nejl ma ko baj t-xnak'tza'nxin tuya nim tipemalxin. Yaltzen ja'lewe hasta cyuyax biman ma tz'abinte tyolxin—tzi ke xjal.

²⁸ Lwewaxse el tzi't naj tpochalxin tuj cykil Galilea.

Tej tk'anj jxuj tji' Pedro tu'n Jesús
(Mt 8:14-15; Lc 4:38-39)

²⁹ Tejtzen tetz Jesús cyuya Santiago bix Juan cyuyax Simón bix Andrés tuj camon jaa' te xnak'tzabl tyol Dios, bix e xi' bajkexin cyja Simón tuya Andrés. ³⁰ Tej tzunj cyponxin tja Simón, tjax jxuj tji' Simón twi' wetbil, cuma otk tzaj yebt-xuj tu'n nin cyak. Bix e xi' cykba'nxin te Jesús ka yaabxuj. ³¹ Bix e xi' lk'e Jesús, bix e jaw tii'nxin tk'abxuj. Tzinxix njaw tii'nxin tk'abxuj tu'n tjaw we'xuj, n-el licy'pajtl yabel. Bix ak'xuj cyey'lx cyexin.

Tej tk'anj nim yaab tu'n Jesús
(Mt 8:16-17; Lc 4:40-41)

³² Tetzen otk cu'x k'ij, tej cyak' pomel nim xjal tja Simón tuya cyaaab bix kej xjal otk tz'oc licy'paj biman cyi'j, tu'ntzen toc tk'a'na Jesús ke yaab, bix tu'n tel tlojo'n Jesús biman cyi' xjal. ³³ Nimxse xjal e pon tziyan tisenc'a cykilca tnom. ³⁴ Bix oc tk'a'na Jesús kej xjal yaab, bix el tlojo'nxin biman cyi'j juntl wik xjal. Pero tej tzunj tel tlojo'nxin biman cyi' xjal, mintzen e tcuya Jesús tu'n cyjaw yolen biman, cuma cytzki'n biman twitz Jesús.

Tej t-xi' Jesús tuj Galilea kbalte tyol Dios
(Lc 4:42-44)

³⁵ Tetzen klaxca, n-ak' cwelc'a jket t-xee' cya'j, bix e jaw we' Jesús, bix exxin ttxa'n tnom te yolel tuya Dios tjunalxin.

³⁶ Yaltzen te Simón bix xsunj oxetl tuyaxin, bix exkexin te jyolte Jesús. ³⁷ Tej tzunj tcnnet Jesús cyu'nxin, bix e xi' cykba'nxin te Jesús cyjulu:

—Cykilcaxse xjal njon ti'ja. ¿Tikentzen min che'x tcye'yena xjal?—tzi tzunkexin.

³⁸ Pero bix aj ttzak'be'n Jesús cyexin:

—Mlay ko aj meltz'ajtl cyuya xjal, cuma il ti'j ma ko'x te pochal tej tbanel Dios cye xjal cyuj jun wikxilt tnom nka tzalu, cuma yaa'n nuk tzalu ma chin tzaa' kbalte tyol Dios—tzi Jesús cye Simón.

³⁹ Ju'tzen e pja' cybetsa'n Jesús cyuya ke tuya tuj cykilca ke tnom te Galilea. Bix tuj jaca camon jaa' tuj juun tnom ocxakexin kbalte cye xjal jtbanel tyol Dios. Bix n-elxitzen tlojo'nxin biman cyi'j xjal otk tz'oc licy'paj biman cyi'j.

Tej tul tnaabl jun xjal nim tx'a'c ti'j tu'n Jesús
(Mt 8:1-4; Lc 5:12-16)

⁴⁰ Pero attzen jun k'ij, bix ul junxin xjal yaab tu'n lepra otk tzaj k'ey tk'abxin tisen tu'n tz'enak. Bix e xi' lk'exin ti' Jesús, bix e cub majexin, bix e xi' tkanenxin te Jesús tu'n toc k'anet-xin. Tzi tzunxin cyjulu:

—Taat, ¿tajpey tz'el tii'na ch'in jyabela wi'ja? At tey tipemal tu'n tel tii'na—tzi tzunxin te Jesús.

⁴¹ Bix oc cy'ixbe tc'u'j Jesús ti'jxin. Bix oc tmoco'n Jesús jaxin.

—Wajwe, cyaj tey ba'n—tzi'tzen Jesús.

⁴² Tujx naj t-xi' tk'umen Jesús, tzin ncyajtl jxin xjal ba'n. ⁴³ Bix e xi' tkba'n Jesús texin:

—Cutxena tey. ⁴⁴ Pero mi'n txi' tk'umena ti ma baj tey, sino jiquen t-xi'y te yec'l tiiba twitzj xin tawil na'l Dios, tu'n toc tcye'yenxin jay ka ma tzul tnaabla. Bix k'inx xsunj tik'ch

c'ajbel tey tisej e cyaj tkba'n Moisés, tu'ntzen t-xi' toyen tawil na'l Dios tisex tten tley Moisés, tu'ntzen tcyaja tuj chic'aj ka ma tzul tnaabla—tzi Jesús texin.

⁴⁵ Pero ch'in tel-len lk'e jxin xjal, bix ak'xin kbalte ka otk tzul tnaablxin tu'n Jesús cye cykil xjal. Ju'tzen e'la nim tpochal Jesús. Ya min ocxtlxin cyuj tnom tu'n nimxse xjal oc cutz'j ti'jxin. Ju'tzen e webaxin tuj cojbil jaa' yaa'n nim xjal najl. Pero nuk jak'ch e tzaa' jlet ke xjal cyey'lte texin.

2

Jun xjal mintii' tanem t-xumlal ul tnaabl tu'n Jesús

(Mt 9:1-8; Lc 5:17-26)

¹ Eltzen cabtl k'ij, bix ocx meltz'aj Jesús juntl maj tuj tnom te Capernaum. Pero tej tzunj tbiyt tpochal Jesús ka otk ponxin tuj jun jaa' tuj tnom, ² lwewa e jaw tchmon naj tiib xjal tpe'nj jaa' jaa' otk tz'ocxa Jesús, bix ocx baj ke xjal tunwen. Ya min ocx bajtl ke xjal tunwen, bix mitetpe pe'ntl oca baj ke xjal. Bix ak'xin te tx'olbal tyol Dios cye xjal.

³ Ntx'olbantzen Jesús cyxol xjal, tej tul jun cloj xjal ikentzen jun yaab tu'n cyaja cyexin twitz jun wetbil. Mintii' tanem t-xumlalxin. ⁴ Pero ya mix ocxakexin jaa' tocxe Jesús tunwen, cuma otk noj jaa' cyuya xjal. Entonces bixse e baj cybincha'nxin yaab tu'n tjax cyii'nxin yaab twi' jaa'. Bix el cyii'nxin jun txol twi' jaa', tu'n tcu'x cyxtunenxin yaab twitz wetbil jaa'j tcu'xa Jesús. ⁵ Pero tej tzunj toc tcyey'en Jesús k'uklec cyc'u'j xjal ti' Jesús, bix e xi' tkba'nxin te yaab cyjulu:

—Ncy'aal, matzen najset tey til ja'lewe—tzitzen Jesús te yaab.

⁶ Pero k'uklec xsunkej xin tx'olbal ley, bix iy' tuj cyc'u'jxin cyjulu:

⁷ —¿Tikentzen t-xoo'na tiib jxjal lu te yolel ju'wa? Nxoo'n teja yol ti' Dios. O'cxc'ate Dios ba'n najsante cyil xjal—tzi tzunkexin tuj cyc'u'jxin.

⁸ Pero el naj tniy' Jesús ti'j ti jilel niy' tuj cyc'u'j tx'olbal ley, bix e xi' tkenenxin:

—¿Tikentzen nxa' cyxi'mana ju'wa? ⁹ ¿Alcye mas secy tyol jilj tej yaaba tuj cywitz, japa: “Ma najset tila,” bix ma jaj: “We'wetzen tey, k'inx twetbila, bix cutxetzen tjax”? Oj t-xi' tk'umen jun xjal: “Ma najset tila,” yaa'n cyiwte tyol jilj, cuma min chic'aj ka otk najset til xjal, bix ka min. Pero oj t-xi' tk'umen jun xjal tej yaaba: “We'wetzen tey, k'inx twetbila, bix cutxetzen tjax,” mas cyiw tyol jilj, cuma cchic'ajaxel naj ka ma tzul tnaabl, bix ka min. ¹⁰ Pero konyeec'axe cyey ka inayen weja, jxjal Sma'n tu'n Dios tu'n ntena cyuya xjal, at wipemala twitz tx'otx' tu'n nnajsa'na cyil xjal—tzi Jesús cye tx'olbal ley.

Entonces bix e xi' tkba'n Jesús tej xin yaab:

¹¹ —We'wetzen tey, k'inx twetbila, bix cutxetzen tjax—tzi Jesús te yaab.

¹² Tej tzunj t-xi' tkba'n Jesús, tzin njaw we'tlte yaab, tzin niy' ti'tlxin twetbilxin, n-etztlxin tuj jaa' cyxol xjal. Ju' tzunj nimxse e jaw klee' ke xjal, bix oc tzalaj ke xjal ti' Dios, bix e baj jaw yolenke:

—Bajxse tz'oca kcyey'en jun maj tisej lu—tzitzen ke xjal.

Tej ttzaj txquet Leví tu'n Jesús

(Mt 9:9-13; Lc 5:27-32)

¹³ Tbjalen tk'a'naxitlzen Jesús jxin mintii' tanem t-xumlal, bix e xi' meltz'ajxin ttzii' jtnjabel a', bix ak' pomel lk'e ke xjal ti' Jesús, bix nxnak'tzantzen Jesús cyxol xjal. ¹⁴ T-xi' tbeten Jesús juntl tkiiy', bix exxin twitz jun jaa', jaa' ete'c'a kej xin chmol chojentj najben te juntl tnom Roma tbi. Jatztzen oca noj Jesús ti' Leví, tcwal jxin Alfeo. Jatzen Leví chmol pwak tu'n Roma. Bix e xi' tkba'n Jesús te Leví:

—Lpetz tey wi'j te wuya—tzitzen Jesús.

Bix e jaw we' Leví, bix oc lpxin ti' Jesús.

¹⁵ Yaa'ntzen ti e baj, bix e xi' ttxco'n Leví ja Jesús te waa'l tja cyuyax ke t-xnak'atz Jesús lepch ti'j, bixse ke kanl chojentj, bix nimtl xjal iiq'uenke tu'n juntl wik, cuma nimxse xjal yaa'n ba'n oc lpe ti'j Jesús.

¹⁶ Bix e pon cabxin tx'olbal ley, cyxol jun cloj xjal n-oc cyk'on cyiib cyiw tuj jtley Dios e cyaj tk'o'n Moisés, fariseo tbi cyclojan xjal. Tej tzunj tocx tcyey'en tx'olbal ley nwaa'ncx Jesús cyuya yuwin xjal, bix e xi' cykanenxin cye t-xnak'atz Jesús:

—¿Titzen taj jxin xnak'tzal cyey nwaa'ncxin cyuyaj yuwin xjal bix xsunkej kanl chojentja?—tzi tzunkexin.

¹⁷ Pero e tbi Jesús cyyol tx'olbal ley tej t-xi' cykba'n cye t-xnak'atz Jesús. Bix e xi' tkba'nxin cye tx'olbal ley:

—Kej xjal ba'n min che'xcye tuya k'anel. Yal tzunkej xjal yaab, il ti'j nche'x tuya k'anel. Jaxse ju'x weya. Min ma chin ul weya te k'ilectz cyej xjal mintii' cyil cyey tuj cywitz, sino ma chin ul weya k'ilectz cyej xjal aj il tuj cywitz—tzi Jesús cye tx'olbal ley cyxol fariseo.

Jun kanbil ti'j epaj weyaj
(Mt 9:14-17; Lc 5:33-39)

¹⁸ Pero attzen jun maj min chi waa'n xjal lepch ti' tyol Juan Bautista bix xsunkej xjal lepch ti'j ley fariseo, tu'n t-xi' cyyeecc'an xjal cyanem te Dios. Attzen cabtl xjal e xi' kanlecte te Jesús:

—Ma kila ka min chi waa'n jxjal lepch ti' Juan Bautista bix ke lepch ti'j ley fariseo. Pero yaltzen kej tey t-xnak'atz, minttzen chi waa'n tisej cyewa. ¿Tikentzen min cybinche tisej cyej xjala?—tzi ke xjal te Jesús.

¹⁹ Bix aj ttzak'be'n Jesús cye xjal:

—Tuj jun mejoblenel tzul nim xjal tuya chmilbaj te iy'sal nin k'ij. Jayaxittzen cub cyyo'n xjal weyaj, sino chi waa'lcye xjal, cuma nchi tzalaj. ²⁰ La' altzen cye jun k'ij oj tcub naj chmilbaj, attzen bis. Entonces jatzen mi'n chi waa'ncye xjalj. Jaxse ju'x weya. Ojtzen ncub naja, ba'ntzen tcub cyyo'n weya nxnak'atz weyaj, pero ja'lewe mlay. ²¹ Pero at juntl cxe'l nkba'n cyey. Min-al jun xjal ncu'x k'onte jun remyent ac'aj ti' jun xbalen k'anak, cuma mas q'uelex rotj k'anak tu'nj ac'aj oj toc yut'paj. Jaxse ju'x weya, ac'aj nyola. Mlay tz'oc tmoj k'anak xnak'tza'n. Tej min chi waa'n xjal ja'lewe ja te xnak'tza'nja te nejl. ²² Bix juntl. Tise oj ncub cyk'eysa'na ac'aj cyviney tuj jun k'anak tz'u'n, n-ex rotj tu'n vino oj n-el ipc'aj, cuma cxe'l tz'u'n tuj il tuyax vino q'uelel kojil. Pero oj ncub cyk'eysa'na ac'aj cyviney tuj ac'aj tz'u'n, mintzen tz'ex rotj. Jaxse ju'x weya nxnak'atz. Mlay tz'ocx tuj cyey k'anak cyxnak'atza—tzi Jesús cye xjal.

Ke t-xnak'atz Jesús el cyii'n twitz triwa tuj k'ij te ajlabl
(Mt 12:1-8; Lc 6:1-5)

²³ Attzen jun k'ij, bix ex bet Jesús cyxol triwa cyuya t-xnak'atz. Tec'a manc'bil k'ij tuj smant, jaj k'ij xjan cyxol xjal. Nchi exxe tzunxin ttzii' triwa, niy'xetzen cytokaxin tspigayil triwa, nxi'xetzen cywaa'nxin, tisenx cyten xjal. ²⁴ Bix oc naj cykanbil jxjal fariseo twitz Jesús:

—Cyena. ¿Tikentzen tzin tcuanyey tu'n tel cytokan jtey t-xnak'atza tspigayil jtriwawa? Xjante ja'lewe. Keya kxol, ak'untl teja, bix jatzen jun k'ij tu'n kajlan keya ja'lewe—tztizen ke fariseo te Jesús, cuma nimalxse ke xjal tuj cyley.

²⁵ Pero bix aj ttzak'be'n Jesús:

—¿Bajxpatzen txa' cycyeyena tuj u'j ti e baj tej xin kiy'jil David cyuya ke tuyaxin tej toc nim tak' weyaj cyxin jun maj? ²⁶ Te tzunj tyem tej tocx Abiatar te nintzaj tawil na'l Dios, bix ocx David tuj tja Dios, bix etz tii'nxin jpan clo'n tex te Dios, bix jatzen panj xjan t-xi' twaa'n jun xjal, o'cxc'a ke tawil na'l Dios ba'n t-xi' waa'nte. Bix e xi' twaa'n David cyuya ke tuya—tzi Jesús cye fariseo.

²⁷ Bix e xi' tkba'n Jesús juntl yol cyexin:

—At juun tley Dios mas nintzaj twitz cabtl tley Dios, tisen tzunj ley tu'n tclet xjal tu'n weyaj twitzj nuk c'u'n xjan pan. Yaltzen tisen ja lu, ja k'ij te ajlabl o cub tbincha'n Dios te onbil xjal. Pero yaa'n te xjal o cub bint te c'ojlal te k'ij. ²⁸ Ju' tzunj inayena, jxjal Sma'n tu'n Dios, at wipemala ncawena cyibaj xjal la' ti cwel cybinchen te ja k'ij ja'lewe—tzi Jesús cye fariseo.

3

Junxin xjal otk tz'el tanem tk'abxin
(Mt 12:9-14; Lc 6:6-11)

¹ Pero attzen jun maj, bix ocx meltz'aj Jesús tuj jun camon jaa' te xnak'tzabl tyol Dios.

Pero toc tcyeyen Jesús, tocx junxin xjal cyimne jun tk'abxin tuj camon jaa'. Tec'aj k'ij manc'bil tuj smant, xjan cyxol xjal.

² Pero tec'a tzunj k'ij xjan, bix ete'c xsunj xjal tej cloj fariseo tuj camon jaa'. Tej tzunj toc cycyeyen fariseo ja Jesús, bix oc tenkexin c'ojlalte Jesús ka tu'n toc tk'a'naxin tk'ab jxjal yaab tuj k'ij xjan, tu'ntzen teleniy' ka tu'n tcub tz'akxin tuj tley Moisés.

³ Entonces bix e xi' tkba'n Jesús tej xin yaab:

—We'wey, bix we'c'atzen tzalu cywitz xjal—tzi Jesús texin.

⁴ Bixse e xi' tkanen Jesús cye xjal fariseo:

—¿Cuyanpatzale tu'nj cyleya tu'n tcub kbinchen jun xtalbil tej k'ij ajlabla, bix ma ja jun k'ij tu'n tcub kbinchen jka'? ¿Cuyanpale tu'nj cyleya tu'n toc clet cychunk'lal xjal, bix ma ja jun k'ij nuk c'ouel cye'yet jun xjal oj tcub cyim?—tzi Jesús.

Pero min-al ajtz tzak'bente Jesús.

⁵ Toc tcyeyen Jesús mintii' lastim cye xjal tuj cywitz fariseo, bix e tzaj tk'ojxin tuyax e jaw bisexin, bix e xi' tkba'n Jesús tej xin mintii' tanem tk'ab:

—Nukpinx tk'aba—tzi Jesús.

Bix e xi' tnuqpi'n jxin xjal tk'abxin, bix ul tnaabl tk'abxin.

⁶ Pero tej tzunj toc cycye'yen jxin fariseo ja lu, bix etzkekxin tuj camon jaa', bix ak'kexin te ninc'ul ti'j, tuya juntl clojxin tk'on tiib tuya Herodes, tu'n ti tten tu'n tcub Jesús. Jatzen Herodes cawel tibaj Galilea.

Nim xjal e pon ttzii' mar

⁷ Yal te Jesús, bix e xi'xin ttzii' tnijabel a' cyuya t-xnak'atzxin. Pero nimxse xjal aj Galilea lepchech ti' Jesús. Bix nimxse xjal e tzaj te jun wiktł tnom. E tzaj te Judea, ⁸ te Jerusalén, te Idumea, te juntl jlajxe te nima' Jordán, tej tnom Tiro, bixse te Sidón, cuma txolen toc cybi'n xjal tik'ch nbint tu'n Jesús. ⁹ Tocxse lpe nim xjal, bix e xi' tkba'n Jesús cye t-xnak'atz tu'n tcub cybincha'n jun choc tuj a' tu'ntzen mi'n tz'oc cutz'jxin cyu'n xjal, ¹⁰ cuma nimxse xjal yaab otk tzul tnaabl tu'n tipemal Jesús. Ju' tzunj nimxse juntl wik xjal yaab e baj tcu'tz'en tiib te mocolec te Jesús tu'n tul cynaabl. ¹¹ Bix ju'x kej xjal otk tz'oc biman cyi'j, bix e ponke ti' Jesús. Pero tej tzunj toc cycye'yen biman ja Jesús, bix oc cychk'o'n biman ke xjal tu'n cymb maje twitz Jesús. Bix e jaw 8-in ke biman:

—Ja tey Tcwal Dios!—tžitzen ke biman.

¹² Pero bix e xi' tmayo'n Jesús ke biman tu'n mi'n jaw cyši'n biman alcye Jesús.

E jaw t-scy'o'n Jesús cablaaj t-xnak'atzxin

(Mt 10:1-4; Lc 6:12-16)

¹³ Yajc'atltzen bix e xi' Jesús cyxol coc' witz, bix e xi' ttxco'nxin kej xjal e tajbexin. Tej tzunj cychmet-xin, ¹⁴ bix etz tscy'o'n Jesús cablajajxin te tuya Jesús, bix tu'ntzen cyxi'xin kbal thanel tpochal Jesús cye xjal tuj cykil tnom. ¹⁵ Bix e xi' tk'o'n Jesús cypemalxin te lojolbel biman cyi' xjal. ¹⁶ Ejee'tzen xinj e tscy' Jesús, kej xin lu: Simón, pero bix oc tk'o'n Jesús tcaab thixin te Pedro, ¹⁷ Santiago, bixse titz'enxin Juan, tcwal jxin Zebedeo, jatzen Santiago tuya Juan oc tk'o'n Jesús cybi te tcwal k'ancyok, cuma nim nchi k'ajt-xin, ¹⁸ Andrés, Felipe, Bartolomé, Mateo, Tomás, bixse Santiago, tcwal jxin Alfeo, Tadeo, Simón, xcul xjal te jun cloj Celote tbi, ¹⁹ bixse Judas Iscariote, jatzen xinja t-xi'lel q'ueyente Jesús mas yaj. Ejee'tzen xinj oc cybi te t-xel Jesús.

Jaj xoo'j yol ti' Espíritu Santo

(Mt 12:22-32; Lc 11:14-23)

²⁰ Tetzlenxiitzen tscy'o'n Jesús ke t-xnak'atz, bix aj meltz'ajxin cyuya t-xnak'atz tuj jaa' jaa' ntemaxin. Bix tocxse chmet nim xjal ti' Jesús juntl maj, ya mintey' e binttl twaa'nxin cyuya ke t-xnak'atzxin. ²¹ Pero tejtzen toc cybi'n ke te tja Jesús tik'ch nbaj texin, bix e xi'ke te k'ilx texin cyja, cuma e'latzen tuj cywitz ka tuj twi'xin otk jaw.

²² Ju'x kej xin tx'olbal ley, otk chi tzajxe tej tnom Jerusalén, ka' cyyolxin ti' Jesús. Bix e baj yolenkexin cyjulu:

—Ma tz'oc tawil biman ti'jxin, bix ma tzaj tk'o'n tawil biman tipemalxin tu'n tel tlojo'nxin ke biman cyi' xjal—tžitzen ke tx'olbal ley te Jerusalén.

²³ Bix e tzaj ttxco'n Jesús ke tx'olbal ley, bix e xi' tkanen Jesús cyexin:

—¿Ti tten oj tel tlojo'n tawil biman ke tuya ti' jun xjal? ²⁴ Mlay tpa jun tnom ka tpa'n tiib tu'n k'oj. Cwel xitj. ²⁵ Jun najaj xjal tpa'n tiib tuj tja jax mlay tz'itz'j tu'n k'oj. ²⁶ Jaxse ju'x te bimana. Ka ma jaw meltz'aj biman ti'jxin biman, jax mlay cypa biman. ²⁷ At juntl cxe'l nkba'na cyey. Min-al ba'n tocx tuj tja jun xjal cyiw te k'ilbetz tk'inemal tuj tja. Katzen xpo'n, ba'ntzen tetz tk'inemal tuj tja. Jaxse ju'x weya. Waja chi el walk'a'na xjal te biman. Ju' tzunj cwel n'xpo'na biman. Ka ma tzel nlojo'na ke biman cyi' xjal, jatzen ncub n'xpo'na biman bix chic'ajzten ka at mas wipemala twitz biman. ²⁸ ¡Mi'n cyxoo' cyiiba! Tzinen cxe'l nkba'n cyey ba'n tcub tnajsa'nte Dios tixja ilele, bix tixja xoo'j yol ti' Dios. ²⁹ Pero al tzunj ma xoo'n yol ti' Espíritu Santo, mlaytzen tnajsa Dios til junx maj, sino matzen cyaj t-xee' til te junx maj—tži Jesús cye tx'olbal ley, ³⁰ cuma otk tz'oc cykba'nxin ka tu'n tipemal tawil biman otk tzel tlojo'n Jesús ke biman cyi' xjal, bix ju' otk tzaj te Jesús tipemal tu'n Espíritu Santo.

Bix etzke tx'olbal ley.

Tej tpon ttxu Jesús cyuya ke titz'enxin

(Mt 12:46-50; Lc 8:19-21)

³¹ Nuk ch'in tuj, tej tpon ttxu Jesús cyuya ke titz'enxin tpe'nj jaa' jaa' tocxa Jesús, bix ocx txocbajxin cyu'n ttxuxin tu'n tetzxin. ³² Pero min ocpan canantł jxjal ocx te txcolte Jesús. Entonces ejee'tl tzunj xjal k'uklec nka ttxlaj Jesús e xi' kbante:

—Lu ttxuy cyuya ke titz'ena ete'c'a pe'na, bix lu ke nchi jyon ti'ja—tži ke xjal te Jesús.

³³ Bix aj ttzak'be'n Jesús:

—¿Al tzunj weya ntxu, bix al tzunj weya witz'en?—tži Jesús.

³⁴ Bix ak' Jesús cyey'lec cye xjal, bix e xi' tkba'nxin:

—Ejee' tzunj luwe weya ntxu bix weya witz'en. ³⁵ Yal tzun kej ma chi ula jatzen weya ntxuj bix witz'ena te ntzq'uela. Pero aljxe xjal nbinchante tajbil Nmana Dios, ejee' tzunj c'oquel cyak' we, tisex ntxuya bix ke witz'ena te ntzq'uela—tzi Jesús.

4

Jun techel ti'jun awal (Mt 13:1-23; Lc 8:4-15)

¹ Te juntl maj, bix ak' Jesús xnak'tzal xjal ttzii' tñijabel a' juntl maj. Tjawsxe chmet xjal, bix e cu'x Jesús tuj jun choc tibaj a', bix e cub kexin tuj choc, nchi cyaj bajltzen xjal ttzii' a'. ² Entonces bixse ak' Jesús xnak'tzal xjal, tuya jun tumel ti' awal. Tujtzen t-xnak'atz Jesús e xa' tkba'n cyjulu:

³—Cyabintz ja lu: At junxin awal ex te awal triwa. ⁴ Tak' tzunxin awal, at cab iyaj e cub tztitj tuj be. Bix e pontl ke ch'it njaw cywaa'ntljil. ⁵ Cabtl twitz iyaj e cyaj tz'ak twitz pc'at tx'otx'. Bix e jatz pok'ch te iyaj, cuma yaa'n nim t-xee' tx'otx'. ⁶ Tu'ntzen tcykal k'ij, bix oc woch'paj, tejxe ttzki, cuma yaa'n nim tlac' otk txi' tuj tx'otx'. ⁷ At cabtl twitz iyaj e cyaj tz'ak tuj tik'ch ch'i'xel. Pero nuk e jaw xq'uilliln tjak' ch'i'x, tejxe tetz cyim. Mintii' twitz e tak'. ⁸ Pero at cabtl twitz iyaj e cyaj tz'ak tuj thanel tx'otx', bix e jaw tz'iy, bix e tak' nim twitz. At juun tken e tak' winaklajaj twitz. At cabtl e tak' oxc'al twitz. Bix at cabtl tken e tak' jun mutx' tuya wink'an twitz, bix ma syent—tzi Jesús cye xjal.

⁹ Bix e xi' tkba'n Jesús:

—Cjykom cyxquina. Katzen cyaja tz'el cyni'ya ti'j yol lu, cyxi'maxsen ti'j—tzi Jesús.

¹⁰ Tcyajtzen Jesús tjunal cyuya t-xnak'atz bix cabtl xjal, bix e xi' cykanen te Jesús ti elpenina j yol otk tkba Jesús. ¹¹ Bix aj tzak'be'n Jesús:

—Mintii' tumel cyuya xjal ti tten tjawlel ttz'isen Dios tcawbil. Yaltzen cyey, ejee'y nrxnak'atz, matzen txi' tk'o'n Dios cyey tu'n tel cyni'ya ti'j ti tten bix ti ctemela tcawbil Dios twitz tx'otx'. Yaltzen cyey xjal min tz'oc cybi'n nyol, nchi oc nrxnak'tza'nwe, pero yaa'nix tuj jiquen yol. ¹² Nchin xnak'tzantzenwe ju'wa tu'ntzen tchic'ajax ti elpenina j yol kiy'jil Isaías tej t-xi' tkba'nxin cyjulu: “Cuma amale n-oquet cycye'yen, pero mintey' n-ak' cywitz ti'j. Bix seya n-oc cybi'n, pero mintey' n-el cyniy' ti'j. Nuket el cyniy' ti'j, otle chi meltz'aj tuya Dios bix otle najset cyil,” tzi Isaías.

¹³ Yajtzen cykanbila ti'j weya nyol, jiyaxittzen min tz'el cyni'ya ti'j! Kane min tz'el cyni'ya ti'j ja lu, jey', ztine cyse'y tu'n tel cyni'ya ti'j cabtl cyiw tpocbal tzul?

¹⁴ Konkba'xne cyey ti elpenina jyola. Jxjal awal jatzen xjalj nkban tyol Dios. ¹⁵ Ja tzunj iyaj cwel tz'ak tuj be, ja tzunja tisej nbajte tyol Dios tuj cyanem jun wik xjalja. Ejee'tzen xjalja n-oc e binte tyol Dios, bix n-el tii'ntl naj biman tuj cyc'u'j. ¹⁶ Ja tzun kej awal cjawel itz'j tuj pc'at tx'otx', jatzen juntl wik xjalja. Ejee'tzen xjalja n-oc e binte tyol Dios, bix n-oc juch cyc'u'j ti'j. ¹⁷ Pero yaa'n cyiw cyc'u'j, tisen yaa'n nim tlac' iyaj tuj tx'otx'. Ju' tzunj min cypa. Ka ti ilel ma tzaj cyi'j tu'n tyol Dios, ya mintltzen tz'oc juch tyol Dios ti' cyanem xjal. ¹⁸ Ja tzunj tx'otx' nim ch'i'x twitz, jatzen juntl wik xjalja. N-oc e binte tyol Dios, ¹⁹ pero nuk ju' naj cyc'u'j ti'j ti jilel at twitz tx'otx'. Ja tzunj nuk ju' toc cyanem ti'j ti q'uelexa cyk'ij, k'ak' cyc'u'j ti' k'inemal, bix n-oc tak' twitz tx'otx' cye, ejee' tzunja k'e'lexc tibaj tyol Diosa. Ya mintzeny' n-oc juchtl cyc'u'j xjal ti' tyol Dios. ²⁰ Ja tzunj iyaj e cub tz'ak tuj thanel tx'otx', ja tzunja tisen kej xjal n-oc cybi'n tyol Dios, tzin cyiik' tyolxin, bi'x n-oc ten ti' cyanem. Ejee'tzen xjalja tisenj awal tzin tk'o'n nim twitz, tisenj tspigayil triwa attzen tk'o'n winaklajaj twitz, at te oxc'al twitz, bix at te syent twitz—tzi Jesús cye t-xnak'atz.

Mintii' jun tuj ewjel mint jaw chic'ajax (Lc 8:16-18)

²¹ Bix ak' Jesús xnak'tzal xjal tuj ewjel yol juntl maj:

—zJac'apatzen tzaj tii'n jun xjal jun cantil tu'n tocx ewet tjak' jun alma bix ma tjak' wetbil? jMin! Sino c'oquex k'it ja cantila tunwen tu'n tcub ten txakel tujxix chic'aj. Oj mintkna'x tocx cantil tunwen, min chic'aj tik'ch jilel tuj kloj. Pero ya oj tocpaan cantil, cykilcaj min chic'ajax tuj kloj, ya chic'ajltzen tuj tken cantil. ²² Jaxse ju'x weya. Jatzen cantilj weya jaxxix yol k'i'n wu'na. Ja nyola jaxxix yaa'n tu'n tcub ewet cyu'na, sino tu'n tk'umj. ²³ Al at txxquin ti' twi', cybimc'atzen—tzi Jesús.

²⁴ Bix e xi' tkba'n Jesús juntl yol cye t-xnak'atz bix cye cabtl xjal:

—Cyk'o'nc cyc'u'ja ti'j c'oquel cybi'na, cuma la' jniy' ch'in cyanema ti' tyol Dios, ka nim, jax tzul tk'o'n Dios nim tkenal tyol cyuyey. Ka yaa'n nim cyc'u'ja ti' tyol Dios, jax yaa'n nim tkenal tyolxin ctzaal cyuyey. ²⁵ Bix xsunkej n-ocxix cyc'u'j ti' tyol Dios, tzul tk'o'n Dios mas ttxolen tyol cyuya. Pero tzunkej min k'ak'xix cyc'u'j ti' tyol Dios, hasta q'uelel baj tuj cyc'u'j alcyey ch'in otk bint cyu'n—tzi Jesús.

Jun techel tu'n ttz'iy iyaj

²⁶ Bix e xi' tkba'n Jesús juntl wik yol cye xjal:

—Jte Dios tcawbil ju'c'a tisen iyaj, ²⁷ tisen oj ncu'x awet twitz iyaj tuj tx'otx' tu'n jun xjal. Tixtetltzen te xjal baj te tii'j, kale nwutan bix kale i'tz, pero te iyaj, ntz'iyte tjunal tu'nx tipemal. Ntz'iyte te k'ijl bix te koniyan. Mintii' te xjal tumel tuya ti tten ntz'iy awal. ²⁸ Nejl njatz itz'j tuj tx'otx', bix njaw tz'iy tken, bix manc'biltzen n-ak' twitz. ²⁹ Yal ojtzen ntzkij, bixsen ntzyet tchmoj, cuma otk pon tumel tu'n tjtx'et. Tisex ttenj iyaj njaw tz'iy tjunalx, ojxe tzin tk'o'n twitz, ju'xse ttenj tcawbil Dios njaw tz'iy tjunalx—tzi Jesús.

Jun techel ti'j iyaj te mostaza

(Mt 13:31-32; Lc 13:18-19)

³⁰ Bix at juntl tyol Jesús:

—¿Titzen tten oj tel niy' ti'j ti tten tcawbil Dios, bix ti tten oj ttz'iy? ³¹ Ju'c'a tisen twitz jun wik itzaaj mostaza. Ja tzunj twitz mostaza jatzen jun iyaj mas xmutz' twitz cykilca twitz tiy'jil itzaaj ncu'x cyawa'n xjal. ³² Pero junxse maj ncu'x awet, njaw tz'iy ojxe niy' tibaj t-xaak. Ma' nimxse, bix at maj nchi ocx najan ch'it tjak' tlequemal—tzi Jesús te techlal ka nejl nuk cab xjal toclel tjak' tcawbil Dios, yal mas yaj, mas nim xjal c'oquel.

Tej tkbante Jesús alcye cyajbelel ke techel

(Mt 13:34-35)

³³ Ju'tzen tten t-xnak'tzan Jesús tuya tyol yaa'n tzinenxix, la' jniy' ch'inxja yol el cyniy' xjal ti'j. ³⁴ Min e t-xnak'tzaxin ke xjal tujxix tzinen, sino tuj ewjel ch'in tyolxin. Pero yaltzen cye t-xnak'atzxin, e xi'tzen tkba'nxin tej ya cyjunaltxin ti tten juun yol min otk tz'el cyniy' ti'j.

Tej twe' cyk'i'k tu'n Jesús

(Mt 8:23-27; Lc 8:22-25)

³⁵ Tejtzen tak' cwel klolj texj k'ij, bix e xi' tkba'n Jesús cye t-xnak'atz:

—Ko iy'x juntl jlajxe tnijabel a'—tzi Jesús.

³⁶ Bix e cyaj cye'yenxin xjal ttzii' a', bix iy'xkexin tuj choc jaa' tcu'xa Jesús. Bix oc lpe juntl wik xjal cyl'jxin tuj juntl wik choc. ³⁷ Pero lwewa e cub pok'ch naj jun jbal bix cyk'i'k cyibajxin. Nimxse oc punntz'aj a' tu'n cyk'i'k ti' choc. Bix ocx noj a' tuj choc, teje tak' xe'l tjak' a'. ³⁸ Pero yaltzen te Jesús, otk tzul twatlxin nka ttzii' t'xo'p choc. Bix ocx cyc'asen t-xnak'atzxin jaxin. Tzi tzunkexin cyjulu:

—i'Taat! ¿minmatii' toclena ki'j oj kxi' baj tjak' a'?—tzikexin te Jesús.

³⁹ Bix e jaw we' Jesús, bix e xi' tkba'nxin te cyk'i'k bix te tnijabel a':

—i'C'oll! i'We'!—tzi Jesús.

Nwe'tle cyk'i'k. Tzinexse e cyja'. ⁴⁰ Tejtzen twe' cyk'i'k, bix e xi' tkba'n Jesús cye t-xnak'atz:

—¿Tikentzen cutzen ttzi cyi'ja? ¿Mina'xpatzen toc ke cyc'u'ja ka ba'n cycleta tu'n Dios?—tzi Jesús cyexin.

⁴¹ Pero otkxsen cub kojll ttzi cyi'jxin, bix ak'kexin kanlecte tiy' cyeylexxin:

—¿Altzen loj junxin xjal lu? Maj ma tbi a' bix cyk'i'k tyolxin—tzi ke t-xnak'atz Jesús.

5

Jun xinak aj Gadara otk tz'oc biman ti'j

(Mt 8:28-34; Lc 8:26-39)

¹ Bix iy'pan bajkexin juntl jlaj tnijabel a', jaa' najla kej xjal aj tnom Gerasa tbi.

² Tej tzunj tetz Jesús tuj choc, bix e xi' lk'e junxin xjal toc biman ti'j. Jatzen otk tz'etxenxin cyxol tjayel anem, ³ cuma jatzen najlaxin tuj camposant. Pero tij cyiw xsunxin. Min-al juntl ba'n tcub xpon texin, mitetpe tuya cadena. ⁴ Nimxse maj e cub xpet tkenxin bix tk'abxin tuya cadena, pero oj toc cye'yet-xin, otk baj ttzakaxin cadena. Min-al juntl ocx cye ti'jxin. ⁵ Bix e bet-xin te k'ijl bix te koniyan cyxol witz bixsen tuj camposant. Nš-in tzunxin, bix n-ocxetzen tpjun tiibxin tuya xak.

⁶ Tej tzunj tak' twitzxin ti'j Jesús, bix e xi' ajkelxin tu'n tpon cananxin ti'j Jesús. Tpon tzunxin, bix e cub majexin twitz Jesús. ⁷⁻⁸ Bix e xi' tkba'n Jesús te biman najl tuj tanem jxin xjal:

—Xewbaj yuwin, ctetz tuj tanem xjala—tzi Jesús te biman.

Bix ak' biman š-il twitz Jesús:

—¿Titzen toclena wi'ja, Jesús, Tcwal nintzaj Dios? Mi'nxse chin baj tyajla'na, nuksamxse Dios—tzi biman te Jesús.

⁹ Bix e xi' tkanen Jesús te biman:

—¿Ti tbiy?—tzi Jesús.

Bix aj ttzak'be'n biman:

—Nimxse nbiya, cuma nimxse kbeta najl tuj tanem jxjala—tzi biman.

¹⁰ Bix ak' biman kanl xtalbil te Jesús tu'n mi'n chi ex tlojo'n Jesús ke biman tuj cytx'otx' Gerasa.

¹¹ Bix attzen jun witz nka ttzii' tnijabel a'. Bix attzen nimjil boch nchi waa'n tc'u'j witz.

¹² Bix e xi' cykanen biman te Jesús:

—Ko ttzakpi'cxa cyxol jil bocha, tu'ntzen kocxa tuj cyxumlaljil—tzi ke biman.

¹³ Bix e tcuya Jesús, bix etz ke biman tuj tanem jxin xjal, bix ocxke tuj cyxumlal boch. Tej tzunj cyocx biman tuj cyxumlal boch, bix e xi' ajkelkejil tc'u'j witz tu'n cycu'panjil tuj tnijabel a'. Bix e jaw jilk'bakejil. Ca'ba mil jil boch e cyim.

¹⁴ Yal tzun kej xjal cylel boch, bix e xi' ok ke xjal tuj tnom bix tuj cojbil te kbalte ti otk baj cye boch. Bix e xi' baj ke xjal ttzii' a' te cyey'lte ti otk baj. ¹⁵ Tej tzunj cypon xjal jaa' tcwa' Jesús, bix oc cyeye'yen xjal jxin ocx najan ke biman tuj tanem, k'uklc'axin, toc ti'jxin, bix ba'ntl tzunxin, mintzen s-intlxin. Bix e jaw sey'paj ke xjal. ¹⁶ Bix alkch tzunj otk tz'oc cye'yente ti otk baj tuyaj xin xjal e najan biman tuj tanem bix ti e baj cye boch, bix ak'kexin kbalte te juntl wik. ¹⁷ Tejtzen t'bay cybi'n xjal, bix ak' ke xjal cubsal cywitz te Jesús tu'n t'exxin tuj cytanem xjal.

¹⁸ Tej tzunj tocx meltz'aj Jesús tuj choc juntl maj, ja tzunj xin xjal otk ten biman tuj tanem, bix oc tenxin cubsal twitzxin tu'n t-xi'xin tuya Jesús. ¹⁹ Pero min e tcuya Jesús, bix e xi' tkba'nxin:

—Cutxa tey cyxol t-xjala. K'umenxse cye ti xtse Dios jay, bix ti tten s-oc k'a'ben tc'u'jxin ti'ja—tzi Jesús tej xin xjal.

²⁰ Bix aj jxin xjal, bix ak'xin kbalte tuj Gerasa bix t-xol juntl tnom tuj ja lugar Lajaj Tnom tbi ti otk temaxin tu'n Jesús, ka otk tz'el tlojo'n Jesús ke biman ti'jxin. Cykilcaxse xjal e jaw klee' ti'jxin.

*Tej t'jatz itz'j jun txin tuj cyamecy tu'n tyol Jesús
(Mt 9:18-26; Lc 8:40-56)*

²¹ Tej tzunj tpon meltz'aj Jesús juntl maj tujx choc juntl jlajxe tnijabel a', bix oc chmet nim xjal ti'jxin ttzii' a'. ²² Texse naj hora tej tpon junxin tawil c'ojlal jun camon jaa' te xnak'tzabl tyol Dios, Jairo t'bxin. T'pontzen cananxin ti' Jesús, bix e xi' t-xoo'n tiibxin t-xee' tken Jesús, ²³ bix nim oc tenxin cubsal twitzxin te Jesús. T'zi tzunxin cyjulu:

—Ch'ix tel tanem jtxin nmeela te cablajaj jnabk'itxin. Quixta ch'in wuya, bix k'a'c'a ch'in tk'aba tibajtxin tu'n tul tnaabltxin bix tu'n titz'jtxin tu'n tipemala—t'zitzen tawil c'ojlal camon jaa' te Jesús.

²⁴ Bix e tcuya Jesús tu'n t-xi' tuyaxin. Tej tzunj cyxi'xin, nimxse xjal oc lpe cyi'jxin. Nimxse oc cutz'j Jesús cyu'n xjal.

²⁵ Cyxoltzen t'nimal xjal e pona junxuj xuuj yaab. Otk bint cablajaj jnabk'i toclen we' cyak a' ti'jxuj. ²⁶ Otkxse tziy'xuj tuya nim k'anel, bix otkxse baj tpwaxuj, pero minxsetii' ch'in otk tz'oc tbinche. Mastlpe otk tzak' cwel bint-xuj. ²⁷⁻²⁸ Cwatzten toc tbi'nxuj ka nim xjal n-ul tnaabl tu'n tipemal Jesús, bix otk pon Jesús tuj ttanemxuj, bix iy' tuj tc'u'jxuj:

—Nuketle oj toc nmoco'n t-xbalenxin, ya tzultzen naaabl—tzi tzunxuj. Bix ocx tcutz'en tiibxuj cyxol xjal tu'n toc tmoco'nxuj t-xbalen Jesús. ²⁹ Tej tzunj toc tmoco'nxuj Jesús, bix e we' tyabelxuj. Bi'xse e tna'xuj ka otk tkij tyabelxuj.

³⁰ Pero tej tzunj tel tniy' Jesús ti'j ka tu'n tipemalxin otk tzula tnaabl jun xjal, bix aj meltz'ajxin kanlte cye xjal:

—¿Al ma tz'oc moconte nxbalen?—tzi Jesús.

³¹ Bix aj cytzak'be'n t-xnak'atz Jesús:

—N-oc tcye'yena ka nim xjal n-oc cutz'ente tey. ¿Tikentzen n-oc t'kanentla keya: “¿Al ma tz'oc moconte we?”—tzi ke t-xnak'atz Jesús.

³² Pero bix oc ten Jesús cyey'lec cye xjal la' al otk tz'oc moconte texin. ³³ Yal tzunj xuj xuuj, otk jaw lu'lenxuj tu'n ttzi, cuma otk tz'el tii'nxuj tipemal Jesús tuj ewjel. Bix e xi' lk'exuj twitz Jesús, bix e cub majexuj, bix e xi' tkba'nxuj tik'ch otk baj texuj. ³⁴ Bix e xi' tkba'n Jesús texuj:

—Xuuj, tu'nxse cykil tanema wi' ma tzula tnaabla. Mi'n baj tc'u'ja. Cutxey tuj ttzyal, cuma ma tzul tnaabla—tzi Jesús texuj.

³⁵ Nyolensxete Jesús tuyaj xuj xuuj, tej cypon cab te tja jxin Jairo, bix e xi' cykba'n sanjel texin:

—Ma cyim tmeela. Mi'ntzen tz'oc tentla yajlalte Xnak'tzal—t'zikexin te Jairo.

³⁶ Pero bix e tbi Jesús cyoolxin, bix e xi' tkba'nxin te tawil c'ojlal camon jaa':

—Mi'n tzaj ttzi ti'ja. Kee'c tc'u'ja. Tzul tnaabl tmeela—tzi Jesús te Jairo.

³⁷ Bix ak' pomel canaxin tja Jairo. Pero min e tcuya Jesús tu'n t-xi' lpe nim xjal. Nuk jac'a Pedro, Santiago, bix tiz'en Santiago, Juan. O'cxse xinj e tcuya Jesús tu'n cyxi'. ³⁸ Bix e ponkexin tja tawil. Tej tzunj cyponxin tja tawil, bix oc cyeye'yenxin nim il nbaj, bix nchi ook' xjal. ³⁹ Bix ocx Jesús tunwen, bix e xi' t'kanenxin cye xjal:

—¿Tikentzen nchi labaney? Min ma cyim tej txin cwala. Nuk nwutantxin—tzi Jesús.

⁴⁰ Pero nuk oc cytze'n xjal tyol Jesús. Pero bix etz tlojo'n Jesús cykilca ke xjal pe'n. Bix ocx tii'n Jesús ke tman nee' bix ke t-xnak'atzxin jaa'j tocxa nee'. ⁴¹ Bix e tzaj ttzyu'n Jesús tk'ab jtxin cyimne, bix e xi' tkba'nxin te cyimne tuj cyol xjal:

—Txin ni' cwal, we'wey—tzi Jesús.

⁴² Tzinxix njaw we'tl naj tej txin cwal. Nak'tltxin betel. Bixse e jaw klee' cykil xjal. ⁴³ Bix e xi' tkba'n Jesús tu'n t-xi' twatxin. Pero cyiwrtzen e xi' tkba'n Jesús tu'n min jaa' tz'oca cykba'n xjal ti otk baj.

6

Tej tpon Jesús tuj tnom Nazaret

(Mt 13:53-58; Lc 4:16-30)

¹ Bix el Jesús ttzii' tniabel a', bix ajxin tuj ttanemxin Nazaret. Bix e xi'ke t-xnak'atzxin tuyaxin. ² Tej tzunj tul canan jmanc'bil k'ij tuj smant, jaj k'ij xjan cyxol xjal, bix ocxxin tuj camon jaa' te xnak'tzabl tyol Dios, bix ak'xin xnak'tzal xjal. Tej toc cybi'n xjal tyol Jesús, bix e jaw klee' ke xjal, bix ak'ke kanlecte tii' cyeeylex:

—¿Jaa'tzen ma tzaa' tcno'n jxjal lu jyola? ¿Tikentzen nimxse ba'n tu'n? ¿Bix jaa'tzen ma tzaa' tipemal te k'anl xjal? ³ ¿Yaa'mpatzen loja carpintero e ten tzalu, tal jxuj María, ttzicy Santiago, tuya José, Judas, bixse Simón? ¿Yaa'mpatzen najl ke taneb kxol tzalu?—tzi cab xjal te cabtl.

Ju' tzunj min ocxix cybi'n xjal aj Nazaret tyol Jesús.

⁴ Pero bix aj ttzak'be'n Jesús cye xjal:

—Jaa'xja tumel n-oc ocsette tyolel Dios. Pero yal jaa' najlaxin, mintii' tilelxin cye te txaxin bix cye te ttanemxin—tzi Jesús.

⁵ Mintii'xix e bint tu'nxin, cuma min oc cybi'n aj Nazaret jaxin. Nuk jaa'x e cwa' tk'o'nxin tk'abxin tibaj juun xjal tu'n cyoc k'anet. ⁶ Bix e jaw klee' ch'in Jesús, cuma min e cybi xjal jaxin.

Bix e xi' Jesús betel cyuj ni' coc' tnom ttxa'nxin nin tnom, bix nxnak'tzanxexin xjal.

Ex tsma'n Jesús jcablaaj t-xnak'atzxin

(Mt 10:5-15; Lc 9:1-6)

⁷ Attzen jun k'ij, bix oc tchmo'nxin jcablaaj t-xnak'atzxin. Bix ak'xin smalxcye ca'cab cybet te xnak'tzal cyuj jun wikxilt tnom. Bix e xi' tk'o'n Jesús cypemal tu'n tel cylojo'nxin biman cyi' xjal. Bix ak' Jesús kbalxte ti chi temela tuj be. ⁸ Bix e xi' tkba'nxin:

—Mintii'xix cxe'l cyii'na tuj be, sino nuk juun cybardóna te juun, bix mintii' pwak bix cyway t-xi' cyii'na, bix mi'n txi' cyii'na cypay. ⁹ Ba'n toc cyxaaba. Pero mi'n txi' cyii'na cych'ixpubla.

¹⁰ Bix oj cyocxa tuj jun jaa', jaxse chi temelaja ojxe cyi'ya. ¹¹ Katzen at jaa' min xi' cmetey bix min xi' oc ebi'na, cytztocjzzen kuk'ti' cyxaaba cywitz tetzen yec'bil ka ejee'xtl xjal cyey'l cyiib twitz Dios bix ka mintii'tl cyoclena cye xjal, bix chi ela—tzi Jesús cye t-xnak'atz.

¹² Entonces bix ex ke t-xnak'atz Jesús te kbalte tu'n cymeltz'aj xjal tuya Dios. ¹³ Bix el cylojo'nxin nim biman cyi' xjal, bix oc cyk'a'nexin nim yabel, n-ocetzen cysu'nxin aseyt, ta'l jun wik lo'pj olivo thi, cyi' xjal te techel ka tu'n tu' cynaabl xjal.

Tej tcyim Juan Bautista

(Mt 14:1-12; Lc 9:7-9)

¹⁴ Bix e tbi jxin Herodes, cawel cyibaj cykil tnom tuj Galilea, ti toc cyol xjal ti'j Jesús, cuma otkxse tz'el tpochalxin. E'latzen tuj twitz juun xjal ka ja Jesús jxin Juan Bautista. Tzi tzun kej xjala cyjulu:

—Ma jatz itz'j Juan Bautista juntl maj tuj tx'otx'. Ju' tzunj at nim tipemal—tzikexin.

¹⁵ At cabtlxin e kbante:

—¿Al tzunj Jesús? Ja loj jxin Elías, tchak'el Dios e ten nejl ma cu'tz meltz'aj tuj cya'j—tzi tzunkexin.

Bix cabtl xjal e kbante:

—Jesús jatzen xinja juntl wikxin tyolel Dios e ten nejl—tzi tzunkexin.

¹⁶ Pero tejtzen toc tbi'n Herodes nbaj yol ju'wa, tzi tzunxin cyjulu:

—Min. Ja te Juanja. Inayena e nkbante tu'n tel tx'omet twi' Juan. Yaltzen ja'lewe, matzen jatz itz'jtlxin—tzi Herodes.

¹⁷⁻¹⁸ Tzitzen Herodes ju'wa, cuma yaa'ntzen ti otk baj nejl. Otktzen tz'el tiken Herodes t-xu'l Felipe, titz'en Herodes, Herodías tbixuj. Pero tejtzen toc tbi'n Juan Bautista, bix e xi' tkba'nxin te Herodes:

—Yaa'n tumel toc t-xu'l ena t-xu'l titz'ena—tzi Juan te cawel.

Ju' tzunj e tzyeta Juan tu'n Herodes tu'n tocxxin tuj tzee', bix ocx xpet-xin tuya cadena. Tu'n tzunj xuj Herodías ocx Juan tuj tzee', cuma nk'ojlec tzunxuj ti' Juan. ¹⁹ E tajbe tzunj xuj Herodías tu'n tcub byet Juan, pero min e tcuya Herodes, ²⁰ cuma at ttzi Juan ti'jxin, cuma ttzki'n Herodes ka ba'n xjalte Juan bix at tajwalelxin tu'n Dios te yolel twitz tx'otx'. Bix oc tclo'nxin ja Juan. At maj e yolen Herodes tuya Juan. Pero cab tc'u'jxin tyolennxin tuya Juan, cuma e tajbexin yolennin nim tuya Juan, pero tu'n tcuyan texin tyol Juan, min.

²¹ Pero attzen jun k'ij toc tcye'yen Herodías ya tumeltzen tu'n tbyet Juan. Yaa'ntzen ti e baj. Tjapantzen baj Herodes twi' juntl jnabk'i tchunk'lalxin, bix iy' tiy'sa'nxin jun nink'ij cyuya tawil tc'ojlaxin, bix ke tcab cawel ttxlaxin, bix ke nintzaj xjal tuj Galilea. ²² Tuj tzunja nink'ij, bix ocx jtxin tal Herodías bixel. Ba'nxse e'la bixentxin tuj twitz tcab tmantxin, Herodes, bix tuj cywitz niy'tl xjal nchi waa'n tuya Herodes. Ju' tzunj e xa' tkba'nxin cyjulu:

—Kanentz we ti taja. Jac'a txi' nk'o'nwe. ²³ Seya niy'janj ttx'otx' Galilea ma tzaj tkanena we, jac'a txi' nk'o'n tey—tzi Herodes te tal Herodías.

²⁴ Bix etztzin te kanlte te ttxutxin:

—¿Ti cxe'l nkanen?—tzi tzuntzin.

Pero ya otktzen tc'olba tumel tuj twitz Herodías, bixse aj ttzak'be'nxuj te talxuj:

—Kanex twi' Juan Bautista—tzi Herodías.

²⁵ Bix ocx ajkeltzin jaa' tocxxin cawel, bix e xi' tkba'ntxin:

—Waj tu'n ttzaj tk'o'n naja twi' Juan Bautista we tuj jun lak—tzi tzuntzin.

²⁶ Bix e jaw bisen cawel, pero cuma ya otk txi' toyennin tetxin cywitz ttxocaxin, ya mix e cwa' tch'ixbe'nxin tyolxin. ²⁷ Ju' tzunj e xa' tchk'o'n cawel junxin aj k'oj tuj tzee' te k'ilbel twi' Juan. ²⁸ Bix e xi' aj k'oj, bix el ttx'omanxin twi' Juan, bix e pon tii'nxin tuj jun lak. Bix e xi' tk'o'nxin tetxin, bix e xi' tk'o'ntlxin te ttxutxin te yec'bil ka otk cyim Juan.

²⁹ Tejzen toc cybi'n kej xjal lepche ti' tyol Juan, bix e ponkexin k'ilbetz t-xumlal Juan te mukbil.

Tej cywaa'n jwe' mil xjal tu'n Jesús
(Mt 14:13-21; Lc 9:10-17; Jn 6:1-14)

³⁰ Entonces tejzen cypon meltz'aj jcablajaxin sma'n tu'n Jesús te xnaktz'al jaa' ta'xin, bix ak'kexin kbalte te Jesús tik'ch otk baj cyexin bix tik'ch otk baj cyxnak'tzanxin. ³¹ Bix e xi' tkba'n Jesús cyexin:

—Ko'ke ajlal kjunalx tuj jun lugar tuj ttzyal—tzi Jesús, cuma txolen cypon xjal bix xi'nax cyxi' xjal. Mitetpe e binttl cywaa'nxin tu'n nimxse xjal.

³² Bix ocx Jesús cyuya t-xnak'atz tuj jun choc tu'n cyiy'xxin tuj jun chk'ajlaj jaa' min-ala xjal. ³³ Pero nim xjal oc cye'yente cyexin tej cyiy'xxin. Tej tzunj toc cye'yen xjal, bix e xi' baj ke xjal cyuj tnom tu'n cypon xjal jaa'j cypomlel Jesús. Bix e pon ke xjal nejl twitz Jesús. ³⁴ Tej tzunj cypon Jesús, bix oc tcye'yennin nimxse xjal. Bix oc k'a'ben tc'u'j Jesús cyi' xjal, cuma tisen jun cloj carnal min-al cycylel. Bix ak' Jesús xnak'tzal cye xjal ti' tik'ch jilel. ³⁵ Tetzen kale, bix oc lk'e ke t-xnak'atz Jesús ti'j, bix e xi' cykba'nxin:

—Ya kaletitzen, bix tzalu mintii'xse ba'n tcnct. ³⁶ Bajsan'atzen twi' t-xnak'atza cyuya xjal tu'n cyxi' lok'ol cywa tuj kej coc' tnoma—tzikexin.

³⁷ Pero bix aj ttzak'be'n Jesús:

—Ejee' cyey cyk'onx cywa xjal—tzi Jesús.

Bix aj cytzak'be'n t-xnak'atzxin:

—¿Tipa ttena ko xe'l tzuna lok'ol nim pan? Atetle twi' tc'u'j jun xjal te jun jnabk'i, la'tzen ka canan te twi' pan—tzikexin te Jesús.

³⁸ Pero bix aj ttzak'be'n Jesús:

—Jte' pan k'i'n cyu'na. Cyjya'x—tzi Jesús.

Tej tzunj tbaj cyjyo'nxin, bix e xi' cykba'nxin te Jesús:

—Ma cnet jwe' pan ku'na bix ca'ba quiš—tzikexin.

³⁹ Bix e xi' tkba'n Jesús tu'n cycub ke xjal tibaj xk'ilen c'ul tuj chk'ajlaj. ⁴⁰ Bix e cub ke ke xjal tuj tclojan te syent bix te cya'wnak tuya lajaj. ⁴¹ Tejzen tbint cyten xjal, bix e tzaj tzyu'n Jesús jjwe' pan bix xsunj ca'ba quiš. Ncye'yen xsunxin tuj cya'j, t-xi' tkanenxin chjonte te Dios ti' cywaxin. Bix ak' Jesús pa'lc'ate pan te ke t-xnak'atzxin tu'n t-xi' cypa'nxin cye xjal. Mixe jun e jatz baj pan tuj tsubel, cuma otk txi' t'zi'y tken pan. Bix ju'x tchu'l quiš. ⁴² Bix cykiltzen e waa'n teje tnoj cyc'u'j. ⁴³ Cybajtzen waa'n xjal, e cyajx cablajaj chi'l pan bix quiš. ⁴⁴ Atle jwe' mil xjal xinak e waa'n.

Tej tbet Jesús tibaj tnijabel a'
(Mt 14:22-27; Jn 6:16-21)

⁴⁵ Tbj tzunj ju'wa, bix e xi' tkba'n Jesús cye t-xnak'atz tu'n cycu'xxin tuj choc juntl maj nejltzen twitz Jesús tu'n cyiy'paxin jlajxilt a' tuj jun tnom Betsaida tbi. Bix iy'xkexin,

ncyajltzente Jesús te bajsalca twi' tyol cyuya xjal. ⁴⁶ Tej tzunj tpon baj tyolxin cyuya xjal, bix e jax Jesús twi' jun witz te yolel tuya Dios. ⁴⁷ Tcubtzen kloj, nyolentzente Jesús tuya Dios twi' witz, bix ete'tl t-xnak'atzxin tmij a' tuj choc.

⁴⁸ Bix oc tcyeyen Jesús ka cyiw tkitj choc tuj a', cuma ju' ntzaj cyk'i'k jaa' xa'ninaxexin. Te ch'itk cyskixxin, bix e xi' bet Jesús tibaj a' tu'n tpon cyi'jxin. Cwa tpon canan Jesús cytxlajxin.

⁴⁹ Tej tzunj toc ccyeyenxin, e'la tuj cywitzxin ka jun t-xlenel biman nbet tibaj a', bix e jaw sey'pajkexin, bix ak'kexin š-il. ⁵⁰ Yaa'n nuk junxin oc cye'yente, sino cykilcakexin oc cye'yente. Pero bix e xi' yolen Jesús cyi'jxin:

—¡Cyiw xhi oqueley! Inayen weja. Mi'n tzaj ttzi cyi'ja—tzi Jesús cyexin.

⁵¹ Bix e cu'xxin tuj choc, bix jax n-aj lk'etlte cyk'i'k. Bi'xse e jaw klee' ke t-xnak'atz Jesús. ⁵² Amale otket tz'oc ccyeyenxin ti otk tse Jesús kej pan, mitkx n-e'la cyniy'xin ti'j ka cykil ba'n tu'n Jesús. Kloj tuj cywitzxin.

E k'anj ke yaab tu'n Jesús tuj Genesaret

(Mt 14:34-36)

⁵³ Cwa cyponxin tuj ttx'otx' Genesaret, jaa' oca cyxp'o'nxin cychocxin ttzii' a'. ⁵⁴ Tzinix nchi cu'tzxin tuj choc el naj cyniy' xjal ti'j ka ja Jesús. ⁵⁵ Tejtzen toc ccyeyen xjal jaxin, bix ex ke xjal kbalte cykil tuj tnóm bix tuj cojbil. Bix ak' xe'l cyii'n xjal ke yaab twitz wetbil twitz Jesús.

⁵⁶ Tisexse e baj tzalu, ju'xse e baj tuj juntl wik tnóm jaa' oca Jesús. Nuk jak'ch e cwa cyk'o'n xjal ke yaab tuj be n-ocetzen cucusba'n xjal cywitz te Jesús tu'n tcuyan texin tu'n toc cymoco'n yaab, amatle nuk tziy' ajx ch'in cyk'ab ti' t-xbalena. Bix aljxe xjal oc moconte texin, ul cynaabl.

7

Alcyej ctz'ilelxix xjal tu'n twitz Dios

(Mt 15:1-20)

¹ Attzen jun k'ij, bix e pon kej xjal nimalxsen tuj ley, ejee'j xjal tej cloj fariseo, tuya cabxin tx'olbal ley. Otk chi tzajxexin maan Jerusalén. Bix e ponkexin ti' Jesús. ² Toctzen ccyeyenxin nchi waa'n t-xnak'atz Jesús min otk txjet cyk'abxin tiseixix tten cyu'n fariseo, bix el ka'yba tuj cywitzxin, cuma e'latzen tuj cywitz fariseo otk chi chucj t-xnak'atz Jesús twitz Dios, ³ cuma kej xjal judío lepxhke cye xjal ti'j jun ley te nejl ka tu'n mixbe cywaa'n xjal ka mitkx n-e'la txjet cyk'ab tiseixix tten. ⁴ Jaxse ju'xe, oj nchi ul meltz'aj lok'ol tuj plasén, jax n-el cytxjo'n cyk'ab tiseixix tten. Bix yaa'n o'cx'aj, sino atl nim cyley xjal, tisen txjoj cylak, ke xaran, ke wicy'il, ke los, bix ke wetbil tiseixix tten cyu'n xjal judío nimal tuj cyley fariseo. ⁵ Ju' tzunj, tej toc ccyeyen ke fariseo bix ke tx'olbal ley min otk txjet cyk'ab t-xnak'atz Jesús tisen cyexin cyten, ya otktzen chi chucjxin tuj cywitz fariseo. Bix e xi' cykba'n te Jesús:

—¿Tikentzen min chi waa'n tey t-xnak'atz tisen kej xjal ootxa? Nchi waa'n tey t-xnak'atz bix chucjninke twitz Dios—tzi tzunkexin te Jesús.

⁶ Pero bix aj tzak'be'n Jesús:

—Jaxne toc tyol Isaías, tyolel Dios, tej tcyaj ttz'i'benxin jtyol Dios cyi'j xmeletz' cytzi tisej cyey. Tzitzen Dios cyjulu, tzi Isaías: “Kej xjal lu tzin chi na'n Dios nim tuya cytzi, perotzen cyanem nakch ta' wi'j. ⁷ Mintii' ba'n tajbe'na ncub cychmon cyiib te na'l weya. Bix xnak'tzben cye yaa'n wu'na, sino nuk cyu'nx,” tzi Dios, tzi Isaías tcyajlen ttz'i'ben. ⁸ Cuma cyey, nuk n-el cyiiq'uena jtzin tkba'n Dios tu'n cyxi' lpey ti'j cyley xjal nejl. ⁹ Cytzki'nix cyey ti tten oj n-aj cylak'ba'na tyol Dios tu'n toc cyc'ojla'na jcyey cyleya. ¹⁰ Tisen tzunj: Ma tz'aj cylak'ba'na jtyol Moisés tej tkbantexin: “Ebim'ca tmána bix ttxuy,” bix “Al tzunj ma tz'el xoo'nte tman bix ttxu, bi'xse cbyetel naj cyu'n xjal,” tzi Moisés cye xjal nejl. ¹¹ Pero yaltzen cyey, ba'ntzen t-xi' tkba'n jun xjal te tman bix te ttxu: “Mlay tz'oc wonen wey, cuma alcyej ch'intl ma cyaj cxe'l oyette te Dios.” ¹² Ju' tzunj al tzunj taj tz'oc onente cye tman tuya pwak, mlayltzen, cuma mintzen tcuyantl cyleya. ¹³ Ju'tzen tten ncub cybajsa'na tyol Dios tuya cyleya. Bix nimxtl nbaj cyey tiseix jluwe—tzi Jesús cye tx'olbal ley bix cyey xjal nimal tuj cyley.

¹⁴ Yajc'atlzen bix e ttxoc Jesús ke xjal, bix e xi' tkba'nxin:

—Chin cybi'tzen, bix cybimquey. ¹⁵⁻¹⁶ Mintii'te jun ti jilel c'oquex tuj ttzi jun xjal chchucjalet tu'n, sino ja tej ctzaal ti' tanem xjal, jatzente cchucjal twitz Dios—tzi Jesús cye xjal.

¹⁷ Tcyajtzen tcyeyen Jesús ke xjal, bix ocxxin tuj jun jaa'. Bix e xi' cykanen t-xnak'atzxin ti elpenina jtyolxin cye xjal. ¹⁸ Bix e xi' tkba'n Jesús:

—Jax ju'x cyey, ¿mimpatzen ma tz'el cyni'ya ti'j? ¿Mimpatzen ma tz'el cyni'ya ti'j ka ti jilel ma tz'ocx tuj ttzi jun xjal, mi'n chucjte twitz Dios? ¹⁹ Mi'n chucjte xjal, cuma mi'n txi' tuj tanem, sino ju' cxe'lte tuj tc'u'j, tu'n tiy' tc'u'n. Mintii' jun waabj ba'n tchucj jun xjal tu'n. ²⁰ Ja tej

ctzaal ti' tanem xjal, jatzen te ja ctz'ilex xjal tu'n twitz Dios. ²¹ Cuma tujxe tanem xjal ntzaa' itz'j tka'yel, tisej kej xjal nuk xinak ma nuk xuuj n-oc tak' cye, alk'al, biy'yen, ²² pajlel, k'abj tik'ch te xjal, cyak wisaj xjal, yajlaj xjal, loch' c'u'jbaj, xchi'len c'u'jbaj, ka' yol ti' xjal, n-oc tk'on tiib jun xjal te jawnex, bix mintii' tc'u'j ti' juntl xjal. ²³ Cykil tzunj tka'yel lu ntzaj tuj cyanem xjal. Cyu'n tzunj lu ntz'ilaxe xjal twitz Dios—tzi Jesús cye t-xnak'atz.

Jun xuuj aj Fenicia e xi' tocsla'n tyol Jesús
(Mt 15:21-28)

²⁴ Bix e xi' Jesús tuj jun wikxilt tnom, Tiro tbi. Bix ocxxin tuj jun jaa'. E tajbexin tu'n min-al xjal tz'oc cye'yente texin, pero mix e bina tewexin. ²⁵ Lwewatzen naj e tbi junxuj xuuj, ttu juntxin cwal otk tz'oc biman ti'j, ka otk pon jlet Jesús. Bix e xi'xuj, bix e cub majexuj twitz tken Jesús. ²⁶ Pero yaa'n judi'axuj, sino tej tnom Fenicia tej nin tnom Siria, ttxlaj Galilea te jawne. Bix ak'xuj cubsal twitzxuj twitz Jesús tu'n tel tlojo'nxin biman ti' talxuj. ²⁷ Pero bix aj ttzak'be'n Jesús texuj:

—Theel chi ouel ncyeyen weja weya nxjal aj judío. Yaa'n tumel oj tel k'i'n cywa nee' tu'n t-xi' k'o'n cye txyan. Nejl chi waa'l ke nee'—tzi Jesús texuj te niy'bel tnaabl'xuj.

²⁸ Pero bix aj ttzak'be'n jxuj xuuj:

—Jax toc tu'na, Taat. Pero tzintlpe cyyo'n cyej jil txyan jniy' q'uelel tz'ak ttx'akan cywa nee'. Jaxse ju'x weya cnyo'wa la' niy' chin tzaal tonena—tzi tzunxuj.

²⁹ Bix aj ttzak'be'n Jesús:

—Ma bint ttzak'bentey nyol. Ba'ntzen taja tjay. Ya ma tz'el biman ti' tala—tzi Jesús texuj.

³⁰ Tejzen tponxuj tjaxuj, tjax talxuj twi' wetbil, pero ya otk tz'el biman ti' talxuj.

Ul tnaabl jun xjal yaab t'xquin bix men tu'n Jesús

³¹ Bix etz meltz'aj Jesús tuj tnom te Tiro, iy'xin tuj tnom te Sidón, bix iy'xin cyuj tnom te Lajaj Tnom, cwa tponxin tzi'ij' tnijabel a' te Galilea. ³² Tej tzunj tponxin, bix e pon cyii'n xjal jun yaab min tziy'x tuj twi' bix makma. Bix e xi' cykanen xjal tu'n tcub tk'o'n Jesús tk'ab tibaj yaab. ³³ Bix el lk'e Jesús tuya yaab cyi'j xjal otk jaw chmet, bix ocx tk'o'n Jesús ke twi' tk'ab cyuj t'xquin yaab. Bix oc ttzubanxin ti' tk'abxin, bix oc tmoco'nxin twi' taak' yaab. ³⁴ Njawtzen tcyeyen Jesús twitz cya'j, bix e jaw jawsanxin, bixse e xi' tkba'nxin tej xjal yaab:

—Jkomtzen tiiba—tzi Jesús.

³⁵ Texse naj tjket t'xquin yaab, bix ncyajtl taak' ba'n. N-ak'ltzen yaab yolel.

³⁶ Bix e xi' tkba'n Jesús cye xjal tu'n mi'n txi' cykba'n ti otk baj te Jesús tuya yaab. Pero amale otket txi' tkba'n Jesús cye xjal tu'n mi'n txi' cykba'n, ilx ti'j e cub ten ke xjal kbalte.

³⁷ Otkxse chi jaw klee' xjal, bix e xi' cyyolen:

—[Cykilxse ba'n tbint tu'n Jesús! Hasta kej xjal min tziy'x tuj cywi' bix xsun kej me, ba'n tbint cyyolen tu'n—tzi ke xjal.

8

Tej t-xi' tk'o'n Jesús cywa cyaja mil xjal
(Mt 15:32-39)

¹ Attzen jun k'ij, bix oc cychmon cyiib nim xjal ti' Jesús juntl maj. Mintzentii' cywa xjal. Bixse e tzaj ttxco'nxin ke t-xnak'atzxin, bix e xi' tkba'n Jesús cyexin:

² —Ma tz'oc k'a'ben nc'u'ja cyi'j xjala, cuma ma bint oxe k'ij cyten wuya tzalú, bix mintzentii'tl cywa. ³ Ka ma chi aj nsma'n cyja mitkx nchi waa'na, tzul tuj cywiz tu'n weyaj, cuma at juun cye tzajninxe nakch—tzi Jesús cye t-xnak'atz.

⁴ Bix aj cytzak'be'n t-xnak'atz Jesús:

—¿Pero titzen tten oj t-xi' kk'o'n cywa jxjala tzalú? Min-al xjal najl tzalú—tzi tzunkexin.

⁵ Pero bix aj tkanen Jesús:

—¿Jte' pan k'i'n cyu'na?—tzi Jesús.

—Wuuk k'i'n ku'na—tzi tzunkexin.

⁶ Bixse e xi' tkba'n Jesús tu'n cymb ke cykil xjal twitz tx'otx'. Bixse e tzaj ttzyu'nxin jwuuk pan, bix e xi' tkanenxin t-xtalbil Dios cyi'j. Bixse e cub tpa'nxin, bix e xi' tk'o'nxin cye t-xnak'atzxin tu'ntzen t-xi' cypa'nxin cyxol xjal. ⁷ Bix jax k'i'n cabjil qui's cyu'nxin. Jax ju'xe bix e xi' tkanen Jesús t-xtalbil Dios cyi'j'jil, bix e xi' tkba'n Jesús tu'n t-xi' cypa'n t-xnak'atzxin. ⁸ Cykilca xjal e waa'n tejxe cynoj. Cybajtzen waa'n xjal, e cyajxtl wuuk chi'ltl pi'x pan. ⁹ Cykilca kej xjal e waa'n atle cyaja mil. Bixsen e k'olben Jesús cye xjal, ¹⁰ n-ocxtl tzunxin tuj choc cyuya t-xnak'atzxin, bixse e xi'xin tuj jun tnom Dalmanuta tbi.

E xi' cykane xjal jun yec'bil te Jesús
(Mt 16:1-4; Lc 12:54-56)

¹¹ Cypon tzunj xjal nimalxse tuj cyley, ejee'j xjal tej cloj fariseo, bix ak'kexin rasonel tuya Jesús. Bix e xi' cykanenxin te Jesús tu'n t-xi' tyeec'an Jesús tipemal cyexin tu'ntzen tchic'ajax ka ju' otk tzaj Jesús tuya Dios. E'la tuj cywitzxin ka tu'n tcub tz'ak Jesús tuj cyvolxin. ¹² Bi'xse e jaw jawsen tc'u'jxin, cuma ete'c fariseo yajlal texin. Bix e xi' tkba'n Jesús:

—¿Tikentzen ete'c'a xjal kanl te weya tu'n t-xi' nyeec'ana wipemala? Nuktzen ti cyaja tu'n ncub tz'aka. Tzinenxix cxe'l nkba'n cyey mintii' tu'n t-xi' nyeec'an wipemal—tzi Jesús cye fariseo.

¹³ Bix e cyaj tcye'yen Jesús ejee'xin, bix ocx meltz'ajxin tuj barc cyuya t-xnak'atz, bix iy'x meltz'ajxin juntl jlaj tnijabel a'.

Cyxnak'tzbil fariseo yaa'n tuj tumel
(Mt 16:5-12)

¹⁴ Pero otktzen tz'el cywaxin tuj cyc'u'j t-xnak'atzxin. Nukxix jun pan k'i'n cyu'nxin. ¹⁵ Toctzen tbi'n Jesús nchi yolen t-xnak'atzxin ti' pan, bix e xi' tkba'n Jesús:

—Nchi yolena ti' pan, cyc'ojlam cyiiba tuyaj cypan fariseo bix xsunj tpan jxin cawel Herodes—tzi Jesús cye t-xnak'atz. Pero yaa'ntzen nyolen texin ti' pan, sino nxi'tzen tkba'nxin tu'n mi'n txi' cybi'n t-xnak'atzxin jcyxnak'atz fariseo bix jte Herodes.

¹⁶ Pero mintzen el cyniy' t-xnak'atzxin ti'j ti elpeninatzen tyol Jesús. Tuj cywitzxin tu'n toc cyc'u'jxin ti' lk'oj pan.

¹⁷ Bix el tniy' Jesús ti'j ti otk tz'e'la tyolxin tuj cywitz t-xnak'atzxin, bix e xi' tkba'nxin:
—¿Tikentzen n-e'la tuj cywitza ka mintii' cypana? ¿Mimpatzen tz'el cyni'ya ti'j yaa'n ti' pan nchin yolena? ¿Junxpatzen maj klolj tuj cywitza? ¹⁸ Ju'c'a ke cyey tise kej xjal at tbak' cywitz, pero mintey' n-ak' cywitz ti'j, bix at cyxquin, pero mintey' n-el cyniy' ti'j. Yal tzunj pan tzin cyolena, ¿tikentzen n-oca tak' cyey? ¿Mimpatzen tzul tuj cyc'u'ja ti' in se nejl? ¹⁹ Tej tcub npa'n jwwe' pan t-xol jwe' mil xinak, ¿jite' chi'l pi'x pan e jaw cychmo'na tej cybaj waa'n xjal?—tzi Jesús.

Bix aj cytzak'be'nxin:

—Cabljaj chi'l, Taat—tzi tzunkexin.

²⁰ Bix e xi' tkanen Jesús juntl maj:

—Yaj tzunj tej tcub npa'n jwuuk pan t-xol jcyaja mil xjal, ¿jite' chi'l pan e cyaj?—tzi Jesús.

Bix aj cytzak'be'nxin:

—Jax wuuktl chi'l—tzi tzunkexin.

²¹ Entonces bixse aj tkba'n Jesús:

—Jeyney, jayaxittzen mix n-e'la cyni'ya ti'j ka cykil ba'n tbint wu'na—tzi Jesús.

Jket twitz jun xjal moš tu'n Jesús tuj Betsaida

²² Cwatzen cyponxin tuj tnom te Betsaida, jlajxe tnijabel a', bix e pon cyii'n xjal jun xjal moš. Bix oc cybusa'n xjal cywitz te Jesús tu'n toc tmoco'n Jesús jxjal moš. ²³ Bix e tzaj ttzyu'n Jesús tk'ab moš, bix ex ti'i'nxin yaab ttxa'nxe tnom. Bix ocx tk'o'n Jesús ta'l ttzi tuj twitz moš. Tcubtzen tk'o'n Jesús tk'ab tibaj moš, bix e xi' tkanenxin:

—¿Atpa ch'in ma tzak' twitza ti'j?—tzi Jesús.

²⁴ Bix ak' moš cyeyel tiy' ttxlaj, bix aj tzak'be'n jxin moš:

—At ch'in chic'aj. Lu ke xjal nchi oc ncyey'en tise jun tzee', bix nchi bet—tzi tzunxin.

²⁵ Bix oc tmoco'n Jesús tbak' twitzxin juntl maj. Bix cyiw e cub tse'n moš twitz, bi'xse ul tnaabl tbak' twitzxin. Ya ba'ntzen ak'tl twitzxin ti' tik'ch jilel. ²⁶ Bix e xi' tkba'n Jesús texin:

—Ba'ntzen taja tjay. Pero cutxetzen jiquen tjay. Mi'ntzen tzi'ya tuj tnom bix min jaa' tz'oca tkba'na—tzi Jesús texin.

Tej tkbante Pedro ka ja Jesús jscy'o'n tu'n Dios
(Mt 16:13-20; Lc 9:18-21)

²⁷ Tbajlaxitl tzunj ja lu, bix e xi' Jesús cyuya t-xnak'atz cyuj ke ni' coc' tnom ttxa'n nin tnom te Cesarea Filipo. Tujtzen be e xa' tkanen Jesús cye t-xnak'atz:

—¿Alcye ken tuj cywitz xjal?—tzi Jesús.

²⁸ Bix aj cytzak'be'n t-xnak'atzxin:

—At xjal nkbante ka jay Juan Bautista. At juntl wik nkbante ka jay Elías, tulel nejl twitzj xin Scy'o'n tu'n Dios. Bix at juntl wik xjal nkbante ka jay jun wikxtil tyolel Dios e ten nejl—tzi tzunkexin.

²⁹ Bix aj tkanen Jesús:

—Yajtzen cyey, ¿altzen cye ken tuj cywitza?—tzi Jesús.

Bix aj tzak'be'n jxin Pedro, t-xnak'atz Jesús:

—Ja te ja Scy'o'n tu'n Dios, jaj xin tulel tsm'a'n Dios te cawel tibaj Israel, jxin e byan tu'n Dios jatxe tuj tneel—tzi Pedro.

³⁰ Pero e xi' tkba'n Jesús cye t-xnak'atz tu'n min jaa' tz'oca cykba'nxin ka jaxin cawel tibaj Israel.

Tej tyole Jesús ti'j tcyamecy
(Mt 16:21-28; Lc 9:22-27)

³¹ Bixse ak' Jesús xnak'tzalec cyexin ka jxin Sma'n tu'n Dios tu'n tten cyuya xjal q'uuyalxse a' tc'u'jxin, bix q'uelel xoo'nxin cyu'n nintzaj xjal tuj tja Dios, cyu'n tawil na'l Dios, bix cyu'n tx'olbal ley. Bixse e tkbaxin ka cbyetelxin, bix cjawetz itz'jxin te toxen k'ij tbyetlenxitlxin. ³² Bix e cyaj tk'o'nxin kej yol lu tuj tzinen.

Pero min el tyol Jesús ba'n tuj twitz Pedro. Bix ex ttxco'nxin ja Jesús cyjunalxin, bix ak' Pedro ocsalec tc'u'j Jesús tu'n mi'n tyolexin ju'wa. ³³ Tejzten toc tbi'n Jesús tyol Pedro, bix aj tcyeyenxin cykilcatl ke t-xnak'atzxin, bix oc yokpajxin ti' Pedro:

—Pedro, ti'j tyola ju'wa, ju'x tuj cywitz xjala, pero tuj twitz Dios, min. Ja te Satanás, tawil biman, n-oc lmonte tey. Tcy'i Satanás chin japan baj ti'j ti waj ma chin tzaj twitz tx'otx'. Ti'j tzunj tyola tu'n mi'n chin cyim, atzzen tyola tuya tawil biman, yaa'n tuya Dios—tzi Jesús te Pedro cywitz niy'tl t-xnak'atzxin.

³⁴ Yajc'atltzen bix e tzaj ttxco'n Jesús ke t-xnak'atz bix juntl wik xjal, bix e xi' tkba'nxin cye:

—Al cyey taj tz'oc lpe wi'j, cyk'oncjtzen tik'ch cyaja, tuyaxe cychunk'lala cyimal tuj cye'u'ja. Ka at-xix il ti'j tu'n cyoca tuj q'uixc'aj nuk wi'jc'a, cyk'onxsen cyiiba. Bix ka ma chi el xoo'na cyu'n xjal nuk wi'jc'a, cyxoo'xixsen cyiiba. Bix katzen at-xix il ti'j, bixse t-xi' cyk'on cyiiba te cyamecy, tisej weya twitz cruz chin byetela. ³⁵ Al tzunj ma bint tu'n ju'wa, chi lpebaltzen wi'j, cyk'a' tzuna cychunk'lala nuk wi'jc'a bix nuk ti' nyol tu'n cyclet xjal tuj il, ka ma bint cyu'na ju'wa, atzzen cychunk'lala. Pero alj tcy'i cyim nuk wi'jc'a, nuk tchunk'lal n-oc tak' te, ja tzunj cxe'l tz'ak. ³⁶ ¿Ti c'ajbela cykilca twitz tx'otx' te jun xjal oj t-xcye ti'j ka otk txi' t-xoo'n tchunk'lal nuk tu'n ttzyet tu'n? ³⁷ ¿Bix ma jte'tzen ctchja' jun xjal twi' tchunk'lal ka o txi' t-xoo'n, nuket jac'a tlók' juntl maj? Cuma at mas twi' tanem jun xjal twitz cykilca twitz tx'otx'. ³⁸ Alj ma tz'el ch'ixwe wi'j bix ti' nyol cywitz xjal nakch ete' wi'j bix cywitz aj il, jaxse ju'x inayena, xjal Sma'n tu'n Dios, q'ueletzen ch'ixwexe ti'j oj tul meltz'ajxin juntl maj twitz tx'otx' tuya nimxsen tajwalelxin tu'n Tmanxin Dios, bix tzinxse ntxakakanxin, bix cyuyax xjan tsanjel Dios tuj cya'j—tzi Jesús cye xjal.

9

¹ Bix jax e xi' tkba'n Jesús:

—Cxe'l xix nkba'n cyey ka at juun cyey tcub tzalu mi'n cyim ojxe toc cycyeyena techel ti tten tipemal tcawbil Dios—tzi Jesús cyexin.

Tej tcub meltz'aj tcyey'nc Jesús
(Mt 17:1-13; Lc 9:28-36)

² Eltzen wukak k'ij, bix e xi' Jesús twi' jun nim witz. Nuktzen ja Pedro, tuya Santiago, bixse Juan e xi' tii'nxin tuyaxin. Cywitz tzunxin tej tcub meltz'aj tcyey'nc Jesús. ³ Yalxse t-xbalen Jesús tzinxse ntxakakan, maxxse sak otk tz'oca tilbil twitz oj tcy'x tbaj txjet jun ti jilel. ⁴ Bix tujx naj toc cycyeyenxin nyolen Jesús tuya Elías bix Moisés, ca'ba ktzan tyolel Dios nejl. ⁵ Bix e xi' tkba'n Pedro te Jesús:

—Xnak'tzal, axse tbanel jlu ko' eto' tzalu. Cjaweltzen kbincha'n oxe ni' pach, junzten tey, junltzen te Moisés, bixse juntl te te Elías—tztizen Pedro te Jesús. ⁶ Yaa'ntzen tii' e xa' tkba'n Pedro jcyjulu, cuma otkxse chi jaw sey'pajxin. Ya mintii'tl ul tuj tc'u'j Pedro tu'n ti t-xi'lel tkba'nxin.

⁷ Nbajc'atzen yolen Pedro, tej ttzaj jlet jun muj. Bix e cyaj bajkexin tuj. Tujtzen muj etza jun yol. Tzi cyjulu:

—Jatzen weya Ncwalja n-oc tak' weya. Cybimc'atzen—tztizen tyol Dios tetz tuj muj.

⁸ Tujx naj tej cycyeyenxin cytxlajxin, ya min-altl tcub cyuyaxin. Nuk jac'atl Jesús tjunal tcub.

⁹ Cyajcattzzen meltz'ajxin twi' witz, bix e xi' tkba'n Jesús cyexin tu'n mi'n jaa' tz'oca cykba'nxin ti jilel otk tz'oc cycyeyenxin, ojxe tjatz itz'j xjal Sma'n tu'n Dios. ¹⁰ Ju' tzunj e cwa' cyewenxin ti jilel otk tz'oc cycyeyenxin. Pero bix ak'kexin kanlecte tiy' cyeeylexxin tizen jilel "ojxe tjatz itz'j." ¹¹ Bix e xi' cykanenxin te Jesús:

—¿Tikentzele nbyana cyu'nj xin tx'olbal ley ka il ti'j tzul meltz'aj jxin Elías twitz tx'otx' nejl twitz xin Scy'o'n tu'n Dios?—tzi tzunkexin te Jesús.

¹²⁻¹³ Bix aj ttzak'be'n Jesús:

—Jax cyu'n tx'olbal ley. Tzul meltz'ajte Elías twitzj Scy'o'n tu'n Dios nejl te ninc'ul xjal. Pero cxe'l xixse nkba'n cyey tej tul Juan Bautista, ju'tzen tul-lenxin tisex Elías, tise'aj toc tu'n tyol Dios. Bix ch'innch'etzen tbyet Juan Bautista cyu'n xjal. Pero atzzen jun kanbil cyey:

¿Ti toc tu'n tyol Dios ti pjel tej xjal Sma'n tu'n Dios? Tzitzen cyjulu: "Jxin Sma'n tu'n Dios q'uiyelxse a' tc'u'jxin, bix q'uelel xoo'nxin cyu'n xjal," tzi tyol Dios—tzi Jesús cye t-xnak'atz.

Tej tel biman ti'j junk'a cwal tu'n Jesús
(Mt 17:14-21; Lc 9:37-43)

¹⁴ Tej tzunj cypon meltz'ajxin jaa' ete'j cabtlxin t-xnak'atz Jesús, bix e pon cnetkexin tuya nim xjal otk tz'oc cychmon cyiib cyi'jxin, bix cabxin tx'olbal ley nchi rasonen tzunxin cyuya t-xnak'atz Jesús. ¹⁵ Tejzen toc ccyey'en xjal ja Jesús, cykilxse xjal e xi' k'olbelte Jesús. Bi'xse e jaw klee' ke xjal tu'n nchi tzalaj, cuma cytzki'ntltzen xjal cykil ba'n tbint tu'n Jesús. ¹⁶ Bix e xi' tkanen Jesús cye xjal:

—¿Titzen jilel nxi' cyyolena cyuya nxnak'atza?—tzi Jesús.

¹⁷ Juntlzen cye xjal ocx tzak'bente:

—Taat Xnak'tzal, ma tzul wii'na ncy'aala ma tz'oc biman ti'j, bi'x ma cyaj me. ¹⁸ Jaa'xja tcwa'k'a ti'j, ntzaj ttzyu'n biman jak'a, bix ncub xoo'nk'a tu'n twitz tx'otx', bix n-ak' eletz plut tuj ttzik'a, bix njawxse kitx'itx'in t-xee' twitz tek'a, bix ncyaj tx'ilek'a. Ma txi' ncubsa'n nwitz cye t-xnak'atza tu'n tel cylojo'n biman ti' ncy'aal, pero mix nbina cyu'n—tzi tman cwal.

¹⁹ Bix aj ttzak'be'n Jesús cye xjal:

—¿At-xpatzen xjal min tz'oc ke tc'u'j ti' Dios, bix wi'j? Jey', ¿jte'tzen maj cxe'l nyeec'an wipemal cyey tu'n toc ke cyc'u'ja? ¿jte'tlzen maj chi oquel nxnak'tza'na tu'n tel cyni'ya ti'j? Cyii'ntzna jcwala tzalu—tzi Jesús.

²⁰ Bixse e xi' cyii'n xjal cwal twitz Jesús. Tejzen toc tcyey'en jbiman toc ti' cwal ja Jesús, bix e tzaj cyim cwal tu'n biman, bi'x e cub tz'ak cwal twitz tx'otx', bix e cub ten balk'ajel, bix e jaw swaquen ttzik'a. ²¹ Bix e xi' tkanen Jesús te tmank'a:

—¿Jtootzen tzyet ni' k'a tu'n j lu?—tzi Jesús.

Bix aj ttzak'be'n tmank'a:

—Jatxe ni' nee'xk'a, ²² bix nimxse maj o txi' t-xoo'n biman jak'a tuj k'ak' bix tuj a' tu'n tcubk'a. Ju' tzunj kape jac'a bint tu'na, k'antz ch'in tc'u'ja ki'ja. Ko toneca—tzi tzunxin te Jesús.

²³ Bix aj ttzak'be'n Jesús texin:

—¿Titzen ttenj "jac'ape bint tu'na?" Cykilca ba'n tbint te alj ma tz'ocslante ka ba'n tbint wu'na—tzi Jesús.

²⁴ Entonces bix e jaw s-in tman cwal cyjulu:

—Tzin wocsla'nwe. Chin toneca tu'n toc wocsla'na mas—tzitzen tman cwal.

²⁵ Toctzen tcyey'en Jesús otk jaw chmet nim xjal, bix oc cawenxin ti' biman:

—Xewbaj, tu'na ma tz'oca jcwala me bix chquint. Inayentzen cxe'l kbante tey tu'n tetza tuj tchu'l jxjaja, bix ya mi nuket juntl maj bix tz'oca ti'j—tzi Jesús te biman.

²⁶ Bix e jaw s-in biman, bix e tzaj cyim cwal juntl maj tu'n biman, bix el biman ti'jk'a. Tejzen tel biman, bi'xse e cyaj bint ttenk'a tisen cyimne. Nim xjal e kbante ka otk cyimk'a.

²⁷ Pero bix e tzaj ttzyu'n Jesús tk'abk'a, bix e jaw tii'nxin jak'a, bix e cub we'k'a.

²⁸ Yajc'atltzen bix ocx Jesús tuj jun jaa'. Ccyajtzen Jesús cyjunalx cyuya t-xnak'atz, bix ak'kexin kanlte:

—¿Tikentzen min s-el biman ti'j k'a cwala ku'na?—tzi tzunkexin.

²⁹ Bix aj ttzak'be'n Jesús:

—Ke cyej biman lu mlay chi el cyeja ka mitkx nchi na'na xjal Dios tuya cykil tanem—tzi Jesús.

Tej tyole Jesús juntl maj ti'j tcyamecy
(Mt 17:22-23; Lc 9:43-45)

³⁰ Tejzen cyetzxin jatzewe, bix iy'kexin cyuj tnom te Galilea. Pero tcy'ixse Jesús oc cye'yey cyu'n xjal, ³¹ cuma nxnak'tzanxin ke t-xnak'atzxin tuj ewjel. Bix e xi' tkba'nxin cye t-xnak'atzxin:

—Tej xin Sma'n tu'n Dios cxe'l k'o'nxin tuj cyk'ab xjal, bix cbyetelxin. Pero tetzen toxen k'ij cjawetza itz'jxin—tzi Jesús. ³² Pero min el cyniy'xin ti'j ti jilel e tkba Jesús, pero tu'ntzen cych'ixewxin min e xi' cykanenxin te Jesús ti elpenina tyolxin.

Alcy mas jawnex toclen
(Mt 18:1-5; Lc 9:46-48)

³³ Bix e ponkexin juntl maj tuj nin tnom te Capernaum. Tejzen cyponxin tuj jaa' tu'n cywe'baxin, bix e xi' tkanen Jesús cye t-xnak'atz:

—¿Titzen jilelj cyey xi' cyyolena tuj be?—tzi Jesús.

³⁴ Pero mintii' aj cytzak'be'nxin tu'n cych'ixewxin, cuma jatzen e xi' cyyolen xinj tuj be alcyexin mas nintzaj cyxolxin. ³⁵ Bix e cub ke Jesús, bix e tzaj ttxco'nxin cocablajaj t-xnak'atzxin, bix e xi' tkba'nxin cye:

—Cyaj cyey chi oca te nintzaj. Pero cxe'lxixse nkba'n cyey, alj ma txi' tc'u'j ti' juntl xjal, ejee' tzunja chi oquel te nmak xjal tuj twitz Dios. Al kej cyaj chi cawen, ejee' tzunja chi cyjel ti'jxe—tzi Jesús cyexin. ³⁶ Bix e tzaj tii'nxin jun nee' cyxol t-xnak'atzxin te techel. Njawtzen tchle'nxin nee', bix e xi' tkba'nxin:

³⁷ —Alj ma tz'oc il ti' jun nee' tisenca' ju'x wi'ja, ju'xse tten oj toc il wi'j. Bix ojtzen toc il wi'j, yaa'n nuk wi'jc'a, sino ju'xse c'oquel il ti' Dios e tzaj tsma'n inayena—tzi Jesús.

Alj min nk'oj ki'j kuya ta'

(Lc 9:49-50)

³⁸ Bix ocx ttx'oman Juan tyol Jesús:

—Xnak'tzal, oc kcyeyena jun xinak n-el tlojo'n biman cyi' xjal tbi tzuna najben te. Pero oztzen kmaya, cuma yaa'n toctz kxol—tzi Juan te Jesús.

³⁹ Bix e tbi Jesús tyol Juan, bix aj ttzak'be'nxin:

—Min, mi'n tz'oc cymyo'na, cuma ju' tk'on teja tiib kuya. Alj xjal ma bint jun ti jilel tu'n, tu'n tipemal nbi'ya, mlay yolente ka' wi'j, cuma yaa'n toc chilsal we. ⁴⁰ Alj min tz'oc k'ojl ki'j, kuyatzen ta'. ⁴¹ Alj tk'on tiib kuya, ctyeec'ate tiib, amale nuket jun vas a' tzaj tk'o'n te cyey, ejee'y lepch ti'j Scy'o'n tu'n Dios. Cxe'lxixse nkba'n cyey, jaante ctiik'el t-xel te Dios.

iAyksen tej xjal ncub tk'o'n tzpetsabl tuj tbe juntl!

(Mt 18:6-9; Lc 17:1-2)

⁴² Ko nbajsa' xsunj nyol nxi' nkba'n cyey. Ka at jun xjal ma tz'oc ten yajlalecte juntl xjal tu'n tcub tz'ak tuj il, bix mintkna'x tcywix tuj tyol Dios, tisen ja nee' luwe, ba'ntetpetzenle oj tcub xpet jun nim cyaa' tkul tu'n t-xi' xe't tuj mar, twitzj oj toc ten ocsal tc'u'j juntl xjal. ⁴³⁻⁴⁴ Yaltzen ka tu'nx ma cwa' tz'ak tuj il, cxe'ltzen nk'o'n juntl tumel cyey. Oj tcub tz'aka tuj il, jatzen theyel k'ak'. Ju' tzunj ka at jun il ma tzaj ti'ja, cyiwx tcla' tiiba twitz. Ba'n tcub tpa'n ch'ina tak' tu'n tcle'ta te il twitzj oj t-xi' tk'on tiiba tuj il bix cxe'la tuj k'ak'. Ba'ntetpele oj tel tx'omet jun tk'aba oj taja tz'ajben tey tu'n t-xi'y tuj il tu'n tpona tuj cya'j twitzj oj t-xi'y tuj k'ak' tuya cyca'bel tk'aba. ⁴⁵⁻⁴⁶ Ju'xse tten tuya tkena ka ja k'ilx tey tuj il. Ba'ntetpele oj tel tx'omet tkena sictzen toxca tuj cya'j. Mas ba'n oj ttena twitz tx'otx' coxa twitzj oj tpona tuya cyca'bel tkena tuj k'ak'. ⁴⁷ Bix ka nnyona il tuya tbak' twitza, ba'ntetpele oj tetz sictzen toxca tuj cya'j. Cuma mas ba'n oj ttena tuya junx tbak' twitza twitz tx'otx' twitzj oj t-xi'y tuya cyca'bel tbak' twitza tuj k'ak', ⁴⁸ jaa'j mintey'xse nyubtz'aj k'ak'.

⁴⁹ Pero cxe'lxixse nkba'n cyey, cykilcakey chi elel k'i'na tuj niy' tisen tuj jun k'ak', tu'n cytxjeta tuj cyila, bix tu'ntzen cytena yaa'n nuk jun tisenj chi'pj atz'emi'. ⁵⁰ Ba'nte atz'en. Pero ka ma tz'oc te zaa', ya mlay cub meltz'aj ttz'yal juntl maj, bix ya mintii'tl ba'n tajbena. Tej atz'en tisenca'axsen a tnaabl cyuyey. J-atz'en mintii' ba'n tajbe'na ka mintii' ttz'yal, ju'xse cyey yuwinkey ka yaa'n ba'n cynaabla twitz juntl xjal bix twitz Dios. Ju' tzunj, ba'nxkey. Tisen tzunj oj tcub tena tuj tbanel tuya juntl xjal, jatzen ba'n tnaablja—tzi Jesús cye t-xnak'atz.

10

Tzin tk'o'n Jesús xnak'tzibil tu'n mi'n tcub tpa'n tiib xinak ti' t-xu'l

(Mt 19:1-12; Lc 16:18)

¹ Bix etz Jesús tuj tnom te Capernaum, bix e xi'xin theyel ttx'otx' Judea, ttxlaj Capernaum te iy'na, bix iy'xxin tuj nima' te Jordán, jlajxe Judea. Bix e jaw chmet xjal ti' Jesús juntl maj, bix ak' Jesús xnak'tzal cye xjal tisex nbaj tixin cyxol xjal. ² Bix e pon cabxin xjal nimal tuj cyley, ejee'j xin fariseo, bix e xi' cykanenxin te Jesús ka ba'n tel tpa'n tiib xinak ti' t-xu'l. Nuktzen ti cyajaxin tu'n tcub tz'ak Jesús. ³ Bix aj ttzak'be'n Jesús:

—¿Titzen e cyaj tkba'n Moisés cyey?—tzi Jesús.

⁴ Bix aj cytzak'be'nxin:

—E tcuya te Moisés tu'n tel tpa'n tiib xinak ti' t-xu'l. Tu'ntzen cycub pax, nuktzen jun u'j txi' tk'o'n xinak te xuuj tzin tkba'n otk chi cub pax—tzikexin te Jesús.

⁵ Bixse aj ttzak'be'n Jesús:

—Ju'tzen tcyajlen tkba'n Moisés, pero tu'nj cyyuwinela. ⁶ Pero tuj tneel yaa'n ju' tewa. E cyaj ttz'i'ben Moisés: “E cub tbincha'nte Dios xinak tuya xuuj. ⁷ Ju' tzunj cyjela tk'o'n xinak tman bix ttxu tu'n toc maje tuya xuuj. ⁸ Cyca'beltzen chi elel tisen junx xjal bix ma tu'n cycub ten mojl junx,” tzi Moisés tcyajlen ttz'i'ben. Ju' tzunj yaa'n ca'ba cybet, sino tisen jun xjal mixbe tu'n tel pax. ⁹ Ju' tzunj tcyajlen tk'o'n Dios te junx, yaa'n tu'n tcub tpa'n jun xjal—tzi Jesús cye fariseo.

¹⁰ Bix jaantzen ke t-xnak'atzxin oc ebinte tyol Jesús cye fariseo. Ete' xsunxin tuj jjaa' jaa' ete'xin, bix e xi' cykanen t-xnak'atzxin ti tten tyol Jesús cye fariseo. ¹¹ Bix e xi' tkba'n Jesús: —Alj ma tz'el tpa'n tiib ti' t-xu'l, bix ma maje tuya juntl xuuj, ma tz'oc tbinche pajlel ti' tneel t-xu'l bix twitz Dios. ¹² Bix jax ju'x te xuuj, ka ma cyaj tk'o'n tchmil, bix ma maje tuya juntl xinak, ma tz'oc tbinchen pajlel ti' tneel tchmil bix twitz Dios—tzi Jesús cye t-xnak'atz.

Tej tcub tcy'iwla'n Jesús ke nee'
(Mt 19:13-15; Lc 18:15-17)

¹³ Bix e xi' cyii'n xjal cab nee' tu'n toc tmoco'n Jesús ejee', tu'n cyoc te wunak. Pero bix ak' ke t-xnak'atz Jesús te cawlec cyej xjal k'ilcye nee' tu'n mi'n che'x lk'e nee' ti' Jesús. ¹⁴ Toctzen tcye'yen Jesús, bix e tzaj tk'ojxin cyi' t-xnak'atzxin, bix e xi' tkba'nxin cyjulu:

—Cytzakpi'nctz kej nee'wa tu'n cytzaj wi'j. Mi'n cysey tisenj tzin cyse'na, cuma nuktzen ejee' cyej xjal tisen kej nee'wa ba'n cyten tjak' tcawbil Dios, cuma tzin cybi'n bix min baj cyc'u'j. ¹⁵ Cxe'lxiixe nkba'n cyey, alj min ma tz'oc tbi'n tcawbil Dios tisen jun nee', mlay tz'oc tuya Dios—tzi Jesús. ¹⁶ Bix e jaw tchle'n Jesús ke nee', bix e cub tk'o'nxin tk'abxin cyibaj nee' te cy'iwlablecye.

Tej tyole junk'a cwal k'ina tuya Jesús
(Mt 19:16-30; Lc 18:18-30)

¹⁷ Tu'ntzen ttzyet tbe Jesús jaa' xa'ninaxin, bix e pon ajkel junxin xjal, bix e cub majexin twitz Jesús, bix e xi' tkanenxin:

—Jey', ba'n Xnak'tzal, ζti cwel nbincha'n tu'n ncaman ti' nchunk'lal te junx maj tuya Dios? —tzi tzunxin te Jesús.

¹⁸ Bix aj ttzak'be'n Jesús:

—ζTikentzen n-oca tkba'na ba'n weya? C'oquelxix tc'u'ja ti' tyola, cuma min-alte jun xjal ba'n. Nuk jac'a te Dios ba'n. ¹⁹ Yal tzunj tkanbila, ttzki'nntl tzuna jlaaj cawbil e cyaj tk'o'n Dios. Mi'n byona, mi'n tz'ikena xuuj, mi'n tz'alk'ana, mi'n xtak'ena ti' juntl xjal, mi'n cub tyajla'na xjal, ebimc'a tmana bix ttxuy, bix xsunj cabtla. Katzen ma cybiy ja lu, bix ka min xsub tz'aka twitz, camal tzuna ti' tchunk'lala te junx maj tuya Dios—tzi Jesús texin.

²⁰ Bix e xi' tkba'n jxin xjal te Jesús:

—Xnak'tzal, cykil te ja luwe o bint weya wu'n jatxe tuj ncwalela—tzi tzunxin.

²¹ Bix aj ttzak'be'n Jesús tuya tc'u'j:

—At-x juntl mina'x tshint tu'na. Q'ueyex tik'ch tey, bix k'onxse twi' cye mebe. Ju'tzen cnetela tk'inemala tuj cya'j. Ojtzen tshint tu'na, lpetztzen wi'j—tzi Jesús.

²² Bix e jaw baj tc'u'j jxin xjal tej toc tbi'nxin, bix e jaw bisenxin, cuma k'ina xsunxin. Bix elxin ti' Jesús.

²³ Bix aj tcye'yen Jesús ke t-xnak'atz ttxlaj, bix aj tkba'nxin:

—Penaxse tu'n toc cyk'on cyiib jxjal k'ina tjak' tcawbil Dios—tzi Jesús cye t-xnak'atz.

²⁴ Bi'x e naj cynaabl ke t-xnak'atz Jesús cyu'n tyolxin, cuma e'la tuj cywitztzin ka ejee' k'ina mas wunak twitz Dios. Bix e xi' tkba'n Jesús cyexin:

—Key cwal, aljxe xjal ti'j, cyiwxsen tu'n toc cyk'on cyiib tjak' tcawbil Dios. Tisen kej xjal k'inan. ²⁵ Mlay tz'ocx naj jun k'inan tuj tcawbil Dios twitz junjil tzej tu'n texjil tuj txyo'p jun bak—tzi Jesús.

²⁶ Toctzen cybi'n t-xnak'atz Jesús, masx e jaw klee'kexin, bix ak'kexin yolel cyxolellexin: —Katzen ju' ttena, ζaltzen jun ba'n tco'pan tiib tu'n mi'n cyaj ti'jxe tcawbil Dios?—tzi tzunkexin.

²⁷ Toctzen tcye'yen Jesús ejee'xin, bix e xi' ttzak'be'n Jesús:

—Cye xjal, mlayx bint cyocxcye tuj tcawbil Dios. Pero te Dios, cykilca ba'n tshint tu'nxin —tzi Jesús.

²⁸ Bix ak' Pedro, t-xnak'atz Jesús, kbalxte texin:

—Keya, o cyaj kcyey'ena tik'ch jilel keya tu'n koc lpeya ti'ja—tzi Pedro te Jesús.

²⁹ Bix aj ttzak'be'n Jesús:

—Tzinen cxe'l nkba'n cyey, aljxe xjal nuk wu'n bix ma ti' nyol te co'pbil ma cyaj tcye'yen tja, bix ke titz'en, ke ttzicy, bix ke tman, ke tcwal, bixsen ttx'otx', ³⁰ mas c'oquel k'o'n te tu'n Dios twitzx ja tx'otx'a. Ctiik'eltzen mas nim c'ojlablte. Bix ctiik'eltzen nim titz'en, bix ttzicy, bix tman, bix ttx'otx', bix ma tja. Pero al tzunj ma tz'oc lpe wi'j, jax q'uiyal a' ch'in tc'u'j. Pero amale cyiwet ch'in twitz ja tx'otx'a, ojtzen tul ac'aj twitz tx'otx', ctiik'eltzen tchunk'lal te junx maj. ³¹ Bix nimxse xjal nintzaj ja'lewe, ejee' tzunj mintii' chi oquela tuj juntl twitz tx'otx'. Bix nimxse xjal yaa'n nintzaj ja'lewe, ejee' tzunj chi oquel te nintzaj tuj juntl twitz tx'otx' tu'n Dios—tzi Jesús cye t-xnak'atz.

Tej tyole Jesús juntl maj ka tu'n tcyim
(Mt 20:17-19; Lc 18:31-34)

³² Bix e tzyet jcybexin tzyu'n tu'n cyponxin tuj tnom te Jerusalén, nejltzen Jesús cywizt t-xnak'atz. Yaltzen ke t-xnak'atzxin, otkxse chi jaw klee'xin, cuma ju' e xi' tiin tiib Jesús Jerusalén jaa' ta' nim xjal nk'ojlec ti'jxin.

Bix at juntl wik xjal lepch cyi'jxin. Otkxse cub ttzi cyi' xjal, cuma cytzki'ntl xjal nimxse xjal nk'ojlec ti' Jesús tuj tnom te Jerusalén.

Bix ex ttxco'n Jesús kej t-xnak'atz juntl maj cyjunalxin. Bixse ak'xin kbalte ti jilel tbajlel ti'jxin. ³³ Bix e xi' tkba'nxin:

—Cyena. Lutzen ko' xi'nin tuj Jerusalén, jaa'j chin xe'la k'o'n tuj cyk'ab ke nintzaj tawil na'l Dios bix ke tx'olbal ley. Ejee' tzunxin chi kbalte tu'n nbyet bix chin xe'l cyk'o'nxin tuj cyk'ab nmak xjal te Roma. ³⁴ Ejee'tzen xinj chi oquel xmuccchante weya, inayena, jxjal Sma'n tu'n Dios tu'n ntena cyuya xjal. Pjel cytzuuben xjal inayena, chin oquel cypju'na xjal, bix chin cwel cybyo'na xjal. Pero tetzen toxen k'ij oj njatz itz'ja juntl maj—tzi Jesús cye t-xnak'atz.

Jun cykanbil Santiago bix Juan

(Mt 20:20-28)

³⁵ Ja tzunj xin Santiago tuya Juan, t-xnak'atz Jesús, ke tcwal jxin Zebedeo, bix e xi' lk'ekexin ti' Jesús, bix e xi' cykba'nxin cyjulu:

—Xnak'tzal, kaja bint jun xtalbil tu'na ki'ja, jaj cxe'l kkanena tey—tzi tzunkexin.

³⁶ Bix aj tkanen Jesús:

—¿Titzen jilel cyaja tz'oc nbince cyi'ja?—tzi Jesús.

³⁷ Bix e xi' cykba'nxin cyjulu:

—Oj toc tey te cawel, ctk'a'y jun nin kaak'ena ttxlajquey te cawel tuyey, jun keya tuj tmank'aba, bix juntl keya tuj tneša—tzi tzunkexin te Jesús.

³⁸ Bix aj ttzak'be'n Jesús:

—Min tz'el cyni'ya ti'j ti jilel ntzaj cykanena we. ¿Jac'apatzen tziy'x cyey cyu'n oj tiy' a' cyc'u'ja tisej weya? Il ti'j chin byetela. Jey', ¿mama cub cybisen cyey tu'n ccyima wuya?—tzi Jesús cye Juan bix Santiago.

³⁹ Bix aj cytzak'be'nxin:

—Chinelke ku'n—tzi tzunkexin.

Bix e xi' tkba'n Jesús:

—Min cytzki'na, pero jax cyu'na q'uuiyal a' cyc'u'ja bix chi byetela. ⁴⁰ Yaltzen cykanbila weya, yaa'n inayenwe chin kbalte al ccawel wuya oj woc te cawel. Jatzen cxe'la k'o'nte ak'untl cyej xjal o tscy'o Dios—tzi Jesús.

⁴¹ Toctzen cybi'n jlajajtlxin t-xnak'atz Jesús tyol Santiago tuya Juan, bix oc chi'l ch'inkexin. ⁴² Toctzen tcyeyen Jesús tik'ch nbajcye t-xnak'atz, bix e tzaj ttxco'nxin cykilcaxexin, bix e xi' tkba'n Jesús cyexin:

—Cytzki'ntl tzuna cyxol kej xjal te Roma nchi cawen cyibaja at cawel nchi cawen tu'n t-xi' cyyee'can nim cyajwalel cye xjal. Bix cyiw nchi oc cyi' xjal. ⁴³⁻⁴⁴ Perotzen cyej cyxol, yaa'ntzen ju' ctemela tewa. Tec'axtl ctemelate, cxe'l ccyeyena ke xjal nejl twitz tu'n cycawena cyibaj xjal. Al tzunj ma bint tu'n ju'wa, ejee' tzunj chi oquel te nintzaj cyxola.

⁴⁵ Mitetpe ja tej xjal Sma'n tu'n Dios o tzul te cyc'ojla'betz xjal, sino ja texin o tzul te ajbel cye xjal, tuyaxetzen cxe'l tk'o'nxin tchunk'lalxin te twi' colbil nim xjal tuj tk'ab il—tzi Jesús cye t-xnak'atz.

Jaj jun moš Bartimeo tbi ul tnaabl twitz tu'n Jesús

(Mt 20:29-34; Lc 18:35-43)

⁴⁶ Tbajtzen tkba'n Jesús ke tyol, bix e tzyet tbexin cyuya t-xnak'atzxin juntl maj. Cwa cyponxin tuj tnom te Jericó. Te xsunxin ttxa'n tnom, bix oc lpe nim xjal ti'jxin. Cwa tpon canaxin ti'j junxin moš k'uklc'a tuj be, kanl tcotz cye xjal. Bartimeo tbi jxin moš, tcwal junxin xjal Timoteo tbi. ⁴⁷ Tej tzunj tbinte moš jxin xjal tzajnin ta'xin ja Jesús aj Nazaret, bix ak'xin s-il:

—¡Jesús, jaj Tcwal David, k'antz tc'u'ja wi'j!—tzi moš.

⁴⁸ Nimtl xjal oc ilente moš tu'n mi'n tz'el twi'. Pero mas el tsi'nxin twi'xin, bix e xi' tkba'nxin juntl maj:

—¡Tcwal David, k'antz tc'u'ja wi'ja!—tzi tzunxin.

⁴⁹ Bix e cub we' Jesús, bix e xi' tkba'nxin cye xjal:

—Cytzcontz jmoša—tzi Jesús.

Bix e tzaj cytxco'n xjal jaxin:

—¡Nimx tc'u'ja! ¡We'wey! Luy ntxquet tu'n Jesús—tzi ke xjal.

⁵⁰ Tbintetzen moš, bix ex t-xoo'nxin ttxow'xin toc, bix e jaw t'icypajxin, bix e xi' lk'exin ti' Jesús. ⁵¹ Bix e xi' tkanen Jesús te moš:

—¿Ti jilel taja tz'oc nbince ti'ja?—tzi Jesús.

Bix aj ttzak'be'n moš te Jesús:

—Xnak'tzal, waj chin cye'yen juntl maj—tzi tzunxin te Jesús.

⁵² Bix e xi' tkba'n Jesús texin:

—Ba'n taja. Tu'n cykil tc'u'ja ma tzula tnaabla—tzi Jesús.

Tujx naj tul tnaabl thak' twitzxin, bix ak' xe'l lpexin ti' Jesús tuj be.

11

Tej tocx Jesús tuj tnom Jerusalén

(Mt 21:1-11; Lc 19:28-40; Jn 12:12-19)

¹ Otktzen pon cana Jesús nka Jerusalén, cyuj tnom te Betfagé bix Betania, junx tuya jun twitz Olivos tbi. Bix e xi' tsmá'n Jesús ca'ba t-xnak'atz tuj jun cyej tнома. ² Bix e xi' tkba'nxin: —Cyucxatzen. Ojtzten cyocxa tuj jtnom, n-oc kcye'yena. C'oquel cycye'yena junjil bur yo'lecjil, bix min-al jun xjal o jax ke tibajjil. Cypjumeljil bix cyii'ntz tzunjil. ³ Katzen al ma tz'oc kanente cyej tiken n-el cypju'n jila, cyk'umenxse ka c'ajbeljil te cyaawa, bix tzul tmetlz'u'n naj texin jajil—tzi Jesús.

⁴ Entonces bix e xi'kexin, bix e cnet jvil bur cyu'nxin, xpo'njil tuj be twitz tlemel jun jaa'. Bix el cypju'nxin jajil. ⁵ Bix attzen cab xjal tcub tuj be, bix e xi' cykanenxin cye t-xnak'atz Jesús:

—¿Titzen nbaj cyey? ¿Tikentzen n-e'la cypju'na jil bura?—tzi tzunkexin.

⁶ Bix aj cytzak'be'nxin tisecaj otk tkba Jesús. Bix e cycuyan xjal tu'n t-xi' cyii'nxin bur. ⁷ Bix e xi' cyii'nxin bur te Jesús, bix e jax cyk'o'nxin cyxbalenxin tibajjil, bix e jax ke Jesús tibajjil. ⁸ Bix e tzyet tbe Jesús, bix minxse xjal oc lpe ti'j Jesús. Bix e cub cyk'o'n xjal cyxbalen tuj tbe Jesús, bix atl xjal e cub k'onte tk'ab xa'j tuj tboxin. Jatzen techelj oj tocx jun nin cawel tuj tnom. ⁹ Bix cykilcaxse xjal nejl twitzxin bix lepch tzinxse nchi š-in:

—¡Ma tzul kaaw! ¡E tten tzunxin kuya nim k'ij! ¡Cy'iwla'nxit-xin, cuma ma tzulxin tuya tajwalelxin tu'n Dios! ¹⁰ ¡Cy'iwla'nxit-xin, cuma ma tzul t-xe'chel David te cawel! ¡Axse tbanell!—tzi ke xjal.

¹¹ Ju'tzen tten tocxlen Jesús tuj nin tnom te Jerusalén, jaj jun tnom mas nintzaj cyxol xjal judío. Tejtzten tocx Jesús tuj Jerusalén, bix e xi'xin tuj nin tja Dios te cye'yecxte tuj. Bix ajtz meltz'ajxin tuya cycablajaj t-xnak'atzxin tuj tnom te Betania, cuma ch'itk tex k'ij.

Tej ttzkij tken higo tu'n tyol Jesús jaj mintii' twitz

(Mt 21:18-19)

¹² Tetzen juntl k'ij bix ex Jesús cyuya t-xnak'atz tuj Betania. Tujtzen be bix oc tak' weyaj te Jesús. ¹³ Nakchtzen e xa' tcyeyenxin jun wi' lo'pj higuera tbi. At nim t-xaak, tzin tyeec'an ka at twitz. Bix e xi'kexin te k'ilbel twitz. Pero tejzten cyponxin, mintii' twitz e cnet cyu'nxin. ¹⁴ Ju' tzunj e xa' tkba'n Jesús te tken higuera:

—Junxse maj min-atl xjal cxe'l lo'nte twitza, cuma mintii' twitza q'uelel—tzi Jesús te tzee'. Bix e cybi t-xnak'atz Jesús tyolxin te tzee'.

Tej tetz tlojo'n Jesús ke q'ueyel tuj tja Dios

(Mt 21:12-17; Lc 19:45-48; Jn 2:13-22)

¹⁵ Bix e ponkexin tuj tnom te Jerusalén. Tejtzten cyponxin, bix ocx Jesús tuj nin tja Dios. Bix ak'xin lojlbetz cyej xjal nchi q'ueyen bix nchi lok'on tuj tja Dios, cuma oc tcyeyenxin tja Dios tisen jun plasen. Bix e jaw tpac'tz'enxin kej mes cyej xjal ch'ixbel pwak te Roma te pwak te Israel tu'n tocx cychojentj xjal te tja Dios, bix e jaw tpac'tz'enxin kej cyk'a'j xjal nchi q'ueyen cucu' te juntl wik tu'n t-xi' cyoyenxin te Dios. ¹⁶ Bix min e tcuyaxin tu'n cyej xjal tuj tja Dios tuya tik'ch k'i'n cyu'n, cuma nim xjal ex tuj tja Dios cuma nkatzen ch'intl be. ¹⁷ Bix ak'xin kbalte cyej xjal tiken e tbinchexin ju'wa:

—Tzi tuj tyol Dios cyjulu: “Weya nja te nabl wewa cyu'n xjal tuj cykil twitz tx'otx',” tzi Dios. Pero yaltzen cyej, matzen cub meltz'aj tja Dios cyu'na tisen jun tja alak'—tzi Jesús cyej xjal.

¹⁸ Tejtzten toc cybi'n ke nintzaj tawil na'l Dios bix ke tx'olbal ley ti e baj te Jesús, bix ak'kexin ninc'ul ti'j ti ctemela tu'n tbyet Jesús, cuma at nim ttzi Jesús cyi'jxin, cuma ya tu'n cyoc baj xjal tuya Jesús. ¹⁹ Pero bix etz Jesús te kale tuj Jerusalén, tisex e tsexin te jun k'ij.

E tzkij tken higo

(Mt 21:20-22)

²⁰ Tetzen juntl k'ij, bix excakexin ta'j tken higuera oc cycye'yenxin te jun k'ij. Yal toc cye'yenxin, otk tzkij. ²¹ Bix ul tuj tc'u'j Pedro ti otk tz'oc tkba'n Jesús te higuera te jun k'ij, bix e jaw yolen Pedro:

—Xnak'tzal, ¡cye'nja higuera e cyaj tsbu'na ewe! ¡Ma tzkij!—tzi Pedro te Jesús.

²² Bix aj ttzak'be'n Jesús:

—Mintii' teja. Alj k'uklec tc'u'j ti' Dios, jac'a bint tik'ch tu'n. Ju' tzunj c'oquelxix ke cye'c'u'ja ti' Dios. ²³ Tzinexixse cxe'l nkba'n cyey, al k'uklec tc'u'j ti' Dios, ctk'a'te Dios ti jilel cxe'l cykanena texin. Tisej oj t-xi' cykba'na tej witz lu tu'n tjaw k'ukpaj tu'n t-xi' tuj mar; ctcuyate witz ka k'uklec cye'c'u'ja ti' Dios, bix ka min baj cye'c'u'ja. ²⁴ Ju' tzunj cxe'l nkba'n cyey, ba'n tbinde Dios tik'ch tu'n ka ilixix ti'j. Nuk cxe'l cykanen ch'ina tuya cykil cye'c'u'ja, bix ccyiik'ey te Dios. ²⁵ Nko yolentzen ti' na'j Dios, attzen juntl tumel. Ojtzzen cyak'a na'l Dios, ka at til jun xjal twitza, cynajsang'uey ka cyaja najset cyila tu'n Dios at tuj cya'j. ²⁶ Pero ka min xcub cynajsa'na til juntl xjal, jax mlay najset cyila tu'n Dios—tzi Jesús cye t-xnak'atz.

Jun toclen Jesús at tu'n Dios

(Mt 21:23-27; Lc 20:1-8)

²⁷ Tbjalnxixitlzen yolentzen, bix aj meltz'ajkexin tuj tnom te Jerusalén, bix e xi' Jesús tuj tja Dios juntl maj. Toctzen cyce'yen ke nintzaj xjal bix ke tx'olbal ley bix ke nintzaj tawil na'l Dios ja Jesús, bix e xi' lk'ekexin te kanlecte te Jesús:

²⁸—¿Titzen jilel tajwalela ti'j nuk tik'ch ncub tbinchena? ¿Altzen ma tz'oc k'onte tajwalela tu'n tex tolo'j nkey xjal tuj tja Dios ewe?—tzi tzunkexin te Jesús.

²⁹ Bix aj ttzak'be'n Jesús:

—Ju'x we jax cxe'l nkanen cyey. Ka ma tzaj cykba'na we alcyey nkanbil cyey, jaxse jac'a t-xi' nkba'nwe cyey tuya alcyey wajwalel ncwa' nbinche. ³⁰ Jatzen nkanbil ja lu: Tej tbautizaran tii'n Juan Bautista cye xjal, ¿jaa' e tzaa' tajwalelxin, tu'npa Dios, ma tu'npa xjalj? —tzi Jesús cye nintzaj xjal tuj tja Dios.

³¹ Bix ak'kexin yolel cyxolelexxin:

—Katzen ma txi' k'kba'n ka ja Dios e tzaj k'onte tajwalel Juan, bixse c'aaltz tkba'nxin ke tu'n tiken min oc kbi'n tyol Juan. ³² Bix jax mlay txi' k'kba'n ka xjal oc k'onte tajwalelxin—tzi tzunkexin, cuma cye'c'ixa oc cye'c'akwusa'nxin ke xjal, cuma cykil xjal etzkilte ka ja Dios e k'onte tajwalel Juan. ³³ Ju' tzunj aj cytzak'be'nxin:

—Min ktzki'nke—tzi tzunkexin te Jesús.

Bix aj ttzak'be'n Jesús cyexin:

—Jaxne ju'x we mlay txi' nkba'n tuya alcyey wajwalel ncub nbinche—tzi Jesús.

12

Jun techel cyi'j ak'anal yaa'n ba'n

(Mt 21:33-46; Lc 20:9-19)

¹ Bix ak'x Jesús kbalte cye tx'olbal ley bix cye nintzaj xjal bix cyuya tawil na'l Dios, bix e cub tk'o'nxin jun techel ka tu'n tbyet-xin. Tzi tzunxin cyjulu:

—At junxin xjal e cu'x awante cab tken uva. Bix oc tk'o'nxin penwen ti'j. Bix e jaw tbincha'nxin jun ttemlel uva tu'n tel vino ti'j, bix e jaw tbincha'nxin jun jaa' nim twe' te c'ojlablte tawalxin bix te c'ojlabl ttemlel twitz uva. Bix e cub bint tyolxin cyuya cab xjal tu'n tucub cymina'n ttx'otx'in tu'ntzen oj tjaw awal twitz, niy'jantzen te taaw tx'otx' bix niy'jantzen cye ak'anal. Bix exxin tuj tboxin.

² Tetzen tumel tu'n t-xilj uva, bix e xi' t'sma'nxin jun tsanjelxin te pa'lbel tej texin. ³ Pero tejtzen tpon sanjel, bix oc cypju'n manal tx'otx' jaxin, bix aj ljet-xin mintii' uva otk tiik'xin.

⁴ Tejtzen tpon meltz'ajxin tuya taaw tx'otx' mintii' uva k'i'n tu'nxin, bix e xi' t'sma'n taaw tx'otx' juntl tsanjel. Tej tzunj tpon sanjel, bix oc cypa'n manal tx'otx' twi' sanjel, bix e baj yaset-xin. ⁵ Bix e xi' t'sma'nxin juntl tsanjelxin. Yal tzunj ja juntl xina, bi'xse e byet-xin. Bix e xi' t'chk'o'nxin nimtl tsanjelxin cabtl maj. Attzen e baj pjet, bix attzen bi'x e cub cybyo'nxin.

⁶ Bix e xi' t'chk'o'n' texin cykilca ke tsanjelxin. Ya min-altl e cyaj. Nuk jun tcy'aalc'atlxin at tuyaxin. Bix e xi' t-xi'manxin ti'j cyjulu: “Oj t-xi' nch'k'o'n ncwal, kapetzen cybi' manal tx'otx' ncwal, tzi tzunxin. Bix e xi' t'chk'o'nxin tcwalxin. ⁷ Pero tej tpon tcwalxin, bix ak' ke manal tx'otx' yolel: Ja tcwal taaw tx'otx' ma tzul. Tetzele tkabk'a cyjela jtx'otx'a. Ka miin kbya'c'ak'a, tu'ntzen ke cyjela,” tzi tzunkexin. ⁸ Bix e tzaj cytzyu'n manal tx'otx' jak'a, bix e cub byetk'a, bix ex xe't t-xumalalk'a ti'jxe penwen.

⁹ Attzen jun cxe'l nkanen cyey. ¿Tii'ntzen cyey tuj cywitz? ¿Ti ctse' jxin taaw awal kej xjal manala? Cxe'l'tzen nkba'n cyey, oj t-xi' jxin taaw tx'otx', cwel tbyo'nxin ke manal tx'otx', bix cxe'l tk'o'nxin tx'otx' te tmaan juntl wik. ¹⁰ ¿Mixpatzen n-e'la cyni'ya ti'j tyol Dios nbyan cyjulu: “Jxak q'uelel ka'yba tuj cywitz binchal jaa' te tk'uklel t-xee' jaa', ja tzunja cwel meltz'aj te nin tk'uklel jaa'. ¹¹ Jatzen Dios cwel meltz'unte xak te tbanal xak. Ju' tzunj axse q'uelela tuj kwitz,” tzi tyol Dios tuj jun bitz?—tzi Jesús cye nintzaj xjal.

¹² Toctzen cybi'n ke nintzaj tawil na'l Dios, ke tx'olbal ley, bix ke nintzaj xjal tyol Jesús, cyaj tzunxin e tzyet Jesús tu'n tbyet-xin, cuma el cyni'xin ti'j ka cyi'jxin otk yolena Jesús, cuma otk tz'el cyxoo'nxin ja Jesús. Pero mintzen e cytzyuxin Jesús tu'n cytzi jxjal lepchec ti'j Jesús. Bix e cyaj cyce'yenxin Jesús.

*Jun tumel tibaj chojentj**(Mt 22:15-22; Lc 20:20-26)*

¹³ Yajc'atlzen bix e xi' cychk'o'n nintzaj xjal cabxin nimal tuj cyley bixsen cabxin cycy'i chi k'o'jl tuya xjal aj Roma, cuma jatzen Roma cawel tibaj Israel. Bix e xi'kexin ti' Jesús te kanlecte jun cyiw yol te Jesús tu'n tcub tz'ak Jesús tuj cyk'abxin tu'n ka' tyol Jesús ti' Roma.

¹⁴ Bix e xi' cykanenxin te Jesús:

—Xnak'tzal, ktzki'na jax tey tyol. Min tz'aj tk'on tey tiib tuya juntl xjal. Min tz'oc tcey'yen tey ti'i' ke xjal oj n-ak'a ninc'ul xjal. Jtey nbaj tyeec'ana ja te ja tisexix taj Dios. Jey'tzen, ¿ti tey toc tu'n? ¿Ilxixpa ti'j tu'n tcub kchoona te te Roma, ma minj?—tzi tzunkexin. Nuktzen e cyyoxin la' ti toc tu'n Jesús, cuma nim xjal e tajbe tu'n tcub tchoon, bix nim xjal min e tcuya tu'n tcub tchoon.

¹⁵ Pero tztzki'n Jesús ca'ba tten cyanem xjal, bix e xi' tkba'nxin cye xjal:

—¿Tikentzen ncwa' cyk'o'na c'o'bil tuj nbe tuya cyyola? Cyk'antz jun pwak we. At jun cxe'l nyeeec'an cyey—tzi Jesús.

¹⁶ Bix e xi' cyk'o'nxin jun pwak te Jesús. Bix e xi' tkanen Jesús cyexin:

—¿Ale jwitzbaj bix ale jbiybjaj tcub twitzj pwaka?—tzi Jesús.

Bix aj cytzak'be'nxin:

—Jaj twitz nin cawel cyibaj cawel te Roma—tzi tzunkexin.

¹⁷ Bix aj ttzak'be'n Jesús cyexin:

—Kane ju'wa, cyk'onxne te cawel alcyey te cawel taj, bix cyk'onx te Dios alcyey te Dios taj —tzi Jesús.

Bix e jaw klee'kexin tu'n tyol Jesús. Otktzen cub tzpet cyc'o'bilxin.

*Jun kanbil ti'j itz'jlenel tuj cyamecy**(Mt 22:23-33; Lc 20:27-40)*

¹⁸ Yajc'atlzen bix e pon jun clojxin xjal, saduceo thi cyclojxin, ti' Jesús. Ejee'tzen xinj e kbante ka oj tcyim jun xjal, bi'x cymel junx maj. Mintii' tu'n tjatz itz'j. Bix e ponkexin te k'olc'a c'o'bil tuj the Jesús tuya cyyolxin. Tzikexin cyjulu:

¹⁹ —Xnak'tzal, o cyaj ttz'i'ben Moisés ka jun xinak najlel ma cyim, bix min-al tcwal tuya t-xu'l, il ti'j tu'n tmaje xuuj tuya jun tiz't'en ma jun ttzicy cyimne tu'n tiz't'j tal xuuj. Yaltzen tneel tal xuuj n-octltzen te tcwal ktzan tchmil xuuj te c'ojlal tx'otx' bix tu'n mi'n txi' tz'ak tiy'jil cyimne. ²⁰ Jaxse ba'nte, attzen jun maj at wuuk xjal cyitz'en cyiib. Ja tzunj xin tneel e majexin, pero bix e cyimxin, bix min e cyaj jun tcwalxin. ²¹ Entonces bix e maje viuda tuya tneel tiz't'en ktzan tchmil xuuj. Pero jax bix e cyimtlxin minxn-al tal xuuj itz'j. Ju'xtl e baj tuya tcab cyitz'enxin. ²² E majejexin cywuukelxin tuya xuuj, bix min-ax jun cyexin itz'j tcwal tuya xuuj. Manc'biltzen bix e cyim xuuj. ²³ Ba'ntzete. Pero ojtzen cyjatz itz'j xjal juntl maj, ¿altzenle jun cyexin c'o'quel te tchmilxuj ti'j cywuukelxin e maje tuyaxuj?—tzi tzunkexin te Jesús te k'ilbel tipemalxin.

²⁴ Pero bix aj ttzak'be'n Jesús:

—Junxse maj tzpetpajninkey, cuma min cytzki'na ti toc tu'n tyol Dios, bix min cytzki'na ka tu'n tipemal Dios ba'n tjatza itz'jtl t-xumlal jun xjal cyimne. ²⁵ Oj cyjatz itz'j cyimne juntl maj, jun wixxitl te chunk'lal. Xuujle, xinakle, mlay chi majecye juntl maj, tise ke tsanjel Dios tuj cya'j min chi oc maje. ²⁶ Cxe'ltzen nkba'n cyey ka il ti'j chi jawetz itz'j cyimne juntl maj. ¿Bajxpatzen txa' ccyce'yena tyol Dios e cyaj ttz'i'ben Moisés ti toc tu'n Dios tej tetz yolnxin tuya Moisés tuj tken k'ak' tuj ch'i'x? Tzi Dios cyjulu: “Inayen wej Tdios Abraham, bix te Isaac, bix te Jacob,” tzi Dios te Moisés tuj tken k'ak'. Ju'tzen e xa' tkba'n Dios cuma it'zx Abraham, Isaac bix Jacob tuj juntl chunk'lal. ²⁷ Ccyce'nc tzuna Dios, yaa'n Tdios cyimne texin, sino Tdios i'tz texin. Ju' tzunj tzpetpajninx ke cyey—tzi Jesús cye xjal saduceo.

*Jun tcawbil Dios jawnex**(Mt 22:34-40)*

²⁸ Toctzen tcey'yen junxin tx'olbal ley otk tz'aj ttzak'be'n Jesús tisexix tten, bix e xi' lk'exin ti' Jesús te kanlecte cyjulu:

—¿Altzen cyej tneel tcawbil Dios cyxol cykilca mas il ti'j?—tzi tzunxin te Jesús.

²⁹ Bix e xi' tkba'n Jesús:

—Jatzen tneel tcawbil Dios cyxol cykilca ncnet tuj tyol Dios ja lu: “Tzi Moisés: ‘Key xjal te Israel, cybim'q'uey: Jxin Kaaw Dios o'cxc'a jun xinj Taaw twitz tx'otx'.” ³⁰ Ju' tzunj c'o'quelxix tak' Cyaawa cyej tu'n cykil cyanema, tu'nix cykil cyc'u'ja, tu'nix cykil cynaabla, bix tuyaxix cykil cyipemala, tzi Moisés cye xjal aj Israel,” tzi tyol Dios. ³¹ Tcabtzen tcawbil Dios ja lu: “C'o'quelxix tak' jun xjal cyej tisex n-oc cyak' cyiiba cyej,” tzi Moisés cye xjal aj Israel nejl. Mintii' juntl tcawbil Dios ju'xix tisej ca'ba lu—tzi Jesús te tx'olbal ley.

³² Bix aj ttzak'be'n jxin tx'olbal ley:

—Ju'xe, Taat Xnak'tzal. Jax toc tu'na junxte Dios at. Min-al juntl at ti'jxexin. ³³ Jaxte. Aljxe xjal ma tz'oc tak' Dios te tuya cykil tanem bix tu'n cykil tc'u'j bix tuya tipemal, bix ma tz'oc tak' jun xjal te tixex n-oc tc'ojlante tiib, masx ba'n'te twitz Dios twitz'j oj nxi' cyoyen xjal cyoybil te Dios—tzi jxin tx'olbal ley te Jesús.

³⁴ Toctzen thi'n Jesús ttxolan tyol tx'olbal ley, bix e xi' tkba'n Jesús texin:

—Yaltzen tey, n-eltzen thi'ya ti' tcawbil Dios. Yaa'ntzen nakch ta'y tu'n toctzen tjak' tcawbil Dios—tzi Jesús texin.

Cybajtzen yoloxin tuya tx'olbal ley, min-altl xjal oc nimsante tc'u'j te kanlec tik'ch jilel te Jesús.

¿Ale cwalbaj Cristo tuj cywitza?

(Mt 22:41-46; Lc 20:41-44)

³⁵ Bix ak'xxin xnak'tzal xjal juntl maj, bix e xi' tkenenxin cye xjal:

—¿Tikentzen nbyana cyu'n tx'olbal ley ka jxin Scy'o'n tu'n Dios t-xe'chel David jaxin? Ju'xte ttena. Pero jaxtlpe David e kbante ka Taaw David jaxin. ³⁶ Cycey'ncntzen tyol David tu'n tipemal Espíritu Santo. Tzi David cyjulu: “Bix e xi' tkba'n Dios te Waawa: ‘Kequey tuj nmank'ab te tneel xjal. Ayomtzen ojxe cyocx baj tajk'oja tjak' tkena wu'n,’ tzi Dios te Tcwal,” tzi David tej tcyaj ttz'i'ben—tzi Jesús cye xjal. ³⁷ Nyolox Jesús t-xi' tkba'n:

—Jax David oc k'onte Scy'o'n tu'n Dios te Taaw at-xe k'ij. Katzen ju'wa, yaa'nale nuk t-xe'chel David jaxin, sino Taawnele David jaxin jatxe nejl—tzi Jesús cye xjal. Ti'jxxin nyolenaxin.

Nimxse xjal oc achente tyol Jesús.

Tej tyole Jesús ti'j cymodo tx'olbal ley yaa'n ba'n

(Mt 23:1-36; Lc 11:37-54; 20:45-47)

³⁸ Bix e xnak'tzanxxin mas cye xjal:

—Cyc'ojlam cyiiba mi'n chi oc lpey cyi' tx'olbal ley, cuma cyachenxin chi iy' bet-xin tuya cu'j cyxbalenxin te yec'bilte ka nmak xjalkexin, cuma cyajxin chi oc k'olbet-xin tuya nim c'u'jbaj cyi'jxin oj nchi iy'xin tuj plasen. ³⁹ Bix ja xsunkej nintzaj k'ukbil nxi' cyjyo'nxin tuj camon jaa' te xnak'tzabl tyol Dios bix tuj jun o'na. ⁴⁰ Nchi na'nxin Dios tuya nim yol nuk tu'n t-xi' cyyeec'axin cyiibxin cye xjal ka ba'nkexin. Peroxix cyexin cynaabl tzin cyyeec'axin oj nbaj cyalk'a'nxin ke cyja viuda. Ejee'tzen cye xinja c'oquel mas cyiw cycastiwa tu'n Dios twitz juntl wik aj il—tzi Jesús cye xjal.

Jun cotz cu'x tk'o'n jun viuda

(Lc 21:1-4)

⁴¹ Yajxetzen ch'intl, k'uklc'atzen Jesús nka ttzii' tja Dios, jaa' ete'c'a jcaxin tcubtel pwak n-ocx te tcozt tja Dios. Bixse oc tc'u'j Jesús ti'j tii'n chi k'on xjal pwak. Nimxse k'ina cu'x k'onte nim pwak. ⁴² Cwa tpon junxuj viuda mebexuj, bix e cu'x tk'o'nxuj ca'ba centavo tuj caxin.

⁴³ Bix e tzaj ttxco'n Jesús ke t-xnak'atz, bix e xi' tkba'nxin cyexin:

—Cxe'lxix nkba'n cyey jxuj mebewa ma cu'x tk'o'nxuj mas nim twitz'j cabtl xjal ncu'x k'onte nim, ⁴⁴ cuma kej xjal k'inawa ncu'x cyk'o'n ya min tz'ajbenxixtl cye, pero jte xuja ma cu'x tk'o'nxuj kej manc'bil ca'ba centavo k'i'n tu'nxuj tu'n titz'jxuj tuj tmebeylxuj—tzi Jesús.

13

E tkba Jesús tu'n tcub xitj tja Dios

(Mt 24:1-2; Lc 21:5-6)

¹ Teltzen Jesús ti' tja Dios cyuya t-xnak'atz, bix e xi' tkba'n jun cyexin te Jesús:

—Xnak'tzal, cyena, ja xsun xak binchbil tej tja Diosa, bix axse cycye'yencj nmak jaa' tej tja Diosa!—tzi tzunkexin.

² Pero bix aj ttzak'be'n Jesús:

—Cye'ncxixseke ti'j lux ke jaa' ete'wa, cuma tzul jun k'ij oj cyiy' kuch'j jaa'wa. Mi nuket jun xak cyjel tibaj juntl—tzi Jesús.

Kej yec'bil cyuj manc'bil k'ij

(Mt 24:3-28; Lc 21:7-24; 17:22-24)

³ Bix etzkexin tuj Jerusalén, bix e xi'kexin twi'j witz te Olivos tumel tja Dios. Bix e cub ke Jesús tuj c'ul. Bix e xi' lk'e ke Pedro, Santiago, Juan, bix Andrés ti' Jesús te kanlecte:

—Taat, ¿jtojtzen pjel jma tzaj tkba'na keya? ¿Bix titzen jilel techel tzul oj ch'itk' thaj ju'wa?—tzi tzunkexin te Jesús.

⁵ Bix aj ttzak'be'n Jesús:

—Cyk'o'nc cye'u'ja ti'j nuk al cub yajlante cyey. ⁶ Cuma tzul nim xjal kbalte: “Inayen wej Scy'o'n tu'n Dios,” tzi cybel, bix cwel cyyajla'n nim xjal. ⁷ Ojtzen toc cycye'yena nbaj k'oj

tzalu bix nxi' cybi'na nbajtl k'oj jak'ch tumel, mi'n chi jaw sey'paja, cuma ju' il ti'j pjel te mintkna'x thaj twitz tx'otx'.⁸ Tzul jun k'ij c'oquell k'oj tu'n jun nin tnomy tuya juntl nin tnomy tuj cykil twitz tx'otx'. Bix nuk jak'ch q'uiyela xcyaklajnab. Bix pjel nim weyaj twitz tx'otx'. Maantkixixe ja te t-xee' tchyonelja, tisen jun xuuj at tuj tchyonel tal. Ju'tzen pjelte twitz tx'otx' oj mitkna'x thaj.⁹ Yaltzen cyey, cyc'ojlamxix cyiiba tuya tik'ch cyyola, cuma chi xe'l k'o'na cye cawel tu'n cyoc pjeta cyey camon jaa' te xnak'tzabl tyol Dios nuk wi'jc'a. Bix chi xe'l chk'eta cywitz gobernador bix cywitz nin cawel nuk wi'jc'a, bixse t-xi' cyk'umena ti nten.

¹⁰ Tetzen mintkna'x thaj twitz tx'otx', q'uelex t'ziti'j t'pocbal jyol co'pbil xjal tuj cykil tnomy twitz tx'otx'.¹¹ Ejee' tzuna chi elez t'ziti'punte tej yola. Ju' tzunj mi'n tzaj t'ziti' cyi'ja oj tzyu'nkey cyu'n cawel nuk wi'jc'a, bix mi'n baj cyninc'u'na ti'j ti cyyola, cuma yaa'n ti'j cywi'y t'zaala cyyola, sino ja te Espiritu Santo c'oquex kbante tuj cywi'y ti cyyola cye cawel.

¹² Cye tzunj k'ij chi ul, ke cytzicyxse xjal ke cyitz'ensex xjal cxe'l k'onte juntl tuj cyk'ab cawel tu'n cybyet, bix ke cwal chi oquell k'ojl cyi' cyman, bix cxe'l cyk'o'n cwal ke cyman tu'n cybyet.¹³ Bix nim xjal c'oquell chi'l cyi'ja cuma telniy'x ka wuya cyk'ona cyiiba. Pero alj xjal min xcyaj cye'yente we ojxe thyet, chi tzakpajeltzen twitz k'ak' tu'n Dios.¹⁴ Cxe'ltzen nkba'n cyeey juntl yoll c'a ti'j. Cyc'ojlam cyiiba. Ojzen toc cyce'yena jun xjal xitel, bi'x cyjel we' jun ti jilel tu'n t'junalx bix chi i'yel tz'e'ya tu'n, tocxsen jaa'y yaa'n ba'n tocxe ten, jatzen ba'n cyxi' okj jxjal te Judea tuj c'ul cyxol witz tu'n t'let cychunk'lal. Il ti'j pjel te ja lu. Ju' tzunj tz'ocxix cyc'u'ja ti'j oj thaj.¹⁵ Alcyej najlan tja oj tul jxjal xitel, mi'n chi ocxtle k'ilbetz titl cyey tuj cyjaj, sino txucl chi xe'l oka tuj c'ul.¹⁶ Bix alj nak'anan tuj taak'en, mi'n tz'ajtz meltz'aj tuj taak'en, mitetpe te k'ilbex ke ti'j.¹⁷ Mlayxix kej xuuj preñada, bix ma nch'u'n cyal, oj cyel ok oj tul ja ila.¹⁸ Bix cykanex te Dios nuket mi'n baj ju'wa tuj j'bblel, cuma cyiwxse thetsaj.¹⁹ Bix cuma jaxse cab k'ij tchyonelj, bix bajxsen pja' jun maj ju'wa jatxe t'cublen itz'j twitz tx'otx' tu'n Dios, bix mi'n baj juntl maj ju'wa oj thaj ja lu.²⁰ Nuket mi'n cub thajsa'n Dios ja q'ui'x'aja twitz tx'otx', milen-al juntl xjal jac'a cyaj itz'j. Pero tzulxin te bajsalc'a twi' tu'n tanemxin cyi'j t'xin t-xjal.

²¹ Katzen al jun xjal ma tz'oc kbante cyey: Cycye'yentzen, lu tzunj xin Scy'o'n tu'n Dios lu, ka t'zi cyseja, mi'n tz'oc cybi'na,²² cuma tzultzen nim xjal x'tak' k'balte ka ejee' Scy'o'n tu'n Dios te cawel, bix tzul xjal x'tak'el ka ejee' tyolel Dios. Ejee' tzunj xjal lu chi ewel binchante techel bix nuk tik'ch chinel cyu'n tuya cyipemal te yajlal cye xjal, bix chi oquell ten niy'belte tuya cyipemal la' ka mi'n chi cub tz'ak cyuyaxe jte Dios t-xjal.²³ Cykil tzunja lu nxi' nkba'n cyey nejl. Cyc'ojlantzen cyiiba twitz tu'n mi'n chi cub tz'aka.

*Ti tten oj tul t'cwal Dios juntl maj
(Mt 24:29-35, 42-44; Lc 21:25-36)*

²⁴ Yaltzen tej k'ij oj tak' iy'pa n-el baj q'ui'x'aj, c'oquell klolj twitz k'ij, ya mi'n txakentl xjaw,²⁵ chi c'u'l tz'ak che'w, bix nuk clu'leltl tipemal twitz cya'j tu'n t-xi' xitj.²⁶ Cyuj xsunj k'ij oj nchic'ajaxa inayena, jxjal Sma'n tu'n Dios tu'n ntena cyuya xjal, tzajnin kena twitz tx'otx' tuj muj, tuya nim wipemala bix tzinxsen chin txakakana.²⁷ Ojzen wul, chi ultzen nsma'n nsanjel tuj cya'j tuj cykil twitz tx'otx', tuyaxe cykil jaa' pomnina baj ttxa'n twitz tx'otx', tu'n cyoc chmet jxjal ebil nyola.

²⁸ Cynomtzen. Nk'a'c'atzen jun techel ti tten oj wul, tuya ti tten oj nxulan jun wi' higuera. Oj n-alajin tk'ab higuera bixsen n-ak' eletz muxk'aj t-xul, ya telniy'tzen tuj cywitzka ka ch'itk toc coesma.²⁹ Tisen tzunj t-xul higuera n-etz te ch'itk coesma, q'uelelc'atzen cyni'ya ti'j oj thaj tik'ch ma txi' nkba'n cyeey twitz tx'otx', jatzen techel ka ch'itk tetz jxjal Sma'n tu'n Dios tuj cya'j.³⁰ Tzinexix cxe'l nkba'n cyeey jcyi'y'jil xjal te Israel mi'n baj teja, sino q'uitz'jelxte ojxe thaj tisej ma txi' nkba'n cyeey.³¹ Il ti'j ju' pjela. Te cya'j bix te twitz tx'otx' chi pjelxeye, pero ke weya nyol mlay chi bajcye.

³² Yaltzen tej tu'n alcye k'ij bix jniy' hora oj wul, min-al ebilte. Mitetpe ejee' tsanjel Dios tuj cya'j itz'kilte, bix mitetpe inayena, T'cwal Dios, itz'kilte. Nukxix ja te Mambaj itz'kilte jtoj pjel.³³ Cuma min cytzki'na jtoj chin ulwe, ju' tzunj cyc'ojlam cyiiba tu'ntzen binne cytena oj cyul canbaja.³⁴ Ju' teja tisen jun xjal matk tziy' bint tu'n t-xi' tuj juntl tnomy. Tetzen mintkna'x tex bint taaw jaa', ncyajtzen tk'o'n cyaak'en ak'anal teylex te juun, bix te c'ojlal jaa' tu'n t-xi' t'c'ojla'n.³⁵ Inayentzen wej tisen taaw jaa'. Mintii' tumel jtoj c'ulel meltz'aj taaw jaa', matzen te ncub klolj, matzen te chil ak'bila, matzen te nok' ey' te ch'itk kskix, bix matzen te k'ijl. Ju' tzunj cyna'mc'a cyiiba,³⁶ cuma yaa'n tumel nchi wutana tuj cyaak'ena oj wul meltz'aj.³⁷ Alcyej nxi' nkba'n cyeey, yaa'n nuk cyequey nxa' nkba'n, sino te cykilj xjal lepchec wi'j. ¡Cyna'mc'a cyiiba!—t'zi Jesus cye t-xnak'atz.

14

Tej cyjyon xjal tumel ti tten tu'n ttzyet Jesús

(Mt 26:1-5; Lc 22:1-2; Jn 11:45-53)

¹ Tetzen ca'batl k'ij tu'n tiy' cyiy'sa'n xjal te Israel jnink'ij oc tbi te Iy' Dios Bix E Tcolxin Ke Xjal Te Israel, bix ka nink'ij te Pascua, oj nchi ak' xjal waa'l pan mintii' tk'anel tocx.

Te tzunj ca'batl k'ij te mintkna'x tul canan nink'ij, bix oc cychmon cyiib ke nintzaj cyawil na'l Dios bix ke tx'olbal ley, te ninc'ul ti'j ti tten tu'n ttzyet Jesús, bix tu'n tbyet-xin. Pero cyaj tzunxin e tzyet Jesús tuj ewjel, cuma cytzki'nxin ka a cyanem xjal ti'j Jesús. ² Pero at cab cyexin e kbante:

—Mi'n jaw ktzyu'n Jesús tuj nink'ij, cuma ka ma jaw ktzyu'nxin tujc'a nink'ij, chi jawel meltz'aj xjal ki'j—tzi tzunkexin.

Tej tjax ko'n c'oc'sbil tuj twi' Jesús

(Mt 26:6-13; Jn 12:1-8)

³ Yaltzen te Jesús, otktzen txi'xin tuj tnóm te Betania tja jxin Simón e yaabt tu'n lepra, jaj jun wik yabel tisen tx'a'c nuk ntzaj k'ey cychu'l xjal tu'n. Nchi waa'ntzen Jesús ttxa'n mes tej tpon junxuj xuuj tuya jun ni' cyeca lmet nojne tuya c'oc'sbil cyi' xjal bix wi'yelxsen. Bix e jaw tjko'nxuj tzi' lmet, bix e jax tko'nxuj c'oc'sbil cyi' xjal tuj twi' Jesús, teje tel baj t-xee' lmet.

⁴ Toctzen cycye'yen cab xjal ti otk tse xuuj, bix e jaw yolen ch'inkexin:

—¿Tikentzen ma pja' tyajla'n jxuuj lu jtij c'oc'sbila? ⁵ Nuket xi' tq'ueyenxuj, matle tz'oc twi' tisen twi' tc'u'j xjal te jun jnabki', bixetle s-ajben twi' te onl cye mebe—tzi tzunkexin. Bix ak'kexin ilec te xuuj.

⁶ Pero bix e xi' tkba'n Jesús cyexin:

—Yaa'n ilj xuja. ¿Tikentzen ete'q'uey ya'l texuj? Jtexuj ma tz'oc tbinche wi'ja, ba'n teja.

⁷ Cuma ke cyej mebewa chi temelx cyeya cyey cyxol. Ba'ntzen toc cyk'o'na ti jilel cye oj cyaja txi' cyk'o'na cye. Pero we, mlay chin tenwe cyxola. ⁸ Tej xuj xuuj lu ma tyeec'axuj cykil tanemxuj wi'j. Bix juntl. Tisentzen cyten xjal oj n-oc seet c'oc'sbil cyi'j oj nbint cyten tu'n cyxi' tuj mukbil, ju'xse ma tse jxuj xuuja ma tz'oc tko'nxuj c'oc'sbil wi'j teja mina'x ncyima, tetzen jun techel ncyamecy, bix tu'n tbaj bint nxumlal tuya c'oc'sbil tu'n nmaketa. ⁹ Tzinexix cxe'l nkba'n cyey, jaa'xja cpomela baj tumel jba'n tpochal tyol Dios ti'j co'pbil xjal, il ti'j chyal tpochal ti ma tbinche jxuj xuuja wi'j. Ju'tzen cna'jalewe—tzi Jesús cyexin.

Tej t-xi' toye Judas tiib tu'n t-xi' tk'o'n ja Jesús

(Mt 26:14-16; Lc 22:3-6)

¹⁰ Cybajlen yolenxilt tzunxin tja Simón, bix el Judas Iscariote, jun t-xnak'atz Jesús t-xol cablajaxin. Bix e xi' Judas te yolel cyuya nintzaj cyawil na'l Dios tu'n toc tonen Judas ejee'xin tu'n ttzyet Jesús. ¹¹ Toctzen cybi'n tawil na'l Dios, e jawxsen tzalajkexin, bixse e bint cyyolxin tu'n toc cyk'o'nxin tpwak Judas. Bix ak' Judas jyolte ti tten tu'n t-xi' tk'o'n Judas ja Jesús tuj cyk'ab tawil na'l Dios.

Tej twaa'n Jesús cyuya t-xnak'atzxin tuj xjan k'ij

(Mt 26:17-29; Lc 22:7-23; Jn 13:21-30; 1 Co 11:23-26)

¹² Tetzen tneel k'ij nink'ij Pascua, oj nchi waa'n xjal pan mintii' k'anel tocx, bix oj nchi byon xjal juun carnal te juun te na'l ja nink'ij lu, bixse e xi' tkanen t-xnak'atz Jesús te:

—¿Jaa' tumel taja txa' kbincha'q'ueya jil carnal te tbel kwa bixse tik'ch jilel ke?—tzi tzunkexin te Jesús.

¹³ Toctzen tbi'n Jesús cyyolxin, bix e xi' tchk'o'nxin ca'ba cye t-xnak'atzxin, bix e xi' tkba'nxin:

—Cyuxa tuj tnóm te Jerusalén. Ojtzén cypona tuj tnóm, bix c'oquel noj jun xinak cywitza tuya jun xaran a'. Bix chi oquel lpey ti'j. ¹⁴ Ojtzén tocx jxinaka tuj jun jaa', cykanenxsen te taaw jaa' cyjulu: “Taat, ma tzaj tkanen Xnak'tzal: ‘¿Altzen cyej cwart ctzaal tk'o'na keya tu'n tbint kwaya cyuya n-xnak'atza te ja nink'ija?’ tzi Jesús,” tzi cybela te taaw jaa'. ¹⁵ Tzultzen tyeec'an taaw jaa' jun ma' nim cwart cyey bix binnentle tten te tcab cxo'len jaa'. Cybinchamtzen kwa jatzeve—tzi Jesús cye t-xnak'atz.

¹⁶ Bix e xi'kexin tuj tnóm. Bix ju'x e baj tisenx e tkba Jesús cyexin, bix ak'kexin binchal cywaxin te kale.

¹⁷ Tetzen n-ak' cwel kloj, bix e pon Jesús cyuya cycablaaj t-xnak'atz te waa'l jaa'j otk bina cywaxin. ¹⁸ Maantktzen nchi waa'nxin twi' mes, tej t-xi' tkba'n Jesús:

—Tzinexix cxe'l nkba'n cyey, attzen jun cyey toctz kxol, n-waa'n wuya, cxe'l k'onte we tuj biybil—tzi Jesús cye t-xnak'atz.

¹⁹ Toctzen cybi'nxin tyol Jesús, tcubxsen licy'paj ttzi cyi'jxin, bi'xse e naj cynaablxin tu'n ttzi. Bix juun n-ela cyexin ak' kanlecte te Jesús:

—¿Inayenpatzen weya, Taat?—tzi tzunkexin.

²⁰ Bix aj ttzak'be'n Jesús cyexin:

—Ja jun cyej cablajaj cyey nwaan wuyena, jaj jun cyey ncu'x mu'nte tpan junx wuya tuj lak. ²¹ Il ti'j ncuaya tisenj nbyan tuj tyol Dios tu'n nbyeta, pero ay tixse tna'xj cxe'l k'onte we. jMasetlpele ba'n minxet itz'j xjala!—tzi Jesús.

²² Maantktzen nchi waa'nxin, tej tjaw ttzyu'n Jesús jun pan, bix e xi' tkanenxin xtalbil te Dios ti' pan. Bix ak'xin pixlcate, bix e xi' tk'o'nxin cye t-xnak'atzxin, bix e xi' tkba'nxin:

—Cywaa'nx xsunj pi'xen pana, cuma ja tzunj pana techlal nxumlala cwel yuchj—tzi Jesús.

²³ Cybajtzen waa'nxin pan, bix e tzaj ttzyu'nxin jun nim malbil nojne tuya vino, bix e xi' tkanenxin xtalbil ti' vino te Dios. Bix e xi' tk'o'nxin malbil te jaca juun t-xnak'atzxin tu'n tel cyc'a'n ti' vino. Bix cykilcakexin el c'ante.

²⁴ Bix e xi' tkba'n Jesús cyexin:

—Jatzen weya techel ntz'q'uelja, q'uelel kojil ti' nim xjal oj ncyima. Tu'ntzen ntz'q'uela cwela we' jun ac'aj tyol Dios cyuya xjal. Tu'ntzen weya cyamecy cwel we' te ja ac'aj tumel tu'n ti tten oj cylonte xjal cywitz tuya Dios.

²⁵ Tzinxese cxe'l nkba'n cyey mi nuket juntl maj t-xi' nc'a'nj vinowa ti'j lux ken ini'tzen texej k'ij oj woca te cawel tibaj twitz tx'otx' tuya Nmana Dios ncyimlenxitle, maxetzen cxe'l nc'a'ntl vino—tzi Jesús cye t-xnak'atz.

Tej t-xi' tkba'n Jesús te Pedro jay cwel e'wente we oxo maj

(Mt 26:30-35; Lc 22:31-34; Jn 13:36-38)

²⁶ Cybajlen waa'nxitl tzunxin, bix ak'kexin bitzel. Cybajtzen bitzenxin, bix e xi'kexin tc'u'j witz te Olivos te koniyan. ²⁷ Bix e xi' tkba'n Jesús cye t-xnak'atz:

—Cykilcakey chi cyjel cye'yente we. Ju'tzen toc cyu'n tyol Dios. Tzitzen cyjulu: “Cwel nbyo'n cylel, bixse chi elel tzi'tj tcarnel,” tzi Dios tuj u'j. Ju'xse we oj ncyim. Chi elel tzi'tja wi'j. ²⁸ Pero ojtzen njatz itz'j, chin xe'l nejl cywitz tuj Galilea—tzi Jesús cye t-xnak'atz.

²⁹ Bix aj tkba'n Pedro:

—Taata, amale cykilcat ke kuya cyjel cye'yente tey, pero we mlay cyaj ncyeyen wey—tzi Pedro te Jesús.

³⁰ Bix aj ttzak'ben Jesús:

—Tzinxex cxe'l nkba'n tey, tex ja koniyan lu, te mintkna'x took' ey' te tcab maj, q'uelel tii'n tiiba wi'j oxo maj—tzi Jesús.

³¹ Pero cyiwx oca tk'on tiib Pedro:

—Amale mat chin cyim junx tuyey, mi'n tz'el wii'n wiib tuyey—tzi Pedro. Juylexsen toc cyu'nj cabtlxin t-xnak'atz Jesús.

Tej tna'n Jesús Dios tuj Getsemani

(Mt 26:36-46; Lc 22:39-46)

³² Yajc'atzen ch'intl bix tex koniyan, bix e cu'xkexin tuj jun lugar jaa' ta' nim tken abech bix t-xol tzee' tken olivo, Getsemani tbi lugar, t-xee'j witz te Olivos. Bix e xi' tkba'n Jesús cye t-xnak'atz:

—Chi kequetzen cyey tzalu; matzen chixwe yolel tuya Dios—tzi Jesús cyexin.

³³ Bix e xi' tii'nxin Pedro, Santiago, bixse Juan tuyaxin. Bix ak' cwel talelxin. ³⁴ Bix e xi' tkba'nxin te cyoxel t-xnak'atzxin:

—May'xsen tz'oc jun bis ti' wanem. Mlayxsen npawe. Chi tenc'atzen cyey tzalu. Cymaltzen ch'in cywatla—tzi Jesús cye Pedro.

³⁵ Bix el lk'e Jesús ch'intl cyi'jxin, bix e cub mutzk'ajxin twitz Dios, bi'x e pon tibaj twitzxin twitz tx'otx'. Bix e xi' tcubsa'nxin twitzxin te Dios ka ilxix ti'j tu'n tiy'x q'uixc'aja tu'nxin, bix ka min, tu'n tel tii'n Dios. ³⁶ Bixsen e xi' tkanenxin cyjulu te Dios:

—Ntaat, cykil ba'n tu'na. Chin tco'pa tzuna tuj ja tc'ayela. Pero yaa'n tej weya waj bint cbinel, sino ja tej alcyey tey taj bint, jatzen wej waj—tzi Jesús te Dios.

³⁷ Tbjatzen yolénxin tuya Dios, bix e pon meltz'ajxin cyi' Pedro. Nchi wutanxin tej tpon Jesús cyi'jxin. Bix e xi' tkba'nxin te Pedro:

—Simón, ¿nwanpa tzuna? Mitetpe jun hora ma tpay watl—tzi Jesús te Pedro. ³⁸ Bix e xi' tkba'n Jesús te cyoxel t-xnak'atz:

—Cyiimalxix ch'in cywatla, bix chi na'n Dios, tu'n mi'n chi cub tz'aka tuj oj cyel oka. Cyey cyc'u'j cyiwte te binchal jun ti jilel ba'n, pero yaa'n cyiw cychu'la te binchal tej ti taj cyc'u'ja —tzi Jesús cyexin.

³⁹ Bix el Jesús cyi' t-xnak'atz juntl maj te yolel tuya Dios. Ejee' xsunj tyolxin te tneel maj, ejee' xsunj e xi' tkba'nxin te Dios te tcab maj. ⁴⁰ Tejzen tpon meltz'ajxin, nchi wutan t-xnak'atzxin juntl maj cyoxelxin, cuma ntzajxe mtz'e cywitzxin tu'n nim watl. Ya mintii'tl aj cytzak'be'nxin te Jesús. ⁴¹ Tbjalen yolénxitlzen Jesús te toxen maj tuya Dios, tpon meltz'ajxin cyuya t-xnak'atzxin, bix e xi' tkba'nxin:

—Jey! ¿nchi wutanxpa tzuna? Ya o'cx xsunj. Matzen pon tumel tu'n t-xi' k'o'n jxjal Sma'n tu'n Dios tuj cyk'ab aj il. ⁴² Chi we'wa. Lu jxin ma txi' k'onte we tzula. Ko'ka clul texin—tzi Jesús.

Tej ttzyet Jesús

(Mt 26:47-56; Lc 22:47-53; Jn 18:2-11)

⁴³ Maantkxsen nyolen Jesús, tej tpon Judas, jun t-xnak'atz Jesús t-xolj tcablajajxin, tuya nim xjal binner tten tuya espada bix tuya tzee'. Chk'o'n tzunkexin cyu'n nintzaj cyawil na'l Dios, cyu'n tx'olbal ley, bix cyu'n nintzaj xjal. ⁴⁴ Otktzen txi' tkba'n Judas jun techel cye tzuyel ti tten oj ttzyet Jesús. Ju'tzen toc tu'n Judas cyjulu: “Al tzunj ma tz'el ntz'u'ben twitz, ja tzunj. Cytzyumtzen, bix cyii'nxsen,” tzi Judas tej t-xi' tkba'n cye tzuyel tej mintkna'x cypon canaxin ta' Jesús.

⁴⁵ Ju' tzunj bix e xi' lk'e Judas ti' Jesús, bix e xi' tkba'n Judas te Jesús:

—Xnak'tzal—tzi Judas, bix el ttz'u'benxin twitz Jesús.

⁴⁶ Entonces bix e xi' cyk'abxin te tzyultzte Jesús. ⁴⁷ Pero attzen junxin t-xnak'atz Jesús tceb, bix e jatz ti'nxin tpadaxin, bix el ttz'omanxin jun t'quin junxin tk'opaj tneel cyawil na'l Dios.

⁴⁸ Bix e xi' tkanen Jesús cye xjal tzuyel:

—¿Tikentzen ma chi tzaa'y tuya espada bix tuya tzee' te tzyul weya, jac'a xsunj xobel kena?

⁴⁹ Cykilca kej k'ij lu ma chin tena cyxola te xnak'tzal cyey tuj nin tja Dios, pero mintlpe in cytzyuya. Pero yaltzen ja'lewe tetzen koniyan ma chi tzaja tzuyel we. Pero cykil tzunj nbaja tetzen tu'n tjapan baj twi'j tyol Dios o cyaj tz'i'bet—tzi Jesús.

⁵⁰ Cykilca ke t-xnak'atz Jesús e cyaj cye'yen texin, bix e baj pjel okkexin.

Junk'a xjal el ok

⁵¹ Pero attzen junk'a xjal nuk oc lpe ti' Jesús tej t-xi' cyii'n xjal jaxin tuj tnom. Yal tzunj k'a xjal nuk jun sámana toc ti'jk'a. Bix e cytzyuy xjal jak'a. ⁵² Pero ttzyet tzunk'a, bix e xi' tzokpan k'aj sámana toc ti'jk'a. Xbikl tzunk'a tej t-xi' tzokpajk'a.

Tej tpon k'i'n Jesús cywitz aj cawel

(Mt 26:57-68; Lc 22:54-55, 63-71; Jn 18:12-14, 19-24)

⁵³ Yaltzen te Jesús, bix e xi' cyii'n xjal jaxin twitz tneel cyawil ke na'l Dios, cyuya cykil ke tceb cyawil na'l Dios, cyuyatzen cykilca ke nintzaj xjal, bix cykilca ke tx'olbal ley. Ejee'tzen xinja jun cloj at te nin cawel cyxol xjal te Israel.

⁵⁴ Nakchtzen e xa' lpete Pedro ti' Jesús, tejxe tpon Jesús cyu'n tzuyel maan tuj tja tneel cyawil na'l Dios. Bix e cyaj ten Pedro twitz pe'n, bix e cub kexin ti' k'ak' te mek'l tiibxin cyuya ke c'ojlal te nin tja Dios.

⁵⁵ Pero tunwentzen nchi jyona jxin nin cawel cyxol xjal te Israel bix ke tceb cyawil na'l Dios cab tstiwa ti' til Jesús tu'n tbyet-xin, pero min e cnet cyu'nxin. ⁵⁶ Amale nimet xjal oc tk'on tiib te tstiwa, pero min el cyyol xjal junelna. ⁵⁷ At juun xjal e jaw we' bix e jaw cymeltz'u'nxin tyol Jesús cyjulu:

⁵⁸ —O tz'ocxe kbi'n keya tyol jxin lu: “Cwel nxitaj nin tja Dios e bint cyu'n xjala. Tetzen toxen k'ij oj tshint juntl tja Dios wu'n, yaa'n cyu'n xjal,” tztizen xina—tztizen ke tstiwa cye cawel. ⁵⁹ Pero ju'x kej xjal e kbante ja yol lu min e maje cyyol.

⁶⁰ Ju' tzunj e jawa we' tneel cyawil na'l Dios cyxol xjal, bix e xi' tkanenxin te Jesús:

—¿Mimpatii' c'aal ttzak'be'na cyi'j yola? ¿Ti toc tu'na ti'j cyyol xjal lu?—tzi tneel cawel te Jesús.

⁶¹ Pero min ak' Jesús. Mintii' aj ttzak'be'nxin. Bix e xi' tkanen tneel cawel te Jesús juntl maj:

—¿Japa teja Scy'o'n tu'n Dios, Tcwal Dios cy'iwla'n?—tzi tzunxin te Jesús.

⁶² Bix aj ttzak'be'n Jesús te tneel cyawil na'l Dios:

—Inayentzen weja. Bix cyla' tzuna inayena, Jsma'n tu'n Dios, k'uklec tuj tmank'ab Dios nim tipemal tuj cya'j bix cyla' tzuna oj ntzaj twitz tx'otx' tuj muj twitz cya'j—tzi Jesús te cawel.

⁶³ Entonces toc thi'n tneel cyawil na'l Dios tyol Jesús, bix el ttzakenxin ti'jxin tu'n tk'ojxin ti' tyol Jesús, cuma ka'j yol tisenj te Jesús tuj cywitz xjal. Bix e xi' tkba'n tneel cyawil na'l Dios:

—¿Titzen kaj te mas tstiwa? ⁶⁴ Ejee' xsuna ma chi oc ebinte lu tzunxin njuben yol ti' Diosa ka junxin tuya Dios. ¿Ti toc cyu'na?—tzi tzunxin.

Cykilca xjal e jaw yolen ka tu'nxxin bix e tbyettzen. ⁶⁵ Attzen naj cab xjal oc tzubente ti'jxin, bix oc makset twitzxin. Bix ak' ke xjal pjulec texin, bixse oc cykanen xjal texin:

—Katzen Diosa, tzak'c'ax tu'na al s-oc pjunte tey—tzi ke xjal texin.

Cyuyaxse ke c'ojlal tja Dios oc pjunte twitz Jesús.

*Tej tel tii'n tiib Pedro ti'j Jesús**(Mt 26:69-75; Lc 22:55-62; Jn 18:15-18, 25-29)*

⁶⁶ Yaltzen te Pedro, tcub xsunxin pe'n, bix e pon juntxin xuuj tk'opaj tneel cyawil na'l Dios. ⁶⁷ Tejtzen toc tcyey'entxin Pedro nmek'enxin tiibxin ti' k'ak', bix oc tenatxin cyey'lecte Pedro, bix e xi' tkba'ntxin:

—Tuyax tey niy' tuya Jesús, aj Nazaret—tzi tzuntxin te Pedro.

⁶⁸ Pero bix elx tii'n tiibxin:

—Min. Min ntzki'nwe twitzxin. Mitetpe n-el nniy' ti'j ali'j nyoleney—tzi Pedro. Bix el lk'exin pe'n. Bix e jaw ok' junjil coo'.

⁶⁹ Bix oc noj jtxin k'opaj ti' Pedro juntl maj, bix e xi' tkba'ntxin cye cabtl xjal:

—Jatzen juntl xinja lepchech ti' Jesús—tzi tzuntxin.

⁷⁰ Pero elx tii'n tiibxin juntl maj.

Yajc'atzen ch'intl bix oc cyumla'n jxjal ete'c'a pe'n ja Pedro:

—Jaanxix tey lepchech ti' Jesús. Aj Galilea tey, cuma ti' yolena—tzi tzunkexin te Pedro.

⁷¹ Bix ak' Pedro k'ilbel tibi:

—Tzkinn Dios yaa'n jaan kenwe. Min ntzki'nwe twitzj xjal nchi yolena ti'ja—tzi Pedro.

⁷² Tujxse tjaw ok' coo' te tcab maj, bix ul tuj tc'u'j Pedro ti' otk tkba Jesús texin: “Te mintkna'x took' ey' te tcab maj, q'uelel tii'n tiiba wi'j oxo maj,” tzi Jesús te Pedro te jya'x. Tjket-xsen jun took'xin tu'n bis.

15*Tej tpon k'i'n Jesús twitz Pilato**(Mt 27:1-2, 11-14; Lc 23:1-5; Jn 18:28-38)*

¹ Tetzen tak' cwel spi'yen, bix oc cychmon cyiib jclojxin nin cawel, binne tten cyu'n tneel cyawil na'l Dios, tcab cyawil na'l Dios, ke tx'olbal ley, bix ke nintzaj xjal tuj nin tja Dios. Bixse e cub cyu'n tu'n t-xi' cyii'nxin Jesús twitz cawel tuj Jerusalén chk'o'n tu'n cawel tibaj Roma te cawel cyibaj xjal judío. Pilato tbi cawel. Ju'tzen tten t-xi' ak'bj Jesús twitz Pilato, xpo'nxin. ² Tejtzen tpon Jesús, bix e xi' tkanen Pilato texin:

—¿Japa teja cawel cyibaj xjal judío?—tzi Pilato te Jesús.

Bix aj ttzak'be'n Jesús:

—Ju'tzen tisenj ma tkbay—tzi Jesús.

³ Bix nimxse oc cyumla'n ke cyawil na'l Dios ja Jesús twitz Pilato. ⁴ Ju' tzunj e xi' tkanen Pilato juntl maj:

—¿Mimpatii' c'aal ttzak'be'na cye xjal? Cye'yenca tik'chj cyool xjal ti'ja—tzi Pilato te Jesús.

⁵ Pero mintii' aj ttzak'be'n Jesús, bi'xse e jaw klee' Pilato, cuma mintii' tyol Jesús aj.

*Tej tbint ti'j tu'n tbyet Jesús**(Mt 27:15-31; Lc 23:13-25; Jn 18:38-19:16)*

⁶ Yaltzen te cawel aj Roma tten tcawbil cyibaj xjal te Israel nejl, jac'a tzunj nink'ija tz'etz ttzakpi'nxin jun xjal aj Israel tuj tzee', la' alj cykanen xjal aj Israel tu'n tetz. ⁷ Te tzunja jnabk'i lu, tocxse junxin aj judío tuj tzee', Barrabás tbixin tuya cabtl tuyaxin aj k'oj. Jatzen Barrabás cyawilxin. Otktzen cybiyxin ke xjal aj Roma tuj jun k'oj tuya cawel te Roma. ⁸ Tisaxse cye xjal cyten, bix e baj pon nim xjal kanlte te Pilato tu'n tetz jun cye xjal aj Israel tuj tzee'. ⁹ Bix aj ttzak'be'n Pilato:

—¿Cyajpey tu'n tex ntzakpi'n jxin xjal lu Cycawel judío?—tzi Pilato. ¹⁰ Ju'tzen toc tu'nxin cye xjal, cuma at tumel tuyaxin ka nuk tu'n tchi'lel cyc'u'j ke nintzaj tawil na'l Dios otk pona cyii'nxin Jesús.

¹¹ Pero tejtzen toc cybi'n tawil na'l Dios tyol Pilato, bix ak'kexin ocsalec cyc'u'j xjal tu'n tetz Barrabás tuj tzee', yaa'n tu'n t-xi' tzakpette Jesús. Bix ja xsunja e xi' cykanenxin te Pilato. ¹² Bix aj tkanen Pilato cye xjal juntl maj:

—Jey', ¿tine cyaja tz'oc nbinchen ti'j jxjal n-oc cyk'o'na tbi “Cycawel aj judío”?—tzi Pilato cye xjal.

¹³ Bix aj cytzak'be'n xjal cyiwx:

—K'onwexin twitz cruz tu'n tcyimxin—tzi ke xjal.

¹⁴ Bix aj tkanen Pilato:

—Jey', ¿tine jilel ka' ma cub tbinchexin?—tzi Pilato.

Pero bix aj cytzak'be'n xjal juntl maj mas cyiw:

—¿K'onwexin twitz cruz!—tzi ke xjal.

¹⁵ Entonces yaltzen te Pilato, cuma taj tzunxin ocxin ba'n cyuya xjal, bix etz ttzakpi'nxin Barrabás, bix e xi' tch'k'o'nxin cabxin aj k'oj te k'olx tz'u'n tocxsen ch'ut twi' ti' Jesús, bix tu'n tjawxin twitz cruz.

¹⁶ Bix e xi' cyii'n aj k'oj ja Jesús twitz tpe'n jjaa' jaa' tocxe cawel, bix e xi' nim tz'u'n ti' Jesús.

Bix oc cychmo'nxin jun tkiy'xin aj k'oj. ¹⁷ Bix oc cyk'o'nxin jun t-xbalen Jesús tisen tilbil t-xmaquel San Juan te tzeblte Jesús, cuma cye xjal cawel tisentzen tilbil t-xmaquel San Juan cyxbalenxin toc. Bix e cub cybincha'n aj k'oj jun tcorona Jesús nuk ch'i'xc'a, bix e cub cyczutz'exin tuj twi' Jesús te cyxmucchbilxin. ¹⁸ Bix ak'ke aj k'oj š-il:

—¡Axse Cycawel xjal judío!—tži ke aj k'oj.

¹⁹ Coc'caxse e cu'x cytz'ajaxin tuj twi' Jesús tuya jun jitx'k'aj tzee', bix ocx cztzubaxin ti' Jesús, nchi cubxetzen majexin twitz Jesús nuk te cyxmucchablxin.

²⁰ Tbjalen cyxmuccha'nxitl tzunxin Jesús, bix el cyii'nxin jt-xbalen Jesús otk tz'oc cyk'o'nxin, bixse oc cyk'o'nxin jte Jesús t-xbalen tocx. Bix e xi' cyii'n aj k'oj jaxin tu'n tjawxin twitz cruz ttxa'nxe Jerusalén.

Tej tjaw k'o'n Jesús twitz cruz bix e cyim
(Mt 27:32-44; Lc 23:26-43; Jn 19:17-27)

²¹ Jaxse Jesús e xi' ikente cruz, pero mix e xcyebexin tjak' tuj be. Niy'c'atltzen junxin xjal, Simón tbixin, tman junxin Alejandro tbi bix juntlxin Rufo tbi, te jun wikxilt tnom Cirene tbi, bix ocx cyk'o'n aj k'oj jaxin tjak' cruz k'i'n tu'n Jesús. ²² Bix e xi' cyii'nxin Jesús tuj jun lugar Gólgota tbi, jatzen elpeninaj "Ttemlel Tbakel Wi'yabaj." ²³ Tejtzen cyponxin, bix e xi' cyk'o'n xjal tc'a'xin vino smo'n tuya jun wik remeda mirra tbi, tu'n taj lk'e ch'in tchyonel ti' Jesús. Pero min e tiik'xin.

²⁴ Bixse e jaw pjet-xin tuya clavos twitz cruz.

Bix ak'ke aj k'oj niq'uel la'l al jun cyexin tu'n tcaman ti' t-xbalen Jesús.

²⁵ Tetzen beljaj tajlal hora te klax, tjaw cypjo'nxin Jesús twitz cruz.

²⁶ Bix e jaw cyk'o'nxin cab letra tibaj twi' Jesús. Tži cyjulu: "Cycawel judío," tu'ntzen telnij' tiken otk jawa Jesús twitz cruz.

²⁷ Te xsunj k'ij tjaw ca'baxin alak' twitz jun cruz junx tuya Jesús, jun cyexin e jaw twitz jun cruz tuj tmank'abxin, bix juntlxin e jaw twitz cruz tuj tneš Jesús. ²⁸ Ju'tzen tten tel-len jax tyol Dios nbyan cyjulu: "Jaan tzunxin c'oquel ten cyajlal ka' xjal," tži tyol Dios.

²⁹ Yal tzunkej xjal exc'a ttxlaj cruz jaa' tjawa Jesús, n-ocxetzen cytze'n xjal jaxin, bix nxi'xe cyyucan xjal cywi', nchi jawxetzen yolen:

—¡A weena! Jatzen teja tcublel xitente nin tja Dios, bix tu'n tjaw tbincha'na te toxen k'ij.

³⁰ Katzen tbinlel tu'na ju'wa, co'pamtzen tiiba, bix tcu'tztzen twitz cruz—tži ke xjal te Jesús.

³¹ Ju'xse tten cyoc ten cyawil na'l Dios bix ke tx'olbal ley xmucchalec te Jesús. Tžikexin cyjulu:

—E tco'paxin nim xjal tuya tik'ch jilel, pero yaltzen texin, mlay bint tco'pa tiibxin. ³² E tcu'tzxin twitz cruz, jxin n-oc tk'on tiib te Šcy'o'n tu'n Dios bix n-oc tk'on tiib te Cawel cyibaj Israel, tu'ntzen toc kcy'e'yen ka jax tu'nxin, bix tu'ntzen toc kbi'nxin—tži ke nintzaj cyawil na'l Dios bix ke tx'olbal ley.

Hasta jaan kej xin alak' otk chi jaw pjet twitz cruz e xoo'n yol te Jesús.

Tej tcyim Jesús
(Mt 27:45-56; Lc 23:44-49; Jn 19:28-30)

³³ Tejtzen tpon chil k'ij, cykilcaxse tibaj ttx'otx' judío e cwa' jun nin kloj. Oxe hora e cub kloj.

³⁴ Tejtzen tcub spi'yen te oxe tajlal hora te kale, bix e jaw š-in Jesús cyiw tuj tyol:

—¡Ndios! ¡Ndios! ¿Tiken ma ch'in cyja' tcy'e'yena?—tži Jesús.

³⁵ Attzen cab xjal oc ebinte tyol Jesús, pero min el cyniy' xjal ti'j. Bix e jaw yolenkexin:

—Cybinx. Luxin ntxcon Elías, tyolel Dios—tži tzunkekin.

³⁶ Toctzen tbi'n junxin xjal, bix e xi'xin k'ilbetz jun brat vino, bix tx'om ch'in, bix e cu'x tmu'nxin jun ttx'aken tžomj tuj, bix oc tžpo'nxin twi' jun ptz'unt, bix e xi' ajkelxin oylxte te Jesús. Bix e xi' tkba'nxin:

—Ko kcy'e'yectzen la' ka tzul Elías k'ilc'atz texin—tži tzunj xin xjal.

³⁷ Pero cwa tel jun twi' Jesús jatzen tcyim xinj.

³⁸ Tujxse tel tanem Jesús, tej tcub rotj jma' xbalen tcub te maksbil tej cwart nintzaj xjan tuj nin tja Dios. E tzajxe rotj tuj twi' e cu'pan baj t-xee'.

³⁹ Ja tzunj xin cyaj wilel aj k'oj te Roma, tcub tzunxin twitzj cruz jaa' pjo'nwa Jesús, toctzen tcy'e'yenxin ti tten tcyimlen, bix e tkbaxin cyjulu:

—Jaxnete tej xin xinak lu Tcwal Dios texin—tži tzunxin.

⁴⁰ Bix jax at cabxuj xuuj ncy'e'yen nakch. Cyxol tzunxuj tocx jxuj María Magdalena, juntlxuj María, ttxu José bix Santiago, yaa'nte Santiago t-xnak'atz Jesús, bix xsunj xuj Salomé. ⁴¹ Ejee'tzen xujja oc lpe ti' Jesús, bix jaan tzunkekin oc onente Jesús tej at-xin tuj tnom te Galilea. Bix yaa'n o'cxc'a ke xuj, sino at nimtl xuuj oc lpe ti'jxin tej xi'ninxin tuj Jerusalén.

*Tej tocx k'o'n Jesús tuj mukbil**(Mt 27:57-61; Lc 23:50-56; Jn 19:38-42)*

⁴² Te tzunj k'ij tej tjaw Jesús twitz cruz tec'aj k'ij te nchi'tk nink'ij te ajlabl, bix nchi binchantzen xjal tik'ch cye te ja nink'ija. Cuma cye xjal judío cyxol, il ti'j tu'n tcu'x maket jun xjal cyimne tex k'ij. Ju' tzunj tetzen ch'itk tex k'ij, ⁴³ cyiwtzen tc'u'j junxin xjal José thi, tej tnom te Arimatea, t-xi'xin kanl t-xumlal Jesús te Pilato te mukbil. Jaantzen José toc te nintzaj xjal cyxol jclojxin nin cawel binner tten cyu'n cyawil na'l Dios, ke tx'olbal ley, bixsen ke nintzaj xjal tuj nin tja Dios. Jax nayon texin jtoj tul-lel Tcawel Dios te cawel twitz tx'otx'. ⁴⁴ Toctzen thi'n Pilato tyol José ka otk cyim Jesús, bix e jaw klee'xin, cuma ke cyej xjal nchi jaw twitz cruz, min ttzki'n chi cyimcye twitz cruz tex k'ij. Bix e tzaj ttxco'nxin jxin cyaj wilel aj k'oj, bix e xi' tkanen Pilato ka jax tu'n José ka otk cyim Jesús. ⁴⁵ Toctzen thi'n Pilato ka jax otk cyim Jesús, bixse e xi' tk'o'n Pilato tumel te José tu'n tcu'tz tii'nxin t-xumlal Jesús twitz cruz.

⁴⁶ Entonces bix etz tlok'o'n José jun nintzaj xbalen, bix e cu'tz tii'n José t-xumlal Jesús twitz cruz. Bix oc tbalx'exin ti' t-xumlal Jesús. Bix ocx tk'o'nxin t-xumlal Jesús tuj jun tij xak, bix oc tlomo'nxin ttzi' tuya juntl tij xak.

⁴⁷ Yaltzen te María Magdalena tuya María ttxu José, nchi cye'yenc tzunxuj jaa' otk tz'ocxa t-xumlal Jesús.

16*Tej tjatz k'i'n Jesús cyxol cyimne**(Mt 28:1-10; Lc 24:1-12; Jn 20:1-10)*

¹ Te xsunj k'ij te ajlabl, tetzen juntl k'ij, ja tzunj xuj María Magdalena, tuyaj xuj María ttxu Santiago, tuya Salomé, etztzen cylok'o'nxuj c'oc'sbil cyi' xjal te c'oc'sbel t-xumlal Jesús. ² Te xsunj tneel k'ij te smant, te ncubc'a c'atxpaj t-xee' cya'j, bix e xi'kexuj ttzii' tjayel Jesús te k'olec c'oc'sbil ti' t-xumlalxin. Cwa cyponxuj te njawelc'a k'ij. ³ Nchi yolen tzunxuj cyil cyiibxuj tej xi'ninkexuj cyjulu:

—¿Altzen ba'n tel k'in tej tij xak toc ttzii'j tjayel Jesús?—tzi tzunxexuj.

⁴ Pero tej cypon canaxuj ti'j, toctzen cyece'yenxuj jxak toc te maksbilte, yaa'ntzen tcwa'tl jaa'j tcwa'. Otk tz'el tolj, amale ma' nimet xak. ⁵ Tej tzunj cyocxxuj tuj tjayel Jesús, bix oc cyece'yenxuj jun k'a xinak k'uklc'ak'a tej plaj te tmank'ab tjayel Jesús, toc jun ma' nu'k t-xbalenk'a, tij skopanxse. Bi'xse e jaw sey'paj kej xuj xuuj. ⁶ Pero bix etz yolenk'a cyi'jxuj:

—Mi'n chi jaw sey'paj cyey. Nchi jyon cyey t-xumlal Jesús aj Nazaret, jxin e jaw twitz cruz. Pero ya min-atl texin tzalu, cuma ma jaw itz'jxin juntl maj. ¡Cyce'nc'! Min-alxin jaa'j e cwa'tenxin. ⁷ Cyucxa cykba'xsen cye t-xnak'atzxin: “Cxe'l nej te Jesús cywitza tuj tnom te Galilea, tisenx o tkbaxin. Jatztzen c'oquela cyece'yen xina,” tzi cybela cye t-xnak'atz Jesús. Jaxix Pedro il ti'j tu'n tbinte—tzik'a cyexuj.

⁸ Entonces bix etz ok kej xuj xuuj tuj tjayel Jesús tu'n ttzi cyi'jxuj. Bix tzinxsen nchi lu'lunxuj. Ya tu'n ttziil cyi'jxuj, min jaa' oca cykba'nxuj.

*Tej tjaw jlet Jesús twitz María Magdalena**(Jn 20:11-18)*

⁹ Texse k'ij te klaxc'a tej tjaw itz'j Jesús juntl maj, texj tneel k'ij te smant. Tejtzen tjawlen itz'jxitlxin, nejlten el jlet-xin twitz María Magdalena, junxuj xuuj jaa' otk tz'ela tlojo'n Jesús wuuk biman ti'jxuj. ¹⁰ Bix e xi'xuj kbalte cyej xin xjal oc lpe ti'jxin. Tejtzen tponxuj, tzinxsen chi ok'xin tu'n cybixsin. ¹¹ Toctzen cybi'nxin ka otk tz'oc tcyeyen María ja Jesús, bix ka i'tzxin, min el jax tuj cywitzxin.

*Tej tjaw jlet Jesús cywitza ca'ba t-xnak'atz**(Lc 24:13-35)*

¹² Tba'jlenxilit tzunj ju'wa, bix el jlet-xin jun wikxilit tcyeyenxinx twitz ca'ba cyej xin oc lpe ti'j Jesús. Otk chi etzxin betel ttxa'n tnom. ¹³ Toctzen cyece'yenxin, bix aj meltz'ajkexin tuj tnom te kbalte cyej cabtlixin, pero ju'xe, min el jax tuj cywitzxin.

*Tej t-xi' tkba'n Jesús cye t-xnak'atz alcye ak'untl tu'n tbint cyu'n**(Mt 28:16-20; Lc 24:36-49; Jn 20:19-23)*

¹⁴ Yajc'atltzen, bix el jlet-xin cywitz junlajaj t-xnak'atzxin tej nchi waa'nxin. Bix oc ilen ch'inxin cyi'jxin, cuma otk tz'el cyxoo'nxin tpochal Jesús e cykba jxjal oc cye'yente ka otk jaw itz'jxin. ¹⁵ Bix e xi' tkba'n Jesús cyexin:

—Cyucxatzen tuj cykil twitz tx'otx' te kbalte cye xjal ja yol te co'pbila. ¹⁶ Alj ma tz'oc ebin tej yol te co'pbila, bix ma bautizarj te techel ka otk tz'oc wunak wuya, ja tzunj cco'pjel tjak' il. Pero alj min ma tz'oc ebinte, ja tzunj cwelex til twitz Dios, bix cxe'l tk'o'n Dios ejee' tuj k'ak'. ¹⁷ Cyxol tzunj ma tz'oc ke cye'c'u'j wi'j, cbineitzen techel cyu'n tisen ke ja lu:

Tu'ntzen wajwalela q'uelela cylojo'n biman cyi' xjal, chinel juntl ac'aj yol cyu'n bix min otk tz'oc cyxnak'tza'n. ¹⁸ Bix ka ma chi cub tz'ak tuj jun il tisenj oj cyoc tx'a'n tu'n lbaj, bix ma ch'innch'e oj t-xi' cyc'a'n veneno, mintii' chi oquel i'k'en tu'n. Bix ka ma cub cyk'o'n cyk'ab cyibaj yaab tu'n tul cynaabl, c'ulel cynaabl tu'n tipemal Dios—tzi Jesús cye t-xnak'atz.

Tej t-xi' k'i'n Jesús tuj cya'j

(Lc 24:50-53)

¹⁹ Tbajlen yolenxiltzen Jesús cyuyaxin, bix e jax k'i'nxin tu'n Dios tuj cya'j, bix e cub kexin tuj tmank'ab Dios te cawel tuya Dios.

²⁰ Yaltzen cye t-xnak'atz Jesús, bix exkexin te xnak'tzal cye xjal ti'j tyol Jesús tuj cykil lugar, toctzen Cyaawxin onl cyexin, bix toctzen Cyaawxin yeec'l cyvolxin tuya techlal nim tipemalxin.

T-xi'len tchunk'lal Jesús tz'i'ben tu'n San Lucas

Jtaj Lucas tu'n tcub ttz'i'ben

¹ Nim xjal o tz'oc cyipen tu'n tcub cytz'i'ben ti'j e bint tu'n Jesús tej ttenxin twitz tx'otx' kxol. ² O cub cytz'i'ben j-oc cybi'n cyej xjal oc cyeyente j-e bint tu'n Jesús jatxe tej ttzaj tzyet taak'enxin bix e cykba tpochalelxin te cykilca ko'. ³ Ju' tzunj ba'n e'la tuj nwitzax jax ju'x weya cwel ntz'i'bena jti e baj texin, cuma o tz'oc wipena tu'n tjaw wii'na tumel tu'n tixix tten ti'j cykilca e baj texin jatxe tizt'jlenxin. Ncub ntz'i'bena tixix tten e baj ti'jxin bix tu'n tcyaj tpochalelxin wu'na tujixix tumel te cyey n-oc tak' Dios cyey, ⁴ tu'ntzen telxix cyni'ya ti'j jaxxix j-o tz'oc cybi'na ti' Jesús.

Tej tul jun ángel k'olte tpochal ka tu'n titz'j Juan Bautista

⁵ Tejtzen tocx Herodes cawel tuj cytanem judío, attzen junxin pala, k'olte chojbil il, Zacarías tbixin. Jaj xin te jun cloj pala Abías tbi. Bix at jun t-xu'lxin Elisabet tbixuj. Tiy'jil Aarónxuj. ⁶ Cyca'bel tzunj xjal lu e xi' cyii'n cynaabl ba'nxix twitz Dios. Min-al ka' tyol cyi'jxin, cuma e xi' cynimanxin cykilca tley Dios e cyaj tk'o'n Moisés. ⁷ Kej xjal lu min-al cycwal itz'j, cuma mixbe tz'alenuj, bix tijtlke.

⁸ Nponxetzen smant tu'n tajben jcloj Abías tuj tja Dios, e pontzen jk'ij tu'n tocx Zacarías tuj xjan cwart te patlte incienso twitz Dios. ⁹ E cye'yen kej xin pala tuj cysuertexin al c'ogueux tuj xjan cwart jaca juun k'ij, tixex tten cyu'nxin, bixsen e cana suerte tej k'ij tu'n tocx Zacarías te patlte incienso. ¹⁰ Nim xjal otk chmet tuj tja Dios tec'ax ja tocxex jxjan cwart jaa' npatja incienso, bix tej tak' pala patlte incienso, nchi ak'tltzen xjal na'l Dios.

¹¹ Maatktzen tocx Zacarías tuj xjan cwart, tej tjaw jlet jun ángel sma'n tu'n Kaaw. Tjaw tcyey'en Zacarías, wa'lc'atl ángel tuj mank'ab te altar jaa' npatja incienso. ¹² Tej toc tcyey'enxin ángel, bi'x el tanemxin, bi'x e jaw sey'pajxin. ¹³ Bixsen e xi' tkba'n ángel te Zacarías:

—Mi'n tzaj ttzi ti'ja. Dios tzul k'onte j-o txi' tkanena te Dios. Jxuj t-xu'la Elisabet tzul jun tcy'aala ti'jxuj, bix c'oquel tk'o'na tbi Juan. ¹⁴ Nimxsen ctzalajela ti'j tcwala, bix ju'x nim xjal ctzalajel ti'j, ¹⁵ cuma ctzaal tk'o'n Dios jawnex jun taak'en. Bix mlay tz'oc c'al k'e'n. Bix oj titz'j, ctemel Espíritu Santo tuya cykil tyem tuj tchunk'lal. ¹⁶ Bix nim xjal te Israel c'oquel cybi'n tyol tu'n cymeltz'aj tuya Dios, Cyaaw. ¹⁷ Ckbal Juan cyxol Israel nejl ojzen tul Cyaaw. Ckbalxin mintii' ttzi ti'jxin bix tuya nim tipemalxin, tisenj e bint tu'n Elías, jxin tyolel Dios ootxa. Ckbalxin tu'ntzen toc cyak' mambaj cye cycwal, bix tu'ntzen t-xi' cyii'n cynaabl tujixix tumel twitz Dios kej xjal min tz'oc cybi'n Dios. Ckbalxin tu'ntzen binnan cyten xjal twitzj tul-len Cyaaw—tzi ángel te Zacarías.

¹⁸ Bix e xi' tkba'n Zacarías te ángel:

—¿Ti tten tu'n tel nni'ya ti'j ka jaxxix tyola? Tijtl kena, bix ju'x nxu'la tijtlxuj—tzi Zacarías te ángel.

¹⁹ Bix aj ttzak'be'n ángel:

—Inayena Gabriel. Inayena tsanjel Dios eбилte tyol Dios jaa'xix ta' Dios. O chin tzaj sma'na tu'n Dios te kbalte tey jba'n tpochalel tcwala. ²⁰ Pero min tocslay nyola. Ju' tzunj c'oqueley te men. Mlaytzen yoleley hasta ojxe titz'j tcwala. Amale mint tocslay nyola, pero ju' ctemela cykilj ma txi' nkba'na tey oj tpon tumel—tzi ángel te Zacarías.

²¹ Yal tzunkej xjal ete'cx tuj tja Dios nchi ayontzen tu'n tetz Zacarías tuj xjan cwart, nimxsen otk chi jaw klee' mixe jun-al Zacarías eelel.

²² Cwatzen telelxin, pero ya mentlxin. Ya min e bintl tyolexin cyuya xjal. Nuk tuya tk'abxin e tak'xin tumel ti otk tz'oc tcyey'enxin tunwen. Ju' tzunj el cyniy' xjal ti'j otk tz'oc tcyey'enxin jun yec'bil tu'n Dios tuj xjan cwart.

²³ Tejtzen tjapan baj jsmant tej cloj Abías tu'n cyajben tuj tja Dios, bixsen aj Zacarías tja. ²⁴ Bix mas vaj, oc t-xu'lxin Elisabet preñada. Bix jwe' xjaw nuk e tenxuj txajuj. Mintey' ex bet-xuj. Bix e xi' tkba'nxuj:

²⁵ —Jawnexsen jun xtalbil o tzaj tk'o'n Kaaw weya. Yaltzen ja'lewe mintzentii'tl nch'ixewa cyxol xjal, cuma tzultzen itz'j wala—tzi Elisabet.

Tpochal titz'jlen Jesús

²⁶ Tetzen tkaken xjaw tel tniy' Elisabet ti'j at tal tuj tc'u'j, jaxj ángel Gabriel e yolen tuya Zacarías jax e xi' tchk'o'n Dios tuj tnóm te Nazaret tuj departamento te Galilea. ²⁷ Bix e pon ángel tuj tja jun txin xuuj mintkna'x tlonte xinak, María tbixin. Otk yolentxin tu'n tmajetxin tuya jun xinak José tbi, jun tiy'jil ktzan rey David. ²⁸ Tej tocx Gabriel tuj tjaxtin, e xi' tkba'n tetxin:

—Xin tzaja k'olbel tey. O tzaj tk'o'n Dios xtalbil te tey. At Kaaw tuyey—tzi ángel te María.

²⁹ Tej thintetxin jyol lu, e jaw sey'pajtxin tu'n, bix ak'txin bislte ti'j:

—¿Tu'n tiken ma tkba' ángel weya ju'wa?—t'zixin.

³⁰ Pero e xi' tkba'n ángel tetxin:

—Mi'n tzaj ttzi ti'ja, María, cuma o scy'eta tu'n Dios tu'n tk'onte jun xtalbil jawnex te tey.

³¹ Jnxi' nkba'na tey jax wu'na, cuma c'oquela preñada, bix c'alela jun tala, bix c'oquel tk'o'na tbi Jesús. ³² Jawnexsen c'oquela tala, bix q'uelel cyniy' xjal ti'j jaxin Tcwal jawnex Dios. Bix cxe'l tk'o'n Kaaw Dios texin tu'n tcawenxin te junx maj, cuma tiy'jilx Davidxin, jxin rey e cyaj tk'o'n Dios tyol tuyaxin tu'n titz'j jun tchmanxin te cawel te junx maj. ³³ Jaxin ccawel tibaj Israel te junx maj. Mintii' tbajlel tcawbilxin—tzi ángel te María.

³⁴ Bix e xi' tkba'n María te ángel:

—¿Titzen tten ma chin oca preñada, cuma mina'x nmajewa?—tzi María.

³⁵ Aj ttzak'be'n ángel tetxin:

—Espíritu Santo cwel tibaja, bix ctemela jun rato tjak' tipemal jawnex Dios. Ju' tzunj, jtala q'uitz'el tu'na mintii' til, bix cbyal tbi Tcwal Dios. ³⁶ Jax ju'x ttzicya Elisabet, amale tijet, pero o tz'oc preñada. E cykba xjal mlay tz'alenuj, pero ya tkaken xjaw talxuj tuj tc'u'jxuj.

³⁷ Ja lu tzin tyec'an mintii' jun mi'nt bint tu'n Dios—tzi ángel.

³⁸ Bix e xi' tkba'n María:

—Cu. Nukle nyo'ya tajbil Kaaw. Bint-xit wi'ja tisenj ma tkbay—tzi María.

Bix aj ángel.

Tej tpon María k'obelte Elisabet

³⁹ Tejzen tkbaj ju'wa, bixsen e xi' María tuj ajkelbil tu'n tpon tuj departamento te Judea, bix e pontxin tuj ttanem Elisabet, jun tnom t-xol witz tcu'xe. ⁴⁰ Tej tponxin, bix ocxtxin tuj tja Zacarías, bix e k'olbentxin te Elisabet. ⁴¹ Tejzen tbinde Elisabet tej tjaw k'olbentxin, e jawxsen yucch talxuj tuj tc'u'jxuj, bix tu'n tipemal Espiritu Santo ⁴² ak'xuj yolel, bix e jaw yolenxuj cyiw. Tzixuj te María cyjulu:

—Jawnex jun xtalbil ma tzaj tey cywitz niy'tl xuuj! ¡Bix at t-xtalbil Dios tibaj jtala tuj tc'u'ja! ⁴³ Titzen nxi'l lena ma tzaja k'olbel weya, jay ttxu Waawiya! ⁴⁴ Ya ntzki'ntla c'oquela ttxu Kaaw, cuma tej nbintiya tjaw k'olbena, nim e jaw yucch wala tuj nc'u'ja tu'n ttzalajehl.

⁴⁵ Cuma ma tocslay tyol Kaaw, ctiik'ela nim tzalajehl, cuma cjapanelxin ti' tyolxin—tzi Elisabet te María.

⁴⁶ Bix e xi' tkba'n María:

—Tuya cykil nc'u'ja cjawel nnimsa'na tbi Kaaw. ⁴⁷ Nchin tzalaja ti' Dios, Clol weya. ⁴⁸ Amale mintii' wajbelela tuj cywitz xjal, pero ma tzul Dios te k'olte jun wajbela. Ja'lewe bix tuj cykilca tyem cykba' xjal ma tsicy' Dios inayena te k'olte jun jawnex woelena. ⁴⁹ O tak' Dios jun jawnex xtalbil wibaja. ¡Xjanxsen tbixin! ⁵⁰ At lastim tu'nxin te cyej xjal nchi niman jaxin. ⁵¹ Nimxsen o bint tu'nxin tu'n tipemalxin. O scyexin cyi'j ke'j xjal e jaw cyiman cyiib. ⁵² O tz'el ti'nxin tipemal cycawbil ke'j cawel, bix o tzaj tk'o'nxin cyajbel ke'j xjal yaa'n jawnex. ⁵³ O tzaj tk'o'nxin jun ba'n te cyej xjal at il ete'. Pero mintii' o tzaj tk'o'nxin te cyej xjal mintii' il ete' tuj cywitz. ⁵⁴ Bix o tzulxin te onlcye ke Israel, ke'j xjal e tsicy'xin tu'n cyajben texin, tu'n tjanan bajxin ti' tyolxin. ⁵⁵ E cyaj tyolxin tuya kiy'jil Abraham tu'n ttzaj lastim tu'nxin cye tchman Abraham te junx maj, bix tu'nj o bint tu'nxin wi'ja, otzen japan bajxin ti' tyolxin—tzi María.

⁵⁶ Bix e tenle María tuya Elisabet jun oxe xjaw. Bix aj meltz'ajtxin t'jatzin.

Tej titz'j Juan Bautista

⁵⁷ Tejzen tpon tumel tu'n talen Elisabet, bix itz'j jun talxuj xinak. ⁵⁸ Ke tvesint-xuj bix ke titz'enuj e cybi otk tz'itz'j talxuj, bix e jaw tzalajke tuyaxuj ti'j jawnex xtalbil otk tzaj tk'o'n Dios texuj.

⁵⁹ Te twajxakan k'ij titz'jlen talxuj, bix e pon ke cyvesint-xuj bix ke cyermanaxuj tuj cyjaxuj, cuma otk pon tumel tu'n tel cpet ttz'umel twi' ttz'albil nee' te techel judiotzen nee'. Bix o cyk'o'n xjal tbi nee' Zacarías, tisex tbi tman. ⁶⁰ Pero bix e xi' tkba'n ttxu nee':

—Min. Te tbi c'oquel Juan—tzixuj.

⁶¹ Pero e xi' cykba'n xjal texuj:

—¿Tu'n tikentzen taja tz'oc tbi tala te Juan? Min-al Juan cyxol ke cyiy'jila—tzi ke xjal.

⁶² Bixsen oc cykanen xjal te tman nee' alcye tbi nee' c'oquel. Pero nuk tuya cyk'ab e yoleneke, cuma menx ta' Zacarías bix otk chquimba. ⁶³ Bix e tkanen Zacarías jun tzlom, bix e cub ttz'i'benxin: “C'oquel tbi te Juan.” Bix cykilca xjal e jaw klee'. ⁶⁴ Tejzen tcub ttz'i'benxin ju'wa, njketltzen ttzixin, bixsen ak'xin k'olxte chjonte te Dios.

⁶⁵ Tejzen cybinte ke xjal cyvesint-xin ti otk baj tuj tja Zacarías, e jawxsen klee'ke, bix cykilca ke'j xjal najl cyxol witz te Judea e yoleneke ti'j ti otk baj. ⁶⁶ Ke'j xjal e binte ti otk baj bix ak'ke bislte ti'j, bix e baj cykanen cye ke cyuya: “¿Titzele c'oquela jnee' lu?” tzi ke xjal. Ju'xne e jaw klee' ke xjal, cuma otk cub tk'ab Dios tibaj nee'.

Tej tk'onte Espíritu Santo tipemal Zacarías tu'n tkbantexin tyol Dios

⁶⁷ Tejzten otk jket ttzi Zacarías tu'n tyolen, bixsen e tak' Espíritu Santo tipemalxin tu'n tkbantexin tyol Dios, bix e xi' tkba'nxin:

⁶⁸ —Jawxit nimset tbi Dios, jatzen Kaawja kibaj ejoo' Israel, cuma min ma ko el tuj tc'u'jxin, bix ma bint tu'nxin tu'n kclel, ejoo' t-xjalxin. ⁶⁹ Ma tzaj tk'o'nxin jun Clol ke nim tipemal. Jatz q'uelela itz'j ti' tiy'jil David, jaj xin cawel ajben te Dios. ⁷⁰ Ma japan bajxin ti'j tyolxin e cyaj tk'o'nxin ke cyu'n kej tyolelxin ajben texin jatxe ootxa. ⁷¹ E cykbaxin at tu'n tul jun Clol ke tu'n kclel tuj cyk'ab kej xjal nchi k'o'jl ki'j, bix tu'n ktzakpet tjak' cycawbil kej n-el iig'uenta ke. ⁷² Ma tzaj tk'o'nxin Clol ke tu'ntzen tjapan bajxin ti'j jawnex tyolxin e cyaj tk'o'nxin cye kiy'jil, tu'n tk'ontexin lastim cye t-xjalxin. ⁷³ Bix ma tzaj tk'o'nxin Clol ke tu'n tjapan bajxin ti' tyolxin tuya kiy'jil Abraham. ⁷⁴ E cyaj tk'o'nxin tyolxin te Abraham tu'n cyclet tiy'jil Abraham tuj cyk'ab ke k'o'jlel cyi'j. Ma tzaj tk'o'nxin te ke tu'n ktzakpet tuj cycawbil kej k'o'jlel ki'j tu'ntzen mi'n bet kk'ij tuya ttzi ki'j, sino tu'ntzen tbet kk'ij tu'n kajben te Dios. ⁷⁵ Tajxin tu'n t-xi' kii'n kchunk'lal sakxix bix jiquen twitxzin te cykil k'ij.

⁷⁶ Yaltzen tey, ncy'aal, c'oquela te tyolel jawnex Dios, cuma kcbala tulel Kaaw, tu'ntzen binne cyten xjal oj tul. ⁷⁷ Ckbala cye xjal ti tten tu'n cyclet, jaj tu'n tnaisset cyil ⁷⁸ tu'nj tk'ak'bil tc'u'j Kman Dios ki'j. Cuma ma tzaj k'ak'en tc'u'j Dios ki'j, ju' tzunj c'ulel jlet jun Clol ke kxol. Jaxin jun spi'yen ⁷⁹ cyej xjal ete' tuj klolj bix te cyej xjal ete' tjak' t-xlequemal cyamecy. Ja tzunxin c-yec'lte ti tten tu'n kten tuj ttzyal—tzi Zacarias.

⁸⁰ E tzi'y twal Zacarías bix ocxe ma xjal, bix ocx nim tnaablxin. Bix e najanxin tuj jun lugar jaa' min-al xjal najl, hasta tejxe tpon tumel tu'n t-xi' tk'umenxin tyol Dios cye Israel tuj lugar ttzii' nima' Jordán.

2

*Tej tiz'j Jesús
(Mt 1:18-25)*

¹ Tejzen mitkna'x tiz'j Jesús, ja tzunj xin cawel tibaj cykil twitz tx'otx', Augusto tbixin, e tkbaxin tu'n tjaw jun tumel te tajlal jte' xjal at twitz tx'otx'. ² Ja jun tneel censo e bint ju'wa, bix tej tjaw censo, tocx jxin Cirenio cawel tuj Siria. ³ Iltzen ti'j e pja'j ke xjal tuj cytanem ke cyiy'jil te ootxa, tu'ntzen cyk'onte cyumel te jaa'ke.

⁴ Bix najltzen José tuj tnom te Nazaret tuj departamento te Galilea. Pero tiy'jil Davidxin, bix jatztzen ttanem David Belén tuj departamento te Judea. Ju' tzunj il ti'j e xi' José tuj Belén, ⁵ te tz'ibl tiibxin. Bix k'i'n María tu'nxin, cuma t-xu'tlxin. Bix ch'itk talentxin.

⁶ Tejzen cypon José tuya María tuj Belén, bix e pon tumel tu'n ttzaj itz'j taltxin. ⁷ Bix itz'j taltxin. Tneel taltxin, bix xinak. Itz'j taltxin tuj cyja alimaj, cuma mintii' cyposada e cnet tuj tnom. Bix e jaw tho'tz'entxin nee' tuj bu's, bix e cu'x tcozt'ba'ntxin nee' tuj tcullel cywa alimaj.

Ke tsanjel Dios bix ke cylel

⁸ Ttxa'nxitzen tnom te Belén atzen cab cylel najlke cyi' cycarnel. Nchi c'o'janl cycarnel te koniyan. ⁹ Tisen tii' tej tpon jlet jun tsanjel Dios tuj cya'j cywitz, bix tspi'yemal Dios e cub txakpaj cyibaj, bix e jaw sey'pajke. ¹⁰ Bix e tkba' ángel cye cylel:

—Mi'n tzaj ttzi cyi'ja, cuma k'i'n jun tpo'chalel jun tzalajebel wu'na te cykil xjal. ¹¹ Tuj ja koniyan lu, bix tuj ja tnom lu, ttanem jxin cyiy'jila David, ma tz'itz'j Clol cyey, jxin scy'o'n tu'n Dios te cawel. ¹² Ka cxe'l cycye'xa nee', ojtzen tcnet jun nee' cyu'na bo'tz'en tuj bu's bix tcu'x tuj tcullel cywa alimaj, q'uelelten cyni'ya ti'j ja tzunja—tzi ángel cye cylel.

¹³ Tej tbaj tkba'n ángel kej yol lu, nukxix tisen tii' tjaw jlet mas nim cybaj ángel te tuj cya'j ttxlaj ángel e pon nejl. Nimxsen e jaw cynimsa'n tbi Dios, bix e xi' cykba'n:

¹⁴ —jJawnex tbi Dios tuj cya'j! Ma tzaj tk'o'n jun xtalbil twitz tx'otx' tu'n cyten xjal tuj ttzyal tuya Dios—tzi ke ángel.

¹⁵ Tej cyaaj meltz'aj ke tsanjel Dios tuj cya'j, bix ak' ke cylel yolel cyxolx:

—Ko'ne cyey'lte jnee' ma tz'itz'j tuj Belén, jatzen nee'ja ma k'umj tu'n Dios—tzi ke cylel.

¹⁶ Bix e xi'kexin tuj ajkelbil te cyey'lte, bix e cnet María tuya José cyu'nxin tuyax ni' xlak. Xukaq'ueux tuj tcullel cywa alimaj. ¹⁷ Tejzen cylonxetxin nee' tuj tcullel cywa alimaj, bix ak'kexin kbalte cye xjal ti otk tkba' ángel cyexin ti' nee'. ¹⁸ E jaw klee' kej xjal e cybi cyyol kej cylel. ¹⁹ Yaltzen te María, mintey' ak'txin, sino nuk e jaw bisentxin ti'j cykilca otk baj.

²⁰ Bix aj meltz'aj ke cylel jaa' ete' cycarnelxin, bix e jaw cynimsa'nxin tbi Dios. E xi' cyk'o'nxin chjonte te Dios ti'j cykilca otk cybixin bix otk cyilxin, bix jax e'la tuj cywitzxin ti'j e tkba' ángel.

Tej tpon k'i'n Jesús tuj tja Dios

²¹ Tetzen twajxakan k'ij titz'jlen tal María, jatzen tumelj tu'n toc techel ti' ttz'albil taltxin judiözen nee'. Te xsunj k'ij lu tej toc tbi te Jesús, jaxj tbi e tkba ángel Gabriel te María tej mitkna'x toc jlet taltxin.

²² Mas yaj, e xi' José tuya María tuj Jerusalén, cuma tzin tkba'n tley Moisés, oj talen jun xuuj, il ti'j tu'n t-xi' oyet jun alimaj, tu'ntzen tcyaj sak xuuj twitz Dios. Ju' tzunj, tej tpon tumel, e xi'kexin tuj tja Dios tuj Jerusalén. Bix tex k'ij tej t-xi' oyet jnee' Jesús tuj tk'ab Dios. ²³ E binttzen cyu'n ju'wa tu'ntzen cynimante tley Dios. Tzin tkba'n cyjulu: “Jaca juun tneel xinak q'uitz'jel t-xol tal jun xuuj, ck'ojel tuj tk'ab Dios,” tzi tley Dios. ²⁴ Bix tu'n cyczuyante tu'nj tley Dios ti'j tx'ajbilte xuuj, e xi' cyoyen María tuya José alimaj te Dios, cuma tzin tkba'n tley Dios: “Tuya jun moj cucu' bix ka jun moj palomas il ti'j cxe'l oyet,” tzi tley Dios.

²⁵ Atzen junxin xjal tuj tnom te Jerusalén Simeón tbixin. Jatzen jun xinj k'i'nix tyol Dios tu'nxin. El tniy' Simeón ti'j tu'n ttzaj tk'o'n Dios jun jawnex Cawel cye Israel la' alcye jun k'ij te clolcye, bix nayon tzunxin ti'j. Tu'n Espiritu Santo e'la tniy'xin. ²⁶ E tkba Espiritu Santo texin tu'n mi'n cyimxin hasta ojxe toc tcyeyenxin jxjal ayonex Israel ti'j. ²⁷ Tponzen tumel, e xi' k'i'nxin tu'n Espiritu Santo tuj tja Dios. Te tzunj k'ij tej tpon cyii'n tman Jesús ja Jesús tuj tja Dios tu'n tye'c'j te Dios, tisen tzin tkba'n ley. ²⁸ Tej toc tcyeyen Simeón nee', bix e xi'xin chleljawte, bix e jaw tniinsa'nxin tbi Dios ti'j, bix e xi' tkba'nxin:

²⁹ —Taat, ba'ntzen tu'n ncyima tuj ttz'yal, inayenja ma chin ajbena tey, cuma ma japan baja ti' tyola. ³⁰ Ma tzaj tk'o'na tu'n toc ncyeyena Jclol keya ma tzul. ³¹ O tscy'a ja tu'n toc Clol cye cykilca xjal twitz tx'otx'. ³² C'ajbel tisen jun spi'yen cyxol xjal yaa'n judío, tu'ntzen tel cyniy' ti'j. Bix c'oquél te jun xjal mas jawnex cyxol t-xjala, kej Israel—tzi Simeón te Dios.

³³ Tejzen cybinte José tuya ttxu Jesús tyol Simeón ti' c'ycwal, e jaw klee'ke. ³⁴ Bix e xi' tkanen Simeón te Dios tu'n ttzaj tk'o'n Dios xtalbil te cye, bix e xi' tkba'nxin te María, ttxu nee':

—Ebi'nc nyola. Ja tala lu c'oquél te kbalte ti'j ti pjel te jaca juun aj Israel, ka tu'n t-xi' tuj castiwa, bix ka tu'n tel ba'n. Nim cbinel tu'n, tu'ntzen tel cyniy' xjal ti'j ja Clol cye, pero nim xjal q'uelel iiq'uenta. ³⁵ Tu'nj q'uelel cyiiq'uen, cchic'ajaxeltzen ka'xsen cynaabl. Pero kej n-oc ke c'yc'u'j ti'jxin, oj tbint cyu'n ju'wa, cchic'ajaxeltzen ba'n cynaabl. Yal tey, c'oquex tuj tanema jun nintzaj bisbajil ti'j tala, tisen c'a c'oquex twi' spada tuj tanema—tzi Simeón te María.

³⁶ At junxuj xuuj at tuj tja Dios, Ana tbixuj. Tmeel Fanuelxuj bix tiy'jil Aserxuj. Kbal tyol Diosxuj. Ni' tijtl xsunxuj. E majexuj wuuk tyem, ³⁷ bix e tentlxuj viuda ochenticuatro jnabk'i. Jaca k'ij ocxxuj tuj tja Dios. Cykil k'ij bix cykil ak'bil e na'nxuj Dios, bix nim maj e cub tpa'nxuj weyay tu'n tniimanxuj Dios. ³⁸ Texsen hora nyolen Simeón tej tpon Ana jaa' toxe María tuya José, bix ak'xuj k'olx chjonte te Dios ti'j ti otk bint tu'n Dios. Bix e xi' tkba'nxuj cye aj Jerusalén, kej otk tz'oc ke c'yc'u'j ti' tulel Clol cye:

—Ja tzunj xlak lu Clol ke—tzixuj.

Tej cyajtz meltz'aj José tuya María tu'n cypon tuj Nazaret

³⁹ Tej cyniman María bix José alcyej tzin tkba'n tley Dios ti'j ti tten oj nitz'j jun nee', bixsen aj meltz'ajkexin jaa' najlekexin tuj tnom te Nazaret, tuj departamento te Galilea. ⁴⁰ Bix tzi'iyne e tzi'iyne nee', bix ocx k'o'n tipen, bix tnaabl tu'n tel tniy' ti'j, bix chic'aj el ba'n twitz Dios.

Tej tpon Jesús tuj tja Dios matk cwal

⁴¹ Bix jaca tyem nche'x tman Jesús tuj Jerusalén te iy'salte jnink'ij te Pascua. ⁴² Tej tjanen Jesús cablaaj tyem titz'jlen, e xi'kexin juntl maj tuj Jerusalén te iy'sal jnink'ij, tixex tten. ⁴³ Bix tej tba'j nink'ij, bix ajke María tuya José cyjaxin. Pero bix e cyaj Jesús tuj Jerusalén, bix min el cyniy' José bix ttxu ti'j ka otk cyaj. ⁴⁴ Tuj cywitzzin tocx Jesús cyxol kej xjal junen cyuya tu'n cypon Galilea. Tejzen cykax tu'n cywe'xin, bix ak'kexin jyolte Jesús cyxol ke cyuyaxin bix ke te cyjaxin. ⁴⁵ Pero min-al e cnet. Bixsen aj meltz'ajkexin te jyolte tuj Jerusalén. ⁴⁶ Te toxen k'ij tcyajlen tii'n tiib Jesús tej tcnat tuj tja Dios cyu'nxin. K'uklecx cyxol ke tx'olbalte tleyel tyol Dios. Toc ebiite cyyolxlin bix toc kanlte tyol Dios cyexin. ⁴⁷ Bix e jaw klee' niy'tl xjal oc ebinte tyol Jesús. Toc ebiite cyyolxlin bix toc kanlte tyol Dios cyexin. ⁴⁷ Bix e jaw klee' niy'tl xjal oc ebinte tyol Jesús, cuma nimxsen tyol Dios tzi'iyne Jesús, bix tuya nim ba'n tu'n e xi' ttzak'be'n cye tx'olbal ley. ⁴⁸ Tej tocx c'ycye'yen María bix José tocx Jesús cyxol tx'olbal ley, e jawxsen klee'ke. Bix e xi' tkba'n ttxu te:

—Wal, ¿tu'n tikentzen e cyja'y tzalú bix mintii' e tkbay keya? Nimxsen ma ko jyona ti'ja tuya tmana, pero yaj ma cnetá ku'na, bix nim ma ko ajkela ti'ja—tzi ttxu.

⁴⁹ Pero e xi' tkba'n Jesús cye tman:

—¿Titzen min el cyni'ya ti'j ka jatzen ntiiniya tzalú tuj tja Dios? ¿Mimpatzen tz'el cyni'ya ti'j il ti'j tu'n ntena tuj taak'en Nmana?—tzi Jesús cye tman. ⁵⁰ Pero María bix José min el cyniy' ti'j ti e tkba Jesús ju'wa.

⁵¹ Bix e tcuyak'a tu'n tajk'a cyuya tmank'a tu'n cyponxin Nazaret. Bix e tnima tzunk'a cykilca cywol tmank'a.

Yaltzen te María, nuk e bisenxuj ti'j cykilca otk baj.

⁵² Yaltzen te Jesús, t'z'inye tt'z'iy tnaabl, bix ocxin ma xjal, bix masxse elxin ba'n tuj twitz Dios bix tuj cywitz xjal.

3

Tej tk'umen Juan Bautista tyol Dios

(Mt 3:1-12; Mr 1:1-8; Jn 1:19-28)

¹ Otktzen bint olaaj jnabk'i tcawbil Tiberio tibaj cykilca twitz tx'otx', tej tak' Juan kbalte tyol Dios. Tej tyem, tocx xsunj jxin Poncio Pilato cawel tuj departamento te Judea, bix tocx jxin Herodes cawel tuj departamento te Galilea, bix tocx Felipe, jxin titz'en Herodes, cawel cyuj departamento te Iturea bix Traconite, bix tocx jxin Lisanias cawel tuj departamento te Abilinia, ² bix ete'c xsunj jxin Anás bix Caifás nejenel cye pala cywol judío. Jatzen te Juan, tcwal Zacarías, e ten jaa' min-al xjal najl. Dios e k'onte kej yol te Juan tu'n tkbante cye xjal. ³ Bix e xi' Juan tiy' tuj cykil lugar ttzii' nima' Jordán te kbalte cye judío tu'n tcyaj cyk'o'n cyil tu'n cymeltz'aj tuya Dios, tu'ntzen tnajset cyil, bix tu'n cycu'x tk'o'nxin tuj a' te jun techel otktzen chi oc tuya Dios.

⁴ Tej tk'umente Juan ju'wa, ju'tzen e'la jaxxix tyol Isaías, jxin kbalte tyol Dios nejl. E tkba Isaías tuj tyol Dios: "Tuj ju'w lugar min-al xjal najl tuj, cjawel jlet jun xinak, bix ctkba' cye xjal cyjulu: 'Tzul Kaaw tu'n tten kxol. Ju' tzunj, key xjal, cyjel cyk'o'na cyila, tu'ntzen binne cytena oj tul. ⁵ Tisentzen binne tten jun be cyu'na oj tul jun jawnex cawel. Il ti'j tu'n tbaj cynojsa'na jul tuj tbexin, bix tu'n tcub kuutz'it witz tuya bu'j tu'n tcyaj chk'ajlaj. Bix kej be at cyxoquel, tu'n cycyaj jiquen, bix kej be at xak cyuj, cjawel buchet, tu'n cycyaj jiquen. ⁶ Ch'ix tpon tumel cykil xjal cyla' jun colbil ke tk'a' Dios,' ju' ctkba' jun xjal," tzi Isaías.

⁷ Nim xjal e pon ti' Juan ttzii' nima' tu'ntzen cycu'x tu'nxin tuj a'. Bix e xi' tkba'nxin cye: —Mina'x tcyaj cyk'o'na cyila. Ke cyey nuk tisen lbaj nchi el ok twitz k'ak'. Cyaj cyey tu'n cycu'xa wu'na tuj a' nuk tu'n mi'n cub castiwa cyibaja tu'n Dios. ⁸ Ka ccy'y'iy tu'n tcub cycastlewiya tu'n Dios cyibaja, cybinchamtzen alcyej ba'n, tu'ntzen tchic'ajax ka otk cyaj cyk'o'na cyila bix otk chi meltz'aja tuya Dios. Mi'n cykbay: "Tu'nj tiy'jil Abraham ko'ya, mlay tzaj kcastiwiya tu'n Dios, cuma t-xjal Dios ko'ya." Yaa'n ju'wa. Cxe'l nkba'na cyey ka at xjal t-xjal Dios nuk tu'nj tiy'jil Abrahamke, cykilcatzen loj xak lu ba'n toc te t-xjal Dios, cuma attzen tipemal Dios tu'n cyoc te tiy'jil Abraham. ⁹ Jaxte tzulte castiwa cyibaj kej xjal yaa'n ba'n twitz Dios. C'oquel cyc'u'ja ti'j ja tumel lu. Taaw cab tken lo'pj c'oquel tcy'e'yen cyi' cyken lo'pj. Kej min cyak' cywitz, chi jawel tx'omet tzi tx'otx', bix nuk te tuj k'ak' chi ajbela—tzi Juan cye xjal.

¹⁰ Bix e xi' cykanen xjal te Juan:

—¿Titzen pjel keya, tu'ntzen tchic'ajax ka otk ko meltz'aja tuya Dios?—tzi ke xjal.

¹¹ E xi' tkba'n Juan cye:

—Jun xjal at ca'ba tcap'xeyen, il ti'j tu'n t-xi' tk'o'n jun te tej xjal mintii' tcap'xeyen. Bix jun xjal at twa, il ti'j tu'n t-xi' tk'o'n ch'in tej mintii' twa—tzi Juan.

¹² E pon cab chmol alcabala tu'n cycu'x tu'n Juan tuj a', bix e xi' cykanen te Juan:

—¿Titzen pjel keya tu'n tchic'ajax ka otk ko meltz'aja tuya Dios?—tzi ke.

¹³ E xi' tkba'n Juan cye:

—Chi chmola alcabala nuk jaj tzin tkba'n ley. Mi'n chi chmona pwak nuk te cyexa—tzi Juan.

¹⁴ Bix at cabtl soldado ttzii' nima', bix e xi' cykanen te Juan:

—Yajtzen keya, ¿titzen pjel keya tu'ntzen tchic'ajax tu'n kmeltz'aja tuya Dios?—tzi ke.

Bix e xi' ttzak'be'n Juan cye:

—Mi'n tz'el cykanena cypwak xjal tu'n cyclet cywitz. Mi'n jaw cyxtz'imena cyi' xjal tu'n cyncamana cyi'j. Mi'n nuk cub cytziy ti'j twi' cyc'u'ja—tzi Juan cye soldado.

¹⁵ Cykil aj Israel nchi ayon tu'n tul jxjal Scy'o'n tu'n Dios te cawel, jxjal Cristo, bix kej xjal e pon ttzii' nima' e yolenke ti' Juan, ka ja Juan te Cawel at tulel, bix ka min. ¹⁶ Tbiinte Juan ju'wa, bix e xi' tkba'nxin cye xjal:

—Weya, yaa'n jawnex kena twitzj xjal tzul. Jxjal tzul, mintlpetii' woclena tu'n tel npju'na tak'el t-xaab. Weya, nuk jun techel tzin nk'o'na, jaj tu'n cycu'xa wu'na tuj a'. Pero ja tzunj xjal tzul, yaa'n nuk jun techel ctk'a', sino ctzaal tk'o'nxin Espiritu Santo te cyej cyej ma cyaj cyk'o'na cyila, bix ctzaal tk'o'nxin tu'n cyxi'y tuj k'ak' te cyej cyey min cyaj cyk'o'na cyila. ¹⁷ Ju'tzen tten pjel tpa'nxin kej xjal at tu'n cyclet cyuyaj xjal at tu'n cyxi' tuj k'ak', tisen jun awal triwa q'uelel tpa'nxin twitz tuya t-xc'omel. Jtwitz triwa c'oquex tuj tx'utx', pero ja tzunj t-xc'omel c'oquex tuj jk'ak' min yubtz'aj—tzi Juan cye xjal.

¹⁸ Ju'tzen tten tej tk'umen Juan tyol Dios cye xjal, bix tuya mastl tumel ti'j colbil cye e tk'umexin cye xjal. ¹⁹ Pero bix e pon tumel tu'n mintl e k'umen Juan tyol Dios, tu'n tyol Herodes, cuma otk tz'el tii'n Herodes t-xu'l ttzicy, Herodías tbixuj, bix otk bint mas ka' tu'nxin. Tu'n tzunj lu e xi' tkba'n Juan texin otk bint ka' tu'nxin. ²⁰ Ju' tzunj e tbinchaxin juntl tka'yelxin, jaj tu'n ocx tk'o'nxin Juan tuj tzee'.

Tej tbautizarj Jesús

(Mt 3:13-17; Mr 1:9-11)

²¹ Tej tcu'x tk'o'n Juan ke xjal tuj a', bix e pon Jesús ti'jxin, bix e cu'x tk'o'nxin tuj a'. Tejtzen tjatz Jesús tuj a', bix ak' na'l Dios, bix e jket cya'j, ²² bix e cub Espíritu Santo tibajxin tisen tcy'e'nc junjil cucu', bix e tzaj tk'ajk'ajel yol tuj cya'j. Tzi yol cyjulu:

—Jay Ncwala n-oc tak'a weya. Nchin tzalaja jay ma scy'et wu'na—tzi Kman Dios te Jesús.

Ke tiy'jil Jesús

(Mt 1:1-17)

²³ Tejtzen tbint jlu ti' Jesús, bixsen e xi' ttzyu'nxin jtaak'enxin otk tzaj tk'o'n Dios tu'n tbint tu'nxin cyxol xjal. Tej tak'xin ak'anal ti' taak'en Dios, otk japanxin winaklaaj jnabk'i. Bix cybi tiy'jilxin jaa' ela itz'jxin ejee' tzunj lu: Tuj cywitz xjal, tcwal José jaxin. Yaltzen te José, tcwal Elixin. ²⁴ Yaltzen te Eli, tcwal Matat-xin. Te Matat, tcwal Levixin. Te Leví, tcwal Melquixin. Te Melqui, tcwal Janaxin. Te Jana, tcwal Joséxin. ²⁵ Te José, tcwal Matatíasxin. Te Matatías, tcwal Amósxin. Te Amós, tcwal Nahumxin. Te Nahum, tcwal Eslixin. Te Esli, tcwal Nagaixin. ²⁶ Te Nagai, tcwal Maat-xin. Te Maat, tcwal Matatíasxin. Te Matatías, tcwal Semeixin. Te Semei, tcwal Joséxin. Te José, tcwal Judáxin. ²⁷ Te Judá, tcwal Joanaxin. Te Joana, tcwal Resaxin. Te Resa, tcwal Zorobabelxin. Te Zorobabel, tcwal Salatielxin. Te Salatiel, tcwal Nerixin. ²⁸ Te Neri, tcwal Melquixin. Te Melqui, tcwal Adixin. Te Adi, tcwal Cosamxin. Te Cosam, tcwal Elmodamxin. Te Elmodam, tcwal Erxin. ²⁹ Te Er, tcwal Josuéxin. Te Josué, tcwal Eliezerxin. Te Eliezer, tcwal Jorimxin. Te Jorim, tcwal Matat-xin. Te Matat, tcwal Levixin. ³⁰ Te Leví, tcwal Simeónxin. Te Simeón, tcwal Judáxin. Te Judá, tcwal Joséxin. Te José, tcwal Jonánxin. Te Jonán, tcwal Eliaquimxin. ³¹ Te Eliaquim, tcwal Meleaxin. Te Melea, tcwal Mainánxin. Te Mainán, tcwal Matataxin. Te Matata, tcwal Natánxin. Te Natán, tcwal Davidxin. ³² Te David, tcwal Isaíxin. Te Isaí, tcwal Obedxin. Te Obed, tcwal Boozxin. Te Booz, tcwal Salmónxin. Te Salmón, tcwal Naasónxin. ³³ Te Naasón, tcwal Aminadabxin. Te Aminadab, tcwal Aramxin. Te Aram, tcwal Esromxin. Te Esrom, tcwal Faresxin. Te Fares, tcwal Judáxin. ³⁴ Te Judá, tcwal Jacobxin. Te Jacob, tcwal Isaacxin. Te Isaac, tcwal Abrahamxin. Te Abraham, tcwal Taréxin. Te Taré, tcwal Nacorxin. ³⁵ Te Nacor, tcwal Serugxin. Te Serug, tcwal Ragauxin. Te Ragau, tcwal Pelegxin. Te Peleg, tcwal Heberxin. Te Heber, tcwal Salaxin. ³⁶ Te Sala, tcwal Cainánxin. Te Cainán, tcwal Arfaxadxin. Te Arfaxad, tcwal Semxin. Te Sem, tcwal Noéxin. Te Noé, tcwal Lamecxin. ³⁷ Te Lamec, tcwal Matusalénxin. Te Matusalén, tcwal Enocxin. Te Enoc, tcwal Jaredxin. Te Jared, tcwal Mahalaleelxin. Te Mahalaleel, tcwal Cainánxin. ³⁸ Te Cainán, tcwal Enóxin. Te Enós, tcwal Set-xin. Te Set, tcwal Adánxin. Te Adán, tcwal Diosxin.

4

Tej toc niy'bet Jesús

(Mt 4:1-11; Mr 1:12-13)

¹ Tejtzen tjatz Jesús tuj a', bix etzxin tuj lugar Jordán. Ya at tzunxin tjak' tipemal Espíritu Santo, bix e xi' tii'n Espíritu Santo jaxin tuj jun lugar min-al xjal najl tuj. ² Npontltzen taaw il ti'jxin te niy'belte tnaablxin. E tenxin tuj lugar tzikj tx'otx' cya'wnak k'ij. Min e waa'nxin, bix tej tjapan baj cya'wnak k'ij, jotkxsen bajxin tu'n weyaj! ³ Bix e xi' tkba'n taaw il te Jesús:

—Katzen Tcwal Diosa, binchanc'a tzunj xaka te tway—tzi taaw il.

⁴ Bix aj ttzak'be'n Jesús:

—Tzin tkba'n tuj tyol Dios cyjulu: “Mas il ti'j tu'n tnmante jun xjal Dios twitzj tu'n titz'j nuk tu'n twa,”—tzi Jesús.

⁵ Bix e jaw tii'n taaw il ja Jesús jawne bix e xi' tyeec'an taaw il texin cykilca tnom twitz tx'otx'. Bix e tilxin cykilca tnom te jun niy' rato. ⁶ Bix e xi' tkba'n taaw il te Jesús:

—Cykilca kej tnom lu tuya cykilca k'inemal cyuj cxe'l nk'o'na tey, cuma te weya o chi k'o'ja, bix chi xe'l nk'o'na la' al taaw waja. ⁷ Ka ma cub maje tey nwitz a nman tzuna nwitz a, chi xe'l tzen nk'o'na tey—tzi taaw il te Jesús.

⁸ Pero aj ttzak'be'n Jesús te:

—Tzin tkba'n tuj tyol Dios cyjulu: “Nuk ja Dios cjawel cynimsa'na, bix nuk te ba'n cyajbe'ney,” tzi tyol Dios cye xjal—tztizen Jesús.

⁹ Bix e xi' tii'n taaw il ja Jesús tuj tnom te Jerusalén, bix e jaw tii'n taaw il ja Jesús maa twi' tj a Dios. Bix e xi' tkba'n taaw il texin:

—Ka jay Tcwal Dios, xoo'nx tiiba twitz tx'otx', tu'ntzen tel cyniy' xjal ti'ja jay Scy'o'na tu'n Dios ka min xcyima. ¹⁰Mlay cyima, cuma tz'i'ben tuj tyol Dios: “Chi tzaal tk'o'n Dios tsanjel tuj cya'j te clol tey. ¹¹Ejee' chi tzyulte tey tuj cyk'ab, tu'ntzen mi'n cub tz'aka twitz tx'otx' bix tu'n mi'n tzak' tkena twi' xak,” tzi tyol Dios—tzi taaw il te Jesús.

¹²Pero aj tzak'be'n Jesús te:

—Tzin tkba'n tuj tyol Dios cyjulu: “Mi'n tz'oc cycyakwusa'na Dios tu'n toc cyk'o'na tuj malbil te, ka jax tu'n,” tzi tyol Dios—tzi Jesús te taaw il.

¹³Tej mix e xcyeba taaw il tu'n t-xi' tnuman Jesús ja, bixsen e cyaj tk'o'n taaw il jaxin te ayolte juntl k'ij tu'n t-xcye tibaxjin.

Tej ttzyet taak'en Jesús

(Mt 4:12-17; Mr 1:14-15)

¹⁴Bix e pon meltz'aj Jesús tuj departamento te Galilea. Nim tipemalxin k'i'n tu'nxin tu'n Espiritu Santo, bix e pon baj tpochelelxin tuj cykilca tnom nkaylex ete'. ¹⁵Ocx Jesús cyuj camon jaa' te xnak'tzabl tyol Dios, bix ak'xin kbalte cye xjal ti tten tyol Dios, bix elxin ba'n tuj cywitz cykil xjal.

Tej tpon Jesús tuj tnom Nazaret

(Mt 13:53-58; Mr 6:1-6)

¹⁶E ponxin tuj tnom te Nazaret jaa' otk t'z'iyxin. Tej tpon k'ij te ajlabl, ocxxin tuj camon jaa' te k'umlte xnak'tzibil ti' tyol Dios, tixex tten tu'nxin. Tej tpon tumel, bix e jaw we'xin cywitz xjal tu'n tjaw tsi'nxin tyol Dios cywitz xjal. ¹⁷Bix e tzaj tii'n jun xjal j-u'j tz'i'ben tu'n Isaias, jxin tyolel Dios. Bix el tlicy'pe Jesús u'j, bix e tjoyxin, bix e cnet tu'nxin alcyey e tjoyxin. Bix ak'xin s-ilte cyjulu: ¹⁸“Te weya o k'oj Espiritu Santo tu'n Dios, cuma o chin scy'eta tu'n Dios tu'n t-xi' nk'umena jun ba'n tpochelel te colbil cye xjal. Inayena sma'n te onlte ke mebe xjal, bix tu'n cytzokpaj kej ete' tuj cyk'ab ke enemiwa, bix tu'n tjket cywitz xjal moš, bix tu'n cyclet kej xjal at tjak' cycawbil kej yajlal xjal, ¹⁹bix tu'n t-xi' nk'umena ma pon tumel tu'n ttzaj t-xtalbil Dios cyibaj xjal.” ²⁰Ejee' tzunj yol lu e jaw tsi'n Jesús tuj tuj te Isaias. Bix e jaw tbal'k'nxin u'j bix e xi' tk'o'nxin te c'ojlal u'j, bix e cub kexin tu'ntzen t-xi' ttx'olba'nxin tyol Dios cye ke xjal ete' tuj camon jaa'. Bix oc txle cywitz xjal ti'jxin. ²¹Bix e xi' tkba'nxin cye:

—Jyol ma cybiy ja'lecuwe, ja'le tzuna matzen japan baj tuj chic'aj cywitz—tzi Jesús.

²²Cykil xjal el cyniy' ti'j ti e tkba Jesús, bix e jaw klee'ke ti'j otk tkbaxin jax xinj xjal at tulel, bix ak' ke xjal yolel cyxolx:

—¿Pero yaa'mpatzen jxjal lu nuk tcwal José?—tzi ke.

²³Bix e xi' tkba'n Jesús cye:

—Ntzki'na mas yaj cykba'y weya cyjulu: “Yeec'amne ka jawnex tipemala. O kbiya e bint nim tu'na tuj tnom te Capernaum. Binchamtzen tzalu kxola, ejoo'ya xjal te ttanema, tu'ntzen kocslana ti'ja,” tzi cybela. ²⁴Ju'tzen cykba'y, cuma chin elel cyiiq'uena, cuma jun tyolel Dios tuj cyex cytanem n-el cyiiq'uen. ²⁵Cxe'l nkba'na cyey ju' pjel weya tisen te Elías, jxin tyolel Dios nejl. At nim xuuj viuda tuj tx'otx' te Israel tej tcub jun weyay tuj Israel tu'n mintii' jbal e cub oxe jnabk'i' tuya kak xjaw. ²⁶Pero yaa'n ju' e xi' ch'k'et Elías tu'n Dios cyey'lcyey viuda tuj ttanemxin, sino ju' e xi' ch'k'et-xin cyey'lte jun viuda tuj juntl tnom Sarepta tbi, tuj tx'otx' te Sidón. ²⁷Bix ju' pjel weya tisen e baj tej xin tyolel Dios Eliseo. At jun tyem at nim xjal tuj Israel nim el k'ey cyk'ab bix cyken tu'nj yabel lepra, pero min-al jun te ttanemxin e tk'anexin. Jun wikxiti xjal e tk'anexin, jatl jxin Naaman te tnom te Siria—tzi Jesús cye aj Nazaret.

²⁸Tej cybinte kej xjal tuj camon jaa' tyol Jesús ju'wa, e tzaj cyk'oj xjal, ²⁹bix e jaw we' ke xjal bix e xi' cylich'o'nxin Jesús, bix e xi' cykitexin twitz tx'otx' tu'n ttx'ax'n tnom. Toc Nazaret t'u'j jun witz. Bixsen e xi' cyii'nxin Jesús twi' witz tu'ntzen tetz cyxoo'nxin twitz xak. ³⁰Pero nuk tisen tii' tetz jilpaj Jesús cyxolxin, bix e cu'x meltz'aj Jesús masa t-xee' witz.

Jun xjal otk tz'oc biman ti'j

(Mr 1:21-28)

³¹Bix e pon Jesús tuj tnom te Capernaum tuj departamento te Galilea. Jaca k'ij te ajlabl ocx Jesús tuj camon jaa', bix e xi' tk'o'nxin xnak'tzibil cye xjal. ³²E jaw klee' ke xjal ti'j t-xnak'tzibilxin, cuma e xnak'tzanxin tuya nim tipemal tyolxin. ³³At jun k'ij e pon junxin xjal tuj camon jaa'. Otk tz'oc biman ti'jxin, bix e jaw s-inxin:

³⁴—¡Ko tk'a'cja, Jesús te Nazaret! ¿Mapa tzula te k'olxte keya ejoo'ya biman tuj castiwa? Ntzki'na alcyey. Jay Tcwal Dios mintii' tila—tzi biman te Jesús.

³⁵Bix e xi' tkba'n Jesús:

—C'ola bix texa tuj ja xjal lu—tzi Jesús.

Tbinte biman tyol Jesús, bix e cub t-xoo'n jxjala twitz tx'otx' cywitz xjal tu'n tišj xjal, bix etz biman tuj. Pero min išj te xjal. ³⁶ Nimxsen e jaw klee' ke xjal ti'j lu, bix e jaw yol cyxolxxin:

—¿Ti tten nuk tu'n tyolxin nchi etz ke biman tuj jun xjal? Nimxsen tipemalxin—tzi ke xjal. ³⁷ Bix el tpočbalelxin e pon cyuj tnom ti'jxe Capernaum.

Tej tk'ane Jesús ti'j xjux tjii' Pedro
(Mt 8:14-15; Mr 1:29-31)

³⁸ Tej tetz Jesús tuj camon jaa', e ponxin tuj tja Simón. Attzen tjii' Simón tuya, bix yaabxuj tu'n nim cyak ti'jxuj. Ejee' tzunj xjal ete' tuj tja Simón e xi' cykanen te Jesús tu'n tk'anenxin ti'jxuj. ³⁹ Bix e pon lk'e Jesús jaa' tocexuj, bix e xi' tkba'nxin tu'n tetz jyabel tuj t-xumlalxuj, bix nwe'tl cyak ti'jxuj. Tex rato njaw we'tlxuj, bix ak'xuj k'olxte waabj cye xjal tuj jaa'.

Nim xjal ul tnaabl tu'n Jesús
(Mt 8:16-17; Mr 1:32-34)

⁴⁰ Te xsunj k'ij te ajlabl, bix mitkna'x tex k'ij, bix e pon nimtl xjal cyuya yaab jaa' ta' Jesús. Bix e cub tk'o'n Jesús tk'ab tibaj juun yaab, bix ul cynaabl tex hora. ⁴¹ Bix nim xjal e pon toc biman cyi'j, bix e xi' tkba'n Jesús cye biman tu'n cyel cyi' xjal. Tejtzen cyel, e jawxsen s-inke: “Jay Tcwal Dios,” tzi ke biman te Jesús. Pero bix e xi' tnyo'n Jesús ke biman tu'n mi'n chi yolentl, cuma el cyniy' biman ti'j ka jaxin Jscy'o'n tu'n Dios.

Tej tbet Jesús cyuj tnom te Galilea te kbalte tyol Dios
(Mr 1:35-39)

⁴² Te juntl k'ij, te jya'x, bix iy'xin tja Simón, bix e xi'xin jaa' min-al xjal. Nim xjal e jyon ti'jxin, bix e cnet-xin cyu'n, bix e cubsanke cywitz texin tu'n mi'n tziy'xin cyxol. ⁴³ Pero e xi' tkba'nxin cye:

—Il ti'j tu'n nxi'ya cyuj cabtl tnom, tu'n t-xi' nyeec'ana cye niy'tl xjal ti tten tcawbil Dios, cuma sma'n kena tu'n Dios te kbalte tzul tcawbil Dios—tzi Jesús.

⁴⁴ Ju'tzen tten tej t-xi' Jesús cyuj cytanem judío. Oj tponxin tuj juun tnom, bix ocxxin tuj camon jaa', bix ak'xin xnak'tzalte tyol Dios.

5

Nim quiš tzyet tu'n tipemal Jesús
(Mt 4:18-22; Mr 1:16-30)

¹ At jun k'ij wa'lc'a Jesús tzii' jun nima' Genesaret tbi. Nim xjal e chmet ti'jxin te ebilecte t-xnak'tzbilxin ti' tyol Dios, bix oc cycutz'en cyiib ti'jxin. ² Bix oc nojxin ti' ca'ba barc min-al xjal cyuj nka tzii' a'. Cyaak'en jxin cyaaw barc tzyul quiškexin. Otktzen chi cyaj cyk'o'nxin cybarcxin, bix nchi txjon tzunxin cyxiy'paxin te k'iljawtz quiš. ³ Bix ocx Jesús tuj jun barc, bix e xi' tkanenxin te taaw barc tu'n taac lk'e ch'intl barc tuj a'. Simón tbi taaw barc, bix juntl tbin Pedro. Bix ocx ke Jesús tuj barc, bix ak'xin xnak'tzal cye xjal.

⁴ Tejtzen tba'j xnak'tzanxin cye xjal, e xi' tkba'nxin te Simón:

—Ko'tzen. K'inx barc maa jaa' ta' nim t-xee' a', bix cyxoo'nxa cyxiy'pay tuj a', tu'ntzen tjat'z cyquiša—tzi Jesús.

⁵ Pero aj ttzak'be'n Simón te Jesús:

—Taat, ma tz'ex cykil ak'bil kquišena, bix mintii' xjatz ku'na. Pero c'oquel ke nc'u'ja ti' tyola. Cxe'l kxoo'na kxiy'paya tuj a' juntl maj—tzi Simón te Jesús.

⁶ Bix e cu'x cyk'o'nxin cyxiy'paxin tuj a'. Tej tjat'z, nojnexsen tuya quiš, ya nuk tu'n tel rotjtl cyxiy'paxin. ⁷ Bix mix e xcyebatlkekin tu'n tjat'z tjak' talel. Ju' tzunj e xa' cyyeec'a Simón cyk'abxin cyuya ke tuyaxin te cyej cabtl cyuyaxin, entera xsunkexin e jatz onente, bix cyca'bel cybarcxin e noj tuya quiš, ya nuk tu'n tak' xe'l bajtlke tjak' a' tu'n talel.

⁸ Tejtzen toc tcyey'en Simón Pedro ti otk baj, e cubxsen majexin twitz Jesús, bix e xi' tkba'nxin:

—Taat, ikch mi'n tzaj lk'ey wi'ja, cuma aj il kena—tzi Pedro. ⁹ E tkbaxin ju'wa tu'nj e jaw klee'xin cyuya ke ak'anal tuyaxin ti'j nimxsen quiš e jatz cyu'nxin tu'n tipemal tyol Jesús. ¹⁰ Jax ju'x e jaw klee' ke'j xin Jacobo bix Juan, ke'j xin tcwal Zebedeo, bix tuya Simón ejee'tzen xinja cyaaw barc.

Bix e xi' tkba'n Jesús te Simón:

—Mi'n tzaj ntziya ti'ja. Tetzen ja'lewe mi'ntzen tz'ak'anantl tey k'iljawtz quiš, sino jatltzen teja taak'en tu'n t-xi' tk'umena cye xjal tu'n cyoc wuyena—tzi Jesús te Pedro.

¹¹ Bixsen e jatz cyii'nxin cybarcxin tuj a' bix e cyajke twitz tx'otx', bix e cyaj cyk'o'nxin cykilca, bixsen e xi' cytzyu'nxin cyaak'enixin tuya Jesús.

Tej tk'anj jun xjal otk tzaj k'ey

(Mt 8:1-4; Mr 1:40-45)

¹² At junlt k'ij e pon Jesús tuj jun tnom. Bix atzen junxin xjal ncub tu'n jun yabel lepra tbi. Tejtzen toc tcyeyen jxin yaab ja Jesús, e cubxsen majexin twitz Jesús, bix e xi' tcubsa'nxin twitzxin:

—Taata, n-el nni'ya ti'ja at tipemala tu'n tk'anena wi'ja, ka ba'n tuj twitza—tzi yaab.

¹³ Bix e xi' tnuqpa Jesús tk'ab tibaj yaab, bix oc tmoco'nxin, bix e xi' tkba'nxin:

—Ba'n tuj nwitzza. Tu'n tel yabel ti'ja—tzi Jesús.

Bix tzinx yolen Jesús tej tel yabel ti' xjal. ¹⁴ Bix e xi' tkba'n Jesús te:

—Mi'n txi' tkba'na cye xjal ti ma baj ti'ja. Nuk o'cx tej xin pala cxe'la tyeeec'a tiiba ka ba'ntla, bix k'oncx jtoybila texin tisen o tkba Moisés, tu'ntzen t-xi' tkba'n pala ya ma txjeta. Yeeec'ax cyexin tu'n tel cyniy'xin ti'j at wipemala tu'n nk'anena xjal—tzi Jesús.

¹⁵ Pero amale otket tkba Jesús te yaab tu'n mi'n baj ttx'olba'n ka otk k'anj, pero elx t'zit t'pochal tk'anbilxin. Tzajnexsen e tzaj lk'e nimxsen xjal ti'jxin te ehitte tyolxin bix tu'n cyk'anj. ¹⁶ E pon ke xjal te jyolte, pero at maj el lk'exin cyi' xjal tuj jun lugar min-al xjal tuj, bix e na'nxin Dios.

E k'anj jun xjal tu'n Jesús min yucchtl t-xumlal

(Mt 9:1-8; Mr 2:1-12)

¹⁷ At jun k'ij e xi' tk'o'n Jesús xnak'tzibil cye xjal. Twitztzen Jesús at cab xjal tej cloj cyiwxsen tuj cyley judío, fariseo tbi cyclojexin, cyuyax cab tx'olbal ley. Ejee' tzunxin e pon otk chi tzaj tuj nim tnom tuj departamento te Galilea, bix at juun otk chi tzaj tuj departamento te Judea bix tuj tnom te Jerusalén. Bix at tipemal Dios tuya Jesús tu'n tk'anen ke yaab. ¹⁸ Nxnak'tzan Jesús tej cypon cab xinak. K'i'n jun xjal twi' jun wetbil cyu'nxin min yucchtl t-xumlal. Cyajxin occkexin tunwen tu'n tcub cyk'o'nxin yaab twitz Jesús. ¹⁹ Pero mix ocxe cyu'nxin, cuma nim xjal. Ju' tzunj e jaxkexin twi'yen tu'n cyjapanxin twi'jaa', bix e jaw cye'obchexin twi'jaa', bix e cu'x cyk'o'nxin yaab tuyax wetbil. E cu'pan twitz Jesús cyxol xjal. ²⁰ Tej toc tcyeyen Jesús yaab cyuyax kej xjal k'ilte oc ke cye'u'j ti'jxin tu'n tk'anj yaab tu'nxin, e xi' tkba'nxin te yaab:

—Tey, ma najset tila—tzi Jesús.

²¹ Tejzen cybinte ke tx'olbal ley bix ke fariseo ja yol ka otk najset til yaab tu'n Jesús, bixse e tzaj cyk'o'jxin, bix ak'kexin kanlte cyxolxxin:

—¿Ti tten nyole ja xjal lu ka junx tuya Dios? Ncub t-xmuccha'nxin Dios, cuma min-alte jun ba'n tnajsanthe til jun xjal, nuk o'cx te Dios—tzi ke xjal crinsipal cyxolx.

²² N-el najtl tniy' Jesús ti'j alj nyolen cyxolx, e xi' tkba'nxin cye:

—¿Tikentzen ncwa' cybisena ka mlay bint wu'na tu'n tnajset cyil xjal? ²³ Ba'n t-xi' nkba'na te yaab: “Ma najset tila,” bix ba'n t-xi' nkba'na: “Tu'n tjaw we'y bix taja tjay.” Tuj cywitza ¿alcy mas nim t-xi'len tu'n t'bhint tej yaab? ²⁴ Cbinel wu'na alcyey mas nim t-xi'len cyej tuj cywitz tu'n t'bhint, jaj tu'n tk'anj ja yaab lu, tu'ntzen tel cyni'ya wi'ja at wipemala tzalu twitz tx'otx' tu'n tnajset cyil xjal wu'na, inayena, Jsma'n tu'n Dios tu'n ntena cyuya xjal—tzi Jesús. Ju' tzunj e xi' tkba'nxin tej xjal min yucch t-xumlal:

—Ebintz nyola. Wey'tztzen, k'inx twetbila, bix cutxetzen tjay—tzi Jesús te yaab.

²⁵ Tzinx yolen Jesús tej tjaw we' yaab, bix e jaw tii'n twetbil, bix aj tja. Nimxsen e jaw tnimsa'n yaab tbi Dios. ²⁶ Bix cykil xjal e jaw klee', bix e jaw cynimsa'n tbi Dios. Bix e cub tzi cyi', bix e xi' cykba'n cyjulu: “¡Bajxsen kla' jma kil ja'lewe!” tzi ke.

Tej ttzaj txquet Leví tu'n Jesús

(Mt 9:9-13; Mr 2:13-17)

²⁷ Tbjalnxetzen ju'wa, bix el bet Jesús tuj tnom. Bix tej texxin twitz jun jaa' jaa' n-ele kanet alcabala, taac tcyeyenxin tunwen k'uklecx jxin xjal k'ilbelte alcabala, Leví tbi. Bix e xi' tkba'nxin te Leví:

—Lpetzen wi'ja tu'ntzen toc te nxnak'atza—tzi Jesús.

²⁸ Bix e jaw we' Leví, bix e cyaj tk'o'nxin cykilca, bix oc lpexin ti' Jesús. ²⁹ Tu'n tyeeec'atexin a tanemxin ti' Jesús, bix iy' tiy'sa'nxin jun nink'ij tjaxin. Nim chmol alcabala bix nim xjal tuyax Jesús e pon tja Leví te waa'. ³⁰ Kej xjal fariseo bix ke tx'olbal ley oc cye'eyenxin jlu, bix el ka' tuj cywitzxin, bix e xi' cykba'nxin cye t-xnak'atz Jesús:

—¿Tikentzen nchi waa'ncxey cyuya chmol alcabala bix tuya mastl aj il?—tzikexin.

³¹ Bix e xi' tkba'n Jesús cyexin:

—Kej xjal mintii' yabel cyi', mlay che'x tuya k'anel. Ja tzunkej xjal yaab, il ti'j nche'x tuya k'anel. ³² Ju'x xsunkej xjal aj il. Min o chin ula te cyej xjal mintii' cyil tuj cywitz tu'n tcyaj cyk'o'n cyil, sino o chin ula te cyej xjal n-el cyniy' ti'j aj ilke tu'n tul cyil tuj cye'u'j—tzi Jesús.

Jun kanbil ti'j epaj weyaj
(Mt 9:14-17; Mr 2:18-22)

³³ Mas yajtl at cabtl xjal e xi' cykba'n te Jesús:

—¿Titzen tten kej tey t-xnak'atz min ncub cypa'n weyaj? Ja tzunkej te Juan t-xnak'atz, nim maj ncub cypa'n weyaj bix nchi na'n Dios, tisex kej xin lepch ti' cyley fariseo. Ja tzunkej tey t-xnak'atza, min ncub cypa'n weyaj. Nuk nchi waa'ncye—tzi ke xjal te Jesús.

³⁴ Aj ttzak'be'n Jesús:

—¿Titzen nbaj ti' jun mejoblanel? Oj nchi pon xjal ti' mejoblanel, ¿tzimpa cub cypa'n weyaj? Min, cuma tumel tu'n cyiy'san xjal tuya chmillbaj. ³⁵ Ju'tzen cye nxnak'atza. Tisen nchi tzalaj ke xjal tuya chmillbaj, ju'xse nchi tzalaj ke nxnak'atza wuyena, cuma ntiina cyuya. Mas yaj, oj wel k'i'na cyi'j, ejee'tzen nxnak'atza chi cyjel tuj bis bix cweltzele cypa'n weyaj—tzi Jesús.

³⁶ Bix e xi' tk'o'n Jesús juntl xnak'tzibil cye xjal. E xi' tkba'nxin:

—Min-al jun xjal jac'a jatz tii'n jun tkiy' remyent ti' jun ac'aj xbalen tu'n tcu'x te remyent ti' jun xbalen k'anak, cuma yaa'n tumel tu'n tcyaj jun oyaj ti'j ac'aj, bix ju'x jremyent ac'aj oj tcu'x ti'j xbalen k'anak, tii'n tcye'nc mlay tz'el junx. ³⁷ Jax min-al jun xjal cwel tk'o'n vino ac'aj tuj jun tz'u'n k'anak, cuma ka ma cub tk'o'n ju'wa, q'uelel rotj tz'u'n tu'n vino oj tel ipc'aj. Ju'tzen tten cxe'l tz'u'n tuj il tuyax vino q'uelel koj. ³⁸ Ju' tzunj, oj ncub ac'aj tuj tz'u'n, il ti'j tu'n tcub tuj tz'u'n ac'aj. ³⁹ J-ac'aj vino tisenj weya nxnak'tzibil. Ac'aj jnxi' nxak'tzana, bix mlay tmojba tiib tuyaj xnak'tzibil te ootxa. Kej xjal cycy'i nxnak'tzibila tisen kej xjal nuk jaj vino k'anak cyaj, bix cycy'i vino ac'aj. “Masxse ba'n jk'anak,” tzi ke.

6

Tej cyak' ke t-xnak'atzxin pi'x'ulbilte twitz triwa tuj k'ij te ajlabl
(Mt 12:1-8; Mr 2:23-28)

¹ Te juntl maj exc'a Jesús tuj triwa cyuya ke t-xnak'atz. Tuj'a jun k'ij te ajlabl, jk'ij xjan cyxol judío. Bix iy' cyii' ke t-xnak'atzxin cab twitz triwa, bix el cysk'uchexin t-xc'omel tuya cyk'abxin, tu'n t-xi' cywaa'nxin twitz. ² Lepchtzen cyxi' kej xjal fariseo ti' Jesús, bix tejtzen toc cyye'yenxin n-el cyii'n t-xnak'atz Jesús tspigayil triwa, n-octzen cykaneltxin te Jesús:

—¿Tikentzen tzin tcuyana tu'n tel cyii'n tuyey twitz triwa tuj ja k'ij lu te ajlabl? Tzin tkba'n ley yaa'n tumel jtzin cybincha'na—tzi ke fariseo, cuma cyiw tuj cyley.

³ Aj ttzak'be'n Jesús cyexin:

—¿Bajxpatzen txa' cyye'yena tuj tyol Dios ti e baj te kiy'jil David cyuya ke tuyaxin tej toc nim tak' weyaj cyexin jun maj? ⁴ Ocx David tuj tja Dios bix etz tii'nxin jpan k'o'n te Dios. Amale tzint tkba'n ley ja xjan pan lu o'cx te cyej xin pala ba'n t-xi' cywaa'nxin, pero e xi' twaa'n David, bix e xi' tk'o'nxin te cywa ke tuyaxin, cuma otkxsen chi cyimxin tu'n weyaj. Katzen ba'n o txi' twaa'nte David jpan bix tu'n t-xi' tk'o'n cye ke tuyaxin, jaxse ju'x weya, mas ba'n tu'n ncuyanteya tu'n t-xi' cywaa'n nxnak'atza triwa ja'lewe, ⁵ cuma inayena, Jsma'n tu'n Dios tu'n ntena cyuya xjal, taaw jk'ij te ajlabl—tzi Jesús cye fariseo.

Junxin xjal otk tz'el tanem tk'abxin
(Mt 12:9-14; Mr 3:1-6)

⁶ Tuj juntl k'ij te ajlabl, ocx Jesús tuj juntl camon jaa', bix ak'xin xnak'tzal cye xjal. Bix at junxin xjal otk tz'el tanem tk'abxin. Min yuccht tk'abxin te tmank'abxin. ⁷ Bix ete' tzunj xin tx'olbal ley bix ke fariseo. Bixsen oc cyc'u'jxin ti' Jesús ka tu'n tk'anenxin cyi' xjal tuj k'ij te ajlabl, tu'ntzen tcub tz'akxin tuj cyexin cyley. ⁸ Pero el tniy' Jesús ti'j ti iy' tuj cyc'u'jxin. Ju' tzunj e xi' tkba'n Jesús tej xin cyimnen tk'ab:

—We'wey, bix ju'tzen cwel we'y cywitz xjal—tzi Jesús.

Bix e cub we'xin jaa' otk tkba Jesús.

⁹ Bix e xi' tkba'n Jesús cye fariseo:

—Cxe'l nkanena cyej, ¿tzimpa tcuyan tley Moisés tu'n t'btin jun ba'n tuj k'ij te ajlabl, bix ka tu'n t'btin jun ka'? ¿Tzimpa tkba'n kley tu'n tk'anj xjal, bix ka tu'n t'byet xjal?—tzi Jesús, cuma el tniy'xin ti'j e cyajbe tu'n t'byet-xin.

¹⁰ Ocx tcye'yen Jesús tuj cywitzxin cykil xjal, pero min-al ak'. Bix e xi' tkba'n Jesús te yaab: —Nukpinx tk'aba—tzi Jesús.

E xi' tnu'kpi'nxin tk'abxin, bix ul tnaabl tk'abxin. ¹¹ Pero yalx cye fariseo, nimxe e tzaj cyexin cyk'oj, bix nim e yolenkexin tu'n ti tten tu'n tcub cybyo'nxin.

Tej tjaw jyet cablaaj t-xnak'atz Jesús
(Mt 10:1-4; Mr 3:13-19)

¹² Attzen jun k'ij ex Jesús na'l Dios cyxol witz jaa' min-al xjal. Ex ak'bil tna'nxin Dios. ¹³ Tej tul k'ij, e tzaj ttxco'nxin kej xin oc lpe ti'jxin, bix etz tscy'o'nxin cablaaj t-xnak'atzxin cyxol, bix e xi' tkba'nxin cye:

—Ejee'y chi oquel te nxela—t̄ixin.

¹⁴ Kej cablaaj t-xelxin ejee' tzuñj lu: Simón, jxjal oc tbi te Pedro tu'n Jesús, bix tuyax titz'en Pedro, Andrés, tuya Jacob, tuya Juan, tuya Felipe, tuya Bartolomé, ¹⁵ tuya Mateo, tuya Tomás, tuya Jacobo, tcwal Alfeo, tuya Simón, jxjal tk'on tiib tuj k'oj nejl tu'n cytzakpinte judío tjak' tcawbil Roma, ¹⁶ tuya Judas, tcwal Jacobo, tuya Judas Iscariote, jxjal e xi' tq'ueyen Jesús tuj cyamecy mas yaj.

Tej t-xi' t-xnak'tza'n Jesús nim xjal

(Mt 4:23-25)

¹⁷ Tej tetz tscy'o'nxin kej t-xnak'atzxin lu, bix e cu'x tii'nxin ke t-xnak'atzxin, bix e ponkexin tuj jun chk'ajlaj. Bix nimxsen xjal e pon jaa' wal'c'a Jesús. At xjal te Judea bix te Jerusalén bix at xjal te mlaj tx'otx' t̄zii' mar te mediterráneo cyej tnóm te Tiro bix Sidona. ¹⁸ E pon ke xjal te ebilte t-xnak'tzibilxin bix tu'n cyk'anj tu'nxin. Bix kej otk tuz'oc biman cyi'j, bix el tii'nxin. ¹⁹ Bix cykilxse xjal oc cyipen tu'n toc cynaco'n jaxin, cuma tej tpon canan cyk'ab ti'jxin, n-ulttzen cynaabl tu'n tipemalxin.

Kej xtalbil bix kej q'uixc'aj

(Mt 5:1-12)

²⁰ Bix oc tcyeyen Jesús cywitz t-xnak'atzxin, bix e xi' tkba'nxin cye cyjulu:

—Ejee'y mebe, at t-xtalbil Dios cyibaja, cuma ck'ojel cyej tu'n cynawena tuya Dios. ²¹ Ejee'y at weyaj cyey ti' Dios ja'lewe, at t-xtalbil Dios cyibaja, cuma cnool cyanema. Ejee'y nchi ok' ja'lewe, at t-xtalbil Dios cyibaja, cuma chi tzalajela. ²² Ka ma chi el iiq'uena cyu'n xjal, bix ka ma chi el xoo'na cyu'n xjal, bix ka ma chi xmuçchaja cyu'n xjal, bix ka ma tkbjaj ka' xjalkey nuk tu'n nj nche'x lpey wi'ja, ²³ ka ju' n-oc bint cyi'ja, chi tzalajxa bix chi tenx aleyre, cuma jaxte ctk'a' Dios nim t-xel tuj cya'j. Ju'x e baj cye tyolel Dios te ootxa.

²⁴ Pero ja tzuñkej k'ina, lastimke, cuma nuk ja'lewe at cyk'inemal. ²⁵ Bix xsunkej nojne cye'uj ja'lewe, lastimke, cuma c'oquel tak' weyaj cye. Bix xsunkej nchi tze'n ja'lewe, lastimke, cuma tzul bisbajil cye bix chi ook'el. ²⁶ Bix xsunkej njaw nimset cybi cyu'n cykilca xjal te twitz tx'otx', lastimke, cuma ejee' tzuñja tisen kej x̄tak' kbal tyol Dios te ootxa. Jax ju'xkewe, e jaw nimset cybi cyu'n cykilca xjal.

Il ti'j tu'n toc cyak' kaj'oj ke

(Mt 5:38-48; 7:12)

²⁷ Pero jatzen cyey, ejee'y n-oc ebinte nyola, cxe'l nkba'na cyey il ti'j c'oquel cyak' cyey kej xjal nchi k'ojl cyi'ja. Cyk'onx jun ba'n te cyej n-el cyi'iq'uen ejee'y. ²⁸ Cykanenxa te Dios tu'n ttzaj tk'o'n xtalbil cyibaj kej nchi sbun cyi'ja. Chi na'na Dios cyi'kej nchi yasen cyi'ja. ²⁹ Ka ma txi' ttz'ajen jun xjal tk'o'txa, cxe'l tk'o'n tla junte tu'ntzen t-xi' ttz'ajen. Ka ma tz'el tii'n jun xjal tcapkeyena, bix ka taj tuyax tcamisa, k'onxa te. ³⁰ Ka at jun xjal ma tkane jun tiixja tey, k'onxa te. Ka ma tz'el talk'a'n jun xjal ti'ja, mi'n cub ttzyu'na tu'n tel tii'na te j-otk tz'el talk'a'n. ³¹ Ka taja tu'n t̄bint jun ba'n tey cyu'n xjal, tneel t̄binchay jun ba'n cye. ³² Ka ma tz'oc tak' tey nuk jaj xjal n-oc tak'a te, yaa'n jawnex jlu twitz Dios, cuma jax ju'x kej xjal aj il n-oc cyak' cyuya cye. ³³ Bix ka ma t̄binchay jun ba'n nuk tej xjal o t̄binka jun ba'n tey, yaa'n jawnex jlu twitz Dios, cuma jax ju'x kej aj il nbint cyu'n ju'wa. ³⁴ Bix ka nmanana pwak nuk tej xjal jaa' cmanalatla mas yaj, yaa'n jawnex jlu twitz Dios, cuma jax ju'x kej xjal aj il chi manal cyej xjal jaa' ba'n tu'n cymananatl cyxol. ³⁵ Pero weya, cxe'l nkba'na cyey, il ti'j c'oquel cyak' cyey kej xjal nchi k'ojl cyi'ja, amale mi'nt tz'oc cyak'a cye. Bix il ti'j chi binchala jun ba'n cye, amale mi'nt cybincha jun ba'n cyey. Bix il ti'j chi manala cyuya, amale mi'nt cymana cyey te t-xel. Ka ma bint cyu'na ju'wa, tk'a' Dios nim t-xel te cyey, bix ejee' tzuna chi yec'lte k'i'ntzen tnaabl jawnex Dios cyu'na, cuma ntzaj tk'o'n Dios t-xtalbil t̄baj kej xjal ka' bix min nchi k'on chjonte te. ³⁶ C'oquel cyk'o'na lastim cye xjal, t̄isente Kman Dios nk'on lastim cyey.

Mi'n chi yolena ka' cyi' xjal

(Mt 7:1-5)

³⁷ Mi'n chi yolena ti' cyuyey, bix mi'n cykba'y ka'ke cyuyey, cuma ka ma bint cyu'na ju'wa, ju'x pjel cyi'ja. Pero ka ma cub cynajsa'na cyil ke cyuyey oc cybincha'n cyi'ja, jax cwel najset cyey cyil tu'n Dios. ³⁸ Ka ma chi xtalena cye xjal, jax chi xtalēl ke xjal cyey. Cnool cypay cyu'n tuyaj ba'n, bix cwelx cutz'et, bix cjawel t̄ztet, tu'ntzen tcu'x nim tuj, hasta ojxe ttzt'et. N-oc tcyeyen Dios la' ti' cyeey nxi' cyk'o'n cye xjal, bix ctk'a' t-xel cyeey—t̄zi Jesús cye t-xnak'atz.

³⁹ Jax ju'x e cyaj tk'o'n Jesús cabtl techel cye:

—¿Ba'mpa t-xi' tyeec'an jun moš be te juntl moš? ¿Yaa'mpatzele junx chi x'e'l tz'ak tuj jun jul? ⁴⁰ Jaxse ju'x jun maystro tuya jun t-xnak'atz. Ka min tz'el tniy' maystro ti'j, jax cyjel t-xnak'atz min tz'el tniy' ti'j, cuma jun xjal nxnak'tzan mlay tz'el tniy' ti'j mas twitz t̄maystro.

Bix la' alcyce n-oc t-xnak'tza'n maystro te, jaxsen cbinel tu'n. Junxsen q'uelele t-xnak'atz tuya maystro.

⁴¹ ¿Tikentzen nyolena ti'j jun tuyeey tocx jun ni' tz'is tuj twitz, pero min tz'el tni'ya ti'j tuj tey tocx jun ztee'? ⁴² ¿Tiken nxi' tkba'na te tuyeey: "Q'ueletz wii'na ni' tz'is tuj twitza," tziy, pero min tz'el tni'ya ti'j at jun ztee' tuj tey twitz? Jay at tpaalta, pero nbint tu'na tisenc'a mintii' tila. K'imetz jtey nejl jzee' tuj twitza, tu'ntzen ba'n tetz tii'na jte tuyeey tocx tuj twitz.

Tu'nj cybinchen xjal q'uelel cyniy'a cyi'j
(Mt 7:15-20)

⁴³ Jun tken lo'pj ba'n mlay tak' twitz yaa'n ba'n. Jax ju'x jun wik ztee' yaa'n ba'n mlay tak' twitz ba'n. ⁴⁴ Q'uelel kniy' ti'j ka ba'n jun ztee' bix ka yaa'n ba'n la' tii'n twitz. Mlay tz'el lo'pj te higo ti' jun ztee' at ch'utel, bix jax ju'x mlay tz'el lo'pj te uva ti' jun skman ch'i'x. ⁴⁵ Ju'tzen japanina ke xjal. Kej xjal ba'n chi binchal ba'n, cuma tuj cyanem ta' ba'n. Pero kej xjal yaa'n ba'n, chi binchal ka', cuma tuj cyanem ta' ka'. Ti' yolen jun xjal tzin tyeeec'an ti ten tuj tanem.

Jun techel cyi'j ca'ba tk'uklel jaa'
(Mt 7:24-27)

⁴⁶ ¿Tikentzen tzin cykba'na weya: "Kaawiya jay," tzikey, pero min cybiy nyola? ⁴⁷ Kej xjal tzin cybi'n nyola bix nbint cyu'n, cxe'l nkba'na cyey, ⁴⁸ ejee' tzunja tisen jun xjal njaw tbincha'n tja ba'nxix cyjelel. Tneel, cjawetz tii'n tx'otx' yaa'n cyiw, tu'n tcnet cyiw tx'otx'. Bix cwelex tk'o'n tsimiyentel jaa', bix cjawel tbincha'n jaa'. Ojtzen tcub nintzaj jbal, bix ojtzen tjaw noj nima' bix c'oquell punntz'aj ti' jaa', mlay yucch jaa' bix mlay txi' tuj il, cuma binne tjan. ⁴⁹ Pero kej xjal tzin cybi'n nyola pero min cyniman, ejee' tzunja tisen jun xjal min cyajxix tja ba'n. Min cu'x tk'o'n tk'uklel jaa', sino look' naj ncu'x tk'o'n tuj tx'otx'. Ojtzen toc punntz'aj a' ti' tja, niy' tz'aktl jaa', bix ju'tzen e pja' jaa'—tzi Jesús cye t-xnak'atz.

7

Tej tk'anj t-ak'anal capitán tu'n Jesús
(Mt 8:5-13)

¹ Tejtzen tpon baj tyol Jesús cye t-xnak'atz cywitz xjal, bix e xi'xin tuj tnóm te Capernaum. ² Tuj tzunj ja tnoma at junxin xjal capitán cye soldado. Ja tzunj xin capitán at jun t-ak'analxin nimxsen tajbel texin. Bix oc yabel ti'j t-ak'analxin. Ya ch'itk teyim. ³ E tbi capitán ka ba'n k'ane Jesús cyi' xjal. Ju' tzunj e xi' tsma'nxin cab nintzaj xjal cye judío tuya Jesús te cubsal cywitz te Jesús tu'n ttzaj Jesús te k'anlte jxin t-ak'analxin. ⁴ Tejtzen cypon tsanjel capitán twitz Jesús, bixsen e xi' cykba'nxin te:

—Taat, ma ko tzaja cubsal kwitza tey tu'n t-xi'y k'anlte t-ak'anal capitán. Jxin ma tzaj chk'onte keya, ba'n xjal texin. Ju' tzunj kaja jac'a txi' ch'ina te k'anlte t-ak'analxin. ⁵ Amale tet Roma texin, pero n-oc kak' ejoo' judío texin, bix o bint jun kjaya camon tu'nxin te xnak'tzabl tyol Dios—tzi ke sanjel.

⁶ Ju' tzunj e xi' Jesús cyuyaxin. Ch'itktzen cyponxin tja capitán, tej t-xi' tchko'n capitán cabtl tuyaxin te tsanjelxin, bix e xi' cykba'n tyol capitán te Jesús.

—Taat, mi'n txi'tla njaya, cuma mintii' wajbela twitza. Yaa'n tumel tu'n tocx tuj njaya, cuma aj il kena. ⁷ Bix tu'n nch'ixewa min xin etza njaya tu'n npona tuyeey. Yal tey tulel, yaa'n il ti'j tu'n tula tuj njaya, cuma n-el nni'ya ti'j nuk tu'nj tyola ba'n tk'anj wak'anala. ⁸ N-el nni'ya ti'j o'cx tu'n tyola ba'n tbin tajbila, cuma jax ju'x weya o k'oj woclena te cawel. Ka ma nkba'ya te jun soldado, "Cutxey," ka ntziya, il ti'j cxe'l, bix ka ma nkba'ya te juntl soldado, "Cyixtey," ka ntziya, jax il ti'j c'ulel. Jax ju'x ka ma nkba'ya te wak'anala: "Bincham jlu," ka ntziya, jax il ti'j cbinel. Jax ju'x xsunj tey. Alcyey tzin tkba'na tu'n tbin, il ti'j cbinel—tzi capitán te Jesús.

⁹ Tej tbinde Jesús tyol capitán, e jaw klee' Jesús ti' capitán, bix e jaw sutpajxin te cyey'lte cyey xjal lepchech ti'jxin, bix e xi' tkba'nxin cye:

—Cxe'l nkba'na cyey, bajxsen wila'ya jun aj Israel n-oc ke tc'u'j wi'ja tisen ja capitán lu yaa'n aj Israel ma tz'oc ke tc'u'j wi'ja—tzi Jesús.

¹⁰ Bix aj meltz'aj ke tsanjel capitán tjaxin, otk tej cyponxin, otk tjal tnaabl t-ak'analxin.

Tej tjaw itz'j junk'a tal junxuj xuuj mebe tu'n Jesús

¹¹ Te cabtl k'ij, e xi' Jesús tuj tnóm te Nain. E xi' ke t-xnak'atzxin tuyaxin, cyuyax nimtl xjal. ¹² Tej tponxin ttxa'n tnóm, n-e'lelc'a jun cyimne k'i'n cyu'n xjal xi'ne tuj mukbilte. Junk'a cyimne, tal jun mebe xuuj. Nuk junx talxuj at. Nim xjal e xi' lpe ti' xuuj bix ti' cyimne. ¹³ Tej toc tcyeyen Jesús ja xuuj, oc tk'o'nxin lastim te xuuj, bix e xi' tkba'nxin texuj:

—Mi'n tz'ok'a, xuuj—tzi Jesús.

¹⁴ Bix e pon lk'exin ti' tcajon cyimne, bix e cub tk'o'nxin tk'abxin tibaj, bix e we' ke xjal k'ilte. Bix e xi' tkba'nxin:

—K'a cwal, we'wey—tzi Jesús.

¹⁵ Bix e jaw k'ukpajk'a, bix ak'k'a yolel. Bix e xi' tkba'n Jesús te ttxuk'a:

—Lutzen tala lu—tzi Jesús.

¹⁶ Tejzten toc cycey'en ke xjal jlu, nimxsen e jaw klee'ke, bix ak'ke nimsaljawte tbi Dios, bix e xi' cykba'n:

—Ma tzul jun jawnex tyolel Dios kxol. Dios ma tzaj k'onte te onlte ke, ejoo' t-xjalxin—tziike.

¹⁷ Bix e pon tpochalel otk tak' Dios jun jawnex tyolelxin tuj cykilca cytx'otx' judío bix cyuj tnom ti'jxe cytx'otx' judío.

*Kej tsanjel Juan Bautista
(Mt 11:2-19)*

¹⁸ Cykilcaj e bint tu'n Jesús, ocx tpochal te Juan Bautista tuj tzee' jaca k'ij cyu'n kej lepchec ti' t-xnak'tzibil Juan.

¹⁹ Bix e ttxoc Juan ca'ba t-xnak'atz, bix e xi' tkba'nxin cye tu'n cyxi' tuya Jesús te kanlte cyjulu: “¿Japa tey Jscy'o'n tu'n Dios tu'n tul te cawel, bix ka at juntl ko ayola ti'j tu'n tul?” tzi cybela.

²⁰ Ejee' tzunj ca'ba tsanjel Juan e ponke tuya Jesús, bix e xi' cykba'n te:

—Ja Juan s-aj chk'onte keya tuyey, bix taj tu'n t-xi' kkanena tey cyjulu: “¿Japa tey Jscy'o'n tu'n Dios tu'n tul te cawel, bix ka at juntl ko ayola ti'j tu'n tul?” tzi Juan—tzi ke t-xel Juan te Jesús.

²¹ Tejzten cypon t-xel Juan, nk'anen Jesús nim xjal, bix etz ke biman tuj cyxumlal xjal nuk tu'n tyolxin, bix e jaw jket cywitz ke moš tu'nxin. ²² Bix e xi' tkba'nxin cye:

—Cyucxey tuya Juan bix cykbanx texin jnbint wu'na j-e tkba Isaías at tu'n tbint tu'n Jscy'o'n tu'n Dios. Cykbanx texin jaj ma cyila bix jaj ma cybiy. Cykbanx kej moš ya lutlke nchi cye'yena, bix ke cox ya lutlke nchi bet, kej yaab tu'n tx'a'c ya lutlke ma chi k'anja, bix kej chquint ya niy'xtl tuj cywi', bix kej cyimne o chi jaw itz'j juntl maj, bix kej mebe lu n-oc cybi'n ba'n tpochal colbil cye. ²³ Cyk'umenx te Juan ctzaal tk'o'n Dios t-xtalbil cyej xjal min baj cye'u'j wi'ja, bix min cyaj cyk'o'n tu'n cyxi' lpe wi'ja—tzi Jesús cye tsanjel Juan.

²⁴ Tej cyex tsanjel Juan, ak'tzen Jesús yolel cye xjal, bix nim ba'n yol e xi' tkba'nxin ti' Juan. E tkbaxin cyjulu:

—Tej cyxi'y te cyey'lecte Juan ttzii' nima' Jordán, ¿e pompakey cuma e cyajbey tu'n toc cybi'na jun xjal yaa'n cyiw tnaabl, tisen jun t'zim nbaj lajpaj tu'n cyk'i'k? Min. ²⁵ ¿Bix e pompakey nuk te cyey'lecte t-xbalen jawnex? Min. Cykilcakey cytzki'na nuk ejee' cyej xjal tuj tja cawel, jawnex cyxbalen bix nbint cyu'n nuk jaj alcye cyaj. ²⁶ ¿Tikentzen e xa'key te cyey'lecte Juan? ¿Yaa'mpa e xi'key te cyey'lecte jun tyolel Dios? Jaxte jun tyolel Dios Juan, bix cxe'l nkba'na cyey, cyxol cykilca tyolel Dios, ²⁷ nuk ti'j Juan tz'i'bena cyjulu: “E tkba Dios te Tcwal: ‘Cxe'l nsma'na nsanjela nejl twitza, tu'n binne cyten xjal oj tpona,’ tzi Dios te Tcwal,” tzi tyol Dios. ²⁸ Cxe'l nkba'na cyey, cyxol tyolel Dios itz'j cyxol xjal, min-al jun ju' jawnex twitzj Juan. Pero jxjal mas ch'in tuj tcawbil Dios, ja tzunja mas jawnex twitz Juan—tzi Jesús cye xjal.

²⁹ Tej cybinte xjal bix kej xin chmol alcabala tyol Jesús ti'j Juan, el tyol ba'n tuj cywitzxin, bix e xi' cyk'o'nxin chjonte te Dios ti' tyol Jesús, cuma otk chi cu'xxin tuj a' tu'n Juan. ³⁰ Pero yal cye fariseo bix ke tx'olbal ley, min e xi' cyk'o'nxin chjonte te Dios ti' Juan, cuma yaa'n cyuyaxxin otk chi cu'x tuj a' tu'n Juan. El cyxoo'nxin j-otk cub tninc'u'n Dios te cyexin.

³¹ Bix e yolen Jesús mas cye xjal:

—Key xjal n-el cyiiq'uena j-e tk'umen Juan bix ju'x jweya tzin nkba'n, ¿ti techel c'ajbel tu'n tel cyni'ya ti'j ti' cytena? ³² Ejee' tzuna te ja'lewe tisen kej nee' tuj be cycy'i tu'n cykxan cyuya kej nchi kxan. Oj cykxan kej nee' nchi kxan tisen jun mejoblanel, cxe'l cykba'n cyekej cycy'i chi kxan cyjulu: “Keya, n-oc kxuxen. Cyey, ¿ti min chi tzaja te bixel kuyena?” tziike. Bix oj cykxan kej nchi kxan tisen oj ncu'x maket jun cyimne, cxe'l cykba'n cyekej cycy'i tu'n cykxan cyjulu: “Keya, nko ook'a. Cyey, ¿ti min chi tzaja te ook'el kuyena?” tziike. ³³ Cxe'l nkba'na cyey, ejee'y tisenj kej nee' cycy'i chi kxan, cuma tej tul Juan Bautista bix min ex tk'ij nwaan pan bix nc'an vino, e xi' cykba'na: “Jxjal lu min nbint tu'n tisenj nbint cyu'n cykilca, bix ju' tzunj ma tz'oc jun biman ti'j. Ju' tzunj, il ti'j q'uelel kiiq'uen tyol,” tziikey. ³⁴ Pero tej wul weya, bix min e cub npa'nwe weyaj tisen Juan, sino in waa'nwe bix in c'anwe tisex tten, tzin cykba'na cyjulu: “Jxjal lu, min cub tpa'n weyaj tisen tten kxol, sino nuk nwaan bix nc'an vino bix nbet cyuya chmol alcabala bix cyuya niy'tl aj il. Ju' tzunj, il ti'j q'uelel kiiq'uen tyol,” tziikey. ³⁵ Ja tzunkej n-el cyniy' ti'j, cchic'ajaxeltzen n-el cyniy' ti'j tu'nj tzin cyocsla'n tyol Juan bix inayena—tzi Jesús cyej xjal el cyxoo'n jaxin bix tyol Juan.

Tej tpon Jesús tuj tja jxin fariseo

³⁶ Junxin xjal cyxol fariseo, Simón tbixin, e xi' ttxco'nxin Jesús tu'n tpon Jesús waa'l tuyaxin tuj tjaxin. Bix e xi' Jesús tjaxin, bix e cub kexin ti' mes. ³⁷ Bix at jun e baj. Tuj tzunj tnom lu at junxuj xuuj nimxsen xinak tu'nxuj. Tej tbintexuj nwaan Jesús tuj tja jxin fariseo, e xi'xuj tjaxin. Bix e xi' ti'nxuj jun c'oc'sbil cyi' xjal wi'yelxsen tuj jun lmet te xak. ³⁸ Bix e xi' lk'exuj ti' Jesús, bix e cub majexuj t-xee' tkenxin, bix ak'xuj ook'el. Bix e cub tx'utl ta'l twitzxuj twi' tken Jesús, bix el tsu'nxuj ta'l twitzxuj ti' tkenxin tuya ttzmal twi'xuj. Bix el ttz'u'benxuj ti' tkenxin tu'n tyee'c'antexuj tnimbilxuj, bix e cub tsu'nxuj jc'o'csbil tibaj tkenxin.

³⁹ Ja tzunj xin fariseo e txconte Jesús te waa'l tuyaxin, tej toc tcyey'xinxin ti oc thinxan' jxuuj aj il ti' Jesús, e cub thixenxin ti'j: "Nuket ja xjal jlu sma'n tu'n Dios, mayetzele tz'el tniy'xin ti'j xuujja ma tz'oc maconte texin aj il xsunxuj."

⁴⁰ Pero el tniy' Jesús ti'j ti niy' tuj tc'u'j fariseo, bix e xi' tkba'nxin te:

—Simón, at jun nyola tey—tzi Jesús.

Bix aj ttzak'be'n Simón:

—Kbantzeney, taat.

⁴¹ Bix e xi' tkba'n Jesús cyjulu:

—At junxin xjal e xi' tk'o'nxin pwak te maan te ca'ba xjal. Attzen junxin e tmanaxin tisenj tzin tcamanxin te ca'ba jnabk'i, bix juntlxin e manan nuk tisenj tzin tcamanxin te ca'ba xjaw. ⁴² Pero mix e xcyebakexin cyhontexin pwak. Ju' tzunj e xa' tkba'n jxin k'ol pwak tu'n mintii' t-xel. ¿Alcye jun cyej xjal lu cxe'l k'onte nim chjonte tej xin k'ol maan?—tzi Jesús te Simón.

⁴³ Aj ttzak'be'n Simón:

—Tuj nwitzta, jaj xjal c'asbenel nim—tzi Simón.

Bix e xi' tkba'n Jesús te:

—Jax toc tu'na.

⁴⁴ Bix aj meltz'aj Jesús cyey'lte tej xuuj tcub, bix e xi' tkba'nxin te Simón:

—¿Tzimpa n-el tni'ya ti'j ti nbint tu'n ja xuuj lu? Tej xin oca tuj tjay, min xi' tkba'na te tk'opaja tu'n ttzaj tk'o'n a' te tx'ajbil nkena, tisenj tten ku'n. Pero ja tzunj xuuj lu, ma tz'el ttxjo'n nkena tuya ta'l twitz bix ma tz'el tsu'nxuj nkena tuya ttzmal twi'xuj. ⁴⁵ Jatzen tey, min s-el ttz'u'bena nwitzta te k'olbebl weya, pero ja tzunj xuuj lu, ch'ima maj ma tz'el ttz'u'benxuj ti' nkena jatxe tej xin oca tuj tjay. ⁴⁶ Tej xin oca tuj tjay, tey min xjax tko'na ch'in aseyt te olivo tuj nwi'ya, tisenj tten ku'n, pero ja tzunj xuuj lu, ma cub tko'n c'oc'sbil cyi' xjal jawnexsen twi' ti' nkena. ⁴⁷ Cykilca tzunj lu ma bint tu'nxuj, cuma n-el tniy'xuj ti'j ni'j tilxuj, amale nimet, pero ma najset. Ju' tzunj nim ma tz'oc k'ak'en tc'u'jxuj wi'ja. Pero ktzk'i'n jaj xjal yaa'n nimxix tzin tyee'c'an jun tk'ak'bil tc'u'j, jatzen xjalja yaa'n nim til tuj twitz tu'n tnajset—tzi Jesús te Simón.

⁴⁸ Bix e xi' tkba'n Jesús te xuuj:

—Ma najset tila—tzi Jesús te xuuj cywitz xjal.

⁴⁹ Kej xjal k'uklec ti' mes tuya Jesús bix ak'ke yolel cyxolx:

—Nim o bint tu'nj xjal lu, hasta at jun najsabl til xjal tu'n. ¿Al tzunj xjal lu?—tzi ke xjal.

⁵⁰ Pero bix e xi' tkba'n Jesús te xuuj:

—Tu'nj ma tz'oc ke tc'u'ja wi'ja, ma cleta. Cutxa tzuna. Tujtzen ttzjal ta'y ja'lewe tuya Dios—tzi Jesús te xuuj cywitz xjal.

8

Kej xuuj ajben tuj taak'en Jesús

¹ Mas yaj e xi' Jesús tuj cabtl tnom te kbalte tpochelel tcawbil Dios. Tuya cablaaj t-xnak'atzxin e xi', ² cyuyax jxuuj otk tz'el ti'n Jesús biman cyi'j bix otk k'anenxin ti' cyyabel. Ejee' tzunj xuuj lu: Maria Magdalena, jaj xuj otk tz'el ti'n Jesús wuuk biman ti'j, ³ tuyax Juana, t-xu'l junxin xjal Chuza tbixin. Ja tzunj xin Chuza tocx te mayordomo ttxlaj gobernador Herodes. Tuyax junxuj xuuj Susana tbi. Bix nimc'atl xuuj e xi' tuya Jesús te onl texin bix cye t-xnak'atzxin tuya cyk'inemal.

Jun techel ti'j jun awal

(Mt 13:1-15, 18-23; Mr 4:1-20)

⁴ Te jun k'ij, cyul chmet nim xjal te nim tnom tu'n cybinte t-xnak'tzbil Jesús, ak'tzen Jesús xnak'tzalcye. Bix e cub tk'o'nxin jun techel cye:

⁵ —Attzen junxin xjal e xi'xin awal triwa tuj tcojbenxin. Tejtzen tak'xin tziitlxte iyaj, at tiyajxin e cub tz'ak tuj be. Bix e baj cywa'be xjal twitz iyaj tuj cybe, bix ul noj ke ch'it ti'j bix e jaw cywaa'njil mastl. ⁶ Cabtl twitz iyaj e cub tz'ak twitz pc'at tx'otx'. Pero tej tjaw pok'ch, bix e cub tz'iyeelex, bix e tzkij, cuma mintii' tcha'xel tx'otx'. ⁷ Bix cabtl twitz iyaj e cub tz'ak

cyxol twitz ch'i'x, bix e jaw pok'chke junx, bix ja ch'i'x e t'z'iy mas bix e cyaj baj triwa tjak'.⁸ Bix cabtl twitz iyaj e cub tz'ak tuj tbanel tx'otx', bix lwewa e jaw pok'ch, bix e t'z'iy naj, bix e tak' nim twitz. Juun tken e tak' syent twitz—tzi Jesús.

Tej tbaj tkba'n Jesús ja techel lu, bix e xi' tkba'nxin cyiw cye xjal:

—Cyjkom cyxquina tu'n tel cyni'ya ti' nyola, bix cybisenx ti'j—tzi Jesús.

⁹ Bix oc cykanen ke t-xnak'atz Jesús te ti japenina ja yec'bil lu ti' iyaj. ¹⁰ Bix aj ttzak'be'n Jesús:

—Tuj ewjel ta' jnxi' nyolena cye xjal ti'j o baj tninc'u'n Dios ti' tcawbil. Te cyey, ejee'y nrxnak'atza, o k'oj cyey tu'n t-xi' ntx'olba'na ti japenina kej techel. Pero te cyej niy'tl xjal, nuk jaj techel ncut nk'o'na. Ejee' tzunja tisen e tkba tyol Dios cyi'j xjal min cybi Dios: “Amale n-oquet cyey'en, bix amale n-oquet cybi'n, pero min tz'el cyniy' ti'j,” tzi tyol Dios.

¹¹ Ja'lewe cxe'l nkba'na cyey ti japenina jtechel ti' iyaj. J-iyaj tisen tyol Dios. ¹² J-iyaj e cub tz'ak tuj be, ju'tzen japenina tisenj tyol Dios n-oc cybi'n xjal pero min cyaj tuj cyanem. Lwewa n-el tii'n taaw il tuj cyanem tu'ntzen mi'n cyocsla, tu'n mi'n chi clet. ¹³ J-iyaj e cub tz'ak tibaj pc'at tx'otx', ju'tzen japenina tisenj tyol Dios n-oc cybi'n xjal tuya tzalajebl ti'j tuj tneel. Pero min cywix tuj cyanem, tisen tzunj awal min txi'xix tloc' tuj pc'at tx'otx'. Min cypa, cuma oj n-oc jun q'uix'aj cyi'j, ncut bajtl cyc'u'j ti' tyol Dios. ¹⁴ Ja tzunj iyaj e cub tz'ak cyxol twitz ch'i'x bix e cyim tjak' ch'i'x, ju'tzen japenina tisenj tyol Dios n-oc cybi'n xjal peroj cyachbil jaj cykilca at twitz tx'otx'. Nuk o'cx cyk'inemal cyaj bix cykil achbil twitz tx'otx', bix n-oc cyk'on cyiib ti'j cyaj, bix tu'n tzunj lu ncaman te xitbil tyol Dios tuj cyanem. Cychunk'lal tisen jun tken triwa mintii' twitz. ¹⁵ Pero j-iyaj e cub tz'ak tuj tbanel tx'otx', ju'tzen japenina tisenj tyol Dios n-oc cybi'n xjal tuya cykil cyc'u'j. Nchi ximan ti'j, bix nbint cyu'n ti toc tu'n. Ncut cyopa'n, bix cychunk'lal tisen jun tken triwa tzin tk'o'n twitz.

Mintii' jun tuj ewjel mint jaw chic'ajax
(Mr 4:21-25)

¹⁶ At juntl techel. ¿Jac'apatzen tzaj tii'n jun xjal jun cantil tu'n tocx ewet tjak' jun alma bix ma tjak' wetbil? ¡Min! Cwel ten twi' mes, tu'ntzen ba'n ccyey'en xjal oj cyocx tunwen. ¹⁷ Jaxsen ju'x cyey. Ja cantil lu tisenj nyola jaxxix nchin k'ona cyey. Ja nyola jaxxix yaa'n tu'n tcut ewet cyu'na, sino tu'n tk'umj. ¹⁸ Ju' tzunj, k'o'nc cyc'u'ja ti' nyola tu'n tel cyni'ya ti'j. Jxjal n-oc tipen ti'j tu'n tniman te nyola, cxe'l k'o'n tu'n tel tniy' ti'j mastl. Pero jxjal min tz'oc tipen ti'j tu'n tniman te nyola, q'uelel k'i'n j-e k'oj te—tzi Jesús cye t-xnak'atzxin.

Tej tpon ttxu Jesús cyuya ke titz'enxin
(Mt 12:46-50; Mr 3:31-35)

¹⁹ At jun k'ij e pon ttxu Jesús cyuya ke titz'enxin jaa' ta' Jesús, pero mix ocxeke tuj jaa' jaa' tocxe Jesús tu'n nim xjal. ²⁰ Bix ocx k'umet te Jesús:

—Lu ttxuy cyuya ke titz'ena wa'lc'a pe'n. Cyaj tu'n cyyolen tuyey—tzi ke xjal te Jesús.

²¹ Bix e xi' tkba'n Jesús cye xjal:

—Alj n-oc tbi'n tyol Dios bix tzin tniman, jatzen xjalja wermaniya. Tisen ntxuya bix tisen witz'enke—tzi Jesús cye xjal.

Tej twe' cyk'i'k tu'n Jesús
(Mt 8:23-27; Mr 4:35-41)

²² At juntl k'ij ocx Jesús tuj jun barc cyuya ke t-xnak'atzxin. Bix e xi' tkba'nxin cye:

—Ko iy'x jlajxe a'—tzi Jesús, bix ak' i'yaxke.

²³ Tej tak' i'yel bet barc tuj a', bix e tzaj twatl Jesús. Pero bix ak' jun nintzaj cyk'i'k tibaj a'. Nimxsen oc punntz'aj a' tu'n cyk'i'k ti' barc, bix e noj barc tuya a', ya tu'n tak' xe'l tjak' a'.

²⁴ Tu'ntzen ttzi cyk'i'k cyi'j t-xnak'atzxin bix e xi'ke yuclecx texin tu'n ttzaj q'uisjxin, bix e xi' cykba'n texin:

—¡Taatl! ¡Taatl! ¿Ti pjel ke? ¡Ko pjel!—tzi ke.

Bix e jaw we' Jesús, bix e xi' tkba'nxin te cyk'i'k tu'n twe' bix te a' tu'n mi'n tz'oc punntz'aj, bix ya nwe' najtl cyk'i'k tuya a', bix ncyajtl tuj tumel. ²⁵ Bix e xi' tkba'n Jesús cye t-xnak'atzxin:

—¿Tikentzen min s-oc ke cyc'u'ja wi'ja?—tzi Jesús.

Pero otj cyaj ttzi cye t-xnak'atzxin, bix nimxsen e jaw klee'ke, bix e yolenke cyxolx:

—¿Ti xjalel jxjal lu? Hasta cyk'i'k bix a' ma tz'oc tilenxin, bix ma cybi—tzi ke.

Jun xinak aj Gadara otk tz'oc biman ti'j
(Mt 8:28-34; Mr 5:1-20)

²⁶ Bix iy'pakexin jlajxe a', tumelx jaa' otk che'xexin tuj Galilea, bix e ponkexin ttzii' a' tuj tnóm te Gadara. ²⁷ Tejtzen tetz Jesús tuj barc, bix e pon lk'e ttzii' a' jun xjal te Gadara. Jxjal e pon, nimxsen biman otk tz'oc ti'j, bix nimxe k'ij cyoclen biman ti'jxin. Mintey' ti'jxin toc,

bix min tenxin tuj jun jaa', sino ju' najlxin cyxol cyjayel anem. ²⁸ Tej t-xi' tcyeyenxin Jesús, e jawxsen s-inxin, bix e cub majexin twitz Jesús, bix e xi' tsi'nxin:

—Mi'n tzaj yolena wuyena, Jesús. Ja tey Tcwal jawnex Dios, bix mintii' tajbila waja. Cxe'l ncubsa'na nwitzá tey mi'n ko tak'a tuj q'uixc'aj—tzi xjal at tjak' cycawbil biman.

²⁹ Ju'tzen tten tej cyyolen biman, cuma e xi' tkba'n Jesús tu'n cyel ti'j xjal. El tii'n Jesús ke biman ti' xjal cuma nim maj cyak'len yaal te xjal. Ch'ima maj e tzyet-xin cyu'n xjal, bix e cub xpet tk'abxin tuya cadena, bix oc cadena te tmaneyxin ti' tkenxin, pero jaca maj oj tcub xpet-xin, ncubxin ttzakaxin cadena, bix e xi' cyii'n biman jaxin tuj jun lugar jaa' min-al xjal najl. ³⁰ Bix e xi' tkenen Jesús texin:

—¿Ti' tbiy?—tzi Jesús texin.

Bix e xi' tkba'nxin:

—Nimc'a tajlal nbi'ya—tzixin, cuma otk chi oc nim biman ti'jxin.

³¹ E cubsan ke biman cywitzt twitz Jesús tu'n mi'n che'x tk'o'nxin tuj jjul mintii' t-xee' jaa' tzyu'na ke biman. ³² Attzen jun linaj nka ttzii' a', bix nim boch nchi waa'nc tc'u'j linaj. E cubsan ke biman cywitzt twitz Jesús tu'n cyocx tk'o'nxin tuj cyxumlal boch, bix e tcuya Jesús. ³³ Bixsen el ke biman ti'j xjal, bixsen ocxke tuj cyxumlal boch. Tejtzen cyocx biman tuj cyxumlal boch, cyeltzen sey'paj boch, bi'x e xi'kejl tuj a', bix e jaw jik'bakejl, bix e cyimkejl.

³⁴ Yaltzen cye c'ojlal boch, tej toc cycyeyenxin ti e baj, bi'x el okkexin, bix el tpochal cyu'nxin tuj tnom bix tuj cojbil ti otk baj. ³⁵ Ju' tzunj enterax ke xjal e xi' baj cyey'lte ti otk baj, bix tejtzen cypon xjal jaa' ta' Jesús, oc cycyeyen xjal jxin otk chi el biman ti'jxin. K'uklc'atlxin twitz Jesús, toclt tij t-xbalenxin, bix otk baj bint-xin. Bix e jaw sey'paj ke xjal. ³⁶ Kej xjal otk tz'oc cycyeyen ti otk baj bix e baj cyk'umentl tuj xjal e pon lepchxitl. E baj cyk'umen ti tten tej tk'anen Jesús ti'j xjal otk baj yaa'n cyu'n biman. ³⁷ Tejtzen tbaj cybi'n kej xjal te Gadara bix niy'tlke te cojbil, ocxsen ttzi Jesús cyi'j, bix e cubsanke cywitzt twitzxin tu'n tetzxin tuj cytanem. E tcuya Jesús, bix ocxsin tuj barc tu'n taj meltz'ajxin. ³⁸ Tej tocxxin tuj barc, yal tzunj xin otk chi el biman ti'j e cubsan xsunxin twitzxin te Jesús tu'n t-xi' tii'n Jesús jaxin. Pero e xi' tkba'n Jesús texin tu'n tcyajxin. E xi' tkba'n Jesús:

³⁹ —Cutxey tjay, bix kbanxa cye tuyej jba'n ma bint tu'n Dios tey—tzi Jesús.

Bix ajxin, bix e baj tk'umenxin te cykilca xjal tuj tnom jba'n otk bint tu'n Jesús texin.

Tej tizat itz'j jun txin tuj cyamecy tu'n tyol Jesús

(Mt 9:18-26; Mr 5:21-43)

⁴⁰ Yaltzen cye xjal te Galilea, tzinxsen chi ayon tu'n tpon meltz'aj Jesús juntl maj. Ju' tzunj, tej tpon meltz'aj Jesús cyxol, e jawxsen tzalajke.

⁴¹ Attzen junxin xjal Jairo tbi. Ja tzunxin cawel cyxolj xjal e chmet tuj camon jaa'. Tej tpon meltz'aj Jesús, bix e pon jxin Jairo twitz Jesús, bix e cub mejtz'ajxin twitz Jesús, bix e cubsanxin twitzxin te Jesús tu'n tpon Jesús tjaxin. ⁴² E bint tu'nxin ju'wa cuma ch'itk tbaj tmeelxin. Te cablaaj jnabk'itxin, bix o'cx junx tmeelxin. E tcuya Jesús, bix e xi' tuyaxin.

Pero tej t-xi' Jesús, nimxsen xjal e baj cycutz'en cyiib ti'jxin. ⁴³ Cyxoltzen tñmal xjal tocx junxuj xuuj yaab. Otk bint cablaaj jnabk'i tak'lenux tu'n cyak a' ti'jxuj. Otk tx'ajxuj cyuya nimc'a k'anel, bix otk baj tpwaxuj, pero mintii' otk tz'oc tbinche. ⁴⁴ Chebe ocxxuj cyxol xjal tu'n tpon canaxuj ttzal ti'j Jesús, bix chebe e pon canan twi' tk'abxuj ti' ttxa'n t-xbalen Jesús tuj ewjel ch'in. Tej toc tmaco'nxuj, nwe'tl tyabelxuj. ⁴⁵ Bix e xi' tkba'n Jesús:

—¿Al tzunj s-oc tzyunte weya ja'lecuwe?—tzi Jesús.

E xi' cykba'n kej xjal nka te'c ti' Jesús:

—Pero min-alte xpon canan tk'ab ti'ja—tzike.

Bix e xi' tkba'n Pedro:

—Taat Xnak'tzal, ¿tizen n-oca tkanena al s-oc tocl ti'ja, nukpatzen jun xjal n-oc tocl ti'ja cyxol tñmal xjal n-oc cycutz'en cyiib ti'ja?—tzi Pedro.

⁴⁶ Aj ttzak'be'n Jesús:

—Jaxte at jun sul canan tk'ab wi'ja, cuma xnna'ya tej s-el wipemala tu'n tk'anj jun xjal —tzi Jesús.

⁴⁷ Tej tel tñiy' xuuj ti'j ka otk tz'el tñiy' Jesús ti'jxuj, ak'xuj lu'lel, bix e pon lk'exuj twitzxin, bix e cub majexuj twitzxin. Bix e xi' tkba'n xuj texin twitz cykil xjal ka otk tz'oc tmaco'nxuj jaxin tu'n tul tnaablxuj, bi'x e we' tyabelxuj. ⁴⁸ Bix e xi' tkba'n Jesús te xuuj:

—Tey xuuj, tu'nj s-oc ke tc'u'ja wi'ja, ma tzul tnaabla. Cutxa tzuna, cuma ya ba'n tla—tzi Jesús texuj.

⁴⁹ Maatkxsen nyolen Jesús tuya xuuj tej tpon jun sanjel te tja jxin cawel tuj camon jaa', bix e xi' tkba'nxin te Jairo:

—Ma cyim tmeela. Mi'n tyaa'tla jxin taat Xnak'tzal tu'n t-xi'xin tjay—tzi sanjel.

⁵⁰ Bix e tbi Jesús tyol sanjel, bix e xi' tkba'nxin te Jairo:

—Mi'n baj tc'u'ja. Keec tc'u'ja wi'ja, tu'n tk'anj tmeela—tzi Jesús texin.

⁵¹ Tej tocx Jesús tuj tja Jairo, min e tkeyxin tu'n cyocx xjal tuyaxin tunwen. Nuk ja Pedro bix Jacobo tuya Juan, nuk ejee'ja ocx tuyaxin, tuya tmantxin bix ttxutxin. ⁵² Nim xjal tocx tunwen, bix nim ok'el nbaj tu'n cybis. Bixsen e xi' tkba'n Jesús cye xjal:

—Mi'n chi ook'a mas. Jnee' lu min ma cyim. Nuk nwutan—tzi Jesús.

⁵³ Bix e jaw tze'n ke xjal ti' Jesús, cuma oc cyce'yen xjal otk cyimtxin. ⁵⁴ Bix e xi' Jesús tzyuljaw tk'abtchin, bix e xi' tkba'nxin tetxin:

—Txin, we'wey—tzi Jesús.

⁵⁵ Bix ul t-xewtxin, bix njawtzen we'tltxin. Bix e xi' tkba'n Jesús tu'n t-xi' twatxin. ⁵⁶ E jawxsen klee' ke tmantxin tuya ttxutxin ti'j lu, pero e xi' tkba'n Jesús cye tu'n mi'n cyk'umen cye xjal ti otk baj.

9

Taak'en cablaaj t-xnak'atz Jesús

(Mt 10:5-15; Mr 6:7-13)

¹ Attzen jun k'ij e cub tchmo'n Jesús kej cablaaj t-xnak'atzxin. Bix e xi' tk'o'nxin tipemalxin bix jtoclenxin cye tu'n tel cyii'nxin biman cyi' xjal bix tu'n cyk'anenxin ti' cyyabel xjal. ² Bix e xi' tchko'nxin ejee' te kbalte ti'j tcawbil Dios bix te k'anlte ke yaab.

³ Bix e xi' tkba'nxin cye:

—Mintii' cxe'l cyii'na tuj be, mi nuk cybardóna, mi nuk cypay, mi nuk cyway, mi nuk cypwaka, mi nuk ch'ixpubl cyi'ja. ⁴ Bix ja tzunj jaa' cnetel cyu'na jaa' chi wutaley, hasta ojxe cyi'ya tuj tnom cyjel cyk'o'na. ⁵ Ka at jun tnom ma tz'el t-xoo'n cyyola, cytžtoncjtzen kuk ti' cyxaaba cywitz xjal oj cyi'ya tuj tnom, te yec'bil min chi k'umentla tyol Dios cyxol, cuma cycy'i—tzi Jesús cye t-xnak'atzxin.

⁶ Bix iy'ke bix ocxkexin cyuj nim tnom. Tuj jaca juun tnom e baj cyk'umenxin jba'n tpochal tcawbil Dios, bix e k'ankenxin ke xjal yaab.

Tej t-xi' tkane Herodes alcyen toclen Jesús tocse

(Mt 14:1-12; Mr 6:14-29)

⁷ Yal tzunj xin gobernador Herodes, cykilj tpochal niy' jnbint tu'n Jesús e pon tuj twi'xin, pero min e cnet tumel tu'nxin alj xin Jesús. E'la tuj cywitz juun xjal ka ja Juan Bautista otk jaw itz'j juntl maj cyxol cyimne. ⁸ Yal cabtl xjal, e'la tuj cywitz kape ja ktzan tyolel Dios Elías otk tzul jlet juntl maj. Yal cabtl xjal, e'la tuj cywitz kape jaj juntl tyolel Dios te ootxa otk jaw itz'j tuj cyamecy juntl maj. ⁹ Tej toc tbi'n Herodes cyyol xjal, e xi' tkba'nxin:

—Yaa'n te Juan, cuma inayena e k'umente tu'n tel tx'omet twi' Juan. ¿Pero alcyenexin? cuma nim tzin nbi'na ti'j nbint tu'nj xin xjal—tzi Herodes ti' Jesús. Bix nim e tajbe Herodes tu'n toc tcyeyen jaxin.

Tej cywaa'n jwe' mil xjal tu'n Jesús

(Mt 14:13-21; Mr 6:30-44; Jn 6:1-14)

¹⁰ Yal tzunj cablaaj t-xnak'atz Jesús otk txi' tsmo'nxin, bixsen ul meltz'ajkexin tuya Jesús, bixsen e baj cykba'nxin ti otk bint cyu'nxin cyuj tnom. Bix e xi' tii'n Jesús ejee'xin tuj jun lugar nka ttxa'n tnom te Betsaida, tu'ntzen cytenxin cyjunalxin. ¹¹ Pero oc cybi'n xjal jaa' e xa' Jesús, bix e xi' ke xjal jaa' e temaxin. Tej cypon xjal, e tiik'xin ejee', bix ak'xin kbalte ti'j tcawbil Dios, bix oc tk'a'nexin kej xjal yaab. ¹² Tejtzen ch'itk tex k'ij, bix e xi' lk'e'j cablaaj t-xnak'atz Jesús tuyaxin, bix e xi' cykba'nxin texin:

—K'umenx cye xjal lu tu'n cyxi' jyol cywa bix cyposada tiy' cyuj tnom nka tzalu bix tuj cojbil, cuma ja lu tuj tzkij tx'otx', bix mintii' te cye at tuj—tzikexin.

¹³ Pero aj ttzak'be'n Jesús cyexin:

—Ejee'x cyey cxe'l k'onte cywa xjal—tžixin.

Bix e xi' cykba'nxin texin:

—Nuk jwe' pan tuya ca'ba quiš at kuyena. ¿Tajpey tu'n kxi'ya lok'ol cywa xjal?—tzi ke t-xnak'atzxin, ¹⁴ cuma atle jwe' mil xinak.

Bix e xi' tkba'n Jesús cye t-xnak'atzxin:

—Cykbanx cye xjal tu'n cycub ke juun cya'wnak tuya laaj xjal q'uelela juun cloj cyu'na —tzi Jesús.

¹⁵ Bix e cycuyaxin bix e xi'kexin te pa'l cye xjal, bix e cub ke cykil xjal. ¹⁶ Bix e xi' ttzyu'n Jesús jwe' pan bix jca'ba quiš, bix e jaw tcyeyenxin twitz cya'j, bix e xi' tk'o'nxin chjonte te Dios ti' waabj. Bix ak'xin pišlte, bix e xi' tk'o'nxin cye ke t-xnak'atzxin tu'n t-xi' cypa'n cyxol xjal. ¹⁷ Bix cykilca xjal e waa'nke tejxe tnoj cyc'u'j. Tej cybaj waa'n xjal, bixsen e jaw chmet ttx'akan waabj otk cyaj, bix e noj cablaaj chi'l.

*Tej t-xi' tkba'n Pedro ka ja Jesús jaj xjal o tscy'o Dios te cawel tibaj cykilca xjal
(Mt 16:13-20; Mr 8:27-30)*

¹⁸ At juntl k'ij e ten Jesús tjunalxin cyuya ke t-xnak'atzxin. Bix e na'n Jesús Dios tjunalxin. Tej tbaj na'nxin Dios, e xi' tkanenxin cye:

—Tuj cywitz xjal, ¿al-ke kena?—tžixin.

¹⁹ Aj cytzak'be'n t-xnak'atzxin texin:

—At juun xjal tzin cykba'n jay Juan Bautista. At juuntl tzin cykba'n jay jtyolel Dios Elías. Bix at juuntl tzin cykba'n ja loy juntl tyolel Dios te ootxa o jatz meltz'aj juntl maj tuj cyamecy —tžike.

²⁰ Bix e xi' tkba'n Jesús cye:

—Yajtzen cyey, ¿al-ke kena tuj cywitz?—tžixin.

Aj ttzak'be'n Pedro:

—Jay jxjal o tscy'o Dios te cawel tibaj cykilca—tži Pedro.

*E tkba Jesús tu'n tcub byet cyu'n xjal
(Mt 16:21-28; Mr 8:31-9:1)*

²¹ Bix cyiw e xi' tk'umen Jesús cyexin:

—Jax tu'na, Pedro, pero mi'n txi' cyk'umena cye xjal ka inayena Jscy'o'n tu'n Dios.

²² Inayena, Jsma'n tu'n Dios tu'n ntena cyuya xjal, tu'n tiy'x nim q'uixc'aj wu'na, bix tu'n wel iiq'uena cyu'n nintzaj xjal tuj nintzaj tja Dios, bix cyu'n pala, bix cyu'n tx'obal ley. Chin cwel byeta, pero te toxen k'ij oj njaw itz'tla juntl maj tuj cyamecy tu'n Dios—tži Jesús.

²³ Mas yaj, e xi' tkba'n Jesús cye xjal:

—Ka at juun cyey taj tz'oc lpe wi'ja, cyjeltzen cyk'o'na cykilcaj taj cyc'u'ja, bix q'uelel cyni'ya ti'j q'uiyax q'uixc'aj cyu'na nuk tu'nj lepcheckey wi'ja, ojxe cycyima. Ka jaca k'ij at cyanema tu'n cyoc lpey wi'ja, amale tu'nt cycuba nuk wi'jq'ueya, ju'tzen tten lepcheckey wi'ja. ²⁴ Ja tzunj xjal tcy'i tz'oc lpe wi'ja tu'nj n-oc tk'on tiib ti'j ti taj, cxe'l t-xoo'n tchunk'lal. Pero ja tzunj xjal cyjel tk'o'n tchunk'lal te twitz tx'otx' tu'nj lepchech wi'ja, ctcamantzen tchunk'lal te junx maj. ²⁵ ¿Ti tajbel cykilca twitz tx'otx' te jun xjal oj tcaman ti'j bix ka otk txi' t-xoo'n tchunk'lal nuk ti'j? ²⁶ Jax ju'x jxjal at tch'ixew cywitz xjal wi'ja bix ti' nyola, jaxsele ju'x weya at nch'ixewa ti'j oj wul meltz'aja twitz tx'otx' juntl maj. Inayena, Jsma'n tu'n Dios tu'n ntena cyuya xjal, chin ul meltz'aja tuya nimxsen wipemala bix tuya nim woclena tu'n Nmana Dios, bix cyuya ke jawnex tsanjel Dios tuj cya'j. ²⁷ Pero cxe'l nkba'na cyey, ti'j ja tipemal tcawbil Dios lu, at juun tocx cyxola ja'lecuwe, tuj cychunk'lala te ja'lewe, te ja mina'x cycyima, c'oquel cyce'yena jun rato ti tten tipemal tcawbil Dios—tži Jesús cye xjal.

*Tej tcub meltz'aj tcy'e'nc Jesús
(Mt 17:1-8; Mr 9:2-8)*

²⁸ Otk tz'ex junle smant tbajlen tkba'n Jesús kej yol at toclel cyce'yen juun xjal jun techel ti tten tcawbil Dios, bix e jawxin twi' witz te na'l Dios. Bix e xi' tii'nxin Pedro bix Juan tuya Jacobo. ²⁹ Maatktzen nna'nxin Dios, tej tcub ch'ixpet tcy'e'nc twitzxin, bix e cub meltz'aj tilbil t-xbalenxin puro sak bix nkoptz'ajxsen. ³⁰ Nuk tisen tii' tej tul ca'ba xjal bix ak'ke yolel tuyaxin. Ejee'tzen Moisés tuya Elías, ³¹ bix tzinxsen chi koptz'ajxin. E yolenkexin tuya Jesús ti'j tcyamecyxin tu'n tnmantexin tuj Jerusalén. ³² Bix otk tzaj ch'in cywatl Pedro cyuya ke tuya, pero tej cyjaw q'uisxin, e jaw cyce'yenxin tzinxsen koptz'aj tcy'e'nc Jesús tuyaj ca'batl tuyaxin wa'lc'a. ³³ Tej ch'itk cycub naj Moisés tuya Elías, e xi' tkba'n Pedro te Jesús:

—Taat, Xnak'tzal, jaxsen tbanel eto' t'zalu! Cjawelzen kbincha'na oxo ni' pach, jun te tey, juntl te Moisés, bix juntl te Elías—tži Pedro, pero mintii' oc tc'u'jxin ti'j.

³⁴ Mitkna'x tbaj yolen Pedro tej tcub jun muj, bix e cyaj baj Pedro bix Juan tuya Jacobo tuj muj, bi'xsen e cub tži cyibajxin. ³⁵ Tujtzen muj etztzen jun yol. Tži cyjulu:

—Jatzen xinj lu Ncwala, jatzen xjalja o nkba'ya tu'n tcawen. K'onc cyc'u'ja ti' yol—tži Dios tuj muj.

³⁶ Tej ttzaj baj jyol e xi' cybi'nxin, bix ak' cywitzxin ti' Jesús tjunalxtlxin tcubxin. Min e baj cykba'nxin ti otk baj. Otktzen tz'el nim k'ij bixsen e baj cykba'nxin.

*Ul tnaabl junk'a xjal tu'n Jesús otk tz'oc biman ti'jk'a
(Mt 17:14-21; Mr 9:14-29)*

³⁷ Tetzen juntl k'ij bixsen e cu'tzkexin twi' witz, bix tej cyc'u'lxin t-xee' witz, nimxsen xjal e pon twitz Jesús. ³⁸ Cyxoltzen xjal at junxin e xi' tkba'nxin te Jesús:

—Taat, cxe'l ncubsa'na nwitzta tey tu'n ttzaj tonena ncy'aala, cuma o'cxc'a junx ncy'aala.

³⁹ O tz'oc jun biman ti'j, bix nim maj nbaj tyaa'n biman jak'a bix njaw s-ink'a tu'n, bix ncub xoo'nk'a tu'n twitz tx'otx', bix n-ak' eletz plut tuj ttzik'a. Tcy'i biman tz'el ti'jk'a, bix ma txi' ncy'aala tuj il tu'n. ⁴⁰ Xi' ncubsa'na nwitzta cye t-xnak'atza tu'n tel cyii'n biman ti' ncwala, pero mix ma binne cyu'n—tžixin.

⁴¹ Aj ttzak'be'n Jesús texin:

—¿Mimpatzenal xjal n-oc ke cye'u'j wi'ja? ¿Jaa'tzen ta' cyocslabla? ¿Jte'tltzen maj cxe'l nyee'ana wipemala, tu'ntzen toc ke cye'u'ja wi'ja? ¿Jte'tltzen maj tu'n cyiy'xa wu'na? Cyii'ntznej ni' cwale wuyey—tzi Jesús.

⁴² Bix e tzaj cyii'nxin ni' cwal te Jesús, pero mitkna'x tpon nee' twitzxin tej tcub t-xoo'n biman ja nee' twitz tx'otx' bix ak' nee' balk'ajel. Bix el tlojo'n Jesús biman bix e k'anj nee', bix e xi' tk'o'n Jesús nee' te tman. ⁴³ Bix cykilca xjal e jaw klee' ti' tipemal Dios.

Tej t-xi' tkba'n Jesús juntl maj tu'n tcub byet

(Mt 17:22-23; Mr 9:30-32)

Nim e yolenke t-xnak'atz Jesús cyi'j jawnex tbinchben Jesús, pero e xi' tkba'n Jesús cye:

⁴⁴ —Cyk'onc cye'u'ja ti'j cxe'l nkba'na cyeey. Inayena, Jsma'n tu'n Dios tu'n ntena cyuya xjal, chin k'ojela tuj cyk'ab xjal tu'n nbyeta—tzi Jesús.

⁴⁵ Pero ke t-xnak'atzxin, min el cyniy' ti' tyolxin ti'j at tu'n tbyet-xin. Te cye, e'wen ta' ti japenina cuma min e cyocsla at tu'n tbyet-xin, bix at cych'ixew tu'n t-xi' cykanen ti japenina kej tyolxin.

Kej mas jawnex tuj twitz Dios

(Mt 18:1-5; Mr 9:33-37)

⁴⁶ Attzen jun k'oj e jaw cyxol t-xnak'atz Jesús. “Inayena mas jawnex,” tzi jun. “Min, inayena,” tzi juntl. ⁴⁷ Pero ttzki'n Jesús te jaca juun e cub tbsen tuj tanem ka ja mas jawnex. Ju'tzen e tzaa' ttxco'n Jesús jun nee' tu'n toc we' ttxlajxin, ⁴⁸ bix e xi' tkba'nxin cye:

—Alj ma tz'oc tk'on tiib tu'n tajben te jun xjal yaa'n jawnex, tisen ja nee' lu yaa'n jawnex, bix tu'n toc wak'a cye, ja tzunja najben weya. Bix oj tajben weya, yaa'n nuk te weya, sino tuyax te Dios, jxjal e tzaj k'onte weya. Ju' tzunj, alj cyxola mas najben cye cabtl, ja tzunja mas jawnex tuj twitz Dios—tzi Jesús cye t-xnak'atz.

Alj min nk'oj ki'j, kuya ta'

(Mr 9:38-40)

⁴⁹ Bix e xi' tkba'n Juan te Jesús:

—Taat, ejoo'ya t-xnak'atza e tjoja te kajbela tey. Pero oc kcyey'ena juntl xjal n-el tii'n biman cyi' xjal tu'n tipemal tey tbi. Pero e xi' k'kba'na texin tu'n twe'xin tbinchantexin ju'wa, cuma yaa'n jaanxin toc te tajlal t-xnak'atza kuyena—tzi Juan.

⁵⁰ Aj ttzak'be'n Jesús:

—Mi'n txi' cymayo'na. Alj xjal min k'ojl ki'j, kuya ta'—tzi Jesús.

Tej toc tile Jesús Jacobo bix Juan

⁵¹ At juntl maj e xi' tkba'n Jesús cye t-xnak'atzxin ti ctemela tej cytzpet. Tej ch'itk tpon tumel tu'n tcyim Jesús bix tu'n tjaxxin tuj cya'j, bix e tnimsaxin tc'u'jxin tu'n t-xi'xin tuj Jerusalén tu'n tbyet-xin. ⁵² E xi' tsma'n Jesús cab tsanjelxin nejl twitzxin, tu'n tcnec cyosadaxin. Ocx ke tsanjelxin tuj jun tnóm tuj departamento te Samaria. ⁵³ Pero tej toc cybi'n kej xjal tej tnóm jaa' tu'n tpona posadayin Jesús, cye'yi xjal tu'n tponxin, cuma cytzki'n xjal nx-ajxin Jerusalén te iy'sal Pascua, bix yaa'n junx jlu tuyaj cyreligión aj Samaria. ⁵⁴ Tej cybinte ke t-xnak'atzxin Jacobo bix Juan otk tz'el cyxoo'n kej xjal tej tnoma ja Jesús, e xi' cykba'nxin texin:

—Taat, ¿yaa'mpaxsele ba'n tuj twitza tu'n t-xi' kkanen k'ak' twitz cya'j tu'n cynaj xjal lu? —tzikexin.

⁵⁵ Bix oc tilenxin ejee', bix e xi' tkba'nxin:

—Min, yaa'n ju'wa. Yaa'n tumel cynaabla. ⁵⁶ Min in ula te xitl cye xjal, sino te co'plcye —tzixin.

Bix e xi'kexin posadayil tuj juntl tnóm.

Kej cyajbe tu'n cyoc lpe ti'j Jesús

(Mt 8:18-22)

⁵⁷ At juntl maj oc noj junxin xjal cywitzxin tuj be, bix e xi' tkba'n jxin xjal te Jesús:

—Taat, chin xe'la tuyena nuk jaa'xa tu'n t-xi'y—tzi xjal.

⁵⁸ Pero aj ttzak'be'n Jesús:

—Kej xiwel at cyja tuj tjulel xak bix kej ch'it at cyk'u'sem, pero jatzen tey, ka taja tz'oc lpey wi'j, iltzen ti'j q'uelel tni'ya ti'j minti' njaya bix nchin wutana te koniyan jaa' nchin poniya —tzi Jesús.

⁵⁹ E xi' tkba'n Jesús te juntl xjal:

—Lpe'c'a wi'ja—tzixin.

Bix aj ttzak'be'n jxin xjal:

—Taat, waja tu'n woc lpeya ti'ja, pero najsama, waja cu'x nmaku'na nmana nejl oj tcyim —tzi xjal.

⁶⁰ Pero e xi' tkba'n Jesús te:

—Ka taja tz'oc lpeya wi'ja, k'oncja tu'n tcu'x cymaku'n cymimne cycyimmne. Jatzen tey, k'o'nc tiiba te k'umlte ti'j tcawbil Dios—tzi Jesús.

⁶¹ At juntl xjal oc kbante te Jesús:

—Taat, chin oquel lpeya ti'ja. Pero najsama, waja tneel pjel nk'olbe'na ke wermaniya ke nmuna bix ntxuya—tžixin.

⁶² Bix aj ttzak'be'n Jesús:

—Jun xjal ncjon tuya wacx, il ti'j cxe'l tcye'yen twitz tu'n t-xi' ttz'utz' jiquen. Mlay txi' jiquen ka n-ajxe tcye'yen ti'jxe. Ju' tzunj xjal c'oquel lpe wi'ja. Ka ma tz'aj tcwent ti'j ma cyaj ti'jxe, mintii' c'ajbela tuj taak'en Dios—tzi Jesús.

10

Oxc'al tuya laaj tsanjel Jesús

¹ Tbjlcnxiltzen yolen Kaaw ti'j tcawbil Dios, e jaw tscy'o'nxin juntl oxc'al tuya laaj xjal tu'n cyajben te tsanjelxin tuj jun ak'untl. Bix e pje'x tpa'nxin ejee' ca'cab cybaj tuj juun tnom bix lugar jaa' at tu'n tponxin mas yaj. ² Bix e xi' tkba'n Jesús cyexin:

—Ak'untl cyi' xjal tisen jun jaatx'en. Nimxsen jaatx'en, pero yaa'n nimxix ak'anal at te chmolte. Ju' tzunj cykanenx te Kaaw ti' ak'untl tu'n t-xi' tsm'a'nxin ak'anal te chmolte twitz awal. ³ Chi xe'la tuj juun tnom jaa' cxe'l nkba'na cyey. Q'uelel cyni'ya ti'j ejee'y cyisen tal carnell bix chi xe'l nsma'na cyxolj xjal cyisen xo'j cyaj tz'oc cytx'a'n ejee'y. ⁴ Oj cyxi'y, mi'n txi' cyii'na pwak, bix cypay, bix ch'ixpubl cyxaaba. Bix mi'n chi yolena cyuya xjal tiy' tuj be. ⁵ Oj cyocxa tuj jun jaa', tneel cyyola c'oquex te taaw jaa' cyjulu: "Tu'n tten ja jaa' lu tuj jttžyal tzin tk'o'n Dios," tzi cybela. ⁶ Ka ma tiik' cyyola ti'j ja ttžyal te Dios tzin cyk'umena, ck'ojeltzen te. Pero ka min ma tiik', mlaytzen k'oj te. ⁷ Ka ma tzalaj taaw jaa' ti'j yol tzin cyk'umena, jatztzen chi temela ch'ina tuya. Jaxsele ju'x oj ttzak' tk'o'n ch'in cyway bix cya'a'y, mi'n chjet cyu'na, cuma ak'analkey ti' tyol Dios, bix cykilca ak'anal tumel tu'n cychjet. ⁸ Oj cypona tuj jaak'ch tnom, ka ma cyiik' xjal ejee'y, mi'n tz'el cyiiq'uena cyway oj ttzak' cyk'o'n cyey. ⁹ Bix chi k'anela kej xjal yaab cyxol, bix chi kbala cyej xjal aj tnom cyjulu: "Jcawel scy'o'n tu'n Dios o tzul twitz tx'otx', bix ju'x tcawbil Dios o tzul ti'i'n. Nkatzen ta' te cyey," tzi cybela. ¹⁰ Pero ka ma tz'el cyiiq'uen xjal ejee'y oj cypona tuj jun tnom, ju'tzen chi xe'la cyuj nmak be tuj tnom, bix chi kbala cye xjal cyjulu: ¹¹ "Bi'x cyjel ktžto'na cywitza jjuk te cytanema otk tz'oc ti' kxaaba, te jun yec'bil te cyey. Tisenxsen otk tz'el cyiiq'uen tyol Dios, jaxse ju'x q'uelel tiiq'uen Dios ejee'y tuj tcawbil. Jaxte tzul tcawbil Dios, pero amale oyjet cyey, pero o tz'el cyiiq'uen," tzi cybela. ¹² Nim castiwa e cub tu'n Dios tibaj tnom te Sodoma jun maj jatxe ootxa, pero cxe'l nkba'na cyey, tuj jk'ij te castiwa tzul, mas castiwa tzul tk'o'n Dios cyej tnom n-el cyiiq'uen tk'umj tcawbilxin twitzj e cub tk'o'nxin tuj Sodoma—tzi Jesús cyej setenta tsanjelxin.

iAyxsen kej tnom o tz'el cyiiq'uen tyol Dios!
(Mt 11:20-24)

¹³ Bix at mastl tyolxin e tkbaxin cye tsanjelxin:

—iAyxsen kej judío te Corazín, bix ayxsen kej judío te Betsaida! cuma o tz'el cyiiq'uen tyol Dios, amale nimet e yec'j wipemala cyuj tzunj tnom lu. Nuket e yec'j jwipemala cyej aj il yaa'n judío cyuj tnom te Tiro bix Sidón, ya otlele tz'oc cyk'o'n cyxbalen te bisbajil bix otlele chi cub ke tuj tza'j te techel ete'tzen tuj bis tu'n cyil. ¹⁴ Tuj jk'ij te castiwa tzul, mas castiwa tzul tk'o'n Dios cyej xjal aj Corazín bix cyej xjal aj Betsaida twitzj tzul tk'o'nxin cyej xjal te Tiro bix cyej xjal te Sidón. ¹⁵ Yaltzen cyej xjal te tnom te Capernaum, tuj cywitz ba'nksen chi elel twitz Dios bix chi camal jun jawnex lugar tuya Dios tuj cya'j, pero yaa'n ju'wa. Chi cwel baj tuj ch'ixbajil tuj k'ak'. ¹⁶ Key nsanjel, kej xjal ma cyiik' cyyola, inayen tzuna tzin cyiik'ente. Pero kej xjal n-el cyiiq'uen cyyola, inayen tzuna n-el cyiiq'uen. Bix kej xjal n-el cyiiq'uen inayena, jatzen Dios n-el cyiiq'uen, ja Dios e tzaaj tsm'a'n inayena—tzi Jesús cyej tsanjelxin, bix e xi' tsm'a'nxin ejee' te kbalte tcawbil Dios.

Tej cymeltz'aj oxc'al tuya laaj

¹⁷ Tej tpon baj cyaak'en jsetenta tsanjel Jesús, bix e pon meltz'ajkexin, bix e tzalajkexin. Bix e xi' cykba'nxin te Jesús:

—Taat, tej t-xi' kk'umena tbiy, cyuyax ke biman oc cybi'n ejoo'ya—tžikexin.

¹⁸ Bix e xi' tkba'n Jesús cyexin:

—Jaxte il ti'j tu'n cynimante ke biman nbi'ya. Oc ncyeyena tej tel tz'ak taaw il, Satanás, tuj cya'j. Tej tel tz'ak, tuj ajkelbil tisen jun tken k'ancyok bix ncub najtl. ¹⁹ Jwipemala e xcyey tibaj taaw il, o txi' nk'o'na cyey, tu'n cynamana cyi' biman bix tibaj cykilcatl n-oc cyi'ja cyisen lbaj bix cyisen si'cy. Tu'n cyxcyey ti'j cykilca nbint tu'n taaw il cyi'ja, o k'oj cyej

cyipemala. Mlay caman cyi'ja tuya jun ka'. ²⁰ Pero mi'n chi tzalaja nuk tu'nj o k'oj cyey cyipemala cyibaj biman. Ja te mas il ti'j, jaj o chi tz'ibja tuj cya'j—tzi Jesús cye tsanjelxin.

Tej tjaw tzalaj Jesús

(Mt 11:25-27; 13:16-17)

²¹ Tej tbaj cyk'umen tsanjelxin cykilca ti otk bint cyu'n, e jaw tzalajxin, bix e na'nxin Dios. E xi' tkba'nxin:

—Nmana, Taat, jay taaw tibaj cykilca tuj cya'j bix tibaj cykilca twitz tx'otx'. Bix nxi' nk'o'na chjonte tey j-e cub tninc'u'na ti'j tcawbila e'wen tu'na te cyej xjal nimxsen ba'n cyu'n tuj cywwitz, pero te cyej xjal ajnintz cynaabl cyisen ke nee', o txi' tk'o'na tu'n tel cyniy' ti'j ti tten tcawbila. Ju'tzen o bint tu'na, cuma ju' tajbila. ²² Cykilca o k'oj tu'na tuj nk'aba, Taat. Min-al ttzki'n nuk o'cx te weya, inayena Tcwala, o thinchay jlu. Nuk o'cx jay ttzki'na jlu, Taat. Bix min-al ttzki'n ka Nmana jay. Nuk inayena etzkilte, bix xsunkej nxi' nk'o'na tumel cye—tzi Jesús te Tman.

²³ Tej tten Jesús tjunal cyuya ke t-xnak'atzxin, e xi' tkba'nxin cye:

—Jun nintzaj xtabil o k'oj cyey, cuma ete'y tuyaj xjal Scy'o'n tu'n Dios te cawel. ²⁴ Cxe'l nkba'na cyey, nim tyolel Dios bix kej cawel ootxa e cyajbe tu'n toc cyeye'yen tipemal Jscy'o'n tu'n Dios, tisenj n-oc cyeye'yena ja'lewe, pero mixbe toc cyeye'yen. E cyajbe tu'n toc cybi'n kej tyol Jscy'o'n tu'n Dios, tisenj n-oc cybi'na ja'lewe, pero mixbe toc cybi'n—tzi Jesús cye t-xnak'atz.

Jun tbanel aj Samaria

²⁵ At jun maj e pon lk'e jun tx'olbal ley ti' Jesús te kanlecte ka n-el tniy' Jesús ti'j ley. E xi' tkba'nxin:

—Taat Xnak'tzal, ¿alcyey il ti'j tu'n tbint wu'na tu'n ncamana nchunk'lala te junx maj?—tžixin.

²⁶ Aj ttzak'be'n Jesús texin:

—¿Ti tz'i'ben tuj ley? ¿Alcyey cxe'l cymeltz'u'na tyol jilj?—tzi Jesús.

²⁷ Aj ttzak'be'n tx'olbal ley:

—C'oquel tak' Cyaawey Dios cyey tuya cykil cye'u'ja, bix tuya cykil cyanema, bix tuya cykil cyipena, bix tuya cykil cynaabila. Bix c'oquel cyak' ke cyuyey cyey tisenj n-oc cyak' cyiiba cyey—tzi tx'olbal ley.

²⁸ E xi' tkba'n Jesús texin:

—Jax tu'na. Bincham ja lu, bixsen ccamala tchunk'lala te junx maj—tzi Jesús.

²⁹ Pero tcy'i jxin xjal lu tz'oc cyak' ke tuyaxin texin. Ju' tzunj e xa' tkba'nxin te Jesús:

—¿Alcyetzen ke wuyena?—tžixin.

³⁰ E xi' tkba'n Jesús texin:

—Cxe'l nk'o'na jun tumel tey alcyey tuyey. At junxin xjal e tzaj tuj tnom te Jerusalén tu'n tponxin tuj tnom te Jericó. Pero e cub tzyu'nxin tuj be cyu'n alak'. El baj tik'ch texin, tuyax ke ti'jxin toc. Bix e baj pju'nxin hasta ch'itk tcyimxin, bix el ke alak' ti'jxin. ³¹ Ju'x e xi' junxin pala tujx be. Tej toc noj jxinak tcub tuj be ti'jxin, min e we'xin, sino txucl exxin ttxlaj. ³² Jax ju'x e xi' junxin aj Leví tujx be, junxin cyuyaj jxin ak'anal tuj tja Dios. Tej toc noj jxin elninakexin ti'jxin, jax ju'x min e we'xin tu'n tjaw tonenxin, sino txucl exxin ttxlaj.

³³ Jax ju'x e baj tej junxin aj Samaria e xi' tujx be. Tej toc tcyeyenxin jxjal iken elninakexin tu'n, bix oc k'ak'en tc'u'jxin ti'j. ³⁴ Bix e xi' lk'exin ti'j, bix oc tsu'nxin aseyt te olivo bix vino ti'j elninakexin iken tu'nxin, tu'n tk'anj, bix oc tptozenxin tuya xbalen, bix e jax tk'o'nxin jaxin tibaj tburxin, bix e xi' tii'nxin tuj jun posada, bix e cyaj tenxin te c'ojlalte. ³⁵ Te juntl k'ij bix ocx tk'o'nxin pwak te plata te taaw posada, bix e xi' tkba'nxin te: "C'ojlanx ch'in jxjal elninakexin. Ka ma tz'ajben mas pwak, cxe'l nk'o'ntla tey oj wul meltz'aja," tzi aj Samaria. ³⁶ ¿Ti toc tu'na? ¿Altzen jun cyey oxo xjal lu oc te tuyaj xin otk tzak' cyu'n alak'?—tzi Jesús te tx'olbal ley.

³⁷ Aj ttzak'be'n tx'olbal ley:

—Jax xjal oc k'ak'en tc'u'j ti'j elninakexin—tžixin.

Bix e xi' tkba'n Jesús texin:

—Jax tu'na. Cuxtoney bix binchama tisenj e bint tu'n aj Samaria—tzi Jesús.

Tej tpon Jesús k'olbelte Marta bix María

³⁸ At juntl maj tej cybet Jesús cyuya t-xnak'atz tuj be, bix e ponkexin tuj jun ch'in tnom. Tuj tzunj tnom lu at junxuj xuuj Marta tbi, bix e ttxocxuj ja Jesús tu'n tponxin tjaxuj. ³⁹ Ja tzunj xuj xuuj lu, at jun titz'enxuj María tbi. Tejtzen tpon Jesús tjaxuj, e cub ke María twitz Jesús tu'ntzen toc tbi'nxuj ti toc tu'n Jesús. ⁴⁰ Pero yal te Marta, nuk taak'en texuj oc tipenxuj ti'j tu'n tbint. E xi' lk'exuj ti' Jesús, bix e xi' tkba'nxuj:

—Taat, ¿mimpa ma tz'oc tcyeyena ma cyaj tcyeyen witz'ena ak'untl nwitz'a? Khanx ch'in texuj tu'n tonenxuj wi'ja—tzi Marta.

⁴¹ Aj ttzak'be'n Jesús texuj:

—Marta, Marta, o'cx ncub thisena ti'j nim taak'ena, ⁴² pero at jun mas ilxsen ti'j. Yaltzen te María, ma baj tscy'o'nxuj alcyey mas ba'n, jaj tu'n t-xi' tbi'nxuj nxnak'tzbila, bix mlay tz'el wii'na texuj—tzi Jesús te Marta.

11

Tej t-xi' t-xnak'tza'n Jesús cye t-xnak'atz ti tten tu'n cyna'n Dios
(Mt 6:9-15; 7:7-11)

¹ At juntl maj e na'n Jesús Dios tuj jun lugar. Tej tbaj na'nxin Dios, at jun t-xnak'atzxin e xi' tkba'n texin:

—Taat, xnak'tzantz keya ti tten tu'n kna'na Dios, tisenj te Juan Bautista e xi' t-xnak'tza'n kej xjal oc lpeke ti' t-xnak'tzbiil—tzi.

² Bix e xi' tkba'n Jesús cye t-xnak'atzxin:

—Oj cyna'na Dios, cykbanxa ju lu: “Kman Dios ata tuj cya'j, jawxit nimsa'n tbiy xjan tu'n cykilca xjal. Tzulxit tcawbila twitz tx'otx'. Bint-xit jtajbila twitz tx'otx' ku'na tisenj nbint tuj cya'j. ³ K'ontza kwaya te ja'lewe. ⁴ Bix najsama kila ncub kbincha'na twitza, cuma ju'x keya ncub knajsa'na jka' n-oc cybincha'n xjal ki'ja. Bix ko toney oj koca tuj niy'bebl, tu'n tiy'x ku'na,” ju' tzi cybela oj cyna'na Dios.

⁵ Bix e xi' tkba'ntlxin cye t-xnak'atzxin:

—¿Tk'a'pa Dios oj cyczubsana cywitz te Dios ju'wa? ¿Ti toc cyu'na ti'j ja tumel lu? Te chil ak'bil oj tpon jun tuyej tjay. Pero mintii'j waabj tuj tjay. Ju' tzunj cxe'ley tuya tvesinta, bix cxe'l tkba'na te cyjulu: “Taat, najsama, at jun il ti'j wi'ja. K'ontze pan nch'exa. ⁶ Ma tzul jun wuleya njaya. Nakch ma tzaa', bix ma tz'oc tak' weyaj te, pero mintii'tl weya nwa tu'n t-xi' nk'o'na te,” tzi tbelá. ⁷ ¿C'aalpa ttzak'be'n taaw jaa': “Mintii'. Cutxey. Lu kenwe nchin wutana cyuya ncwala, bix lu jaa' lmo'na. Mlay chin jaw we'wa k'olte waabj tey,” tzi pa tbel tvesinta tey? ⁸ Cxe'l nkba'na cyey mi'n txi' tkba'nxin ju'wa. Il ti'j tk'a'xin. Amale tcy'it-xin txi' tk'o'nxin nuk tu'nj tvesint tiibxin, pero il ti'j cxe'l tk'o'nxin tu'n mi'n tz'el tch'ixewxin cywitz xjal. Yaltzen te Dios, ¿mi'mpa tzaj tk'o'nxin cyey alcyey il ti'j, tu'n mi'n cub baj nimbilte tbiin, bix tuya cykil tc'u'jxin? ⁹ Ju' tzunj, tuya cykil cye'u'ja cykanenx te Dios tu'n ttzaj tk'o'n jnajben cyey. Ka ma chi cubsana cywitz te, tzul tbi'n. ¹⁰ Cxe'l nkba'na cyey jaca juun xjal nxi' tkanen te Dios tu'n ttzaj tk'o'n j-il ti'j, ctzaaltzen tk'o'n Dios te, bix jaca juun xjal ncubsan twitz te Dios ti' onbilte, ctiik'eltzen, tisenj oj toc cycto'na tlemel jaa' bix cjketel cywitz. ¹¹ Bix jtzaal tk'o'n Dios cyey, ¿japaj min tz'ajben? Cxe'l nkanena cyey, oj tkanente jun cychwala ch'in tchi' quies cyey, ¿lbajpa cxe'l cyk'o'na te? ¹² Bix oj tkanente jun cychwala jun ni' tjos, ¿si'cypa cxe'l cyk'o'na te? ¹³ Min. Mlay cybinchay ju'wa. Amale aj iletkey, pero jaj ba'n cxe'l cyk'o'na cye cychwala. Yajtzen te Cymana tuj cya'j, masxsen jaj ba'n ctzaal tk'o'n cyey oj t-xi' cykanena. Jaj ba'n ctzaal tk'o'n Dios te cyey, hasta tuyax Espíritu Santo tk'a'xin te cyey—tzi Jesús.

Tej cykbante fariseo ja taaw il k'ol tipemal Jesús
(Mt 12:22-30; Mr 3:20-27)

¹⁴ At juntl k'ij e xi' tkba'n Jesús tu'n tel biman ti' jun xinak. Tej toc ten biman ti' xinak, min e bintl tyolen, pero tej tel biman, nbintltzen tyolen xinak. E jawxsen klee' cykilca xjal ti'j.

¹⁵ Pero at juun cyxol xjal cycy'i tu'n tjaw nimset tbi Jesús, bix e xi' cykba'n:

—Jtipemal jxjal luwe cyibaj biman yaa'n te, sino o k'oj te tu'n cyaaw biman, jaj Beelzebú tbi—tziike.

¹⁶ At juuntl cyxol xjal e xi' cykanen te Jesús tu'n tk'ontexin jun yec'bil cywitz xjal ka otk k'oj tipemalxin tu'n Dios tuj cya'j, cuma tuj cywitz yaa'n jaxin Jscy'o'n tu'n Dios, bix e cyajbexin tu'n tchic'ajax mlay bint tu'nxin tu'n tyeec'antexin ju'wa. ¹⁷ Pero el tniy' Jesús ti'j ti iy' tuj cy'c'u'jxin, bix e xi' tkba'nxin cyeyin:

—Tzin cykba'na nchin ak'anana te taaw il. ¿Pero ti tten ju'wa? Cytzki'ntla ka ma tz'el tpa'n tiib jun tnomb bix pjel cyk'ojlen cyiib xjal, cxe'l tnomb tuj il. Jax ju'x jun moj najlel, ka ma chi jaw k'oj, bi'x cxe'l cynajle'n tuj il. ¹⁸ Ju'tzen tten tuya taaw il, Satanás. Ka ma txi' tkba'n te cyey ete' tjak' tcawbil tu'n t-xi' cyniman juntl patrón, cxe'l tcawbil tuj il. Ju' tzunj, jcyey ncub cybisen, ka ja Beelzebú o tzaj k'onte wipemala tu'n nk'ojla cyi' cybiman, mlay bint ju'wa. ¹⁹ Bix oj tzin cykba'na n-el wii'na biman tu'n tipemal Beelzebú, ¿tzimpa cykba'na oj tel cyii'n ke cyuyey biman, tu'npatzen tipemal Beelzebú? Mi'n txi' cyyolena ju'wa, cuma cytzki'ntla mi nuk cyu'n bix mi nuk wu'na bixet tz'el biman tu'n tipemal Beelzebú. ²⁰ Ju' tzunj, tu'nx tipemal te Dios n-el wii'na biman. Bix ka tu'n tipemal Dios, q'ueletzen cyni'ya ti'j tu'nj wul-lena o tzul tcawbil Dios cyibaja. ²¹ Cybisenx ti'j ja techel lu. At jun taaw jaa'

nc'ojlan tja tuya tmachbil. Ka min-al tzul tuya mas tipemal twitz, mlaytzele tz'etz jtik'ch te. ²² Pero ka ma tzul jun tuya mas tipemal, bix ck'ojlel ti' taaw jaa', jatzen ccamal, bix q'uelel tii'n cykilca macbil te taaw jaa' oc ke tc'u'j ti'j, bix q'ueletz tii'n tik'ch at tunwen. Jaxse ju'x weya at wipemala tu'n tel wi'na j-at tuj tk'ab taaw il. ²³ Ju' tzunj, mi'n chi tzpeta. Ka min ma tz'oc cyk'on cyiiba wuya, nchi k'oj tzuna wi'ja. Kej xjal min cyak' cyiib wuya tu'n cyclet xjal tuj tk'ab Satanás, ju'tzen chi onen ti' Satanás tu'nx cyxi' ke xjal tuj il—tzi Jesús cyej xjal e xi' cykba'n ka jaxin el tii'n biman tu'n tipemal cawel cyibaj biman.

Tej tkban Jesús tu'n cycojlanx cyiib xjal cywitz biman
(Mt 12:43-45)

²⁴ Bix e xi' tkba'n Jesús cyi'j biman:

—Oj tel ljo'n jun biman ti' jun xjal, nbettzen biman jaa' min-al xjal. Njyon tu'n tajlan, pero min cnet jaa' tu'n twe'ban. Ju' tzunj nxi' tkba'n: “Chin aal meltz'aja tuyaj xjal jaa' ntiiniya nejl,” tzi. ²⁵ Oj taj meltz'aj biman tuyaj xjal, oj toc tcye'yen jxjal tisen jun jaa' tz'isen tuj, bix binne tten, bix nayon al c'oquex tuj. ²⁶ Oj toc tcye'yen min-al wa'lc'a tziyen, n-eliltzen biman jyolte mas tuya, bix cpomel meltz'aj tuya wuuktl tuya, mas ka' twitz. Enteraxseke chi oquex tunwen tu'n cynajan, bix ju' tzunj yal tzunj xjal masxsen tuj il ta' twitz nejl—tzi Jesús.

Tzin tk'o'n Dios t-xtalbil te jaca juun xjal n-oc tbi'n tyol Dios bix nxi' tniman

²⁷ At jun xuuj cyxol tnimal xjal. Tej toc tbi'nxuj nyolen Jesús ju'wa, e jaw klee'xuj cyi' tyol Jesús, bix e jaw tsi'nxuj:

—Nim t-xtalbil Dios e k'oj tej xuuj jaa' e'la itz'jey, bix jaa' e ch'u'ney—tzi xuuj.

²⁸ Pero e xi' ttzak'be'n Jesús:

—Mas ba'n tu'n t-xi' tkba'na tzin tk'o'n Dios t-xtalbil te jaca juun xjal n-oc tbi'n tyol Dios bix nxi' tniman—tzi Jesús.

Kej xjal ka' tzin cykana tu'n tbintl jun techel
(Mt 12:38-42)

²⁹ Mas yaj aj ttzak'be'n Jesús cyej xjal otk chi kanen jun yec'bil tu'nxin ti cbinel tu'nxin. Nim oc cyc'utzen cyiib tnimal xjal ti'jxin, bix e xi' tkba'nxin cye xjal:

—Key xjal judío te ja'lewe ka'key. Min chin cyiik'a, sino nuk ete'c'a kanlte we ti cbinel wu'n tetzen techel ka sma'n kena tu'n Dios. Pero jtechel ete'c'a kanlte, mlay k'oj cyey. Oj pjel wi'ja tisenxj e baj ti' Jonás, jatzen c'ajbel te techel cyey. ³⁰ Tisenxj e baj ti' Jonás ajben te techel cye aj Nínive ka sma'n Jonás tu'n Dios, jaxse ju'x jppel wi'ja c'ajbel te techel cyey judío o chin tzaj sma'na tu'n Dios. ³¹ Oj tpon tumel tu'n cyoc cykil xjal tuj xkela tu'n Dios, jaj xuj xuuj e cawen tuj tnóm te Saba jatxe ootxa cjawel yolel cyi'ja judío te ja'lewe. E xi'xuj nakch te eбилte ke tyol rey Salomón, bix oc tbi'nxuj bix e tnimanxuj. Pero cyey, n-oc cybi'na tyol jun xjal mas jawnex twitz Salomón, pero min txi' cynimana. Ju' tzunj ctkba'xuj tu'n cyaaja tuj castiwa. ³² Jax ju'x chi jawel yolel kej aj Nínive cyi'j ejee'y judío te ja'lewe tuj jk'ij te xkela tzul. Tej t-xi' tk'umen jxin tyolel Dios Jonás cye aj Nínive tu'n tajtz ti' cyanem, ajtztzen ti' cyanem. Pero cyey, amale nxi' tk'umen jun xjal mas jawnex twitz Jonás, pero min cynimey —tzi Jesús cye judío.

Ntzaj tk'o'n Dios knaabl tu'ntzen kten tuj spi'yen
(Mt 6:22-23)

³³ Bix e xi' tkba'ntl Jesús cye xjal:

—Min-al jun xjal n-oc txkonte jun cantil tu'n tcub te'wen bix ka tu'n tocx tk'o'n tjak' alma, sino cjawel tk'o'n twi' mes, tu'ntzen at tken luz cywitz xjal oj cyocx tunwen. ³⁴ Yaltzen te tbak' cywitza, najben tu'n ccyce'yena. Ka ba'n tbak' cywitza, ba'ntzen ccyce'yena alcyey cchic'ajaxel tu'n tken luz. Pero ka yaa'n ba'n tbak' cywitza, ete'y tuj klolj. ³⁵ Tisentzen najben tbak' cywitza te cyxumlala tu'n ccyce'yena, jaxse ju'x najben cynaabla tu'n tel cyni'ya ti'j alcyey ma yec'j cyey tu'n Dios. Ju' tzunj, c'oquec' cyc'u'ja ti'j, cuma ka lmo'n cynaabla, tuj klolj ete'y. ³⁶ Pero ka yaa'n lmo'n cynaabla, c'oqueksen jaxxix yol tuj cyanema, bix q'ueletzen cyni'ya ti'j jaxxix yol, bix cynimey, tisenj oj ba'n tbak' cywitza bix ba'n ccyce'yena tu'n cantil tuj jun jaa' bix ba'n cybeta tuj tumel cuma chic'ajxsen cybey—tzi Jesús.

Tej tyole Jesús cyi'j tx'olbal ley bix kej fariseo yaa'n ba'n
(Mt 23:1-36; Mr 12:38-40; Lc 20:45-47)

³⁷ Tej tba'j yolen Jesús, attzen junxin tej cloj fariseo e xi' tkanenxin te Jesús tu'n t-xi' tuyaxin tjaxin te waa'l. Bix e pon Jesús tjaxin bix ocx Jesús tunwen bix e cub ke ti' mes. ³⁸ E jaw klee' aj fariseo ti' Jesús tu'n min e tnima Jesús ti'j ti tten cye fariseo tx'ajbil cyk'ab tej cyak'xin waa'l. ³⁹ Bix e xi' tkba'n Kaaw texin:

—Ejee'y fariseo nimel xsunkey tuj cyleya. Lepchkey ti' cyleya ti'j ti tten tu'n tel cytxjo'na ti'jxe cyvasey bix cylaka, peroj tuj cyanema yaa'n sak. Nuk nchi bisena ti'j tu'n cyelk'ana bix nuk n-oc cyk'on cyiiba te cykilca cyaja. ⁴⁰ ¿Mimpa tz'el cyni'ya ti'j ocx tbincha'n Dios cyanema, yaa'n nuk o'cx cyxumlala, bix il ti'j tuj twitzxin tu'n ttjxet cyanema, yaa'n o'cx cyxumlala? ⁴¹ Ka cyaja tu'n tcyaj cyanema sak, cyonenxsen ke mebe. Ka ma txi' cyk'o'na cye tuya tzalajeb, sak tzunkey twitz Dios. ⁴² ¡Ay xsunkey fariseo! Nchi k'ona jnu'x cyoybila te alwent bix n-ula bix cykilca itzaaj, pero min tz'oc cyk'on cyiiba te onlte cye xjal bix min tz'oc tak' Dios cyey. Ba'n tu'n t-xi' cyk'o'na tlajan pa' te cyawala, pero min tz'ajben ka min txi' cyii'na cynaabla tisen taj Dios bix ka min tz'oc tak' Dios cyey. ⁴³ ¡Ay xsunkey fariseo! Nuk te cyey n-oc tak' cyey. Oj cypona tuj camon jaa', nuk jaj k'ukbil mas jawnex nche'xa jyolte. Ju'x oj nche'xa tuj plaza, cyaja oj cyoc k'olben ke xjal cyi'ja tuya nim nimbil. ⁴⁴ ¡Ay xsunkey fariseo! Xmeletz'key. Ejee'y cyisen cyimne maku'n tjak' tx'otx' tiy' tuj cjo'n. Oj nchi bet ke xjal tuj cjo'n, min tz'el cyniy' ti'j nchi bet cyibaj k'eynen. Jaxse ju'x oj toc cybi'n xjal cyyola. Min tz'el cyniy' ti'j ka k'eyna tuj cyanema—tzi Jesús te fariseo.

⁴⁵ Jax at jun tx'olbal ley tuj tja fariseo, bix e xi' tkba'nxin te Jesús:

—Taat, oj n-oc ilena cyi' fariseo ju'wa, tuyax kibaj keya ejoo'ya tx'olbal ley cwela jyola—tzixin.

⁴⁶ E xi' tkba'n Jesús texin:

—Jax ju'x cxe'l nkba'na cyey tx'olbal ley, ¡ay xsunkey! Nimxsen ley cyiw o bint cyu'na tu'n tjaw cyiken xjal, pero mintii' o bint cyu'na tu'n thint cyu'n. Tisen njaw cyk'o'na jun iktz al ti' cykul, pero mi nuket jun twi' cyk'aba txi' onjawte cyi'j. ⁴⁷ ¡Ay xsunkey! Ejee'y cyisenx kej cyiy'jila e cub cybyo'n ke tyolel Dios ootxa, amale tet ja'lewe njaw cybincha'na cyjayel te nabbilcye te cyey. ⁴⁸ Ke cyiy'jila te ootxa ccy'ixin oc cybi'nxin cyyol ke tyolel Dios, bix ju' tzunj e cwa' cybyo'nxin ejee', bix e jaw cybincha'nxin jawnex cyjayel. Bix lux key nbaj cybincha'na ja'lewe cyjayel kej tyolel Dios e cub byet cyu'na ke cyiy'jila. Pero nuk cye cybake! nxa' cyk'o'na cynymbila. Ju' tzunj junx ete'y cyuyaj cyiy'jila e cub cybyo'n ke tyolel Dios, ⁴⁹ cuma ba'n tuj cywitzza ccyublen byet ke tyolel Dios. Cykilca ttzki'n Dios, bix e xi' tkba'nxin cyjulu: "Cxe'l nk'o'na ke nyolela bix ke nxela te cyej xjal lu. At juun cyxol ke n-ak'anala byo'n chi temela, bix juuntl pjel yaset. ⁵⁰ Chi xe'l nk'o'na te cyej xjal lu, tu'ntzen oj ccyub byet, otktzen pon tumel tu'n ttzaj nk'o'na castiwa te t-xel cykilcaj nyolela o cub byet thintlen twitz tx'otx'." ⁵¹ Cwel cychjo'n cykilca ccyublen n-ak'anala, jatxe tcublen Abel, hasta tejxe tcub Zacarías tuj tja Dios twitz altar twitz tneel xjan cwart," tzi Dios. Cxe'l nkba'na cyey, ju'tzen pjel. Ma pon tumel tu'n tk'oj castiwa te t-xel cykilcaj bi'ya o baj cye n-ak'anala, bix ejee'y judío te ja'lewe chi ikle ja castiwa lu. ⁵² ¡Ay xsunkey tx'olbal ley! Cye cyaa'ken tu'n t-xi' cytx'olba'na tyol Dios cye xjal, pero min o bint cyu'na. Min o tz'el cyni'ya ti'j tixix tten tyol Dios, bix tej cyaj cabtl xjal tu'n tel cyniy' ti'j, bix oc cymayo'nkey ti'j—tzi Jesús te tx'olbal ley tuj tja fariseo.

⁵³ Tej tetz Jesús tuj tja xin fariseo, nimxsen e jaw cyk'oj fariseo cyuya tx'olbal ley ti'jxin. Nimxsen cyxkelbilxin oc te Jesús, tu'n tcub tzpet-xin cywitzxin. ⁵⁴ Bixsen e cyyoxin tu'n tcub tz'axxin tuj tyolxin, tu'ntzen tjaw cytzyu'nxin tuj til. Pero mlay bint cyu'na.

12

Min ko oc lpe ti'j cynaabl fariseo

¹ Tujx jtyem e cub cyninc'u'n ke fariseo bix ke tx'olbal ley ti tten tu'n tcub tz'ak Jesús tuj cyk'ab, nmimatl xjal nuk e cyajbe tu'n toc cybi'n tyolxin. Jte'le mil xjal e chmet ti'jxin, hasta e baj cywa'be cyken. Ete' t-xnak'atzzin tuyaxin, bix e xi' tkba'nxin cye:

—Cyk'o'nc cye'u'ja ti'j tu'n mi'n txi' cyii'na cynaabla tisen cynaabl fariseo. Jawnex chi xnaktzan, tu'ntzen tuj cywitz xjal ba'nxsenke, pero nojne tuj cyanem tuya ka'. ² Pero jka' at tuj cyanem cchic'ajaxeltzen. Cykilca e'wen cyjel tuj chic'aj. ³ Mi'n cub cyewena jka' tisen nbint cyu'n fariseo. Cykilcaj nbint cyu'na oj min-al n-oc cyeeyente cyey, q'uelex tpochal tuj cykil lugar. Bix cykilcaj nchi jasena tuj ewjel tu'n min-al tz'oc ebinte, cyjel tuj tzinen cywitz cykil xjal.

Mas il ti'j tu'n ttzaj tzi Dios ki'j twitzj tu'n ttzaj cytzi ki'j kej xjal cyq'ui Dios (Mt 10:26-31)

⁴ Ejee'y wuyena, cxe'l nkba'na cyey, mi'n tzaj cytzi cyi'ja jxjal n-el iiqu'ente cyey nuk wi'ja. O'cx cbinel cyu'n pjel cybyo'n cyxumlala. Oj thint cyu'n ju'wa, mintii'tl c'oquel bint cyu'n cyi'ja. Mlay cubtl cyanema cyu'n. ⁵ Cxe'l nkba'na cyey alj ctzaal tzi cyi'ja. Ja Dios, cuma at tipemalxin yaa'n nuk o'cx tu'n tcub byet cyxumlala, sino jax ju'x at tipemalxin tu'n t-xi' t-xoo'nxin ejee'y tuj k'ak'. Ju' tzunj nxi' nkba'na cyey tu'n ttzaj tzi Dios cyi'ja. ⁶ N-oc tcyeyen Dios cykilcaj nbaj cyey. C'oquel cye'u'ja cyi'j tal ch'it. ¿Mimpatii' nq'uey jwe' tu'n nuk ca'ba oxe centavo tuj plaza? Pero amale yaa'nt nim cywi', mi nuk jun q'uelel tuj tc'u'j

Dios. ⁷ Pero yaltzen cyey, jawnexsen cywi'y cywitz nim ch'it. Pero katzen min chi el ch'it tuj tc'u'j Dios, yajtzen cyey, ¿chi elelpey tuj tc'u'jxin? Min. Nim n-el tniy' Dios ti'j ti nbaj cyey. Hasta ttzmal cywi'y ttzki'n Dios jte'. Ju' tzun'j mi'n tzaj ttzi jcbinel cyi'ja cyu'n kej xjal iic'bel te weya, cuma Dios ncyeyen ti'j nbaj. ⁸ Cxe'l nkba'na cyey kej xjal tzin cykba'n cywitz xjal ka lepchecke wi'ja, cxe'l nk'umena cywitz ke tsanjel Dios tuj cya'j ka ejee' nxjalja, inayena, Jsma'n tu'n Dios tu'n ntena cyuya xjal. ⁹ Pero kej xjal cycy'i cykba cywitz xjal ka lepchecke wi'ja, cxe'l tzen nkba'na cywitz t-ángel Dios ka yaa'n ejee'ja te weya. ¹⁰ Kej xjal yaa'n ocslal wi'ja, ka ma chi k'ojl wi'ja, inayena, Jsma'n tu'n Dios tu'n ntena cyuya xjal, ba'n tnajset cyil. Pero kej xjal tzin cykba'n ka' jnbint wu'na, amale n-elet cyniy' ti'j nbint tu'n tipemal Espiritu Santo, mlay najset cyil. ¹¹ Oj cyxi' tzyeta nuk tu'nj lepchecke wi'ja bix oj cypon k'i'na cywitz ke nejenel xjal tuj camon jaa' tu'ntzen cyel xoo'na nuk tu'nj lepchecke wi'ja, mi'n chi bisena ti'j ka tu'n cycuyantey alcyey cye cyaj, bix ka min, bix mi'n chi labta ti'j alcyey c'aal cytzak'be'na oj toc kanet cyey. ¹² Mi'n chi xoba, cuma oj tpon tumel tu'n toc kanet cyey, c'oneltzen Espiritu Santo cyi'ja oj taj cytzak'be'na cyyo!—tzi Jesús cye t-xnak'atzxin.

Jun k'ina mintii' tnaabl

¹³ Cyxoltzen tñimal xjal tocxe junxin xjal e jaw s-in ti' Jesús:
—Taat Xnak'tzal, kbanxa te ntzicya tu'n tcub tpa'n kkaba bix tu'n ttzaj tk'o'n jweya—
tzixin.

¹⁴ E xi' tkba'n Jesús texin:

—Xinak, yaa'n weja waak'en tu'n tcub npa'na cykaba—tzi Jesús.

¹⁵ Bix e xi' tkba'n Jesús cye cykilcaj xjal:

—C'oquel cycwenta ti'j tu'n mi'n txi' cyii'na jun cynaabla tu'n tten mas cyuyey, cuma yaa'n tu'nj nim tk'inemal nojne tchun'k'lal jun xjal tuya tzalajeb. ¹⁶ Cxe'l nk'o'na jun tumel cyey. At junxin xjal k'ina, bix nim twitz tawalxin e chmet tuj ttx'otx'xin. ¹⁷ Bix ak'xin bisel ti' twitz tawalxin, bix e xi' tkba'nxin: “Nimxsen twitz wawala, hasta mlay tz'ocx baj cyuj ntx'utx'a. ¿Ti'pjel weya?” tzixin. ¹⁸ Bix e xi' tkba'nxin cyjulu: “Ma tzul tuj nc'u'ja ti'pjel weya. Cwel nxi'tiya ke ntx'utx'a, tu'n cyjaw bintl te mas nmak, tu'ntzen tocx baj cykilca twitz wawala bix tik'ch weya at. ¹⁹ Nimxsen tik'ch weya at. At nwaya te nim tyem. Mi'ntltzen chin ak'anala, sino nukzten cxe'l niy'be'ntla tik'ch tal nwaya bix nc'a'ya, bix tuj txubtx chin temela ch'ina,” tzixin tuj tanemxin. ²⁰ Pero e xi' tkba'n Dios tej xin k'ina: “Mintii' tnaabla. Tujx koniyan te ja'lewe q'uelel wii'na tchun'k'lala. Bix oj tcyima, cykilcaj tk'inemala o tz'oc tipena ti'j tu'n tchmet, c'aal te juntl,” tzi Dios tej xin k'ina. ²¹ Ju'tzen pjel te cyey xjal min nchi bisen ti'j tu'n tñint alcyey ba'n, sino nuk nchi bisen ti'j tu'n tchmet cyk'inemal. Pero pjel—tzi Jesús cye cykil xjal.

Mi'n ko labt mi'n baj kc'u'j ti'j ti jilel tu'n kitz'j

(Mt 6:25-34)

²² Tej tñaj tkba'n Jesús ja yol lu cye xjal, e xi' tkba'nxin cye t-xnak'atzxin:
—Cuma jk'inemal min tzin tk'o'n cychun'k'lala, ju' tzun'j cxe'l nkba'na cyey, mi'n chi labta ti'j waabj tu'n cyitz'ja bix ti'j xbalen te cyxumlala. ²³ Min o k'oj cychun'k'lala nuk tu'n cywaa'na, bix min o k'oj cyxumlala nuk tu'n toc cyxbalena.

²⁴ Cyway, Dios ck'olte cyway. Cycyeyenc ke joj. Min nchi awanjil, bix min nchi jtx'onjil. Mintii' cyaajonjil tñublel ixi'n, bix mintii' cytx'utx'jil. Pero nchi itz'jil, cuma ntzaj tk'o'n Dios cywajil. Yaltzen cyey, mas jawnexkey cywitz joj. Ju' tzun'j, ¿mimpa tzaj tk'o'n Dios cyway? ²⁵ Min tz'ajben oj nchi labta ti'j jun tii', cuma mi nuket jun k'ij ba'n txi' cyk'o'na te cychun'k'lala tu'nj nchi labta ti'j.

²⁶ Katzen min tz'ajben tu'n t-xi' cyk'o'na jun k'ij te cychun'k'lala tu'nj nchi labta, ¿tikentzen nchi labta ti'j cykilcatl? ²⁷ Cycyeyenc kej abech. Min nchi chkon bix min nchi tñmon. Pero cxe'l nkba'na cyey, mas cyeca cycyey'nc twitzj jawnex t-xbalen jrey Salomón. ²⁸ Ntzaj tk'o'n Dios cyxmaquel c'ul, amale nuket ca'ba oxo k'ij nten bix n-el tz'ak bix ncub patet. Yaltzen cyey, ¿yaa'mpa mas jawnexkey cywitz c'ul? Ejee'y yaa'n nimxix n-oc ke cyc'u'ja ti'jxin. Ka ma tzaj tk'o'nxin cyxmaquel c'ul, jax ju'x ctzaal tk'o'nxin cyxbalena.

²⁹ Ju' tzun'j, mi'n chi labta ti'j jaa' tu'n tñnet cyway bix cyc'a'y, bix mi'n baj cyc'u'ja ctzaal tk'o'n Dios tu'n cyitz'ja. ³⁰ Kej xjal yaa'n lepchech ti' Dios, nuk o'cx n-oc cyipen ti'j tu'n tñnet cywa bix cyc'a'. Pero cyey, ejee'y ocslal ti'j Cymana Dios, bix ttzki'nxin cyaja cyway bix cyc'a'y. ³¹ Ju' tzun'j, c'oquel cyipena tu'n tñint tajbil Dios cyu'na. Ka ma bint cyu'na ju'wa, ck'ojel cyoclena tuj tcawbil Dios, bix jax ju'x ck'ojel cyway bix cyc'a'y bix cyxbalena.

Jun kk'inemabl tuj cya'j

(Mt 6:19-21)

³² Jatzen cyey lepchech wi'ja yaa'n nim cybaja, mi'n chi bisena ka nuk cyajxa oj nbint ti'j taj Dios cyu'na, cuma jaxte ck'ojel cyey tu'n cyawena tuya Dios tuj tcawbil. Ja tzun'j lu tajxin

tu'n ttzaj tk'o'nxin cyey. ³³ Cyq'ueyexn tik'ch cyey at, bix cyk'onx cye mebe. Oj nbint tajbil Dios cyu'na ju'wa, j-o txi' cyk'o'na cye cabtl tisenca' chmo'n ta' tuj cya'j te cyey. Jtzin cyk'o'na chmo'n tuj cya'j, mlay tz'oc k'anak, bix mlay cub naj cyk'inemala jatzewe. Min-al alk'al ba'n tocx ti'j, bix mintii' poc' ba'n tocx tuj te xiltle. ³⁴ Ka nchi k'ona cyk'inemala tuj cya'j, ja tzunj lu tzin tyee'c'an at jcyajbila tuya ti taj Dios, pero ka nuk o'cx n-oc cyipena ti'j cyk'inemala twitz tx'otx', ja tzunja nyee'c'ante mintii' cyanema tuya Dios.

Jun ak'anal binne tten

³⁵ Tzul tcawbil Dios twitz tx'otx'. Ju' tzunj, cyitz'lem cyiiba, tu'ntzen binne cytena oj wul meltz'aja, tisen kej xjal ntxakan cytzaj nbaj ak'bil. ³⁶ Cyitz'le'n cyiiba tisen kej xjal nchi c'ojlan tja cypatrón oj t-xi' cypatrón ti' jun mejoblenel. Chi ayol ke c'ojlal jaa' oj tpon meltz'aj taaw jaa', tu'ntzen i'tzke tu'n tocx cyjko'n tlemel jaa' oj tocx tco'n taaw jaa'. ³⁷ Ctk'a'tzen taaw jaa' xtalbil cyey c'ojlal jaa' cuma i'tzke bix nchi ayon oj tul meltz'aj cypatrón. Cxe'l nkba'na cyey, tu'nj ttzalajeblixin cyi'j t-ak'analxin, cxe'l tkba'nxin cye tu'n cyucub ke ti' mes, bix c'oquel jun twitz tkenxin, bix jaxxin cxe'l k'onte cywa, te yec'bil tanemxin cye. ³⁸ Ka ma tzulxin chil ak'bil, bix ka ma tzulxin te ch'itk kskix, ka ma chi ayon ke t-ak'analxin ti'jxin, ccyiik'eltzen jun chojbil cye tu'nxin.

³⁹ Cxe'l nk'o'na juntl tumel cyey. Cybisexn ti'j jun jaa' jaa' ocxe jun alak' tuj, te alk'al. Nuket el tniy' taaw jaa' ni' hora tu'n tpon alk'al tuj tjaxin, c'ojla'ntle tjaxin tu'nxin te tej hora. ⁴⁰ Jatzen cyey, mi'n cybinchay tisenj taaw jaa', sino cykil hora cyitz'lem cyiiba, cuma mintii' tumel cyuyey jtoj tu'n wul meltz'aja, inayena, Jsma'n tu'n Dios tu'n ntena cyuya xjal —tzi Jesús cye t-xnak'atzxin.

Jun ak'anal min nbint taak'en tu'n

(Mt 24:45-51)

⁴¹ Bix e xi' tkanen Pedro te Jesús:

—Taat, jma baj tkba'na cyi' c'ojlal jaa', ¿nukpa te ke keya, ma tuyax te cykilcatl xjal?—tzi Pedro.

⁴² Aj ttzak'be'n Kaaw texin:

—Jaj alcyey mas il ti'j, tu'n tcub cybisena ti'j ti tten tu'n cyoca te ba'n ak'analkey. Oj tex jun patrón, bix cyjel tk'o'nxin jun mayordomo te cyey'lte ke t-ak'analxin bix te k'olte cywa, ¿ti toc cyu'na? ¿Mi'mpa jaw tjyo'nxin jun mayordomo at tnaabl bix c'oquel ke tc'u'jxin ti'j? ⁴³ Cjyolxin ju'wa, bix ctk'a' patrón xtalbil te ka nbinchan mayordomo alcyey otk txi' tkba'n tpatrón te oj tul meltz'aj tpatrónxin. ⁴⁴ Cxe'l nkba'na cyey, cxe'l tk'o'n patrón te mayordomo tu'n toc te cawel tibaj cykilca at te texin.

⁴⁵ Pero ti pjel tej mayordomo ka ma txi' tkba'n: “Tuj nwitzá, yaj c'ulel meltz'aj patrón,” ka ma tzi ju'wa, bix ka ma tzak' k'olte tz'u'n cyey ak'anal xinak bix cyey ak'anal xuuj, bix ka ma tz'oc tk'on tiib te nim waa'n bix te nc'an k'e'n, bix ka ma tz'oc te bola? ⁴⁶ Tuj jun k'ij te min tz'ayonxin tpatrónxin, ja ponj tpatrónxin, bix oj toc tcye'yen patrón ka min tz'ak'anan tmayordomoxin, sino nbinchan nim ka', cwel byet, tisen nbint te cykilcaj ak'anal min cnyiman tyol cypatrón.

⁴⁷ ¿Titzen pjel te jun mayordomo n-el tniy' ti'j alcyey taak'enixin e xi' tkba'n tpatrónxin, pero min nbint taak'en tpatrónxin tu'nxin, bix yaa'n binne ttenxin oj tul meltz'aj tpatrónxin? Te texin ck'ojel nim tz'u'n. ⁴⁸ Yaltzen tej xin mayordomo mintii' tumel tuyaxin alcyey taj tpatrónxin tu'n tbint tu'nxin, bix ntpet-xin tuj taak'en tpatrónxin, amale yaa'nt nim tilxin twitzj ka' e bint tu'nj juntl mayordomo, pero ck'ojel ch'in tz'u'n texin. Pero ka nim ma k'oj te jun xjal tu'n n-el tniy' ti'j alcyey ak'untl tu'n tbint tu'n, il ti'j tu'n tel taak'en ba'n, cuma ju' ctkane tpatrón—tzi Jesús.

Tej tyole Jesús ti'j tpabl kiib

(Mt 10:34-36)

⁴⁹ Bix e xi' tkba'ntl Jesús cye t-xnak'atzxin:

—O chin ula twitz tx'otx' tisen jun tzaj nk'on k'ak' tuj c'ul, cuma wu'na c'oquel nim k'oj twitz tx'otx'. Nuket bint alcyey tu'n tbint wu'na. ⁵⁰ Pero mina'x tbint wu'na. At jun jawnex q'uixc'aj il ti'j q'uixax wu'na, bix hasta ojxe wi'ya tuj, nchin ayona ti'j tuya nim tchyonel —tzi xin.

⁵¹ Bix e xi' tkba'ntlxin:

—¿Tzimpa cub cybisena ka in ula tu'n twe' cykil k'oj twitz tx'otx' wu'na? Yaa'n ju'wa, sino in ula tu'n tbaj cypa'n cyiib xjal wu'na. ⁵² Te ja'lewe, t-xol jaca juun najaj xjal pjel cypa'n cyiib wu'na. Ka at jwe' xjal tuj jun najaj, c'oquel k'ojl oxé ti' ca'ba, bix ka ja ca'ba ti' oxé. ⁵³ Jax ju'x chi k'ojlel mambaj tuya tawal, bix txuybaj tuya tal, bix elibj tuya tliib—tzi Jesús cye t-xnak'atzxin.

*Techel ti'j ti nbaj ja'lewe**(Mt 16:1-4; Mr 8:11-13)*⁵⁴ Bix e xi' tkba'n Jesús cye tñimal xjal ti'jxin:

—Cyey, n-el cyni'ya ti'j twitz cya'j bix ti'j cyk'i'k. Oj t-xi' cycyey'ena njaw muj jaa' n-exa k'ij, nxi' cykba'na: “Tzul jbal,” bix ju' nbaja. ⁵⁵ Bix oj tak' cyk'i'k, nxi' cykba'na: “Tzul cyak,” bix jax cyu'na. ⁵⁶ At cyna'bla tu'n tel cyni'ya cyi'j techel twitz cya'j bix twitz tx'otx'. ¿Titzen tten min tz'el cyni'ya cyi'j techel o tyeeec'an Dios cyey ti'j ti nbaj cyxola tuj tyem te ja'lewe? Xmeletz'key, cuma cycy'iy tz'el cyni'ya ti'j alcyey o cub tyeeec'an Dios, amale tzint cykba'na ka cyaja.

*Binchax tiiba tuya taj k'oja**(Mt 5:25-26)*

⁵⁷ Jax ju'x, ¿tikentzen min n-oc cyipena tu'n tel cyni'ya ti'j alcyey tu'n thint cyu'na tu'n cycyaja jiquen twitz Dios? ⁵⁸ Cxe'l nkba'na jun tumel cyey. Ka at jun cyc'asbena te jun xjal, bix ka ma txi' tkba'nxin cyey tu'n t-xi' tii'nxin ejee'y twitz juez, tu'n tchjet cyu'na, mas ba'n cwel cyninc'un cyiiba tuya taaw pwak te mitkna'x cypona twitz juez. Ka min ma cub cyninc'un cyiiba, chi aal k'o'na tuj cyk'ab soldado tu'n juez, bix chi xe'la tuj tzee', ⁵⁹ bix cxe'l nkba'na cyey, mi'n chi etz oka tuj tzee' hasta ojxe tocx baj tchjoj cykil cyc'asbena hasta manc'bil centavo—tzi Jesús cye xjal.

13*Ka min ma tz'ajtz ti' cyanem cwel cycastiwey*

¹ Cxoltzen tñimal xjal, at cab oc cykba'n te Jesús otk chi baj byet juun aj Galilea tu'n tley jxin gobernador Pilato. Otk chi pon ke aj Galilea maa tuj Jerusalén, bix nchi oyen alimaj te Dios tej cypon soldado te byolcye. ² E xi' tkba'n Jesús cye:

—¿Ti ncub cybisena? Tu'nj e k'oj cycastiwa kej aj Galilea, ¿tzimpa cub cybisena mas aj ilke cywitzj niy'tl ejee'y aj Galilea? ³ Pero yaa'n ju'wa. Cxe'l nkba'na cyey, ka min xi meltz'aja tuya Dios, jax ck'oeljzen cycastiwey te cyamecy te cykilca cyey. ⁴ Cxe'l nkanena juntl cyey. Kej wajxaklaaj aj Jerusalén e cyim tej tiy' tz'ak jcuartel nim twe' cyxol Siloé, ¿tzimpa cub cybisena mas aj ilke cywitzj niy'tl aj Jerusalén? ⁵ Min, yaa'n ju'wa. Cxe'l nkba'na te cykilca cyey, ka min sul cyila tuj cyc'u'ja, jax cykilcakey chi naal najtla.

Techel ti'j tken higo mintii' twitz toc

⁶ Cxe'l nk'o'na jun tumel cyey. At junxin xjal e cu'x tawa'nxin jun wi' higuera tuj ttx'otx'xin. Jaca jnabk'i e ponxin tuj ttx'otx'xin te cyey'lte ka at twitz ti' tzee', pero mintii' twitz toc. ⁷ Ju' tzunj e xi' tkba'nxin te c'ojlal ttx'otx'xin: “Otk tz'ex oxetl tyem tibaj tu'n tk'onte ja tzee' lu twitz. Pero oj wula jaca jnabk'i te cyey'lte, mixtii' twitz n-oc. Ju' tzunj tx'omajaw. Min tz'ajben tuj nt'x'otx'a,” tzi taaw tx'otx' tej xin c'ojlal ttx'otx'xin. ⁸ Aj ttzak'be'n jxin c'ojlal: “Taat, k'oncj te juntl tyem. Chin ak'anala t-xee' tuj tx'otx' bix cwelex nk'o'na cytxa alimaj t-xee'.” ⁹ Katzen ma tak' twitz, mi'nttzen jaw tx'omet. Pero ka mixtii' twitz, cjaweltzenle tx'omet,” tzi c'ojlal—e xi' tkba'n Jesús tu'n tyeeec'an alcyey tñajlel cyi'j tu'nj min tzul cyil tuj cyc'u'j.

Tej tk'anj jun xuuj tu'n Jesús tuj k'ij te ajlabl

¹⁰ Tujtzen jun k'ij te ajlabl, ocx Jesús tuj jun camon jaa', tu'ntzen t-xi' tk'o'nxin t-xnak'tzibilxin cye xjal. ¹¹ Ocx junxuj xuuj otk tz'oc jun yabel ti'jxuj wajxaklaaj jnabk'i. Nuk c'onen tiy'xuj. Min jaw we' ti'jxuj. ¹² Tej t-xi' tcyey'en Jesús jaxuj, e xi' ttxco'nxin jaxuj, bix e xi' tkba'nxin texuj:

—Xuuj, ma tz'el yabel ti'ja—tzi Jesús.

¹³ Bix e cub tk'o'n Jesús ke tk'abxin tibajxuj, bix ya njaw we'tl ti'jxuj. Bix ak'xuj nimsaljawte tbi Dios.

¹⁴ Tej t-xi' tcyey'en jxin cawel tuj camon jaa' otk tk'anen Jesús jun xuuj tuj k'ij te ajlabl, bix e tzaj tk'ojxin, bix e xi' tkba'nxin cye xjal:

—Tuj jun smant at kak k'ij ba'n tu'n kak'anen. Ka cyaja tu'n cyk'anja, cytzaja cyuj jk'ij ba'n te ak'untl, yaa'n tuj k'ij te ajlabl—tzi cawel tuj camon jaa'.

¹⁵ Bix aj ttzak'be'n Jesús texin:

—Xmeletz' yolena. ¿Mimpa che'xa jaca k'ij te ajlabl te k'ilbetz ke cywacxa bix cybura tu'n cyxi'jil c'al a'? ¹⁶ Yal tej xuuj lu, o ten tjak' tcawbil Satanás wajxaklaaj jnabk'i. Ju' tzunj, ¿ti ncwa cybisena? Ka ba'n tu'n cytzakpet ke alimaj tuj k'ij te ajlabl, ¿jax yaa'mpa tumel tu'n ttzakpet jxuuj tiy'jil Abraham lu tuj k'ij te ajlabl?—tzi Jesús.

¹⁷ Tej t-xi' tkba'n Jesús ju'wa, kej xjal e jaw yolen ti'jxin e cub cych'ixew cywitz xjal, pero ke niy'tl xjal e jaw tzalajke ti'j cykilca jawnex nbint tu'n Jesús.

Jun techel ti'j iyaj te mostaza

(Mt 13:31-32; Mr 4:30-32)

¹⁸ Bix ak' Jesús te xnak'tzal. E xi' tkba'nxin:

—¿Ti cxe'l nkba'na ti'j tcawbil Dios? ¿Ti tten oj tt'z'iy? ¹⁹ Ct'z'iyel tisen tten tej tcu'x tawa'n jun xjal iyaj te jun tzee' mostaza tuj ttx'otx'xin. E tt'z'iy mostaza tejxe toc te tzee', bix ajben tu'n cyajlan ke ch'it tuj tk'ab.

Techel ti'j levadura

(Mt 13:33)

²⁰ Cxe'l nkanena juntl maj, ¿ti c'ajbel te techel ti'j ti tten oj tt'z'iyen ct'z'iyel tcawbil Dios? ²¹ C'ajbel levadura te techel. Ocx tk'o'n jun xuuj levadura tuj k'otj te pan, bix e cub tk'o'nxuj k'otj tuj oxe tcublel. Bix e jaw tt'z'iy k'otj te pan tu'n levadura hasta tejxe tjaw punntz'aj—tzi Jesús.

Ttzi'iyen ch'in

(Mt 7:13-14, 21-23)

²² Iy' Jesús cyuj nimc'a tnom, tu'ntzen t-xi' t-xnak'tza'nxin cye xjal. At tnom nmak, bix at coc'. Min el tuj t'c'ujxin tu'n tponxin Jerusalén. ²³ At jun k'ij e xi' tkanen jun xjal texin:

—Taat, kej chi cletel, ¿nimxixpa cybaj, bix ka yaa'n nimxix?—tzi xjal.

Bix e xi' tkba'n Jesús cye xjal:

²⁴—Ka ma tz'ocx nim tuj tcawbil Dios, bix ka yaa'n nim, pero cyk'o'nc cyipena tu'n ejee'xa chi caman tu'n cyocxa. Ttzi'iy tcawbil Dios ch'in, bix at nim xjal mlay nchi ocx. Mas yaj ccyajbe' tu'n cyocx, pero otk lmet ttzii'. ²⁵ Oj tpon koniyan, bix oj tel tniy' taaw jun jaa' ti'j ka otk chi oc baj cykilca ttxocaxin tuj tjaxin, bixsen q'ueletz t'lomo'nxin jaa'. Katzen ma chi pona oj ya otk lmet ttzii' jaa', bix cxe'l cykba'na: “Taat, jkom jaa' kwitza,” ka tzi cybela ju'wa, nuk q'ueletz ttzak'be'nxin: “Min ntzki'nkey,” tzi tbelxin. Ju'tzen pjel oj mi'n jket ttzii' tcawbil Dios cywitza. ²⁶ Bix chi cubsala cywitza texin: “Taat, mi'n tbinchey. Kape jac'a ko ocxa, cuma e waa'n ko'ya bix e c'an ko'ya tuyey, bix e tzaj tk'o'na xnak'tzibil tuj kq'ueybila,” tzi cybela. ²⁷ Pero cxe'l tkba'nxin cyey: “Min ntzki'na cywitza. Cyucxey, cuma nuk binchal ilkey. Mlay jket tcawbil Dios cywitza,” tzi tbelxin, ²⁸ bix jatzen chi jaw ook'ja, bix jatzen jaw kitx'itx'in t-xee' twitz cyey tu'n cyk'o'ja, cuma c'oquex ccyey'ena jcyiy'jila Abraham bix Isaac bix Jacob tunwen, cyuyaj cykilca tyolel Dios, pero jatzen cyey chi cyjelxa ti'jxa. ²⁹ Cyoxl xjal chi pomel tuj tcawbil Dios, ejee'j ocslan ti'nyola, at xjal te cykilca twitz tx'otx'. At te ocne, te elne, te jawne, bix te cubne, bix chi temel tuya Dios te junx maj. ³⁰ C'oquel cyc'u'ja ti'j kej xjal tzin cykba'na yaa'n nintzajke tuj twitz Dios, chi pomel, pero ejee'y mas jawnex tuj cywitza, mi'n chi pona—tzi Jesús cye xjal.

Oc q'uixba tc'u'j Jesús cyi'j xjal aj Jerusalén

(Mt 23:37-39)

³¹ Tujx k'ij, e pon juun aj fariseo, bix e xi' cykba'nxin te Jesús:

—Taj jxin gobernador Herodes tu'n tcub byeta. Il ti'j c'aala tuj Galilea—t'zikexin.

³² Pero e xi' tkba'n Jesús cyexin:

—Jaj xin Herodes o'cx tajxin tu'n tcub tyaa'nxin inayena, tu'ntzen waaja. Cyucxey kbalte tej yaal xjal chin cyjela tzalu ca'ba oxetel k'ij te ak'anal tixex tten. Q'uelel wii'na biman cyi' xjal bix chin k'anela kej xjal yaab. Oj tpon baj twi' jca'ba oxe k'ij, otktzen bint waak'ena tzalu tuj Galilea. ³³ Pero il ti'j q'uelel cyni'ya ti'j, amale mint xin aja tu'n ttzi Herodes wi'ja, pero tuj ca'ba oxe k'ij chin aala. Il ti'j chin xe'la Jerusalén tu'n nbyeta, cuma cytzki'n cykil xjal jatzen nchi cwa' byete ke tyolel Dios—tzi Jesús cye aj fariseo.

³⁴ Bix e xi' tkba'ntl Jesús:

—Key aj Jerusalén, key aj Jerusalén, ¿tikentzen nchi cub cybyo'na ke tyolel Dios? ¿Bix tiken nchi cub cybyo'na tu'n xak kej xjal nxi' tsma'n Dios cyey? Nim maj o wajbe'ya tu'n nclonteya ejee'y, tisen nchi ocx clet tal jun ttxu ey' tjak' t-xiicy', pero ccyey' inayena. ³⁵ Jey', cyjel tcyey'en Dios cytanema, bix min-al xjal chi cyjel tuj. Cxe'l nkba'na cyey, oj wel iig'uena, mi'n tz'oc cyey'ena nwitzta juntl maj hasta ojxe tpon jk'ij oj t-xi' cykba'na: “Chjonte te Dios ti'j ja xjal lu tzul tsma'n tu'nxin te cawel,” tzi cybela—e xi' tkba'n Jesús.

14

Jun xjal otk jaw mal ti'j e k'anj tu'n Jesús

¹ At juntl k'ij te ajlabl e xi' Jesús te waa'l tja junxin xjal nenel cye fariseo. Bix oc ccyey'en kej xin fariseo jaxin ka tu'n tak'anaxin tuj k'ij te ajlabl. ² Bix e pon junxin xjal yaab twitz Jesús. Otk jaw mal ti'jxin. ³ Bix e xi' tkba'n Jesús cye tx'olbal ley bix cye fariseo:

—¿Ti ncub cybisena ti'j? ¿Tzimpa tk'o'n ley amle'n tu'n tk'anj jun xjal tuj k'ij te ajlabl, bix ka min?—tzi Jesús.

⁴ Mintii' aj cytzak'be'n. Bix e cub tk'o'n Jesús ke tk'ab ti' tkul yaab, bix e tk'anexin, bix e xi' tkba'nxin te yaab tu'n taj tja. ⁵ Bix e xi' tkba'nxin cye fariseo:

—Ka at jun cyxola nxi' tz'ak tbur bix ka twacx tuj jun jul, ¿mi'mpatzen jatz tii'n najxin, amale tujet k'ij xjan?—tzi Jesús.

⁶ Min-al jun e bint ttzak'bej tu'n.

Kej e txquet tuj mejoblanel

⁷ Tej tpon tumel tu'n cywaa'n, oc tcye'yen Jesús kej tuya fariseo e cyajbe tu'n cycub ke cyuj k'a'j toc ttxa'n mes mas cymunel. Ju' tzunj e xi' tk'o'n Jesús jun tumel cyexin. E xi' tkba'nxin:

⁸—Ka ma ttxoc jun xjal ejee'y tuj jun mejoblanel, mi'n chi cub key cyuj k'a'j mas cymunel. Ka ma txi' ttxco'n taaw mejoblanel jun xjal mas nintzaj cywitza, ⁹ oj tpon, iltzen ti'j ctkba' taaw mejoblanel cyey: “Najsamkey, chi aal lk'e ch'ina, cuma ma tzul jun xjal mas nintzaj cywitza,” tzi bel. Bix jun ch'ixbajil nim oj cycub key cywi'j k'a'j menos cymunel. ¹⁰ Ju' tzunj, oj cytxqueta tuj jun mejoblanel, ju' chi cwel key cywi'j k'a'j menos cymunel, tu'ntzen ba'n txi' tkba'n taaw mejoblanel cyey: “Cyixtekey tzalu cyuj k'a'j mas cymunel,” tzi. Bix kej xjal ete' twi' mes cyuyey, q'uelel cyniy' ti'j ejee'y nchi nimj cyu'n. ¹¹ Ja tumel lu tzin tyeec'an ti'j xjal njaw tniman tiib, c'oquel te ch'in, bix alj xjal n-oc tk'on tiib te ch'in, ck'ojel te tu'n toc te nim—tzi Jesús cye xjal.

¹² Bix e xi' tkba'n Jesús te fariseo jxin otk txi' txcon te Jesús tu'n twaa'n tuyaxin:

—Oj t-xi' ttxco'na ke xjal tu'n cywaa'n tuyey, yaa'n nuk ejee' ke tuyey, bix ke titz'ena, bix ke titz'en tmana, bix ke tvesinta k'ina. Jax cxe'l cytxco'n jay tu'n twaa'n cyuya, tu'ntzen t-xelenta tiib. ¹³ Oj t-xi' ttxco'na ke xjal tu'n cywaa'n tuyey, txcom ke mebe tuyey bix kej xjal tal tpaltel, coxle, mošle, bix atle mastl. ¹⁴ Ka ju' nbint tu'na tu'n t-xi' ttxco'na kej mlay cyak' t-xel tey, cwel xtalbil tibaja, cuma ck'ojel t-xel tey tuj jk'ij oj cyjatz itz'j cykilca kej xjal ba'n cyten twitz Dios tuj cyamecy juntl maj—tzi Jesús te fariseo.

Jun techel ti'j nintzaj waa'n

¹⁵ Juntlxin xjal k'uklc'a tuya Jesús ti' mes, tej toc tbi'nxin kej tyol Jesús lu, bix e xi' tkba'nxin te Jesús:

—Taat, cykilca ejoo' judío ko oquel tuj tcawbil Dios bix ck'ojel xtalbil ke. ¿Yaa'mpa ju'wa?—tzi jun judío.

¹⁶ Pero e xi' tkba'n Jesús texin:

—Tuj cywitza ju' pjela. Pero c'oquel tc'u'ja ti'j ja tumel lu. At junxin xjal e tajbe tu'n tiy'sanxin jun nink'ij tuj tjaxin, bix e ttxocxin nim xjal. ¹⁷ Tej tpon tumel tu'n cypon tuj tjaxin, e xi' t'sma'nxin jun t-ak'analxin te txcol cye xjal. Te jaca juun txoca e xi' tkba'n t-ak'analxin: “Tzaj ch'ina te iy'salte nink'ij, cuma cykilca ch'in ma bint,” tžixin te cykilca. ¹⁸ Pero cykilca ke xjal e kbante ka mlay chi pon. Tneel e tkba junxin: “Najsama, kbanx ch'in te tpatróna mlay chin pona. At ch'in tx'otx' o cyaj nlok'o'na, bix il ti'j ma chixa cyey'lte,” tžixin. ¹⁹ At juntl xjal e xi' tkba'n: “Najsama, kbanx ch'in te tpatróna mlay chin pona. Ma cyaj nlok'o'na jwe' moj wacx, bix il ti'j tu'n toc nniy'be'n ke jila te cjol,” tžixin. ²⁰ Juntl xjal e xi' tkba'n: “Najsama, mlay chin pona, cuma ma chin majeya tuya jun xuuj,” tžixin. ²¹ Tej tpon meltz'aj tsanjelxin tuya tpatrónxin, e xi' tkba'nxin tik'ch j-otk cykba xjal texin. Tej tbinde tpatrónxin ju'wa, bix e jaw k'ojxin, bix e xi' tkba'nxin te t-ak'analxin: “Cutxa tuj ajkelbil cyuj be te tnom, bix k'intz ke mebe bix kej xjal tal tpaltel, coxle, mošle, bix atle mastl,” tzi patrón. ²² E tcuya t-ak'analxin, bix tej tbinde alcyej otk txi' tkba'n tpatrónxin texin, e xi' tkba'nxin te tpatrónxin: “Taat, o bint wu'na cykilcaj e tkbay weya, pero nimx k'ukbil at,” tzi t-ak'analxin. ²³ Bix e xi' tkba'n patrón te t-ak'analxin: “Ja'lewe cutxey ttxa'n tnom bix tiy' cyxol jaa' naxch, bix mxoetz ke xjal tu'n cyul bix te waa'l, tu'ntzen tnoj njaya cyuya xjal. ²⁴ Kej xjal e ntxoca nejl, cxe'l nkba'na tey mi nuk juncye cxe'l waa'nte tuj nnink'ija,” tžixin—e xi' tkba'n Jesús ti'j alcye kej xjal chi oquel tuj tcawbil Dios.

Cyiw tu'n koc lpe ti'j Jesús

(Mt 10:37-38)

²⁵ Nimxsen xjal oc lpe ti'j Jesús. Bix aj meltz'ajxin te cyey'lyce, bix e xi' tkba'nxin cye:

²⁶—Ka cyaja chi oc lpey wi'ja, pero ka mas n-oc tak' cymana cyey, bix cytxuy, bix cyxu'la, bix ke cycwala, bix ke cyxibena, bix ke cyaneba, bix ju'x cyey, mlay chi oca te nrxnak'atza.

²⁷ Bix ka ccy'iy tu'n cybyeta wuyena bix tu'n tiy'x ch'ixbajil cyu'na tu'nj tu'n cyoc lpey wi'ja, mlay chi oca te nrxnak'atza. ²⁸ Ka al cyey taj tz'oc lpe wi'ja, il ti'j cwel cybisena ti'j tik'ch cyjel cyk'o'na. Tisen tzunj ka cyaja jaw bint jun nmak jaa'. Oj cybinchana cyjay, ¿yaa'mpa il ti'j tuj tneel cwel cybisena jte' pwak chibela, bix ka chi xcyebela ti'j tu'n tbinde? ²⁹ Ka ma chi ak'a binchal cyjay, bix nuk t-xee' cyjay chinel cyu'na, ojtzen toc cyce'yen xjal, chi tze'l cyi'ja. ³⁰ Cxe'l cykba'n ke tze'l cyi'ja: “Jxjal lu oc ttzyu'n tu'n tbinde tja, pero tu'n min e cub t'isen ti' gaxt ti'j, mlay bint,” tzi cybel.

³¹ Cxe'l nk'o'na juntl tumel cyey. Ka at jun rey tu'n tclonte ttanem nuk tuya laaj mil tsoldado twitz juntl rey tzul k'ojlel tibaj tuya wink'an mil tsoldado, cwel t'bisen tuj tneel ka ba'n cyxcye tuya laaj mil tsoldado twitz wink'an mil. ³² Ka tuj twitz mlay xcye nuk tuya laaj mil tsoldado, bix cxe'l tsm'a'n jun tsanjel tuyaj rey tzajnen ttzaj tuya wink'an mil tsoldado te kanlte tu'n mlaype we' k'oj, bix alcye taj tu'n tk'oj te tu'n twe' k'oj. ³³ Ju'tzen cytena. Cwel cybisenaj nejl ka cyaja tu'n cyxi' lpey wi'ja. Ka yaa'n tuya cykil cyanema tu'n tcyaj cyk'o'na cykilca at te cyey tu'n cyxi' lpey wi'ja, mlay chi oc lpey wi'ja.

Jun ocslal twitz tx'otx' ju' tisen atz'en
(Mt 5:13; Mr 9:50)

³⁴ Chi ajbela weya nuk ka tuya cykil cyc'u'ja lepchkey wi'ja, tisen atz'en najben nuk ka ba'nx. Ka ma tz'el baj tik'bil atz'en, ¿ti tten tu'n tajben te atz'en? ³⁵ Mintii' c'ajbeletl, mi nuket te abono tuj tx'otx', bix mi nuket te tuj cytxa alimaj tu'n tonen. O'cx nuk tu'n tex xe't. Ka cyaja tz'el cyni'ya ti'j, c'o'quell cyc'u'ja ti'j ma txi' nkba'na cyey—tzi Jesús cye xjal.

15

Jun techel ti'j jun carnal e xi' tz'ak
(Mt 18:10-14)

¹ Cykilca chmol chojentj bix cykilcatl kej yaa'n ba'n tuj cywitz judío, nchi pon lk'e ti' Jesús te eбилte tyol. ² Yal tzunkej xin te cloj fariseo cyxol judío bix ke tx'olbal ley cye judío, e jaw yolken ti'j lu. E xi' cykba'nxin:

—Ju'x tej xin Jesús, jaan tej xina cyuyaj kej aj ila, hasta nwa'a'n xina cyuya—tzikexin.

³ Bix e xi' tkba'n Jesús jun techel cyexin, tu'n tel cyniy' ti'j tu'n tiken oca tjunen tiibxin cyuya aj il:

⁴—Jaca juun cylel carnal cyxola, ka at syent tcarnelxin bix ka ma txi' tz'ak junjil, ¿mi'mpa cyaj tk'o'nxin jnoventa y nuevejil jaa' ete'jil, tu'n t-xi'xin jyol tej jil otk cyaj tz'ak, tu'n tcnctijil? ⁵ Oj tcnctijil tu'nxin, cjawel tzalajxin, bix cjawel tk'o'nxin jajil ti' tkulxin, tu'n tajjil cyxol tuyajil. ⁶ Bix oj tponxin tjaxin, chi tzaal ttxco'nxin ke tuyaxin bix ke tvesint-xin, bix cxe'l tkba'nxin cye: “Chi tzalaj ch'ina wuyena, cuma jncarnela e cyaj tz'ak, ma cnetjil wu'na,” tzixin. ⁷ Tisentzen te cylel njaw tzalaj ti'j carnal e cnet tu'nxin, ju'tzen te Dios njaw tzalaj cyi' aj il oj tcyaj cyk'o'n cyil. Cxe'l nkba'na cyey, nim tzalajeb'l at tuj cya'j oj tcyaj tk'o'n jun aj il til, pero mintii' tzalajeb'l cyi'j noventa y nueve xjal mintii' cyil tuj cywitz.

Techel ti'j pwak xi' tz'ak

⁸ Cxe'l nkba'na juntl tumel cyey. Ka at jun xuuj at laaj pwak te dracma, bix ka ma txi' tz'ak jun, ¿mi'mpa tz'oc ttxko'n jun cantil, bix chebe q'ueletz tms'o'nxuj tz'is tuj tjaxuj, tu'n tcnct'9 Oj tzen tcnct tu'nxuj, chi tzaal ttxco'nxuj ke tuyaxuj bix ke tvesint-xin, bix cxe'l tkba'nxuj cye: “Chi tzalaj ch'ina wuyena, cuma jpwak e xi' tz'ak, ma cnet,” tzixuj. ¹⁰ Tisen tzunja xuuj lu cjawel tzalaj cyuya tvesint-xuj ti'j jun tpwaxuj oj tcnct, cxe'l nkba'na cyey, njaw tzalaj Dios cyuya ke t-ángelxin tuj cya'j ti'j jun aj il ncyaj tk'o'n til—tzi Jesús cye fariseo bix cye tx'olbal ley.

Techel ti'j junk'a cwal el yuwint

¹¹ Bix e xi' tkba'n Jesús juntl tumel cye:

—At junxin xjal at ca'ba tcwal. ¹² At jun k'ij e xi' tkba'n jk'a ch'i'p te tmank'a: “Taat, k'ontz weya nkab,” tzik'a. “Cu,” tzi tmank'a, bix e xi' tk'o'nxin juun kab te juun. ¹³ Min el k'ij tej tak'ka chmolte ke tik'ch tek'a, bix e xi'k'a tuj jun tnom nakch. Bix e cub baj tpwakk'a bix tik'ch tek'a jaa' nponak'a, tu'n nuk tik'ch e tajbek'a. ¹⁴ Tejtzen tcub baj niy'j tkabk'a, ntzajc'atlzen jun weyaj tuj tnom jaa' e ponak'a, bix e tzajtzen tcyajjal ti'jk'a. ¹⁵ Bix e xi'k'a cubsal twitzk'a te junxin aj tnom tu'n tk'ontexin taak'enk'a, bix e tak'xin taak'enk'a te c'ojlal boch. ¹⁶ Bix yaa'n nimxix twak'a e tak' tpatrónk'a. Nimxsen tak' weyaj oc tek'a. Nimxsen e tajbek'a tu'n t-xi' twaa'nk'a cywa boch, pero mi nuket cywa boch min e k'oj tek'a. ¹⁷ Cwatzen tel tniy'k'a ti'j texk'a tilk'a e tjoyk'a, bix ak'k'a bislte ti' pjel tek'a. Ul tuj tc'u'jk'a: “At nim t-ak'anal mmana, bix k'o'nnye nim cywa. Pero weya tzalu, ch'ix ncyima tu'n weyaj. ¹⁸ Chin pomel meltz'aja tuya mmana, bix cxe'l nkba'na texin: “Taat, oxsen nbinchaya nim wila twitz Dios bix twitza. ¹⁹ Mi'n chin n-oc tk'o'n tla te tcwala, sino nuk te jun t-ak'anala chin oqueleya ka ma tzaj tk'o'na xtalbil tu'n wak'anana te tey,' tzi nbela,” ju'tzen iy' tuj tc'u'j k'awa. ²⁰ Bix ajtzk'a cyxol boch bix e tzyet t'bek'a tu'n tponk'a tuya tmank'a. Maat-x tzajnen ttzajk'a nakch tej tel tniy' t'bek'a ti'jk'a, bix oc k'aben tc'u'jxin ti' tcwalxin, bix e xi' ajkelenxin te clulte tek'a, bix e tzaj t-xk'e'nxin jak'a bix el ttz'u'benxin twitzk'a. ²¹ Bix e xi' tkba'nk'a te tmank'a: “Taat, oxsen nbinchaya nim wila twitz Dios bix twitza. Mi'n chin n-oc tk'o'n tla te tcwala,” tzik'a. ²² Pero min e tkba' tc'u'j tmank'a ju'wa, sino e xi' tkba'nxin cye t-ak'analxin: “Cyk'o'nc cyipena. Cyii'ntz xbalen t'banel bix cyk'o'nc ti' ncwala. Bix cyk'o'ncc'a jxmul

k'abbaj tzin tkba'n ka ncwal k'eya, bix cyk'o'nc t-xaabk'a. ²³ Bix cyii'ntz ch'inj wacx n-oc tz'iset tu'n tajben weya tuj nink'ij, bix cybyo'nc'a, tu'ntzen kwaan ti'j te t'nink'ij ncwala, ²⁴ cuma jncwala lu tisenca'o o cyim, pero ma tzul meltz'aj wi'ja. El tzpet, pero ma tzul jlet," t'zixin cye tmaanxin.

Bix ak'kexin iy'salte jun nink'ij.

²⁵ Yal tzunj xin t'zicyk'a, nak'anaxin tuj cycojbilxin. Tejtzen tpon lk'exin nka ta' cyjaxin, bix e tzaj tbi'nxin nbajxsen jun tuj nink'ij. ²⁶ Bix e xi' ttxco'nxin jun cymaanxin, bix oc tkanenxin: "¿Ti nbaj? ¿Ti nink'i'l nbaj?" t'zixin. ²⁷ Bix e xi' tkba'n maan texin: "Ja tiz'ena ma tzul meltz'aj, bix ba'nk'a. Ju' tzunj ma tkba cymana tu'n tcub j'il wacx clo'n tu'nxin te t'nink'ijxin, tu'ntzen tiz' t'nink'ij jk'a tiz'ena ma tzul," t'zi maan. ²⁸ Tejtzen t'bj tbi'nxin ju'wa, bix e tzaj tk'ojxin. Ya tcy'itlxin ocxxin tuj cyjaxin. Bix etz cymanaxin cubsal twitz texin tu'n mi'n k'ojxin. ²⁹ Bix e xi' tkba'nxin te tmanxin: "Nimxsen tyem ma chin ak'anana cyiw tuj taak'ena, tisenx kej t-ak'anala. Pero bajx tz'e'len nxoo'na tleya. Bix mintii' o tzaj tk'o'na weya, mi nuket jun ni' nchivaya tu'n tajben weya cyuya ke wuyena. ³⁰ Pero tej sul jk'a tcy' aal, jk'a x'aj yaa'nte tpwaka cyuya xuuj tiy' jak'ch tumel, bix ma cub t'hyo'na j'il wacx clo'n tu'na te tek'a. Yaa'n tumel tuj n'witza," t'zi t'zicyk'a. ³¹ E xi' tkba'n tmanxin texin: "Ncy'aal, ma tena wuyena cykil tyem, bix cykilca tik'ch weya, te tcy. O'cx ctzaal tkatena weya. ³² Pero yal tzunj tiz'ena, e najk'a. Tisenc'a e cyimk'a, pero ja'lewe ma tzul meltz'ajk'a i'tzk'a. El tzpetk'a, pero ja'lewe ma tzul jletk'a juntl maj. Ju' tzunj tumel tu'n ktz'alaj bix tu'n kiy'san t'nink'ijk'a," t'zi cymanaxin—ju'xsen te Jesús e tkba cye fariseo.

16

Techel ti'j junxin mayordomo yaa'n ba'n

¹ Bix e xi' tkba'n Jesús cye t-xnak'atzxin:

—Cxe'l nkba'na jun tumel cyey. At junxin ak'anal tuya jun patrón k'ina, bix e k'oj texin tu'n t-xi' t'cyeyenxin cykilca tk'inemal t'patrónxin. At jun k'ij oc cykba'n cab xjal te t'patrónxin: "Jtey tmayordomo min tz'ajben ba'n. Nuk nbaj tyaa'n tpwaka," t'zike. ² Bix e ttxoc jxin k'ina ja mayordomo, bix e xi' tkba'nxin texin: "¿Ti t'nen tzin nbi'na nbaj tyaa'na npwaka? K'om t'cuenta weya ti t'nen tik'ch weya at tuj t'cuenta, cuma ya mi'n tz'ajbentla te n-ak'anala," t'zi t'patrónxin. ³ Bix e cub t'hsen mayordomo ti'j: "¿Ti p'jel weya tu'n witz'ja, cuma q'uelel ti'n n'patróna waak'ena? Yaa'n nak'l kena ncjo'na, bix at nch'ixewa oj wak'a kanl n'cotza. ⁴ Aa, ma tzul tuj nc'u'ja. Cwel nninc'u'na ti'j tu'n t'zaj cyk'o'n xjal x'talbil weya tuj cyja oj tel k'i'n waak'ena," t'zixin. ⁵ Bixsen e ttxocxin cykilcaj xjal jaa' otk txa' tk'o'nxin tpwak t'patrónxin te maan. E xi' tkba'nxin te t'neel c'asbenel: "¿Jte' tcy t'asben twitz n'patróna?" t'zixin. ⁶ Bix e xi' tkba'n: "Ex wii'n weya jun syent bot te aseyt te olivo," t'zi. Bix e xi' tkba'n mayordomo te: "Lu tu'l lu. Kequey bix tuj ajkelbil k'o'nq'uey juntl u'j, bix tz'i'bac'ax tuj nuk cincuenta bot," t'zixin. ⁷ Bix e xi' t'kanen mayordomo te juntl c'asbenel: "Yaj tcy, ¿jte' tcy t'asben?" t'zixin. E xi' tkba'n: "Ex wii'n weya jun syent alma triwa," t'zi. Bix e xi' tkba'n mayordomo: "Lu tu'l lu. K'o'nq'uey tuj juntl u'j nuk jun mutx'," t'zixin. ⁸ Tej t'bine k'ina ti otk bint tu'n mayordomo, e xi' tkba'nxin: "Jnmayordomiya yaa'n ba'n, pero amale ot bint jun ka' tu'n wi'ja, pero te junx maj x'bi'l, cuma ma cub t'hsen ti'j tu'n tiz'j yaj," t'zixin—t'zi Jesús.

Bix e xi' tkba'ntl Jesús cye t-xnak'atz:

—Ja tumel lu ma txi' nkba'na cyey, tu'n t-xi' nyee'c'ana cyey kej xjal yaa'n lep'hec ti' Dios mas ncub cybisen ti t'nen tu'n cyitz'j twitz tx'otx' cywitzj kej xjal lep'hec ti' Dios ncub cybisen ti t'nen tu'n t'bine cyten ti' cychunk'lal tuj cya'j. ⁹ Tisen te mayordomo oc tipen ti'j tu'n tajben te cykilcaj at tuj t'cwent tu'n t'caaman tu'n tk'oj x'talbil mas yaj cyu'nj cyuya, jaxse ju'x cyey, il ti'j c'ouqel cypena ti'j tu'n tajben tik'ch cyey tu'n cyela ba'n te Dios, tu'ntzen oj cybaja twitz tx'otx', c'ycaman t'zana t-xel tu'n Dios tuj cya'j.

¹⁰ Al ma cuyante tuj jun ak'untl ch'in, jax ju'x c'cuya tuj jun ak'untl nim. Bix al mi'n t'cuyan tuj jun ak'untl ch'in, jax mlay t'cuyan tuj jun ak'untl nim. ¹¹ Ka min ma chi ela ba'n tuj jch'in at cyuyey twitz tx'otx', jey'tzen, ¿ti t'nen tu'n toc ke t'c'u'j Dios cyi'ja tuj jnim tuj cya'j? ¹² Ka min ma chi cuyana tuj j-ak'untl nk'oj tu'n Dios cyey twitz tx'otx', ¿ctzaalpa tk'o'n Dios t-xel tuj cya'j? Min.

¹³ Mlay tz'ajben jun ak'anal te ca'ba patrón. Ka ma t'joj tu'n tajben te jun patrón, cyjeltzen tk'o'n juntl. Bix ka jatz ma tak'a tiib tuya t'cab patrón, cyjeltzen tk'o'n j'neel. Ju'tzen t'nen tuya Dios bix k'inemal. Ka tuya cykil cya'u'ja nche'x l'pey ti' k'inemal, mintz'entii' cyaja tu'n cyajbena te Dios—t'zi Jesús cye t-xnak'atzxin.

¹⁴ Octzen cybi'n fariseo cykilcaj e xi' tkba'n Jesús cye t-xnak'atz ti'j k'inemal. Ocx tak' k'inemal cyexin, bix tuj cywitzxin otk k'oj k'inemal cyexin tu'nj nimxsen ajbenkexin te Dios. Ju' tzunj, oc cytze'nxin ja Jesús. ¹⁵ E xi' tkba'n Jesús cyexin:

—Cywitz xjal nxi' cyyeec'a cyiiba ka ba'n xjalkey. Pero ttzki'n Dios ti niy' tuj cyc'u'ja. Nchi ela ba'n tuj cywitz xjal, pero twitz Dios ejee'y tzu'key. ¹⁶ Nejl e k'oj cyey tley Dios bix cyol tyolel Dios tu'n cynimante. Bix mas yaj ul Juan Bautista te kbalte jba'n tpoebal tu'n tul tcawbil Dios, bix tuj ajkelbil nchi txquet cykil xjal tu'n cyocx tuj tcawbilxin. ¹⁷ Pero tuj cyanema cycy'iy jtzin tkba'n Dios. Pero mlay chi camana ti'j tzin tkba'n Dios. Cyiw tu'n t-xitj twitz cya'j bix twitz tx'otx', pero mas cyiw tu'n t'ba'j tilel tyol Dios. Tcawbil tyol Dios mlay baj twi', mi nuket ch'in tu'n t'ba'j tilel.

Tej tyole Jesús ti'j paxjlenel

(Mt 19:1-12; Mr 10:1-12)

¹⁸ Tisen tzunj, tzin cykba'na tumel tu'n tcub cypa'na cyiiba tuya cyxu'la, tu'ntzen ba'n cymajey tuya juntl. Pero tzin tkba'n tley Dios, ka ma cub cypa'na cyiiba tuya cyxu'la bix ka ma chi majey tuya juntl, tzin cybincha'na aj pajlel. Jax ju'x ka ma maje jun xinak tuya jun xuuj o cub tpa'n tiib tuya tchmil, aj pajlel tzin tbincha'n—tzi Jesús cye fariseo.

Jun xjal k'ina bix Lázaro

¹⁹ Bix e xi' tkba'ntl Jesús cye fariseo:

—At junxin xjal k'ina. Oc ti'jxin nukksen jaj tisen t-xbalen rey bix jawnexsen twi'. Te jaca k'ij jawnexsen tbel twaxin, bix nuk jaca k'ij tziy' tmlink'ijxin. ²⁰ Bix at juntlxin xjal mebe te junx maj, Lázaro tbixin. Nimksen tx'a'c ti'jxin. Bix e xi' cyk'a'x xjal jaxin ttzi tjaxin k'ina, tu'ntzen tk'oj ch'in twaxin. ²¹ Nim e tajbe Lázaro tu'n t-xi' twaa'n nuk thuchlel tpan k'ina el tz'ak tey nwaaxnin, pero nuk el tc'u'j ti'j. Bix yaa'n nuk o'cx at tak' weyajo, sino jax ju'x e pon ke txyan te l'k'bilte twitz tx'a'c ti'jxin. ²² Tetzen jun k'ij tej tcyim Lázaro. Bix e xi' k'i'n cyu'n ángel jaa' ta' Abraham. Jax ju'x e cyim k'ina, bix e cu'x maket. ²³ Jatz e pone k'ina tuj cynajbil cyimne, bix oc tuj q'uixc'aj. Tej t-xi' tcyeyenxin, e tilxin Abraham. Nakch tcwa' Abraham, bix tcub Lázaro ttxlajxin. ²⁴ Bix e jaw š-in k'ina: “Taat Abraham, najsama, k'ontz ch'in lastim weya. Khanx ch'in te Lázaro tu'n ttzaj ti'i'n a' weya, ikch nuk tcu'x tmu' twi' tk'ab tuj a', tu'n toc tk'o'n ti' waak'a, tu'n tchewex, cuma nimsxen niy'x q'uixc'aj wu'na tzalu tuj k'ak',” tzi k'ina. ²⁵ Pero aj ttzak'be'n Abraham: “Nchman, c'ulel tuj tc'u'ja tej ttena i'tza twitz tx'otx', nuk te tey e cub ttzyu'na cykilca, pero te Lázaro, nuk jaj ka' e k'oj te. Pero ja'lewe, te te tu'n tten tuj tzalajeb. Jatzen tey, tu'n ttena tuj q'uixc'aj. ²⁶ Bix yaa'n nuk o'cx jlu, pero jax ju'x at jun jul mintii' tumel jaa'le npomnina baj t-xee' tmij jaa' eto'we, tu'ntzen ka taj jun xjal tzalu tu'n tpon tuyej, mlay tziy'x tibaj jul, bix tu'ntzen mlay tziy'tza tzalu kuyena,” tzi Abraham. ²⁷ Bix e xi' tkba'n k'ina te Abraham: “Nchman, ka ju' ttena, cxe'l ncubsa'na nwitzta tey tu'n t-xi' t'sma'n Lázaro tja nmana twitz tx'otx',” tzu'na at jwe' witz'aj, bix waja tu'n t-xi' tk'umen cye ti ttenj jaa' ntiiniya, tu'ntzen mi'n chi cu'tz tzalu tuj q'uixc'aj,” tzi xin. ²⁹ Bix aj ttzak'be'n Abraham: “Min. At tyol Moisés cyuya, bix cyol cabtl tyolel Dios. Ba'n toc cybi'n,” tzi Abraham. ³⁰ Pero e xi' tkba'n k'ina: “Pero mlay tz'oc cybi'n ke witz'ena tyol Dios. Najsama, chk'onx jun xjal o cyim cyuya, tu'ntzen toc cybi'n, tu'n tcyaj cyk'o'n cyil,” tzi k'ina. ³¹ Bix aj ttzak'be'n Abraham: “Ka min o tz'oc cybi'n alcyej e tkba Moisés bix cyej cabtl tyolel Dios, jax mlay tz'oc cybi'n o'j tpon juntl te kbalte tyol Dios, amale njawet itz'j jun cyimne juntl maj, bix npon te kbalte,” tzi Abraham—tzi Jesús cye fariseo, kej xin nim oc cyachen k'inemal.

17

¡Ayksen tej xjal ncub tk'o'n tzpetsabl tuj tbe juntl!

(Mt 18:6-7, 21-22; Mr 9:42)

¹ Atzen jun k'ij e xi' tkba'n Jesús cye t-xnak'atz:

—Mlay we' at ocsabl c'u'j'ba'j tzul tu'n t-xi' tzpet jun xjal tuj tbe Dios. ¡Pero ay xsunj xjal ncub tk'o'n tzpetsabl tuj tbe juntl yaa'n cyiw tuj tocsabl, tu'n t-xi' tzpet tuj tbe Dios! ² Masetpele ba'n o'j tcub ye' jun xak al tkul jxjal nk'on tzpetsabl te juntl, tu'n t-xi' xe't tuj mar, twitz tuj nxix t-xi' tuj castiwa tu'n Dios tu'n'ncub tk'o'n tzpetsabl cyej xjal yaa'n cyiw tuj cyocslabl. ³ Ju' tzunj, c'o'quel cyc'u'ja ti'j tu'n mi'n txi' cytzpetsa'na jun xjal tuj tbe Dios.

Katzen at jun k'i'n tyol Dios tu'n bix ka ma tz'oc tbincha'n il cyi'ja, cykbanx te tu'n mi'n binchantl il. Ka ma cyaj tk'o'n til, cynaysanq'uey. ⁴ Bix ka at jun xjal nbinchan jun ka' cyey nim maj, kape wuuk maj tex k'ij, bix ka jaca maj tzin tkba'n cyey: “Najsama, najsanq'uey wila tu'n'ja k'a-n-oc nbincha'na ti'ja,” ka tzi ju'wa, il ti'j cwel cynajsa'na til jaca maj—tzi Jesús cye t-xnak'atz.

Ti tten tu'n toc ke ku'uj ti' Dios

⁵ At juntl k'ij e xi' cykba'n kej xin sma'n tu'n Jesús texin:

—Taat, k'ontz keya tu'n mas tu'n toc ke ku'ja ti' Dios, tu'ntzen t'bin mas ku'na tu'n tipemalxin—tzikexin.

⁶ E xi' tkba'n Kaaw cyexin:

—Nuket tz'oc ke cyc'u'ja ti' Dios cykilca texin ba'n tbint tu'n, ikchetle ju' ch'in cyocslabla tisen jun twitz mostaza, jac'atzenle t-xi' cyk'umena tej tzee' lu tu'n tjatz tii'n tiib tuyax floc', tu'n tcu'x tawan tiib tuj mar, bix jac'atzele tbi cyyola—tzi Jesús.

Alcyej cbinel tu'n jun ak'anal

⁷ E xi' tkba'n juntl yol cye t-xnak'atz:

—C'oquel cyc'u'ja ti' ja tumel lu ti' junxin xjal tuya t-ak'analxin. Jaxin cxe'l tchk'onte t-ak'analxin te cjol ttx'otx'xin bix ka te cylel ke tcarnelxin. Oj tpon meltz'aj t-ak'analxin tuj taak'en tja tpatrónxin, ¿cxe'lpa tkba'n tpatrónxin texin: “Ctoctz tey, bix kequey te waa'l. Ja'lex txi' nk'o'na tway,” tzi'pa tbel tpatrónxin? ⁸ Min, yaa'n ju'wa, sino ju' cxe'l tkba'nxin te t-ak'analxin cyjulu: “Binchama nwaya, bix k'ontza weya. Oj nbaj waa'na bix oj nbaj wc'ana, ba'ntzen twaa'n tey bix tu'n tc'ana,” tzi tbelxin. ⁹ Ojnbint tu'n ak'anal alcyej otk tkba tpatrón, ¿ilpa ti' cxe'l tk'o'n tpatrónxin chjonte texin tu'nj otk bint tu'nxin? Min. ¹⁰ Jaxse ju'x cyey t-ak'anal Dios, oj tbint cyu'na alcyej ckbajel cyey, mlay chi ayona ti'j tu'n tk'oj jun chjonte cyey, sino cxe'l cykba'na: “Nuk ak'anal ko'ya. Mintii' il ti'j tu'n tk'oj chjonte keya, cuma o bint ku'na nuk jaj il ti'j tu'n tbint ku'na,” tzi cybela—tzi Jesús cye t-xnak'atz.

Tej tk'anj laaj xjal tu'n Jesús

¹¹ Tejzen tzyet te Jesús tu'n t-xi'xin tuj Jerusalén, bix e xi'xin tujele tmojon Galilea tuya Samaria. ¹² Tejzen tpon lk'exin ti' jun tnom, ttxa'ntzen tnom attzen laaj xjal tuya jun yabel nk'ey cychu'l tu'n, lepra tbi. E cub we'ke nakch ch'in twitz Jesús, ¹³ bix e jaw s-inke twitzxin:

—Taat, Jesús, k'ontz tanema kibaja bix k'anena ki'ja—tzi'ke.

¹⁴ E xi' tcyey'en Jesús eje'e'xin, bix e xi' tkba'nxin:

—Cyucxey cyuya ke pala bix cwel cyyeec'a cyiiba cywitz, tu'ntzen toc cycyey'en ya mintii'tl lepra cyi'ja—tzi Jesús.

Ju'tzen e xa'kexin, bix tuj be e k'anjake tu'n tipemal Jesús. ¹⁵ At jun cyxolxin, tej toc tcyey'enxin mintii'tl tyabelxin, e jawssen tniimsa'nxin tbi Dios tuya jun cyiw tuj twi'xin, bix aj meltz'ajxin tuya Jesús. ¹⁶ Bix e cub mutzk'ajxin t-xee' tken Jesús, bix e xi' tk'o'nxin chjonte te. Jxin xjal aj meltz'aj tuya Jesús, te Samariaxin. ¹⁷ Bix e xi' tkba'n Jesús cyey xjal tcub tuyaxin:

—¿Yaa'mpatzen laaj cybaj jxjal ma chi k'anj? Yaj tzunj beljajtl, ¿tii'n ma che'x? ¹⁸ ¿Japa jxjal yaa'n judío jlu tjunal s-ajtz meltz'aj tu'n tk'onte chjonte te Dios?—tzi Jesús.

¹⁹ Bix e xi' tkba'n Jesús tej xin e cub mutzk'aj:

—We'wey bix cutxey. Tu'nj s-oc ke tc'u'ja wi'ja, ma cleta—tzi Jesús.

Ti tten oj ch'itk tul meltz'aj Jesucristo juntl maj

(Mt 24:23-28, 36-41)

²⁰ At juntl k'ij e xi' cykanen ke fariseo te Jesús:

—Kbantz keya jtoj tzul tcawbil Dios twitz tx'otx'—tzi'kexin.

Aj tztzak'be'n Jesús cyexin:

—Cyaja tu'n t-xi' nkba'na cyey alcyej techel tzul jlet te yec'bil ch'iktzen tul tcawbil Dios, pero jn-oc cykanena, mlay cyila. ²¹ Tuj cywitzatza tzul jun k'ij oj tk'umj: “At tcawbil Dios tuj lugar lu,” bix ka oj tk'umj: “Ma pon tcawbil Dios maa chix.” ¿Mimpa tz'el cyni'ya ti'j atl twigar Dios cyxola ja'lewe?—tzi Jesús cye fariseo.

²² Pero te cyex t-xnak'atzxin e xi' tkba'nxin cyjulu:

—Nimxsen il cyuj k'ij chi ul. Cxe'l cykba'na: “Maxitpe tzul Kaaw ja'lewe te cawel, ikchetle nuk jun k'ij,” tzi cybela, pero mlay cyila, cuma mina'tl tpon tumel. ²³ At xjal cykba': “Ma tzul jxin Scy'o'n tu'n Dios. Luxe at chixa,” bix ka cykba': “Luxe at tzalú,” tzi cybel. Pero mi'n cyocslay cyyol, tu'n njyeta. ²⁴ Oj wula te cawel, inayena, jxin Sma'n tu'n Dios te cawel, cchic'ajaxel cywitz cykil xjal, tisen oj tcub koptz'aj jun tken k'ancyok cykilca twitz cya'j. ²⁵ Pero nejl, at nim q'uixc'aj tu'n tiy'x wu'na, bix kej xjal te ja'lewe chin elel cyxoo'n.

²⁶ Yal cyey xjal at twitz tx'otx' oj ch'itk wul meltz'aja, inayena, jxin Sma'n tu'n Dios tu'n ntena cyuya xjal, mi'n tz'oc cyc'u'j ti'j alcyej at tu'n t'aj, tisenx kej xjal at twitz tx'otx' tuj ttyem Noé min e labtke ti'j alcyej at tu'n t'aj cyi'j. ²⁷ Min e cyocsla at tu'n tcub jun nim castiwa cyibaj, sino nuk ex cyk'ij nchi waa'n, bix nchi c'an, bix nchi maje, tisex cyten. Pero nuk tisen tii' tej tpon jk'ij tej cyocx Noé tuj barc, bix ntzajtltzen jun nintzaj jbal cyibaj bix e baj cykilca xjal. ²⁸ Jax ju'x e baj mas yaj tuj ttyem Lot. Nchi waa'n bix nchi c'an ke xjal tisex cyten. Nchi lok'on bix nchi q'ueyen. Nchi awan bix nchi binchan jaa', tisex cyten. ²⁹ Jax ju'x e baj tej tpon jk'ij tej cyetz Lot tuj tnom te Sodoma, bix e tzaj twitz cya'j k'ak' tuya jun wik polvos azufre tbi. E cub tisen jbal tibaj tnom, bix e baj cykilca xjal. ³⁰ Ju'xsen nuk q'uelex cyk'ij xjal oj wul meltz'aja twitz tx'otx'. Bixsen cwel castiwa cyibaj.

³¹ Tuj tzunj k'ij oj wul meltz'aja, mi'n chi labta ti'j tik'ch at te cyey. Ka te wexe twi' cyjay oj wul meltz'aja, mi'n chi cu'tza te clolte cyk'inemala. Jax ju'x ka nchi ak'anana tuj cycojbila, jax mi'n cub cybisena ti'j tu'n cyajtz meltz'aja cyjay te tzyulte cyk'inemala. ³² Mi'n chi oca tisen t-xu'l Lot. Tcy'ixuj e cyaj tk'o'nxuj tk'inemalxuj tuj Sodoma, bix ju' tzunj e cyma'xuj ti'j. ³³ Alj xjal nuk n-oc tc'u'j ti' t'chunk'lal twitz tx'otx', mlay tcaman jtchunk'lal tzin tk'o'n Dios. Pero ja tzunj xjal yaa'n nukxix n-oc tak' t'chunk'lal twitz tx'otx' te, sino ju' nxi' lpe ti'j tajbil Dios, ccamaltzen jtchunk'lal tzin tk'o'n Dios. ³⁴ Cxe'l nkba'na cyey, tuj tzunj k'ij oj wul meltz'aja, at ca'ba xjal nchi wutan junx twi' jun wetbil. Junx cjawel k'i'n, pero cyjel juntl tu'n tk'oj tcastiwa. ³⁵ At ca'ba xuuj nchi t'zee'n junx tuj jun jaa'. Junx cjawel k'i'n, pero cyjel juntl. ³⁶ At ca'ba xinak nchi ak'anan junx tuj cjo'n. Junx cjawel k'i'n, pero cyjel juntl—tzi Jesús cye t-xnak'atz.

³⁷ Oc cykanen t-xnak'atzxin texin:

—Taat, ¿jaa'tzen c'uleley?—tzikexin.

Aj ttzak'be'n Jesús cyxin:

—Tisen cytzki'n c'utz jaa' tcwa' jun xumlal baj cymne, cuma chic'aj tuj cywitz, jaxse ju'x weya oj wula. Chch'ajaxel jaa' chin ulela, tu'ntzen mintii' il ti'j tu'n toc cykanena jaa'—tzixin.

18

Jun techel ti'j jun viuda bix juez yaa'n ba'n

¹ Bix e xi' tkba'n Jesús juntl techel cye t-xnak'atzxin, tu'n t-xi' tyeeec'anxin cye tu'n mi'n baj cyc'u'j ti' Dios tu'n ttzaj tonenxin ejee' oj t-xi' cykanen texin, bix tu'n mi'n cyaj cyk'o'n tu'n toc ke cyc'u'j ti'jxin. ² E xi' tkba'nxin:

—At junxin juez e cawen tuj jun tnom. Mintii' tajxin Dios, bix jax mintii' lastim cye xjal texin. ³ Tuj xsunj tnom at junxuj mebe xuuj. Nim maj e ponxuj tuya juez, bix n-oc tkba'nxuj texin: “Taat, kbanx ch'in tej xinak lu o tz'alk'an wi'ja tu'n tajtz tk'o'n,” t'zixuj. ⁴ Mintey' e tocsla juez jaxuj. Pero at jun k'ij e xi' tkba'nxin: “Amale mint tz'oc nbi'na Dios, bix amale mintii' lastim cye xjal weya, ⁵ pero cxe'l wonena ja viuda lu, tu'ntzen mi'n nuk tz'otz tenxuj wi'ja,” t'zi juez.

⁶ C'oquel cyc'u'ja ti'j tyol jjuez yaa'n ba'n. ⁷ Katzen jaj xin juez e tbi t'kanbil jxuj xuuj, ¿mimpa tz'oc tbi'n Dios ke t-xjal nchi cubsan cywitz texin te k'ij bix te koniyan tu'n cyclet twitz ka'? ¿C'oquelpa Dios tisenj xin juez tcy'i tz'oc tbi'n viuda? ⁸ ¡Min! Cxe'l nkba'na cyey, yaa'n tuya cubsaj witz baj ctzaal tonen Dios ke t-xjal cywitz jxal nchi binchan ka' cyi'j. Pero oj wul meltz'aja twitz tx'otx', ¿at-xpa xjal n-oc ke cyc'u'j ti' Dios?—tzi Jesús cye t-xnak'atz.

Jun techel ti'j fariseo bix jxin chmol pwak

⁹ Bix e xi' tkba'n Jesús jun techel cyey xjal oc ke tc'u'j cyi'jx tu'n jiquen ete' tuj cywitz, bix el cyi'it'uetl ke niy'tl xjal. E xi' tkba'nxin:

¹⁰ —At ca'ba xinak ocxke tuj tja Dios te na'l Dios. Junxin tej cloj fariseo cyxolxin, bix juntlxin chmol chojentj te gobierno cyxolxin. ¹¹ E jaw we' jxin fariseo bix e na'nxin Dios ti'jxin. E xi' tkba'nxin: “Kman Dios, nxi' nk'o'na chjonte tey yaa'n jun aj il kena tisen juntl wik xjal. Yaa'n jun alak' kena. Mintii' ka' nbint wu'na jmintii' nbyan tuj ley. Yaa'n ju' kena tisen aj pajlel. Yaa'n ju' kena tisenj chmol chojentj t'cub chixa. ¹² Weya, n'cub n'pa'na weyaj ca'ba maj tuj smant. Bix nchin k'ona tlajan pa' ti' cykilca tzin ncamana te tja Dios,” t'zi fariseo te Dios. ¹³ Yal tzunj xin chmol chojentj, tu'n tch'ixewxin ex we'xin na'l Dios cyi'jxe xjal tuj tja Dios. Min e jaw tcyey'yentlxin jawne tuj na'j Dios, t'isex tten cyu'nxin, sino nuk oc t'pju'nxin t'tzi t-xuuc'xin tu'n t'bisxin, bix e xi' tkba'nxin: “Dios, tzajxit tk'o'na tk'ak'bil tc'u'ja wibaja, cuma jun aj il kena,” t'zixin. ¹⁴ Cxe'l nkba'na cyey, ja tzunj xin chmol chojentj e xi'xin t'jxin ya otk najset tilxin tu'n Dios, tu'nj otk txi' tkba'nxin te Dios aj ilxin. Pero ja tzunj xin fariseo, min e tocsla Dios jaxin, cuma alcyej xjal njaw t'nimsan tiib, c'oquel te ch'in. Ja tzunj xjal n-oc tk'o'n tiib te ch'in, c'oquel te jawnex—tzi Jesús cyey xjal e jaw cynimsan cyiib.

Tej tcub tcy'iwla'n Jesús ke nee'

(Mt 19:13-15; Mr 10:13-16)

¹⁵ At juntl e baj tuj juntl k'ij. E pon cyi'in ke xjal ke cyxlak twitz Jesús, tu'ntzen tcub tk'o'nxin tk'abxin cyibaj. Pero tej t-xi' c'ycye'yen t-xnak'atz Jesús jlu, e xi' cykba'nxin cye ke cyman nee' cyt'xu nee' tu'n mi'n chi oc ten yaalte texin ju'wa. ¹⁶ Pero e xi' tkba'n Jesús cye t-xnak'atzxin:

—Mi'n tz'oc cymayo'na tu'n mi'n chi tzaj ke nee' wuyena, cuma kej nee'wa jun cyanem te cmolte alcye cxe'l k'o'n cye, bix nuk ka ju' tanem jun xjal tisen ja nee'wa, ba'ntzen tocx tuj tcawbil Dios. ¹⁷ Cxe'l nkba'na cyey, alcyej xjal yaa'n ju' tanem tisen tanem jun nee' tu'n tiik'ente alcyej tzin tk'o'n Dios, mlay tz'ocx tuj tcawbil Dios—tzi Jesús.

*Junk'a cwal k'ina**(Mt 19:16-30; Mr 10:17-31)*¹⁸ At junxin xjal crinsipal cyxol judío oc tkanenxin te Jesús:

—Xnak'tzal ba'n, ¿alcyé chinel wu'na tu'n ncamana nchunk'lala te junx maj?—tžixin.

¹⁹ E xi' tkba'n Jesús texin:—¿Tikentzen nchin oca tk'o'na te ba'n? Min-al te jun ba'n, nuk ja te Dios ba'n. ²⁰ Yaltzen ti'j tkanbila, ttžki'na jley e cyaj tk'o'n Dios. Mi'n chi jyona juntl xuuj te pajbaj. Mi'n chi byona xjal. Mi'n chi alk'ana. Mi'n chi xtak'ena. Chi nimala twitz cymana bix cytxuy—tži Jesús.²¹ Aj ttzak'be'n jxin xjal:

—Cykilcaj lu o japan wu'na ntzajlenxe jatxe cwal kena—tžixin.

²² Tej toc thi'n Jesús tyol jxin xjal, aj ttzak'be'n Jesús texin:

—At-x juntl mina'x tbint tu'na. Q'ueyex tik'ch tey, bix k'onx twi' cye mebe. Ju'tzen ctemeltzen k'inemal te tey tuj cya'j. Oj tbint ju'wa tu'na, c'oquel lpey wi'ja—tži Jesús.

²³ Tej tbinte xin'ju'wa, bix e tzaj tžbixin, cuma k'ina xsunxin. ²⁴ Tej t-xi' tcyey'en Jesús otk bisenxin, e xi' tkba'n Jesús cye t-xnak'atzxin:—Cyiwxsen tu'n tocx jun k'ina tuj tcawbil Dios. ²⁵ Mas cyiw tu'n tocx jun k'ina tuj tcawbil Dios twitz tuj tu'n tex jun tžej tuj tžyo'p bak—tži Jesús.²⁶ Toc cybi'n jlu, e xi' cykba'n t-xnak'atzxin:

—Ka ju' ttena, ¿titzen tten tu'n tclet jun xjal?—tžikexin.

²⁷ E xi' tkba'n Jesús:

—Yal cye xjal, mlay bint cyu'nx tu'n cyocx tuj tcawbil Dios. Pero jatzen te Dios, cykilca ba'n tbint tu'n—tži Jesús.

²⁸ Bix e xi' tkba'n Pedro te Jesús:

—Taat, ttžki'na o cyaj kk'o'n keya tik'ch keya tu'n kxi' lpey ti'ja—tžixin.

²⁹ Aj ttzak'be'n Jesús cye t-xnak'atzxin:—Tzinen cxe'l nkba'na cyey, alj xjal mas taj tcawbil Dios twitz tja, bix ka cye tman, bix ka cye titz'em, bix ka te t-xu'l, bix ka cye tcwal, ³⁰ ck'ojeltzen te nim t-xel tuj tytem te ja'lewe, bix tuj tytem tzul, ctiik'eltzen tchunk'lal te junx maj—tži Jesús cye t-xnak'atzxin.*Tej tyole Jesús juntl maj ka tu'n tcyim**(Mt 20:17-19; Mr 10:32-34)*³¹ Bix e xi' tii'n Jesús ke cablaaj t-xnak'atzxin jaa' e temakexin cyjunalxxin, bix e xi' tkba'nxin cyexin:—Cybintz nyola. Ko xe'l tuj tnóm te Jerusalén, cuma ma pon tumel tu'n nnimenteya jtz'i'ben jatxe ootxa cyu'n tyolel Dios ti'j Sma'n tu'n Dios te cye xjal. ³² Chin k'ojel tzuna tuj cyk'ab xjal yaa'n judío, bix chin oquel jubena cyu'n tuya cyyol, bix chi yasel wi'ja, bix c'oquex cytzuuben tuj nwitza. ³³ Cxe'l cyk'o'n tz'u'n wi'ja, bix chin byetela cyu'n. Pero te toxen k'ij ncyimlena, oj njaw itz'jtla juntl maj—tži Jesús.³⁴ Pero min e cyocsla t-xnak'atzxin ka cykilca lu tu'n tžaj ti' Jesús. Oc cybi'nxin, pero mix e'la cyniy'xin ti'j ti japenina j-e xi' tkba'nxin.*Jun xjal moš te Jericó ul tnaabl tu'n Jesús**(Mt 20:29-34; Mr 10:46-52)*³⁵ Tejtzen tpon lk'e Jesús ttxa'n tnóm te Jericó, attzen jun xjal moš k'ukc'a ttžii' be. Nkanen pwak cye xjal. ³⁶ Tej toc thi'n moš nim xjal nlabt tuj be, e xi' tkanen:

—¿Tiken at nim xjal ja'lewe? ¿Ti nbaj?—tžixin.

³⁷ Oc cykba'n xjal texin:

—Jaj xin Jesús te Nazaret tzul—tžikexin.

³⁸ Tej tbintexin ju'wa, e jawxsen š-inxin:

—¡Jesús, tiy'jil David o tzaj tsuma'n Dios, k'ontz lastim weya!—tžixin. Nimxsen oc tenxin š-ilte thi Jesús.

³⁹ Ejee' tzunj xjal nejl twitz Jesús, tej cypon lk'exin ti' moš, bix oc ilenkexin ti' moš tu'n twe'xin tš-inxin, pero tzinx k'olbenxxin ti' Jesús:

—¡Tiy'jil David, k'ontz lastim weya!—tžixin.

⁴⁰ Tej toc thi'n Jesús ja moš, bix e we'xin, bix e xi' tkba'nxin cye xjal tu'n t-xi' k'i'n moš twitzxin. Tej tpon moš twitzxin, e xi' tkba'n Jesús te moš:⁴¹ —¿Ti taja tu'n tbint wu'na ti'ja?—tži Jesús.

Aj ttzak'be'n moš:

—Taat, k'ontz weya tu'n ncyeyena—tžixin.

⁴² E xi' tkba'n Jesús texin:

—Cxe'l nk'o'na tey tu'n cyjket tžak' twitza. Tu'nj n-oc ke tc'u'ja wi'ja, ba'n tcyeyena—tži Jesús.

⁴³ Tzinx yolen Jesús tej cyjket tbak' twitz moš, bix e xi' lpexin ti' Jesús, bix e jawxsen tnimsa'nxin tbi Dios. Cykilcaxsen xjal, tej t-xi' cycye'yen jlu, e xi' cyk'o'n chjonte te Dios.

19

Jesús bix Zaqueo

¹ Bix ocx Jesús tuj tnom te Jericó, bix iy'xin betel tuj tnom. ² Tujtzen tnom najle junxin xjal Zaqueo tbi. Nejenelxin cye ke chmol chojentj, bix k'inaxin. ³ Tej xi'nin Jesús tuj be, e tajbexin tu'n toc tcye'yenxin al tzunj Jesús, pero mix e tilexin tu'n timal xjal, bix cuma ch'in twe'xin. ⁴ Ju' tzunj bixsen iy' nejlxin tuj ajkelbil cywitz xjal, bix e jawxin twi' jun tzee' sicomoro tbi tu'n tcu'tz tcye'yenxin tii'n Jesús, cuma el tnuy'xin ti'j tu'n tex Jesús t-xee' jtzee'.

⁵ Tejtzen tcana Jesús nka t-xee' jtzee' jaa' tjaxe Zaqueo, e jaw tcye'yenxin, bix e xi' tkba'nxin: —Zaqueo, nix tcu'tza, cuma il ti'j chin pomel posadayina tjav ja'lewe—tzixin.

⁶ Tej tbinte Zaqueo ju'wa, e cu'tzxin tuj ajkelbil, bix e tiik'xin Jesús tuj txaxin tuya cykil tc'u'jxin. ⁷ Pero tej toc cye'yen xjal ju'wa, cykilcaxsen xjal e jaw yolen, cuma yaa'n ba'n tuj cywitz. E cykba:

—Ma tz'ocx Jesús posadayil tuj tja jun aj il—tzikexin.

⁸ Mas yaj, e cub we' Zaqueo, bix e xi' tkba'nxin te Kaaw cywitz xjal:

—Taat, cxe'l nk'o'na jun niy'jan te cykilca at wuyena cye mebe, bix cyej xjal o tz'el wii'na pwak cye tisen alk'al, cxe'l nk'o'na cyaja maj t-xel—tzixin.

⁹ Aj ttzak'be'n Jesús texin bix cye xjal:

—Te ja k'ij ja'lewe ma clet ja xjal lu, cuma tisen oc ke tc'u'j Abraham ti' Dios, jaxe ju'x ma tz'oc ke tc'u'j ja xjal lu ti' Dios. ¹⁰ Il ti'j q'uelel cyni'ya ti'j o chin u'la te jyol cyej xjal o che'x tzpet, tu'ntzen cyclet—tzi Jesús.

Jun techel ti'j laaj pwak (Mt 25:14-30)

¹¹ Tuj cywitz kej xjal n-oc cybi'n alcyej e xi' tkba'n Jesús, ya tu'n ttzyet tcawbil Dios tu'n Jesús, cuma ya ch'itk tpon Jesús Jerusalén. Min el cyniy' ti'j il ti'j tu'n taj nejlxin te mitkna'x tocxin te cawel. Ju' tzunj e xi' tkba'nxin jun tumel cye. ¹² E xi' tkba'nxin:

—At junxin xjal nintzaj. Ja tzunxin e xi' tuj jun tnom nakch, tu'ntzen tk'oj texin tu'n jxin rey tibaj cykilca tnom tu'n tocxin te cawel tuj ttanemxin tej tpon meltz'ajxin. ¹³ Tej mitkna'x tajxin, e xi' ttxco'nxin laaj t-ak'analxin, bix e cyaj tk'o'nxin junelne pwak te juun, bix e xi' tkba'nxin cyexin: “Ja pwak ma cyaj nk'o'na cyej, chi ak'anaxa ti'j tu'n cycamana mas,” tzixin, bix ajxin. ¹⁴ Yal tzunkej xjal te ttanemxin, el cyiiq'uen jaxin, bix e xi' cysma'nxin ke cysanjelxin te rey te kbalte cyjulu: “Kcy'ya tu'n tcawen ja xjal lu kibaja,” tzikexin. ¹⁵ Pero e k'oj texin tu'n tocxin te cawel tibaj ttanemxin, bix tej tpon meltz'ajxin, e xi' ttxco'nxin kej laaj t-ak'analxin otk cyaj tk'o'nxin pwak cye, tu'ntzen tbintexin jte' pwak otk tcaman jaca juun. ¹⁶ Ul jtneel t-ak'analxin, bix e xi' tkba'nxin te cawel: “Taat, jpwak e cyaj tk'o'na weya, ma japan tuj laaj,” tzixin. ¹⁷ E xi' tkba'n cawel texin: “Jay jun ba'n ak'anal. Cuma ba'n ma bint tu'na ti'j ch'in e cyaj nk'o'na tey, ju' tzunj cxe'l nk'o'na tey tu'n tcawena tibaj laaj tnom,” tzi cawel. ¹⁸ Bix ul tcab t-ak'analxin twitxzin, bix e xi' tkba'n te cawel: “Taat, jpwak e cyaj tk'o'na weya, ma japan tuj jwe',” tzixin. ¹⁹ Jax e xi' tkba'n cawel texin: “Cuma ba'n ma bint tu'na ti'j ch'in e cyaj nk'o'na tey, ju' tzunj cxe'l nk'o'na tey tu'n tcawena tibaj jwe' tnom,” tzi cawel. ²⁰ Bix ul juntl twitxzin, bix e xi' tkba'n te cawel, “Taat, lu jpwak e cyaj tk'o'na weya. Bi'x e cub n'xo'na tuj jun su'tj. ²¹ Min in ak'anana ti' tpwaka tu'n ttz'iy, cuma at ttzi wi'ja jac'a otk txi' tz'ak, cuma tey cyiw tnaabla. Nuk taja tu'n ttz'iy tpwaka. Nt'z'iy tpwaka nuk tu'n cyak'mal xjal, bix njtx'ona tuj j-e cu'x tawa'n juntl,” tzixin. ²² Bix aj ttzak'be'nxin te: “Tey jun ak'anal yaa'n ba'n. Jtey tyol c'ajbel tu'n tchic'ajax at tpaalta. Ka tuj twitza inayena jun xjal at il ti'j tu'n ttz'iy npwaka, bix tu'n ncamana tu'n cyak'mal juntl wik xjal, ²³ ztikentzen min e xi' tk'o'na npwaka tuj banco, tu'ntzen ttz'iy tuj tk'ab juntl xjal? Nuket e bint tu'na ju'wa, otelel ttz'iy tuya tal tej wul meltz'aja,” tzi cawel. ²⁴ Bix e xi' tkba'n cawel cyej xjal ete'c'a twitxzin: “Cyimel jpwak tej xjal lu, bix cyk'onx tej xjal e caman laaj e japana tu'n,” tzixin. ²⁵ E xi' cykba'n te cawel: “Taat, pero ya ma japan tuj laaj tu'n,” tzikexin. ²⁶ Aj ttzak'be'n cawel: “Cxe'l nkba'na cyej, jxjal e caman ti'j e k'oj te, mastl ck'ojel te, pero ja tzunj xjal minti' e tcama, ti'j e k'oj te, q'uelel k'i'ntl te. ²⁷ Yaltzen cyej xjal el cyxoo'n inayena bix cycy'i tu'n ncawena cyibaj, cyii'ntzke tzalu bix cybyo'nc'ake nwitz'a,” tzi cawel—tzi Jesús cye xjal.

Tej tocx Jesús tuj tnom Jerusalén (Mt 21:1-11; Mr 11:1-11; Jn 12:12-19)

²⁸ Tej tbaj tkba'n Jesús kej yol lu, bix exxin tuj Jericó, tu'ntzen tponxin Jerusalén. ²⁹ Tujtzen be at ca'ba coc' tnom Betfagé tbi bix Betania tbi juntl. Ete'c t-xee' jwiz Olivos tbi. Tej tponxin cytxa'nj niy' tnom, e xi' tkba'nxin te ca'ba t-xnak'atzxin:

³⁰—Waja tu'n cyxi'y tuj ni' tnom lu. Oj cypona, c'oquél cycyey'ena yo'lc'a jun bur. Jatzen jun burja min-al xjal o jax ke tibaj. Cypjumeltzen, bix cyii'ntz. ³¹Ka at xjal ma tz'oc kanente cyey: “¿Titzen n-ela cypju'na jžil bur?” ka tziike ju'wa, bix cxe'l cykba'na: “Ja jilja c'ajbel te Kaawa,” tzi cybela—tzi Jesús.

³²Bix e xi' kej ca'ba t-xnak'atxzin, bix oc noj jbur yo'lc'a cywitz, tisenx otk tkba Jesús. ³³Tej tel cypju'nxin, bix oc noj ke taaw bur cyi'jxin, bix e xi' cykanen cyexin:

—¿Titzen n-ela cypju'na jžil bur?—tziike.

³⁴E xi' cykba'nxin:

—Ja jilja c'ajbel te Kaawa—tzikexin.

³⁵Bix e xi' cyii'nxin bur twitz Jesús, bix e jax cyk'o'nxin cypapxeyenxin tuj tzalti'jžil te jun k'ukbil, bix e jax cyk'o'nxin Jesús tibajžil. ³⁶Bix e xi' bet bur, bix e baj cub cyliy'pa xjal cypapxeyen tuj tbe bur tuya Jesús, tisen tten oj n-ocx jun cawel. ³⁷Tej tpon lk'e Jesús nka tibaj tnom te Jerusalén, tejtzen cubnecx tcubxin tibaj tnom te'u'j jwitz te Olivos, cykilca kej xjal lepech ti'jxin bix ak' najke nimsaljawte tbi Dios tu'nj cytzalajabl. Otk cyil jjawnex tipemal e xi' tyeec'an Jesús, bix tuya nim šit'bil ³⁸e xi' cykba'n:

—iTzajxit nim xtalbil tibaj ja kcawel sma'n tu'n Dios lu! ¡Chjonte te Dios! ¡At-xit tzalajabl tuj cya'j, bix jawxit nimset tbi Dios!—tzi ke xjal tuya nim šit'bil.

³⁹Cyxoltzen tñimal xjal tocxe cabxin fariseo, ejee'j xin oc ke cyc'u'j te nimlte ley. E xi' cykba'nxin te Jesús:

—Taat Xnak'tzal, k'umenx cyej xjala tu'n mi'n chi cub ten š-il ka jay Jcawel sma'n tu'n Dios—tzikexin.

⁴⁰Aj ttzak'be'n Jesús cyexin:

—Cxe'l nkba'na cyey, ka c'oquél cymayo'na tu'n tk'umj cyu'n xjal ma tzul Jcawel sma'n tu'n Dios, ejee'tzen xak chi jawel yolel te kbalte, cuma il ti'j tu'n tk'umj tpochal—tzi Jesús.

⁴¹Tejzen tpon lk'e Jesús ttxa'n tnom te Jerusalén, oc tcyey'enxin ti' tnom, bix ak'xin ook'el. ⁴²Bix e xi' tkba'nxin:

—Key aj Jerusalén, nuket tz'el cyni'ya ti'j alcyey tu'n tñint cyu'na tu'n cytena tuj ttzjal. Tex ja k'ij ja'lewe matketle nxi' nk'o'na cyey tu'n cytena tuj ttzjal nuket nchi ocslana wi'ja, pero min tz'el cyni'ya ti'j al kena. ⁴³Nuket tz'el cyni'ya ti'j, cuma tzul jun k'ij oj cyul te k'o'jlel cyi'ja kej xjal n-el cyiiq'uen ejee'y. C'oquél cysut'en cyiib ke soldado ti'j cytanema, tu'ntzen mlay chi el oka. ⁴⁴Ejee'tzen chi cwel xিতে cytanema, bix pjel cybyo'n cykilca xjal tuj. Mi nuket jun xak bix cyaj tibaj juntl. Pjel ju'wa cuma te ja k'ij ja'lewe min xcyocslay tej sul Dios te onlte cyey—tzi Jesús.

Tej tetz tlojo'n Jesús ke q'ueyel tuj tja Dios

(Mt 21:12-17; Mr 11:15-19; Jn 2:13-22)

⁴⁵Tej tpon Jesús tuj Jerusalén, ocxzin tuj tja Dios, bix etz tlojo'nxin kej xjal ete'cx q'ueyel tuj. ⁴⁶E xi' tkba'nxin cye:

—Tz'i'ben tuj tyol Dios cyjulu: “Il ti'j tu'n tajben njaya te naablte nbi'ya,” tzi Dios. Pero cyey, ma tz'oc cyk'o'na te jun cyja alak'—tzi Jesús.

⁴⁷Jaca k'ij ocx Jesús tuj tja Dios te xnak'tzal cye xjal. Pero ejee' tzung xin nejenel cye pala cyuya tx'olbal ley bix ke nejenel te tnom e cyajbe tu'n tbyet-xin, bix oc cyipenxin ti'j tu'n ti ctemela tu'n tbyet. ⁴⁸Pero min e cnet ttxolan cyu'nxin ti tten tu'n tzyet cyu'nxin, cuma cykilca'tl te xjal toc ebil texin, bix ba'n tyolxin tuj cywitz.

20

Jun toclen Jesús at tu'n Dios

(Mt 21:23-27; Mr 11:27-33)

¹Te jun k'ij ocx Jesús tuj tja Dios te k'olte xnak'tzibil cye xjal bix te k'umlte jba'n tpochalel tcawbil Dios. Bix e pon kej pala mas nintzaj, cyuyax tx'olbal ley bix kej nejenel cye xjal te tnom, ²bix e xi' cykba'nxin te Jesús:

—Kbantz keya, ¿ti tey toclena tu'n tñinchana cykilcaj nbint tu'na tuj tja Dios? ¿Bix al e k'onte toclena tu'n tñint jlu tu'na?—tzikexin.

³Aj ttzak'be'n Jesús cyexin:

—Jax ju'x weya cxe'l nkanena cyey. Cykbantz weya, ⁴tej t-xi' tk'umen Juan Bautista tzul Jscy'o'n tu'n Dios bix e cu'x ke xjal tuj a' tu'nxin, ejee'j xjal e cyajbe tu'n tul cyil tuj cyc'u'j bix tu'n binne cyten tej tulxin, ¿al e k'onte toclen Juan tu'n tñint jlu tu'nxin? ¿Japa Dios, ma jaxxin?—tzi Jesús.

⁵Bix ak' kej xin pala bix kej xin tx'olbal ley yolel cyxolx ti tten tu'n taj cytzak'be'nxin:

—E tkbaxne jxin Juan Bautista ja Jesús Jscy'o'n tu'n Dios. Katzen ma txi' kkba'n te Dios taak'en Juan Bautista, ctkba'tzen Jesús ke: “Ka ju'wa, ¿tikentzen min e cyocslay tyol?” tzi tbel ke. ⁶Pero ka ma txi' kkba'n yaa'n te Dios taak'en e bint tu'n Juan, sino e tk'umexin nuk

texxin tyolxín, ka ko tzi ju'wa, ko cweltzen tu'n xak cyu'n xjal, cuma tuj cywitz xjal, tyolel Diosxin—tzikexin cyxolxxin. ⁷ Ju' tzunj e xi' cykba'nxin te Jesús:

—Mintii' tumel kuyena ka te Dios taak'en e bint tu'n Juan Bautista, bix ka min—tzikexin.

⁸ Bix e xi' tkba'n Jesús cyexin:

—Ka cycy'iy txi' cykba'na al e tzaj k'onte toclen Juan Bautista, jax mlay txi' nkba'na cyey al e tzaj k'onte weya woclen—tzi Jesús.

Jun techel cyi'j ak'anal ya'an ba'n

(Mt 21:33-44; Mr 12:1-11)

⁹ Bix e xi' tkba'n Jesús jun tumel cye xjal:

—At junxin xjal e cu'x tawa'nxin uva tuj ttx'otx'xin. Bix e cub tninc'u'nxin cyuya ke t-ak'analxin tu'n t-xi' cycye'yen ti'j tawalxin, niy'jantzen twitz awal te cye bix niy'jantzen texin. Bix e xi'xin tuj jun tnom nakch, bix e tenxin nim tyem. ¹⁰ Tejzen tpon tumel tu'n t-xilij uva, e xi' tsmá'nxin jun tsanjelxin cyuya t-ak'analxin, te k'ilte niy'jan texin. Pero tej tpon tsanjelxin, bix oc cypju'n ke t-ak'analxin, bix aj cysma'nxin mintii' ch'in k'i'n tu'n. ¹¹ Bix e xi' tsmá'n taaw tx'otx' juntl tsanjelxin cyuya. Tej tpon sanjel, jax ju'x e baja oc pjet cyu'nxin bix e baj yaset, bix aj mintii' ch'in k'i'n tu'n. ¹² Bix e xi' tsmá'n taaw tx'otx' juntl te toxen, pero jax ju'x e baj cyasene ke t-ak'analxin, bix el cylojo'nxin. ¹³ E xi' tkba'n taaw tx'otx': “¿Ti pjet weya? Cxe'lne nsma'na o'cx'a junx ncwala n-oc tak' weya. Kape cyniman ja ncwala oj tpon,” tzi xin. ¹⁴ Pero tej t-xi' cycye'yen ke ak'anal tawalxin, e xi' cykba'nxin cyxolxxin: “Lu jk'a tcwal jxin taaw tx'otx' tzule. Tele tek'a cyjela ja tx'otx'a te tkabk'a. Ko kbya'c'ak'a, tu'ntzen tcyaj te ke,” tzi xin. ¹⁵ Bix ex cyii'nxin tuj cojbil, bix e cub cybyo'nxin—tzi Jesús.

Bix e xi' tkba'ntl Jesús cye xjal:

—¿Ti tse' taaw tx'otx' ke t-ak'anal? ¹⁶ Cxe'l nkba'na cyey, tzulxin bix chi cwel tbyo'nxin kej ak'anala bix cninc'ulxin ti'j cyuya cabtl xjal—tzi Jesús.

Tejzen toc cybi'n xjal tyol Jesús, eltzen cyniy' cyi'j t-ak'anal taaw tx'otx' jun cyechel nejenel cye xjal cyxol judío el cyiiq'uen Jesús, bix e xi' cykba'n:

—¡Min! Mlay tz'el cyiiq'uen Jsma'n tu'n Dios ju'wa—tzi ke xjal tuj tja Dios.

¹⁷ Oc tcyeyen Jesús ejee', bix e xi' tkba'nxin:

—Tzin cykba'na mlay tu'n teliiq'uet jscy'o'n tu'n Dios, pero ka ju'wa, ¿tikentzen tzin tkba'n tyol Dios ti'j Scy'o'n tu'n Dios cyjulu: “Jxak el cyiiq'uen ke binchal jaa', c'oquel xak tej xak mas nintzaj te t-xee' jaa',” tzi tyol Dios? ¹⁸ Jatzen xak kbalte ti pjet cye xjal. Alj xjal ncub tz'ak twi' jxak lu, bi'x cwel buchj tu'n, bix oj ttzaj tz'ak jxak lu tibaj jun xjal, bi'x cwel patz'ex—tzi Jesús.

Jun tumel ti'j chojentj

(Mt 21:45-46; 22:15-22; Mr 12:12-17)

¹⁹ Tex jk'ij, e cyajbe ke tx'olbal ley bix kej pala mas nintzaj te tzyulte Jesús, cuma el cyniy' ti'j tumel cyi'j t-ak'anal jxin taaw tx'otx' e cub cybyo'n jk'a tcwalxin, cyi'jx toca ti japenina ja yola. Pero min e cub tzytzu'n jaxin, cuma at cytzi xjal cyi'j. ²⁰ Pero e jyonkexin tumel ti tten tu'n tcub tz'ak Jesús tuj cyk'abxin. E xi' cysma'nxin ke cyxelxin te xkelbilte te Jesús ti' tyol, tisenc'a e cyajbe tu'n cybinte alcyé tnaablxin. Oc cyipen tu'n tcub tz'ak Jesús tuj tyol tu'nj tkbantexin ka' ti'j Roma, tu'ntzen ba'n t-xi' cyii'n jaxin twitz gobernador te kbalte ka yaa'n ba'n tyolxín. ²¹ E xi' cykanenxin:

—Xnak'tzal, ktzki'na jxnak'tzibil tzin tk'o'na jaxxix yol, bix nuk tuj tumel tzin tk'umena. Mintii' tey tzin tyeec'a pabl cye xjal. Judíole, aj Romale, mintii' cytzi ti'ja te kbalte cye cykilca xjal ti taj Dios. ²² Ju' tzunj, kbantz keya, ¿tajpa Dios tu'n t-xi' kk'o'n te cawel te Roma jchojentj tzin tkanen ke, bix ka min?—tzikexin.

²³ El tniy' Jesús ti'j nuk e cyajbe tu'n tcub tz'ak tuj tyolxín, tu'ntzen ttzaj tk'oj jxin gobernador oj taj ttzak'be'nxin tu'n yaa'n il ti'j tu'n t-xi' cychjo'n judío chojentj te Roma, bix ka tu'n ttzaj cyk'oj judío oj t-xi' tkba'nxin jtajbil Dios tu'n t-xi' cychjo'n judío chojentj te Roma. E xi' tkba'nxin cye:

²⁴—Cyyeec'atz jun pwak weya. ¿Ale tzunj witzbaj tcub twitz ja pwaka, bix ale biybjaj toc tjak' witzbaja?—tzi xin.

Aj cytzak'be'nxin:

—Te cawel te Roma—tzikexin.

²⁵ E xi' tkba'n Jesús cyexin:

—Ka ju' ttena, cyk'onx te cawel te Roma alcyey te, bix cyk'onx te Dios alcyey te Dios—tzi Jesús.

²⁶ Ju'tzen e baj min e bint cyu'nxin tu'n tcub tz'ak Jesús tuj cyxkelbilxin cywitz xjal. E jaw klee'kexin, bix min ak'tlkexin.

Jun kanbil ti'j itz'jlenel tuj cyamecy

(Mt 22:23-33; Mr 12:18-27)

²⁷ Mas yaj e pon tuya Jesús juntl cloj xjal, saduceo tbi cycloj. E cykba juntl clojxin lu mlay chi jatz itz'j cyimne juntl maj tuj cyamecy, tisen tzunj e tkba Jesús. ²⁸ E xi' cykanexin texin: —Xnak'tzal, e cyaj ttz'i'ben Moisés ja ley lu: “Ka ma cyim jun xinak, bix ka min-al tal t-xu'l, il ti'j tu'n tmaje jun itzicy bix ka jun titz'en tuya t-xu'l, tu'ntzen titz'j jun tiy'jil, tu'ntzen mi'n naj tiy'jil,” tzi tley Moisés. ²⁹ Attzen jun maj at jun cloj te wuuk xinak cyitz'en cyiib. E maje cytzicy tuya jun xuuj, pero e cyimxin, bix min-al tcwalxin e cyaj. ³⁰ Bix e maje tneel titz'enxin tuya t-xu'lxin, tisen tzin tkba'n tley Moisés, pero jax ju'x e cyimxin, bix min-al tcwalxin e cyaj. ³¹ Ju'x e baj te toxen. Cykilcaj wuuk e maje tuya junx cyxu'lxin, bix cykilcakexin e cyimkexin, bix minxn-al jun cycwalxin e tzaj ti' xuuj. ³² Lepchxetzen tej thajtl te xuuj. ³³ Ojzen cyjatz itz'j ke cyimne juntl maj tuj cyamecy, ¿altzen cyxolj wuuk xinak c'oquel te tchmil ja xuuj? ¿Yaa'mpatzen il ti'j tu'n cyoc cykilcaj wuuk xinak te tchmilxuj, cuma tchmilbaxuj ejee?—tzi ke saduceo, tu'n tcub cyyeec'an at pajbaj tuj cya'j ka ma chi jatz itz'j ke cyimne tuj cyamecy juntl maj.

³⁴ Aj ttzak'be'n Jesús cyexin:

—Twitz tx'otx' at najle'n. ³⁵ Pero cyxolj xjal ck'ojel cye tu'n cyjatz itz'j tuj cyamecy juntl maj, bix min-altdtzen te cmajebel. ³⁶ Ya mintii'tl il ti'j tu'n cyitz'j nee', cuma ke xjal ya mi'n chi cyimtl. Chi oquel tisen ke tsanjel Dios tuj cya'j min chi cyim. Mlay chi cyim xjal, cuma jchunk'lal ck'ojel cye tisen tchunk'lal Dios. ³⁷ Tuj cywitza, oj ccyim xjal, cyimneke te junx maj. Pero yaa'n ju'wa. C'oquel cyc'u'ja ti'j e cyaj ttz'i'ben Moisés jun xnak'tzibil cyi'j xjal o cyim. Tej tyolen Dios tuj jun c'ul ch'i'x tuya Moisés, ja tzunxin e kbante cyjulu: “Inayena Tdios Abraham bix Tdios Isaac bix Tdios Jacob,” tzi Dios. ³⁸ Nukettzen cyimnen kej lu te junx maj tisen tzin cykba'na, minttzele e tkba Dios te Moisés ka jaxin Cydios, cuma texin nuk Cydios kej xjal i'tz jaxin. Tuj twitz Dios, luke i'tz kej xjal o chi cyim—tzi Jesús cye saduceo.

³⁹ At juun cyxol tx'olbal ley e xi' cykba'n:

—Xnak'tzal, ba'n ma yolena—tzikexin.

⁴⁰ Tej thaj ttzak'be'n Jesús cye saduceo, min-al juntl e tnimsa tiib tu'n thaj t-xkelentl te Jesús.

¿Ale cwalbaj Cristo tuj cywitza?

(Mt 22:41-46; Mr 12:35-37)

⁴¹ Bix e xi' tkba'n Jesús cye tx'olbal ley:

—Inayen tzuna c'oquel nkanen te cyey. ¿Tikentzen e kbaj Jscy'o'n tu'n Dios te cawel tcwal jrey David? ⁴² C'oquel cyc'u'ja ti'j jax David e kbante ka ja Scy'o'n tu'n Dios Taawxin. Tuj u'j te Salmos tzin tkba'nxin: “E xi' tkba'n Dios te Waawiya: ‘Kequey tuj nmank'aba te tneel xjal. ⁴³ Tcyaja tzalu hasta ojxe cyocx k'o'jlel ti'ja tjak' tkena wu'na,’ tzi Dios te Waawiya,” tzi David. ⁴⁴ Cykbantz weya, tej t-xi' tkba'n David ka Taawxin Jscy'o'n tu'n Dios, ¿tiken c'oquela kk'umen ka tcwal David Jscy'o'n tu'n Dios?—tzi Jesús.

Bix min ak'lkexin tu'n.

Tej tyole Jesús ti'j cymodo tx'olbal ley yaa'n ba'n

(Mt 23:1-36; Mr 12:38-40; Lc 11:37-54)

⁴⁵ Bix e xi' tkba'nxin cye t-xnak'atzxin cywitz cykilca xjal:

⁴⁶ —Mi'n txi' cyii'na cynaabla tisen nbint cyu'n tx'olbal ley. Cyaj tu'n cyiy' cyxol xjal tuya cyxbalen jawnex te yec'bil jawnexsenke, bix oj nchi bet tuj plaza, cyaj tu'n cyoc k'olbet tujxix tumel. Cyaj ejee' chi oquex nejl tuj k'ukbil mas jawnex tuj camon jaa', bix tiy' cyuj nink'ij nchi jyonxin kej k'ukbil te nimbil ti' mes. ⁴⁷ Pero ejee', nchi kanen nim manbil cypwak cye viuda, tu'ntzen ka min xchjet cyu'n viuda, n-eltzen cyii'ntl cyjaxuj. Pero amale mintii' lastim cye viuda cyu'nxin, bix nchi na'nxin Dios nim tyem cywitz xjal, tu'ntzen nim nchi ajbenxin te Dios tuj cywitzxin. Ejee' tzunj tx'olbal ley, ck'ojel mas castiwa cye tu'n Dios cywitzj cye niy'tl aj il—tzi Jesús cye t-xnak'atzxin.

21

Jun cotz cu'x tk'o'n jun viuda

(Mr 12:41-44)

¹ Bix oc ten Jesús cyey'lte, bix e tilxin ncu'x cyk'o'n k'ina cyoybil tuj tcubel pwak tuj tja Dios. ² Ju'x e tilxin tej tcu'x tk'o'n junxuj viuda mebe ca'ba centavo tuj tcubel pwak. ³ Bix e xi' tkba'nxin cye t-xnak'atzxin:

—Tuj cywitza yaa'n nim ma cu'x tk'o'n ja xuuj viuda, pero cxe'l nkba'na cyey ma cu'x tk'o'nxuj mas cywitzj cykilca kej k'ina, ⁴ cuma nuk ch'in n-el cyii'nxin ti' nimxsen at

cyuyaxin ncu'x cyk'o'nxin, pero ja tzunj xuuj lu ma cu'x tk'o'n tuya cykil tc'u'jxuj jmanc'bil k'i'n tu'nxuj tu'n titz'jxuj—tzixin.

Tej tkbante Jesús tu'n tcut xitj tja Dios

(Mt 24:1-2; Mr 13:1-2)

⁵ Yaj ch'intl ak' ke t-xnak'atzxin yolel ti'j nintzaj tja Dios. E xi' cykba'nxin:

—Cyecaxsen tcy'e'ncj tja Dios lu. Binne tuya ttx'otx'el nmak xak bix tbanel, bix cyecaxsen tuya tik'ch techel toc twitz xak, bix e bint tu'n cyoybil xjal—tzi ke t-xnak'atzxin.

⁶ Pero e xi' tkba'n Jesús cyexin:

—Cykilcaj n-oc ccyce'yena, tzul jun k'ij tu'n thaj xitj. Mi nuket jun xak tej lu cyjel tibaj juntl—tzi Jesús.

Kejyec'bil cyuj manc'bil k'ij

(Mt 24:3-28; Mr 13:3-23)

⁷ Bix e xi' cykanenxin te Jesús:

—Taat Xnak'tzal, cykilca kej lu ma tkbay keya ti'j ti pjel jun k'ij, ¿jtojtzen pjel? ¿Bix alcye techel tzul te yec'bil oj ch'itk tu'n thaj?—tzikexin.

⁸ Aj ttzak'be'n Jesús ti'j alcyej tu'n thaj cyuj k'ij tzul:

—Cyc'o'lanx cyiiba cywitz kej xjal chi ul tzpetsal cyey tuj cyocslabla ti'j jaxxix tyol Dios, cuma cyuj jk'ij chi ul, tzul nim xjal te kbalte ka ejee' Jscy'o'n tu'n Dios. “Ch'ixc'a tu'n thaj twitz tx'otx',” tzi cybel. Mi'n che'x lpey cyi'j. ⁹ Cyuj jk'ij chi ul c'o'quel nim k'o'j twitz tx'otx' nmom tuya nmom, bix chi jawel meltz'aj xjal k'o'jele ti' cygobierno. Oj cybinte at k'o'j, mi'n chi jaw sey'paja tu'nj at k'o'j, cuma il ti'j at k'o'j te mitkna'x wula. Pero kej k'o'j lu yaa'nja te yec'bil ch'ixc'a tpon manc'bil k'ij—tzi Jesús cye t-xnak'atzxin.

¹⁰ Bix e xi' tkba'ntl Jesús cye t-xnak'atzxin:

—Cyuj jk'ij chi ul, chi jawel nmak nmom te k'o'jele cyuya juntl nmak nmom, bix ju' pjel tuj cykilca twitz tx'otx'. ¹¹ Bix q'uiyela nim xcyaklaj nab cyiw, bix tuj nim lugar tzul weyaj bix yabel. Bix cwel ttzi twitz tx'otx', bix twitz cya'j cchic'ajaxel jawnex sey'pajlenel. ¹² Pero oj mintkna'x thaj cykilcaj lu, tu'nj lepcheckey wi'ja chi tzyetela bix chi yasjela cyu'n kej xjal nchi k'o'j wi'ja. Chi xe'l k'i'na cyu'n tuj xkela cyuj camon jaa', bix chi xe'la tuj tzee'. Bix chi xe'l txquetta cywitz cawel bix cywitz gobernador nuk wi'ja. ¹³ Pero oj thint cykilcaj q'uixc'aj lu cyey, c'ajbeltzen tu'n tk'umj nbi'ya. ¹⁴ Ju' tzunj mi'n chi labta cyi'jxa, ti'j ti tten tu'n cyyclon cyiiba tu'n cytzakpeta. ¹⁵ Jaca maj oj cyyolena wi'ja cywitz cawel, inayenxa cxe'l onenta cynaabla. Amale c'o'quele cyc'u'j ti'j tu'n tcul cyeece'an yaa'n jaxxix cywola wi'ja, pero mlay tz'el cyii'n tipemal cywola. Mlay maket cywola cyu'n. ¹⁶ Pero yal te cyey, chi xe'l q'ueyeta tuj cyk'ab cawel. Hasta cyexa cymana bix cytzyca bix cyitz'ena bix ke te cyjay bix ke cyuyey cxe'l cyq'ueyen ejee'y tuj cyk'ab cawel, bix juun cyey chi cwel byeta. ¹⁷ Cykilca xjal q'uelel cyiit'uen ejee'y tu'nj cyk'on cyiiba wuyena. ¹⁸ Pero yal te cychunk'lala te junx maj, min-al ba'n toc ipan ti'j. Mi nuket jun tztmal cywi'y cnaal. ¹⁹ Ka ma tziyx q'uixc'aj cyu'na wi'ja bix ka min chin cyaj ccyce'yena, chi oquela tuj cychunk'lala te junx maj.

²⁰ Yaltzen ti'j cykanbila ti'j jtoj tu'n tcut xitj tja Dios, oj t-xi' ccyce'yena cysut'en cyiib soldado ti'j nmom te Jerusalén, q'ueleltzen cyni'ya ti'j otk pon tumel tu'n tcut xitj. ²¹ Oj tpon tzunj k'ij, chi elxix ok kej xjal te departamento te Judea cyxol witz tu'n cyclet, bix chi etzxix kej xjal tuj Jerusalén. Kej xjal najl ttxa'n nmom, mi'ntet chi ocx tuj nmom tu'n cyclet, ²² cuma oj tpon tzunj k'ij, cwel castiwa tibaj nmom te Jerusalén, tu'ntzen thaj tisenj e cykba tyolel Dios jatxe ootxa. ²³ Oj tpon tzunj k'ij, lastim kej xuuj at cyal tuj cyc'u'j bix kej xuuj nch'u'n cyal cyi'j, cuma q'uiyel nim q'uixc'aj tuj nmom bix nim cwel castiwa cyibaj aj Jerusalén. ²⁴ Chi cwel byet cyu'n soldado tuya cypada, bix chi xe'l k'i'n te pres cyuj cabtl nmom, bix c'o'quel Jerusalén tjak' cyaawbil kej xjal yaa'n judio bix min nchi niman Dios, hasta ojxe tpon jk'ij tu'n twe' cyaawbil.

Ti tten oj ch'itk tul meltz'aj Jesucristo juntl maj

(Mt 24:29-35, 42-44; Mr 13:24-37)

²⁵ Cyujtzen manc'bil k'ij c-yeece'altzen twitz cya'j jbjax bina ju'wa. Bix tuj tiy' twitz tx'otx' q'uiyel sey'pajlenel cyuj nmom, bix mlay cnet cyu'n nmom ti tten tu'n twe', cuma pjel nim tk'ajk'ajel mar oj toctz punntz'aj mar twitz tx'otx'. ²⁶ Q'uelel cyanem xjal tu'nj ttzi ti pjel twitz tx'otx' cyi'j, cuma entera twitz clic'h'ajel cya'j tisen xlok'lay cya'j. ²⁷ Bix oj thaj cykilcaj lu, cyla' xjal inayena, Jsma'n tu'n Dios cye xjal, oj ncu'tza tuj jun mlay tuya nim wipemala bix nchin txakakanxsena. ²⁸ Oj tak' chic'ajaxel cykil kej yec'bil lu, cyocslay at tu'n wula bix chi ayona wi'ja tuya cykil cyc'u'ja, cuma q'uelel cyni'ya ti'j ch'ixc'a tpon jk'ij tu'n cycleta—tzi Jesús cye t-xnak'atzxin.

²⁹ Bix e xi' tkba'n Jesús jun techel cyexin:

—Cycye'nc ke tzee'. Cycye'nc jc'ul higuera bix ka juntl wik tzee'. ³⁰ Oj tak' xulel tzee', q'ueleltzen cyni'ya ti'j ch'ixc'a toc jbaale. ³¹ Jaxse ju'x oj wula. Oj cyak' chic'ajaxel kej yec'bil ma txi' nkba'na cyey, q'ueleltzen cyni'ya ti'j ch'ixc'a tul tcawbil Dios. ³² C'oquel cyc'u'ja ti'j ti cxe'l nkba'na cyey. Kej xjal cyla' cykilca kej yec'bil ma txi' nkba'na cyey, min otk chi cyim oj tak' tcawbil Dios. ³³ Jma txi' nkba'na pjel. Cya'j bix twitz tx'otx' cwel xitj, pero nyola mlay naj.

³⁴ Ju' tzunj k'o'nc cyipena ti'j tu'n binne cytena. Mi'ntet txi' tz'ak tipen cynaabla tu'nj achbil te twitz tx'otx' bix tu'n k'e'n bix tu'nj nuk nchi labta ti'j ti tten tu'n cyitz'ja. Ka ma tz'oc cyc'u'ja nuk cyi'j lu, yaa'ntzen binne cytena oj ya nulq'uetl jmanc'bil k'ij. ³⁵ Tisen jun jil nuk ch'innch'e oj ttzyet tu'n c'o'bil, ju'tzen pjel tuj cykilca twitz tx'otx' cyej xjal min tz'oc cyc'u'j ti'j ka at tulel manc'bil k'ij. Ch'innch'e oj tul manc'bil k'ij oj yaa'n binne cyten. ³⁶ Ju' tzunj k'o'nc cyipena ti'j tu'n i'tzkey, tu'ntzen binne cytena tuj jmanc'bil k'ij. Bix cykanenx te Dios tu'n tiy'x j'q'uixc'aj tzul, tu'ntzen mintii' cych'ixewa nwitza, inayena, Jsma'n tu'n Dios tu'n ntena cyuya xjal—tzi Jesús.

³⁷ Jaca k'ij e xi' tk'o'n Jesús t-xnak'tzbilxin tuj tja Dios, pero te koniyan e xi'xin tc'u'j jwitz te Olivos te wutal. ³⁸ Yaltzen cye cykilca xjal, e jaw we'ke jya'x tu'ntzen cypon tuj tja Dios te ebilte Jesús.

22

Tej cyiyon xjal tumel ti tten tu'n ttzyet Jesús

(Mt 26:1-5, 14-16; Mr 14:1-2, 10-11; Jn 11:45-53)

¹ Ch'itk tul canan jnink'ij te Pascua, jaj nink'ij oj nchi waa'n xjal te Israel pan mintii' tk'anel n-ocx tuj, tu'n mi'n jaw tz'iy. ² Bix e baj cychmon cyiib kej xin tneel pala bix ke tx'olbal ley, te ninc'ulte ti tten tu'n tbyet Jesús cyu'nxin, cuma min xjal otk tz'oc lpe ti' Jesús, bix at ttzi tu'n ttzaj cyk'oj xjal cyi'jxin ka ma chi byonxin ja Jesús.

³ Jax ju'x ocx Satanás, taaw il, tuj tanem Judas Iscariote, junxin te cyej cablaaj t-xnak'atz Jesús, cuma e tajbe Judas txi' tq'ueyen Jesús. ⁴ Bix e xi'xin yolel cyuya tneel pala bix cyuyaj xin capitán cye c'ojlal tja Dios ti'j ti tten tu'n t-xi' tk'o'nxin Jesús tuj cyk'ab. ⁵ Bix e jaw tzalajkexin, bix e xi' cykba'nxin texin tu'n t-xi' cyk'o'nxin pwak texin tu'n tonenxin cyexin. ⁶ E cyaj tk'o'nxin tyolxin tu'n tonenxin cyexin, bix ak'xin cye'yel, tu'ntzen t-xi' tk'o'nxin Jesús tuj cyk'abxin tej tten Jesús tjunal.

Tej twaa'n Jesús cyuya t-xnak'atzxin tuj xjan k'ij

(Mt 26:17-29; Mr 14:12-25; Jn 13:21-30; 1 Co 11:23-26)

⁷ Bix e pon jk'ij te nink'ij oj n-etz cyii'n xjal cykilca tk'anel pan tuj cyja, jax jk'ij at il ti'j tu'n cybyet carnal tu'n tiy'set cynink'ij. ⁸ Bix e xi' tsma'n Jesús ja Pedro tuya Juan, bix e xi' tkba'nxin cyexin:

—Cyucxeney bix cybincham jwaabj te xjan k'ij, tu'ntzen ba'n t-xi' kwaa'n—tžixin.

⁹ Bix e xi' cykanenxin texin:

—¿Jaa' taja tu'n thint waabj ku'na?—tžikexin.

¹⁰ Aj ttzak'be'n Jesús cyexin:

—Oj cyocxa tuj tnom, cyla'y jun xinak, jun xok' a' k'i'n tu'nxin. Chi xe'la ti'jxin, bix oj tocxxin tuj tjaxin, bix chi ocx lpey ti'jxin, ¹¹ bix cykbanx te taaw jaa' cyjulu: “Ma tzaj tsma'n kxnak'tzala ejoo'ya te kanlte tey: ‘¿Alcejwart tu'n nwa'a'na cyuya nxnak'atza, tu'ntzen tiy'set Pascua ku'na?’ tzi kxnak'tzala,” tzi cybela. ¹² Oj thinte taaw jaa' ju'wa, ctzaaltzen tyeec'anxin jun nim wart cyey tuj tcab cxo'len. Tuj tzunj wart at nim k'ukbil tuj bix jun mes. Jatzzen cybinchama waabj—tžixin.

¹³ Bix aj Pedro tuya Juan, bix cykilca e tkba Jesús jax e'la. Bix e bint jwaabj tej nink'ij te Pascua cyu'nxin.

¹⁴ Bix tej tpon hora te waabl, e cub ke Jesús ti' mes cyuya t-xelxin. ¹⁵ Bix e xi' tkba'nxin cyexin:

—Nim o wajbe'ya tu'n wiy'sana ja Pascua lu cyuyey, jatzen manc'bil Pascua ja te mitkna'x nbyeta. ¹⁶ Cxe'l nkba'na cyey, mlay chin iy'santla ja nink'ij lu cyuyey hasta ojxe tjapan ti japenina tuj tcawbil Dios—tzi Jesús cye t-xnak'atzxin.

¹⁷ Bix e jaw tii'nxin jvaso nojne tuya vino otk cub cyk'o'n t-xnak'atzxin te cyiy'sablxin nink'ij, tixex tten cyu'n xjal, bix e xi' tk'o'nxin chjonte te Dios ti'j, bix e xi' tkba'nxin cye t-xnak'atzxin:

—Cyc'anx cykilcakey ja vino lu. ¹⁸ Cxe'l nkba'na cyey, mlay chin c'antla jvino te Pascua te mitkna'x tul tcawbil Dios—tzi Jesús.

¹⁹ Bix e jaw tii'nxin jun pan, bix e xi' tk'o'nxin chjonte te Dios ti'j, bix ak'xin pi'xl'ate, bix e xi' tk'o'nxin cye t-xnak'atzxin, bix e xi' tkba'nxin:

—Ja pan lu jun techel nxumlala, cuma cxe'l oyet nxumlala te colbil cyey. Cywaa'nx ja pan cykilca maj ju'wa te nabl te weya—tzi Jesús.

²⁰ Ju'x e jaw tii'nxin vino tej tbaj cywaa'n, bix e xi' tkba'nxin:

—Ja vino lu techel ntz'quela, cuma cxe'l oyet ntz'quela te Dios te cyey. Tu'nj ntz'quela q'uelel tzi'tj, ctemeltzen jun ac'aj ttrat Dios cyuya xjal. ²¹ Pero c'oquel cyc'u'ja ti'j ja lu. Jxjal cxe'l q'ueyente weya tuj cyk'ab kej xjal nchi k'oj wi'ja, lu xjal at wuyena tzalu ti' mes. ²² Il ti'j tu'n ncyima, cuma ju' o tkba Dios, ipero ay xsunj xjal cxe'l q'ueyente weya tuj cyamecy! —tzi Jesús.

²³ Tej cybinte t-xnak'atzxin ju'wa, e jaw klee'kexin, bix ak'kexin kanlte cyxolxxin alcyey cyexin tu'n t-xi' q'ueyente Jesús tu'n tcubxin. ²⁴ Bix ju'x ak'kexin k'o'jle cyxolxxin ti'j alcyey cyexin mas jawnex. ²⁵ Bix e xi' tkba'n Jesús cyexin:

—Cyxol cawel te twitz tx'otx', nchi cawen nuk tu'n cyajben xjal cye. Bix kej xjal jawnex nchi jyon tu'n cykbante xjal ka nim o chi onen cyi' xjal. ²⁶ Pero yal cyey, mi'n cybinchay ju'wa, sino chi ajbenx cyey cyuyey. Jxjal najben cye cabtl, jatzen xjalja mas jawnex. Ka ejee'y jun cawel, cyk'o'nc cyipena ti'j tu'n cyajbena cye cabtl. ²⁷ Oj nwa'a'n jun xjal ti' mes, ¿alcyey mas jawnex tuj cywitz xjal? ¿Japa jxjal nwa'a'n, bix ma jaj xjal najben te? ¿Yaa'mpa jaj nwa'a'n? Pero c'oquel cyc'u'ja ti'j ka inayena, cyxnak'tzala, nchin ajbena cyey.

²⁸ Pero jaxte cpomel tumel chi cawela. Ejee' tzuna kej min el ok wi'ja tej cyjaw yolen cykilca xjal wi'ja. ²⁹ Ju' tzunj, cxe'l nk'o'na cyey tu'n cycawena wuyena. Ma tzaj tk'o'n Nmana weya tu'n ncawena, bix cxe'l nk'o'ntla cyey ³⁰ tu'n cyoca te jawnex tuj ncawbila. Ck'o'jel cyey tu'n cycawena cyibaj jcablaaj cloj tiy'jil Israel—tzi Jesús cye t-xnak'atzxin.

Tej t-xi' tkba'n Jesús te Pedro, jay cwel e'wente we oxo maj
(Mt 26:31-35; Mr 14:27-31; Jn 13:36-38)

³¹ Bix e xi' tkba'n Jesús te Pedro:

—Simón, Simón, c'oquel tc'u'ja ti'j cxe'l nkba'na tey. O tz'oc tkanen Satanás te Dios tu'n toca tuj niy'bebl cyuyaj niy'tl nxnak'atza. Bix taj taaw il tu'n mi'n chi e'la ba'n tuj niy'bebl, tisen tz'is oj n-el mu'pet tuj triwa. ³² Bix oj toca tuj xkelbil, ctzpetela, Simón. Pero o chin cubsana nwitzta te Dios tu'n mi'n cyaj tcyey'ena tocslabla. Oj tmeltz'aja tuya Dios, ctaaal tonena cyi'j niy'tl nxnak'atza tu'n ccywix tuj cyocslabl—tzi Jesús te Pedro.

³³ Aj ttzak'be'n Pedro te Jesús:

—Taat, lu kena lu tu'n nxi' lpeya ti'ja, seya tuj ztee' tocxeey bix ka tu'n ncyima junx tuyey —tzi Pedro.

³⁴ E xi' tkba'n Jesús texin:

—Pedro, cxe'l nkba'na tey, te ja koniyan ja'lewe, te mitkna'x took' coo', tu'n ttzi ti'ja otktzen txi' tkba'na oxo maj min ttzki'na nwitzta—tzi Jesús.

Paa', tz'us bix spada

³⁵ Bix e xi' tkba'n Jesús cye t-xnak'atzxin:

—Tej t-xi' nsma'na ejee'y nejl tu'n cypocba'na tcawbil Dios bix tej t-xi' nkba'na cyey tu'n mi'n txi' cyii'na pwak bix cypay bix jun ch'ixpubl cyxaaba, ¿atpa ti e paltex cyey?—tzi Jesús.

—Mintii', cuma onen ke xjal ki'ja—tzikexin.

³⁶ Bix e xi' tkba'nxin cyexin:

—Pero yal cyuj k'ij chi ul, cyyc'itl xjal tu'n cyonen cyi'ja tisen nejl. Ju' tzunj, ka at cypwaka, cyii'nx, bix cyii'nx cypay. Bix ka mintii' cyspadey, cyq'ueyenx cypapxeyena tu'ntzen t-xi' cylok'o'na jun cyspadey, tu'n cyclonte cyiiba. ³⁷ Nchin yolena ju'wa tu'nj pjel wi'ja. Tzin tkba'n tyol Dios: “Tuj cywitz xjal c'oquel jxin Sma'n tu'n Dios te tajlal ka' xjal,” tzi tyol Dios. Ilksen ti'j tu'n t'apan baj ja yol lu, bix ja'lewe ma pon tumel tu'n t'apan baj—tzi Jesús.

³⁸ Tuj cywitz t-xnak'atzxin ch'itk tpon tumel tu'n cyk'o'jxin cyuya xjal. Ju' tzunj e xi' cykba'n t-xnak'atzxin texin:

—Taat, cye'yenx. Lu naj ca'ba spadawe at tzalu—tzikexin.

Pero e xi' tkba'n Jesús cyexin:

—Min tz'el cyni'ya ti'j. Mi'n ko yolentl ti' spada—tzi Jesús.

Tej tna'n Jesús Dios tuj Getsemani
(Mt 26:36-46; Mr 14:32-42)

³⁹ Bix etz Jesús, bix e xi'xin tc'u'j jwitz te Olivos, tisenx tzin tse'nxin jaca koniyan, bix e xi' ke t-xnak'atzxin tuyaxin. ⁴⁰ Tej tponxin, e xi' tkba'nxin cyexin:

—Cykanenx te Dios tu'n mi'n cyaj cyk'o'na cyocslabla wi'ja—tzixin.

⁴¹ Bix el lk'e Jesús cyi'jxin ca'ba oxo cuerdas, bix e cub majexin, bix ak'xin na'l Dios. ⁴² E xi' tkba'nxin te Tmanxin:

—Taat, ka yaa'n il ti'j tu'n tiy'x ja q'uixc'aj lu wu'na, k'imal wi'ja. Pero yaa'n te weya jwajbil waja tu'n tbint, sino jaj o cub tninc'u'na tu'n tbint—tzi Jesús te Tmanxin.

⁴³ Bix ul jlet jun tsanjel Dios tuj cya'j twitzxin, bix oc tniinsa'n tc'u'jxin. ⁴⁴ Nimxsen bis oc texin, bix e na'ntlxin Dios tuyaxsen cykil tc'u'jxin. Bix e tzaj a' ti'jxin tisen tziy' el tx'ut ti'jxin e cub twitz tx'otx'.

⁴⁵ Tejtzen tbaj na'nxin Dios, bix e jaw we'xin, bix e xi'xin cyuya t-xnak'atzxin. Tej tponxin, nchi wutanxin tu'n cybisxin. ⁴⁶ E xi' tkba'nxin cyexin:

—¿Tikentzen nchi wutana? Chi we'wey bix cykanenx te Dios tu'n mi'n chin cyaj cyk'o'na —tzi Jesús.

Tej ttzyet Jesús

(Mt 26:47-56; Mr 14:43-50; Jn 18:2-11)

⁴⁷ Tzinx yolen Jesús cyuya t-xnak'atzxin tej cypon nim xjal. E xi' lpe ke xjal ti' Judas, jaj xin te tcablajan t-xnak'atz Jesús. E pon lk'e Judas ti' Jesús, bix el ttz'u'benxin twitzxin. ⁴⁸ Bix e xi' tkba'n Jesús texin:

—Judas, ma tzula k'olbel weya tu'n tel ttz'u'bena nwitzza. ¿Tepa tq'ueybila inayena tu'nj n-el ttz'u'bena nwitzza?—tzi Jesús te Judas.

⁴⁹ Tejtzen tel cyniy' t-xnak'atz Jesús ti'j at tu'n ttzyet Jesús cyu'n xjal, e xi'tzen cykba'nxin te Jesús.

—Taat, ¿tajpey tu'n kk'o'jla cyi'j xjal lu tuya kspadiya?—tzikexin.

⁵⁰ Bix ak' junxin t-xnak'atz Jesús buul tuya tspadaxin ti' t-ak'anal jxin tneel pala, bi'x el jt&quinxin te tmank'abxin. Nuk yo'lectl. ⁵¹ Pero e xi' tkba'n Jesús:

—Mj'n cybinchaatla ju'wa—tzi Jesús, bix e xi' tk'a'ctlxin jaa' e'la tx'omet. ⁵² Bix e xi' tkba'n Jesús cye tneel pala bix cye capitán c'o'jlat te tja Dios bix cye xjal nejenel, ejee'j otk chi pon tzyul texin:

—¿Alak'pa kena, tu'ntzen at il ti'j tu'n cyula tuya cyspadiya bix cytzee'y te tzyul weya? ⁵³ Jaca k'ij ma chin tena cyxola tuj nintzaj tja Dios, pero min in tzyeta cyu'na. Pero ya ja'lewe ma pon tumel tu'n tbin ka' wi'ja tu'n taaw il, bix ma tzaj tk'o'n tipemal cyey tu'n ntzyeta cyu'na—tzi Jesús cyej xjal tzyul texin.

Tej tel tii'n tiib Pedro ti' Jesús

(Mt 26:57-58, 69-75; Mr 14:53-54, 66-72; Jn 18:12-18, 25-27)

⁵⁴ Bix e xi' cytzyu'nxin ja Jesús bix e pon cyii'nxin tuj tja tneel pala cyxol judío. E xi' lpe Pedro cyi'jxin, pero nakch ch'in. ⁵⁵ Ti'jxe tja tneel pala e cub cyk'o'nxin k'ak' nakch ch'in twitz pe'n, bix oc kekexin ti' k'ak', bix jax ju'x te Pedro oc kexin ti' k'ak' cyxolxin. ⁵⁶ Cyxol tzunj xin k'uklec ti' k'ak' attzen juntxin tk'opaj jxin taaw jaa'. Tej tlontetxin Pedro, cyiw ocx tcy'e'yentxin tuj twitzxin, bix e xi' tkba'nxin:

—Jaan tej xin lu tuya Jesús—tzitxin.

⁵⁷ Pero tcy'i Pedro jtyoltxin ju'wa. E xi' tkba'nxin:

—Txin, pero min ntzki'na twitzxin—tzin.

⁵⁸ Te jun rato, ocx tcy'e'yen juntl xjal tuj twitz Pedro, bix e xi' tkba'nxin:

—Jaan tey lepchech ti' Jesús—tzin.

Pero e xi' tkba'n Pedro:

—Xinak, yaa'n jaan kenwa—tzin.

⁵⁹ Te juntl hora, e xi' tkba'n juntl xjal:

—Jaxte jaan tej xjal lu tuya Jesús, cuma te cytanem cyiib te Galileake—tzin.

⁶⁰ Pero e xi' tkba'n Pedro:

—Xinak, min tz'el nni'ya ti'j titzen tyola—tzin.

Tzinx yolen Pedro tej took' coo'. ⁶¹ Bix aj tcy'e'yen Kaaw ja Pedro, bix ul tyol Jesús tuj tc'u'j Pedro. Otk txi' tkba'n Jesús: “Te mitkna'x took' coo', otktzen txi' tkba'na oxo maj min ttzki'na nwitzza,” otk txi' tkba'n Jesús. ⁶² Bix ex Pedro bix ok' xsunxin nim.

Xmuccha'bl bix bujbil ti' Jesús

(Mt 26:67-68; Mr 14:65)

⁶³ Yal tzunkej xin otk cytzyu Jesús, oc cyxmuccha'nxin bix oc cypju'nxin. ⁶⁴ Oc cymaks'i'nxin twitzxin, bix e xi' cykanenxin texin:

—Kbantz keya, ¿alj xjal kxola s-oc pjunte tey?—tzikexin, ⁶⁵ bix mas oc cyxmuccha'nxin jaxin.

Tej tpon k'i'n Jesús cywitz aj cawel

(Mt 26:59-66; Mr 14:55-64; Jn 18:19-24)

⁶⁶ Tej kskix, e chmet ke xjal nejenel bix kej xin tneel pala bix ke tx'olbal ley, bix e xi' cyii'n jxin c'o'jlat Jesús ja Jesús cywitzxin. Bix e xi' cykba'nxin texin:

⁶⁷ —Kbantz keya, ¿japa tey Jscy'o'n tu'n Dios te cawel?—tzikexin, cuma e cyajbexin tu'n tchic'ajax nk'o'jl Jesús ti'j cawel te Roma.

—Bix aj ttzak'be'n Jesús:

—Ka ma txi' nkba'na cyey inayena Jscy'o'n tu'n Dios, mi'n chin cyocslay. ⁶⁸ Bix ka ma txi' nkanena cyey ti'j ti toc tu'n tyol Dios ti'j Scy'o'n tu'n Dios, cycy'iy tzaj cykba'na, cuma cycy'iy cyk'umey inayena Jscy'o'n tu'n Dios. ⁶⁹ Pero cxe'l nkba'na cyey, tbajlenxitzen niy' jlu wi'ja, chin cwel keya tuj tmank'ab jjawnex Dios, inayena, Jsma'n tu'n Dios tu'n ntena cyuya xjal —tzi Jesús.

⁷⁰ Bix e xi' cykba'nxin cykilcakexin:

—¿Tzimpa tkba'na ka jay mero Tcwal Dios?—tzikexin.

Bix e xi' tkba'n Jesús cyexin:

—Ja tzunj yol lu, ma scy'et cyu'na wi'ja, pero mi'n tz'oc nkba'na cyey ka ma chi tzpeta —tzi Jesús.

⁷¹ Tejtzen cybintexin ju'wa, e xi' cykba'nxin:

—¿Alcyettzen mas il ti'j tu'n kbintetl mastl ti'jxin? Ma tz'oc kbi'n jaxxin nk'umente Tcwal Diosxin—tzikexin, cuma tuj cywitz jun il te junx maj oj t-xi' tkba'n jun xjal ka junxxin tuya Dios.

23

Tej tpon k'i'n Jesús twitz Pilato

(Mt 27:1-2, 11-14; Mr 15:1-5; Jn 18:28-38)

¹ Bix cykilcaj xjal otk chi chmet, e jaw we', bix e xi' cyii'nxin Jesús twitz Pilato, jxin gobernador. ² Bix twitz Pilato ak'kexin xool yol ti' Jesús. E xi' cykba'nxin:

—Ma tzyet ja xjal lu ku'na, cuma ma txi' t-xitenxin cynaabl ke kxjala. O tkbaxin cye xjal yaa'n il ti'j tu'n t-xi' kchjo'na kchojentja te cawel te Roma. Tzin tkba'nxin ka jaxxin jun rey scy'o'n tu'n Dios te cawel—tzikexin.

³ Bix e xi' tkanen Pilato te Jesús:

—¿Japa tey rey cye xjal judío?—tixin.

Bix aj ttzak'be'n Jesús texin:

—Jay ma scy'onte ja yol rey cye judío, yaa'n inayena—tzi Jesús.

⁴ Bix e xi' tkba'n Pilato cyej xin tneel pala bix te cykilca xjal:

—Mintii' til ja xjal lu ncnet wu'na—tixin.

⁵ Pero cycy'i xjal e we'ke cyyolen ti'jxin. E xi' cykba'nxin:

—Tu'nj t-xnak'tzbilxin, nchi jaw ke xjal ti' gobierno. Tneel e xnak'tzanxin tuj Galilea, bix mas yaj e xnak'tzanxin tuj Judea, bix yal ja'lewe o tzulxin tzalú tuj Jerusalén—tzikexin.

Tej tpon k'i'n Jesús twitz Herodes

⁶ Tej tbinte Pilato ju'wa, e xi' tkanenxin cye xjal ka te Galilea Jesús. ⁷ Tej tbintexin ka e ten Jesús tjak' tcawbil Galilea, e xi' tsmá'nxin ja Jesús te Herodes, jxin gobernador te Galilea, cuma otk tzul Herodes tuj Jerusalén te nink'ij. ⁸ Tej tpon cyii'nxin Jesús twitz Herodes, e jaw tzalaj Herodes, cuma otk tz'el k'ij tu'n tajxin tilxin twitz Jesús, tu'nj nim tpochal tik'ch otk bint tu'n Jesús, bix e tajbexin tu'n tcub tyeeec'an Jesús ti ba'n tu'n twitzxin. ⁹ Nim e xi' tkanenxin te Jesús ti'j ti ba'n tu'n, pero min ak' Jesús. ¹⁰ Cyuyax xsunkej xin tneel pala bix ke tx'olbal ley e pon twitz Herodes, bix nim e jaw cyši'nxin xtak'bil yol ti' Jesús twitz Herodes. ¹¹ Bix ak' Herodes cyuya tsoldadoxin iic'belte Jesús bix te xmucchalte. Nuk te cyxmucchbilxin oc cyk'o'nxin jun t-xbalen rey ti'j. Bix e xi' tsmá'n Herodes ja Jesús juntl maj tuya Pilato te tyec'bilxin el tniy'xin ti'j at mas tipemal Pilato twitzxin. ¹² Ju' tzunj, te xsunj k'ij, e cyaj Pilato ba'n tuya Herodes, bixsen e cub cymojobitlxin cyyolxin, cuma nejl at ch'in k'oj cyxolxin.

Tej tbint ti'j tu'n tbyet Jesús

(Mt 27:15-26; Mr 15:6-15; Jn 18:39-19:16)

¹³ E tzajtzen ttxco'n Pilato kej xin tneel pala bix kej niy'tl xjal nejenel, tuya nimc'atl xjal, ¹⁴ bix e xi' tkba'nxin cyexin:

—Ma tzul cyii'na ja xjal lu nwitzá bix ma tzaj cykba'na nkba'nxin cye xjal tu'n cyk'ojl ti' gobierno te Roma. Pero jey', ma chin jyon tilxin cywitzá, pero mintii' tilxin ma cnet wu'na, tisenj zcin cyk'umena. ¹⁵ Jax ju'x te Herodes, mintii' til ja xjal lu ncnet tu'nxin. Matzen tzaj tsmá'nxin juntl maj wuyena. Cycye'yenc, mintii' il o bint tu'n ja xinak lu tu'n tcyim. ¹⁶ Ju' tzunj nuk tz'u'n cxe'l ti'j cyu'n soldado, bix oj tel tuj tz'u'n, cxe'l ntzakpi'na—tzi Pilato, ¹⁷ cuma at jun ley jaca jnabk'i tuj nink'ij te Pascua n-el tzakpet jun pres.

¹⁸ Pero e jaw cyši'n xjal:

—¡Min! ¡Kaja tu'n tcubxin! Ja te Barrabás tzakpintz keya—tzikexin.

¹⁹ Ja tzunj xin Barrabás tocx tuj tzee' tu'nj otk baj tbyo'nxin cab aj Roma tuj Jerusalén tuj jun k'oj ti' gobierno te Roma. ²⁰ Ju' tzunj e tajbe Pilato tu'n tel ttzakpi'n Jesús, yaa'n Barrabás, bix juntl maj e xi' tkba'nxin cye xjal tu'n tel ttzakpi'nxin Jesús. ²¹ Pero e jaw cyši'n xjal:

—¡E tjaw twitz cruz! ¡E tjaw twitz cruz!—tzikexin.

²² Bix e xi' tkba'n Pilato te toxen maj cye xjal:

—¿Tikentzen cyaja tu'n tbyet ja xjal lu? ¿Alcye ka' o bint tu'nxin? Mintii' tka'el j-o bint tu'nxin ma cnet wu'na tu'n tcyimxin. Ju' tzunj nuk tz'u'n cxe'l ti'jxin bix q'uelex ntzakpi'n xina—tzi Pilato.

²³ Pero minx e cykey xjal tyol Pilato, bix e jaw cyši'n juntl maj tu'nx tbyet Jesús twitz cruz, hasta teixe cymacan tibaj tyol Pilato. ²⁴ Ju' tzunj e xi' tkba'n Pilato tu'n tbyet-xin tisenj alcye cyaj xjal. ²⁵ El ttzakpi'n Pilato Barrabás, tisenj e cyajbe xjal, jxin pres tu'nj otk k'o'jxin ti' gobierno bix otk byonxin xjal. Pero yal te Jesús, e tcuyax Pilato cyol xjal tu'n tbyet-xin.

*Tej tjaw k'o'n Jesús twitz cruz bix e cyim
(Mt 27:32-56; Mr 15:21-41; Jn 19:17-30)*

²⁶ Bix ex cyii'n ke soldado jaxin, bix jax Jesús e xi' kitente jtzee' cruz jaa' tu'n tcu'xe awet, tu'n tjawxin twitz. Pero e baj tipenxin, bix e cub cymaku'n soldado junxal xjal tzajnxin tuj cojbil tu'n tponxin tuj tnom, bix e jaw cyk'o'nxin cruz ti' tkul jxjal. Jxin xjal Simón tbiixin, jun aj tnom te Cirenexin, bix e xi' tkitenxin cruz, bix oc lpexin ti' Jesús.

²⁷ Nimxsen xjal oc lpe ti' Jesús cyuya nim xuuj. Tzinxsen n-oc cytz'ajan xuuj ti' cyin tu'n tak' tcastiwa Jesús ti' cyanemxuj, bix nchi ok'xuj tixex nbaj cyexuj oj ncyim jun xjal. ²⁸ Pero aj tcyey'en Jesús cyexuj, bix e xi' tkba'nxin:

—Key xuuj te Jerusalén, mi'n chi ok'a wi'ja, sino chi ok'a cyi'jxa bix ti' cyala, ²⁹ cuma tzul jun k'ij te nim q'uixc'aj te cyey bix te cyala. Tuj tzunj k'ij tzul, cxe'l cykba'n xjal: “Mas ba'n ke cyey xuuj mintii' cyal bix ke cyey xuuj bajx chi alena bix ke cyey xuuj min-al nch'u'n ti' cyin, cywitz ke cyey xuuj at cyal,” tzi cybel. ³⁰ Bix cxe'l cykba'n xjal cye witz: “Chi aaltz tz'aka kibaja,” bix cye bu'j: “Ko cyewacxa, tu'n kcleta cywitz kej xjal o chi ul te byolte keya,” tzi cybel. ³¹ Jaxte tzul q'uixc'aj cyi'ja, cuma ka ma tz'ocx cha'x tzee' tuj k'ak', ¿yaa'ntzen loj tzkij tzee' il ti'j c'o'quex? Jtzin nkba'na, ka ma cub ncastiwiya mintii' wila, ¿yaa'ntzen loj cyey at nim cyala?—tzi Jesús.

³² Tuyax ca'ba binchal il e xi' cyii'n ke soldado, tu'n cybyet junx tuya Jesús. ³³ Tej cyponxin t-xee' jun linaj Tbakel Wi'yabj tbi, e xi' cyk'o'nxin clavos tuj tk'ab bix tuj tken Jesús twitz cruz, bix jax ju'x e tematl ca'ba binchal il twitz cycruz, jun e jaw tuj tmank'ab Jesús, bix juntl tuj tneñ. ³⁴ Maatkxsen ncub cyk'o'n soldado Jesús twitz cruz, e xi' tkba'nxin te Dios:

—Taat, najsanc'a cyil kej soldado lu ncub cybyo'n inayena, cuma min tz'el cyniy' ti'j alcyej ncub cybyo'n—tzi Jesús.

Bix e cub cypa'n soldado t-xbalen Jesús cyxolxxin. E cub cyk'o'nxin suerte ti'j tu'n al ccamal ti' juun.

³⁵ Yaltzen cye tñimal xjal, nuk oc cycye'yen ti' Jesús. Nim xjal cyxolxin, cyuya kej nejenel cye judío, oc cychmuccha'nxin ti'jxin. E xi' cykba'nxin:

—Ja xjal lu o tcol nim xjal. La'tzen ka jac'a tcol te tiib ja'lewe. Ka jaxxix jaxin Jscy'o'n tu'n Dios, q'ueleltzen tco'pan tiibxin twitz cruz—tzikexin.

³⁶ Jax ju'x ke soldado oc cyxmuccha'n ja Jesús. E pon lk'ekexin ti'jxin twitz cruz, bix e xi' cykba'nxin:

—Tcu'tza, ko kc'a'x ch'in c'a vino tzalu—tzikexin. ³⁷ Bix e xi' cykba'ntlxin:

—Ka jay cawel cyibaj judío, clomtzen tiiba—tzikexin.

³⁸ Bix e jaw cyk'o'n soldado cab letra tuj twi' Jesús tzin tkba'n te oxe yol junx ta': “Ja xjal lu cawel cye xjal judío,” tzi letra tuj yol te griego bix te latín bix te hebreo.

³⁹ Jax ju'x cyey xin aj il e jaw twitz cruz tuya Jesús, at junxin oc t-xmuccha'nxin ja Jesús.

—Ka jay Jscy'o'n tu'n Dios, clomtzen tiiba, bix kuyaxa—tžixin.

⁴⁰ Ja tzunj juntlxin aj il tjaw twitz cruz oc ilenxin ti'j xin oc xmucchante Jesús. E xi' tkba'nxin:

—iC'olal ¿Mimpatii' tnaabla twitz Dios, aj jaana at tu'n tcyim? ⁴¹ Ke, ma k'oj kcastiwa tu'nj ka' o bint ku'n, pero ja xjal lu, mintii' ka' o bint tu'n—tzi juntlxin.

⁴² Bix e xi' tkba'n jxin min oc t-xmuccha'n te Jesús:

—Jesús, oj toca tuj tcawbila, tak'xita weya tu'n woca tjak' tcawbila—tžixin.

⁴³ Bix aj ttzak'be'n Jesús tixin:

—Cxe'l nkba'na tey, tex k'ij ja'lewe cpomela wuyena tuj lugar te tzalajeb! Paraíso tbi—tzi Jesús.

⁴⁴ Tejtzen tpon chil k'ij, bix e cub jpet jun nintzaj kloj entera twitz tx'otx', bix e ten kloj oxe hora. ⁴⁵ Oc kloj twitz k'ij. Bix tuyax jnintzaj xbalen tjaw tuj nintzaj tja Dios te maksibl twitz jawnex xjan cwart jaa' u'la Dios, bi'x e cub rotj tmij. ⁴⁶ Yal te Jesús, e jaw tši'nxin te Tmanxin:

—Taat, cxe'l wokxenena wanema tuj tk'aba—tzi Jesús. Bix tej t-xi' tkba'nxin ju'wa, ncyimtlxin.

⁴⁷ Yal tzunj xin capitán cye soldado e jaw k'onte Jesús twitz cruz, tej toc tcyey'enxin cykilcaj otk baj, e xi' tkba'nxin:

—Jaxte mintii' til ja xjal lu—tžixin, bix e jaw nimset tbi Dios tu'nj tyolxin.

⁴⁸ Yal tzunkej xjal otk chi chmet te cyey'lte tej tjaw Jesús twitz cruz, tej t-xi' cycey'en otk cyim Jesús, bix ajke, bix ak' ke xjal tz'ajlecte ttzii' cyxuuc' tisex tten oj ncyim jun xjal. ⁴⁹ Pero ja tzunkej tuya Jesús bix kej xuuj otk chi tzaj lpe ti'j Jesús te Jerusalén tuj Galilea, e cyaj tenke, nakch ch'in, te cyey'lte ti pjel ti'j.

Tej tocx k'o'n Jesús tuj mukbil

(Mt 27:57-61; Mr 15:42-47; Jn 19:38-42)

⁵⁰ Cyxol tzunkej tuya Jesús at junxin xjal José tbi. Tocx José cyxolj xin nejenel e cawen cyxol judío. Jun ba'n xjalxin bix jiquenxin twitz Dios. ⁵¹ Min otk tz'ocxhin cyxol niy'tl xjal nejenel tej tcub cyninc'u'n jun ka' ti' Jesús. Jatx itz'jixin tuj tnom te Arimatea, jun tnom cyxol judío. Bix oc ten ti' tanemxin tu'n tul tcawbil Dios. ⁵² Jatzen José e xi' tuya Pilato te kanlte t-xumlal Jesús, tu'n tocx tk'o'nxin tuj tjayel. ⁵³ E tcuya gobernador, bix e cub tii'n José t-xumlal Jesús twitz cruz, bix oc tbal'k'i'nxin jun xbalen sak ti'j. Bix ocx tk'o'nxin tuj jun tjayel anem twitz xak. Ac'aj. Mitkna'x tocx cyimne tuj. ⁵⁴ Tej k'ij oj nbaj cybincha'n xjal tik'ch cye tu'n mi'n chi ak'anaxin te juntl k'ij, jatzen k'ij te ajlabl. Ch'itk tex k'ij, bix atzen tu'n cyxi' cyii'n xjal k'ij te ajlabl.

⁵⁵ Yal tzunkej xuuj otk tzaj tuya Jesús tuj Galilea, bix ocx lpekexuj ti' José tuj jul tocx tuj xak, bix oc cycey'enxuj ti e tse José t-xumlal Jesús tej tocx. ⁵⁶ Bix e pon meltz'ajkexuj tuj tnom, tu'n cybinchanxuj c'oc'sbil cye xjal, tu'ntzen toc cysu'nxuj ti' t-xumlal Jesús tuj bajlaxitl k'ij te ajlabl. Pero tneel ajlanxuj tuj k'ij te ajlabl, tisen tzin tkba'n cyley.

24

Tej tjatz itz'j Jesús

(Mt 28:1-10; Mr 16:1-8; Jn 20:1-10)

¹ Tejtzen tpon tneel k'ij te smant, jya'xsen e xi' kej xuuj te Galilea tuj lugar jaa' tocxe t-xumlal Jesús. E pon cyii'nxuj jc'o'csbil cye xjal otk bint cyu'nxuj. ² Tej cyponxuj, yalj xak oc te tlemel tjayel Jesús ya mintii'tl tcub. ³ Bix ocxkexuj tuj jul, pero yalj t-xumlal Kaaw Jesús min e cnet cyu'nxuj. ⁴ Min el cyniy'xuj ti'j tiken mintii'tl t-xumlalxin tocx. Pero nuk tisen tii' tej cyul jlet ca'ba xinak wa'c'ake cytxlaxuj. Toc cyxbalen cyi'j nkoptz'aj bix ntxakakan. ⁵ E jawxsen sey'paj ke xuuj cyi'j, bix e cub cyyut'en cyiibxuj. Bix oc yolen ke tsanjel Dios tuj cya'j cyi'jxuj:

—¿Tiken nchi jyona ti' jun xjal i'tz cyxol cyimne? ⁶ Min-altl te Jesús tzalu, cuma ma jaw itz'j juntl maj. ¿Na'mpa cyu'na ti e tkba Jesús tej ttenxin tuj Galilea? ⁷ E tkbaxin nejl: “Il ti'j tu'n nk'oja tuj cyk'ab aj il, inayena, jxin Sma'n tu'n Dios tu'n ntena cyuya xjal, bix tu'n njawa twitz cruz tu'n ncyima. Pero te toxen k'ij il ti'j tu'n njaw itz'ja tuj mukbil,” tži Jesús—e cykba ca'ba tsanjel Dios cye xuuj.

⁸ Bix ul tuj cye'u'jxuj kej tyol Jesús lu, ⁹ bix aj meltz'ajkexuj ttzii' tjayelxin tu'n tbaaj cykba'nxuj cyej junlaaj t-xnak'atz Jesús bix te niy'tl xjal ti otk baj. ¹⁰ Kej xuj xuuj e xi' kbalte tpochal cye t-xel Jesús, ejee' tzunj xuj lu: María Magdalena, bix Juana, bix María, ttxu Jacobo, tuya cabtlxuj cyuyaxuj. ¹¹ Pero tej cyak'xuj kbalte, min e cyocsla t-xnak'atz Jesús cyyolxuj. Tuj cywitezxin, nuk otk jaw cyjlo'nxuj. ¹² Yal te Pedro, e tajbexin tu'n tcyaj tuj tzenen cyyolxuj, bix e xi' ajkelenxin jaa' otk tz'ocxe maket Jesús. Tej tponxin, bix ocx tcyey'enxin tuj jul. Pero nuk jaj xbalen oc balk'et ti'jxin e tilxin, ko'lecx tuj jul. Min-al Jesús. Bix elxin ttzii' jul, bix e xi'xin tuj juntl lugar tu'n ttenxin tjunalxin, te bislc'ate ti'j ti otk baj.

Tej tbet Jesús tuj be tu'n tpon tuj tnom Emaús

(Mr 16:12-13)

¹³ Tex k'ij, xi'nin ca'ba xjal tuj tnom te Emaús, te oxo ajlabl ta' tuya Jerusalén. Ejee'n tzunxin cyxol kej otk tz'oc ebinte cyyol xuuj ti'j min-al Jesús tuj tjayel. ¹⁴ Nimxsen e yolenke tuj be ti'j cykilcaj matkx baj ti'j Jesús. ¹⁵ Bix tej ttzyu'n tyol jilj cyu'n nchi bet, jax Jesús e pon cytxlaj, bix e xi' cyjunen cyiib. ¹⁶ Pero amale oquet cycey'en jaxin, pero min el cyniy' ti'j alcyexin. ¹⁷ Bix e xi' tkba'n Jesús cye:

—¿Ali'j nchi labtey?—tži Jesús.

Bix e we'ke tuj be, chic'aj otk tzaj cybis cywitz. ¹⁸ Bix e xi' tkba'n jun cye, Cleofas tbi:

—Cyxoltzen cykilcaj xjal o chi ul tuj Jerusalén, nuk o'cx jay min o tz'oc tbi'na ti e baj ca'baaje—tžixin.

¹⁹ Bix e xi' tkba'n Jesús cye:

—¿Ti e baj?

Bix aj cytzak'be'n:

—Oc cybincha'n jun ka' ti' junxin aj Nazaret Jesús tbi. Jaxin jun tyolel Dios, bix jawnex thinchbenxin bix tyolxin. E ten t-xtalbil Dios tibajxin, bix elxin ba'n cywitz cykil xjal. ²⁰ Pero kej xin tneel pala bix kej xjal nejanel e xi' cyk'o'nxin jaxin tuj tk'ab jwixkitl gobiernoncawen kibaj, tu'n tbyet-xin, bix e cub byet-xin twitz cruz tisen jun binchal ka'. ²¹ Jun lastim jlu, cuma otk tz'oc ke kc'u'ja ti'jxin tu'n cyclet xjal te Israel tuj cyk'ab Roma tu'nxin. Pero ya ma baj tilel, cuma e cyimxin ca'baje. ²² Pero at jun ma baj. Te klax jatxe may' xi' cab xuuj kxola jaa' ocxe maket Jesús, bix tej xi pon meltz'ajxuj kbalte, xko jaw klee'ya ti' cyyolxuj. ²³ S-aj cykba'n keya mintii' t-xumlal Jesús xcnet cyu'nxuj, bix otk chi ul jlet cab tsanjel Dios tuj cya'j cywitzxuj jaa' e maketaxin, bixsen xcykba tsanjel Dios cyexuj ka i'tz Jesús. ²⁴ Ju' tzunj at juun kxola xi x-aj tuj tjayel Jesús, bix tej s-oc cycye'yen ju'x tten tisej xcykba xuuj. Bix yal te t-xumlal Jesús, min xcnetl cyu'n tuj tjayelxin—tzi ke ca'ba betel te Jesús.

²⁵ Bix e xi' tkba'n Jesús cye:

—Key xjal yaa'n i'tz cynaabila, min o tz'el cyni'ya ti'j cykilca e cykba tyolel Dios ootxa. ²⁶ ¿Mimpa na'n cyu'na il ti'j tu'n tiy'x q'uixc'aj tu'nj Scy'o'n tu'n Dios? Yaa'n nuk tu'n toc te Cawel, sino tuj tneel tu'n tiy'x q'uixc'aj tu'n, e cykba tyolel Dios—tzi Jesús cye.

²⁷ Bix ak' Jesús tx'olbalte cye ti'j cykilca tz'i'ben tuj tyol Dios ti'jxin. E cub ttx'olba'nxin ti e cub tz'i'ben Moisés ti'jxin bix jax ju'x ti e cub cytz'i'ben ke tyolel Dios.

²⁸ Tej cyponxin tuj tnom te Emaús, otketle txi' Jesús txucl, ²⁹ pero e cubsan kej ca'ba xjal cywitz texin tu'n mi'n txi' lk'exin mas. E xi' cykba'n:

—Tcyaja kuyena tzalu, cuma ya kaletl. Ch'ix tex k'ij—tzikexin.

E tcyua Jesús, bix e cyajxin cyuyaxin.

³⁰ Tejtzen cyucub ke ttxa'n mes te waa'l, e jaw tii'n Jesús jun pan, bix e xi' tk'o'nxin chjonte te Dios ti'j. Bix e cub tpiixenxin pan, bix e xi' tk'o'nxin cye tuyaxin. ³¹ Tej thint tu'nxin ju'wa, bixsen el cyniy' jca'ba xjal ti'j alcyexin, ka ja Jesús. Bix te jun ni' rato e cub naj Jesús cywitzxin.

³² Bix ak'ke cyca'bel yolel cyxolx:

—Jaxte ja xjal lu ja Jesús. ¿Ti min s-el kniy' ti'j ka ju'wa tej tcub ttx'olba'nxin tyol Dios ke tuj be, cuma xjawxsen noj kc'u'j tuya nim tzalajeb'l ti'j tyolxin?—tzikexin.

³³ Ju' tzunj, te jun ni' rato nchi jaw we'tl cyca'bel ti' mes bix e tzyet cybe tu'n cypon meltz'aj Jerusalén, tu'ntzen t-xi' cyk'umen cyej junlaaj t-xnak'atz Jesús ka i'tzxin. Tej cypon, e cnet ke t-xnak'atz Jesús cychmon cyiib cyuya cabtl cyuya. ³⁴ Kej otk chi chmet e xi' cykba'n cyej ca'ba aj Emaús:

—¡At jun jawnex tpochal Jesús! ¡Ma jatztz'j Kaaw tuj cyamecy! Jaxte, cuma sul jlet twitz Simón—tzikexin.

³⁵ Bix ak' kej ca'ba xjal te Emaús kbalte ti otk baj cyexin tuj be, bix ju'tzen e'la cyniy'xin ti'j ka jaxin Jesús tej tcub tpiixenxin pan te cyexin.

Tej tjaw jlet Jesús cywitz ke t-xnak'atzxin

(Mt 28:16-20; Mr 16:14-18; Jn 20:19-23)

³⁶ Tzinx chi yolennin ti'j cykilca otk baj tej k'ij tej tul jlet jax Jesús wa'lc'a cyxolxin. Bix e xi' tkba'nxin cyexin:

—Chi tenxita tuj ttzyal—tzixin.

³⁷ Pero e jawxsen sey'pajkexin, cuma tuj cywitzxin nuk tanem Jesús otk tzul jlet cywitzxin. ³⁸ Bix e xi' tkba'n Jesús cyexin:

—¿Tiken ma chi jaw sey'paja? ¿Ti min cyocslay ka i'tz kena? ³⁹ Cycye'yenc ke nk'aba bix ke nkena, tu'ntzen tel cyni'ya ti'j ka inayena. Cymaco'nc nxumlala, tu'ntzen tel cyni'ya wi'ja yaa'n nuk jun anem kena, cuma cytzki'na jun anem mintii' tchu'l bix mintii' t'bakel, tisenj weya—tzi Jesús.

⁴⁰ Tej t'ba'j tkba'nxin jlu, bix oc tyeec'anxin cyexin tc'oblil clavos e xi' cyuj tk'abxin bix tkenxin. ⁴¹ Nim e jaw klee'kexin, bix e xi' cykanenxin cyxolx:

—¿Jaxpate ka ja xjal jlu Jesús?—tzikexin, bix e jaw tzalajkexin cuma kape jaxin.

Bix e xi' tkba'n Jesús cyexin:

—¿Atpa ch'in waabj tzalu?—tzixin.

⁴² Ju' tzunj e xi' cyk'o'nxin ch'in quís t-xoo'n tuya ch'in ta'l xii' texin. ⁴³ E xi' tii'nxin bix e xi' tchy'o'nxin quís bix e xi' tc'a'nxin ta'l xii' cywitzxin, tu'ntzen tcub tyeec'anxin yaa'n jun anemxin.

⁴⁴ T'ba'jlenxilt tzunj lu, e xi' tkba'n Jesús cyexin:

—J-o baj wi'ja, jaj e xi' nkba'na cyey nejl at tu'n t'ba'j wi'ja. J-o baj wi'ja, jaj e cub tz'i'bet wi'ja tuj tyol Dios tu'n Moisés, bix cyu'n tyolel Dios, bix tuj Salmos, bix il ti'j tu'n tpon baj cykilca—tzi Jesús, ⁴⁵ bix ak'xin tx'olbalte cyexin ti'j ti e tkba tyol Dios ti'jxin, tu'ntzen tel cyniy'xin ti'j. ⁴⁶ Tu'n tpon baj twi' tyolxin, e xi' tkba'nxin:

—Ju'tzen ttena. E cub tz'i'bet tuj tyol Dios il ti'j tu'n tiy'x q'uixc'aj tu'nj Scy'o'n tu'n Dios, bix il ti'j tu'n tcyimxin, bix il ti'j tu'n tjatz itz'jxin juntl maj tuj cyamecy te toxen k'ij. ⁴⁷ Bix yal ja'lewe, il ti'j tu'n tk'umj tuj cykilca twitz tx'otx' tu'n tcyaj cyk'o'n xjal cyil, tu'ntzen tnajset cyil. Cwel tnajsa'n Dios cyil tu'nj o bint wu'na. Cytzyunx tkbaj tpochalel colbil cye xjal wu'na tzalu tuj Jerusalén. ⁴⁸ O cyila ti o baj bix ma tz'el cyni'ya ti'j ma txi' nkba'na cyey. Ju' tzunj il ti'j cxe'l cyk'umena j-o cyila bix e cybiy—tzi Jesús.

⁴⁹ Te juntl k'ij mas yaj, e xi' tkba'n Jesús cye t-xnak'atzxin:

—Cybi'ntz, ctzaal nsma'na Espíritu Santo te onl cyey, tisenj e tkba Nmana tu'n tk'oj cyey. Jatzen cyey, chi tenxa tzalu tuj Jerusalén te ayolte cyipemala tzul tuj cya'j—tzi Jesús.

Tej t-xi' k'i'n Jesús tuj cya'j

(Mr 16:19-20)

⁵⁰ Bix e xi' tii'nxin ke t-xnak'atzxin nka ttxa'n tnóm te Betania, bix e jaw tk'o'nxin ke tk'abxin twitz cya'j bix e xi' tkanenxin t-xtalbil Dios cyibaj t-xnak'atzxin. ⁵¹ Tzinx kanenxin xtalbil tej tel tpa'n tiibxin cyi'jxin bix e jaw k'i'nxin tuj cya'j. ⁵² Bix e jaw cynimsa'n t-xnak'atzxin tbixin bix aj meltz'ajkexin Jerusalén. Nim e jaw tzalajkexin. ⁵³ Bix ocxkexin jaca k'ij tuj jnintzaj tja Dios tu'n tjaw cynimsa'nxin tbi Dios.

T-xi'len tchunk'lal Jesús tz'i'ben tu'n San Juan

Ja te Cristo Jyol I'tz te Dios

¹ Tej mitkna'x tbint twitz tx'otx', ya atlj Yol I'tz te Dios. Junx ta' Jyol I'tz tuya Dios, bix jax Diosxin. ² Tuj tneel at-xin tuya Dios. ³ Tu'nxin e binte twitz cya'j bix twitz tx'otx'. Tu'nxin e binne cykilca at. ⁴ Ti'jxin e tzaa' itz'j tchunk'lal cykilca, bix jaxin e k'onte cye xjal tu'n tel cyniy' ti'j jaxxix yol. ⁵ Jaxin tisen spi'yen nkoptz'aj tu'n tnaj klolj cyxol xjal. Pero min e cyocsla xjal t-xnak'tzbilxin. Nuk e cyajbe tu'n cycyaj tuj klolj.

⁶ Ultzen junxin xjal Juan Bautista tbi. Ja tzunj xjal lu sma'n tu'n Dios. ⁷ Jtaak'en Juan tu'n tk'umen cye xjal otk tzul spi'yen cyxol, tu'ntzen cyocslan cykil xjal ti'jxin. ⁸ Yaa'n ja Juan spi'yen. Nuk o'cx ajbenxin tu'n tk'umenxin ti'j spi'yen. ⁹ Jspi'yen jaxxix, jaj ul jlet cyxol xjal tej tk'umente Juan, bix jaj nyeec'an alcyej jaxxix te cykilca wik xjal. ¹⁰ Pero amale e tzajet Jyol I'tz te Dios twitz tx'otx', bix amale tu'n xet-xin e binne twitz tx'otx', pero el cyiik'uen xjal jaxin. ¹¹ Ulxin cyxol ttanemxin, pero mi nuket ejee' e cyiik' jaxin. ¹² Pero kej xjal e cyiik' jaxin, ejee'j xjal oc ke cyc'u'j ti'jxin, e xi' tk'o'nxin cyoclen tu'n cyoc te tcwal Dios. ¹³ Ocke te tcwal Dios yaa'n tu'nj cyiy'jil, bix yaa'n tu'nj xjalke, bix yaa'n tu'nj cyex cyajbil. Nuk o'cx tu'nj e tzaj tk'o'n Dios tu'n cyoc te tcwal.

¹⁴ Jyol I'tz oc te xjal, bix e najan kxol. Bix e kil ti tten tchunk'lalxin. Min-al juntl xjal tisen jaxin. E xi' tii'nxin tnaablxin jawnex, cuma Tcwal Diosxin. Nuk jaj ba'n e tbinchaxin cye xjal, bix nuk jaj jaxxix e tkbaxin. ¹⁵ Ti'j tzunj xjal lu e yolena Juan Bautista cye xjal. E xi' tk'umen Juan cyjulu: "Ja tzunj xjal lu e xi' nk'umena nejl: 'Jtzul lephexe wi'ja, mas jawnex nwitz. Amale nejlet in itz'ja twitzxin, pero at-xxin tej mitkna'x witz'ja,' ntziya," tzi Juan. ¹⁶ Nuk jaj ba'n tzin tk'o'nxin ke, cuma nuk jaj ba'n o kiik' cykilca ko' ti'jxin. Mintii' tba'jlel t-xtalbilxin ntzaj tk'o'nxin ke. ¹⁷ Tu'n Moisés e tzaj tk'o'n Dios ley te ke, pero tu'n Jesucristo e tzaj tk'o'nxin xtalbil te ke bix tu'n tel kniy' ti'j ti tten jaxxix yol. ¹⁸ Min-al xjal o til twitz Dios. Nuk o'cx Tcwal Dios at ttxlaj Dios o tilxin, bix o tzaj tyeeec'an te ke ti tten Dios.

Tej tk'umen Juan Bautista cye xjal ka tu'n tul jxin Sma'n tu'n Dios (Mt 3:11-12; Mr 1:7-8; Lc 3:15-17)

¹⁹ At junxin xjal e k'umen cye xjal: "Ma pon tumel tu'n tul jxin Sma'n tu'n Dios, ja Cristo," tzi'xin. Jatzen Juan Bautista e k'umente. At jun k'ij e pon juun pala bix juun xjal cyxol Leví tuya Juan Bautista. Otk chi tzaj cysma'n judío tuj Jerusalén. Bix e xi' cykanen te Juan:

—¿Alcye tzuna?—tzikexin.

²⁰ Bix aj ttzak'be'n Juan tuya jun yol jiquen. Min e cub tewenxin. E xi' tkba'nxin:

—Yaa'n inayena Cristo, Jscy'o'n tu'n Dios te cawel—tzi'xin.

²¹ Bix e xi' cykanenxin texin juntl maj:

—Ka yaa'n jay Jscy'o'n tu'n Dios, ¿japatzen tey ktzan tyolel Dios Elías?—tzikexin.

Aj ttzak'be'n Juan cyexin:

—Yaa'n inayen wej tyolel Dios Elías—tzi'xin.

Bix e xi' cykanenxin:

—¿Japa tey jjawnex tyolel Dios e tkba Moisés at tulel?—tzikexin.

—Min—tzi Juan.

²² Bix e xi' cykba'nxin texin:

—Kbantz keya alcye tzuna, tu'ntzen t-xi' ktx'olba'na cyej xjal e tzaj cysma'n ejoo'ya tuyey. ¿Alcye cxe'l kkba'na? ¿Alcye tzuna tuj twitza?—tzikexin.

²³ Bix aj ttzak'be'n Juan:

—Nuk jun sanjel kena. Inayena jxjal e tkba tyolel Dios Isaías at tulel jaa' min-al xjal najl. Weya waak'en tu'n t-xi' nk'umena cye xjal: "Tzul Jcawel kxol. Cybinchanx cybey twitz Dios, tu'ntzen binne cytena oj tulxin, tisen e tkba ktzan Isaías."

²⁴ Kej xjal e tzaj sma'n, fariseoke, ejee'x judío cyiw xsunkexin tuj cyleyxin. ²⁵ E xi' cykba'nxin te Juan:

—Katzen yaa'n jay Jscy'o'n tu'n Dios, bix yaa'n Elías, bix jax yaa'n jnintzaj tyolel Dios at tu'n tul, ¿tikentzen nchi cu'xa xjal tuj a' tu'na? Mintii' toclena—tzi ke fariseo.

²⁶ Bix aj ttzak'be'n Juan:

—Inayena nuk jun xjal tu'n ccyu'x xjal tuj a' wu'na. Pero cyxola at jun jawnexsen xjal, bix min tz'el cyni'ya ti'j at cyxola. ²⁷ Ja tzunj xjala, jatzen xjalja at tulel lephexe wi'ja pero mas jawnex nwitz. Jxjal at cyxola, mintlpetii' woclena tu'n tel npju'na tak'el t-xaab—tzi Juan.

²⁸ E baj jyol lu ttxa'n tnóm te Betania, te ocne ttzii' nima' Jordán, jaa' nchi cu'xa xjal tuj a' tu'n Juan.

N-ul jlet jchojbil il e tak' Dios

²⁹ Te juntl k'ij, oc tcyeyen Juan tpon lk'e Jesús ti'jxin, bix e xi' tkba'nxin:

—Lu tzunj Carnel tzula te chojbil il ma tak' Dios, tu'n tel tii'n cyil xjal. ³⁰ Ja tzunj xjal lu e xi' nk'umena: “Lepchexe wi'ja tzul jun xjal mas jawnex nwitzá, cuma atlxin tej mitkna'x wul itz'ja,” ntziya. ³¹ Nejl, min ntzki'na twitz. Pero amale mint el nni'ya ti'j alcyexin, pero in ula tu'n cyu'x xjal tuj a' wu'na, tu'ntzen tel cyniy' xjal te Israel ti'j ya at tu'n tulxin. ³² Pero el nni'ya ti'j jaxin Jscy'o'n tu'n Dios tej toc ncyeyena tcyu'tz Espíritu Santo tuj cya'j tisen jun cucu' bix e cyaj ten Espíritu Santo tuyaxin. ³³ Min el nni'ya ti'j ka jaxin Jscy'o'n tu'n Dios. Pero ja Dios e tzaj kbante weya tu'n cyu'x xjal tuj a' wu'na, e tzaj tkba'n weya: “Oj toc tcyeyena tcyu'tz Espíritu Santo tibaj junxin xjal bix jax cyjela ten tuyaxin, jatzen xjalja ctzaal tk'o'n Espíritu Santo cye xjal,” tzi Dios weya, bixsen el nni'ya ti'j alcyexin. ³⁴ Bix ju'x e baj ti'jxin, bix e wila. Ju' tzunj tzin nk'umena ka jaxin Tcwal Dios—tzi Juan cye xjal.

Kej tneel t-xnak'atzxin

³⁵ Te juntl k'ij, e ten Juan juntl maj ttzii' nima', cyuyax ca'ba xjal lepch ti' t-xnak'tzbilxin.

³⁶ Bix iy' Jesús cyi'jxin. Cyiw oc tcyeyen Juan ti' Jesús, bix e xi' tkba'nxin:

—Lu tzunj Carnel te chojbil il ma tak' Dios ni'ya—tzixin.

³⁷ Tejtzen cybinte kej ca'ba t-xnak'atzxin tyolxin, oc lpeke ti' Jesús. ³⁸ Bix aj tcyeyen Jesús, bix tej tlontexin oc lpekexin ti'jxin, e xi' tkba'nxin cyexin:

—¿Ti cyaja?—tzixin.

—Taat Xnak'tzal, ¿jaa' najley?—tzikexin.

³⁹ Bix e xi' tkba'nxin cyexin:

—Ko'tzen. Cxe'l nyee'ana cyey jaa' nchin posadayina—tzixin.

Ju' tzunj, e xi'kexin tuyaxin, bix e xi' cycyeyenxin jaa' nposadayinaxin. Bix ex cyk'ijxin tuyaxin, cuma mitkna'x tpon chil k'ij tej cyponxin.

⁴⁰ Cyxol tzunkej ca'ba xjal otk cybi tyol Juan bix oc lpeke ti'j Jesús, jaj xin titz'en Simón Pedro, Andrés tbi. ⁴¹ Jtneel e bint tu'nxin, jaj tu'n t-xi'xin tuya ttzicyxin Simón, bix e xi' tkba'nxin te:

—Ma cnet Jscy'o'n tu'n Dios ku'na—tzixin te ttzicyxin.

⁴² Bix e xi' tii'n Andrés ttzicy tuya Jesús. Ocx tcyeyen Jesús tuj twitz Simón, bix e xi' tkba'nxin te:

—Jay Simón tbiy, tcwal Jonás. Pero c'oquel nk'o'na tbiy Sefas, cuma c'oquela tisen jun cyiw xak te junx maj—tzi Jesús. E tkbaxin ju'wa, cuma japenina jyol Sefas bix Pedro “cyiw xak.”

Tej ttzaj ttxco'n Jesús ja Felipe tuya Natanael

⁴³ Te juntl k'ij, e tajbe Jesús tu'n t-xi' tuj departamento te Galilea. Pero mitkna'x ttzyet bexin, tej toc noj jxin Felipe twitzxin, bix e xi' tkba'n Jesús texin:

—Lpe'c'a wi'ja—tzixin.

⁴⁴ Ja tzunj xin Felipe aj tnomxin te Betsaida tuj Galilea, jaj ttanem Andrés bix Pedro. ⁴⁵ E xi' Felipe jyol tej xin Natanael. Tejtzen tcnet tu'nxin, e xi' tkba'nxin:

—Jxin jawnex xjal e ttz'iben Moisés tuj ley bix e cykba tyolel Dios at tulel, ma tz'oc nojxin kwitza. Jatzen Jesús te Nazaret, tcwal jxin José—tzixin.

⁴⁶ Bix e xi' tkba'n Natanael te Felipe:

—Yaa'n Nazaret jun nintzaj tnom. ¿Ti tten tu'n tetz jun ba'n tuj ja tnom?—tzi Natanael. Bix e xi' tkba'n Felipe:

—Ko'tzen, tu'ntzen toc tcyeyena jxjala—tzixin.

⁴⁷ Tejtzen tlonte Jesús tpon lk'e Natanael ti'jxin, e xi' tkba'n Jesús:

—Lu jun aj Israel tzula tuya jun tnaabl jiquen, cuma mintii' xtak'bil tuj tanem—tzi Jesús.

⁴⁸ Bix e xi' tkba'n Natanael te Jesús:

—¿Titzen ttzki'natla ka jiquen nnaabla?—tzi Natanael.

Bix aj ttzak'be'n Jesús:

—Tej mitkna'x ttzaj ttxco'n Felipe jay, otk wila jay tej tocxa tjak' tken higo—tzixin.

⁴⁹ Tej tbinte Natanael ja yol lu, e xi' tkba'nxin te Jesús:

—Taat Xnak'tzal, jaxte jay Tcwal Dios. Jay Cawel kibaja ejoo'ya xjal te Israel—tzi Natanael.

⁵⁰ Bix aj ttzak'be'n Jesús te Natanael:

—iNim nchin tzalaja ti'ja! Ma chin tocslay nuk tu'nj xi' nkba'na xwila jay tjak' tken higo. Pero ctlay' nim yec'bil mas jawnex twitz'lu. ⁵¹ Jaxxix cxe'l nkba'na cykilca cyey, la' alcyey jun k'ij cyla'y oj tjket cya'j, bix cyla'y oj cyjax bix oj cyu'tz tsanjel Dios tuj cya'j wi'ja, inayena, jxjal Sma'n tu'n Dios—tzi Jesús cye ac'aj t-xnak'atz.

2

Tej tbint jun mejoblenel tuj tnom Caná

¹ Tetzen toxen k'ij tbaflen yolen Jesús tuya Natanael, attzen jun mejoblenel tuj tnom te Caná, tuj departamento te Galilea. Bix jaan ttxu Jesús ajben tuj mejoblenel. ² Jax ju'x e pon Jesús cyuya ke t-xnak'atzxin tuj jmejoblenel, cuma otk chi tzaj txquet-xin.

³ Tuj tzunj mejoblenel, e cub baj vino. Bix e xi' tkba'n ttxu Jesús texin:

—At jun il ti'j. Mintii'tl vino—tízixuj.

⁴ Bix e xi' tkba'n Jesús texuj:

—¿Tikentzen nbaj te'u'ja ti'j lu, naa? Mina'x tpon hora te tu'n tchic'ajax wipemala. Oj tpon tumel, Dios kbalte—tzi Jesús.

⁵ Bix e xi' tkba'nxuj cyej niy'tl xjal nchi ajben:

—Oj tpon hora, alcyey ctkba' Jesús cyej, cybinchama—tízixuj.

⁶ Tuj tzunj jaa' at wukak chcan xak cytx'otx'el. Tuj jaca juun e xi' wink'an xok' a' tuj. Otk cub k'o'n tuj jaa' tu'n cyajben tuj mejoblenel te tx'ajbil cyk'ab xjal tixex tten cyxol judío. ⁷ Bix e xi' tkba'n Jesús cyej xjal ajben tuj mejoblenel:

—Cynojsanx kej chcanne tuya a'—tzi Jesús.

Bix e cycuyaxin, bix e baj noj ke chcan tuya a' cyu'nxin. ⁸ Bix e xi' tkba'n Jesús cyexin:

—Cyii'nctz ch'in a' ja'lewe, bix cyii'nxa te tneel calpul—tízixin.

E cycuyaxin, bix e xi' cyii'nxin te tneel calpul. ⁹ Amale otket cyil jcabtlixin jaa' otk tzaa' a', pero min ttzki'n jxin tneel calpul. Bix oc tniy'be'nxin j-a' k'i'n cyu'n tuyaxin ya otk tz'oclt te vino. Bix ba'nxsen e'la jvino tuj twitzxin. Ju' tzunj, e tzaj ttxco'nxin j-ac'aj chmilbaj, ¹⁰ bix e xi' tkba'nxin te:

—Cykilca xjal nejl nxi' cyk'o'n vino ba'n cye xjal. Mas yaj, ojtzen t-xi' cyc'a'n xjal nim, min tz'el cyniy' xjal ti'j ka ba'n vino tzin cyc'a'n bix ka yaa'n ba'n, bix nxi' cyk'o'nx jvino yaa'n ba'nxix. Pero tey, yaa'n nejl ma tzaj tk'o'na jvino tbanelxix keya, sino texa yaj—tzi tneel calpul te chmilbaj tuj mejoblenel.

¹¹ Ja tzunja e bint tu'n Jesús, tneel maj e tyeec'axin tipemalxin. E tbinchaxin tneel tyec'bilxin tuj tnom te Caná, tuj departamento te Galilea, bix e cyocsla ke t-xnak'atzxin ka jaxin Scy'o'n tu'n Dios.

¹² Tbaflenxiltzen jlu, e xi' Jesús tuj tnom te Capernaum, tuyax ttxuxin, cyuyax titz'enxin, bix cyuyax t-xnak'atzxin, bix e tenkexin tuj ja tnoma cab k'ij.

Tej tetz tlojo'n Jesús ke q'ueyel tuj tja Dios

(Mt 21:12-13; Mr 11:15-18; Lc 19:45-46)

¹³ Bix at tu'n tpon tumel tu'n tiy' iy'set jnink'ij te Pascua, jk'ij tej tul tuj cyc'u'j judío etz tco'pan Dios ke xjal te Israel tuj tk'ab Egipto. Ju' tzunj, e xi' Jesús tuj Jerusalén. ¹⁴ Tej tponxin, e xi'xin tuj jnin tja Dios. Tuj tapya ti' tja Dios ocx ten kej xjal nchi q'ueyen wacx bix carnal bix cucu', kej jil nchi ajben te cyoybil judío te Dios. Bix xsunkej k'uklecke ti' cymes kej xjal ncub cych'ixpu'n pwak te Roma tuya pwak te tja Dios, cuma nuk pwak te tja Dios ajben tuj tja Dios. ¹⁵ Ka'xsen el jlu tuj twitz Jesús, bix e xi' tbincha'nxin jun charyon te cyjaj, bix etz tlojo'nxin cykilca ke q'ueyel alimaj cyuyax ke cycarnal bix cywacx tuj tja Dios. Bix e cub ttzítexin cypwak ch'ixpul twitz pwak, bix e jaw tpac'tz'enxin cymes. ¹⁶ Bix e xi' tkba'nxin cyej xjal nchi q'ueyen cucu':

—¡Cyii'nx kej cucu' lu! Mi'n tz'oc cyk'o'na tja Nmana tisen jun q'ueybil—tízixin.

¹⁷ Tej cylonte t-xnak'atz Jesús ti e bint tu'nxin tuj tja Dios, ultzen tuj cyc'u'jxin ti e tkba tyol Dios. Tzi cyjulu: “E xi' tkba'n Tcwal Dios te Tman: ‘Cuma waja tu'n tajben tjay nuk tu'n tjaw cynimsa'n xjal tbyi, chin celtwenz cybyo'n xjal ti'j,’ tzi Tcwal Dios.”

¹⁸ Yaltzen kej nejenel cye judío, tej cylonte ti otk baj te Jesús, e xi' cykanenxin texin:

—¿Jaa' ma tzaa' k'o'n tu'n tcawena tibaj tja Dios ju'wa? K'ontz jun yec'bil keya, tu'ntzen tel kni'ya ti'j at toclena—tzi ke judío.

¹⁹ Bix aj ttzak'be'n Jesús cyexin:

—Ka ma cub cyxitenja ja tja Dios lu, cjaweltzen nbincha'na juntl maj tuj oxo k'ij—tzi Jesús.

²⁰ Ju' tzunj, e xi' cykba'n judío texin:

—Ak'anan ke binchal jaa' cya'wnak jnabk'i tuya wukak e binne ja tja Dios lu. ¿Ti tten tu'n tjaw tbincha'ntey nuk oxo k'ij?—tízixin. ²¹ Min el cyniy'xin ti'j e yolen Jesús ti'j t-xumlal tisen tja Dios. Min e yolenxin ti'j nin tja Dios. ²² Pero yal kej t-xnak'atz Jesús, tej tjtaz itz'j Jesús juntl maj tuj cyamecy mas yaj, e tzaj cyna'nxin ti otk tkbaxin ti'j tu'n tbinchaj tja Dios, bix el jax tyol Dios bix tyolxin tuj cywitzxin.

Ttzki'n Jesús tuj cyanem cykil xjal

²³ Entonces, e ten Jesús tuj Jerusalén te iy'sal nink'ij te Pascua. Bix tuj cywitz nim xjal, jaxin Jscy'o'n tu'n Dios, cuma e cyil jnim tipemalxin e xi' tyeec'anxin. ²⁴ Pero ttzki'n Jesús

min oc ke cyc'u'j xjal ti'jxin, cuma el tniy'xin ti'j ti iy' tuj cyc'u'j cykil xjal. ²⁵Mintii' il ti'j tu'n tkbaj texin ti tten tnaabl jun xjal, cuma tziki'nxin alcyej at tuj tanem jaca juun xjal.

3

Tej tyole Jesús tuya Nicodemo

¹Attzen junxin xjal Nicodemo thi. Cyxol fariseoxin, kej xjal cyiw tuj cyley judío. Bix tocxxin te nejenel te cycloja judío nchi cawen tuj cyley judío. ²At jun koniyan e pon Nicodemo tuya Jesús te yolel. E xi' tkba'nxin te Jesús:

—Taat Xnak'tzal, ntzki'na ka sma'na tu'n Dios te xnak'tzal keya, cuma nuket min tzaj tonen Dios jay, mlayettzenle bint cykilcaj nbint tu'na—tzixin.

³Bix e xi' tkba'n Jesús texin:

—Min tz'el tni'ya ti'j tcawbil Dios. Cxe'l nkba'na tey, nuket min ma tzaj tk'o'n Dios tu'n tiz't'j jun xjal tuya jun ac'aj chunk'lal, mlaytzen tz'ocx ja xjala tuj tcawbil Dios—tzi Jesús.

⁴Bix e xi' tkanen Nicodemo te Jesús:

—¿Ti tten tu'n tiz't'j jun xjal tijtl juntl maj? ¿Jac'apatzen tz'ocx juntl maj tuj tc'u'j ttxu, tu'ntzen tiz't'jtl?—tzixin.

⁵Aj ttzak'be'n Jesús:

—Jax wu'na. Mlay tz'ocx jun xjal tuj tcawbil Dios nuk o'cxj tiz't'jlen tu'n ttxu, sino c'oquex oj tiz't'j tuya jun ac'aj tchunk'lal k'o'n tu'n Espíritu Santo. ⁶Jn-it'z'j ti' jun xjal, jax nuk xjalx. Pero jn-it'z'j tu'n Espíritu Santo, jun ac'aj wikan tchunk'lal. ⁷Ju' tzunj, mi'n jaw klee'y oj nxi' nkba'na tey il ti'j tu'n tiz't'ja tuya jun ac'aj tchunk'lala k'o'n tu'n Dios. ⁸Mi'n tz'el t-xoo'na ja yol lu nuk tu'nj min tz'el tni'ya ti'j. Min chic'aj cyki'k, pero nxi' nuk jaak'ch, bix ntbi'na tk'ajk'ajel, amale mint tz'el tni'ya ti'j jaa' n-it'z'ja bix jaa' npona baj. Jax ju'x jaca juun xjal k'o'n jun tchunk'lal ac'aj tu'n Espíritu Santo. Amale mint tz'el tni'ya ti'j, pero chi itz'jel juntl maj—tzi Jesús te Nicodemo.

⁹Bix e xi' tkba'n Nicodemo te Jesús:

—¿Ti tten tu'n tiz't'j jun xjal tuya jun ac'aj tchunk'lal?—tzixin.

¹⁰Bix aj ttzak'be'n Jesús texin:

—Jay jun jawnex xnak'tzal cyxol Israel. ¿Titzen tten min tz'el tni'ya ti'j? ¹¹Cxe'l nkba'na tey, cykilcaj tzin nkba'na tey, jaxxixte, pero ejee'y judío cycy'iy. ¹²Ka mlay tz'el cyni'ya ti'j nyola ti'j tu'n cyt'z'j xjal juntl maj twitz tx'otx' tuya jun ac'aj cychunk'lal, ¿titzen tten tu'n tel cyni'ya ti'j ka ma txi' nkba'na cyey ti'j ti'j chinel tu'n Dios tuj cya'j? ¹³Min-al jun xjal ba'n t-xi' tk'umen cyey ti'j nbaj tuj cya'j, cuma min-al o japan tuj cya'j. Nuk o'cx jxjal o cu'tz tuj cya'j ba'n t-xi' tk'umen tii'j tuj cya'j, inayen tzuna, Jsma'n tu'n Dios tu'n ntena cyuya xjal. ¹⁴Bix ma chin ula tu'n njaw k'o'na cywitez xjal. Tisenj e jaw tk'o'n Moisés techel lbaj te xcbil tuj jlugar mintii' najbil tuj, tu'ntzen cyclet xjal, jax ju'x weya. Ixsen ti'j tu'n njaw k'o'na, ¹⁵tu'ntzen cyiik'ente cykilca xjal cychunk'lal te junx maj n-oc ke cyc'u'j wi'ja, inayena, jxjal Sma'n tu'n Dios—tzi Jesús te Nicodemo.

N-oc cyak' cykil xjal te Dios

¹⁶Nimxsen oc cyak' cykil xjal te Dios, bix ju' tzunj e tzaj tk'o'nxin jaj junx Tcwalxin cye xjal. Ju' tzunj, alcyej xjal ma tz'ocslan ti'j Tcwalxin, ck'ojeltzen tchunk'lal te junx maj, bix mi'n txi' tuj cyamecy te junx maj. ¹⁷Min e tzaj tsm'a'n Dios Tcwal twitz tx'otx' te k'ol castiwa cye xjal, sino e tzaj tsm'a'nxin tu'n cyclet xjal tuj castiwa tu'n Tcwalxin. ¹⁸Alcyej xjal ma tz'ocslan ti'j Tcwalxin, mlay cub castiwa tibaj. Pero kej xjal min chi ocslan ti'j, ck'ojeltzen ccastiwa, cuma n-el cyxoo'n jjunx Tcwal Dios. ¹⁹Ck'ojeltzen ccastiwa tu'nj cycy'i jxjal ul k'ol spi'yen cye. Min e jaw tzalajke ti'j spi'yen sma'n tu'n Dios, cuma mas e cyajbe jcyil twitz jaxxix yol ul tii'nxin. ²⁰Kej xjal nchi binchan ka' n-el cyiiq'uen jspi'yen. Cycy'i tu'n cye nka ti' spi'yen, cuma cycy'i tu'n tchic'ajax ti'j jka' nbint cyu'n. ²¹Pero kej xjal nchi oc lpe ti'j jiquen, nchi jyon jjaxxix yol, cuma cyaj tu'n tel ba'n cybinchben tuj twitz Dios.

Tej tyole Juan juntl maj ti' Jesús Jscy'o'n tu'n Dios

²²Tbajlaxitlzen jlu tuj Jerusalén, bix iy' Jesús tuj tnóm cyuyax t-xnak'atzxin, bix e bet-xin cyuyaxin cab k'ij tuj departamento te Judea. Nchi cu'x xjal tuj a' cyu'n t-xnak'atzxin. ²³Jax ju'x e ten Juan Bautista tuj Judea nchi bautizarj xjal tuj a' tu'nxin. E tenxin tuj tnóm te Enón, nka ta' tnóm te Salim, cuma at nim a' tuj Enón. Bix nchi ponxetzen xjal tuyaxin tu'n cycu'x tuj a' tu'nxin. ²⁴Tzinx chi cu'x xjal tuj a' tu'nxin, cuma mitkna'x tocx k'o'nxin tuj tzee'.

²⁵Tu'nj e bautizarj ke xjal tuj a' cyu'n t-xnak'atz Jesús, ju' tzunj e jaw jun k'oj cyxol ke judío bix kej t-xnak'atz Juan. Yaa'n ba'n tuj cywitz t-xnak'atz Juan tu'n cycu'x xjal tuj a' cyu'n t-xnak'atz Jesús. ²⁶Ju' tzunj e pon lk'e ke t-xnak'atz Juan ti' Juan, bix e xi' cykba'n texin:

—Taat Xnak'tzal, jxjal e ten tuyey jlajxe nima' te Jordán bix e xi' tk'o'na jun ba'n te te tej tjaw tnimsa'na tbi, nchi cu'x xjal tuj a' tu'n, bix cykilca xjal ncyaj cyk'o'n jay tu'n cyaj tuyaxin. Yaa'n tumel jlu—tzikexin.

²⁷ Bix aj ttzak'be'n Juan:

—Mi'n chi labta ti'j ch'in woclena. Mlay tu'n tten mas woclena twitzj o k'oj tu'n Dios weya tuj cya'j. ²⁸ Yaa'n jawnex kena tisenj xjal nchi yolena ti'j. Ejee'xa tstiwa e xi' nk'umena: “Yaa'n inayena Jscy'o'n tu'n Dios. Nuk jun sanjel kena sma'n tu'n Dios tu'n binne cyten xjal oj tulxin,” ntziya. ²⁹ Tisen jun mejoblenel. Yaa'n jxjal t-amiwa chmilbaj cmajebel tuya xuuj, sino ja te chmilbaj. Jtaak'en jun t-amiwa chmilbaj, nuk ja tej tu'n tninc'un tunwen, bix c'ayoltzen ti toc tu'n chmilbaj, ka ma tz'el ba'n taak'en tuj twitz chmilbaj. Katzen ma tkba chmilbaj ma tz'el taak'en ba'n, cjaweltzen tzalaj jt-amiwa chmilbaj. Ju' tzunj weya nuk tisen jun tuya chmilbaj kena. Ju' tzunj, nimxsen nchin tzalaja tu'n nim xjal nchi pon tuya Jesús, cuma ba'n ma tz'el waak'ena, tisen taak'en jun xjal tuj mejoblenel. ³⁰ Tumel tu'n cypon xjal tuya Jesús, cuma il ti'j tu'n tjaw nimset tipemal Jesús, bix tu'n tcub jweya wipemal cubne—tzi Juan.

Jun xjal o tzaj tuj cya'j

³¹ Jxjal ma tzaj tuj cya'j, mas jawnex twitz cykilca xjal. Kej xjal, nchi itz'j twitz tx'otx', bix te twitz tx'otx' cynaabl. Ba'n chi tx'olban nuk ti'j ti tten jnbaj twitz tx'otx'. Pero jxjal ma tzaj tuj cya'j, ³² ttzki'n ti tten tuj cya'j, bix ntx'olban j-o til bix o tbi. Pero min-al xjal taj tyolxin. ³³ Pero ja tzunkej xjal ma cyocsla tyolxin, tzin cyyeec'an jax ma cyocsla tzin tkba'n Dios, ³⁴ cuma jxjal e tzaj tsma'n Dios, tex Dios tyol ntk'umen. At tipemalxin tu'n tyolenxin j-e tkba Dios, cuma o txi' tk'o'n Dios Espiritu Santo texin te junx maj. ³⁵ N-oc tak' Tcwal Dios te Tman, bix o txi' tk'o'n Dios cykilca at tuj tk'abxin tu'n tcawenxin tibaj. ³⁶ Alcyej xjal ma tz'ocslan ti'j Tcwal Dios, atzen tchunk'lal te junx maj. Pero kej xjal cycy'i tz'oc cybi'n Tcwal Dios, mlay k'oj cychunk'lal te junx maj. Nuk o'cx chi cyjel ten tuj castiwa tu'n Dios.

4

Tej tyole Jesús tuya jun xuuj aj Samaria

¹ E pontzen tpochal cyuya fariseo nche'x lpe xjal mas ti'j t-xnak'tzibil Jesús twitzj t-xnak'tzibil Juan Bautista, bix mas e cu'x ke xjal tuj a' tu'n Jesús twitzj tu'n Juan, ² amale yaa'nt tu'n Jesús e cu'x ke xjal tuj a'. Nuk cyu'n t-xnak'atzxin. ³ Tejzen tbinte Jesús otk cybi fariseo jlu, etzxin tuj Judea, bix e xi'xin juntl maj tuj Galilea.

⁴ Tu'ntzen tponxin Galilea, il ti'j tu'n tiy'xin tuj departamento te Samaria. ⁵ Bix e ponxin tuj jun tnóm te Samaria, Sicar tbi. Tcub Sicar nka ta' jtx'otx' otk txi' tk'o'n Jacob te José, tcwalxin, jatxe ootxa. ⁶ Ti'jxetzen tnóm ta' jpozo otk cyaj tbincha'n Jacob. Bix tu'nj otk sict Jesús tuj be, e cub kexin ttzii' pozo. Otk pon chil k'ij.

⁷ Bix ultzen junxuj xuuj aj Samaria ti' pozo te k'iljatz a'. Bix e xi' tkba'n Jesús texuj: —K'ontz ch'in a' weya—tzixin. ⁸ Otk cyajxin tjunalxin, cuma otk che'x t-xnak'atzxin tuj Sicar te lok'ol waabj.

⁹ Bixsen e jaw klee' tzunj xuuj aj Samaria ti'j tkanbil Jesús, bix e xi' tkanenxuj texin:

—¿Titzen tten ntzaj tkanena tu'n wajbena tey tuya jun tc'ay? Jay jun xjal judío, bix jun xuuj aj Samaria kena—tzi tzunxuj, cuma el tniy'xuj ti'j kej xjal te Samaria mintii' ajbenke tuj cywitiz judío.

¹⁰ Bix aj ttzak'be'n Jesús texuj:

—Ma txi' nkanena ch'in nc'aya tey, pero nuket s-el tni'ya ti'j taj Dios tzaj tk'o'n xtalbil tey, bix nuket s-el tni'ya wi'ja alcyé kena, matle tzaj tkanena a' weya, bix matle txi' nk'o'na j-a' tzin tk'o'n tchunk'lala—tzi Jesús texuj.

¹¹ E xi' tkba'nxuj texin:

—Taat, mintii' k'iljajwtzte a' tu'na, bix nakch tcu'xa te a' tuj jul. ¿Ti tten tu'n ttzaj tk'o'na a' weya ctk'a' nchunk'lala? ¿Japatzen tey mas jawnex twitzj kiy'jila Jacob? ¹² J-a' tuj ja pozo lu ajben te Jacob cyuya tcwalxin, bix nimte te cyc'a' cywacx. Bix o cyaj tk'o'nxin ja pozowe te keya. ¿Japa tey mas jawnex twitzxin, tu'n ttzaj tk'o'na jun a' mas ba'n weya?—tzixuj.

¹³ Bix aj ttzak'be'n Jesús texuj:

—Ka nuk jax j-a' lu nchi c'an xjal ti'j, n-ocx tak' a' cye. ¹⁴ Pero alcyej xjal cxe'l c'ante j-a' cxe'l nk'o'na te, mlay tzaj tak' a' te juntl maj. J-a' cxe'l nk'o'na te, c'oqueltzen te jun twi' a' tuj tanem mintii' tbailel twi'. I'tz, bix ja tzunja tu'n tk'onte tchunk'lal xjal te junx maj—tzi Jesús te xuuj.

¹⁵ Bix e xi' tkba'nxuj te Jesús:

—Taat, k'ontz j-a' lu weya, tu'ntzen mintii' tl tak' a' wi'ja, bix tu'n mintii' tl il ti'j tu'n wula maa tzalu te k'ilte a'—tzixuj.

¹⁶ E xi' tkba'nxin texuj:

—Cutxey tjay, kbanx te tchmila tu'n ttzaj tzalu, bix ctzaal meltz'aja tuyaxin—tzixin.

¹⁷—Mintii' nchmila—tzixuj.

Bix e xi' tkba'n Jesús texuj:

—Jax tu'na mintii' tchmila, ¹⁸cuma o tz'el tpa'n tiiba ti' jwe' tchmila, bix jxinak at tuyey ja'lewe yaa'n tchmila. Ju' tzunj, ba'n ma tkbay mintii' tchmila—tzixin.

¹⁹E xi' tkba'nxuj texin:

—Taat, ¿ti tten at tumel tuyey wi'ja? Tuj nwitzja jay jun tyolel Dios. ²⁰At jun nkanbila tey. Ke kiy'jila e na'nke Dios tzalu twi' ja witz lu. Pero ejee'y judío tzin cykba'na il ti'j tu'n tjaw knimsa'na ejoo'ya aj Samaria tbi Dios nuk tuj Jerusalén. ¿Ti toc tu'na ti'j ti taj Dios?—tzixuj.

²¹E xi' tkba'n Jesús texuj:

—Naa, k'o'nc tc'u'ja ti'j cxe'l nkba'na tey. Tzul jun k'ij tu'n mi'n jaw cynimsa'ntl xjal tbi Kman Dios mi nuk twi'j witz jatzewe bix mi nuk tuj Jerusalén. ²²Ejee'y aj Samaria njaw cynimsa'na jmin tz'el cyni'ya ti'j, bix ju' tzunj mlay tz'itz'j colbil cye xjal cyxola. Pero ejoo'ya judío n-el kni'ya ti'j jnjaw knimsa'na, cuma te keya o tz'itz'ja jcolbil cye xjal. ²³Pero yaa'n il ti'j jaa' tu'n tjaw cynimsa'na Dios. Tzul jun k'ij, bix ya ma tzyet tu'n tul, kej xjal cyaj chi na'n Kman Dios tuya jun jaxxix cyanem, cbinel cyu'n yaa'n nuk tuj jun lugar, sino tuj cyanem tuya cykil cyc'u'j. Taj Kman Dios tu'n tjaw cynimsa'n tbixin ju'wa. ²⁴Yaa'n jun xumlal baj Dios. Ju' tzunj, ka cyaj xjal chi na'n Dios, il ti'j tu'n cyna'n jaxin yaa'n nuk tuya cyxumlal, sino tuya cyanem, bix tuya jun cyanem jaxxix—tzi Jesús te xuuj.

²⁵Bix e xi' tkba'nxuj texin:

—Ntzki'na tzul Cristo, jaj xjal Scy'o'n tu'n Dios. Oj tulxin, ctzaal ttx'olba'nxin cykilca keya —tzixuj.

²⁶E xi' tkba'n Jesús texuj:

—Inayena, jxjal nyolen tuyey, inayenja Scy'o'n tu'n Dios kena—tzixin.

²⁷Te tzunj hora, e pon meltz'aj ke t-xnak'atz Jesús. Tej t-xi' cycye'yenxin nyolen Jesús tuya jun xuuj, e jaw klee'kexin. Pero min-al e xi' kanente texin ti tajxin bix tu'n tiken e yolenixin tuyaj xuuj.

²⁸Yal te xuuj, e xi'xuj tuj tnóm. Tu'n nim e jaw klee'xuj, el tuj tc'u'jxuj tu'n t-xi' tii'nxuj twicy'ilxuj. Bix e xi' tkba'nxuj cye xinak tuj tnóm:

²⁹—¡Ko'tzen! Ti'jxe tnóm at jun xjal ma tzaj tkba'n weya cykilcaj o nbinchaya witz'jléna. ¿Ti toc cyu'na? ¿Yaa'mpale xjalja lu Jscy'o'n tu'n Dios?—tzixuj.

³⁰Ju' tzunj etz nim xjal tuj tnóm tu'ntzen cypon tuya Jesús. ³¹Maatktzen nchi ul aj Sicar, bix e yolen ke t-xnak'atz Jesús tuyaxin. Bix e xi' cykba'nxin texin:

—Waa'na, Taat.

³²Pero e xi' tkba'nxin cyexin:

—Ya ma txi' nwaa'na jun nwaya min tz'el cyni'ya ti'j—tzixin.

³³Ju' tzunj ak' ke t-xnak'atzxin kanlte cyxolx:

—¿Atpale jun xjal ma tzul k'olte twa?—tzikexin.

³⁴E xi' tkba'n Jesús cyexin:

—Min. Yaa'n jwaabj tu'n t-xi' nwaa'na nchin yoléna ti'j. Weya nwa, jaj ak'untl k'o'n weya tu'n Dios e tzaj tasma'n inayena, bix tu'n tbint jtajbilxin wu'na. ³⁵At juntl cxe'l nkba'na cyey. Cyxola at jun yol tzin tkba'n: “At-x cyajatl xjaw tu'n tchmet twitz awal.” Pero cxe'l nkba'na cyey, c'oquel cyc'u'ja ti'j twitz awal lu ata. Ma knax awal, bix matzen pon tumel tu'n tchmet. ³⁶Yaa'n yaj, sino ja'lewe. Yaltzen ke cyey n-oc cyipena ti'j tu'n tjaw cychmo'na ja awal lu, cjaweltzen cychmo'na jun awal yaa'n nuk te jun rato, sino jun awal mi'n pon baj twi'. Bix tujx k'ij ja'lewe chi tzalajela ejee'y chmol awal junx wuyena, inayenja awaal. ³⁷Kxol ejoo' judío at jun yol tzin tkba'n: “Ncub tawa'n jun xjal, pero junxilt cjawel chmonte.” Q'uelel jax ja yol lu ja'lewe, ³⁸cuma ma txi' nsma'na cyey tu'n tjaw cychmo'na jun awal min ma chi ak'anana ti'j. Junxilt xjal xcub awante, pero ejee'y te chmolte—tzi Jesús cye t-xnak'atz.

³⁹Bix ju' e baj. Nim xjal aj Samaria te tnóm te Sicar oclsan ti' Jesús. Oclsanke tu'n tyol jxuuj oc kbante cye: “Ma tzaj tk'umexin weya cykilcaj o nbinchaya witz'jléna.”

⁴⁰Tejzen cypon xjal te Sicar cuyaya Jesús, e cubsanke cywitzxin texin tu'n tcyaj tenxin cyuyaxin. Bix e tcyuyaxin, bix e tenxin tuj Sicar ca'ba k'ij. ⁴¹Bix nimc'atl xjal oclsan ti'jxin tu'n tx tyolxin. ⁴²Bix e xi' cykba'nxin te xuuj:

—Yaa'n nuk tu'n'j tey tyol nko oclslana, cuma ejoo'xa ma ko ebinte tyol jxjal e yolen tuyey, bix ktzki'na jaxin jjaxxix Clol cye cykil xjal—tzikexin texuj.

Tej tul tnaabl junxin t-ak'anal cawel tu'n Jesús

⁴³Tbajlenxiltzen ca'ba k'ij, etztzen Jesús tuj Samaria bix e xi'xin tuj Galilea. ⁴⁴Tuj Judea otk tz'el cyiiq'uen fariseo jaxin. Ju' tzunj, e xi'xin tuj Galilea, cuma e tkbaxin jun kbalte tyol Dios te tex tnóm yaa'n nimxix n-oc cybi'n xjal. ⁴⁵Tejzen tponxin tuj Galilea, e jaw tzalaj ke xjal ti'jxin, cuma otk cyil cykilcaj otk bint tu'nxin tuj nink'ij tej cyten tuj Jerusalén, cuma

ejee'x otk che'x tuj nink'ij. ⁴⁶ Bixsen e xi'xin juntl maj tuj tnóm te Caná tuj Galilea, jtnóm jaa' otk cub tch'ixpu'nxin a' te vino.

Tujtzen tnóm te Capernaum, otktzen yaabt tcwal junxin cawel. ⁴⁷ Tej tbinte tzunj xjal ka otk tz'etz Jesús tuj Judea bix otk tzul tuj Galilea, e xi'xin tuya Jesús tuj Caná, bix e cubsanxin twitzxin te tu'n t-xi' tuj ttanemxin tu'n tco'pante Jesús tcwalxin tuj tyabel, cuma ch'itk tcyim tcwalxin. ⁴⁸ Ju' tzunj, e xi' tkba'n Jesús texin:

—Jey', ¿chi ocslalpa key judío wi'ja ma nuk o'cx ka ma txi' nyeeec'ana nim wipemala cyey? —tzi Jesús.

⁴⁹ E xi' tkba'n cawel te Jesús:

—Taat, najsama, pero waja txi' naja, cuma ya ch'ix tcyim ncwala—tixin.

⁵⁰ E xi' tkba'n Jesús texin:

—Ba'n taja. Ma k'anj tcwala—tzi.

Oc ke tc'u'j cawel ti' tyol Jesús, bix e tzyet tbexin. ⁵¹ Bix e tzaj c'ulbajxin cyu'n t-ak'analxin tuj be, bix e xi' cykba'nxin texin:

—Taat, ma k'anj tcwala.

⁵² Bix e xi' tkanenxin cyexin:

—¿Ni' hora tk'anj ncwala?—tixin.

—E k'anj ewe jun hora tibaj chil k'ij—tixikin.

⁵³ Ultzen tuj tc'u'jxin jatzen horaj tej tkbante Jesús texin: “Ma k'anj tcwala.” Ju' tzunj, e tocsloxin Jesús ka Scy'o'nxin tu'n Dios, cyuyax ke te txajin.

⁵⁴ Ja tzunja e bint tu'nxin, te tcab maj e xi' tyeeec'an Jesús tipemal tuj Galilea tej tetz tuj Judea.

5

Tej tul tnaabl jun xjal aj Betesda

¹ Mas yaj, attzen jun nink'ij cye judío. Ju' tzunj, e xi' Jesús tuj Jerusalén.

² Nkatzen ttzii' jtapya tocsen ti' tnóm te Jerusalén jaa' nchi pona xjal q'ueylecxe carnal, tocsen jun tx'ajbil cye xjal tuj tapya. Betesda tbi tx'ajbil tuj cyoyol judío. Bix ttzii' tzen tx'ajbil tcub jwe' pach nuk te pa'tbil, bix tu'n cyxmuun xjal cyuj tu'n k'ij. ³ Cyuytzen pach cotz'lecx nim xjal yaab cyuj, ke moš, ke cox, bix kej xjal mintii' cyipen. Nchi ayontzen xjal tu'n tyucch a' tuj tx'ajbil. ⁴ Tuj cywitz xjal, at maj e cu'tz jun tsanjel Dios tuj cya'j bix e yucch a' tuj tx'ajbil tu'n, tu'n tk'onte tipemal a'. Jtneel xjal e cu'x tuj a' tej tyucch a', e k'anen ti'j alcyey yabel ni'k'an.

⁵ Tuj tzunj lugar e ten junxin xjal otk tz'oc jun tyabel ti'jxin winakoxlaaj jnabk'i. ⁶ Tej tlonte Jesús ja yaab, el tniy'xin ti'j otk tz'el nim k'ij tyabtlénxin. Bix e xi' tkba'nxin te yaab:

—¿Tajpey tu'n tco'pja tuj tyabela?—tixin.

⁷ —Taat, waja, pero min-al jun wuyena ntzaj onente weya, tu'n ncu'x k'o'na nejl tuj a' oj tjaw yucch. N-oc wipena ti'j tu'n npona tneel tuj a', pero jaca maj ncu'x nejl juntl xjal nwitzá —tzi yaab.

⁸ E xi' tkba'n Jesús te:

—Wey'tztzen, k'inwe tpopa, bix beta—tixin.

⁹ Tejtnen t-xi' tkba'n Jesús ju'wa, tzin nk'anjtl yaab, tzin jaw tii'ntlénxin tpopxin, bix nxi' betlxin.

Pero e k'anj yaab tuj k'ij te ajlabl, jk'ij xjan tu'n mi'n ak'anán ke xjal judío. ¹⁰ Ju' tzunj, e xi' cykba'n kej judío cyiw ete' tuj cyley tej yaab otk k'anj:

—Jk'ij te ajlabl ja'lewe. Yaa'n k'o'o'n tu'n ley tu'n t-xi' tii'na tpopa—tixikin.

¹¹ Pero aj ttzak'be'n yaab cyexin:

—Nuk s-oc nbi'na tyol jxjal xk'anen weya ja'lewe. Jaj xjala s-aj kbante weya tu'n tjaw nbalk'i'na npopa bix tu'n nbeta—tixin.

¹² Ju' tzunj, e xi' cykanenxin texin:

—¿Alcyey xjal s-aj kbante tcy tu'n tjaw tbalck'i'na tpopa bix tu'n tbeta?—tixikin

¹³ Pero jxjal otk k'anj, mintii' tumel tuya alcyey otk k'anen te, cuma tej njaw tbalck'i'nxin tpopxin, otk tz'el lk'e Jesús ti'j tx'ajbil cyox nim xjal.

¹⁴ Ch'intzen tbaljen, e xi' Jesús tuj tja Dios tu'n tcnet jxin xjal otk k'anj tu'nxin, bix e xi' tkba'nxin te:

—Jey', ma cyaj t-xumlala ba'n. Pero at-x juntl cxe'l nkba'na tcy. Mi'ntzen tbinchatla mas il, tu'n mi'n txi'y tuj jun il mas ka' twitzj jnejl—tzi Jesús.

¹⁵ Tej tel tniy'xin ti'j ka ja Jesús otk k'anen texin, e xi'xin cyuya nejenel cye judío, bix e xi' tk'umenxin cye ka tu'n Jesús otk k'anxin. ¹⁶ Yal kej judío, cuma e k'ane Jesús cye xjal tuj k'ij te ajlabl, ju' tzunj e k'ojl ke judío ti'jxin, bix e cyajbe tu'n tcub cybyo'n jaxin.

¹⁷ Tejzten tbintne Jesús min el ba'n j-e bint tu'nxin tuj cywitzt nejenel cye judío, e xi' tkba'nxin cyexin:

—Bajx cyja' tk'o'n Nmana Dios tu'n mi'n tc'ojla twitz tx'otx' cykil k'ij. Bix jax ju'x weya, ilxsen ti'j tu'n wak'anana tuya Nmana—t'zixin.

¹⁸ Tej cybintne judío tyol Jesús, masxsen e cyajbexin tu'n tcub cybyo'nxin, cuma yaa'n nuk o'cx el t-xoo'nxin k'ij te ajlabl tuj cywitzxin, sino jax ju'x e tkbaxin ka Diosxin, cuma e tkbaxin ka Dios Tmanxin.

Jtipemal o tzaj tk'o'n Dios te Tcwal

¹⁹ E xi' tkba'nxin cyexin:

—Cyk'o'ncxix cye'u'ja ti'j cxe'l nkba'na cyey. Alcey nbint wu'na, yaa'n nuk waja tu'n tbint. N-oc ncey'yena, inayena, Tcwal Dios, ti'j ti nbint tu'n Nmana, tu'ntzen junx ta' waak'ena tuya taak'en Nmana. Alcey nbint tu'n Nmana, n-oc wipena ti'j tu'n tbint wu'na tisenx nbint tu'n Nmana. ²⁰ N-oc wak'a te Nmana. Ju' tzunj, ntzaj tyeec'an weya cykilcaj tzin tbincha'n. Ma chin k'anen jun xjal mintii' tipen t-xumal, pero ctzaal tyeec'antl Nmana ak'untl mas jawnce twitz ju tu'n tbint wu'na, tu'ntzen cyjaw klee'y ti'j. ²¹ Tisen tzunj, cjawel itz'j ke cyimne tuj cyamecy wu'na. Tisenx njatz itz'j cyimne tu'n Nmana tuj cyamecy bix nxi' tk'o'n cychunk'lal, jax ju'x weya, inayena Tcwal, cxe'l nk'o'na cychunk'lal xjal. Bix inayena kbalte alcey xjal ck'ojel cychunk'lal, ²² cuma yaa'n Nmana kbalte alcey xjal ck'ojel cychunk'lal, sino o k'oj tu'n Nmana weya tu'n nkbante alcey xjal ck'ojel cychunk'lal bix alcey xjal ck'ojel cychunk'lal, ²³ tu'ntzen cyinman cykil xjal inayena tisenxsen nchi niman Kman Dios. Alcey xjal min tz'oc tbi'n inayena, jax min tz'oc tbi'n Nmana, cuma sma'n kena tu'n Nmana.

²⁴ Jaxxix cxe'l nkba'na cyey, kej xjal c'oquell cybi'n nyola bix chi ocslal ti' Dios, j-e tzaj tsm'a'n inayena, attzen cychunk'lal te junx maj, bix mlay che'x tuj castiwa, sino ma chi clet tuj cyamecy te junx maj, tu'ntzen cypon tuj cychunk'lal tuya Dios. ²⁵ Cybi'ncxix nyola. Tzul jun k'ij, bix ya ma tzyet tu'n tul, kej xjal at tuj be te cyamecy te junx maj, c'oquell cybi'n nyola, bix kej cxe'l cybi'n, chi oqueltzen tuj cychunk'lal tuya Dios. ²⁶ Ba'n txi' nk'o'na cychunk'lal, cuma ma tzaj tk'o'n Nmana wipemala tu'n t-xi' nk'o'na. Tisenx ntzaj chunk'lal ti'j Nmana Dios, jax at chunk'lal wuyena, inayena Tcwal. ²⁷ Bix cuma in oca te xjal, ju' tzunj ma tzaj tk'o'n Nmana woclena te kbalte alcey kej xjal chi xe'l tuj castiwa bix alcey kej xjal chi oquell tuj cychunk'lal tuya Dios. ²⁸ Mi'n baj cye'u'ja ti'j nxi' nkba'na cyey. Tzul jun k'ij cykilca xjal o chi cyim c'oquell cybi'n oj ntxco'na cyi'j, ²⁹ bix il ti'j chi jawetz tuj cyamecy. Kej xjal o chi binchan ba'n, chi jawetz tu'n tk'oj cychunk'lal, bix kej xjal o chi binchan ka', chi jawetz tu'n tk'oj cychunk'lal.

Tu'nj tbinchben Jesús tzin tkba'n o tzaj tsm'a'n Dios ja

³⁰ Pero yaa'n wu'nxwe cxe'l nkba'na alcey kej xjal ck'ojel cychunk'lal. N-oc nc'u'ja ti'j ti taj Nmana, tu'ntzen ba'n txi' nkba'na ti pjel cye xjal. Ju' tzunj, tuj tumelxix jnxi' nkba'na, cuma yaa'n weya wajbil. Jaj tajbil Nmana e tzaj tsm'a'n inayena.

³¹ Nuket nuk inayena nxi' nkba'na ka junx waak'ena tuya taak'en Dios, tujzten kley mintii'tle il ti'j tu'n cyocslana nyola. ³² Pero at juntl xjal tstiwa wi'ja. Jatzen Nmana. Bix ntzki'na ilxsen ti'j tu'n cyocslana ti'j tyol, cuma jaxxix tyol. ³³ At juntl. Tuj cywitza najben Juan Bautista te jun tstiwa ka sma'n kena tu'n Dios. O txi' cysma'na cysanjela tuyaxin, bix o cyiik'a tyolxin wi'ja. ³⁴ Te weya, mintii' il ti'j tu'n tajben tyol jun xjal tu'n tcywix yol wi'ja ka sma'n kena tu'n Dios. Pero ma chin yolena ti' Juan tu'n tajben tyolxin cyey, tu'ntzen cycleta. ³⁵ Jaxte ajben Juan tisen jun jul tzaj, te cyeybil tuj be. Bix jun rato ba'n e'la tuj cywitza tu'n cybinteya j-e tk'umexin.

³⁶ J-e tk'ume Juan nim e tyeec'a ka junx weya waak'en tuya taak'en Dios, pero jnbint wu'na mas tzin tyeec'an twitz tyol Juan. J-ak'untl ma tzaj tk'o'n Nmana weya tu'n tbint wu'na, tisenj tej nk'aneya jxjal mintii' tipen, tzin tkba'n ma tzaj tsm'a'n Nmana inayena. ³⁷ Bix jax Nmana o tzaj tyeec'an sma'n kena tu'nxin. Pero min o txi' cybi'na tk'ajk'ajel twi'xin bix min o cyajbey tu'n tel cyni'ya ti'jxin. ³⁸ Min ma tz'ocx tyolxin tuj cyanema tu'n n-el cyiij'uena tyol jxjal ma tzaj tsm'a'nxin. ³⁹ Njaw cyi'na ootxa tyol Dios, cuma tuj cywitza ck'ojel cychunk'lala te junx maj nuk tu'n nchi cye'yena tyol. Pero jtaak'en tyol Dios yaa'n tu'n tk'onte cychunk'lala. Nuk jaj tu'n ncneta cyu'na. ⁴⁰ Pero cicy'y tu'n cyocslana wi'ja, tu'ntzen tten cychunk'lala te junx maj.

⁴¹ Ma txi' nkba'na yaa'n tu'n waja tu'n wela ba'n tuj cywitzt xjal. ⁴² Ma txi' nkba'na cuma ntzki'na tiken cicy'y nyola. Jaj cuma min n-oc tak' Dios cyey. ⁴³ Ma chin tzaja cyxola te t-xel Nmana, pero cicy'y tu'n cyocslana wi'ja. Pero oj cyul juntl wik nuk cyu'nx cyiib, chi ocslala cyi'j tuya cykil cye'u'ja. ⁴⁴ Cicy'y tu'n cyocslana wi'ja, cuma nuk cyaja ee'j y nejenel cye judío tu'n tjaw nimset cybiy cyu'n xjal. Mintii' cyajbila tu'n cyela ba'n twitz jun Dios at. ⁴⁵ Pero mintii' il ti'j tu'n t-xi' nkba'na te Nmana at cyila, cuma jax tley Moisés tzin kbante

min tz'oc cybi'na, amale tujet cywitza chi cletela tu'nj cynimbila ti' tley Moisés. ⁴⁶ Nuket ocslankey tyol Moisés, jax otle chi ocslana wi'ja, cuma j-e cyaj ttz'i'ben Moisés, nbya'ntzen wi'ja. ⁴⁷ Pero cuma ma tz'el cyxoo'na j-e cyaj ttz'i'ben Moisés, ¿titzen tten tu'n cyocslantey jnxi' nkba'na cyey?—tzi Jesús cye judío.

6

Tej cywaa'n jwe' mil xjal tu'n Jesús

¹ Yajxittzen, bix iy'x Jesús tuj tnijabel a' te Galilea, bix juntl tbi Tiberias. ² Cyuj tzunkej k'ij, tbet-xin nimxsen cyajlal xjal oc lpe ti'jxin, tu'ntzen toc cycye'yen jjawnex tipemalxin tej tco'pantexin kej yaab tuj cyyabel. ³ Bix oc lpe ke xjal cnol texin tu'n cyken ttziyela a'. Tejtzen tiy'paxin jlajxe a', e tajbe tzunxin tu'n ttenxin tjunalxin. Ju' tzunj e jaxxin twi' jun witz cyuya t-xnak'atzzin, bix e cub kexin cyuya. ⁴ Ch'itktzen tpon jjawnex cynink'ij judío te Pascua. ⁵ Tejtzen tten Jesús tc'u'j witz, oc tcyeyenxin, bix e tilxin nimxsen xjal otk k'on vwelt ti' a' tu'n tcnet-xin cyu'n. Ju' tzunj, e xi' tkba'nxin te Felipe:

—¿Ti tten tu'n tcnet waabj, tu'ntzen cywaa'n kej xjal nchi ul wi'ja?—tžixin.

⁶ E xi' tkba'nxin ju'wa nuk tu'n tchic'ajax ka at tocsabl Felipe ti'jxin, cuma ttzki'ntlxin alcye tu'n tbint tu'nxin. ⁷ Aj ttzak'be'n Felipe texin:

—Taat, mlay tu'n tleket waabj ku'n. Mitle tu'n xcnet ca'ba syent pwak te denario ku'n, mlayx canan tu'n t-xi' klok'o'n waabj te cykilca xjal, tu'ntzen t-xi' twa jaca juun xjal bix nuk ch'inee' at—tzi Felipe.

⁸ At juntlxin t-xnak'atz Jesús, Andrés tbi, titz'en Simón Pedro, bix e xi' tkba'nxin te Jesús:

⁹—Taat, lu'jk'a ma tzul tii'nk'a jwe' pan te cebada tuya ca'ba quiš. Pero, ¿ti tten tu'n tcanan jlu cye nimc'a xjal?—tzi Andrés.

¹⁰ Tejtzen cypon baj xjal ti'jxin, e xi' tkba'n Jesús cye t-xnak'atz:

—Cykbanx cye xjal tu'n cycub ke—tžixin.

Tc'u'jzen witz at jun chk'ajlal toc, bix e cub ke ke xjal tuj tž'im. Atle jwe' mil xinok otk pon. ¹¹ Bix e tzaj tžyuu'n Jesús ke pan, bix e xi' tk'o'nxin chjonte te Dios ti'j, bix e xi' tk'o'nxin pan cye t-xnak'atzzin, tu'ntzen t-xi' cypa'nxin cyxol xjal otk chi cub ke. Bix ju'x e xi' tk'o'nxin ke quiš. Jax nimc'a otk tz'e'la te cykilca xjal. ¹² Tejtzen cybaj noj ke xjal, e xi' tkba'nxin cye t-xnak'atzzin:

—Cychmonwe ttx'akan cywa xjal min xba'j cyu'n, tu'ntzen mintii' q'uelex xe't—tžixin.

¹³ Bix e jaw cychmo'nxin ttx'akan pan otk cyaj cyu'n xjal ti'j jwe' pan te cebada, bix e noj cablaaj chi'l. ¹⁴ Yaltzen ke xjal, tej cylonte jjawnex tipemal Jesús, e cykbaxin:

—Tzimente ja xjal lu'jtyolel Dios at tu'n tul twitz tx'otx'—tžikexin.

¹⁵ Tejtzen tel tniy' Jesús ti'j e cyajbe xjal tu'n ttzyet-xin, tu'ntzen t-xi' cyii'n jaxin tisen cyawelxin, mas e jax lk'exin twi' witz, tu'n ttenxin tjunalxin.

Tej tbet Jesús tibaj tnijabel a'

¹⁶ Tejtzen tex k'ij, e cu'x ke t-xnak'atz Jesús ttzii' tnijabel a' te Galilea. ¹⁷ Bix ocxkexin tuj cychocxin, bix ak' iy'exkexin tuj a' tu'n cyponxin tuj tnom te Capernaum. Otk cub klolj tej cyocxxin tuj choc, pero mitkna'x tpon Jesús cyuyaxin. ¹⁸ Bix nimxsen oc punntz'aj a', cuma nuk tisen tii' tej ttzaj jun nintzaj cyk'ik' tibaj a'. ¹⁹ Nimxsen oc cyipenxin ti'j tu'n cyiy'xxin tuj tnijabel a'. Otktzen chi iy'xxin ca'ba ajlabl tej toc cycye'yenxin ja Jesús. Nbet-xin tibaj a', bix tzajne e tzaj lk'exin ti' cychocxin. Tej cylontexin jaxin, e jawxsen sey'pajkexin. ²⁰ Pero e xi' tkba'nxin cyexin:

—Inayen weja. Mi'n tzaj ntziya cyi'ja—tžixin.

²¹ Tej tel cyniy'xin ti'j ka ja Jesús, e jawxsen tzalajkexin, bix e tzaj cytxco'nxin tu'n tocxxin tuj choc. Bix tujx naj e cub k'o'n cychocxin ttzii' a' jaa' tu'n cyponaxin.

Tej cyjyo'n xjal ti' Jesús

²² Te juntl k'ij, min e cnet Jesús cyu'n kej xjal otk chi cyaj ttzii' tnijabel a' jaa' otk k'o'ja cywa tu'nxin. Ultzen tuj cye'u'jxin nuk junx choc otk ten ttzii' a', bix e cyilxin min otk tz'ocxin tuj ja choca tej cyiy' t-xnak'atzzin. Min el cyniy'xin ti'j ti tten tej tiy'xxin.

²³ Maatkxsen ete'xin jaa' otk chi waa'naxin tej t-xi' tk'o'n Cawel kxol chjonte te Dios, attzen juuntl choc e tzaj tuj tnom te Tiberio. ²⁴ Ju' tzunj, tej cylontexin min-alx Jesús cyuya t-xnak'atzzin, ocxkexin cyuj choc, tu'ntzen cyponxin tuj Capernaum te jyolte Jesús.

Ja Jesús waabj te chunk'lal

²⁵ Tejtzen tcnnet-xin cyu'nxin jlajxe a', e xi' cykanenxin texin:

—Taat Xnak'tzal, ¿jtoo tzula tzalu?—tžikexin.

²⁶ Aj ttzak'be'nxin cyexin:

—Jaxxix cxe'l nkba'na cyey, tej t-xi' nyee'c'ana wipemala ewe, nuk tu'n tel cyni'ya ti'j sma'n kena tu'n Dios, pero min ma tz'el cyni'ya ti'j techel. Nchi jyona wi'ja cuma cyaja nuk

o'cx tu'n tnoj cyc'u'ja tisen ke alimaj. ²⁷ Mi'n tz'oc cyipena nuk ti'j cyway nbaj tipen. Jax ju'x c'oquel cyipena ti'j tu'n tcnet jwaabj tzin tk'o'n cychunk'lala mlay baj. Jatzen waabja cxe'l nk'o'na cyey, inayena, jxjal Sma'n tu'n Dios tu'n ntena cyuya xjal. Tu'n wipemala o cyila, ma tzaj tyeeec'an Kman Dios scy'o'n kena tu'n t-xi' nk'o'na jwaabj te cychunk'lala mlay baj —tzi Jesús.

²⁸ Bix e xi' cykba'nxin texin:

—¿Alcyej ak'untl taj Dios tu'n tbint ku'na, tu'n ttzalaj Dios ki'ja?—tzikexin

²⁹ Bix aj ttzak'be'nxin cyexin:

—J-ak'untl taj Dios tu'n tbint cyu'na, jaj tu'n cyocslana ti'j ma tzaj tsm'a'nxin inayen tzuna —tzi Jesús.

³⁰ E xi' cykba'nxin texin:

—Ka jaj sma'n tu'n Dios, k'ontz jun yec'bil jawnex, tu'ntzen kocslana ti' tyola. ¿Ti cbinel tu'na, tu'ntzen tchic'ajax ka jaxxix tyola? ³¹ Jma bint tu'na, yaa'n jawnex tisen e bint tu'n Moisés tej t-xi' cywaa'n kxe'chel jwaabj e cu'tz twitz cya'j jaca k'ij tuj jlugar jaa' mintii' cynajbil xjal tuj. “E tzaj tk'o'n Dios waabj te tuj cya'j cye,” tzi tyol Dios—tzikexin.

³² Ju' tzunj e xi' tkba'n Jesús cyexin:

—Jaxxix cxe'l nkba'na cyey, yaa'n ja Moisés e tzaj k'onte waabj te twitz cya'j cyexin, sino ja te Nmana. Bix tzinx tk'o'nxin ja'lewe, pero jaj waabj ntk'o'n cychunk'lala mlay baj, ³³ cuma tej waabj tzin tk'o'n Dios ntzaj tuj cya'j, bix c'ajbel tu'n tk'onte chunk'lal te junx maj cye xjal —tzi Jesús.

³⁴ Tej cybinte ke xjal kej tyolxin lu, e xi' cykba'nxin texin:

—Taat, k'ontzne ja jawnex waabj lu keya jaca k'ij—tzikexin.

³⁵ Bix e xi' tkba'n Jesús cyexin:

—Inayenja jwaabj tzin tk'o'n chunk'lal te junx maj. Alcyej kej xjal chi tzaal wuyena, mintii'tl tak' weyaj cye, bix jax alcyej kej xjal chi ocslal wi'ja, ya mintii'tl ccyajbe'. ³⁶ Jatzen cyey, nim maj ma txi' nk'o'na nxnak'tzbila cyey, bix amale matet cyila wipemala, pero min chi ocslana wi'ja. ³⁷ Tuj nk'aba ma tak'a Nmana cykil kej xjal at tu'n cyclet. Bix mi nuket jun xjal, oj tul wuyena tu'n tclel, q'uelelet nxoo'na. ³⁸ Mlay che'x nxoo'na, cuma ma chin cu'tza tuj cya'j yaa'n tu'n nbinchana weya wajbil, sino tu'n nbinchana tajbil Nmana ma tzaj tsm'a'n inayena. ³⁹ Tajbil Nmana ma tzaj tsm'a'n inayena, jaj tu'n mi'n cyaj mi nuket jun xjal tuj cyamecy kej xjal ma tzaj tk'o'nxin tuj nk'aba tu'n cyclet. Taj Nmana tu'n cyjaw itz'j cykilca tuj cyamecy wu'na juntl maj tuj manc'bil k'ij. ⁴⁰ Jtaj Nmana, jaj tu'n tten cychunk'lal te junx maj jaca juun xjal ma tz'el tniy' ti'j alcye kena bix ma tz'ocslan wi'ja. Kej xjal nbint cyu'n ju'wa, inayena cjawetz itz'jsa'ncye tuj cyamecy tuj manc'bil k'ij—tzi Jesús cye kej judío nchi k'ojl ti'jxin.

⁴¹ Tejtzen cybinte ke judío tyol Jesús, el ka' tyolxin tuj cywitzxin, cuma otk txi' tkba'nxin: “Inayena jwaabj e cu'tz tuj cya'j.” ⁴² E xi' cykba'nxin cyoxolxxin:

—¿Yaa'mpatzen jaj xjal lu nuk Jesús, tctal xjin José? Ktzki'n twitz tmanxin bix twitz ttxuxin María. ¿Titzen tten nxi' tkba'nxin ka e cu'tzxin tuj cya'j?—tzikexin.

⁴³ Bix e xi' tkba'n Jesús cyexin:

—¿Tikentzen nchi jaw yolena wi'ja cyxolxa ju'wa? ⁴⁴ Jaxte ma tzaj tsm'a'n Nmana inayena. Yaa'n tu'nj nchi yolena ju'wa chi ocslala wi'ja, sino tu'nj oj ttzaj tk'o'n Nmana jun tajbil tuj cyanema tu'n cyocslana wi'ja. Bix tuj manc'bil k'ij cjawetz witz'jsa'na tuj cyamecy kej xjal ma chi ocslan wi'ja. ⁴⁵ Jaxte at xjal chi ocslal wi'ja, cuma tuj tyol Dios e cykba tyolel Dios cyjulu: “C'oquel tk'o'n Dios cye xjal, tu'n tel cyniy' ti'j,” tzi tyol Dios. Kej xjal cybi' jtzin tkba'n Nmana bix chi ocslal ti'j tyol, jax chi ocslal wi'ja. ⁴⁶ Min tzin nkba'na o til jun xjal twitz Nmana, cuma mi nuk jun xjal o til twitzxin. Nuk jaj xjal sma'n tu'n Dios o til twitzxin, inayen tzuna. ⁴⁷ Jaxxix cxe'l nkba'na cyey, alcyej xjal ma tz'ocslan wi'ja, at tchunk'lal te junx maj. ⁴⁸ Inayenja jwaabj tzin tk'o'n chunk'lal te junx maj. ⁴⁹ Yal tej waabj e cu'tz twitz cya'j, e xi' cywaa'n ke cyxe'chela, pero e cyimke. ⁵⁰ Pero jwaabj nchin yolen weya ti'j, e cu'tz tuj cya'j, bix oj twaa'n jun xjal ti'j, mi'n cyim. ⁵¹ Bix ja waabj i'tz lu e cu'tz tuj cya'j bix ntk'o'n chunk'lal cye xjal, inayen tzuna. Alcyej xjal cwaal' ti'j jwaabj lu, atzen tchunk'lal te junx maj. Bix jwaabj cxe'l nk'o'na tu'n tten cychunk'lal xjal, jatzen nxumlalja—tzi Jesús cye judío.

⁵² Tejtzen cybinte judío tyol Jesús ti'j t-xumlal, ak'kexin k'ojlel cyxolxxin ti'j ti japenina ja yol lu. E baj cykanenxin:

—¿Ti tten tu'n ttzaj tk'o'n jxin lu t-xumlal ke, tu'n t-xi' kchyo'n?—tzikexin.

⁵³ Ju' tzunj, e xi' tkba'n Jesús cyexin:

—Jaxxix cxe'l nkba'na cyey, ka min ma txi' cywaa'na nchu'la, bix ka min ma txi' cyc'a'na ntz'q'uela, mlay ten cychunk'lala, cuma inayena jxjal sma'n tu'n Dios tu'n nk'onteya cychunk'lal xjal. ⁵⁴ Alcyej xjal cxe'l twaa'n nchu'la bix cxe'l tc'a'n ntz'q'uela, atzen tchunk'lal te junx maj, bix cjawel witz'jsa'na tuj cyamecy tuj manc'bil k'ij. ⁵⁵ Ntk'o'n chunk'lal, cuma jwaabj jaxxix ja nchu'la bix ntz'q'uela. ⁵⁶ Alcyej xjal cxe'l waa'nte nchu'la bix cxe'l c'ante

ntzq'uela, c'oqueltzen junx wuyena, bix jax chin oquela junx tuya. ⁵⁷ O tzaj itz'y cykil chunk'lal ti'j Nmana i'tz, bix cuma junx kena tuya Nmana e tzaj tsm'a'n inayena, ju' tzunj at chunk'lal wuyena tu'n t-xi' nk'o'na cye xjal. Bix tisenj at chunk'lal wuyena tu'nj ti'jxxin o chin tza'ya, jax ctemel tchunk'lal jxjal cwaa'l wi'ja, cuma otktzen tz'oc wuyena. ⁵⁸ Key xjal, inayena ja waabj o cu'tz tuj cya'j. Jwaabj e xi' cywaa'n cyxe'chela yaa'n jwaabj jaxxix te tuj cya'j, cuma e tiinkexin bix e yimkexin. Pero ja waabj jaxxix lu, alcyej xjal cwaa'l ti'j, attzen tchunk'lal te junx maj—tzi Jesús ⁵⁹ tej t-xi' t-xnak'tza'nxin cye xjal tuj camon jaa' te xnak'tzibil ti' tyol Dios tuj tnom te Capernaum.

Tyol Jesús tzin tk'o'n chunk'lal te junx maj

⁶⁰ Kej xjal e bet tuya Jesús, tej cybinte kej yol lu, at nim xjal cyxolxin e xi' cykba'n:

—Yaa'n tumel kej yol lu. Mlay tu'n kocslan cyi'j—tzikexin.

⁶¹ Pero el tniy' Jesús ti'j e jaw yolen kej xjal e xi' lpe ti'jxin ti'j tyolxin, bix e xi' tkba'nxin cyexin:

—¿N-elpa cyiig'uena ja yol lu tu'n t-xi' cywaa'na nxumlala cuma ka' tuj cywitza? ⁶² Katzen yaa'n telniy' tuj cywitza ja'lewe, ¿ti toc cyu'na nuket cyila oj njaxa jaa' in tiina nejl bix min-atl nxumlala? Tuj cywitza, jac'a nxumlala cxe'l cywaa'na, pero min ma tz'el cyni'ya ti'j nyola. ⁶³ Tu'n tenet cychunk'lala, ja nyola c'oquel te cyway. ⁶⁴ Pero at juun cyxola mi'n cyiik' cychunk'lal, cuma n-el cyxoo'n nyola—tzi Jesús.

E xi' tkba'nxin ju'wa cuma ttzki'nxin jatxe tej cyak' oquel lpe xjal ti'jxin alcyej min e cyocsla jaxin. Bix jax ju'x ttzki'nxin alcyej cyxol t-xnak'atzxin at tu'n t-xi' tq'ueyen jaxin tuj cyk'ab kej xjal at tu'n t'cub cybyo'n jaxin.

⁶⁵ Tu'n tpon baj tyolxin, e xi' tkba'nxin cyjulu:

—Ma txi' nkba'na cyey, min-al jun xjal c'ocslal wi'ja ka min ma tzaj tk'o'n Nmana te xjal tu'n tocslan wi'ja—tzi Jesús.

⁶⁶ Cuma otk txi' tk'umen Jesús kej yol lu cye xjal, ju' tzunj nim xjal e cyaj cycye'yen jaxin, bix mintl e betkexin tuyaxin. ⁶⁷ Ju' tzunj, e xi' tkba'nxin cyej cablaaj t-xnak'atzxin:

—Yaj cyey, ¿jax cyajpey cyaj cycye'yena inayena?—tzi Jesús.

⁶⁸ Bix aj ttzak'be'n Simón Pedro texin:

—Taata, mi'n cyaj kcyeyena. Min-al juntl tu'n kxi'ya tuya. Nuk jay nxi' tii'na kej yol ntk'o'n kchunk'lala te junx maj. ⁶⁹ N-el kni'ya ti'j ka jay jjawnex xjal scy'o'n tu'n Dios, bix ma ko ocslana ti'ja—tzi Pedro.

⁷⁰ Bix aj ttzak'be'n Jesús cye t-xnak'atzxin:

—Inayen weja ma scy'onte cyey cablaaj cybaja tu'n cyoca te nxnak'atza. Pero at jun cyey ma tz'oc tnaabl tisen jun biman—tzi Jesús. ⁷¹ Jyol lu e xi' tkba'nxin ti'j Judas, tcwal Simón Iscariote, cuma ja Judas tu'n t-xi' q'ueyente texin. ¡Pero cyimel niy', jaanxin cyxol kej cablaaj t-xnak'atz Jesús!

7

Min e cyocsla ka titz'en Jesús ke jaxin Jscy'o'n tu'n Dios

¹ Tbjajlenixiltzen jlu, e cyaj ten Jesús tuj Galilea, bix iy'xin te kbalte tcawbil Dios cyuj tnom. Min e tajbexin tu'n tiy'xin tuj Judea, cuma e cyajbe nejenel cye judío tu'n t'cub cybyo'n jaxin.

² Pero ch'itk tpon jun jawnex nink'ij cye xjal judío, jk'ij tu'n cyten xjal jun smant cyuj ni' pach. ³ Ju' tzunj, e xi' cykba'n titz'enxin texin:

—Ctex tzalu, ju' txi'y Judea, tu'ntzen toc cycye'yen kej xjal nchi oc lpe ti'ja jatzewe ti nbint tu'na. ⁴ Ka taja tz'oca te jun cawel, mi'n txi' tyeec'ana tipemala nuk cyxol kej xjal tzalu yaa'n nintzaj. Oj tyeec'ana tipemala, yeec'anx tiiba twitz cykil xjal, yaa'n nuk cywitz ca'ba oxe yalx xjal tzalu—tzi ke titz'enxin, tu'n toc cyxmuccha'nxin jaxin. ⁵ Amale titz'et-xin ejee'xin, pero min e cyocslaxin ka jaxin Jscy'o'n tu'n Dios.

⁶ Ju' tzunj, e xi' tkba'n Jesús cyexin:

—Mina'x tpon jk'ij tu'n woca te nintzaj cyibaj xjal. Pero cyey, cykil k'ij ba'n tu'n cyyeec'ana jawnex key cywitz xjal. ⁷ Mlay tz'el cyiig'uen xjal ejee'y. Pero weya, cycy'i xjal inayena, cuma wu'na nchic'ajaxa jka' nbint cyu'n. ⁸ Ejee'xa nche'xa tuj nink'ij. Weya, mi'n chixa tuj nink'ij cyuyey, cuma mina'x tpon tumel tu'n njawa—tzi Jesús cye titz'en.

E ten Jesús tuj nink'ij jaa' nchi chmete xjal

⁹ Tej t-xi' tkba'n Jesús kej yol lu, bix e cyajxin tuj Galilea. ¹⁰ Pero mas yaj, cyxi'lenixiltzen titz'enxin tuj nink'ij, yal t'exxin e xi'xin, pero yaa'n cywitz xjal, sino tjunalxin.

¹¹ Tejtzen cypon aj Galilea tuj Jerusalén pero min-al Jesús cyxolxin, e jyon ke judío ti'jxin, bix e xi' cykanenxin:

—¿Jaa' ta' jxjal Jesús?—tzikexin.

¹² Cyxol kej xjal otk chi pon tuj nink'ij, at nim yol ti' Jesús cyu'n, pero tuj ewjel. At juun e xi' kbante: "Jun ba'n xjalxin." Pero at juuntl e xi' kbante: "Jaxin jun tzpetsal xjal." ¹³ Pero nuk tuj ewjel e yolen ke xjal, cuma at cytzi nejenel cye judío cyi'j.

¹⁴ Otk tz'ex niy'jan nink'ij tej tocx Jesús tuj nin tja Dios. Bix ak'xin xnak'tzal cye xjal. ¹⁵ Tej cybinte nejenel cye judío t-xnak'tzbilxin, e jaw klee'kexin, bix e xi' cykba'nxin:

—¿Ti tten nimxsen ba'n tu'nj xjal lu? Bix min o xnak'tzet cyu'n maystro escuela —tzikexin.

¹⁶ Ju' tzunj, e xi' tkba'n Jesús cyexin:

—Jxnak'tzbil nxi' nk'o'na cyey, yaa'n weya nyola, sino tyol Nmana e tzaj tasma'n inayena. ¹⁷ Kej xjal cyaj tz'oc cybi'n tajbil Dios, q'ueleltzen cyniy' ti'j nxnak'tzbila, ka te Dios, bix ka nuk wexwe nyol. ¹⁸ Nuket nxi' nk'o'na wexa nyola cyey, wajattzen loya tu'n tjaw nimset nbi'ya cyu'n xjal. Pero yaa'n ju'wa, cuma waja tu'n tjaw nimset Nmana e tzaj tasma'n inayena. Ju' tzunj, jun jaxix xnak'tzal kena, yaa'n jun xnak'tzal min tz'ajben, tisenj cyey tzin cykba'n. ¹⁹ Ejee'xa kej xjal tzpetsal xjal. E tak' te Moisés tley Dios cyey. Pero mi nuket jun cyey n-oc ebinte ley te Moisés. Ka ma cykbay n-oc cybi'na, ¿ti tten cyaja tu'n tcub cybo'na inayena?—tzi Jesús.

²⁰ Bixsen e jaw cyši'n xjal texin:

—iNjaw tuj twi'y! ¿Alcye xjal taj tu'n tcub byo'na tu'n?—tzi ke xjal.

²¹ Bix aj ttzak'be'n Jesús cyexin:

—Nuk jun maj e cub nco'pana jun yaab tuj tyabel tuj k'ij te ajlabl, bix ka'xsen o tz'e'la tuj cywitza. ²² Pero c'oquel cyc'u'ja ti'j ti toc tu'n Moisés tu'n tonen cyi' xjal. E tak' te Moisés jley cyey tu'n tcpet tchu'l ttz'albil jaca juun xlak xinak. Bix yaa'n nuk Moisés e tzaj k'onte ja ley lu, sino ak' ke tneel cyxe'chela binchal jlu. C'oquel cyc'u'ja ti'j, ka k'ij te ajlabl oj npon twajxakan k'ij titz'jlen jun xlak, cpeteltzen cyu'na tu'n cycuyana tuya ley, amale k'ijet te ajlabl. ²³ Katzen ju' nbint cyu'na tuj k'ij te ajlabl tu'ntzen cynimana tley Moisés, ¿tikentzen njaw cyk'oja wi'ja tu'nj ul tnaabl cykilca t-xumlal jun yaab wu'na tuj k'ij te ajlabl? ²⁴ Tuj cywitza in binchana jun il, pero mi'n chi kbana ka ka' j-e bint wu'na, sino c'oquel cyc'u'ja ti'j tu'n tel cyni'ya ti'j ka jiquen waak'ena twitz ley—tzi Jesús cye xjal.

¿Japale xjal jlu Scy'o'n tu'n Dios?

²⁵ Cuma otk yolen Jesús cyiw cye xjal, ju' tzunj at juun aj Jerusalén e xi' cykba'n:

—¿Yaa'mpa ja xinak lu nchi jyon xjal ti'j tu'n tcub cybo'na? ²⁶ Pero lu xyolen cyuya xjal bix min-al jun nejenel cye xjal ma txi' tkbante texin tu'n twe'xin tyolxin. ¿Japale xjal jlu Scy'o'n tu'n Dios te Cawel tuj cywitzy nejenel? ²⁷ Pero n-el kniy' ti'j yaa'n jaxin Jscy'o'n tu'n Dios, cuma ktzki'n jaa' itz'jxin bix alcye ke tmanxin. Yal tej xjal Scy'o'n tu'n Dios, oj tulxin, min-al ttzki'n jaa' ctzaalaxin bix alcye tmanxin—tzi ke aj Jerusalén.

²⁸ Maatktzen at Jesús tuj tja Dios, e tbixin tej t-xi' cykba'n aj Jerusalén ka yaa'n jaxin jCristo. Ju' tzunj, e jaw tsi'nxin:

—¿Tzimpa cykba'na alcye kena bix jaa' in itz'ja bix alcye kej nmana? Pero mintii' tumel cyuyey. Yaa'n wu'nxu ma chin tzaja, tisenj tzin cykba'na. At jun e tzaj tasma'n inayena, pero cicy'iy jaxin. ²⁹ Weya, ntzki'na twitzxin, cuma in tiina tuyaxin bix e tzaj tasma'nxin inayena tzalu—tzi Jesús.

³⁰ Tejtzen cybinte nejenel cye judío kej yol lu, oc cyipen ti'j tu'n tcub cytzyu'n ja Jesús. Pero mixbe cyu'n, cuma mitkna'x tpon tumel e tkba Dios tu'n tcyimxin. ³¹ Pero cyxol xjal otk chi pon tuj Jerusalén, at nim e xi' tocsla'n ka jaxin Scy'o'nxin tu'n Dios, ja Cristo. Bix e xi' cykba'n cyej xjal min oclante:

—Ka yaa'n Jscy'o'n tu'n Dios jxjal lu tuj cywitza, oj tul jxjal nchi ayona ti'j, ¿ba'mpale cbinchal mas twitzj ja ma bint tu'n ja xjal lu?—tzi ke xjal oclal.

Ex cysma'n fariseo ke c'ojlal tu'n ttzyet Jesús

³² Tej cybinte kej fariseo nchi yolen xjal ti'j Jesús Jscy'o'n tu'n Dios, e xi' cysma'n aj fariseo bix ke nejenel cye pala cab tc'ojlal tja Dios te tzyulte texin.

³³ Ju' tzunj, e xi' tkba'nxin cyexin:

—Nuk ch'intl chin temela cyxola, cuma chin aal meltz'aja tuya Nmana j-e tzaj tasma'n inayena. ³⁴ Chi jyola wi'ja, pero mlay chin cmeta cyu'na, cuma mlay chi pona jaa' chin temela—tixin.

³⁵ Ju' tzunj, e xi' cykba'n nejenel cye judío cyxolx:

—¿Jaa' tumel cxe'la jxjal lu, tu'ntzen mi'n cnet ku'n? ¿Cxe'lpaxin cyxol kej judío o chi el tztit cyuj cytanem xjal yaa'n judío? ¿Jac'apa txi' tk'o'nxin t-xnak'tzbil te cyej xjal yaa'n judío? ³⁶ ¿Ti japenina ja yol: "Chi jyola wi'ja, pero mlay chin cmeta cyu'na, cuma mlay chi pona jaa' chin temela?"—tzi ke judío.

Nima' i'tz te junx maj

³⁷ Tujtzen manc'bil k'ij te nink'ij, jk'ij mas xjan, e cub we' Jesús, bix e jaw tsi'nxin:
—Alcyej xjal at tak' a' te, tzajxit wuyena, bix cxe'l nk'o'na tc'a. ³⁸ Alcyej xjal c'ocslal wi'ja, j-a' cxe'l nk'o'na, c'oqueltzen te jun nima' tuj tanem ctk'a' tchunk'lal te junx maj, tisen tzin tkba'n ootxa tyol Dios—tzi Jesús.

³⁹ Pero ja yol lu ti'j a' e xi' tkba'nxin ti'j Espiritu Santo, cuma at tu'n tk'oj Espiritu Santo te cyej xjal ocslan ti'jxin, cuma mitkna'x tk'oj Espiritu Santo cye ocslal, cuma mitkna'x tjazt itz'j Jesús tuj cyamecy bix mitkna'x tjaxxin tuj cya'j.

Tej tjaw jun k'oj cyxol xjal tu'n tlaj alcye Jesús

⁴⁰ Tej cybinte xjal ti otk tkba Jesús tuj nink'ij, at juun e xi' cykba'n:

—Jatzen xjal jlu jjawnex tyolel Dios e tkba Moisés at tu'n tul—tzikexin.

⁴¹ At juuntl e xi' cykba'n:

—Jatzen xjal jlu jmero Scy'o'n tu'n Dios—tzikexin.

Pero at juuntl e xi' cykba'n:

—Min. Mlay tz'itz'j Jscy'o'n tu'n Dios maa tuj Galilea. ⁴² ¿Yaa'mpatzen tzin tkba'n tyol Dios ka ti'j tiy'jil David tuj ttanem David, jtnom te Belén, q'uitz'jel Jscy'o'n tu'n Dios?—tzikexin.

⁴³ Ju'tzen tten e jaw jun k'oj cyxol xjal tu'n tlaj alcye Jesús. ⁴⁴ At juun e cyajbe tu'n ttzaj cytzyu'n jaxin, pero min-al jun cye e tzyunte, tu'n tocx cyk'o'n jaxin tuj ztee'.

Min-al jun xjal o yolen tuya tipemal tisen te Jesús

⁴⁵ Yaltzen ke c'ojlal tja Dios, e pon meltz'ajke cyuya nejenel cye pala bix cyuya ke fariseo. Min-al Jesús k'i'n cyu'nxin. Ju' tzunj, e xi' cykba'nxin cye c'ojlal tja Dios:

—¿Tikentzen min tzaj cyii'na?—tzikexin.

⁴⁶ Bix aj cytzak'be'n c'ojlal tja Dios:

—Min xknimsaya kc'u'ja tu'n xtzyet ku'na, cuma min-al jun xjal o yolen tuya tipemal tisen ja xjal lu—tzikexin.

⁴⁷ Ju' tzunj, e xi' cykba'n fariseo cye c'ojlal tja Dios:

—¿Ju'xpa cyey ma chi tzpeta tu'nxin? ⁴⁸ ¿Atpa jun keya kxola, ejoo'ya nejenel cye xjal bix ejoo'ya aj fariseo, ma ko ocslana ti'jxin? Min. ⁴⁹ Kej t'nimal xjal lu min cytzki'n ley tisen ejoo'ya. Min chi ajben. ¡Cubxit tsubl Dios cyibaj!—tzikexin.

⁵⁰ Pero at jun aj fariseo cyxolxlin yaa'n junx cyuya niy'tl fariseo. Nicodemo tbixin, jaj xin e pon tuya Jesús jun koniyan. E xi' tkba'n Nicodemo cye fariseo:

⁵¹ —Tuj kley, yaa'n tumel tu'n tcub kk'o'n tcastiwa jun xjal ka mitkna'x kbinte tyol tu'n tco'pan tiib, bix ka mitkna'x kcyeyen tbinchben, tu'n tel kniy' ti'j ka yaa'n ba'n—tzi Nicodemo.

⁵² Bix aj cytzak'be'nxin te Nicodemo:

—Nyolena tisen junx ta' tnaabla cyuyaj yalx xjal te Galilea. C'oquel tc'u'ja ti'j tyol Dios, tu'n tel ni'ya ti'j min-al jun tyolel Dios nitz'j tuj Galilea—tzikexin.

⁵³ Tejtzen tbaj nink'ij, cykilca xjal ajke cyja.

8

Jun xuuj aj paj

¹ Yaltzen te Jesús, e xi' tc'u'j jwitz Olivos thi. ² Te juntl k'ij, tej kskix, ocx Jesús juntl maj tuj tja Dios tuj Jerusalén. Bix nim xjal e pon tuyaxin. E cubtzen kexin, bix ak'xin xnak'tzal cye.

³ Maatktzen nrxnak'tzanxin, e pon ke tx'olbal ley cyuya ke fariseo twitzxin. Matkx tjaw tzyet jun xuuj aj paj cyu'nxin te nbinchan jyaa'n ba'n, bix ul cyii'nxin jaxuj, bix e cub cywa'baxin cyxol xjal tuj tja Dios. ⁴ Bix e xi' cykba'nxin te Jesús:

—Xnak'tzal, ja xuuj lu jun aj paj. Xtzyet ku'na te toc kcyeyena nwutanxuj tuya jun xinak yaa'n tchmilxuj. ⁵ Taat, e cyaj tkba'n Moisés tuj ley, ka at jun xuuj aj paj, iltzen ti'j tu'n tcub byet-xuj tu'n xak. Yaltzen tey, ¿ti toc tu'na ti'j lu?—tzikexin texin. ⁶ Pero e xi' cykba'nxin jlu nuk tu'n tcub cyk'o'nxin jun c'o'bil tuj tbexin, tu'n tcub tz'akxin tuj tyolxlin, tu'ntzen tcnet tilxin cyu'nxin.

Mintii' aj tzak'be'nxin cyexin. Nuk e cub pch'exin, bix ak'xin tz'iblc'ate twitz tx'otx' tu'n twi' tk'abxin. ⁷ Pero tej t-xi' cykanenxin texin juntl maj, e jaw tcyeyenxin, bix e xi' tkba'nxin:

—Ka at jun cyxola mintii' til tuj twitz, ba'ntzen toc t-xoo'n tneel xak ti'jxuj—tzi Jesús, ⁸ bix e cub pch'exin te tz'iblc'ate juntl maj twitz tx'otx'.

⁹ Tejtzen cybintexin tyol Jesús, e tzaj cych'ixewxin, bix ak' elex juun cyexin. Nejl, ex kej nejenel mas nintzaj, bix manc'biltzen ex baj ke fariseo. Nuk ja Jesús e cyaj ten tuya xuuj cyxol xjal. ¹⁰ Bix e jaw we' Jesús, bix e xi' tkanenxin te xuuj:

—Naa, ¿tii'n ma che'x ke kbal tila? ¿Mimpanal ma cyaj tu'n toc cyxoo'n xak ti'ja?—tzixin.

¹¹ —Min-al, taat—tzixuj.

Bix e xi' tkba'n Jesús texuj:

—Jax ju'x weya, mlay cub nk'o'na tcastiwey. Cutxey, bix mi'n binchantla il juntl maj—tžixin.

Ja Jesús spi'yen cyxol xjal

¹² Juntl maj e yolen Jesús cyuya aj fariseo. E xi' tkba'nxin cyexin:

—Inayena tisen spi'yen cye xjal. Kej xjal ma chi oc lpe wi'ja, mlay chi bet tuj klolj, sino chi temel tuj spi'yen. At cychunk'lal te junx maj—tžixin.

¹³ Ju' tzunj, e xi' cykba'n fariseo texin:

—Mintii' c'ajbel tyola, cuma jax tey nyolena te tstiwa ti'jxa. Min-al juntl tu'n tcyiwsante tyola—tžikexin.

¹⁴ Pero aj ttzak'be'n Jesús cyexin:

—Jax at tajbel nyola. Jaxxix nyola ti'j alcye kena, cuma nuk inayena ba'n wu'na jaa' tumel in tzaja bix jaa' tumel chin xe'la. Pero cyey, min-al jun cyxola ba'n tajben te tstiwa wi'ja, cuma min cytzki'na jaa' tumel in tzaja bix jaa' tumel chin xe'la. ¹⁵ Tzin cykba'na yaa'n inayena jxjal sma'n tu'n Dios tu'n tlaj nche'x lpey nuk ti'j cynaabl xjal, bix tzin tkba'n cynaabl xjal nuk jun aj Galilea kena. Weya, min nbint wu'na tu'n ntzpeta ju'wa tu'n nxi' lpeya ti'j cynaabl xjal. ¹⁶ Oj nmlona tnaabl jun xjal, cxe'l nkba'na ti tten tuya jun yol jaxxix, cuma min chin mlona njunala, sino junx tuyax Nmana e tzaj tsma'n inayena. ¹⁷ Tujtzen cywitza, mintii' tajbel nyola nbyan wu'na. Pero c'oquel cyc'u'ja ti'j cyleya. O tz'ibj ka at ca'ba xjal junx ta' cyool, jaxxixtzen cyool. ¹⁸ Ju' tzunj, jaxxix ta' nyola ti'j alcye kena, cuma yaa'n nuk inayena tstiwa wi'ja, sino jax Nmana e tzaj tsma'n inayena tstiwa wi'ja—tži Jesús cye fariseo.

¹⁹ Ju' tzunj, e xi' cykba'nxin texin:

—¿Jaa' ta' tmana, tu'ntzen tajben te tstiwa ti'ja?—tžikexin.

Aj ttzak'be'n Jesús:

—Min tz'el cyni'ya ti'j alcye kena bix alcye Nmana. Nuket ma tz'el cyni'ya ti'j alcye kena, jax cytzki'nla Nmana—tžixin.

²⁰ Kej yol lu e xi' tkba'nxin tuj tja Dios jaa' e cyk'a xjal cyoybil te tja Dios. Pero min-al e tzaj tzyunte texin, cuma mitkna'x tpon jk'ij tu'n tclubxin.

Tej tkbante Jesús cyjulu: "Jaa' tumel chin pomela, mlay chi pona"

²¹ Bix juntl maj e xi' tkba'nxin cye fariseo:

—Chin aal tzuna. Bix oj waja, chi jyola wi'ja, inayena, Colbil cyey, pero chi cymeela bix min najset cyila. Jaa' tumel chin pomela, mlay chi pona—tžixin.

²² Ju' tzunj, e xi' cykba'n judío cyxolxxin:

—¿Tu'n xpaxin cwel thyo'n tiibxin? Cuma ma txi' tkba'nxin: "Jaa' tumel chin pomela, mlay chi pona"—tžikexin.

²³ Bix e xi' tkba'nxin cyexin:

—Ejee'y nche'x lpey ti'j naabl te twitz tx'otx'. Inayena at nnaabla te tuj cyaj, yaa'n te twitz tx'otx'. ²⁴ Cuma at cynaabla te twitz tx'otx', ju' tzunj chi cymeela tjak' cyila, cuma ka min ma cyocslay ti'j ma txi' nkba'na ti'j alcye kena, chi cymeela min najset cyila—tžixin.

²⁵ —¿Alcye tzuna?—tžikexin

E xi' tkba'n Jesús cyexin:

—Ma txi' nkba'na alcye kena jatxe tuj tneel. ¿Tikentzen min cyocslay nyola? ²⁶ At nim cyka'yela ba'n t-xi' nkba'na cyi'ja, pero waja txi' nk'umena nuk tyol j-e tzaj tsma'n inayena. Jaxxix tyolxin, bix j-e nbi'ya texin, ja tzunj yol nchin yolena cye xjal—tžixin.

²⁷ Pero min el cyniy'xin ti'j e yolen Jesús ti'j Dios, Jtmanxin. ²⁸ Ju' tzunj e xi' tkba'nxin cyexin:

—Oj njaw cyk'o'na twitz cruz, q'ueleltzen cyni'ya ti'j ka inayena jxjal Sma'n tu'n Dios tu'n ntena cyuya xjal. Bix q'uelel cyni'ya ti'j ka jnxi' nkba'na cye xjal, yaa'n jweya wajbila, sino nxi' nkba'na nuk alcyej e tyec'an Nmana weya. ²⁹ Bix Nmana e tzaj tsma'n inayena at-xin wuyena. Min ma chin cyaj tcyeyenxin, sino ntzalaj wi'ja, cuma nuk nchin binchana tajbilxin—tžixin.

³⁰ Tej t-xi' tkba'n Jesús kej yol lu, nim xjal e cykba ka ocslalke ti'jxin.

Tu'n tzunj nxnak'tzbila, chi tzakpetela, tži Jesús

³¹ Ju' tzunj, e xi' tkba'nxin cyej judío otk chi ocslan ti'jxin:

—Ka cyaja tu'n cyxi' lpey wi'ja, c'oqueltzen cybi'na nyola. ³² Bix q'uelel cyni'ya ti'j ka jaxxix nxnak'tzbila, bix tu'n tzunj nxnak'tzbila, chi tzakpetela—tžixin.

³³ Bix e xi' cykba'n kej judío te Jesús:

—Tchman kiy'jila Abraham ko'ya, bix bajx o ko tema tjak' c'ycawbil juntl wik xjal. ¿Titzen tten nxi' tkba'na at jun il ti'j tu'n ktzakpeta?—tži ke judío.

³⁴ Aj ttzak'be'n Jesús cyexin:

—Jaxxix cxe'l nkba'na cyey, alj nbinchan il, atzen tuj tk'ab il. ³⁵ C'oquel cycwenta ti'j jun techel. Tuj jun jaa', jun maan mlay cyjel te junx maj tuj jaa'. Pero tcwal taaw jaa', at toclen tu'n tcyaj tuj jaa' te junx maj. ³⁶ Jmaan mintii' toclen ntechla'n ejee'y xjal ete'y tuj tk'ab il. Nuk inayena, Tcwal Dios, ba'n tel ntzakpi'na ejee'y tuj tk'ab il. ³⁷ Jax cyu'na tiy'jil Abrahamkey. Pero yaa'n t-xjal Dioskey, cuma ccy'iy nyola bix ju' tzunj cyaja tu'n ncub cybyo'na. ³⁸ Pero jyol nxi' nkba'na cyey bix ccy'iy, jatzen yolj ma tzaj tk'o'n Nmana weya. Yaltzen cyey cyool, nxi' cykba'na jaj ma cybiy te cyey cyman—tzi Jesús.

Kej t-ak'anal taaw il

³⁹ E xi' cykba'nxin texin:

—Keya kman, ja kiy'jila Abraham—tzikexin.

E xi' tkba'n Jesús cyexin:

—Ka tcwal Abrahamkey, cybinchamna j-e bint tu'n Abraham. ⁴⁰ Pero min nche'x lpey ti'j tbinchben Abraham. Nuk o'cx n-oc cyipena tu'n ncub cybyo'na, inayena, jxjal ma txi' nkba'na jjaxxix yol cyey, jaj yol ma nbi'ya te Dios. Min e bint tu'n Abraham ju'wa. ⁴¹ At juntl cymana, jatztzen nche'x lpey ti'j tnaabl—tzixin.

E xi' cykba'nxin texin:

—Jaxte t-xe'chel Abraham ko'ya. Yaa'n sicy'bel cwala ko'ya. Bix tcwal Dios ko'ya—tzikexin.

⁴² E xi' tkba'n Jesús cyexin:

—Nuket Dios cymana, n-ocle wak'a cyey, cuma ti' Dios ma chin tzaja. Yaa'n wu'nx wiiba ma chin tzaja, sino jaxin e tzaj tsuma'n inayena. ⁴³ ¿Tikentzen min tz'el cyni'ya ti'j nyola? Min tz'el cyni'ya ti'j cuma ccy'iy tz'oc cybi'na nyola. ⁴⁴ Cyey cyman, ja taaw il. Cyaja tu'n cyxi' lpey ti'j ti' tajxin. Jaxin jun byol xjal jatxe tcublen itz'j twitz tx'otx'. O tz'el tpa'n tiibxin ti'j jaxxix yol, cuma tcy'ixin jjaxxix. Oj n'xtak'inxin, nuk nxi' lpexin ti'j tecxin tnaablxin. Xtak'xin, bix jaxin cyman kej xjal 'xtak'. ⁴⁵ Pero weya, jaxxix yol tzin nkba'na, bix ju' tzunj ccy'iy nyola. ⁴⁶ ¿Atpa jun cyey o tz'ebinta mi nuket jun 'xtak' nyola? Min-al. Ju' tzunj, ¿tikentzen ccy'iy tu'n cyocslana nyola oj nxi' nkba'na jaxxix yol cyey? ⁴⁷ Kej xjal te Dios, nxi'tzen cybi'n tyol Dios. Ju' tzunj, nchic'ajax yaa'n t-xjal Dioskey, cuma min nxi' cybi'na tyol Dios—tzi Jesús cye judío.

Tej mitkna'x tul itz'j Abraham ya atlte Cristo

⁴⁸ Bix e xi' cykba'nxin texin:

—Jax ku'na jaj jun xjal nk'ojla ti' Dios tisen ke aj Samaria, bix njaw tuj twi'y—tzikexin.

⁴⁹ Aj ttzak'be'n Jesús:

—Min njawwe tuj nwi', sino nchin nimana Nmana. Pero cyey, nchi xmucchana wi'ja nuk tu'nj nchin nimana Nmana. ⁵⁰ Pero min n-oc wipena tu'n woca te jawnex. At juntl xjal ctzaal tk'o'n weya tu'n woca te jawnex, bix ctkba' ka ba'n nchin e'leya tuj twitzxin. ⁵¹ Jaxxix cxe'l nkba'na cyey, kej xjal cxe'l cyniman nyola, ck'ojel cye jun cychunk'lal tu'n mi'n chi cyim—tzixin.

⁵² E xi' cykba'n judío texin:

—Tzinenxsen njaw tuj twi'y. E cyim Abraham kaape ootxa, bix jaj ju'x ke tyolel Dios o chi cyim. Pero tey, tzin tkba'na ka ma txi' tman jun xjal tyola, mlay cyim. ⁵³ ¿Japa tey mas jawnex twitzj tneel kiy'jila Abraham e cyim? ¿Bix japa tey mas jawnex cywitzj tyolel Dios e cyim? ¿Titzen tten njaw tman tiiba ju'wa?—tzikexin.

⁵⁴ Aj ttzak'be'n Jesús:

—Ka ma jaw nnimana wiiba, nuk waxje nchin yolena. Pero jaj Nmana njaw nimsante weya, Cydiosa tuj cywitzja. ⁵⁵ Min cytzki'na Dios. Pero weya, ntzki'na jaxin. Nuket t-xi' nkba'na min ntzki'na jaxin, 'xtak'tzen kenle tisenj ejee'y. Pero ntzki'na jaxin, bix n-oc nbi'na tyolxin. ⁵⁶ Yaltzen te Abraham, tej tel tniy'xin ti'j at tu'n ntzaja, e tajbexin tu'n ntzaja, bix e tiibxin tej ntzaja, bix e jaw tzalajxin wi'ja—tzixin.

⁵⁷ Ju' tzunj, e xi' cykba'n judío texin:

—¿Tzimpa tkba'na e tena junx tuya Abraham twitz tx'otx' kaape ootxa? At-x nim jnabk'i tu'n tpona cya'wnak tuya laaj jnabk'i. ¿Ti tten nxi' tkba'na o tila Abraham?—tzikexin.

⁵⁸ E xi' tkba'n Jesús cyexin:

—Jaxxix cxe'l nkba'na cyey, tej mitkna'x tiz'j Abraham, inayena at—tzixin.

⁵⁹ Tejtzen cyebinte judío ja yol lu, el cyniy'xin ti'j oc tk'on tiibxin te junx tuya Dios. Ju' tzunj, e jaw cytzyu'nxin xak tu'n toc cyxoo'nxin ti'jxin. Pero e xi' tewenx tiibxin cyool xjal, bix etzxin tuj tja Dios.

¹ Tejtzen tetz Jesús tuj nintzaj tja Dios, tcub junxin xjal moš. Mošxin titz'jlenxin. ² Bix e xi' cykanen t-xnak'atz Jesús te:

—Taat Xnak'tzal, ¿alcy e binchan il, ti'j itz'j ja xjal lu moš? ¿Japa moš, bix ka ejee' tmanxin? —tžikexin.

³ Aj ttzak'be'n Jesús:

—Min ul itz'jxin moš tu'n tlaj jun tilxin. Jax ju'x ke tmanxin, min ul itz'j cycwal moš tu'n tlaj jun cyil. Ul itz'j ja xjal lu moš tu'ntzen tyeec'aj tipemal Dios oj tbint. ⁴ Bix ma pon tumel. Iltzen ti'j tu'n tbint ku'n j-ak'untl o k'oj ke tu'n Nmana e tzaj tsm'a'n inayena. Bix il ti'j tu'n kak'anan ti' taak'en Nmana tuj tyem te ja'lewe, cuma oj tul tyem te koniyan, otktzen pon baj twi' tyem tu'n kak'anan. ⁵ Ti'j lux kena ntiina twitz tx'otx', il ti'j chin k'ola spi'yen cye xjal—tžixin.

⁶ Tej tkbante Jesús jlu, e cub ttzubanxin twitz tx'otx', bix e cub tbincha'nxin ch'in xook'l tuya ta'l ttzixin, bix oc tsu'nxin xook'l cyi' t'bak' twitz moš. ⁷ Bix e xi' tkba'nxin te moš:

—Cutxey txjol twitza tuj jtx'ajbil Siloé tbi, jatzen japoninaj O Tzaj K'o'n—tžixin.

Bix e tcuya moš, bix el ttxjo'nxin twitzxin tuj tx'ajbil. Bix e bint twitzxin tu'n tcy'e'yenxin, bix e ponxin tjaxin. ⁸ Bix e xi' cykba'n ke tvesint-xin bix kej xjal otk cyil jaxin tej tkanenxin pwak:

—¿Yaa'mpa ja xjal jlu moš ncub ke twitz tja Dios te kanl pwak?—tžikexin.

⁹ At juuntl e xi' cykba'n:

—Ja tzunxin.

Pero at juuntl e xi' cykba'n:

—Min, yaa'n jaxin, sino nuk jun xjal ju' tcy'e'nc tisenj moš—tžikexin.

Pero e xi' tkba'n jmoš otk k'anj:

—Inayen weja.

¹⁰ Ju' tzunj, e xi' cykba'nxin texin:

—¿Ti xbina twitza, ti'j lutle ncy'e'yena?—tžikexin.

¹¹ Aj ttzak'be'nxin:

—At junxin xjal Jesús tbi. Ja tzunxin xcub binchante ch'in xook'l, bix s-oc tsu'nxin xook'l ti' nwitzza, bix s-aj tkba'nxin weya tu'n tel ntxjo'na nwitzza tuj tx'ajbil te Siloé. Xin pona tuj tx'ajbil, bix s-el ntxjo'na nwitzza, bix xcyaj nwitzza ba'n—tžixin cye tvesint-xin.

¹² Bix e xi' cykba'nxin texin:

—¿Jaa'tzen ta' jxjal xk'anente tey?—tžikexin.

—Mintii' tumel wuyena jaa' ta'—tžixin.

Nchi xkelen fariseo te jxjal otk jket twitz tu'n Jesús

¹³ Entonces, e xi' cyii'nxin ja xjal otk ten moš cywiz fariseo. ¹⁴ Tuj k'ij te ajlabl tej tbinchante Jesús xook'l bix e k'anj xjal moš. ¹⁵ Ju' tzunj e xi' cykanen fariseo te moš:

—¿Ti tten xk'anja, tu'n tcy'e'yena? ¿Ti xbjay tey?—tžikexin.

Bix e xi' tkba'nxin cye fariseo:

—S-oc tsu'n Jesús xook'l ti' nwitzza, bix s-el ntxjo'na nwitzza, bix ncyajltzen ba'n—tžixin.

¹⁶ Ju' tzunj, e xi' cykba'n juun fariseo cyxolx:

—Yaa'n sma'n tu'n Dios ja xjal lu, cuma ma binchanxin xook'l tuj k'ij yaa'n ba'n te ak'untl. Min niman jley tej k'ij te ajlabl—tžikexin.

Pero at juuntl cyxolxin e xi' cykba'nxin:

—Yaa'n tumel cyyola. ¿Ti tten ba'n tk'ane jun aj il moš?—tžikexin. Bix ju' tzunj e tzaj jun k'oj cyxolxin. ¹⁷ Manc'biltzen, e xi' cykanenxin te moš:

—Tzin tkba'na ma k'anen jxin lu cyi'j twitza. Ju' tzunj, ctzaal tkba'na alcyexin tuj twitza —tžikexin.

—Jaxin jun tyolel Dios—tžixin.

¹⁸ Pero ccy'i nejenel cye judío tyolxin ka otk tenxin moš bix ka otk k'anjxin. Ju' tzunj, e cytxocxin tmanxin tuya ttxuxin. ¹⁹ Bix e xi' cykanenxin cye tmanxin:

—¿Japa tzunj xjal lu cycwala? ¿Jaxpa mošpa tej titz'j? Katzen mošxin, ¿titzen tten sul tnaabl twitzxin?—tžikexin.

²⁰ Bix aj cytzak'be'n tmanxin cye fariseo:

—Jaxte kcwala, bix jaxte mošxin tej titz'jxin. ²¹ Pero min tz'el kni'ya ti'j ti tten sul tnaabl twitzxin ja'lewe, bix mintii' tumel kuyena alcyexin xjal s-oc tk'anen ke t'bak' twitzxin. Cykanenx texin, cuma ma xjaltxin. Jaxxin kbalte—tži ke tmanxin. ²² E yolen ke tmanxin ju'wa cuma at cytži nejenel cye judío cyi'jxin, cuma otk cykba judío ka at jun xjal ma kbante Jscy'o'n tu'n Dios ja Jesús, n-etztzen lejetl tuj camon jaa' te xnak'tzibil tyol Dios, tu'n mi'ntl tz'ocx tentl. ²³ Tu'n cytži cyi'jxin, ju' tzunj e xi' cykba'nxin: “Ma xjaltxin. Cykanenx texin.”

²⁴ Tejtzen tel cyniy' fariseo ti'j ccy'i tman moš e yolenke, jundl maj e tzaj cytxco'nxin jxin otk ten moš, bix e xi' cykba'nxin texin:

—Kbantz ka ma k'anja tu'n Dios, pero yaa'n tu'n Jesús, cuma ktzki'na jun aj il teja—tzikexin.

²⁵ Bix aj ttzak'be'nxin cyexin:

—Mintii' woclena tu'n t-xi' nkba'na ka aj ilxin bix ka min. Pero ntzki'na ja lu. Moš kena nejl. Pero ja'lewe, ba'ntl chin cye'yena—tzixin.

²⁶ Pero min el ba'n tyolxin tuj cywitzxin. Ju' tzunj e xi' cykanenxin texin:

—¿Ti xtbíncha Jesús ti'ja? ¿Ti xbit tu'nxin, tu'ntzen tcy'e'yena?—tzikexin.

²⁷ Aj ttzak'be'nxin cyexin:

—Ya ma txi' nkba'na cyey, pero cycy'iy tu'n cyocslantey nyola ti'j Jesús. Ka cycy'iy nyola, ¿tikentzen ntzaa' cykanena weya juntl maj? ¿Cyajpey tu'n cyxi' lpey ti'jxin?—tzixin.

²⁸ Tej cybintexin ja yol lu, e tzaj cyk'ojxin, bix e xi' cykba'nxin texin:

—Tey, nxi' lpey ti'jxin, pero keya, nko'x lpeya ti' Moisés. ²⁹ Ba'n ku'na o cyaj tk'o'n Dios tyol te Moisés. Yal tej xjal lu, mintii' tumel jaa' e tzaa'—tzikexin.

³⁰ Aj ttzak'be'nxin cyexin:

—Jey', ¿titzén tten mintii' cynaabla? Ma tzaj tk'o'n Jesús weya tu'n ncy'e'yena, pero tzinx cykba'na min tz'el cyniy' ti'j jaa' e tzaa'xin. ³¹ Cykilca ko' ktzki'n min tak' te Dios tipemal cyej xjal aj il, sino nk'onxin tipemalxin tej xjal nniman jaxin bix nbínchan tajbilxin. ³² Jatxe tej tbint twitz tx'otx', bajx kbi'ya o k'anj jun xjal moš titz'jlen tu'n juntl xjal. ³³ Nuket min e tzaj ja xjal lu ti' Dios, mlayettzele k'anen wi'ja—tzixin.

³⁴ Bix e xi' cykba'nxin texin:

—¿Ti tten ntx'olbana keya? Nuk jun aj iltey, cuma ul itz'ja moša. Te ja'lewe, mintii' tl toclena tu'n tocca tuj tja Dios bix tzalu tuj camon jaa'—tzikexin.

Kej xjal mi'n n-el cyniy' ti' Cristo, moške tuj twitz Dios

³⁵ Tejtzen tbinte Jesús otk tz'etz cylojo'n fariseo ja moš tuj tja Dios bix tuj camon jaa', e jyonxin ti'j moš, bix e xi' tkba'nxin te:

—¿Mapa tz'ocslaney ti'j ma tzul jxjal Sma'n tu'n Dios kxol?—tzixin.

³⁶ —Taat, kbantz weya alcyexin, tu'ntzen wocslana ti'jxin—tzi moš.

³⁷ E xi' tkba'n Jesús te:

—Ma tila jaxin. Jaxj xjal nyolen tuyey ja'lecuwe. Inayena—tzi Jesús.

³⁸ Tej tbintexin jlu, e cub majexin tu'n t-xi' tyeec'anxin tnimbilxin, bix e xi' tkba'nxin:

—Taat, chin ocslala ti'ja—tzixin.

³⁹ Mas yaj ch'intl, e xi' tkba'n Jesús cye xjal:

—In tzaja twitz tx'otx' tu'n tcyaj tuj tzinen alcye kej xjal chi cyjel moš. Kej xjal ma tz'el cyniy' ti'j ka moš cynaabl, cjketeltzen cynaabl. Pero kej xjal n-el cyniy' ti'j tuj cywitz, cyjeltzen cynaabl moš—tzixin.

⁴⁰ Cyxoltzen xjal at cab fariseo. Tej cybinte fariseo tyol Jesús cyi'j moš, e xi' cykanenxin texin:

—¿Jaxpa ju'x ko'ya, mošpa ko'ya tuj twitza?—tzikexin.

⁴¹ —Nuket moškey, mintii'le cyila. Pero tzin cykba'na: “Mintii' il ti'j tu'n tk'oj xnak'tzibil keya, cuma ma tz'el kni'ya ti'j cykilca,” tzikey. Ju' tzunj, chi cyjela tuj cyila—tzi Jesús.

10

Jun techel ti'j jun tpenwen carnal

¹ Bix e xi' tkba'ntl Jesús cye fariseo:

—Jaxxix cxe'l nkba'na cyey, ejee'y yaa'n cylel jaxxix cye xjal. C'oquel cyc'u'ja ti'j jun techel. Alcye cylel tcy'i tz'ocx tzii' cypenwen carnal, sino ju' n-ocx twi' penwen, jatzen xjalja yaa'n jaxxix cylel, sino jun alak'. ² Pero jcyel n-ocx tzii' penwen tuj tumel, nyee'antzen ka jaxxix jun cylel cye carnal. ³ Oj npon jcyel jaxxix tzii' penwen te klax, jxjal nc'ojlan ke carnal te koniyan tziki'n twitzxin, bix njkon tzii' penwen, tu'ntzen tocx jxin cylel. Bix cytzki'n carnal twi' cycylel. Bix nchi tzaj ttxco'n cylel teeylex juun carnal alcye cybijil, bix nche'x tii'nxin tuj penwen. ⁴ N-etz tii'nxin kej carnal at te texin, bix nbet-xin nejl cywitzjil. Bix nchi oc lpejil ti'jxin, cuma cytzki'njil twi'xin. ⁵ Pero jun wikxilt xjal, mlay chi oc lpejil ti'j, sino chi élel okjil ti'j, cuma min cytzki'njil twi' junxilt xjal—tzi Jesús cye fariseo.

⁶ Pero tej t-xi' tkba'n Jesús ja techel lu cye fariseo, min el cyniy'xin ti'j ti elpenina.

Ja Jesús jba'n cylel

⁷ Ju' tzunj, e xi' tkba'nxin juntl yol cyexin:

—Jaxxix cxe'l nkba'na cyey, inayena jjaxxix cylel. ⁸ Cykilca kej xjal ul nejl nwitzta te k'umlte jaxxix cylel ejee', alak'ke. Pero min oc cybi'n ncarnela cyool. ⁹ Junx tzii' penwen at, bix inayen tzunja junx tzii' penwen. Alcye ma tz'ocx wu'na, cc'ojleteltzen, bix ck'ojel

te tu'n tex, tu'n tcnct twa. ¹⁰ Yaltzen te alak', tzul nuk tu'n talk'an, bix te byol, bix tu'n t-xi' cykilca tuj il. Pero weya, in ula tu'n tten cychunk'lal, bix tu'n tnoj cychunk'lal tuyaj ba'n. ¹¹ Inayena jcyel ba'n. Jun cyel ba'n ctk'a' tiib tu'n tcyim tu'n cyclet carnel. ¹² Pero jxjal yaa'n cyel, bix yaa'n cyaaw carnel, sino nuk jun tmaan cyel, oj tlonte jun xo'j, mi'n tc'ojla ke carnel, sino cyjel tcyeyen ke carnel tu'n tel ok. Bix c'ulel tzul xo'j te tzyul ke carnel, bix chi elel tztijil. ¹³ Cuma mintii' tc'u'j cyi' carnel, n-el ok, cuma nuk jun maan. ¹⁴ Pero inayena, jcyel ba'n kena. Ntzki'na ke ncarnela, bix cytzki'n ncarnela inayena. ¹⁵ Ntzki'na ke ncarnela tisen Nmana ttzki'n inayena, bix cytzki'n ncarnela inayena tisen ntzki'na Nmana. Bix cnk'a' wiiba tu'n ncyima tu'n cyclet ncarnela. ¹⁶ Bix juuntl carnel ete' cyuj juuntl tnom at tu'n cyoc te ncarnela. Il ti'j tu'n ttzaj wii'na tuj penwen. Oj cytzaj nttxco'na, c'oqueltzen cybi'n nwi'ya, bix chi oquel te junx cyuya ncarnela tzalu, bix junx cycylel chin oquela. ¹⁷ Bix cuma cnk'a' wiiba tu'n ncyima tu'n cyclet carnel, ju' tzunj n-oc wak'a te Nmana. Bix chin cymeela tu'n njaw itz'ja juntl maj. ¹⁸ Min-al ba'n tel k'inte nchunk'lala. Oj tpon tumel tu'n ncyima, tu'nj weya wajbil chin cymeela. At wipemala tu'n ncyima, bix at wipemala tu'n njaw itz'ja juntl maj. Bix cbinel wu'na cuma ju' taj Nmana—tzi Jesús cye fariseo.

¹⁹ Tejtzen cybinte judío kej yol lu, juntl maj e jaw jun k'oj cyxolxin. ²⁰ At nim xjal e xi' cykba'n:

—Ma tz'oc jun biman ti'j, bix njaw tuj twi'xin. ¿Tiken nxi' cybi'na tyolxin?—tzikexin.

²¹ Pero juuntl xjal e xi' cykba'n:

—Min. Mlay yolen jun xjal tuj tumel ju'wa ka ma jaw tuj twi'. Bix at juntl. Mlay bint tu'n jun xjal tu'n tjetk twitz jun moš ka ma tz'oc jun biman ti'j—tzikexin.

El cyiiq'uen judío ja Jesús

²² Yajc'atltzen bix e pon juntl nink'ij, ja trink'ij nin tja Dios tuj Jerusalén. ²³ Otk pon tyem te ncub che'w. Bix nbet Jesús tuj jtwitz pe'n Salomón tbi. ²⁴ Tej t-xi' cycye'yen judío e ten Jesús tuj tja Dios, e jaw cychmon cyiibxin ti'jxin, bix e xi' cykba'nxin texin:

—¿Jtojzen tkbay tuj tzinen ka jay jxjal Scy'o'n tu'n Dios?—tzikexin.

²⁵ Aj ttzak'be'n Jesús cyexin:

—Nim maj e xi' nkba'na cyey, pero cycy'iy tu'n cyocslana ti' nyola ti'j alcye kena. Jax ju'x kej o bint wu'na tuya tipemal Nmana, tzin cykba'n alcye kena. ²⁶ Pero cycy'iy cyocslay wi'ja, cuma yaa'nkey ncarnela. ²⁷ N-oc cybi'n ncarnela nwi'ya, bix ntzki'na ejee', bix nchi oc lpe wi'ja. ²⁸ Bix nxi' nk'o'na cychunk'lal te junx maj. Mi'n chi cyaj tyamecy. Bix min-al ba'n cyel k'inte tuj nk'aba. ²⁹ O tzaj tk'o'n Nmana ejee' weya, bix at mas tipemal Nmana cywitz cykilca. Ju' tzunj, min-al ba'n cyel k'inte tuj tk'ab Nmana. ³⁰ Inayena tuya Nmana, junx ko'ya—tzi Jesús.

³¹ Tej cybinte judío tyol Jesús ka junx tuya Dios, juntl maj e jaw cyii'nxin xak tu'n toc cyxoo'nxin ti'jxin. ³² Tej tel tniy'xin ti'j e cyajbexin tu'n tcubxin, e xi' tkba'nxin cyexin:

—Nim nbinchbena ba'n o bint wu'na cywitza tu'n tipemal Nmana, te yec'bil junx ko'ya tuya Nmana. ¿Alcyetzen nbinchbena tzin tyeec'an min e bint tu'n tipemal Nmana, tu'ntzen toc cyxoo'na xak wi'ja?—tzixin.

³³ Aj cytzak'be'n judío texin:

—Mlay tz'oc kxoo'na xak ti'ja tu'n tlaj jba'n o bint tu'na. Pero il ti'j tu'n tcyima tu'n tlaj ncub t-xmuccha'na Dios, cuma tzin tkba'na Diostey, amale nuket jun xjaltey—tzikexin.

³⁴ Aj ttzak'be'n Jesús cyexin:

—¿Mimpa tzul tuj cyc'u'ja at maj dios cybi xjal tuj tyol Dios? Tzin tkba'n Dios tuj cyleya: “Dioskey.” ³⁵ E tkba Dios ju'wa cye cycawel aj Israel cuma ajbenke tisen t-xel Dios cyxol xjal tu'n cyk'umen tyolxin. Oc tk'o'n Dios cybi te dios, bix ktzki'n mlay tzpet tyol Dios. ³⁶ Ju' tzunj, ka dios kej xjal nuk xjal te twitz tx'otx'ke, ¿tikentzen tzin cykba'na nchin xmucchana Dios oj nxi' nkba'na Tcwal Dios kena? ¿Tikentzen nchi jaw yolena ti'j xjal e tscy'o Dios bix e tzaj tsma'n Dios tzalu twitz tx'otx' tu'n t'nt taak'en Dios tu'nxin? ³⁷ Ka ja ak'untl nbint wu'na mi'n tzin tyeec'an ka sma'n kena tu'n Nmana, ba'ntzen tu'n wel cyxoo'na. ³⁸ Pero ka jnbint wu'na nyeeec'an Tcwal Dios kena, amale cycy'iyet nyola, pero tu'nj taak'en Dios nbint wu'na, il ti'j tu'n cyocslana ti'j junx kena tuya Nmana—tzi Jesús.

³⁹ Ju' tzunj, te juntl maj oc cyipenxin ti'j tu'n tcub cytzyu'n jaxin, pero el lk'exin cyi'jxin. ⁴⁰ Bix e xi'xin juntl maj jlajxe nima' te Jordán, tu'n tcyajxin tuj lugar jaa' otk tzak'a Juan Bautista tu'n cyu'x xjal tuj a' tu'nxin. ⁴¹ Bix nim xjal e pon tuyaxin, bix e xi' cykba'nxin:

—Amale mint e bint jun ak'untl te nim tipemal tu'n Juan, te yec'bil tyolel Dios jaxin, pero o tz'el jaxxix cykilcaj e tkbaxin ti'j xjal lu—tzikexin.

⁴² Bix nim xjal ocslan ti'j Jesús jatzewe ka jaxin jCristo.

11

Tej tcyim Lázaro

¹ E yebttzen junxin xjal Lázaro tbi tuj tnóm te Betania, nka ti' Jerusalén. Jun tuya Jesús Lázaro, bix cyitz'en Marta bix María jaxin. ² Ja tzunj xuj María, jaxj María otk cub tsu'n c'oc'sbil tibaj tken Cawel kxol, bix otk tz'el tsu'nxuj ti' tken Jesús tuya ttzmal twi'xuj.

³ Tejzten tyeft Lázaro, e xi' cysma'n ke ttzicyxin jun sanjel kbalte te Jesús:

—Taat, jxjal n-oc tak' tey nim ma yebt, bix ma tz'it'z'exin—tzi sanjel.

⁴ Tej tbinte Jesús tyol sanjel, e xi' tkba'nxin:

—Jt-xi'len ja yabel lu yaa'n tu'n t-xi' tii'n Lázaro tuj cyamecy, sino tu'n tchic'ajax tipemal Dios, tu'ntzen tjaw nimset nbi'ya, inayena Tcwal Dios—tzixin.

⁵ Nim oc cyak' Marta bix María bix Lázaro te Jesús. ⁶ Ju' tzunj, tej tbintexin ka yaab Lázaro, e tcuyaxin tu'n t-xi'xin cyey'lte. Pero nejl, e cyajxin ca'batl k'ij tuj lugar jaa' e tenaxin. ⁷ Bix tej tpon tumel tu'n t-xi'xin, e xi' tkba'nxin cye t-xnak'atzxin:

—Ko'tzen juntl maj tuj Judea—tzixin.

⁸ Bix aj cytzak'be'n t-xnak'atzxin:

—Taat Xnak'tzal, ma bint ca'ba oxe k'ij oc cyipen judío jatzewe ti'j tu'n tcub cybyo'n jay tuya xak. ¿Tikentzen taja t-xi'y juntl maj tuj ja tnoma?—tzikexin.

⁹ Bix aj ttzak'be'nxin cyexin:

—Il ti'j tu'n nxi'ya, cuma mina'x tpon baj waak'ena. Cyxol xjal at jun yol tzin tkba'n: “Tuj jun k'ij at cablaaj hora te spi'yen. Ka ma bet jun xjal te k'ij, mlay cub tz'ak, cuma at spi'yen. ¹⁰ Pero ka ma bet jun xjal te koniyan, cjawel tz'ak tuj klolj,” tzi yol. Jax ju'x weya. Mina'x tpon baj tyem tu'n tbint waak'ena, bix mi'n ko ak'anan tuya ttzi k'ij, tisen oj nchi bet xjal tuj klolj—tzi Jesús.

¹¹ Bix e xi' tkba'ntlxin:

—Jkuya Lázaro nwutan. Pero ma chixa tu'n tjaw nc'asena—tzixin.

¹² —Taat, ka ma wutanxin, jatzén jun yec'bil ba'n, cuma tzultzen tnaablxin—tzikexin,

¹³ cuma min el cyniy' t-xnak'atzxin ti'j ka otk yolenxin ti'j tcyamecy Lázaro. Tuj cywitzxin, nyolenxin ti'j najlan Lázaro.

¹⁴ Cuma min el cyniy'xin ti'j, ju' tzunj e xi' tkba'nxin cyexin tuj tzinen:

—Ma cyim Lázaro. ¹⁵ Bix ba'n tuj nwitzza min in pona nejl tu'n nco'pana jaxin tuj yabel, cuma mas ba'n te cyey tu'n tcywix cyocslabla wi'ja oj toc cycey'yena jun mas jawnex twitzj tu'n nco'pana jun yaab tuj yabel. Ko'tzen jaa' ta'xin—tzi Jesús.

¹⁶ Pero tu'n ttzi cyi'j, cicy'i t-xnak'atzxin tu'n cyxi'. Pero bix e xi' tkba'n Tomás cye niy'tl t-xnak'atz Jesús:

—Ka taj Jesús tu'n tcub byet, jax ju'x ke. Ko'tzen, tu'ntzen kcyim tuyaxin—tzi Tomás, jxjal Yo'x tbi cyu'n xjal. Bix e xi'kexin cykilcakexin.

Cjawel itz'j cykil xjal tu'n Jesús tuj manc'bil k'ij

¹⁷ Tejzten cyponxin tuj Betania, e tbitzen Jesús cyaja k'ij tcyajlen Lázaro tuj tjayel anem twitz xak. ¹⁸ Cuma ta' Betania nuk jun ajlabl ti' Jerusalén, ¹⁹ ju' tzunj e xi' nim xjal judío cyuya Marta bix María, te yec'bil tk'ak'bil cye'u'jxin cyi'xuj, cuma otk cyim cyitz' enxuj.

²⁰ Tejzten tbinte Marta otk tzul Jesús tuj ttanemxuj, etzxuj tuj tjaxuj te clulte Jesús tuj be. Yal te María, e cyaj tuj cyjaxuj. ²¹ Tej tpon Marta tuya Jesús, e xi' tkba'nxuj texin:

—Taat, nuket e tena tzalu, minttzele e cyim nxibena. ²² Pero amale mint ula, pero ba'nx wu'na alcyey cxe'l tkanena te Dios, ctzaal tk'o'n Dios tey—tzi Marta.

²³ E xi' tkba'n Jesús texuj:

—Cjawel itz'j t-xibena juntl maj tuj cyamecy—tzixin.

²⁴ Bix e xi' tkba'n Marta texin:

—Ntzki'na oj tpon tumel tu'n tjaw itz'j cykil xjal tuj manc'bil k'ij, jax cjawel itz'j nxibena tuj cyamecy—tzixuj.

²⁵ Bix e xi' tkba'nxin texuj:

—Inayena k'olte cye xjal tu'n cyjaw itz'j tuj cyamecy, bix inayena k'olte cychunk'lal xjal te junx maj. Ka c'ocslal jun xjal wi'ja, amale ncyimet, pero wu'na cjawel itz'j tuj cyamecy juntl maj. ²⁶ Cykilca kej xjal i'tz, ka ma chi ocslan wi'ja, mlay chi cyaj tuj cyamecy te junx maj. ¿Tocsla'pa te ja lu?—tzixin.

²⁷ Aj ttzak'be'n Marta texin:

—Tzin, taat. Ya ma txi' wocsla'na jay jxjal Scy'o'n tu'n Dios te Cawel. Jay Tcwal Dios at tulel twitz tx'otx', bix tu'na chi jawel itz'j xjal tuj cyamecy juntl maj—tzixuj.

Tej tjaz itz'j Lázaro

²⁸ Tej tbaj tkba'n Marta ja yol lu, e xi'xuj tjaxuj te txcolte titz' enxuj. E xi' tkba'nxuj te María, pero yaa'n cywitz judío:

—Ma tzul jjawnex Xnak'tzal tuj tnom, bix taj yolen tuyej—t'zixuj.

²⁹ Tej tbinte María ka otk txcon Jesús ti'jxuj, tujxse naj e jaw we'xuj, bix e tzyet tbexuj tu'n tponxuj tuyaxin. ³⁰ Mitkna'x tul Jesús tuj tmij tnom, sino at-xxin ttxa'n tnom jaa' otk pona Marta tuyaxin. ³¹ Pero mitkx n-exa María tjunal, cuma kej nejenel cye judío ete' tuj tjaxuj tu'n tcywix tc'u'jxuj, tej t-xi' cycye'yenxin otk jaw we' María bix e xi'xuj tuj ajkelbil, bix oc lpekexin ti'jxuj, cuma tuj cywitzxin xi'ninxuj tuj camasant te ook'el. ³² Pero e xi'xuj tuya Jesús. Tej tpon María tuya Jesús, bix e tilxuj jaxin, bix e cub mutzk'ajxuj t-xee' tkenxin, bix e xi' tkba'nxuj texin:

—Taat, nuket e tena tzalu, minttzele e cyim nxibena—t'zixuj.

³³ Tej tlonte Jesús nchi s-in María cyuya nejenel cye judío, e tzajtzen tbisxin, bix e tzaj tk'ojxin ti'j nchi cyim xjal tu'n tlaj il. ³⁴ Bix e xi' tkanenxin cye xjal:

—¿Jaa' tumel e cu'xa cymaku'na jaxin?—t'zi Jesús.

—Taat, ko'tzen, tu'n t-xi' kyeeec'ana tey—t'zixekxin.

³⁵ Bix e jaw ok' Jesús. ³⁶ Ju' tzunj, e xi' cykba'n judío cyxolx:

—Nimxsen oc tak' Lázaro texin—t'zixekxin.

³⁷ Pero at juun cyxol e xi' cykba'n:

—Jxin lu e xi' tk'anen jun xjal moš. ¿Titzen tten min oc tipenxin ti'j tu'n mint e cyim ja tuyaxin lu?—t'zixekxin.

³⁸ Ju' tzunj, juntl maj e tzaj tk'oj Jesús, cuma min oc ke cyc'u'jxin ti'jxin.

Tejzen cyponxin tuj camasant, tocx anem tuj jun jul twitz xak, bix tocx jun xak paatz' tztzi' tjayel anem. ³⁹ Ju' tzunj, e xi' tkba'n Jesús cye xjal:

—Cyimel xak—t'zixin.

Bix e xi' tkba'n Marta, taneb jxjal otk cyim:

—Taat, yaa'n tumel, cuma q'ueletz nim t-xewel anem. Ma bint cyaja k'ij tcyimlenxin—t'zi Marta.

⁴⁰ Bix e xi' tkba'n Jesús texuj:

—¿Tikentzen minti' n-oc ke tc'u'ja wi'ja? ¿Mimpa txi' nkba'na tey, ka ma tz'ocslana wi'ja, tla'y tipemal Dios?—t'zixin.

⁴¹ Tejzen tel cyii'n xjal xak twitz tjayel anem, e jaw tcyey'en Jesús twitz cya'j, bix e xi' tkba'nxin te Dios:

—Taat Nmana, nxi' nk'o'na chjonte tey, cuma e tzaj tbi'na nkanbila tej t-xi' nkanena tey wipemala tu'n tjaw witz'jsa'na ja xjal lu. ⁴² Weya, ntzki'na ntzaj tbi'na nyola jaca maj oj nxi' nna'na tey. Pero tzin nk'o'na chjonte tey ja'lewe, tu'ntzen tel cyniy' kej xjal lu ti'j ka jay e tzaj tasma'na inayena twitz tx'otx'—t'zi Jesús te Tmanxin cywitz xjal.

⁴³ Tej tbaj nna'n Jesús Dios, cyiwxix e jaw tsi'nxin:

—¿Lázaro, ctetza!—t'zixin.

⁴⁴ Bix n-etztl jcyimne. Balk'i'n tk'abxin bix tkenxin tuya jun t'zomj, bix potzen twitzxin. Bix e xi' tkba'n Jesús cye xjal:

—Cyco'pamel t-xbalenxin, tu'ntzen tbet-xin—t'zixin.

Tej tjaw cychmon cyiib xjal tu'n ttzyet Jesús

(Mt 26:1-5; Mr 14:1-2; Lc 22:1-2)

⁴⁵ Kej xjal judío otk chi ul tuj camasant tuya María, tej cylontexin ti otk bint tu'n Jesús, e cyocslaxin ka tu'n Dios jaxin. ⁴⁶ Pero at juuntl e xi' cyuya fariseo tu'n t-xi' cykba'n cyexin ti otk tbincha Jesús.

⁴⁷ Tejzen cybinte fariseo tpochal e jaw titz'jsa'n Jesús jun xjal tuj cyamecy, oc cychmon cyiibxin cyuyaj nejenel cye pala, bix e xi' cykba'nxin:

—¿Ti pjel ke? Nimxsen nbint tu'n ja xjal lu tuya nim tipemal. ⁴⁸ Ka ma txi' tzakpet-xin tu'n tcub cyi'j xjal tu'nxin, cykilcatzen xjal chi ocslal ti'jxin, bix c'oquelxin te cawel. Bix ctzaal tk'oj gobierno te Roma ki'j, bix q'ueel ti'i'n kcawbil tuj tja Dios bix kxol ejoo' judío—t'zixekxin.

⁴⁹ Attzen junxin pala cyxol, Caifás tbi, jxjal mas nintzaj cyxol pala tej tcub byet Jesús, bix e xi' tkba'nxin:

—¿Tikentzen min tz'el cyni'ya ti'j alcye tu'n tbint ku'n ti'j ja xjal lu? ⁵⁰ ¿Mimpa tz'el cyni'ya ti'j ka mas ba'n te cyey tu'n tcyim jun xjal te cyxel cykilca xjal, twitzj tu'n cyxi' xjal tuj il?—t'zi Caifás.

⁵¹ Min el tniy' tneel pala ti'j ka k'i'n tyol Dios tu'nxin, pero cuma tneel oylxte chojbil ilxin, ajbenxin te Dios tu'n t'kbantexin alcyej wik chojbil cyil xjal at tu'n toyet tujx jnabk'i, jaj tu'n tcyim Jesús te cyxel judío, ⁵² bix yaa'n nuk te cyxel judío, sino te cyxel cykilca xjal te twitz tx'otx', tu'ntzen cyoc te junx tnom cykilca kej xjal cyuj juntl tnom cyaj tu'n cyoc te tcwal Dios.

⁵³ Tej t-xi' tkba'n Caifás ju'wa, tex k'ij oc cyk'on cyiib nejenel cye judío tu'n tcub cybo'no ja Jesús. ⁵⁴ Ju' tzunj, mintl e bet Jesús cyxol nejenel cye judío, sino el lk'exin cyi'j. E ponxin

tuj jun tnom Efraín tbi, nka ti'j tx'otx' mintii' cynajbil xjal tuj. Tuj Efraín e tenxin cyuya t-xnak'atzxin.

⁵⁵ Tejtzen ch'itk tul nink'ij te Pascua, kej k'ij xjan cye judío, etz nim xjal cyuj tnom tu'n cyponxin tuj Jerusalén, te k'olte chojbil cyilxin, tu'n cicyajxin sak nejl twitz nink'ij, tisenx cye judío cycostumbre. ⁵⁶ Bix tuj Jerusalén e jyonkexin ti' Jesús. Bix tej cychmonte cyiibxin tuj jintzaj tja Dios, e xi' cykanenxin cyxolxxin:

—¿Titzen toc cyu'na? ¿Tzulpale Jesús tuj nink'ij tuj ja jnabk'i lu?—tzikexin. ⁵⁷ E yolenkexin ju'wa cuma otk tz'etz jun yol cyu'n fariseo bix kej nejenel cye pala, ka ma tbi jun xjal jaa' ta' Jesús, ya tu'n tpon naj cywitzxin te kbalte jaa' tumel, tu'ntzen tcub cytzyu'nxin jaxin.

12

*Tej txaj tk'o'n jun xuuj c'oc'sbil tuj twi' Jesús
(Mt 26:6-13; Mr 14:3-9)*

¹ Cuma ch'itk tpon nink'ij te Pascua, ju' tzunj e tzyet tbe Jesús tu'n tponxin tuj Jerusalén. At-x wukak k'ij tu'n tzyet nink'ij tej tponxin tuj Betania, jtnom jaa' najle Lázaro, jxjal otk jaw títz'jsa'nxin tuj cyamecy. ² Bix tu'n cyk'onte aj tnom chjonte te Jesús, iy' cyiy'sa'nxin jun trink'ixin. Bix oc ten Marta cyxol kej xjal ajbel cye xjal nchi waa'n. Bix at Lázaro cyxol kej xjal k'uklc'a ttxa'n mes tuya Jesús. ³ Yal te María, tu'n t-xi' tyeec'an María tanem texin, e tzaj tii'nxuj jun lmet nojne tuya c'oc'sbil cyi' xjal nardo tbi, wi'yelxsen, bix yaa'n smo'n tuya a'. Bix e cub tko'nxuj c'oc'sbil ti' tkenxin, bix e baj tsu'nxuj tuya tzmäl twi'xuj. Bix e noj jaa' tuya tc'o'cjel.

⁴ Bix tocxsen Judas Iscariote tunwen, jun t-xnak'atz Jesús, tcwal Simón. Bix jatzen Judas tu'n t-xi' q'ueyente Jesús tuj cyk'ab byol xjal. E tkbatzen Judas:

⁵—¿Tikentzen min xi' q'ueyet ja c'oc'sbil lu? Nuket xi' q'ueyet, matle tz'oc twi' te oxe syent pwak te denario, bixetle xi' cyej xjal mebe—tzi Judas. ⁶ Pero mintii' tanemxin cye mebe. E xi' tkba'nxin ju'wa cuma alak'xin. Ajbenxin te c'ojlal jcajon te pwak te Jesús cyuya ke t-xnak'atzxin, bix at maj el tii'nxin cyoybil xjal e cu'x cyk'o'n tuj tcublel pwak.

⁷ Bix e xi' tkba'n Jesús te Judas:

—Mi'n tz'oc tena yaa'l xuuj. Yaa'n nuk tajx ma cyaj tcl'o'nxuj jc'oc'sbil tu'n tcub tko'nxuj cyibaj nkena. Jma bint weya najben tu'n tbaj bint nxumlala tu'n nmaketa. ⁸ Ka taja txi' tyeec'ana tanema cye mebe, attzen mebe cyxola cykil k'ij. Pero weya, nuk ch'intl chin temela cyxola—tzi Jesús.

Tej tbint ti'j cyu'n xjal tu'n tcub byet Lázaro

⁹ Yal cyej txkentl xjal judío otk chi chmet te iy'sal nink'ij, tej cybinte e ten Jesús tuj Betania, e tzajkexin te cye'y'lte Jesús, bix yaa'n nuk tu'n toc cicye'yen ja Jesús, sino jax jux' tu'n toc cicye'yen ja Lázaro, cuma otk jaw itz'j tuj cyamecy tu'n Jesús. ¹⁰ Pero yal kej nejenel cye pala, e tzaj cychmon cyiibxin tu'n tbaj cyninc'u'nxin ti tten tu'n tcub byet yaa'n nuk ja Jesús, sino tuyax Lázaro, ¹¹ cuma tu'n tñaj e jaw itz'j Lázaro tuj cyamecy, nim xjal judío el lk'e tjak' c'oc'awbil pala tu'n cyocslan ti' Jesús.

*Tej tocx Jesús tuj tnom Jerusalén
(Mt 21:1-11; Mr 11:1-11; Lc 19:28-40)*

¹² Yal te nink'ij te Pascua, nimxsen xjal otk chi pon tuj Jerusalén te iy'sal nink'ij. Tetzen juntl k'ij toclen tk'on María c'oc'sbil ti' Jesús, e pon tpochal tu'n t-xi' Jesús tuj Jerusalén. Tejtzen cybinte tñimal xjal tu'n t-xi' Jesús, ¹³ el cytx'omen tk'ab xa'j, bix etzkexin tuj Jerusalén te clulte texin. Bix ak'kexin š-il:

—jawnxssen Cawel kxol! ¡Cy'iwla'nxit jxjal tzul te t-xel Dios! ¡Ma tzul jmero Cawel kxol ejoo' aj Israel!—tzi ke xjal.

¹⁴ Yal te Jesús tuj Betania, e tzaj ttzyu'nxin jun tal bur, bix e jaxxin tibajjil. Ju' tzunj jax e'la jyol tuj tyol Dios tzin tkba'n: ¹⁵ “Mi'n tzaj ttzi cyi'ja, key xjal te Jerusalén, cuma tzul C'oc'awela tjax tibaj jun tal bur,” tzi tyol Dios.

¹⁶ Yal ke t-xnak'atz Jesús, min el cyniy'xin ti'j nyolen kej yol lu ti'j Jesús. Pero mas yaj, tej taj k'i'nxin tuj cya'j, ul tuj cye'u'jxin ti otk baj, bix el cyniy'xin ti'j otk tz'el tyol Dios jax.

¹⁷ Kej xjal otk ten tuyaxin tej tetz ttxco'nxin Lázaro tuj mukbil bix e jaw títz'jsa'nxin tuj cyamecy juntl maj, otk txi' cyk'umen cye xjal tuj Jerusalén ti otk bint tu'nxin. ¹⁸ Ti'j tzunj tpochal tipemalxin otk tz'etz tñimal xjal tuj Jerusalén te clulte texin. ¹⁹ Bix cuma e jaw cynimsa'n xjal tbi Jesús, ju' tzunj e xi' cykba'n fariseo cyxolx:

—Mintii' tz'ajben jma baj kninc'u'n ti'j Jesús, tu'n tul cyii'n xjal jaxin kwitz. Cicye'yenc. Cykil xjal ma che'x lpe ti'jxin—tzikexin.

Tej cypon kej xjal griego tuya Jesús

²⁰ Cyxoltzen xjal e pon tuj Jerusalén te nimal Dios tuj nink'ij, attzen cab xjal griego. ²¹ E pon lk'e kej griego lu ti' Felipe, jxjal aj Betsaida tuj departamento te Galilea. Bix e xi' cykba'nxin te Felipe:

—Taat, kaja tu'n kyolena tuya Jesús—tzikexin.

²² Ju' tzunj, e xi' Felipe tu'n t-xi' tkba'n te Andrés, bix e xi'kexin kbalte te Jesús ti cyaj kej xjal griego.

²³ Bix e xi' tkba'n Jesús cyexin:

—Ma pon tumel tu'n tbint wu'na jk'o'n weya tu'n tbint wu'na, inayena, jxjal Sma'n tu'n Dios tu'n ntena cyuya xjal. ²⁴ Cxe'l nkba'na jun techel cyey. Jaxxix cxe'l nkba'na cyey, jun iyaj te triwa, ka min ma cu'x maku'n tuj tx'otx' tu'n tcyim, ju'x cwel ten iyaj tjunal. Mlay jatz pok'ch. Pero ka ma cyim, nim twitz c'oquel. Jaxse ju'x weya, il ti'j tu'n ncyima, tu'ntzen t-xi' nk'o'na cychunk'lal xjal. ²⁵ Jax ju'x cye xjal. Al tzunj xjal min ma cyaj tcyeyen tchunk'lal, sino nuk o'cx ma tz'oc tc'u'j tu'n tten tchunk'lal te twitz tx'otx', mlay caman tchunk'lal te junx maj tzin nk'o'na. Pero ja tzunj xjal cyjel tcyeyen tchunk'lal te jun rato, ccamaltzen tchunk'lal te junx maj. ²⁶ Ka taj jun xjal tz' ajben weya bix yaa'n nuk tz'oc tc'u'j ti'j tchunk'lal, iltzen ti'j tu'n tiy'x q'uixc'aj tu'n wi'ja, ojxe tcyim ka at il ti'j, tisenxj ma wak' wiiba tu'n ncyima. Kej xjal chi ajbel weya ju'wa, chi temeltzen jaa' chin xe'la, bix cxe'l tk'o'n Nmana tu'n cyoc te jawnex.

Tej tyole Jesús ti' tcyamecy

²⁷ Pero weya, ma pon tumel tu'n ncyima. Bix yaa'n tuj ttzyal ta' wanema. ¿Ti cxe'l nkba'na? ¿Cxe'lpa nkba'na: “Taat Nmana, najsama. Chin tcla'y, tu'ntzen mi'n pon hora tu'n ncyima,” ntzipaya? Pero mlay txi' nkanena jlu, cuma in ula tu'n ncyima. ²⁸ Taat, bint-xit jtajbila wu'na, tu'ntzen tjaw nimset tbiy—tzi Jesús.

Bixsen e tzaj tyol Dios tuj cya'j, bix tzi cyjulu:

—Tu'nj ma bint tu'na, ya ma jaw nimset nbi'ya. Bix juntl maj ctzaal nk'o'na tu'n tajbena tu'n tjaw nimset nbi'ya—tzi twi' Dios.

²⁹ Kej tñimal xjal e ten ti'j Jesús, tej cybinte tk'ajk'ajel, e xi' cykba'n otk k'ajt jun k'ancyok. Pero at juuntel e xi' cykba'n otk yolen jun ángel tuyaxin. ³⁰ Tu'n tel cyniy' xjal ti'j, e xi' tkba'n Jesús:

—Ja yol e tzaj tuj cya'j najben te jun techel, yaa'n te weya, sino te cyey, tu'ntzen cyocslana wi'ja. ³¹ Ma pon tumel tu'n ncyima, bix tu'nj ncyamecy, cyjel tuj tziñen alcye c'oquel te cawel tibaj twitz tx'otx'. Ma pon tumel tu'n tetz lojo'n taaw il ncawen ja'lewa. ³² Bix weya, ojzen njaw k'o'na tibaj twitz tx'otx', jatzen tumelja te cykil xjal tu'n cyclet tjak' tcawbil taaw il—tzi Jesús. ³³ E yolenxin ti'j tu'n tjawxin tibaj twitz tx'otx' tu'ntzen tel cyniy' xjal ti'j at tu'n tjawxin twitz jun cruz tu'n tcyimxin.

³⁴ Bix e xi' cykba'n xjal tegin:

—O kbi'ya tzin tkba'n tlej Dios, oj tul jxjal Scy'o'n tu'n Dios, cyjeltzen te junx maj. Mi'n cyim. Pero tzin tkba'na: “Il ti'j tu'n tcyim jxjal Sma'n tu'n Dios twitz cruz,” tziy. Jey', ¿alcye tzuna? ¿Titzen tten cymeela twitz cruz oj tzin tkba'n tyol Dios mlay cyim Jscy'o'n tu'n Dios?—tzi ke xjal.

³⁵ Bix aj ttzak'be'nxin cyexin:

—Cycy'iy tz'el cyni'ya ti'j. Cycy'iy nxnak'tzbila. Pero nuk ch'intl ctemel nxnak'tzbila cyxola. Mi'n chin cyaja tzalu. Ju' tzunj, c'oquel cyipena ti'j tu'n tajben nxnak'tzbila cyey jooctzen at-x, tu'ntzen mi'n chi beta tuj kloj. Kej xjal nchi bet tuj kloj, chi tzpeteltzen. ³⁶ Ma pon tumel tu'n waja. Chi ocslana wi'ja loj lux kena ntiina, tu'ntzen cyoca junx wuyena—tziñin cye xjal.

Min e xi' cyocslan xjal judío ja Jesús

Tej tbaj tkba'nxin kej yol lu, el lk'exin cyi'jxin, tu'n tewente tiibxin cywitzxin. ³⁷ Amale otket tyeec'axin nimxsen tipemalxin cye xjal judío, pero min ocslanke ti'jxin ka jaxin Cristo. ³⁸ Ju' tzunj, jax e'la tyol Isaías, jtyolel Dios te ootxa. Tzi Isaías cyjulu: “Kman Kaaw, min e cyajbe ke xjal tej tyol te t-xi' kk'umena, bix min ocslanke tej t-xi' ccyeyen tipemala,” tzi Isaías. ³⁹ Bix cuma el cyiig'uen xjal tyol Cawel kxol, ju' tzunj e xi' tkba'ntl Isaías: ⁴⁰ “O cyaj tk'o'n Kaaw ejee' tu'n tcub mutz'ba'n cynaabl, bix tu'n mi'ntl tz'ajben cyanem tu'n cyiik'ente tyola. Ju' tzunj, mlay tz'el cyniy' xjal ti'j, tu'ntzen mi'n cyaj cyk'o'n cyil, tu'ntzen cyclet,” tzi Isaías.

⁴¹ Tej tyolen Isaías ju'wa, e yolenxin ti'j Scy'o'n tu'n Dios, cuma otk tilxin tej tjaw tii'n Dios ja Isaías tuj cya'j jun maj. Bix jax e yolen Isaías jun maj ti'j Jscy'o'n tu'n Dios tu'n tiy'x nim q'uixc'aj tu'n twitz tx'otx'.

⁴² Amale el ch'ixc'at yaa'n cykilca nejenel cye xjal el cyxoo'n Jscy'o'n tu'n Dios, pero at nim cyxol ocslan ti'jxin ka jaxin Cristo. Pero at cytzi fariseo cyi'jxin, bix cycy'ixin tu'n cyetz

lojo'nxin cyxol xjal judío. Ju' tzunj min e cykbaxin cywitz xjal ka lepcheckexin ti'jxin. ⁴³ Mas e cyajbexin tu'n cyelxin ba'n cywitz xjal twitzj tu'n cyelxin ba'n twitz Dios.

Tu'n tyol Jesús cwel cycastlewa xjal

⁴⁴ Jyol e tk'ume Jesús cye xjal tej tten twitz tx'otx', ju'tzen cyjulu: "Alcyej xjal cxe'l tocsla'n ti'j nyola, yaa'n o'cx wi'ja n-ocslan, sino jax n-ocslan ti'j tyol Nmana e tzaj tsma'n inayena. ⁴⁵ Bix oj n-el tniy' jun xjal wi'ja, jax n-el tniy' ti Nmana e tzaj tsma'n inayena, cuma junx ko'ya. ⁴⁶ Ma chin ula twitz tx'otx' tisen spi'yen. Kej xjal ma chi ocslan wi'ja, mi'n chi cyaj tuj kloj. ⁴⁷ Kej xjal ma chi ebinte nyola pero min cyocsla, cwel cycastlewa, pero yaa'n wu'na cwel castiwa cyibaj, cuma min in ula twitz tx'otx' tu'n t-xi' nk'o'na cycastlewa xjal, sino tu'n t-xi' nk'o'na cycolbil xjal. ⁴⁸ At juntl ctkba' at cyil xjal. Kej xjal q'uelel cyiiq'uen inayena bix cicy'i nyola, tuj manc'bil k'ij j-e xi' nkba'na c'ajbel tu'n tcyaj tuj tzinan at cyil. ⁴⁹ C'ajbel nyola ju'wa, cuma yaa'n wexwe nyol tzin nkba'na, sino tyol Nmana e tzaj tsma'n inayena. Ma tzaj tkba'n Nmana weya alcye tu'n t-xi' nkba'na. ⁵⁰ Bix ja yol ma tzaj tkba'n Nmana weya, jaj tu'n t-xi' nk'o'na cychunk'lal xjal. Ju' tzunj, nxi' nk'umena cye xjal nuk o'cx tisenj ma tzaj tkba'n Nmana weya," tzi Jesús.

13

Tej tel ttx'jo'n Jesús cyken ke t-xnak'atzxin

¹ Tetzen tneel k'ij te Pascua, e cub ke Jesús cyuya t-xnak'atzxin te koniyan te waa'l. El tniy'xin ti'j otk pon tumel tu'n tcyimxin bix tu'n tiy'xin twitz tx'otx' tu'n tponxin tuya Tmanxin. Tuya cykil tc'u'jxin otk tz'oc cyak' kej xjal lepchec ti'jxin texin. Kej xjal lepchec ti'jxin tu'n ccyaj cyxol xjal twitz tx'otx', bix ya otk pon tumel tu'n tyeec'anxin te junx maj tk'ak'bil tc'u'jxin cyi'. ² Bix otk cu'x tk'o'n taaw il tuj tanem Judas Iscariote, tcwal Simón, jun tajbil tu'n tq'ueyen Judas ja Jesús tuj cyk'ab kej xjal e cyajbe tu'n tcubxin. ³ Bix el tniy'xin ti'j otk tzaj tk'o'n Tmanxin tipemalxin t'ibaj cykilca at, bix otk tzajxin tuya Dios bix at tu'n tpon meltz'ajxin tuya Dios juntl maj. ⁴ Pero amale elet tniy'xin ti'j at cykilca tuj tk'abxin, pero e jaw we'xin tej nchi waa'nxin, bix el ti'nxin t-xbalenxin, bix oc t'xpo'nxin jun toalla tcy'itzxin. ⁵ Bix e cu'x tko'nxin a' tuj jun jo's, bix ak'xin txjol cyken t-xnak'atzxin. Bix el tsu'nxin cykenxin tuyaj toalla otk tz'oc t'xpo'nxin tcy'itzxin. ⁶ Tej tponxin twitz Simón Pedro, e xi' tkba'n Pedro texin:

—Taat, ¿wepaya nkena q'uelel ttxjo'na? Yaa'n tumel—tzi Pedro.

⁷ Bix aj ttzak'be'nxin:

—Ja'lewe min tz'el tni'ya ti'j tiken nchin txjona cykena. Pero tuj juntl rato q'uelel tni'ya ti'j ja techel lu—t'zixin.

⁸ Bix e xi' tkba'n Pedro texin:

—Te junx maj cxe'l nkba'na tey, mlayx tz'el ttxjo'na nkena—tzi Pedro.

—Ka min ma tz'el ntxjo'na tkena, mintzentii' tmunela weya—tzi Jesús.

⁹ Ju' tzunj, e xi' tkba'n Pedro:

—Taat, ka ju' tten, waja tu'n tel ttxjo'na yaa'n nuk nkena, sino jax ke nk'aba tuyax nwi'ya —tzi Simón Pedro.

¹⁰ E xi' tkba'n Jesús te Pedro:

—Jun xjal, ka ma txjon tiib, mintii'tzen il ti'j tu'n ttxjon tiib juntl maj. Nuk o'cx tu'n ttxjet tken. Q'uelel ntxjo'na nuk cykena, cuma sak cyxumlala. Pero at jun cyxola yaa'n sak—t'zixin. ¹¹ Tziki'nxin alcyej t-xnak'atzxin tu'n t-xi' k'onte texin tuj cyk'ab byol xjal. Ju' tzunj otk txi' tkba'nxin: "At jun cyxola yaa'n sak."

¹² Tejtzen t'ibaj txjet cyken t-xnak'atzxin tu'nxin, oc tk'o'nxin t-xbalenxin, bix e cub kexin ti' mes. Bix e xi' tkba'nxin cye t-xnak'atzxin:

—¿Mapa tz'el cyni'ya ti'j ti elpenina jma bint wu'na cyi'ja? ¹³ Tzin cykba'na inayena Xnak'tzal cyey bix Cawel cyxola, bix jax cyu'na, cuma ju' ttena. ¹⁴ Katzen ma tz'el ntxjo'na cykena, amale Cawelet kena cyxola bix Cyxnak'tzala kena, ju' tzunj il ti'j tu'n cyajbena cyxolxa ju'wa. ¹⁵ Ma txi' nyee'ana cyey jun yec'bil ti tten tu'n cyajbena cye juntl, tu'ntzen tbint cyu'na tisenx ma bint wu'na. ¹⁶ Jaxxix cxe'l nkba'na cyey, yaa'n ejee'y mas jawnex nwitz, cuma jun ak'anal yaa'n mas jawnex twitz tpatrón, bix jxjal ma tzaj sma'n yaa'n mas jawnex twitzj xjal e tzaj smante jaxin. ¹⁷ Pero ma tz'el ntxjo'na cykena te jun techel ti tten tu'n cyajbena cye juntl. Ka ju' chi ajbela cye juntl, atzen cytzalajebila.

¹⁸ Pero yaa'n cykilcaey chi temela tuj cytzalajebila. Tej tjaw nscy'o'na ejee'y tu'n cyoca te nxela, el nni'ya ti'j at jun yaa'n tu'n tel ba'n. Pero tocx ja xjal lu cyxola tu'ntzen tel jax tyol Dios. Tzin tkba'n tyol Dios cyjulu: "Cyxol kej xjal chi waa'l wuyena, at jun cjawel tken tu'n toc t-xjo'n inayena," tzi tyol Dios. ¹⁹ At jun cyxola cbinchal jun ka' wi'ja. Bix tziin nkba'na jlu cyey te mitkna'x tbint, tu'ntzen mi'n baj cye'u'ja wi'ja oj tbint tu'nxin ju'wa, sino c'oquel ke cye'u'ja wi'ja Jscy'o'n tu'n Dios inayena. ²⁰ Jaxxix cxe'l nkba'na cyey, chi oquela te nxela,

bix alcyce c'oquel thi'n cyyola oj t-xi' nsma'na ejee'y, jax n-oc thi'n weya. Bix alcyce c'ocslal wi'ja, jax n-ocslan ti'j Nmana e tzaj t'sma'n inayena—tzi Jesús cye t-xnak'atzxin.

E tkba Jesús ka ja Judas tu'n t-xi' q'ueyente

²¹ Tej t'bj tkba'nxin kej yol lu, e tzaj jun nintzaj bisbajil ti'jxin, bix e xi' tkba'nxin tuj tzinen:

—Jaxxix cxe'l nkba'na cyey, at jun cyxola cxe'l tq'ueyen inayena tuj cyk'ab kej xjal cyaj tu'n ncuba—t'zixin.

²² Tej t-xi' tkba'n Jesús at jun t-xnak'atzxin tu'n tq'ueyen jaxin, nimxsen e jaw sey'pajkexin, bix ak'kexin cyey'lte tuj cywitzxin. Mintey' tumel cyuyaxin alcyey tocx cyxolxin e yolen Jesús ti'j. ²³ Toctzen tt'xlaj Jesús jun t-xnak'atzxin nim oc tak' texin. ²⁴ Bix oc tch'iquen Simón Pedro ti'j jxin toc tt'xlaj Jesús, te yec'bil e tajbe tu'n tyolen tuya, bix e xi' t'kanen Pedro te:

—¿Mapa thiy alcyey nyolen Jesús ti'j? Kbantz keya—tzi Pedro.

²⁵ Ju' tzunj, jt-xnak'atz Jesús toc tt'xlajxin e xi' t'kanen texin:

—Taat, ¿alcyetzen?

²⁶ —Alcyce tzunj cxe'l nk'o'na pan te, oj tcu'x nmu'na. Ja tzunja—tzi Jesús.

Bix e cu'x tmu'nxin jun pi'x pan, bix e xi' tk'o'nxin te Judas, tcwal Simón Iscariote. ²⁷ Pero tej t-xi' toyenxin te Judas, bi'x oc Judas tuj tk'ab taaw il. Bix e xi' tkba'n Jesús te:

—J-at tu'n t'bit tu'na, bincham tuj ajkelbil—t'zixin.

²⁸ Pero cyxol kej niy'tl t-xnak'atzxin k'ukl ti' mes, min-al el cyniy' ti'j tiken e xi' tkba'nxin kej yol lu te Judas Iscariote. ²⁹ Cuma ajben Judas te c'ojal cypwak Jesús, ju' tzunj tuj cywitz juun t-xnak'atzxin e tajbexin tu'n t-xi' Judas te lok'ol jwaabj te nink'ij, bix ka tu'n t-xi' tk'o'n Judas jun onbil cyey xjal mebe.

Jun ac'aj mandamyent

³⁰ Tejtzen t-xi' ttzyu'n Judas jpan otk txi' tk'o'n Jesús, n-etztl Judas. Bix otk cub kloj. ³¹ Tej tetz, e xi' tkba'n Jesús cye t-xnak'atzxin:

—Ya ma pon tumel tu'n t'bit wu'na jma tzaj k'o'n weya tu'n t'bit, bix tu'n t'jaw nimset thi Nmana tu'nj cbinel wu'na, inayena, jxjal Sma'n tu'n Dios. ³² Bix ka ma jaw nnimsa'na thi Dios tu'nj at tu'n t'bit wu'na, jax ctzaal tyee' an Dios tnimil weya. Bix ch'ixc'a tpon tumel tu'n t'jaw nimset nbi'ya tu'nxin. ³³ Key wuya nim n-oc cyak'a weya, cxe'l ntx'olba'na cyey tuj tzinen ti japenina nyola. Nuk ch'intl chin temela cyuyey. Bix cyaja tu'n cyxi' y wuyena, pero mlay che'xa wuyena. Tisen e xi' nkba'na cye nejenel cye judío, jax cxe'l nkba'na cyey ja'lewe, mlay che'xa jaa' chin xe'la.

³⁴ Cxe'l nk'o'na cyey jun ac'aj ley. C'oquel cyak' cyiiba cyey. Tisen ma tz'oc cyak'a weya, ju'x cyii'nx tu'n toc cyak' cyiiba cyey. ³⁵ Ka ma tz'oc cyak' cyiiba cyey ju'wa, tu'n tzunj jlu q'uelel cyniy' cykil xjal ti'j ka nrxnak'atzkey—tzi Jesús.

Tej t-xi' tkba'n Jesús te Pedro, jay cwel e'wente we oxo maj

(Mt 26:30-35; Mr 14:26-31; Lc 22:31-34)

³⁶ E xi' tkba'ntzen Simón Pedro texin:

—Taat, ¿jaa'tzen cxe'ley?—tzi Pedro.

—Mlay tz'oc lpey wi'ja ja'lewe jaa' chin xe'la. Pero la' alcyce jun k'ij c'oquel lpey wi'ja—tzi Jesús.

³⁷ E xi' tkba'n Pedro texin:

—Taat, waja tu'n woc lpeya ti'ja ja'lewe. Ka at il ti'j, chin cymeela tu'n woc lpeya ti'ja—tzi Pedro.

³⁸ Aj ttzak'be'n Jesús te Pedro:

—¿Jaxpa tu'na cymela tu'n toc lpeya wi'ja? Jaxxix cxe'l nkba'na tey, te mitkna'x kskix, oj took' jun coo', tu'n t'zi ti'ja otktzen tkbay oxo maj min ttzki'na nwitza—t'zixin te Pedro.

14

Ja Jesús jbe tuya Dios

¹ Tu'n tcywix cyc'u'j t-xnak'atz Jesús, e xi' tkba'nxin cyexin:

—Nim nchi bisena ti'j ti pjel, pero mi'n tzaj t'zi cyi'ja. C'oquel ke cyc'u'ja ti' Dios bix jax ju'x wi'ja. ² Tuj tnajbil Nmana at nim lugar te cyey. Nuket mintii', matle txi' nkba'na cyey. Pero tneelxix, il ti'j tu'n nneja jkolte najbil cywitz. ³ Bix ka ma chin aja jkolte cynajbila, jax chin ul meltz' aja junl maj, bix cxe'l nchmo'na ejee'y, cuma waja tu'n cytena junx wuyena. ⁴ Yal tzunj be ctzyetel wu'na, n-el cyni'ya ti'j alcyey be—tzi Jesús cye t-xnak'atzxin.

⁵ E xi' tkba'n Tomás texin:

—Taat, min ktzki'na jaa' cxe'ley. ¿Titzen tten q'uelel kni'ya ti'j alcyey be ctzyetel tu'na? —tzi Tomás.

⁶ Aj ttzak'be'nxin:

—Inayen weja jbe. Inayen weja jjaxxix. Inayenja k'ol cychunk'lala te junx maj. Nuk wu'na at cyoclena tu'n cypona tuya Nmana. ⁷ Nuket el cyni'ya ti'j alcye kena bix alcyej il ti'j tu'n tbint wu'na, jaxettzenle ma tz'el cyni'ya ti'j Nmana bix ti tajxin. Pero te ja'lewe q'uelel cyni'ya ti'jxin, bix q'uelel cyni'ya ti'j ya ma cyila jaxin—tzixin.

⁸ E xi' tkba'n Felipe texin:

—Taat, yeec'antz Tmana keya, tu'n toc kcyey'ena. Oj toc kcyey'ena jaxin, mintii'tl kaja —tzi Felipe.

⁹ E xi' tkba'n Jesús te Felipe:

—Nim k'ij ma chin tena cyuyey, Felipe. *¿Mimpana'x tel tni'ya ti'j alcye kena? Ka ma tz'oc ccyey'ena inayena, jax ma tz'oc ccyey'ena Nmana, cuma inayen weja jyec'bil ti tten Nmana. ¿Tikentzen ntzaj tkanena weya: “Yeec'antz Tmana keya?” tziy.* ¹⁰ *¿Mimpa tocslay ka junx kena tuya Nmana bix junx ta' Nmana wuyena? Kej yol nxi' nkba'na te cyeey nrxnak'atza, yaa'n wexwe nyol, sino tyol Nmana at wuyena. Bix jnbint wu'na, yaa'n tu'n wexwe wipemal, sino tu'n tipemal Nmana—tzi Jesús te Felipe.*

¹¹ Bix e xi' tkba'ntlxin cye t-xnak'atzxin:

—Cyocslama nyola ka junx kena tuya Nmana bix junx ta' Nmana wuyena. Pero ka ccyey'iy tu'n cyocslana wi'ja tu'nj nyola, chi ocslana wi'ja tu'n wipemala ma txi' nyee'ana cyeey. ¹² Jaxxix cxe'l nkba'na cyeey, ka ma tz'oc ke cye'ya wi'ja, j-ak'untl ma bint wu'na tuya tipemal Nmana, jax cbinel cyu'na. Bix jun ak'untl mas jawnex mina'x tbint wu'na cbinel cyu'na, cuma weya, chin aala tuya Nmana. ¹³ Bix oj waja, alcyej cxe'l cykanena te Nmana, ka junx cykanbila tuya wajbila, cbinel wu'na, cuma waja tu'n tjaw nimset tbi Nmana tu'nj nbint wu'na, inayena Tcwal. ¹⁴ Jax wu'na. Alcyej cxe'l cykanena, ka junx cykanbila tuya wajbila, cbinel wu'na.

Ctzaal tsmā'n Dios Espiritu Santo

¹⁵ Ka ma tz'oc wak'a cyeey, chi nimala nyola. ¹⁶ Bixsen cxe'l nkanena te Nmana tu'n ttzaj tsmā'nxin juntl Onlte cyeey. Ctzaal tsmā'nxin, bix ctemel cyuyey te junx maj. ¹⁷ Ja Espiritu Santo ja tzunja Onlte cyeey, bix cxe'l t-xnak'tza'n alcyej jaxxix cyeey. Pero kej xjal te twitz tx'otx', mlay k'oj Espiritu Santo cye, cuma ccyey'iy jaxin, bix n-el cyi'iy'uen jaxin. Pero cyeey, cytzki'na jaxin, cuma at-xin cyuyey. Bix mas yaj ctemelxin tuj cyanema. ¹⁸ Mi'n chi cyaja cyjunala.

Jax ju'x weya, chin ultla cyuyey. ¹⁹ Nuk ch'intl chin temela twitz tx'otx', bix mlay chin oc ccyey'yentl xjal te twitz tx'otx'. Pero cyeey, chin oquel ccyey'ena juntl maj oj njaw itz'ja tuj cyamecy. Bix cuma chin jawel itz'ja juntl maj, jax ju'x cyeey, chi jawel itz'ja juntl maj. ²⁰ Bix oj njaw itz'ja tuj cyamecy, q'uelel cyni'ya ti'j ka junx kena tuya Nmana, bix junx kena cyuyey, bix junx ete'y wuyena.

²¹ Ka ma tz'oc cybi'na nyola, n-octzen wak'a cyeey. Bix ka ma tz'oc wak'a cyeey, c'oqueltzen cyak'a te Nmana. Bix jax ju'x weya, c'oquel cyak'a weya, bix chin temela cyuyey tu'nj Espiritu Santo—tzi Jesús.

²² Bix e xi' tkanen Judas texin, yaa'n Judas Iscariote:

—Taat, ¿ti ma baj? Ka at tu'n tco'pana ktanem, ¿tikentzen ctzaal tyee' an tiiba nuk kwitza, bix yaa'n cywitz cykil xjal?—tzi Judas.

²³ Aj ttzak'be'n Jesús:

—Mintii' nmojbabla cyuyaj xjal ccyey'iy tu'n toc cybi'na nyola. Alcye kej xjal ma tz'oc wak'a cye, n-octzen cybi'na nyola. Bix c'oquel cyak' te Nmana, bix junx tuya Nmana ko temela cyuyaxin. ²⁴ Pero alcye kej xjal min tz'oc wak'a cye, jax mi'n tz'oc cybi'na nyola, bix mi'n chin tena cyuya. Kej yol lu ma txi' nkba'na cyeey, yaa'n wexwe nyola, sino tyol Nmana e tzaj tsmā'n inayena.

²⁵ Tej ntena tzalu cyxola, nim nrxnak'tzbila ma cyaj nk'o'na cyuyey. ²⁶ Bix oj tul J-onlte cyeey, cxe'l ttx'olba'n cykilca te cyeey, tu'ntzen tcyaj tuj tzinen jma txi' nrxnak'tza'na cyeey. Ctzaal tsmā'n Nmana Espiritu Santo te nxela, bix tu'n tzul cykilca nyola tuj cye'ya.

²⁷ Cxe'l nk'o'na cyeey tu'n tten cyanema tuj ttzjal. Cyxol xjal te twitz tx'otx', n-oc cyipen ti'j tu'n cyten tuj txubtx, pero mintii' jaa' tu'n toc ke cye'ya. Pero weya, tuya wipemala nxi' nk'o'na cyeey tu'n ccyajaja tuj txubtx. Ju' tzun, mi'n baj cye'ya. Mi'n tzaj ttzi ti pjel cyi'ja.

²⁸ Jatxe may' xi' nkba'na cyeey: “Chin xe'la, bix chin ul meltz'aja,” ntziya. Nuket oc wak'a cyeey tuya cykil cye'ya, matle chi jaw tzalaja tej xi' nkba'na chin xe'la tuya Nmana, cuma te weya, jun nin xtalbil tu'n ntena tuya Nmana, cuma mas jawnex Nmana nwitzta. ²⁹ Ma txi' nkba'na cyeey te mitkna'x tbaj ti pjel wi'ja, tu'ntzen tcywix cyocslabla wi'ja oj tbaj.

³⁰ Yaa'n nimitlxix chin yolela cyuyey, cuma ch'ix tpon tumel tu'n tul taaw il, jxjal ncawen tibaj twitz tx'otx' ja'lewe. Taj tu'n tpon baj nk'ija, pero mintii' tipemal wibaja. ³¹ Pero amale mintii' tipemal taaw twitz tx'otx' wibaja, pero chin oquela tjak' jctbincha wi'ja, tu'n

nnimana tyol Nmana, tu'ntzen tel cyniy' cykil xjal ti'j n-oc tak' Nmana weya. Chi we'wetzen cyey. Ko'tzen tzalu—tzi Jesús cye t-xnak'atzxin.

15

Ja Jesús tisen jun jaxxix tken lo'pj

¹ Tej cyetz Jesús, e xi' tkba'ntlxin cye t-xnak'atzxin:

—Cxe'l nkba'na jun techel cyey. Inayena tisen jun jaxxix tken lo'pj te uva. Bix Nmana taaw tken uva. ² Bix ejee'y tisen kej tk'ab toc wi'ja. Kej tk'ab uva toc wi'ja, ka min ma cyak' twitz, q'ueleltzen ttx'oman Nmana wi'ja. Pero kej tk'ab at twitz, q'uelel tii'n Nmana tzkijil cyi'j, tu'ntzen toc mas twitz. ³ Ejee'y tisen kej tk'ab ba'n, cuma ma chi cyaja sak tu'nj yol ma txi' nkba'na cyey. ⁴ Cyk'o'nc cyipena ti'j tu'n cytena junx wuyena, tu'ntzen ntena junx cyuyey. Jun tk'ab lo'pj, ka yaa'n toc ti' tken, mlay tak' twitz. Bix jax ju'x cyey, mintii' ba'n cbinel cyu'na ka min ma chi cyaja junx wuyena. ⁵ Inayen weja tken uva. Cyey, tk'ab uvakey. Ka junx chi temela wuyena, tu'ntzen junx ntena cyuyey, nim cbinel cyu'na. Pero ka ma chi e'lkey wi'ja, mintii' cbinel cyu'na. ⁶ Alcey xjal yaa'n toc wi'ja, ju'tzen ctemela tisen jun tk'ab lo'pj ka min tak' twitz. Nuk q'uelex xe't tk'ab, bix ctzki'l. Bix c'ajbel nuk tu'n tocx cyk'o'n xjal tuj k'ak', tu'ntzen t'aj tz'ey'.

⁷ Ka junxkey wuyena, bix ka ma cyaj nyola tuj cyanema, alcey ma txi' cykanena te Nmana, ctzaal tk'o'nxin cyey. ⁸ Oj t-xi' cyeeec'ana ka nche'x lpey wi'ja tu'nj nim cbinel cyu'na, cjaweltzen nimset tbi Nmana. ⁹ Tisen ma tz'oc wak'a te Nmana, ju'xse weya, ma tz'oc cyak'a weya. Ju' tzunj, mi'n chi e'lkey ti'j tk'ak'bil nc'u'ja cyi'ja. ¹⁰ Ka ma cybiy nyola, ju'tzen chi yeeec'ala n-oc wak'a cyey, tisenx ma txi' nyeeec'ana n-oc tak' Nmana weya tu'nj e nbiya tyol.

¹¹ Ka ma tz'oc cybi'na kej yol lu ma txi' nkba'na cyey, chi tzalajela tisen weya nchin tzalaj. Waja tu'n tten jun cytzalajebja jawnex.

¹² Cxe'l nk'o'na juntl yol cyey. C'oquel cyak' cyuyey cyey, tisen ma tz'oc cyak'a weya. ¹³ Mlay txi' tyeec'an jun xjal jun tk'ak'bil tc'u'j mas jawnex twitz tu'n t-xi' tk'on tiib tu'n tcyim, tu'n ttelet jun tuya tu'n. ¹⁴ Cyey, wuyakey ka ma cybiy nyola. ¹⁵ Mi'n tz'oc nk'o'nla cybiy nuk ak'anal, cuma min tz'el tniy' jun ak'anal ti'j ti niy' tuj tc'u'j tpatrón. C'oquel nk'o'nla cybiy wuyena, cuma cykilca ma tzaj tkba'n Nmana weya, ma txi' nkba'na cyey, tu'ntzen tel cyni'ya ti'j ti niy' tuj tc'u'jxin. ¹⁶ Yaa'n ejee'y e kbante tu'n cyak'anana junx wuyena, sino inayena e jaw scy'onte cyey, bix ma txi' nk'o'na cyaak'ena, jaj tu'n cyxi'y kbalte cye xjal tu'n cyocslan wi'ja. Jaj ak'untl lu tisen jun awal mlay cub baj. Bix cuma ma txi' nk'o'na ja cyaak'ena lu, ju' tzunj alcey cxe'l cykanena te Nmana, ctzaal tk'o'nxin cyey.

Q'uelel cyiiq'uen xjal kej ocslal

¹⁷ Juntl maj cxe'l nkba'na cyey, tu'n cybintey nyola, c'oquel cyak' cyiiba cyey. ¹⁸ Kej xjal ete' tjak' tcawbil taaw twitz tx'otx', q'uelel cyiiq'uen ejee'y. Bix oj cyel cyiiq'uen ejee'y, q'uelel cyni'ya ti'j o tz'el cyiiq'uen inayena nejl cywitza. ¹⁹ Nuket junx cynaabla tuyaj cynaabl xjal te twitz tx'otx', n-oqueltzele cyak'a cye, cuma junxseke cyuyey. Pero yaa'n junx cynaabla tuya cynaabl xjal te twitz tx'otx'. Ma jaw nscy'o'nkey tu'n tel cypa'n cyiiba cyi'j. Ju' tzunj, q'uelel cyiiq'uen ejee'y. ²⁰ C'oquel cyc'u'ja ti'j jun yol xi' nkba'na cyey nejl. Yaa'n jun ak'anal mas jawnex twitz tpatrón. Ju' tzunj, ka ma chi k'o'jl xjal wi'ja, jax chi k'o'jlel cyi'ja. Pero jax at juun o cybi nyola. Jax ju'x cyey, at juun c'oquel cybi'n cyyola. ²¹ Kej xjal ccy'yi jweya nyol, chi yajlal cyi'ja nuk tu'n t'aj lepcheckey wi'ja. Bix ccy'yi inayena cuma ccy'yi Díos e tzaj tsma'n inayena. ²² Kej xjal te twitz tx'otx', nuket min in tzaja tu'n t-xi' n'xnak'tza'na alcey kena, minttzenle el cyxoo'n inayena. Pero in tzaja, bix ju' tzunj mlaytl txi' cykba'n min tz'el cyniy' ti'j, cuma o tz'oc cybi'n nyola, bix ccy'yi. ²³ Alcey ma tz'el tiiq'uen inayena, jax n-el tiiq'uen Nmana. ²⁴ Nuket min in tzaja cyxol xjal te twitz tx'otx' bix e xi' nyeeec'ana wipemala, minttzenle e xi' cyxoo'n nyec'bila. Min-al juntl o binchan jma bint wu'na cyxol. Pero amale e xi't ccy'ye'yen nbinchbena, pero ccy'yi inayena. Tejzen t-xi' ccy'ye'yen inayena, jax ju'x e xi' ccy'ye'yen Nmana. Ju' tzunj, tej tel cyiiq'uen inayena, jax el cyiiq'uen Nmana. ²⁵ Amale e cyilet wipemala, pero el cyxoo'n inayena. Ju'tzen ma tz'el jax jun yol tz'i'ben tuj ley te Díos e k'o'j cye. Tzi cyjulu: “Amale c'oqueltzele ccy'ye'yen wipemala, pero q'uelel cyiiq'uen inayena.” tzi tyol Díos.

²⁶ Cxe'l nsma'na Onlte cyey. At tuya Nmana. Ja Espíritu Santo, bix ju' ctzaal tuya Nmana. Jtaak'en tu'n tchic'ajax alcey jaxxix. Oj tul, c'ak'analtzen tuj cyanem xjal tu'n tcyaj tuj tzinen alcey kena. ²⁷ Jax ju'x cyey, chi k'umela cye xjal wi'ja, cuma o chi tena wuyena jatxe tej wak'a ak'anal—tzi Jesús cye t-xnak'atzxin.

16

¹ Bix e xi' tkba'ntl Jesús cye t-xnak'atzxin:

—Ma txi' nkba'na cyey q'uelel cyiiq'uen xjal ejee'y bix ma txi' nkba'na cyey tzul Espíritu Santo te onlte cyey, tu'ntzen mi'n cyaj cyk'o'na cyocslabla wi'ja. ² Q'ueletz cylojo'n xjal ejee'y cyuj camon jaa' te xnak'tzbil ti' tyol Dios. Jax wu'na, tzul jun k'ij cwel cybyo'n xjal ejee'y cuma tuj cywytz nchi onen ti' Dios. ³ Cbinel cyu'n ju'wa cuma cyyi' t'zel cyniy' ti'j Nmana bix wi'ja. ⁴ Ma txi' nkba'na cykilcaj lu cyey, tu'ntzen tul nyola tuj cyc'u'ja oj tpon k'ij tu'n cyk'ojl xjal cyi'ja.

Taak'en Espíritu Santo

Min e xi' nkba'na jumel lu cyey nejl, cuma mitkna'x tpon k'ij tu'n waja. ⁵ Pero ja'le chin xe'la tuya Dios e tzaj tasma'n inayena. Pero jey', min-al jun cyey ma tzaj tkanena weya: “¿Jaa' ma txa'y?” ⁶ Min nchi bisena wi'ja, sino nuk nchi bisena ma noj tuj cyanema tuya bisbajil tu'nj nyola cyey. ⁷ Pero jaxxix cxe'l nkba'na cyey, mas ba'n te cyey tu'n nxi'ya. Ka min ma chin aja, mlaytzen tzul Onel cyuyey. Pero ka ma chixa, ctzaaltzen nsma'na cyuyey. ⁸ Bix oj tul, cxe'l tyeec'an cye xjal te twitz tx'otx' at cyil, bix ti tten tu'n t-xi' cyii'n cychunk'lal jiquen twitz Dios, bix cwel cycastiwa ka min ma chi oc jiquen twitz Dios. ⁹ At cyil, cuma min ma chi ocslan wi'ja. ¹⁰ Bix cuma chin pomela tuya Nmana, ya mi'n cyitla inayena. Pero c'ak'analtzen Onlte cyey te nxela tu'n t-xi' tyeec'an cye xjal ti tten tu'n t-xi' cyii'n cychunk'lal jiquen twitz Dios. ¹¹ Bix cuma o tkba Dios at tu'n tcub tcastiwa taaw twitz tx'otx', ju' tzunj cxe'l tyeec'an Espíritu Santo cye xjal jax cwel cycastiwa cykilca aj il.

¹² At nimtl waja tu'n t-xi' nkba'na cyey, pero mlay chi camana tu'n tel cyni'ya ti'j ja'lewe. ¹³ Pero n-el tniy' Espíritu Santo ti'j cykilca jaxxix, bix oj tul, cxe'ltzen tonen ejee'y, tu'ntzen tel cyni'ya ti'j jaxxix yol. Yaa'n tex tyol cxe'l tkba'n, sino cxe'l tk'o'n jyol ma tzaj tkba'n Nmana te. Bix cxe'l tyeec'an cyey ti' pjel mas yaj. ¹⁴ Cjowel tnmisa'n nbi'ya, cuma weya nyol cxe'l ttx'olba'n cyey, tu'n tcyaj tuj tzinen cykilcaj ma txi' nkba'na cyey. ¹⁵ Junx nnaabla tuya tnaabl Nmana. Ju' tzunj, tumel tu'n t-xi' nkba'na cyey cxe'l ttx'olba'n Espíritu Santo ti' elpenina jma txi' nkba'na cyey, cuma junx ta' nyola tuya tyol Nmana.

Jaj cybisa c'oquel te tzalajeb!

¹⁶ Nuk ch'intl chin temela cyuyey, bix mlay cyitla inayena. Pero tuj juntl rato c'oquel cyye'yena inayena juntl maj—tzi Jesús cye t-xnak'atzxin.

¹⁷ Yal kej t-xnak'atzxin, cuma min el cyniy'xin ti'j tyolxin, ju' tzunj at juun e xi' cykanenxin cyxolxxin:

—Yaa'n telniy' kej yol lu ma tzaj tkba'n taat ke. ¿Tikentzen tzin tkba'naxin ju'wa: “Nuk ch'intl chin temela cyuyey, bix mlay cyitla inayena. Pero tuj juntl rato c'oquel cyye'yena inayena juntl maj,” t'zixin? ¿Bix tiken tzin tkba'naxin ju'wa: “Chin pomela tuya Nmana,” t'zixin? ¹⁸ ¿Ti japenina ja yol “nuk ch'intl chin temela cyuyey”? ¿Ti tten tu'n tel kniy' ti'j tyolxin?—tzikexin.

¹⁹ Eltzen tniy' Jesús ti'j e cyajbe t-xnak'atzxin tu'n t-xi' cykanenxin texin tu'n tcyaj tyolxin mas tuj tzinen. Ju' tzunj, e xi' tkba'nxin cyexin:

—¿Tikentzen nchi kanena cyxola ti japenina nyola tej xi' nkba'na cyey: “Nuk ch'intl chin temela cyuyey, bix mlay cyitla inayena. Pero tuj juntl rato c'oquel cyye'yena inayena juntl maj”? ²⁰ Jaxxix cxe'l nkba'na cyey, tuj jun rato chi jawel ook'a tu'n ncyamecya, bix chi tzalajel kej xjal te twitz tx'otx'. Cnool cyanema tuya nim bisbajil, pero c'oquel cybisa te tzalajeb. ²¹ Jbisbajil tzul cyi'ja tisen tchyonel tal jun xuuj. Oj tpon tumel tu'n talenxuj, nbisenxuj, cuma nim q'uixc'aj q'uuiyel tu'nxuj. Pero oj titz'j talxuj, mi'ntl tzul tu' tc'u'jxuj iy'x q'uixc'aj tu'nxuj, cuma ctzalajelxuj ti'j ma tz'itz'j talxuj twitz tx'otx'. ²² Jax ju'x cyey, il ti'j tu'n tiy'x q'uixc'aj cyu'na ja'lewe. Pero chi wila'ya juntl maj, bix cnool cyanema tuya tzalajeb, bix min-al q'uelel ti'i'n cytzalajeb la tuj cyanema. ²³ Tuj tzunj k'ij te cytzalajeb la, q'uelel cyni'ya ti'j, bix mlay cykanetla weya ti japenina nyola.

Jaxxix cxe'l nkba'na cyey, alcyey cxe'l cykanena te Nmana, ctzaal tk'o'nxin cyey, ja junx ta' cykanbila tuyaj wajbila. ²⁴ Nejl, min ma txi' cykanena texin tuya jun cynaabla junx ta' tuya wajbila. Cykanenx, tu'ntzen tk'ontexin cykanbila, tu'n tnoj cyanema tuya tzalajeb.

Jun yaa'n ba'n at twitz tx'otx' ma cub ti'j tu'n Jesús

²⁵ Kej yol ma txi' nkba'na cyey, e'wen ch'in ta'. Pero tzul jun k'ij oj t-xi' nkba'na cyey tujxix tzinen ti tten Nmana, bix q'uelel cyni'ya ti'jxin. ²⁶ Tuj tzunj k'ij oj tel cyni'ya ti'j Nmana, cxe'l cykanena wajbila te Nmana. Bix ctk'a'xin cykanbila, yaa'n nuk cuma cxe'l nkanena texin te cyxela, ²⁷ sino cuma jax texin at tk'ak'bil tc'u'j cyi'ja. N-oc cyak'a texin cuma ma tz'oc wak'a cyey, bix ma chi ocslana ti'j nyola ka tuya Dios in tzaja. ²⁸ In tzaja tuya Nmana, bix in ula twitz tx'otx'. Pero ya cyjel nk'o'na twitz tx'otx', bix chin aala tu'n npona tuya Nmana juntl maj—tzi Jesús cyexin.

²⁹ E xi' cykba'n t-xnak'atzxin texin:

—Jey', ja'lewe nyolena tuj tzinen bix yaa'n tuj ewjel. ³⁰ Bix ktzki'na at cykil tumel tuyey. N-el tni'ya ti'j ti niy' tuj cyc'u'j xjal, tu'ntzen mintii' il ti'j tu'n t-xi' tkanena ti cyaj tu'n tel cyniy' ti'j. Ju' tzunj, nxi' kocsla'na ma tzaja tuya Dios—tzikexin.

³¹ E xi' tkba'n Jesús cyexin:

—¿Jaxpa cyu'na nchi oclana wi'ja? ³² Jey', ch'ixc'a tpon hora tu'n tcyaj cycye'yena inayena. Chi elel tztija. Teeylex juun cyey cxe'l tii'n tbe. Pero yaa'n njunala chin cyjela, cuma at Nmana wuyena.

³³ Kej yol lu ma txi' nkba'na cyey tu'n cyocslana wi'ja, tu'ntzen cytena tuj ttzyal. Twitz tx'otx' c'oquel nim pena cyl'ja, pero mi'n baj cyc'u'ja, cuma inayena chin camal túbaj twitz tx'otx'—tzi Jesús cye t-xnak'atzxin.

17

Tej tna'n Jesús Dios cyi'j t-xnak'atzxin

¹ Tejzen tñaj tkba'n Jesús cye t-xnak'atzxin, e jaw tcyey'yen twitz cya'j, bix e xi' tkba'nxin te Tmanxin:

—Taat, ma pon hora tu'n ncyima, inayena, Tcwala. K'ontz weya tu'n tñint ncyamecya wu'na, tu'ntzen tñaw nimset tñiy tu'nj ncyamecya. ² Chin tonentza tu'n ncyima, cuma tuj ncwenta ma tzaj tk'o'na cykil xjal. Te weya ma tzaj tk'o'na j-ak'untl tu'n t-xi' nk'o'na cye xjal cychunk'lal te junx maj, bix nuk wu'na chi cletel kej xjal ma tzaj tk'o'na weya tu'n t-xi' nk'o'na cychunk'lal. ³ At cychunk'lal xjal te junx maj nuk tu'nj cyocslabl ti'j o'cx jay jaxxix Dios bix wi'ja, inayena Jesucristo, jxjal ma tzaj tsma'na cyoxl xjal. ⁴ Ma bint wu'na j-ak'untl e tzaj tk'o'na weya tu'n tñint twitz tx'otx', bix tu'nj jlu, ma jaw nnumsa'na tñiy. ⁵ Bix cuma ma bint waak'ena twitz tx'otx', ju' tzunj k'ontz weya tu'n woca te jawnex juntl maj, tisenx tej ntena tuj tneel tuyey tej mitkna'x tñint twitz tx'otx'.

⁶ Yal kej xin nxnak'atza etz tscy'o'na cyoxl xjal tuj twitz tx'otx', ma txi' nyeeec'ana cyexin ti tten tnaabla. T-xjalke xina, bix e tzaj tk'o'na ejee' weya, bix ma chi oclan ti' tyola. ⁷ Ma tz'el cyniy'xin ti'j kej yol ma txi' nkba'na bix jwipemala ma txi' nyeeec'ana tuyey e tzaa'. ⁸ Ma txi' nkba'na cyexin nuk jyol e tzaj tk'o'na weya, bix ma txi' cyocsla'nxin, bix ma tz'el cyniy'xin ti'j tuyey in tzaa'ya, bix jax tcy e tzaj tsma'na inayena.

⁹ Chin cubsal nwitza tcy nuk cyi'j nxnak'atza ma chi jaw tscy'o'na, cuma tcy t-xjalke xina. Yaa'n cyi'j xjal te twitz tx'otx' chin cubsal nwitza tcy ja'lewe. ¹⁰ Tey t-xjalke xina, cuma cykilcaj xjal at te weya, jax at te tcy. Jax cykilcaj xjal at te tcy, atzen te weya. Bix cyu'nj nchi oclan wi'ja, ma jaw nimset nbi'ya.

¹¹ Taat, ma pon tumel tu'n tcyaj nk'o'na twitz tx'otx', tu'n npona tuyey. Pero kej nxnak'atza, chi cyjel tzalu twitz tx'otx'. O chi tzaj tk'o'na xina weya. K'ontz tc'ojlabla cyexin, tu'ntzen junx ctemel cynaablxin, tisenx junx ko'. ¹² Tej nbeta tzalu twitz tx'otx' cyuyaj nxnak'atza e tzaj tk'o'na weya, e xi' nxnak'tza'na cyexin tu'n cyoc lpxin ti' tyola. Min-al cyexin ma txi' tuj il. Nuk jaj xjal at tu'n t-xi' tuj castiwa ma tz'oc tuj tk'ab il, tu'ntzen tel jaj tyol Dios te ootxa.

¹³ Pero ya ma pon tumel tu'n npona tuyey. Pero jooc'tzen nchin tena twitz tx'otx', nchin cubšana nwitza tcy cyi'jxin. K'ontz cyexin tu'n tnoj cyanemxin tuya jun jawnex cytzalajblxin, tisen at ntzalajebla. ¹⁴ Ma txi' nk'o'na tyola cyexin. Ju' tzunj q'uelel cyiiq'uen kej xjal te twitz tx'otx' ejee'xin, cuma yaa'n junx cynaablxin tuyaj cynaabl xjal te twitz tx'otx', tisen weya yaa'n junx nnaabla tuyaj cynaabl xjal te twitz tx'otx'. ¹⁵ Min chin cubšana nwitza tcy tu'n tetz tii'na ejee'xin cyoxl kej xjal q'uelel cyiiq'uen ejee'xin, sino tu'n tc'ojlana ejee'xin tu'n mi'n chi cub tz'axkin tuj tk'ab taaw il. ¹⁶ Yaa'n junx cynaablxin tuyaj cynaabl xjal te twitz tx'otx', tisenx weya yaa'n junx nnaabla tuyaj cynaabl xjal te twitz tx'otx'. ¹⁷ Pa'melkexin te tcy, tu'n cyajbenxin tu'n cyk'umenxin jaxxix tyola, cuma nuk tcy tyola jaxxix. ¹⁸ Tisenj tej ttzaj tsma'na inayena twitz tx'otx' tu'n nk'umena tyola, ju'x xsunj cxe'l nsma'na ejee'xin cyoxl cykilca xjal tu'n cyk'umen jyol jaxxix. ¹⁹ Ma txi' nk'on wiiba tu'n tñint tñijela wu'na, te jun techel cyexin ti tten tu'n cyajbenxin tuya cykil cyc'u'jxin tuj taak'ena.

²⁰ Taat, yaa'n nuk cyi'j nxnak'atza cxe'l ncubsa'na nwitza tcy, sino cyuyaj cykilca kej xjal chi oclan wi'ja oj t-xi' cyk'umenxin npocbala. ²¹ Nxi' ncubsa'na nwitza tcy tu'n cyoc te junx cykilca kej xjal chi oclan wi'ja. Taat Nmana, tisenx junx ta'y wuyena bix junx kena tuyey, chi ocxit junx cykilca oclan tu'nj chi oc junx kuya, cuma oj toc cycye'yen kej xjal yaa'n oclan ka junxke, q'uelelzen jax tuj cywiz ma tzaj tsma'na inayena. ²² Tisenx ma tzaj tk'o'na tnaabla weya, jax ma txi' nk'o'na tnaabla cye, tu'ntzen junx ten cynaabl, tisenx junx ko'. ²³ Ma txi' nk'o'na cye tu'n junx ctemel nnaabla cyuya, tisenx junx ko', tu'ntzen

junx ten cynaabl tuya jun cymojbabl cyyib tz'aklxix, tu'ntzen tel cyniy' xjal yaa'n ocslal ti'j e tzaj tsma'na inayena, bix ti'j ma tz'oc cyak' tey tisenx n-oc wak'a tey.

²⁴ Taat, kej ocslal wi'ja ctzaal tk'o'na weya, waja tu'n cyten wuyena jaa' chin pomela, tu'ntzen t-xi' cyye'yen jjawnex wipemala ma tzaj tk'o'na. Cxe'l ncubsa'na nwitzat ey ju'wa, cuma ma tz'oc wak'a tey jatxe tej mitkna'x tbint twitz tx'otx'.

²⁵ Taat, jiquentey te junx maj. Min cytzki'n kej xjal te twitz tx'otx' ti tten tnaabla. Pero weya, n-el nni'ya ti'ja. Bix kej xjal lepchecke wi'ja ma tz'el cyniy' ti'j e tzaj tsma'na inayena. ²⁶ Ma txi' nyeeec'ana cyexin ti tten tnaabla, bix cxe'l nyeeec'antla, cuma waja tu'n toc cyak' cyuya cye tisenj n-oc wak'a tey. Bix waja tu'n woca junx cyuya—tzi Jesús te Tmanxin.

18

Tej tjaw ttzyet Jesús

(Mt 26:47-56; Mr 14:43-50; Lc 22:47-53)

¹ Tejzen tbaj na'n Jesús Dios, etzxin tuj Jerusalén tuya t-xnak'atzxin, bix e ponkexin jlajxe jnima' Cedrón tbi. Bix occkexin tuj jun awal te lo'pj.

² Yaltzen te Judas, otk txi' te q'ueylte Jesús. Ttzki'nxin jaa' e tena Jesús, cuma nim maj otk tz'oc cychmon cyyib Jesús cyuya t-xnak'atz awal lu tu'n cywutanxin. ³ Ju' tzunj, te tzunj koniyan e pon Judas tuj awal cyuya nimxsen soldado te Roma bix cyuyaj c'ojlal tja Dios otk txi' cysma'n kej nejenel cye pala bix kej xjal fariseo. E xi' cyii'nxin lampara bix tzaj bix cymacbilxin te k'oj.

⁴ Eltzen tniy' Jesús ti'j otk pon tumel tu'n tbint tcyamecyxin tu'nxin. Ju' tzunj, e pon lk'exin cywitz soldado, bix e xi' tkba'nxin cyexin:

—¿Al tzin cyjyo'na?—tžixin.

⁵ —Nko jyona Jesús, aj Nazaret—tžikexin.

Bix e xi' tkba'nxin cyexin:

—Inayena jxjal nchi jyona ti'j—tžixin.

Bix at Judas, j'q'ueyl texin, cywitz c'ojlal tja Dios bix soldado.

⁶ Tejzen t-xi' tkba'n Jesús “inayena” cye soldado, el lk'ekexin bi'x e pjiy' tz'akkexin twitz tx'otx'. ⁷ Ju' tzunj e xi' tkanen Jesús juntl maj cyexin:

—¿Al tzin cyjyo'na?—tžixin.

—Nko jyona Jesús, aj Nazaret—tžikexin.

⁸ Bix aj ttzak'be'n Jesús:

—Ma txi' nkba'na cyeey ka inayena jxjal nchi jyona ti'j. Katzen inayena, cytzakpinxna ke nxnak'atza tu'n cyex libre—tžixin. ⁹ tu'ntzen tjanen baj jyol otk txi' tkba'nxin te Dios: “Min-al nxnak'atza e tzaj tk'o'na tuj nk'aba ma txi' tuj il.”

¹⁰ Yaltzen te Simón Pedro, k'i'n jun machet tu'nxin tcu'x tuj tjayel. Tej tlontexin tu'n ttzyet Jesús, e jatz ti'nxin tmachet-xin, bix e xi' tjubacxin tmachet-xin ti' twi'jxin Malco, bix el jun tžiquinxin te tmank'abxin. T-xel jxin pala mas jawnex ja Malco. ¹¹ Pero e xi' tkba'n Jesús te Pedro:

—K'onc'ax tmacheta tuj tjayel. Ja q'uixc'aj ma tzaj tk'o'n Nmana weya tu'n tiy'x wu'na, q'uuyex wu'na—tzi Jesús.

Tej tpon k'i'n Jesús twitz tneel pala

(Mt 26:57-58; Mr 14:53-54; Lc 22:54)

¹² Bix e xi' tzyet Jesús tu'n capitán bix ke soldado bix kej judío c'ojlal tja Dios, bix oc cyxpo'nxin tk'abxin tzalti'jxexin. ¹³ Bix e xi' cyii'nxin jaxin tuj tja Anás. E ponkexin tuya Anás nejl, cuma at nim tipemal tyol Anás tibaj jtneel pala, cuma tjii'xin tneel pala. ¹⁴ Caifás jaj xin tneel pala otk txi' tkba'n cye judío ka mas ba'n tu'n tcyim jun xjal te cyxel cykil xjal.

Tej tel ti'i'n tiib Pedro ti'j Jesús

(Mt 26:69-70; Mr 14:66-68; Lc 22:55-57)

¹⁵ Tejzen t-xi' cyii'n soldado ja Jesús, e xi' lpe Simón Pedro ti' Jesús, pero nakch ch'in. Bix at juntl t-xnak'atz Jesús e xi' lpe ti' Jesús. Ttzki'n Caifás twitz t-xnak'atz Jesús, bix ju' tzunj e tcuyaxin tu'n tocx ja t-xnak'atz Jesús lu tuj tjaxin tuya Jesús. ¹⁶ Pero min ocx Pedro tunwen. Nuk e cyaj ten ti'jxe tlemel jaa'. Ju' tzunj, jt-xnak'atz Jesús otk tz'oc tunwen cuma ttzki'n tneel pala twitz, etz tuj jaa' tu'n tkanen tej txin c'ojlal ttzii' jaa' tu'n tocx Pedro tunwen, bix e tcuyatxin. ¹⁷ Bix e xi' tkanen jtxin c'ojlal ttzii' jaa' te Pedro:

—¿Yaa'mpatey juntl cyxol t-xnak'atz ja xjal at tunwen?—tžitxin.

—Yaa'n t-xnak'atzxin kenwa—tzi Pedro.

¹⁸ Attzen che'w, bix otk cub cyk'o'n t-ak'anal taaw jaa' bix ke c'ojlal tja Dios jun k'ak'. Wa'leckexin ti' k'ak' nchi mek'en cyyibxin. Tuyax Pedro ocx cyxolxin te mek'l tiibxin.

Tej toc Jesús tuj xkelbil tu'n Anás
(Mt 26:59-66; Mr 14:55-64; Lc 22:66-71)

¹⁹ Yal te Anás, e xi' tkanen te Jesús cyi'j t-xnak'atz bix ti'j t-xnak'tzibil. ²⁰ Bix aj ttzak'be'n Jesús:

—Cywytz cykil xjal ma txi' nkba'na. Cyuj camon jaa' ma txi' nk'o'na nrxnak'tzibila, bix ma txi' nk'umena tyol Dios tuj nintzaj tja Dios, jaa' n-oca cychmon cyiib cykil judío. Mintii' ma txi' nkba'na tuj ewjel. ²¹ ¿Tikentzen ntzaj tkanena weya? At nim tstiwa ma cybi nyola. Kanenx cyexin, tixix tten tuj cyleya. Ba'n cyu'n alcyey ma txi' nk'umena cye xjal—tzi Jesús.

²² Tejzen t-xi' tkba'nxin jlu, oc tloka jun c'ojlal tja Dios twitzxin, bix e xi' tkba'nxin texin: —Mi'n tz'oc t-xmuccha'na jawnex pala—tžixin.

²³ Aj ttzak'be'n Jesús te c'ojlal:

—Ka min ma chin yolena tuj tumel, kbantz weya ti tten ma chin tzpeta. Pero ka tuj tumel nyola, ¿tikentzen n-oc tloka nwitzza?—tžixin.

²⁴ Mix e caman Anás ti' Jesús. Ju' tzunj e xi' tasma'nxin ja Jesús tuya Caifás, tneel pala. Xpo'nx Jesús.

Tej tel tii'n tiib Pedro ti' Jesús te tca'ba maj
(Mt 26:71-75; Mr 14:69-72; Lc 22:58-62)

²⁵ Jatzen Simón Pedro, luxxin wa'lecx ti' k'ak' tu'n tmek't-xin. Bix e xi' cykba'n niy'tl xjal toc ti' k'ak' texin:

—¿Jaanpatey lepchech ti' ja xjal lu?—tžikexin.

Pero tcy'i Pedro jcyvolxin ju'wa, bix e xi' tkba'nxin:

—Yaa'n jaan kenwa—tžixin.

²⁶ Atzen cyxol xjal junxin t-ak'anal tneel pala, titz'en jxin xjal otk tz'el ttx'oman Pedro tžquin. E xi' tkba'n tzunxin te Pedro:

—¿Yaa'mpa ja tey xwila t-xol tken awal tuya Jesús?—tžixin.

²⁷ Pero juntl maj e cubx tewen Pedro tu'n min e tk'umexin. Tzinxix xi'c'a tkba'nxin ju'wa tej took' coo'.

Tej tpon k'i'n Jesús twitz Pilato
(Mt 27:1-2, 11-31; Mr 15:1-20; Lc 23:1-5, 13-25)

²⁸ Tejzen tba'j tkanen Caifás te Jesús, e xi' cyii'n judío ja Jesús twitz pe'n te tja gobernador. Mitkna'x tul k'ij. Tej cypon judío tja gobernador aj Roma, min ocxke tunwen, cuma tuj cyley ka' tu'n tocx jun xjal judío tuj tja jun xjal yaa'n judío. Eltzen cyniy' k'ilte Jesús ti'j ka ma chi ocx tuj tja jun xjal yaa'n judío, otktzen chucj, bix mlayltzen txi' cywaa'n jwaabj te Pascua.

²⁹ Ju' tzunj, etz Pilato, ja gobernador, tuj tja, bix e xi' tkanenxin cye judío:

—¿Alcyey til ja xjal lu tuj cywitzza?—tzi gobernador.

³⁰ Aj cytzak'be'nxin texin:

—Nuket yaa'n binchal ka' jxjal lu, mintle ma tzul kii'na twitza tu'n tcub tk'o'na tcasti-waxin—tžikexin.

³¹ E xi' tkba'n Pilato cyexin:

—Ka ccy'iy tu'n ttzaj cykba'na weya tuj tzinen alcyey tilxin, cyii'nxa, bix cyk'onx tcasti-waxin tisen tzin tkba'n tuj cyexa cyleya—tzi gobernador cye judío.

Aj cytzak'be'nxin texin:

—Jxin lu, il ti'j tu'n tcyim. Pero judío ko'ya, bix yaa'n k'o'n keya tu'n ley te Roma tu'n tcub kbyo'na jun binchal ka'—tžikexin.

³² Tejzen t-xi' cykba'n judío e cyajbe tu'n tcub cybyo'n kej aj Roma ja Jesús, el jax tyol Jesús otk txi' tkba'n nejl, jaj tcyimlel twitz cruz.

³³ Cuma e cyajbe judío tu'n tbyet Jesús tu'n gobierno te Roma, ju' tzunj ocx Pilato tuj tja bix e xi' ttxco'nxin Jesús tu'n tpon twitzxin. Bix e xi' tkanenxin:

—¿Jaxpa cyu'n kej xjal lu ka ja tey jcawel cyibaj judío?—tzi Pilato.

³⁴ Aj ttzak'be'n Jesús:

—¿Tzimpa kanena weya cuma taja tz'el tni'ya ti'j ka nchin k'ojla ti'ja, bix ka cuma ma chi jaw yolen nejenel cye judío wi'ja?—tžixin.

³⁵ Aj ttzak'be'n Pilato:

—Yaa'n jun aj judío kena, bix mintii' il ti'j tuj nwitzza ti nchi yolena ejee'y judío ti'j jun cawel cyxola. Jmas il ti'j tuj nwitzza, jaj tiken njawe cyk'oj tnanema ti'ja. ¿Tikentzen ma tzula cyii'n kej tneel pala nwitzza tu'n tcub nk'o'na tcastiwey?—tzi Pilato.

³⁶ Aj ttzak'be'n Jesús:

—Ma tzaj tkanena weya ka inayena jun cawel. At jun ncawbila, pero yaa'n cyu'n xjal te twitz tx'otx' ma k'oj weya tu'n ncawena. Nuket te twitz tx'otx' ncawbila, matle chi k'oj kej xjal lepchech wi'ja, tu'ntzen mi'n nxi' k'o'na tuj cyk'ab nejenel cye judío. Pero yaa'n te twitz tx'otx' jncawbila ma tzaj k'o'n weya—tzi Jesús.

³⁷ Cuma e yolen Jesús ti'j tcawbilxin, ju' tzunj e xi' tkba'n Pilato texin:

—Jey', jun cawel tzuna—tzixin.

Aj ttzak'be'n Jesús:

—Ju' tzuna. Ma chin ula twitz tx'otx' bix ma chin ul itz'ja tu'n woca te cawel. In ula tu'n t-xi' nk'umena jyol jaxxix. Kej xjal cyaj jaxxix yol, chi oquel lpeke wi'ja—tzi Jesús.

³⁸ Bix e xi' tkba'n Pilato:

—Tuj nwitzá, min cnet jjaxxix yol twitz tx'otx'—tzixin.

Tej tbaj tyol Pilato tuya Jesús, etz Pilato juntl maj tu'n tyolen cyuya judío. Bix e xi' tkba'nxin cyexin:

—Mintii' jun til jxjal lu ma cnet wu'na. ³⁹ Pero at jun costumbre cyxola. Tzin tkba'n costumbre tu'n tel ntzakpi'na jun aj judío tuj tzee' jaca nink'ij te Pascua. ¿Cyajpey tu'n tex ntzakpi'na jxin xjal lu Cycawel ejee'y judío?—tzixin.

⁴⁰ Pero bix e jaw cyši'n xjal:

—¡Yaa'n jxin lu tu'n tetz ttzakpi'na! ¡Tzokpimax jaj xin Barrabás keya!—tzi ke xjal.

Bix ja Barrabás, jun k'ojlel ti' gobierno te Roma.

19

¹ Tejzen cicy'i judío tu'n tetz ttzakpi'n Pilato ja Jesús, e xi' tkba'n Pilato cye soldado tu'n t-xi' cyk'o'nxin tz'u'n toc xcbil twi' ti' Jesús. ² Tej cybaj k'onxin tz'u'n ti'jxin, e baj cybincha'nxin jun pasbil te ch'i'x, bix e cub cycutz'enxin tuj twi'xin, bix oc cyk'o'nxin jun t-xbalen cawel, ³ bix e cub majekexin twitzxin te xmuccchal texin, bix e xi' cykba'nxin: “¡Axsen cycawel xjal judío!” bix oc cylokaxin twitzxin. ⁴ Tbjalxenxetzen Jesús tuj tz'u'n, etz Pilato juntl maj, bix e xi' tkba'nxin cye judío:

—Q'ueletz wii'na ja xjal lu. Nim castiwa k'on texin, tisen cyaja. Pero waja tz'el cyni'ya ti'j mintii' tilxin ma cnet wu'na—tzi Pilato.

⁵ Bix etz Jesús cywitz xjal, tjax jpasbil te ch'i'x tuj twi'xin, bix toc t-xbalenxin xbalen rey. Bix e xi' tkba'n Pilato cye judío:

—Jey', cycye'yenx ja xjal lu. ¿Japale jun cawel jlu?—tzi Pilato.

⁶ Pero tej toc cycye'yen kej nejenej cye pala bix kej c'ojlal tja Dios ja Jesús, min e cub cyi'j tu'n Pilato, sino e jaw cyši'nxin:

—¡K'onwexin twitz cruz! ¡K'onwexin twitz cruz!—tzikexin.

Bix e xi' tkba'n Pilato cyexin:

—Min. Ka cyaja jaw cyk'o'na twitz cruz, cyii'nxa ejee'x cyey, cuma tuj nwitzá mintii' tilxin—tzixin.

⁷ Aj cytzak'be'n ke judío:

—Pero at tilxin. Tzin tkba'n kleya il ti'j tu'n tcyimxin, cuma ma txi' tkba'nxin Tcwal Diosxin—tzi ke judío.

⁸ Tejzen tbinte Pilato yol lu ti'j Tcwal Diosxin, nim ttzi e tzaj ti'jxin. ⁹ Bix ocxxin juntl maj tuj tjaxin, bix e xi' tkanenxin te Jesús:

—¿Japa tey te twitz tx'otx', bix ka ma tzaja te juntl lugar?—tzixin.

Pero mintii' ak' Jesús.

¹⁰ Ju' tzunj e xi' tkba'n Pilato te Jesús:

—¿Mimpa tzaj ttzak'be'na inayena? ¿Mimpa tz'el tni'ya ti'j at wipemala tu'n t-xi' ntzakpi'na jay, bix at wipemala tu'n tcyima twitz cruz?—tzixin.

¹¹ Aj ttzak'be'n Jesús:

—Nuket min otk tzaj tk'o'n Dios toclena tu'n tcawena cyxol xjal, minttzeletii' tipemala wibaja. Jnxi' tbincha'na wi'ja, nbinchana nuk o'cx cuma ma k'oj tey tu'n tcawena. Pero jxin tneel pala, oc tk'on tiibxin tu'n ttzaj tk'o'nxin inayena tuj tk'aba. Ju' tzunj, at mas tilxin twitz jtey til—tzi Jesús te Pilato.

¹² Tej tbinte Pilato kej yol lu, nim e tajbexin tu'n tel ttzakpi'nxin Jesús. Pero tej t-xi' tkba'nxin cye judío at tel-lel ttzakpi'nxin, e jaw cyši'nxin:

—Ka ma txi' ttzakpi'na ja xjal lu, cxe'l kkba'na te rey tuj Roma ka yaa'n junx tey tuya gobierno te Roma, cuma taja tz'el ttzakpi'na jun xjal njaw tii'n tiib ti'j rey tu'n toc te t-xel gobierno—tzi ke judío.

¹³ Tej tbinte Pilato kej yol lu, e tzaj ttzi rey ti'jxin, bix e tcuyaxin jcyajbil judío. Etz tii'nxin Jesús cywitzxin, bix e cub kexin tuj k'ukbil te xkelte tuj jun lugar Xak Xi'nen Tuj tbi, bix ka Gabata tbi tuj cyool judío.

¹⁴ Jatzen k'ij lu, jk'ij oj nbaj cybincha'n judío tik'ch cye te tajbel te juntl k'ij te ajlabl tuj nink'ij te Pascua. Bix otk tz'oc Jesús tuj xkelbil te kak tajlal hora.

Tej tcub ke Pilato, e xi' tkba'nxin cye judío:

—Jey', lu jxjal lu tzin cykba'na cycawela—tzixin.

¹⁵ Bix e jaw cyši'nxin:

—¡Byo'nc'axin! ¡Byo'nc'axin! ¡K'onwexin twitz cruz!—tzikexin.

Bix e xi' tkba'n Pilato cyexin:

—¿Jaxpa cyu'na? ¿Cyajpey tu'n tjaw nk'o'na cycawela twitz cruz?—tżixin.

Bix aj cytzak'be'n nejenel cye pala texin:

—Nuk rey te Roma ncawen kibaja. Min-al juntl—tżikexin.

¹⁶ Tej cyyolen judío ju'wa, e xi' tk'o'n Pilato ja Jesús tuj cyk'abxin, tu'ntzen tbyet.

Tej tjaw k'o'n Jesús twitz cruz bix e cyim

(Mt 27:32-50; Mr 15:21-37; Lc 23:26-49)

¹⁷ Bixsen ex cyii'n soldado ja Jesús ti'jxe tnóm. Jaxse Jesús e xi' kiténte tcruz. E xi'kexin tuj jlugar Tbakel Wi'ybaj tbi, bix ka Gólgota tbi tuj cyyol judío. ¹⁸ Tej cyponxin, e jaw cyk'o'nxin jaxin twitz cruz, cyuyaj ca'batl xinak ttxlajxin. Jatzen Jesús tmij. ¹⁹ Bix tibaj twi'xin e jaw cyk'o'nxin cab letra otk cub ttz'i'ben Pilato twitz jun tzlóm, tu'n tchic'ajax alcye tilxin. Tzi cyjulu: “Jesús, aj Nazaret, Cycawel Judío.” ²⁰ Nim judío e jaw cyši'n kej yol lu, cuma jlugar jaa' otk jawa k'o'n Jesús twitz cruz, nka ttxa'n tnóm, bix tz'i'ben tuj yol hebreo bix tuj yol latín bix tuj yol griego. ²¹ Pero min el ba'n ja letra lu tuj cywitz nejenel cye pala cye xjal judío. Ju' tzunj, e cubsankexin cywitzxin te Pilato:

—Najsama, kaja tu'n tcub tch'ixbe'na jletra. Yaa'n tumel ja yol “Cycawel Judío.” Mas tumel tu'n toc ja yol “Ja xjal lu oc tk'on tiib te Cycawel Judío”—tżikexin.

²² Aj ttzak'be'n Pilato:

—Mlay tu'n tch'ixpet yol. Cyjel jma cub ntz'i'bena—tżixin.

²³ Tej tjaw cypjo'n soldado Jesús twitz cruz, e xi' cytzyu'nxin t-xbalenxin, bix e cub cypa'nxin tu'n tel te cyaja, jun te jaca juun soldado. Jax ju'x e xi' cytzyu'nxin jun t-xbalenxin te nim twe'. Mintii' tz'isbilte, sino te junx plaj cujlec ti'jxin. ²⁴ Ju' tzunj, e xi' cykba'nxin cyxolxxin:

—Mi'n cub krotan tzunj t-xbalenxin, sino nuk tu'n tcub kk'o'n suerte ti'j kla' la' alcye jun ke ccamal ti'j—tżikexin. E baj jlu, tu'ntzen tel jax jtyol Dios tzin tkba'n cyjulu: “Cwel cypa'n xjal nxbalena cyxolx, bix cwel cyk'o'n suerte ti'j tu'n al ccamal ti' nxbalena,” tzi tyol Dios jatxe ootxa.

²⁵ Pero amale oquet ten ke soldado yajlal Jesús, pero ete' nka ti' cruz cyaja xuuj lephec ti'jxin. Tocxse ttxuxin, bix titz'en ttxuxin, bix María, t-xu'l jxin Cleofas, bix xsunj xuj María Magdalena. ²⁶ Jax at nka jt-xnak'atzzin nim oc tak' texin. Tej tlontexin ttxuxin, bix tuyax t-xnak'atzzin, e xi' tkba'nxin te ttxuxin:

—Naa, ja xjal lu c'oquel tisen tala te nxela te c'ojlaltey—tżixin.

²⁷ Bix e xi' tkba'nxin tej t-xnak'atzzin nim oc tak' texin:

—Ja xuuj lu c'oquel tisen ttxuy—tżixin. Bix tex hora e xi' tii'n tzunj t-xnak'atzzin ja María tuj tja te c'ojlal texuj.

²⁸ Mas yaj, tej tel tniy' Jesús ti'j otk bint cykilca tu'nxin tu'n tel jax tyol Dios, e xi' tkba'nxin:

—At tak' a' wi'ja—tżixin.

²⁹ Attzen cyxol soldado jun vaso nojne tuya jun wik vino tx'om ch'in. Bix e cu'x cymu'nxin jun bu's tuj vino, bix oc cyk'o'nxin bu's twi' tk'ab jun wik c'ul hisopo tbi, bix e jax cyk'o'nxin tuj tżixin tu'n tetz ttz'u'benxin vino tuj bu's. ³⁰ Tej t-xi' tc'a'nxin vino, e xi' tkba'nxin:

—Ma bint cykilca waak'ena—tżixin, bix e cu'tz tunntz'aj twi'xin cubne, bix otk txi' tokxenexin tanemxin tuj tk'ab Dios.

Tej tocx lansa ttxa'n t-xuuc' Jesús

³¹ Te tzunj k'ij tej tjaw Jesús twitz cruz, jatzen k'ij te binchal tik'ch cye judío tu'n mi'n chi ak'anan te juntl k'ij te ajlabl. Bix ja tzunj k'ij te ajlabl jun k'ij te ajlabl mas jawnex, cuma tu'n nink'ij te xjan smant. Bix tuj cyley nejenel cye judío, ka'xsen tu'n tjawe jun xjal twitz cruz tuj k'ij te ajlabl. Ju' tzunj, e cubsankexin cywitzxin te Pilato tu'n tñaj cytoken soldado cyken kej oxé xjal tjaw twitz cruz, tu'ntzen mi'n jatztl cyxew, bix tu'n tcu'tz cyii'n soldado cyxumlalxin cyimne twitz cruz. ³² E tcuya Pilato, bix e pon cab soldado, bix e baj cytokenxin ke tken tneel aj il tjaw ttxlaj Jesús. Tñajlen cytokenxin tken tneel aj il, e baj cytokenxin ke tken juntl al il tjaw twitz cruz tuya Jesús. ³³ Pero tej cyponxin ti'j Jesús, e cyilxin ya otk cyimxin. Ju' tzunj, min e baj cytokenxin ke tkenxin. ³⁴ Pero at jun soldado ocx t-xyu'n tñans ttxa'n t-xuuc'xin, bix etz tziy' tuya a' tuj. ³⁵ Inayena, jtz'i'bel tej u'j lu, ncub ntz'i'bena jma chin cye'yena ti'j. Inayena jun tstiwa jaxxix ti'j ti e baj, bix nxi' nkba'na cykilca tuya jaxxix yol, tu'ntzen cyocslana ti'j ja Jesús Jscy'o'n tu'n Dios, ³⁶ cuma ma tz'el jax j-e tkba tyol Dios. Tzi tyol Dios cyjulu: “Mi nuket jun tñakel Jscy'o'n tu'n Dios cwel toket,” tzi tyol Dios. ³⁷ Bix at juntl tyol Dios tzin tkba'n cyjulu: “C'oquel cycye'yen kej xjal judío xjal e jaw cypjo'n,” tzi tyol Dios ti'j Scy'o'n tu'n Dios.

Tej tocx k'o'n Jesús tuj mukbil

³⁸ Attzen junxin xjal José tbi, jun aj tnom te Arimatea. Lepchecxin ti'j tyol Jesús, pero min otk tyec'a tiibxin, cuma at cytzi nejenel cye judío ti'jxin. Tcyimlenxitzen Jesús, e pon José twitz Pilato te kanl te Pilato tu'n ttzaj tk'o'n t-xumlal Jesús te. E tcuya Pilato, bix e pon José jaa' ta' t-xumlal Jesús tu'n t-xi' tii'nxin.

³⁹ Jaan Nicodemo e xi' tuya José, jatzenj Nicodemo otk pon tuya Jesús jun koniyan. Ul tii'nxin nim c'oc'sbil cyi' xjal te c'oc'sbel te Jesús, mirra tbi jun wik c'oc'sbil, bix áloes tbi juntl. Setenta libros talen c'oc'sbil, bix smo'n cyca'bel wik. ⁴⁰ Bix oc cybalk'i'nxin xbalen ti' t-xumlal Jesús tuya c'oc'sbil ti'j, tisex tten cyxol judío oj nmaket jun cyimne.

⁴¹ Nkatzen lugar jaa' otk jawa Jesús twitz cruz, at jun awal te lo'pj, bix cyxol cyken lo'pj at jun ac'aj t'jayer anem twitz xak. Mitkna'x tocx cyimne tuj. ⁴² Bix cyeca nka ta' ja mukbil lu, tu'ntzen at-x tyem tu'n tmaket naj t-xumlal Jesús, cuma ch'itk toc jk'ij te ajlabl, bix xjantzen tu'n cymakunxin cyimne tuj k'ij te ajlabl.

20

Tej t'jatz itz'j Jesús

(Mt 28:1-10; Mr 16:1-8; Lc 24:1-12)

¹ Texlen k'ij te ajlabl, tej tpon tneel k'ij te smant, te mitkna'x tul k'ij, e tzaj jxuj María Magdalena ti' t'jayer Jesús twitz xak. Bix tej toc tcyeyenxuj, otk tz'el k'i'n xak tlemel twitz t'jayer anem. ² Tuj twitzxuj, otk tz'el cyii'n nejenel cye judío t-xumlal Jesús. Ju' tzunj, ajtz kelenxuj cyuya Simón Pedro bix jjuntl t-xnak'atz Jesús, jatzenj t-xnak'atzxin nim oc tak' texin, bix e xi' tkba'nxuj cyexin:

—Ma tz'etz k'i'n t-xumlal Jesús tuj t'jayer, bix mintii' tumel jaa' ma pona cyk'o'n—tzixuj.

³ Tej tbinte Pedro t'pochal min-al Jesús tuj t'jayer, extzen tuyaj juntl t-xnak'atz Jesús, bix e xi'kexin ttzii' t'jayer. ⁴ Junx ajkelenkexin cyca'bel tuj be, pero tuya mas ajkelbil ajkelen jjuntl t-xnak'atz Jesús, bix e pon ttzii' t'jayer Jesús nejl twitz Pedro. ⁵ Bix e cub mutzexin tu'n tocx tcyeyenxin tuj jul, bix e tilxin nuk ejee' tl t-xbalen Jesús oc balk'et ti'j ete'cx, pero min ocxxin tuj jul. ⁶ Bix lepchxe e pon Pedro ti'jxin, bix ocxxin tuj jul, bix oc tcyeyenxin ke xbalen otk cyaj tuj jul. ⁷ Bix jxbalen otk tz'oc balk'et ti' twi' Jesús, yaa'n junx t'cub cyuya niy'tl xbalen, sino t'cub tuj juntl lugar tuj jul, bix baltz'i'n.

⁸ Yal te juntl t-xnak'atzxin, jaj otk pon nejl ttzii' t'jayer cyimne, jax ocxin tuj jul. Tej tlontexin tocx t-xbalen Jesús tuj tumel bix mintii' tl xumlabaj, eltzen tniy'xin ti'j otk jaw itz'j Jesús juntl maj tuj cyamecy. ⁹ El cyniy'xin ti'j jlu tu'nj toc cycyeyenxin t-xbalen Jesús. Yaa'n tyol Dios te ootxa e kbante cyexin, cuma mitkna'x tel cyniy'xin ti'j e tkba tyol Dios ka ilxix ti'j tu'n t'jatz itz'jxin juntl maj tuj cyamecy. ¹⁰ Tej tel cyniy'xin ti'j otk jatz itz'jxin tuj cyamecy, e pon meltz'ajkexin tuj cyposadaxin.

Tej t'jaw jlet Jesús twitz María Magdalena

(Mr 16:9-11)

¹¹ Yaltzen te María Magdalena, e ponxuj ttzii' t'jayer Jesús juntl maj, bix nim oo'kxuj. Bix e cub mutzexuj, tu'n tocx tcyeyenxuj tuj jul. ¹² Bix e tilxuj ca'ba tsanjel Dios tuj cya'j toc cyxbalen sak c'yl'j. K'uklecxkexin jaa' ocxe ten t-xumlal Jesús. Junxin tocx jaa' a ten twi' Jesús, bix juntlxin tocx jaa' a ten ke tkenxin. ¹³ Bix etz cykba'nxin texuj:

—Naa, ¿tikentzen noo'ka?—tzikexin.

Bix aj ttzak'be'nxuj:

—Nchin oo'ka cuma ma tz'ex cyii'n xjal t-xumlal Jcawel weya, bix mintii' tumel wuyena jaa' ma pona cyk'o'n—tzixuj.

¹⁴ Tej t-xi' tkba'nxuj jlu, ajtz meltz'aj twitzxuj, bix e tilxuj wa'lec jun xinak, pero min el tniy'xuj ti'j ka ja Jesús. ¹⁵ Bix e tzaj yolen tuyaxuj:

—Naa, ¿tikentzen noo'ka? ¿Altzen tzin t'jyo'na?—tzixin.

Tujtzen twitz María Magdalena, c'ojlal cyken lo'pj jaxin. Ju' tzunj, e xi' tkba'nxuj texin:

—Taat, ka jay jxjal ma tz'aj tii'na t-xumlal Jesús, kbantz weya jaa' ma pona tk'o'na, tu'ntzen t'cu'x nmaku'na—tzixuj.

¹⁶ Bix e xi' yolen Jesús texuj:

—¡María!

Tej t-xi' tkba'nxin tbixuj, el tniy'xuj ti'j ka Jesúsxin, bix te junx maj oc tcyeyenxuj ti'jxin, bix e xi' tkba'nxuj:

—¡Taat!—tzixuj tuj yol hebreo.

¹⁷ E xi' tkba'n Jesús texuj:

—Mlay chin cyaja tzalu. Mina'n nxaxa tuya Nmana, pero il ti'j chin jawela. Ju' tzunj, mi'n cub ttzyu'na inayena, sino cutxey cyuya ke hermano nxnak'atza, bix kbanx cyexin ka chin pomela tuya Nmana bix Cymaxin, tuya Ndiosa bix Cydiosxin—tzixin te María.

¹⁸ E t'cu'yaxuj, bix e xi'xuj kbalte cye t-xnak'atzxin:

—Ma wila Cawel kxol—t̄zixuj, bix ak'xuj kbalte cyexin ti otk tkba Jesús.

Tej tjaw jlet Jesús cywitz ke t-xnak'atzxin

(Mt 28:16-20; Mr 16:4-18; Lc 24:36-49)

¹⁹ Jax jtneel k'ij te smant, tej tex k'ij, oc cychmon cyiib t-xnak'atz Jesús. Etz cylo mo'nxin jaa' tuya tal, cuma at cytzi nejenel cye judío cyi'jxin. Ch'innch'e tul jlet Jesús cyxolxin, bix e xi' tkba'nxin cyexin:

—Chi tenxita tuj tt̄zjal—t̄zixin.

²⁰ Tej t-xi' tkba'nxin jlu, e xi' tyeec'anxin ke išjnin cyuj tk'abxin bix tt̄xlaj t-xuuc'xin. Tej tel cyniy'xin ti'j ka ja Cawel cyxolxin, nim e jaw tzalajkexin. ²¹ Bix juntl maj e xi' tkba'nxin cyexin:

—Chi tenxita tuj tt̄zjal. Tisenx ma tzaj tsmā'n Nmana inayena tu'n nk'umena tyol cye xjal, jax inayena cxe'l nsma'na ejee'y—t̄zixin.

²² Tej t-xi' tkba'nxin at t-xi' lel tsmā'nxin ejee' te t-xelxin, e xi' t-xupanxin t-xewxin cyi'jxin, te jun techel tu'n tcu'tz tk'o'nxin Espiritu Santo, bix e xi' tkba'nxin:

—Oj tul Espiritu Santo, ccyiik'ela jaxin. ²³ Ejee'y kbalte ti pjel cye ocslal wi'ja. Jcykba'y ba'n tu'n tbint cyu'n ocslal, ba'ntzen. Bix jcykba'y yaa'n ba'n tu'n tbint cyu'n xjal, jax yaa'n ba'n—t̄zi Jesús cye t-xnak'atzxin.

Min tocsla Tomás ka otk jatz itz'j Jesús

²⁴ Yal tej Tomás, bix ka Yoḡ tbi, min otk tenxin cyxol niy'tl t-xnak'atz Jesús tej tul jlet Jesús cyxolxin. ²⁵ Ju' tzunj, e xi' cykba'n niy'tl t-xnak'atzxin texin:

—Ma kila Cawel kxol—t̄zikexin.

Pero aj ttzak'be'n Tomás cyexin:

—Chin ocslala cyyola nuk o'cx ka ma wila jaa' oca clavos cyuj tk'abxin, bix ka ma tz'ocx nk'o'na twi' nk'aba tuj tocxlen clavos, bix ka ma tz'ocx nk'o'na nk'aba tuj t-xuuc'xin—t̄zi Tomás.

²⁶ Tetzen juntl tneel k'ij te smant, juntl maj oc cychmon cyiib ke t-xnak'atz Jesús, lmo'ntl ke tlemel jaa' tuya tal. Ja maj lu at Tomás cyxolxin. Bix juntl maj ul jlet Jesús cyxolxin, bix e xi' tkba'nxin:

—Chi tenxita tuj tt̄zjal—t̄zixin.

²⁷ Bix e xi' tkba'nxin te Tomás:

—Cye'yenc j-išjnin cyi' nk'aba, bix k'o'nctz twi' tk'aba tzalu cyuj nk'aba. Bix k'o'nctz tk'aba tuj nxuuc'a, tu'ntzen mi'ntl baj tc'u'ja i'tz kena, tu'n tocslana ti'j ka inayena—t̄zixin.

²⁸ Aj ttzak'be'n Tomás:

—Taat, jay Cawel wibaja bix Ndiosa—t̄zixin.

²⁹ E xi' tkba'n Jesús texin:

—Ma tz'ocslana ti'j in jaw itz'ja tuj cyamecy nuk cuma ma chin tila. Pero mas ba'n ka ma tz'ocslan jun xjal wi'ja, amale mint ma chin cyil—t̄zixin.

Alcye t-xi'len u'j lu

³⁰ Key xjal, ma cub ntz'i'bena ch'in ti'j ti e bint tu'n Jesús. At nimtl e bint tu'nxin cywitz t-xnak'atzxin tu'n t-xi' tyeec'anxin tipemalxin, pero yaa'n tz'i'ben tuj ja u'j lu. ³¹ Pero ma cub ntz'i'bena kej tbinchbenxin lu, tu'ntzen cyocslana ka jxjal Scy'o'n tu'n Dios ja Jesús, bix Tcwal Diosxin, bix tu'n toc ke cyc'u'ja ti'jxin, tu'ntzen tten cychunk'lala te junx maj.

21

Tej tjaw jlet Jesús cywitzj wuuk t-xnak'atzxin

¹ Tul-len jlet Jesús cyxol t-xnak'atzxin, bix e cub tyeec'an tiibxin juntl maj cywitz juun t-xnak'atzxin ttzii' tnijabel a' Tiberias. Ju'tzen tten e cub tyeec'anxin tiibxin. ² Oc cychmon cyiib Simón Pedro tuyax Tomás ja yoḡ, tuyax Natanael, aj Caná tuj departamento te Galilea, cyuyax tcwal jxin Zebedeo, bix cyuyax ca'batl t-xnak'atz Jesús. ³ E xi' tkba'n Simón Pedro cyexin:

—Weya, ma chixa tzyul quiš—t̄zixin.

—Jax ju'x keya, ma ko'xa tuyey—t̄zikexin.

Epkexin, bix ocxkexin tuj jun choc, bix e baj ak'bil cyu'nxin tuj tnijabel a', pero mi nuket jun quiš e tzyet cyu'nxin. ⁴ Tej kskix, lu Jesús wa'lc'a ttzii' a'. Pero min el cyniy' t-xnak'atzxin ti'j ka jaxin. ⁵ Ju' tzunj, e xi' tkba'nxin cyexin:

—Jey', key k'a, zatpa quiš xtzyet cyu'na?—t̄zixin.

—Mintii', taat.

⁶ Ju' tzunj, e xi' tkba'nxin cyexin:

—Cyxoo'nкса cyxiy'pay tuj a' tuj mank'ab te choc, bix ctzyetel quiš cyu'na—t̄zixin.

E cycuyaxin, bix tej cyak'xin tu'n tjatz cyii'nxin cyxiy'paxin tuj choc, ya min e bint cyu'nxin tu'nj nimxsen tajlal quish.

⁷ Ja tzunj xin t-xnak'atz Jesús oc tak' te, tej tlontexin tipemal tyol jxjal ttzii' a', e xi' tkba'nxin te Pedro:

—Jaja Cawel kxoll!—tžixin.

Tej tel tniy' Pedro ti'j ka ja Cawel cyxol, oc tžpo'nxin t-xbalenxin ti'jxin, cuma otk tz'el tii'nxin tu'n tak'anaxin, bix e cu'xxin tuj a'. ⁸ E cub t-xoo'n tiibxin tuj a' cuma yaa'n nakch ta' choc ttzii' tx'otx', sino nuk jun syent vara ta'. Yal kej niy'tl t-xnak'atzxin, e tzajkexin tuj choc, kitenzen cyxiy'paxin nojne cyuya quish. ⁹ Tej cyi'yelxin twitz tx'otx', e cyilxin otk cub pek'ch jun k'ak' tuya txal k'a'l, bix ntxeet quish tibaj, tuyax waabj. ¹⁰ E xi' tkba'n Jesús cyexin:

—Cyii'ntza ca'ba oxe quish xtzyet cyu'na jatxe may'—tžixin.

¹¹ Ocxtzen Simón Pedro tuj a', bix e tzaj tkitenxin xiy'pa, tu'ntzen ti'yel ttzii' a'. Nojne xiy'pa cyuya nmak quish. At jun syent tuya cya'wnak tuya oxlaaj quish. Pero amale nimet, pero min e cub rotj xiy'pa. ¹² Bix e xi' tkba'n Jesús cyexin:

—Chi tzaja, bix chi waa'na—tžixin.

E cycuyaxin, bix min-al e xi' tkanen texin alcyexin, cuma el cyniy'xin ti'j ka ja Cawel cyexin. ¹³ E xi' ttzyu'n Jesús jwaabj, bix e xi' tk'o'nxin cyexin, bix jax e xi' tk'o'nxin quish cyexin.

¹⁴ Tej t-xi' tk'o'n Jesús waabj cye t-xnak'atz, toxentzen maj e cub tyeec'an tiibxin cywitzxin tjatzlen itz'jxin tuj cyamecy juntl maj.

C'ojlanx kej ncarnela, tzi Jesús te Pedro

¹⁵ Tejtzen cybaj waa'nxin, e xi' tkba'n Jesús te Simón Pedro:

—Simón, tcwal Jonás, ¿n-ocpa wak'a tey mas twitzj taak'ena te tzyul quish?—tžixin.

—Tzin, taat. Tzki'n tu'na n-oc tak'a weya—tži Pedro.

E xi' tkba'nxin te Pedro:

—Ka ju' tten, c'ojlanx kej xjal lepchech wi'ja, tisenj jun cyel nc'ojlan ke tal carnal—tžixin.

¹⁶ Juntl maj e xi' tkanenxin te Pedro:

—Simón, tcwal Jonás, ¿n-ocpa wak'a tey?—tžixin.

Aj ttzak'be'n Pedro:

—Tzin, taat. Tzki'n tu'na n-oc tak'a weya—tži Pedro.

—C'ojlanx kej xjal lepchech wi'ja—tži Jesús.

¹⁷ Bix te toxen maj e xi' tkanenxin te Pedro:

—Simón, tcwal Jonás, ¿n-ocpa wak'a tey?—tžixin.

Cuma otk tzaj tkanenxin toxen maj: “¿N-ocpa wak'a tey?” ju' tzunj e tzaj tžis Pedro, bix e xi' tkba'n te Jesús:

—Taata, tzki'n tu'na cykilca. Tzki'n tu'na n-oc tak'a weya—tži Pedro.

Bix e xi' tkba'n Jesús te Pedro:

—C'ojlanx kej xjal lepchech wi'ja. ¹⁸ Jaxxix cxe'l nkba'na tey, tej cwalx tey, e tbincha tey tajbila. N-oc tžpo'na t-xbalena tcy'itza, tu'ntzen t-xi'y nuk jaa'xja taja. Pero oj ttiina, juntl xjal c'oquel x'ponte tey, bix cxe'l tii'n jay jaa' tcy'iy tu'n t-xi'y. Bix cxe'l tnukpi'na tk'aba—tžixin. ¹⁹ E xi' tkba'nxin jlu tu'n tyeec'anxin ti tten tu'n tcyim Pedro, bix at tjawlel tniimsa'n Pedro tbi Dios tu'n tcyamecy.

Tej tkbantexin jlu, e xi' tkba'ntlxin te Pedro:

—Tzaja wuyena—tžixin.

Jun t-xnak'atz Jesús nim oc tak' texin

²⁰ E tcyua Pedro, bix tej nchi etz lk'ekexin cyi' niy'tl t-xnak'atzxin, ajtz tcyeyen Pedro ti'j, bix e til lepchech cyi'jxin jt-xnak'atzxin oc tak' te Jesús, jatzenj t-xnak'atzxin otk cub ttxlaj Jesús tej cywaa'nxin manc'bil maj tuyaxin, bix otk txi' tkanen texin: “Taata, ¿alcyey kxola cxe'l tq'ueyen jay tuj cyk'ab byol xjal?” ²¹ Bix tej tlonte Pedro ja t-xnak'atzxin lu toc lpe cyi'jxin, e xi' tkba'nxin te Jesús:

—Taata, yaj tzunj t-xnak'atza lu, ¿ti pjel texin oj ttiinxin?—tži Pedro.

²² E xi' tkba'n Jesús texin:

—Ka waja tu'n tcyajxin i'tz hasta ojxe wul meltz'aja, mintii' tey taj te. Tey, il ti'j tu'n t-xi' lpey wi'ja—tžixin te Pedro.

²³ Cuma otk txi' tkba'nxin ja yol lu, ju' tzunj tuj cywitz ocslal mas yaj, yaa'n tu'n tcyim ja t-xnak'atzxin lu. Pero yaa'n ju'wa, cuma min e xi' tkba'n Jesús te Pedro tu'n mi'n tcyim ja juntl t-xnak'atzxin. Nuk o'cx e xi' tkba'nxin: “Ka waja tu'n tcyajxin i'tz hasta ojxe wul meltz'aja, mintii' tey taj te.”

²⁴ Inayena jt-xnak'atzxin e wila cykilcaj e baj, bix e cub ntz'i'bena ti e baj. Bix ntzki'na jaxxix yol cykilcaj ma cub ntz'i'bena. ²⁵ At nimtl e bint tu'n Jesús min ma cub ntz'i'bena.

Nuket ma cub ntz'i'bena cykilcaj tbinchbenxin, tuj nwitzza mlayle bint tu'n tcnet lugar twitz tx'otx' tu'n cyten libro tu'n tcub tz'i'bet cykilca.

O'cx nyolja.

Cybinchben kej xin t-xnak'atz Jesús

Tej tkbante Jesús ka tu'n tul Espiritu Santo

¹ Key xjal n-oc tak' Dios cyey,

Inayen Lucas. Ncub ntz'i'ben tcab u'j cyey. J-u'j e xi' ntz'i'ben cyey tneel, e xi' nkba'n cyey cykilj e baj te Jesús bix cykilj e baj t-xnak'tza'nxin cye xjal, jatxe tej ttzaj tzyet t-xnak'tzanxin tneel k'ij, ² teje tjaxxin tuj cya'j.

Tuj tzunj libro lu cxe'ltzen nkba'n cyey ti e baj cyey xin oc lpe ti'j Jesús tej tajlenixitlxin tuj cya'j.

Tej ttenxin twitz tx'otx', nuk e tyee'axin cyey t-xnak'atzxin otk baj tjyo'nxin tu'n cyya-jxin te t-xel Jesús. E baj tminc'u'n Jesús ejee'xin tuya tonbil Espiritu Santo tu'n ti ctemela jtaak'enxin otk tzaj tzyet.

³ Bix tej tjatz itz'jxin tej tcyimlenxitlxin, bix e xi'xin jaa'j ete' ke t-xnak'atzxin, bix e pon Jesús i'tz cyi'jxin, bix nim maj e cub tyee'axin techlalxin ka i'tzxin. Bix e tenxin cyuya ke t-xnak'atzxin cya'wnak k'ij bix e baj tyee'axin ti tten tcawbil Dios.

⁴ At jun k'ij tej mintkna'n t-xi' Jesús tuj cya'j bix e xi' tkba'nxin cye t-xnak'atzxin:

—Mi' chi exa tuj tnom te Jerusalén. Cyyo'm cabtl k'ij tzalu, ojxe tul Espiritu Santo tzenen o tzaj kbet cyey, ka tu'n ttzaj chk'et Espiritu Santo tu'n tten cyuyey, otzen txi' nkba'n cyey nejl.

⁵ N-ultzen tuj cyc'u'ja tej xin Juan Bautista e cu'x tk'o'nxin ke xjal tuj a'kej e cyajbe cymeltz'aj tuya Dios. Pero tujtzen cabtl k'ij attzen juntl ch'ixbe'n c'oquel. Tzultzen Espiritu Santo te k'olte mas cypemala tu'n t-xi' cyii'na jyaak'ena cyjel nk'o'na—tzi Jesús cye t-xnak'atz.

Tej taj Jesús tuj cya'j

⁶ Juntlzen k'ij tbaixenitl ju'wa, tej toc cychmon cyiib t-xnak'atz Jesús tuyaxin, ttxa'n Jerusalén, twi' jun witz Olivos tbi, bix e xi' cykanenxin:

—Taat, keya ejoo'ya xjal te judío lu ko'ya eto'cx tjak' cycawbil jxjal tzajninxa. Jey', ¿mapatzen pon tumel tu'n kel tco'pana tjak' cycawbil bix tu'ntzen ja tey cawen? —tzi tzunkexin te Jesús.

⁷ Bix aj ttzak'be'n Jesús:

—Yaa'n ilixite ti'j tu'n cybinte cyey jntzaj cykanena. Nuk o'cxc'ate Kman Dios itzkil te ja, cuma nuk ja texin at tajwalele te scy'olte jtoj pjel tik'ch jilel. ⁸ Jcyey il ti'j tu'n cybinte ja tej tzul cyey cypemal ojtzen tul Espiritu Santo najal cyuyey bixsen ckebel cye'u'ja oj cyak'a yol we. Chi xe'la tzipul we nuk jak'ch tumel, tzalu tuj tnom te Jerusalén, tuj ttx'otx' Judea, tuj ttx'otx' Samaria, bixsen cyuj tx'otx' mas nakch twitz tx'otx'. Chi oquela te nxel—tzi Jesús cye t-xnak'atz.

⁹ T-xi'len tkba'nxitlzen Jesús ja lu, bix ak' jawexxin tuj cya'j, maatkxsen nchi cye'yenx t-xnak'atzxin ti'jxin. Cwa tcyaj bajxin tuj jun muj. Minx e cyilxin jaxin. ¹⁰ Maatkxsen n-el jac'ch cyanemxin ti'j tjaxlen Jesús tuj cya'j, tjaw jlet ca'bxin tsanjel Dios cytlajxin sc'apexxen cyi'jxin. ¹¹ Bix e xi' cykba'nxin cye t-xnak'tzal Jesús:

—Ke cyey xjal aj Galilea, ¿tikentzen nim nchi cye'yenxa tuj cya'j? Tej xin Jesús lu ma cyaj tk'o'n texin ejee'y. Ma tz'aj k'i'n texin tuj cya'j. Ma cyila ma jaxxin, bix la' alcye jun k'ij tzul meltz'aj texin twitz tx'otx'. Tisenx ma jaxxin ju'x oj tulxin—tzi ke tsanjel Dios cyexin.

Tej tjaw scy'et t-xel Judas

¹² Entonces bix e xi' ke t-xel Jesús twi' jwitz Olivos, bix ajtz meltz'ajkexin tuj Jerusalén te jun kilómetro ta'.

¹³ Tejzen cyponxin tuj tnom, bix e jaxkexin tuj tcab cxe'len jaa'j jaa'j ta' cyosadaxin. Bixsen oc cyk'o'nxin te tajlal kej xin Pedro, Jacobo, juntl tbixin Santiago, Juan, Andrés, Felipe, Tomás, Bartolomé, Mateo, Jacobo, tcwal jxin Alfeo, jxin Simón, junxin otk ten nejl tej cloj e tajbe tk'ojl tuya Roma, bixsen Judas, juntl tbixin Tadeo, tcwal Jacobo, yaa'nte Judas Iscariote. ¹⁴ Jatztzen oca cychmon cyiibxin jaca k'ij tu'n toc cyk'on cyiibxin te na'l Dios te junx maj bix cyjunen cyiibxin. Cyuya cab xuuj e pon cyuyaxin te na'l Dios cyuyaxin, cyxoltzen xuuj tocca jxuj María, ttxu Jesús, bixsen ke títz'en Jesús.

¹⁵ Cabltzen k'ij mas yaj tuj jun wikxtil lugar bix oc cychmon cyiib jun syent tuya wink'an xjal otk tz'ocslante Jesús, bixsen e cub we' Pedro cyxol xjal te yolel cyuya. ¹⁶ Bix e xi' tkba'n Pedro cyjulu:

—Key ocslal wuya, tej e cu'x tz'i'bet tuj tyol Dios at-xe tyem ox bintte. E cyaj tkba'n Espiritu Santo tuya tyol ktzan David ti jilel tbinlel tu'n Judas Iscariote. Bix yaltzen ja'lewe ox bintte ju'wa. Cykil ko' itzkilte ti tten tonen bix ti tten tcub nej Judas cywitz jxjal e tzyunte Jesús tu'n tbyet-xin. ¹⁷ Tej xin Judas lu ja te xinja jun kuya, cuma jax e scy'et-xin tu'n Jesús tu'ntzen tbin jkaak'en, tu'n thic'ajax jba'n tpochalj yol te co'pbil. ¹⁸ Pero bix e xi' tq'ueyen Judas

ja Jesús tuj ewjel. Mas yaj, ya tzkki'nlttzen keya, bix e xi' Judas tuj jun lugar jaa' e tzaa' t-xoo'n tiibxin lenchl e ponxin twitz tx'otx'. Tcubtzen tz'akxin, bi'x el tzac'ch tzoo'nxin bix etz baj tuj tc'u'jxin ti'jxe. Ju'tzen tten tcyimxin. Yajc'atltzen bixsen e cylok'tl ke pala cyibaj xjal judío ja tx'otx'a tuyaj pwak e tcama Judas ti'j t-xi'len tq'ueyenxin ja Jesús tuj ewjel. ¹⁹ Yaltzen ke xjal te Jerusalén, tej toc cybi'n xjal ja ila, bixsen oc cyk'o'n xjal tbi ja tx'otx'a te Acéldama, jatzen elpenina "Jtx'otx' Tlok'aj Pwak Byol Xjal" tuj cyool xjal. ²⁰ Tuj Salmos at jun yol nbya'n cyjulu: "E tcyajtzen tk'o'n tja bix min-al juntl ba'n tocx najan tuj." Bix juntl tzin tkba'n cyjulu: "Jun wikxiltzen xjal e tk'in tej taak'en tocsen," tzi tyol Dios, tu'ntzen telniy' ka tu'n tcyim Judas bix tu'n tcyaj taak'enxin otk tz'oc nejl.

²¹⁻²² Ju' tzunj ctzaal kjoyo'n jun xjal te t-xel Judas, jaj junxin xjal e bet kuya junx tuya Jesús tej tbautizarjxin tu'n Juan Bautista bix tejxe taj k'i'nxin tuj cya'j. Jatzen xjalaja cwel ten kbalte tyol Dios kuya ka o jatx itz'jte Kman Jesús—tzi Pedro cye xjal.

²³ Entonces cyxoltzen xjal bix etz cyscy'o'nxin ca'ba xjal. Jatzen José bixsen Matías. Jatzen José at maj n-ocxin te Barsabás bix at maj n-ocxin te Justo. ²⁴ Bix ak'kexin na'l Dios cyjulu: —Taat, ja tey itzkilte tii'n tanem cykil xjal. Nuksama, yeec'antz tzuna keya al jun cyej xjal lu taja ²⁵ te t-xel Judas, tu'n thint jtaak'en Judas ma cyaj tk'o'n tej t-xi' tjoyo'n til bix o cyim, o txi' tuj k'ak' ja tzunja o tiik'—tztizen ke xjal te Dios.

²⁶ Tejzen cybaj na'nxin Dios, bixsen ak'kexin kxal ti' cysuertexin la' altzen jun cyexin tu'n tcaman te t-xel Judas. Jatzen Matías e caman, ja tzunxin ocx tuj taak'en Jesús tuyaj junlajajltxin.

2

Tej tul Espíritu Santo

¹ Tcublen bajxilt tzunj cya'wnak tuya lajaj k'ij at-xsen cye xjal judío cycostumbre tu'n t-xi' cyk'o'n cab twitz cyawal te Dios, bixsen tziy' jun cynink'ij xjal. Ja tzunj nink'ija Pentecostés tbi. Tejzen tpon tumel ja nink'ij te Pentecostés, jatzen junx n-oc cychmon cyiib t-xel Jesús.

² Tejzen tcyhmon cyiibxin, ch'innche t-xi' cybi'nxin tjaw jun tij k'ajltenel tzajninxe tuj cya'j. E k'ajt-xsen tisen jun tij cyk'i'k njitx'itx'in. E k'ajk'ajaxsen tuj cykil lugar jaa' ete'c'axin.

³ Bix e cub jlet nim techlal tisen taak' xjal, bix tisen tken k'ak', bix e baj cub paxke bix e cub tenke tibaja jaca juun xjal. ⁴ Ju'tzen tten toc Espíritu Santo tuya jaca juun xjal. Bix oc tk'o'n cyipemal xjal, bix ak'ke yolel tuj jun wikxilt yol la' alcyce oc tk'o'n Espíritu Santo cye tu'n t-xi' cyyolen.

⁵ Tu'ntzen tiy'set jk'ij te nink'ij, nimxsen xjal judío otk pon tuj Jerusalén. Te cykil twitz tx'otx' otk chi baj tzaa' xjal, bix tec'alex yolen juun wik xjal e baj tzaj te nakch. ⁶ Tejzen toc cybi'n jxjal tex tnom bix xsun kej xjal te nakch, cybinte tzunj tij k'ajltenel, bix oc cychmon cyiib xjal junx. Tejzen toc cybi'n xjal cyool t-xel Jesús nchi kban tuj tyol Dios tuj jcyce xjal cyool, bix e baj jaw klee' ke xjal. ⁷ Min e bint cybisen xjal ti'j, bix e xi' tkba'n cab te cabtl:

—¿Tikentzenle nimxsen yol ba'n cyu'n? Pero nuk te tnom Galilea ke xjal. ⁸ ¿Pero tikentzenle ju'wa? Lu ke nchi yolen kuya tuj ke kyol te jaca juunke. ⁹ Bix nim ke kyol. Kxol at xjal te ttx'otx' Partia, te ttx'otx' Media, ttx'otx' Elam, te Mesopotamia, te Judea, te Capadocia, te Ponto, te Asia, ¹⁰ te Frigia, te Panfilia, te Egipto, cye tnom tuj ttx'otx' Africa mas nakch twitz Cirene, bixsen te Roma. Kxol at ke judío cuma jax itz'ja ko' tzalu, bix at ke nuk o tz'oc kk'on kiib te judío. ¹¹ Ju'nawa, pero mi'n tz'el tuj kc'u'j tu'n cyxi' kna' kej xjal te Creta bix xsun kej xjal te Arabia, i'ixtate ti'j, ja te cxe'l kc'u'j ti'j ba'n tbinchen Dios nkbet ke tuj kyol!—tztizen cykilca xjal.

¹² Pero e jawxsen klee' ke xjal minxsentii' ba'n t-xi' cybisen ti'j bix ak'ke kanlte cyxolelex:

—¿Titzen elpenina ja lu? ¿Titzen nbaj?—tztizen ke xjal.

¹³ Pero attzen cab xjal oc ten xmuuchalec cyej xin t-xel Jesús kbal tyol Dios. Tzi tzunkexin cyjulu:

—Cuma ma txi' cyc'a'n k'e'n—tztizen ke xjal.

Tej tpochan Pedro tneel maj

¹⁴ Tejzen toc cybi'n jcablajajxin t-xel Jesús tyol, bix e jaw we'kexin. Cyxolx xsunxin ak'a Pedro yolel cyiw cye xjal bixsen cyej xjal xmuuchal:

—Ke cyej xjal te ntanem judío, bix xsunkey xjal najl tuj Jerusalén, cybimc'atzen ti jilel cxe'l nkba'n cyej. ¹⁵ Keya yaa'n bola ko'ka tisenj cyej tuj cywitz. Cybisenxa ti'j, maa beljaj tajlal hora ja'lewe, bix cykil xjal itzkilte min-alte jun n-ak' c'al k'e'n te jya'x. ¹⁶ Yaa'n ju' tewa. Ja te ja lu e cyaj tk'umen Dios jatxe tyem tu'n thint tu'n. Ba'n cyu'na o tzaj tk'umen Dios tu'n tyolel Joel cyjulu: ¹⁷ "La' alcyce jun k'ij tzul nchk'o'n Espíritu Santo tu'n tten cyuya tixte xjalel ti'j, tu'ntzen cxe'l cyk'umen ke cya'aala bixsen ke cymeela nyola cye xjal. Bix ke xjal c'oquel cye'ye'nen tuj cywitziy' ti jilel waj txi' nyee'c'an cye, cyele cwal, cyele tij. ¹⁸ Jaxxix wu'n cyuj tzunj k'ij chi ul, cxe'ltzen nchk'o'n Espíritu Santo te cykil kej xjal ma

tz'oc ebinte we bix chin cybi' aljxele ti'j, xuujle, xinakle. Bix cykba' la' alcyey we cxe'l nkba'n cye. ¹⁹ Bix cyuj tzunj manc'bil k'ij cxe'l'tzen nyeeec'an ke techlal tuya nim sey'pajlenel twitz cya'j, bix ka'c'axsen pjel twitz tx'otx'. Nimxsen tziy' q'uelel, nimxsen k'ak' bix nimxsen sib. ²⁰ Kloljxsen c'oquela k'ij bix cyakxsen c'oquela xjaw tisen tziy'. Bix yajxiiltzen oj tpon k'ij tu'n tak' Taaw twitz tx'otx' te ninc'ul cykil xjal, jatzen k'ij oj t-xi' tyeeec'an Dios nintzaj tipemal. ²¹ Pero jaca juun xjal ma txi' kanente najsbil ti' til te Dios cco'pjeltzen tuj il tzul," tztizen Dios tu'n Joel jatxe nejl.

²² Cybimc'atzen nyol, key te ntanem Israel. Jesús te Nazaret jatzen jun xjal o tzaj tchk'o'n Dios twitz tx'otx'. Bix cywitz tzuna toc tajwalelxin tu'n Dios tuya nim techlal tipemalxin, tisenxj o cyila. ²³ Pero tisenx tcublen tuj twitz Dios jatxe nejl, ja tzunj xin Jesús lu oc k'o'n tuj cyk'aba, bix tejtzen tpon tumel, ejee' tzuna e cub byonte texin cyu'nj xjal min tz'oc tak' Dios cye. Ejee'tzen xjal e jaw k'onte texin twitz cruz. ²⁴ Pero amale e byetet-xin, o jatz tiz'jsa'n Dios jaxin. O tco'pan Dios jaxin tuj cyamecy, cuma yaa'n tumel tu'n toc ten cyamecy c'ojalate Jesús tisen jun pres. ²⁵ Ja tzunj tpochala e cyaj ttz'i'ben jxin David nejl tuj Salmos. Tzi tzunj xin Scy'o'n tu'n Dios cyjulu, tzi David: "Ntzki'nwe ka cykil tyem at Dios wuya. Jatzen weya wuyaj at tuya nk'aba tuj nmank'aba te onl weya. Ju' tzunj mintii'wa ttzi wi'j. ²⁶ Ju' tzunj axsen ttzjal ta'we wanem. Cxe'l'tzen nkba'n ch'in ti'j ttzjal ta' wanem, jaj cuma ntzki'ntl oj ncyim, chin jawetz itz'jtlwe juntl maj. ²⁷ Dios nman, ntzki'nwe mlay cyaj tk'o'n wey wanem cyxol cyimne, bix jax mlay tcuuey tu'n tcub k'ey nxumlal, cuma inayena sant tcwala. ²⁸ Czaal tmeltz'u'n wey nchunk'lal juntl maj. Bix chin pomel meltz'ajwe twitza bixsen chin temela tuj tbanel tu'na," tztizen Tcwal Dios, tzi David tcyaj tkba'n at-xe k'ij.

²⁹ Ke cyey te ntanem, min e yolen jxin kxe'chel David ti'jxxin, cuma cykilte ko' itzkilte ka e cyimte David bix e mket-xin, bix jax lu'x t'jayelexin at-x tuj tx'otx'. ³⁰ Yaltzen te David e yolen texin ti'j cpjel ma yaj, bix ttzki'ntexin ka otk tkbate Dios tuyaxix jun tyol jax, bix ka ja jun t-xe'chel David tscy'etel tu'n Dios te cawel te junx maj. ³¹ Ti'j tzunj t-xe'chel David e tkbatzen David alcyey k'ij tul-lelxin, bix jaxsen xinj e tkba David tu'n tjatz itz'j tuj tx'otx', bix mintii' tu'n tcyaj tanemxin cyxol cyimne, bix tu'n mi'n cu'x k'ey t-xumlalxin. ³² Jatzen Scy'o'n tu'n Dios ja Jesús, e jatz tiz'jsa'nxin juntl maj tu'n Dios. Cykilxsen ko' te tstiwa ti'j. ³³ Yaltzen ja'lewe o tz'aj k'inxin tuj cya'j, jaa' o tz'oca tajwalelxin te cawel junx tuya Dios tibaj cykil twitz tx'otx'. Bix jax o tz'oc tk'o'nte Kman Dios Espiritu Santo te Jesús tisenx e tkbaxin tuj tneel, bix tu'ntzen ttzaj tchk'o'n Jesús Espiritu Santo twitz cykil twitz tx'otx'. Ja tzunja ma bint tu'n Dios ja'lewe, bix xsunj ma cyila bix ma cybiy ejee'tzen techlal J-espíritu Santo ma tzaj tk'o'n te kcotz. ³⁴ Ba'n, tzinenx ti'j yaa'nte David aj k'in tuj cya'j, sino ja te Jesús. Jax David e kbante cyjulu: "Jax Kman Dios e kbante te Waaw: 'Keca tuj nmank'ab tisen tneel xjal, ³⁵ ojxe nxcye cyibaj taj k'o'ja,' tzi Dios te Tcwal," tzi ktzan David.

³⁶ Ju' tzunj cyjel nk'o'n tu'n tuj chic'aj cyey, ejee'y te Israel, jxin Jesús nko yolen ti'j, jatzen xinj jaxxix Scy'o'n tu'n Dios. Otzen tz'oc tk'o'n Dios jaxin te Kaaw. Bix jax xsun ja xjal lu cyey e cybiya twitz cruz—tztizen Pedro cye xjal judío.

³⁷ Tejtzen cybinte xjal jtyol Pedro, bixsen e cyna' xjal tchyonel, cuma el cyniy' xjal ti' cyka'yel, bix e xi' cykba'n xjal te Pedro bix tej cabtl t-xel Jesús:

—Key ktanem, tztizen ko temela ya tu'ntzen kco'pja?—tztizen ke judío.

³⁸ Pero bix aj ttzak'be'n Pedro:

—Cyjel cyk'o'na cyila, bix chi xe'la tuj a' tu'ntzen t-xi' cyyeeec'ana ka ma chi meltz'aja, bix ya cyk'ontlzen cyiiba tuyaj xin Scy'o'n tu'n Dios, jaj xin Jesús. Ju'tzen ctemela tu'n tnajset cyila bix cyiik'a tzuna t-xalbil Dios, ja Espiritu Santo. ³⁹ Jatzen jun tyol Dios o cyaj te cyey, bix te cycwala, bixsen te cyej xjal chi itz'jel la' alcyey jun k'ij, te cykilj xjal ttxca' Dios—tzi Pedro cye xjal.

⁴⁰ Jayle tzunja e tyole Pedro, bix at-x nimtl tyolxin. E tkbaxin tu'n il ti'j tel cypa'n cyiib xjal c'ij xjal judío c'ycy'i tu'n cyiik'ente Jesús. ⁴¹ At-xsen nim xjal oc ocslante tyol Pedro bix e bautizarj. Tex xsunj k'ija atle oxe mil xjal e bautizarj. ⁴² Bix oc cysmon cyiib xjal cyuya nimtl ocslal tu'n toc cyk'on cyiib nuk te e bil cyxnak'atz t-xel Jesús. E ten ke xjal tuj ttzjal tuya cabtl. E waa'nke bix e na'nke Dios junx, bix e cub cypa'n tik'ch cye.

Ti tten cychunk'lal tneel ocslal

⁴³ Bix cykilxsen ke xjal te Jerusalén e jaw klee' cuma nimxsen tajwalel techlal cyaak'en t-xel Jesús e bint. ⁴⁴ Bix cykilca kej xjal oc ocslante Jesús oc cychmon cyiib jaca k'ij junx. Ojzen n-oc c'ycye'yen jun xjal tuj tcyajjal, e cub cypa'ncyey xjal tik'ch cye cyxol. ⁴⁵ E xi' cyq'ueyen tibaj cytx'otx' bix tik'cht' cye at. Tuya tzunj twi' e cyiik', bix ajben cye te onlec cyej ocslal mebe tuya alcyey tcyajjal ete'. ⁴⁶ Jacaxsen k'ij e chmetke xjal te na'l Dios tuj nintzaj tja Dios. E waa'nke xjal junx cyja bix nchi tzalajxsen xjal bix junx e'la cyanem. ⁴⁷ Bix nim e xi' cyk'o'n chjonte te Dios, cuma nimxsen cyanem ti' Dios. Bix nimel ke xjal cywitz ocslal.

Jacaxsen k'ij oc mas nim xjal ocslalte tyol Jesús. Ju'tzen tten ttz'iy cybet ke ocslal tu'n Kman Dios.

3

Tej tk'anj jun cox

¹ Attzen jun k'ij ca'ba tzunxin t-xel Jesús, ja Pedro tuya Juan, bix e xi'kexin tuj nintzaj tja Dios te oxe tajlal hora te kale, texj hora oj nchi pon xjal judío te na'l Dios. ² Ch'itktzen cypon cananxin ta' tja Dios, t-xi' cyye'yenxin cab xjal k'i'n juntl xjal cox cyu'n, xi'ninke tuj tja Dios. Pero jxjal cox ju'x tten ttzajlen itz'ja, bix nak'lx tu'n t-xi' k'it ttzii' jtja Dios. Oc cyk'o'n xjal tbi Cyeca Ttzi'yen, bixsen ncub kej xin xjal cox ttzii' tja Dios te kanl pwak tcoztzin cye xjal nchi ocx ttzi'yen. ³ Tejzen tak' twitzj xin cox cyi' Pedro tuya Juan, ya ch'itk cyocxxin tuj tja Dios bix e xi' t'kanenxin jun pwak tcoztzin. ⁴ Cyiwc'a oc cyye'yen t-xel Jesús jaxin, bix e xi' tkba'n Pedro texin:

—Ko tcy'e'c'a—tzi Pedro texin.

⁵ Bixsen ocxix tk'o'n jxin cox t'c'u'jxin cyi'jxin. Tujzen twitzxin, ch'in pwak tu'n toc texin. ⁶ Pero bix e xi' tkba'n Pedro:

—Pwak mintii'ke k'i'n ku'n, mitetpe plata bix mitetpe oro. Yaa'n k'ina ko'ya. Keya k'i'n ku'n nuk ja tej keya kipemal o tz'oc tk'o'n Jesús Kajwalela. Tuya tzunja c'oquela konena Jay. Tu'n tajwalel Jesús te Nazaret, jxin Scy'o'n tu'n Dios, cxe'ltzen nkba'n tey tu'n tjaw we'y bix tu'n tiy' beta—tzi Pedro texin.

⁷ Bix e tzaj ttzyu'n Pedro tk'abxin te tmank'abxin bix e jaw tii'n Pedro jaxin. Tujx naj tcywix ke tkenxin bix ke tmopxin. ⁸ Bix e jaw lipenxin tej tjaw we'xin, bix ak'xin betel. Axsen e'la tuj twitzxin tjaw lipenxin bix tiy' bet-xin. Tzinxxen na'nxin Dios. Ju'tzen tten tocxxin tuj tja Dios tuya Pedro bix Juan. ⁹ Cykil xsunj xjal tcub oc cyeyente jxin cox nbet-xin bix nk'o'nxin chjonte te Dios. ¹⁰ Nimxxen e jaw klee' ke xjal toc cyye'yen xjal jaj xin cox ncubxix ten ttzii' Cyeca Ttzi'yen te kanl tcoztzin.

Tej tpoeban Pedro twitz jun pe'n te Salomón tbi

¹¹ Tejzen cybaj na'nxin Dios, bixsen etzkegin twitz pe'n Salomón tbi. Yal tzunj xin otk tzul tnaabl, minxxen elxin cyi' Pedro tuya Juan. Yal cye xjal, tzinxsen chi klee' xjal, bix binxxen toc cychmon cyiib xjal. ¹² Tejzen toc cychmon cyiib xjal cyi' Pedro, bix e xi' tkba'n Pedro:

—Key te ntanem te Israel, ¿tu'n tikentzen nimxxen nchi klee'y? ¿Tikentzen nim nchi klee'y oj nko oc cyye'yena jac'a xsunj nuk ku'n keya ma tzula tnaabl jxin coxa? Min bet texin tu'n jun keya kipemal, bix yaa'n nuk tu'n nj nko na'na Dios. ¹³ Yaa'n ju' tewa. Tej ma baja tu'n Dioste, jaj xin Tdios Abraham, Tdios jxin kiy'jil Isaac, tej xin kiy'jil Jacob, bixsen cykil ke kiy'jil. Ja te Dios ma binchan te ja lu tu'ntzen t-xi' tyeec'anxin ka o jax tk'o'nxin Tcwalxin mas jawnex bix o txi' tk'o'nxin nim tipemal Tcwalxin. Jatzen Tcwal xin Jesús, jaxj xin cyey e xi' cyk'o'n tej xin cawel Pilato tu'ntzen tbyet-xin, bix jaxj xin cyey el cyoo'o'n, amale otket cub te Pilato tuj twitz tu'n tex ttzakpi'nxin Jesús. ¹⁴ Jaj xin Scy'o'n tu'n Dios te cawel, jaj xin Jesús ba'n tanem, min e cyyuey. Pero tzunj xin byol xjal Barrabás, jatzen xin e cyyuey tu'n tetz ttzakpet-xin. ¹⁵ Ju' tzunj ejee'y e byonte tej xin xjal tbyel jchunk'lal te junx maj. Pero o jatz titz'jsa'n Dios jaxin. O kila o jatz itz'jxin. Ejoo'ya stsiwa. ¹⁶ Bix lu tzunj xin xjal cox nejl lu, bix cytzki'na twitzxin, matzen tz'oc ke t'c'u'jxin ti' tbi jxin Jesús, bix tu'ntzen tipemal tbi Jesús ma tzula tnaablxin. Tu'nja a tanemxin ti' Jesús, ju'tzen ma tzula tnaabl xina tisenxj tten n-oc cyye'yena.

¹⁷ Ke cyey te ntanem, weya ntzki'na ka minxix otk tz'el cyni'ya ti'j tuya ke cycawela ka ja Jesús Scy'o'nxin tu'n Dios. ¹⁸ Pero amale otket cybinchey ka', yal te Dios max bint texin tu'n ti jilel tajxin, cuma at-xe k'ij cyoolbil-lente ke tyolel Dios ka tu'n tiy'x q'uixc'aj bix tu'n tcyim jxin Scy'o'n tu'n Dios. Jax o tz'e'la tyol Dios. ¹⁹ Pero amale otket bint cyu'na cuma min cytzki'na ka jaxin Tcwal Dios, pero cyu'nx cyey. Ju' tzunj chi meltz'aja cyyaj meltz'aj tuya Dios, tu'ntzen tnajset cyila, ²⁰ bix tu'ntzen tajt tmeltz'u'n Dios jxin Jesús, Scy'o'n tu'n Dios, jaxj xin otk k'oj te cyey. ²¹ Pero te lwewa naj ctemelxte Jesús tuj cya'j, ojxetzen tpon jk'ij te tu'n t'bj tninc'u'n Jesús cykilca nbaj twitz tx'otx', jaj e tkba Dios cye ke tyolel at-xe tyem. ²² Cxe'ltzen nkba'n cyey tu'ntzen cymeltz'aja. C'ulelcaixina tuj cyc'u'ja ti e tkba jxin kxe'chel Moisés: "Jatzente Kman Dios q'ueletz scy'o'nte jun tyolelxin tisenj weya cyxola ejee'y te Israel. Ja tzunxin c'oquel cybi'na bix cyyuey tyolxin. ²³ Al tzunj min ma tz'oc ebinte texin, junxxen maj q'uelel pax cyi'j te Dios t-xjal," tzi Moisés tcyaj tkba'n—tzi Pedro cye xjal, tu'ntzen tel cyniy' xjal ti'j ka ti' Jesús nyolena Moisés tej tkbante xin ju'wa.

²⁴ Bix e xi' tkba'ntl Pedro:

—Ju'xxen tten cyyolen cykil tyolel Dios, jatxe tuyaj xin tyolel Dios Samuel o tzaj bet tyem nyolj ti'j tten Jesús tzalu twitz tx'otx'a, tejxe taj Jesús tuj cya'j. ²⁵ Ke cyey te ntanem, tisenx cyey bix tisenx keya, jatza e'la itz'j ko' cyi'j kej xin kxe'chel ootxa e yolen tej tyol Dios. Ke

cyey bix ko keya ejoo' tzunj cotzlj tej tyol Dios e cyaj tk'o'n cyuya ootxa. Ju'tzen tten tcyajlen tkba'n Dios tyol tej xin itz'jsal kxe'chel, jxin Abraham: "Cykil ke tnom twitz tx'otx' cy'iwla'n chi temela tu'n jun cyey itz'j cyxol ke t-xe'chela," tzi Dios te Abraham.

²⁶ Ejee'y te Israel tneel tnom o tscy'o Dios tu'n tcy'iwlet tu'nj xin xjal, ba'n tcyaj cyk'o'na cyila. Ju' tzunj, cubsanx cywitza—tzi Pedro cye aj judío tuj nin tja Dios.

4

Tej tpon k'i'n Pedro tuya Juan cywitz aj cawel

¹ Pedro tuya Juan nchi yolenxxin cyuya xjal, tej cyul kej pala cye xjal judío cyxklun cyiibxin tuyaj xin cycawel ke c'ojlal tuj nintzaj tja Dios, bix xsun kej xin tej cloj saduceo, ejee'xsen xinj min el jax tuj cywitz ka nchi jatz itz'jtl cymne juntl maj. ² Otkxsen chi tzaj k'ojlxin cuma nchi xnak'tzan Pedro tuya Juan cye xjal, bix tuj cywitzxin otk tz'el cypemalxin bix cuma nchi xnak'tzantzen Juan tuya Pedro ka cykil xjal cjawetz itz'j tisenx otk tyee'an Jesús. ³ Bixsen e cytzyuxin Pedro tuya Juan, bix ocx k'o'nkexin tuj tze'e' tuxe juntl k'ij, cuma ya kaletl bix mintii'tl tyem tu'n t-xi' niq'uet ti' cyilxin, bixsen e cyaj t-xke stis texa juntl k'ij. ⁴ Pero amale ju'te, nimxsen xjal cyxolj otk tz'oc ebinte tyol Pedro jax e'la tuj cywitz. Nukxix xinack'a atle jwe' mil ocslal.

⁵ Tetzen juntl k'ij bix oc cychmon cyiibxin tuj Jerusalén ke cycawel xjal te judío, bix ke nintzaj tij, bix kej xin nmak tx'olbal ley, ⁶ tuyaj xin Anás, nintzaj tneel pala, tuyaxe cabtl te tjaxin, jaantzen Caifás, juntlxin Juan, bixsen Alejandro. ⁷ Bixsen e cykanenxin tu'n cypon Pedro tuya Juan cywitzxin tuyaxe jxin cox otk tzul tnaabl, bix e xi' cykanenxin cye Pedro:

—¿Titzen tten toc cyk'anena ja xjal lu? ¿Altzen o tzaj k'onte cypemala? ¿Altzen cyey o tz'oc k'onte cyajwalel tu'n toc cyk'a'nena jxjal lu?—tzitzen ke pala.

⁸ Pero te Pedro nimxsen tipemalxin tu'n Espíritu Santo, bix aj ttzak'be'nxin:

—Key nin cawel bix xsun kej nintzaj xjal te Israel, ⁹ kane nchi kanena keya ti'j ba'n ma tz'oc kbincha'na ti'j coxa, tu'ntzen cybintey ti tten tul tnaablxin, ¹⁰ chin ttzakpi' tzuna tu'n t-xi' ntx'olba'n cyey bix te cykil xjal te Israel, tej xin xjal lu e k'anj texin tu'n tipemal Jesús te Nazaret, jxin Scy'o'n tu'n Dios, jaxj xin cyey e cybiy twitz cruz, bix jaxj xin e jatz titz'jsa'n Dios tuj cyamecy. Tu'ntzen tajwalel bix tipemal jxin Jesús lu jxin xjala wa'lc'a kuyena cywitza ya ba'ntlxin. ¹¹ Ti'j tzunj xin Jesús lu nyolena tyol Dios nbya'n tu'n cyjulu: "Ja tzunj xak ex cyxoo'n xjal binchal jaa', ja tzunja ma tzul meltz'aj tu'n toc te mas nintzaj xak te t-xee' jaa'." Ejee'y tisen binchal jaa', bix ja xak mas nintzaj, jatzen Jesús. ¹² Tuj cykil twitz tx'otx', min-al juntl tisen Jesús ba'n kco'pj tu'n. Junx biybjaj tjak' cya'j twitz cykil twitz tx'otx' o tz'oc tk'o'n Dios tajwalel te co'pl xjal, ja Jesús—tzi Pedro cye nintzaj xjal.

¹³ Tejtzen toc cybi'n nin cawel cyiw cyc'u'j Pedro tuya Juan nchi yolen, e jawxsen klee' ke xjal, cuma oc ccyce'yen xjal ejee'xin nuk tisen yalx xjalkekin. Min otk chi xa'cx tuj scwela bixsen el cyniy' ke cawel ti'j Pedro bix Juan ka ejee'xin otk chi bet tuya Jesús, bix ju' tzunj nim ba'n cyu'nxin. ¹⁴ Bix cuma wa'lc'a tzunj xin otk tzul tnaabl, ju' tzunj mix e bina cyyolennxin ka' yol cyi'j. ¹⁵ Entonces bix ex chk'etkexin tuj juntl cwart, bixsen e cyaj ke nin cawel te yolel cyjunalxxin. ¹⁶ Tzi tzunkexin cyjulu cyxolxxin:

—¿Titzen kbincha cyuyaj xjal lu? Cykilxsen xjal te Jerusalén itz'kilte ka ma tzul tnaabl xjal cox cyu'n. Mlay kewen. ¹⁷ Pero jax mitetpe tu'n kcuyante tu'n t-xi' itzen cyxnak'atz cyxol xjal. Entonces tu'ntzen tbaj twi', chi oqeltzen ksiy'pu'n tu'ntzen te ja'lewe bix ma txi' bet tyem ya mi'n chi yolentl ti' Jesús te juntl xjal—tzitzen ke cawel.

¹⁸ Bixsen etz cytxco'nxin Pedro tuya Juan juntl maj, bix e xi' cykba'nxin:

—Matzen txi' k'kba'na cyey ya mintzentii'tl tu'n cyyolena bix tu'n cyxnak'tzana xjal ti'j Jesús—tzi tzunkexin.

¹⁹ Pero bix aj ttzak'be'n Pedro tuya Juan:

—¿Titzen cyey nxi' cybisen ti'j? Altzen cye mas jiquen twitz Dios, ¿japaj tu'n toc kbi'na ejee'y, bix ma jaj tu'n toc kbi'na Dios? ²⁰ Yaltzen keya, mlay cyaj kk'o'na ti'jxe ti jilel o tz'oc kbi'na bix o tz'oc kcyeyena, cuma ju' toc tu'n Kman Dios—tzi Pedro tuya Juan.

²¹ Pero bix oc meltz'aj ke cawel te siy'pulec cyexin juntl maj tu'nx mi'n chi cub tenxin tzi'tpulte tpochal Jesús. Yajc'atltzen bixsen e tzakpetkexin. Min e cub kexin tuj castiwa tu'n mintii' il baj, cuma cykilxsen xjal nchi k'on chjonte te Dios ti'j tik'ch otk baj. ²² Jxin xjal otk tzul tnaabl k'i'nxin mas te cya'wnak jnabk'i te tij' bet-xin tneel maj.

Tej t-xi' cykane ocslal tuj naj Dios tu'n ttzaj k'o'n nim cypemalxin tu'n cykba'nxin tyol Dios

²³ Tzinxix nchi tzakpet-xin, bix e xi' Juan tuya Pedro jaa' ta' jcabtlxin t-xel Jesús, bixsen e baj cykba'nxin tik'ch toc cyu'n tajwil na'l Dios bix ke tij xjal cyexin. ²⁴ Tejtzen tbaj cybi'nxin, bixsen el cyniy'xin ti'j ka tu'n cyak'xin xnak'tzal cye xjal tjak' tc'ojlabatz ke cawel, bixsen ak'kexin te na'l Dios cyjulu:

—Taat, jay Kaawa, ja tey e cub binchante cya'j, bix twitz tx'otx', bix mar, bix tik'ch at. ²⁵ Jay e kbante tu'n Espíritu Santo tu'n tyol kxe'chela David tyolela: “¿Tikentzen n-oca cyk'on cyiib te nintzaj cykil tnom twitz tx'otx'? ¿Tikentzen nuk tik'ch nbaj cyniq'uen xjal ti' Dios? Mintii' q'uelela. ²⁶ Ke nmak cawel twitz tx'otx' bixsen ke cawel cyuj tnom matzen tzak' oquel cychmon cyiib tu'n cyoc k'ojlxin ti' Dios bixsen ti'j xin Scy'o'n tu'n Dios te cawel twitz tx'otx'.” tzi tzuna te tyolela David. ²⁷ Bix jax ju'tzen nbaj. Tuj tnom lu, ja tzunj xin cawel Herodes bix xsunj xin cawel Poncio Pilato matzen tz'oc cymojoban cyiibxin cyuya kej xjal judío bix xsun kej xjal yaa'n judío tu'n cyoc k'ojlxin ti'j xin sant Tcwala, jxin e tsicy'a te cawel. ²⁸ Cykil o baj cybincha'n, ja tzunja e tkbay ti jilel tu'n tbaj. ²⁹ Bix ju'x nbaja. Kman Dios, cye'ntza ti nbaj ki'ja. Nko baj siy'pu'na tu'n nko tziitpuna tyola. Keetzten tc'u'ja ki'ja tu'ntzen mi'n tzaj ttzi ki'ja oj t-xi' kyolena tyola. ³⁰ Nuksama, tu'ntzen tipemala tzula cynaabl yaab tu'n toc cybi'n xjal tyola. K'ontza mas tipena keya tu'n tcub kbíncha'na mas tchclala cywitz xjal, tu'n tipemal Tcwala Jesús—ju'tzen tten cyna'n t-xel Jesús te Dios.

³¹ Tejzen cybaj na'nxin Dios, bixsen e tzaj yuchh jaa' jaa'j cychmona cyiibxin. Bix oc nim cypemalxin tu'n Espíritu Santo tu'ntzen k'uklxix cyc'u'jxin oj t-xi' cykba'nxin tyol Dios.

Kej ocslal cykilxsenke cychmon cyiib tuya cykil cyanem

³² Yaltzen cye ocslal, cykilxsenke cychmon cyiib tuya cykil cyanem. Min-axsen jun e kbante ka nuk cye tik'ch cye, sino e baj cypa'ncye xjal tuya juntl wik la' ti tcyajlalel ete'. ³³ Yaltzen ke t-xel Jesús, tuyaxsen nim cypemalxin t-xi' cykba'nxin ti tten tjatz itz'j Jesús tuj cyamecy. Bix enterax ke ocslal e ten tjak' t-xtalbil Dios bix tuj ttzyal. ³⁴ Minxsen-al jun ocslal e ten tuj tcyajlal, cuma alcyej at cytx'otx' bix ma at juntl cyja, bix e xi' cyq'ueyen, bix e tzaj cyii'n twi'. ³⁵ Cye t-xel Jesús, tu'n tcub cypa'nxin cywitz mebe la' ti' tcyajlalel ete'. ³⁶ Tisen tzunj junxin xjal Jos é tbi, jaxsen xinj n-oc tbi cyu'n t-xel Jesús te Bernabé, jatzen elpeninaj “nimsal cyanem xjal.” Jatz elnina itz'jxin cyxol xjal levita. Jatzen itz'jaxin tuj jun lugar Chipre tbi. Jatztzen najlaxin Jerusalén. ³⁷ Ja tzunj xin Jos é e xi' q'ueyente jun ttx'otx'xin, bix e xi' tk'o'nxin twi' cye t-xel Jesús tu'n tajben cyexin.

5

Ananías tuya Safira

¹ Pero atzen junxin xjal min e cub tpa'nxin tik'ch texin tuya cykil tc'u'jxin. Ananías tbixin, bixsen t-xu'lxin Safira tbixuj. Bixsen e xi' cyq'ueyenxin jun cytx'otx'xin cyca'belxin. ² Bixsen e cub cyniq'uenxin tuya t-xu'lxin tu'n tcyaj cyii'nxin jun tkii' ti'j twi' cytx'otx'xin, bixsen e cub cyu'nxin tu'n t-xi' cykba'nxin cye t-xel Jesús ka cykil twi' tx'otx' toclel cyk'o'nxin cyexin. Entonces bixsen e xi' Ananías k'olte tej jun tkii' twi' tx'otx', bix e xi' tk'o'nxin cye t-xel Jesús.

³ Pero bix e xi' tkba'n Pedro te Ananías:

—¿Tu'n tikentzen ncwa' tc'u'n tey juntl tkii' twi' jtx'otx'a te tey? Jma tzaj tk'o'na keya nuk tisenc'a cykil twi' tx'otx' ma tzaj tk'o'na keya. Yaltzen tey matzen xtak'ena twitz Espíritu Santo. ¿Tu'n tiken ma tz'oca tbi'na ti jilel ma tz'oc tk'o'n taaw il Satanás tey? ⁴ Mintii'xix te il ti'j tu'n t-xi' tq'ueyena ttx'otx'a. Bix ka taja t-xi' tq'ueyena, ja tey taaw. Te tey, bixet t-xi' tc'u'na cykil twi' ttx'otx'a, cuma tey. ¿Pero tu'n tikentzen xcwa' tbsena ti'j tu'n tcub tyajla'na ejoo'ya cyjulu? Pero jaxxix min ma xtak'en tey twitz xjal, sino twitz Dios—tzi Pedro te Ananías.

⁵ Tejzen toc tbi'n Ananías kej yol ju'wa, bix e cub tz'akxin cymneltxin twitz tx'otx'. Cykilxsen xjal oc ebinte ti otk baj te Ananías, bixsen oc ttzi cyi' xjal. ⁶ Yajc'atlzen bix ul cabk'a xjal tuya jun sávana, bix iy'x cymaksi'nk'a t-xumlal cymne tuya, bix iy' cyii'nk'a te mukbil.

⁷ Otktzen bint oxe hora tej tocpan jxuj Safira, t-xu'lxin cymne. Mintii' tumel tuyaxuj ti otk baj. ⁸ Bix e xi' tkanen Pedro texuj:

—Kbantz we, jpwak ma tzaj cyk'o'na keya, ¿cykilpa twi' jtx'otx' ja lu?—tzi Pedro.

—Jaxte cykilte twi' tx'otx'—tzi Safira.

⁹ Entonces bix e xi' tkba'n Pedro:

—¿Titzen tten ma chi xtak'ena twitz Dios? Yaltzen ja'lewe, ebin xsunj alj tzul beta. Lu tzajne tzaj nkayena ejee'j k'a xjal xi cu'x mkunte tchmila. Bix ju'x tey, ejeexk'a chi xe'l k'inte tey tuj mukbil—tzi Pedro texuj.

¹⁰ Tzinxix nxi' baj tkbante Pedro ju'wa, tzin ncub tz'ak Safira t-xee' tken Pedro cymneltxuj. Tejzen cyocpan jk'a xjal, cymneltxuj toc cycye'yenk'a. Jax bix etz cyii'nk'a jaxuj te mukbil, bix e cu'xxuj ttxlaj tchmilxuj. ¹¹ Cykil xsunj xjal te tja Dios, bix cykilkej ebin tej ju'wa bix xsun kej oc cyeyente tcyamecy Ananías bixsen t-xu'lxin Safira tu'n cyxtak'bil, nimsen ttzi e cub cyi' xjal.

Nimxsen techel bix tbanel e bintl cyu'n t-xel Jesús

¹² Nimxsen techlal bixsen k'anj ke xjal e bint cyu'n t-xel Jesús cyxol xjal. Bixsen ke cye ocslal jaca k'ij nchi chmet tuj nintzaj tja Dios, twitz tpe'n tunwen Salomón tbi. ¹³ Yal tzun kej xjal yaa'n ocslal, tej tcyim Ananías tuya Safira cywitzt t-xel Jesús, bix e tzaj ttzi cyi' xjal kej xin t-xel Jesús, pero nim oc cybi'n xjal ejee'xin. Pero chebe ak'ke xjal ebil cyyolxin, bix oc ke xjal ocslal. ¹⁴ Pero mixsen jtoo ju'wa. Nimxsen xjal ak' ebilec tyol Jesús, xuujle, xinakle. ¹⁵ Tu'ntzen nim techlal e bint cyu'n t-xel Jesús, nimxsen tpochal el, hasta etz cyii'n xjal ke cyyaab tuj be twitz wetbil, twitz pop, tu'ntzen oj tiy' bet Pedro tuj be, amaten nuk t-xlequemal Pedro tziy' cyibaj yaab, tu'n tul cynaabl. ¹⁶ Jax ju'x cyuj nim tnom ttxlaj Jerusalén, nimxsen xjal ul Jerusalén, k'i'ntzen ke yaab cyu'n, bix xsun kej otk tz'oc biman cyi'j. Cykilxsenke ul cynaabl.

Tej cyjaw tzyet Pedro tuya Juan

¹⁷ Pero tejtzen toc cycye'yen nimxsen xjal lepchech cyi' t-xel Jesús, bixsen oc chi'l jxin tneel cawel cyibaj pala tuj nintzaj tja Dios, bix xsun kej xin at tuyaxin, bix kej xin saduceo. ¹⁸ Tu'ntzen tchi'lel cyc'u'jxin bix ex cysma'nxin tu'n cytzyet ke t-xel Jesús, bix occkexin tuj tzee' cywitzt xjal. ¹⁹ Pero tejtzen tclub klolj, bix e pon jun tsanjel Dios e tzaj tuj cya'j, bix el tjko'nxin tlemel tzee', bix etzkegin, bixsen e xi' tkba'n tsanjel Dios cye t-xel Jesús:

²⁰ —Cyix cyxi'y. Cyocxsen tuj nintzaj tja Dios, bix mi'n baj cyc'u'ja tu'n cyk'umenxsen ti ttenj ac'aj chunk'lal tuya Dios, bix ti elpenina—tzi tsanjel Dios.

²¹ Tejtzen toc cybi'n t-xel Jesús, tetzen klaxc'a, bix occkexin tuj nintzaj tja Dios, bix ak'kexin xnak'tzalec cye xjal.

Jooctzen nbaj, tchmonte tneel pala tiib cyuya nintzaj consejo te ni'c'ul cyley tuj cyreligión judío tujx jjaa' jaa' n-oca cychmon cyiibxin. Bixsen e tzaj cytxc'o'nxin kej xin nintzaj tij cyxol xjal judío. Tejtzen tbaq cychmon cyiibxin, bix e xi' ik'bajkexin tuj tzee' tu'n cypon jxin t-xel Jesús cywitztzin. ²² Entoces bixsen e xi' ke cypolicia nintzaj xjal te k'il kexin, pero te cypon policia, min-altlkexin tuj tzee'. Bixsen ajtzkexin te kbalte cyuya pala cyuya consejo. ²³ Bix e xi' cykba'nxin cye cawel:

—Kej tlemel tzee' jaa' ete'cxa kej pres jpu'nte, bix ke c'o'jlan nchi c'o'jlan cyexin pe'n. Pero tejtzen tocx k'jko'na tzee', min-altl tocx tunwen—tztizen ke policia cye cawel.

²⁴ Tejtzen toc tbi'n jxin cawel cyibaj c'o'jlan tja Dios bixsen tneel pala, e jaw klee'kexin, bix ak'kexin kanlte te cyeeylexxin ti otk baj, bix ti tten oj tel tpochal. ²⁵ Pero lwewa ul naj jun xjal bix ocx kbet cyexin:

—¡Cycye'yentz! Kej xjal ocx cyk'o'na tuj tzee', lu ke nchi xnak'tzan ja'lecuwe tuj nintzaj tja Dios—tzi tzunj xjal cye ke cawel.

²⁶ Toctzen cybi'n xin jcawel cyibaj c'o'jlan tja Dios ju'wa, ja tzunj xin cawel cyuya cabtl c'o'jlan bix e xi'kexin jaa' ete' t-xel Jesús, tu'ntzen cytzej k'i'nxin cywitzt nintzaj cawel. Pero min ocxix tenke c'o'jlan yajlalte cyexin, cuma cytzi xjal cyi' c'o'jlan. ²⁷ Tejtzen cyul k'i'nxin, bix e cub wabatkexin cywitzt consejo. Bixsen e xi' tkanen tneel pala cyexin:

²⁸ —Cyiw o txi' kkba'na cyey tu'n mi'n chi yolena ti' Jesús. ¿Pero titzen ma cybinchey? ¡Jun wikxiit ma cybinchey! Ma tz'ex baj ttzitpuj tyol Jesús cyu'na tuj cykil Jerusalén. Yaa'ntzen o'cx ma tz'oca cyu'na, sino cyaj tzuna tz'oc cyk'o'na te kiketzen cyimlen jxjal Jesús—tztizen tneel pala cye t-xel Jesús.

²⁹ Pero bix aj ttzak'be'n Pedro tuyaj cabtlxin t-xel Jesús:

—May'te, taat, ma bint ke ku'n ti jylid o cykbay keya. Pero keya te ke, ja tej tyol Dios mas il ti'j twitz cyool xjal. ³⁰ Ja Dios, jaj xin Cydios kej xin ootxa kxe'chel, jatzen xinj e jatz itz'jsante Jesús tuj tcyamecy. Pero ejee'tzen cyey xjal, ejee'tzen cyey e binchante tu'n tclubxin, bix e cubxxin cyu'na twitz cruz tisen jun nuk yalx xjal byol. ³¹ Pero tej xin Jesús oc cycye'yena tisen jun byol, jatzente xjal o jax ti'i'n Dios tuj cya'j. O cub kexin tuj tman'ab Dios, bix o tz'oc nim tajwalelxin tu'n Dios. O tz'ocxin te mas nintzaj cawel cye xjal, bix co'pl xjal, tu'ntzen ba'n cyco'pj xjal te Israel tuj cyil. Bix ka ma chi etza tuj cyila, chi co'pjel cyey tuj cyila. ³² Keya jaxxix ke kyol, bix ba'n tu'n Espíritu Santo kyola, cuma la' alj ma tz'oc ebinte tyol Dios, ntzaj tk'o'nte Dios Espíritu Santo te cycotz—tztizen ke t-xel Jesús cye cawel.

³³ Tejtzen toc cybi'n ke cawel tuj consejo kej yola, bix e tzaj k'o'jlkexin nim. Tu'ntzen tchi'lel cyc'u'jxin cyajxin e cub cybo'nxin ke t-xel Jesús. ³⁴ Pero cyxoltzen nintzaj consejo at jun tij xjal tej cloj fariseo, kej xin nimal tuj tley Moisés. Jxin xjal Gamaliel tboxin. Gamaliel tx'olbal leyxin, bix ebi'n xsunxin cyu'n xjal. Ja tzunj xin Gamaliel bix e jaw we'xin cyxol ke tuyaxin, bix e xi' tkanenxin tu'n tyolenxin. Bix e xi' tkba'nxin tu'n cyetz k'i'n t-xel Jesús jun tkiy' tu'ntzen mi'n tz'oc cybi'nxin ti' tyol Gamaliel. ³⁵ Entoces bixsen e xi' tkba'n Gamaliel cyej cabtlxin tuyaxin:

—Key te ntanem Israel, cxe'lxiix cycye'yena ti chi temeley cyuyaj xjal lu. ³⁶ Tzulc'axna tuj cyc'u'ja ma bint cab tyem jxin Teudas ocxin te nintzaj xjal, bix oc meltz'ajxin k'o'jlel ti' gobierno tuya cyaja syent xjal. Pero cwax tbyet Teudas. Yal tzun kej oc lpe ti'j, bix el tztiztke,

bix e baj twi'. ³⁷ Ju'x e baj tuyaj xin Judas tuj Galilea. Te tzun kej k'ij tej njaw tumel tajlal xjal tu'n gobierno, bixsen oc k'ojlkexin ti' gobierno cyuya ke tuyaxin. Pero cwax tcubxin bix cykilca kej xjal oc lpe ti'jxin el t'zitj. ³⁸ Ch'innc'etzen ju'x pjel te ja lu. Ju' tzunj cxe'l nkba'n cyey tu'n mi'n chi cub cybyo'na, cuma ka yaa'n te Dios cyaak'en, ka nuk cyex, cykil pjel twi', tisen e baj cyej xjal ma txi' nkba'n cyey. ³⁹ Pero ka jax te Dios cyaak'en ncub bint, mlayx bint cyu'na tu'n tcub yabajs'na. Cyk'o'ncix cyc'u'ja ti'j mi'n tz'oc cyk'on cyiiba te k'ojlel ti' Dios—t'zitzen Gamaliel cye ke nintzaj consejo te stis.

⁴⁰ Cykil xsunkexin oc ebin tej tyol Gamaliel. Entonces bixsen e tzaj cytxco'nxin ke t-xel Jesús juntl maj, bixsen el k'i'nke cyi'jxin, bixsen e xi' nim tz'u'n cyi'jxin. Bix juntl maj e xi' kbet cyexin tu'n mi'n chi yolenxin mas ti'j Jesús. Yajc'atltzen bix ex tzakpetkexin.

⁴¹ Entonces bix etz ke t-xel Jesús cywitz nintzaj consejo te stis cyxol xjal judío. Axsen ttzyal cuma otk tcuya Dios tu'n tiy'x cawbil cyu'nxin nuk ti'jc'a Jesús. Ba'nxsen e'la tuj cywitzxin.

⁴² Bix min oc cybi'nxin cywol cawel, sino jaca k'ij iy'kexin ttzii' cyja xjal, bixsen tuj nin tja Dios e kbanxexin ti'j tten Jesús, jxin Scy'o'n tu'n Dios.

6

Tej tjaw scy'et wuuk ak'anal tuj taak'en Dios

¹ Yaltzen tajlal ocslal, t'z'inyax ttz'iy. Pero maatkxsen txolen ttz'iy, attzen jun yol e jaw. Atzen ocslal judío cye chi yolen tuj cywol xjal griego, bix atl judío ba'n yolen tuj hebreo. Cyxol jca'ba cloj xjal at nim viuda. Ejee' tzunj xuuj viuda bix e baj paax cywa jaca k'ij. Pero ejee' tzunj viuda aj griego octzen cykanbil xjal ka yaa'n ju'x tken cywa n-etz tisenx kej xuuj aj hebreo. Ju' tzunj e jaw jun k'oj. ² Entonces bixsen oc chmet cykil ocslal tu'nj cablajaj xin t-xel Jesús, bix e xi' cykba'nxin:

—Cyajtzen cyey ejoo' keya ko xe'l ninc'unte cyey cyk'oj. Pero yaa'n ba'n tu'n tcyaj kk'o'na kxnak'atza nuk tu'n ejoo'ya ko xe'l pa'n te cyway. ³ Ju' tzunj, key ocslal, cyjyonxa wuuk xinak cyxola te ninc'ulte cyey. Ja tzunj wuuk xjala c'oquelxix ke cyc'u'j xjal cyi'j bix c'oquelxix cybi'n xjal ejee', bix cbinelxix cyu'n, bix ejee'j ebilte Espíritu Santo. Ojzen tcnet wuuk xjal tisenj nxi' kkba'na cyey, ejoo'tzen keya ko oquel wa'bencye ti'j ja ak'untla te pa'lte cyway. ⁴ Yaltzen keya, cxe'lx kii'nke kaak'en te na'l Dios bix te kbalte tyol Dios—t'zitzen ke t-xel Jesús cye ocslal.

⁵ Cykilxsen ke ocslal oc ebinte ju'wa. Bix etz scy'et ja wuuk xjal lu: Esteban, junxin xjal axsen tanemxin ti' Dios, bix nuk ebilxxin ti' Espíritu Santo, ju'x jxin Felipe, jxin Prócoro, jxin Niconor, jxin Timón, jxin Parmenas, bixsen Nicolás, jun xjal te Antioquia nejl ocslalxin ti' cyreligión judío, pero ya otk tz'ocslanxin Jesús. ⁶ Cykil tzun kej xin lu e pon cywitz t-xel Jesús bix e baj na't Dios cyibajxin, bixsen oc cyajwalelxin tu'nj tcublen cyk'ab t-xel Jesús cyibajxin.

⁷ Ju'tzen tten tbinlen ke ocslal te Dios, bix xi'ne e xi' tz'iy. Tyol Dios e xi' tz'iy cyxol xjal, bix jawnxsen e jaw tken tajlal ocslal tuj Jerusalén, bix nimxsen pala cye judío e cub cych'ixbe'n cynaabl tu'n oc ke cyc'u'jxin ti' Jesús.

Tej ttzyet Esteban

⁸ Ja tzunj xin Esteban nimxsen tipemal Dios at tuyaxin, bix nim xtalbil tibajxin, bix jaj nimxsen techlal tipemal Dios e bint tu'nxin cyxol xjal.

⁹ Pero attzen cabxin oc ten cyakwusalecte Esteban, bix e k'ojlke tuya Esteban. Ejee' tzunj xin oc k'ojl ti' Esteban, te jun camon jaa' te xnak'tzabl tyol Dioskexin jaa'j e chmeta kej xjal otk chi tzakpet tuj ak'untl tjak' tcawbil Roma. Jatzen otk chi tzaa'xin tuj tnóm te Cirene, Alejandria, bix Cilicia, bixsen tuj ttx'otx' Asia, tu'n cyponxin tuj Jerusalén. ¹⁰ Ejee' tzunj xin lu e k'ojlkexin tuya Esteban, pero mix e xcyebake ti'jxin, cuma texin e yolenxin tuya tonbil Espíritu Santo. ¹¹ Entonces tu'ntzen tchi'lel cyc'u'jxin, bixsen oc cychjo'nxin tuj ewjel cabtl xjal tu'ntzen tbaj bint xtak'bil ti' Esteban tisen ka otk tz'oc cybi'nxin tyol Esteban ka' ti' Moisés bixsen ti' Dios. ¹² Ju'tzen tten tbaj cyxtz'imemxin cywitz xjal bixsen ke tij xjal bixsen ke tx'olbal ley. Bixsen e cytzyuxin ja Esteban, bix e xi' k'i'nxin cywitz ke nintzaj cyconsejo judío. ¹³ Bixsen e pon kej xin xtak' tstiwa, bix e cykbaxin ka min cyaj tyolen ka' yol Esteban tibaj tja Dios bixsen ti' tyol Moisés. ¹⁴ Bixsen oc tyol Esteban te cysakchbilxin. T'zi tzunkexin cyjulu:

—O t'oc kbi'na tyol xjal lu ka jxin Jesús te Nazaret cwel t-xitenxin nin tja Dios bix ctch'ixbe'xin jcostumbre o cyaj tk'o'n Moisés—t'zitzen ke xtak' cye cawel.

¹⁵ Yaltzen ke cawel, bixsen ke cykil kej xjal k'ukl, occa cycye'yen xjal ja Esteban. Pero tej toc cycye'yenxin twitzxin, nkoptz'ajxsen twitzxin tisenxsen twitz jun tsanjel Dios tuj cya'j.

7

Tej tyole Esteban tu'n tco'pan tiib cywitz aj cawel

¹ Entonces ja tzunj xin pala nintzaj cyaewel cyibaj mas pala cyxol xjal judío e xi' kanente te Esteban:

—¿Jaxpa ka ma tz'oc meltz'aja ti' tley Moisés? Jatzen cykanbil xjal jti'ja, ¿jaxpa?—tzi tajwil na'l Dios.

² Bix aj ttzak'be'n Esteban:

—Cybintza, taat, key te nanem, cybintz ch'ina jun rato. Wajtzen txi' ntx'olba'n ch'in ti'j nbint tu'n Dios ti' kloq'uel bix cyi' kxe'chel ootxa, bix ti'j ox chi cub tzpet kloq'uel tuj taj Dios bint.

Tneelxsen cxe'l nkba'n ti'j jxin kxe'chel Abraham. Tej i'tzx Abraham tuj ttx'otx' Mesopotamia, ja tzunj xin nintzaj Kdios el jlet twitz Abraham tisen cyey cytzki'ntla. ³ Bix e xi' tkba'n Dios te Abraham: “Abraham, k'onj ttx'otx'a bixsen alkch te tjaj, bix ctexsen tzalu, bix lpetztzen wi'j tuj tx'otx' cxe'l nyeeec'an tey,” tzi Dios te Abraham. ⁴ Bix etz Abraham tuj ttx'otx' Mesopotamia, juntl tbi Caldea. Pero tejtzen tponxin tuj Harán, bix e cyajxin cab k'ij jatzewe. Cwa tcyim tmanxin tuj tnom Harán. Mas yajtl, bixsen iy'tii' Dios jaxin tuj ttx'otx' Canaán, jaa' tcwa' Israel ja'lewe, jaa'j najla ko'we. ⁵ Yaltzen ja'lewe, ketltzen, pero tej k'ij tej tul Abraham, pero mi nuketpe jun bara oc tetzen Abraham. Mitkx n-oca tk'o'n Dios texin. Pero otk txi' tkba'n Dios texin tu'n tcub tcmo'nxin, bix la' altzen cye k'ij tetzen ke tchmanxin tu'n cyeke tisen cycotz. Bix e tkba te Dios ja lu jatxe tej min-alte Abraham tcwal. ⁶ Bix jax e xi' tk'o'n Dios juntl tumel te Abraham: “Kej tey t-xe'chel chi najalcye tuj juntl tx'otx'. Cyaja syent jnabk' chi najal tey tloq'uel jatzewe. Chi ak'analcy, pero mintii' chojbilcy. Chi ak'anal nuk cotz. Tetzen t-xel twi' cyc'u'j, jatzen cyiik'el jnimxsen ka' c'oquel cybinchen xjal cyi'j. ⁷ Pero cwax oj cyetz jatzewe, bix chi altz meltz'aj tuj ja tx'otx' lu juntl maj, tu'n cyajben we. Yal tzun kej xjal c'oquel binchen tej ka' cyi'j tcwala, inayenxsenwe chin cwel k'onte il cyibaj,” ju'tzen toc tu'n Dios te Abraham tej tpon Abraham tuj tx'otx' otk tz'oc oyet texin. ⁸ Bix tu'ntzen tcyaj kej yola tuj chic'aj, bixsen e cub bint jun tyol Dios tuya Abraham. Jatzen cyyolxin e cub bint, jatzen Abraham cyuya ke t-xe'chel, ke xjal te Israel, cycyocleltzen te t-xjal Dios. Yaltzen te Abraham, cyuya ke tcwal, t-xi'leltzen tyeeec'anxin techlal tyolxin, teltzen keset ttz'umel twi' cytz'albil jxjal xinak. Ju' tzunj tej titz'j tcwal Abraham, Isaac, bix el tkesenxin ttz'umel twi' ttz'albil Isaac te wajxak k'ij titz'jlen. Jaxsen ju'x te Isaac tuya tcwal Jacob, bix ju'x e tse Jacob tuyaj cablaaj tcwalxin. Ejee' tzunj cablajajxin tcwal Jacob e cub itz'jsante jcablajaj cloj xjal te Israel, tisen cyey cytzki'ntla.

⁹ Jatzen jun xin cyxol jcablajajxin itz'jsalcatej, jxin José. Otkx tzaj texin te co'pl t-xjalxin tuj weyaj. Pero yaa'ntzen telni'y'xin ka ju' xina, sino el xoo'nxin. Yaltzen ke ttzicyxin tzinxsen nk'ak'en cyanemxin tuya tchi'lel cyc'u'j, bix e xi' q'ueyet-xin cye xjal te Egipto tu'n tak'anaxin nuk cotz. E bint cyu'nxin ju'wa cuma jaxin achen tu'n cymaxin cywitzxin. Ju'tzele tewa. Pero atte Dios tuya José. ¹⁰ Pero cwax tco'pjxin tuj il, bix e tak' Dios nim tu'n tiy' tilbilxin ti'j, bix e tak' Dios texin tu'n tten t-xtalbil cawel te Egipto ti'jxin, bix ocxin te tcab cawel tibaj cykil ttx'otx' Egipto tu'n nin cawel. Bix oc tk'o'n cawel tajwalelxin tu'n tcawenxin tibaj tja cawel.

¹¹ Entonces bixsen e tzaj weyaj tibaj cykil ttx'otx' Egipto. Jaxsen tyemj tul weyaj tibaj Canaán, jaa'j najla ttzicy José, ke kchman ootxa. Cyiwxsen cychunk'lalxin tu'n weyaj. Min e cnet cywaxin. ¹² Pero tejtzen tshintte Jacob tumel ka at triwa tuj Egipto, bixsen e xi' tchko'nxin ke tcwalxin te lok'olte. Ju'tzen tten cyxi'len ke ootxa xjal te tneel maj cykenxin te lok'ol waabj tuj Egipto. Jatztzen e poná cnet José cyu'nxin. Pero min el cyniy'xin ti' José. ¹³ Eltzen cabtl xjaw, bix e baj cywaxin tuj Canaán. Iltzen ti'j tu'n cyxi'xin Egipto juntl maj. Entonces bix e xi'kexin te tcab maj. Te tzunj juntl maja, bixsen e tyeeec'a tiib José cye ttzicy. Bix te xsunja maj lu tej tel tniy' cawel ti' José te jaa'xin, bixsen el tniy'xin ti'j jaa' elnina itz'j José. ¹⁴ Bix ajtz meltz'aj ke ttzicy José Egipto tu'n cyponxin tuj Canaán. K'i'ntzen jun txoquen José cyu'nxin tu'n cyxi'xin cykilke te cyjaxin najal tuj Egipto. Tejtzen cyul meltz'ajxin te toxen maj, bixsen e xi'kexin cykilcaxin, atle ama nuk oxc'al tuya olajaj xjal. ¹⁵ Ju'tzen tten tpomlen Jacob najal Egipto, bix jatztzen e cyma' xina. Bix tujtzen Egipto e cyma' José, bixsen ke ttzicyxin, ejee'tzen kxe'chel te ootxa. ¹⁶ Tejtzen cybaj cyimxin, bix aj k'it cyxumlalxin mas yaj tuj ktanem. Tzalutzen moku'nakexin tuj cyjayelxin otk tlok' Abraham. Otk tz'el tlok'o'nxin te junxin xjal Hamor tbixin, tej tnom te Siquem, tisen cyey cytzki'ntla.

¹⁷ Ke ootxa xjal e najankexin nim tyem tuj Egipto. Bix e tzi'tpajkexin, bix tij e tzi'y' xsunkexin. Pero cwax tpon tyem tu'n tbi'ntj otk toye Dios te Abraham, tu'nx cyaj meltz'aj ke kchman ootxa tujx ke ktx'otx'. ¹⁸ Pero tuj xsunj tyem lu atzen junxin cawel tibaj Egipto, junxin cawel min ul José tuj tc'u'jxin, bix min oc tbi'nxin tyol José. ¹⁹ Ja tzunj xin cawel lu nimxsen e baj tyajla'nxin bix nimxsen tcyajlal i'ya ke kchman tu'nxin. Bix oc tlomo'nxin ke xjal tu'n tcyaj cyce'yen ke cycwal xinak, tu'ntzen ccyim ke nee' ac'aj xinak txolen cyitz'j. ²⁰ Tuj tzunj tyem lu tej tiz'tj Moisés. Jun nee' cwal na'n twitz Dios, bix nee' cyeca

xsunxin, bix el ewet-xin tunwen cyu'n tmanxin te oxo xjaw. ²¹ Pero cwa tpon jk'ij tu'n ya mixben tclub ewetl nee' cwal, bix e pon jk'ij tu'n tcyaj cyeyet. Pero jaltzen tmeel cawel tibaj Egipto iy' k'inte, bix oc t'z'isentxin nee' tisen jun taltxin. ²² Ju'tzen tten t-xnak'tzetlen Moisés tuya tik'ch ba'n tu'n Egipto. Bix tejtzen tocxin ma xjal, axsen jun yolennin, bix nimxsen e bint tu'nxin. ²³ Attzen jun k'ij ya nukxix n-elactlxin twi' cya'wnak jnabk'i, bix ul tuj t'c'u'j Moisés tu'n t-xi'xin k'olbelcye te ttanemxin, ke te Israel, jatzex najlake Egipto. ²⁴ Pero tejtzen tponxin tuj lugar, bix oc tcyeyenxin nimxsen il ni'ya cabtl te ttanemxin tu'n junxin te Egipto. Toctzen tcyeyenxin, bix e tzaj k'o'jlxin, bix e cub tbyo'nxin jxin aj Egipto. ²⁵ Jatzex tuj twitz Moisés tel-letzen cyniy' te ttanemxin ti'j ka tu'nxin tel-letzen to'pan Dios ke te ttanemxin tuj cyk'ab aj Egipto. Pero min el ba'n tuj cywitz aj Israel.

²⁶ Tetzen juntl k'ij bix e xi' Moisés k'olbelcye xjal te Israel juntl maj. Pero te tzunja juntl maj lu, bix oc tcyeyenxin ca'ba te ttanemxin nchi k'o'jl cyil cyiib cyiib. Taj tzunxin e cub tpa'nxin ejee', bix e xi' tkba'nxin cye cyjulu: "Key taat, mixben cyk'o'jl cyey cyjulu, cuma te cytanem cyiiba. ¡Mi'n chi k'o'jla mas!" tzi Moisés t-xi' tkba'n cyexin.

²⁷ Pero tzunj juntlxin toc pjulec tej juntlxin, bix ex tlomo'nxin ja Moisés, bix oc tkba'nxin te Moisés: "¿Al tey ma tz'oc k'onte te cawel keya kibaja?" ²⁸ ¿Tajpey chin cub tbyo'na tisenj e tsey jxjal aj Egipto ewe?" t'zixin te Moisés.

²⁹ Toctzen tbi'n Moisés ju'wa, bix el tniy'xin ti'j ka otk tz'el niy' ti'jxin ka jaxin otk cub byon tej xin aj Egipto. Bix el okxin. Bix e ponxin tuj ttx'otx' Madián. Jaxsen e temaxin jtisen jun te nakch xjal. Bix e majexin tuya jun xuuj te Madián, bix itz'j ca'ba tcalxin.

³⁰ Exsen cya'wnak jnabk'i. Attzen jun k'ij ncylen Moisés tuj chk'ajlaj nka taj witz Sinaí, tej t-xi' tcyeyenxin jun wi' ch'i'x njulen tuya k'ak'. Bix e jaw jlet jun tisenca jun tsanjel Dios tuj tken k'ak'. ³¹ Tejtzen toc tcyeyen Moisés, e jawxsen klee'xin, bix e xi' lk'exin te cyey'lecte nka tu'n tocxix tcyeyenxin tixix tten. Pero tujtzen tken k'ak' etza tyol Dios. Tzi tyol cyjulu: ³² "Inayenwe Jcydios ke cychmana, Tdios Abraham, Tdios Isaac, bixsen Tdios Jacob," t'zitzen tyol Dios. Tejtzen toc tbi'n Moisés tuj twi' Dios, bix e jaw lu'lenxin tu'n t'zixi. Ya min ocox tcyeyentlxin tken k'ak'.

³³ Pero te Dios, bix ak'x tecxin yolel: "K'imal ke t-xaaba tu'n ttzaj tyec'ana mas tanema we tuj ja lugar lu, cuma ja tx'otx' jaa' t'cwa'y xjan tx'otx' teja. ³⁴ Cxe'l nkba'n tey ma tz'oc ncyeyen ti' tka'yel ete' nxjal te Israel tuj cyk'ab xjal te Egipto. O nbi tzinxsen nchi kanen xtalbil, bix matzen chin tzaj te co'plcye. Pero tuya tonbila chi co'pjela. Quixtetzen. Matzen txi' nsma'na Egipto," tzi Dios te Moisés—tzi Esteban cye cawel tuj consejo.

³⁵ Bix ak'x Esteban kbalte:

—Key taat, ja xsunj xin Moisés lu el cyxoo'n xjal te Israel tuya cyool cyjulu: "¿Altzen ma tz'oc k'onte tey te cawel keya kibaja?" tzi tzunkexin. Bix jaj xsunj Moisés lu e cyaj tk'o'n Dios tajwalel te cawel bix te co'pel cye xjal te Israel tuj tk'ab cawel te Egipto. Ja te Dios e yolen tu'n tyol tsanjel tuj tken k'ak' tuj ch'i'x. ³⁶ Jatzex Moisésj etz k'inte cye kchman ootxa tuj ttx'otx' Egipto. Cytzki'ntlxen cyey ja Moisésj e binchan tej techlal bix nim sey'pajlenel tuj Egipto, bixsen t'zixi' Cyak Mar. Bix jaxsen xinj oc c'o'jancye aj Israel te cya'wnak jnabk'i tuj tzikij tx'otx'. ³⁷ Bix jaxsen Moisésj e xi' kbante cye xjal te Israel: "La' alcye jun k'ij q'ueletz tscy'o'n Dios jun nintzaj xjal yec'l be cyxol aj Israel te kbalte tyol Dios cye xjal, tisenj ma chin etz tscy'o'n weya Dios," tzi Moisés. ³⁸ Jaxsen Moisésj el xoo'n cyu'n xjal, jajxsen xinj ajben te yolel cyxol xjal tuya Dios tej cychmet xjal t-xee' jwitz te Sinaí. Nuktzen tu'nc'a Moisés e binne cyyolen kchman tuya Dios, bix nuk tu'nc'a Moisés e tzaa' tk'o'n Dios ke tley cye xjal. Kej yol lu ejee'tzen yol jte cychunk'lal xjal tuya Dios. ³⁹ Nuket bix oc cybi'n ke ootxa xjal ke ja yola, bixitle e tzaj tk'o'n Dios cychunk'lal te junx maj, pero bix el cyxoo'n. Min e cybi, bix el cyxoo'n Moisés. Yaltzen tuj cyanem e cyajbex tu'n cyaj meltz'aj tujx cychunk'lal te ootxa tuj Egipto. ⁴⁰ Pero min oc cybi'n ja Moisés, sino oc cykanbil twitz Aarón, tzicy Moisés: "Taata, min ktzki'na ti ma baj te Moisés, jxin etz k'inte keya tuj Egipto. Jatzex tey, keya kuya kbincia'c'atzen cab kdios tu'ntzen t-xi' k'inte ke," t'zitzen ke ootxa xjal te Aarón. ⁴¹ Entonces bixsen e cub cybincha'n xjal junjil wax' nukxsen oro ttx'otx'elzil, bixsen oc ten ke xjal patlc'a alimaj te cyoybil twitz. Bix axsen ttzjal ta' cyc'u'j xjal ti'j otk bint cyu'n xjal tuya cyk'ab. ⁴² Entonces bix el tpa'n tiib Dios cyi' xjal, bix e cyaj tcyeyen Dios ejee' xjal la' ti jilel e cyajbe tclub hint cyu'n. Bixsen e na'nke xjal ke che'w tuj cyaj. Ootxa tyol Dios nyolen tuj libro te Amós ti'j e baj. Tzi Dios cyjulu tuj u'j te Amós: "¡Xjal te Israel! ¿Tepatzen we jkej jil alimaj e tzaj cyoyena we tej cytena tuj tzikij tx'otx' cya'wnak jnabk'i? ¡Min! Ju' tten cyu'na, pero tuj cyanema, min. ⁴³ Te t-xelj tu'n cyoc tena na'l we, bix oc tenkey na'l tdios k'ij Moloc tbi, bix e na'nkey dios twitz jun dios che'w, dios te Renfán. Ejee'tzen cyey cydios ajben cyey. E na'nkey dios twitz kej diosa nuk tu'n cyk'aba. Ju' tzunj ma chi ex wii'na tuj cytx'otx'a. Matzen che'x nch'k'o'na tuj jun tx'otx' nakch, mas nakch ti' tx'otx' te Babilonia," tzi Dios cye xjal te Israel, kej min oc cybi'n Dios, tzi tyolel Dios Amós at-xe jnabk'i—t'zitzen Esteban cye judío tuj Jerusalén.

⁴⁴ Bix ak'x Esteban yolel:

—Yaltzen ja'lewe c'aaltzen ntzak'be'n cabtl yol ti'j yol wi'ja ti'j nin tja Dios. Cytzki'ntltzen cyey ke kchman ootxa e ten jun tja Dios puro xbalen, jaa' e tema Dios, jaa'xja che'xaxin ti'j tuj tzkij tx'otx' bix tziy' cyii'nxin Dios cyuyaxin. Ja xbalen t'ubel Dios e bint cyu'nxin tisenxj otk tkba Dios te Moisés, bix tisen'axj otk tz'oc tcyeyen Moisés twi' jwitz te Sinaí. ⁴⁵ Ja xbalen tja Dios, bix e xi' cyii'n ootxa xjal tuj ttx'otx' Canaán. Tuya cycawelxin Josué bixsen e cub cychmo'nxin tuj Canaán. Tuyatzen tonbil Dios e xcyebakexin cyibaj xjal ka' te Canaán. Cykilxsen tyem, jatxe tuj ttem Moisés tejxe tpon baj ttem cawel David, ke ootxa xjal e tenx cyexin t'ajel Dios cyxol. Mintii' cyexin nin tja Dios cyuya. ⁴⁶ Pero nimxsen t-xalbil David tuya Dios, bix e xi' t'kanenxin xtalbil te Dios tu'ntzen t'jaw t'bincha'nxin jun jaa' te tja Dios jaa' tu'n kocxa na'nke Dios ejoo' t-xe'chel Jacob. ⁴⁷ Bix e xi' t'cuyan Dios tyol David, pero yaa'n ja David, sino ja t'cwalxin Salomón. ⁴⁸ Perotzen cyey tuj cywitz, ¿jatztzen najla Dios tuj jun jaa' t'binchben xjal? ¡Min! Tej xin jawnexsen, tej xin binchal twitz tx'otx', jxin Dios, yaa'n tuj jun jaa' najli'n t'xaxin. Cybintzney tyol ktzan Isaías, tyolel Kman Dios. Tzitzen Dios tu'n tyolelxin Isaías cyjulu: ⁴⁹ “Maan tuj cya'j nchin t'zaa' cawen twitz tx'otx'. Bix ka ja cya'j te we nuk jun nk'a'j, yal te twitz tx'otx' nuk tu'n t'cub we'we nken tibaj. Yaltzen cyey ejee'y xjal, ¿titzten tten tu'n t'jaw cybincha'na jun jaa' te nnajbila bix ma tu'n wajlana tuj? ⁵⁰ ¿Yaa'mpatzen inayena in cub binchan tej cykilj at twitz tx'otx'a?” tzi Dios cye ootxa xjal at-xe tyem, tzi Isaías tcyaj tkba'n—tzi Esteban.

⁵¹ Bix oc t'z'aktza'n Esteban tuya manc'bil tyol te colbil tiibxin:

—Entonces, key taat, alj toc chilsalec t'c'u'j Dios ejee' cyey. Tisenc'ax kej cyey cychman ootxa e cub cykipan cyiib twitz Espiritu Santo tej t'cub cykipan cyiib twitz Moisés, ju'xsen ke cyey cyiw xsun key tuya cyanema, tisen'ax kej min cytzki'n twitz Dios. ¡ju'x ke cyey tisen ke kchman ootxa xjal! ⁵² ¿Pero alcyey tyolel Dios min oc cyyasen ke ootxa xjal? ¡Mí nuket jun cye! ¡Cykilcake minx e cybi! Bix xsun kej e kbante ka alcyey jun k'ij tul-lel kuya junxin Scy'o'n tu'n Dios, junxin nuk jaj ba'n t'cubel t'binchben, ja t'zun kej k'balte e cub byetke. Bix yaltzen ja'lewe, otzen tzul jxin e kbaj, pero o t'xi' cyq'ueyen xina, bix o cub cybyo'n xina. ⁵³ Ejee'y xjal o t'z'oc k'o'n t'ley Dios cyey tu'n t'sanjel Dios, pero minx oc cybi'na, ejee' xsuna o cub byo'nte jxin xjal Scy'o'n tu'n Dios—t'zitzen Esteban tcyaj tk'o'n tuj chic'aj cywitz nintzaj consejo.

⁵⁴ Tejtzen toc cybi'n pala cyibaj judío kej tyol Esteban, e tzajxsen tij k'o'jlkexin. E jawxsen kitx'itx'in t-xee' twitz cyexin ti' Esteban yec'bil cyk'o'jxin. ⁵⁵ Pero te Esteban maans t'xaxin t'naabl. Tujxsen t'noj tanemxin tu'n t'ipemal Espiritu Santo. Bix e xi' t'cyeyenxin tuj cya'j. E til tzunxin tilbil Dios t'zinxsen ntxililin, bixsen Jesús wa'l'c'axin tuj t'mank'ab Dios. ⁵⁶ Totzen t'cyeyen Esteban, tzi tzunxin cyjulu:

—Q'uelelc'a cyni'ya ti'j, lu cya'j jakl tuj nwitza, lu Jesús, ¡xjal Sma'n tu'n Dios tu'n tten cyuya xjal, wa'l'c'a tuj t'mank'ab Dios—tzi Esteban.

⁵⁷ Pero c'cyi' nintzaj cawel e cybi ke tyol Esteban ka at Jesús tuya Dios, bix oc cymaksi'nxin cyxquinxin, bix ak'kexin š-il, bix e xi'kexin tibaj Esteban. ⁵⁸ Bix ex kitet-xin ttxa'n t'nom te Jerusalén, bix nbajtzen cyxoo'nxin tuya xak. Tu'ntzen at mas cyipen jxin xool xak, bix el cyi'jxin, tu'nx t'bjaj Esteban. Bixsen e cya'j cyk'o'nxin cyi'jxin twitz junxin xjal Saulo t'bxin. ⁵⁹ Maatkxsen nbaj xoo'nxin cyu'n kej xjal cymoj consejo, bix e xi' tkba'n Esteban te Jesús tuj cya'j:

—Nuksama, Taat Jesús, k'inxsen wanem tuj cya'j—tzi Esteban.

⁶⁰ Bix e cub mejtz'ajxin, nš-inxin t'xi' tkba'nxin te Dios:

—Nuksama, mi'n t'z'oc tk'o'na cybinchben ¡xjala te tajlal—tzi Esteban. T-xi'len bajxiltzen t'kbante Esteban, bix e cymixin tuj t'z'yal.

8

Tej tk'o'jl Saulo cyi' ocslal

¹ Te xsunj k'ij tej t'byet Esteban, bix e tzaj tzyet jun tij k'o'j cyi' ocslal tuj Jerusalén. Ju' tzunj nimxsen ocslal el t'z'itj cyuj juntl lugar ti'jxe Jerusalén, bix e baj ponke tuj Judea bix tuj Samaria. Pero cykil ke t-xel Jesús jax e cya'kexin tuj t'nom te Jerusalén.

² Attzen cabtl xjal n-oc tak' Dios cye, bix e xi'kexin jaa'j cymneca Esteban. Chebexsen e cu'x maket-xin. Nimxsen ok'kexin ti' t'cyamecy Esteban.

³ Cyxoltzen k'o'jlel cyi' ocslal tocxe junxin xjal nintzaj xjal, Saulo t'bxin. Jaan tzunxin oc ten k'o'jlel nim cyi' xjal ocslal. Ocxxin tuj jaca juun jaa', bix ocxxin tunwen nuk ka ma cnet jun ocslal tu'nxin, xuujle, xinakle, bix etz tii'nxin tu'n cyocx tuj t'zee'.

Tej tyole Felipe ti'j jxin Scy'o'n tu'n Dios jatzen Jesús

⁴ Tu'n tzunj otk baj bix tu'n tzunj cyel-len t'z'itj ocslal, bixsen el t'z'itj mas tyol Dios, cuma kej xjal otk chi el t'z'itj, t'zinx nchi yolen xjal tyol Dios jaa'xja nchi i'ya xjal ti'j. ⁵ Ju'xsen e

xa' Felipe, jun onl cye xjal cyxol ocslal, tuj Samaria, bixsen ak'xin yolel ti'j jxin Scy'o'n tu'n Dios, jatzén Jesús. ⁶ Bix jax ju'x te Felipe nimxsen techel e bint tu'nxin, bix nimxsen xjal oc cyeyente, bix oc ebinte tyolxin, bix tu'nksen tbi'nc, oca we' cyc'u'j xjal ti' tyol Felipe. ⁷ Bix e xi' tyee'c'an Felipe tipemal Jesús cyibaj biman toc cyi' xjal, bix e baj pjetz ke biman cyi' xjal. Tejtzén cyel biman cyi' xjal, elksen cywi'jil. Bix at xjal mintii' tanem t-xumlal bix nim cox, bix ul cynaabl xjal tu'n tipemal Jesús tu'n tyol Felipe. ⁸ Tu'n tzunja cykilxsen ke xjal te Samaria axsen e cyja' cyc'u'j.

⁹ Tuj tzunj tnom te Samaria najla junxin chmambaj Simón thixin. Nimxsen tyem otk tz'ex tu'nxin t-xnak'tzanxin ti' chmambaj bix e baj tyajla'nxin ke xjal. Cykil maj oc ten cyc'u'j xjal ti' tyolxin, bix e sey'paj ke xjal tu'nxin tuya ke ba'n thinchbenxin, bix e jaw tñiman tiibxin ka jaxin jun ba'nksen xjal. ¹⁰ Cykilxsen xjal, nmak xjal-le, ajnintz xjal-le, ocxsen cybi'n xjal jaxin ti' ttz'yal tyolxin, bix nchi yolentzen xjal: "Tej xin Simón at-xsen texin nintzaj tipemal, bix juntl Dios looxin," t'zitzen ke xjal. ¹¹ Axsen otk tz'e'la tuj cywitz xjal, lepchx ke xjal ti' junx maj.

¹² Pero yal te Felipe, oc cybi'n xjal tyol Felipe ti'j tcawbil Dios tuj cyanem xjal bix ti'j Scy'o'n tu'n Dios, jxin Jesús. Bix tejzén tak' Felipe yolel bix k'anel, nimxsen xjal oc te ocslal, bix e jaw a' cywi', xuujle, xinakle. ¹³ Bix jaan Simón e cub ti'j, bix e bautizarjxin. Tu'nksen cykil tc'u'jxin toc tcy'e'yenxin kej techlal bix tik'ch e bint tu'n Felipe. E jawxsen klee' Simón cuma j-oc tcy'e'yenxin jax, yaa'n yajla'n tisenj texin e bint tu'n.

¹⁴ Joo'c'tzen ete'xcye t-xel Jesús tuj Jerusalén, cybintexin txolen cyocslan xjal te Samaria. Ke cyej xjal te Samaria, yaa'n judío'ke cye xjal. Bix e xi' chk'et Pedro tuya Juan te cyeyle. ¹⁵ Bix e pon te Juan tuya Pedro tuj Samaria. Tejzén cyponxin, toctzen ccy'e'yenxin ti' nbaj, bix e cykanexin te Dios tu'n cyiik'ente xjal te Samaria Espiritu Santo, tisenx kej xjal ocslal judío otk cyiik' Espiritu Santo tuj cyanem. ¹⁶ E na'nkexin Dios, cuma mitkx n-ocxa Espiritu Santo tuj cyanem xjal te Samaria. Otk cyiik'cye jawsaj a' te techlal ka otk chi ocslan ti' Jesús. Pero te Espiritu Santo mitkna'x cyiik'ente. ¹⁷ Entonces bix ak'ke t-xel Jesús k'olc'a cyk'ab cyibaj ocslal. Tuya tzunj cyajwalelxin, e cyiik'a xjal Espiritu Santo tisenx cyej xjal judío.

¹⁸ Tejzén toc tcy'e'yen jxin Simón ke techlal tul cyibaj ocslal, tej cyiik'ente ocslal Espiritu Santo cyu'n t-xel Jesús, bixsen e tajbete Simón ju'wa. Bix e xi' toyenxin pwak te Juan tuya Pedro. ¹⁹ Tzi tzunxin cyjulu:

—Nuksamkey, cyk'ontz cyipemala we, tu'ntzen oj tcub nk'o'n nk'ab cyibaj xjal, jaxsen ccyiik'el Espiritu Santo—tzi Simón te Pedro tuya Juan.

²⁰ Pero bix aj ttzak'be'n Pedro:

—i;Cutxa tuj infierno tuya tpwaka! Jtey ma tz'oc tcy'e'yena, te Dios teja. Yaa'n ba'n tu'n tlek'ette tu'n pwak. ²¹ Tey mintii' tumel tu'n toca tajlal ja tajwalel Dios. Min tz'el tni'ya ti'j ti' nbaj tzalu. Tnaabla bix tanema yaa'n jiquen twitz Dios. ²² Jtey toclen ja'lewe, ja tej tu'n tmeltz'aj tc'u'ja ti'j taja tok'ontey tipemal Dios. Tzin tk'o'n Dios te jun xjal ti' jilel taj, pero yaa'n tu'n pwak. Na'm Dios, tu'ntzen kape jac'a najset ka' t'bisa tuj tc'u'ja. ²³ Jac'a tej k'i'nx tej tanem tu'n tisenx tanem chmambaj, bix pres tzya tu'nj ila—tzi Pedro te Simón.

²⁴ Bix aj ttz'ak'be'n Simón:

—Nuksama, na'm ch'in Dios wi'j, tu'ntzen min chixa tuj k'ak' tisenj toc tu'na—tzi Simón tej ttz'ak'be'n, cuma tcy'ixin e xi'xin tuj cawbil tu'n thinchbenxin.

²⁵ Tbjalntzen cykba'nxin ti' txolen tyol Dios cye xjal te Samaria, jatzén Pedro, Juan, bixsen Felipe bix e meltz'ajkexin tuj be te Jerusalén juntl maj. Tujtzen be e cyja' cyk'o'nxin tuj chic'aj tbanel tpochal Jesús cyuj niy' tnom te Samaria. Cwa cyponxin tuj Jerusalén.

Felipe bix jxin te Etiopía

²⁶ Yaltzen te Felipe bix el jlet jun tsanjel Dios otk tzaj tuj cya'j twitzxin, bix e tkba te Felipe: —Taat, at jun tye cxe'l tii'na. Cutxa k'inx jbe n-ex ttxa'n Jerusalén npon tuj tzkij tx'otx' npon tuj ootxa tnom te Gasa—tzi tsanjel Dios te Felipe.

²⁷ Bix e tcuya Felipe, bix exxin. Tujtzen be, tisen tii' toc nojxin twitzj xin nintzaj c'ojlal pwak tej tx'otx' te Etiopía. Jxin nintzaj chmol pwak sortelxxin, cuma jun xjal otk binchetxin te ju'wa, tu'n minx tten t-xu'lxin, bix minxtii' tajxin te xuuj, bix tu'n mi'n tz'oc ipanxin ti' nintzaj reina, cuma jaxin c'u'l pwak tej nintzaj xuuj reina tibaj Etiopía. Jxin nintzaj xjal otk txi' ajxin Jerusalén te na'l Dios. ²⁸ Otktzen meltz'ajxin tuj be te ttanemxin. Tocxxin tuj jun carwaj kiten tu'n tzej. K'uklc'a tzunxin, ncy'e'yenxin tyol Dios tz'i'ben tu'n tyolel Dios Isaías. ²⁹ Bix e xi' tkba'n Espiritu Santo te Felipe:

—K'o'nc tipena ti'j tu'n tpon cnet jcarwaja tu'na. Mojba'nctzen tiiba tuyaj xjal tocx tuya —tzi tsanjel Dios te Felipe.

³⁰ Bix e xi' ajkelen Felipe ttxlaj carwaj, bix e bet-xin ttxlaj, bix e thixin jxin tocx tuj carwaj ncy'e'yenxin tyol Dios otk cyaj ttz'i'ben ktzan tyolel Dios Isaías. Bix e xi' tkanen Felipe te aj Etiopía:

—Taat, nuksama, ¿pero tzimpa n-el tni'ya ti'j nxi' tcy'e'yena?—tzi Felipe.

³¹ Bix aj ttzak'be'n nintzaj c'ojlal pwak:

—Mlay tz'el nniy' ti'j. ¿Ti tten oj tel nniy' ti'j? ¡Aj cyiw yolke! Waja tu'n al jun tzaj k'onte jun tumel we tu'n tel nniy' ti'j—tzi jxin xjal te Felipe. Bix e jax ttco'nxin Felipe tuyaxin tuj carwaj.

³² Kej tyol Isaías nxi' tcy'e'yen jxin xjal te Etiopía, ejee' tzunj lu: “E xi' k'i'nxin tuj biybil tisen jun carnel tuj biybil chi'pj. Bix tisen jun carnel mutz'l twitz oj ncub byet, jaxsen ju'x texin min e jket ttzixin te co'pel tiibxin. ³³ Tisen texin nukxsen yalnex ti'jxin, min e bint tsisenxin. Jatzen cyka'yel xjal e ten cyuj tyema, minxsen-al jun ba'n tcub yolente, cuma nimxsen cyka'yel xjal,” tztizen tyol Dios tuj u'j tjaw tš-in jxin xjal te Etiopía.

³⁴ Bix aj tkba'nxin te Felipe:

—Weya te we, ¿tixsenle jilel? Kbantz we ti'jxpe Isaías nyolena, ma ti' juntl xjalj—tzi aj Etiopía txi' tkanen.

³⁵ Bix aj ttzak'be'n Felipe:

—Ju'tzen tten tyolen Isaías ti'j jxin Scy'o'n te co'pl twitz tx'otx', jatzen Jesús—tzi Felipe, bix ak'xin k'umlxte tyol Isaías, bix cabtl tpochal tuj tyol Dios. Bix e xi' tt'olba'n Felipe tej xin c'ojlal pwak te Etiopía jba'n tpochal Jesús. ³⁶ Bix ocslan jxin nintzaj c'ojlal pwak. Tejtzen xi'ninkexin tuj jun lugar at a' tuj, bix e tkba jxin nintzaj xjal:

—Cye'yentz tey. Atte a' tzalu. ¿Mlaypala chin cu'x weya tu'na tuj a'?—tzi tzunj xin tij nintzaj xjal.

³⁷ Bix e xi' tkba'n Felipe:

—Ka ma tbiy tuya cykil tanema, min-alte ba'n tel k'inte—tztizen Felipe.

Bix aj ttzak'be'n nintzaj xjal:

—Weya tuj nwitz, jxin Jesús, jatzen texin Tcwal Dios—tzi tzunxin.

³⁸ Entonces bix e xi' tkba'nxin cye tc'ojlaxin tu'n twe' tcarwajxin. Bix e cu'x jxin tij nintzaj xjal te Etiopía tuj a' tuya Felipe, bixsen e jaw tii'n Felipe a' twi'xin. ³⁹ Tejtzen cyjatzxin tuj a', bix e tzaj Espíritu Santo k'ilxte Felipe, bix tujx naj t-xi'xin tuj juntl lugar. Yal jxin aj Etiopía, e cyajxin tjunaxin. Min oc tcy'e'yentlxin twitz Felipe juntl maj. Pero amale otket cub naj Felipe, pero tej xin xjal e tzyet-x texin tbe tuj ttzyal, cuma ya ocslatl tzunxin.

⁴⁰ Yaltzen te Felipe, jatza e jawa jlet-xin tuj tnom te Azoto. Jatztzen e tzaa' tzyet tboxin tu'n tponxin tuj tnom te Cesarea. Tujtzen tboxin iy'xin tuj jaca tnom te kbalte jba'n tpochal Jesús.

9

Tej tocslan Saulo

(Hch 22:6-16; 26:12-18)

¹ Yaltzen te Saulo, nukzten toc te siy'pul bix te byole'a cye ocslal. Attzen jun k'ij bix e xi'xin tuyaj tneel pala cye xjal judío. ² Bix ak'xin yolel cyi' ocslal otk chi el ok tuj tnom te Damasco. Bixsen e tkane Saulo te tneel pala tu'n tcub ttz'i'benxin jun u'j tuya tajwalelxin te cye ke cawel cyuj camon jaa' te xnak'tzabl tyol Dios tuj Damasco, te kanbilte tu'n cyonenxin, bix tu'n toc tajwalel Saulo cyu'nxin tu'n tjaw ttzyu'n Saulo alj xjal lepch ti' tbe Jesús, xuujle, xinakle, la' al ma cnet tu'nxin, tu'ntzen cyaj tmeltz'u'nxin juntl maj Jerusalén. Bix e k'oj texin ju'wa, bix e xi'xin tuj Damasco.

³ Tel-lenxiltzen cabtl k'ij tuj be, ch'itktzen tpon canan Saulo cyuya ke tuya jaa'j xa'ninaxexin tuj tnom te Damasco. Ch'innch'exsen tcub tz'ak nka cyi'jxin jun tij tken k'ij tzinxsen ntxakakan. Otk tzajxe tuj cya'j. ⁴ Ja tzunj tken k'ij iy' xoo'n texin twitz tx'otx'. Lenchtzen e ponxin twitz tx'otx'. Bix e tbi Saulo jun xjal tjaw yolen. Tzi cyjulu:

—Saulo, Saulo, ¿tikentzen nim ka' n-oc tbinchena wi'j?—tztizen jun yol tzaj tuj cya'j.

⁵ Bix aj ttzak'be'n Saulo:

—Taat, ¿altzen cyey?—tztizen Saulo.

Bix e tzaj ttzak'be'n jyol:

—Inayen wej Jesús, jaxj xjal ztin yasena ti'j, jaca maj nk'olja cyi'j kej xjal nchi oc lpe wi'j. Inayen wej. ⁶ Pero wey'tzen. Tocx tuj tnom. Jatztzen c'oquela kba'n tey ti ctbinchay—tztizen Jesús te Saulo.

⁷ Yal tzun kej xin xjal tuya Saulo bixsen e cyajkexin me tu'n sey'pajlenel, cuma e cybi xinj yol, pero min-al e cyilxin.

⁸ Cytzajlen bajxiltzen yol tuj cya'j, bix e jaw we' Saulo. Pero junx maj otk cyajxin moš, amale jaklet texin ttzi twitz. Mix e bina tcy'e'yenxin. Entonces bixsen iy' cyii'n jxin tuyaxin tk'abxin tu'n tbet-xin. Ju'tzen tten cypon bajxin tuj tnom te Damasco. ⁹ Bix e cyaj Saulo moš te oxo k'ij. Cyuj tzunj oxo k'ija minxsentii' ch'in e xi' tc'a'nxin bix e xi' twaa'nxin.

¹⁰ Tujtzen tnóm te Damasco najla junxin xjal lepch ti' Jesús Ananías tbixin. Ja tzunj xin Ananías tisen ti' tcub klee' tuj twitzxin tisen tuj twitziy'xin. Jatzen e cub klee' tuj twitzxin, Dios e tzaj txconte texin tuj twitzxin. Tzitzen Dios cyjulu:

—Ananías—tzi Dios.

Bix aj ttzak'be'n Ananías:

—¿Ti, taat?—tzi Ananías.

¹¹ Bix e tzaj tkba'n Dios te Ananías:

—At jun tsanlala ma txi'y ti'. Cutxa tuj jbe “Jiquen Be” tbi. Tuj tzunj be'wa najla Judas. Kanenxse te Judas junxin xjal ma tziy' tuyaxin, Saulo tbi. Jatza itz'ja tuj tnóm te Tarso. Lu Saulo nna'n Dios ja'lecuwe. ¹² Matzen cub klee' tuj twitz. Jaxsen ju'x tewa, jax tuj twitz. Matzen cub klee' tuj twitz Saulo. Yal tuj twitzxin, xi'nen t-xi' lk'ey ti'jxin, bix tuj twitz otk cub tk'o'na tk'aba tibaj, tu'n thint tcy'e'yen juntl maj, cuma moš—tzi Dios te Ananías tuj twitz.

¹³ Tejzten toc thi'n Ananías ju'wa, bix e xi' tkba'n Ananías:

—Nuksama, taat, nimxsen tka'yel o nbi'ya ti'j xjal Saulo. Nimxsen bi'yen o baj te cyi'j xjal ocslal tuj Jerusalén. ¹⁴ Yaltzen ja'lewe tzultzen tuj tnóm te Damasco tuya tajwalel cyu'n cawel bix tu'n nintzaj pala tu'ntzen kxi' k'i'n keya pres, ejoo'ya ocslal tyola—tzi Ananías te Dios.

¹⁵ Pero bix e xi' tkba'n Dios:

—Junawe, pero cutxa, cuma tej Saulo may'xsen tzaj nscy'o'n te kbalte nyol te co'pbil cye xjal tuj juntl wik tnóm, cye nim cawel, bixsen cye xjal te Israel. ¹⁶ Ju' tewa, nimxsen q'uixc'aj o tak' cye ocslal. Pero we, ma txi' nyeeec'an te nejl cykilj q'uixc'aj q'uuyela tu'nj tk'on tiib wuya—tzitzen Dios te Ananías, tu'n tcub chewaxxin.

¹⁷ Entonces bix e tcyua Ananías, bix e xi'xin ta'j jaa' jaa' otk cnetá tposada Saulo. Jatztzen e cwa' tk'o'n Ananías tk'ab tibaj Saulo, bix e xi' tkba'nxin:

—Tey Hermano Saulo, jxin Kman Jesús, jaxj xin tey e til tuj be, ma chin tzaj tchk'o'nxin ti'ja tu'ntzen thint tcy'e'yena juntl maj, bix tu'ntzen nim tipemala tu'n Espiritu Santo tu'n tiy' tiibila ti'j—tzi Ananías te Saulo.

¹⁸ Bix tujxsen naj tel tz'ak tuj twitz Saulo jun tz'is tisen ttz'umel quiš, bix ak'xin cye'yel juntl maj. Bix e jaw we'xin, bix e bautizarjxin. ¹⁹ Bix ak' Saulo waa'l juntl maj. Ju'tzen tten tul tipen Saulo juntl maj. Bix e xi'xin cyuya ocslal.

Tej tpočan Saulo tuj Damasco

Bixsen cabtl k'ij attzen Saulo cyuyaj xjal oc lpe ti' Jesús tuj Damasco. ²⁰ Tneeltzen ke tk'ijxin bix ak' Saulo yolel cyuj camon jaa' te xnak'tzal tyol Dios ka ja Jesús jaxin Tcwal Dios. ²¹ Cykil xsun kej oc ebinte nimxsen e jaw klee'ke, bix e xi' cyyolen cyxolelex:

—¿Yaa'mpatzen jaj xjal lu oc ten yaa'lye ocslal tuj Jerusalén? ¿Bix yaa'mpatzen jajja ma tzaj tzalu te jyol mas ocslal, tu'n cyxi' tui'n te pres cywitz nintzaj pala tuj Jerusalén?—tztizen ke ocslal tuj Damasco.

²² Pero te Saulo tzinx nkba'nxin tyol Dios tuya mas tilbilxin ti'j, mix e bina tmojtzej tyolxin cyu'n xjal judío tuj Damasco, kej oc ten jyolec texin. Kej tyol Saulo ti' Jesús, ka jaxin mero Scy'o'n tu'n Dios, jaxsen otk tz'e'la tuj cywitz xjal. Ya min-al juntl iy'x tu'n.

Tej ttzokpaj Saulo cywitz judío

²³ Cabdtzen k'ij mas yaj, tu'ntzen tchi'lel cyc'u'j jxjal judío yaa'n ocslal, bix e jaw cychmon cyiibxin te ninc'ul ti'j tu'n tcub Saulo. ²⁴ Pero bix e pon tumel te Saulo. Ke tajk'oj Saulo e cub ten c'ojlal jak'ch n-exa be bix n-octza be tuj nim tnóm, te k'ijl bix te koniyan, tu'n ttzyet-xin. ²⁵ Pero bix e baj cynic'u'n cye ocslal ti'j, bix e cu'x cyk'o'nxin Saulo tuj jun ti'j ch'il tetzen koniyan, bix e cu'x xtunet-xin twitzj penwen tocsen ti' tnóm. Ocxsen e tema tu'n tzokpaj Saulo tuj tnóm te Damasco.

²⁶ Tejzten tpon Saulo tuj Jerusalén, bix ak'xin jyolte tu'n toc tmojban tiibxin cyuya ocslal. Pero cykil ke ocslal e cub ttzi cyi'j. Min el jax tuj cywitzxin ka jaxxix otk tz'oc Saulo te ocslal. E'la tuj cywitz xjal nuk tu'n cycub yajla'n tu'n Saulo. ²⁷ Pero cyxoltzen ocslal tocxe junxin Bernabé tbi, jaj xin e tzaj tuj tx'otx' te Chipre, jaxj xin otk txi' tq'ueyen ttx'otx' te onl cye mebe. Ja tzunj xin Bernabé oc ke tc'u'j ti' Saulo, bix e xi' tui'nxin ja Saulo cywitz t-xel Jesús, bix oc ten Bernabé kbalte cye t-xel Jesús ti tten toc noj Jesús twitz Saulo tuj be te Damasco, bix ti tten toc yolen Jesús ti'jxin, bix ti tten tyolenxin ti' Jesús tuj Damasco tu'n cykil tc'u'jxin.

²⁸ Bix e cyiik' t-xel Jesús jaxin tisen jun cyuyaxin, bix iy'xin cyuyaxin kbalte tyol Jesús tuj cykil Jerusalén tuyaxsen nim cyc'u'jxin. ²⁹ Pero tejzten tyolen Saulo cyuya xjal judío yaa'n ocslal, bix ja cyoolj griego, bix e tzaj k'ojlkexin, bix e cub cyniq'uenxin tu'n tcub Saulo. ³⁰ Tejzten tel cyniy' ocslal ti'j, bix iy' k'i'nxin tu'n tponxin tuj tnóm te Cesarea bix iy' smet-xin tu'n tponxin tuj tnóm te Tarso, jaa' itz'jajin.

³¹ Ju'tzen tten tcub ch'in tuj ttzyal. Jatzen Saulo tneel oc ten yaalcye ocslal. Entonces cykiltzen ke tja Dios te ttx'otx' Judea, te Galilea, bixsen te Samaria ete'tzen tuj ttzyal, bix

otktzen tz'oc mas cypemal. Bix e tz'iy ke oclsal mas ti tten tu'n toc cybi'n Espíritu Santo bix ti tten tu'n cyyik'ente k'ukbil cyc'u'j.

Tej tul tnaabl Eneas

³² Jatzen t-xel Jesús Pedro nbet tzunxin tuj jaca juun tnóm te k'olbelcye oclsal. Atzen jun k'ij bix e xi'xin k'olbelcye oclsal tej tnóm te Lida. ³³ Tuj tzunj tnóm lu bix oc noj junxin xjal Eneas tbixin twitz Pedro. Ja tzunj xin Eneas mintii' tanem t-xumlalxin, bix otk tenxin twi' wetbil wajxak jnabk'i. ³⁴ Bix e xi' tkba'n Pedro:

—Eneas, tzul tey tnaabl tu'n Jesús. ¡We'wey! Binchanc'a twetbila, cuma ya mintii'tl ba'n tajbena tey—tzi Pedro te Eneas.

Tujx naj tul tnaabl Eneas, bix e jaw we'xin. ³⁵ Cykil xsun kej xjal najl tuj tnóm te Lida e cyil nbet Eneas. Ju'x kej xjal najl tuj jun lugar chk'ajlaj Sarón tbi e cyil nbet Eneas. Bix nim e cyaj cycostumbre te ootxa, bix ak' xe'l lpeke ti' Jesús.

Tej tuj cyamecy Dorcas

³⁶ Jooc'tzen nbaj ju'wa, tuj tzunj juntl tnóm te Jope atzen junxuj oclsal Tabita tbixuj tuj yol te judío, bixsen tuj cyyol xjal griego Dorcas tbixuj. Cyecaxsen tnaabl xuj, bix nimxsen e tbinchexuj cye xjal mebe. ³⁷ Pero tuj tzunj tyem lu, bixsen e yebt Dorcas, bix e cyimxuj. Bixsen e baj txjet t-xumlalxuj. Pero min e maket, sino ju' e jax t-xumlalxuj tuj jun cwart te tcab cxo'len tjaxuj. ³⁸ Pero tej mitkna'x tcyimxuj, bix e xi' chket ca'ba sanjel tuj tnóm te Lida te txcolte Pedro tu'n tul tuj Jope te k'anlte Dorcas cuma nka ta' Lida ti' tnóm Jope. Bix otktzen tz'abij ka at Pedro jatzewe. Bix e xi' cykba'n sanjel te Pedro:

—Taát, nuksama, quixtey ch'ina tuj tnóm te Jope, cuma ch'ix t'aj jxuj oclsal Dorcas—tzi tzunkexin t-xi' cyk'umenxin te Pedro.

³⁹ Entonces bix e xi' Pedro cyuyaxin. Tejtzen tponxin, bix e xi' k'it-xin tuj cwart jaa' tocxe Dorcas, pero ya otk cyimxuj. Nimxsen xuuj viuda nook' ti'jxuj. Otktzen chi ul cyyi'nxuj al cyek'ch ke t-xbalen Dorcas e xi' cye viuda, te yec'bil tnaabl xuj tej i'tzxxuj. ⁴⁰ Pero bix etz tchk'o'n Pedro cykil xjal pe'n, bix e cub majexin te na'l Dios. Ncye'yenc tzunxin ti'j cymime, bix e xi' tkba'nxin cyjulu:

—Tabita, we'wey—tzi Pedro.

Bix e jaw tjko'nxuj ke twitzxuj. Tejtzen toc tcyey'enyxuj Pedro, bix e jaw kexuj. ⁴¹ Bix e tzaj ttzyu'n Pedro tk'abxuj, bix e jaw tii'nxin jaxuj. Bixsen ocx ttxco'nxin ke oclsal, bixsen ke viuda, bix oc tyeec'axin Dorcas i'tztlxuj. ⁴² Exsen baj tpočbal tuj tnóm te Jope. Nimxsen xjal oclslante Jesús tu'nj tpočbal.

⁴³ Bixsen e ten Pedro nim k'ij tuj tnóm te Jope. Jatztzen e temaxin tja junxin xjal kesh tz'u'n.

10

Pedro tuya Cornelio

¹ Tuj tzunj tnóm te Cesarea, atzen junxin xjal Cornelio tbixin. Yaa'n aj judío, sino ju' otk tzaj tloc'alxin cyxol xjal romano. Jatzen Cornelio cawel tibaj jun cloj te syent soldado te jun cloj Italiano tbi. ² Jatzente Cornelio ebilx texin tyol Dios, bix cykilke te tjaxin, pero mitkx nchi oclsanaxin Jesús. Nimx e k'on texin cotz cyej xjal judío mebe. Bix nuk e na'xxin Dios.

³ Atzen jun k'ij, te oxe tajlal hora te kale, tej nna'n Cornelio Dios, tisen tii' tcub klee' tuj twitzxin. Tej tzunj tcub klee'j ju'wa tuj twitzxin, e tilixxin jun tsanjel Dios tuj cya'j, bix e pon jtsanjel Dios jaa'j t'cwa'xin. Tzitzen cyjulu:

—Cornelio—tzi tsanjel Dios.

⁴ Bix oc ten Cornelio cyey'lte tsanjel Dios tuya nim ttzi ti'jxin, bix e xi' t'kanenxin:

—¿Ti, taat?—t'zitzen Cornelio.

Bix aj ttzak'be'n tsanjel Dios:

—Tu'nj nna'n tey Dios, bix xsunj tonbila cyej xjal mebe jatzen ma tbinchaja, nimxsen ma tz'oc tcyey'en Dios jay tuya nim xtalbil. ⁵ Yaltzen ja'lewe, tejtzen Dios t-xi' tchk'o'na cab tsoldadey tuj tnóm te Jope, te jyolte junxin xjal Simón tbi, bix juntl tbixin Pedro, bix tu'ntzen ttzaj k'it-xin t'zalu. ⁶ Ja tzunj xin Pedro, jatztzen ta' tposadaxin tuya juntlxin xjal Simón tbi, jxin kesh tz'u'n najl ttzii' mar. Atzen jun tyol Pedro tzul tk'o'n te tey—tzi tsanjel Dios tuj cya'j te Cornelio.

⁷ Tejtzen tkbante tsanjel Dios ju'wa, bix aj. Bixsen e tzaj ttxco'n Cornelio jun tsoldado jax ebil tyol Diosxin, jaa' k'ukleca t'c'u'j Cornelio, bixsen ca'ba tk'opajxin xinak. ⁸ Bixsen e xi' tkba'nxin ti jilel e cub klee' tuj twitzxin tisen tuj twitziy'xin. Tex xsunj k'ij, bix e xi' tchk'o'n Cornelio ejee'xin tuj tnóm te Jope.

⁹ Tetzen juntl k'ij te chil k'ij, ya matktzen chi ak' pomel canan tsanjel Cornelio tuj tnóm te Jope. Ch'itktzen cypon cananxin, bix e jax Pedro na'l Dios tuj tcab cxo'len jaa', tisenx

ttenxin nna'nxin Dios te chil k'ij. ¹⁰ Pero ya otktzen tz'oc tak' weyaj te Pedro. Taj tzunxin e waa'nxin. Jooc'tzen nbint twaxin cubne, bix e cub klee' tuj twitz Pedro tisen tuj twitziy'. ¹¹ E xi' tcyeyenxin ka e jket cya'j tixsenle jilel tij el txakpaj ti' jun manta xpo'n ccyaaal ttxa'n. ¹² Bix e cu'tz twitz tx'otx'. Tujtzen tocxe cykil wik alimaj te cyaja tken, bix nimjil mintii' tken tisen lbaj bix cykil wik ch'it. Octzen nimjil te tajlal ka' tu'n t-xi' cychyo'n judío. ¹³ Bix e tbi Pedro jun yol. Tzi cyjulu:

—Pedro, we'wey. Byo'nc'a kej jil alimaja. Chyon xsun ke jila—tzi Dios.

¹⁴ Pero bix aj ttzak'be'n Pedro:

—Taata, mlayxte, cuma ka'xsen t-xi' chyetke, cuma ka'xsen tu'n tleya. Weya, tuj cykil nchun'lal, bajxsen t-xa' nwaan'we ch'in tka'yel tz'il tisenj luwe. Nuksam xsuna, taata—tzi Pedro.

¹⁵ Bix e tzaj jyol juntl maj te Pedro:

—Pero ba'n. Cuma alcey e cub tbincha'n Dios tuj sak, mixben toc tkba'n tey te tz'il—tzi tzunj yol.

¹⁶ Oxe maj tcy'i Pedro ju'wa. Tetzen toxen maj, tzinenxsen e tzaj tkba'n jyol te Pedro ka cxe'l tchoy'n Pedro cychu'ljil, bix ba'nte. Bix aj jaw meltz'aj manta cyuya alimaj tuj cya'j.

¹⁷ Yal te Pedro, nuk otk jaw tzpet-xin ti'j tcublen klee' tuj twitzxin. Nbisen tzunxin ti'j ti elpenina. Pero maatkxsen nbisenxin ti'j, tej cypon jxin tsanjel Cornelio tjaxin. Otktzen cykanenxin jaa' ta' tja Simón, taaw jaa'. Cwa cyponxin ttzi'yen. ¹⁸ Tejtzen cyponxin, bix e jaw s-inkexin:

—¿Jatzpa najla jxjal Simón tbi tzal, jaxj xin n-oc te Pedro?—tzi tzunkexin.

¹⁹ Pero tjaxte Pedro tuj tcab cxe'len tposadaxin, nbisenxin ti'j twitziy'xin, bix e xi' tkba'n Espiritu Santo te Pedro:

—Cye'yenx. At oxe xjal ma tzul te jyol tey. ²⁰ We'wey, bix tcu'x cyi'j te cye'y'lye. Ojzen t-xi' cytxco'n jay, cutxa cyuya. Mi'n baj te'cu'ja, cuma inayenx ma chix chk'onte tey te cyuya —tziitzen Espiritu Santo te Pedro.

²¹ Bixsen e cu'tz Pedro cyi' tsanjel Cornelio, bix e xi' tkba'nxin:

—Key taata, inayen wej xjal tzin cyjyo'na. ¿Titzen cyaja?—tzi Pedro.

²² Bix aj cytzak'be'nxin:

—Jaj xin kcawela Cornelio ma tzaj chk'onte keya. Jxin Cornelio jaxin cawel tibaj syent soldado, bix ba'n xjal texin. Tzin tbi'nxin tyol Dios. Ja xsunxin jun xjal ebin cyu'n xjal judío tuj tnom te Cesarea. N-oc tak'xin cye xjal, bix n-oc ke cye'cu'j xjal ti'jxin. O tiik'xin jun yol te jun sanjel te Dios tu'n ttzaj txocbaja tu'n t-xi'y tjaxin tuj tnom te Cesarea, bix tu'ntzen toc tbi'nxin alcey cxe'l tkba'na texin—tziitzen ke tsanjel Cornelio te Pedro.

²³ Bix ocx ttxc'on Pedro ejee'xin tunwen. Tuya tzunxin ewtanakexin te koniyan. Tetzen juntl k'ij bix e xi' Pedro cyuyaxin tuj tnom te Cesarea, bix e xi' cabtl ocslal te Jope te cyuyaxin.

²⁴ Texetzen juntl k'ij tpon Pedro tuj Cesarea cyuya ke tuyaxin. Otktzen tz'oc tchmo'n Cornelio ke te tja bix ke tuya. Nchi ayon tzunxin cyi' Pedro. ²⁵ Tejtzen toc Pedro twitz tpe'n Cornelio, bix etzxin clul texin, bix e cub majexin twitz Pedro te tyec'bil te'cu'jxin. ²⁶ Pero bix e jaw tii'n Pedro jaxin. Tzi Pedro cyjulu:

—Wey'tza. Yaa'n Dios kenwe. Xjal kenwe tisenxj tey—tzi Pedro.

²⁷ Tejtzen tba'j k'olbenxin Pedro te Cornelio, bix ocxxin tunwen, bix ocpan nojxin ti' nim xjal cychmon cyiib tunwen. ²⁸ Bix e xi' tkba'nxin:

—Amale yaa'nt judío ke cyeey, cytzki'na ka ka' toc cychmon cyiib xjal judío tisen keya cyuya xjal yaa'n judío, mitetpe tu'n cyocx tunwen tuj cyja. Ka'xsen toc tk'on tiib jun xjal judío cyuya xjal yaa'n judío, mitetpe te k'olbelcye. Yaltzen tisenj weya, Diostzente ma tzaj yeec'ante tuj chic'aj mintii' tu'n toc nk'o'n tbi jun xjal te tz'il. ²⁹ Bix cuma ju' toclen t-xnak'tza'n Dios inayen, ma chin tzajwe tu'n cykil nc'u'j, bix lwewaxsen xin tzajwe tej xi pon tsanjela. Yaltzen ja'lewe, ¿tizten cyaja we?—tzi Pedro cyej xjal at tja Cornelio.

³⁰ Bix aj ttz'ak'be'n Cornelio:

—Ja'la tcyaa'n k'ij tisenx ja hora lu, in tin nja tzal, nchin na'n Dios, tej tcub jlet jun xjal nwitz. Tzinxsen nt'ililin t-xbalen. ³¹ Jatzen xjalj e tzaj kbante we: “Cornelio, matzen tbi Dios ka nna'na Dios, bix ma tz'oc tcyeyenxin jtanema cyi' mebe. ³² Jatzen Dios ctzaal kbante tey tu'n tyolelxin Simón, juntl tbixin Pedro. Entonces chk'onxsen tsanjela te txcolte Pedro tuj tnom te Jope, tu'n tul tzal. Jatztzen ta' Pedro tja jxin Simón, kesi te tz'u'n, jxin tcub tja ttzii' mar,” ju'tzen tten ttzaj tkba'n jtsanjel Dios we. ³³ Entoncen tzinxix nbaj ju'wa, tzin nxi' nchko'nj oxe xjal te txcol tey. Bix yaltzen tey, matzen tbinchey jun xtalbil wi'j ti'j ma tzaja. Lu tzuna lu, bix lutzen ko' eto' twitz Dios, tu'n toc kbi'na tyola. La' ti toc tu'n Dios tu'n ttzaj tk'umena keya—tzi Cornelio te Pedro.

³⁴ Tejtzen toc tbi'n Pedro ju'wa, bixsen ak'xin kbal tyol Dios cyexin. Tziitzen ke tyolxin cyjulu:

—Key taat, ja'lewe ma tz'el nniy' ti'j te Dios min tz'oc tcy'e'yen texin ti xjalel. Te Dios mintii' texin toclen ti'j ka judio jun xjal bix ka min. ³⁵ Ja te xinj toclen ti'j, ja jun xjal n-oc ebinte texin, bix ja jun ba'n t'cub tbinchen. Tuj alcyex ja tnom ti'j, jun xjal ju'wa, ba'nte tuj twitz Dios. ³⁶ Yaltzen ja'lewe, jtyol Dios e cyaj tk'o'n jatxe nejl cyuyaj xjal te Israel, ja tej ttzyal chi temela xjal tuya Dios, bix ja te ttzyal jba'n ttema jun xjal tu'nj xin Scy'o'n tu'n Dios, jxin Jesús. Ja te Jesús taaw cykil xjal twitz tx'otx', yaa'n nuk cye judío. ³⁷ Tej xin Jesús lu, cytzki'nxixa tik'ch o baj, jaxix tej nkba Juan Bautista tyol Dios bix tej nbautizara cye xjal, cykilj e baj tuj ttx'otx' Galilea bixtl mas e baj yaj tuj ttx'otx' Judea. ³⁸ Ja te Jesús, tej tnom te Nazaret, cytzki'ntl tzuna ti tten tzaj tk'o'n Dios nin Espíritu Santo te texin. Bix cytzki'ntl tzuna ti tten jak'ch i'ya Jesús te k'anel bix te onl xjal, bix te co'pl xjal tuj tk'ab biman. E tenxte Dios tuya Jesús. ³⁹ Cytzki'n tzuna, bix keya, ejoo'ya t-xel Jesús, oxexsen tz'oc kcy'e'yena tuya thak' kwitza tik'ch o bint tu'n Jesús, tuj tnom te Jerusalén, bix tuj cytx'otx' judío. Bix o kila nimxsen tak' i'ya Jesús tej tbyet twitz cruz. ⁴⁰ Pero tej tcyimxin, e jatz titz'jsa'n Dios jaxin juntl maj, te toxen k'ij, tu'ntzen tjaw jlet-xin juntl maj. ⁴¹ Min ul jlet-xin tuj chic'aj juntl maj cywitz cykil xjal, sino nuk kwitz keya, ejoo'ya t-xel Jesús, bix juuntl xjal. E waa'n ko'ya, bix e wc'ana tuyaxin juntl maj tej tjatzlen itz'jtlxin. Ejoo' keya tstiwa ka o jatz itz'j Jesús juntl maj tej tcyimlenxin. Tetzen ju' e scy'eta ko'ya tu'n Dios nejl. ⁴² Bix e xi' tchk'o'n Jesús ejoo'ya te kbalte ka nuk jac i'ya Jesús o tz'oc tajwalel tu'n Dios te binchal stis cyibaj cykil xjal, cymne cyuyax kej i'tz. Kla' alcyex jun k'ij. ⁴³ Ti'j tzunj xin Jesús lu e yolena ke tyolel Dios. E cyaj cytz'ib'benxin ka nuk tu'nxin ba'n tbaj twi' til jun xjal, ka ma tz'oc ke tc'u'j xjal ti'jxin te junx maj—ju'tzen tten tyolen Pedro tuya Cornelio, ke tuyaxin, bix ke te tjaxin.

⁴⁴ Maatkxsen nyolen Pedro, tujx naj tul Espíritu Santo cyibaj xjal. ⁴⁵ Ttoctzen cycye'yen otk txi' k'o'n Espíritu Santo cye jxjal yaa'n judío, e jawxsen klee' kej tuya Pedro, ocslal judío, cuma min otk tziy' tuj cyc'u'j ka ba'n toc k'o'n Espíritu Santo cyej xjal yaa'n judío. ⁴⁶ Ti e baj cyej xjal otk tzul Espíritu Santo cyibaj, bixsen ak'ke yolel tuj juntl wik yol mixbix cyu'n. Bix ju'x otk baj cye xjal judío tu'nx Espíritu Santo nejl. Ja tzunj tuj cywitz judío jun nim techlal otk tak' Dios cye xjal yaa'n judío. Bix e xi' cyk'o'n chjonte te Dios, bix e xi' tkba'n Pedro:

⁴⁷ —Kej xjal lu yaa'n judío, pero ma cybi Jesús tisenj keya, bix ma cyiik' Espíritu Santo tisenxj kewa. Ba'na atet ti pjel tu'n oj cybautizarj—tzi Pedro cye tuya.

⁴⁸ Entonces bix e xi' tkba'n Pedro te Cornelio bix cye tuya:

—Ke cyey xjal chi bautizarjela, tu'ntzen telniy' ka tuya Jesús ete'y—tzi Pedro.

Bix e cycuya xjal. Yajltzen bix e cytxocxin Pedro tu'n ttenxin cyuyaxin cabtl k'ij te xnak'tzalcy mas ti'j tyol Jesús.

11

Tumel tu'n Pedro cye ocslal tuj Jerusalén

¹ Tpontzen t'pochal tuj Judea ka otk cyiik' jxjal yaa'n judío tyol Dios bix otk cybi xjal Dios, bixsen ke ocslal bixsen ke t-xel Jesús twitz tx'otx' oc ebinte ja lu. ² Pero tej tpon meltz'aj Pedro tuj Jerusalén, at cab ocslal judío e yolen ti' Pedro tiken otk tbinche xinj ju'wa. ³ Al tzun kej xjal oc ebin tej ju'wa, bix e xi' cykba'n te Pedro:

—¿Tikentzen e cyja' ten tey tuj tja jun xjal yaa'n judío, jun yaa'n t-xjal Dios? Yaa'n tumel junx maj. Pero tey, e waa'n tey cyuya xjal. Ttzki'n tzuna junxsen maj ka' kwaa'n tuya jun xjal yaa'n judío—tztizen ke xjal.

⁴ Pero bix ak' Pedro kbalxte tik'ch jilel bix tik'ch otk baj. Tzi tzunxin cyjulu:

⁵ —Key taat, in tinwe tuj tnom te Jope. Jun k'ij nchin na'n Dios, bix oc ncy'e'yen tisen tuj nwtziy'. E cu'tz jun xbalen tisen jun sávana ma tij, xpo'n cycyaa' ttx'u'c, bix e c'u'l jaa'j in tinc'a. ⁶ Tejtzen tc'u'l, bix ocxix ncy'e'yen, bix ocx ncy'e'yen tuj. At jil alimaj ch'it, lbaj, bix at juntl wikjil talen c'u'l choyljlil, tuya kej jil ka' txi' cycho'o'n xjal judío. ⁷ Bix e nbi jun yol e tzaj tkba'n we: “Pedro, byom tzun kej alimaja, bix chyo'nxke,” tztizen Dios. ⁸ Pero bix aj ntzak'be'n: “Nuksam xsuna, Taat. Bajxsen t-xa' nwa'a'nwe waabj ka' txi' waa't te cyej xjal judío,” ntzi tzuna. ⁹ Pero bix e tzaj tkba'n jyol tuj cya'j juntl maj: “Waa'nx, cuma tej o cub tbincha'n Dios jsak, yaa'n ka'te,” tzi tzunj yol we. ¹⁰ Oxe maj e yolen ko'ya ju'wa. Yajltzen bix e jax k'i'n xbalen cyuya alimaj juntl maj tuj cya'j. ¹¹ Cybintztzen. Te xsunj tpon baj jyol e cub klee' tuj nwtiza, bix e pon oxexin xjal jaa'j ta' kposadaya. Otktzen che'x chk'et te txcolte weya tu'ntzen waajtz meltz'aja cyuya tuj tnom te Cesarea. ¹² Bix e tzaj tkba'n Espíritu Santo weya tu'n nxi'ya cyuya, bix tu'n mi'n baj nc'u'ja ti'j yaa'n judío ke xjal. Bix jax ejee' tzunj wukak ocslal lu e xi' wuyena. Tej kpona, bix ocx ko'ya tuj tja jxjal otk txconte weya. ¹³ Ja tzunj xin xjal Cornelio tbi. Bix e tzaj tkba'nxin keya ti tten tpon jlet jun tsanjel Dios tuj cya'j tjaxin. Otk tkba texin cyjulu: “Chk'onx cabtl xjal tuj tnom te Jope te txcolte Simón, jaxj xin n-oc te Pedro. ¹⁴ Ja tzunj xin Pedro kbalte tey bix cye te tjay tik'ch pjel cyey tu'n cyc'o'pja tuj cyila,” tztizen tsanjel Dios te Cornelio. ¹⁵ Entonces bix in ak' yolel cyuyaxin. Maatkxsen

nchi yolenwe cyuyaxin, bix ul Espíritu Santo cyuyaxin, tisenx tten tul-len ke kuya tuj tneel. ¹⁶ Tejtzen toc ncyey'en ju'wa, bix ul tuj nc'u'j kej tyol Kman Jesús otk tzaj tkba'n ke: "Jxin Juan Bautista e bautizaran xjal, pero cyey ceyiik'ey Espíritu Santo," tzi Jesús ke jun maj—tzi Pedro.

¹⁷—Key taat o cyiik' cyexin Jesús te Cyaawxin, bix te Scy'o'n tu'n Dios, tisenxj kewa. Bix ju' tzu'n o txa' tk'o'n Dios Espíritu Santo cyexin. Katzen ma txi' tk'o'n Dios cye xjal tisenxj ke, ¿titzen jilel ken weya tu'n woc meltz'aja ti' Dios?—tzi Pedro cyej xjal min e cycuya tu'n cyocx xjal yaa'n judío te oclsal.

¹⁸ Tejtzen toc cybi'n xjal tyol Pedro, bixsen e baj twi' cyyol xjal, bixsen ak' ke xjal tzalajel ti' Dios, bix e jaw yolen ke xjal:

—¡Axsen thanel! Yaa'n nuk keca, sino tuyaxe te cyej xjal yaa'n judío ma txi' tk'o'n Dios xtalbil cyi'jxin tu'n cymeltz'aj tuyaxin, tu'n cycaman cychunk'lal te junx maj—tztizen ke xjal.

Kej oclsal tuj Antioquía

¹⁹ Cyuj tzu'nja tyem lu nimxsen oclsal najl cyuj juntl wik tnóm ti'jxe Jerusalén, cuma ete'c xjal yajlalec cye oclsal tcyimlenxilt Esteban. Attzen cab oclsal ex ok tuj Jerusalén, bix e xi' ke tuj tnóm te Fenicia bix tuj tnóm te Antioquía, bix tuj tx'otx' te Chipre. Bix e cub ten ke xjal pocal tyol Dios jaa' e ponake, pero nuk cyej xjal judío. ²⁰ Pero tuj tzu'nj tx'otx' te Chipre bix tuj tnóm te Cirene attzen cab oclsal, bix e ponkexin tuj tnóm te Antioquía. Bix ak'kexin pocal thanel tpochal Jesús cye xjal yaa'n judío. ²¹ O txi' tk'o'n Dios nim cypemalxin, cuma nimxsen xjal yaa'n judío e cyaj cyk'o'n cycostumbre nuk ti'j Jesús. ²² Bix e pon tpochal cyxol oclsal tuj Jerusalén ti nbaj tuj Chipre bix tuj Cirene, bix at ac'aj oclsal tuj tnóm te Antioquía. Bixsen e xi' cychk'o'n oclsal jxin Bernabé maan Antioquía te cyey'lte. ²³ Tejtzen tpon Bernabé Antioquía, tuyatzen cyca'bel thak' twitzxin toc tcyey'yxin txolen tco'pante Dios kej xjal yaa'n judío, yaa'n nuk ejee'c'acye judío. Ju' tzu'nj e jawxsen tzalajxin, bix ak'xin ocsalec cyc'u'j xjal tu'n mi'n cyaj cyk'o'n the Jesús. ²⁴ Bix e ke tc'u'j Bernabé ti'j ti nbaj, cuma jun ba'n xjal xsunxin. Ebil tyol Espíritu Santoxin, bix k'uklecxsen tc'u'jxin ti' Dios. Bix tu'n tzu'nj tpmolen Bernabé cyuya xjal, nimxsen xjal oclsal.

²⁵ Bix etz Bernabé tuj tnóm te Antioquía, bix e xi'xin ti'jxe tnóm te Tarso te jyolte Saulo, cuma jatza najla xina. ²⁶ Tejtzen tcnet-xin, bix e xi' tii'n Bernabé jaxin tuj Antioquía. Jun jnabk'i e tenkexin cyuya ke ac'aj oclsal tuj Antioquía bix nim e yeec'anekexin tyol Dios te nim xjal. Tujtzen Antioquía oca cybi'n xjal tneel maj te "Cristiano," jatzen elpeninaj ke lepch ti' t-xnak'atz Scy'o'n tu'n Dios.

²⁷ Maatkxsen at Bernabé tuya Saulo tuj tnóm te Antioquía, cypon cabxin tyolel Dios otk tzajxe Jerusalén. Nchi yolen tzu'nxin ke yol Espíritu Santo otk tak' cyexin. ²⁸ Jun tzu'nxin ba'n yolen tu'n Espíritu Santo Agabo thixin. Bix e cub we' Agabo cyxol oclsal, bix e cub tenxin kbalte ka tul-lal jun tij weyax tuj tx'otx', bixsen q'uiyel a' cyc'u'j xjal oclsal tuj tx'otx' te Judea. Bix e bajx ja weyaja tej tocx Claudio te nin cawel tibaj cykil twitz tx'otx'.

Ju'tzen tten tyol Agabo.

²⁹ Tejtzen toc ebin tyol Agabo, bixsen e cub cyniq'uen oclsal ti'j tu'n t-xi' cysma'nxin ch'in onbil cye xjal oclsal tuj tx'otx' te Judea, la' jniy' ch'in ba'n tk'onte xjal. ³⁰ Tejtzen tbaj cychmo'nxin cykil onbil, bixsen aj cyokxenaxin ti' Bernabé tuya Saulo, tu'n t-xi' cyk'o'nxin cye ke tij cyxol oclsal tuj Jerusalén tuj Judea.

12

Tej tcub byet Jacobo; ya'tzete Pedro ocx k'o'n tuj tzee'

¹ Te tzu'n kej k'ij lu jatzen Herodes cawel cyibaj xjal judío. Ja tzu'nj xin Herodes, titzen tajaxin tu'n toc onet-xin cyu'n niy'tl cawel judío. Ju' tzu'nj ak'xin yajlalecte cab xjal oclsal. ² Bix e ttzuyxin jxin Jacobo, ttzicy Juan, bix el tx'omet twi'xin tuya espada.

³ Tejtzen toc tcyey'yxen Herodes axsen e'la tuj cywitz judío, bix e ttzuyxin jxin t-xel Jesús Pedro, bix ocxxin tuj tzee'. Jatzen tocx xinj tuj tzee' tej nink'ij tej t-xi' cywaa'n xjal judío jun wik pan jawnex mintii' tk'anel ocx tuj tu'n tjaw tz'iy. ⁴ Tujtzen tzee' e c'ojleta Pedro tu'n waklaaj soldado. Te cyaja pa' elninakexin tuj tki'yen e cwa' tenkexin. Jatzen txolaj otk bint tu'n Herodesj, tu'n tetz Pedro tuj tzee' thajlenxilt jnink'ij, tu'ntzen thyet-xin.

⁵ Ju'tzen tten tocxlen Pedro tuj tzee'. Maatkxsen tocxxin tuj tzee', nchi na'ntzen oclsal Dios tu'n cykil cyc'u'jxin ti' Pedro.

Tej ttzokpaj Pedro tuj tzee'

⁶ Ex cabtl k'ij. Ya otktzen pon jmanc'bil koniyan tu'n tetz tii'n Herodes jaxin tu'n tocx keset tkulxin. Nwutantzen Pedro t-xol ca'ba soldado, cyxpon cyiib tuya Pedro tuya cadena. Pe'nxiltzen tcwa' ca'batl soldado te c'ojlal.

⁷ Tujxsen tej tul jlet jun tsanjel Dios tuj cya'j tuj tzee', bixsen e noj tunwen tuya tken luz. Bix ocx t'asen sanjel ja Pedro ti' t-xuuc'xin tu'n ttzaj cy'isjxin, bix e xi' tkba'n:

—We'wey, Pedro. Nix tu'na—tzi sanjel. Bix el tz'ak kej cadena xipbel tk'abxin.

⁸ Bix e xi' tkba'n sanjel te Pedro:

—Xpo'nc tcy'itza, bix k'o'nc t-xaaba—tzi sanjel.

Bix e tcuya Pedro, bix e xi' tkba'n Pedro may'tzen.

Bix e xi' tkba'n sanjel:

—Ja'le tzuna k'o'ntzen tcapey. Lpetztzen wi'j—tztizen sanjel.

⁹ Entonces bix etz Pedro tuj tzee', bix oc lpeixin ti'j sanjel. Pero min el tniy' Pedro ti'j ka jaxj txolen tbint tu'n Pedro. E'la tuj twitzxin nuk twitziy'xin. ¹⁰ Tbjalxenitl tzunj ju'wa, ejee' tzunj xin soldado c'ojlal jaa'j tocxe Pedro tuj tzee', bix e ponkexin ti'j tlemel jaa' junx maj xcbil toc te tuj be. Pero bix ocx jaxpaj tjunalx, bix etzkexin, bix e xi' betkexin junx tuj jun be. Entonces bix e cyaj tk'o'n sanjel ja Pedro tjunalx. ¹¹ Te tzunj ju'wa, tel tniy' Pedro ti'j ka jaxj, yaa'n nuk witziy', bix e xi' tbsenxin ti'j:

—Ma tz'el nniy' ti'j jale Dios s-aj smante jun tsanjel wi'j tu'n ntzokpaj tuj tk'ab Herodes bix tuj tik'ch jilelj tzin cyyo'n xjal judío tu'n toc cycye'yen—tzi Pedro.

¹² Tejtzen tel tniy' Pedro ti'j ti nbaj, bix e xi'xin tja junxuj xuuj María tbixuj. Ja tzunj xuj María ttxu junxin xjal Juan tbi, juntl tbixin Marcos. Tjatzten María nimxsen xjal ocslal cychmon cyiib te na'l Dios ti' Pedro. ¹³ Tejtzen tponxin tja María, bix oc tco'nxin tlemel jaa' te twitz pe'n, bix e'lal juntxin k'opaj Rode tbixin te cyey'lte al. ¹⁴ Pero tej tocx yolen Pedro, bix el tniy' Rode ti'j tuj twi'xin, pero tu'n tzunj tjaw tzalajebtxin bix el tuj tc'u'jtxin tu'n tocx tjko'ntxin tlemel jaa', bix ocx ajkelentxin te kbalte cye cabtl xjal ka otk pon Pedro ttzi'yen.

¹⁵ Pero bix aj cytzak'be'n jcabtl xjal te Rode:

—Male jaw tuj twi'y—tzi tzunkexin.

Pero bix e xi' tkba'n Rode ka jax, pero yalx tej cabtl xjal min el jax tuj cywitz, bix ju' toc cyu'n cyjulu:

—Yaa'nle Pedro. Ka yaa'n ja tsanjel Dios c'ojlalte Pedro. Matzele tzul tisenc'ax Pedro—tztizen ke xjal.

¹⁶ Jooc'tzen, tocxe Pedro tcol ttzi'yen. Cwaxsen tocx jket ttzi'yen. Tejtzen toc cycye'yen jax Pedro, e jawxsen tzalajkexin, bix nimxsen e jaw klee' ke xjal. ¹⁷ Pero bix e xi' tk'o'n Pedro jun techlal tu'n mi'n chi k'ajt xjal, bix e xi' tkba'nxin ti tten tetz tii'n tsanjel Dios jaxin tuj tzee', bix e xi' tkba'nxin:

—Tiyla tzunj ma txi' nkba'n cyey, cykbanxsen te Jacobo, tiz'en Jesús, bix cye niy'tl ocslal —tzi Pedro, bix iy'xin tuj juntl lugar.

¹⁸ Tejtzen kskix, bixsen ul juntl cloj soldado te c'ojlalte Pedro. Nimxsen jun tzpetpajlenel e baj cyxol soldado, cuma mintii' tumel cyuya ti e baj te Pedro. ¹⁹ Tejtzen tbintte rey Herodes, bix ex tch'k'o'nxin xjal te jyolte Pedro. Tejtzen minx e cnetá Pedro, bixsen e tzaj ttxco'nxin kej soldado e cub ten te c'ojlal Pedro. Tbjalen tkanenxiti tzunxin cab yol cye, bix e xi' tsma'nxin ejee' tuj biybil. Tbjalen tzunj ju'wa, bix etz Herodes tuj ttx'otx' Judea, bix e xi'xin najal tuj tnom Cesarea tuj mlaj tx'otx'.

Tej tcyim Herodes

²⁰ Otkxsen tzaj k'ojl Herodes cyi'j xjal najl tuj tnom te Tiro bixsen Sidón nchi cyaj tibajxe tnom te Cesarea. Ju' tzunj, ya min e tcuyatlxin tu'n t-xi' cyk'o'n t-xjalxin triwa tuj Tiro bixsen tuj Sidón, amale nimet xjal najbente triwa. Entonces bix e xi' tsma'n Tiro bix Sidón cab xjal te tyolet tuj tnom te Cesarea, tu'ntzen cycaman xjal t-xtalbil Herodes juntl maj. Cwa cycamanxin t-xtalbil Blasto, junxin nintzaj t-ak'anal cawel Herodes. Te tzunj xin oca cykanen xjal tu'n tcub tuj ttzyal, cuma nchi ajben xjal waabj. ²¹ Bixsen e ttxoc Herodes ke cyyolel xjal te Tiro bix Sidón. Te tzunj k'ij tu'n cypon xjal, bix oc nintzaj t-xbalen Herodes, bixsen e cub kexin tuj tk'ajxin te cawbil, bix e yolenxin cywitz xjal. ²² Tejtzen tpon baj tyolxin, bix ak'ke xjal s-il:

—Jaxxixsen te ja tyol Dios. Yaa'n nuk jun xjal—tzi cysit'z'bil xjal.

²³ Pero bix e tzaj tc'u'j Herodes cyibaj xjal tu'n toclen cykba'n xjal texin ka Diosxin. Min e xi' tk'o'nxin chjonte te Dios. Ju' tzunj, tujx naj tpon jun tsanjel Dios k'olec jun tij tyabelxin. Lwewa e jaw jletkil xuk' chyl texin, bix e cyimxin.

²⁴ Otkxsen baj tzyu'nxin ke ocslal, bix otkxsen chi baj tsiy'pu'nxin. Pero te Dios tyol, xi'nax e xi' t'z'iy, bix nimx xjal oc te ocslal.

²⁵ Yaltzen te Bernabé bix Saulo, e bint-x cyexin cyaak'en cyu'n tej t-xi' cyii'nxin cyonbil ocslal te Antioquia cye ocslal tuj Jerusalén, bix aj meltz'ajkexin tuj Jerusalén tu'n cyponxin Antioquia juntl maj. E xi' cyii'nxin Juan cyuyaxin, juntl tbixin Marcos.

13

Tej t-xi' Bernabé tuya Saulo kbalte tyol Dios tneel maj

¹ Entonces cyxoltzen ocslal tuj tnom te Antioquia tocxsen Saulo bixsen Bernabé. Bix jax tocx Simón, juntl tbixin "K'ek," juntlxin Lucio tej tnom te Cirene, bixsen Manaén, junxsen e jaw t'zi'y jxi'na tuya Herodes, jxin cawel tuj Galileo. Cyjwe'yel tzunj xina oc ten xnak'tzalte tyol Dios cye ocslal. ² Juntzen k'ij cyjwe'yel tzunj xin lu cyuya niy'tl ocslal nchi na'ntzen xjal Dios, bixsen e cub cyyo'n weyaj tu'n cyna'n mas Dios, bix e tzaj tkba'n Espiritu Santo cyexin:

—Cyk'ontz Bernabé tuya Saulo we. Chi ajbel we tuj jun cyaak'en wu'n—tzi Espiritu Santo.

³ Entonces cybajtzen na'nxin Dios bix tpon baj twi' cypan texin weyaj, bixsen oc cyk'o'n ocslal cyajwalel Bernabé bixsen Saulo tu'nj tcublen cyk'o'n ocslal cyk'ab cyibajxin. Yajlttzen bix e baj k'olbenkexin tu'n cypaxxin. ⁴ Ju'tzen tten tetz tscy'o'n Espiritu Santo bix t-xi' tchk'o'n ja Bernabé tuya Saulo. Bix e xi'kexin tuj tnom te Seleucia, tzi'ii' mar. Jatztzen ocxakexin tuj barc tu'n cyxi'xin tuj tx'otx' te Chipre tuj mar. ⁵ Tejtzen cyponxin tuj tnom te Salamina tuj tx'otx' te Chipre, bix e xi'kexin k'olbel cyuj camon jaa' te xnak'tzibil tyol Dios cyej xjal judío tetzen kbal tyol Dios. Jaantzen Juan Marcos cyuyaxin, cuma jaanxin e xi' te onlcy Bernabé te kbal tyol Dios.

⁶ Cyetz tzunxin tuj tnom te Salamina, bix e xi'kexin elne tuj tnom te Pafos, te juntl jlajxiltl ttx'otx' Chipre, bix nuk jak'ch i'yakexin te kbal tyol Dios. Tejtzen cyponxin tuj tnom te Pafos, bix oc nojkexin tuya jun aj cy'a' judío. Barjesús tbixin. Yaltzen tuj yol griego Elimas tbixin. Octzen tniq'uexin kbaj tyol Dios, pero yajlal xjalxin. ⁷ Ja tzunj xin Elimas otktzen tz'oc tk'on tiibxin tuya cawel tuj Chipre. Sergio Paulo tbi cawel. Jxin cawel nimx ba'n tu'nxin, bix elnaxsen tniy'xin ti' tcawbilxin. Taj tzunxin oc tbi'nxin tyol Dios. Ju' tzunj e xa' ttxco'nxin Bernabé tuya Saulo. ⁸ Pero min e tcuya Elimas, jxin aj cy'a', bix ak'xin cyakwusalec cye Bernabé tuya Saulo, bix oc tenxin kbalecte te cawel tu'n mi'n tz'oc tbi'nxin tyol Dios. ⁹ Jatzen Saulo bix juntl tbixin Pablo. Toctzen tcyeyen Pablo ti jilel ncub tbinchen Elimas, bix oc tilen Pablo jaxin. Nojne tanem Pablo tuya nim tipemal Espiritu Santo. Bix cyiwc'a ocx tcyeyen Pablo tuj twitzxin. ¹⁰ Bix e xi' tkba'nxin:

—Elimas, tey yajlal xjal tey. Tey tisen jun alak'a, tuya cyiw tanema. Ja tey n-oc tbi'n jti jilelj taj biman. N-oc chi'l tey ti'j alcyey ba'n. Oj tzin cyajben xjal jax yol, tey nuk nchi cub tyajla'na tuya xtak'bil. ¿Jtojzen pjel twi' tu'na? ¹¹ ;Chin tbi'c'aney! Ja'lac'a naja ma tzak' jawel tk'ab Dios ti'ja tu'n tcawja. Ya ch'ixc'a toca te moš. Mitetpe k'ij tzak' twitza ti'j—tzi Pablo te Elimas.

Ya tujx naj tcub jpet tibaj Elimas tisen jun tij muj. Junxsen maj e cyaj bajxin tuj kloj, bi'x e cyajxin moš junx maj. Tu'ntzen tetzxin, e xi'c'a jyet jun xjal k'ilbatz tk'abxin.

¹² Tejtzen toc tcyeyen jxin cawel Sergio Paulo ti otk baj te Elimas, bixsen ocslanxin tyol Dios, cuma otkxsen jaw klee'xin bix otktzen tz'el tniy'xin ti'j t-xnak'atz Taaw twitz tx'otx' cyu'n tyolelxin Pablo bixsen Bernabé.

Tej tiy' Pablo tuya Bernabé tuj tnom Antioquia te Písidia

¹³ Thajlaxxiltl tzunj ju'wa, bix etz Pablo cyuya ke tuya tuj tnom te Pafos, bix iy'kexin tuj mar. Bix e ponkexin tuj tnom te Perge tuj ttx'otx' Panfilia. Tuj tzunj tnom te Perge bix el tpa'n tiib Juan Marcos cyi'jxin, bix ajtzxin tuj cytanemxin Jerusalén. ¹⁴ Tel-len tpa'nxitzen tiib Juan Marcos cyi'jxin, bix e xi' Pablo tuya Bernabé mas jawne tu'n cyponxin tuj ttx'otx' Písidia. Cwa cyponxin tuj tnom te Antioquia, jun wikxiltl Antioquia. Tetzen jun k'ij sábadó, jun k'ij tu'n cyajlan xjal judío, bix ocxkexin tuj camon jaa' te xnak'tzibil tyol Dios, bix e cub kekexin. ¹⁵ Bix e cybixin tej t-xi' s-itj u'j te tley Moisés bix xsun kej xin profeta, tyolel Dios. Tejtzen tpon baj ts-ij tyol Dios, bixsen e xi' cykba'n jxin k'il txolen culto tuj camon jaa' cye Pablo tuya Bernabé:

—Ke cyey te ktanem judío, ch'innch'e ka at jun ba'n yol te keya, ma txi' kk'o'na tumel cyey tu'n cyolena—tziitzen ke cawel tuj camon jaa' cye Pablo tuya Bernabé.

¹⁶ Entonces bixsen e jaw we' Pablo, bix e xi' tyee'c'axin tk'abxin te techlal tu'n tak'xin yolel bix e xi' tkba'nxin cye xjal:

—Achenkey wu'na, ke te ntanem Israel, bix key xjal te juntl wik tnom, key nchi oc ebinte tyol Dios, chin cyi'tza. ¹⁷ Cytzki'ncyey Dios, jaj xin Dios te Israel. Bix ba'n cyu'na e tsicy'xin ke kxe'chel ootxa, Abraham, bix Isaac, bixsen Jacob, tu'n cyocxin te t-xjalxin. Cyl'j tzunxin e'la tziitpaj nim xjal. Bix tajtzen tiy' bint Jacob cyuya ke tcwal tu'n cyponxin tuj ttx'otx' Egipto, jatztzen e tzaa' tk'o'n Dios tu'n tel itz'j jun tij nin tnom cyi'jxin. Cwatzen tetz co'pan Dios ke kxe'chel tuj ttx'otx' Egipto tu'n Moisés. ¹⁸ Tetzlen tco'panxiltl Dios ke xjal tu'n Moisés, bix ak'xte Dios co'pl xjal. Ya cytzki'ntlcyeey cya'wnak jnabk'i e c'oijan Dios cyi' xjal jaa' mintii' waabj, pero e tak'xte Dios cywa xjal, bix tuya nim tc'u'jxin. ¹⁹ Yajc'atlzen bix e tak' Dios cyipemalxin tu'n cyxycyexin tibaj wuukt wik xjal tuj ttx'otx' Canaán, bix oc tk'o'nxin cytx'otx' te cycotz kxe'chel. ²⁰ Tejtzen cynajanxin Canaán, bixsen oc tch'i'quen Dios

jun ni'c'ul cyexin tu'n tcawen cyibaj xjal te Israel. Jatxe tuj tyem te tneel ninc'ul cye xjal, tejxe tpon baj manc'bil tyem tuj tcwent Samuel, atle jun cyaja syent tuya cya'wnak tuya lajaj jnabk'i. ²¹ Pero yaj, bix ak'ke xe'chel kanl jun rey cawel te ni'c'ul. Entonces bixsen e tcuya Dios, bixsen el tscy'o'n Dios Saúl, tcwal Cis. Jxin Saúl jatzen e'la itz'jxin ti'j kxe'chel Benjamín, bix oc tk'o'n Dios jaxin te nin cawel cyibaj xjal te Israel. Ocxin te cawel cya'wnak jnabk'i. ²² Pero cwax tel tii'n Dios jaxin. Bixsen ocx David te t-xel Saúl. Jatzen xinj e tsciy' Dios te cawel. Ti'j tzunj xin David lu e bya'na tu'n Dios cyjulu: "Ntzki'n tnaabl David, jxin tcwal Isaí. Nuk cuyante David tu'n alcey we waj, bix chin oquel tbi'n," tzi Dios.

²³ Key taat, cytzki'n cyey o byan tu'n Dios ka jun t-xe'chel David tocltel te co'pl Israel. Bix ya ti'jzen David, ma tzula tii'n Dios co'pbil e tkbaxin, ja Jesús. ²⁴ Key cytzki'na ch'itk tak' Jesúsnak' tzal cye xjal, Juan Bautista e k'umente cye xjal Israel ilx ti'j tu'n tcyaj cyk'o'n cyil, bix tu'n cymeltz'aj tuya Dios. ²⁵ Tej tzunj ch'itk tpon baj taak'en Juan Bautista te k'olc'ax xjal tuj a', bixsen e tkbaxin: "Ka yaa'n nxi' cybisen cyey ti'j ka inayen weya jsma'n tu'n Dios, jxjal cyey tzin cyyo'n. Pero yaa'n inayen weya. Tzulte juntl xjal tuya nim tipemal bix nim tajwalel. Yal weya, axsele jac'a tz'e'la nuket ba'n tel npju'na ke t-xaab cyi' tken," tzi tzen Juan Bautista ti' Jesús.

²⁶ Ja'le tzuna, key taat, ejee'x cyey t-xe'chel Abraham. Bixsen niy'tl kej xjal cyxola n-oc ebinte tyol Dios. Wajtzen txi' nkba'n cyey ka te cyeja ja jun yol te co'pbila. ²⁷ Tuj Jerusalén min tz'el cyniy' xjal ti'j ka ja Jesús co'pbil, bix mitetpe ja cycawel n-el tniy' ti'j. O'cxtl e bint cyu'nj e cykanen tu'n tbyet Jesús. Mitetpe el cyniy' ti'j ttxolen tbin cyu'n ti jilel e cykba tyolel Dios jatxe nejl tuj u'j ti jilel tu'n t'bj. Amale e jawet s-it kej yola cywitz xjal jaca sábadó, minx e'la cyniy' ti'j ti elpenina. ²⁸ Amale minxet e cnet jun tl Jesús tu'n t'cbuxin, pero e cyjoyx ti ctemela tu'nx tbyet-xin tu'n cawel Pilato. ²⁹ Ju'tzen e baj tisenj e tyola ootxa tyol Dios ti'j tcyamecy Jesús. Tejtzen tbyet Jesús cyu'n xjal, bixsen e cu'tz k'it Jesús twitz cruz, bix e cu'x maket-xin. ³⁰ Pero bix e jatz titz'jsa'n Dios jaxin tuj cyamecy. ³¹ Tej tetz Jesús tuj Galilea tu'n tpon tuj Jerusalén te cyimel, xklu'n tzunxin cyu'n t-xnak'atzzin. Ejee' xsunj xin t-xnak'atzzin oc ccyce'yente Jesús tej tul meltz'aj juntl maj. Ja'le tzuna ejee' xsunxin tstiwa ti'j ti jilel o baj te Jesús. Ti'j tzunj t'jatzlen itz'jxin ktzki'ntzen ka ja Jesús Scy'o'n tu'n Dios. ³² Yaltzen keya, jaxsen lu ko'ya nko kban jba'n t'pocbalj tyol Jesús. Bix ja'lewe, tu'ntzen cybintey ja ba'n yola. Tyol e tkba Dios cye ootxa xjal o bint. Yal tzunj xin Scy'o'n tu'n Dios, matzen tzulxin. Ya mintzentii' tu'n kyonte mas. ³³ Ejuo'tzen cycwal ke ootxa xjal. Bix ma tz'oc ttz'aktza'n Dios ke ti jilel o cyaj tkba'nxin cye kman ootxa. Jatzen e tkba Diosj tu'n t'jatz itz'j Jesús tuj cyamecy. Ju'tzen elpeninaj tuj t'cab Salmo. Nbya'n cyjulu: "Jay ncwala. Ja'lewe cxe'l nk'o'n tchunk'lala twitz tx'otx'," tzi Dios te Tcwal. Jatzen nbya'na jyola ti'j t'jatzlen itz'j Jesús. ³⁴ Tuj juntl tyol Dios, tuj Isaías, tzi cyjulu: "Cxe'l nk'o'n cyi'wla'n cyey, tisenj e cyaj nkba'n te cawel David," tzi Dios cyej xjal Israel at-xe tyem. Kej yol ti'j cyi'wla'n nxi' nkba'n cyey, ja tzunj japeninaj ti'j t'jatzlen itz'j Jesús tuj cyamecy. ³⁵ Tzi cyjulu tuj juntl Salmo: "Mi'n tcuyey tu'n tcu'a'k'ey Tcwala tuj camposant," tzi tzen Tcwal Dios te Tman at-xe tyem.

³⁶ Cytzki'ntl tzuna tej otk tz'ajben cawel David te Dios tisenxj te Dios e tajbe, bix e cyimxin, bix e cu'x maket-xin jaa'xj maku'ne ke ootxa xjal, bix e cu'x k'ey texin t-xumlal. ³⁷ Entonces jax ke cyej yol tuj Salmos ti'j jun xjal min t'cubel k'ey, yaa'n ti'j David. O'quel ccyey'ena t-xumlal jxjal e jatz titz'jsa'n Dios min e cu'x k'ey. ³⁸ Entonces, key te ntanem, cyeltzen kk'o'na tuj tzin ka ja Jesús. Jatzen xjal jsma'n tu'n Dios tuya tajwalelxin te najsalc'a kil. ³⁹ Ya nimxsen tyem tzin cyajbe'na tu'n t'najset cyila. Tu'n t'binjtley Moisés cyu'na, cyey mix nchi tzokpajey tuj cyila. Pero tuya Jesús, ba'n ccyaj cyey junx maj sak. ⁴⁰ Cybi'nc'a tzunj kej yola. Cyk'o'nc cye'u'ja ti'j nuk cub cyibaja tisenj tzin nbya'n tuj tyol Dios. Tzi cyjulu: ⁴¹ "Ke cyey min tz'oc cybi'nja. Nuk n-oc cyxmoccha'na. ¡Q'uelelc'atzen cyni'ya ti'j! ¡o chi tzaj k'o'n cyey tu'n ccyima junx maj! Pero tetzen mitkna'x ccyima, chi jawelxsen klee'y, cuma weya, inayena Dios, cwel nbíncha'na tik'ch jilel cyibaja. Pero amale chic'ajat nyol cykil tyem, bix amale nxi't cyk'umen nsanjel tzin cyey, minx tz'el cyni'ya ti'j, bix minx cybiy," tzi Dios cye judío nejl. Ja tzunja e tkba Dios cyej xjal tu'n cyoc tuj cawbil, cuma min e cyocslaj jax yol. Dios cyjel tk'o'n ke xjal judío te junx maj ka min ma cybi Jesús—tzi Pablo cye judío tuj camon jaa'.

⁴² Tejtzen otk pon baj tyolen Pablo, bix etz Pablo tuya Bernabé tuj camon jaa' te xnak'tzabl tyol Dios. Pero tej cyetzzin, bix e cykanen xjal tu'n cyyolenxin tuj juntl sábadó cyuya xjal ti'jx kej yol lu. ⁴³ Tejtzen otk chi el t'ziti'j xjal, nimxsen xjal judío bix yaa'n judío oc lpe cyi' Pablo tuya Bernabé. Bix oc cyocsa'nxin cye'u'j xjal tu'n toc ke cye'u'j xjal ti' t-xalbil Dios.

⁴⁴ Bix e pon juntl sábadó. Ch'ix yaa'n cykil tnom e tchmon tiib te ebilecte tyol Dios k'i'n tu'n Pablo tuya Bernabé. ⁴⁵ Pero tejtzen toc ccyey'yen kej xin judío tajwil tuj camon jaa' nimxsen xjal tocltel ebin tej t-xi'lel cykba'n Pablo, bix oc chi'lkexin. Bix ak'kexin iic'belcye Pablo, bix oc cykba'nxin nim ka' yol cye Pablo, bix x'tak' te Pablo. ⁴⁶ Pero bix aj ttzak'be'n Pablo tuya Bernabé tuya cykil cye'u'jxin. Mintii' t'ziti'j xjal t-xi' cykba'nxin:

—Keya te ke, il ti'j t-xi' kkba'na jba'n tpoctal Jesús cyey nejl, cuma judíokey. Pero cyczy'y tzuana tco'pbil Dios tisenj texin taj. Ju'tzen tten tzin cyeeec'ana tu'n mintii' cyoclena ti'j chunk'lal te junx maj. Matzen ko'xa cyuyaj xjal yaa'n judío, tu'ntzen toc cybi'ncye bix tu'n cyocslan ti'j ja co'pbil lu. ⁴⁷ O tzaj tk'o'nte Dios ejoo' tisenxix tten ttzajlen tk'o'nxin kej xjal judío at-xe tyem, tej ttzaj tkba'nxin cye judío tu'n tyolelxin Isaías cyjulu: “Lu ken nchin chk'o'n cyey te k'ol nyol cyej xjal yaa'n judío. Tisen jun luz ntxaken tuj be, ju'xsen oj tjav txaken tuj cywitz xjal yaa'n judío oj tel cyniy' ti'j nyol. Ejee'tzen cyey chi xe'l k'inte ja yol te co'pbila la' jaa'xa pomnina baj twitz tx'otx'.” tzi Dios cye xjal judío, tcyajlen tkba'n te Isaías jatxe nejl, bix tzi Dios ke ja lewe—tzi Pablo cye tajwil judío.

⁴⁸ Tejzen toc cybi'n xjal yaa'n judío ke ja yol lu, ejee'tzen xjal e na'nte ttzjal, bix e jaw yolen ke xjal ka ba'nksen tyol Dios. Bix nimksen xjal oc oclante tyol Dios, kej xjal otkx chi tzaj k'o'n tu'n Dios tu'n cyocslante Jesús. ⁴⁹ Bix ju'tzen tten tkbaj tyol Dios ti' Jesús tuj cykil tx'otx' te Pisidia.

⁵⁰ Pero kej xin tajwil cyxol judío e cub cyi'jxin xjal nintzaj tuj tnom bix ke xuuj cyiw tuj cyoreligión, tu'n cyoc ten te yajlalcye Pablo tuya Bernabé, tu'n cyexxin tuj ja tx'otx'a. ⁵¹ Pero tejzen cyexxin tuj Antioquia, bix el cytzt'o'n Pablo tuya Bernabé kuk ti' cyxaab ti'j ja tnoma te techlal cyi'j xjal judío, bix e xi'kexin ocne tuj tnom te Iconio.

⁵² Yaltzen cyey ac'aj oclsal, e cyaj tuj tnom te Antioquia tuj Pisidia. Bix e tzaj tk'o'n Dios nim ttzjal cyexin, bix e noj cyanem tu'n Espíritu Santo.

14

Pablo tuya Bernabé tuj tnom Iconio

¹ E pontza ke Pablo tuya Bernabé tuj tnom te Iconio. Tejzen cyponxin, bix ocxkexin tuj camon jaa' cye judío. Jatzzen e yolenakexin tuya nim cypemalxin. Nimksen xjal oclante cyoolxin, bix oc cybi'n. At xjal judío, bixsen at xjal griego. ² Pero attzen cab xjal judío min e cub cyi'j, bix ak'ke yolel ka' cyi' Pablo tuya Bernabé, tu'n tcyaj wi't cyka'yelxin cywitz xjal griego. ³ Ju' tzunj e cwa' tuj cywitzxin tu'n cytenxin tuj Iconio te nim k'ij. Tuya nim cypemalxin bix nim toc ke cy'ujxin ti' Dios nchi yolen tzunxin ti' t-xtalbil Dios. Bix e tzaj tk'o'n Dios nim cyajwalelxin tu'n t'cub cybincha'nxin tik'ch techlal, tu'ntzen t-xi' cyyeeec'anxin ka jax cyoolxin.

⁴ Pero tujzen cynic'bil judío bixsen ke cyool t-xel Jesús, bix e cub pax tnom. At cab oc ebinte cyool judío, bix at cabtl oc ten cyuya Pablo tuya Bernabé. ⁵ Cwaxsen tbint cyool cycawel griego tuya cycawel judío tu'n cyoc yaset-xin bix tu'n cycub peek'et-xin tuya xak. ⁶ Pero te Pablo tuya Bernabé, e cybixin tpoctal ti' jilel nbaj bint, bix e bint cyu'nxin tu'n cyetzxin tuj Iconio, bix ex okkexin cubne tuj tnom te Listra bix tnom te Derbe, ca'ba tnom te tx'otx' Licaonia. ⁷ Tuj tzunj nim tnoma bix ke tnom tiy' ttxa'n bix ak'kexin kbal tpoctal jba'n.

Oc xeet Pablo tuya xak tuj tnom Listra

⁸ Tuj tzunj tnom te Listra najl junxin xjal cox. Jatxe titz'jlenxin bajx jawa bet-xin jun maj. Mintii' tipenxin cyuj tkenxin. ⁹ Attzen jun k'ij nabi'nc tzunj xin cox cyi' tyol Pablo. Bix ak' twitz Pablo ti'jxin, bix e tna' Pablo ka wa'lec te'u'jxin cyi' tyol Pablo, bix otkxsen tz'oc ke te'u'jxin ti' Jesús ka ba'n tul tnaablxin tu'n Jesús. ¹⁰ Entonces bix cyiw tuj twi' Pablo t-xi' tkba'n:

—Taat, we'wey jiquen cyibaj tkena—tzi Pablo.

Ya tujx naj tjav lipen jxin cox, bix ak'xin betel. ¹¹ Tejzen toc tcyeyen t'nimal xjal ti' jilel otk bint tu'n Pablo, bix ak'ke xjal s-il tuj cyool tuya nim tzalajeb:

—ke dios ma cub cych'ixbe'n cyiib te xjal, bix lutzen ke lu!—tztizen ke xjal.

Pero te Pablo tuya Bernabé, min e yolenkexin tuj cyool aj Licaonia. Min el cyniy'xin ti'j.

¹² Pero bix ak' elelx cywi' xjal tu'n cyklee'batz. Tzitzen ke xjal ka ja Bernabé dios Júpiter, cycawel dios. Yaltzen te Pablo, jatzen dios Mercurio, cysanjel niy'tl dios, cuma jatzen Pablo mas nim e yolen. ¹³ Tuj be n-octz ttxa'n tnom te Listra, at jun tja dios jaa' nchi na'na xjal dios Júpiter tuya cystembre. Tuj tzunj tja Júpiter attzen junxin pala te binchalte cyoybil. Tuj tzunj cyoybilxin nbaj cyabechenxin toro, bixsen ncub thyo'n jxin pala ejee'jil tu'n cyxi' oyetjil te Júpiter. Tej tbinte texin ka otk jaw jlet Júpiter tuj Listra, bix e xi' ajkelenxin te k'il cabjil wacx abechen, bix e tzaj tii'nxin ejee'jil jaa' t'cwa' Pablo tuya Bernabé. ¹⁴ Toc ccyeyen ke toro, bix el cyniy'xin ti'j ti' jilel t'cublel bint cyu'n xjal. Teltzen cyniy'xin ti'j, bix el cyrotexin cyi'jxin, tu'n t-xi' cyyeeec'anxin cye xjal ka yaa' ba'n tuj cywitzxin. Bix ocxkexin cyxol t'nimal xjal te s-il cyxol xjal. Tztizenke cyjulu:

¹⁵ —¿Tu'n tiken ncwa' cybincha'na ju'wa? Yaa'n tumel, cuma xjal ko'ya tisenxj cyey. Yaa'n Dios ko'ka. Yaa'n ti ma ko tzaa' keya cyxola jaj tu'n t'bj twi'j nchi na'na cydiosa, cuma mintii' ba'n tajbe'na. Kajka tu'n tcyaj cyk'o'na kej cydiosa cymnewe, tu'n cyajbena te Dios i'tz. Ja

texin e cub binchante tik'ch jilel, cya'j, mar, twitz tx'otx', bixsen tik'ch jilel at. ¹⁶ Cyuj tyem ootxa e na'nkecye xjal ke dios tisenx cye cycostumbre, bix e tzakpite Dios ejee'. Min cytzki'n alxix tej jaxxix Dios. ¹⁷ Pero at-x tumel techlal ka at-x jun Dios jaxxix. Tisen tzunj, ntzaj tk'o'nxin jbal, nim twitz awal, nimxsen waabj, ttzyal, bix tik'ch jba'n. Ejeeyla tzunja tstiwa ti'j ka jax at Dios—tzitzenke Pablo tuya Bernabé.

¹⁸ Pero mitetpe cyuya jyol ju'wa, mix e bina tu'n tcub cywaban xjal tu'n t-xi' oyet kej jil wacx cyexin.

¹⁹ Maatkxsen ete' Pablo tuya Bernabé cyxol jxjal, ya npon jun clojxin judío otk tzaxje tuj tnom te Antioquía Pisidia bixsen Iconio. Ejee'j xin ete'cx yajlal cye Pablo tuj tneel. Bix e cub cyi' xjal cyu'nxin tuya cyyolxin tu'n cyoc meltz'aj xjal ti' Pablo tuya Bernabé, bixsen e jaw jun nim k'oj, bix e jaw meltz'aj ke xjal cyi'jxin tu'n tcub cyk'o'n xjal ja Pablo tuya xak. Bix iy' tuj cyc'u'j xjal ka otk byet-xin, bix ex kitet-xin ti'jxe tnom. ²⁰ Pero ke ocslal te Listra oc cysut'en cyiib ti'jxin. Pero maatkxsen ete'c xjal ti'jxin, bix e jaw Pablo, bix ocx meltz'ajxin tuj tnom juntl maj.

Tetzen juntl k'ij bix iy' Pablo tuya Bernabé tu'n cyponxin tuj jun nka tnom Derbe tbi.

²¹ Tejzen cyponxin tuj tnom te Derbe, bix ak'kexin kbalte jba'n tpochal. Nimxsen xjal oc ocslante cyyolxin, bix ocslan ke xjal Jesús. Tejzen tpon baj twi' cyxnak'atzxin tuj tnom te Derbe, bix ajtz meltz'ajkexin tuj Listra, bix tuj Iconio, bixsen tuj Antioquía, bixsen tuj tx'otx' te Pisidia. ²² Cyuj tzunj lugara nukxsen ju' iy'kexin nimsalec cyc'u'j ocslal. Bix e xi' cykba'n cyjulu:

—Ilx ti'j chi cwel tena tuj tumel twitz Jesús, cuma tzulxte q'uixc'aj nuk ti'jc'a Jesús. Mi'n cyaj cycye'yen xina. La' alcyje jun k'ij ko temel tuyaxin tuj tcawbil Dios—tzitzen ke t-xel Jesús cye ocslal te nimsalcye.

²³ Cyuj tzunj tnom e xa' cyjyo'n Pablo tuya Bernabé cab xjal te ninc'ul bix c'ojlal cyxol ocslal. Bix e na'nke t-xel Jesús, bix e cub cyyo'nxin weyaj, bixsen e cub cyk'o'nxin cyk'abxin tibaj cywi' kej xjal otk chi etz cyscy'o'nxin cawel cyxol ocslal, tu'ntzen at cyajwalelxin, bix tu'ntzen cyxi' k'o'nxin tuj tk'ab Jesús. Tzi tzunkexin cyjulu:

—Jaxetzen Jesús c'ojlalte cyey, cuma ma cyocsla xina—tzitzen Pablo tuya Bernabé, bix etzkexin cyuj tnom.

Tej cypon Pablo juntl maj tuj Antioquía

²⁴ Bix iy'kexin tuj ttx'otx' Pisidia, bix e ponkexin tuj ttx'otx' Panfilia, jaa' ta' jtnom te Perge. ²⁵ Tujzen tnom te Perge e yolenkexin ti' tyol Dios cye xjal. Yajc'atlzen bix e xi'kexin tuj jun nka tnom te Atalia tuj mlaj tx'otx'. ²⁶ Bixsen tuj Atalia ocxakexin tuj jun barc tu'n cyiy'xin tuj mar, tu'n cyponxin juntl maj tuj Antioquía, jaa'xj otk chi exaxin. Antioquíatzen, jatzen jun tnomj jaa'j otk chi na'na xjal Dios cyi' Pablo cyuya ke cyuyaxin, tu'n t-xi' tc'ojla'n Dios ejee'xin tuj be. Bix ya otk chi pon meltz'ajxin, cuma otk pon baj cyaak'inxin. ²⁷ Tejzen cypon Pablo tuya Bernabé, bix oc cychmo'nxin cykil ke ocslal tuj tja Dios, bixsen e baj cykba'nxin tik'ch e baj cyexin tuj be, ti tten toc tonen Dios ejee'xin, bix ti tten tk'ontete Dios tu'n cyiik'en jxjal yaa'n judío ja Jesús. ²⁸ Bix e ten ke Pablo tuya Bernabé cyuya ocslal nim tyem.

15

Tej toc cychmon cyiib ke t-xel Jesús cyuya jun clojxin tnejenel te tja Dios tuj Jerusalén

¹ Maatkxsen ete' Pablo tuya Bernabé tuj tnom te Antioquía, bix e pon jun clojxin xjal judío, te ttx'otx' Judeakexin. Bixsen ak'kexin kbal cye ocslal ka tu'n cyco'pja tuj il, il ti'j chinel cyu'na tisenx tten tcostumbre Moisés e cyaj ttz'i'ben. Tzi tzunkexin:

—Te tzun kej k'ij ootxa ke cye xjal il ti'j el cpette ttz'umel twi' cytz'albil te techel ka te Dios ke t-xjal. Ju'x ley ja'lewe ke cyey ejee'y judío, il ti'j cxe'l cyii'na ja costumbrewa, bixsen ke cyey xjal yaa'n judío, ju'xa il ti'j cycuyey ja costumbre te ootxa. Ka min, mlay chi co'pja —tzitzen ke judío te Judea cye ocslal.

² Pero te Pablo tuya Bernabé, min el ba'n tuj cywytzin ti'j cyxnak'atzxin, bix e jaw jun k'oj. Pero tu'ntzen t'bj twi' ja k'oja, bix aj cysma'n ke ocslal ja Pablo tuya Bernabé bixsen cabtl xjal tuj tnom te Jerusalén, tu'n cyiik'en texin mas txolen ti'j cyk'oj ti'j tley Moisés cye t-xel Jesús bix cye tij. ³ Entonces bixsen e xi' bintkexin tuj tnom te Jerusalén. Tu'n cyponxin, il ti'j iy'kexin tuj tx'otx' te Fenicia bix Samaria. Tejzen cybet-xin cyuj ja tx'otx'a, bix e cyaj cyk'o'nxin tuj chic'aj cyej xjal judío tii'n ke xjal yaa'n judío otk cyaj cyk'o'n cycostumbre tu'n cyoc lpe ti' Dios. N-ocxetzen cybi'n ocslal ju'wa, nchi jawxe tzalaj.

⁴ Cwax cypon Pablo tuya ke tuya tuj tnom te Jerusalén, bix e k'ijkexin cyu'n t-xel Jesús twitz tx'otx' bix cyu'n cawel tuj tja Dios, bix cyu'n cykil xjal tuj tja Dios. Bix e xi' cykba'n Pablo cyexin tik'ch otk bint tu'n Dios cyuj juntl lugar, bix ti tten otk tonen Dios ejee'xin.

⁵ Pero cyxoltzen ocslal tocxe cabxin cyiw cyk'o'na cyiib tuya tley Moisés. Bix e jaw we'kexin, bix ak'kexin yolel cyjulu:

—Ba'nte ti'j kej xjal yaa'n judío ma chi ak' ocslal tco'pbil Jesús. Pero il ti'j chi oquel kchk'o'n tu'n cyczuyante tik'chj e tkba Moisés, tu'n toc cyechel ti' twi' cytz'albil tisenx tten cyxol xjal judío—tzi tzun kej xin ocslal cyiw cyk'ona cyiib tuj cyley. Ejee' ke fariseo.

⁶ Tbjalxenxilt tzunj yola, cykil ke t-xel Jesús cyuya ke cawel tuj tja Dios bix oc cychmon cyiibxin te cyey'lte, bix te ninc'ulte ti chi temela jxjal yaa'n judío ka tu'n cyoc lmet ti'j tu'n tel keset ttz'umel twi' cytz'albil bix ka min, tu'ntzen tbtin cyu'nxin tixix ctemela. ⁷ Nimxsen tyem e yolenkexin tibaj ju'wa. Nimxsen jun yol otk jaw. Pero cwa tjaw we' Pedro, bix e xi' tkba'nxin:

—Key hermano, cytzki'ntl tzuna at-xe tyem tscy'o'n kena tu'n Dios tu'n t-xi' nkba'na jba'n tpochal kej xjal yaa'n judío tu'n cyocsla'n. ⁸ Ttzki'nte Dios alj ba'n taj, bix e xi' tk'o'nxin Espíritu Santo cye tisenx tten tzaj tk'o'nxin Espíritu Santo ke. Ju'tzen tten tkbamlente Dios ka tu'n tiik'en texin kej xjal yaa'n judío tisenxj kewa. ⁹ Yaa'ntzen ti elpenina ja lu jaj min tz'oc tcyeyente Dios ka tec'ax xjal ko'. Min-alte jun mas achen twitz juntl. Cuma o chi ocslan, cykilkecyo e tz'el ttjxo'n Dios il ti' cyanem. ¹⁰ Katzen ju'wa, ka nuk tu'nc'a Jesús ta' co'pbil, ¿tikentzen ete'q'uey cyakwusalecte Dios? ¿Tikentzen n-oca cyk'o'na cykilj tley Moisés cyej xjal yaa'n judío? Tej tley Moisés tisen jun iktz te ja kibaj, mitetpe ejo'ke mitetpe ke ootxa xjal mix ebina tjaw cyiken, bix ya cyajltzen cyey tz'oc cychk'o'na cabtl te ikjawte. ¹¹ Min, key taat! Min chi oc cylomo'na ti' tley Moisés. Ktzki'ntl tej co'pbil ke tu'n a tanem Kman Jesús, bix ju'xsen ke xjal yaa'n judío, jax co'pl te cye tu'n Kman Jesús. Mintii'tl juntl mas. Mintii'tl menos. O'cx Jesús—tzi Pedro cye niy'tl xjal.

¹² Tbjalxenxilt tzunj ju'wa, mintzentii'tl yol e baj. Bix ak' Pablo tuya Bernabé yolel. Cykil xjal oc ebinte cyexin tej cyoolenxin ti', tik'ch tcyecayil bixsen techlal e bint tu'n Dios cyu'nxin te yec'bil ka ncy'iwanl Dios cyi'j xjal yaa'n judío tisenx cyej xjal judío. ¹³ Tejtzen cybaj yolen Pablo tuya Bernabé, bix ak' Jacobo yolel, titz'en Jesús, bix jaxin tneel cawel cyibaj ocslal. Tzi tzunxin cyjulu:

—Key hermano, cybintz nyol, nuksama. ¹⁴ Otzen tz'oc cybi'na ti'j tyol jxin Simón Pedro. Ma tzaj tyolenxin ke ti tten tscy'onte Dios ke xjal yaa'n judío tu'n cyoc te ocslal bix tu'n cyoc te t-xjal Dios. ¹⁵ Kej tyol Pedro lu junxc'ake tuyaj tu'l cyool tyolel Dios twitz tx'otx' jatxe nej. Cybintzney ti tten tyol ktzan tyolel Dios Amós. Tzitzen cyjulu: ¹⁶ “Tzitzen Kman Dios cyjulu: ‘Cyuj tzunj k'ij chi ul, inayena Dios chi oquel nc'ojla'na juntl maj kej xjal el itz'j ti' cawel David. Ya cawbil t-xe'chel David ma tzak' pjel twi', tisenxj nintzaj tja Dios e bint tu'n David mintii'tl tipemal. Pero tzul jun k'ij oj tjaw ntz'iysa'n tcawbil jun t-xe'chel David, tisen jun jaa' ma cub xitj pero cjawel cybincha'n juntl maj. ¹⁷ Chinel ja lu wu'n tu'ntzen cykil ke tnóm twitz tx'otx' yaa'n judío tu'n t-xi' cyjyo'n Taaw entera twitz tx'otx', tu'n cyoc te nxjal,’ ¹⁸ ju'tzen toc tu'n Kaawa,” tzitzen Amós. Entonces o cyaj tk'o'n Dios tuj chic'aj at-xe tyem ka tajxin kej xjal yaa'n judío.

¹⁹ Ju' tzunj, key taat, weya tuj nwitz min tz'oc kyajla'n ke xjal yaa'n judío tuyaj cycos-tumbre judío, cuma ya ma cyaj cyk'o'n cycostumbre nuk tu'n ma tz'oc lpe cyanem ti' Dios. ²⁰ Nuk cab yol ti'j yaa'n ba'n cxe'l kkba'n tuj jun u'j, nuk jaj ti' jilelj n-el cyxoo'n xjal judío. Min-al jun ocslal cxe'l chyonte jchi'pj otk txi' oyete cye sant, kej mintii' cyanem. Min-al juntl xuuj tajbe xinak, bix min-al juntl xinak tajbe xuuj. Nuk ja t-xu'l, nuk ja tchmil. Min-al jun toclen ti'j chyoy jun alimaj nuk otk jaw jtz'et, cuma min ma tz'el ttziy', bix tu'n mi'n txi' cye'a'n tziy'. O'cx xsunj. ²¹ Jatzen cyaja tumel lu cxe'l kkba'n cye, tu'ntzen mintii' tak' ti' cyanem ocslal judío, cuma ete' tuj cykil kej tnoma, bix tzinx n-oc cybi'n tyol Moisés, nxi' cyeyette jaca sábado, jaca smant at-xe k'ij. Cyuya tzunja yol cxe'l kkba'n chinela cye cyu'n. Ju'tzen ko temel ch'in cyuyey tuj ttzyal—tzitzen Jacobo te cabtl.

²² Cykilxsen ke t-xel Jesús, ke cawel, bixsen ke ocslal el tyol Jacobo ba'n tuj cywitz, bixsen etz cyscy'o'nxin ca'ba xjal te tuya Pablo bix Bernabé, tu'n cyxi'xin cyuya ocslal tuj tnóm te Antioquía. Nintzaj k'il txolen xsunkexin cyxol ocslal te Jerusalén. Judasxin, juntl tbtin Barsabás, bixsen Silas. ²³ Ccycaal tzunj xin xjal lu e xi' k'onte jun u'j cyej ocslal yaa'n judío. Tzitzen u'j cyjulu: “Achenkey ocslal te Antioquía, bixsen cykil ke ocslal yaa'n judío te ttz'otx' Siria bix Silicia. Jun k'olbehl cyej. Keya ejo'ya t-xel Jesús, bix cawel tuj tja Dios, bix cykilj cabtl ocslal tuj Jerusalén ma txi' kk'o'na ja u'j lu cyey. ²⁴ O kbiya at cab xjal e xi' tzalú bix o chi pon cyuyey. Pero mintii' tumel o txi' kk'o'na, bix o chi oc ten yajlalec cyey tuya cyxnak'atz, bix o chi cub tzipeta. Tzitzenke ka te cyey, il ti'j tu'n cyoc lpey ti' tley Moisés. Tisen tzunj, kej xinak il ti'j q'uelel cpet tz'umel twi' cytz'albil tisenj cye xjal judío. ²⁵ Ju' tzunj ma baj kninc'u'n ke ti'j tzalú. Matzen cub ku'na tu'n tetz kscy'o'na cab xjal te kej kcloja tu'n cyxi' tuya Bernabé bix Pablo. Ejee'tzen xjalja n-oc nim kak'a cye. ²⁶ N-oc ke ke kc'u'j ti' Bernabé bix ti' Pablo, cuma nuk tu'nc'a Jesús ma txa' cyk'o'n cychunk'lal tuj t-xobiyl. ²⁷ Ja tzunj ca'baxin kyolela ma txi' ksma'na, jatzen Judas tuya Silas. C'oquel cymo'jba'n cyool tuya

Pablo bix Bernabé, tu'ntzen t-xi' cykba'n cyey ti jilel ma baj kninc'u'na ti'j. ²⁸ Jatzen yol ja lu. Te Espiritu Santo bixsen keya, ba'n ma tz'el tuj kwitza tu'n mi'n jaw cyikena jun ley cyiw. O'cx xsun cye ja lu: ²⁹ 'Mi'n txi' cycho'na kej alimaj otk txi' oyet cye sant. Mi'n txi' cyc'a'na tziy'. Mi'n txi' cycho'na ke alimaj at-x tziy' tuj t-xumlal. Mintii' cyoclena ti' juntl xinak ma juntl xuuj yaa'n t-xu'la ma yaa'n tchmila.' Ka ma cub cyc'u'na kej yola, ba'ntzen chi xe'la. Cyc'o'nc cypena," tztizen u'j.

³⁰ Entonces bixsen e xi' cysma'n oclsal ke Pablo, Bernabé, Judas, bixsen Silas maan Antioquia tuyaj u'j. Cycyaal tzunxin e xi'kexin. Tejtzen cyponxin, bix oc cychmo'nxin cykil ke oclsal tuj jun lugar, bixsen e xi' cyc'o'nxin u'j. ³¹ Tejtzen t-xi' cycye'yenxin u'j, bix e jaw tzalajkexin tu'nj ba'n ocsabl cyc'u'jxin e pon. ³² Bix oc cytzak'tza'n ch'intl Judas tuya Silas cabtl yol. At-xix cyexin cypemal te kbalx tyol Dios. Nimxsen oc cynimsa'nxin cyc'u'j oclsal tuya cyoylxin.

³³ E ten ke Judas tuya Silas cabtl k'ij. Tel-lenxilt tzunj cab cyc'ijxin tuj Antioquia, bix e k'olben ke oclsal cyexin, tu'n tuj ttzjal chi temelaxin oj cymeltz'ajxin tuj Jerusalén cyuyaj xjal e xi' chk'onte cyexin. ³⁴ Pero cwa tcub tu'n Silas tu'n tcyajxin tuj Antioquia. ³⁵ Pablo tuya Bernabé bix e cyajkexin tuj Antioquia. Tuya cabtl xjal bix e xnak'tzanxke cye xjal, bix e kbanxexin tyol Dios.

Tej tel tpa'n tiib Pablo ti' Bernabé

³⁶ Tel-lenxiltzen cab cyc'ijxin, bix e xi' tkba'n Pablo te Bernabé:

—Nchin ximan cyi'j oclsal cyuj tnom jak'ch o ko i'ya te kbal tyol Jesús. Titzele min ko'x te k'olbelcye juntl maj te cyey'lye la' tii'n ete'—tzi Pablo te Bernabé.

³⁷ Ba'n e'la tuj twitz Bernabé. Pero e tajbe tzunxin tu'n t-xi' Juan Marcos cyuyaxin. ³⁸ Pero min e tcuya Pablo, cuma jxin Juan Marcos tuj tneel maj cybexin bix otk cyaj tcye'yenxin ejee' Pablo tuya Bernabé tuj Panfilia, bix min oc lpeixin cyi'jxin tuj cyaak'enxin. ³⁹ Mix e cyja'kexin ba'n. Cwa cycub paxxin tu'n mix e bina cytenxin. Bix oc tmojban tiib Bernabé tuya Juan Marcos. Cya'bel tzunxin ocxkexin tuj jun barc tu'n cyponxin tuj ttx'otx' Chipre, te yolel cyuya xjal ti' tyol Dios. ⁴⁰ Yaltzen te Pablo, bix iy' tii'nxin Silas te tuyaxin tuj tbexin. E na'n ke oclsal Dios cyibajxin, tu'ntzen ttzaj nim tc'u'j Dios cyibajxin tuj be, bix e tzyet cybexin. ⁴¹ Bix ak'kexin betel tuj ttx'otx' Siria bix Silicia, bix nuk jak'ch i'yakexin. Oc cynimsa'nxin cyc'u'j oclsal cyuj tja Dios.

16

Tej t-xi' tjunan tiib Timoteo tuya Pablo bix Silas

¹ Cyetz tzunxin tuj ttx'otx' Cilicia, bix e pon Pablo juntl maj tuj kej tnom te Derbe bix Listra, junx tuya tuyaxin Silas.

Tujtzen tnom te Listra, attzen jun xin oclsal Timoteo tbixin. Ja tzunj xin Timoteo tal junxuj oclsal judío, pero texin tman te griego. ² Ejee'tzen oclsal te Listra bixsen te tnom Iconio ba'nksen cyoylxin ti' Timoteo. ³ Tajtzen Pablo e xi' jxin xjal te cyuyaxin tuj be, bix jax ba'n te Timoteo tuj twitz. Pero ttzki'n Pablo ka at nim xjal judío cyuj tnom jaa' xa'ninakexin. Tu'ntzen mintii' k'oj cyuyaj xjal judío lu, bix el tcpu'n Pablo ttz'umel twi' ttz'albil Timoteo, cuma cykil xjal itzkilte ka tcwal griego jaxin, bix mintzentii' cye xjal griego cycostumbre ju'wa.

⁴ Entonces bixsen ak'ke Pablo, Silas, bixsen Timoteo te betel. Tujtzen jaca juun tnom e xa'kexin kbalte cyej xjal yaa'n judío ti otk cub cyniq'uen t-xel Jesús ti'j bixsen ke tij xjal tuj Jerusalén alcye tbinlel cyu'n xjal oclsal yaa'n judío. ⁵ Ju'tzen tten cyoc chmet ke oclsal tuya mas ttzjal, bix ju' tzunj mas cypemal cyuj tja Dios, bix e xi' tz'iy mas cybaj oclsal.

Tej tocx twitziy' Pablo ti'j xjal te Macedonia

⁶ Tuj tzunj tyem lu tajtzen Pablo bix xsunj ca'batlxin e xi'kexin elne te tuj ttx'otx' Asia te kbalte tyol Dios. Pero te Espiritu Santo jun wikxiltle txolen k'i'n tu'n. Min e tcuya tu'n cyxi'xin tuj Asia. Entonces bix exkexin tuj tnom te Frigia bix tuj Galacia. ⁷ Yajc'atl cyponxin tawte mojon tuya Misia. Tejtzen cyponxin tuj Misia, e cyajbe tzunxin tu'n cyxi'xin mas jawne tej lugar te Bitinia, pero juntl maj min e tcuya Espiritu Santo te Jesús tu'n cyxi'xin. ⁸ Entonces bixsen e xi'kexin te elne cyuj tnom tuj Misia. Tejtzen cyponxin tuj mlaj tx'otx', tuj tnom te Troas, jaa' in tina weya inayena Lucas.

⁹ Tetzen koniyan, bix ocx jun twitziy' Pablo. Jatzen oc tcye'yenxin ja lu. Attzen junxin xjal wa'l'ca. Te Europa jxin xjal, tej lugar te Macedonia. Toc tzunj xin xjal kanlte te Pablo cyjulu: "Ctiy'tz tuj mar. Quixtey tzalu tuj Macedonia te k'umlte keya ti tten jtyol Dios," tztizen ttxocan xjal. ¹⁰ Tejtzen ttzaj tna'n tiib Pablo tu'n twitziy', bixsen e cub ku'na ka jun tyol Dios, bix ja Dios otk txconte keya tuj Macedonia. Entonces lwewax e jaw bint ko'ya tu'n kxi'ya tuj Macedonia.

Tej cyocx Pablo tuya Silas tuj tzee' tuj tnom Filipos

¹¹ Bix ocx ko'ya tuj jun barc, bix etz ko'ya tuj Troas, bix iy'x ko'ya tuj mar jiquen tejxe kpona tuj tx'otx' tuj mar Samotracia tbi. Tetzen juntl k'ij bix iy' ko'ya tu'n kpona tuj ttx'otx' Macedonia, tuj jun tnom Neápolis. ¹² Tujtzen Neápolis e xa' ko'ya tuj tnom te Filipos, jun tnom nintzaj tuj ttx'otx' Macedonia, jun tnom jaa' najla nim xjal te Roma. ¹³ Tejtzen tpon jk'ij te ajlabl, jk'ij te sábado, bix etz ko'ya ttzi pwert te tnom, tu'n kpona ttzii' nima'. Jatztzen e xa' kej xjal judío tej tnom te na'l Dios. Tejtzen cypon, atzen cabxuj xuuj cychmon cyiib, bix e cub ke ko'ya, bix ak' ko'ya yolel cyi'jxuj. ¹⁴ Juntzen cyej xuj xuuj Lidia tbixuj. Otk tzajxexuj nakch te jun tnom te Filipos te ttx'otx' Tiatira. Jatzen taak' enxuj te q'ueyl xbalen tuya tilbil tisen t-xmaquel San Juan. Jatzen tilbil jmas jawnex te cyxbalen xjal Romano. Ebil tyol Dios texuj, bix oc tenxuj ebil tyol Pablo. Bix e tjak' Dios tanemxuj tu'n toc tbi'nxuj yol, bix oc tocslanxuj. ¹⁵ Bix e bautizarj Lidia cyuyaxj xjal najl tjaxuj. Yajc'atltzen bix e tzaj tkba'nxuj keya:

—Katzen jaxxix ba'n tuj cywitzt ti'j ma tz'oc wocsla'n jyol te tco'pbil Jesús, quixtakey nja tu'n cyposadayina te k'umlte keya mas ti' Jesús—tzi Lidia te Pablo tuya Silas bixsen te Timoteo bixsen we. Ju'tzen tten toclen tcubsa'nxuj twitzxuj keya. Cwatzen kcuyan teya kyajaja tjaxuj.

¹⁶ Tetzen juntl k'ij bix e xi' ko'ya tuj lugar jaa'j nchi na'na judío Dios. Pero tujtzen be ttzii' nima' oca noj ko'ya ti' juntxin xuuj. Pero jtxin xuujaja tzyu'ntxin tu'n biman najl tuj t-xumlaltxin. Tu'ntzen biman ncyaja' tuj tzinen tu'nj txin xuuj ti pjelte jun xjal mas yaj. Pero at cab xjal taaw jtxin xuuj. Nimxsen pwak e cycama jxin xjal taawtxin, cuma chjo'n tzuntxin tu'n tkban tetxin tsuerte juun xjal. ¹⁷ Pero bixsen oc lpetxin ti' Pablo bix ki'ja tuj be. Njawxe s-intxin:

—Kej xjal lu nchi ajben cyeja tej xin jaxxix Dios, jxin Dios tibaj cykil. Bix jyol tzin cykba'n cyey, jatzen te be ja te co'pbil—tzi tzunj txin xuuj tjaw tsi'ntxin.

¹⁸ Pero e jaw kej tsitz'bil jtxin xuuj jaca k'ij, tejxe ttzaj k'ojl Pablo. Bix e xi' tkba'n Pablo tej biman najl tuj t-xumlaltxin:

—Biman, tu'n tajwalel tbi Jesús, cxe'l nkba'n tey tu'n tetz tuj t-xumlal jxuujaja—tzi Pablo. Yalj ka' xewbaj n-etztl naj tuj t-xumlaltxin.

¹⁹ Tejtzen toc cycey'yenxin tej tetz biman ti'jtxin, bixsen e jaw k'ojl kej xin taawtxin, cuma el cyniy'xin ti'j ka ya mintii'tl tipemaltxin te kbal suerte. Yaltzen cyc'a'sxin ti'jtxin, otktzen cub baj. Bixsen e cytzyuxin Pablo tuya Silas, bix e xi' k'i'nkexin cywitzt cawel tuj tnom tuj maa nim plaza. ²⁰ Tejtzen cypon k'i'nxin cywitzt nmak cawel, bixsen ocx cyniq'uen jxin taaw jtxin xuuj cyi' Pablo tuya Silas cyjulu:

—Kej xjal lu judío ke. Nuktzen tik'ch ntzaj cyk'o'n tuj ktanem. ²¹ Lu ke nchi snak'tzan xjal tuya juntl costumbe yaa'n tisenj ke kley, bix jaj mintii' tu'n toc kbi'n, cuma te Roma ko'ke —tztizen ke xtak'el.

²² Tejtzen toc ebi'n jyol ju'wa, cykilxsen xjal e jaw k'ojl, bix ak' ocax cykba'n xjal ka' cyyol cyi'jxin. Bixsen e xi' cykba'n cawel tu'n tel cyxbalen Pablo tuya Silas, tu'ntzen ttzyet cypjuxin tuya tzee'. ²³ E bajxsen pjtekexin cyiw, bixsen ocxkexin tuj tzee'. Bixsen e xi' cykba'n cawel tej xin taaw tzee' tu'n cyc'ojlet-xin tuya nim c'ojla'n.

²⁴ Ja tzunj xin taaw tzee' taj tik'en tedin yol ju'wa, bixsen ocx tk'o'nxin ke Pablo maan t-xee'xa tzee' tuj jun chwart min jaa' ba'n cyetzaxin, bix oc tk'o'nxin cyken Pablo tuya Silas tuj toyajil ke tij laa'n tzee', tu'n mi'n chi tzokpajxin.

²⁵ Tejtzen tpon chil ak'bil, tocxsen Pablo tuya Silas tuj tzee'. Nchi na'nxin Dios bix nchi bitzenxin ti' tbanel Dios. Yaltzen tnmal pres, nuktzen nchi ebinxin. ²⁶ Ch'innch'etzen ttzaj jun xcyaklajnab, bix e cub xitj t-xee'yel tzee'. Cykil ke tlemel e jket, bix el co'pj cykilj cadena bix toyajil tzee' xipbel cye pres. ²⁷ Yal tzunj xin c'ojlal cars, tej ttzaj tnal na'n tiibxin, toctzen tcey'yenxin cykil ke tlemel tzee' jaktl, bix etz tii'nxin jun espada tu'n tcub tbyon tiibxin, cuma e'la tuj twitzxin cykil ke pres otk chi etz baj, bix ttzki'n tzunxin ka tu'n tbyet-xin cyu'n cawel tu'n min tz'oc tc'u'jxin ti'j. ²⁸ Pero bix oc tcey'yen Pablo ju'wa, bix etz s-ixxin cyiw ti' c'ojlal:

—Mi'n cub tbyon tiiba, cuma cykilca ko'ke eto'ctz—tzi Pablo.

²⁹ Tejtzen toc tbi'nxin tuj twi' Pablo, bix e xi' tsmá'nxin tu'n cytzaj k'it luz. Tejtzen cyul luz, bixsen ocxxin ajkelenxin jaa'j tocca Pablo tuya Silas. Bix e jaw lu'lenxin tu'n ttzi, bix e cub tz'akxin cywitzt Pablo tu'n t-xi' tyeec'anxin cykil tanemxin. ³⁰ Bix tujx naj tetz tii'nxin ke Pablo tuj tzee'. Tejtzen t-xi' tii'nxin ke Pablo tjaxin, bix e xi' tkanenxin:

—Key taat, ¿tizen cnbincha'ya tu'n nco'pja tuj wila?—tzi tzunj xin c'ojlal.

³¹ Bix aj cytzak'be'nxin:

—Oclama Jesús, jxin Scy'o'n tu'n Dios, jxin taaw tik'ch jilel. Ju'tzen ctemeley bix cykil ke te tjay, bix chi co'pjel tuj cyila bixsen cawbil cyibaja—tzi tzunkexin.

³² Bixsen e baj cykba'nxin te cykil ke te tjaxin tik'ch tten tyol Jesús. ³³ Texsen koniyan, bix e baj ttjo'n jxin c'ojlal kej išjnin ti' Pablo bix Silas. Tbjatzen twi'j ju'wa, ja tzunj xin jkol tzee' cyuyax ke te tjaxin e bautizarjkekxin te techel ka otk chi ocslanxin Jesús. ³⁴ Tej cybautizarjxin, bix aj tii'n jxin jkol tzee' ejee'xin juntl maj tjaxin, bix e xi' tk'o'nxin ch'in cywaxin, bix ocx meltz'ajkekxin tuj tzee' juntl maj. Bix xsunj xin c'ojlal tzee' bix ke te tjaxin e tzalaj ke xjal tu'n otk chi ocslan tyol Dios.

³⁵ Tejtzen kskix, bix e xi' cychk'o'n nin cawel ke policia te kbalte tu'n cyetz tzakpet Pablo tuya Silas. ³⁶ Entonces bix e xi'kekxin tuj tzee'. Tejtzen cyponxin, bix e xi' tkba'n jxin c'ojlal te Pablo:

—Ma wiik' jun tumel tu'n cyex tzakpeta. Quixtakey. Ya ba'ntzen cyexa tuj ttzyal—tzi tzunxin.

³⁷ Pero bix aj ttzak'be'n Pablo:

—Min. Keya, aj Roma ko'ya. Yaa'n nuk tik'ch xjalel ko'ke. Pero ti'j ju'wa, min e tzaj cyc'u'j ki'ja tisenxix tten, sino e bajssen cypju'n ejoo'ya cywytz xjal tisen jun byol xjal. O ko octzen tuj tzee' twitz cykil xjal. Ja'le tzuna cyaajzen ko ex cyii'naj tuj ewjel. ¡Min! Yaa'n tumel. Ejee'x cawel e cytza'j te k'ilbax keya tuj tumel—tzi Pablo.

³⁸ Bix e xi' cyii'n policia ke tyol Pablo cye nin cawel. Tejtzen toc cybi'nxin, bix tej tel cyniy'xin ti'j ka aj Roma Pablo tuya Silas, bix e jaw lu'len tuj cychu'lxin, bix e tzaj ttzi cyi'jxin. ³⁹ Bix e xi' ajkelenkekxin tuj tzee', bix e xi' cykba'nxin te Pablo tuya Silas:

—iNuksamkey, taat, cybajsama kila ti'j ti jilel xkbinchaya! Bix cxe'l kcubsa'na kwitza cyey tu'n cyexa tuj ja tnom lu, bix ba'nxit che'xa tuj cybey—tzitzen ke cawel.

⁴⁰ Bix e tcuya Pablo tuya Silas, bix etzkexin tuj tzee' bix tuj tnom te Filipos. Pero te mitkna'x cyexxin tuj tnom, bix e xi'kekxin tja Lidia, bix e k'olbenkekxin cye cykil ocslal, bix oc cynimsa'nxin cyc'u'j.

17

Tej cyjaw labtl ke xjal tuj tnom Tesalónica

¹ Cyetzlenxilt tzunxin tuj tnom te Filipos, bix e xi' Pablo cyuya ke tuya te elne tuj tt'otx' Macedonia. Excaxin tuj tnom te Anfipolis bix Apolonia. Cwax cyponxin tuj tnom te Tesalónica, jaa' ta' jun camon jaa' te xnak'tzabl tyol Dios cyej xjal judío. ² Entonces bix e bint tu'n Pablo tisenx nbint tu'nxin oj nponxin tuj jun ac'aj lugar. E xi'xin te sábado tuj camon jaa' te yolel cyuya xjal judío. Oxe sábado e x-ajxin tuj camon jaa'. ³ Tzitzen Pablo cye judío cyjulu:

—Key taat, tzin tkba'n tyol Dios jaj xin Scy'o'n tu'n Dios, ja te xinj tbej tu'n tcyimxin bix tu'n tjabat itz'jxin juntl maj tuj cyamecy. Bix nuk o'cxc'a jun xjalj o til ja lu, jaj xin Jesús nxi' nkba'n cyeey. Jatzen cye'ybil ka ja Jesús Scy'o'n tu'n Dios, jaj xin cyey tzin cyyo'n ejee'y judío—tzi Pablo cye judío.

⁴ Cyuya ke tyol Pablo ti'j Jesús e cwa' tuj twitz cabxin judío, bix ockexin te ocslal, bix oc cyonexin ke Pablo tuya Silas. Bix cyuyax nim xjal aj griego otk tz'oc ebinte tyol Dios, bix ocslan kej yol nyolj ti' Jesús, tuyax cabxuj nintzaj xuu'j.

⁵ Pero cabtlxin judío min oc cybi'nxin tyol Pablo, bix oc chi'lkexin, cuma jcabtlxin judío ya lepchtlkexin ti' ac'aj be. Ejee' tzunj xin judío nchi k'ojla, bix e xi'kekxin tuj plaza te jyol cyej xjal cy'aj bix ka' xjal. Entonces bixsen e baj niy'q'uetkekxin te tzpetsalc'a tnom tuya tik'ch ba'n cyu'nxin bix tik'ch tzpetpajlenel. Tejtzen t'bj cyyajla'nxin tnom, bixsen e jaw chi'l ke tnom, bix e tzaj cyk'oj xjal, bixsen e jaw meltz'aj ke xjal, bix oc ten ke xjal k'ojlel ti' tja Jasón, jaa' ta' tposada Pablo cyuya ke tuya. Cyaj xsunxin etz cyii'nxin Pablo tuya Silas tu'ntzen cyxi' k'o'nxin cye xjal te tnom. ⁶ Pero min e cnet Pablo tuya Silas tunwen. Entonces bixsen e cytzyuxin Jasón, bix etz kitet-xin junx tuya cabtl ocslal cywytz ke cawel tuj tnom. Bix ak' ke xjal š-il cye cawel:

—Kej xjal Pablo tuya Silas tuj cykil nwtz tx'otx' o cwa' ti' nim xjal cyu'n tu'n cyoc meltz'aj yuwun ti' cawel te Roma. Ju'tzen tten nchi jyon k'oja. Matzen cub cymeltz'en twitz tx'otx', bix ya ma chi ul tzalu tu'n ju'x bint cyu'na. ⁷ Pero lutzen Jasón k'i'n ku'na. Jatzen xinja o k'inte cyexin tja. Ejee'tzen xina bixsen cykil ke ocslal ma chi oc meltz'aj k'ojlel ti' tley cawel te Roma. Nbya'ntzen cyu'nxin ka at juntl xin cawel mas nintzaj, junxin cawel Jesús tbi. ¡Q'ueyl xjal ke cyejal!—tzitzen ke judío cyuya ka' xjal cye cawel.

⁸ Tejtzen toc cybi'n kej yol ju'wa, cykilksen ke xjal bixsen ke cawel e jaw k'ojl. ⁹ Entonces bixsen el cyii'n cawel pwak ti' Jasón bixsen cyi' ocslal, bix e xi' cytzakpetkekxin, bixsen e xi' kbet cyexin:

—Ya ba'ntzen cyexa. Ojtzen cyex Pablo cyuya ke tuya tzalu, c'aal kmeltz'u'nke cyey cypwak—tzi tzunkekxin te Jasón.

Tej tpon Pablo tuya Silas tuj tnom Berea

¹⁰ Entonces texsen k'ij, te koniyan, cykil ke ocslal ex chk'o'ncye Pablo, Silas, bixsen Timoteo tuj tnom te Berea. Tejtzen cyponxin, bix ocxkexin tuj camon jaa' te xnak'tzabl tyol Dios cye judío. ¹¹ Kej xjal judío najl tuj tnom te Berea mas ba'nke xjal cywitzj xjal najl tuj tnom te Tesalónica. Bix listo ete' xjal te ebil tyol Pablo, bix nim oc ten cye'u'j xjal ti' tyol Dios. Cykilxsen k'ij e cyeiyen ke xjal ti'j tyol Dios tz'i'ben, la'tzen ka junx ta' tuyaj tyol Pablo. ¹² Cwa tk'onte tumel nim xjal judío ocslan ti' Jesús. Bix nim xjal griego ocslan, bix oc nim nintzaj xinak bix ke nintzaj xuuj tajlal ocslal.

¹³ Pero tej cybinte ke judío te Tesalónica nkba'n Pablo tyol Dios tuj tnom te Berea, jax ju'x cyexin bix e xi'kexin jatzewe, bix ak'kexin txcoltz il juntl maj tu'n cyoc chil xjal ti' Pablo. ¹⁴ Pero ke ocslal te Berea lwewa e xi' cychk'o'n xjal ja Pablo tuj mlaj tx'otx' tzii' mar. Bix e cyaj Silas tuya Timoteo tuj tnom te Berea. ¹⁵ Cab tzunxin ocslal te Berea e xi' xklunte Pablo tuj tbe. Cwa cyponxin tuj nakch tnom te Atenas tuj ttx'otx' Grecia. Jatztzen e tkba' Pablo cye ke tuya tu'n cymeltz'ajxin tuj Berea bix tu'n t-xi' cysma'nxin Silas tuya Timoteo tuj tnom te Atenas, tu'n toc cymojoban cyiibxin lwewa.

Tej tpon Pablo tuj tnom Atenas

¹⁶ Nayontzen Pablo tuj Atenas tu'n cypon Silas bix Timoteo. Jooc'tzen nayonxin, bix e tilxin nim sant nchi oc na'n xjal Dios twitz, bix oc bisenxin ti'j. ¹⁷ Bix ocx Pablo cyuj camon jaa' te yolel cyuya xjal judío bix cyuya xjal yaa'n judío n-oc ebinte Dios. Bix ju'x tuj nin plaza e xi' Pablo jaca k'ij te kbalte tpochal Jesús te cykilj xjal at jatzewe. ¹⁸ Bix jatztzen tuj plaza ak'ake yolel tuya Pablo cab xjal epicúreo bixsen cab xjal estoico. Kej xjal epicúreo jatzzen jun cloj n-e la tuj cywitz jaj ti jilel ttz'yal at twitz tx'otx' tzin cyna'n xjal, jatzzen il ti'j. Yal tzun kej estoico, ejee'tzen xjalj n-e'la tuj cywitz ka jaca juun xjal t'cuya ta' ti tsuerte. Mintii' tu'n t'cub tch'ixbe'n, tu'ntzen ba'n t'tema jun xjal tuya twitz tx'otx'. Attzen jun cyexin oc xmuuchante Pablo. Tzi tzunxin cyjulu:

—¿Ti toc tu'nj jun cht'ol min we' tyolen?—t'zitzen cab.

Bix aj ttzak'be'n cabtl:

—Jac'a tej nkba'n texin yol ti' cab ac'aj dios. La' tii'ntzenke—tzi tzunxexin. E xi'tzen cybisen xinj ju'wa, cuma nyolen Pablo ti'j jun xjal otk jatz itz'j tuj cyamecy.

¹⁹ Bix e xi' cyii'n ke epicúreo bix ke estoico ja Pablo twi' jun witz Aerópogo tbi. Jaa'j cychmona cyiib jxin crinsipal te tnom te ninc'ul ti'j. Bix e xi' cykanenxin te Pablo:

—Ma tz'oc kbi'na jay nyolena ti' juntl ac'aj yol. Tx'olbantz keya jyol nbaj tkba'na. ²⁰ Jtey tzin tkba'na jun wikxiil. Kajtzen ke kbi—t'zitzen ke epicúreo te Pablo. ²¹ Tzi tzunxexin ju'wa, cuma kej xjal te Atenas bixsen ke xjal te nakch najl tuj Atenas nim cye xjal cyanem tu'n cyyolen ti' jun ac'aj yol.

²² Bix e cub we' Pablo cyxol epicúreo twi' jwitz te Aerópogo, bix aj ttzak'be'nxin:

—Key taat te Atenas, o tz'oc ncyeyen cyey nim nbaj cybisena ti'j ti tten tu'n toc mas tak' ke cydiosa cyey. ²³ Cyey junxsen maj nuk nchi na'na ke cydiosa. Nimal xsunkey tuj cyreligióna. Jatzzen oc ncyeyen tej wiy' cyey'lec tej jun cynaabl Dios simyent xak jaa'j nbya'nc'a cyjulu: “Ja simyent xak lu te tej xin Dios min-al itz'kil twitz.” Ju'tzen toc tu'nj tz'i'bec twitz simyent xak. Ja'le tzuna cxe'ltzen nkba'n ch'in ti'j xin Dios cyey n-oc cybi'n pero min cytz'ki'na twitzxin. ²⁴ Jxin Dios lu jatzente mero Diosj, binchal cykil twitz tx'otx'. Jaxin taaw cya'j bixsen twitz tx'otx' entera. Bix tej xin Dios lu min tz'ajben texin jaa' tisenj nbint cyu'n xjal tu'n tten jun t'lugar. ²⁵ Texin min tz'ajben texin tonbil juntl xjal. Tex texin. Pero ja tzunxin k'ol chunk'lal te cykil xjal tu'n titz'j. ²⁶ Jaxin e cub binchante tneel xjal, bix ti'j tzunjin xin xjal lu o tz'ela itz'j cykil xe'chel. Jaxsen Dios o tz'el t'ziteente cye xjal te nojsal twitz tx'otx', bix jax Dios o kbante la' ni' ch'in tyem ctemel jun wik xe'ch, bix jaa' pomnina baj tmojon. ²⁷ Bix o cub tbincha'n Dios xjal tu'n toc tipen tu'n tlonte twitz Dios. Taj Dios tu'n cykil xjal jyonte texin. Bix aj xjal ma jyonte texin, cnetelxin, cuma te Dios nka ta' texin ti' cykil xjal. Binne texin tten te tu'n tyee'ante tiiibxin. ²⁸ Ja Dios binchal ke. Jaxin k'oltz kchunk'lal. Jatzta e'la itz'j ko' ti'jxin. Tik'ch nbint ku'n te texin t-xalbilxin. Ejee'x ootxa xjal o cyaj tz'i'bente: “Ejoo' t'cwal Dios, cuma ja Dios o binchante ke,” ju'tzen t'cyajlen cytz'i'ben ootxa xjal te cyey. ²⁹ Katzen ju'wa ka t'cwal Dios ejoo', mintzen txi' kbisen ti'j ka jxin Dios o tzaj k'onte kchunk'lal tisen oro, ma plata, ma xaxxin, ma ti jilel juntl ba'n t'bj tbincha'n jun xjal tuya tk'ab. ¡Titzen jilel ju'wa! ³⁰ Ttz'ki'n Dios ka at nim xjal tuj cykil twitz tx'otx' min tz'el tniy' ti'j ka jaxin mero Dios. Pero ma pon tyem tu'n ttzaj tk'o'n Dios tu'n tel cyniy' xjal ti'j jak'ch tumel tu'n mi'n chi oc lpe cyi'j nic'bil diosa, tu'ntzen cyoc lpe ti'jxin. ³¹ Ja lu junx maj il ti'j, cuma o tzaj tk'o'n Dios jun k'ij tzul. Oj tul jk'ij, jaxin cxe'l ninc'unte xjal twitz cykil twitz tx'otx'. Jaca juun xjal ck'ilte la' alcyey te, la' ti jilel xbint tu'n. Ja Dios tzul k'onte stis te cykil xjal tu'n jun xjal o tsicy'xin te ninc'ul. Jatzzen xjalj Jesús. O jaw tii'n Dios jaxin tuj cyamecy. Ju'tzen o tniy'be Dios ka ja Jesús c'oquel te ninc'ul—tzi Pablo. Ju'tzen tten tyolen Pablo cyuya xjal te Atenas.

³² Cabtl tzunxin tocx tmoj crinsipal, toc cybi'nxin ka at jun xjal jaxxix otk jatz itz'j tuj cyamecy, bix ak' jawel tze'nkexin, cuma min el jax tuj cywitzxin. Pero cabtlxin e kbante: —Cutzen tbi'nc. Ka yaa'n c'oqucl kbi'n juntl maj juntl k'ij cyi'j yola—tzi tzunkexin tuya mas cyanemxin.

³³ Jaxsen e pona baj twi' yolj, bix etz Pablo cyxol xjal. ³⁴ Tejtzen tetz Pablo, attzen cabxin oc lpe ti' Pablo, bix oc cyocsla'nxin tyol Pablo. Dionicio jatzen jun xinj tocxin cymojo ocsal, bix ocxe te ocslal. Bix cabtl xjal ocslan, tuyaxa junxuj xuj Damaris tbiuxj.

18

Tej tpon Pablo tuj tnom Corinto

¹ Tbjalnxitl tzunj ju'wa, bix e cub tch'ixbe'n Pablo tbevel taak'en, bix etzxin tuj tnom te Atenas, bix e xi'xin tuj tnom te Corinto. ² Jatzzen oca noj Pablo ti' junxin judío Aquila tbi. Jxin Aquila jatzen otk tz'itz'jaxin maan tuj ttx'otx' Ponto. Pero maatkxsen tpomlenxin tuya t-xu'lxin Priscila te najal tuj tx'otx' te Italia. Pero attzen jun k'ij ja tzunj xin Claudio, cawel tibaj cykil twitz tx'otx', otktzen tkbaxin tu'n cyetz baj cykilj xjal judío tuj tnom te Roma tuj Italia. Ju'tzen tten tpomlen Aquila najal tuj Corinto. Jatzzen e cnetakexin tu'n Pablo, bix e xi'xin k'olbel. ³ Bixsen e posadayin Pablo tjaxin. Te Aquila taak'en, binchal ke nee' coc' jaa'xin. Jaj najben cye soldado oj nche'x tuj k'oj. Bix jax ju'xte Pablo, ba'n texin tz'ak'anana ju'wa, bix ak'kexin ak'anal junx. ⁴ Ke sábadotzen bix el Pablo tuj taak'en tu'n tocxin cyuj camon jaa', bix nuk e yolenxin cyuya xjal judío bix ke xjal griego, tu'n tcub cyc'u'j tu'n cyocslan ti' Jesús.

⁵ Cwa cyetz Silas tuya Timoteo tuj Macedonia, bix e ponkexin tuj Corinto. Tejtzen cyponxin, bix e cyaj tk'o'n Pablo taak'en junx maj, tu'n toc tenxin junx maj bix tuya cykil tanemxin te kbalte cye xjal judío ka ja Jesús Scy'o'n tu'n Dios, jaxsen xinj tzin cyyo'n xjal judío.

⁶ Pero min e cybi judío ja yol lu, bix ak' ke xjal judío xool cyiw yol bix k'oj yol ti' Pablo. Entonces bix e cyaj ttzto'n Pablo kuk cyi' ti'j te yec'bilte ka otk cyaj tceye'yn Pablo ejee'xin tuj cyilxin. Bix e xi' tkba'nxin cye:

—Ma txi' nk'o'n jun tumel tu'n cyiik'entey chunk'lal te junx maj. Katzen ma che'xa tuj k'ak', junxsen maj cyey cculpey, yaa'ntzen wetlwe. Ke cyey ejee'y judío, may'xsen tz'el cyxoo'na tyol Dios junx maj. Matzen chixwe cyi'j xjal yaa'n judío te oylxte cye—tztizen Pablo cye judío.

⁷ Tej t-xi' tkba'n Pablo yol ju'wa, bix etz Pablo tuj camon jaa', bix e xi'xin tja junxin xjal Tito Justo tbi, nka najlaxin ttxlaj camon jaa'. Ja tzunj xin Justo nuk nabinx texin tyol Dios. ⁸ Mastzen yaj ja tzunj xin Crispo, cawel tuj camon jaa', bix cykil ke te tjaxin, bix ocslanke. Bix nim xjal te Corinto, tejtzen toc cybi'n jtyol Pablo, bix ocslan ke xjal, bix e bautizarjke.

⁹ Attzen jun k'ij te koniyan bix ul Kman Jesús tuj twitziy' Pablo, bix e tkbaxin: —Mi'n tzaj ttzi ti'ja. Ba'nte oj tyolen tey we wi'j. Mi'n we'y tyolena, ¹⁰ cuma lu kenwe ntiin tuyey. Cxe'l nkba'n tpe min-al c'oqucl ipan ti'ja, bix min-al c'oqucl k'ojl ti'ja tuj ja tnom lu. Nimxsen xjal c'oqucl ley wi'j tzalu—tzi Jesús te Pablo tuj twitziy'.

¹¹ Entonces bix e cyaj Pablo tuj Corinto te jun jnabk'i tuya niy'jan. Tujtzen cykil ja tyema e xnak'tzan Pablo tyol Dios cye xjal.

¹² Pero tejtzen tjax jxin Galión te cawel tuj ttx'otx' Grecia, juntl tbi ttx'otx' Acaya, bix oc cychmon cyiib cykil ke judío te k'ojlel ti' Pablo, bix e xi' k'i'nkexin cywitz cawel. ¹³ Bix e xi' cykba'nxin te cawel:

—Taat, tej xjal lu niy' te ja te yajlalc'a ke xjal tu'n cyna'n Dios, pero jtley jun wikxilt tten bix junx maj ka' twitzj ley te Roma—tztizen ke xjal judío.

¹⁴ Bix e jket ttzi Pablo te co'pl tiib. Pero tujx naj tak' Galión, jxin cawel, yolel cyuya judío. Tzi tzunxin cyjulu:

—Key taat judío, nuket ma tz'octz cyk'o'na jun techel ka at tka'yel ma cub tbinchen Pablo, tuyatzen cykil nc'uj che'x ncyeyena ti'j. ¹⁵ Pero yaa'n ju' ttena. Nuk ti' cyley judío te ja. Yaa'n cyeycey Roma cyley. Nuk yol te ja cyey cyxola. Mintii'te til binne tten. Cyninc'u'nx cyiiba. Mlay tz'ocx nk'onwe wiib tuj cyleya—tztizen Galión.

¹⁶ Tejtzen tkbante xin ju'wa, bix etz tlojo'n cawel ejee'xin ti'jxe stisbil. ¹⁷ Bix e cytzuy xjal judío jxin Sóstenes, jxin ac'aj cawel tibaj camon jaa', bix e baj cypju'n xjal jaxin twitz stisbil. Pero amale otket tz'oc tcey'en Galión tik'ch jilel, min e xi' tk'o'nxin tc'u'jxin ti'j.

¹⁸ Nimxlt k'ij e ten Pablo tuj Corinto. Pero cwa tk'olbenxin cye ocslal, bix etzxin. Yaltzen cye Aquila tuya Priscila, bix e xi' cyjunen cyiibxin tuya Pablo, bix e ponkexin tuj jun nka tnom te Cencrea. Jatzzen e'la mtzet ttzmal twi' Pablo te techlal ka otk tcuyante Pablo jun tyol otk tkba twitz Dios nejl. Tbjalnxitl tzunj ju'wa, bix occkexin tuj jun barc tu'n tcub cyxajbenxin a', tu'n cyponxin tuj ttx'otx' Siria, jaa' ta' jtnom te Antioquia. ¹⁹ Tujtzen cybexin

e ponakexin tuj tnom Efeso, jaa'xsen e cyja' te Priscila tuya Aquila te junx maj. Jaan Pablo e ten tuj Efeso cab k'ij. Bix ocxxin tuj camon jaa' te rasonel cyuya judío. ²⁰ Bix oc ten ke judío cubsal cywitz texin tu'n tcyaj Pablo cyuyaxin. Pero min e tcuya Pablo. ²¹ Bixsen e k'olbenxin cyexin, bix e xi' tkba'nxin ke manc'bil tyolxin:

—Weya il ti'j tu'n npona Jerusalén te iy'sal tej nink'ij tuzul. Pero ka ma tcuya Dios, chin ul meltz'ajwe k'olbel cyey juntl maj—tzi Pablo cye judío. Bix etzxin tuj Efeso tuj jun barc.

Tej t-xi' tzyet toxen maj taak'en Pablo te kbalte tyol Dios

²² Cwax tpon barc tuj tnom te Cesarea, bix e xi' Pablo tuj Jerusalén. Jatzten e k'olbena Pablo cye ocslal tuj tja Dios, bix ajc'atz meltz'ajxin tuj Antioquía juntl maj, jaa'j e tzaa' tzyet tbexin jatxe nejl.

²³ Tel-lenxiltzen cab tk'ijxin jatzewe, bix etz Pablo juntl maj tuj tbe. Bix aj meltz'ajxin tuj cykil kej tnom tuj ttx'otx' Galacia bix Frigia, jaa'j otk tziyaxin xnak'tzal nejl. Jak'ch i'yaxin n-ocxa tnimsa'nxin cyc'u'j ocslal.

Tej tkba'n Apolos tyol Dios tuj tnom Efeso

²⁴ Jooc'tzen at-xte Pablo tuj Galacia bix Frigia, bix e ponxin tuj tnom Efeso junxin judío Apolos tbi. Jxin Apolos te Alejandriaxin te ttx'otx' Egipto. Jatzten jun xjalj ttzki'n ti tten tu'n tsub cyc'u'j xjal, bix junx maj ttzki'nxin tyol Dios tuj u'j. ²⁵ Bix jax ttzki'nxin tik'ch otk tkba Juan Bautista tibaj Kman Jesús. Tuyaxsen cykil tc'u'j Apolos e xnak'tzan cyi' xjal tuj Efeso ti'j alcyey n-el tniy'xin ti' Jesús. Otk tz'el texin tniy' ti'j ka oj tbautizarj jun xjal, nxi'tzen tyeec'an ka otk cyaj tcyey'en til. Pero min el tniy' Apolos ti'j otk tuzul aj Jesús. ²⁶ Ju'tzen tten xnak'tzan Apolos. K'ukbaj c'u'l xsunxin tak'xin yolel tuj camon jaa'. Pero tejtzen toc tbi'n Priscila bix Aquila ke tyol Apolos, bix el cyniy'xin ti'j ka at-x ch'intl min tz'el tniy'xin ti' Jesús. Entonces bix ex cyii'nxin Apolos tjunal, bixsen e baj cykba'nxin mas tuj chic'aj jax yol. Tzi tzunkexin cyjulu:

—Apolos, lu tey nkban cye xjal: “Ya lu Scy'o'n tu'n Dios tzula. Cybincham cyiiba, bix chi meltz'aja te k'il texin,” tzi tzuna, tisenx e tkba Juan Bautista. Pero q'uelel tey tniy' ti'j tej xin Scy'o'n tu'n Dios o tuzul aj texin—tzi tzunkexin.

²⁷ Bix e tcuya Apolos kej yola. Yajc'atltzen bix e tajbexin tiy'xin tuj mar tu'n tponxin tuj ttx'otx' Acaya te kbalte tbanel ac'aj yol. Ke ocslal te Efeso el cye xjal ba'n tuj cywitz, bix oc cyonen xjal jaxin, bix e cub cytz'i'benxin jun u'j cye ocslal te Acaya tu'n cyiik'ente xjal jaxin. Cwa tpon Apolos tuj tnom te Corinto tuj Acaya. Jatzten oca tonenxin kej xjal otk cyiik' co'pbil tu'n t-xtalbil Dios. ²⁸ Bix tuya nim tipemalxin tu'n tsub cyi' xjal, bix e cub tyeec'anxin ti toc cyu'n tyol Dios, ka ja Jesús Scy'o'n tu'n Dios, jxin ayo'n te co'pl xjal, bix ayo'n cyu'n judío. Cywitzten cykil xjal bix e cub tk'o'nxin tuj chic'aj ti tten cyxnak'atz yaa'n jiquen xjal judío ti'j Jesús. Bix jax min el cyii'n cyexin cyiib ti'j.

19

Tej tpon Pablo tuj tnom Efeso

¹ Jooc'tzen at-xte Apolos tuj Corinto, yal te Pablo nbet-xin cyuj ttx'otx' cywi' witz. Cwa tponxin tuj tnom te Efeso. Jatzten e cneta nim ocslal tu'nxin. Pero cye ocslal o'cx cye ba'n cyu'nj tisenj otk tkba Juan Bautista. Bix e xi' tkanen Pablo:

—Key taat, tej cyoc cyey tmoj Jesús, ¿e cyiik'pey Espíritu Santo?—tzi Pablo.

² Bix ajtz cytzak'be'nxin:

—Min. Mitetpe o tz'oc kbi'na ka o tzaj k'o'n Espíritu Santo te cycotz jxjal nchi ocslan Jesús—tzi tzunkexin.

³ Bix aj tkanen Pablo:

—Jey', ¿titzen jilel cyey jawsaj a' o cyiik'? ¿Titzen jilel e baj tej cybautizarja?—tzi Pablo t-xi' tkanen.

Bix aj cytzak'be'nxin:

—Tzin kiik'en keya te Juan Bautista tbautismo cye xjal. Nxi' kocsla'na bix nxi' kyolena jtexin oc t-xnak'tza'n—tzi tzunkexin.

⁴ Bix e xi' tkba'n Pablo:

—N-el cyey cyniy' ti'j e bautizaran Juan Bautista jxjal e tajbe tjatz tkba'n til bix otk tzul til tuj tc'u'j. Bix ba'nte. Pero te Juan Bautista, e tkba texin cye xjal tu'n toc cyocsla'n xjal jxin Scy'o'n tu'n Dios, jxin tul-lel mas yaj. Bix ya ktzki'ntltzen ka ja Jesús. ¡Ja tzunxin ma tzul!—tzi Pablo cye xjal.

⁵ Tejtzen toc cybi'nxin ttxolen, cykil ke xjal e bautizarj, tu'ntzen cykbante ka otk chi oc tuya Cyaaw Jesús. ⁶ Tejtzen tpon baj tej cybautizarj xjal, bix e cub tk'o'n Pablo tk'ab tibaj cywi' xjal. Tejtzen thint tu'n Pablo ju'wa, bix ul Espíritu Santo te cyuya junx maj, bix ak'ke xjal yolel tuj yol bajx binne cyu'n, tu'n tcyaj tyol Dios tuj chic'aj. ⁷ Cblajaj cybet xjal ocslante Jesús.

⁸ E tentzen Pablo tuj Efeso oxe xjaw. Bix coc'c'ax ocxxin cyuj camon jaa', bix tuyaxsen nim tajwalelxin e yolensin tu'n tcub cyi' xjal ti'j tcawbil Dios.

⁹ Pero cyxol tzunj xjal oc ebinte tyol Pablo, attzen cabxin e cub tcyiwsan tiib. Ccy'ixin oc cybi'nxin. Cywitzzen nimal xjal bix e yolen kej xin xool cynaabl ka' ti' tyol Pablo. Entonces bix el tpa'n tiib Pablo ti' camon jaa', jaa'j ete'cxa jxin ka' xjal, bix e xi' Pablo cyuya jcabtlxin ocslal tuj tja jun xjal Tiranno tbi. Jatztzen e yolena Pablo ti' tyol Dios cykil k'ij cyuya xjal. ¹⁰ Nyolenssen Pablo tuj Efeso te ca'ba jnabk'i. Ju'tzen oca cybi'n cykilj xjal najl tuj ttx'otx' Asia jyol ti' Jesús, judíole, bix yaa'nle judío. ¹¹ Bix e tzaj tk'o'n Dios tipemal Pablo tu'n t-xi' tyeec'anxin ka jaxxix tyolxin, bix nim tik'ch e bint tu'nxin. ¹² Axsen tbaneyil ke thinchben Pablo, bix oc cyk'o'n xjal cyusuut' bix twitz cyken ti' Pablo, bix oc cyk'o'ntl cyi'j xjal yaab. Bix tej toc cyk'o'n xjal ju'wa, ul cynaabl yaab tu'n, bix etz biman tuj cychu'l xjal tu'n.

¹³ Cyuj tzunj tyem lu attzen cabxin judío e bet tuj jaca tnom. Nchi kban tzunxin ka at cyipemalxin tu'n tel biman cyi' xjal cyu'nxin. Tujtzen tnom te Efeso bix ak'kexin ajbel tbi Jesús tu'n tetz biman tuj cychu'l xjal. Jatzen nxi' cykba'n xinj cye bimanj ja tzunja lu:

—jBiman, cxe'l nk'umen tye, ctel ti'j xjala! Cxe'l nk'umen tu'n tipemal tbi Jesús, ja Jesús nyolen Pablo ti'j—tzi tzunkexin judío cye biman.

¹⁴ Cyxol tzunj xjal e bint cyu'n ju'wa, attzen wuukxin tcwal Esceva, jun nim cyyolel xjal twitz Dios cyxol judío. Ja tzunj wuuk xina el lojo'ncye biman cyi' xjal. ¹⁵ Attzen jun maj e cyajbexin tbin cyu'nxin ju'wa. Pero bix aj ttzak'be'n ka' xewbaj:

—Ntzki'nwe twitz Jesús, bix Pablo ntzki'nwe alcyexin. Perotzen cyey, ¿altzen cyekey?—tztizen jun biman cyej xin tcwal Esceva.

¹⁶ Tej tkbante biman ju'wa, yal tzunj xin xjal jaa' iklte biman bix e xi' tzokpajxin te pjulec cyexin, bix e xcyexin ti' cywuukal tcwal Esceva. Nimxsen e bajkexin, tejxa tel rotj cyi'jxin cyu'n biman, bix e cyaj xbiikt'ajkexin, bix otkxsen chi isjxin. ¹⁷ Cykilxsen xjal ebinte, ke griego bixsen ke judío, ti otk baj. Tejtzen toc cybi'n xjal ju'wa, cykilxsen xjal oc ebinte tbi Jesús, bix nimxsen ba'n yol e cyyolen xjal ti' Jesús. ¹⁸ Bix jax nim ocslal otk tz'aj tuya chmambaj e cykba cyil. ¹⁹ Bix nim nxnak'tzante magia, bix oc cychmo'n cyu'j bix ak' cwel cypaten cywitz cykil xjal. Atle jun cincuenta mil plata tui' cyu'j e baj tz'ey'.

²⁰ Ju'tzen tten t-xi' t'z'iy cybet ocslal, bix nim oc ebinte tyol Dios.

Tej cyjaw labtl ke xjal tuj tnom Efeso

²¹ Attzen jun k'ij e xi' thisen Pablo tu'n nxi' k'olbel tuj Macedonia juntl maj, bixsen tuj Acaya, bix yaj tu'n t-xi' tuj Jerusalén, bix yaj tu'n t-xi' tuj tnom te Roma. ²² Bix e xi' tchk'o'n Pablo ca'ba onl texin tuj Macedonia nejl. Pero te Pablo, e cyaj texin tuj tx'otx' te Asia. ²³ Bix jooc'tzen at-xte Pablo tuj tnom te Efeso tuj tx'otx' te Asia, bix e jaw jun tij k'oj tu'n t-xnak'atz Jesús. ²⁴ Ju'tzen tten tjawlen jk'oja cyjulu. Attzen junxin binchal plata Demetrio thixin. Ja tzunj xin Demetrio nchi bintzen sant tu'nxin tuya jun wik xcbil plata te ttx'otx'el binchbilte jxuj sant Diana tbi. Bix nim t-ak'analxin at. Nimxsen e q'ueyexin. ²⁵ Pero attzen jun k'ij bix oc tchmo'n Demetrio cykil ke ak'anal bix cabtl xjal ju'x taak'en tisenx te Demetrio, bix e xi' tkba'nxin:

—Key taat, cytzki'ntl tzuna ti'j ke kaak'en nbinta, jatztzen i'tza ko'ya. ²⁶ Pero ya matzen tzul Pablo te yajlal ke, bix o tz'oc cybi'na bix o cyila ti tten ncub cyi' xjal tu'nxin tu'n tcyaj cyk'o'n xjal ke kdios. Tzin tkba'nxin ka mintii' ba'n tajbena jcyechlal dios nbint tu'n k'abbaj. Bix yaa'n nuk tujc'a Efeso, sino tuj cykil ttx'otx' Asia n-oca k'ojlxin ti' cyechel dios. ²⁷ Ka' xsunja lu. Ch'innch'e oj t'bj twi' kaak'en, bix yaa'n o'cxj, sino cwa oj tcyaj cyk'o'n xjal jxuj diosa Diana, bix ya min chi ocxlt xjal tuj tja dios binne te texu tu'n tna'jxuj. Jxuj diosa Diana nna'j cyu'n cykil xjal te Asia, bix yaa'n nuk o'cx'aj, sino tu'n cykil twitz tx'otx'. jAxsen jun ilbelal! Matzele cyaj cyeyet-xuj—tztizen Demetrio cye niy'l t-xjal Diana.

²⁸ Tejtzen toc cybi'n xjal ju'wa, cykil ke xjal e tzaj k'ojl, bix ak' elel cywi' xjal:

—I'tzxta Diana cyej xjal te Efeso—tzi ke xjal cyjaw s-in.

²⁹ Junxsen rato el t'zitj naj tuj cykil tnom. Ca'ba tuya Pablo, ja Gayo bix Aristarco te Macedonia, e tzyetkexin cyu'nj xjal nchi k'ojl. Bix junxsen rato e xi' kitet Gayo tuya Aristarco tuj camon jaa' tuj plaza. ³⁰ Tejtzen thinte Pablo ka otk che'x k'in tuyaxin tuj camon jaa', e tajbetzen Pablo tu'n t-xi' rasonel, pero min e cycuya ocslal tu'n t-xi'xin tu'n ttzi. ³¹ Bix tuyaxe cabxin cawel te Asia, cytzki'nxin twitz Pablo, e kbante tu'n mi'n tz'ocx tk'on tiib Pablo tuj.

³² Tujxsen camon jaa' nim tzetpajlenel e baj. At cab xjal e kbante jun wikxilt yol, bix at cabtl nuk tik'ch e cyyole, bix nimtl xjal min el tniy' ti'j ti cyaj tuj camon jaa'. ³³ Cyxoltzen xjal tocxe cabxin judío. Attzen jun cyexin Alejandro tbi. Bixsen ocx cylomo'n jmastl xjal judío jaxin cywitz cykil xjal tu'n tocxxin te rasonel tu'n taj tk'o'nxin culpa tibaj Pablo tu'ntzen tel il cyibaj judío. Bix e xi' tyeec'an Alejandro tk'ab te techel tu'n cywe' xjal cyyolen, tu'ntzen

tyolen texin. ³⁴ Pero toc cycye'yen ka ja Alejandro e tajbe tu'n tyolen. Bix itzki'nxin ka judíoxin, cykil xjal ak' jawel š-in juntl maj:

—¡i'tzte Diana cye xjal Efeso! ¡Jaxuj dios cyibaj ke entera xjal te Efeso!—tzi cysitz'bil xjal. Ca'ba hora e š-inkeixin mintii' wa'len cyu'nxin.

³⁵ Cwaxsen tetz secretarioio te myolcye xjal. Tejtzen cywe' xjal cyš-in, bix ak'xin yolel. Tzi tzunxin cyjulu:

—Key taat te Efeso, cykil twitz tx'otx' itzki'le ka jaj tnom te Efeso at te c'ojlal tej tja dios Diana. Keya junx maj c'ojla'n ku'na jxak techlal Diana e tzaj tz'ak tuj cya'j. ³⁶ Min-alte jun ba'n tel xoo'nte. C'olke cyey. Mintii' cub cybinchena ka mintii' otk txi' cybisena ti'j. ³⁷ Yaa'n ba'n ti'j ma tzaj cyii'na Gayo tuya Aristarco, cuma mintii' cyexin ma cyalk'a ti' tja dios Diana, bix mitetpe ka' cyool ti' kdiosa Diana. ³⁸ Cxe'l nk'umen te Demetrio bix cye xjal ak'anal, ka at jun cyk'oj tuya jun xjal, chi xe'l k'umlte tuj stis twitz cawel. ¡Tzalu, min! cuma o'cx tuj stis ba'n tclonte jun xjal tiib. ³⁹ Bix ka cyaja chi yolena tuj tumel, ba'n ayoncyey ojxe toc cychmon cyiib kej xjal sinica te yolel tujxix tumel. ⁴⁰ Pero oj cycub tena label, mintii' tumel cyuyey. Nuk tisen ka' xjal ke cyey. ¿Tu'n tiken? ¡Ka' tzunj ju'wa! cuma ka'xsen q'uelele te ke ka ma thi jxin cawel te Roma ti ma kbince ja'lewe. C'oquel we' cywitz ki'j ka ka' ko', bix ko cwel tuj cyiw castiwa. ¿Tu'n tikentzen? Jcyey ma cybinchewe yaa'n tumel. Mintii' ttxolen, bix mlay bint kclon kiib—ju'tzen tten tyolen secretarioio cyxol xjal. ⁴¹ Tejtzen t'bj tkba'nxin ju'wa, bix e t'kbaxin tu'n tel cypa'n cyiib xjal, bix e baj twi' k'oj.

20

Tej tpon Pablo tuj tcwentel Macedonia bix tuj tcwentel Grecia

¹ Tejtzen t'bj twi' jk'oj e jaw, bix e tzaj ttxco'n Pablo ke ocslal te Efeso, tu'n t-xi' tk'o'nxin ke tyolxin ba'n cye.

Tejtzen tpon baj ke tyolxin, bix e k'olbenxin cyuya ocslal, bix e xi'xin tu'n tiy'xxin tuj mar, tu'n tponxin tuj ttx'otx' Macedonia. ² Tejtzen tponxin tuj Macedonia, bix ak' Pablo betel tuj jaca juun tnom. Tuj jaca juun lugar oc t'nimsa'nxin, bix oc tk'o'nxin cyipemal ocslal tuya tyolxin. Cwa tertzxin tuj Macedonia, bix e ponxin tuj ttx'otx' Grecia. ³ Jatzzen Grecia e tema Pablo oxo xjaw. Tejtzen tpon baj oxo xjaw tuj Grecia, bix e cub tniq'uen Pablo ti'j tu'n tocxxin tuj t'barcxin, tu'n t-xi'xin tuj ttx'otx' Siria, te ocne. Pero tejtzen binne ttenxin tu'n tocxxin tuj barc, bix e t'bxin ka tu'n niq'uen cyu'n judío tu'n tzyet-xin. Entonces bix e cub tch'ixbe'nxin ti'j, bix e xi'xin tu'n tkenxin tuj Macedonia juntl maj, tu'n t-xi' tii'n jun barc jaxin. ⁴ Tujtzen t'bxin tu'n tponxin Macedonia, bix e xi' xklu'nxin tu'n wuuk xjal, ejee'tzen wuuk xjal lu: Šepater te tnom Berea, Aristarco bix Segundo te tnom te Tesalónica, Gayo te tnom te Derbe, bixsen Timoteo, Tíquico, bix Trófilo te tx'otx' te Asia. ⁵ Yaltzen weya, inayena Lucas, in tin tzuna tuj tnom te Filipos tuj tx'otx' te Macedonia. Tejtzen tpon Pablo tuj Filipos, bix oc kmojban kiiba juntl maj. Yal tzunj wuuklxin ocslal bix e xi' cyii'nxin jun barc tu'n cyponxin tuj ttx'otx' Asia, jatzzen e cyyoxin ejoo'ya tuj tnom te Troas. ⁶ Pero Pablo bix weya bix e cyaj ko'ya cab k'ij tuj Filipos, te iy'sal cynink'ij judío oj nchi waa'n pan mintii' tk'anel tocx tu'n t'jaw t'z'iy. Tejtzen tpon baj nink'ij, bix etz ko'ya tuj Filipos tuj barc. E bet barc jwe' k'ij tu'n tpon tuj tnom te Troas. Tejtzen k'pona, bix e ten ko'ya wuuk k'ij.

Tej tpon Pablo k'olbelte cye ocslal tuj tnom Troas

⁷ Tetzen tneel k'ij te smant, jk'ij domingo, keya cyuya ocslal bix oc kchmoon kiiba cyuya te iy'sal jun waa'n. Bix ak' Pablo yolel cyuya ocslal. Ttzki'ntlxin ka tu'n tertzxin te juntl k'ij tuj Troas. Entonces bix e yolénxin tuj jun nim yol, tejxe tpon chil ak'bil. ⁸ Jlugar jaa'j oca kchmoon kiiba tuj jun cwart te toxen cxo'len jaa', bix nimxsen luz t'xko'n. ⁹ Cyxoltzen xjal tocx junk'a xjal k'uklc'a t'zii' ventan. Eutico t'bk'a, bix mas e tyole Pablo, bix masx e tzaj t'watlk'a. Cwax t'k'a tu'n watl, bix etz tz'akk'a t'zii' ventan te toxen cxo'len jaa' maan twitz tx'otx'. Tu'ntzen wolp e cymak'a. ¹⁰ Tejtzen t'binde Pablo, bix e cu'tzxin, bix e xi' t-xkian tiixin t'bjak'a, bix e tzaj t-xk'e'nxin jak'a, bix e xi' tkba'nxin cye ocslal:

—¡Mi'n chi jaw sey'paja! Lu te k'a i'tza—tzi Pablo.

¹¹ Entonces bix e jax meltz'aj Pablo juntl maj, bix e tzaj tii'nxin ch'in pan, bix e xi' twaa'nxin. Yajc'atlzen bix ak'xxin yolel cyuya ocslal mas tyem, tejxe t'zaj t-xee' cya'j. Tetzen klax, bix exxin. ¹² Yaltzen ke ocslal bix iy' cyii'nxin jk'a xjal otk jaw itz'j. Ju' tzunj e temakexin tuya nim cye'u'jxin.

Tej t-xi' Pablo tuj tnom Troas tu'n tpon tuj tnom Mileto

¹³ Pablo e t'bjbxin tu'n t-xi'xin tu'n tkenxin tuj tnom Asón, tu'n ttzyet barc tu'nxin jatzewe. Pero keya bix ocx ko'ya junx maj tuj barc tuj Troas, bix e xi' ko'ya tuj Asón te k'iltzte Pablo. ¹⁴ Tejtzen k'pona tuj Asón, bix e kyoya Pablo. Tejtzen tponxin, bix etz kii'n xina tuj barc. Bix junxsen e xi' ko'ya tuj tnom te Mitilene. ¹⁵ Entonces bixsen etz ko'ya tuj Mitilene. Tetzen juntl k'ij bix e pon ko'ya tuj ttx'otx' Quio. Textetzen juntl k'ij k'pona tuj ttx'otx' Samos.

Te juntl k'ij bix e pon ko'ya tuj tnom te Mileto. ¹⁶ Pero otk txi' k'tzyu'na jun barc mintii' tu'n twe' tuj Efeso, cuma ilx ti' Pablo tu'n tpon tuj Jerusalén, bix ya min e tcyuatl Pablo tu'n tex ttyem tuj ttx'otx' Asia. Ju' tzunj e xa' ko'ya txucl ti' Efeso, cuma e tajbe Pablo tu'n kpona tuj Jerusalén te iy'sal trnink'ij awal. Pero tuj Mileto e cyja' ko'ya cab k'ij.

Manc'bil tyol Pablo cye aj Efeso

¹⁷ Eto' tzuna tuj Mileto, bix e xi' tchk'o'n Pablo txocbilcye oclsal ti'j cawel tuj tja Dios tuj Efeso. ¹⁸ Tejtzen cyponxin tuj Mileto, bix e xi' tkba'n Pablo cyexin:

—Key wuya, cytzki'n cyey tik'chwe nten tej wul tuj Asia, bix ti'i'n xjal ken. ¹⁹ Cykil tyem nchin ajbenwe te Dios tuya cykil wanem. Bajx tz'oca nk'onwe wiib te nmak xjal. In ook' tej cyoc ncyey'en xjal n-el cyxoo'n tyol Jesús. Bix q'uixc'aj in tema cyu'nj yajlabl oc cyk'o'n judío wi'j. ²⁰ Pero we, nunca e cyaj nk'o'nwe nkbante kej nyol il ti'j tu'n toc cybi'na te cyey. Tuj tnom bix cyja xjal in xnak'tzanxwe. ²¹ Oc wocsa'nxxkey, te cyey xjal judío, bix te cyey xjal yaa'n judío. Jweya nyola, ja tej tu'n tcyaj cyk'o'na jka', bix tu'n cyxi' lpey ti' tyol Dios, bix tu'n tke cye'u'ja ti' Kman Jesús, Scy'o'n tu'n Dios.

²² Yaltzen ja'lewe, tisen tzunj n-oc cye'ye yena, lu nbe tzyu'n Jerusalén. Jac'a Espiritu Santo smalx te we tuj Jerusalén. Pero o'j npon, tila pjel wi'j. ²³ Pero te ja ntzki'ntlwe, tuj jaca tnom jaa' o chin i'ya, o wil q'uixc'aj bix tuj tzee', bix ntzaj tkba'n Espiritu Santo we tzinen ka jax ja nayon wi'j tuj Jerusalén. ²⁴ Pero min tzajwe ttzi wi'j. Mintii'we woclen ti'j ka ma chin etz k'i'n ojxe t'bj twi' nchun'k'ial. Ja we mas n-oc tak' wej, jaj tu'n t'btnt wu'n jwaak'en o tzaj tk'o'n Jesús. Jatzen waak'en jaj tu'n t-xi' nkba'na mas tuj tumel jba'n t'pochal t-xtalbil Dios te twitz tx'otx'.

²⁵ O chin bet cyxola te yolel ti'i'n jtcawbil Dios. Pero ya tzinen ta' tuj nwitz mi nuketpe juntl maj chin n-oc cye'ye yena twitz ja tx'otx'a. Mi nuketpe chin ul meltz'aj t'zalu. ²⁶ Ju' tzunj cxe'l nkba'n cyey ja'lewe aljxe xjal tuj t'xanot'aj te j' theyel k'ak' yaa'n tu'n wewe nculpa. ²⁷ Cuma cykilte jax tyol Dios o txi' nkba'nwe cyey. Mintii'we o cub we'wen, bix min o cyaj nk'o'nwe tkbalte cykil tyol Dios.

²⁸ Manc'biltzen nyol cyey. Cyc'ojlamtzen cyiiba, bix cyk'o'nctzen cye'u'ja cyi' oclsal. Tisen jun cylel c'ojla'n ke cycarnel cyu'n, ju'xsen tten o tzaj tokxena Espiritu Santo te cyey tu'n cye'yojla'na ke oclsal. Ke cyey ocllala te Kman Jesús ke cye, cuma o tchoj texin tuya ttziy'xin. Entonces cyc'ojlanxsenke. ²⁹ Ilx ti'j tu'n cyxi' c'ojlet, cuma ntzki'ntlwe oj wex, chi uldtzen xjal te yajlal cye oclsal bix te k'ilbaxcye, tisen jun ski't cyoxl carnel. ³⁰ Jax wu'n, bix cyxolxa cjawela jlet cab xnak'tzal tej nic'bel yol. Cxe'ltzen nkba'n cyey tzul jun k'ij oj t'jaw cyniq'uena x'tak'bil tu'n t'cub cyi' oclsal cyu'na tu'n cyoc lpe cyi'ja. ³¹ Ju' tzunj cxe'l nkba'n cyey tu'n t-xi' cyc'ojlan cyiiba. Cytzki'n tzuna ti'i'n wanem cyi'ja, bix ti'i'n ma jawel baj oxe jnabk'iwe bix oc wocsa'n cye'u'ja tuya tal nwitz tu'n mi'n chi cub yajla'na.

³² Ja'le tzuna matzen chi cyaj nk'o'na tuj tk'ab Dios tu'n cyxi' c'ojleta. Jatzen tyol Dios cxe'l k'inte cyey, bix c'oquel nimsante cyey, cuma nimte tipemal. Te Dios tyol, atte tipemal te ch'ixbelc'a cynaabla. Bix te Dios tyol, tzin tkba'nte ka at cykab t'cwal Dios.

³³ Yaltzen weya, matzen chin ak'anana cyxola, pero bajx t-xa' nkanewa cyk'inemala. Yal cyey yajlalca xjal, pwakcye cyjya'. ³⁴ Cytzki'ntzen cyey tuya nk'abwe x'in itz'ja, bix e xi' wonewe kej xin wuya. ³⁵ In ak'anaxnsenwe cyiw. Ju'tzen e nse weya tu'n tcyaj jun techlal te cyey. Jaxsen ju'x cyey cwel cyk'o'na jun techlal cywitz ac'aj oclsal ti tten tu'n t'cub cypa'n tik'ch cye cyuya kej ete' tuj tcyajjal. Tzulc'ax tyol Kman Jesús tuj cye'u'ja. Tzixin cyjulu: "Mas ttzyal chi temela kej k'ol cotz cywitz chi k'ilte te juntl," tzi Jesús—ju'tzen tten tyolen Pablo cyuya ninc'ul tja Dios ke oclsal te Efeso otk chi ul tuj Mileto.

³⁶ Tejtzen tpon baj tkba'nte Pablo cykil ju'wa, bix e cub majexin, bix e na'nxin Dios cyuya ninc'ul tja Dios. ³⁷ Cykilcakexin ook', bix e tzaj cyxke'nxin Pablo, bix nim maj el cytz'ubanxin twitz Pablo. ³⁸ Otkxsen chi bisenxin, cuma otk tkba Pablo cyexin ka mi nuket juntl maj tz'oc cye'ye yexin twitz tx'otx'. Cwa t-xi' cyxklu'nxin ja Pablo tuj barc.

21

Tej t-xi' Pablo tu'n tpon tuj Jerusalén

¹ Jatzzen ta' barc, axsen tcyiwe'l t'cub kpa'n kiiba cyuya tij otk chi ul tuj Mileto, bix ocx ko'ya tuj barc. Bix e xi' ko'ya txucl tuj tx'otx' te Cos. Tetzen juntl k'ij kpona tuj tx'otx' te Rodas. Kiy'tla bix e pon ko'ya tuj tnom te Patara. ² Tujtzen Patara e kch'ixbe kiiba tuj juntl barc. Ja tzunj barc e xi' k'inte keya ju' xi'nin tuj tx'otx' te Fenicia, parte te Siria. ³ Tujtzen be tuj mar e kila tx'otx' te Chipre, pero min e we' ko'ya, sino ju' ex ko'ya tuj kmank'aba te Chipre. K'inx kbeya tejxe kpona tuj tx'otx' te Siria. Pero tu'ntzen tcyaj tk'o'n barc iktz tuj tnom te Tiro, ttzii' mar, bix ocx ko'ya jatzewe. ⁴ Tujtzen Tiro bix e xi' k'jyo'na ke oclsal, bix e ten ko'ya cyuya wuuk k'ij. Tejtzen cybinte oclsal ka xi'nin Pablo Jerusalén, bix e cykbaxin te Pablo:

—Taat, nuksama. Mi'n txi'y tuj Jerusalén. At-xsen tka'yel te tey. O tzaj tkba'n Espiritu Santo keya tu'n mi'n txi'y—tzi tzunkexin te Pablo.

⁵ Pero te Pablo min e tcuyaxin, bix etzx ko'ya tej wuuk k'ij. Tejtzen ketza, cykilca ke ocslal tuya ke cyxu'l bix ke cycwal bix e tzajke wabl keya ttxa'nxe tnóm ttzii' mar. Tejtzen kpona ttzii' mar, bix e cub maje ko'ya, bix e na'n ko'ya Dios. Kbjatzen na'na Dios, bix e k'olben ko'ya. ⁶ Bix ocx ko'ya juntl maj tuj barc, bix ajtz meltz'aj ke ocslal te Tiro cyja.

⁷ Bix ex ko'ya tuj barc tejaxa kpona tuj tnóm te Tolemaida, bix etz ko'ya tuj barc. Bix e xi' ko'ya jyol cye ocslal. E k'olben ko'ya cye, bix e ten ko'ya jun k'ij cyuya. ⁸ Tetzen juntl k'ij bix etz ko'ya tuj Tolemaida, bix e xi' ko'ya tu'n kkena cubne tuj tnóm te Cesarea, jaa'j najla Felipe, junxin cyxol jwuukxin onel tuj tja Dios otk cub pan tej waabj cyxol viuda te Jerusalén. Ya jatl tzunxin kbalte tpochal Jesús cye xjal, bix e cyaj ko'ya tuya Felipe. ⁹ Cyaja tmeelxin sortel at. Bix nchi kbantxin tyol Dios otk cyiik'txin te Dios, cuma ejee'txin tyolel Dios.

¹⁰ E ten ko'ya cab k'ij tuya Felipe. Attzen jun k'ij e tzajxin junxin tyolel Dios tuj Judea, bix e ponxin tuj Cesarea. Ttzki'nxin ti jilel tu'n tba. Agabo tbi jxin tyolel Dios. ¹¹ Ja tzunjin Agabo e pon te k'olbel keya. Tejtzen tponxin, bix el tii'nxin tq'uelbil Pablo. Tuyatzen tq'uelbil Pablo oca t'xpo'nxin ke tk'abxin bix ke tkenxin. Tzi tzunxin cyjulu:

—Ma tzaj tkba'n Espiritu Santo ka cwel xpet jtaaw jq'uelbil lu, tisenj ma cub wichla'na, cyu'n judío, bix cxe'l k'o'na cye xjal te Roma—tzi Agabo.

¹² Tejtzen toc kbi'na kej yol ju'wa, bix oc k'cubsa'na kwitza cyuya ocslal te Cesarea te Pablo tu'n mi'n txi'xin Jerusalén. ¹³ Pero bix aj ttzak'be'n Pablo:

—¿Tikentzen nchi ook'ey bix ju' cyyole tu'n tcub cynajsa'na nc'u'j tii'n xi'nin kena? Lu kenwe binne nten tu'n ncub xpet, bix yaa'n o'cxj, sino tuyaxa tu'n ncyim nuk ti'j'ca Kman Jesús—tzi Pablo keya.

¹⁴ Mix e cwa' ti'jxin ku'na tu'n mi'n txi'xin Jerusalén. Cwa tpon baj twi' o kyolena tuyaxin, bix e xi' k'kba'na texin:

—jNukxna ja t-xtalbil Dios tuyey!

¹⁵ Tbjalxenitltzente k'olbena tuj Cesarea, bix oc kchmo'na tik'ch keya, bix e tzyet kbeya Jerusalén. ¹⁶ Bix e xi' junxin ocslal te Cesarea kuyena tuj kbeya. Tejtzen kpona Jerusalén, bix e xi' cyii'nxin ejoo'ya tja junxin Mnasón tbi, tu'n kcyaja tjaxin. Jxin Mnasón te tx'otx' te Chipre, bix nimxsen tyem toclenxin ocslal.

Tej tjaw ttzyet Pablo tuj templo

¹⁷ Bixsen ke ocslal te Jerusalén e cyiik' ko'ya tuya nim ttzyal tej kpona.

¹⁸ Tetzen juntl k'ij bix e xi' Pablo kuyena te k'olbel Jacobo, tiz'en Jesús bix jaxin tneel tajwil cye ocslal. Bix tuya Jacobo otk pon cychmoon cyiib ke tajwil ocslal. ¹⁹ Kbjaxitltzen k'olbena, bix ak' Pablo k'umlte tik'ch otk bint tu'n Pablo tu'n tipemal Dios cyxolj xjal yaa'n judío. ²⁰ Tejtzen toc cybi'n tawil tja Dios judío kej tpochal, bix ak'kexin k'ol chjonte te Dios. Pero yajc'altzen bix e xi' cykba'nxin te Pablo:

—Taat, ba'nxsente cyxolj xjal yaa'n judío at nim ma chi ocslan. Pero attzen jaa' toca ch'in. Matzen tz'oc tcyeyena cyxol xjal judío nimxsen mil xjal ma tz'ocslan. Pero kej ocslal judío ncubx cycyiwsan cyiib ka ilx ti'j tu'n cyxi' lpe ti' tley Moisés. ²¹ Pero kej judío o chi oc ebinte cyxolj xjal judío najl nakch cyxol juntl wik xjal, jatzen tey umla'n kbal tej tu'n mi'n chi oc lpe ti' tley Moisés, mitetpe cychostumbre judío, mitetpe il ti'j tu'n toc cyechel judío ti' twi' cytz'albil nee' cwalxke. ²² Entonces ¿titzen kse'? Jax cybi'xcye ka ma tzul tej t'zalu, bix c'o'quel cychmoon cyiib ti'j cye cyaj. ²³ At jun ba'n ttema tu'n cycub chewex. Bincham jcxel k'kba'na tey. Keya kxol at cyaja xjal o cyaj cyk'o'n cyool twitz Dios cwelx cyc'u'ncye jun cychostumbre judío, bix mi'n cub cymatzo'n ttzmal cywi' ojxe t'bint ja yol lu cyu'n. ²⁴ Ya nukxix nbinactl ja lu cyu'n. Cutxetzen tey, bix k'i'nxsenke, tu'nzen t'bint cyu'na cykil cychostumbre judío cyu'na jcyé chinel cyu'n. Bix juntl, jax tey c'o'quel chjonte cyej jil alimaj te oybil cxe'l cyoyej jcyaja xjala tu'nntzen tpon baj twi' cyool twitz Dios. Bix oj tpon baj oybil, bixsen cwel mtzet twi' y cyuyaj cyaja xjala. Ti'j tzunju'wa cykilca ke xjal judío c'o'quel cye'yente ka min cub tch'ixbe'n tey tley Moisés. C'o'quel ccyey'en ka jaan tey ncuyan tej cychostumbre judío. ²⁵ Yaltzen ke ocslal yaa'n judío, matzen cub ktz'i'bena jun u'j cye tzin tkba'n ti chi temela ku'n. Mi'n tz'oc cyk'o'n cye cyc'u'j ti'j cyley judío. Nuktzen jaj tu'n mi'n txi' cycho'n jchi'pj otk txi' cyoyen cye sant, mitetpe tziy', mitetpe cychu'l alimaj min otk tz'el tziy' cye, bix min-al jun ba'n twutan tuya juntl xuuj, nuk ja te t-xu'j—tzitzen ke tij tuj tja Dios te Pablo.

²⁶ Kej yol lu ba'n e'lake tuj twitz Pablo. Tetzen juntl k'ij bix e xi' tii'nxin kej cyaja xjal, bix e xi'xin tuj nin tja Dios te ichlalca costumbre cyuya, bix tu'nntzen tpon baj twi' jwuuk k'ij costumbre te mitkna'x cyxi' oyet jil alimaj te Dios te jaca juun xjal.

²⁷ Ju'tzen tten tpon baj twi' jwuuk k'ij nimbil tuj nin tja Dios. Tejtzen ch'itk cypon baj wuuk k'ij, bix ocpan cabxin judío tuj tja Dios. Otk chi ponxin Jerusalén. Otk chi tzajxexin tuj tx'otx' te Asia. Tejtzen toc cycye'yenxin Pablo bix ak'kexin cyakwusal xjal, bix e cytzuycin Pablo. ²⁸ Bix ak'kexin š-ilcye xjal:

—Key xjal te Israel, ꞑko cyoneca tzalu! Ma tzyet jxjal niy' tuj jaca tnom kbalte ka mintii' il ti'j tu'n toc ebi'nj tzin t-xnak'tzan ktanem, bix tley Moisés, bix tley nin tja Dios. Bix ka tzul ti'n cab xjal griego tuj nin tja Dios, jaa' nuk ejee'c'acye xjal judío ba'n cyoctz. Ju'tzen ma tz'oc cytz'ilsa'n ja lugar sant—tzi tzun kej xin judío otk chi tzajxe. ²⁹ Ju'tzen cyool xina cyibaj xjal griego, cuma otk tz'oc cycye'yenxin Trófimo te Efeso, jun tuya Pablo, tuj tja Dios, bix tuj cywitztjin ja Pablo k'il texin. Pero yaa'n ju'wa.

³⁰ Tejtzen cybi'n kej yol, bix e tzaj k'ojl cykil tnom, bix e tzaj cychmoon cyiib xjal, bix e tzyet Pablo, bix etz kitet-xin ti'jxe tja Dios, bix e jpetke ttzii' tja Dios. ³¹ Bi'xitle e byet-xin nuket min e pon tumel k'oj tuyaj xin cawel cyibaj soldado te Roma. ³² Ja tzunj xin cawel cye soldado bix e tzaj ttcox'nxin ke tsoldadoxin, bix ke tcapitánxin, bix junxsen cyxi' ajkelenxin jaa' npja' il. Tejtzen toc cycye'yen xjal jxin cawel cyuya soldado otk chi ponxin, ja min oc cywolpsa'nxin Pablo. ³³ Entonces bix e xi' lk'e cawel ti' Pablo, bix e tzaj ttzyu'nxin Pablo, bix e xi' tkba'nxin cye tsoldadoxin tu'n tcub xpet Pablo tuya ca'ba cadena, bix e bint cyu'nxin ju'wa. Bix ak'xin kanlte te Pablo alcye Pablo, bix ti otk cub tbinchenxin, bix ti jilel tilxin. ³⁴ Pero tzinxsen n-el cywi' xjal, ja minx iy'xtl tyol Pablo tuj twi'xin, bix mitetpe el tniy'xin ti cyool xjal, cuma tec'ax tzin tyolen jun wik yol, bix cabtl juntl wik cyool. Mix e'la tniy'xin ti'j. Entonces cwa t-xi' tchk'o'nxin tu'n t-xi' k'i'n Pablo tuj jaa' jaa' najla ke soldado. ³⁵ Tejtzen cyponxin tuj jaa', bix ak' jawexkexin cyuj yotx te jaa', bix e jaw cyii'n soldado ja Pablo ti' cykulxin tu'n tclat-xin cywitzt xjal, cuma cyaj xjal tu'n tcub Pablo. ³⁶ Otkxsen chi oc lpe xjal, bix tzinxsen nchi š-in:

—iCybyo'nc'al iCybyo'nc'al—tZitzen cysitZ'bil xjal.

Tej tyole Pablo tu'n tco'pan tiib

³⁷ Tejtzen ch'itk tocx Pablo cyu'nxin tunwen, bix e xi' tkba'nxin te cawel cye soldado:

—Taat, waj jun xtalbil. Waj txi' nyolen cab nyol tuyey—tzi Pablo.

Bix aj ttzak'be'n cawel:

—A, ba'n tey yolen tuj griego—tzi comandante, cuma otk txi' tkanen Pablo tuj griego.

—Ba'nte—tzi Pablo.

³⁸ Bix e xi' tkba'n comandante cye soldado te Pablo:

—Ka ba'n yolena tuj griego, yaa'n aj Egipto tey tisenj we tuj nwitz. At jun xjal te Egipto ma bint-xe cab tyem e jaw ti'n jun k'oj tzalu. Jaytltzen bix e xi' ti'i'n cyaja mil byol xjal jaa' min-al xjal najl—tzi comandante.

³⁹ Bix aj tkba'n Pablo:

—Min, taat, yaa'n inayen weja. Aj judío kenwe, bix tej tnom Tarso kenwe, jaj jun tnom mas il ti'j tuj tx'otx' Cilicia. Pero wajtzen txi' nkanen jun xtalbil tey. Nuksama, chin tzakpi'y te kbalx cab nyol cyej xjal lu—tzi Pablo.

⁴⁰ Bix e tak' cawel tu'n tyolen Pablo, bix e cub we'xin cyuj yotx te jaa', bix e xi' tk'o'nxin techlal tuya tk'abxin tu'n cywe' xjal cyyolen. Tejtzen cywe' xjal, bix ak'xin yolel tuj yol hebreo, cyool xjal judío bix tyol Pablo.

22

¹ Bix e xi' tkba'n Pablo:

—Key te ntanem, bix key cawel, cyk'ontz ch'in cyc'u'ja ti' nyola te co'pbil weya, nuk-samkey—tzi Pablo.

² Tejtzen toc cybi'n xjal tej tyolen Pablo tujx cyool, tuj yol hebreo, bix e we'ke xjal mas, bix oc cyk'o'n xjal cyc'u'j ti'j. Bix ak'x Pablo yolel:

³—Aj judío kenwe. Jatzen in itz'ja tuj tnom te Tarso, parte te Cilicia. Pero tejtzen cwalx kena, bix ajt bint ko'ya tzalu Jerusalén. Jatztzen ma chin tzi'ya wewe. Jatztzen in ocxawe tuj scwela. Ja weya xnak'tzal we jGamaliel, jxin cyiwksen e tema tuj tley Moisés, octzen cycye'yen ke kxe'chel ootxa. Bix axsenwe nc'u'j ti'j, bix tuyaxsen cykil wanem waj oc ncy'e'yen tley Dios tisenj tzin cyse'n cyey. ⁴ Bix yal weya tuj nwitz, kej xjal lepchech ti'j t-xnak'atz Jesús nchi oc k'ojl ti' Dios. Ju' tzunj nim in oc k'ojl weya cyi' ocslal lepchech ti' tbe Jesús, tejtze cybyet wu'na. Xinakle ke ocslal, xuujleke, bix e xi' wii'nkeya tuj tzee' te pres. ⁵ Bix ba'n toc te tstiwa ti'j jaj xin tneel pala bix nintzaj consejo tuj nin tja Dios. Ejee' tzunxin e k'onte jun u'j weya te wajwalela cywitzt cawel te judío tuj tnom te Damasco, tu'n t-xi' njoy'n ke ocslal. Ju'tzen in xa' weya te jyol cye ocslal, tu'n cytza'j wii'na tzal Jerusalén, tu'n ccyub tuj castiwa.

*Nk'umen Pablo ti tten tocslan**(Hch 9:1-19; 26:12-18)*

⁶ In ten weya tuj be te Damasco, bix ya ch'itk npona. Pero tetzen chil k'ij ttzaj txakpaj jun tij tken luz wibaj tuj cya'j. ⁷ Tzinxsen tij nt'ilpaj bix tij cyiwxsen, bi'x in cub tz'ak tu'n. Pero bix in bi'ya jun yol e tzaj kbante weya: “¡Saulo, Saulo! ¿Tu'n tikentzen nim q'uixc'aj ntzaj tk'o'na weya?” tztizen ju'wa. ⁸ Bix aj ntzak'be'na: “Taata, ¿altzen cyey?” ntzi tzuna. Bix ajtz ttzak'be'n weya: “Inayen wej Jesús te Nazaret. Inayenxj nchin baj tzyu'na,” tztizen weya. ⁹ Kej xjal weya wuya e cyil jtken luz, bi'xsen e jaw sey'pajke, pero min el cyniy' ti'j ti jilel e tzaj tkba'n yol we. ¹⁰ Bix aj nkanen tej yol: “Taata, ¿titzzen jilel tey taj bint wu'na?” ntzi tzuna. Bix ajtz tkba'nxin weya: “We'wey. K'inx jtbey Damasco. Ojzen tpona, la' altzen ctzaal kbante tey ti cbinel tu'na,” tztizen weya.

¹¹ Bix in jaw we'ya, pero min ak' nwitz tu'n tken jluz. Ju' tzunj in xa' cyii'na wuyena nk'aba tejxe kpona Damasco.

¹² Tejzen kpona Damasco, atzen junxin xjal Ananías tbi. Ebil xsunxin ti' tley Moisés. Cykil xsun kej xjal judío najl tuj Damasco ba'nxsen cyol ti'jxin. ¹³ Bix e tzaj xin Ananías wi'ja. Tejzen tulxin wi'ja, bix e tzaj tkba'nxin weya: “Hermano Saulo, e tcye'yena juntl maj,” tzi tzunxin. Tujx naj tjaw ncyeyena, bix oc ncyeyenxin. ¹⁴ Bix e tzaj tkba'nxin weya: “Jxin Dios e cyna' ke kxe'chel ootxa ma scy'onte tey tu'n tel tni'ya ti'j alcyey taj Dios. C'oquel tcye'yena tcwalxin, jxin mintii' til tuya tnaabl. Ctiik'a tzuna tyolxin. ¹⁵ Ma tscy'o Dios jay, cuma tajxin tz'oca te t-xelxin cyxol xjal te kbal tej cykil c'oquel tcye'yena bix c'oquel tbi'na texin. ¹⁶ Yal ja'lewe, intii'tl tu'n tcub tyo'n tey mas. ¡We'wa! ¡Ko! Matzen bautizarja wu'na. Tu'n toc ke tc'u'ja ti' Jesús. Bix tu'n tel ttxjo'nxin tila,” tztizen Ananías weya. ¹⁷ Bix in cuyaya, bix in ajtz meltz'aj tzalu Jerusalén, bix in ocx tuj tja Dios te na'l Dios, bix e cub klee' tuj nwitz. ¹⁸ Tej tcub klee' tuj nwitz, oc ncyeyen Jesús, bix e tzaj tkba'nxin we: “Nix tu'na. Ctex naj tuj Jerusalén, cuma mlay cycuya xjal kej yol o wak' tey,” tzi Jesús we. ¹⁹ Bix aj ntzak'be'na: “Taata, ka yaa'n chin oquel cybi'nwe bix cybiwe nyol, cuma cytzki'ntl ti tten n-oc nclo'n Dios, bix cuma weya nchixa tuj jaca camon jaa' te jyolcye ocsal te pjulecye, bix k'olecxcye tuj tzee'. O'cx cyilj ti'j n-oc cybi'n jay. ²⁰ Cye'yentz, taata, tej nbyet Esteban tuya xak, jaantzen ken weya cyey'lxte tik'ch e baj cyi' ocsal, bix nchin c'o'jlan tzuna cyxbalen jxin xool xak,” ntzi tzuna. ²¹ Pero bix ajtz ttzak'be'n Jesús: “Min. Mlay tz'oc cybi'n jay. Pero at-x juntl taak'ena wu'n. Cutxa. Ma txi' nchko'na nakch cyuyaj xjal yaa'n judío,” tzi Jesús we—ju'tzen ten tyolen Pablo cye xjal judío.

Tej tpon k'i'n Pablo tuj tk'ab cycawel soldado

²² Maatz'e ja'lewe oc cybi'n judío ja Pablo. Min-al e k'ajt, pero tej cybinte tbya'n tu'n Pablo kej xjal yaa'n judío, bix ak' ke xjal cyakwusal juntl maj, bix e jaw ši'nke:

—Mlay kpa jun ka' xjal. Mintii' tu'n tten twitz tx'otx'. ¡E tcyim! Yaa'n ba'n tu'n titz'j—tzi ke xjal cyjaw ši'n.

²³ Bix ak'xke ši-il, bix el cyrotan xjal cyi'j, bix e jaw cytztizen kuk, cuma tzinxsen nchi'l cye'u'j xjal.

²⁴ Tejzen toc tcye'yen ju'wa, bix e tkba jxin cycawel soldado tu'n tocx Pablo tunwen tuj cyja soldado. Bix e xi' tkba'n najxin cye tsoldadoxin:

—Cye'o'nksen tz'u'n ti'j ojxe ttzaj tkba'n ke tu'n tiken nim cykanbil xjal ti'j—tzi cawel cye soldado.

²⁵ Entonces bix ak' ke soldado te xpoc'a tkenxin tk'abxin tu'n ttzyet tpjuxjin. Pero bix aj tkba'n Pablo te junxin ch'in cawel tcub nka:

—Judío kenwe. Pero jax aj Roma kenwe. Ju' tzunj mintii' ba'n toc cypju'n cyey inayena, cuma mix nchixa cyii'na twitz jun cawel tu'n t-xi' tcye'yen wil tuj tumel—tztizen Pablo te capitán cye soldado.

²⁶ Tejzen tbinte capitán ju'wa, bix e xi'xin twitz nin cawel cye soldado te kbalte, bix e xi' tkba'nxin:

—Nuksama, taata, cye'yentz, jxjal lu jun xjal romano—tzi ch'in cawel te nin cawel.

²⁷ Entonces bix e xi' lk'e comandante ta' Pablo, bix e xi' tkenenxin:

—Kbantz we, ¿jaxpa ka aj Roma?—tzi tzunxin t-xi' tkenenxin.

Bix aj ttzak'be'n Pablo:

—Ju' tewa, taata, te Roma kenwe—tzi Pablo.

²⁸ Bix e xi' tkba'n comandante:

—Ju'x weya aj Roma kena, pero nimxsen pwak ajben we tu'n cynet wu'j tu'n woc te aj Roma—tzi tzunxin te Pablo.

Bix aj ttzak'be'n Pablo:

—Ba'nte, pero weya aj Roma kenwe, cuma ju' witz'jlen—tzi Pablo.

²⁹ Tejtzen toc tbi'nxin ke tyol Pablo, bix el cytzakpi'n kej xin soldado binne cyten te pjulec te Pablo. Bix e jaw lu'len tuj tchu'lxin, cuma aj Roma Pablo. Jaxin toclel c'ojlante Pablo tjak' tcawbilxin, pero otk cub t'xpo'nxin Pablo tuya cadena.

Tej cytxquet kej nejenel cye judío tu'n cawel cye soldado tu'n toc Pablo tuj xkel

³⁰ Pero jxin comandante e tajbexin txi' tjyo'nxin tu'n tiken nchi kanena judío ti' Pablo. Entonces tetzen juntl k'ij bix e xi' tsma'nxin tu'n cyel k'it jcadena xiphelte Pablo, bix tu'ntzen cyoc chmet ke nintzaj pala cye judío cyuya ke consejo te stis. Tejtzen toc cychmoon cyiibxin, bix e xi' tii'n comandante ja Pablo tuj sesión, bixsen e cub wa'bet-xin cyxolxin.

23

¹ Bix oc we' twitz Pablo cyi' ke nintzaj xjal judío, bix e xi' tkba'nxin:

—Key taat, key te ntanem, mintii' junwe wil. Hasta ja'lewe o chin cub ten ch'inwe twitz Dios junx maj sak. Mintii'xixwe n-oc yajlante we—tzi Pablo.

² Pero tej toc tbi'nxin kej yol, bix e jaw k'ojl jxin tneel pala Ananías tbixin, bix e xi' tkba'nxin cyej xjal ete'c nka ttxlaj Pablo:

—Cytzakpi'ncx jun tuj ttzi jxin lu tu'n toc kyeec'an te tu'n mi'n tz'oc ten yajlalec te Dios —tztizen tneel pala. Bix oc tpu'nxin Pablo.

³ Pero bix e xi' tkba'n Pablo te Ananías:

—Tey, taat, ca'ba twitz. Ju' tey tisen jun tzlom sak ti'jxa, pero k'eyna tuj tc'u'j. Dios cwel k'onte tej tuj cawbil. Lu tey k'ukle'a jatzewe te binchal stis wibaj. Pero jaxa min thiy ley, cuma taja chin n-oc pjeta. Mina'x tzlooj wil. Ju' tzunj mintii' toclena te pjul we—tztizen Pablo toc ilen ti' nintzaj pala.

⁴ Pero bix aj cytzak'be'n kej xin ete'c nka ttxlaj Pablo:

—iK'o'nc tc'u'ja ti'j! Jxin lu ja te xin ja nintzaj cycawel pala ¿Miman ttzki'na?—tzi tzunkexin te Pablo.

⁵ Entonces bix e xi' tkba'n Pablo:

—Cynajsama, key te ntanem, min ntzki'nwe ka jaj xin lu cycawel pala. Tej n-oc ncyakwusa'nxin yaa'n tumel n-oca wu'n, cuma tuj tyol Dios tzi cyjulu: “Mi'n tyoley ka' ti' jun cawel te ttanema,” tzi Dios—tzi Pablo.

⁶ Ttzki'nte Pablo ka at cabxin ocsal cyxol consejo tej cloj saduceo bix cabtlxin tej cloj fariseo. Bix ul tuj tc'u'jxin tu'n tjaw titz'jsa'nxin jun k'oj cyxol nmak xjal. Bix ak'xin s-il:

—Key te ntanem, aj fariseo kenwe. Bix weya nman aj fariseo. Ke cyej ete'c'a j yol wil, cuma weya tuj nwitz ke cye cyimne chi jawetz itz'jcyte juntl maj—tzi Pablo.

⁷ Tejtzen t-xi' tkba'n Pablo ju'wa, bix e jaw jun k'oj cyxol ke fariseo cyuya ke saduceo. Mix e binne tten cya'nxin ti tu'n ttema Pablo. ⁸ Ke saduceo e cubx cycyiuwsan cyiib ka yaa'n espíritu ke anem, yaa'n ba'nke bix yaa'n ka'ke. Bix mintii' tu'n cyjatz itz'j tuya cyxumlal juntl maj. Pero ke fariseo oc cyocsla'ncyte cykil ja lu. ⁹ Bix e cub meltz'aj yol te jun tzpetpajlenel. Cwax tjaw we' cabxin tx'olbal ley cyxol xjal fariseo te colte Pablo, bix e jaw s-inkexin:

—Tej xjal lu mintii' te til, bix ka yaa'n junle espíritu ma jun tsanjel Dios tuj cya'j o tzaj k'onte tipemal, bix katzen ju'wa, mlay ko yolen ka' ti' Dios—tztizen ke fariseo.

¹⁰ Pero jawnex e jaw tz'iy tzpetpajlenel yol, tejxa ttzaj ttzi ti'j xin cawel cye soldado ka tu'n tcub cytz'akenxin Pablo. Ju'tzen e xa' tkba'nxin cye soldado tu'n tetz k'it-xin tuj jaa' cychmoon cyiibxin te yolel, bix e xi' k'i'nxin juntl maj tuj cya' soldado.

¹¹ Pero te tzunj koniyan, bix ul jlet Jesús ttxlaj Pablo, bix e xi' tkba'nxin:

—Pablo, mi'n baj tc'u'ja. Ma baj tyeec'ana alcyey we waj tuj Jerusalén. Yaltzen ja'lewe, matzen txi'y yec'lte we tuj Roma. Jatzen niq'uen wu'nj—tzi Jesús te Pablo.

Tej tbint ti'j cyu'n xjal judío tu'n tcub cybyo'n Pablo

¹² Tetzen juntl k'ij cabtl tzunxin judío e cub tu'n cyjulu. Bix e tzaj cyii'nxin Dios te tstiwa ka tu'n mi'n chi waa'nxin bix tu'n mi'n chi wc'anxin ka mitkna'x tcub Pablo cyu'nxin. ¹³ Ejee' tzunj xin e cub niq'uen tej ju'wa atle mas te cya'wnakxin xjal. ¹⁴ Bix e xi'kexin cywitz cawel cye pala, bix ke cycawel judío. Tzi tzunkexin cyjulu:

—Cybimq'uey, taat, keya ma tz'oc kk'o'na Dios te tstiwa tu'n mintii' t-xi' kwaa'na ka mitkna'x tcub Pablo ku'na. ¹⁵ Yaltzen ja'lewe, kaj tzuna tu'n cyonena kuyna. Ke cyej bixsen ke consejo tu'n cyxi'y twitz comandante te kbalte ka tu'n cyaja txi' cykanena te Pablo mas tuj tumel twitzj nejl. Cykanex te tu'n t-xi' tii'nxin ja Pablo cywitz nchi'j. Yaltzen keya, tujtzen ewjel kyoya, tu'ntzen tcub ku'na tuj be te mitkna'x tpon—tzi tzunkexin cye cawel.

¹⁶ Pero junk'a tal taneb Pablo oc ebin tej nbaj niq'uet ti'j, bix e xi'k'a cya' soldado te kbalte te Pablo. ¹⁷ Tejtzen toc tbi'n Pablo, bix e tzaj ttxco'nxin junxin capitán, bix e xi' tkba'n Pablo texin:

—Taat, jk'a cwal lu at nim yol k'i'n tu'nuk'a tu'n t-xi' tkba'nk'a te comandante. Nuksama, k'inx ch'ink'a twitz comandante, tu'n t-xi' tkba'nk'a yol—tzi Pablo te capitán.

¹⁸ Entonces bix e tcuya capitán, bix e xi' tii'nxin jak'a twitz comandante. Tzi tzunxin cyjulu:

—Taat, jxin pres Pablo xi' ttxco'nte we, bix s-aj tkba'n we tu'n ttzaj wii'n jk'a lu twitza. Tisen ka at il ti'j tu'n t-xi' tkba'n tey—tzi capitán te cawel.

¹⁹ Entonces bix e tzaj tii'n comandante jaj k'a xjal tuj tk'abxin, bix e xi' tii'nxin jak'a cyjunalxin, bix e xi' tkanenxin:

—¿Ti jilel k'i'n tu'na tu'n ttzaj tkba'na we?—tzi comandante t-xi' tkanen.

²⁰ Bix aj ttzak'be'n jk'a xjal:

—Kej xjal judío ma tz'oc cychmon cyiib ti' jun cynic'bil. Tzul cykanen tey tu'n t-xi' tii'na Pablo cywitz consejo juntl maj nchi'j, tu'ntzen cyjyonte juntl maj til Pablo, tuj mas chebe yol. Pero nuk jun xtak'bil. ²¹ Mi'n txi' tk'o'na te'u'ja ti'j, cuma at mas te cya'wnak judío chi ayol tuj ewjel tuj be. Ma cub cyu'n tu'n mi'n chi waa'n, mitetpe cyc'a' t-xi' ka mitkx ncwa' Pablo cyu'n. Ya luke binne cytena. Ya nuktzen tzin cyyo'ntl tu'n tkba'ntey tu'n tex Pablo—tzi tzunj k'a xjal te comandante.

²² Cyiwxsen aj tkba'n comandante tej k'a cwal:

—Mi'n jaa' tz'oca tkba'na ka ma tkbay we—tzi comandante, bix e xi' tkba'nxin te k'a tu'n tajk'a.

Tej t-xi' cyk'et Pablo tu'n tpon twitz Félix jun gobernador

²³ Tejzen tetzlenxiti jk'a xjal, bix e tzaj ttxco'n comandante ca'baxin capitán, bix e xi' tkba'nxin:

—Cybincham cyiiba tu'n cyxi'y tuj jun cybey tuj tnóm te Cesarea tuj mlaj tx'otx'. Chi betela te koniyan. Chi elaxe beljaj tajlal hora. Chi xe'la tuya ca'ba syent soldado tu'n cyken, bix oxc'al tuya lajaj tibaj caballo, bix ca'ba syent tuya lans. ²⁴ Ejee'tzen cyey chi xe'l k'in tej xin pres Pablo. Entonces cybincham jun caballo te texin. Waj pon cyu'na ba'n twitzj cawel Félix—tzi comandante cyej ca'baxin capitán.

²⁵ Jooc'tzen nchi binchancye soldado cyiib tu'n ttzyet cybe te koniyan, bix e cub tk'o'n comandante jun u'j te cawel. Tzi tzunxin tuj u'j cyjulu: ²⁶ “Nukxsen jaq'uey Cawel Felix, jun k'olbebl tey. Inayenwe jClaudio Lisias, comandante cye soldado te Jerusalén. ²⁷ Ma txi' nchk'o'n jxjal Pablo tey. E tzyet-xin cyu'n judío tzalu, bix tu'n tcubxin cyu'n. Pero bix in pon cyuya soldado, bix e kco'piya. Bix el ntzakpi'n cye judío, cuma ntzki'n ka aj Roma. ²⁸ Pero waj e nbi tiken e tzyetaxin cyu'n judío te pres, bix tu'n tiken npja' niq'uet ti'jxin. Entonces bix e xi' wi'i'n cywitz nintzaj cyconsejo judío te cye'ybil. ²⁹ Tejzen toc nbi'n yol, bix el nniy' ti'j ka nbaj niq'uet ti'jxin nuk tu'nj cye cyley. Pero tisenj ke kley ejoo' te Roma, mintii' texin ma cub tbinchen tu'n tbyet-xin, mitetpe tu'n tocxxin tuj tze'e'. ³⁰ Yaltzen ja'lewe, matzen nbi ka ma bint cyu'n judío tu'n tcubxin tuj be. Ju' tzunj ma txa' nchk'o'n jiquen tey. Bix ma txi' nkba'n cyej xjal nchi kanen ti'j, tu'n t-xi' cyjyo'n stis twitza junx maj. Ti'jltzen tey toca ti pjel tey.” Ju'tzen toc tu'n comandante tuj u'j te cawel gobernador.

³¹ Entonces bix iy' cyii'n soldado ja Pablo ti'jxe Jerusalén te koniyan, tisenx otk cybixin. Bix te koniyan, cyocxxin tuj tnóm te Antípatris. ³² Pero tetzen juntl k'ij cykil kej xin soldado nchi bet tu'n cyken bix ajtz meltz'ajkexin Jerusalén. Nuk o'cx ketlj oxc'al tuya lajaj xin tibaj caballo e xi'x jaa'j tu'n cyponexin. ³³ Cwax cyponxin tuj tnóm te Cesarea, bix e xi' cyk'o'nxin tu'j comandante bix Pablo te cawel. ³⁴ Bix e xi' tcy'e'yen cawel u'j. Tejzen tba'j tcy'e'yenxin u'j, bix e xi' tkanenxin te Pablo:

—¿Te jaa' tey?

Bix aj ttzak'be'n Pablo:

—Taat, te tx'otx' te Cilicia ken weya—tzi Pablo te cawel.

³⁵ Entonces bix aj ttzak'be'n cawel:

—Jax ba'n. Cnyo'we oj cyul jxjal k'ojlel ti'ja. Ojzen cyul, cxe'l nbi'na tco'pbil tiiba—tzi cawel, bix e xi' tchk'o'n cawel tu'n t-xi' k'it Pablo tja cawel Herodes, jaa' ta' juntlxin comandante tuya cabtlxin soldado.

24

Tej tyole Pablo tu'n tco'pan tiib twitz gobernador Félix

¹ Jwe'tltzen k'ij mas yaj, bix e xi' Ananías, cycawel pala tuj Jerusalén, tu'n tponxin tuj tnóm te Cesarea, cymojba cyiibxin tuya cabtlxin cawel cyxol judío, bix junxin licenciado Tertulo tbinxin. Cykilca tzun kej xina e pon twitz cawel te k'olc'a til Pablo.

² Tejzen cyponxin, bix e tzaj k'it Pablo twitz cawel gobernador. Cykiltzen otk bint tten, bix ak' Tertulo te k'olc'a til Pablo. Tzi tzunxin te gobernador Felix:

—Taat gobernador, chjonte tey keya ejoo'ya judío tzinxsen kna'nke ttzyal bix jtbanela, bix xsun xobl keya yasbil keya xmucchabl keya ma tz'ajtz lk'eete. Cykil tzunja ma bint tu'n t-xjalela. ³ Nukxsen jaq'uey Felix, jaa'xja ti'j ktzki'nke ma bintke tten kchunk'lala tu'na, bix

nimke chjonte tzin kk'o'na ti'j. ⁴ Pero nuksama, ncy'i tz'el wii'n nim ttyema. Nuk waj txi' nkanena te t-xjalela tu'n ttzaj tk'o'na tanema jun rato te ebilecte kajbela. ⁵ Jatzen kajbela ja lu. Ja tzunj xin xjal lu Pablo, junxsen ilbelalke kxola. Nuk coc'c'a nx-ajte cyxol xjal judío tuj cykil twitz tx'otx' te itz'jسالwe k'oj cyuya tyol. N-ocx tk'on tiib tuj keya tajbelel kxola. Mintii' te toclen ti'j. Bix at jun cloj xjal Nazareno cybi nchi oc k'ojl ti' cycostumbre xjal judío, bix ja tzunj xin Pablo nintzajxin cyxolj xjala. ⁶ Bix juntl. Taj tzaj tii'n xjal yaa'n judío keya tuj xjan tja Kdiosa. Keya te ke, junxsen maj ka'. Ju' tzunj e tzyeta ku'na tu'n tcub tuj castiwa tisen tzin tkba'n cyley judío. ⁷ Pero bix e pon jxin comandante, Lisias, te k'olecx tiib cyuya soldado te k'ilbetz texin. ⁸ Bixsen e tkba keya la' alj at tk'oj ti' Pablo, tu'ntzen ktzaja twitza, tu'ntzen jaq'uey tz'oc ebinte. Kanextlpey tewa. Sictzen ba'n tel tni'ya ti'j ka jaxj nxi' kkba'na tey—tzi Tertulo, jxin licenciado, tej xin gobernador Felix.

⁹ Jaan tzunj cabtlxin judío tcub, oc k'onte tipemal tyol Tertulo ka cykilj otk tkba'nxin jax. ¹⁰ Entonces bix oc tch'iquen gobernador ja Pablo tu'n tco'pante tiibxin, bix e yolen Pablo cyjulu:

—Taat gobernador, we ntzki'nwe nimxsen jnabk'i tak'lena cawel kibaja ejoo'ya judío. Bix ya tzki'nntla ti tten tu'n toc tbi'na kajbela. Ju' tzunj k'ukbaj c'u'lxix ma chin ak' co'pl wiib twitza.

¹¹ Nukxix cablajaj k'ij wexlen tuj ja tnóm lu tu'n npon tuj Jerusalén te na'l Dios. Ba'ntzen tel naj tey tni'ya ti'j maa'tkxix nchin pon. ¹² Tuj tzunj cab k'ija, mintii'wa ma cub nbinchen, mitetpe tuj nin tja Dios, bix mitetpe cyuj camon jaa' te xnak'tzabl tyol Dios, mitetpe jaa' tumel tuj tnóm, min jaa' x'in jawa cnetwe tzint nchin k'ojl, matitet tka'yel ncub nbinchen. ¹³ Ju' tzunj, mlay bint tcub cyk'o'n jxjal lu ti' wil cye. ¹⁴ Pero atzen jun yol jaxxix, bix ba'ntzen nk'onte wiib ti'j. Ti'j cloj aj Nazareno, min, yaa'n in tincwe cyuya. Pero tej cloj Tbe Jesús tbi, jatztzen in tinca weya. Jatzenwe be jlepch ken ti'j. Yal tzun kej xjal lu, tuj cywitz nuk ten, pero jaxxix. Jatzenwe bej npon tuya Dios, jax Dios cye xjal ootxa, cuma junx maj ba'n cyten ti'j ley cye judío. Cykil ke yec'l tbe Dios nejl e cyaj tz'ibente at-xe tyem. ¹⁵ Kej xjal ete'c twitza n-oc ke cyc'u'j ti' Dios, bix jax ju'x weya. Ntzki'nxiixwe ti tten, bix jax ju'x cyewe cytzki'nxiixwe ti tten, ka ko jawel itz'j cykil ko' o'j kcyim, junelne ejee' loj n-oc ebinte tyol Dios, cyuyaxj min tz'oc cybi'n. ¹⁶ Ju' tzunj nxa' nbisenwe ti'j ti tten tu'n tten jun ba'n nchun'k'lal twitz Dios bix cywitz xjal, tu'ntzen ba'n nna'nte cykil ncub bint wu'n. ¹⁷ Bix tejtzen tel nim cab jnabk'i tuj juntl wik tnóm, cwa npon tuj ntanem te onlcye mebe tuya pwak, bix te k'olxte jun cotz te Dios. ¹⁸ Tu'n tzunj ju'wa, otk chin ocxawe tuj nin tja Dios mintii'wa ttzi wi'j. Otk baj ntjxo'n ch'inwe wiib tisenx cye judío cycostumbre, bix otktzen chin ocxwe. In tincxsen tej tzyet. Pero mintii'wa tka'yel ncub bint wu'n, bix mintii'wa k'oj e jaw wii'n cyxol xjal, cuma nuk cabwe xjal tcub wuya. Pero tuj xsunj ju'wa, tocpán cab judío te Asia te nic'jaw yol wi'j. ¹⁹ Tzitzenke ka otk tz'ocx wii'n xjal griego wuya tuj tja Dios. Pero yaa'n ju' tewa. Pero min-al kej xjal tzalu ja'lewe, amale ejee'tlcye xjal ba'n cyul tzalu tu'n tiwa wil cye, ka at cyaj we. ²⁰ Pero min-alké ma chi ul. Entonces yal tzun kej ma chi ula, e cykbantetzen ti jilel wil ma cub nbincha'n bix ti jilel wil ma cykba cywitz nintzaj cyconsejo judío. ²¹ Bix e jaw nši'n jun yol tu'n tjaw itz'j jun cyyol cyxol. Ju'tzen cyjulu: "Key taat ocsal, tej cyey cyk'oj wi'j, ja tej ka tuj nwitzá ch'i jawetz itz'j cykil cyimne juntl maj," ntzi tzuna. Ju'tzen toc wu'na tjaw nši'na tej wa'lc'a kena cyxol. Vaya tzunj, ju'wa ba'ntzen toc cyniq'uena wi'j, cuma ju' toc wu'na. Pero te ja lu, mintii' mas ba'n toc cyniq'uén jxjal lu wi'j—tzitzen Pablo twitz gobernador.

²² Pero tejtzen toc cybi'nxin tyol Pablo tco'pbil tiib, taj Felix e cyaj tk'o'n stis texa juntl k'ij. Tzki'nxin ka at nim ocslal, bix ti tten cyocslabl. Entonces tzi tzunxin cyjulu:

—Cnyo' ojxe tul comandante Lisias tzalu. Tzul tkba'nxin we mas, bixsen cxe'l ncyey'en ti cnbinche—tzitzen gobernador.

²³ Entonces bix e xi' tkba'n Felix tej xin capitán tu'n tocx tenx Pablo tuj tzee', bix jax tu'n x' ttzakpet-xin bix tu'n t-xi' tkanenxin ti tten oj tocslan jun xjal ti' Jesús. ²⁵ Entonces bix ak'kexin yolel. Bix e yolen Pablo ti'j oj tcub tena jiquen twitz Dios, ti tten tu'n tcub ttzyun tiiba twitz tka'yel, bix ti'j k'ij tzul oj t-xi' tcyey'en Dios cykil twitz tx'otx' tu'n t-xi' tcyey'enxin ka ba'n bix ka ka' otk cub tbinchan jun xjal. Tejtzen toc tbi'n Felix ju'wa, bix e tzaj ttzi ti'jxin, bix e xi' tkba'nxin te Pablo:

—Jaxle ba'n tu'n taj meltz'aj tey ja'lewe. Ojtzen ttzaj amle'n wi'j, ba'ntzen ttzaj ntco'na juntl maj tu'n toc nbi'n tyola—tzi Felix te Pablo.

²⁶ Bix e xi' tbsien Felix ti'j ka tu'n tocx tk'o'n Pablo pwak tcoztzin tu'n ttzakpet-xin. Ju' tzunj e cwa' ttzyu'nxin Pablo. Min e tzakpixin. Attzen maj e txocxin Pablo te yolel tuyaxin.

²⁷ Pero mintii' e baj, bix ex ca'ba jnabk'i ju'wa. Cwaxsen tocx t-xel Felix jxin Porcio Festo te gobernador, pero ju'x jxin Festo minx e tzakpixin Pablo, cuma e tajbexin tu'n tocxin cyeca cyuya xjal judío. Ju' tzunj e cyja' tk'o'nxin Pablo tuj tzee'.

25

Tej t-xi' tkanen Pablo tu'n t-xi' k'i'n twitz César

¹ Oxteltzen k'ij tocxlén jxin ac'aj gobernador Festo, etzxin tuj Cesarea te k'olbel Jerusalén. ² Tej tzen tpon Festo, ejee' tzen nintzaj pala bixsen ke mas nintzaj cawel cyxol xjal judío bix e baj ponkexin twitz Festo, bix ocx cykanbilxin juntl maj ti' Pablo. Cyiwaxsen cykanbilxin ocx ti' Pablo. ³ Bix e xi' cykanenxin te gobernador tu'n t-xi' tkba'nxin tuj Cesarea tu'ntzen t-xi' smet Pablo tuj Jerusalén. Pero at e cyajbexin. Cyajxin e cub cybyo'nxin tuj ewbil tuj be. ⁴ Pero bix aj tzak'be'n Festo:

—Mlay, cuma ma chin aj najwe tuj Cesarea. Mintii' amle'n wi'j tu'n ncyaj te stisel. Mlay. Ma cyajte Pablo tuj tzee' tuj Cesarea. ⁵ Pero at juntl ba'n tbint. Yajtzen xe'x cyey ejee'y cawel wuya tuj Cesarea. Vayatzen, jatzewe nuk ka at jun til jxjala o cub bint, ba'ntzen cykanena —tztizen Festo cye xjal judío.

⁶ Bix e cyaj Festo Jerusalén juntl wajxak k'ij ma lajaj k'ij. Tej tzen tpon baj tajlal k'ij ju'wa, bix aj meltz'ajxin tuj Cesarea tuya cabxin cawel cyxol judío. Tetzen juntl k'ij cypomlenxin, bix ocx Festo tuj tk'a'j gobernador tuj jaa' jaa' npja' ninc'u'n, bix e xi' tsm'a'nxin ik'bilte Pablo. ⁷ Tej tzen tpon jlet Pablo twitzxin, bix oc cysut'en cyiib judío te Jerusalén ti' Pablo, bix ak'ke xjal k'olc'a nim tilxin. Pero mix e tk'a' tumel tilxin. ⁸ Cwa t-xi' tkba'n Pablo:

—Key taat, mintii'wa wil o cub bint wu'n, mitetpe ti' cyley xjal judío, mitetpe ti' tcostumbre nin tja Dios, bix mitetpe ti' cyley xjal romano—tzi Pablo tu'n tco'pante tiib.

⁹ Pero jxin Festo e tajbexin tu'n tcyajxin ba'n cyuya judío, bix tu'n mintii' tz'oc tbinchenxin cyi'j. Ju'tzen e xa' tkba'nxin:

—Pablo, ¿ba'mpa tuj twitza tu'n t-xi'y Jerusalén, tu'ntzen tcub nbincia'n stis ti'j ncub cyk'o'n xjala?—tztizen Festo te Pablo.

¹⁰ Pero bix aj tzak'be'n Pablo:

—Twitzxin t-xel tneel nintzaj cawel te Roma in tina. Jatzete tzalu, yaa'n Jerusalén, cwela we wil. Tzki'n tey minxtii' jun we wil o tz'oc nbinchen cyi' xjal judío. ¹¹ Katzen jax at il o cub bint wu'n, bix ka ilxix ti'j tu'n ncyim ti'j, entonces mlay tz'el nxoo'nwe ncyamecy. Lu kenwe lu. Pero ka nuk xtak'bil kej wila, yaa'n ba'n tu'n woc tk'o'na tuj cyk'ab'jxjal cyaj chi cub byonte we. Min-al jun at tajwalel tu'n t-xi' k'onte we ju'wa. Yaltzen ja'lewe, cxe'ltzen nkanen tey tu'n toc tbi'n jxin nintzaj cawel te Roma ti nten—tzi tyol Pablo te gobernador.

¹² Tej tzen toc tbi'nxin ju'wa, bix e xi' tkanen Festo cye ocsal. Yajc'atltzen bix aj tzak'be'nxin te Pablo:

—Ma tkaney tu'n tcub tila tuya mas jawnex cawel. Pon tzuna twitz nintzaj cawel tuj Roma—tzi Festo.

Tej tpon k'i'n Pablo twitz rey Agripa

¹³ Exsen cab k'ij, bix e pon jxin Agripa tuya tanebxin Berenice tbixuj tuj tnom te Cesarea. Ja tzunj xin Agripa jatzen xin jrey cyxol judío. Jatzen nintzaj cawel tibaj Roma bix tibaj cykil twitz tx'otx' otk tz'oc k'onte texin te cawel cyibaj judío. Bixsen e ponxin tuj Cesarea te k'ol jun nintzaj k'olbebl te ac'aj gobernador Festo. ¹⁴ E tentzen Agripa bix Berenice cab k'ij tuya Festo. Atzen jun k'ij bix e xi' tkba'n Festo te Agripa ti tten Pablo. Tztizen Festo cyjulu:

—Kape jac'a tzaj tk'o'na jun ocsal we. At jun pres tzyu'n wu'n, Pablo tbi. Ja gobernador Felix e cyaj k'on texin we. ¹⁵ Tej tzen nx-aj Jerusalén, ejee' tzunj xin mas nintzaj yolel tuya Dios bix ninc'u'n til cyxol xjal judío ul k'inte nim kanbil ti'j xjal Pablo. Bix e cykana we tu'n tcub nk'o'n til tu'n tcub. ¹⁶ Pero bix aj ntzak'be'n ka yaa'n ju' ctemela, bix ka min tcyua tley Roma tu'n tcub jun xjal nyalx. Bix e xi' nkba'n cye il ti'j tu'n tcub cyk'o'n tilxin tujxix chic'aj oj tmaje cywitzxin tuya Pablo, tu'ntzen tco'pante tiibxin. ¹⁷ Ju'tzen tten cyul-len ke kbalte til Pablo tzalu. Tej tzen cyul, min e xi' nk'o'n tyem te, sino bix in cub ke twi' nk'a'j te binchal stis te juntl k'ij, bixsen oc nchmo'nke cykilke nwitz, bix e xi' nchk'o'n ik'bilte Pablo. ¹⁸ Otktzen bint tten, ejee' tzunj xin kanel bix e jaw we'kexin, bix ak'ke tx'olbal cykanbilxin. Pero jcykanbilxin ti' Pablo mintii' elpenina ti'j we otk txi' nbisen ti'j. ¹⁹ Cykanbilxin nuk ti'j yaa'n ba'n cytenxin ti' cyreligion judío. Bix juntl. E yolenke ti' jun xjal Jesús. O cyimxin, tzi ke judío, pero te Pablo tuj twitz, i'tz texin. ²⁰ Ju' tzunj ya mix e binne tele nniy' ti'j stis, jaa'le otk tzaa' jlet. Ju' tzunj e xa' nkba'n te Pablo tu'n taj meltz'aj tuj Jerusalén tu'n tcub tilxin jatzewe. ²¹ Pero min e tcyayxin. Jaxsen Pablo e tzaj kanente we tu'n ja nintzaj cawel te Roma, jax te Augusto, cxe'l cye'yente tilxin. Ju' tzunj e xa' nkba'n tu'n tcyajxin pres tzalu ojxetzen tk'onte tumel tu'n t-xi' nsm'a'n tibaj mar tu'n tpon twitz nintzaj cawel. ¿Ti tey toc tu'n?—tzi Festo te Agripa.

²² Bix aj ttzak'be'n Agripa te Festo:

—Wachexsela ojat toc nbi'n tyol Pablo—tzi Agripa.

Bix e xi' tkba'n Festo:

—Cuna, taat, nchi'jna tz'oc thi'na—tzi Festo.

²³ Entonces tetzen juntl k'ij attzen jun tij sesi6n tuj jun jaa' ma nim. Bix ocxke Agripa tuya Berenice. Ocxkexin tuya nintzaj cyxbalencin te yec'bil ka ma nintzaj xjalckexin, bix cyuya cyk'o'pajxin. Bix opan ke nintzaj cyawel soldado, bix ke nintzaj xjal tjom. Tejzen toc cychmon cyiibxin, bix e xi' tsma'n gobernador Festo ik'bilte Pablo. ²⁴ Tejzen tpon Pablo tunwen, bixsen ak' Festo yolel cyjulu:

—Nintzaj cawel Agripa, bix cykilkey ete' tzalu, ch'in cybi'tza, nuksamkey. Lu tzunj jun xjal lu n-oc cyce'yena. Nim xjal judio o tzul k'inte kanbil nwitz ti'j. O tz'oc cychmon cyiib nwitz tzalu tuj Cesarea, bix tuj Jerusal6n. Nuk coc'c'a tzin cyajbe'n tu'n tcub nbo'6n. ²⁵ Pero weya tuj nwitz, mintii'te til tu'n tbyet. Pero, cuma jax o kanente tu'n t-xi' twitz Augusto ti ctemela stis ti' til, matzen ncuyan wej ju'wa. Cxe'l nch'k'o'nwe Roma. ²⁶ Pero at ch'inee' tka'yel. ¿Titzen tten oj t-xi' nsma'n jun pres mintii' til twitz nintzaj cawel? Pero bix mintii' ba'n t-xi' ntz'i'ben te. Ju' tzunj waj txi' nkanen cyocsabla. Ma tzaj wii'n jxjal lu cywitza, bix twitzxixa, cawel Agripa, tu'ntzen toc cybi'na, tu'ntzen ttzaj cykba'na we ti tten til cwel nk'o'n twitz nintzaj cawel te Roma, ²⁷ cuma tuj nwitz jun na'c xjal kena oj t-xi' nsma'n twitz cawel bix mintii' til cxe'l kbet—ju'tzen tten tyolen Festo twitz Agripa bix cywitz xjal otk tz'oc cychmon cyiib.

26

Tej tyole Pablo tu'n tco'pan tiib twitz rey Agripa

¹ Entonces bix e pon hora tu'n tyolen Agripa, bix e xi' tkba'n Agripa te Pablo cyjulu:

—Yaltzen tey, ba'ntzen tyolena tu'n tco'pana tiiba—tzi Agripa.

Entonces bix e xi' tnu'kpi'n Pablo tk'ab tisenx ttenxin te jun techlal tu'n tyolencin, bix ak'xin yolel tco'pbiil tiibxin:

² —Taat Agripa, nchin tzalajxsen ma tzul canana tu'n nclonte wiib twitza ti'j cykanbil tzin cykba'n xjal judio wi'ja. ³ Ja tey jun xjal itzkilte ti tten cycostumbre xjal judio, bix xsunj n-etza itz'j kk'o'ja. Ju' tzunj cxe'l nkanen xtalbil tey tu'n ntzaj tbi'n ch'ina tuya nim tc'u'ja wi'ja.

Eyolen Pablo ti'j ti tten tchunk'lal nej tej mitkna'x toclan

⁴ Ke cye judio cytzki'ncey jwe tbanel nchunk'lal cyxol tuj ntx'otx' bix tuj Jerusal6n jatxix ntzajlen cwal. ⁵ Bix cytzki'n bix ba'n cyoc tstiwa wi'j, tej woc weya ma xjal, bix oc nk'o'n weya wiib cyuyaj xjal fariseo. Bix ttzki'n tey kej xjal fariseo cyiwssen ete'cye tuj cycostumbre xjal judio, mas twitz juntl wik judio. ⁶ Pero ja'lewe lu ken in tin tzalu, cuma at cynic'bil judio wi'j. Jaj yaa'n ba'n tuj cywitz, jaj weya tzin nyo'n ka cyitz'jel cyimne juntl maj. Yaa'n o'cx ccyimlenx cyej. Ja tzunja o tkba Dios cye kxjalel ootxa. ⁷ Bixsen cybim ja lu kej judio tej cablajaj cloj el itz'j ti'j cablajajxin tcwal Israel, jxin ootxa kxe'chel. Bix tu'n tzunj nchi ajben te Dios coc'c'a, bix nchi k'on chjonte te Dios, cuma cytzki'n at jun ac'aj chunk'lal te junx maj tzul. Bixsen nintzaj cawel Agripa, ti'j xsunj cyexin tzin cyyo'n bix lepchx ken weya ti'j, n-oca niq'uet wi'ja ka ka' kena. ¿Tixsenle jilel! ⁸ Jatzen tey, cawel Agripa, bixsen ke cyej judio, ¿tikentzen axsen n-ela tuj cywitza ka at tipemal Dios tu'n tjtatz titz'jsa'n ke cyimne?

Tej tyole Pablo ti'j ti tten tk'ojl cyi' ocslal

⁹ Maatktzen n-ocxix weya nc'u'j ti' cycostumbre judio, bixsen e xi' nbisen weya ti'j kej lepch ti'j t-xnak'atz Jesus te Nazaret ka' n-oc cybinchen ti'j ti tijel niman cyu'n judio. Ju' tzunj nimxsen ka' oc nbinchen cyi'j. ¹⁰ Tuj Jerusal6n, jatzen e bint wu'nj. Yaa'n nuk o'cx nk'o'n ke ocslal tuj tzee' tuya wipemal, sino tej cybyet ocslal, nimxsen ba'n el tuj nwitz. ¹¹ Nimxsen castiwa i'ya ke wu'n cyuj camon jaa', bix at maj nim bujbil i'yake wu'n, tu'n tcyaj cyk'o'n Jesús. Nimxsen in oc chi' cyi' ocslal. In jyon cyi'j tuj Jerusal6n bix cyuj cabtl tnom, hasta tujxe juntl wik tx'otx'.

Tej tyole Pablo ti'j juntl maj ti tten tajtz ti' tanem

(Hch 9:1-19; 22:6-16)

¹² Attzen jun k'ij xi'nin ken tuj tnom te Damasco te tzyulcye ocslal. Otk tz'oc cyk'o'n ke cyawel cyyolel xjal twitz Dios wajwalel. ¹³ Nintzaj cawel Agripa, cxe'l nkba'n tey ti e baj we tuj be. Te chil k'ij at jun tken luz e tzaj tuj cya'j. Tzinxsen ntxaken, mas ntxaken twitz tken k'ij. Bix e cub txakpaj ntxlaj, cyuya kej xjal wuya. ¹⁴ Cykilca ko'ya e cub tz'ak twitz tx'otx' junx maj. Bix e nbi jun xjal. Jxjal e tzaj yolen tuj nyol hebreo, bix e tzaj tkba'n we: "Saulo, Saulo, ¿tiken nim nbaj tyajla'na ke nxjal? Jtey ncub tbincha'na, mintii' c'ajbela. Nuk

ti'j xtey n-oca tbincha'na ka,' tzi tzunj xjal ttzaj yolén tuj cya'j. ¹⁵ Bix aj ntzak'be'n: "Taat, ¿altzencye tey?" ntzi tzuna. Bix ajtz ttzak'be'n jxjal: "Inayen wej Jesús, jax xjal tey nbaj tyajla'n," tzi tzunxin weya. ¹⁶ Bix at nim e tzaj tkba'nxin weya ju'wa: "We' watzen. Ma chin cub jlet twitza, cuma c'ajbela we. Ja tey c'ajbel te nxel te kbalte ti jilel ma tz'oc tcyeyena juntl maj. ¹⁷ Cxe'l nsma'na cyuya xjal judío, bix tuyaxe cyej xjal yaa'n judío, bix cnc'ojla'y twitz cykil xjal tu'n mi'n cub byeta. ¹⁸ Ma txi' nsma'na, cuma ncy'i tu'n toc cybi'n xjal ke cybibl yaa'n jax. Waj cyaj cyk'o'n jcybe tuj klolj, tu'n cyocx tuj tbe Dios. Ka ma chi oc lpe wi'j, cwel nnajsa'n cyil, bix chi oquel te nxjal, tu'n tel cypa'n cyiib ti'j ka', bix tu'n toc ke cye'w'j wi'j," ju'tzen tten tyol Jesús we.

Tej t-xi' t'niman Pablo alcyej e tzaj tkba'n Dios te

¹⁹ Cawel Agripa, mlay tz'el nxoo'n weya kej yol el jlet nwitzá tuj cya'j. Ma bint we wu'n. ²⁰ E tzaj ntzyu'n siy'puplxsen tej tyol Jesús tuj Damasco, bix mas yaj tuj Jerusalén, bix tuj cykil twitz ttx'otx' Judea, bix te cykil kej xjal yaa'n judío. Jatzen weya nyolj, tu'n cymeltz'aj tuj cyil, tu'n cymeltz'aj tuya Dios, bix tu'n cycub ten jiquen tuj cychunk'lal. ²¹ Tu'n tzunj tkbaj tej yol lu, atzen cab xjal judío e jaw tzyunte we tuj nin tja Dios, bix e cyajbe tu'n ncub. ²² Pero Dios e clonte we, bix hasta ja'lewe lux ken ini'tz. Nuk nchin yolénx'ti' tyol Jesús jak'ch ta' xjal, cye nintzaj xjal, bix kej yaa'n nintzaj xjal. Nxi' nkba'n ti jilel e cykba ke tyeec'l the Dios nejl, bix ti jilel e tk'ume Moisés tu'n t'bj. ²³ Tzi tzunkexin nejl ka tu'n tul jxin Scy'o'n tu'n Dios, bix tu'n tcyimxin, bix mas yaj tu'n t'jaw itz'jxin juntl maj tuj tcyamecy. Ja Jesús tneel xjal ajtz meltz'aj tuj tcyamecy te tu'n tocx tuj chunk'lal te junx maj. Ju' tzunj, at tajwalel te kbalte ka tu'nxin chi co'pjela xjal, judío, bix yaa'nle judío—tzi Pablo te Rey Agripa.

Tej t-xi' tkba'n Pablo te Rey Agripa tu'n tocslan ti' Cristo

²⁴ Jooc'tzen nyolénx Pablo, bix e jaw §-in Festo:

—Pablo, jma jaw tey tuj twi'! Tu'n nim xnak'tzan tu'na yaa'n tz'akl twi'y—tzi Festo.

²⁵ Pero bix e xi' tkba'n Pablo:

—Taat Festo, yaa'n ma jaw tuj nwi', sino tej we nxi' nkba'na jatzen jaxxixja. ²⁶ Lu jxin cawel Agripa lu. Kanenxna texin. Ttzki'n texin kej we nyola jaxte. Ju' tzunj, k'u'kl nc'u'j nchin yolén twitzxin. We tu'n nwitz, ttzki'n texin cykilj we ma txi' nyolen jax nyol, cuma mintii'te te Jesús o cub tbincha'n tuj ewjel—tzi Pablo.

Entonces bix e xi' t'kanenxin te Agripa:

²⁷ —Rey Agripa, ¿tzimpa n-oc tbi'n tey cyyol tyolel Dios, kej yol e cyaj cytz'i'benxin nejl ti'j tu'n t'jaw itz'j Jesús tu'n tcyamecy? Weya tuj nwitz, ba'n tu'na ka jax cyu'n—tzi Pablo.

²⁸ Bix aj tkba'n Agripa te Pablo:

—Tuyaj cab yol lu q'uelela tuj twitza c'oquel nbi'na, bix chin oquel te ocslal, pero yaa'n ju' tewa—tzi Agripa.

²⁹ Bix aj ttzak'be'n Pablo:

—Tuyale cab yol ma tuya nim yol, wajwe yaa'n nuk jac'a tey, sino cykilca key chi ponte tisenj weya, amale yaa'nt tuya cadena tisenj weya—tzi Pablo.

³⁰ Tejzen t-xi'len tkba'n Pablo ju'wa, ja tzunj xin rey jxin gobernador, bix Berenice, bix cykilcatlkexin e jaw we'. ³¹ Bix e cub cypa'n cyiibxin, bix ak'kexin yolel cyil cyiibxin. Bix e xi' cyyolénxin:

—Jaxte tej xjal lu minxtii'te ka' ma cub tbinchen. Mintii' tu'n tcub byette, bix mitetpe tu'n tocx tuj tze'e—tzi tzunkexin.

³² Juntl, bix e xi' tkba'n Agripa te Festo:

—Ja weya cxe'l nkba'n jnuket min o tkane jxjal lu tu'n t-xi' twitz nintzaj cawel te Roma tu'nj t'jyet til, oxetle t-xi' tzakpet—tzi Agripa.

27

Tej t-xi' cyk'et Pablo maa tuj Roma

¹ Entonces bix e xi' cysma'n cawel ja Pablo tuj barc tuj nakch tx'otx' te Italia, tu'n tponxin twitz nintzaj rey te Roma. Tu'n ja lu, e xi' k'o'n Pablo te junxin ch'in cycawel soldado Julio t'bxin. Jxin Julio bixsen ke soldado ete'c'cxin t'jak' tc'ojlabatz nintzaj rey tuj Roma. Inayen weya Lucas bixsen cab pres, bix e xi' k'klun kiiba tuya Pablo tuj kbeya t'bjaj mar. ² Jaan junxin xjal Aristarco t'bi e xi' kuyena, tej tnóm te Tesalónica tuj ttx'otx' Asia. Tejzen t'bjint k'tena, cykilcatzen ko'ya ocx tuj jun barc otk tzaj tuj tnóm te Adramitio. Otk'tzen tzul tzalu tuj Cesarea. Ya nukxixsen tu'n tex barc tu'n t-xi' cyuj tnóm mlaj tx'otx' te Asia. Cwa ttzyet kbeya.

³ Tetzen juntl k'ij bix e pon ko'ya tuj tnóm te Sidón, jaa' ttzki'na Pablo nim tuya. Jat'tzen tzalu e tyeec'a capitán Julio tanem ti' Pablo, bix e tak'xin tumel te Pablo tu'n t-xi'xin k'olbelcye tuyaxin, bix tu'n toc onet-xin. ⁴ Ti'jx'itl tzunja bix etz ko'ya tuj Sidón, jiquen tuj mar. Pero bix e jaw itz'j jun cyk'ik te t'zpetsalc'a the barc. Mixsen e betet, bix e ch'ixpet

kbeya, bix e xi' ko'ya jawne tibaj tx'otx' tuj mar Chipre tbi. Ja tzunj tx'otx' Chipre e clonte ch'in keya te cyk'i'k. ⁵ Ju'tzen tten kexa tuj mar ttxa'n mlaj tx'otx' te Cilicia, te Panfilia, bix te Licia. Cwa kpona tuj tnom te Mira tuj ttx'otx' Licia, jun tnom jaa' nchi pona we' barc. ⁶ Jatzzen etza ko'ya tuj barc. Ja tzunj xin cycawel soldado Julio e xi' jyonte juntl barc xi'nin jiquen Italia, bix e cnet jun barc tu'nxin otk tzaj tuj Alejandría ttx'otx' Egipto. Bix ocx tk'o'n Julio ejoo'ya tuj, bix e tzyet kbeya.

⁷ Nimxsen k'ij e bet ko'ya tibaj mar, pero chebexsen, cuma nimx cyk'i'k. Cwaxsen, tuya nim ak'untl, kpona tuj tnom te Gnido tuj ttx'otx' Asia. Pero tu'nx kbeta mas tuj cyk'i'k, mix e binte. Entonces bix e cub kch'ixbe'na kbeya, bix e xi' ko'ya tuj Creta, jun tx'otx' tuj mar. Bix e pon ko'ya tuj jun lugar Salmón tbi, ja lugar mas ocne ti'j ttx'otx' Creta, bix ex ko'ya ttxlaj te iy'na ti'j ja tx'otx'a. Jatzzen e cleta ko'ya te cyk'i'ka. ⁸ Chebexsen ex ko'ya ttxa'n mlaj tx'otx' te Creta, pero chebex e pon ko'ya tuj jun lugar Buenos Puertos tbi, jaa' nchi pona we' barc te ajlal nka ttxa'n tx'otx'. Bix nka ta' tnom te Lasea.

⁹ Otkxsen tz'el k'ij, bix otkxsen ko yajta. Bix nimxsen tu'n kpon canana Italia, pero ya ch'itk tul canan ttxa'n jbael bix che'w bix cyk'i'k, jun tyem tujxsen il cye barc tuj mar. Ju' tzunj e xa' tkba'n Pablo cab tyol te ocsabl cye xjal. ¹⁰ Tzi tzunxin cyjulu:

—Key taat, nxi' nbsen ti'j tu'n min ko bet mas tuj ja tyem luwe. Ka max ko bet, ch'innch'e oj t-xi' kxoo'n cykil iktz, bix tuyax barc, bix yaa'n nuk jac'a barc, sino kuyaxle ko cymel—tzi Pablo.

¹¹ Pero jxin taaw barc bix xsunj xin k'ilte barc e xi' cybisenxin ti'j ka mas ba'n oj t-xi' cyiin cyiibxin, bix cwax tcub ti'j capitán Julio tu'n tyol taaw barc twitzj te Pablo tyol. ¹² Tuyaxa tnmal xjal tuj barc e cyajbe tu'n cyetz, bix e cyajbe tu'n cypon canan amale nuket tuj tnom te Fenice, jatzzen ncyja' te ttxlaj tx'otx' te Creta te elne. Ja tzunj tnom Fenice e k'onte mas colbilte cyk'i'k te jbael twitz tcolbil cyk'i'k e tak' Buenos Puertos. Jatzzen Fenice jcyk'i'k te ocne bix te jawne minx e xcyebe cyi' barc.

Tej ttzaj nim cyk'i'k tibaj mar

¹³ Entonces cwaxsen tcub tu'n kpona tuj tnom te Fenice. Bix e tzaj jlet jun cyk'i'k te iy'na chebe, ba'nte te tuj be tu'n kpona tuj Fenice, bix ex ko'ya. Bix e bet ko'ya ttxa'nele mlaj ttx'otx' Creta. ¹⁴ Ba'nte tzyet kbeya, pero tujxsen kbeya e cwa' tch'ixbe'nte cyk'i'k te te jawne bix te ocne, bix e cub tuj a'. Bix cyiwxsen jun tij cyk'i'k, bix cyiwxsen tak'pan ti' barc. ¹⁵ Mix e kpaya tu'n kpona tuj Fenice tu'n cyk'i'k. Entonces bix e xi' ktzakpi'na barc tu'n t-xi' tii'n cyk'i'k. Nuktzen ju' e xi' ko'ya tuj jaa' xa'nina cyk'i'k. Mintii' oc bint ku'na. ¹⁶ Ju'tzen tten kpona tuj juntl tx'otx', Claudia tbi, jun nee' nu'x tx'otx' tuj mar. Ja tzunj tx'otx' lu e k'onte ch'in colbil keya te cyk'i'k. E tak' tumel tu'n t'jatz kii'na juntl choc tocx ku'na tuj nim barc. Otk tzaj kkitena juntl choc tu'ntzen sewur ko'ya. Pero cyiwxsen tu'n tjaw jnu'x choc ku'na. ¹⁷ Tjaxlenixitl tzunj ch'in choc ku'na tuj barc, bixsen ak' ke xjal xpolacte barc tuya akwil tu'n cyiw tten bix tu'n mi'n tz'el pax. Bix e cu'tz cyii'n xjal ke'j tij mmak pin xbalen tjawsen tibaj barc tu'n t-xi' tlomo'n cyk'i'k barc. E cu'tzke tu'n mi'n txi' tii'n cyk'i'k barc maan ttxa'n mlaj tx'otx' te Africa, jaa' ch'in t-xee' mar, bix jaa' tu'n t-xi' barc tuj il tuj arena. Pero ya mintzenti'itl ke'j tij xbalen ete'wa, ya mixbentzen t-xi' tlomo'n cyk'i'k barc ttxa'n Africa. Pero ya mintii' ttxolen barc tej t'bet tibaj mar. Nuktzen cyk'i'k e kbante.

¹⁸ Pero xjtij nin cyk'i'k minxa jun e we'. Tetzen juntl k'ij bix ak' ko'ya xolbax cykil iktz tuj mar, tu'n mas sasz barc tibaj mar. ¹⁹ Pero nuk ttzix tu'n a' njaw punntz'aj. Tetzen juntl k'ij il ti'j ex kxoo'na tuj mar niy' jte barc najben te. ²⁰ Pero xjtij cyk'i'k tzinx ti'j nipan. Jacax juun k'ij mintii' e kila, mitetpe ke che'w, bix mitetpe k'ij. Bix ak' ko'ya bisle ka ke'j tu'n mintii' tu'n kitz'jela tu'n'j tij cyk'i'k, bix tu'n kcu'x cyima tuj mar. ²¹ Bix ex nim k'ij ku'na. Minx e waa'n ko'ya. Axsen tak' weyay, bix tzi. Bixsen e xi' Pablo yolel cyuya xjal. Tzi tzunxin cyjulu:

—Key taat, lastim ko' min oc cyc'u'ja ti'j nyol e xi' nyolen tuj Creta. Bixet in oc cybi'na, mintle ma txi' kxoo'n iktz bix kwa, bix mintle ma kil ja il lu. ²² Pero at juntl wocsabl cxe'l nkba'n cyey. Tej barc lu cwel xitj. Pero mi'n baj cyc'u'ja, cuma min-al jun cyey cymel. ²³ Cytzki'n cyey ka ocslal ken weya ti' Dios, bix nchin ak'anana te texin. Te koniyan jatxe may' sul tsm'a'n Dios jun tsjanel tuj cya'j wuya. Sul jlet-xin nwitz. ²⁴ Bixsen s-aj tkba'nxin we: “Pablo, mi'n tzaj tzi ti'ja. Mi'n tcuya Dios tu'n tcub cyima. Taj Dios pona twez nintzaj cawel te Roma. Bix juntl, Dioste cc'ojlalte cyej xjal tuj barc. Min-alte ccymel,” ju'tzen tten sul tsm'a'n Dios we tuj cya'j. ²⁵ Ju' tzunj, chi tzalaja, taat, bix c'olkey, cuma k'uklewe nc'u'j ti' tyol Dios, bix we tuj nwitz ju' qu'elelate tisenc'axj ma tzaj tkba'n Dios we. ²⁶ Pero jaxte c'oguel moc'chte barc ti' jun tx'otx', bix cwel xitj—tzi Pablo te cykil xjal tuj barc.

²⁷ Ca'ba smant e cub we' cyk'i'k kibaja. Min e we'. Jatzzen eto'ya tuj mar Adriático. Te tzunj koniyan te tcyajlajan k'ij, tel cyniy' ak'anal ti' barc ka ch'itk kpon canana ti' jun tx'otx'. ²⁸ Entonces bix e cu'x cyechenxin t-xee' mar. At-x wink'an tuya waklajaj metro t-xee'. Yaj ch'intl bix e cu'x cyechenxin juntl maj. Ya nuk winak wuuktl metro. ²⁹ Bix e cub tzi cyi'jxin

ka tu'n toc moc'ch barc ti' xak twitz tx'otx'. Ju' tzunj e cu'xa cyk'o'nxin cyaja tij al xcbil tuj mar tuya ke tij cyiw akwil, tu'ntzen cycupan twitz tx'otx', bix tu'ntzen twe' barc. Nimxsen ayonke tu'n ttzaj t-xee' cya'j, bix nim ttzi cyi'j. ³⁰ Attzen cab ak'anal ak' k'ilc'atz tej ch'in choc tuj a' tu'ntzen cyok jtwitz tx'otx' tu'n cycop'j. Pero tu'ntzen tcub cyajala'n jabtl xjal, bix ak'ke k'ilc'atz cabtl tij xcbil tuj ch'in choc, pero nukcten ti cyajaxin. ³¹ Pero bix e xi' tkba'n Pablo tej xin capitán bix cye soldado:

—Key taat, il ti'j kej ak'anal txolen cyexa tuj ch'in choca, jax e cytemaj tzalú. Nuk ka ma chi tzakpaj, chi cymel cykilca cyey—tzi Pablo cye soldado.

³² Entonces bix el cytx'omen soldado kej akwil otk chi oc xpet ti'j ch'in choc, bix ex tz'ak choc junx maj tuj a'.

³³ Tejcten ttzaj t-xee' cya'j, bix e xi' tkba'n Pablo te cykil xjal:

—Key taat, ja'letzen te tcyajlajan k'ija cyiw te cyey, bix mintii' ma txi' cywaa'na. ³⁴ Ba'n txi' nkba'n cyey tu'n t-xi' cywaa'na jch'intl kwa at-x. Il ti'j tu'n at kipen tu'n kiy'x tuj mar tu'n kiy'pan twitz tx'otx'. Mi'n tzaj ttzi cyi'ja. Tzinen cxe'l nkba'n cyey min-alte cymel, bix mitetpe chi oquel isja—tzi Pablo.

³⁵ Tejcten t-xi' tkba'n Pablo ju'wa, tile jilel ch'in e tzaj tii'n Pablo, bix cywittzen cykil xjal e xa' tkanenxin xtalbil te Dios. Bix e cub tpiñenxin jun piñ, bix ak'xin waa'lxte. ³⁶ Tuya tzunj ju'wa, cykil xjal e cywix tc'u'j, bix e waa'nke. ³⁷ Ca'ba syent tuya oxc'al tuya waklaaj xjal tocx tuj barc, bix cykil ke xjal e waa'n. ³⁸ Tejcten otk chi baj waa'nxin, bix ex cyko'nxin cykil triwa tuj mar tu'n toc barc mas sasj.

Tej tcub xitj barc tu'n tipemal a'

³⁹ Tejcten tcub spi'yen, bix e cyilxin twitz tx'otx', pero min el cyniy'xin ti'j. Min cytzki'nxin jaa' ete'xin. Bix e cyilxin at jun ttxa'n mar ocnxin tuj tx'otx'. Jaa' pomina baj ttxa'n mar, at jun tkij' chk'ajal puro arena. Tejcten t-xi' cycye'yenxin, bix e xi' cyniy'be'nxin tu'n t-xi' cyii'nxin barc maa tuj arena. ⁴⁰ Ju' tzunj e cwa cytx'omenxin cykil kej akwil xipbel cyej xcbil, bix e cyaj cycye'yenxin tuj mar. Bix e xi' cytzakpi'nxin jtímón tzalti'j barc, tu'ntzen thint tk'ij jaa' cyajaxin. Bix e jax cyk'o'n xin jun tij xbalen twitz barc tu'n t-xi' tii'n cyk'i'k barc tuj arena. Ju'tzen tten cyak' pomel cananxin tuj arenawa. ⁴¹ Pero at jun lugar jaa' n-oca tmojban tiib ca'ba a' tuj mar. Jun n-ajtz meltz'aj tuj arena, bix juntl n-ajtz tuj mar. Ojcten nchi oc maje, bixsen njaw tz'iy jun lom tjak' twitz mar. Toctzen moc'ch barc ti'j, bix e xi' wit' barc tuj arena. Pero yaltzen tzalti'j barc, n-ocxsen punntz'aj mar. Tu'ntzen tipemal a' bix ak' cwel xitj barc. ⁴² Tejcten toc cycye'yen xjal ju'wa, e cyajbe soldado tu'n tcub cybyo'n ke pres, tu'n mi'n bint cyiy'x tuj a', bix tu'n cytzokpaj twitz tx'otx'. ⁴³ Pero min e tcuya jxin capitán. E tajbexin tu'n tcyaj itz'j Pablo. Bix e xi' tk'o'nxin tumel:

—Cykilj xjal ba'n xjon a' cyxoo'nx cyiiba tuj a', tu'n cyiy'pena twitz tx'otx'. ⁴⁴ Bix cykilca tzun kej mixben chi xjon a', cyii'ntz jun tzlom ma tixja jila jun ba'n tel jlet cyu'na ti' barc, sic ba'n cyiy'pena twitz tx'otx—tziiten capitán cye soldado cye xjal.

Ju'tzen tten tiy'x ku'na, bix cykil ko'ya ba'n kpon baja twitz tx'otx'.

28

Tej tten Pablo tuj tx'otx' tcwental Malta

¹ Cykilca ko'ya u'la ba'n twitz tx'otx'. Bix tej kpona twitz tx'otx', bix el kni'ya ti'j ka jaj tx'otx' Malta tbi. ² Kej xjal najl tuj tx'otx'a oc c'ojlet ko'ya cyu'n, bix axsen jun cynaabl. Bix ak' jbal. Nimxsen tak' che'w, bix e cub cyk'o'n xjal k'ak', bix e xi' t-xquet ko'ya ti' k'ak' tu'n kmek'ta. ³ Jaan Pablo ak' onel te chmol sii', pero tejcten tak'xin k'olecxte tuj k'ak', bix etz junjil lbaj nim tvenenojil, tu'n tcykal k'ak', bix oc ttx'a'njl tk'ab Pablo, bix oc tbalk'i'n tiibjil ti' tk'ab Pablo. ⁴ Tejcten toc cycye'yen xjal te Malta jkil lbaj otk tz'oc tbalk'i'n tiibjil ti' tk'ab Pablo, bix e xi' cyyolenxin cycololaxin:

—Jaxte tej xjal lu jun byol xjalte. Ma tco'pate tiib tu'n mi'n cyim tuj mar, pero jatl tzunj jil lbaja ma tz'oc ttx'a'nte tu'n tchjet til ti'j o tbiy—tziiten ke xjal t-xi' cybisen ti'j.

⁵ Pero nuk o'cx el tsto'n Pablo jajil lbaj tuj k'ak', bix mintii' texin oc ik'en. ⁶ Tu'n tzunj bix el klee' tuj cywitz xjal. Nuktzen e cyyotl xjal tu'n t-xi' mal Pablo tu'n veneno, ma nuk tu'n tcyimxin. Pero yajc'atl toc cycye'yen xjal mintii' otk tz'oc ik'en Pablo. Ju' tzunj, ak'a ke xjal bislx ti'j ka jun dios Pablo.

⁷ Nkatzen ta' jtx'otx' lu ta' ttx'otx' jxin xjal mas nintzaj tuj tx'otx' te Malta. Publio tbixin. Ja tzunj xin Publio oyente ttx'otx'xin keya tu'n kposadayina twitz, bix ba'n e cyja' ko'ya tuyaxin. Oxe k'ij e tak'xin kwaya. ⁸ Yajc'altzen ch'intl bix e kbiya ka yaab jxin tman Publio tu'n cyak bix nim a' tuj tc'u'jxin. Bixsen e xi' Pablo te k'olbel texin. Tbjalen na'nxiltzen Pablo Dios tibajxin, bix e cub tk'o'n Pablo tk'ab tibajxin. Ju'tzen u'la tnaablxin. ⁹ Tejcten thinte, cykil xjal yaab te Malta e xi'ke jaa' ta' Pablo, bix jax u'lcye cynaabl. ¹⁰ Nimxsen otk

tz'oc ten ti' cyanem xjal, bix nim kcotza e tzaj cyu'n xjal. Tejtzen tul canan jk'ij tu'n ttzyet kbeya, bix e tzaj cyk'o'n xjal nim kcotza te tuj kbeya.

Tej tpon Pablo tuj tnom Roma

¹¹ Oxe xjaw e ten ko'ya tuj ttx'otx' Malta. Attzen jun barc otk tzajxe Alejandría. Otktzen pon tuj Malta bix e ten cykil j'bal el tuj Malta. "Kej Yox" tbi barc. Oc tbi ju'wa cyej ca'ba tcwal junxin dios Zius. Tel tzunz oxe xjaw, bix ocx ko'ya tuj barc. ¹² Bix etz ko'ya tuj Malta, bix e pon ko'ya tuj tnom Siracusa tuj tx'otx' te Sicilia. E ten ko'ya oxe k'ij. ¹³ Bix etz ko'ya. E bet ko'ya nka ttxa'n mlaj tx'otx'. Cwaxsen kpona tuj tx'otx' Italia, tuj tnom te Regio. Juntzen k'ij mas yaj bix e tzaj tzyet jun cyk'i'k te cubne, bix e xi' t'lomo'n ejoo'ya jawne. Jey', te juntl k'ij bix e pon ko'ya tuj tnom te Puteoli, nakchxsen ti' Regio. Jatztzen e tzaa' ko'ya tuj barc junx maj, c'ojla'ntzen ke pres cyu'n soldado. ¹⁴ Tuj tzunz tnom te Puteoli oca noj cab ocslal kwitza, bix e t-xquet ko'ya tu'n ktena jun smant. Tel tzunz wuuk k'ij, bix e tzyet kbeya tu'n kpona Roma. ¹⁵ Ke ocslal te Roma ya otk cybi ka eto'ya tuj be tu'n kpona. Entonces bix etzke tuj Roma te clul keya te k'olbel keya tuj be. At cab e pon maan tuj tnom Mercado te Apio, bix at cabtl jax e ponakej tuj tnom te Oxe Posada. Tejtzen toc kc'ulban kiiba cyuya ca'ba cloj ocslala, nimxsen oc nimset tc'u'j Pablo, bix e xi' tk'o'nxin chjonte te Dios. Junxsen kxi'ya tuj nin tnom te Roma.

¹⁶ Tejtzen kpona tuj Roma, bix e xi' tk'o'n Julio, jxin capitán, ke pres cye ke cawel cyibaj ke c'ojlal te cars. Pero te Pablo bix e k'oj tumel texin tu'n ttenxin najal tuj jun jaa' tjunalxin, tuya jun soldado te c'ojlal texin.

Tej tkba'n Pablo tyol Dios tuj tnom Roma

¹⁷ Tetzen oxe k'ij tuj Roma bix e xi' t'sma'n Pablo txocbil cyej xjal nintzaj cyxol judío najl tuj Roma, tu'n cytzaj chmet, bix e xi' tkba'nxin cyjulu:

—Key te ntanem, mintii' junwe wil ma cub nbinchen ti' ktanem judío, mitetpe ti' cycostumbre ke ootxa xjal. Pero tzunz lu, ke xjal judío tuj Jerusalén e jaw tzyunte we tisenca jun ka' xjal ken, bix e n-oc k'o'n tuj cyk'ab cawel te Roma. ¹⁸ Entonces bixsen e cyjoy aj Roma wila, pero mintii' wil e cnet cyu'n. Ju' tzunz, mintzen in cuba, bix jax min in tzakpeta. ¹⁹ Pero mi tu'nju'w'wa minx e cycuya ke judío. Min el ba'n tuj cywitz. Ju' tzunz, e nkana najsbil tu'n ja nintzaj cawel te Roma toclel ebinte nyol, tu'ntzen ka at bix ka mintii' wil. Ju' tzunz, ma chin ul tzalu, amale mintii'wa na'n wu'n cyi' nxjal. ²⁰ Ma chi tzaj ntco'na tzalu tu'n toc cybi'na ti nten cyej, tu'ntzen tel cyni'ya ti'j ti waj cywitz'na tzalu. Lu ken nchin n-oc cycye'yena xpon tuya cadena tisen jun pres. Bix niy'x wu'na ja lu nuk ti'j nyol ti'j Scy'o'n tu'n Dios o tzulte cyuya xjal te Israel—t'zitzen Pablo cye nintzaj xjal judío najl tuj Roma.

²¹ Bix aj cytzak'be'nxin:

—Taat, bajx kiik'eke mi nuketpe jun u'j ka' ti'ja cyu'nj xjal judío ete' tuj ttx'otx' Judea. Bix mi nuketpe jun xjal o tzul aj kbal ka' yol ti'ja. Mintii' te yol ka' tey ti'j. ²² Pero jaxte nuk jak'ch nchi yolena cye xjal ka' ti' cyocslabl xjal lepch ti' Jesús, bix ja tey jun xjal ju'wa. Pero kaja kbiya ti tten cyocslabl. Kbantz ch'inke ke—tzi tzunkexin.

²³ Pero tu'ntzen toc cybi'nxin tyol Pablo, bixsen e cub cyk'o'nxin juntl k'ij tu'n toc cychmon cyiibxin tuya Pablo. Tejtzen tpon jk'ij, nimxsen xjal judío e pon tuj jaa' jaa' ta' Pablo. Te tzunz k'ija, te klax hasta texa koniyan, e tx'olba Pablo cyexin ti tten tcawbil Dios tibaj twitz tx'otx', bix e baj ttx'olba'nxin ti elpenina tley Moisés, bix ti elpenina cyyol ke tyolel Dios nejl. Cyi'j tzunz yol otk cyaj ttz'i'ben Moisés bix kej tyolel Dios, e tyee'atzen Pablo ka ti' Jesús otk chi yolena. Ju' tzen tajbe Pablo tu'n tcub cyi'jxin. ²⁴ Cab tzunxin k'olbel oc ebinte tyol Pablo, pero cabtl tzunxin min. ²⁵ Cyxolela xsunxin min e cubkexin tuj tumel, bix nim tyol juun bix cabtl. Cwa cyak' eletztl. Pero te mitkna'x cyetz xjal, bix e xi' tyolen Pablo juntl maj cye xjal. Tzixin cyjulu:

—Tej te Dios tyol, ju' e'late tisenj otk tyola jxin tyolel Dios Isaías. ²⁶ Ju'tzen toc tu'n Dios te Isaías: "Isaías, cutxa bix yolen cyuya xjal te Israel ja nyol lu: 'Pero c'oquel cybi'na, pero mlay tz'el cyni'ya ti'j nyol. Pero c'oquel cycye'yena, pero mlay tz'oc cyc'u'ja ti'j.'" ²⁷ Ja tzunja cxe'l tkba'na cye xjal, Isaías. Kbanx ja lu, cuma cyiwxsen cyanem jxjala, bix ccy'ix tz'oc cybi'n nyol, bix ncub cymutz'ba'n cywytz ti'j jax yol. Min tziy'x tuj cywi', cuma ccy'yi' cybi. Min tzak' cywitz ti'j, cuma ccy'yi' tz'el cyniy' ti'j. Cyiw cyten, cuma ccy'yi' chi meltz'aj tuj cyil tu'n tcub nnajsa'n cyll," tzi Dios te Isaías.

²⁸ Kej xjal judío te ntanem, ke xjal judío tzinexix ma tz'el cyxoo'n tyol Dios. Q'uelelc'atzen cyni'ya ti'j, te Dios ma txi' toyen texin tyolxin te co'pbil cyej xjal yaa'n judío. Min ma cyiik' ke xjal judío tco'pbil Dios, pero ke xjal yaa'n judío ccyiik'el tyol Dios te co'pbil cye—jutzen toc tu'nxin cye xjal judío.

²⁹ Tejtzen t'bjay yolen Pablo ju'wa, bix aj ke judío cyja. Pero cyxoltzen e jaw nim yol cyi'j tyol Pablo.

³⁰ Pablo e najanxin ca'ba jnabk'i tuj Roma. Jaxxin e chjon tej jaa' jaa' e najanaxin, bix e tcuyaxin nuk la' aljxe xjal ul k'olbel texin. ³¹ Mintii' texin il ti'j tu'n ley te Roma tu'n t-xi' tyolenxin tyol Dios cye xjal. Nuk e yolenx texin ti' Jesús, jxin Scy'o'n tu'n Dios. Min-al jun e cub wabante texin ti'j.

Ju'j e xi' ttz'i'ben Pablo cye ocslal tuj Roma

K'olbebl tu'n Pablo cye ocslal tuj Roma

¹ Key ocslal tuj Roma,

Inayena Pablo. Jun t-ak'anal Jesucristo kena. Scy'o'n kena tu'n Cristo te kbalte jba'n tyol Dios. ² Jtyol Dios tzin nkba'na ti'j colbil ke jaxj e cyaj tk'o'n Dios cye kbalte tyol Dios nejl. Tz'i'ben cyu'n tuj tyol Dios jawnex. ³ Jba'n tyol Dios lu nyolen ti'j Tcwal Dios. Oc Tcwal Dios te xjal, bix tej titz'jxin, ocxin te tiy'jil David. Jatzen xjalja Kaaw Jesucristo. ⁴ Pero amale oquet-xin te xjal, pero Tcwal Dios texin. Jatztzen e chic'ajaxen tuya nim tipemal tej tjatz itz'jxin tuj cyamecy juntl maj. ⁵ Ja tzunxin e tzaj k'onte waak'ena te weya tu'n woca te t-xelxin. Nchin k'umena tyol Dios tuj cykilca tnom tu'ntzen t-xi' cyniman xjal Dios tu'nj n-oc ke cyc'u'j ti' Cristo. ⁶ Bix cyxoltzen cykilca tnom cyuyax xsuna ejee'y te Roma. Cyuyaxa o chi oca te t-xjal Jesucristo. ⁷ Tetzen cyey, ejee'y ocslal te tnom Roma, nxa' ntz'i'bena ja wu'ja lu. N-oc cyak'a te Dios. Tu'nxit t-xtalbil Kman Dios bix Kaaw Jesucristo tzaaj cyibaja, bix tzajxit cyk'o'nxin te cyey tu'n cytena tuj tzyal.

Tej tkbante Pablo tu'n tpon k'olbelte cye ocslal ete' tuj Roma

⁸ Tneelxix, cxe'l nkba'na cyey nchin k'ona chjonte te Dios nuk tu'n Jesucristo cyi'ja cykilcakey. Tuj cykilca twitz tx'otx' ma tz'abij cyiw ete'y tuj cyocslabla. ⁹ Tuya cykil nc'u'ja nchin ajbena te Dios tu'nj nchin k'umena jba'n tpochal Tcwalxin. Bix ttzki'n Dios min chin we'ya nkaniya onbil cyey te Dios. ¹⁰ Jaca k'ij nchin kanena texin tu'n ttzaj tk'o'nxin amle'n weya tu'n npona cyxola. Kape ch'ix tpon tumel tu'n tk'ontexin amle'n wi'ja tu'n npona cyuyey. ¹¹ Wajxsen chin pon cyuyey, tu'ntzen tcyaj nkba'na cyey ti ma tkba Dios weya, tu'ntzen ccywixa mas tuj cyocslabla. ¹² Pero yaa'n nuk ejee'y chi cywixela mas tuj cyocslabla, sino jax ju'x weya ctzaal cynimsa'na nc'u'ja oj npona cyxola. Oj toc ncyeyena ka cyiw ete'y tuj cyocslabla ti' Cristo, jatzen cyiwsabl nc'u'ja, tisenxj oj toc ccyey'ena inayena cyiw ntiiniya tuj wocslabla, jax ju'x cyey ccywixel cyc'u'ja. ¹³ Key hermano, waja cybiy ch'ima maj e cub wu'na tu'n npona cyxola maa tuj Roma. Pero hasta ja'lewe mix nchin poniya. E wajbe'ya tu'n npona tu'n nk'umena tyol Dios cyey, tu'ntzen tajben cyey, tisen o bint wu'na cyxol niy'tl ocslal yaa'n judio. ¹⁴ O tzaj tkba'n Dios weya tu'n t-xi' nkba'na te cykilca xjal j-o tzaj tkba'n weya. Il ti'j cxe'l nkba'na cyey xjal griego bix cyey xjal yaa'n griego, bix cyey xjal nmak xjal, bix cyey xjal ajnintzxe. ¹⁵ Ju' tzunj nim nganiya tu'n t-xi' nkba'na ba'n tpochal Cristo te cyey aj Roma, tisen o bint wu'na cye niy'tl xjal.

Jun tipemal tpochal Cristo

¹⁶ Weya mintii' nch'ixewa tu'n t-xi' nkba'na tpochal Cristo, cuma tzin tyeec'an jaja tipemal Dios. Te cyekej tzin cyocsla'n, ejee'tzen chi cletel. Seyle judioke oc cybi'n jtpochal ja yol lu nejl, bix seyle yaa'n aj judioke, pero ja yol lu at tajbel tu'n cyclet. ¹⁷ Najben tpochal Cristo, cuma tzin tkba'n ti tten tu'n cyoc xjal jiquen twitz Dios. O'cx oj toc ke tc'u'j jun xjal ti' Cristo, jiquentzen ta' twitz Dios. Tzin tkba'n tyol Dios cyjulu: "Jiquen ta' jun xjal twitz Dios nuk o'cx tu'nj n-oc ke tc'u'j ti' Dios," tzi tyol Dios.

Cykil ko' at tu'n tcub kcastiwa

¹⁸ Yaltzen cyey xjal min tz'oc cybi'n bix nuk jaj ka' nbint cyu'n, n-el kniy' ti'j ctzaal castiwa tu'n Dios tuj cya'j cyibaj. Tu'nj ka' nbint cyu'n, ya mintl nche'x lpe ti' Dios jaxxix. ¹⁹ Yaa'n tu'nj min tz'el cyniy' ti'j, cuma o txi' tyeec'an Dios cye ti tten. ²⁰ Telnij' ti tten Dios, cuma jatxe tej t'bj t'bincha'nxin twitz tx'otx' jatzen tyeec'antexin nimxsen tipemalxin. Amale yaa'nt chic'ajxin, n-el cyniy' xjal ti' at-xin. Oj n-oc ccyey'en cykilca o bint tu'n inayen, n-el tzen cyniy' ti'j at Dios, bix at tipemalxin te junx maj. Ju' tzunj mlay chi ak'tl xjal oj ttzaj tk'o'nxin cyaastiwa tu'nj el cyiig'uen jaxin. ²¹ Amale ot tz'el cyniy' ti'j at Dios, pero min o jaw cynimsa'n t'bxin. Min o txi' cyk'o'n chjonte texin, sino o cyocsla juntl xnak'tz'bil yaa'n jaxxix ti'j ti tten t'binlen twitz tx'otx'. Tu'nj o che'x lpeke ti'j yol te tzetsalcyce, bi'x o cyaj tzpetke tu'n. ²² O chi kban ka n-el cyniy' ti'j, pero min o tz'el cyniy' ti'j. ²³ Min o jaw cynimsa'n t'bi Jdios mintii' t'bjalel, sino nuk o'cx cye xjal o jaw cynimsa'n cyechel xjal bix cyechel ch'it bix cyechel lbaj bix cyechel mastl alimaj. O jaw cynimsa'n ke xjal kej lu, pero cyimneke. ²⁴ O cyaj cycolen Dios. Nuk ka' o cyajbe tu'n t'bin cyu'n. Ju' tzunj o chi cyaj tcyey'en Dios tu'n x cyxi' lpe ti'j ka' cyajbil. Bix tuj ch'ixbajilxse o chi pone baj tu'nj ka' o bint cyu'n tuya cyxumlal. ²⁵ Min o che'x lpeke ti' tyol Dios jaxxix, sino o che'x lpeke nuk ti'j xtak'bil yol. Min o jaw cynimsa'n xjal t'bi jxin Dios binchal cykilca, sino nuk o'cx cye xjal o jaw cynimsa'n kej t'binchbil Dios. Pero ja Dios tu'n t'nimj te junx maj. Ju'xit tzuna.

²⁶ Cuma nuk ejee'j tbinchbil Dios o jaw cynimsa'n, ju' tzunj o chi cyaj tcyeyen Dios tu'n cyxi' lpe ti'j cyajibil te ch'ixbajil. Tisen tzunkej xuuj, yaa'ntl nuk cye xinak o chi ajbe'nake tisenx tten achbil, sino bix o chi jaw meltz'aj xuuj cyuya xuuj. ²⁷ Jax ju'x ke xinak, o cyaj cyk'o'n cyachbil cyuya xuuj, tu'ntzen cyjaw meltz'aj xinak cyuya xinak tuya nim cyachbil cyi'j. Nimxsen ch'ixbajil oj cyjaw maje xinak cyuya xinak. Cuma o cyaj cyk'o'n Dios, ccyiik'eltzen ccastiwa.

²⁸ Kej o tz'el cyyiq'uen Dios, tuj cywitz yaa'n il ti'j tu'n tel cyniy' ti' Dios. Ju' tzunj o chi cyaj tcyeyen Dios tu'n t-xi' cyii'n cyex cyajibil yaa'n ba'n, tu'ntzen tbint cyu'n cykilca yaa'n tuj tumel. ²⁹ Nuk o'cx jyaa'n ba'n tuj twitz Dios nbint cyu'n. Nuk lepchke ti' cykil ka'. Nuk n-el cye'u'j ti'j cye juuntl. Nuk nchi yasen cyi' xjal. Nuk nchi'l cye'u'j cyi' cabtl. Byol xjalke. Aj k'o'jke. Sbul xjalke. Iic'bel xjalke. Nuk nchi yolen ka' ti' cabtl. ³⁰ Nuk nchi k'umen cypaltel xjal cye cabtl. Iic'bel Dioske. Nchi jaw cyakbil cyoxl xjal. Mintii' onbil cyaj. Nuk nbaj cyniman cyyilb. Nuk nchi ximan ti' jun ka' tu'n tbint cyu'n. Min cybi tcawbil cyman. ³¹ Min tz'el cyniy' ti'j ba'n tuya ka'. Min nbint cyu'n alcyej nxi' cyk'umen. Min tz'oc cyak' ke te cyja cye. Ka at jun k'oj, ccyi' tu'n tbaj tilel. Mintii' tk'ak'bil cye'u'j cyi' cabtl. ³² Tzin tkba'n tyol Dios cykil kej xjal nchi binchan kej ka' lu, ccyiik'eltzen ccastiwa, jaj tu'n ccyim. Amale n-elet cyniy' ti'j chi cymel tu'nj ka' nbint cyu'n, pero min chi we' tu'n tbint mas il cyu'n. Bix yaa'n o'cx nbint il cyu'n, sino nchi jaw tzalaj oj nbint il cyu'n cabtl.

2

Tzul tk'o'n Dios tcastiwa teeylex juun la' alcye xbint tu'n

¹ Ja tzunkej xjal cyxola nchi mlon ti' cybinchbil kej xjal ka' nbint cyu'n, cyuyax mlay cycyl cyyilb twitz Dios. Ka tzin cykba'na aj il kej xjal lu tu'nj ka' nbint cyu'n, cyuyaxa aj ilkej, cuma nbint cyu'na tisenx nbint cyu'n. ² Tzin cykba'na cyjulu: "Ejoo' ktzki'n tk'a' Dios ccastiwa te cykilca kej xjal nbint il cyu'n ju'wa, la' alcye il nbint cyu'n," tzikey. ³ Ka nchi yolena cyi' aj il tu'nj il nbint cyu'n, bix ju'x key nbint il cyu'na, ziti'n cwa' cybisena chi elela libre ti' ccastiwey tul tu'n Dios? ⁴ O tzaj tk'o'n Dios nim xtalbil te cyej. Ch'ima maj o we' tk'o'xin cyi'ja bix o zizy'x tu'nxin cyi'ja. Pero mi'n tkba cye'u'ja ka mi'n tzaj ccastiwey tu'n Dios tu'nj cyila. O tzaj tk'o'nxin kej xtalbil lu tu'ntzen tcyaj cyk'o'na cyila. ⁵ Pero kej cyxola n-el cyxoo'n t-xtalbil Dios, bix min cyaj cyk'o'n cyil, nbaj tchmo'n Dios ccastiwa. Ccyiik'el ccastiwa oj tpon tumel tu'n toc jaca juun xjal tuj xkelbil tu'n Dios, bix c'oquel tcyeyenxin ti'xix tumel. ⁶ Ctzaal tk'o'nxin teeylex juun la' alcye xbint tu'n. ⁷ Ctzaal tk'o'nxin chunk'lal te junx maj cyej xjal nbint jtajibil Dios cyu'n bix n-oc cyipen tu'n cypon tuya Dios bix tu'n cycaman ccyotz bix cychunk'lal mintii' tbajlel. ⁸ Pero ja tzunkej xjal min cyniman ti' taj Dios bix nuk nchi jyon cyex cyajibil bix nuk jaj ka' nbint cyu'n, cyibajtzen c'u'la tk'o'j Dios bix ccastiwa. ⁹ Jaca juun xjal aj il nim q'uixc'aj bix nim bisbajil q'uuyax tu'n tuj tcastiwa. Judiole, bix yaa'nle judio, pero cykil aj il ccyiik'el ccastiwa. ¹⁰ Ja tzunkej xjal ba'n nbint cyu'n, chi pomel jaa' ta' Dios bix chi camal ccyotz bix chi temel tuj ttzyal. Judiole, bix yaa'nle judio, pero cykilca kej nchi binchan ba'n, cycaman ccyotz. ¹¹ Oj toc tcyeyen Dios ke xjal, min-al jun mas jawnex twitz juuntl. ¹² Cykilca kej xjal cyaj tu'n tbint il cyu'n, judiole, yaa'nle judio, pero ccyiik'el ccastiwa tu'n Dios. Kej xjal yaa'n judio min e cybi ti' toc tu'n tley Moisés. Ju' tzunj mi'n tz'oc tcyeyen Dios ejee' la' ka e cynima tley Moisés bix ka min. Pero ctzaal tk'o'n Dios ccastiwa, cuma e Dios ch'hanke il. Yal tzunkej xjal judio, e cyyiik' tley Moisés. Ju' tzunj jtley Moisés c'ajbel te bino oj tmlon ti' cybinchben, tu'ntzen tk'ontexin ccastiwa kej min e cyniman tley Moisés. ¹³ Yaa'n kej judio nuk n-oc cybi'n tley Moisés chi temel jiquen twitz Dios, sino nuk ejee'j nbint cyu'n alcyej tzin tkba'n. ¹⁴ Ja tzunkej xjal yaa'n judio, amale mint cytzki'n tley Moisés, pero tuj cyanem n-el cyniy' ti'j alcyej ba'n bix ti'j alcyej yaa'n ba'n. Ka jaj ba'n nbint cyu'n, tzin cyyeec'an at tley Dios tuj cyanem. ¹⁵ Amale mint cytzki'n tley Moisés, pero ka k'i'n tley Dios cyu'n, nyee'antzen tisenx at tley Moisés tuj cyanem, cuma kej ca'ba ley lu junx ete'. Ka tzin tkba'n cynaabl ka ka' nbint cyu'n bix ka ba'n, ju'tzen ntyee'c'an at tley Moisés tuj cyanem. ¹⁶ Tuj tzunj k'ij oj toc tcyeyen Dios cykilca xjal, tujtzen tcewnt Jesucristo c'aale tk'o'n Dios tu'n toc tcyeyen jcu'n tuj cyanem xjal. Kej e cyniman, cchic'ajaxel jiquenke twitz Dios. Ju' toc tu'n tyol Dios, bix ju'x weya.

Tuj cywitz judio n-el cyniy' ti'j ti' taj Dios

¹⁷ Ejee'tzen key judio, at juun cyey tzin cykba'na nintzaj t-xjal Dioskey. Tzin cykba'na mintii' ccastiwey tk'a' Dios, cuma ejee'y e tjoy Dios tu'n cyyiik'ente cyej tley Moisés. Cuma ejee'y e tjoy Dios te t-xjal, ju' tzunj njaw cyniman cyyiba. ¹⁸ Tuj cywitza n-el cyni'ya ti'j ti' taj Dios tu'n tbint cyu'na. Tuj cywitza k'i'n cyu'na tuj tumel, cuma jaj tley Moisés xnak'tzalte cyej ti' tten tu'n cyela ba'n. ¹⁹ Tuj cywitza n-el cyni'ya ti'j cykilca, bix ju' tzunj te cyej cyaak'ena te xnak'tzalte cyej xjal yaa'n judio. Tisen mo's ete' cywitza. Tuj cywitza tuj kolj ete', bix ejee' tzuna te k'olte spi'yen te cye. ²⁰ Tuj cywitza ja cyaak'enja te kbalte tyol

Dios te cyey xjal min tz'el cyniy' ti'j. Tuj cywitza tisen cwalke, bix ejee' tzuna cymaystra, cuma cyuya tzuna ta' jmera tyol Dios, cuma at tley Moisés cyuyey. ²¹ Tuj cywitza jawnex maystrakey cye cabtl, pero min o cynimey jn-oc cyxnak'tza'na. Tzin cykba'na mi'n tz'alk'an jun xjal, pero ejee'xa nchi alk'ana. ²² Tzin cykba'na mi'n tz'oc ipan jun xjal ti' t-xu'l juntl, pero ejee'xa nchi oc ipana ti' t-xu'l cyuyey. Tzin cykba'na ka' tu'n toc cyniman xjal ke sant. Nuk ja Dios, tzikey, pero ejee'xa min cynimey Dios. ²³ Cuma e tzaj tk'o'n Dios tley Moisés cyey, ju' tzunj njaw cyniman cyiiba, pero min tz'oc cynimena. Ju' tzunj nchi yolen kej xjal yaa'n judío ka' ti' Dios. ²⁴ Cycye'yenx ti toc tu'n tyol Dios ti'j lu. "Kej xjal yaa'n judío, nuk xmucchabl te Dios tzin cykba' tu'n ja ka' nbint cyu'na, ejee'y judío," tzi tyol Dios.

²⁵ Ke cyey judío n-oc ke cyc'u'ja ti' c'upbil ttz'umel twi' cytz'albila te techel t-xjal Dios tzunkey. Ba'n tej cyechela lu, pero o'cx ka tzin cynimana cykilca tley Moisés. Pero amale atet cyechela toc, pero ka min cynimey tley Moisés, tisen'ax mintii' cyechela. ²⁶ Pero ka at jun xjal yaa'n judío tzin tniman tley Dios c'u'n tu'n tanem, amale minttii' techel toc ti'j, pero tuj twitz Dios, t-xjal Dioste. ²⁷ Ka jun xjal yaa'n judío nman tley Dios, amale minttii' techel toc ti'j, pero telniy' t-xjal Dioste. Pero jun xjal aj judío, ka min tzin tniman tley Moisés, amale ot cpet tchu'l bix amale atet tley Moisés tuya, pero telniy' yaa'n t-xjal Dioste. ²⁸ Yaa'n t-xjal Dios jun xjal tu'n aj judío bix tu'n oc cpet t-xumlal. ²⁹ Kej mero t-xjal Dios ejee'j tzin cyniman Dios tuya cykil cyc'u'j, yaa'n nuk ejee'j o tz'el keset ch'in cychu'l. Jun xjal, tu'n toc te t-xjal Dios, il ti'j tu'n tnimante Dios tuj tanem, yaa'n nuk tu'n toc tcyeyen tley Dios twitz u'j. Tuj cywitz judío, kej nchi el ba'n ejee'j toc cyechel ti' cychu'l te yec'bil t-xjalzten Dioske. Pero tuj twitz Dios, kej nchi el ba'n, ejee'j tzin cyniman Dios tuj cyanem.

3

¹ Kape at juun cyey ctzaal cykanena weya cyjulu: "Katzen ju' ttena, ztitzen tajbel tu'n oc te judío? zTi oc tbinchen tej tel keset cychu'l judío te techel t-xjal Dioske?" tzi cybela ju'wa. ² Cxe'l ntz'ak'be'na cyyola, nim ajbe'na. E tzaj tk'o'n Dios cye judío jawnex cyoclen te tz'iblte bix te c'u'lte tyol Dios.

³ Pero kape cykba'y weya cyjulu: "Pero at nim judío el cyxoo'n tyol Dios. Ju' tzunj mlay tniman Dios tyol e cyaj tk'o'n cye tu'n toc te Cydios," tzi cybela ju'wa. Pero cxe'l nkanena cyey cyjulu: Amale mint e cyniman ke judío, zcwelpa tch'ixbe'n Dios jtyol e cyaj tk'o'n? ⁴ zCbinelpa tu'n Dios ju'wa? zAtpa maj min tniman Dios tyol? jYaa'n ju'wa! Mas ba'n tu'n t-xi' kkba'n cykil xjal xtak' xjal twitz tu'n t-xi' kkba'n ka ja Dios yaa'n jiquen tyol. Tzi jun xjal tuj tyol Dios cyjulu: "Kman Dios, jiquen ta' cykilca tey tyol. Mintii' xtak'bil tuj tyola. Ka ma tz'oc cymlon xjal tyol tu'n tcnet jun palt te tyola, pero mintii' palt cnetel cyu'n," tzi jun xjal, tzi tyol Dios te yec'bil jiquente Dios.

⁵ Kej judío tocx cyxola, kapetzen cykba'y weya cyjulu: "Yaa'n tumel ka ma tzaj tk'o'n Dios kcastiwa tu'nj il nbint ku'n, cuma tzi cynkobela ajben te Dios oj nbint il ku'n, cuma ka mintii' il nbint ku'n, mlay chic'ajax ja Dios jiquen," tzi cybela. Pero ja tumel lu nuk cynaabl xjal te twitz tx'otx'. ⁶ Yaa'n jaxxix. Ka tzin cykba'na yaa'n tumel tu'n ttzaj tk'o'n Dios tcastiwa jun aj il, jax ju'x tzin cykba'na mlay tz'ajben Dios tu'n toc tcyeyenxin jaca juun xjal twitz tx'otx' ka ba'n e bint tu'n bix ka ka'. Pero yaa'n ju'wa. ⁷ Ka mintii' toclenxin tu'n ttzaj tk'o'nxin tcastiwa jun aj il, ba'ntzen txi' tkba'n jun xjal xtak' cyjulu: "Oj nxtak'ena, c'ajbelpen tu'n tchic'ajax min nxtak'en Dios. Ju' tzunj yaa'n tumel tu'n ttzaj tk'o'n Dios ncastiwiya, cuma tu'nj xtak' nyola cjawel nimset tbixin," tzi xjal ju'wa. ⁸ Kane ju'wa, cxe'lne kkba'n cyjulu: "Il ti'j ko binchal il, tu'ntzen tchic'ajax ja te Dios ba'n," tzi kbel. At juun tzin cykba'n ju'wa, pero xtak' cyyol. Ctzaal tk'o'n Dios cycastiwa te cyey xjal tzin cykba'n ju'wa, bix jiquen ta' cwel cycastiwa tu'n Dios.

Min-al jun xjal tz'aklxix, cykil ko' at kil

⁹ Entonces, zcxe'lpa kkba'n kej xjal wiy'jila, ke judío, mas ba'nke tuj twitz Dios cywitz kej xjal yaa'n judío? jMin! Yaa'n ju'wa, cuma ma txi' nkba'na cyey cykilca xjal, judío, yaa'nle judío, pero tocx tjak' tcawbil il. ¹⁰ Tzi tyol Dios julu: "Mi nuk jun xjal jiquen twitz Dios. ¹¹ Min-al n-el tniy' ti'j ti ttenxin. Min-al n-oc tc'u'j ti'jxin tu'n tnimjxin. ¹² O cyaj cyk'o'n tbehin cykil xjal. Mintii'tl cyajbel texin. Mi nuk jun xjal nbinchab ba'n. ¹³ Jtzin cykba'n tuya cytzi ka'xsen, tisen t-xewel cyimne tuj camposant. Cyaak' o'cx tajbel te sbul xjal. Oj cyyolen, cytzalajebtl cabtl nxi' tuj il, tisen n-oc ttx'a'n lbaj ti' jun xjal bi'x cyjel tveneno tuj tchu'l tu'n t-xi' tuj il. ¹⁴ Nim juubj yol n-etz tuj cytzi, bix c'a yol. ¹⁵ Nuk ti' ch'in julu ncub cybyo'n xjal. ¹⁶ Jaa'xja nchi pona, bi'x nxi' cykilca tuj il cyu'n, bix niy'x q'uixc'aj cyu'n xjal cyu'n. ¹⁷ Min cytzki'n ti tten tu'n cyten tuj ttzyal. ¹⁸ Min tzul tuj cyc'u'j tu'n at ttzi Dios cyi'j," tzi cyley judío te yec'bil aj il cykil xjal.

¹⁹ Ju'tzen tzin tkba'n cyley judío cykilca xjal aj il, bix n-el kniy' ti'j cyuyax judío, cuma ejee'n e tenke tjak' tcawbil cyley. Ju' tzunj min-al jun cye ba'n tkbante yaa'n aj il. Cykilca

xjal twitz tx'otx', judiole, yaa'nle judío, il ti'j chi pomel te kbalte twitz Dios at cyil. ²⁰Ju' tzunj, tzinen ta' min-al jun xjal twitz tx'otx' cxe'l jiquen twitz Dios tu'nj e niman jleye tzaj tk'o'n Dios cye judío, cuma najben jley nuk o'cx tu'n tyeec'ante cykilca ko' aj il.

Ma ko oc te tz'aklxix nuk tu'n kocslabl ti' Jesucristo

²¹ Pero ja'lewe o txi' tyeec'an Dios cye xjal at juntl tumel tu'n cyoc jiquen twitzxin. Yaa'n tu'nj ley e tzaj tk'o'n Dios cye aj Israel tu'nj Moisés, sino tu'nj juntl. Jaj jun be e byan tu'n Moisés, bix ju'x e byan cyu'n cabtl tyolel Dios jatxe ootxa. ²² Ja tzunj lu. Ja te Dios k'olte tu'n koc jiquen twitzxin, bix ntzaj tk'o'nxin ja xtalbil lu te cyej xjal n-oc ke cyc'u'j ti' Jesucristo. ²³ Cykilca ko' xjal o ko binchan il. Mi nuket jun xjal o txi' tii' n' tk'unk'lal jiquen tisen tbanel tnaabl Dios. ²⁴ Nuk tu'nj t-xtalbil Dios tzin tkba'n Dios ejee'j n-oc ke cyc'u'j ti' Cristo, jiquen ete' twitzxin. Bix o cyaj tk'o'nxin ja xtalbil lu nuk o'cx tu'nj e xi' tchjo'n Cristo Jesús chojbil kil tu'ntzen ktzakpet ti'j kil. ²⁵ E tzaj tk'o'n Dios jaxin twitz tx'otx' tu'ntzen tel tzi'tj tz'q'uelxin te chojbil il, tu'ntzen tve' tk'oj Dios ki'j, tu'ntzen koc jiquen twitz Dios tu'nj kocslabl ti' Cristo. Min e tzpet Dios tej tcub tnajsa'nxin cyil kej xjal ootxa, te mitkna'x tul Cristo. Tumel tu'n Dios tej t'bin tu'nxin ju'wa, cuma tz'ki'nxin tu'n tzaj tk'o'nxin tcastiwa Cristo te chojbil cykil il. ²⁶ Tej tzaj tk'o'n Dios Cristo te chojbil cyil xjal, e tyeec'atzen te ke ja'lewe nbinchanxin cykilca tuj tumel te junx maj. Amale atet il ti'j tu'n tk'ontexin castiwa tu'n t'aj il, cchic'ajaxeltzen jun aj il tisenca' mintii' til twitz Dios ka ma tz'oc ke tc'u'j ti' Jesús.

²⁷ Ju' tzunj, ¿tumelpa tu'n t'jaw kniman kiib? Min, cuma jiquen ko' twitz Dios yaa'n tu'nj nko'x lpe ti'j jun ley, sino jiquen ko' tu'nj toc ke kc'u'j ti' Cristo. ²⁸ Jaxix tumelj k'o'n te jun xjal tu'n toc jiquen twitz Dios nuk o'cx tu'nj tocsabl ti' Cristo, yaa'n tu'nj nniman jun ley.

²⁹ At juun cyey ejee'y judío tzin cykba'na nuk cye judío Dios, yaa'n cyey xjal yaa'n judío. Pero cxe'l nkanena cyey, ¿zapa juntl Dios te cyej xjal yaa'n judío? ¡Min! Ju' tzunj, il ti'j q'ueel cyni'ya ti'j Jdios te cyej xjal judío jax Dios te cyej xjal yaa'n judío, ³⁰ cuma jaxte nuk o'cx jun Dios at. Ka junx Dios at, judiole, yaa'nle judío, pero iltzen ti'j chi oquell cykil xjal te t-xjal Dios ti'jx jun be, jaj tu'nj n-oc ke cyc'u'j ti' Cristo.

³¹ Kapetzen cxe'l cykba'na cyjulu: “Ka jiquen ko' twitz Dios nuk tu'nj kocslabl ti' Cristo, mintii'tlzen tajbel jley e tzaj tk'o'n Dios,” tzi cybela. ¡Pero yaa'n ju'wa! Jtzin nkba'na ja ley nkbante tu'n koc tz'aklxix twitz Dios, pero nuk tu'nj n-oc ke kc'u'j ti' Cristo o nimj ley ku'n.

4

Jun yec'bil te ke tu'n Abraham

¹ Cyk'o'nc cyc'u'ja ti'j Abraham, jxin tneel cyiy'jil judío. ¿Ti tten tel jiquen twitz Dios? ² Nuket e xi'xin jiquen twitz Dios tu'nj ba'n tbinchbenxin e bint tu'nxin, atetzetele toclenxin tu'n e jaw tnimsan tiibxin. Pero tuj twitz Dios, el Abraham ba'n yaa'n tu'nj ba'n e tbinchaxin. ³ C'oquell cyc'u'ja ti'j ti toc tu'n tyol Dios. Tzi cyjulu: “Oc ke tc'u'j Abraham ti' Dios. Ju' tzunj e tzaj k'o'n te Abraham tu'n jiquen ta' twitz Dios,” tzi tyol Dios tu'n t-xi' tyeec'an jiquen e tema Abraham twitz Dios yaa'n tu'nj jun ba'n e bint tu'nxin, sino nuk tu'nj t-xtalbil Dios. ⁴ N-eltzen kniy' ti'j oj nak'anan jun xjal, bixsen ntzaj tk'o'n taaw ak'untl pwak te. Yaa'n tcotz ntzaj k'o'n, sino twi' tc'u'jxin, cuma otk' ak'ananxin. ⁵ Ja tzunj xjal min tz'ak'anan, bix ka ntzaj k'o'n pwak te, yaa'n twi' tc'u'j, sino nuk tcotz. Ti'j ja techel lu q'ueel kniy' ti'j ka n-oc ke tc'u'j jun aj il ti' Dios, ctk'a' Dios xtalbil te, yaa'n twi' tc'u'j. Bix ja xtalbil lu, jaj tu'n toc jiquen twitz Dios. ⁶ Ju'x e tkba David ootxa at t-xtalbil Dios tibaj jun xjal yaa'n tu'nj ba'n tbinchben e bint tu'n, sino tu'nj ntzaj k'o'n te tu'n jiquen ta' twitz Dios. Tzi David cyjulu: ⁷ “Kej xjal o najset cyil, ejee'tzen xjalja at t-xtalbil Dios cyibaj. ⁸ Kej xjal o chi binchan il pero ya mintl chi ul tuj tc'u'j Kaaw, ejee'tzen xjalja at t-xtalbil Dios cyibaj,” tzi David.

⁹ Kape tuj cywitz juun xjal ctk'a' Dios ja xtalbil lu nuk te cyej xjal ncpet cychu'l te techel t-xjal Dioske, bix min ma tak' te cyej yaa'n k'i'n jtechel lu cyu'n. Pero yaa'n ju'wa. Tzi tyol Dios cyjulu: “Tu'nj tocsabl Abraham ti' Dios, e tzaj k'o'n texin tu'n jiquen ta'xin twitz Dios,” tzi tyol Dios te yec'bil yaa'n tu'nj toc techel ti' tchu'l. ¹⁰ Cxe'l nkanena cyej xjal judío, ¿jttoo e tkba Dios jiquen ta' Abraham twitzxin? ¿Otkpa bint tu'n t'pet Abraham tej tzaj tkba'n Dios jiquen ta' Abraham twitz Dios, ma mitkna'x? Mitkna'x. Ju' tzunj q'ueel kniy' ti'j yaa'n tu'nj tej t'pet tchu'lxin e tkba Dios ba'nxin twitz Dios. ¹¹ Mas yaj e tkba Dios tu'n toc tk'o'nxin jun c'upbil ti' tchu'lxin tetzen techel jiquentzen ta'xin tu'nj tocsabl'lxin ti' Dios. C'oquell kc'u'j ti'j mitkna'x toc techel ti' Abraham tej tkbante Dios jiquen ta'xin twitz Dios. Ju'tzen e baj tninc'u'n Dios ti'j, tu'ntzen toc Abraham te mambaj te cykilca kej xjal yaa'n judío at tu'n toc ke cyc'u'j ti' Dios mas yaj amale mintii' techel toc cyil'j, tu'ntzen jax ju'x cye tu'n cyocslabl chi oquell jiquen twitz Dios tisen te Abraham. ¹² Ja tzunkej xjal judío, kej xjal e cpet cychu'l te techel t-xjal Dioske, jaj ju'x o cub tninc'u'n Dios ti'j tu'n toc Abraham te cyxe'chaj, cuma

jaxin tneel xjal k'ilte ja techel lu. Pero jaxin cyxe'chel nuk o'cx ka n-oc ke cyc'u'j ti' Dios tisen e bint tu'n Abraham tej mitkna'x toc techel ti'jxin.

Tu'nj oc ke tc'u'j Abraham ti' tyol Dios o tcama jun tkab

¹³ Q'ueleltzen kniy' ti'j oc Abraham jiquen twitz Dios nuk tu'nj oc ke tc'u'jxin ti'j ti e tkba Dios texin. Ju'tzen e cyja' tkba'n Dios jun cykab te Abraham bix cye ke tchmanxin. E tkba Dios tu'n tcyaj tk'o'n texin entera twitz tx'otx', yaa'n tu'nj e nimanxin ti' ley, sino tu'nj e tenxin jiquen twitz Dios tu'nj tocslablxin ti'j Dios. ¹⁴ Nuket chi camal xjal jcykab tzin tk'o'n Dios nuk o'cx tu'nj cyniman ley, mintzeletii' il ti'j tu'n toc ke kc'u'j ti'j e tkba Dios, bix nuktzele tajxtl Dios e cyaj tkba'n tyol te Abraham bix cye ke tchman. ¹⁵ Kej xjal n-oc cyipen tu'n cyniman tley Dios tu'n cycaman t-xtalbil Dios, mlay cyiik' t-xtalbil Dios, sino ccyiik'elcye o'cx tk'oj Dios, cuma mi nuk jun xjal nniman entera ley. O'cx nuket minttii' ley ba'ntzele cyten xjal tu'n mi'n tz'el cyxoo'n ley.

¹⁶ Ju'tzen q'uelela kniy' ti'j yaa'n tu'nj nko niman ti' ley ko kabel tu'n Dios, sino nuk tu'n kocslabl ti' Dios. Bix cuma nuk tu'nj kocslabl, ju' tzunj ktzki'n jkkab tzin tk'o'n Dios yaa'n twi' kc'u'j, sino kcotz. Nuket nko ayon ti'j twi' kc'u'j tu'nj oc kniman tley Dios, mlay kcaman, pero ka nko ayon ti'j kcotz e cyaj tkba'n Dios tu'n tk'onte, il ti'j tu'n kiik'ente. Bix jkkab lu ctk'a' Dios te cykilca kej xjal nchi binchan j-e bint tu'n Abraham, tisenc'a tchman Abraham. Ctk'a' Dios yaa'n nuk cyej xjal judio e cyiik' tley Moisés, sino jax ju'x cyekej xjal yaa'n judio, cykilca kej xjal n-oc ke cyc'u'j ti' Dios tisen e bint tu'n Abraham. Jaxin t-xe'chel te cykilcaj n-oc ke tc'u'j ti' Dios. ¹⁷ Tzi Dios te Abraham cyjulu: "Ma cyaj nk'o'na te tye tu'n toca te t-xe'chel te nimc'a wik xjal" tzi Dios tuj tyol Dios. Amale minttii' t'cwal Abraham otk tz'itz'j, pero tuj twitz Dios ya otk tz'oc Abraham te t-xe'chel te nimc'a wik xjal. Bix oc ke tc'u'j Abraham ti'j e tkba Dios texin, cuma el tniy'xin ti'j ba'n tu'n Dios tu'n tk'onte tipemal te jun xjal tijtl tisenc'a cymimne, bix ba'n tu'n Dios tu'n toc tcyeyen jmina'x t'bj bix ba'n tu'n xnin tu'n tyolen ti'j jmina'x t'bj tisenc'a otk baj tilel. ¹⁸ Ju' tzunj ayon Abraham ti'j e cyaj tkba'n Dios, amale tujet cywytz xjal mlay bint. El jax tuj twitzxin tu'n tocxin te t-xe'chel te nimc'a wik xjal, cuma otk tkba Dios texin cyjulu: "Nimxsen tajlal tiy'jila q'uitz'jel," tzi Dios. ¹⁹ El tniy' Abraham ti'j minxtii' tiz'jel jun t'cwalxin, cuma ch'ixc'a yaa'n jun syent jnabk'i t'nyemxin, bix el tniy'xin ti'j jax ju'x t-xu'lxin mlayx tu'n talenxuj. Pero tocslablxin ti' Dios min e cub baj. ²⁰ Nukx nayonxin ti'j t'cwalxin otk cyaj tkba'n Dios texin, bix e cywixxin mas tuj tocslablxin, bix e jaw t'nimsa'nxin tbi Dios. ²¹ Tuya cykil tc'u'jxin oc ke tc'u'jxin ti' Dios tu'n t'btint j-otk cyaj tkba'n Dios texin. ²² Ti'j tzunj lu e tkba Dios jiquen ta'xin twitz Dios.

²³ Entonces n-el kniy' ti'j nuk tu'nj tocslabl Abraham oc Abraham jiquen twitz Dios. Ja yol lu yaa'n nuk ti'jxin nyolene, ²⁴ sino jax ju'x nyolen ki'. Jax ju'x ko', jiquen eto' twitz Dios, cuma jax ju'x o'z'oc ke kc'u'j ti'j Dios e jaw tiz'jsa'n Kaaw Jesús juntl maj tuj cyamecy. ²⁵ E tzaj tk'o'n Dios Kaaw Jesús tu'n t'byet tu'n kil, bix e jaw tiz'jsa'n Dios jaxin juntl maj tuj cyamecy cuma otk bint tu'nxin tu'n koc jiquen twitz Dios.

5

Jiquen ko' twitz Dios tu'nj n-oc ke kc'u'j ti' Jesucristo

¹ Entonces, jiquen ko' twitz Dios tu'nj n-oc ke kc'u'j ti' Dios. At ttzyal'tl eto' tuya Dios tu'nj e bint tu'n Kaaw Jesucristo. ² Bix tu'nj e bint tu'n Kaaw, bix tej toc ke kc'u'j ti'j e bint tu'nxin, e k'oj t-xtalbil Dios ke tu'n koc jiquen twitz Dios. Bix nko tzalaj, cuma nko ayon la' alcyey k'ij oj kten tuya Dios tuya jun kchunk'lal t'banelxix. ³ Bix nko tzalaj yaa'n nuk o'cx tu'nj k'ij tzul, sino jax ju'x oj toc q'uixc'aj ki', cuma n-el kniy' ti'j oj t'byet q'uixc'aj kwitz, cbineltzen tu'n t'iy'x ku'n. ⁴ Bix oj niy'x q'uixc'aj ku'n, cyjeltzen knaabl mas ba'n. Bix oj ncyaj knaabl mas ba'n, nko ayontzen ti'j o cyaj tkba'n Dios ke. ⁵ Bix mlay ko ayon nuk kajx, cuma jaxte c'japanel baj Dios ti' tyol. Ktzki'ntl te Dios mlay ko el t-xoo'n Dios tuj jk'ij tzul, cuma atumel kuya ntzaj k'ak'en tc'u'jxin ki'. O tzaj tk'o'nxin Espiritu Santo ke, bix nak'anan Espiritu tuj kanem tu'ntzen tel kniy' ti'j n-oc kak' te Dios. ⁶ Tzinen ta' n-oc kak' texin, cuma tej t'pon tumel, e tzaj tk'o'nxin Cristo tu'n t'cymim te kxel. Aj il ko' nejl, bix min-al jun clol ke tu'n kco'pj twitz kcastiwa tzul tk'o'n Dios. ⁷ Katzen at jun xjal ba'n tnaabl, pero amale ba'nt tnaabl, pero min-al jun xjal jac'a tak' tiib te t-xel tu'n t'cymim. Jac'atzele at juun cyk'a' c'yiib tu'n t'cymim te t-xel jun xjal ba'n tnaabl, pero cykilcatle xjal jac'a jaw klee' ti'j. Pero min-al jun xjal cymel te t-xel jun xjal ka' tnaabl. ⁸ Pero yal te Dios, e tzaj tk'o'nxin Cristo twitz tx'otx' tu'n t'cymim te kxel, amale aj ilet ko'. Ti'j tzunj lu e tyeec'anxin tk'ak'bil tc'u'jxin ki'. ⁹ Cuma oc kak' texin tej eto'x tuj kil, q'ueleltzen kniy' ti'j oj kpon tuj k'ij te stisibil tzul, nimxsen c'onelxin ki'j tu'n Cristo tu'n ktzakpet ti'j kcastiwa binne tu'n Dios, cuma ja'lewe yaa'n aj il ko' twitz Dios, sino jiquen eto' twitzxin tu'nj e bint tu'n Cristo tej tel t'zajt t'zq'uel Cristo tu'n kil. ¹⁰ Jnxi' nkba'na cuma e tzaj tk'o'n Dios tu'n kten tuj ttzyal tuyaxin tu'nj t'cymimlen T'cwal te kxel tej lux ko'ke nko chi'lec ti'jxin, q'ueleltzen kniy' ti'j mi'ntzen jawtl tk'o'jxin ki'j tuj jk'ij te stisibil tzul, cuma yaa'ntzen

nko chi'lectl ti'jxin. Bix cuma onen Tcwalxin ki'j tej tcyim, mlaytzen cyaj tk'o'nxin tonbilxin ki'j ja'lewe, cuma i'tz tzunxin. ¹¹ Pero yaa'n o'cx tu'n kcllet twitz kcastiwa tu'n Dios, sino jax ju'x nko tzalaj ti'j Dios tu'nj e bint tu'n Kaaw Jesucristo tu'n twe' tk'oj Dios ki'j.

Alcye o bint tu'n Adán bix alcye o bint tu'n Cristo

¹² Ju'tzen tten, key hermano, tu'nj e bint tu'n jun xjal, ja Cristo, at kchunk'lal te junx maj. Pero tu'nj e bint tu'n juntl xjal tuj tneel, oc il twitz tx'otx', bix ju' tzunj cykil xjal oc tjak' tcawbil cyamecy. Tu'nj aj ilke, ete' xjal tjak' tcawbil cyamecy. ¹³ Yaa'n ete' xjal tjak' tcawbil cyamecy tu'nj min txi' cyniman ley. Ktzki'ntl jlu tu'nj ti e baj tej mitkna'x ttzaj tk'o'n Dios tley Moisés. Amale minttii' ley e k'oj cye xjal, pero at il cyxol xjal, cuma e cyim ke xjal. ¿E cyimpake tu'nj il e bint cyu'n? Min, cuma n-el kniy' ti'j ka mintii' ley, mintii' ba'n tel cyiiq'uen. ¹⁴ Pero e bi'n ku'n e cyim cykilca xjal e ten twitz tx'otx' tej mitkna'x tk'oj ley te Moisés. Amale mint el cyxoo'n jun ley e tak' Dios tisenj el t-xoo'n Adán, pero cykil e cyim. Ja tzunj lu nk'onte tumel e cyimke yaa'n tu'nj el cyxoo'n jun ley, sino tu'nj cyiy'jil Adán. J-il e bint tu'n Adán bi'x e tiik' cykil xjal. Jax ju'x j-e bint tu'n Jesucristo mas yaj jax bi'x e cyiik' ke xjal. ¹⁵ Pero j-o tzul kibaj tu'nj e bint tu'n Cristo yaa'n ju' tisenj ul kibaj tu'nj e bint tu'n Adán, cuma jco'pbilte ke ul tu'n Cristo mas tipemal twitz cyamecy ul kibaj tu'n Adán. Amale oquet ke xjal tjak' tcawbil cyamecy tu'nj il e bint tu'n Adán, pero jxtalbil ntzaj tk'o'n Dios cye xjal tu'nj e bint tu'n Jesucristo, nbajtzen twi' cyamecy tu'n, cuma mas tipemal. ¹⁶ Jco'pbil ke e tzaj tk'o'n Dios, e cub tyeec'an mas tipemal twitz jil e bint tu'n Adán. Tu'nj nuk junx il e bint tu'n Adán, e tkba Dios cykilca xjal oc te ka' twitzxin. Pero amale atet nim il ja'lewe, jco'pbil e tzaj tk'o'n Dios at tipemal tu'n tnajset cykilca il, yaa'n nuk o'cx te Adán til. ¹⁷ Katzen nuk tu'n til jun xjal oca ke xjal tjak' tcawbil cyamecy, yajtzen tu'n Jesucristo chi eletz tzokpaj xjal tjak' tcawbil cyamecy, cuma mas jawnex tipemalxin, bix chi cawel tuyaxin te junx maj, ejee'j nchi ocslan ti'j jawnex t-xalbil Dios, ejee'j jiquen ete' twitz Dios.

¹⁸ Ju' tzunj, ti'j nuk jun maj min e tniman Adán tley Dios, e tkba Dios il ti'j chi xe'l cykilca xjal tuj castiwa. Pero te Cristo, e tnima texin ja Dios tej t-xi' tkba'n Dios texin tu'n tcyimxin. Bix ti' tzunj ju'wa junx tnimbil Cristo, at tuj tk'ab Dios tu'n t-xi' tkba'n jiquen ke xjal twitzxin, bix tu'n ttzaj tk'o'nxin tchunch'nal te junx maj. ¹⁹ Tumel e'la e tkba Dios il ti'j chi xe'l xjal tuj castiwa, cuma tu'n til jun xjal oc ke xjal aj il. Jax tumelte oj tkbante Dios jiquen ete' xjal twitzxin, cuma tu'nj tnimbil jun xjal ja Cristo, jaxte e cyajtzen ke xjal jiquen twitzxin.

²⁰ Yaltzen te tley Moisés, ¿tikentzen e tzaj tk'o'n Dios? E tzaj tk'o'n Dios tu'n tcub tyeec'anxin oj at tcawbilxin, masc'a n-el cyxoo'n xjal tcawbilxin. Pero amale masc'at e binchanx ke xjal il, pero t-xalbil Dios mas tipemal twitz jil e bint cyu'n xjal. ²¹ Mas tipemal t-xalbil Dios, tu'ntzen mi'n ko tentl tjak' tcawbil cyamecy, sino tu'ntzen ju' ko temel tjak' t-xalbil Dios. O tkba Dios jiquen ko' twitzxin tu'nj e bint tu'n Kaaw Jesucristo. Ju' tzunj at kchunk'lal te junx maj mintii' t'bjalel.

6

Tu'nj kmojbabl kiib tuya Cristo otzen cyaj jknaabl aj il te ootxa

¹ Katzen ju' ttena ja t-xalbil Dios at mas tipemal twitz il, jey', kape nxi' cybisena ti'j tu'n thint mas il cyu'na, cuma tuj cywitza c'ajbel cyila te Dios tu'ntzen tyeec'ante jaj te Dios t-xalbil at mas tipemal. ² ¿Pero tikentzen tzakpi'n ko' tjak' tcawbil il tu'n Cristo ka nuk kajx tu'n kmeltz'aj juntl maj tu'n thint il ku'n? ¿Mimpa tz'el cyni'ya ti'j o cyim tej knaabl aj il? ³ Cytzki'ntl tzuna tej kocslan ti'j Cristo Jesús, octzen ko' junxsen tuyaxin. Atzen kmojbabl kiib tuyaxin. ¿Pero mipma tz'el cyni'ya ti'j tu'n kmojbabl kiib tuyaxin, tisenxsen e xi' ko' tuyaxin tej tcyimxin? ⁴ Tu'n tzunj kmojbabl kiib tuya Cristo, otzen cyaj jknaabl aj il te ootxa tuj cyamecy tu'nxin. Bix tisen e jatz itz'jxin juntl maj tuj cyamecy tu'n tipemal Kman Dios, jax ju'x o tz'itz'j jun kchunk'lal ac'aj. ⁵ Jaxte at jun ac'aj kchunk'lal, cuma at kmojbabl kiib tuya Cristo yaa'n nuk o'cx tej tcyimxin, sino jax ju'x tej tatz itz'jxin tuj cyamecy. Ju' tzunj at kchunk'lal ac'aj. ⁶ Q'uelel kniy' ti'j jaan jknaabl aj il e cyim tuya Cristo twitz cruz. E cub byet-xin tu'ntzen t'bj tilel cykil il, tu'ntzen mi'ntl ko ten tjak' tcawbil il. ⁷ Tisentzen jun xjal cyimne mi'n tentl tjak' tcawbil juntl xjal, cuma otk cyim, jax ju'x ko', yaa'n eto' tjak' tcawbil il ka at kmojbabl kiib tuya Cristo. Tzakpi'n ko' ti' tcawbil il, cuma tu'n kmojbabl kiib tuya Cristo, o cyim jknaabl aj il. ⁸ Cuma e cyim knaabl aj il tu'n kmojbabl kiib tuya Cristo, jaxte c'ajbel kmojbabl kiib tuyaxin tu'n at kchunk'lal ac'aj tuyaxin, cuma yaa'n nuk o'cx e cyimxin, sino jax ju'x e jatz itz'jxin juntl maj tuj cyamecy. ⁹ Tu'n kmojbabl kiib tuyaxin, mlay ko aj meltz'aj tjak' tcawbil cyamecy, cuma ktzki'n e jatz itz'jxin juntl maj tuj cyamecy bix mlay cyimxin, cuma jcyamecy mintii'tl tcawbil tibajxin. ¹⁰ Mi'n cyimxin juntl maj, cuma tej tcyimxin, e baj tilel il te junx maj. E cyaj il tu'nxin tuj cyamecy, bix itz'jxin tu'n tajbenxin te Dios. ¹¹ Jax ju'xse ke. Q'uelel kniy' ti'j tu'n kmojbabl kiib tuyaxin o cyaj kk'o'n kil, bix at kchunk'lal ac'aj tu'n kajben te Dios.

¹² Entonces, q'uelel cyni'ya ti'j mi'n ko tentl tjak' tcawbil il. Ju' tzunj, key hermano, mi'n cyak' cyiiba juntl maj tjak' tcawbil il. Mi'n txi' cyii'na jtajbil cyxumlala yaa'n ba'n. ¹³ Mi'n txi' cyk'o'na ambil te cyxumlala tu'n tbinchan ka', sino ju' cyk'a' cyiiba tu'n cyajbena te Dios. Nejl e tenkey tjak' tcawbil cyamecy, pero ja'lewe o k'oj ac'aj cychunk'lala tu'n Dios. Ju' tzunj cyk'o'nc cyipena tu'n tajben cyxumlala te Dios tu'n tbtnt ba'n tu'n. ¹⁴ Ja te Dios cxe'l cynimana, cuma yaa'n ete'tla tjak' tcawbil il. Nejl tej cyk'on cyiiba ti' jun ley tu'n cycleta, e chic'ajaxsen at nim tipemal il cyibaja. Pero ja'lewe mintii'tl tipemal il cyibaja, cuma tu'n t-xtalbil Dios o chi tzakpeta ti'j tej toc chk'etkey te nimlte tleyxin tu'ntzen cycleta.

Il ti'j tu'n kbinchante ba'n cuma te Dios ko'

¹⁵ Kapetzen tuj cywitza ba'n tu'n tbtnt il ku'n, cuma o kiik' t-xtalbil Dios, bix ju' tzunj mintii'tl il ti'j tu'n t-xi' kniman ley. Pero yaa'nxsele tumel ka nxi' cybisena ju'wa. ¹⁶ ¿Mimpa tz'el cyni'ya ti'j ka cyk'on cyiiba tu'n t-xi' cynimana jun xjal, jatzen xjalja c'oquel te cyaawey? Jax ju'x tuya il. Ka cyk'on cyiiba tuya il, cyk'ontzen cyiiba tjak' tcawbil il, bix cxe'l tii'n ejee'y tuj cyamecy. Pero ka cyk'on cyiiba tu'n cynimana Dios, ja tzunxin cyaawey, bix chi elela jiquen twitzxin. ¹⁷ Chjonte Dios mi'n chi tentla tjak' tcawbil il, sino o cynimana tuya cykil cye'c'u'ja jxnak'tzibil jaxxix e pon cyxola. ¹⁸ O chi tzakpeta tjak' tcawbil il. O chi oca tuj tcent Dios tu'n tbtnt ba'n cyu'na.

¹⁹ Cyiw ch'in tu'n tel cyni'ya ti'j nyola. Ju' tzunj ma txi' ntz'i'bena cyey otk tz'oc il te cyaawey nejl. Ajben cyxumlala tu'n tbtnt ka' cyu'na, bix nim min e xi' cynimana ley. Jawnex e jaw cyila. Pero yaltzen ja'lewe iltzen ti'j c'ajbel cyxumlala tu'n tbtnt jun ba'n cyu'na. Ka ma bint cyu'na ju'wa, nchi ajben tzuna te Dios. ²⁰ Nejl tej cytena tjak' tcawbil il, mintii' cyaja te tu'n cywi' lpey ti'j ba'n. ²¹ ¿Titzen e cyamey tej cybinchana il? Mintii', cuma o'cx ma tak' cych'ixewa ja'lewe ti'j e bint cyu'na nejl, bix cuma at bint ku'n. Bix tu'n tuj cyamecy tu'n. ²² Pero yal ja'lewe o chi etz k'i'na tjak' tcawbil il. Tjak'tzen tcawbil Dios ete'y, bix o k'oj cyey tu'n cycub tena sakxix bix tu'n at cychunk'lala mintii' t'ajjel. ²³ Q'uelel kniy' ti'j kej xjal nchi ajben tjak' tcawbil il, jatzen chojbil cyej cyamecy. Pero kej xjal cyk'on cyiib te Dios, nk'ontzen Dios cychunk'lal mintii' t'ajjel tu'nj at cymojobabl cyiib tuya Kaaw Cristo Jesús.

7

Jun xnak'tzibil ti'j mejoblanel

¹ Key hermano, ejee'y jun wik xjal n-el cyni'ya ti'j ti tten ley te twitz tx'otx'. Ju' tzunj cytzki'na oj tcyim jun xjal, min cawetl ley t'abajxin. O'cx ti'j i'tz ko' ncawentzen ley kibaj. ² Cxe'l nk'o'na jun tumel cyey ti tten oj ttzakpet jun xjal ti' ley tu'n cyamecy. Tzin tkba'n ley il ti'j ctemel xuyj tuya tchmil. Jaj i'tzxxin, atzen xuyj tjak' jley tzin tkba'n tu'n tten majebil tuya tchmil. Pero oj tcyim tchmil xuyj, tzakpi'ntltzen ta' xuyj tuj ley. ³ Katzen ma maje xuyj tuya juntl xinak i'tzx tchmil, tzin tkba'ntzen pa'l najle'ntzen xuyj. Pero katzen otk cyim tchmil xuyj, tzakpi'ntzen ta' xuyj tuj jley tzin tkba'n il ti'j ctemel tuya tchmil. Katzen taj xuyj maje tuya juntl xinak, yaa'ntzen pa'l najle'nxuj. ⁴ Key hermano, tisenxsen ntzakpet xuyj ti' ley te najle'n tu'n jun cyamecy, tu'ntzen tmaje tuya juntl xinak, ju'xsen ke. O ko tzakpet tuj tk'ab ley jax tu'n jun cyamecy, jaj tcyamecy Cristo, tu'ntzen at kmojobabl kiib tuya Cristo, jaj xjal e jatz itz'j juntl maj tuj cyamecy. At kmojobabl kiib tuya Cristo tu'ntzen kajben te Dios tu'nj ba'n nbint ku'n. ⁵ Nejl tej lepchx ko' ti' ootxa knaabl, e bint-x ku'n nuk jaj kajbil yaa'n ba'n. E kajbe tu'n tbtnt ku'n j-e tkba ley tu'n maj ku'n. Bix tu'nj e xi' lpe ko' cyi'j kajbil yaa'n ba'n, ajben ko' te taawj k'ilx cye xjal tuj cyamecy. ⁶ Pero ja'lewe tzakpi'n ko' tjak' tcawbil ley. Min ko tentl tjak' tawbil ley, tisenxsen jun xjal oj tcyim min tentl tjak' ley. Ya nko niman Dios yaa'n tu'nj chk'o'n ko' tu'n ley, sino cuma kaj tu'n kajben texin tuya cykil kc'u'j.

K'i'n ootxa knaabl aj il ku'n

⁷ Katzen tu'n ley at kil, jey', ¿ka'patzen ley? Min. Te ley min tz'oc tlojo'nte ejoo' ti' il. Ulte ley nuk te kbalte at kil. Tisen tzunj, nejl oc nk'a'bena tik'ch cye wuyena, pero min el nni'ya ti'j ka yaa'n ba'n jlu. Pero tej toc nbi'na tley Dios ka yaa'n ba'n toc nk'a'bena tik'ch cye xjal at, eltzen nni'ya ti'j ka'tzen e bint wu'na. ⁸ Tej tkbante ley tu'n mi'n tu'n tz'oc nk'a'bena tik'ch at, pero jnnaabla aj il tcy'i' tz'oc tbi'n jlu. O'cx oc tk'a'ben tik'ch at. Nukettzen mintii' ley, mintzele e cnet jwila. ⁹ Nejl tej mitkna'x toc nbi'na ti toc tu'n ley, e'llexe tuj nwitzza ba'n kena. Pero tej tuj ley jyol wila, e chic'ajaxse i'tz ta' wila, bix el nni'ya ti'j yaa'n ba'n kena. Cymnen kena. ¹⁰ Jley e tkba ko camal kchunk'lal te junx maj ka ma kniman. Pero min e nnimiya, bix nuk e xi' tii'n kena tjak' tcawbil cyamecy. ¹¹ Tuj nwitzza ul ley te onl te weya tu'n ncamana nchunk'lala te junx maj, pero yaa'n ju'wa. Ajben nuk tu'n tyee'c'ante aj il kena, bix at tu'n ncyima tu'n wila. ¹² Ju' tzunj, key hermano, amale tzint tyee'c'an tley Dios aj il ko', q'ueletzen kniy' ti'j yaa'n ley ka'. Jaca juun ley sakxsen bix jiquenxsen bix ba'nxsen.

¹³ Kape cykba'y yaa'n ba'n ley, cuma tu'n ley oc ko' tjak' tcawbil cyamecy. Pero yaa'n tu'n te ley. Tu'n ilte ocx ko' tjak' tcawbil cyamecy. Tu'nj ootxa knaabl min e xi' kniman jley ba'nxix, bix ju' tzunj ocx ko' tjak' tcawbil cyamecy. Jatzen tajbel leyj nuk tu'n tchic'ajax ka'xsen knaabl ootxa. ¹⁴ N-el kniy' ti'j ba'n ley, cuma jley jax tnaabl Dios. Pero yal ke, at knaabl aj il tjak' tcawbil il. ¹⁵ Chic'aj tjak' tcawbil il ta' ootxa knaabl, cuma jba'n kaj tu'n tbint ku'n min nbint ku'n, sino jaj kcy'i tu'n tbint, nbint ku'n. ¹⁶ Katzen tzin kkba'n yaa'n ba'n jnbint ku'n, nyee'atzen jlu ba'n te ley tuj kwitz, cuma jax ju'x ley tzin tkba'n jnbint ku'n yaa'n ba'n. ¹⁷ Katzen nbint ku'n jkcy'i, tzin yee'atzen yaa'n ejoo' nko binchante sino knaabl aj il nbinchante. ¹⁸ N-el kniy' ti'j te junxse maj ka' ootxa knaabl aj il, cuma amale kajat tu'n tbint ba'n ku'n, pero min tcuyan knaabl aj il tu'n tbint. ¹⁹ Kaj tu'n tbint ba'n ku'n, pero min nbint. Pero jka' kcy'i tu'n tbint, nbint ku'n. ²⁰ Pero ka nbint jkcy'i, n-eltzen kniy' ti'j yaa'n ejoo' nko binchante il, sino jaj knaabl aj il. ²¹ Ju' tten kchunk'lal. Kaj tu'n tbint ba'n ku'n, pero jaj knaabl aj il nmyonte. ²² Tuj kanem n-oc tak' tley Dios ke, ²³ pero at juntl knaabl nak'anan te myolte ti taj kanem, jaj knaabl aj il, bix tzyu'n ko' tu'n. ²⁴ ¡Lastim ko'! ¿Al cco'plte ke tjak' tcawbil jknaabl ka' nxi' tii'n ejoo' tuj cyamecy? ²⁵ ¡Cxe'l kk'o'n chjonte te Dios ma ko co'pj tu'nxin tu'n Kaaw Jesucristo!

Ju'tzen ma tz'el kniy' ti'j tuj kanem kaj tu'n kniman ley te Dios, pero taj knaabl aj il tu'nx kxi' lpe ti' il.

8

Tu'n tipemal Espíritu Santo at ac'aj kchunk'lal

¹ Pero yaa'n eto'tl tjak' tcawbil il, cuma at kmojbabl kiib tuya Cristo Jesús. Ya min ko'xtl tuj castiwa, ² cuma tzakpi'n ko' tjak' tcawbil jley tzin tkba'n aj il ko' bix il ti'j ko xe'l tuj cyamecy te junx maj. Tu'nj kmojbabl kiib tuya Cristo Jesús, ma ko el libre tjak' ley, bix ma k'oj ac'aj kchunk'lal tu'n Espíritu Santo. ³ Jley e tkba il ti'j tu'n knimante, pero min e xcy'e tu'n knimante, cuma jknaabl aj il mintii' tipemal tu'n knimante. Pero e xcy'e Dios tu'n tnmj ley tej ttzaj tsmá'nxin Tcwalxin twitz tx'otx' tu'n toc te xjal tisen ejoo', tu'ntzen tbyet te chojbil kil, ejoo' aj il. Tu'nj tcyimlen Tcwalxin tisen xjal, cykiltzen il e chjet tu'nxin, ⁴ tu'ntzen koc jiquen twitz Dios tisenj tzin tkba'n ley. Yaa'ntzen eto'tl tjak' tcawbil knaabl aj il, sino eto'tl tjak' tcawbil Espíritu Santo. ⁵ Ja tzunkej xjal ete' tjak' tcawbil ootxa cynaabl, nuktzen jaj ti taj cyxumlal ncub cybisen. Ja tzunkej xjal ete' tjak' tcawbil Espíritu Santo, ncubtzen cybisen ti'j ti taj Espíritu Santo. ⁶ Ja tzunkej xjal nuk nche'x lpe ti'j ti taj cynaabl aj il, chi xe'ltzen tuj cyamecy. Ja tzunkej nchi jyon ti taj Espíritu Santo, atzen cychunk'lal te junx maj bix ete' tuj ttzyal. ⁷ Jknaabl aj il n-el tii'q'uen Dios. Tcy'i knaabl aj il tnmán tley Dios, bix mintii' tipemal tu'n tbint tu'n. ⁸ Ju' tzunj kej xjal ete' tjak' tcawbil cynaabl aj il, mlay chi japan ti'j ti taj Dios. ⁹ Jatzen cyey, yaa'n tjak' tcawbil cynaabl aj il ete'y, sino tjak' tcawbil Espíritu Santo, cuma at Espíritu Santo tuj cyanema. Q'uelel cyni'ya ti'j ka min ma k'oj Espíritu Santo tu'n Cristo te jun xjal, yaa'ntzen t-xjalxin ja xjal. ¹⁰ Pero ka at Cristo tuj cyanema, amale cymelet cyxumlala tu'n il, pero at cychunk'lala te junx maj, cuma jiquen ete'y twitz Dios. ¹¹ Pero jaj ju'x cjawel itz'j cyxumlala juntl maj. J-espiritu Santo at tuj cyanema, e tak' Dios cyey, jaj Dios e jatz k'inte Jesús cyxol cyimne. Ju' tzunj cjawetz tii'n Dios cyxumlala juntl maj tuj cyamecy, tisenxj e jatz tii'nxin ja Jesús cyxol cyimne. Bix cbinel tu'nxin ju'wa tu'n Espíritu Santo at tuj cyanema.

¹² Ju' tzunj, key hermano, mintii' nko oc chk'et ti'j tu'n t-xi' kniman alcye tajbil knaabl aj il. ¹³ Ka ma ko niman knaabl aj il, ko cymeltzen tu'n te junx maj. Pero ka tuya tonbil Espíritu Santo n-el kxoo'n jka' taj knaabl aj il, ko camaltzen kchunk'lal te junx maj. ¹⁴ At kchunk'lal te junx maj cuma tcwal Dios ko'. Kej nche'x lpe ti'j Espíritu Santo, ejee'tzen tcwal Diosja. ¹⁵ Tcwal Dios ko'. Yaa'n nuk tmaaxin ejoo'. Ya mintl ko tziyel twitz Dios tisen nejl, cuma n-el kniy' ti'j o ko oc tcwal Dios. Ju' tzunj oj t-xi' kk'olbe'n Dios, "Kman Dios" tzi kbel. ¹⁶ Nxi' kkba'n ju'wa cuma jaj Espíritu Santo tzin tkba'n tuj kanem tcwal Dios ko'. ¹⁷ Cuma tcwal Dios ko', ckiik'eltzen kkab te Dios, cuma ja tzunxin Kman. Bix ckiik'el kkab tuya Cristo, cuma niy'x q'uixc'aj ku'n ti'jxin, tisenx texin iy'x q'uixc'aj tu'nxin nejl. Ka eto' tuyaxin amale niy'xet q'uixc'aj ku'n tu'n tlajxin, ko temeltzen tuyaxin oj tiik'en texin jawnex tkabxin.

¹⁸ Pero amale niy'xet q'uixc'aj ku'n, pero tuj nwitzaj kej q'uixc'aj te ja'lewe yaa'n nimxix twitz jawnex chojbil ctk'a' Dios te cyxel la' alcye jun k'ij. ¹⁹ Tuj tzunj k'ij oj cyiik'ente tcwal Dios cykab, cpomel baj twi' cykilca q'uixc'aj twitz tx'otx'. Ju' tzunj, cykilca kej tbinche Dios nchi ayon tuya cykil cyc'u'j alcyej k'ij tzul. ²⁰ Kej tbinchbil Dios yaa'n tuj tbanel ete' ja'lewe. Pero yaa'n cyu'nx tu'n cyten tuj il, sino tu'nj toclen tpaltel tu'n tneel xjal. Ju' tzunj nayet jba'n tyem tzul tu'n cykilca, ²¹ cuma cykilcaj e baj bint tu'n Dios cco'pjel tuj tbeyle cyamecy oj tul cana jk'ij tk'a Dios cykab tcwal. ²² Jq'uixc'aj niy'x tu'n entera twitz tx'otx' ja'lewe tisen

tchyonel tal jun xuuj. Niy'x tchyonel tu'n, pero tk'a' jun tal. Ju'x xsunj cykilca e bint tu'n Dios. At tuj tchyonel ja'lewe, pero nchi ayon ti'j ba'n tzul. ²³ Bix yaa'n nuk ejee'j e baj bint tu'n Dios at tuj tchyonel, sino kuyax. Amale ot tzaj tk'o'n Dios Espiritu Santo ke te yec'bilte tzul mastl mas yaj, pero niy'x tchyonel ku'n ja'lewe, cuma mina'x tpon jk'ij oj tchic'ajax te junx maj tcwal Dios ko', jaxj k'ij oj tk'onte Dios ac'aj kxumal. ²⁴ Tej klet, eltzen kniy' ti'j at ttzajlel tk'o'n Dios juntl ba'n ke la' alcyce jun k'ij. Nuket o tzul, yaa'ntle il ti'j tu'n kyonte. ¿Ti c'oquel tyo'n jun xjal te nuket ya o k'oj? ²⁵ Pero mina'x klonte jchojbil ke tzul. Ju' tzunj mi'n baj kpasensya tu'n kyonte j-ac'aj kxumal.

²⁶ Tisexsen kpasensya n-onen ki'j tu'n tiy'x q'uixc'aj ku'n, jax ju'x n-onen Espiritu Santo ki'j tu'n tiy'x q'uixc'aj ku'n. Min ktzki'n alcyce onbil cxe'l kkanen te Dios tu'n tiy'x q'uixc'aj ku'n, pero Espiritu Santo nna'n Dios ki'j cyuya yol min cnet ku'n. ²⁷ Iy'nen tilbil Dios ti'j alcyce niy' tuj kc'u'j, bix n-el tniy'xin ti'j ti toc tu'n Espiritu Santo oj nna'n Dios ki'j, cuma jnna'n Espiritu Santo Dios ki'j, junx ta' tuyaj taj Dios te ke.

Cykilca cwel ti'j ku'n, nuk tu'n Cristo

²⁸ Amale niy'xet q'uixc'aj ku'n, pero ktzki'n nak'anan Dios ti'j cykil q'uixc'aj n-oc ki'j, tu'ntzen cyajben te onbil ke, ejoo'j n-oc tak' Dios ke. Ncawen Dios tibaj cykilca nbaj, tu'ntzen at jun ba'n te ke, ejoo'j at tu'n kpon tuj j-o baj tninc'u'n Dios ti'j te ke. ²⁹ Cykilca q'uelel ba'n, cuma o baj tninc'u'n Dios ju'wa. Jatxe tuj tneel tzk'i'n Dios alcyce xjal at tu'n cyxi' lpe ti'j, bix jatxe tuj tneel o baj tninc'u'nxin tu'n toc knaabl tisenj te Tcwalxin, tu'ntzen at nim cwal tisen Tcwalxin, Jesús, bix tu'ntzen tchic'ajax jtcwalxin mas jawnex cyxol cykilca cwel. ³⁰ Ju'tzen e baj tninc'u'n Dios cyi'j kej xjal at tu'n cyoc lpe ti'jxin. E baj tninc'u'nxin tuj tneel tu'n koc te tcwalxin, bix tu'n jiquen ko' twitzxin tu'n t-xtalbilxin, bix tu'n tk'oj te ke jun jawnex kchunk'lal te junx maj, ejoo'j jiquen twitzxin.

³¹ ¿Tii'ntzen tuj cywitza ja yol lu? Cuma o baj tninc'u'n Dios cykilca lu te ke, ¿ppjelpatzen kc'u'j oj nchi k'ojl xjal ki'j? Min. Mlay chi xcye ki'j, cuma Dios n-onen ki'j. ³² Yaa'n xpi'x Dios te ke, sino e tzaj tk'o'nxin Tcwalxin te ke tu'n tcyim te kxel cykilca ko'. Cuma o tzaj tk'o'nxin Tcwalxin te ke, ju' tzunj jaxte czaal tk'o'nxin cykilcatl xtalbil te ke. ³³ ¿Atpa jun xjal jac'a tz'oc tkanbil twitz Dios ki'j, ejoo' t-xjalxin? Min-al, cuma o k'oj ke tu'n Dios tu'n jiquen ko' twitzxin tu'n Cristo. ³⁴ ¿Atpa jun xjal jac'a kbante te Dios tu'n kxi' tuj castiwa? Min-al, cuma at Cristo Jesús te onl ke. E cyimxin, bix e jatz itz'jxin juntl maj tuj cyamecy, bix at-xin tuj tmank'ab Dios tuj cya'j ja'lewe te yolel ki'j twitz Dios. ³⁵ Inbaj ki'j, ¿tzimpa tyeeec'an ka min tz'oc'kak' te Cristo? ¡Min! Oj niy'x q'uixc'aj ku'n, oj nbaj kc'u'j, oj n-el cyiig'uen xjal ejoo' bix nchi oc lpe ki'j te tzyulte ke, oj at tak' weyay ke, oj mintii'tl ch'in kxbalen, bix oj at nim sey'pajlenel ki'j, bix oj cyaj xjal tu'n kcuub byet, t-xol entera kej lu min tzin tyeeec'a nwe' tk'ak'bil tc'u'j Cristo ki'j. ³⁶ Tzin tkba'n tyol Dios niy'x q'uixc'aj cyu'n kej t-xjal Dios. Tzi cyjulu: "E xi' cykba'n t-xjal Dios te Dios: 'Nuk tu'nj t-xjala ejoo'ya, coc'a nchi jyon xjal ki'ja tu'n kbyeta cyu'n. Tuj cywitz tisen carnal ko'ya tu'n kbyeta,' t'zike t-xjal Dios te Dios," tzi tyol Dios. ³⁷ Pero amale niy'xet q'uixc'aj ku'n, pero ko camal te junx maj tibaj cykilca nbaj ki'j. Ko kamal tu'n Cristo, jaj xjal n-oc kak' te. ³⁸ Tuj nwitz jaxte mintii' jyon ba'n tu'n tcaman ki'j tu'n kel pax tuya Dios. Cyamecyle, bix cykilcaj tik'ch nbaj ki'j tuj kchunk'lal, ke tsanjel Diosle, ke bimanle, ke cawel-le, jtik'ch nbaj ki'j ja'lewe, bix ppjel ki'j nchi'j, ³⁹ mi nuk ejee'j ete' jawne, bix mi nuk ejee'j ete' cubne, bix nuk alcyexja o bint tu'n Dios, mlay bint cyu'n tu'n twe' tk'ak'bil tc'u'j Dios ki'j tu'n Kaaw Jesucristo.

9

Scy'o'n ke aj Israel tu'n Dios

¹ Key hermano, nimxsen bisbajil at wi'ja cyi'j ntanema, kej xjal te Israel. Ti'j tzunja bisbajil lu, ttzki'n Cristo nchin yolena jaxxix. Yaa'n nchin xtak'ena. Jax ju'x wanema tzin tkba'n nchin yolena jaxxix, bix mlay xtak'en wanema tjak' tcawbil Espiritu Santo. ² Nim nchin bisena cyi'j ke te ntanema, bix tchyonel nbisa tuj wanema mlay we'. ³ Nuket jac'a bint tu'n cyclet ke ntanema tu'nj ojat npaxa tuya Cristo tu'n nxi'ya tuj castiwa te cyxel, jac'a bint wu'na. ⁴ Aj Israela, ejee'tzen xjalja e tsicy' Dios tu'n cyoc te ttanem. Ja jawnex Dios e ten cyxol, bix e cyaj tkba'nxin nimc'a te cye, bix e cyaj tk'o'nxin tleyxin te cye, bix e cyaj tyeeec'anxin ti tten tu'n tjaw cynimsa'n Dios, bix e cyaj tkba'nxin nim xtalbil tu'n tk'ontexin cye. ⁵ Jatzen cyi'y'jil ja Abraham bix ja Isaac bix ja Jacob, bix cyxoltzen aj Israel etza itz'j Cristo tej tocxin te xjal, jaxj xjal scy'o'n tu'n Dios te cawel, jajj xjal ncawen tibaj cykilca at, jatzen xjal mero Dios. Cy'iwla'nxit te junx maj. Ju'xit tzuna.

⁶ Amale yaa'nt nim aj Israel o clet, ¿cxe'lpitzen kkba'n min e japan Dios ti' tyol cye aj Israel tu'n cyoc te ttanemxin? Min, cuma yaa'n cykilca xjal tiy'jil Israel kej mero aj Israelix tuj twitz Dios. ⁷ C'oquel cyc'u'ja ti'j yaa'n cykilcaj el itz'j ti' Abraham tcwalet-xin tuj twitz Dios. Tzi Dios te Abraham cyjulu: "Ti'j tcwala Isaac q'uelel itz'j kej tchmana jmero tiy'jila tuj

nwitzza, yaa'n ti' tcwala Ismael," tzi Dios. ⁸ Ja yol lu tzin tkba'n yaa'n cykilcaj xjal el itz'j ti' Abraham jmero t-xjal Dios. Kej mero tiy'jil Abraham tuj twitz Dios ejee'j xjalja oc te tiy'jil Abraham nuk tu'nj e tkbaxin tu'n tbint tu'nxin. ⁹ C'oqucl cyc'u'ja ti'j Isaac itz'j nuk tu'n t-xtalbil Dios. E cyaj tkba'n Dios te Abraham cyjulu: "Tuj juntu jnabk'i ja'lewe otk tzaj itz'j jun tal tij t-xu'la Sara," tzi Dios.

¹⁰ Yaa'ntzen nuk o'cx kej tcwal Abraham tzin tyeeec'an yaa'n cykilca te tiy'jil Abraham t-xjal Dioske, sino jax ju'x ke tal Rebeca tzin tyeeec'an ja lu mas, cuma o'cx nuk jun xinak tu'nxuj, ja Isaac, bix e tzaj ca'ba talxuj yo'kke. ¹¹ Amale mitkna'xet cyitz'j yo'k, bix amale mintii' otk bint cyu'n, mi nuk ba'n bix mi nuk ka', pero junx oc te tiy'jil Abraham, ja Jacob. E scy'et Jacob tu'n Dios yaa'n tu'nj ba'n e bint tu'nxin, sino cuma ju' e tajbe Dios. Tu'ntzen tbint tajbil Dios, ¹² e xi' tkba'nxin te Rebeca cyjulu: "Jaj tala e tzaj itz'j tneel cyjel toclen mas cubnin twitzj te tiz'en," tzi Dios. ¹³ Bix ju' e baja. Tzi Dios tuj tyol cyjulu: "Jacob oc te nxjala bix oc wachena, pero Esaú el nxoo'na," tzi Dios tuj tyol.

¹⁴ Cuma tzin tscy'u'n Dios jun bix n-el t-xoo'n Dios juntu, ¿cxe'lpa kkba'n yaa'n ba'n Dios? Min. ¹⁵ Jaxin kbalte tu'n tbint alcyce tajxin. E xi' tkba'n Dios te Moisés cyjulu: "Ka waja tu'n t-xi' nk'o'na jun xtalbil te jun xjal, cxe'ltzen nk'o'na jun xtalbil te. Bix ka waja tz'oc nk'o'na lastim te jun xjal, c'oqueltzen nk'o'na lastim te," tzi Dios te Moisés. ¹⁶ Ju' tzunj tzinzen ta' nk'on Dios lastim te jun xjal yaa'n tu'n ja xjal kbalte, bix yaa'n tu'nj n-oc tipen xjal tu'n tk'on Dios lastim te, sino cuma ja Dios kbalte, jaxj Dios at tk'ak'bil tc'u'j ki'j. ¹⁷ At juntu tumel tuj tyol Dios tzin tyeeec'an nbint tu'n Dios alcyce taj tu'n tbint. E xi' tkba'n Dios te cawel te Egipto cyjulu: "O txi' nk'o'na jay tu'n toca te cawel, tu'ntzen tchic'ajax jawnex weya wipemal oj nxycyeya tibaja, bix tu'ntzen tel tpoctal o chin xcyeya tibaja tuj cykilca twitz tx'otx'," tzi Dios te cawel te Egipto. ¹⁸ Ju'tzen q'uelele kniy' ti'j ka taj Dios tu'n t-xi' tk'o'n lastim te jun xjal, cxe'ltzen tk'o'n lastim te, bix ka tajxin tu'n t-xi' tk'o'nxin amle'n te jun aj il tu'ntzen ttz'iy tk'o'j ti' Dios, cxe'ltzen ttzakpi'n Dios.

¹⁹ Kape cykba'y weya cyjulu: "Ka mlay tz'el t-xoo'n jun xjal jti taj Dios, entonces jatzen Dios yaa'n tzinzen tyol of kbante at til xjal," kape tzi cybela. ²⁰ Ka ju' ncub cybisena, ¿tikentzen nchi jaw yolena ti' Dios ju'wa? Mintii' cyey cyoclen tu'n cyyolena ti' Dios ju'wa, cuma nuk xjalkey. ¿Ba'mpa tu'n tjaw yolen jun wicy'il tuya binchal te cyjulu: "¿Tikentzen o tbinchay inayena ju'wa?" tzipatzen wicy'il? Min, yaa'n ba'n, ²¹ cuma jbinchal wicy'il at toclen tu'n tjyonte alcyce taj tu'n tbint tu'n tuya xcab tx'otx'. Ka tajxin bint jun wicy'il cyeca tcy'e'nc, jaxin kbalte. Bix ka tajxin bint jun wicy'il ajnintz tcy'e'nc, jax ju'xa at toclenxin tu'n tbint tu'nxin ju'wa. ²² Tisentzen jun binchal wicy'il ja kbalte ti tajxin bint tuya xcab tx'otx', jax ju'xsen te Dios, ja kbalte alcyce tajxin bint cyuya aj il. At toclen Dios tu'n ttzaj tk'o'xin cyi'j aj il bix ba'n tu'nxin tu'n t-xi' tyeeec'anxin at nim tipemalxin tu'n t-xi' tk'o'nxin cyncastiwa. Pero amale e bajet tninc'u'nxin tu'n t-xi' tk'o'nxin cyncastiwa, pero iy'x tu'nxin tuya nim tpsensyaxin cyi'j xjal at cyxi'lel tuj cyncastiwa. Katzen ju'wa, ¿tikentzen tzin cykba'na yaa'n ba'n Dios? ²³ Iy'x ke aj il tu'nxin tuya tpsensyaxin tu'ntzen t-xi' tk'o'nxin tk'ak'bil tc'u'jxin cyibaj. E baj tninc'u'nxin jatxe ootxa tu'n t-xi' tk'o'nxin jun jawnexen xtalbil cye bix tu'n cyten tuyaxin tuj cya'j. ²⁴ Bix kej xjal at tu'n cyiik'ente t-xtalbilxin, ejoo'tzen. O ko ttxocxin tu'n koc te t-xjalxin. Bix o ttxocxin yaa'n nuk ejee' judío, sino cyuyax kej xjal yaa'n judío. ²⁵ Jax wu'na, cuma e tkba Dios tuj tu'j tz'i'ben tu'n Oseas cyjulu: "Kej xjal yaa'n n-xjala nejl, cxe'l nk'o'na cye tu'n cyoc te nxjala. Bix jtnom yaa'n te weya nejl, ja tzunja c'oqucl tak' weya. ²⁶ Cyuj jlugar jaa' e kbaja te cye yaa'n nxjalke, cyujxse lugar c'oqucl cybi te tcwal Dios i'tz," tzi Dios.

²⁷ Yaltzen cye Israel, c'oqucl cyc'u'ja ti'j ti toc tu'n Isaías tuj tyol Dios cyi'j. Tzi cyjulu: "Amale nimet cybah aj Israel, tisen arena ttzii' mar, pero nuk juun cye chi cletel. ²⁸ Tnimal mlay chi clet, cuma cbinel tu'n Dios j-e tkba tu'n tbint tu'n. Cxe'l tk'o'nxin castiwa cyibaj xjal te junx maj bix tuj ajkelbil," tzi Isaías, tyolel Dios. ²⁹ Bix jax ju'x e tkba Isaías cyi'j ttanem Dios cyjulu: "Nuket min e cyaj tk'o'n Dios juun kxol tu'n cycyaj itz'j, jaj Dios ncawen tibaj cykilca at, ottzele ko baj twitz tx'otx' te junx maj, tisenxsen tej cyucub baj kej xjal te Sodoma bix te Gomorra," tzi Isaías cyi'j aj Israel te yec'bil yaa'n cykilca Israel chi cletel.

Jun xjal tu'nj toclabl ti' Cristo jiquen tten twitz Dios

³⁰ Ju' tzunj, ¿altzen cye q'ueel kniy' ti'j? Q'ueel kniy' ti'j kej xjal min oc cyipen tu'n cyoc jiquen twitz Dios nejl, otzen k'oj cye tu'n cyoc jiquen twitz Dios ja'lewe, ejee'j xjal yaa'n judío, cuma o tz'oc ke cyc'u'j ti' Dios. ³¹ Ja tzunkej aj Israel min e camanke tu'n cyoc jiquen, amale oquet cyipen tu'n cyxi' lpe ti' jun ley tu'n cyoc jiquen twitz Dios. ³² ¿Tikentzen min e caman ke judío? Min e camanke tu'n cyoc jiquen twitz Dios, cuma min oc ke cyc'u'j ti' colbil tzin toyen Dios, sino o'cx oc ke cyc'u'j ti'j ba'n e bint cyu'n. Pero tuj cywitz judío min ajben colbil e tzaj tk'o'n Dios cye. Tuj cywitz tisen jun xak tuj be n-oc texpaj twi' cyken ti'j. Bix ju' tzunj e'la cyiiq'uen. ³³ Otk tkba Dios nejl ju' tu'n tbaja. Tzi Dios cyjulu: "C'oqucl cyc'u'ja ti'j

cxe'l nk'o'na jun Clol cye te cytanem nxjala. Pero tuj cywitz nuk tisen jun xak tuj be nchi jaw pitc'aj xjal ti'j bix tisen jun tzlom a'bj nchi jaw jilpaj twitz. Pero kej xjal n-oc ke cyc'u'j ti'j Clol cye cxe'l nk'o'na, chi cleteltzen te junx maj. Yaa'n nuk cyajx c'oquel ke cyc'u'j ti' Clol cye," tzi Dios tuj tyol.

10

¹ Key hermano, tuya cykil nc'u'ja waja tu'n cyclet ntanema, kej xjal te Israel. Cyi'j'tzen nchin na'na Dios. ² Nchin na'na Dios cyi'j cuma ntzki'na amale nimet cyaj tu'n cyajben te Dios, pero min tz'el cyniy' ti'j tbe Dios. ³ Cycy'i tz'el cyniy' ti'j ja te Dios k'olte tu'n cyel jiquen twitzxin. Cyaj chi oc jiquen twitzxin nuk tu'nj cye nbint cyu'n. Ju' tzunj o tz'el cyxoo'n jcolbil e tajbe Dios tu'n t-xi' tk'o'n cye. ⁴ O chi tzpet, cuma e k'o'j ley cye tu'n Dios nuk tu'n tel cyniy' ti'j nuk tu'n toc ke cyc'u'j ti' Cristo, ba'ntzen cyoc jiquen twitz Dios.

⁵ Jatxe ootxa e cub ttz'i'ben Moisés ti tten tu'n toc jun xjal jiquen tu'n ley. E cub ttz'i'benxin il ti'j cnimal jun xjal cykil ley tu'n tel jiquen twitz Dios. ⁶ Pero at juntl tumel tu'n koc jiquen twitz Dios, jaj tu'n kocslabl ti' Cristo, bix yaa'n cyiw tu'n tcnet ku'n. Tz'i'ben ta' ja lu: "Mi'n cub cybisena at jun il ti'j tu'n tjapan jun xjal maa tuj cya'j te k'ilte Cristo tu'ntzen cycleta. ⁷ Bix mi'n cub cybisena at jun il ti'j tu'n tcu'x jun xjal maa tuj cynajbil cyimne te k'iljawtze Cristo cyxol cyimne," tzi tyol Dios. ⁸ Jcolbil ke yaa'n nakch ta', sino nka ta', tu'ntzen tcnet. Tzin tkba'n tyol Dios cyjulu: "Nka ta' nyola cyuyey. Nkbaj cyxola, bix tocx tuj cyanema," tzi tyol Dios ti'j colbil cye xjal. Bix jajx tyol Dios jweya tzin nkba'n. ⁹ Ja tzunj lu. Ka ma cykbay tuya cytziy cywitz xjal ka ja Jesús Cyaawey, bix ka ma cyocslay tuj cyanema e jatz ti'i'n Dios jaxin cyxol cyimne, chi cletel tzuna tu'n, ¹⁰ cuma ka ma tz'oc ke tc'u'j jun xjal ti'j ti' toc tu'n Dios tuya cykil tc'u'j, jiquentzen ta' twitzxin, bix ka ma tkba cye xjal ka tuj tcwent Jesús ta', cleteltzen. ¹¹ Jaxte ko cletel ka ma tz'oc ke kc'u'j ti' Cristo, cuma tzi tyol Dios cyjulu: "Nuk aljxe xjal n-oc ke tc'u'j ti' Cristo, mi'n txi' tuj il," tzi tyol Dios. ¹² C'oquel cyc'u'ja ti'j yol "nuk aljxe xjal." Ju' japenina twitz Dios min-al jun xjal mas jawnxe twitz juntl xjal, judiole, yaa'nle judío, cuma jaxin cawel tibaj cykilca ocslal. Ntzaj tk'o'nxin t-xtalbilxin te cykilca kej xjal tzin cykanen colbil cye te Kaaw. ¹³ "Nuk aljxe xjal tzin cykanen colbil cye te Kaaw, cleteltzen," tzi tyol Dios.

¹⁴ Ja tzunkej xjal judío, min e cykane colbil cye te Kaaw. Kape ctzaal cykanena weya, ¿ti tten tu'n cykanen colbil cye texin ka min o tz'el cyniy' ti'j il ti'j tu'n toc ke cyc'u'j ti'jxin? ¿Bix ti tten tu'n tel cyniy' ti'j il ti'j tu'n toc ke cyc'u'j ti'jxin ka min o tz'oc cybi'n tpochalxin? ¿Bix ti tten tu'n toc cybi'n tpochalxin ka min-al kbalte tpochalxin cye? ¹⁵ ¿Bix ti tten tu'n tex jun te kbalte ka min-al e xi' chk'onte? tzikey. Pero cxe'l nkba'na cyey kej kbalte tpochalxin o k'o'j cye tu'n Dios. Tzi tyol Dios cyjulu: "Nim tzalajeb'l at ti'j cypomlen kej kbalte tyol Dios, kej nchi kba'n ti tten tu'n cycub xjal tuj ttzyal tuya Dios," tzi tyol Dios te yec'bil e xi' tsma'n Dios ke tyolel. ¹⁶ Pero amale e kbajet ba'n tpochal cye aj Israel, pero yaa'n nim e cyniman jba'n tpochal. E xi' tkba'n Isaías tuj tyol Dios cyjulu: "Kman Dios, tisenca min-al jun xjal o nimante jtyola o ko k'umena," tzi Isaías te yec'bil el cyxoo'n aj Israel tyol Dios. ¹⁷ Jaxte il ti'j c'oquel cybi'n xjal alcyey tzin tkba'n Dios tu'ntzen toc ke cyc'u'j ti'j tzin tkba'nxin, bix jaxte il ti'j cpomel tyol Dios cyxol tu'ntzen toc cybi'n. ¹⁸ Pero cxe'l nkanena cyey, ¿mimpatzen o tz'oc cybi'n kej aj Israel? Cxe'l nkba'na cyey o tz'oc cybi'n. C'oquel cyc'u'ja ti'j ti' toc tu'n tyol Dios. Tzi cyjulu: "Jcyoyol kbalte tyol Dios o ponte tuj cykilca lugar tuj cykilca twitz tx'otx'," tzi tyol Dios. ¹⁹ ¿Pero elpa cyniy' aj Israel ti'j j-oc cybi'n? Cxe'l nkba'na cyey el cyniy' ti'j, cuma ¿eltlpa cyniy' kej xjal yaa'n judío ti'j, ejee'j xjal min el cyniy' ti'j tuj cywitz judío? El cyniy' ti'j. C'oquel cyc'u'ja ti'j ti' toc tu'n Moisés tuj tyol Dios: "Tzi Dios cye aj Israel cyjulu: 'At jun wik xjal yaa'n nxjala. Tuj cywitza min tz'el cyniy' ti'j. Pero chi oquel te nxjala, bix cchyl cyc'u'ja tu'n, bix cjawel cyk'o'ja ti'j,' tzi Dios cye aj Israel," tzi Moisés. ²⁰ Mas yaj e xi' tkba'n Isaías cyjulu tuj tzinenix: "Key aj Israel, cxe'l nkba'na cyey ti' toc tu'n Dios cyi'j kej xjal yaa'n te Israel. Tzi Dios cyjulu: 'Kej xjal min e jyonke wi'ja nejl, otzen chin cneta cyu'n. Kej xjal min oc cyipen tu'n tel cyniy' wi'ja, ya ja'lewe n-eltzen cyniy' wi'ja,' tzi Dios," e tkba Isaías. ²¹ Pero cyi'j aj Israel, e tkba Dios te Isaías cyjulu: "Tuj cykil tyem bix tuya cykil nc'u'ja o ntxoca kej aj Israel tu'n cyxi' lpe wi'ja, pero min o cyniman. Min o cykey tuyaj waja," tzi Dios.

Ju' tzunj q'uelel kniy' ti'j kej aj Israel min e cykanen colbil cye te Kaaw. Yaa'n tu'nj min oc cybi'n j-e tkba Dios bix yaa'n tu'nj min el cyniy' ti'j e tkbaxin, sino cuma el cyxoo'n j-e tkbaxin.

11

Alcye kej chi cletel cyxol aj Israel

¹ Amale elet cyxoo'n ke t-xjal Dios j-e tkba Dios, ¿pero opa tz'el t-xoo'n Dios ejee'? Min. Inayena jun tumel min o tz'el t-xoo'nxin cykilca, cuma jun aj Israel ken weya, pero min o

tz'el t-xoo'nxin inayena. T-xe'chel Abraham kena, bix te Benjamín kena. ²Kej xjal o chi oc te t-xjal Dios, ejee'j ya ttzki'ntlxin jatxe tuj tneel at tu'n cyoc te t-xjalxin, min o tz'el t-xoo'nxin. Tuj cykil tyem at juun xjal e xi' lpeke ti' Dios. ¿Mimpa cytzki'na ti toc tuj tyol Dios ti' Elías tej toc tcanbilxin twitz Dios cyi' aj Israel? ³E xi' tkba'n Elías te Kaaw cyjulu: "Taata, o cub cyboyo'n aj Israel cykilca te tyolela. O cub cyxiten ke altar jaa' e na'na ko'ya tbiy. Bix yal ja'lewe nuk inayena o chin cyaj itz'j cyu'n, bix nchi jyon wi'ja tu'n ncuba," tzi Elías. ⁴¿Pero ti e tzaj tkba'n Kaaw texin? E tzaj tkba'n cyjulu: "Yaa'n tjunala o cyaja, cuma at wuuk miltl xinak nchi na'n nbi'ya, bix min o cub cych'ecy twitz sant Baal tbi te cynaabl Dios," tzi Kaaw te Elías. ⁵Bix jax ju'x ja'lewe. At juun xjal cyxol aj Israel ja'lewe o chi oc te t-xjal Dios. Bix o chi oc te t-xjalxin nuk tu'nj o tzaj tk'o'nxin t-xtalbilxin cye. ⁶Cuma t-xjal Dios ko' tu'nj t-xtalbil Dios, mlaytzen txi' kkba'n t-xjal Dios ko' tu'nj ba'n o bint ku'n. Ka tu'nj ba'n o bint ku'n, yaa'ntltzen tu'nj t-xtalbil Dios.

⁷Ju' tzunj, ¿ti q'uelela kniy' ti'j? Q'uelel kniy' ti'j kej aj Israel n-oc cyipen tu'n cyoc jiquen twitz Dios, pero min o chi caman tu'n cyoc jiquen twitzxin. Pero kej cyxol aj Israel o tz'oc ke cyc'u'j ti' Dios, te cye o k'oj tu'n cyoc jiquen twitzxin. Yaltzen niy'tlkej, cycy'i e xi' cyniman Dios, ⁸tisen tzin tkba'n tuj tyol Dios: "E cyaj tk'o'n Dios ejee' tu'n cyten tuya jun cyanem cyimne, bix tuya jun cynaabl mintii' n-ocx tuj, tisenca min tz'ex tuj cywi'. Ju' cyten nejl, bix ju'x cyten ja'lewe," tzi tyol Dios. ⁹Ejee' tzunja tisenj e tkba David. Tzi David cyi'j aj Israel cyjulu: "Jcyk'inemal c'oquel te tzyul cye nuk tu'n t-xi' tii'n ejee' tuj il. Jatzen cycastiwaj. ¹⁰Chi cyjel tuj kloj tu'n mi'n tz'el cyniy' ti'j. Bix cyil chinelxsen tisen jun cyiketx mlay chi jaw tjak'," tzi David tuj tyol Dios.

Jun colbil cye xjal yaa'n judío

¹¹N-eltzen kniy' ti'j o tz'el cyxoo'n aj Israel ja Cristo. Pero cxe'l nkanena cyey, ¿q'uelelpa cyxoo'n mas yaj? Min, yaa'n te junx maj o tz'el cyxoo'n. Pero tej tel cyxoo'n ja Cristo nejl, ja tzunja cyil oten tz'ajben tu'n cyclet kej xjal yaa'n Israel. Bix ja lu c'ajbel cye aj Israel, cuma oj cylonte tk'a Dios te cyekej yaa'n Israel tu'n cyclet, c'oqueltzen loch' cyc'u'j ti'j tu'ntzen ejee' tu'n cyclet. ¹²Cuma o tz'ajben te cyej xjal yaa'n judío tu'n tk'o'j xtalbil cye tu'nj tel-len cyxoo'n aj Israel ja Cristo, bix cuma o tz'ajben te cyej xjal yaa'n judío tu'n cyiik'ente jun ba'n tu'nj tel-len cyiik'uen aj judío jxtalbil e tak' Dios, ¿yaa'mpatzele jax nimxsen mastl xtalbil cyyiik'el kej yaa'n judío oj tul jk'ij tu'n cyocslan kej xjal judío ti' Cristo?

¹³Key xjal yaa'n judío, il ti'j q'uelel cyni'ya ti'j tu'nj oj cyocslan ntanema ti' Cristo, c'ajbeltzen waak'ena tuj nwitzza. Amale sma'nt kena tu'n Cristo tu'n nk'umena tpochalxin te cyej xjal yaa'n judío, ¹⁴waja tu'n tajben waak'ena cye ntanema. Waja tu'n toc cycye'yen kej xjal judío jxtalbil e k'oj cye tuj tneel pero tu'n tel-len cyiik'uen, o k'oj te cyej yaa'n judío, tu'ntzen tel cyc'u'j ti'j ja xtalbil lu te cyex, tu'ntzen cyclet. ¹⁵Bix ka ma chi clet ke ntanema, ¿c'ajbelpa loj lu te cyej xjal yaa'n judío? Oc. Cuma o tz'ajben te cyej yaa'n judío tu'n cyoc tuj ttzyal tuya Dios ti'j tel-len cyiik'uen ke judío ti' Cristo, ju' tzunj mas c'ajbel te cyej yaa'n judío ka ma chi ocslan kej judío ti' Cristo, cuma chi jawetz itz'j tuj cyamecy.

¹⁶Kej xjal judío t-xjal Dioske tuj tneel. ¿Bix ju'xpele chi pomela baja? Cxe'l nkba'na cyej jun tumel. Ka at jun cluj ttx'otx'el pan, bixsen q'uelel pi'xet jun tkiy' te niy'bebl, ka ba'n j'q'uelel pi'xet, q'ueleltzen kniy' ti'j ba'n entera pan, cuma junx ttx'otx'el. Jax ju'x jun tzee'. Ka ba'n tloq'uel, jax ba'n ke tk'ab, cuma jax tzee'.

¹⁷Ja'lewe, nim judío yaa'n t-xjal Dios. Ejee'tzen tisen cab tk'ab jun wik tzee' olivo tbi min e cyak' cywitz. Ju'tzen e'la tx'ometke ti' tzee'. Ejee'tltzen cyey ocslal yaa'n judío tisen tk'ab juntl wik tzee' o chi oc wi't ti' then olivo. Ya junx elinakey cyuja t-xjal Dios, bix o k'oj cyey jax xtalbil, tisex kej tk'ab o chi oc wi't junx ncyiik'en cyipemal tu'n junx cyloq'uel. ¹⁸Pero amale ot chi oca t-xjal Dios, mi'n cub cybisena ejee'y mas ba'n cywitz judío. Ka cyaja ncub cybisena mas ba'nkey, q'uelel cyni'ya ti'j nuk tk'abkey, bix yaa'n tk'ab ntz'isente tloc', sino ja tloc' ntz'isente ke tk'ab.

¹⁹Kape at juun cyey cxe'l cykba'na cyjulu: "Ejoo'ya xjal yaa'n judío mas nintzaj cywitz judío, cuma kej judío o chi el tx'omet tu'n koctlke te cyxel," tzikey. ²⁰Jax cyu'na el tx'omet ke judío, pero nuk tu'n min oc ke cyc'u'j ti' Cristo. Bix ke cyey o chi oca te tajlal nuk tu'nj cyocslabla ti' Cristo. Ju' tzunj mi'n cub cybisena mas nintzajkey, sino c'oquel cyc'u'ja ti'j ti e baj cye judío. ²¹Cuma el ttx'oman Dios kej mero t-xjal tej min e cybi tyolxin, ju' tzunj cyey, q'uelel ttx'omanxin ejee'y ka min ma cybi tyolxin.

²²Ju' tzunj, il ti'j q'uelel cyni'ya ti'j tzin tk'o'n Dios xtalbil, pero jax ju'x tzin tk'o'n Dios castiwa. E tak'xin castiwa cyej judío e cub tz'ak tuj il, pero te cyej e tak'xin t-xtalbilxin cyey. Bix tk'a'xxin t-xtalbilxin cyey ka min ma cyaj cycye'yena cyocslabla ti' Cristo. Pero ka ma cyaj cyxoo'na cyocslabla ti' Cristo, Diostzen q'uelel tx'omente cyey, tisen tej tel ttx'omentexin ke judío. ²³Yaltzen ke judío, ka ma tzul tuj cyc'u'j bix ka ma tz'oc ke cyc'u'j ti' Cristo, chi oqueltzen te t-xjal Dios juntl maj, tisentzen o tz'el tx'omet tk'ab tzee' bix c'oquel

juntl maj, cuma ba'n thint jlu tu'n Dios. ²⁴ Tej cyoca t-xjal Dios, ejee' tzuna tisentzen oj toc wi't juntl wik ttze'yel lo'pj ti' tken olivo, cyiw tu'n thint. Cuma ba'n tu'n thint tu'n Dios ju'wa, yaa'ntzen nim t-xi'len tu'n thint tu'nxin tu'n cyoc judío te t-xjalxin juntl maj, cuma ejee' tisen mero tken olivo tuj tneel, yaa'n tisen juntl wik tzee' tisen ejee'y.

Kej xjal aj Israel chi oquel te t-xjal Dios juntl maj

²⁵ Key hermano, cxe'l nkba'na jun tumel cyey min el cyni'ya ti'j nejl. Pero ja'lewe waja tu'n tel cyni'ya ti'j, tu'ntzen mi'n cub cybisena mas jawnexkey cywitz aj Israel. Kej aj Israel chi oquel te t-xjal Dios juntl maj la' alcey jun k'ij. Q'uelel cyxoo'n ti taj Dios hasta ojxe cykilcaj xjal yaa'n aj Israel at tu'n cyoc te t-xjal Dios otk chi oc. ²⁶ Ojtzen tpon tumel alcey k'ij, cykilcatzen aj Israel chi cletel. Ntzaj tkba'n tyol Dios cyjulu: "Jclol cye xjal tzul tzalu te tnom te Dios, Sión tbi, bix q'uelel tii'n cyil ke tiy'jil Jacob," tzi tyol Dios. ²⁷ Bix jax ju'x tzin tkba'n Dios tuj tyol cyjulu: "At jun ntrata cyuya aj Israel tu'n cyoc te ntanema, bix oj tel wii'na cyil, otktzen nnimana ntrata cyuya," tzi Dios. ²⁸ Kej judío o tz'el cyxoo'n tpochal Clol cye, bix ju' tzunj aj k'ojke ti' Dios tuj twitz Dios. Tu'nj tel-len cyxoo'n tyol Dios, o k'oj te cyey yaa'n judío tu'n cyoca te t-xjal Dios. Pero tuj tneel e tsciy' Dios kej judío tu'n cyoc te t-xjal. E cyaj tk'o'nxin tyolxin cyuya ke cyxe'chel tu'n cyoc cyiy'jil te t-xjal Dios. Ju' tzunj chi oqueltzen te t-xjalxin n-oc cyak' texin. ²⁹ E cyaj tk'o'nxin tyolxin at tu'n tk'ontexin t-xtalbilxin cye, bix at tu'n cyoc te t-xjalxin, bix ktzki'n cjanpanelxin ti' tyolxin. ³⁰ Pjel cyi'j judío tisenj e baj cyi'ja ejee'y yaa'n judío. Nejl min e cynimana Dios. Pero tej tel cyxoo'n kej judío t-xtalbil Dios, bixsen oc toyenxin te cyey, bix e cyiik'a. ³¹ Jax ju'x min cynima kej judío Dios ja'lewe, pero tzul lastim cye tu'n Dios, tisenxj ul lastim cyey tu'nxin. ³² O tyeec'a Dios cykilca xjal, judío, yaa'nle judío, o tz'el cyxoo'n tyolxin, tu'ntzen toc toyenxin najsbil cyil te cykilca, cuma cykilca at cyil.

³³ Tu'n tzunj tbaflen tninc'u'n Dios, jjawnexsen te junx maj jtilbil Dios o txi' tyeec'an! jNimxsen tumel at tuyaxin! Min cnet tu'n tel kniy' ti'j cykilcaj o baj tninc'u'nxin tu'n thint, bix mi nuket jun xjal at tumel tuya ti'j ti tten tu'n nbint tu'nxin. ³⁴ Ja lu tisen tzin tkba'n tyol Dios. Tzi cyjulu: "¿Atpa jun xjal n-el tniy' ti'j tnaabl Dios? Min-al. ¿Atpa jun xjal ba'n tu'n t-xi' tk'umen te Dios alcey ba'n tu'n thint? Min-al. ³⁵ ¿Atpa jun xjal c'asbenel Dios juditz? Min-al," tzi tyol Dios. ³⁶ Ja te Dios binchalte cykilca at. Jaxin ncawen tibaj cykilca nbaj, bix cykilca at te tajbel texin. jjawxiitzen nimset tbixin te junx maj! Ju'xit tzuna.

12

Il ti'j tu'n kajben te Dios tuya jun kanema sakxix

¹ Key hermano, o ko oc ttanem Dios tu'nj tk'ak'bil te'u'jxin ki'j. Ju' tzunj, nchin cubsana nwitza cyey tu'n t-xi' cyk'o'na cyxumlala te Dios tu'n tajben texin tisen jun oybil i'tz. Chi ajbena te Dios tuya jun cyanema sakxix bix tuya jun cychunk'lala ba'n twitzxin. Ka ma bint cyu'na ju'wa, ju'tzen cjawel cynimsa'na Dios tuya cykil cyc'u'ja. ² Mi'n che'x lpey ti' tnaabl te twitz tx'otx', sino ju' chi xe'l lpey ti' jun cynaabla ac'aj, tu'ntzen cych'ixpeta, tu'ntzen tel cyni'ya ti'j tajbil Dios, ba'n bix tz'aklxix.

³ Cuma o tak' Dios woclena tu'n t-xi' nk'umena tyolxin, ju' tzunj cxe'l nk'o'na te jaca juun cyey jun xnak'tzibil. Mi'n cub cybisena ka mas nchi ajbena cywitz ke cyuyey, sino c'aaltz ti' cynaabla, cuma o tzaj tk'o'n Dios cyaak'ena te cykilcakey tu'n cyajbena cye ocslal, yaa'n tu'n cyoca te mas jawnex. ⁴ Cxe'l nkba'na jun tumel cyey te yec'bil amale nimet kbaj, pero junx ko'. At nim iken tu'n kxumlal, bix cykilcaj iken tu'n kxumlal at taak'en. Pero junx xumlal baj elnina. ⁵ Ju' jafenina ejoo' ocslal. Nim kbaj, bix jaca juun ke at taak'en, pero tu'nj kmobjabl kiib tuya Cristo, junx elnina ko'.

⁶ Entonces, o tzaj k'o'n te jaca juun ke tuya jun ak'untl ba'n thint tu'n. Ju' tzunj, cybincham jaca juun cyey la' alcey cyaak'ena o tak' Dios cyey. Ka jaj tkbaj tyol Dios o tzaj k'o'n tey, kbanx, pero c'oquel tipey ti'j oj t-xi' tkba'na, junx q'uelela tyola tuya t-xnak'tzibil Cristo. ⁷ Ka jaj tu'n tajbena cye xjal o tzaj k'o'n tey, tz'ajbenxa cye. Ka jaj tu'n t-xnak'tzana cye xjal o tzaj k'o'n tey, xnak'tzanxke. ⁸ Ka jaj tu'n t-xi' tnimsa'na cyc'u'j xjal o tzaj k'o'n tey, cxe'l tnimsa'na cyc'u'j. Ka jaj tu'n tk'ona onbil cye xjal at il ete' o tzaj k'o'n tey, onexke tuya cykil te'u'ja. Ka jaj tu'n tbaj tninc'u'na ke xjal o k'oj tey, bincham, bix sey' tz'oquey te ninc'ulcye. Bix ka jaj tu'n toc k'ak'en te'u'ja cyi' mebe o k'oj tey, k'ak'ec te'u'ja pero tuya tzalajabl.

⁹ K'ak'enc cyc'u'ja ti' cyuyey tuya cykil cyc'u'ja, yaa'n nuk ten cyu'na. Cyxomel jka' nbint cyu'n, pero jaj ba'n c'oquel tak' cyey.

¹⁰ Cyonex cyiiba cyxola tuya tk'ak'bil cyc'u'ja, cuma ocslalkey. Cybi'y juntl ocslal cyuyey.

¹¹ Chi ajbena te Kaaw tuya cykil cyc'u'ja. Sey'x chi oqueley tuj taak'enxin, yaa'n alkey.

¹² Chi ayona tuya tzalajabl ti'j o cyaj tkba'n Dios ke. Q'uiyax q'uixc'aj cyu'na. Tuj cykil tyem cyna'nxa Dios.

¹³ Cxe'l cyonena kej ocslal at il cyi'j. Ka taj jun xjal posadayin bix ka taj ch'in twa, cxe'l cyk'o'na.

¹⁴ Ka at jun xjal n-oc yasente cyey, cykanenx te Dios tu'n tk'onte jun ba'n te te. Mi'n txi' cykanena tcastiwa te Dios.

¹⁵ Ka at jun ntzalaj, chi tzalaja tuya. Ka at jun nbisen, chi ok'a tuya.

¹⁶ Cyk'onx jun ba'n te cyuey, tisenx nchi jyon cyey jun ba'n te cyey. Mi'n jaw cynima cyiiba, sino ctemel cynaabla tuya cykilca xjal ajnintz cynaabl. Mi'n cub cybisena mas ba'n cyu'na.

¹⁷ Ka ma tz'oc bint jun ka' cyi'ja, mi'n xe'len cyu'na. Ja cyeja cbinel cyu'n jaj jun ba'n tuj cywitz cykil xjal.

¹⁸ C'oquel cyipena ti'j tu'n cytena tuj ttzyal tuya cykil xjal. Mi'n chi cyakwusana jun k'oj.

¹⁹ Key hermano n-oc cyak'a weya, mi'n xe'len jun ka' cyu'na ka ma tz'oc bint jun ka' cyi'ja cyu'n xjal. Cyk'onx te Dios tu'nten ja Dios ck'olte ccastiwa. Tzin tkba'n Dios tuj tyol cyjulu: "Nuk inayena at woclena tu'n nk'onte castiwa te t-xel jka' nbint cyu'n xjal. Inayen weya taaw tu'n nk'onteya t-xel," tzi Dios. ²⁰ Ju' tzunj, ka nk'ojl jun xjal cyi'ja, bix ka ncyim tu'n weyaj, cyk'onx twa. Bix ka ncyim tu'n a', cyk'onx tc'a. Ka nbint cyu'na ju'wa te te, tzultzen tch'ixew tuj tc'u'j. ²¹ Katzen junx ma chi ela ka'x t-xel cyu'na, jaxsen ka' otk caman cyibaja. Mas ba'n tu'n tbint jun ba'n cyu'na tej xjal tzin tbinchan jun ka' cyi'ja.

13

¹ Entera key il ti'j cxe'l cynimana kej cawel te twitz tx'otx', cuma ja Dios o cyaj k'onte tu'n at cawbil twitz tx'otx', bix ja Dios o cyaj k'onte tu'n at kej nchi cawen cyibaj xjal. ² Ju' tzunj, ka min txi' cyniman xjal kej cawel, nchi k'ojlzten ti'j cawbil o tzaj tk'o'n Dios bix ck'ojlzten ccastiwa cyu'n cawel, ³ cuma o k'oj cye cawel yaa'n tu'n cyk'onte castiwa te cyej xjal nchi binchan ba'n, sino nuk o'cx te cyej xjal nchi binchan ka'. Ka cycy'iy tzaj ttzi ke cawel cyi'ja, jaj ba'n cybinchama, bix ba'n chi eleley tuj cywitz. ⁴ Cxe'l cybi'na ke cawel, cuma ja Dios o cyaj k'onte cawbil tu'n cawen te jun ba'n te cyey. Pero ka ka' nbint cyu'na, nukntzen ete'q'uey tziyel cywitz, cuma yaa'n nuk cyajx at cawbil cyuya. Ja te Dios o k'onte cawbil tu'n cyk'onte ccastiwa kej nchi binchan ka'. ⁵ Ju' tzunj il ti'j cxe'l cynimana ke cawel. Pero yaa'n nuk o'cx tu'n mi'n chi cuba tuj castiwa, sino cuma taj Dios tu'n t-xi' cynimana ke cawel. ⁶ Bix chi choola alcyey tzin cykanen cawel, cuma Dios o cyaj k'onte ke cawel tu'n cawen, bix ti'j nchi cawen, nchi ajben te Dios. ⁷ Ju' tzunj chi choola alcyey il ti'j tu'n cyk'ontey cye cawel, jaa'xja tumel tu'n tchjet. Cxe'l cynimana alcyeykej at cyoclen tu'n cynimj, bix ctemel ch'in cynaabla cywitz kej at tu'n cyiik'ente cynaabla.

⁸ Ka c'asbenelkey, mi'n tz'el tuj cyc'u'ja tu'n cychjontey. Pero ja tzunj tk'ak'bil cyc'u'ja cyxola tisen cyc'asbena mlay t'we'. Ju' tzunj cucx tz'oc cyak' cyuey cyey. Ka n-oc cyak' cabtl cyuey cyey, nbintzen cykilcaj tzin tkba'n ley cyu'na. ⁹ Tzin tkba'n ley cyjulu: "Mi'n tz'el cyi'na t-xu'l cyuey. Mi'n cub cybo'na xjal. Mi'n chi alk'ana. Mi'n tz'oc cyachena tik'ch at," tzi ley, bix at mastl tzin tkba'n. Jax ju'x tzin tkba'n tyol Dios cyjulu: "Tisenx cyc'ojlan cyey cyiiba, ju'xsen c'oquel cyak' cyuey cyey," tzi tyol Dios. Ka ju' nbint cyu'na, nchi niman tzuna cykilcaj tzin tkba'n ley. ¹⁰ Ka n-oc cyak' xjal cyey, mintzentii' ka' n-oc cybinchena cyi'j ju'wa. Ju' tzunj nchi niman tzuna alcyey tzin tkba'n ley o'j n-oc cyak' cyuey cyey.

¹¹ Cykilca tzunj lu ma txi' nkba'na cyey, iltzen ti'j tu'n tbint cyu'na, cuma ktzki'n ma pon tumel tu'n tel kelsa'n kwatl. Nimxe tyem o tz'ex toclen kocsla'n Cristo, bix tzajnen ttzaj lk'e jk'ij tu'n tulxin te clol ke. ¹² C'pemel baj twi' jk'ij tuj kloljil eto'. Jk'ij te tulel Cristo ma tzak' ulel lk'e. Tisenc'a ch'ix kskix. Ju' tzunj cyjel cyk'o'n ja ka' nbint tuj kloljil, bix cybinchama jba'n nbint tuj spi'yen. ¹³ Cxe'l'ix kii'n kchunk'lal tuj tumel, yaa'n tisen kej ete' tuj kloljil. Mi'n cybinchay tisen kej xjal nchi bolayin bix nim sitz'bil ete'. Mi'n chi binchana tuya pajbaj bix tik'ch taj cyxumlala. Mi'n chi jyona k'oj cyxola, bix mi'n chi'l cyc'u'ja tu'n juntl. ¹⁴ Jcbinel ku'n jaj cxe'l'ix kii'n jun knaabl junx tuya tnaabl Kaaw Jesucristo. Oj taj tnaabla aj il tu'n tbinchan il, mi'n txi' ntimana.

14

Yaa'n ba'n cyyolena ka' ti' juntl ocslal ti'j alcyey wik twa

¹ At juun ocslal tuj cywitz at il ti'j tu'n cyniman nim ley tu'n cyel ba'n twitz Dios. Ncub cyk'o'n pablte cywa cychi' cyc'a', bix nchi niman k'ij te nimbil, amale yaa'ntl il cyi'j lu tuj twitz Dios. Cyiik'emke cyxola kej ocslal lu mina'x tel cyniy' ti'j, pero yaa'n te cyiilbila ti'j cynaabl k'in cyu'n ju'wa. ² Ja tzunkej ocslal n-el cyniy' ti'j, cytzki'n ba'n tu'n t-xi' cyniy'be'n cykilca wikan chi'pj. Pero kej ocslal min tz'el cyniy' ti'j tzin cykba'n ka'x tej lu, bix ju' tzunj jac'a nukitzaaj jac'a txi' ku'n. ³ Jatzen ke cyey n-el cyniy' ti'j ba'n tu'n t-xi' cyniy'be'na cykilca wikan waabj, mi'n tz'el cyiik'uena kej ncub cybisen yaa'n ba'n tu'n t-xi' cyu'n. Bix jatzen ke cyey ncub cybisena ka' tu'n t-xi' cyniy'be'na cykilca kej lu, mi'n chi yolena cyi'kej nxi' cyu'n,

cuma o tiik' te Dios ejee' te t-xjal. ⁴ ¿Ejee'pa tzuna at cyoclen tu'n cykbantey ka ma tz'el jun ocslal ba'n twitz Dios bix ka min? Min, cuma j-ocslal lu te Dios, bix nuk ja te Dios kbalte ka ma tz'el ba'n bix ka min. Pero mi'n chi labta cyibaj cyuyey, cuma chi elelcye ba'n, cuma te te Dios taak'en tu'n cyel ba'n, bix cbinel taak'enxin tu'nxin.

⁵ Kej ocslal min tz'el cyniy' ti'j tzin cykba'n at k'ij mas jawnex te nimbil twitz Dios. At juunt ocslal tzin cykba'n cykil k'ij junii' ta' twitz Dios. Cyi'j tzunj lu, mi'n tz'oc cybi'na ka at xjal cyaj baj cyninc'u'n alcye ba'n te cyey, sino ejee' cyey kbalte ka cyaja cynimana jun k'ij bix ka min. ⁶ Kej ocslal tzin cyniman kej k'ij mas jawnex tuj cywitz, nbintzen cyu'n tu'ntzen cyniman twitz Kaaw. Jax ju'x kej ocslal min cyniman jun k'ij, jax nbint cyu'n tu'n cyniman twitz Kaaw. Jax ju'x kej ocslal nchi chyon chi'pj, pero yaa'n tu'n n-el cyiiq'uen Kaaw, sino cuma ba'n tuj twitz Kaaw tuj cywitz. Tuj cywitz ja Dios nk'onte. Ju'tzen nxa' cyk'o'n chjonte te Dios. Bix kej ocslal min txi' cycho'o'n chi'pj, jax ju'xe cyaj cyniman Kaaw, bix jax nxi' cyk'o'n chjonte te Dios ti'j ntzaj k'o'n cye. ⁷ Cykilca ko' at tzalu tu'n kajben te Kaaw. Yaa'n eto' tzalu te kajbelel kwitzx. Kchunk'lal yaa'n te kex, bix hasta tuyax kcyamecy yaa'n te kex. ⁸ Tuj cykilca, kchunk'lal-le, kcyamecyle, te texin. Ka i'tzx ko' bix ka cyimnen ko', tuj t'wenty-xin eto'. ⁹ Nuk tu'n tocxxin te Kaaw cykilca ko', i'tzle, cyimnele, e cyimxin bix e jatz itz'jxin juntl maj tuj cyamecy. ¹⁰ Ju' tzunj, ¿tumelpla oj nuk nchi cxololona ti'j ti nbint cyu'n ke cyuyey? ¿Bix tumelpla oj n-el cyiiq'ueena kej ocslal min tz'el cyniy' ti'j? Min, cuma cykilca ko' ko pomel baj twitz Cristo tu'ntzen toc tcyeyenxin ejoo' ka ba'n e bint ku'n bix ka ka'. ¹¹ Jaxte cykilca ko' ko oqucl tuj xkela, cuma tzin tkba'n Dios tuj tyol cyjulu: "Jaxte inayena Dios i'tz, bix jaxte cykil xjal il ti'j chi oqucl nwitzza bix chi cwel maje nwitzza, bix cykba' weya cyjulu: 'Jay Dios,' tzi cybel xjal weya," tzi Dios tuj tyol Dios. ¹² Ju' tzunj, q'uelel kniy' ti'j te te Dios kk'a' kcwent ti'j kchunk'lal, yaa'n cye ocslal.

Mi'n cub cyxixena jtaak'en Dios tuj cyanem ocslal

¹³ Ju' tzunj, mi'n tz'oc kcyeyentl cyi' cabtl ocslal la' ka nbint ba'n cyu'n tuj twitz Dios, sino ejoo'j n-el kniy' ti'j c'oqucl tilel ku'n tu'n mi'n bint ku'n j-il n-e'la tuj cywitzj ocslal min tz'el cyniy' ti'j, tu'ntzen mi'n che'x tuj il. ¹⁴ Ntzki'na mintii' chi'pj ka' tu'n t-xi' chyet, bix ti'j tzunj lu junx ta' nyola tuya tyol Kaaw Jesús. Pero ka at jun ocslal nk'umente at jun wik chi'pj yaa'n ba'n tu'n t-xi' chyet, bix ma txi' tchyo'n, nbintzen til tu'n. ¹⁵ Ka ma txi' cycho'o'na jchi'pj mixbe t-xi' chyet tuj twitz juntl ocslal, bix nbintzen il tu'n tu'nj nbint cyu'na, ntyeec'antzen min tz'oc tak' j-ocslala cyey. Mi'n txi' cytzpeta'sa'na j-ocslal tu'n tlaj cychi'y tu'n t-xi' tuj il tu'nj cychi'y nxi' cyu'na, cuma e cyim te Cristo te te. ¹⁶ Amale n-elet kniy' ti'j cykilca wik chi'pj ba'n, mi'n txi' cycho'o'na cywitzj ocslal min tz'el cyniy' ti'j, cuma ka ma bint il tu'n jun ocslal tu'nj nbint cyu'na, ckbajeltzen ka' e bint cyu'na. ¹⁷ Mi'n txi' cycho'o'na jka' tuj cywitz kej ocslal min tz'el cyniy' ti'j, cuma tuj tcawbil Dios yaa'n ja te chi'pj bix c'a'bj il ti'j, sino ja te il ti'j, jaj tu'n t-xi' kii'n kchunc'lal jiquenxix, bix tu'n kten tuj ttzyal, bix tu'n at tzalajeb'l ke tzin tk'o'n Espiritu Santo. ¹⁸ Katzen ju' nbint ku'n, nko ajbentzen te Cristo, bix ctzalajtzen Dios ki'j, bix ko elel ba'n tuj cywitz xjal. ¹⁹ Ju' tzunj, c'oqucl kipen ti'j tu'n junx ko e'la xkol tuj ttzyal bix tu'n t-xi' knimsa'n cyanem ke kuya ocslal. ²⁰ Mi'n cub cyxixena jtaak'en Dios tuj cyanem ocslal tu'nj nxi' cyu'na. Jaxte mintii'te waabj xjan t-xi' kwaa'n ja'lewe, pero ka at juun ocslal chi cwel tzpet tu'nj nxi' cyu'na, mi'ntzen txi' cywaa'na cywitz. ²¹ Mas ba'n tu'n mi'n txi' cycho'o'na chi'pj, bix mas ba'n tu'n mi'n txi' cyc'a'na vino, bix mas ba'n tu'n mi'n txi' cywaa'na alcye juntl wik waabj, twitzj tu'n t-xi' jun ocslal tuj il tu'nj cyway. ²² Ja tzunkey n-el cyniy' ti'j cykilca ba'n tu'n t-xi' cyu'na, mi'n chi cub tena tx'olbalte cywitz xjal ti' cyway, cuma nuk cyex cyey tuya Dios. Jnbint cyu'na, ka yaa'n jun il tuj cywitzza, tuj tzalajeb'l chi temeley. ²³ Pero ka tuj cywitzza xjan jnxi' cyu'na tuj twitz Dios, iltzen, cuma nchi binchana jtzin tkba'n cyc'u'ja ka' tu'n t-xi' cyu'na. Ka tzin tkba'n cynaabila tu'n mi'n bint jun cyu'na, pero nbint, bix jatzen ilj.

15

¹ Ju' tzunj, key hermano, jatzen ke n-el kniy' ti'j alcyey il ti'j twitz Dios, il ti'j q'uiyax kej ocslal min tz'el cyniy' ti'j ku'n. Yaa'n tumel tu'n tcub kbincha'n tik'ch kaj cywitz. ² Cxe'lxix kbisen ti'j alcyey t'onel cye tu'n cytz'iy tuj cyocslabl, ³ cuma il ti'j tu'n thint ku'n tisenj e bint tu'n Cristo. Amale Dioset-xin, pero min e bint tu'nxin ti'j tik'ch e tajbexin, sino iy'x q'uiux'aj tu'nxin te jun ba'n cye cabtl. Tzi Cristo tuj tyol Dios cyjulu: "Nuk tu'nj nchin ajbena tey, kej xjal nchi k'ojl ti'ja nchi yasen wi'ja," tzi Cristo te Tman. ⁴ Nxi' nkba'na cyey j-e cub tz'i'bet jaxte ootxa, cuma c'ajbel tuj Dios ke. Tzin tyeec'an ke yaa'n nuk kajx niy'x q'uiux'aj cykilca ku'n, bix tzin tnimsa'n kc'u'j tu'n kayon ti'j o cyaj tkba'n Dios ke. ⁵ Jatzen Dios n-onen ki'j tu'n tiy'x cykilca ku'n. Bix ja te Dios nnimsan kc'u'j tu'nj tyol. Tzajxittzen tk'o'n Dios tu'n cybeta junx, tisen taj Cristo Jesús. ⁶ Chi tena tuya junx cyanema, tu'ntzen tuya junx elnana cyyla cjawel cynimsa'n tbi Dios, jaxj Tman Kaaw Jesucristo.

Jax ju'x kej xjal yaa'n judío at tu'n cyclet jaj ka ma tz'el cyniy' ti'j colbil

⁷ Ju' tzunj, tu'n tjaw nimset thi Dios, cyiik'amtzen cyiiba, tisenj e tiik' Cristo ejoo'.
⁸ Ajbenxin te cykilca. E bint taak'en Dios, tu'nxin cyxol judío, tu'ntzen tjapa cykilcaj otk cyaj tkba'n Dios te Abraham bix te Isaac bix te Jacob. ⁹ Bix jax ju'x ajbenxin cyej xjal yaa'n judío. Ak'anaxin tu'ntzen tjaw cynimsa'n thi Dios tu'nj e tzaj lastim cye tu'n Dios tu'nj e bint tu'nxin. Tzin tkba'n tyol Dios cyjulu: "Ju' tzunj cjawel nnimsa'na thiy cyxol kej xjal yaa'n Israel. Chin bitzela tu'ntzen tjaw nimset thiy," tzi jun xjal tuj tyol Dios tu'n t-xi' tyeec'an cjawel nimset thi Dios cyxolj xjal yaa'n judío. ¹⁰ Bix tzin tkba'ntl tyol Dios cyjulu: "Ja tzunkey yaa'n aj Israel chi tzalaja junx cyuyaj t-xjal Dios," tzi tyol Dios. ¹¹ Bix tzin tkba'ntl cyjulu: "Cynimsanwe thi Kaaw, ejee'y yaa'n aj Israel. Jawxit cynimsa'n cykilca ke tnom thi," tzi tyol Dios. ¹² Bix jax ju'x tzin tkba'n Isaías, ja tyolel Dios, cyjulu: "Tzul jun tiy'jil Isaí. C'oqucl te cawel cyibaj kej xjal yaa'n aj Israel, bix c'oqucl ke cyc'u'j ti'j," tzi Isaías tu'n t-xi' tyeec'anxin at Cristo tu'n tajben te cykil xjal. ¹³ Jatzen tzin tk'o'n Dios cyey tu'n toc ke cyc'u'ja ti' Cristo. Bix tu'nj cyocslaba ti' Cristo, tzajxit tk'o'n Dios cyey tu'nj tipemal Espíritu Santo tu'n at cytzalajebba bix tu'n cytena tuj ttzyal, tu'ntzen tuya cykil cyc'u'ja chi ayola ti'j cykilcaj o baj tninc'u'n Dios cyi'ja.

¹⁴ Key hermano, min baj nc'u'ja cyi'ja. Ntzki'na nojnen cyanema tuya cykilj ba'n, bix ntzki'na n-el cyni'ya ti'j ti tten tu'n cyxi' lpey ti' Dios, bix ntzki'na ba'n cyu'na tu'n nbaj cyonen cyiiba tu'n tel cyni'ya ti'j tyol Dios. ¹⁵ Pero amale n-elet cyni'ya ti' tyol Dios, pero mintii' tzi wi'ja tu'n tcub ntz'i'bena jun cyiw yol cyey ti'j tyol Dios, tu'ntzen tc'asj cynaabla. Ma cub ntz'i'bena te cyey aj Roma, cuma ja waak'enja o tzaj tk'o'n Dios weya. ¹⁶ O tzaj tk'o'nxin weya tu'n woca te t-ak'anal Jesucristo te cyej xjal yaa'n judío. Ja waak'enja tu'n t-xi' nk'umena jba'n tpochal tyol Dios cyey yaa'n judío, tu'ntzen cytxjet tu'n Espíritu Santo tu'n cyel ba'n twitz Dios, tisen jun oybil ba'n tuj twitz Dios. ¹⁷ Ju' tzunj at woclena tu'n t-xi' ntx'olba'na cyey ti'j tyol Dios. O tzaj tk'o'n Dios waak'ena, bix nbint wu'na tu'n Cristo Jesús. ¹⁸ Yaa'nxsele tumel tu'n t-xi' nkba'na cyey wu'ntza weya nimxsen taak'en Dios o bint wu'na. Ju' tzunj nxi' nkba'na nuk tu'n Cristo nbint taak'en Dios wu'na. Tu'nj waak'ena k'o'n weya, nim xjal yaa'n judío o cyniman tyol Dios. O cyniman tu'nj o txi' nk'umena bix tu'nj o bint wu'na cyxol. ¹⁹ Tu'n tipemal Espíritu Santo, nimxsen bix jawnexsen techlal e bint wu'na jaa'xja in poniya te kbalte tyol Dios, tu'ntzen tyeec'j jnbint wu'na jtaak'en Dios. Ju'ylatzen tten tjablen bint jba'n tpochal Cristo tuj cykil lugar wu'na. Tneel wak'a kbalte tuj Jerusalén, bix in pon baja kbalte hasta maa tuj Iliria. ²⁰ Bix tej t-xi' nkba'na tyol Dios, ocxsen wipena tu'n mi'n txi' nk'umena tpochal colbil ke tu'n Cristo jaa'j otk chi pona juntl t-ak'anal Dios te kbalte, cuma ncy'i'ya tu'n wak'anana jaa' otk tzyeta taak'en Dios cyu'n juntl. ²¹ O'cx e wajbe'ya tu'n tel jaxxi'ja yol lu tuj tyol Dios. Tzin tkba'n cyjulu: "Kej xjal bajx pona tpochal Clol cye cyxol, cpomeltzen tu'n cybinte. Kej lugar bajx cybi' xjal ti'j ti tten tu'n cyclet, q'ueleltzen cyniy' ti'j," tzi tyol Dios.

Ncub thisen Pablo ti'j tu'n t-xi' tuj Roma

²² Ti'j tzunj waak'ena lu mix e bina tu'n npona cyxola maa tuj Roma, amale nimet maj e wajbe'ya tu'n npona cyxola. ²³ Pero ja'lewe, mintii' t' tnom tzalú tu'n tocx waak'ena tuj. At-xxe k'ij tzin wajbe'na tu'n npona maa cyxola. ²⁴ Ju' tzunj, npja' nninc'u'na tu'n nwe'ya cyxola oj nxi'ya España. Chin temel tzuna cab k'ij cyuyey. Bix nim chin tzalajela oj toc ncyey'na ejee'y. Bix ojtzen wiy' aja cyuyey, nuket jac'a chi onena wi'ja tuj nbe'ya. ²⁵ Pero tneelxix il ti'j tu'n nxi'ya tuj Jerusalén, tu'n t-xi' wii'na jun onbil te cye ke ocslal judío o chmet te cye. ²⁶ Ke ocslal cyuj departamento te Macedonia bix Acaya e cyajbe tu'n t-xi' cysma'n jun onbil te cyej ocslal mebe tuj Jerusalén. ²⁷ Amale yaa'nt judioko, pero nchi tzalaj tu'n t-xi' cysma'n jun onbil te cyej ocslal judío, cuma tisen jun cyc'asben tuj cywitz tu'n cyk'onte. At cyc'asben, cuma kej ocslal judío, ejee' e xi' k'onte tyol Dios te cyej lu, tu'ntzen cyclet. Ju' tzunj tumelte tzin tyeec'an cyanem kej ocslal yaa'n judío te cyej ocslal judío tu'nj t-xi' cysma'n j-onbil cye. ²⁸ Ju'tzen tten wu'na. Oj wi'ya k'ol tej pwak te cyej ocslal tuj Jerusalén, chin xe'l tzuna España bixsen chin i'yela cyey'lte cyey tuj nbe'ya. ²⁹ Bix ntzki'na oj npona cyxola, junx ko tzalajel tu'nj t-xtalbil Cristo kibaj.

³⁰ Key hermano, cxe'l ncubsa'na nwitzá cyey tu'n cyna'na Dios wi'ja. Chi oney wi'ja ti'j ja lu, cuma ocslal ko' ti' Kaaw Jesucristo, bix cuma k'o'n cyey tu'n Espíritu Santo tu'n toc wak'a cyey. ³¹ Cykanenxa onbil te Dios wi'ja tu'n nclata cywitz xjal tuj departamento te Judea min tz'oc cybi'n tyol Dios, bix oj t-xi' nk'o'na j-onbil cyey ocslal tuj Jerusalén, cykanenx te Dios tu'n tel ba'n tuj cywitz, amale k'o'nt cyu'nj ocslal yaa'n judío. ³² Bix cykanenx te Dios tu'n npona cyxola, bix tu'n at nim ktzalajebba oj npona, tu'ntzen knimsante kc'u'j. ³³ Tenxit Dios tuya cykilcakey. Nuk ja texin nk'onte tu'n kten tuj ttzyal. Ju'xit tzuna.

16

Jun k'olbebl tu'n Pablo cyuya ke tuya cye ocslal aj Roma

¹ Jxuuj Febe tbi cxe'l tii'nxuj jwu'ja lu te cyey. Jun ba'n xuuj t-ak'anal Dios cyxol ocslal tuj tnom te Cencrea. ² Cxe'l ncubsa'na nwitza cyey tu'n t-xi' cyc'ojla'n jxuujja, tisex nbint cyxol ocslal, cuma ocslalxuj ti' Kaaw. Cyonenx-xuj tuya ti cyitz'jela'xuj, cuma nim xjal o tonenxuj, bix o tz'onenxuj wi'ja.

³ Cyk'onxa jun nk'olbebla te hermana Priscila bix te hermano Aquila. O chi ak'anan junx wuyena tuj taak'en Cristo Jesús. ⁴ Ch'ixc'ama e cwa'ke tu'ntzen ncleta cyu'n. Ju' tzunj nim nxi' nk'o'na chjonte te cye, bix yaa'n nuk njunala, sino cykilca kej ocslal yaa'n judío.

⁵ Bix cyk'onxa jun nk'olbebla te cyey ocslal nchi chmet tuj tja Priscila bix Aquila tu'n tjaw cynimsa'n tbi Dios. Bix cyk'onxa jun nk'olbebla te Epeneto, jun wuyena. Jaxin tneel ocslal ti' Cristo tuj departamento te Asia. ⁶ Bix cyk'onxa jun nk'olbebla te María. Nim o tz'ak'ananxuj cyxola. ⁷ Bix cyk'onxa jun nk'olbebla te Andrónico bix te Junias. Te ntanema kej xjal lu, bix o chi tenxin tuj tzee' wuyena. Bix t-xel Cristoke bix nim o bint cyu'nxin, bix ejee'xin nejl ocslal nwitza.

⁸ Cyk'onxa jun nk'olbebla te hermano Amplias, jun wuyena. ⁹ Bix cyk'onxa jun nk'olbebla te Urbano. Kuya kiib tuya tuj taak'en Cristo. Bix cyk'onxa jun nk'olbebla te Estaquis, juntl wuyena. ¹⁰ Bix cyk'onxa jun nk'olbebla te Apeles. Iy'x q'uixc'aj tu'nxin nuk ti'j Cristo, pero min e cyaj cyey'yxin tocslablxin. Bix cyk'onxa jun nk'olbebla te cyey ocslal at tuj tja Aristóbulo. ¹¹ Bix cyk'onxa jun nk'olbebla te Herodión, juntl xjal te ntanema. Bix cyk'onxa jun nk'olbebla te cyey ocslal at tuj tja Narciso. ¹² Bix cyk'onxa jun nk'olbebla te Trifena bix te Trifosa. Ak'analkexuj tuj taak'en Kaaw. Bix cyk'onxa jun nk'olbebla te Persida, jun wuyena. Nim o tz'ak'ananxuj tuj taak'en Kaaw. ¹³ Bix cyk'onxa jun nk'olbebla te Rufo. Jun ocslal tbanelxix tnaabl. Bix cyk'onxa jun nk'olbebla te ttxu Rufo. Jaxuj o c'ojlan te weya tisenc'a talxuj inayena. ¹⁴ Bix cyk'onxa jun nk'olbebla te Asincrito, te Flegonte, te Hermas, te Petrobias, te Hermes, bix cykilca kej ocslal nchi chmet cyuyaxin tu'n tjaw cynimsa'n tbi Dios. ¹⁵ Bix cyk'onxa jun nk'olbebla te Filólogo, bix te t-xu'lxin Julia tbixuj, bix te Nereo, bix te xuuj titz'en Nereo, bix te Olimpás, bix te cyey ocslal nchi chmet cyuyaxin. ¹⁶ Bix ju'x cyxola, cyk'olben cyiiba tuya cykil cyc'u'ja.

Bix jax ju'x cykilca kej ocslal ti' Cristo tzalu, jax nxi' cyk'o'n jun k'olbebl te cyey.

¹⁷ Key hermano, il ti'j tu'n cyc'ojlan cyiiba cywitz kej xjal cyxola ncub pa'nte cyey, cywitz kej nchi xnak'tzan jun xnak'tzibil yaa'n junx ta' tuyaj cyey o tz'oc cyxnak'tza'na ti'j tyol Dios, tu'ntzen cytzpeta. Cypamel cyiiba cyi'j, ¹⁸ cuma kej xjal lu yaa'n t-ak'anal Kaaw Cristo, sino nuk nchi xnak'tzan alcyej ba'n cye tuj cywitz. Tuya yol jawnc' pero x'tak', ncub cysbu'n kej ocslal mintii' tumel cyuya ka jaxxix chi yolen bix ka min. ¹⁹ Ntzki'na min o che'x lpey ti'j jyaa'n jaxxix, cuma nk'umj tuj cykil twitz tx'otx' nchi niman cyey tyol Dios. Ju' tzunj nchin tzalaja cyi'ja, pero waja tu'n cyc'ojlante cyiiba cywitz kej xjal cyaj tu'n t'bit ka' cyu'na. Waja tu'n tel cyni'ya ti'j alcyej ba'n, pero ncy'iya tu'n tel cyni'ya ti'j t'ten tu'n t'bit jka'. ²⁰ Amatezele tzint chi ak'anan kej lepchec ti' taaw il tu'n t'bjaj cypa'n ke ocslal, pero jax ju'x nak'anan Dios tu'n cytena tuj ttzyal. Oj tpon tumel, Dios cwel wa'bente tuj ajkelbil taaw il, bix cwel k'o'n tjak' cykena.

Jatzen cyey, tzajxit t-xtalbil Kaaw Jesucristo cyibaja.

²¹ Timoteo nk'on jun k'olbebl cyey. Ak'analxin wuyena tuj taak'en Dios. Bix Lucio tuya Jasón bix Sosípater nchi k'on jun k'olbebl cyey. Te ntanemake.

²² Inayena, Tercio, jun tz'i'bel te Pablo, jax ma txi' nk'o'na jun k'olbebl te cyey, cuma ocslal kena.

²³ Nxi' tk'o'n Gayo jun k'olbebl cyey. Tjaxin ntiiniya, bix tuj tjaxin nchi chmete ke ocslal tzalu te nimsalte tbi Dios. Jax ju'x Erasto nxi' tk'o'n jun k'olbebl cyey. Jaxin c'u'l pwak tuj ja tnom lu. Bix nk'on jxin Cuarto jun k'olbebl cyey. Jaxin jun ocslal tzalu.

²⁴ Bix weya, nchin kanena te Dios tu'n ttzaj t-xtalbil Kaaw Jesucristo cyibaj cykilcakey.

Tej tjaw tnimsa'n Pablo tbi Dios

²⁵ Manc'biltzen, chi xe'l nk'o'na tuj tk'ab Dios. Nuk jaxin at tipemalxin tu'n ccywixa tu'ntzen cytena jiquen tuj tyol Dios, jaj ba'n t'pocbal ti'j Jesucristo o txi' nk'umena cyey. Jaj t'pocbal ti' Cristo e'wen ta' jatxe ootxa, pero ja'lewe yaa'n e'wentl ta'. ²⁶ Ja'lewe lu nkbaja. Jxnak'tzibil ti' Cristo o cyaj tz'i'bet cyu'n kej kbalte tyol Dios. Jaj xin Dios mintii' t'bjalel e kbante tu'n t'bit jlu, tu'ntzen tk'umj tuj cykilca twitz tx'otx' jxnak'tzibil ti' Cristo, tu'ntzen cyniman ke xjal t'bjabil Dios, jaj tu'n cyocslan ti' Cristo. ²⁷ O'cx jun Dios at. Iynen tilbil tibaj cykilca te junx maj. Jawxit nimset t'bxin tu'n Jesucristo te junx maj. Ju'xit ttena.

Tneel u'j e xi' ttz'i'ben apóstol Pablo, t-xel Jesucristo, cye ocslal tuj tnom Corinto

Tej t-xi' tk'o'n apóstol Pablo jun k'olbebl cye ocslal tuj tnom Corinto

¹ Inayena, Pablo, nxi' ntz'i'bena j-u'j lu te cyey ocslal tuj tnom Corinto. Dios o scy'onte weya tu'n wajbena te t-xel Jesucristo. Tuyax Hermano Sóstenes at wuyena, bix tuyax nxi' k'onte jun k'olbebl te cyey.

² Ejee' tzuna t-xjal Dios. At cymojbabl cyiiba tuya Cristo Jesús, bix ju' tzunj ejee'y t-xjal Dios, tu'n cyajbena te. J-u'j lu c'ajbel te cyey, bix yaa'n nuk te cyey, sino tuyax te cykil kej xjal nxi' cyna'n tbi Kaaw Jesucristo, cuma jaxin Taaw cykilca ocslal. ³ Waja nuket ma cya'aman jun cy'iwalbl cyey tu'n Kman Dios bix tu'n Kaaw Jesucristo, bix nuket ete'y tuj ttz'yal.

Jun ak'bil chjonte ti'j t-xtalbil Dios

⁴ Key hermano, nxi' nk'o'nxwe chjonte te Dios cyi'ja. Nchin tzalajwe cuma Dios e tzaj k'onte nim t-xtalbil cyibaja tu'n Cristo Jesús tej cyocslana. ⁵ Tu'nxin at cypemala tu'n thint cykil cyu'na. At cypemala tu'n cykbantey tuj tzinenxix jn-el cyni'ya ti'j, bix tu'n tel cyni'ya ti'j ti' tten jaxxix yol. ⁶ Jaj lu ncyiwsante at tipemal tpochal Cristo o cyaj nk'o'na cyxola. ⁷ O tzaj tk'o'n Dios cypemala tu'n thint cykil cyu'na, bix ju' tzunj yaa'n at-x cyaja ti'j tu'n thint alcyexja cyu'na. Cykilcaj k'i'n cyu'na te tajbel te Dios jooc'tzen nchi ayona ti' Kaaw Jesucristo texe oj tulxin juntl maj. ⁸ Jaxin ncyiwsante cyey tu'n cywe'xixa tuj cyocslaba, tu'ntzen sakxixkey oj tul Kaaw Jesucristo te cyey'lte cyey ka ba'n xbitn cyu'na bix ka min. ⁹ Dios o txconte cyey tu'n cyk'onte cyiiba tuya Tcwalxin, ja Kaaw Jesucristo. Bix te Dios njapan bajxixte ti' tyol te ke. Ju' tzunj jaxxix at kmojbabl kiib tuya Kaaw.

Jun pabl cyiib kej ocslal tuj tnom Corinto

¹⁰ Key hermano, amale nxi't nk'o'na chjonte te Dios cyi'ja, pero il ti'j tu'n cyxi' ncawena. Ja Kaaw Jesucristo nkbanne tu'n t-xi' nk'umena cyey chi cwel tena tuya junx cynaabla, tu'ntzen mi'n baj cypa'n cyiiba tu'n cyk'o'ja, tu'ntzen cytena tuj ttz'yal. ¹¹ Key hermano, nxi' nkba'na ju'wa cuma o nbi'ya cyu'n ke te tja Cloé ti'j cyk'o'ja. ¹² Ejee'tzen nchi k'umante we at cab cyey nk'umante: "Te Pablo ko'ya"; bix cabtl nk'umante: "Te Apolos ko'ya"; bix cabtl nk'umante: "Te Pedro ko'ya"; bix cabtl nk'umante: "Te Cristo ko'ya." ¹³ Jey', ¿titzen nbaj cyey? ¿Ch'imapatzen elnina Cristo cyxola? ¿Inayenpa tzuna Pablo e jaw k'o'n twitz cruz cyi'ja tu'n cycleta? ¿Bix wuyapa tzuna cyk'on cyiiba tej cybautizarja? ¿Titzen tten n-oc lpe juun cyey wi'ja? ¹⁴ Ka ju' n-e'la tuj cywitza nchin jyona xjal tu'n cyoc lpe wi'ja tej cybautizarja wu'na, chjonte Dios min-al jun cyey o bautizarj wu'na, nuk ja Crispo bix Gayo. ¹⁵ Bix ju' tzunj min-al jun cyey ba'n tk'umante ka ti' nbi'ya e bautizarja. ¹⁶ ¡Aa! ma tzul juntl tuj nc'u'ja. Tuyax Estéfanos cyuyax ke te tja e bautizarjke wu'na. Bix o'cx kej lu n-ul tuj nc'u'j. ¹⁷ Pero q'uelel cyni'ya ti'j jweya waak'en o tzaj tk'o'n Cristo we, yaa'n te k'iljaw a' cywi' xjal, sino te kbalte tpochal jcolbil cye xjal ti' cyil tu'n tcyimlen Cristo twitz cruz. Ka ma chin yolena tuya jawnex yol, chi ulel lpe ke xjal wi'ja. Ju' tzunj chin yolela tuya chebe yol, tu'ntzen cyxi' lpe ke xjal ti' Cristo, tu'ntzen mi'n tz'el tipemal tcyimlen Cristo twitz cruz.

Ja Cristo tipemal Dios bix tnaabl Dios

¹⁸ Key hermano, jyol ti'j tcyimlen Cristo twitz cruz, tzaj yol tuj cywitz kej xjal nche'x tuj be te xitbil. Pero jatzen ke, ejoo' o ko clet, ja yol ti' tcyimlen Kaaw twitz cruz at nime'a tipemal Dios ti'j, cuma najben tu'n t'cub cyi'j xjal tu'n cyco'pj tuj cyil. ¹⁹ Tzin tkba'n tuj tyol Dios mas najben tibbil Dios tibaj cykilca. Tzi cyjulu: "Kej mas n-el cyni'y ti'j tuj cywitz, bix kej ba'n thint cykilca cyu'n tuj cywitz, mlay tz'ajben cynaabl. Cwel ntpetsa'na cynaabl," tzi Dios. ²⁰ Key hermano, cxe'l nkanena cyey ¿nintzajpa tuj twitz Dios cynaabl kej xjal te twitz tx'otx' nchi yolenn tuya jawnex yol? ¡Min! ¿Bix nintzajpa tuj twitz Dios cynaabl kej xjal xnak'tzal cyley judío bix mas jawnex cynaabl tuj cywitz? ¡Min! ¿Bix nintzajpa tuj twitz Dios cynaabl kej xjal ncub cyi'j xjal cyu'n tuya jawnex cyool? ¡Min! Tuj twitz Dios tzpetpajnin cynaabl. ²¹ Cykilcaj ba'n cyu'n xjal te twitz tx'otx', amale cyeat bix jawnex, pero yaa'nja ba'n tu'n t-xi' tii'n jun xjal tuj be te colbil tu'n tpon tuya Dios. Pero te Dios, mas ba'n tu'nxin. Tzki'nxin yaa'n tu'n jawnex ba'n cyu'n xjal te twitz tx'otx' cnetele t'hexin cyu'n xjal, sino cnetelte tu'n jun yol ajnintz pero tzinen. Tej colbil ke ja tej tu'n toc ke kc'u'j ti' Dios, yaa'n tu'n mas ba'n ku'n. Pero ke xjal te twitz tx'otx', ajnintz ja yol lu tuj cywitz. ²² Kej xjal judío, tu'n cyocslante ka jaxxix, cyajxix tu'n toc cycye'yen jun nintzaj techel te cycye'ybil ka jaxxix. Yal tzunkej xjal yaa'n judío, nuk tu'n jun yol jawnex ncwa' cyi'j. Ka ajnintz jun yol tuj cywitz, min cyocsla. ²³ Ju' tzunj, ka' tuj cywitz xjal judío oj nxi' kk'umen e cyim Cristo twitz cruz te clol xjal, cuma min cyocsla xjal tu'n tcawen Cristo cyibaj. N-e'la tuj cywitz nuk e cub

cyim Cristo twitz cruz tisen jun ka' xjal. Bix ju'x cyey xjal yaa'n judío, min cub cyi'j tu'nj yol lu, cuma tuj cywitz nuk ajnintz bix tzcaj yol. ²⁴ Yaltzen te cyey xjal e cybi tej ttxquet tu'n Dios, judíoleke, yaa'nle judíoke, Dios o jkonte cywitz tu'ntzen tel cyniy' ti'j tu'n tcyimlen Cristo o tyee'c'a Dios tipemal bix alcyey ba'n tu'nxin. ²⁵ Ja tzunj yol ti'j tcyimlen Cristo, mas jawnex tnaabl twitzj cye xjal cynaabl. Bix jtzin cykba'n kej xjal mintii' tipemal Dios, pero mas tipemal tibaj cye xjal cypemal te twitz tx'otx'. ²⁶ Key hermano, ejee'y jun techel te ja lu. Cybisenx ti'j ti' xjalelkey tej ttxconte Dios ejee'y. Tej cyocslana, yaa'n ejee'y nintzaj xjal, sino nuk yalxj xjalkey. Cywitzj xjal te twitz tx'otx' yaa'n nim cybaja ba'n cyu'na, bix yaa'n nim tawil xjal at cyxola. ²⁷ Te cye xjal te twitz tx'otx' ejee' cyey min tz'el cyniy' ti'j. Pero ejee'xix cyey e tsicy' Dios tu'n cyoca te t-xjal. Ju'tzen e tzaj tk'o'n Dios cych'ixew kej xjal mas ba'n cyu'n tuj cywitz. Bix o tscy'o Dios ejee'y mintii' cyilbil ti'j tu'ntzen ttzaj cych'ixew kej at nim cyilbil ti'j tuj cywitz. ²⁸ E jaw tscy'o'n Dios kej xjal tal mebe bix kej xjal ic'bil bix kej mintii' ba'n cyajbe'na tuj cywitz nintzaj xjal, tu'ntzen la' alcyey jun k'ij ctzaal cych'ixew kej mas ba'n cyu'n tuj cywitz. ²⁹ O hint jlu tu'n Dios tu'ntzen min-al jun xjal ba'n tjaw tniiman tiib twitz Dios. ³⁰ Cyey, mintii' tu'n tjaw cyniman cyiiba, cuma cykilca cynaabla bix t-xtalbil Dios cyibaja bix cychunk'lala ma tzaj k'o'n tu'n Dios nuk tu'nj o cymojba cyiiba tuya Cristo Jesús. Dios o tzaj k'onte Cristo ke, bix nuk tu'n Cristo n-el kniy' ti'j, bix nuk tu'nxin jiquen ko' twitz Dios, bix nuk tu'nxin sak ko', bix nuk tu'nxin o ko colpet tj'ab il. ³¹ Ju' tzunj ko nimanxit Kaaw, tisen toc tuj tyol Dios: "Alj taj tu'n tjaw tniimsan tiib, mas ba'n jaj te Kaaw cjawel tniimsa'n," tzi tyol Dios.

2

O kban apóstol Pablo cye aj Corinto ti'j tcyimlen Cristo twitz cruz

¹ Key hermano, tej npomlana cyxola te kbalte jun jaxxix tyol Dios at-xe k'ij te tneel maj, min in pona yee'lte jun waxa nyola mas ba'n wu'na, bix min in pona kbalte jun jawnex yol cyey nuketle ejee'j ke xjal jawnex el cyniy' ti'j. ² O'cx jwe waj tej ntena cyxola, jaj tu'n t-xi' nk'umena tpochalj tcyimlenj Jesucristo, jxin Kcawel e cyim twitz cruz ti' kil. ³ Tej npona kbalte tyol Dios cyey, e cub ttzi wi'ja tu'n mi'n paltex tk'umj cykil tyol Dios wu'na cyey. ⁴ Jnyola e xi' nkba'na cyey yaa'n tisen tyol jun xjal mas ba'n tu'n, tisenj cye nmak xjal tuya jawnex cyol. Jweya nyola nuk tu'n tipemal Dios bix tu'n Espíritu Santo, ⁵ tu'ntzen e cub cyi'ja tu'n ke cye'c'ua ti' Kaaw, yaa'n tu'n mas ba'n cyu'n xjal, sino tu'n tipemal Dios.

Tu'n Espíritu Santo n-el kniy' ti' Dios

⁶ Oj nyolena cyxolj ocslal ya n-el cyniy' ti'j, nchin yolena ti' jun yol yaa'n te twitz tx'otx'. Jyol lu min tz'el ba'n tuj cywitz kej nenel te twitz tx'otx'. Ejee' nenel ocsla'nke cyu'n xjal ja'lewe, pero chi xe'l tuj il. ⁷ Ja tumel lu te Dios. Pero nimxe tyem mintii' tumel kuya, cuma jun tumel tuj ewjtal ta' tu'n Dios. Pero ya chic'ajte te ke. Tej tumel lu tu'n Dios atte jatxe tuj tneel, jaj tu'ntzen kclet te junx maj. ⁸ Ch'ixc'a yaa'n entera cawel te twitz tx'otx' min el cyniy' ti'j ja lu. Tisen tzunkej cawel tuj Jerusalén, nuket el cyniy' ti'j, mintetle e cub cybyo'n nintzaj Kaaw Jesús twitz cruz. ⁹ Ju' tzunj at tumel tuj tyol Dios tej ttzi cyjulu: "Bajx cyla' xjal bix bajx cybi' xjal bix bajx tzula tuj cye'c'ua' xjal jun chunk'lal o tbincha Dios cye kej xjal n-oc tak' Dios ti' cyanem," tzi tyol Dios.

¹⁰ Yaltzen ke ejoo' ocslal, q'uelel kniy' ti'j ti o baj tninc'u'n Dios, cuma at Espíritu Santo te Dios kuya, bix ttzki'n Tspirít Dios ti niy' tuj tc'u'j Dios. ¹¹ Yaltzen cye xjal, nuk ja xjal n-el tniy' ti'j ti niy' tuj tc'u'j. Ya tu'n tel niy' ti'j ti niy' tuj tc'u'j juntl xjal, mlay. Jax ju'x te Dios. Ja Tspirit Dios itzkilte ti niy' tuj tc'u'j Dios bix nuk ja itzkilte. ¹² Bix ja tzunj Espíritu Santo o kiik' te Dios. Yaa'n eto' tjak' jcawbil cynaabl xjal te twitz tx'otx', sino eto' tjak' tcawbil Espíritu Santo o kiik'. Bix tu'n Espíritu Santo q'uelela kniy' ti'j ti niy' tuj tc'u'j Dios, tu'n tel kniy' ti'j alcyey tumel at tu'n Dios ki'j bix alcyey t-xtalbil Dios tzul te ke. ¹³ Oj t-xi' nk'umena jun jaxxix yol cye kej nche'x lpe ti' Espíritu Santo, yaa'n cynaabl xjal te twitz tx'otx' tuya nintzaj yol, sino tnaabl Espíritu Santo tzin nk'umena.

¹⁴ Pero ja tzunkej xjal te twitz tx'otx', min cyocsla t-xnak'tzbil Tspirít Dios, cuma te cye nuk jun tzcaj yol tuj cywitz. Bix mlayx tz'el cyniy' ti'j, cuma mintii' Espíritu Santo at cyuya te onlte cye. ¹⁵ Pero ke nko'x lpe ti'j Espíritu Santo, n-el kniy' ti'j alcyey jaxxix. Pero kej xjal te twitz tx'otx', min che'x lpe ti'j Espíritu Santo, bix min tz'el cyniy' ti'j alcyey jaxxix. Ju' tzunj mlay chi oc ten tu'n t'aj c'ycye'yen knaabl, cuma min tz'el cyniy' ki'j. ¹⁶ Tzi tyol Dios cyjulu: "¿Alj yaa'n ocslal twitz tx'otx' q'uelel tniy' ti'j tnaabl Kaaw? ¿Bix alj c'oquel xnak'tzante? Min-ax jun," tzi tyol Dios. Perotzen ke, n-el kniy' ti'j tnaabl Cristo. Ju' tzunj kej te twitz tx'otx' mlay tz'el cyniy' ki'j.

3

Junx nko ak'anan cykilca ko' tuj taak'en Dios

¹ Pero cyey, hermano, tej npona cyxola te kbalte tyol Dios cyey tuj tneel, bix maatk ac'aj ocslalkey. Mitkna'x cytzketa tuj cyocslabla. Cynaabla nuk tisex cynaabl xjal te twitz tx'otx'. Ju' ke cyey tisen jun nee' mix n-e'la tniy' ti'j. Ju' tzunj mlay chin yolena cyuyey tisen tuya jun xjal ma xjal'tl. ² Tej npona tuj tneel, min el cyni'ya ti'j. Ju' tzunj e xi' nk'o'na xnak'tzibil cyey yaa'n nim t-xi'len, tisen jun xuuj nuk tch'u' tal nxi' tk'o'n cuma mina'n tak' waa'l. Nuket e xi' nk'o'na xnak'tzibil cyiw nej, tisentzele nxi' nk'o'na waabj te jun xlak. Bix ju' x'alewe mina'x tel cyni'ya ti'j tu'n cyiik'entey xnak'tzibil mas tz'aklxix, ³ cuma nxi' cynimanxa nuk o'cx tajbil cyxumlala. Cyxola at k'oj, at ic'bil, at ch'len, bix pabl cyiiba. Ju' tzunj yaa'n cyiwkey tuj cyocslabla. ⁴ Cybisenx ti'j ti nbaj cyey oj nxi' cykba'na, "Keya te Pablo ko'ya," bix cabtl nxi' cykba'na, "Te Apolos ko'ya." Tej k'oj lu tzin tkba'n yaa'n cyiw ete'y tuj tyol Dios. ⁵ Cxe'l nkanena cyey, zinayenpa tzuna jun xjal jawnex? ¿Bix japatzen Apolos juntl xjal jawnex? ¿Altzen ko'ya tu'ntzen at k'oj nbaj ki'ja cyu'na? O'cx tu'n kajben keya te Kaaw tu'n kk'umena tyol Dios cyey, tu'ntzen cyocslana. Teeylex juun keya o'cx e bint ku'na cyxola jkaak'ena e tkba Dios. ⁶ Ejee'y tisen jun awal. Tej npona cyxola te kbalte tyol Dios, tisen e cyaj wawa'na iyaj. Tejtzen tpon Apolos te k'olte mas xnak'tzibil cyey, tisen e xi' a' tibaj iyaj, tu'n ttz'iy awal. Pero ja te Dios nojsal awal tuj cyanema. ⁷ Ju' tzunj jxjal awaal yaa'nxiix nim t-xi'len, bix xsunj k'ol a' tibaj awal, jax yaa'n nim t-xi'len. Ja te nim t-xi'lenj ja te Dios, cuma jaxin tzpetsalcy awal. ⁸ Ja tzunj jxjal awaal bix xsunj k'ol a', junx japenina cyaak'en. Dios chjolyce, teeylex juun tuya taak'en la' tii'n taak'en, ka ba'n bix ka min. ⁹ Ju' tzunj nko ak'anana Apolos bix inayena kuya kiiba tuj tawal Dios. Yaltzen cyey, tisen tawal Dioskey.

Cxe'l nk'umena tuya juntl tumel. Cyey tisen jun jaa'key njaw tbincha'n Dios. ¹⁰ Weya tisen jun nintzaj binchal jaa' kena. Ntzki'na ti tten tu'n tcu'x tk'uk'lel jaa'. Dios o tzaj k'onte waak'ena tu'n tcub cyi'ja wu'na tu'n cyocslana ti' colbil ke. Ja tzunj waak'ena lu tisentzen ncu'x tk'uk'lel t-xee' jaa' wu'na. Bix juntl t-ak'anal Dios at taak'en te xnak'tzal cyey ti' tyol Dios. Jlu tisen nxi' tk'o'n look' twi' tk'uk'lel jaa'. Bix jaca juun binchal jaa' njaw tk'o'n look' twi' tk'uk'lel jaa' c'oquele tc'u'j ti'j tu'n tcyaj taak'en ba'n. ¹¹ Ja tzunj tk'uk'lel o cyaj wu'na cyxola, jatzen Jesucristo. Mintii' juntl tk'uk'lel cyocslabla at. ¹² Tibaj tzunja tk'uk'lel cyocslabla, jun t-ak'anal Dios ya ba'ntltzen tu'n t-xi' tk'o'n t-xnak'tzibil, tisen njaw tbincha'n jun jaa' tibaj tk'uk'lel jaa'. Katzen nxnak'tzan ba'n, ju'tzen taak'en tisen oro bix plata bix tisen xak cyecaxsen bix cyiw te junx maj. Pero ka min xnak'tzan ba'n, ju'tzen taak'en tisen tzee' bix tz'im bix ptz'unt. ¹³ Tzul jun k'ij te niy'belte tipemal taak'en jaca juun xjal, ka jaxxix taak'en, bix ka min. Tuj tzunj k'ij tzul tu'n Dios cwel tz'ak alcyey xnak'tzibil yaa'n jaxxix, tisen jun jaa' nuk ptz'unt t-xee' jun rato cwel tz'ey' oj toc k'ak' ti'j. ¹⁴ Ka ma xnak'tzan ba'n cye xjal, bix jtaak'en min txi' tuj il oj toc tcyey'en Dios, tcotzentzen jun tcotz ti'j tu'n Dios. ¹⁵ Pero ka min xnak'tzan ba'n cye xjal, mintii' tcotz tk'a' Dios, amale ccleletelet tuj k'ak'. C'oquele tisen jun xjal n-etz ok tuj tken k'ak' pero mintii' q'ueletz tii'n tuj tken k'ak'.

¹⁶ Yaltzen cyey, hermano, ¿mimpatzen tz'el cyni'ya ti'j ejee'y tisen jun tja Dios? Tisen najben cyjay te cynajbila, ju'tzen nchi ajbena te tnajbil Espiritu Santo. ¹⁷ Katzen at jun xjal ma cub xitente tjta Dios tuya t-xnak'tzibil yaa'n tumel, jax cwel t-xiten Dios ja xjal, cuma sakkix tnajbil Dios, bix tnajbil Dios tzunkey.

¹⁸ Cyc'ojlanx cyiiba tu'n mi'n chi jaw tz'iyaya. Kej xjal te twitz tx'otx' ba'n n-el tuj cywitz oj taj jun xjal tz'oc te tneel. Pero tuj twitz Dios, yaa'n ba'n. Ka cyaja chi oca te mas ba'n cyu'na tuj twitz Dios, ya iltzen ti'j otk chi oca tisen mintii' ba'n cyu'na tuj cywitz xjal te twitz tx'otx'. ¹⁹ Kej mas ba'n cyu'na tuj cye cywitz, tzcaj n-e'la tuj twitz Dios. Ju' toc tuj tyol Dios cyjulu: "Dios cwel xitente kej xjal jawnex ba'n cyu'na tuj cywitz. Ejee'x chi xe'l tz'ak tuj jnbaj bint cyu'n tisen tuj jun c'o'bil," tzi tyol Dios. ²⁰ Bix tzi juntl tyol Dios cyjulu: "Ttzki'n Dios mintii' c'abela jawnex cynaabl kej xjal te twitz tx'otx'," tzi tyol Dios.

²¹ Ju' tzunj mi'n tz'oc cyk'on cyiiba mas ba'n cyu'na oj cyxi' lpey ti'j jun xnak'tzal mas ba'n tu'n tuj cywitz. Mi'n txi' cyk'umena nuk te Pedro key bix ka te Apolos key, cuma cykilcaxexin c'ajbel te cyey. ²² Yaa'n nuk Apolos c'ajbel te cyey, bix yaa'n nuk inayena c'ajbel te cyey, sino kca'bela ko ajbela te cyey, bix tuyax Pedro c'ajbel te cyey, bix cykil tik'ch at twitz tx'otx' c'ajbel te cyey, bix hasta chunk'lal bix cyamecy c'ajbel te cyey, bix ja tyem te ja'lewe, bix cykil tyem te yaj, cykilca c'ajbel te cyey. ²³ Yaa'n cykilcaj lu tu'n tajben te cawlte cyey, sino cykilca te ajbel te cyey, pero mas il ti'j ejee'y tu'n cyajbena te Cristo, bix ja Cristo te ajbel te Dios.

4

Nuk ajbelel ko'ya te Cristo

¹ Ju' tzunj, key hermano, keya nuk te kajbelela te Cristo tu'n t-xi' kxnak'tza'na cyey alcyey tumelj e'wen ta' tu'n Dios ootxa pero ya chic'aj ja'lewe. ² Apolos bix inayena nuk t-ak'anal

Cristo, bix cytzki'na te jun ak'anal il ti'j tu'n tbint taak'en k'o'n tu'n taaw, tu'ntzen ba'n toc ke tc'u'j tpatrón ti'j.

³ Yaltzen weya, yaa'n il ti'j tuj nwitzza ti niy' tuj cyc'u'ja ti' waak'ena. Bix jax mintii' il ti'j tuj nwitzza tu'n toc tc'u'j juntl xjal ti' waak'ena, ka ba'n bix ka min. Mi nuket inayena mlay tz'oc nwitzza ti' waak'ena. ⁴ Tuj nwitzza ba'n nbint waak'ena wu'na, pero mintii' il ti'j tu'n t-xi' nkba'na ka ba'n waak'ena, cuma nuk ja te Kaaw kbalte ka ba'n. ⁵ Ju' tzunij yaa'n tumel tu'n cyoc tena te cyey'lte ti tten waak'ena. Tzul tej k'ij oj tul Kaaw te cyey'lte cykil ak'untl, tu'n tchic'ajax tii'n taak'en jaca juun xjal. Bix oj tulxin, te cyey'lte ti niy' tuj tc'u'j jaca juun xjal. Bix kej xjal e binchan ba'n cyc'ma'n jun ba'n yol cyibaj tu'n Dios.

⁶ Key hermano, cykil t-ak'anal Dios at tu'n cyajben cyey, yaa'n nuk inayena tuya Apolos. Pero najben jkbi'ya tuj-j'uj lu te cyey, cuma ejoo'ya te jun yec'bil ti tten tu'n tajben jun xjal te Dios. Nxi' ntz'i'bena nuk o'cx kajbelela te Cristo tu'n kajbena te cyey, tu'ntzen tbint cyu'na tu'n taajtz ti' cynaabla, tisenzen tkba'n tyol Dios, bix tu'ntzen mi'n chi jaw tz'ia'y oj cyxi' lpey ti' jun xnaktzal mas ba'n tu'n tuj cywitzza. ⁷ Cxe'l nkanena cyey, ¿tikentzen nchi jaw tz'ia'y twitz cabtl? ¿Titzen mastl at cyuyey tec'axtlpa tzunj e tzaj tk'o'n Dios te cyey? Pero katzen o cyiik'a cykilca te Dios, jey', ¿tikentzen nchi jaw tz'ia'y jaac'aca tej ejee'xa o chi jyonte cyu'nxa?

⁸ Key ocslal tuj Corinto, tuj cywitzza cykilca ba'n cyu'na bix ya mintii' juntl il ti'j te cyey. Tuj cywitza cawelkey. Tuj cywitzza mintii' ba'n wu'na bix yaa'n il wi'ja. Lastim ken weya yaa'n cawelkey. Nukettzen ju' otk pon k'ij te cawel, tu'ntzen in cawenttzen loya cyuyey.

⁹ Pero yaa'n ju'wa, sino tisenca ja Dios o cub yeec'ante keya t-xel Jesús cywitz xjal tu'ntzen nuk chi tze'l xjal ki'ja. Ejoo'ya tisen jun pres tu'n tcub byet bix nim nbaj xmucchet. O ko oca te cyey'byil cywitz cykilca ke ángel cyuyax ke xjal, tu'ntzen cyxmucchan ki'ja.

¹⁰ Oj kak'anana tuj taak'en Cristo, tuj cywitz xjal tisen otk jaw tuj kwi'ya. Yaltzen cyey, oj cyak'anana tuj taak'en Cristo, jawnex ejee'y tuj cywitz xjal. Keya, mintii' kipemala tuj cywitz xjal. Cyey, nim cypemala at tuj cywitz xjal. Keya t-xel Jesús, nuk jun ch'ixbajil ko'ya. Cyey, nintzajkey tuj cywitzza bix tuj cywitz xjal. ¹¹ Cykil tyem hasta ja'lewe keya o tziy'x weyaj bix tak' a' ku'na tuj kaak'ena, bix at maj mintii'xix ch'in kxbalena. Bix nim xjal o tz'oc pjunte keya, bix at maj mintii' kwethila ncnet. ¹² Bix tuj kaak'ena ti' tyol Dios mintii' twi' kc'u'ja. Tu'n kitz'ja, at maj sictnin ko'ya tuj cyiw ak'untl tu'n kk'aba. Bix tej tiy'x cykilj lu ku'na ¿ti kse'ya? Tejtzen cyoc yasen xjal ki'ja, nuk e kkaniya t-xalbil Dios cyibaj. Bix tejtzen toc cypju'n xjal ejoo'ya, nuk e cub kpa'na. Mintii' oc kbincheya cyi' xjal. ¹³ Bix tejtzen jaw jlet xtak'bil yol ki'ja tu'n cabtl, aj ktzak'be'na tuj tumel. Nejl, bix ju'x ja'lewe, cywitz xjal nuk tisen tx'ajbil twitz lak ko'ya.

¹⁴ Cykilj lu niy'x ku'na. Nxi' ntz'i'bena jlu te cyey, yaa'n tu'n tcub cych'ixewa, sino nuk te nimsabl cyc'u'ja tu'n cytena mas tuj tumel. Nxi' nkba'na ju'wa cuma n-oc cyak'a weya tisen ncwalkey. ¹⁵ Ejee'y tisen ncwalkey, cuma inayena tisen cymana tuj tyol Dios. Amale atet hasta laaj mil cyxnaktzala ti' tyol Cristo cyxola, nuk junx cymana at tuj tyol Dios. Inayena. Inayena tneel xjal in pona cyxola tuyaj yol ti'j colbil cyey tu'n Cristo Jesús. Bix tu'nj nyola itz'ja cyocslabla. Ju' tzunij inayena tisen cymana tuj cyocslabla. ¹⁶ Ju' tzunij ncub nwitzza cywitzza tu'n t-xi' cyii'na ti tten wu'na. ¹⁷ Tu'ntzen tel cyni'ya ti'j ti tten wu'na, o txi' nch'k'o'n Timoteo tu'n tpon cyxola, cuma ya tz'iki'ntlxin ti tten nnaabla. Tisen cyey, ja Timoteo jun xjal ocslan ti' Kaaw tu'n nyola. Ju' tzunij tisen ncwalxin tuj kocslabl, bix ja jun ocslal jiquenxix tuj tyol Dios. Oj tponxin cyxola, jatzen ctzaal tna'nxin cyey ti ntena tuj wocslabla ti' Cristo bix ti tten nnaabla, bix junx ta' nyola cyxol cykil ocslal.

¹⁸ Attzen juun cyey tuj cywitzza at cytziy wi'ja tu'n npona cyxola tu'n woc ilena cyi'ja, tu'n ccyajaja tuj tumel, bix ju' tzunij nchi jaw tz'ia'y. ¹⁹ Pero ka ma tak' Kaaw weya, chin pomel naj cyxola. Bix oj npona, c'oquel ncyey'ena bix c'oquel nniy'be'na cynaabl jxjal nchi jaw tz'iy, ka nuk tuya nintzaj yol nchi yolen, bix ka at tipemal cyol. ²⁰ Yaa'n nuk tu'nj nxi' kk'umen ba'n ko', sino tu'nj ba'n tzin kbancha'n, ejoo' ocslal nko yeec'ana ncawen Dios tuj kanem. ²¹ ¿Entonces alcye cyaja? ¿Cyajpey tu'n npona tuya i'lbil yol, tisen jun mambaj cyiw oj tpon cyxol ke tcwal ka min cybi? ¿Bix ka cyajpey tu'n toc k'ak'en nc'u'ja cyi'ja oj npona cyuyey?

5

Tej tyole apóstol Pablo ti'j jun ocslal nbint il tu'n

¹ O tz'el tziit tyol jilj at jun nim ch'ixbajil cyxola. At jun ocslal n-oc ipan ti' tcab ttxu. Ja il lu mintipe bintja cyxol kej xjal yaa'n ocslal. ¡Nimxsen jun ch'ixbajil te cyey! ² ¡Bix amale atet jun nimxsen il cyxola, pero tzinx n-oc cyk'on cyiiba te jawnex bix mas ba'n cyu'na! Yaj tzunij xinak tocx binchal il cyxola, masetle ba'n ka tuj bis ete'y ti'j twitzj nuk nchi jaw tz'ia'y. Bix masetle ba'n tu'n tetz cyxoo'na ja aj il cyxola twitzj ete'c'a clolte. Pero mintii' o cybinchay ti'j aj il. ³ Nuket intin cyxola, inayentla o cub k'onte tuj castiwa. Tuj nnaabla ntiina cyxola te

cyey'lte, ⁴ bix entera ke cyey cychmo'nc cyiiba ti'j xinak aj il. Bix tuj nnaabla ntiina jatzewe cyxola tuya jun woclena tu'n Kaaw Jesucristo bix tuya nim wipemala tu'n, ⁵ tu'n t-xi' nkba'n tu'n tex cyxoo'na jxjala cyxola, tu'ntzen taj tuj tcawbil taaw il jun rato, tu'ntzen tel tniy'xin ti'j tu'n il nimxsen ka' tzin tk'o'n te texin. Oj tiy'x q'uixc'aj tu'nxin ju'wa, kapetzen tu'n tmeltz'ajxin, tu'ntzen tocxxin te tajlal cyuyaj xjal chi co'pjel oj tul Kaaw Jesucristo juntl maj.

⁶ Nuket ntiina cyxola, j-ocslal aj il tisetle yaa'n ocslal tuj nwitzza, pero cyey, ba'n tuj cywitzza ti'j tox cyxola, bix jawnex cyk'on cyiiba cuma nuk niy'xec til cyu'na. ¿Mimpatzen tz'el cyni'ya ti'j ka ma tz'ocx ten jun ocslal binchal il cyxola, c'oquel lpe cabtl ti'j? Ka at il cyxola, cxe'l tz'iy tisen jun cluj k'otj te ttx'otx'el pan njaw punntz'aj tu'n n-ocx levadura te tk'anel. ⁷ Ju' tzuñj cyimetz cyxola cykilj tka'yel tox cyxola. Nejl ke xjal te Israel e clet cychunk'lal tu'n carnal e xi' cyoyen te Dios. Bix tej tiy' jnink'ij te co'pbil cyexin, e waa'nxexin pan mintii' levadura tox te tk'anel. Jlevadura ajben te techel il tej tox tuj cypanxin. Yal te ke ja'lewe, jatzen Cristo e cyim te co'pbil ke. Ju' tzuñj cxe'l kii'n kchunk'lal mintii' kil, cuma ejoo'tzen tisen pan etz levadura tuj. ⁸ Ju' tzuñj, tu'ntzen kajben te Dios, cyjeltzen kk'o'n kka'yel e bint ku'n nejl, tisetzen cye aj Israel etz cyi'nxin levadura tuj cyjaxin tu'ntzen tiy' cyiy'sa'nxin Pascua. Tej Pascua tisen kchunk'lal ja'lewe, bix yaa'n tumel tu'n knimante tuya mastl kil. Mas ba'n tu'n knimante tuya jun knaabl sakkix bix jaxxix.

⁹ Key hermano, o txi' ntz'i'bena juntl u'j te cyey tu'n mi'n tz'oc cymojban cyiiba cyuya kej ocslal aj pajlel. ¹⁰ Pero mintii' e xi' nkba'na tu'n tel cypa'n cyiiba cyi'j kej xjal yaa'n ocslal, amale aj pajletke, bix kej nuk tik'ch cyaj, bix kej nchi alk'an, bix kej nchi na'n Dios twitz cysant, cuma ete'q'uey twitz tx'otx' cyuya, cuma kej te twitz tx'otx' cykilca ete'c'a cyuyey. Katzen cyaja tu'n mi'n chi yolena cyuya, entonces iletnele ti'j tu'n cyi'ya twitz tx'otx'. Mlay txi' nkba'na tu'n tel tpa'n cyiiba cyi'j xjal yaa'n ocslal. ¹¹ Nuk o'cx waja txi' nkba'na ka at jun ocslal, bix nbincan nim til, mi'n cub cyjunen cyiiba tuya. Ka at jun ocslal at tpaj, bix ka nuk tik'ch taj, bix ka nna'n Dios twitz tsant, bix ka nyasen ti' juntl xjal, bix ka nc'an k'e'n, bix ka n-alk'an, mi'ntzen tz'oc cymojban cyiiba tuya, mi nuket tu'n cywaa'na junx tuya, te yec'bil yaa'n ba'n tnaabl tuj cywitzza. ¹² Ju'tzen jac'a tz'e'la cyniy' ocslal aj il ti' cyil, tu'ntzen tul cych'ixew, tu'ntzen tcyaj cyk'o'n cyil. Jatzen cyey yaa'n ocslal, mintii' ke koclén te cyey'leccye. ¹³ Ja te Dios tzul cyey'lcyé.

Ju' tzuñj, key hermano, cyimetz cyxola jxinak n-oc meltz'aj ti' tcab ttxu.

6

Yaa'n ba'n cyxi' ocslal kanel ti' juntl ocslal cywitz aj cawel te twitz tx'otx'

¹ Key hermano, at juntl il o nbi cyi'ja. O nbi'ya oj at ch'in cyk'oja cyxola ejee'y ocslal, bi'x nchi pon baja cywitz cawel yaa'n ocslal tu'n tbaj cycye'yen al tzinen tyol bix al min. ¿Tikentzen min nbint cyu'na cyxolxa tu'n tbaj twi' cyk'oja? ² ¿Mimpatzentii' tumel cyuyey ke ocslal chi binchal stis bix chi cawel cyibaj xjal te twitz tx'otx' la' alcye jun k'ij? ¡Bix lux ke cyey mix nbina cyu'na tu'n tshint jun ch'in stis cyxola! Tzinx nchi jyona kej xjal yaa'n ocslal te nic'ulte cyey, ejee'y ocslal.

Yaa'n tumel ja lu. ³ ¿Mimpatzentii' tumel cyuyey hasta ke ángel ko cawel cyibaj? Katzen ju'wa, ¿mlaypale bint tu'n tsub kninc'u'n ti jilel ch'in yaa'n nim t-xi'len nbaj kxol? ⁴ Oj at jun k'oj cyxola, ¿tu'n tiken nchi jyona stis cywitzj xjal yaa'n ocslal? Masetnele ba'n tu'n toc cyk'o'na jun ocslal mas ajnintz tnaabl te nic'ul cyey ti' jun cyk'oja. ⁵ Ja tzuñj lu nxi' nk'umena cyey nuk tu'n ttzaj cych'ixewa. ¿Mimpatzen-al jun tox cyxola at ch'in tnaabl te nic'ul te cyey ti' cyk'oja? ⁶ Nchi k'olja cyxolalexá, bix yaa'n o'cx, sino bi'x npon baj cyk'oja cywitz xjal yaa'n ocslal. ⁷ ¡Nimxsen jun ch'ixabajil oj nche'xa jyolte ley ti' juntl ocslal! Mas ba'n tu'n tiy'x jun yasbil cyu'na tu'n jun ka' n-oc tbinche juntl ocslal cyi'ja bix mas ba'n tu'n tiy'x cyu'na oj n-alk'an juntl ocslal cyi'ja, twitz tu'n cyxi'y jyolte ley ti' cyuyey cywitz xjal yaa'n ocslal. ⁸ Pero yaa'nj ba'n tzin cyjyo'na, sino nchi jyona k'oj ti' juntl. Bix yaa'n o'cx, pero hasta nchi alk'ana. Bix yaa'n nuk nchi alk'ana, sino hasta ti' juntl ocslal nchi alk'ana. ⁹ ¿Mimpatzen tz'el cyni'ya ti'j kej nchi binchan ka' mi'n chi oc tuj tcawbil Dios? Mi'n chi tzpeta ti'j lu. Jax tej yol lu. Kej xjal at cypaj, bix kej niy' cyii' t-xu'l cyuya, bix kej nchi niman twitz cysant, bix kej xinak ncub cyk'on cyiib te xuuj tu'n toc ipan juntl xinak cyi'j, bix kej xuuj nchi jaw meltz'aj cyuya juntl xuuj. ¹⁰ Bix kej nchi alk'an, bix kej n-oc ch'i' cyc'u'j ti' tik'ch te juntl, bix kej bola, bix kej nchi yasen cyi' cabtl, bix kej ncub cytzyu'n xjal tu'n tel cypwak, cykilca tzuñkej lu mintii' cyoquelex tuj tcawbil Dios. ¹¹ Nejl ju' tzuñkey tisen kej lu. Pero yaltzen ja'lewe ya txjo'nkey tuj cyila tu'n Dios. Dios o scy'onte cyey tu'ntzen cyoca te t-xjal. Bix jiquentltzen ete'y twitz Dios nuk tu'nj o bint tu'n Kaaw Jesucristo cyi'ja. Bix tu'n Espiritu

Santo ocslanakey. Ju' tzunj mi'n che'xa cywitz ke xjal yaa'n ocslal te jyol stis ti' jun cyuyey ocslal.

C'ajbel kxumlal te Dios

¹² Ya juntl yol. At juun cyey nk'umene cykilca ba'n tu'n t'bin. Pero we cxe'l nk'umene cyey, amale cykilcat ba'n, pero yaa'n cykil najben. Ka at jun kajbil ka' mlay we', jatzen kaawja. ¹³ Jatzen cyey, tzin cykba'na oj taj kxumlal ch'amac'a xuuj, ju' tisenj oj kaj waabj twitz Dios. Oj ntkanen kc'u'j waabj, ba'n tu'n t-xi' kwaa'n. Bix ju'x oj tkanen kxumlal ch'amac'a xuuj, ba'n tu'n t-xi' kbincia'n, bix tzul jun k'ij tu'n Dios tu'n t'bj tilel waa'n bix pajbaj, tzikey ju'wa. Junelne n-e'la waabj tuya pajbaj tuj cywitz. Pero yaa'n tumel cyrasona. Min e jaw t'bincha'n Kaaw kxumlal te pajbaj. E jaw t'bincha'n texin kxumlal te texin, bix tu'n tiik'ente t-xtalbilxin. ¹⁴ Tisen o jatz tii'n Dios Kaaw tuj mukbil, jaxse ju'x cjawetz tii'n Dios ejoo' tuj kcyamecy tu'n tipemalxin. ¹⁵ Key hermano, ¿mimpatzen tz'el cyni'ya ti' kxumlal at tu'n t'niman te Kaaw? Katzen tu'n t'niman kxumlal te Cristo, yaa'ntzen tumel tu'n tel k'i'n tuj tk'ab Cristo tu'ntzen toc k'o'n tuj tk'ab jun puta xuuj. ¹⁶ ¿Mimpa tz'el cyni'ya ti'j oj toc ipan jun xjal ti' xuuj aj paj, junx cyxumlal otk tz'e'la? Tzitzen tyol Dios: "Oj toc ipan jun xinak ti' jun xuuj, twitz Dios junx cyxumlal otk tz'e'la," tzi tyol Dios. ¹⁷ Pero at juntl kmojbabl kiib mas jawnex twitzj kmojbabl kiib tuya kxu'l. Oj t-xi' kk'on kiib te Kaaw, junx kanem otk tz'e'la tuyaxin. ¹⁸ Ju' tzunj, cyk'oncja cyachbila cyuya xuuj. Jatzen cyey tzin cykba'na min txi' tnaabl jun xjal tuj il oj nbint il tu'n. Pero we nxi' nkba'na cyey yaa'n ju'wa. Ka at jun n-oc ipan cyi' ch'amac'a xuuj, bi'x nxi' tnaabl tuj il. ¹⁹ ¿Mimpa tz'el cyni'ya ti'j ke kxumlal t'najbil Espiritu Santo? O tzaj tk'o'nte Dios Tspirit te najal kuya. Ju' tzunj ejoo' tisen jun jaa', pero yaa'n te ke, sino te Dios tja. ²⁰ Lok'ajtzen o ko tema tuya nim twi', cuma tu'n tcyimlen Tcwal Dios e tlak' ejoo'. Ju' tzunj il ti'j c'oquel cyc'u'ja ti' cyxumlala tu'n tajben te tja Dios. Mi'n tz'oc cytz'ilsa'na cyuya juntl xuuj.

7

Jun xnak'tzibil ti'j mejoblenel

¹ Key hermano, ya pon t-xel wu'na ti' nimc'a cykanbila tuj cyu'ja o tzul wuyena. O tzaj cykanena weya ka ba'n tu'n mi'n chi majey. Cxe'l nk'umena cyey mas ba'n ja'lewe tu'n mi'n chi majey tuya xuuj, cuma cyiw ta' twitz tx'otx' ja'lewe. ² Pero at nim nny'bebl cyol xjal tu'n cyxi' ti' pajbaj. Ju' tzunj mas ba'n tu'n tten t-xu'l juun xinak, bix tu'n tten tchmil juun xuuj.

³ Yaltzen jun xuuj at tchmil, oj taj xuuj tz'oc ipan tchmil ti'j, il ti'j tu'n tcyuante xinak. Ju'xsen jun xinak, ka taj tz'oc ipan ti' t-xu'l, il ti'j tu'n tcyuante xuuj. ⁴ Jun xuuj yaa'n jax taaw t-xumlal. Mintii' tu'n tel t-xoo'n tchmil tuj wetbil oj taj tchmil. Jax ju'x xinak, yaa'n xinak taaw t-xumlal. Yaa'n ba'n tu'n t-xi' tkba'n ka tcy'i oj taj t-xu'l. ⁵ Ju' tzunj mi'n cub t-xq'ueyen tiib jun te juntl. Pero katzen at jun moj najlel cyaj cyniman jun ch'in tyem tu'ntzen cyna'n Dios ti' jun cypena, ba'nte. Pero mi'n cub cypa'n cyiib nim k'ij, tu'n mi'n chi cub caman tu'n taaw il tu'n t-xi' cyjyo'n juntl pajbaj tu'nj mlay cypa.

⁶ Entonces ba'n tu'n cymajey. Yaa'n lojo'nkey ti'j tu'n cymajey, sino nuk jun tumel ma txi' nk'umena cyey ka cyaja chi majey. ⁷ Pero tuj nwitzta ba'nxitile cykil xjal min-al cyxu'l, tisen inayena min-al nxu'la. Pero n-el nni'ya ti'j min o tak' Dios te cykilca tu'n cypante min-al cymoj. ⁸ Entonces j'tumel nxi' nk'o'na cyej xjal sortelx bix cyej xjal viuda, mas ba'n tu'n cycyaj min-al cymoj, tisen inayena. ⁹ Pero ka mlay cypa, mas ba'n tu'n cymaje, cuma mas ba'n at cymoj twitzj nchi k'a'bac ti' juntl pero mlay hint cyu'n.

¹⁰ Yaltzen cyej xjal najlel bix ocslalke, cxe'ltzen nk'umena mas tumel cye. Pero yaa'n nuk wexwe nyol, sino te te Kaaw tyol. Jun xuuj mi'n cyaj tcyeyen tchmil. ¹¹ Pero katzen ma cyaj tcyeyen jun xuuj tchmil, ya mi'n majetl tuya juntl xinak. Ba'n tu'n tcub ten t'junal, bix ba'n tu'n tcub t'ninc'un tiib tuya tchmil juntl maj. Jax ju'x te xinak, mintii' tu'n tex tlojo'n t-xu'l.

¹² Ja tzunkej xjal najlel bix at jun yaa'n ocslal, mlay chin n-oc ten k'umlte ti toc tu'n Kaaw ti'j, pero jac'a t-xi' nk'umena cyey jun tumel. Ka at jun xinak ocslal pero yaa'n ocslal t-xu'lxin, bix taj xuuj we' tuyaxin, mi'n tu'n tcub tpa'n tiibxin tuyaxuj. ¹³ Bix jax ju'x ka at jun xuuj ocslal pero yaa'n ocslal tchmilxuj, bix tajxin t'najle'nxin tuya t-xu'lxin ocslalxuj, jax mi'n tu'n tcub tpa'n tiibxuj tuyaxin, ¹⁴ cuma oj t'najjanxin tuya jun t-xu'lxin ocslal, ntk'o'n Dios t-xtalbil cyibaj nuk tu'nj ocslal t-xu'lxin, amale yaa'nt ocslal xinak. Jax ju'x jun xuuj yaa'n ocslal, ntk'o'n Dios t-xtalbil cyibaj nuk tu'nj ocslal tchmilxuj. Katzen ma cub cypa'n cyiib, yaltzen ke cycwal matzen che'x cyxol ke xjal yaa'n ocslal, bix mas chi xe'l tuj il.

¹⁵ Jatzen jun najlel yaa'n ocslal bix taj tu'n tcub tpa'n tiib tuya tmoj ocslal, ba'n tu'n t-xi' tzakpet. Min-al nk'on il ti'j tu'n'xix t'we' tuyaj tmoj. Ka tuj fuerzal ctemela tuya jun tmoj ocslal, nuk k'oj taj, bix yaa'n ba'n tuj twitz Dios, cuma te Dios taj tu'n knajan tuj ttzyal. ¹⁶ Tuj cywitz, ka jun xjal yaa'n ocslal at tuya tmoj ocslal, chebe c'oquel ocslal. Pero at maj yaa'n

ju'wa. Key hermano, mintii' tumel ka c'oquel tmoja ocslal, amale tent tmoja tuyey cykil tyem ojxe tcyim.

¹⁷Entonces, key hermano, mintii' il ti'j tu'n t'bay cych'ixben cyiiba tu'n cyxi' lpey ti'j Kaaw. Ka najlelkey, cyii'nx cynajle'na. Bix ka sortelkey, cyii'nx sortelxkey. Ja yol lu nxi' nk'umena, inayena Pablo, tuj cykilca tja Dios. Chi tenxixa tuj ttxubtxjal tuya alcye k'o'n tu'n Dios cyey tej cyocslana. ¹⁸Ka judiokey tej cyocslana, mi'n chi labta ejee'y xinak tu'nj t'z'umel el cpet twi' cytz'albila te yec'bil judiokey. Bix ka yaa'n judiokey tej cyocslana, yaa'ntzen il ti'j tu'n toc jtechel judio cyi'ja. ¹⁹Tuj twitz Dios yaa'n il ti'j ka jun xjal k'i'nx techel judio tu'n, bix ka min. Ja te mas il ti'j ka ma txi' cyocsla'na Dios. ²⁰Jaca juun xjal tu'n tten tixey tten tej toc ocslal. ²¹Ka ak'anankey tuj jun cyiw taak'en cypatróna tej cyocslana, mi'n baj cye'u'ja ti'j. Pero ka ma ttzakpi cypatróna ejee'y, cycuyam. ²²Ka ak'anankey tjak' tcawbil cypatróna tej cyocslana, mintii' nbaj tu'n, cuma o chi etza tuj tk'ab taaw il. Pero ka min-al cypatróna tej cyocslana, yal te ja'lewe ya attzen cypatróna, ja Kaaw Cristo. Ke cyey yaa'n ejee'y taaw tibaj ti taj cyxumlala. Ju' tzunj, tuj t'cwent Cristo, tzakpi'n ko' bix tzyu'n ko'. ²³Tzyu'n ko', cuma o ko tlok' Kaaw tuya jun nim chojbilte. Ju' tzunj mi'n cyaj kk'o'n Kaaw nuk tu'nj kk'on kiib alcye cyaj xjal. ²⁴Entonces, key hermano, mintii' il ti'j tuj twitz Dios ti cytena tej cyocslana. Ja te mas il ti'j, jaj tu'n kxi' lpe ti' Dios, bix tu'n kten tuj ttzjal.

²⁵Bueno, e tzaj cykanena weya cyi'j txin xuuj mina'n cymaje', ka ba'n tu'n cymajetxin. Amale mintii'xix o tzaj tk'umen Kaaw weya ti'j lu, pero cxe'l nk'umena jun tumel cyey. Tz'oc kex cye'u'ja ti' jun nyola, cuma tu'n t-x'albil Dios wibaja, n-oc ke tc'u'j Kaaw wi'ja. ²⁶Ya cytzki'ntla at nim yajibil tzul. Ju' tzunj, ba'nxittzele tu'n mi'n maje jun xjal. ²⁷Ka najlela, mi'n cub tpa'n tiiba. Pero katzen yaa'n najlela, mi'ntzen majey tuj ja' tyem ja'lewe. ²⁸Pero ka cyaja chi majey, ba'nte. Bix xsunkej txin sortel oj cymajetxin, yaa'n jun il tuj twitz Dios. O'cx cxe'l nk'umena nimx q'uixc'aj chi i'yela tuj cynajle'na tu'n tik'ch ilel tzul, bix waja tu'ntzen mi'n cye'ulbay nim q'uixc'aj. ²⁹Key hermano, cxe'l nk'umena cyey juntl maj il ti'j cwel kbisen ti'j cyuj ja cyiw tyem lu. Ya yaa'n nimtl tyem eto' tuj ttzjal. Ch'ix t-xi' twitz tx'otx' tuj il. Ju' tzunj il ti'j tu'n t-xi' kii'n tu'n kak'anan te Dios. Mas nintzaj tu'n kk'on kiib tuj taak'en Dios twitzj nuk nko ajkel ti' tik'ch at twitz tx'otx', cuma cykilca pjel. Kej at cyxu'l, mi'n nuk cyk'on cyiib o'cx te najlel ³⁰Bix kej at nim bisbajil cyi'j, mi'n cybis tz'oc nuk o'cx tak' cye. Bix kej nuk nchi tzalaj, mi'n txi' cybisen nuk o'cx chi tzalajel. Bix kej nchi lok'on, mi'n txi' cybisen nuk o'cx nchi lok'on. ³¹Bix kej nchi tzalaj ti' tik'ch at twitz tx'otx', mi'n nuk ja tz'oc tilel cyu'n. Cykilca pjel. Nuk jaj te Dios cyjel.

³²Entonces, ncy'iwa cyk'on cyiiba nuk te cykilca at twitz tx'otx', sino jaj te Kaaw taak'en c'oquel cyk'o'na il ti'j. Ju' tzunj mas ba'n tu'n cytena sortel, tu'ntzen mas t-xi' cyii'na taak'en Kaaw. ³³Pero jun xinak najlel mas najkel tuya ti chi itz'jela tcwal bix tu'ntzen aleyre t-xu'l. Jatzen xjalja minxix pon tc'u'j ti' taak'en Kaaw. ³⁴Jax ju'x jun xuuj. Ka yaa'n najlel, mas k'i'n taak'en Kaaw tu'nxuj. Pero katzen at tchmilxuj, mas ju' naj tc'u'jxuj ti' tchmilxuj tu'ntzen aleyrexin tuyaxuj.

³⁵Cykilj nyola lu nxi' nk'umena cyey tu'n tajben cyey. Yaa'n tu'n nchi oc nlojo'na tu'n mi'n chi majey, sino nuk waja tu'n cyajbena mas te Kaaw.

³⁶Katzen at juunk'a cyajxix n-oc juch cye'u'j tu'n cymaje, bix min tz'el cyganak'a tu'n cymajek'a cyuyatxin, ba'nxitnele tu'n cymaje. Ba'n oj cymajek'a cyuyatxin, cuma yaa'n ka' oj cymaje. ³⁷Pero ka jun xinak taj tu'n tcub ten t'junal, bix katzen ba'n tu'n tpante tu'n tiy'x tu'n tu'n mi'n tajbe xuuj, ba'ntzen tu'n mi'n maje tuya jun xuuj. ³⁸Ju' tzunj, jaj xinak cmajebel, ba'n t'bit tu'n. Pero ja tzunj mi'n maje, mas ba'n chinel tu'n.

³⁹Tu'n tpon baj nyola ti'j mejoblanel, il ti'j tu'n tten jun xuuj ocslal tuya tchmil ka i'tzx tchmil. Pero katzen ma cyim tchmil, ba'ntzen tu'n tmaje xuuj tuya juntl tchmil ka ocslalxin.

⁴⁰Pero tuj nwitz mas aleyrexuj ka mi'n ma majexuj juntl maj. Bix tuj nwitza cuyan tu'n Espiritu Santo tuyaj yol lu.

8

Jun tumel ti'j tchu'l alimaj o'yen cye cydios cymme

¹Bueno, key hermano, o tzaj cykanena ti'j cychu'l alimaj n-ocx oyete te cycotz sant, ka ba'n tu'n t-xi' cycho'na, bix ka min. Attzen juun cyey nk'umente ba'n, bix at juuntl cyey nk'umente yaa'n ba'n. At juun cyey o chi jaw t'z'ia tu'n t-xi' cycho'na, bix at juuntl cyey o chi jaw t'z'ia tu'n mi'n txi' cycho'na. Cxe'ltzen nk'umena cyey yaa'n ba'n ju'wa. Ja te Dios taj tu'n toc tak' cyuyey cyey, yaa'n k'oj. ²Ka at jun xjal nk'umente mas ba'n tu'n, tz'oc t'cwent ti'j, cuma kape min tz'el tniy' ti' cykilca. ³Pero jxjal n-oc tak' Dios te, jatzen xjalja n-el ba'n twitz Dios.

⁴Yaltzen ti'j ka ba'n tu'n t-xi' cycho'na tchu'l alimaj o'yen cye sant, cxe'ltzen nk'umena cyey cyjulu. Ya ktzki'ntl kej sant nchi oc maje xjal cywitz, yaa'n dioske. Nuk thince xjal.

O'cx jun Dios i'tzxi at, min-al juntl. ⁵ Tuj cywitz xjal yaa'n ocslal, at nim dios twitz tx'otx' bix twitz cya'y, bix ncub cybincha'n cysant tu'ntzen cyna'n cydios cywitz. ⁶ Yaltzen ke, ktzki'ntl o'cx jun Dios at, bix jaxin Kman Dios, bix te texin cykilca at. Bix o'cx jun Kaaw at, ja Kaaw Jesucristo. Bix tu'nxin e binne cykilca. Kuyax e bint tu'nxin. ⁷ Pero at juun ocslal cyxola mina'x tel cyniy' ti'j o'cx jun Dios at. Tzinx tzaj cyna'n cycastlembre te nejl. Ju' tzunj jchi'pj nxi' oyel cye sant cy'iwla'n tu'n sant tuj cywitz. Ju' tzunj, amale ocslaletke, oj t-xi' cycho'n tzunj chi'pj cy'iwla'n cyu'n sant tuj cywitz, tuj cywitz nchi chucj, cuma tuj cywitz nchi na'n dios cywitz sant. Pero ejee' tzunj ocslal mas cyiw ete' tuj cyocslabl, n-el cyniy' ti'j jun sant yaa'n Dios, bix ju' tzunj mintii' pjel tu'n, amale mat txi' cycho'n jchi'pj n-ocx oyel te sant. ⁸ Ka ma txi' kcho'n jchi'pj, bix ka min, yaa'n tu'nja ko elel ba'n twitz Dios.

⁹ Pero at juntl tumel. Ejee'y cyiw ete' tuj cyocslabla, cyc'ojlanx cyiiba oj t-xi' cyk'umena ba'n tu'n t-xi' cycho'na jchi'pj o'yen cye sant, tu'ntzen mi'n che'x tuj il kej ocslal yaa'n cyiw tuj cyocslabl. Oj nxi' cycho'na jchi'pj o'yen cye sant, amale yaa'nt ka' tu'n t-xi' cycho'na, pero jcabtl ocslal yaa'n cyiw ete' tuj cyocslabl ncub baj cyc'u'j ti'j. ¹⁰ Oj t-xi' tcho'na jun ocslal cyiw tuj tocsabl jchi'pj o'yen te sant tuj jun tja sant, bix ch'innch'e oj toc tcey'en juntl ocslal yaa'n cyiw ta' tuj tocsabl, yaa'n ba'n jlu, cuma tu'n tyeec'bil, cxe'l tcho'n juntl jchi'pj o'yen te sant, amale nbajet tc'u'j ti'j. ¹¹ Mas ba'n mi'n cub tyeec'an jun twitz juntl, cuma yaa'n nuk ti' jun xjal cyiw ta' tuj tocsabl e kyma' Cristo, sino tuyax ti'j yaa'n cyiw e cyma'. Ju' tzunj, yaa'n tumel tu'n t-xi' cytzpetsa'na juntl cyermaney bi'x nxi' tuj il. ¹² Ka n-oc cytzpetsa'na juntl ocslal, jax nchi binchana il ti' Cristo. ¹³ Ju' tzunj tuj ncwenta, ka nxi' ncho'na chi'pj o'yen cye sant bi'x nxi' juntl ocslal tuj il wu'na, bajx t-xa' ncho'na chi'pj o'yen cywitz sant, tu'ntzen ccyaj wermaniya jiquen tuj cyocslabl.

9

Toclen jun ak'anal tuj tyol Dios

¹ Key hermano, cyii'nx ti tten wu'na. Inayena jun t-xel Jesús. Ju' tzunj at nim woclena. Pero te weya woclen, mintii' cnkaniya ti'j.

Pero at juun ocslal nk'umente yaa'n t-xel Jesús kena. Pero jaxte inayena jun t-xel Jesús, cuma o wila Kaaw Jesús, bix o chi ocslana tu'nj waak'ena. ² Amale atet juntl wik xjal nk'umente yaa'n t-xel Jesús kena te cye, pero te cyey, jaxte inayena t-xel Jesús, cuma wu'na o chi oquey tuya Kaaw. ³ Jatzen jun yec'bil inayena t-xel Jesús.

⁴ Waj chin yola cyuyey ti'j jun woclena o cyaj nk'o'na. Cuma t-xel Jesús kena, ju' tzunj at woclena ti' chojbilte weya tuj waak'ena tuj tyol Dios, tu'ntzen mi'n chin ak'anantla tuj juntl ak'untl tu'n witz'ja. At woclena tu'n nwe'ya cyjay tu'n ttzaj cyc'o'na nwaya bix nc'a'ya. ⁵ Bix yaa'n o'cx, sino at woclena tu'n nmajeya, bix nuket at nxu'la ocslal, iletle ti'j tu'n toc cyc'ojla'na, tisen tzunj cabtl t-xel Jesús cyuya ke titz'en Jesús bix tuya Pedro at cyxu'l bix tzin cyiik'entexin onbilte te cyxu'lxin. ⁶ At woclena tu'n cychjontey inayena, pero inayena tuya Bernabé nko ak'anana tuya kk'aba ti' juntl kaak'ena tu'n kitz'ja joo'c'tzen nchi onj cabtl t-xel Jesús cyu'na. ⁷ At woclena tu'n cyc'ojlantey inayena tisen jun soldado c'ojla'n tu'n gobierno. Yaa'n tcwent-x ti' i'tzen. Bix jun ak'anal ti' tx'otx' at toclen tu'n twaa'n ti' tawal. Jax ju'x jun cyel wacx at toclen tu'n tetz tii'n tal tin wacx te tc'a'. Bix jax ju'x jun t-xel Jesús at toclen tu'n titz'j ti' taak'en tuj tyol Dios, cuma ka nak'anan jun xjal, at chojbil te. ⁸ Yaa'n nuk wexa nyol jlu, sino ju' tzin tkba'n tyol Dios. ⁹ Tzi tley Moisés cyjulu: "Mi'n tz'oc cyc'o'na paa' ti' tzi wacx, tu'n twaa'njil joo'c'tzen nbaj pjunjil triwa," tzi tyol Dios. Pero yaa'n nuk ti' wacx ja tumel lu, ¹⁰ sino ju' japenina ti' jun ak'anal ti' tyol Dios. Jun ak'anal ti' tyol Dios at toclen tu'n tiik'ente twi' tc'u'j cyekej najbenxin cye. Ktzki'ntl jun cjol tuya wacx ncjon ti' tx'otx', bix xsunj cjt'ol at cyoclen tu'n cycaman ti' cyja'tx'en. ¹¹ Ju'x weya at woclena tu'n ncamana ti' waak'ena. Inayen tzuna tisen jun awaal ti' tx'otx', bix ejee'y tzuna tisen tx'otx'. Jax tx'otx' ck'olte chojbil te awaal. Ja iyaj o cyaj wawa'na cyxola, jatzen tyol Dios. Ja jun iyaj mas jawnex twitzj iyaj te kwa. Ju' tzunj at woclena tu'n ttzaj cyonena ti chin nitz'jeleya.

¹² Jayle tzunj lu woclena o cyaj nk'o'na. Ntzki'ntl at juntl ak'anal ti' tyol Dios nxi' cyonena. Attzen cyexin cyoclen tu'n cyiik'entexin onbil cyexin. Yajtzen weya, mas weya woclen at cywitzxin tu'n wiik'enteya onbil weya. Pero min o nkaniya tu'n wiik'ente cyonbila, sino o chin ak'ananwe cyiw tu'n witz'ja. Ju' tzunj mlay tzaj cykba'na nchin k'umena tpoctal Cristo nuk tu'n pwak wu'na.

¹³ Cytzki'ntla e tkba Dios cye xjal judío kej nchi ak'anan tuj tja Dios at cyoclen tu'n t-xi' cycho'na cychu'lj alimaj e xi' oyel te Dios. ¹⁴ Ju'xse e tkba Kaaw cyi'j kej nchi ak'anan ti' k'oj tpoctal jyol te co'pbil, ba'n tu'n cyitz'j ti' cyaak'en tuj tyol Dios.

¹⁵ Pero ja nyola lu ma cub ntz'i'bena cyey yaa'n tu'n cychjontey twi' nc'u'ja ti'j. ¡Min! Weya, waja tu'n ncamante jun chojbil weya mas jawnex twitzj twi' nc'u'ja. Ja tzunj chojbil weya waja, jaj tu'n wak'anana ti' tyol Dios mintii' twi' nc'u'ja ti'j. Bix ja chojbil te weya ncy'iya

tu'n tel ti'i'n juntl. Ju' tzunj mlay txi' nkaniya mi nuket jun centavo cyey. Mas ba'n tu'n ncyima twitzj tu'n nchjeta ti'j. ¹⁶ Il ti'j tu'n t-xi' nkba'na tpochal co'pbil ke ti' kil. Ju' tzunj yaa'n tu'n tjaw nniman wiiba ti'j, cuma ka min xbint wu'na, tzul il wi'ja. ¹⁷ Ja waak'enja te kbalte tyol Dios yaa'n tu'n wexa nganiya, sino ja Dios oc k'onte weya ti'j. Nuket inayena e jyontej ak'unt lu, jac'atzen t-xi' nkaniya twi' nc'u'ja ti'j. Pero Dios o k'umente, bix ju' tzunj nxi' ncyana. ¹⁸ ¿Titzen jilel t-xel cncamiya? Jaj tu'n t-xi' nkba'na tpochal co'pbil ke cyey min chin kanena twi' nc'u'ja cyey ti' waak'ena ti' tyol Dios. Ju' tzunj ncyaj nk'o'na tu'n mi'n chin chjete.

¹⁹ Min-al jun xjal nchjonte weya. Ju' tzunj min-al jun xjal at toclen tu'n tcawen wibaja. Pero amale yaa'nt ntiincxa tjak' tcawbil mi nuket jun xjal, ma chin oca te ajbel te cykilca xjal, tu'ntzen cyxi' lpe nim xjal ti' Cristo. ²⁰ Oj ntiina cyxol xjal judío, yaa'n nuk c'oquex ntx'omena cyley. Amale minttii' il ti'j tu'n ncyanteya cyley, pero tzinx n-oc nk'on wiiba cyuya judío, tu'ntzen toc cybi'n nyola bix tu'n cyocslan ti' Cristo. Jax amale atet woclena tu'n mi'n tz'oc nbi'na tey Moisés, pero oj ntiina cyxol ke'j xjal n-oc cybi'n tley Moisés, jax n-oc nbi'nwe, tu'ntzen mi'n chin n-el cyiiq'uen bix n-oc tzen cybi'n jweya nyol. ²¹ Bix ju'x oj ntiina cyuya ke'j xjal yaa'n ete'cx tjak' tley Moisés, jax yaa'n nuk n-ocx ntx'omena cyley, tu'ntzen cyocslante. Pero amale tzint n-ocx nk'on wiiba cyxol, ka at jun cycostumbre ka' ti' tyol Dios, mas il ti'j tu'n ntiina tjak' tcawbil Dios cywitz, cuma lepch kena ti' Cristo. ²² Bix oj ntiina cyxolj oclsal yaa'n cyiw ete' tuj cyocslabl, mlay txi' nchyo'na chi'pj o'yen cye sant cywitz, tu'n mi'n cub nbajsa'na cyc'u'j, bix chebe q'uelel cyniy' ti'j. Alcyexja xjal ntiina cyuya, n-oc nk'on wiiba cyuya, tu'ntzen tcub cyi'j wu'na tu'n cyocslante tyol Dios. ²³ Cykil woclena ncyaj nk'o'na, tu'ntzen ttz'iy tpochal at co'pbil cye xjal tu'n Jesús.

²⁴ Entonces, key hermano, ju'x cyey il ti'j tu'n toc cyipena tu'n cyoc lpey ti' Cristo tuya cykil cyc'u'ja. Cwel nk'o'na jun techel cyey. Tuj jun ajkelbil at nim xjal najkelen. Pero junx ncaman ti' ajkelbil bix ncaman jun tcozt. Nuketzen ju'ke cyey tisen jun cam ncaman ti' tajkelbil. Cyii'nxa jun cynaabla ba'n tu'n ba'n xi' e'ley twitz Dios oj toc t'cye'yen Dios cynaabl. ²⁵ Il ti'j cyc'ojla' cyiiba tu'n cynamana cycotza tu'n Dios, tisen ke'j pelotel cyc'ojlan cyiib tu'ntzen cycaman cycotz ti' cysakech. Pero ke k'xal pelot n-oc cyipen tu'n cycaman ti' jun cycotz jun rato nbaj twi'. Pero ejoo' oclsal kaj ko'x lpe ti'j Cristo tu'n kcaman ti' jun kcozt mintii' tbajle. ²⁶ Ju' tzunj n-oc wipena tu'n ncamana, yaa'n ju' tisen jun k'ojlel nbu'n nuk tuj cyk'ik bix min tz'oc tk'o'n ti' juntl, bix yaa'n ju' tisen jun ajkelel najkelen nuk jak'ch n-exa txelpaj, sino ju' tisen jun ajkelel najkelen jiquen. ²⁷ Nxumlala taj nuk tik'ch ka' bix taj cawen wibaja. Pero min txi' nk'on wiiba te nxumlala, sino inayena nchin cawena tibaj nxumlala, tu'ntzen ncamana tibaj yaa'n ba'n. Jun ch'ixbajilettzele te weya ka min ma nnimana jnxi' nk'umena cye oclsal bi'x cxe'l t-xoo'n Dios inayena tu'n wila.

10

Jun naabl tu'n mi'n chi cub maje ke oclsal cywitz ke dios cyimne

¹ Key hermano, cycye'yenc ke'j ootxa xjal wiy'jila te Israel el xe'tke tu'n Dios tu'n cyil. Ejee'tzen xjalja e ten tjak' t-xalbil Dios. Dios e cub k'onte jun muj cyibajxin te c'ojlal cyexin bix te k'ilx cyexin tuj cybexin. Bix Dios e cub pa'nte tej Cyak Mar tu'ntzen cyey'x ke'j xjal te Israel jlajxe. ² Bix oc cyk'on cyiibxin tu'n cyxi' lpexin ti' Moisés, jxin otk tak' Dios te nenel. ³ Bix Dios e tzaj k'onte cywaxin etz t'zitz twitz cya'j, bix cykilcaxekin e xi' waa'nte. ⁴ Bix Dios e tzaj k'onte cyc'a'xin etz itz'j ti' jun xak, bix cykilcaxekin e xi' wec'ante. Cxe'l nk'umena cyey tej xak etz a' tuj, jatzen jun techel te te Cristo, cuma e ten tipemalxin cyuya xjal. ⁵ Pero amale nimet e ten ke aj Israel tjak' t-xalbil Dios, pero ch'ixc'a yaa'n cykil xjal min el ba'n twitz Dios, bix ju' tzunj min e ponkexin tuj tx'otx' otk tkba Dios, sino e cyimkexin tuj tzkij tx'otx'.

⁶ Ju' tzunj, key hermano, nim cyk'o'nc cyc'u'ja ti'j e baj nejl. Nim ka' e cyajbe ke ootxa xjal wiy'jila, bix e xi' tzpetkexin tu'n. Ju' tzunj cyc'ojlam cyiiba tu'n mi'n chi e'la ju'xa ⁷ Mi'n chi oc majey twitz sant, tisen e baj cye ke ootxa xjal wiy'jila. Tzi tyol Dios cyulu: "Tneel e cub keke twitz cysant tisen waxç bix ak'ke waa'l bix wc'al, bix lwewa e jaw we'ke bixel twitz cysant tisen waxç," tzi tyol Dios. ⁸ Bix mi'n chi achena tuya pajbaj. C'ulel tuj cyc'u'ja ke ootxa xjal te Israel wiy'jila oc ipanke cyi' ke'j xuuj te Moab tuj pajlel, bix ju' tzunj e tzaj tk'oj Dios bix e cyim winak ox mil aj Israel te junx k'ij. ⁹ Mi'n tz'oc cycyakwusa'na Dios tuya nim cyila. Ju' e bint cyu'nj ootxa aj Israel, ¿bix ti e baj cye? Tu'n nimnxen nchi yaan, e tzaj tk'oj Dios cyi'j, bix oc tsma'n Dios lbaj te tx'a'leccye, bix nimxse xjal e cyim. ¹⁰ Bix mi'n nuk chi txololona ti' Dios. Ju' e baj cye wiy'jila, bix e cyimke tu'n Dios tu'n t-ángel. ¹¹ Cykilj castiwa lu e baj cyi'j wiy'jila, amale nimet t-xalbil Dios at cyibajxin. O cyaj tz'i'bet tuj tyol Dios te yec'bil te ke ja'lewe tuj manc'bil tyem, tu'ntzen toc kwent ti'j tu'ntzen mi'n ko tzpet. ¹² Ju' tzunj, alj cyey tuj cywitz mlay chi cub tz'aka tuj il, ¡k'o'hc cyc'u'ja ti'j! ¹³ Nuk ch'innch'e

oj cychub tz'aka tu'n niy'bebl cyi'ja. Pero kej niy'bebl niy' cyxola, cyxol cykilca ocslal ni'ya, yaa'n nuk cyxol ejee'y ocslal tuj Corinto. Pero oj toc niy'bebl ti' jun xjal, jatzen xjalja ba'n tu'n toc ke tc'u'j ti' Dios te onlte tu'n twe' twitz niy'bebl. N-el tniy' Dios ti'j, bix mlay tak' Dios tu'n toc niy'bebl ti' jun xjal ka mlay tziy'x tu'n xjal oj toc niy'bebl ti'j. Oj toc niy'bebl ti' jun xjal, Dios c'onlte, tu'ntzen mi'n cub tz'ak tuj il. ¹⁴ Entonces, key hermano, e xi'ke wiy'jila tuj castiwa tu'n oc majeke cywitz sant. Ju' tzunj cyxomela sant.

¹⁵ Ejee'y xjal n-el cyey cyniy' ti'j. Ju' tzunj cxe'l nk'umena jun tumel cyey. Cybisenx ti'j ka tumel nyola bix ka min. ¹⁶ Oj t-xi' kc'a'n santa cena te nabbil tetzlen ttz'q'uel Cristo tuj t-xumlal, nko yeec'antzen at kmojbabl kiib tuyaxin. Ju'x oj t-xi' kwaa'n juun pix pan te nabbilte tcyimlen Cristo, nko yeec'antzen junx elnina ko' ti' t-xumlalxin. ¹⁷ Ju'c'a japenina ko' tisenj pan te santa cena ch'amac'a n-e'la. Amale nbaj pixet pero junx pan, jax ju'x ke. Amale nimet kbaj ocslal, pero junx elnina ko'. Jpan nbaj pixet pero junx, jatzen jun techel junx elnina ko' ti' Cristo.

¹⁸ Junxtil techel cxe'l nk'umena cyey. Cyxol aj Israel nejl e cub cypaten ke pala alimaj te Dios twi' altar, bix e xi' cychoy'ntlxin cychu'l alimaj. Tej t-xi' cychoy'nxin ju'wa, e xi' cyyeec'anxin at cymojbabl cyiibxin tuya Dios. ¹⁹ ¿Titzen nxa' nkba'na jlu ju'wa? Min tzin nkba'na tec'axit jchi'pj nxi' oyet cye sant twitzj chi'pj min txi' oyet, bix min tzin nkba'na ejee't sant at cyipemal. Jnxi' nkba'na ja te il ti'j jaj jaa' nxa' kk'o'n kanem. ²⁰ Jnxi' nkba'na kej xjal yaa'n ocslal oj nxi' cyoyen jun cyoybil te jun sant, yaa'n te Dios nxa' cyoyen, sino cye biman nxa' cyoyen. Ju' tzunj cyk'o'nc cyc'u'ja ti'j tu'n mi'n txi' cychoy'na chi'pj o'yen cye sant, cuma ncy'ya tu'n cymoiban cyiiba cyuya biman. ²¹ Mlay tu'n tbaj cysmo'na c'aal cyanema ti' Dios bix c'aal cyanema cyi' biman, pero ju' tzin cyse'na ka nchi nimana santa cena bix nche'xtla te nimal cywitz sant. ²² Oj tcub kpa'n kanem ti' Dios, tzultzen tk'oj Dios ki'j, bix mlay we' tk'oj Dios ku'n, cuma at mas tipemalxin twitz ke kipemal. N-oc juch tc'u'j Dios ki'j, bix tajxin nuk ti'jxin c'oquela juch ke kc'u'j.

Cykil ba'n tu'n tbint ku'n pero yaa'n cykilca najben

²³ Jax cyu'na cykil ba'n tu'n tbint tu'n jun ocslal, pero nxi' nkba'na cyey yaa'n cykilca najben. Jac'a bint te alcyekaj, pero yaa'n cykilca jac'a tz'ajben tu'n ktz'iy' tuj tyol Dios, ²⁴ bix yaa'n entera ba'n te yec'bil te juntl. Cyxi'mex alcyekaj jun ba'n te juntl ocslal. Yaa'n nuk chi ximela ti'j alcyekaj.

²⁵ Pero oj cypona te lok'ol chi'pj tuj q'ueybil chi'pj, mintii' il ti'j tu'n tbaj cykanena alcyekaj chi'pj otk tx'aj oybaj twitz sant. Ka mintii' tumel cyuyey ka o'yen chi'pj cye sant bix ka min, mintii' tu'n tbaj cyc'u'ja ti'j, ²⁶ cuma cykilca wikan chi'pj o tzaj tk'o'n Dios ke. Tzi tyol Dios cyjulu: "Entera twitz tx'otx' tuyax cykilca at twitz tx'otx' ntzaj tk'o'n Dios," tzi tyol Dios.

²⁷ Katzen ma ttocx jun xjal yaa'n ocslal ejee'y te waa'l tuya, ka cyaja che'xa, ba'n tu'n cyxi'y, bix ba'n tu'n t-xi' cychoy'na la' alcyekaj chi'pj ctzaal k'o'n cyey. Mi'n chi oca te kanlte ka otk tx'aj oyet chi'pj twitz sant bix ka min. ²⁸ Pero ka ma tk'umen jun xjal te cyey, "O'yen tej chi'pj lu cye sant," ka tzi ju'wa, mi'n txi' cychoy'na jchi'pj, tu'n mi'n cybinchay jun il tuj twitz xin nk'umente. ²⁹ Pero n-el kniy' ti'j nuk te te texin il tuj twitzxin, yaa'n te cyey.

Pero cxe'l cykba'na yaa'n tumel tu'n mi'n txi' cychoy'na chi'pj nuk tu'n tyol juntl, ³⁰ bix yaa'n tumel oj toc ten juntl xjal yolel cyi'ja oj t-xi' cytziybe'na alcyekaj ntzaj tk'o'n Dios cyey bix nxi' cyk'o'na chjonte te Dios ti'j. ³¹ Jax cyu'na cykilca chi'pj ba'n tu'n t-xi' kchyo'n. Pero cxe'l nkba'na cyey, amale ba'nt tu'n t-xi' kchyo'n cykilca, bix tu'n t-xi' kc'a'n cykilca, bix tu'n t-xi' kbincia'n cykilca, mas il ti'j tu'n kajben te Dios twitzj tu'n tbint cykilca ku'n. ³² Ju' tzunj mi'n cub kyeec'an jun kbinchbil tu'n tcub tz'ak juntl tuj il ku'n, mi nuk jun judío bix mi nuk jun yaa'n judío bix mi nuk jun ocslal. ³³ Ju' nbint wu'na. Ti'j cykilca nbint wu'na, nchin jyona tu'ntzen wajbena te cykilca xjal. Mintii' nbint wu'na nuk jaj ba'n te weya, sino jaj ba'n te cykilca, tu'ntzen cyclet.

11

¹ Ju' tzunj cyii'nx jun cynaabla tisen weya k'i'n nnaabla wu'na. Cynomela wi'ja, tisen weya n-el ncno'na ti'j tnaabl Cristo.

Jun xnak'tzibil cye xuuj

² Key hermano, nchin tzalaja cyi'ja, cuma nbint cyu'na jnxnak'tzibila e cyaj nyeeec'ana cyey. ³ Pero waja tu'n tel cyni'ya ti'j juntl tumel. Dios cawel tibaj Cristo, bix Cristo cawel tibaj jaca juun xinak, bix jaca juun xinak cawel tibaj t-xu'l. ⁴ N-eltzen kniy' ti'j ka potzen twi' jun xuuj tuya jun xbalen tuj jun culto, tetzen techel attzen tjak' tcawbil tchmil. Nuketzen ejee' xinak potzen cywi' oj nchi na'n Dios bix oj nchi k'umen tyol Dios tuj jun culto, jun ch'ixbajilettzele te cycawel Cristo, cuma nchi yeec'attzele xinak ete'cx tjak' tcawbil cabl xinak, yaa'n Cristo. ⁵ Yaltzen cye xuuj, ka min tz'oc potzet cywi'xuj oj cyna'nxuj Dios bix oj cyk'umenuxuj tyol Dios tuj jun culto, jun ch'ixbajil te cychmilxuj. Ja tzunj lu tzin

tyeec'an mintii' cynimbilxuj, cuma tisetzen ju'xkexuj cyisenj xuj ma tzo'n ttzmal cywi' te yec'bilte ejee'tzen xuja tisen xinak. ⁶ Ke cyey xuuj ocslal tuj Corinto, ka cyaja bint tu'n mi'n potzet cywi'y, ba'nttzele tu'n tcub matzet ttzmal cywi'y tu'ntzen tcyaj cywi'y sc'o'j. Jun ch'ixbajiletzele te cyey, bix ka jun cych'ixewa tu'n tcub matzet ttzmal cywi'y, jax ju'x jun cych'ixewa oj tel cyii'na potzbil cywi'y tuj culto.

⁷ Entonces, key hermano, te cyey xinak yaa'n tumel tu'n toc potzet cywi'y tuj jun culto, cuma at cycawbil xinak tu'n Dios tu'n cycawen. Yaltzen te cyey xuuj, jcawbil k'i'n cyu'na, cychmila k'olte. ⁸ Tuj tneel min el itz'j xinak ti' xuuj, sino ja xuuj el itz'j ti' xinak. ⁹ Ju'tzen q'uelela kniy' ti'j min e cub tbincha'n Dios ja xinak te te xuuj, sino e cub tbincha'n Dios ja xuuj te te xinak. ¹⁰ Ju' tzunj ja xuuj c'o'quel t'potzen twi' tuj culto te yec'bil at tjak' tcawbil tchmil tu'ntzen t-xi' tyeec'an tnimbil cywitz ke nenel cyxol ocslal.

¹¹ Pero amale jat xinak ncawen tibaj xuuj, pero t-xol, cyca'bel il ti'j. Cyxol t-xjal Kaaw, junelne ko'. At tajbel xinak bix at tajbel xuuj. ¹² Jaxe ja tneel xuuj el itz'j ti' xinak, pero yaj cykilca xinak o chi el itz'j ti' xuuj, bix cyca'bel, xinak tuya xuuj, o tzaj tk'o'n Dios. Ju' tzunj il ti'j nbaj cyonen cyiib.

¹³ Key hermano, cxe'l nkanena cyey ζtumelpa tuj cywitz a oj tna'n jun xuuj Dios yaa'n potzen twi'? ¹⁴ Tu'n ttzaj cytzak'be'na, ccyey'yenc'a ti tten cyxol xjal. ζTumelpa oj tcub t'z'iy ttzmal twi' jun xinak? Yaa'n tumel. ¹⁵ Yaltzen te jun xuuj, tumel oj tcub t'z'iy ttzmal twi', cuma ju' ttena. Ja tzunj ttzmal twi'xuj nmak najben te t-xel potzbil twi'xuj, te techel xuujxuj bix at-xuj tjak' tcawbil tchmilxuj. Jatzen jun techel at jun xuuj tuj tumel oj potzen twi' tuj jun culto. ¹⁶ Ju' nxi' nk'umena cyey, pero ka at jun cyxola yaa'n tumel nyola tuj twitz, q'uelel tniy' ti'j ju' tzin nk'umena cyxol cykilca ocslal bix ju' nbint cyuj tja Dios tuj cykilca tnom.

At jun palt tuj santa cena cyxol aj Corinto, tzi apóstol Pablo

¹⁷ Jax at jun palt tuj santa cena niy' cyiy'sa'na tu'n cycultey. Oj nchi chmeta tu'n tiy' cyiy'sa'na santa cena, mlay txi' nkba'na ba'n nbint cyu'na, cuma ma nbi'ya at mas ka' n-e'la twitzj at ba'n. ¹⁸ Mlay txi' nkba'na ba'n nbint cyu'na, cuma ma nbi'ya oj nchi chmeta ejee'y ocslal te waa'l bix te iy'salte santa cena, ncub cypa'n cyiib teeylex juun cloj cytena. Juj nwitzja jax'jyol o nbi'ya. ¹⁹ Te cyey il ti'j tu'n ncub cypa'n cyiiba ju'wa, tu'ntzen tchic'ajax alcye cyey mas jawnex cyxola. ²⁰ Ju' tzunj oj ncub cychmon cyiiba, yaa'n tej tu'n ttzaj cypa'na tcyimlen Kaaw, sino nuk ja tej tu'n tchic'ajax alcye cyey tneel. ²¹ Il ti'j cxe'l cypa'na waabj t-xol cykilca oj nchi chmeta te waa'l te iy'salte santa cena, pero yaa'n ju' tten cyu'na. Pero jtzin cyse'na, nchi waa'na tec'ax, teeylex juun tuya twa. Min cyyoj oj nchi pon baj ke cyuyey tu'n cywaa'na junx. Ju' tzunj at juun min nchi noj, bix at juuntl nchi nojxsen tuya cywa bix cye'a vino hasta ojxe nchi oc bola. ²² ζTizen tten jun santa cena ju'wa? Cxe'l nk'umena cyey mas ba'n bi'x chi waa'la bix chi wc'ala cyaj twitzj jatzen nchi noja tuj santa cena. Jnbaj cyey ja'lewe oj nchi chmeta jun ch'ixbajil te cykil ocslal, bix ncub cyk'o'na cych'ixew kej mebe mlay pon cyii'na waabj cyxola. ζOcpale cxe'l nkba'na ba'nj ma bint cyu'na? ¡Mlay! Yaa'n jax cyu'na nbint cyu'na cykilj nxnak'tzbla e cyaj nkba'na cyey nejl.

Jun xnak'tzbil ti'j santa cena

²³ Cxe'l nna'na cyey jaj e tzaj tk'umen Dios weya bix e cyaj nxnak'tza'na cyey nejl ti'j tixix tten jsanta cena. Texj koniyan tej t-xi' q'ueyet Kaaw Jesús tu'n tcub byet, e jaw tii'nxin jun pan, ²⁴ bix e xi' tk'o'nxin chjonte te Dios ti' pan, bix e cub tpi'xexin, bix e xi' tkba'nxin cye tuyaxin cyjulu: "Cyii'nx bix cywaa'nx ja lu. Jatzen techel nxumlalja. Tisenj pan lu ma baj pi'xen, jaxse ju'x nxumlala pjel toket te colbil cyey. Cywaa'nx ja lu te nabl weya," tzi Jesús cye tuyaxin. ²⁵ Tbjalenxiti' waa'n, e jaw tii'nxin jun vaso vino, bix e xi' tkba'nxin: "Jvino lu techel ntz'q'uela q'uelel wi'ja te k'ol tipemal jun ac'aj trat tuya Dios cyi' xjal. Jaca maj oj cye'ana ti'j, cybinchama te nabl weya," tzi Jesús.

²⁶ Entonces, key hermano, jaca maj nchi waa'na bix nchi c'ana santa cena, ntzaj cypa'na tcyimlen Kaaw ki'j, hasta ojxe tul meltz'ajxin juntl maj twitz tx'otx'. ²⁷ Ju' tzunj, oj ncub bint santa cena cyu'na bix min tz'oc cye'u'ja ti'j ti' japenina tcyimlen Kaaw, n-eltzen cyii'q'uena tcyimlen Kaaw. ²⁸ Ju' tzunj teeylex juun il ti'j q'uelel cyni'ya ti'j ti' niy' tuj cye'u'ja oj cypona te nimlte santa cena, ka cyaja txi' cypa'na tcyimlen Jesús cyi'ja, bix ka junxiti' niy' tuj cye'u'ja. Katzen jaxxix cyaja tu'n t-xi' cypa'na tcyimlen Jesús, ba'n tu'n t-xi' cywaa'na santa cena. ²⁹ Pero ka min tz'oc cye'u'ja ti'j tcyimlen Kaaw oj cywaa'na santa cena, sino ka junxiti' niy' tuj cye'u'ja, at cyila tocsan ti'j twitz Dios, bix tzultzen jun cycastiwey tu'n Dios. ³⁰ Ju' tzunj at nim ocslal yaab cyxola bix at juuntl bajnen cyipen, bix at juuntl o chi cym.

³¹ Entonces, key hermano, ka ma cyaj cyk'o'na jka' nbint cyu'na oj nchi binchana ti' santa cena, mintii' il ti'j tu'n cyoca tuj castiwa tu'n Dios ti'j. ³² Pero ka ma tzaj tk'o'n Dios jun cycastiwey, yaa'n tu'n cyxi'y tuj castiwa te junx maj tisen oj cyxi' xjal yaa'n ocslal tuj castiwa tu'n Dios, sino tu'n cyxi'y tuj tumel.

³³ Entonces, tu'ntzen tJapan baj twi' nyola ti'j santa cena, cxe'l nkba'na cyey oj nchi chmeta waa'l te nablte tcyimlen Jesús, cyyo'y ojxe cypon baja cykil ocslal, tu'ntzen cywaa'na junx tuj tumel. ³⁴ Jsanta cena yaa'n tu'n cynoja. Ka at juun cyey tak' weyaj cye, mas ba'n tu'n cywaa'na nejl cyjay, tu'ntzen cynimantey tcyimlen Jesús tuj tumel, tu'ntzen mi'n tz'oc jun cycastiwey tu'n Dios.

Bueno, at juntl cykanbila o tzaj cykanena weya. La' alcye jun k'ij, oj npona cyxola, cxe'l'tzen nk'umena cyey.

12

Ejoo' ocslal, o tzaj tk'o'n Espiritu Santo jun kaak'en

¹ Key hermano, ya waja txi' nk'umena cyey jun tumel ti'j ti tten tu'n cyak'anana junx tuj taak'en Dios tjak' tcawbil Espiritu Santo. Il ti'j tu'n tel cyni'ya ti'j.

² Tej mitkna'x cyocslana, tej ete' cxa tjak' cycawbil biman, cytzki'ntla tu'n cypemal biman e xi' kitetkey tu'n cyoc lpey cyi' sant cyimne. ³ Ju' tzunj nxa' nkba'na tu'n toc cyc'u'ja ti'j, cuma at ca'ba wik espiritu tu'n toc ten cawel cyey. Atte biman, bix atte Espiritu Santo. Cxe'l nk'umena cyey ti tten tu'n tel cyni'ya ti'j alcyej ncawen cyi'ja oj nchi yolena. Ka at jun xjal nxi' sbunte Kaaw Jesús, ktzki'ntl yaa'nte Espiritu Santo njaw k'inte taak'xin. Pero ka at jun xjal nkbante "Ja Jesús Kaaw," ka tzi ju'wa, ktzki'ntl Espiritu Santo njaw k'inte taak'xin, cuma te biman mlay txi' tkba'n ja Jesús Kaaw.

⁴ Tujtzen cywitza nuk jun wik ak'untl c'ajbel tuj taak'en Dios. Pero cxe'l nkba'na cyey tuj taak'en Dios, at nim wik kaak'en, bix k'o'n tu'n Espiritu Santo te teeylex juun taak'en. Pero amale jacat juun ocslal tec'ax taak'en, jax Espiritu Santo o tzaj k'onte cykilca, bix junx Espiritu Santo ncawen tibaj cykilca taak'en Dios. ⁵ Bix amale ch'imac'at wik ak'untl at cyxol ocslal, cykilca ko' nko ajben te junx Kaaw. ⁶ Bix amale ch'imac'at tten cyu'n ocslal tuj taak'en Dios, pero junx Kman Dios taaw tibaj cykilca. ⁷ Ntzaj tk'o'nte Espiritu Santo te jaca juun ocslal alcye ba'n tbint tu'n, tu'ntzen tajben cye niy'tl ocslal. ⁸ At juun ntzaj tk'o'n Espiritu Santo tu'n ttzaj mas cynaabl. Bix at juuntl ntzaj tk'o'n Espiritu Santo tu'n cytzket ch'intl ti'j. ⁹ Bix at juuntl ntzaj tk'o'n Espiritu Santo nim n-oc juch cyc'u'y ti'j tu'n tbint nim cyu'n, cuma n-oc ke cyc'u'y ti' Dios cuma jaxin ba'n tbint cykilca tu'nxin. Bix at juuntl ntzaj tk'o'n Espiritu Santo jun cypemal tu'n cyk'anen ti' cyyabel xjal. ¹⁰ Bix at juuntl nim cypemal o cyiik' tu'n Espiritu Santo tu'n tbint jun ak'untl jawnex cyu'n. Bix at juuntl ba'n cyu'n tu'n t-xi' cyk'umen tyol Dios cye xjal. Bix at juuntl ntzaj k'o'n cypemal tu'n tel cyniy' ti'j ti niy' tuj tc'u'j juuntl, ka jax bix ka xtak', ka te Dios bix ka yaa'n te Dios. Bix at juuntl ntzaj k'o'n tu'n cyyolen tuj ch'imac'a wika yol min tz'el cyniy' ti'j. Bix at juuntl ntzaj k'o'n tu'n tel cyniy' ti'j ti japenina jch'imac'a wik yol tzin cyyolen cabtl pero min tz'el cyniy' ti'j. ¹¹ Ejeeyle tzunj lu ba'n tbint tu'n juun ocslal, la' ti cyaak'en. Pero jax Espiritu Santo nk'onte te cye, bix ja nk'onte te jaca juun la' alcye tipemal taj tak'.

¹² Cxe'l nk'umena cyey jun techel. Tisenc'a ch'imac'a iken tu'n kxumlal najben te junx kxumlal, jaxse ju'x ejoo' ocslal tuya ch'imac'a kaak'en nko ajben te junx Cristo. Ejoo'tzen ocslal tisen t-xumlal Cristo. Amale ch'imac'at kbaj, pero junx elnina ko', cuma mintii' ca'ba t-xumlalxin. ¹³ Tej kocslan, Espiritu Santo e tzaj tchmo'n ejoo' tu'n at kmojbabl kiib. Judíole, yaa'nle judío, eto' cxle tjak' tcawbil kpatrón, yaa'nle eto'cx tjak' tcawbil kpatrón, cykilca ko' junx cloj elnina ko', bix eto'c tuj tk'ab Kaaw. Bix nuk o'cx junx Espiritu Santo at, bix o kc'am.

¹⁴ Ejoo'tzen ocslal tisen jun xumlal baj. Yaltzen te jun xumlal baj, nim iken tu'n. Yaa'n nuk junx iken tu'n. ¹⁵ Nuket tzi jun ken baj, "Yaa'n te xumlal baj kenwe, cuma yaa'n inayena jawnex tisen jun k'abbaj," nuket tzi ju'wa, pero tex xumlal bajx ken baj. ¹⁶ Ju'x xquin baj, nuket tzi jun xquin baj, "Yaa'n jun nintzaj tbak' witz baj kenwe. Ju' tzunj yaa'n te xumlal baj kenwe," nuket tzi xquin baj ju'wa, pero tex xumlal bajx xquin baj. ¹⁷ Nuket cykil xumlal baj tbak' witz baj, ¿titzen tten tu'n nbinte? Bix nuket cykil xumlal baj xquin baj, ¿titzen tten tu'n tskun? ¹⁸ Najben xquin baj bix najben tbak' witz baj, bix najben cykilca iken tu'n xumlal baj. Bix o baj tninc'u'n Dios cykilca jaa' toca tajbelel. ¹⁹ Katzen cykilca nuk tbak' witz bajc'a iken tu'n jun xumlal baj, ¿titzen tten tu'n tajben? ²⁰ Mlay tz'ajben ju'wa. Xquin bajle, tbak' witz bajle, ken bajle, k'abbajle, taj jun xumlal baj cykilca tu'n toc te junx xumlal baj.

²¹ Tbk' kwitz mlay txi' tk'umen te kk'ab, "Tey yaa'n ju' tisen inayena. Ju' tzunj min tz'ajbena we." Jax ju'x kwi', ka nxi' tk'umen kwi' te kken, "Min tz'ajben tey cuma junx itla bix ajnintza," ka tzi ju'wa, yaa'n jax tyol. ²² Kej iken tu'n kxumlal yaa'n cyiw tuj kwitz, ejee'tlpeje mas cyajbel. ²³ Bix kej iken tu'n kxumlal yaa'n tumel tu'n toc cye'yet, ejee'tl mas c'ojla'n ku'n. Oj cyoc kpotzen, nyee'c'atzen jawnexke tuj kwitz, ²⁴ tisenx kej tu'n tchic'ajax jawnex. Tuj twitz Dios jawnexsen kej iken tu'n kxumlal potzenke. Jaxin e binchante cykilca iken tu'n kxumlal, bix o baj tninc'u'nxin cykilca jaa' toca tajbelel, ²⁵ tu'ntzen tbaj cyonen

cyiib tuj ttzyal, bix tu'ntzen jaca juun c'ajbel te kxumlal tu'ntzen tel ba'n. ²⁶ Ka at jun at nchyon te, cykilca ntina'n tchyonel, bix ka at jun ntina'n tzalajabl, cykilca ntzalaj tuya.

²⁷ Jaxse ju'x ke ocslal. Ejoo'tzen tisen t-xumlal Cristo. Jaca juun ke tisen jun iken tu'n t-xumlalxin. ²⁸ O baj tninc'u'n Dios nim wik ocslal te cyajbel cye cabtl. Bix o tz'oc tk'o'n Dios jaca juun ocslal jaa' toca tajbelel cye niy'tl ocslal. At juun at cyipemal tu'n cyajben te apóstol tu'n t-xi' cyk'umen tpochalj co'pbil tu'n Jesús cyxol xjal yaa'n ocslal. Bix at juuntl at cyipemal tu'n cyajben te profeta tu'n toc cicyiwsa'n cyc'u'j ocslal tuj tyol Dios. Bix at juuntl at cyipemal tu'n cyajben te maystro te tx'olbalte cye xjal ti japenina tyol Dios. Bix at juuntl o tzaj cyipemal tu'n t'aint jun nintzaj ak'untl cyu'n. Bix at juuntl o tzaj cyipemal tu'n cyk'anen cyyabel xjal. Bix at juuntl at cyipemal te onlcy xjal. Bix at juuntl at cyipemal te nic'ulte bix cawel ti' jun ak'untl. Bix at juuntl at cyipemal tu'n cyyolen tuj juntl wik yol min tz'el cyniy' ti'j. ²⁹ Cxe'l nkanena cyey, ¿atpa cyipemal ti'j cykilca ocslal tu'n t-xi' cyk'umen tyol Dios cye xjal? ¿Atpa cyipemal ti'j cykilca tu'n toc cicyiwsa'n cyc'u'j niy'tl ocslal? ¿Atpa cyipemal ti'j cykilca ocslal tu'n t-xi' cyxnak'tza'n cye xjal ti' toc tu'n tyol Dios? ¿Atpa cyipemal ti'j cykilca ocslal tu'n t'aint jun nintzaj ak'untl cyu'n? ³⁰ ¿Bix atpa cyipemal ti'j cykilca tu'n cyk'anen cyyabel xjal? ¿Bix atpa cyipemal ti' cykilca tu'n cyyolen tuj juntl wik yol min-al n-el tniy' ti'j? ¿Bix atpa cyipemal ti' cykilca tu'n tcub cych'ixbe'n ja juntl wik yol tu'n tel cyniy' xjal ti'j? ¡Min! Yaa'n ju'wa. Teeylex juun tuya taak'en k'o'n tu'n Dios. ³¹ Yaltzen cyey, jaca juun cyey cyaja tu'n cyooca tuj cyaak'ena mas jawnex tuj cywitza. Ba'nte tu'n cyjyona jun ak'untl jawnex, pero cxe'l nk'umena cyey ti tten tu'n t'aint jun mas ba'nix cyu'na.

13

Mlay ko ajben te Dios ka min n-oc tak' juntl kuya ke

¹ Kane ba'n ko yolen cyuya xjal, bix kane ba'n tu'n kjaw yolen tuj jun wikxilt yol mintii' tumel, hasta ba'ntetnele kyola cyuya ke ángel tuj cya'j, pero ka mintii' tk'ak'bil kc'u'j cyi' xjal, mintzen nko ajben twitz Dios. Ka min tz'oc cyak' kuya ke, nuk kyol nk'ajt, tisen jun xcbil nuk ntzininín mintii' najbe'na. ² Bix ka at nim kajbel tu'n t-xi' kk'umen tyol Dios, bix kane ma tz'el kniy' ti'j cykilca, hasta cykilcaj e cyaj tk'o'n Dios ti' pjel yaj, pero ka min tz'oc cyak' kuya ke, mintii' tajbelel. Bix ka nim kocslabl ti' Dios at, hasta jac'anele tsiy' yucch witz ku'n tu'n kocslabl, pero ka mintii' tk'ak'bil kc'u'j cyi' kuya, mintii' kajbel. ³ Bix ka ma txi' kk'o'n cykilca at kuya cye mebe xjal, pero nuk te nimbil kiib, bix mintii' tk'ak'bil kc'u'j cyuya mebe, mintii' tajbelel jnbint ku'n twitz Dios. Bix ka ma cub tzey' kxumlal nuk tu'n nko k'umen tyol Dios, pero ka mintii' tk'ak'bil kc'u'j cyuya xjal, mintii' tajbel kcyamecy.

⁴ Katzen at tk'ak'bil kc'u'j, atzen kpasensya, bix jun xtalbil cxe'l kk'o'n cye cabtl, bix mi'n nuk chi'lec kc'u'j ka at jun tii' at tuya juntl, bix yaa'n cjawel kniman kiib, bix mi'n ko iy' tibaj mas knaabl tibaj cabtl. ⁵ Tu'n toc cyak' xjal ke, iltzen ti'j ko yeeec'an ba'n knaabl cye xjal, yaa'n nuk c'oquex kcu'tzen kiib, bix yaa'n nuk te ke jun ba'n cxe'l kbisen, bix min ko jaw k'oj naj, bix ka at jun ka' n-oc tbincha'n juntl ki'j, mi'n tzaj kna'ntl. ⁶ Oj at tk'ak'bil kc'u'j, mi'n ko tzalaj ka ma txi' jun xjal tuj il tu'n til, sino o'cx ko tzalajel ti'j ka ma txi' tii'n jun xjal tchun'lal jiquen. ⁷ Ka n-oc cyak' xjal ke, cweltzen knajsa'n cyil, bix nuk cxe'l kbisen ba'n ti' jun xjal, bix kaj nuket cykilca ba'n te jun xjal, bix q'uiyax ku'n cykilca ka' n-oc xe't ki'j.

⁸ Tk'ak'bil kc'u'j mintii' t'ajlel, cuma c'oquél k'ak'en kc'u'j tuj cya'j te junx maj. Pero yaltzen tk'umj tyol Dios, bix jyol tuj jun wikxilt yol min-al n-el tniy' ti'j, bix tk'umj jcykilca ba'n ku'n, cykilca pjel twi' la' alcyé jun k'ij oj kpon tuya Dios, cuma mintii' chi' abjelel. Nuk o'cx cyjel tk'ak'bil kc'u'j kuya kxol. ⁹ Jn-el kniy' ti'j ja'lewe, yaa'n enterax. At mastl. Bix cykilcaj nbyan ti' Dios ja'lewe yaa'n ju' tisej oj tocc'a kcyeyen. ¹⁰ Ju' tzunj ojtzen kpon tuya Dios, bixsen pjel tilel tpochal Dios, cuma ya mintii'tl il ti'j. Mintii'tlzen nuk tpochal, cuma t'ubtltzen Dios ya kuya.

¹¹ Cxe'l nkba'na jun tumel. Tej nee' kena, in yolena tisen jun nee', bix at jun nnaabla tisen jun nee'. Yaltzen ja'lewe ma xjal'tlzen kena, bix ya yaa'ntlzen ju'tl nnaabla tisen nee'. Ju'tzen kten ja'lewe. Tisen nee' eto' ja'lewe, hasta ojxe toc kcyeyen jmera jaxxix. Pero oj toc kcyeyen jmera jaxxix alcyé jun k'ij, ya tisentzen jun xjal ya ma xjal'tl, bix q'ueleltzen kniy' ti'j.

¹² At juntl tumel. Oj kaj kil kwitz, mlay kil. Nuk tuj jun respej kla'tzen ch'in. Ju'tzen tten n-el ch'in kniy' ti' Dios ja'lewe. Nuk tisen n-oc kcyeyen ch'in kwitz tuj respej ja'lewe, pero at jun k'ij c'oqueltzen kcyeyen twitz Dios tisen te Dios n-oc tcyeyen kwitz ja'lewe.

¹³ Entonces, key hermano, tu'n tpon baj twi' nyola ti'j tk'ak'bil kc'u'j, cxe'l nkba'na cyey at k'ukl kc'u'j ti' Dios, bix at nko ayon ti'jxin, bix at tk'ak'bil kc'u'j kxol. Bix cyxol tzunj oxé tumel lu ja te mas il ti'j, jaj tk'ak'bil kc'u'j kxol.

14

Tej tyole Pablo ti'j oj nyole jun ocslal tuj jun wikxitleyol

¹ Ju' tzunj, key hermano, c'oquel cyk'o'na tilel tu'n at tk'ak'bil cyc'u'ja cyxola. Pero jax ju'x ba'n tu'n tbint cyu'na tu'n Espiritu Santo jun cyaak'ena tuj taak'en Dios. Bix tibaj cykilca, cyjyonxa tu'n t-xi' cyk'umena tyol Dios. ² Ojzten tyolen jun ocslal tuj jun wikxitleyol min-al n-el tniy' ti'j, nuk o'cx nyolen te Dios, yaa'n cyuya xjal. Amale nyolet tu'n tipemal Espiritu Santo, min-al q'uelel cyniy' ti'j tyolxin, cuma yaa'n telniy'. ³ Pero oj t-xi' tk'umen jun ocslal tyol Dios tu'n tipemal Espiritu Santo, q'ueleltzen tniy' cabtl ocslal ti'j, bix chinel tu'n tu'ntzen cytz'iy ocslal tuj tyol Dios, bix tu'n cyxi' onet tuj cyocslabl ti' Dios, bix tu'n n-oc nimset cyc'u'j. ⁴ Jun ocslal nyolen tuj jun wikxitleyol min-al n-el tniy' ti'j, nuk te te najbe'na. Pero jun ocslal nk'umen tyol Dios, tetzen cykilca ocslal najbe'na.

⁵ Katzen cyaja cykilca key chi cyvolela tuj jun wikxitleyol min-al n-el tniy' ti'j, ba'n. Pero jawe waj mas ka cykilcaye nchi k'umena tyol Dios. Ja tej tkbaj tyol Dios mas il ti'j twitzj yol mintey' telniy'. Pero katzen at jun te tx'olbalte ti elpenla tuj jun wikxitleyol min-al n-el tniy' ti'j, ba'ntzen, cuma c'ajbeltzen cye ocslal tu'n cytz'iy tuj tyol Dios. ⁶ Ka oj npona cyxola bix chin yolela tuj jun wikxitleyol min-al n-el tniy' ti'j, ¿ti c'ajbele nyola cyey? ¡Mintii! Pero ka ma txi' nk'umena cyey alcye o tkba Dios weya, bix alcye n-el nni'ya ti'j tyol Dios, bix ka tzinen n-oc wu'na alcye toc tu'n tyol Dios, bix ka nxi' nkba'na cyey alcye o nxnak'tzaya tuj tyol Dios, c'ajbeltzen nyola cyey.

⁷ Cxe'l nk'o'na juntl tumel cyey. Kej nchi oc k'onte jun quitar bix ka jun xux, ka min bint chinbelte cyu'n, nuk nlililin. Mintii' tumel ti toc tu'n. Ja tej ka ttxolante chinbelte, atzen tumel ti toc tu'n. ⁸ Ju'xsen oj cyxi' soldado tuj k'oj. Jxjal cxe'l k'onte tumel cye soldado tuya trompeta la' alcye otk tkba cyawel, ka min s-oc tk'o'n tuj tzinen, mlay tz'el cyniy' soldado ti'j ti chinel cyu'n. ⁹ Ju'x oj nchi yolena. Ka min chi yolena tuj tzinen, ¿ti tten tu'n tel cyniy' xjal ti'j? Nuk tuj cyk'i'k nchi yolena.

¹⁰ Cxe'l nk'umena juntl tumel. At nim wik yol twitz tx'otx', bix tec'alex juun tuya tyol bix n-el tniy' ti'j. ¹¹ Pero ka at jun xjal ma tzaj yolen wi'ja bix min tz'el nni'ya ti'j tyol, te nakch xjal kena te texin, bix te nakch xjalxin te weya. ¹² Ju' tzunj ka cyaja chi ak'anana tu'n Espiritu Santo, il ti'j cyaja cypemala tu'n cyonena cyi'j ocslal tu'n tel cyniy' ti'j.

¹³ Ju' tzunj, key hermano, katzen at jun ocslal nyolen tuj jun wikxitleyol min-al n-el tniy' ti'j, e t-xi' tkanen te Dios tu'ntzen jax q'uelel tniy' ti'j titzen tyola, tu'ntzen t-xi' ttx'olba'n tyol cye cabtl. ¹⁴ Oj kna'n Dios tuj jun wikxitleyol min-al n-el tniy' ti'j, ja te kanem nyolen te Dios, yaa'n knaabl. Ju' tzunj min tz'el kniy' ti'j titzen tkba'n kanem. ¹⁵ Key hermano, ¿alcye ba'n tu'n tbint? Ba'n tu'n kna'n Dios tuj kanem tuj jun wikxitleyol min-al n-el tniy' ti'j, bix ba'n tu'n kna'n Dios tuya kyol n-el kniy' ti'j. Bix ko bitzel yaa'n nuk tuya jun wikxitleyol min-al n-el tniy' ti'j, sino ju'xa ko bitzel bix q'uelelxix kniy' ti'j kbitz. ¹⁶ Ka njaw knimsa'n Dios tuj jun wikxitleyol min-al n-el tniy' ti'j, yaj tzunkej xjal min tz'el cyniy' ti'j knabl Dios, mlay cykba "Amen" te yec'bilte ba'n tuj cywitz oj t-xi' kk'o'n chjonte te Dios, cuma min tz'el cyniy' ti'j knabl Dios. ¹⁷ Amaloj ba'nxsen kna'j Dios tuj jun wikxitleyol, pero ejee' tzunj ocslal min tz'el cyniy' ti'j, mlay tz'ajben cye.

¹⁸ Yaltzen weya, chjonte te Dios ba'n wu'na tu'n nyolena tuj jun wikxitleyol min-al n-el tniy' ti'j. Bix mas nchin yolena tuj jun wikxitleyol twitz cykilcaj ke cyey. ¹⁹ Pero cyxol ocslal mas waja nuk jwe' yol cxe'l nkba'na pero telniy', twitzj oj t-xi' nk'umena laaj mil yol tuj jun wikxitleyol min-al n-el tniy' ti'j.

²⁰ Key hermano, oj t-xi' kbisen ti'j tu'n tbint jun ak'untl ku'n, mi'ntzen ko oc tisen jun nee' tuya knaabl, sino tisen jun xjal ma xjal tl nxi' tbsen ti'j. Pero tu'n t-xi' kbicha'n jun ka', ba'ntzen tu'n koc tisen jun nee' mlay bint tu'n. ²¹ Cxe'l xix cybisena ti'j ti toc tu'n ootxa tyol Dios ti'j jun wikxitleyol at tu'n tl cyxol xjal te Israel nejl. Tzi Kaaw cyjulu: "Ja nyola cicy'i xjal te Israel. Ju' tzunj c'oquel nch'k'o'n juntl tnóm tuya jun wikxitleyol te cawlcye. Pero amale cwelet nk'o'na cycastiwa ju'wa, pero cicy'i t-xi' cybi'n nyola," tzi Kaaw tuj tyol Dios. ²² N-oc kcyeyen tuj tyol Dios tej tpon juntl wik xjal tuya juntl wik yol cyxolj xjal min e cybi tyol Dios, minxtii' oca tu'n cyiik'ente tcawbil Dios. Yaltzen cyey tuj cywitz, jax ju'x oj kyolen tuj jun wikxitleyol min-al n-el tniy' ti'j, q'ueleltzen ba'n tuj twitzj xjal yaa'n ocslal, tzikey. Bix tuj cywitzja oj kk'umen tyol Dios tuj tzinen, c'ajbel te jun xjal ocslal pero yaa'n te jun xjal yaa'n ocslal. ²³ Pero yaa'n ju'wa. Ka cykilca key ocslal nchi chmeta tuj jun lugar, bix cykilca key nchi ak'a yolel tuj jun wikxitleyol yaa'n telniy', ¿ti pjel oj tocx jun xjal yaa'n ocslal cyxola? Q'uelela tuj twitz njaw tuj cywi'y. ²⁴ Pero katzen nchi k'umena tyol Dios tzinenxix, ojzten tocx jun xjal yaa'n ocslal cyxola, c'oqueltzen thi'n, bix jketel tnaabl, bix q'uelel tniy' ti'j at til. ²⁵ Cykil tzunj ewen tu'n tanem c'uleltzen tuj tc'u'j, bix cyjeltzen tk'o'n til, bix cwel maje na'l Dios, bix q'uelel tniy' ti'j Diostzen at cyuyey.

²⁶Entonces, key hermano, jnxi' nkba'na cyey jaj oj cychmeta tuj jun culto, cab cyey bitzel, bix cabtl cyey k'umlte tyol Dios, bix cabtl cyey kbalte ti o tyeec'a Dios cye, bix cabtl cyey yolel tuj jun wikxilt yol min-al n-el tniy' ti'j, bix cabtl cyey kbal ti japeninaj jun wikxilt yol. Pero cybinchama cykilca tu'n ttzket cynaabl ocslal tuj tyol Dios. ²⁷Ka ma yolen juun tuj jun wikxilt yol min-al n-el tniy' ti'j, ca'bax ba'n tyolen ju'wa, bix ka ma yolen oxe, pero o'cx xsunj. Bix juntl, oj cyyolen xjal tuj jun wikxilt yol, mi'n chi yolen junx, sino nuk juunc'a c-yolel. Bix iltzen ti'j at juntl te kbalte ti japenina cyyol. ²⁸Pero katzen min-al jun ba'n ttx'olbante ti elpenina cyyol tuj culto, mi'n chi yolen tuj wikxilt yol min-al n-el tniy' ti'j. Mejor e cyyole cyjunax bix tuya Dios.

²⁹Ja tzunkej k'uml tyol Dios, o'cx ca'ba oxe ba'n tyolen tuj jun culto. Jatzen cabtl nuk chi ebil ti toc cyu'n kej nchi k'on tyol Dios, la' ka tumel bix ka min. ³⁰Bix oj nk'on jun ocslal tyol Dios, bix nebinj juntl ocslal k'uklecx, bix at ch'intl tumel tuya ti tten tyol Dios, iltzen ti'j tk'a'j ocslal nk'on tyol Dios ttem tej juntl ocslal tu'n tyolen jun rato. ³¹Mas ba'n juunc'a c-yolel ti'j tyol Dios tuj tumel twitzj oj tjaw nilj entera ocslal te k'olte tyol Dios. Ju'tzen q'uelel cyniy' ocslal ti'j tyol Dios bix chi cychwixeltzen tuj cyocslabl. ³²Jnxi' nk'umena jaj oj at nim cybaja cyaja chi k'ona tyol Dios tuj jun culto, ilxsen ti'j ttxolan cyse' cyiiba jooct'zen ncana cyi'ja tu'n cyyolena, ³³cuma te Dios taj tu'n cykilca ten tuj ttzyal, yaa'n tu'n cykil ten tuj tzpetpajlenel. Ju' tten cyxol ocslal tuj cykilca tja Dios.

³⁴Bix at juntl nbaj cyxola. Ke xuuj oj min tz'el cyniy' ti' cyyol k'uml tyol Dios, bixsen nchi ocx te kanlte te ke cychmil ti tten, bix ka'ca jun tbi'nc tuj culto. Ke xuuj mixbe cyyolen ju'wa tuj culto. Il ti'j tu'n cybinte jley ti tten tu'n cycub ten tuj tumel tuj culto. ³⁵Ka cyaj xuuj tu'n tel cyniy' ti'j ti toc cyu'n k'uml tyol Dios, ba'n tu'n t-xi' cykanen te cychmil cyja, cuma yaa'n ba'n tu'n cyocx ten labtel tuj culto.

³⁶Yaltzen key, ¿tzimpa niy' tuj cyc'u'ja ti'j ejee'pa tzuna e jaw itz'jsante tyol Dios? ¿Bix tzimpa niy' tuj cyc'u'ja ti'j nuk ejee'y n-el cyniy' ti' tyol Dios? Ka ju' niy' tuj cyc'u'ja, ju'tzen loj njaw cyniman cyiiba. ³⁷Ka jaxxix cyu'na n-el cyniy'ya ti'j alcey jaxxix, bix ka jaxxix cyu'na at cypemala tu'n t-xi' cyk'umena jaxxix, q'uelel cyniy'ya ti'j jnxi' ntz'i'bena cyey jaj tcawbil Dios. ³⁸Ka at jun k'uml tyol Dios cyxola min tz'el tniy' ti'j jaxxix jnxi' ntz'i'bena cyey, mi'n tz'oc tajlal te kbalte tyol Dios.

³⁹Key hermano, cyk'o'nc cypena ti'j cyk'umena tyol Dios tuj tzinen, pero mi'n txi' cykba'na cye kej ocslal nchi yolen tuj jun wikxilt yol min-al n-el tniy' ti'j tu'n mi'n chi yolen. ⁴⁰Ja mas il ti'j jaj tu'n cytena tuj tumel tuj jun culto, yaa'n tuj tzpetpajlenel.

15

Oj cyjatz itz'j ke cyimne

¹Key hermano, at juun cyey tzin cykba'n mlay jatz itz'j kxumlal juntl maj. C'ulel tuj cyc'u'ja nyola tej t-xi' nk'umena cyey nejl tpochal co'pbil ke. E cyiik' tzunja jyol lu. Ja tzunj ba'n yol jatzen tloq'uel cyocslabla, ²bix tu'nj tzunj ba'n yol chi copjela, ka k'i'nxix cyu'na bix ka min xcyaj cyiit'q'uea. Katzen ma cyaj cyiit'q'uea, nuktzen ocslankey nuk cyajxa.

³Jba'n yol e xi' nk'umena cyey, yaa'n inayena binchal, sino e wiik'a te Dios. Bix tuj tpochal co'pbil ke, jmas il ti'j jaj e cyim Cristo twitz cruz ti' kil, tisen otk tkba tyol Dios nejl at tu'n tcyim, ⁴bix e cu'x maket, bix te toxen k'ij tej tjatz itz'j tuj cyamecy, tisen otk tkba tyol Dios at tu'n tjatz. ⁵Bix e til jxin Pedro ja Jesús mas yaj, bix mas yaj e cyitl cykilcatlj t-xel Jesús otk jatz itz'jxin. ⁶Bix mas yaj e jaw jlet Jesús cywitz mas te jwe' syent ocslal tuj jun lugar. Ejee' tzunja ba'n cyajben te tstiwa ti'j e jatz itz'j Cristo juntl maj, cuma cyxol tzunj jwe' syent xjal lu ch'ixc'a yaa'n cykilca ke xjal i'tzx ja'lewe. Nuk cab o cyim. ⁷Bix mas yaj e jaw jlet Jesús twitz Jacobo, bix mas yajtl e jaw jlet-xin cywitz cykilcatlj xjal lepchec ti'jxin. Cykilca tzunkej xjal lu e lonte otk jaw itz'j Jesús tuj cyamecy juntl maj.

⁸Manc'biltzen e jaw jlet Jesús nwitzza, inayena Pablo. E jaw jlet-xin nwitzza, amale inayenta tuj tneel min e najbe'na twitzxin. In tena twitzxin tisen jun elsa'n cwal mintii' tajbel oj titz'j. ⁹Tuj nwitzza inayena jun t-xel Jesús yaa'n nim wajbela cywitzj cabtl t-xel Jesús, hasta minxtii' wajbela tu'n woca te t-xel Jesús. Nxi' ntz'i'bena ju'wa cuma tuj tneel inayena in oc lpe te tzulcye ke ocslal tu'n cyxi' tuj tze' bix tu'n cycub. ¹⁰Pero amale mintii' wajbela tu'n woca te t-xel Jesús, pero tu'n t-xtalbil Dios wibaja o tz'oc woclena te t-xel Jesús. Bix yaa'n nuk tajx o tz'oc tk'o'n Cristo weya tu'n woca te t-xel, cuma o chin najbe'na mas ti' tk'umj tyol Dios cywitz niy'tl t-xel Jesús. Pero min e najbe'na tu'n waxa wipemala, sino tu'n tipemal Dios. ¹¹Pero mintii' xix il ti'j al ak'anan mas, ka inayena bix ka ejee' cabtl t-xel Jesús. Ja te il ti'j jaj tkbaj junx kyola ti'j tjatzlen itz'j Cristo juntl maj. Bix o tz'el jax tuj cywitzza.

¹²Pero katzen cykilca ke t-xel Jesús o ko kba'na o jatz itz'j Cristo juntl maj tuj cyamecy, ¿titzten tten at juun cyxola tzin cykba'n min-al jun cjawetz itz'j juntl maj tuj cyamecy? ¹³Kane min-al cjawetz itz'j tuj cyamecy, entonces cyimnexnele ta' Cristo tuj mukbil te

ja'lewe. ¹⁴ Bix kane min e jaw itz'j Cristo juntl maj, nuknele kajxa jkyola ti'j Cristo, bix ju'xse loj cyocslabla ti' Cristo jaxsele nuk cyajxa. ¹⁵ Bix kane ju'wa, ejoo'tzen loya t-xel Jesús x'tak' ti' tyol Dios, cuma nko k'umena o jatz titz'jsa'n Dios ja Cristo tuj cyamecy. Pero ka yaa'n jax chi jawetz itz'j cyimne juntl maj, entonces yaa'n jax kyola ti'j o jatz titz'jsa'n Dios ja Cristo tuj cyamecy, ¹⁶ cuma ka min-al xjal cjawetz itz'j juntl maj, mi nuketnele ja Cristo o jaw itz'j tuj cyamecy. ¹⁷ Kane min e jatz itz'j Cristo tuj mukbilte, jaxsele mintii' tajbel cyocslabla, bix yaa'n o'cxj, jaxsele ete'xa tjak' cyila. ¹⁸ Bix ka ejoo' ocslal i'tzx eto' tjak' kil, kej ocslal o chi cyim jax ete' tjak' cyil, bix te junx maj cyimneke. Mintii' cyitz'jeltl. ¹⁹ Ju' tzunj ka o tz'oc ke kc'u'j ti' Cristo nuk ti'j kchunk'lal te twitz tx'otx' bix yaa'n ti'j kchunk'lal te junx maj, lastim ko', cuma niy'x q'uixc'aj ku'n ti'j jun kocslabl mintii' c'oquela.

²⁰ Pero jaxte o jatz itz'j te Cristo tuj cyamecy juntl maj. Bix tej tjatz itz'jxin juntl maj, e tyeec'axin chi jawel itz'j cykilcatl xjal tuj cyamecy juntl maj. ²¹ Cykilca xjal twitz tx'otx' il ti'j chi cymel tu'n il cuma oc il twitz tx'otx' tej tcub tz'ak tneel kxe'chel tuj il. Ju'tzen tu'n jun xjal e tzyet cyamecy twitz tx'otx'. Pero jax tu'n jun xjal tzul co'pbil te tuj cyamecy la' alyce jun k'ij. ²² Ju' tzunj, nko cyim, cuma tiy'jil Adán ko'. Pero tu'n'tzen kk'on kiib tuya Cristo, ko itz'jel juntl maj. ²³ Pero yaa'n junx ko jawetz itz'j tuya Cristo. Texin il ti'j e jatz itz'jxin te tneel. Yaltzen ke, ko jawel itz'j mas yaj ojxe tulxin. Oj tul meltz'ajxin twitz tx'otx', cykilca t-xjalxin chi itz'jel juntl maj. ²⁴ Bix manc'biltzen cpomeltzen baj twi' tu'n t'bj twitz tx'otx'. Bix tuj manc'bil k'ij, pjeltzen twi' kej cykilca aj k'o'j ti'jxin, bix ojtzen t'bj bint tcawbilxin tuj tumel, cxe'l'tzen tk'o'nxin te Kman Dios. ²⁵ Maxetzen cxe'l tk'o'nxin tcawbilxin te tmanxin, il ti'j ccawelxin, cuma mlay txi' tk'o'nxin tcawbilxin te tmanxin te mitkna'x tcamanxin tibaj cykil kej nchi k'ojl ti'jxin. ²⁶ Bix manc'biltzen ccamalxin ti'j mintii' tuj cyamecy. ²⁷ Tuj tyol Dios tzin tkba'n cyjulu: "Cyjel tk'o'n Dios cykilca tjak' tken Tcwalxin," tzi tyol Dios. Pero tej tkbante tyol Dios cyjel tk'o'n Dios cykilca tjak' tcawbil Tcwalxin, pero yaa'n jaan Dios tu'n tcyaj tjak' tcawbil Tcwalxin. ²⁸ Yaa'n c'oquex Dios tjak' tcawbil Tcwalxin, sino ja Tcwalxin c'oquex tjak' tcawbilxin oj t-xi' tk'o'n Tcwalxin texin cykilca'j otk tz'oc tk'o'nxin tjak' tken Tcwalxin. Ju'tzen ccawel Dios tibaj cykilca at.

²⁹ Key hermano, oj cybautizarja te t-xel cyimne, n-e'latzen tuj cywitza chi jawetz itz'j cyimne tuj cyamecy juntl maj. Tuj cywitza najben jlu te cyimne. ¿Pero ti c'ajbela jlu ka jun cyimne cyimnen ta' te junx maj?

³⁰ At juntl tumel. Oj t-xi' nk'umena tyol Dios, cyaj xjal chin cub byeta. Katzen mi'n ko jatz itz'j tuj cyamecy juntl maj, ¿tikentzen nchin oca tuj q'uixc'aj ti'j? ³¹ Jax wu'na mi nuket jun k'ij mint niy'x q'uixc'aj wu'na ju'wa. Ka n-oc cyocsla'na nyola o tzin nkba'na nchin tzalaja tu'nj e cyocslay ti' Kaaw Cristo Jesús tej t-xi' nk'umena cyxola, cybi'nc'a nyola ti'j ch'ix mi'n chin cub byeta jaca k'ij, cuma junelne ta' cyca'bel nyola. ³² Oj nchi ak' xjal te Efeso yaslecte weya tisen león tu'n t-xi' tchyo'n xjal, ¿titzzen tajbel weya j'q'uixc'aj n-oc weya ka yaa'n jax tu'n kitz'j juntl maj? Masxetzele ba'n tu'n t'bj kniy'be'n tik'ch at twitz tx'otx' twitz tu'n niy'x q'uixc'aj ku'n, cuma ko cymel naj. ³³ Pero yaa'n ju'wa. Mi'n chi o t'zpeta tu'n cyyol kej xjal tzin cykba'n mi'n ko jatz itz'j tuj cyamecy, cuma ka n-oc cybi'na cyyol, cxe'l xitj cynaabla. ³⁴ Cycwentem cyiiba tu'n mi'n tz'oc cybi'na cyyol, cuma min cytzki'n Dios. ¡Nim jun ch'ixbajil te cyey nchin yolena ju'wa cyi'ja!

³⁵ Yaltzen ti'j ac'aj kxumlal, at juun cyey c'oquel kanente weya, ¿ti tten oj cyjatz itz'j cyimne juntl maj? ¿Bix tii'n cyxumlal oj cyjatz itz'j? ³⁶ Tneelxix c'aal ntzak'be'na ti'j tii'n kxumlal oj kjatz itz'j. Ka tuj cywitza mintii' tu'n kjatz itz'j tuj cyamecy, min tz'el cyni'ya ti'j. C'oquel cyce'yena jco'n nitz'j. ¿Jaa' ntzaa' itz'j? ¿Mimpatzen ti'el cyni'ya ti'j oj ncu'x cyiyaja tuj tx'otx', njatz pok'ch awal tuj, bix ncyim iyaj? ³⁷ Yaa'n te iyaj njaj. Ja tej jawel pok'ch junxilt twitzj cwelex awet, cjo'nle, triwale, bix tiixjale iyajel ti'j. ³⁸ O bint tu'n Dios jaca juun iyaj cjawetz itz'j jun awal ti'j tuya tec'ax t-xumlal. Yaa'n cykilca awal junx. ³⁹ Tec'alex juun wik tuya t-xumlal. Ke xjal, tec'ax cyxumlal. Ke alimaj, tec'ax cyxumlal. Ke ch'it, tec'ax cyxumlal. Bix ke quís, tec'ax cyxumlal. ⁴⁰ Ma chin yolena cyi'j alyeckh xumlabaj te twitz tx'otx'. Pero jax ju'x at cabtl te twitz cya'j. Pero yaa'n juniy' cyce'yenc cyuyaj te twitz tx'otx'. ⁴¹ Tec'ax juun tuya tcyeyenc. K'ij tec'ax tcyeyenc twitz xjaw. Bix xjaw tec'ax tcyeyenc cywitze che'w. Bix jax ju'x ke che'w. At juun nim twitz juntl. Key hermano, katzen o tak' Dios jun xumlabaj tu'n tajben te cykil wikan at twitz tx'otx' bix twitz cya'j, ctk'a'tzen Dios jun kxumlal tu'n tajben ke oj kjaw itz'j juntl maj.

⁴² Entonces, key hermano, cykilj at twitz tx'otx' bix twitz cya'j nyee'c'an te ke ti pjel oj kjatz itz'j tuj cyamecy. Jun iyaj, oj t'cu'x awet, cwelex k'ey, pero cjawel itz'j jun t-xul. Bix ju'tzen kten. Ko cymel, bix ko jawetz itz'j tuya junxilt kxumlal, bix ja jun kxumlal te junx maj. Mi'n k'ey. ⁴³ Kxumlal at ja'lewe yaa'n cyiw, bix ncyim. Pero ja tzunj ac'aj kxumlal q'uitz'jel oj kjatz itz'j juntl maj, masxsen t'banel bix te junx maj cyiw. ⁴⁴ Kxumlal at ja'lewe cwelex k'ey tisen jun iyaj, pero jun ac'aj kxumlal ckiik'el alyce jun k'ij. Katzen at kxumlal najben te twitz tx'otx', jax ju'x at jun kxumlal ckiik'el tu'n tajben te ac'aj kchunk'lal. ⁴⁵ Cyce'yenc

ti toc tu'n tyol Dios ti'j kchunk'lal te twitz tx'otx'. Tzi cyjulu: "Tneel xjal Adán e cub bint tu'n toc te jun xjal," tzi tyol Dios. Pero Cristo, jaxin k'olte kchunk'lal c'ajbel te junx maj. ⁴⁶ Jkxumlal najben nuk te twitz tx'otx', jatzen tneelj, bix jkxumlal c'ajbel te junx maj, jatzen tcabj. ⁴⁷ Adán el itz'j ti' tx'otx', bix ju' tzunj ajben t-xumlalxin te twitz tx'otx'. Pero te Cristo, amale twitz tx'otx'et itz'jaxin, pero texin tuj cya'j tzajninaxin. ⁴⁸ Yal te cykil xjal te twitz tx'otx', jaca juun xjal at kxumlal tisenj te Adán, tu'n najben te twitz tx'otx'. Pero kej xjal nchi oc lpe ti' Cristo, ctemel jun cyxumlal tisenj te Cristo e tzaj tuj cya'j. ⁴⁹ Tisen ja'lewe at kxumlal tisen t-xumlal jxjal itz'j te twitz tx'otx', jax ju'x at kxumlal la' alcye jun k'ij tisenj tej xin tzajninxe tuj cya'j.

⁵⁰ Key hermano, cxe'l'tzen ntzak'be'na ja'lewe ti'j ti tten oj kjatz itz'j juntl maj. Ja tzunj kxumlal tuya kchu'l bix ktz'q'uel at ja'lewe twitz tx'otx', mlay tz'ocx tuj tcawbil Dios, cuma tej at tu'n tcu'x k'ey, mlay tz'ajben jaa'j mintii' cyamecy. ⁵¹ Ju' tzunj cxe'l nk'umena cyey jun tumel o tzaj tyeec'an Dios weya. Amale yaa'nt cykilca ko' ocslal ko cymel, pero cykilca kxumlal cch'ixpetel. ⁵² Ju pjeel tuj ajkelbil, nuk tisen ncub yutz'paj ttzi kwitz. Tzul jun k'ij oj tk'ajt tzunj manc'bil tk'ajk'ajel xux. Oj tk'ajt xux, cykilca t-xjal Dios cyimne chi jawetz itz'j bix mlay chi cyim juntl maj. Kej ocslal mitkna'x cycyim jax ko ch'ixpetel tuya jun ac'aj kxumlal, pero mi'n ko cyim. Te tzunj k'ij tzul cch'ixpetel cykilca ko' ocslal. ⁵³ Cyjel kk'o'n jkxumlal nxi' tuj cyamecy tu'ntzen kocx tuj jun kxumlal mi'n k'ey, ac'aj, bix mintii' t'bjajel. ⁵⁴ Oj'tzen tcyaj kk'o'n jkxumlal ncu'x k'ey, tu'ntzen kocx tuj juntl kxumlal mintii' t'bjajel, otktzen bint jun yol tuj tyol Dios tzi cyjulu: "Pjeltzen twi' cyamecy kibaj cuma ccamal kchunk'lal te junx maj tibaj kcyamecy," tzi tyol Dios. ⁵⁵ Ju' tzunj, oj kjatz itz'j tuj cyamecy, bixsen ko al meltz'aj xmucchal ti' taaw cyamecy. Cxe'l'kkba'n: "Taaw cyamecy, ¿ti e baj tey? E tajbey tu'n ktzyeta tu'na, pero min e camana. ¿Tii'n o txi'j tipemala tu'n toc isj ki'ja?" tzi kbel. ⁵⁶ Yaltzen tipemal taaw cyamecy, ¿titz'zen jilel tipemal taaw cyamecy tu'n toc tšjsa'n ejoo' ja'lewe? Jaj tu'n t'binchaj il ku'n, bix j-il nxi' tii'n ejoo' tuj cyamecy. Tzin tyeec'an tley Dios at nim kil, bix tu'n kil, at tu'n kxi' tuj cyamecy. ⁵⁷ Pero chjonte te Kman Dios o tzaj tk'o'n co'pbil ke tu'n mi'n ko'x tuj tk'ab taaw il tu'nj e baj bint tu'n Kaaw Jesucristo.

⁵⁸ Entonces, key hermano n-oc cyak'a weya, jaxte ko camal tibaj il bix tibaj cyamecy. Yaa'n tu'n kcyaj tuj cyamecy. Ju' tzunj chi we'xixa tuj kocslabl ti' Kaaw, tu'ntzen mi'n chi cub tz'aka. Bix chi ak'anaxa tuya cykil cyanema tuj taak'en Kaaw, cuma yaa'n nuk kajx nko ak'anax.

16

Jun cotz cye ocslal mebe

¹ Cxe'l'tzen ntzak'be'na cyey ti'j cykanbila ti' pwak nbaj cychmo'na cyxol ejee'y ocslal tuj Corinto tu'n t-xi' cysma'na cye mebe ocslal tuj Jerusalén. Tisenj e xi' nkba'na cye ocslal tuj tnom te Galacia, ju'x cxe'l nkba'na cyey. ² Oj cychmeta jaca tneel k'ij te smant, jaca juun cyey q'uelel cyii'na ch'in ti'j pwak ma cycamey tuj smant, tu'n tcub cyk'o'na te ofrenda. Ka nim ch'in ma cycamey, jaxle ba'n tu'n nim ch'in cwel cyk'o'na, bix ka yaa'n nim ma cycamey, jax yaa'n nim ch'in cy-ofrendey. Ju'tzen cychmetel cy-ofrendey nim. Ka nchi ayona ojxe npona cyxola tu'ntzen tcub cyk'o'na cy-ofrendey nuk te jun k'ij, yaa'nxix nim pwak cychmetel. ³ Oj npon cyxola, bix cyjoya cab xinak ba'nxix tu'n t-xi' cyii'n jcy-ofrendey ma tuj Jerusalén. Bix cxe'l nk'o'na cyu'j tzin cykba'n alcyekexin bix ti cysanalalxin, tu'ntzen mintii' chi oc iy'k'anxin tuj be ti' pwak. ⁴ Bix ka at amle'n wi'ja, chin xe'l tzuna cyuyaxin.

Tej tcub t'bisén Pablo ti'j tu'n t-xi' tuj tnom Corinto

⁵ Oj'tzen nxi'y cyuyey, chin i'yel tzuna tuj Macedonia te cyey'lcye ke ocslal jatzewe. Bix yajltzen chin pomela cyuyey. ⁶ Kape chin cyjela cyxola nim k'ij. Kape enterax j'balél chin temela. Bix yajltzen chin cyonena tzuna tu'n ttzyet nbe'ya, la' alcye be cxe'l wii'na. ⁷ Ka ma tak' Dios, waja chin tena cyxola nim tyem. Yaa'n nuk chin xe'l aalxe te cab k'ij. ⁸ Pero te ja'lewe chin cyjela tzalu tuj tnom te Efeso hasta ojxe t'bjaj jnink'ij Pentecostés, ⁹ cuma tzalu ma tzaj tk'o'n Dios weya tu'n nk'umena tyol Dios nim, bix at nim xjal n-oc ebinte, amale atet nim xjal nk'ojlec wi'ja.

¹⁰ Pero cpomel nej Timoteo nwitza cyuyey. Jak'a nak'anax tuj taak'en Kaaw tisen inayena. Pero atzen ch'in ttzi. Ju' tzunj, oj tponk'a cyxola, ccyiik'el ch'in k'ey tuj tumel, tu'ntzen tel ttzi ti'jk'a. ¹¹ Mi'n tz'el cyiiq'uen ch'ina, sino bix chi onen ch'ina ti'jk'a, tu'ntzen tul meltz'ajk'a wi'ja tuj ttzyal. Cnyo'k'a tzalu tuyax cabtl ocslal hasta ojxe tul meltz'ajk'a.

¹² Yaltzen te Apolos, nim ma chin cubsan nwitza te tu'n t-xi' tjunen tiib cyuyaj xjal tu'n tpon cyii'n ja u'j lu cyey, pero tcy'ixin t-xi'xin ja'lewe. Pero kape ponxin mas yaj oj ttzaj amle'n ti'jxin.

Jun k'olbebl tu'n Pablo cye ocslal tuj tnom Corinto

¹³ Manc'biltzen, key hermano, tu'n tbaj twi' nyola cyuyey, cxe'l nkba'na cyey tu'n cyitz'lente cyiiba, bix tu'n chi we'bilxixa tuj kocslabl ti' Cristo, bix mi'n chi cub yut'paja tu'n ttzi, sino cyiw chi oqueley, bix tu'n toc cyipey, ¹⁴bix cykilca ti pjel cybinchama, tuyaxix tk'ak'bil cyc'u'ja.

¹⁵ Wajtzen tu'n tel cyni'ya ti' Estéfanos bix ti' ke te tja. Cytzki'ntl tzuna tuj enterax tx'otx' te Acaya, Estéfanos cyuya ke te tja ejee'tzen tneel ocslalja, bix nim o chi ak'anan tu'n cyajben cye niy'tl ocslal. ¹⁶ Ju' tzunj nchin cubsana nwitzta cyey tu'n cyxi' lpey ti' tnaablxin, bix tu'n t-xi' cyii'na tisen kej xjal nchi onen cyi' cabtl xjal tisenxsen jaxin.

¹⁷ Yal te weya, junxe ch'in njunala tzalu, cuma min-al key wuyena. Pero nchin tzalaja o chi ulj oxo xjal te cytanema wuyena tzalu, jatzen Estéfanos tuya Fortunato bix tuya Acaico. ¹⁸ Ejee' tzunxin o tzaj nimsante nc'u'ja, bix oj cypon meltz'aj cyxola, ju'x cxe'l cynimsa'n cyc'u'ja. Ju' tzunj c'oquel cybi'na bix cyocslay cyyol.

¹⁹ Yaltzen ke ocslal cye ke tja Dios tzalu tuj tx'otx' te Asia, nxi' cyk'o'n jun k'olbebl te cyey jatzewe. Bix kej ocslal nchi chmet tuj culto tuj cyja Aquila bix Priscila nxi' cyk'o'n tuya cykil cyc'u'j jun k'olbebl te cyey. ²⁰ Bix nxi' cyk'o'n jun k'olbebl te cyey cykil ocslal tzalu tuj tnom te Efeso. Bix ju'x cyey, cyk'olbem cyiiba tuya nim tk'ak'bil cyc'u'ja. ²¹ Jax ju'x inayena, Pablo, nxi' nk'o'na jun k'olbebl te cyey, pero yaa'n jun ntz'i'bila ncub tz'i'bente nk'olbebla, sino inayena.

²² Ka at jun xjal mintii' ch'in tk'ak'bil tc'u'j ti' Kaaw, sbu'nixtizen ta'.

Tzulxit Kaaw Jesús.

²³ Cyiik'axita t-xtalbil Kaaw Jesús. ²⁴ Te cykilca tzunkey n-oc ke cyc'u'ja ti' Cristo Jesús, nxi' nsma'na wanema cyibaja.

O'cx nyolja.

Tej t-xi' ttz'i'ben Pablo juntl u'j cye ocslal tuj tnom Corinto

Jun k'olbebl tu'n Pablo cye ocslal aj Corinto

¹ Key hermano tuj tnom te Corinto,

Inayena Pablo. Dios o scy'onte weya tu'n wajbena te jun t-xel Cristo Jesús. Nxi' ntz'i'bena ja u'j lu te cyey t-xjal Dios tuj Corinto. Tu'nxit tajben jwu'ja, yaa'n nuk te cyey, sino tuyaxa te cykilca ocslal tuj cykilcatl tnom iken tu'n tx'otx' te Acaya. At Hermano Timoteo tzalu wuyena, bix ba'n tuj twitzj nxi' ntz'i'bena cyey. ² At-xit t-xtalbil Kman Dios bix Kaaw Jesucristo cyibaja, bix nuket tzaj cyk'o'nxin cyey tu'n cytena tuj ttz'yal.

Jun q'uixc'aj ti' Pablo pero ja Dios ncyiwsante tc'u'j

³ Jawxit knimsa'n tbi Dios, Tman Kaaw Jesucristo. N-oc k'a'ben tc'u'jxin ki'j, bix jaxin ncyiwsante kc'u'j. ⁴ Oj niy'x q'uixc'aj ku'n, Dios ncyiwsante kc'u'j, tu'ntzen oj niy'x q'uixc'aj cyu'n cabtl ocslal, ejoo'tzen ba'n t-xi' cyiwsante cyc'u'j, tisenj n-oc tcyiwsa'nte Dios ke kc'u'j. ⁵ Nim q'uixc'aj q'u'iayax ku'n oj kxi' lpe ti' Cristo. Katzen nim niy'x q'uixc'aj ku'n, jax nim ncyiwsan Dios kc'u'j tu'n Cristo. ⁶ Jatzen weya, o tziy'x q'uixc'aj wu'na tuj waak'ena te kbalte cyey ti tten tu'n cycleta. Bix oj toc cycye'yena tii'n o tcyiwsa Dios nc'u'ja tu'n tiy'x q'uixc'aj wu'na, jax ju'x cyey ccyiwsetel cyc'u'ja, tu'ntzen oj toc pena cyi'ja tisen oc pena wi'ja, q'u'iayax cyu'na. ⁷ Weya k'u'kl nc'u'ja cyi'ja ka niy'x cyu'na oj toc pena cyi'ja. Ntzki'na tisen te Dios ntzaj tcyiwsa'n weya nc'u'j tu'n tiy'x wu'na oj toc pena wi'ja, jaxsen ju'x cyey. Ctzaal tcyiwsa'n Dios cyc'u'ja tu'n tiy'x cyu'na oj toc pena cyi'ja.

⁸ Key hermano, waja tu'n tel cyni'ya ti'j ti ttenj q'uixc'aj iy'x wu'na tej ntena tuj tx'otx' te Asia. Nim q'uixc'aj oc weya, tejde t'bj wipena tu'n tiy'x wu'na, bix tuj nwitzza tu'n ncyima tu'nj q'uixc'aj oc weya. ⁹ El jax tuj nwitzza tu'n ncyima. Ju' e baj weya, tu'ntzen toc ke nc'u'ja ti' Dios tu'n witz'ja, yaa'n nuk wi'ja. Dios ba'n t'jaz itz'jsante ke tuj cyamecy. ¹⁰ Jaxin e clonte weya tej ch'itk ncyima, bix n-oc ke nc'u'ja ti'jxin tu'n tco'pantexin inayena tu'n mi'n chin cyima. Jaxin cco'plte weya tuj cyk'ab xjal tu'n mi'n chin cyima cyuj k'ij chi ul. ¹¹ Bix ka nchi na'na Dios wi'ja, nim tajbel te onbil weya. Ka nim cybaja nchi na'na Dios wi'ja, jax nim xjal ba'n t-xi' cyk'o'n chjonte te Dios oj tk'ontexin t-xtalbilxin wibaja.

Tej tcub tchi'xbe'n Pablo tu'n t-xi' mas yaj tuj tnom Corinto

¹² Key hermano, jaxxix jweya nyol bix ju' tzin tkba'n nc'u'ja o txi' wii'na nchunk'lala tuj tumel bix yaa'n e cub yaa'nkey. Min in xi' lpeya ti' tnaabl te twitz tx'otx', sino o tz'oc ke nc'u'ja ti' Dios tu'n ttzaj tonenxin inayena, tu'ntzen t-xi' wii'na nchunk'lala jiquenxix. O txi' wii'na nchunk'lala tuj tumel cywitz cykil xjal, pero ejee'tzen cyey, mas cytzki'na nnaabla cywitz cykilcatl xjal. ¹³ Cytzki'n'tla jiquen nnaabla, cuma kej wu'ja nxi' ntz'i'bena cyey tzinen cya'. Jnyola nxi' tuj wu'ja yaa'n ca'ba tten tu'n cycub tzpeta tu'n. Cutzit tel cyni'ya ti'j nyola te junx maj. Weya nyol, yaa'n squetc'ajnin ta' tu'n cyxi'y tuj il tu'n. ¹⁴ Nuk alx juun cyey n-el cyni'ya ti'j nyola. Ojat tel cyni'ya ti'j waja tu'n cytzalaja wi'ja, tisenj chin tzalajela cyi'ja tej k'ij oj tul meltz'aj Kaaw Jesús te cyey'lte ka ba'n waak'ena cyxola.

¹⁵ Tuj tneel tuj nwitzza at tu'n cytzalaja oj toc cycye'yena inayena. At npomlela cyuyena ca'ba maj te onlte cyey. ¹⁶ Otk cub nninc'u'na tu'n wi'ya cyxola tuj Corinto, tu'ntzen wula mas yaj tuj Macedonia. Mas yaxje at npomlela cyxola juntl maj. Bix jax ju'x otk cub nninc'u'na tu'n ttzaj cyk'o'na onbil weya tu'n nxi'ya maa tuj Judea. ¹⁷ Ju'tzen otk cub nbisena ti'j nejl, pero e cub nchi'xbe'n'tla j-e wajbe'ya tuj tneel. Ju' tzunj at juun cyey tzin cykba'na yaa'n jaxxix toclen nyola. Tuj cywitzza ncub nch'ixbe'na nyola tisen kej xjal yaa'n ocslal. ¹⁸ Pero ttzki'n Dios taj nc'u'ja tu'n t'btnt wu'na alcyej cxe'l nkba'na tu'n t'btnt wu'na, ¹⁹ cuma il ti'j tu'n nxi' lpeya ti' tnaabl jxjal tzin nk'umena. Tej ntena cyxola tuya Silvano bix tuya Timoteo, e xi' nk'umena t'pochal Tcwal Dios, Cristo Jesús, bix cytzki'na bajx tkba' Cristo tu'n t'btnt jun tii' tu'nxin bix mint elpe bajxin twitz. ²⁰ Ktzki'n'tltzen elpe baj Cristo ti' tyol, cuma tu'nxin elpe baj Dios cykilcaj otk cyaj tkba'n cye xjal. Ju' tzunj oj t-xi' kkba'n "Amen" te Dios te yec'bil njaw knimsa'n t'bxin, tu'n Cristo tzin kkba'n ju'wa. ²¹ O tak' Dios weya bix te cyey tu'ntzen kten cyiw tuj kmojbabl kiib tuya Cristo. Ja Dios lu e scy'onte weya tu'n woca tuj taak'en. ²² Tex Dios e tzaj tk'o'n Espiritu Santo ke te techel t-xjal Dios ko'.

²³ E cub nninc'u'na tu'n npona cyxola, pero mas yaj e cub nch'ixbe'na nyola, cuma nuket in i'ya cyxola, ilelttzele ti'j tu'n cyoc wilena. Pero ttzki'n Dios min e wajbe'ya tu'n cyoc wilena. Ju' tzunj e nch'ixbe'ya tu'n mi'n chin i'ya cyxola tuj Corinto. ²⁴ Katzen nchi oc wilena, yaa'n tu'nj yaa'n kena taaw cyocslabla. O'cx tu'n cyxi' wonena tu'n cytzalaja. Yal tej cyocslabla ti' Dios, cyiw ta'.

2

¹ Ju' tzunj, key hermano, min in i'ya cyey'lte cyey, cuma nuket in i'ya cyxola, otle chi oc wilena, bix e cyajet lokey tuj bis tu'n nyola. ² Pero nuket e cyajkey tuj bis tu'n nyola, ¿altzen ba'n ttzaj k'ukbante nc'u'ja? Mintlen-al. ³ Ju' tzunj e xa' nsma'na wu'ja cyey nejl. E wajbe'ya tu'n tcyaj cyk'o'na cykilj ka' nbint cyu'na looj mitkna'x npona cyxola, tu'ntzen ntzalaja cyi'ja, yaa'n tu'n nbisena cyi'ja. Tuj nwitzta junelne ta' cyyola wuyena nuket min chin tzalaja cyi'ja, jax mlay chi tzalaja wi'ja. ⁴ Tej t-xi' nsma'na wu'ja cyuyey, e tzaj ch'in nbisa bix e xi' wok'je'na, cuma il ti'j oc wilenkey. Pero min e wajbe'ya tu'n cybisena. Nuk e wajbe'ya tu'n t-xi' nyeeec'ana nim tk'ak'bil nc'u'ja cyi'ja. Ju' tzunj min in pona cyxola tisenj otk cub nninc'u'na.

Il ti'j tu'n tcub cynajsa'na jtil jun ocslal bix tu'n t-xi' ccyiwsa'na tc'u'j

⁵ Ja tzunj ocslal cyxola e tbincha jun ka', o tzaj ch'in nbisa ti'j. Pero yaa'n nuk te weya ja bis lu, sino mas nim te cyey. Pero min txi' nkba'na ka cykilca key e bisenkey ti'j, cuma kape yaa'n jax. ⁶ Tnimal cybaja e cyajbey tu'n tcub tuj castiwa. Pero ma tzul til tuj tc'u'j tcublen tuj castiwa, bix nim tken tcastiwa e cub. ⁷ Matzen pon tumel tu'ntzen tbaj tilel jtil ocslal cyu'na, tu'ntzen t-xi' ccyiwsa'na tc'u'j. Katzen tzinx n-oc cyk'o'na tuj castiwa, cwelzten tbsenxin ti'j ka min cub cynajsa'na tilxin tej tcyaj tk'o'nxin tilxin, bix jac'a tu'n tbsixin mi'n tz'ajbentlxin tuj taak'en Dios. ⁸ Ju' tzunj nchin cubsana nwitzta cyey tu'n tcub cynajsa'na tilxin, tu'ntzen t-xi' cyyeeec'ana tk'ak'bil ccy'u'ja texin. ⁹ Nejl e xi' nsma'na wu'ja cyey, tu'n tcub cyk'o'na j-ocslal aj il tuj castiwa. Pero e xi' nk'umena ju'wa nuk tu'n tel nni'ya ti'j ka nbint cyu'na cykilcaj ti' nxi' nkba'na cyey. ¹⁰ O tz'el nni'ya ti'j o cybiy nyola. Pero ja'lewe, katzen cwel cynajsa'na j-ocslal aj il, jax ju'x weya. Amale yaa'nt wi'ja oca tbincha'n il, ttzki'n Cristo o cub nnajsa'na. O bint wu'na ju'wa te jun yec'bil te cyey. ¹¹ Ka min knajsa j-ocslal aj il, taaw iltzen ke ccamal ki'j. N-el kniy' ti'j taj taaw il tu'n tcub tyaa'n ejoo', tu'ntzen kcub xitj.

Tej tpon Pablo tuj tnomo te Troas

¹² Tejtzen npona tuj tnomo te Troas te k'umlte tpochal Cristo, at nim amle'n wi'ja tu'n wajbe'na tuj taak'en Kaaw. ¹³ Pero mix e binne wak'anana ba'n jatzewe, cuma min otk pon Hermano Tito tuj Troas tuya cypochala tii'n ete'y. Ju' tzunj ajkelen nc'u'ja, bix e cyaj nk'o'na ke ocslal te Troas tu'n wula tuj Macedonia te jyolte.

Ncub ti' il ku'n nuk tu'n Cristo

¹⁴ Pero amale ajkelet nc'u'ja, bix nxi' nk'o'na chjonte te Dios. Tu'nj nmojbabl wiiba tuya Cristo, at woclena tuya Dios oj tcamanxin ti'j cykilca nk'oj ti'jxin. Bix tisen n-el pax tc'o'cjel jun tii' tuj cyk'i'k, ju'tzen o tak' Dios weya tu'n t-xi' nk'umena tpochal Cristo jaa' nchin poniya, ¹⁵ bix ba'nksen tuj twitz Dios oj t-xi' nk'umena ju'wa. Tisen jun c'oc'sbil n-el pax tc'o'cjel tzin cyna'n xjal, ju'tzen japenina oj nxi' nk'umena ja yol lu ti'j Cristo cyekej chi ocslalte nyola bix chi cletel tuj cyil, bix ja tzunkej q'uelel cyiiq'uen chi xe'l tuj il. ¹⁶ Kej n-el cyiiq'uen nyola, tzin cyna'n tisen t-xewel anem, cuma tzin techla'n te cyamecyke. Pero kej nchi ocslan ti' nyola, tisentzen c'o'cj tuj cywitz.

¿Altzen ba'n tbint jun nintzaj ak'untl tu'n ju'wa? Tuj twitz juun cyey mlay bint wu'na. Pero yaa'n jax cyu'n, ¹⁷ cuma yaa'n ju' kena tisen juntl wik xjal nchi ak'anana ti' tyol Dios nuk tu'n pwak cyu'n. Jwaak'ena nbint wu'na o tzaj tk'o'n Dios weya, bix nbint wu'na, yaa'n nuk tu'n pwak wu'na, sino jaxxix nchin k'umena tyol Dios bix tuya tipemal Cristo, cuma Dios cyey'lte weya la' ka ba'n nbint taak'enxin wu'na bix ka min.

3

E tkba Pablo tpochal ac'aj ttrat Dios tu'n cyclet xjal

¹ Key hermano, ma txi' nkba'na inayena jun t-ak'anal Dios jaxxix, pero mi'n cub cybisena ti'j ka te nimbil wiiba. Mintii' il ti'j tu'n tcub ttz'i'ben jun xjal u'j te okxenbal weya cyuyey ka jiquen kena. At juun il ti'j k'i'n jun cyu'j tu'n t-xi' cyyeeec'an ka ak'analke tuj taak'en Dios, pero weya yaa'n il ti'j k'i'n wu'ja. ² Ntzki'na tu'nj e bint wu'na cyxola, o chi oca t-xjal Cristo. Ju' tzunj ejee' tzuna jun yec'bil cywitz cykil xjal ka jaxxix t-ak'anal Dios kena. ³ Tzinen ta' ejee'y t-xjal Cristo. Yal weya, nchin ajbena cyey tuj taak'en Cristo, tisen najben jun xjal tz'i'bel tuj taak'en tpatron oj tcub tbincha'n u'j cye cabtl xjal. Yal te u'j, tz'i'ben tuya tint q'uelel baj tik'bil. Bix ju'xse ootxa e cyaj tz'i'bet ley twitz xak yaa'n i'tz. Pero te cyey ja'lewe, o tak' Dios Espiritu Santo i'tz te junx maj, tu'ntzen tel cyni'ya ti'j tuj cyanema ti' taj Dios.

⁴ Ju' tzunj, ntzki'na nxi' nk'umena tyol Dios jiquenxix, bix nbint wu'na tu'nj n-oc ke nc'u'ja ti' Dios tu'n Cristo. ⁵ Yaa'n tu'n waxa wipemala nchin ak'anana ba'n, sino tu'n tipemal Dios. ⁶ Dios o tzaj tk'o'n weya wipemal tu'n t-xi' nk'umena tpochalj ac'aj ttrat Dios tu'n cyclet xjal tuj cyil. Jk'anak ttrat Dios cyi' xjal nuk tz'i'ben ta', bix e tkba alj min e tbi tley Dios bi'x e cub

byet. Pero j-ac'aj trat yaa'n ju'wa, cuma tzin tkba'n ctk'a' Espiritu Santo te xjal tu'n tbint jti taj Dios tuyu cykil t'u'j, bix tk'a' tchunk'lal te junx maj.

⁷Ja tzunj ley k'anak, twitz xak e cyja' tz'i'bet. E tkba jley nejl kej xjal min e cynima cykil ley, il ti'j tu'n cycub byet. Jawnexsen jun ley e cyaj tk'o'n Dios. Ju' tzunj tej t-xi' tk'o'n Moisés cye xjal, tzinxsen nkoptz'aj twitz Moisés bix min e bint toc cycye'yen xjal twitzxin, amale cubnenti e cub bajlt nkoptz'aj twitzxin. ⁸Katzen nintzaj ley te ootxa, ¿mimpatzen t'el kniy' ti'j ac'aj ttrat Dios cyi' xjal k'o'n tu'n Espiritu Santo mas jawnex twitzj ley te ootxa? ⁹Katzen jawnex jtrat te ootxa, amale e tyeeec'at min el ba'n ke xjal twitz Dios, mas jawnex j-ac'aj trat te ja'lewe, cuma nbint tu'n tu'n cycyay xjal jiquen twitz Dios. ¹⁰J-ootxa trat yaa'n jawnex twitzj te ja'lewe. Ac'aj trat masxsen jawnex. ¹¹J-ac'aj trat mas jawnex twitzj trat te ootxa, cuma katzen jawnex j-o baj tilel, mas jawnex jmi'n baj tilel.

¹²Ju' tzunj, key hermano, oj nxi' nk'umena tpochal j-ac'aj trat, cyequy c'oquela nkba'na tixix tten, cuma ntzki'na c'ajbel ke te junx maj. ¹³Min txi' nk'umena jun trat pjel tilel tisenj e tk'umen Moisés. Tej t-xi' tk'o'n Moisés tley Dios cye aj Israel, bix oc tk'o'nxin potzbil twitzxin, tu'ntzen mi'n cyil xjal cubne tcub baj jnkoptz'aj twitzxin. ¹⁴Pero ke aj Israel te ootxa min el cyniy' ti'j at tu'n tbaj tilel jtrat te ootxa, tisen e cub baj tkoptz'aj twitz Moisés. Jax ju'x ke aj Israel te ja'lewe, oj nxi' cycye'yen xjal k'anak ttrat Dios te cye, min tz'el cyniy' ti'j min tz'ajbentl. Min tz'el cyniy' ti'j ja tbaj tilel tej tul Cristo. ¹⁵Ja'lewe oj n-oc cybi'n jtrat Dios te ootxa tz'i'ben tu'n Moisés, mlayx tz'el cyniy' ti'j ti japenina. Tisenten tcub jun potzbil tibaj cynaabl. ¹⁶Pero ojten tocslan jun xjal ti' Kaaw, q'ueleltzen potzbil tibaj tnaabl, tu'ntzen tel tniy' ti'j. ¹⁷Jatzen xinj Kaaw nk'onte tu'n kaj tz'oc kbi'n ti taj Dios. Ejee' tzukenje nche'x k'inte ja lu, tzakpi'ntltzenke tjak' trat te ootxa. ¹⁸Bix otktzen tz'el potzbil tibaj knaabl, tu'ntzen tel kniy' ti'j. At koclen tu'n koc twitz Kaaw. Pero min kil twitzxin. Jkocslabl ti'jxin ja'lewe tisen n-ocx kcyeyen tuj jun respej. Pero amale mint kil twitzxin, tu'nj kocslabl ti'jxin, tz'iyen tz'iy knaabl tu'n toc tisenj tbanel tnaablxin, cuma ja tzunxin nk'onte ac'aj knaabl.

4

¹Ju' tzunj, key hermano, tu'n t-xtalbil Dios wibaja, o wiik'a waak'ena te k'umlte tpochal j-ac'aj ttrat Dios, bix ju' tzunj mi'n chin xyut'ena tuj waak'ena. ²Min tzaj nch'ixewa oj nchin k'umena ti'j ac'aj trat, cuma min cub nsbu'na ke xjal, bix min nchin k'umena tyol Dios tu'n tel wii'na cypwak xjal, tisen nbint cyu'n kej xjal nchi yolen nuk ten cyu'n. Twitz Dios bix twitz cykilca xjal nxi' nk'umena nuk alcyej jaxxix, tu'ntzen tchic'ajax jiquenxix kena. ³Yal kej xjal min tz'el cyniy' ti'j nxi' nk'umena, ejee' tzunja nche'x tuj k'ak'. At jun potzbil tcub tibaj cynaabl. ⁴Jaj taaw il ncawen twitz tx'otx' ja'lewe ncub tmošen cynaabl kej xjal yaa'n ocslal, tu'ntzen mi'n tz'el cyniy' ti'j tpochal jxin Cristo jawnex, jxin nyeeec'an ke tii'n Dios, cuma jaxin juniy' tuyu Dios. ⁵Yaa'n wi'ja jnxi' nk'umena, sino ti'j Kaaw Cristo Jesús. Ntiina tzalu nuk tu'n wajbe'na cyey tu'n wajbe'na te Jesús. ⁶Tuj tneel, tej nuk klolj ta' twitz tx'otx', e xi' tkba'n Dios, "Tu'nxit ttxakan spi'yen," tzi Dios. Tisen e cub naj klolj tej tul txakpaj spi'yen jatxe ootxa, ju'xsen q'uelelj klolj twitz knaabl ja'lewe oj ttzaj tonen Dios ejoo' tu'n tel kniy' ti'j. Bix oj tel kniy' ti'j jawnexte Cristo, otktzen tz'el kniy' ti'j jaxse jawnex Kman Dios, cuma ja Cristo yec'bil te ke ti tten Dios. Tu'n tzunja nchin k'umen weya ti' Cristo.

Il ti'j tu'n toc ke kc'u'j ti' Dios

⁷Yal weya, ju' kena nuk tisen jun wicy'il ajnintz bix yaa'n cyiw bix ncub pax. Pero tuj wicy'il at k'inemal, bix ju'xsen weya k'in jun nintzaj wu'na. Jaj tpochalj Cristo. Jwipemal tu'n tbint taak'en Dios yaa'n weya, sino te Dios, tu'ntzen tchic'ajax yaa'n inayena at wipemala tu'n tbint taak'en Dios, sino ja te Dios at nimxsen tipemal tu'n tbint taak'en wu'na. ⁸Jaxte at nim wik q'uixc'aj n-oc weya, pero Dios n-onen wi'ja tu'n mi'n xcye wibaja. Bix ju'x min tz'el nni'ya ti'j tiken nuk tik'ch nbaj wi'ja, pero min nbaj nc'u'ja tuj waak'ena. ⁹Bix ju'x nim nchi oc lpe xjal wi'ja te yasl te weya, pero Dios min o cyaj tcye'yen inayena. Bix ju'x ma chin iy' tz'aka cyu'n k'o'jlel wi'ja, pero lux kena i'tza. ¹⁰Jaca k'ij niy'x q'uixc'aj tu'n nxumlala tuj taak'en Jesús, tu'ntzen toc cycye'yen xjal yaa'n jawnex kena, tu'ntzen yaa'n jweya nbi cjawel cyniman, sino tu'ntzen cyjyon cychunk'lal tzin tk'o'n Jesús. ¹¹Lo'j tzunj i'tzx kena, jaca k'ij at xjal cyaj tu'n ncub byeta tu'nj taak'en Jesús. Niy'x wu'na ju'wa tu'ntzen tcnet cyu'n xjal jychunk'lal tzin tk'o'n Jesús. ¹²Tu'nj o tziy'x q'uixc'aj wu'na ju'wa tuj waak'ena, o cnet cyu'na cychunk'lala te junx maj.

¹³Pero n-oczen ke nc'u'ja ti' Dios. Inayena tisenj xjal e tkba cyjulu tuj tyol Dios jatxe ootxa: "E xi' wocsla'na, bix ju' tzunj e xi' nk'umena jaj tpochal j-e wocslaya,' tzi jun xjal," tzi tyol Dios. Jax ju'x weya o txi' wocsla'na. Ju' tzunj jax nxi' nk'umena jaj e wocslaya. ¹⁴Ntzki'na Dios cjawel itz'jsante ke ocslal tuj cyamecy, cuma ntzki'na o jatz titz'jsa'n Dios ja Kaaw Jesús tuj cyamecy. Cjawel tii'n Dios inayena cyuyey tu'n kpon jaa' ta'xin. ¹⁵Ju'

tzunj cykilca q'uixc'aj n-oc wi'ja tzin npa'na. Bix tzin npa'na te cyey, tu'ntzen at t-xtalbil Dios cyibaja. Ka at nim xjal ccyiik'el t-xtalbil Dios, jax nim xjal cxe'l k'onte chjonte te Dios, tu'ntzen tjaw nimset tbi Dios mas.

¹⁶ O tz'el nni'ya ti'j ko jawel itz'j tuj cyamecy. Ju' tzunj min chin xyut'ena tuj waak'ena. Amale bajnent baj tipen nxumlala tu'nj cykilca n-oc wi'ja, pero jax jaca k'ij ncywix nc'u'ja. ¹⁷ Tej niy'x tu'n nxumlala ja'lewe yaa'n nimxix te ja twitzj ncozta cncamela la' alcyey jun k'ij tu'nj q'uixc'aj niy'x wu'na tuj taak'en Cristo. Jq'uixc'aj niy'x tu'n nxumlala ja'lewe pjel tilel, pero thaneyil j-ac'aj nchunk'lal mintii' thajlel. ¹⁸ Ju' tzunj min tz'oc nk'on wiiba ti'j chic'aj, cuma pjel la' alcyey jun k'ij, sino ju' n-oc nk'on wiiba ti'j mina'x thchic'ajax, cuma ctemel te junx maj.

5

¹ Amale tu'nt taak'en Dios chin cwel byeta, pero min chin xyut'ena ti'j, cuma ktzki'n oj t'bay t'waj kxumlal, kcaman jun ac'aj kxumlal. Cjawel bint, yaa'n cyu'n xjal, sino tu'n Dios, bix c'ajbel te junx maj tuj cya'j. ² Tej ti'j lux ko' eto' tuj kxumlal te ja'lewe, nim q'uixc'aj at ki'j. Ju' tzunj kaj tu'n kocc tuj juntl kxumlal ac'aj tuj cya'j. ³ Jaxxixte ko oquel tuj jun ac'aj kxumlal, tu'ntzen yaa'n x'ibikl kanem. ⁴ Tej ti'j lux kxumlal at ja'lewe, nim q'uixc'aj niy'x tu'n, bix nim bisbajil toc ki'j. Pero amale atet q'uixc'aj, ja te kaj, yaa'n tu'n kcyim, sino tu'n kocc tuj juntl kxumlal ac'aj. Kaj tu'n toc jmi'n baj te t-xel ppjel. ⁵ Ja te Dios o binchante ke tu'n at juntl ac'aj kxumlal, bix o tzaj tk'o'nxin Espiritu Santo tu'n tten kuya, te techel il ti'j chinel tu'nxin tu'n at ac'aj kxumlal te junx maj.

⁶ Ju' tzunj, key hermano, ma cywix nc'u'ja. Ntzki'n na ntiinxu tuya kxumlal te ja'lewe, bix mina'x npona tuya Kaaw. ⁷ Amale mina'xet toc ncyey'ena twitzxin, pero cnla'ya twitzxin tu'nj o tz'oc ke nc'u'ja ti' Dios. ⁸ N-el nni'ya ti'j ti pjel wi'ja, bix nchin ayona tu'n waxa tuj nxumlala at ja'lewe, tu'ntzen npona tuya Kaaw. ⁹ Ju' tzunj waja tu'n wela ba'n tuj twitz Kaaw. Katzenle tu'nj taak'en Kaaw chin cymela, bix ka min, pero c'oquelw wipena ti'j tu'n wela ba'n tuj twitzxin, ¹⁰ cuma cykilca ke oclal ko pomel twitz Cristo la' alcyey jun k'ij, tu'ntzen toc tcyey'enyin cykilcaj e bint ku'n twitz tx'otx'. Ka ba'n e bint ku'n, kcaman jun kcotz ti'j. Pero ka min e bint ba'n ku'n, cxe'l kxoo'n kcotz.

Nkba'n Pablo cye xjal tu'n tbint cyten tuya Dios

¹¹ N-el nni'ya ti'j c'oquel tcyey'enyin Kaaw ti tten in ak'anana tuj taak'enyin. Ju' tzunj nimxix cniimiya, bix ju' tzunj n-oc wipena ti'j tu'n tcub cyi' xjal tu'n cyocslan ti'j Cristo. Ttzki'n Dios nchin k'umena tyol tuj tumelxix, bix nuket ju'x cyey tz'elxit cyni'ya ti'j nchin k'umena tyolxix tuj tumel. ¹² Nxi' nkba'na nchin ak'anana tuj tumel, yaa'n te nimbil wiiba cywitza, sino nxi' nkba'na tu'ntzen ba'n cyyola wi'ja cyey xjal nchi binchan taak'en Dios, yaa'n tu'n cyajix chi ajben te Dios tuya cykil cyanem, sino nuk te ccyey'ybil xjal. ¹³ Yal weya, jnbint wu'na yaa'n tu'n toc cyniman xjal nbi'ya. Ka nchin tx'ujta tuj cywitza, pero nuk tu'n wajbela te Dios. Bix ka nxi' nk'umena tuj ttxolan, tetzen tajbel te cyey. Pero mintii' nbint wu'na tet weya c'abel. ¹⁴ Tu'nj o tbincha Cristo wi'ja, waja tu'n nxi' lpeya ti'j ti tten tu'nxin, bix yaa'n te tajbel weya. N-el kniy' ti'j tu'nj oc k'ak'en tc'u'jxin ki'j, e cyimxin ti' kil. E cyimxin te kxel. Ju' tzunj n-el kniy' ti'j tisen e cyim cykilca ko' tuyaxin. ¹⁵ E cyimtxen Cristo ti' cykilca ko' tu'ntzen mi'n txi' k'jyo'ntl nuk tik'ch te kex, sino tu'ntzen kajben tej xjal e cyim te kxel bix e jatz itz'jxin tuj cyamecy tu'ntzen tzaj tk'o'nxin kchunk'lal te junx maj.

¹⁶ Ya mi'ntl chin jyona jwexa wajbela, sino nuk jaj tajbil Cristo. Ju' tzunj oj toc ncyey'ena cynaabl xjal, ya mi'n chin octla te mlolte cynaabl tisenj tej yaa'n oclal kena. Tej yaa'n oclal kena, tuj nwitzza mintii' tajbel Cristo, pero ja'lewe min cub nbisetla ju'wa. ¹⁷ Ka at tmojbabl tiib jun xjal tuya Cristo, atzen jun ac'aj tnaabl. Ya mintl nxi' lpe ti'j tnaabl te ootxa, cuma ya k'i'ntl jun tnaabl ac'aj tu'n. ¹⁸ Cykilcaj lu jatzen jun t-xtalbil Dios kibaj. Nejl aj k'oj ko' ti' Dios, pero jax Dios e binchante tu'n tcyim Cristo twitz cruz, tu'ntzen thaj tilel kk'oj tuya Dios. Bix o tzaj tk'o'n Dios jwaak'ena te k'umlte cye cykil xjal tu'ntzen twe' jcyk'oj tuya Dios. ¹⁹ Nxi' nk'umena Dios e binchante o tz'oc Cristo tuj castiwa nuk ti' cyil xjal. Nuk tu'nj tcyimlen Cristo ti' cyil xjal o bint tu'n Dios tu'n tel t'zakpi'n ke xjal tuj castiwa. Jwaak'ena o tzaj tk'o'n Dios, jaj tu'n t-xi' nk'umena ja yol lu cye xjal. ²⁰ Ju' tzunj inayena jun t-xel Cristo. Tu'n nyola, Dios ncubsan twitz cye cykil xjal tu'n cyoc tuyaxin. Inayena, t-xel Cristo, nchin kba'na cye xjal: "Tu'nxit twe' cyk'oja tuya Dios," ntzi. ²¹ Kaaw Jesús mintii' texin til. Pero ja Dios aj k'onte cykil kil tibaj Jesús bix o penayinxin te kxel, tu'ntzen jiquen ko' twitz Dios oj at kmojbabl kiib tuya Jesús.

6

¹ Nchin ak'anana tuya Dios te k'umlte t-xtalbil. Ju' tzunj cxe'l ncubsa'n nwitzza cyey tu'n mi'n tz'el cyxoo'na jnxi' nk'umena. ² C'oquel ccyey'ena ti toc tu'n tyol Dios. Tzi Dios te jun

xjal cyjulu: “Tej tpon tumel tu'n t-xi' nk'o'na xtalbil tey, e nbi'ya tyola bix e tzaj wonena. Bix tej tpon tumel tu'n tcleta wu'na, bix e xi' wonena,” tzi Dios. Ja tzunj yol lu nyee'c'an at jun k'ij tu'n kiik'ente jun t-xtalbil Dios, bix nxi' nk'umena cyey jatzen k'ij lu.

³ Tuj taak'en Dios n-oc nc'u'ja ti'j tu'n mi'n bint ka' wu'na, tu'ntzen min-al jun xjal ba'n tjaw yolen wi'ja, tu'n mi'n tz'el t-xoo'n jnxi' nk'umena. ⁴ N-oc wipena ti'j tu'n t-xi' nyee'c'ana jaxxix jun t-ak'anal Dios kena. Ju' tzunj, tuj taak'en Dios niy'x q'uixc'aj wu'na tuya pasensya. At maj nimxsen q'uixc'aj bix bisbajil n-oc weya. ⁵ At maj nxi' tz'u'n wi'ja cyu'n xjal, bix at maj nchin ocxa tuj ztee' nuk ti'j tyol Dios. At maj cyakbajnin ete' xjal wi'ja hasta nchi jaw k'o'jl weya. At maj sicninxsen kena tuj taak'en Dios cuma cyiwxsen nchin ak'anana. Bix at maj n-ex juun ak'bil wu'na mintii' nwatla n-oc, bix at maj ncub npa'na weyaj. ⁶ Bix jax ju'x tu'n jun ba'n nnaabla ncub nyee'c'ana jun t-ak'anal Dios jaxxix kena. Ji'quen jun nnaabla nxi' wi'na, bix n-el nni'ya ti'j alcye jaxxix bix nxi' nnimana. Niy'x wu'na o'j toc cyyajla'n xjal inayena, bix nchin binchana jun ba'n cye cabtl. Nchix lpewa ti' Espiritu Santo, bix at tk'ak'bil nc'u'ja jaxxix ti' cabtl. ⁷ Tu'nj tk'umj jun jaxxix tyol Dios, bix tu'nj tchic'ajax tipemal Dios o'j t-xi' nk'umena tyol, nxi' nyee'c'ana jun jaxxix t-ak'anal Dios kena. Tisen ke soldado nchi k'o'jl tuya macbil te biybil tuj cymank'ab ta', bix cyne'x k'ilte juntl macbil te makbilte tu'n mi'n chi ak', ju'xsen nchin k'o'jla weya tuya ka' tu'nj ba'n nbint wu'na bix tu'nj nkolbil wiiba twitz il. ⁸ O'j t-xi' nk'umena tyol Dios, at xjal tzin cybi'n inayena, pero at juuntl n-el cyiiq'uen inayena. At juun nchi yolen ba'n wi'ja, pero at juuntl nchi yolen ka' wi'ja. Amale tujet tumel nchin yolena, at juun tzin cykba'n x'ak' kena. ⁹ Amale atet juun xjal tzin cykba'n yaa'n jun jaxxix t-xel Cristo kena, pero at nim xjal n-el cyniy' ti'j jaxxix t-xel Cristo kena. At xjal cyaj tu'n ncub byeta, pero lux kena i'tza. Nim o chin i'ya tuj castiwa, pero mina'n cymacan tu'n ncuba. ¹⁰ Tuj cywitz juun xjal, nchin bisena, pero nchin tzalaja. Bix amale tzint cykba'n juun xjal mebe xjal kena, pero nim xtalbil te tyol Dios nxi' nk'o'na cye nim xjal. Bix amale minttii' at wuyena, pero at cykilca k'inemal at wuyena tu'nj mojbabl wiiba tuya Cristo.

¹¹ Key ocslal tuj Corinto, ma txi' nkba'na cyey cykilca niy' tuj nc'u'ja, cuma nim n-oc cyak'a weya. ¹² Jmina'n thint jaj tk'ak'bil cyc'u'ja wi'ja, yaa'n jweya te cyey. ¹³ N-oc cyak'a weya tisen jun mambaj n-oc cyak' tcwal te. Ju' tzunj c'o'quel wak'a cyey tisentzen n-oc cyak' cyman cwal cye.

Tja Dios ko', jaj jun Dios i'tz

¹⁴ Key hermano, mi'n tz'oc cylich'on cyiiba junx maj cyuya kej xjal yaa'n ocslal. Kej xjal ji'quen nbint cyu'n yaa'n junx ta' cynaabl cyuyaj xjal nuk ka' nbint cyu'n, tisen spi'yen yaa'n junx ta' tuya klo'lj. ¹⁵ ¿Ti' tten at tmojbabl tiib Cristo tuya taaw il? ¿Bix ti' tten at tmojbabl tiib jun ocslal ti' Cristo tuya jun xjal min tz'ocslan ti' Cristo? ¹⁶ ¿Bix ti' tten ka ma tz'ocx jun sant tuj tja Dios? Kej nchi niman Dios mlay tu'n at cymojbabl cyiib cyuyaj kej nchi niman sant, cuma najl Dios kxol ejoo' ocslal, jxin Dios i'tz. Jatxe ootxa e tzaj tkba'n Dios cyej e xi' lpe ti'jxin: “Chin najala cyxola bix chin betela cyxola. Chin oquela te Cydios, bix chi oquela te nxjala. ¹⁷ Ju' tzunj q'uelel cypa'n cyiiba cyi' kej xjal yaa'n nxjala, tu'ntzen mi'n chi binchana j-il nbint cyu'n, bix tu'ntzen cyajbena o'cx te weya. Ka chinel cyu'na ju'wa, chi xe'l wocsla'na te nxjala. ¹⁸ Ju'tzen chin oquela te Cymana jaxxix, bix ejee'y chi oquela te ncwala,” tzi Dios, Cawel tibaj cykilca, cye aj Israel jatxe ootxa.

7

¹ Nim o tkba Dios tu'n tk'onte ke. Ju' tzunj cyk'oncja cyka'yela. Key hermano n-oc cyak'a weya, il ti'j cyjel cyk'o'na ti'j cykil ka' taj cychu'la bix mi'n che'x lpey ti'j cynaabla ka'. Ka cyaja tu'n cynimana Dios, cyk'o'nc cyc'u'ja ti'j tu'n cyoca sak.

O tzalaj Pablo cyi'j aj Corinto tej toc ke cyc'u'j ti' Dios

² Key hermano, juntl maj cxe'l ncubsa'na nwitz'a cyey tu'n toc k'ak'en cyc'u'ja wi'ja. Mintii' jun ka' o' tz'oc nbinchana ti' jun xjal, bix min o txi' naabl jun xjal tuj il wu'na, bix min-al jun o cub yaa'na tu'n tel wii'na tpwak, tisen tzin tkba'n juun. ³ Yaa'nja wajbala tu'n cyoc wilena, cuma c'ulel tuj cyc'u'ja ti' e nkbaya cyey nejl. E xi' nk'umena cyey nim n-oc cyak'a weya. Kale ma chin cyima bix kale chin itz'jela, pero we tk'ak'bil nc'u'j cyi'ja mlay we'. Nim n-oc ke nc'u'ja cyi'ja. ⁴ Nim nchin yolena ba'n cyi'ja cywitz xjal. Amale niy'xet q'uixc'aj wu'na, ma jaw nimset nc'u'ja bix ma chin jaw tzalaja tu'nj o nbi'ya cypocbala. ⁵ Tej wula tzalu tuj Macedonia te ebilte cypocbala, nchin ajkelena cyi'ja cuma mintii' cypocbala. Nim q'uixc'aj oc wi'ja. At wajkelbila cyi'ja, bix nim xjal tzalu oc k'o'j wi'ja. ⁶ Pero Dios ncub k'ukbante cyc'u'j j-ocslal nchi bisen. Tu'n tk'ukbante nc'u'ja, jaxin e xi' smante Tito wi'ja. ⁷ Bix in tzalaja, yaa'n nuk tu'nj otk tzul Tito wi'ja, sino ju'x in tzalaja cuma ulxin tuya ba'n cypocbala. Tej tten Tito cyuyey, e cywix tc'u'j cyu'na. E tzaj tkba'nxin weya n-oc ju'ch

cyc'u'ja wi'ja, bix ultl wilela cyey cuma otk chi oc k'ojla wi'ja, bix ya cyajtla tu'n cyonena wi'ja tuya cykil cyc'u'ja. Tej nbintiya cypobala ba'n, nimxsen in jaw tzalaja cyi'ja.

⁸ Amale e bisetkey tej t-xi' nk'o'na ilbil cyey tuj wu'ja nejl, pero tuj nwitz ba'n te cyey. In bisena, cuma tu'nj wu'ja e xi' cyey, e jaw bisenkey. Pero nuk jun rato e bisenkey. ⁹ Amale e bisetkey ti'j wu'ja, pero ja'lewe nchin tzalaja e xi' nsma'na j-u'j cyey, cuma tu'nj cybisa e cyaj cyc'o'na cyila. Tu'nj cybisa min e xi' xitjkey tu'n, sino nuk ajben tu'n tcyaj cyc'o'na cyila tisen taj Dios. ¹⁰ Jkbis ba'n tuj twitz Dios jaj ka ma cyaj cyc'o'n xjal cyil tu'n, tu'ntzen cyclet. Bix ka tu'n cyclet, mlay tzajt cybis ti'j. Pero yal kej xjal te twitz tx'otx' min cyaj cyc'o'n cyil, o'cx tajbel cybis tu'n cyxi' tuj il. ¹¹ Pero cyey, o chi bisena tisen taj Dios. Ju' tzunj tuya cykil cyc'u'ja o cyajbey tu'n cywe'y cyc'ojla wi'ja. E cyajbey tu'n tel nni'ya ti'j min tziy'xtl til j-ocslal aj il cyu'na. Bix tzin cyna'na cych'ixewa ti'j. Bix e tzaj ttzi cyi'ja tu'nj ilbil cyey at tu'n tpon wu'na. Bix cyajtla cyila inayena. Bix cyajtla tu'n ntzalaja cyi'ja, bix o cub cyc'o'na tcastiwa jxjal e binchan jintzaj tka'yel. Ti'j cykilcaj lu o tz'el nni'ya ti'j o cyaj cyc'o'na te junx maj j-il otk tziy'x cyu'na nejl. ¹² E xi' nsma'na jun wu'ja cyey cyiw t-xi'len, pero tziki'n Dios yaa'n nuk tu'n tcub cyc'o'na j-ocslal aj il tuj castiwa, bix yaa'n nuk tu'n tajben tej xjal iiq'uen tu'n til, sino tu'n tel cyni'ya ti'j at jun jaxxix cyanema wi'ja. ¹³ Ju' tzunj ya mi'ntl chin bisena, sino nchin tzalaja.

Pero min chin tzalaja nuk o'cx cuma o tzaj cynimsa'na nc'u'ja, sino jax ju'x nchin tzalaja cuma ntzalaj Tito cyi'ja. Nim otk t'ajkel tc'u'jxin cyi'ja, pero o til mintii' tl cyc'oja wi'ja. ¹⁴ E xi' nkba'na te Tito: "Ctzaal cybi'n aj Corinto nyola," ntziya, bix yaa'n ch'ixbajil weya nyol, cuma jax o tz'e'la nyola. Tisenx e xi' nkba'na cyey nuk o'cx alcyey jaxxix, jaxse ju'x o tz'el jaxxix j-e xi' nkba'na te Tito cyi'ja. ¹⁵ Oj nchi ula tuj tc'u'j Tito, nim ntzalaj Tito cyi'ja, cuma cykilcakey e cybiy tyol bix tuya cykil cyc'u'ja e bint cyu'na na cykilcaj e tkba cyey. ¹⁶ Bix yaltzen weya, nchin tzalaja cyi'ja, cuma n-oc ke nc'u'ja cyi'ja.

8

Tu'n t-xi' kk'o'n jun onbil tuya cykil kc'u'j

¹ Key hermano, ja'lewe waja txi' nkba'na cyey ti nbaj cyxol ocslal tuj cykilca tnom tuj Macedonia. Tu'n t-xtalbil Dios cyibaj, o cycaman pwak te onbil cye mebe ocslal tuj Jerusalén. ² Amale nimet e niy'bet ke ocslal te Macedonia tuj q'uixc'aj, bix amale penat nchi itz'ja tu'n tcyajlal, pero tu'n cytzalajebl e xi' cyc'o'n jun onbil tuya cykil cyc'u'j. ³ Inayena tstiwa e xi' cyc'o'n onbil tuya cykil cyc'u'j, bix e xi' cyc'o'n la' niy' ch'in e cnet cyu'n, bix e xi' ch'intl tibaj. ⁴ Nim e cubsanke cywitz weya tu'n t-xi' nk'o'na xtalbil cye tu'n cyonen cyi' ocslal judío. ⁵ E xi' cyonen kej ocslal tisenj e wajbe'ya, bix e bintl mas jawnextl cyu'n. Yaa'n nuk e tzaj cyc'o'n cypwak, sino e xi' cyc'on cyiib te Kaaw bix mas yaj te weya, tisen taj Kaaw. ⁶ Ojat tbint cyu'na ju'wa. Ju' tzunj o chin cubsan nwitz te Tito tu'n tpon cyxola juntl maj, tu'ntzen tbaj bint taak'en otk tzyet cyxola nejl, jaj tej cyak'a chmolte pwak te cye ocslal mebe tuj Jerusalén. ⁷ Ch'imac'a o bint cyu'na ba'n. Nim n-oc ke cyc'u'ja ti' Dios. Bix ba'n t-xi' cyc'umena tyol Dios. Bix n-el cyni'ya ti'j tyol Dios. Bix nchi ak'anana tuya cykil cyc'u'ja tu'n cyela ba'n tuj nwitz. Bix at cyanema wi'ja. Yal ja'lewe, tisen cykilca o bint cyu'na tuj tumel, jax ju'x cyc'o'nc cyipena ti'j tu'n t-xi' cyonena kej judío mebe. ⁸ Min chi oc nlojo'na ti'j tu'n cychmona pwak. Nuk nxi' nkba'na cyey ke ocslal tzalu tuj Macedonia nim nchi yeec'an lastim cye mebe, tu'ntzen toc ncyeyena ka ju'x cyey ka at lastim cye mebe cyu'na tuya cykil cyc'u'ja. ⁹ Il ti'j cxe'l cyc'o'na cyoybila, cuma cytzki'na xtalbil o cyaj tk'o'n Kaaw Jesucristo cyey. Amale k'inet xsunxin tuj cya'j, pero ocxin te mebe xjal twitz tx'otx' nuk tu'n tyeec'axin tk'ak'bil tc'u'jxin cyey, tu'ntzen tajben tmebeyilxin tu'n cyiik'entey t-xtalbil Dios.

¹⁰ Cxe'l nk'o'na jun consejo te cyey, cuma ja c'abel te onbil te cyey. Ma bint jun jnabk'i e cub cybisena tu'n cychmona jun cyoybila cye mebe judío. Ejee'y tneel ocslal tu'n tcub cybisena ju'wa. Bix yaa'n nuk e cub cybisena, bix ak'key binchalte. ¹¹ Pero ma pon tumel tu'n tjaw baj cychmona jcyoybila. Tuj tneel e cyajbey tu'n tcub cychoo'na tuya cykil cyc'u'ja, pero ma pon tumel tu'n tcub baj cyu'na j-o tz'oc cytx'aakena. Teeylex juun cyey ck'olte la' niy' ch'in ba'n tnet cyu'na. ¹² Ka tuya cykil cyc'u'ja nchi k'ona la' niy' ch'in ba'n t-xi' cyc'o'na, ntzalaj Dios cyi'ja. Ka at juun cyey mlay cnet nim cyu'na, pero cyc'a'x ch'in, ntzalajtzen Dios cyi'j. ¹³ Tzin nkba'na ba'n tu'n t-xi' cyc'o'na cyoybila la' niy' ch'in ncnnet cyu'na, cuma yaa'n ba'n tu'n mintii' tl cyey cyjel oj t-xi' cyc'o'na onbil cye mebe. Nuktzen tzin nkba'na il ti'j ko onel cye mebe. ¹⁴ Pero ntzki'nwe ja'lewe yaa'n mebekey. Ju' tzunj ba'n cyonena cyi'j xjal pena nchi itz'ja. Kape la' alcyey jun k'ij chi oquela te mebe xjal, bix ja tzunkej xjal mebe ja'lewe chi oquel te k'ine, bix ejee'tlzen chi onel cyey tu'n cyi'z'ja. Ju'tzen at kitz'jel te cykilca ko'. ¹⁵ Tzi tyol Dios cyjulu: "Jxjal e jaw tchmo'n nim waabj e cutz tk'o'n

Dios, mintii' ttx'aken e cyaj. Ja tzunj xjal e jaw tii'n nuk ch'in, at twa jaca k'ij tu'n titz'j," tzi tyol Dios cyi'j xjal tuj tzkij tx'otx' tej tcu'tz tuj cya'j jun wik cywa "maná" tbi.

¹⁶ Chjontetzen te Dios jaxin o cux k'onte tuj tanem Tito tu'n at tk'ak'bil tc'u'jxin cyi'ja, tisexj weya. ¹⁷ E tbixin nyola tej t-xi' nkanena texin tu'n tponxin cyxola, pero cpomelxin yaa'n nuk tu'nj e xi' nk'umena, sino cuma tajx texxin ponxin. ¹⁸ Attzen juntl ocslal cxe'l nsma'na junx tuya Tito tu'n cypon cyuyey. Cykilca ocslal cyuj cykilca tja Dios tzalu cytzki'n ba'n tnaablxin, cuma tuya cykil tc'u'jxin o tz'oc tk'on tiibxin tuj taak'en Dios. ¹⁹ Bix yaa'n nuk o'cx n-oc ke cye'c'u'j ocslal cyuj cykilca tja Dios ti'j tnaablxin, sino jax ju'x o jyet-xin cyu'n ocslal tu'n t-xi'xin wuyena oj nxi'ya Jerusalén te k'olte onbil cye mebe. Tu'nj onbil lu cynimet tbi Dios, bix chic'ajaxet waja tu'n t-xi' wonena ke mebe ocslal tuj Jerusalén. ²⁰ Cxe'l tzunj ocslal lu wuyena, tu'ntzen min-al cjawel w'ja ka min e xi' nk'o'na j-onbil cye mebe tuj tumel. ²¹ Tuya cykil nc'u'ja waja tu'n wak'anana tuj tumel, tu'ntzen wela ba'n twitz Kaaw, pero yaa'n nuk twitz Kaaw, sino tuyax cywitz xjal.

²² Bix at-x juntl ocslal cxe'l nsma'na cyey junx cyuya Tito. Bix ch'impaxe maj txi' nk'o'na taak'en, bix e bint tu'n tuya cykil tnaabl. Nim taj tzaj tonen ejee'y ti' tchmoj cyoybila, cuma nim n-oc ke tc'u'jxin cyi'ja.

²³ Yaltzen te Tito, jaxin jun ak'anal wuyena bix jaxin npon te nxela cyxola. Ja tzunj ca'batl ocslal, ejee'ja nchi pon te cyxel cyxol ocslal tzalu, bix ba'nkexin tuj twitz Cristo. ²⁴ Ju' tzunj cyyeec'ax cyej oxe ocslal bix cyej cykil ocslal tzalu, at tk'ak'bil cye'c'u'ja cyi'j ocslal mebe, bix cyyeec'ax nyola jaxxix ti'j oj tzin nkba'na tu'n tcub baj cyoybila cyu'na.

9

¹ Pero kape mintii' il ti'j tu'n t-xi' ntx'i'bena cyey ti tten tu'n t-xi' cyonena ke ocslal mebe, ² cuma ntzki'na tuya cykil cye'c'u'ja cyaja tu'n cyonena. Nxi' nkba'na cye ocslal tzalu tuj Macedonia ma bint jun jnabk'i ke cyey ejee'y ocslal tuj tcwentel te Acaya ak'key tu'n t-xi' cyonena ke ocslal mebe tuj Jerusalén, bix tej toc cybi'n ke ocslal tzalu ti e cub cynic'u'na, jax ju'x tzalu nim ocslal e cyajbe tu'n cyonen. ³ Pero amale ot txi' nk'umena tzalu ka cyaja chi onena, cxe'ltzen nchk'o'na Tito cyuyey tuya tzunj ca'batl ocslal, tu'ntzen t-xi' cyonen tu'n t'btint cyu'na, tu'ntzen tel nyola jax cywitz xjal tzalu cyi'ja. E xi' nkba'na cye ocslal tzalu: "Ntzk'i'n tla chinel cye ocslal aj Corinto cyu'n tu'n ttzket cyonbil," ntziya. Ju' tzunj ejee' tzunj oxe ocslal lu chi pon te nimsalte cye'c'u'ja tu'n tchmet cyonbila, tu'ntzen tel nyola jax cyi'ja, ⁴ tu'ntzen mintii' ch'ixbajil cyxola. La'alcye jun k'ij chin pomela cyxola, bix kape tuya cab ocslal te tzalu tuj Macedonia cxe'l wuyena. Ojtzen kpona, bix kla' tzuna ka cye'c'u'j chi onena, nimitzele nch'ixewa ti'j, bix cyuyaxa attzele cych'ixewa ti'j, cuma cchic'ajaxel amale ba'nt nyola cyi'ja nejl, pero min ma tz'etl jax. ⁵ Ju' tzunj ma txi' nkanena j-oxe ocslal tu'n cypon nejl cyxola ntwitza. Ejee'tzen chi pon te nimsal cye'c'u'ja tu'n tcub cyk'o'na jcyonbila nim o cyk'umey, tu'ntzen otk cub baj cyu'na oj npona. Waja tu'n tcub cyk'o'na tuya cykil cye'c'u'ja, yaa'n tuya xpi'xen.

⁶ Key hermano, cxe'l nk'o'na tumel cyey ti'j ti tten tu'n tcub cyk'o'na. Jxjal yaa'n nim tawal, jax yaa'n nim tja'tx'en cjawel. Jxjal nim tawal, jax nim tja'tx'en cjawel. ⁷ Teeylex juun xjal cwel t'bsen jte' tk'a' te cyonbil, bix oj tk'onte, yaa'n tuya bisbajil ti'j bix yaa'n lojo'n ti'j tu'n tcub tk'o'n, sino tuyaxix cykil tc'u'j, cuma ntzalajtzen Dios ti'j jun xjal oj t-xi' tk'o'n tuya cykil tc'u'j. ⁸ At tipemal Kman Dios tu'n tk'onte cykilcaj il ti'j te cyey tu'ntzen cyitz'ja, bix tuyax tu'n cyonena cyi'ke cyuyey mebe. ⁹ Tzi tuj tyol Dios cyjulu: "Jxjal n-onen tuya nim cye mebe, ju'x cxe'l tuya tonbil," tzi tyol Dios. ¹⁰ Dios ntzaj k'onte iyaj tej xjal awaal tu'ntzen tawan, bix mas yaj ntzaj tk'o'nxin jk'atx'en tu'ntzen at twa. Ju'tzen tten oj cyonena cye mebe. Tisen ntzaj tk'o'n Dios iyaj tej xjal awaal tu'n tawan, ju'xse ntzaj tk'o'n Dios cyey tu'n cyonena cye mebe. Katzen nchi k'ona onbil cye mebe, tisentzen chi awana. Bix tixesxen ntzaj tk'o'n Dios jk'atx'en, ju'xsen ntzajtzen tk'o'nxin cyey tu'n cyonena mastl. ¹¹ Ka nchi oney cye mebe, ctzaal tk'o'n Dios mastl cyey, tu'ntzen t-xi' cyonena tuya mastl kej xjal pena nchi itz'ja. Bix oj t-xi' nk'o'na cyonbila cyej ocslal tuj Jerusalén pena nchi itz'ja, jax cxe'l cyk'o'n chjonte te Dios ti'j. ¹² Oj t-xi' cyonena ke mebe ocslal, nxi' cyonena yaa'n nuk tu'n cyitz'j, sino jax ju'x cxe'l cyk'o'n chjonte te Dios. ¹³ Bix cxe'l cyk'o'n chjonte te Dios, yaa'n o'cx tu'nj xi onena cyi'j bix cyi'j cabtl mebe, sino tuyaxsen tzin cyyeec'ana k'i'n tyol Cristo cyu'na, yaa'ntzen nuk tzin cykba'na. ¹⁴ Bix cxe'l cyk'o'n chjonte te Dios cyi'ja, bix c'oquel cyak'a cye, cuma tu'nj t-xalbil Dios cyey o txi' cyk'o'na cye tuya cykil cye'c'u'ja. ¹⁵ Chjonte te Dios jun nimxsen t-xalbil cyibaja.

10

¹ Ja'lewe inayena, Pablo, cxe'l ncubsa'na nwitzza cyey tu'n t-xi' cynimana nyola, bix mi'n tz'oc cybi'na cyyol ke x'tak' t-ak'anal Dios. Cxe'l ncubsa'na nwitzza cyey tuya jun nnaabla maans, tisenx te Cristo maansxin. Tzin cykba'n jx'tak' t-ak'anal Dios oj nchin tena cyxola at cytziy wi'ja tu'n t-xi' nkba'na cyey o chi binchana il, bix tzin cykba'n nuk o'cx oj nchin tena nakch cyi'ja nxi' nk'o'na nyola tuya ilbil cyi'ja. ² Chin cubsal nwitzza cyey tu'n t-xi' cynimana nyola bix tu'n tel cyxoo'n tel cyxoo'na cyyol ke x'tak', tu'ntzen mintii' il ti'j tu'n cyoc wilena oj npona cyxola, cuma jax wu'na at wipemala tu'n cyoc wilena. Tzin cykba'n ke'j x'tak' nchin ak'anana tuj taak'en Dios nuk tuya tnaabl te twitz tx'otx', tziike. ³ Jax cyu'n nuk jun xjal kena, pero min chin k'ojla cyi'j xjal nchi k'ojl ti' Dios tuya wexa wilbela ti'j, tisen nbint cyu'n xjal te twitz tx'otx'. ⁴ Mlay chin xcyeya cyi'ke aj k'oj ti' Dios tu'n wexa wipemala, pero tuya tipemal Dios k'o'n weya nchin xcyeya cyi'j, amale nimet cyipemal at. ⁵ Nchin k'ojla ti' cynaabl jxjal jawnex cynaabl tuj cywitz bix nchi iy' tibaj tyol Dios. N-oc wipena ti' ka' cynaabl xjal, tu'ntzen taajtz ti' cynaabl, tu'ntzen cyoc tjak' t'cawbil Cristo. ⁶ Bix ojzten tel cyxoo'na cyyol ke x'tak' t-ak'anal Dios min cybi nyola, tisen e xi' nkba'na cyey tu'n tel cyxoo'na, inayen tzuna chin k'olte cycastleiwa ke'j ocslal min e cybi.

⁷ Co'quell cyc'u'ja ti'j tii'n cynaabl ke'j x'tak' t-ak'anal Dios. Tuj cywitz jawnexke tuj taak'en Cristo, pero nuket tz'el cyniy' ti'j yaa'n ajnintz kena cywitz tuj taak'en Cristo. ⁸ Bix yaa'n nuk o'cx nchin ak'anana tuj taak'en Cristo, sino tuyax at woclena tu'n ncawena cyibaja, yaa'n tu'n cyxi'y tuj il, sino tu'n wonena cyi'ja tu'n ccywixax tuj cyocslabla. Kane cxe'l nk'umena cyey o tak' Kaaw woclena cyibaja, mintii'tzele nch'ixewa ti'j, cuma yaa'ntetle x'tak'bil nyola. ⁹ At juun tzin cykba'n ka nuk tu'n wu'ja nchin ila cyi'ja tu'n ttzaj ttzi cyi'ja. Pero mi'ntzen tziy' tuj cyc'u'ja nxi' nkba'na at woclena cyibaja nuk o'cx ka nakch ntiina cyi'ja. ¹⁰ Ke'j x'tak' t-ak'anal Dios cyxola tzin cykba'n cyjulu: "Oj ntzaj tsm'a'n Pablo u'j keya, cyiwixsen tyol bix nimxse tipemal. Pero oj n-ulxin kxol, mintii'xix tzin tyeeec'anxin ka at nim tipemalxin, bix min tz'ajben tyolxin," tziike ju'wa. ¹¹ Pero il ti'j q'uelel cyni'ya ti'j oj npona cyxola, tuya nim wipemala ba'n nyolena cyi'ja, tisenx' tuya nim wipemala nxi' nzt'i'bena cyey.

¹² Weya ncy'iya bint jaj tisenj nbint cyu'nj x'tak' t-ak'anal Dios. Tzin cykba'n ka eeje' mas jawnex ak'anal te Cristo, bix nchi mlon nuk cyex cynaabl, bix ba'n n-e'la tuj cywitz. Tzin cykba'n jcyey cynaabl mas jawnex twitz cynaabl juntl wik. Pero oj nchi oc ten mlol cynaabl ju'wa, telniy'tzen ka min tz'el cyniy' ti'j. ¹³ Yaltzen weya, min njaw nniman wiiba tu'n wexa nnaabla tisenj cye nbint cyu'n. Chin yolelwa nuk ti'j ak'untl o tzaj tk'o'n Dios weya tu'n tbint wu'na. Yal tzunj waak'ena o tzaj tk'o'n Dios weya, tuyaxa tu'n wak'anana cyxola tuj Corinto. ¹⁴ Mlay chin i'ya tibaj ak'untl o tzaj tk'o'n Dios weya. Nuket min e tzaj tk'o'n Dios weya tu'n wak'anana cyxola, mintzeletii' woclena ti'j tu'n npona te ak'anal cyxola. Inayena tneel t-ak'anal Dios tu'n npona maa Corinto te kbalte tpochal Cristo cyey. ¹⁵ Min in ocxa tuj tak'mal juntl t-ak'anal Dios. Ncy'iwa tu'n npon ak'anal jaa' ete'tl t-ak'anal Dios, sino nuk o'cx nchin ayona tu'n ccywixax tuj cyocslabla, tu'ntzen ntzakpeta cyxola tu'n nxi'ya cyuj jun wikxilt lugar o tak' Dios weya ¹⁶ te kbalte jba'n tpochal Jesús cyuj juntl tnom jaa' min-al jun xjal o k'umen tpochalxin. Ka nchin ak'anana jaa' min-ala t-ak'anal Dios, mintzen o chin ocxa tuj tak'mal juntl tu'n tel wii'na toclen. ¹⁷ Cyk'o'nc cyc'u'ja ti'j ti' toc tu'n tyol Dios cyi'j xjal n-oc cyniman cyiib: "Jun xjal mintii' tu'n tjaw tniimsan tiib, sino o'cx kyo' oj tkbante Kaaw ka ba'n ma bint ku'n," tzi tyol Dios. ¹⁸ Ba'nte jun xjal, yaa'n tu'nj jax nkbante, sino ka ba'n tuj twitz Kaaw.

11

¹ Key ocslal, waja tziy'xxit ch'in cyu'na wi'ja, cuma cjawel nnimsa'na ch'in nbi'ya. Ka at jun xjal nbint tu'n ju'wa, jatzén jun xjalja nuk ntx'ujt, pero ntzki'na q'uiyax ch'in cyu'na wi'ja. ² Tisen jun mambaj cxe'l tc'ojla'n tmeel tu'n mi'n cub tz'ak' naj tuj il te mitkna'x tmaje, ju' tzunj weya. Waja tz'oc nc'u'ja cyi'ja tu'n cyela sak twitz Cristo, cuma o tak' Dios weya tu'n toc cyak'a weya. ³ Pero najkelen nc'u'ja cyi'ja cyu'nj x'tak' t-ak'anal Dios o chi pon cyxola te sbulte cyey. C'ulel tuj cyc'u'ja tu'n t'xtak'bil lbaj e cub ti' Eva tu'n tel t-xoo'n tyol Dios. Tuj nwitzza kape cyuyaxloy nchi cub sbu'n, tu'n mi'ntl che'x lpey ti' Cristo tuya cykil cyc'u'ja bix tuya jun sakkix cyanema. ⁴ Nipax nc'u'ja cyi'ja. Ke'j x'tak' xnak'tzal nchi pon cyxola, tec'axtl cyyol ti'j Jesús twitzj weya nyol, bix jac'a tej n-ocltzen cybi'na mas cyyol twitzj weya nyol. Bix n-oc cybi'na ke'j xjal jun wikxilt cynaabl twitzj t-xnak'tzibil Espiritu Santo e cyaj nk'o'na cyuyey. Bix n-oc cybi'na jun wikxilt xnak'tzibil twitzj ba'n tpochal colbil ke e xi' nkba'na cyey nejl. ⁵ Jaj weya nyol c'o'quellxix cybi'na, cuma tuj nwitzza yaa'n cubnin kena cywitz ke'j tzin cykba'n jawnex t-xel Jesúske. ⁶ Kape jax min txi' nk'umena tuya jun jawnex yol, pero o k'oj te weya tu'n tel nni'ya ti'j nim, bix nim maj o txi' nyeeec'ana jlu te cyey.

⁷ ¿Tu'n tikentzen mintii' ba'n wajbe'neya cyey ja'lewe? ¿Ka'pa tuj cywitzza cubninxse in temana cyxola tu'nj wak'anana tuya nk'aba tu'n witz'ja, tu'ntzen cyxi' wonena ti'j jun

cychunk'lala mas ba'n? ⁸¿Chin elepa cyiiq'uena tu'n min e nkaniya twi' nc'u'ja cyey tej t-xi' nkba'na tyol Dios cyey? ⁹¿Ka'pa tuj cywitza e wiik'a ch'in onbil weya cyu'n cabtl oclsal te nakch tuj cabtl tnom, amale mint in ak'anana te cye, nuk tu'n ntena te kbalte tyol Dios te cyey? ⁹ Tej ntena cyxola, cyiw ch'in tu'n witz'ja, pero mintii' onbil weya oc nkanena te mi jun cyey. Tej cypon ke oclsal te Macedonia te cyey'lte weya tej ntena cyxola tuj Corinto, e cyaj cyk'o'n nim onbil weya tu'n witz'ja, tu'ntzen mintii' il ti'j tu'n t-xi' nk'o'na jun iktz cyibaja tu'n woc cyc'a'china. Bix mintii' cnkaniya. ¹⁰ Ttzki'n Cristo jax wu'na mi'n chin kaniya cyey chojbil weya. Tuj cykilca tcwentel Acaya min-al jun cyey ba'n tjaw tnic'an wi'ja ka nchin kanena pwak. ¹¹ Pero ojtzen ncy'ia wiik'a cypwaka, ¿tzimpa nyee'c'ana ka min tz'oc cyak'a weya? ¡Min! Ttzki'n Dios n-oc cyak'a weya.

¹² Pero il ti'j tu'n mi'n wiik'a cypwaka, tu'ntzen cywe' jxtak' xnak'tzal cyyolen ka nchi ak'anana tuj taak'en Dios tisenj weya. Cyaj tu'n wiik'enteya twi' nc'u'ja, tu'ntzen cyel junx tuj taak'en Dios wuyena tuj cywitz xjal. ¹³ Nxi' cykba'n eeje' t-xel Cristo tisen inayena, pero nuk ten cyu'n. Oj nxi' cykba'n sma'nke tu'n Cristo, ncubtzen cyaa'n eeje'y. ¹⁴ Mi'n chi jaw klee'y ti'j yaal xjalke, cuma jax ju'x taaw il n-oc tisen jun t-ángel Dios tuj cyaj' te sbulte cye xjal. ¹⁵ Ka taaw il, ja Satanás, nsbun xjal tuya cyeca tyol, jax ju'x pjel cyey kej nche'x lpe ti'j taaw il. Chi chic'ajaxel tisenj jaxxix t-ak'anal Dios, pero ccyyik'el cycastiwa, la' niy' ch'in ka' ok bint cyu'n.

Nim q'uixc'aj iy'x tu'n Pablo nuk tu'nj t-xel Jesús

¹⁶ Key hermano, cxe'l ncubsa'n nwitz cyey juntl maj. Mi'n cub cybisena wi'ja inayena jun xjal min tz'el nni'ya ti'j, amale njawet nnimsan wiiba cywitza. Pero katzen tuj cywitza nuk nchin tx'ujta, cyk'o'nctzen cyc'u'ja ti' nyola, tisen o tz'oc cybi'na cyool kej xtak' t-ak'anal Dios nuk nchi tx'ujt. ¹⁷ Yaa'n njaw tniman te Kaaw tiib tisen jun xjal nuk ntx'ujt. Pero yal weya, cxe'l nkba'na cyey cykilcaj ba'n o bint wu'na, tisen jun xjal nuk ntx'ujt. ¹⁸ Kej xtak' ak'anala ti' tyol Dios njaw cyocsabla cyiib tisen nbint cyu'n xjal te twitz tx'otx'. Ju' tzu'nj jaxse ju'x weya cxe'l nkba'na ka jun jawnex xjal kena, tu'ntzen jax ju'x chin oquel cybi'na. ¹⁹ N-e'la tuj cywitza nim ba'n cyu'na, pero tuya cykil cyc'u'ja n-oc cybi'na cyool kej xjal nuk nchi tx'ujt. ²⁰ Cyey o cyiik'a kej xtak' t-ak'anal Dios, kej cyaj chi cawel cyibaja, bix n-el cyii'n cypwaka, bix tu'n xtak'bil cyool nbint cyu'n tu'n chebe chebe tu'n cyajbe'na te cye, bix tzin cykba'n mintii' cyajbela cywitz, bix n-oc cylok'an yol cywitza. ²¹ Katzen il ti'j tu'n jun t-xel Jesús tu'n thint ju'wa tu'n t-xi' tyee'c'an at nim tipemal, attzele nch'ixewa ti'j, cuma min o bint wu'na ju'wa.

Pero amale mint o bint cykilj lu wu'na, pero jaxsele cjawel wii'n ch'in wiiba, cuma amatzele cykba'te eeje' jawnex, pero inayena yaa'n jun t-ak'anal Dios mas cubnin kena cywitz.

²² Nbjay cyniman cyiibxin cuma aj hebreokexin. Jax ju'x weya aj hebreo kena. Bix nbaj cyniman cyiibxin cuma tiy'jil Israelkexin. Jax ju'x weya tiy'jil Israel kena. Bix tzin cykba'nxin tiy'jil Abrahamkexin. Jax ju'x weya tiy'jil Abraham kena. ²³ Tzin cykba'nxin nchi ajbenxin te Cristo, pero weya mas nchin ajbena te Cristo. Amale tx'u'j xjalet kena tuj cywitza, pero cjawelx wiin wiiba mas. O chin ak'anana bix o tziy'x q'uixc'aj wu'na tuj taak'en Cristo mas twitz cyexin. Mas o chin oca tuj tze'e' nuk ti' tyol Dios. May bint tajlajjete' maj o chin pjeta cyu'n xjal. Bix nim maj o tz'el wi'ja tu'n ncyima. ²⁴ Jwe' maj e xi' tz'u'n wi'ja cyu'n judío. Winaklaaj tuya beljaj tz'u'n e xi' wi'ja jaca maj. ²⁵ Bix oxo maj in pjeta tuya tze'e' cyu'n xjal te Roma. Bix jun maj o tzitj ke xjal te xol xak wi'ja tu'n ncuba. Tuj taak'en Cristo oxo maj in xi' ya tuj a' tej tcub xitj harc tuj mar, bix at jun maj in cyaja jun k'ij tuya jun ak'bil tuj a'. Twitz tzlom in beteya tu'n njawela ttzii' a'. ²⁶ Bix tej wi'ya cyuj tnom te kbalte tpocbal Jesús, at jaa' in i'ya cyuj nima' xobajilxsen tu'n wi'ya cyuj. Bix ch'ima maj el wi'ja cyu'n alak' tuj be. Bix tuj cykilca tnom in yasja cyu'n xjal judío, bix ju'x cyu'n ke xjal yaa'n judío. Nim o k'ojl ke xjal wi'ja cyuj tnom, bix ju'x tiy' tuj c'ul bix tuj mar oc q'uixc'aj weya. Bix at maj eeje' oclsal yaa'n jaxxix n-el cyii'n tipemal waak'ena. ²⁷ Nimxsen in sicta tuj taak'en Dios. At maj min in wutana. At maj in cyima tu'n weyaj bix tu'n tak' a' wi'ja, cuma mintii' nwaya e cnet bix mintii' a'. At maj at tak' che'w wi'ja, bix yaa'n nimxix nxbalena k'i'n wu'na. ²⁸ Bix yaa'n nuk o'cx iy'x q'uixc'aj tu'n n'xumlaala. Jax ju'x tu'n tk'ak'bil nc'u'ja nipax wanema jaca k'ij cyi' oclsal tuj cykilca tnom. ²⁹ Ka at juun oclsal yaa'n cyiw ete' tuj cyocslabl, bi'x nchin bisena ti'j. Bix ka at jun oclsal ma cub tz'ak tuj il tu'n t-xmoxbil juntl oclsal, tzultzen nk'o'ja ti'j.

³⁰ Key hermano, at il ti'j tu'n tjaw nnimsan ch'in wiiba. Pero nuk nchin yolena ti'j tik'ch q'uixc'aj o tziy'x wu'na tuj taak'en Dios, tu'n tchic'ajax yaa'n jawnex kena. ³¹ Kman Dios, Tman Kaaw Jesús, niman tbixin ku'n te junx maj, ttzki'nxin alcyey tzin nkba'na ti'j o baj wi'ja yaa'n nxtak'bila. ³² Bix jax ju'x ttzki'n Dios ti' jun ch'ixbajil e baj weya tuj tnom te Damasco. Tej ntena tuj Damasco, at junxin gobernador otk tz'ocx tk'o'n jxin rey Aretas.

Tcy'ixin tu'n wak'anana tuj taak'en Dios. Ju' tzunj ja tzunj xin gobernador e cub k'onte soldado tuj cykilca ttzii' tapya toc ti' tnom te xmuklte weya, tu'ntzen ntzyeta cyu'nxin tej wetza tuj Damasco. ³³ Tu'ntzen wetza tuj tnom, tuj ewjel in ex k'o'na cyu'n wuyena tuj jun ventan te tapya nakchxsen tjawen, bixsen e cu'x cyxtunen inayena ti'jxe tapya tuj jun chi'l, bix ju'tzen in e'leya libre tuj tk'ab gobernador.

12

Jaj o tzaj tyeec'an Dios te Pablo

¹ Amale yaa'nt tumel te nimsaljaw nbi'ya, pero cjawel wiin wiiba ch'intl mas, tu'n t-xi' nyeeec'ana jun jaxxix t-ak'anal Cristo kena. Ju' tzunj, cxe'l nkba'na cyey ti'j e tzaj tyeec'an Dios weya bix j-e tzaj tkba'n Dios weya. ² Ntzki'na jun ocslal ti' Cristo. Aj tii'n Dios jaxin tuj toxen cya'j jun rato maa jaa' ta' Dios. Ma bint cyajlaaj jnabk'i tbaflen jlu. Mintij' tumel wuyena ka tuyax t-xumlalxin e jax tii'n Dios tuj cya'j bix ka e cyaj t-xumlalxin twitz tx'otx'. Nuk ja Dios itzki'lte. ³ Pero jax wu'na, kale tuyax t-xumlalxin, bix kale yaa'n tuyax, ⁴ pero e jax tii'n Dios jaxin tuj cya'j. Jatztzen oca tbi'nxin jwol jawnexsen nunca tz'el cyniy' xjal te twitz tx'otx' ti'j, bix min e k'oj texin tu'n tcub tenxin tx'olbalte ti otk tz'oc tbi'nxin tuj cya'j. ⁵ Ti'j tzunj nintzaj xtalbil lu e tzaj tk'o'n Dios tej ocslal lu, nchin tzalaja ti'j. Pero te weya, yaa'n te nnimbil wiiba, sino nuk jaj ti'j q'uixc'aj o tziy'x wu'na cxe'l ntx'olba'na, tu'ntzen tel cyni'ya ti'j yaa'n jawnex kena. ⁶ Nuket waja tu'n t-xi' nk'umena inayen tzuna in x-aja tuj cya'j, jac'a baj nk'umena, cuma jaxte in x-aja. Pero mi'n txi' nkba'na mas ti tten, cuma ncy'iya tu'n toc cynimana inayena nuk tu'nj nx-ajlena tuj cya'j jun maj. Waja tz'oc cynimana inayena nuk tu'nj ba'n nnaabla nxi' nyeeec'ana cyxola bix tu'nj nyola o tz'oc cybi'na.

⁷ Tu'nj tik'ch e tzaj tyeec'an Dios weya tuj cya'j, kape njaw nnimsan wiiba ti'j. Ju' tzunj jun nimxsen pena oc weya, tisen jun ch'i'x n-oc xuy'j tuj nchu'la, tu'ntzen taajt'z ti' nnaabla. Jpena niy'x wu'na tisen jun tsanjel taaw il toc yajlal te weya. ⁸ Oxe maj e xi' ncubsa'na nwitzta te Kaaw tu'n tel tii'nxin jpena oc wi'ja. ⁹ Pero min e tcuyaxin, sino e tzaj tkba'nxin weya: "Cxe'l nk'o'na wipemala tey te onl tey. Ka yaa'n jawnexa, mas cchic'ajaxel weya wipemal oj woniya ti'ja," tzi Kaaw weya. Ju' tzunj mas nchin tzalaja ti'j yaa'n jawnex kena, twitzj nbaj nniman wiiba ti'j oc ncyey'ena tuj cya'j, cuma ka yaa'n jawnex kena, mas nchic'ajax tipemal Cristo weya oj bint taak'en Dios wu'na. ¹⁰ Ju' tzunj ba'n tuj nwitzta yaa'n jawnex xjal kena. Nchin tzalaja oj nchi jaw cyakbitl xjal wi'ja tu'nj nchin ak'anana tuj taak'en Cristo. Bix nchin tzalaja oj at pena wi'ja, bix oj nchi jaw ilen xjal wi'ja, bix oj nim ka' toc wi'ja, cuma oj tchic'ajax yaa'n jawnex kena, q'uelelzen cyniy' xjal ti'j nuk tu'nj tipemalxin nbint taak'enxin wu'na.

¹¹ Key hermano, junxsen nch'ixewa xjaw nnimsan wiiba, pero nuket e yolenkey ba'n wi'ja cywitz kej xtak' xnak'tzal, mintetletii' il ti'j tu'n tjaw nnimsan wiiba. Amale jawnexit t-ak'anal Cristo ejee' tuj cywitz, pero yaa'n mas ajnintz kena cywitz, amale yaa'nt jawnex kena. ¹² Tej ntena cyxola, tu'nj jawnex ak'untl e bint wu'na, bix tu'nj jawnex techlal e bint wu'na, e xi' nyeeec'ana cyey jun jaxxix t-xel Jesús kena, bix e bint tuya nim iy'x wu'na. ¹³ O txi' nyeeec'ana tuj cykilca tnom t-xel Cristo kena. O'cx min e bint wu'na cyxola min e nkaniya twi' nc'u'ja cyey. Ju' tzunj, ztzimpa cykba'na yaa'n il cyi'ja wu'na cywitzj ocslal cyuj juntl tnom? Katzen tuj cywitzta yaa'n il cyi'ja wu'na, cynajsam ch'in wi'ja min e nkaniya twi' nc'u'ja cyey.

Tej t-xi' tile Pablo ke ocslal tuj tnom Corinto

¹⁴ Key hermano, ca'ba maj o chin pona cyxola, bix waja tu'n npona te toxen maj. Bix oj npona, mi'n chin kanewa pwak cyey. Yaa'n cypwaka tzin njo'na. Nuk jun ba'n te cyey waja. Yaa'n tumel oj cyc'ojlan nee' ti' cyman, sino ejee' cyman nee' chi c'ojlalcyey nee'. Tujtzen tyol Dios inayena tisen cymana. ¹⁵ Ju' tzunj nimxsen nchin ak'anana nuk tu'n jun ba'n te cyey. Nimxsen n-oc cyak'a weya. Yajtzen cyey, ztikentzen nuk ch'in wak'a n-oc cyey?

¹⁶ Amale mint e xi' nkanena pwak cyey, pero at juun cyxola tzin cykba'n tu'n xtz'imj yol o tz'el wii'na cypwaka, cuma n-el nni'ya ti'j ti tten tu'n tcub yaa'na ke xjal, tzike. ¹⁷ Pero cxe'l nkanena cyey, zti tten tej cyub yaa'nkey tu'n tel wii'na cypwaka? Kej e xi' nsma'na cyuyey nejl, ztzimpa cub cybisena e cykanen cyonbila otk chmet te cye mebe tu'n ttzaj te weya? ¹⁸ Tej t-xi' nsma'na Tito tuya juntl tuyaxin cyxola nejl te cyiwsalte cyc'u'ja tu'n tchmet cypwaka te cye mebe, zelpa tii'n Tito cypwaka tu'n ttzaj tk'o'n weya? jMin! Ejee'xa itzki'lte e xi' texin tuya jun tnaablxin ba'nxin cyxola, tisenxj weya, bix junelne ta' kyola cyuyaxin.

¹⁹ Key hermano n-oc cyak'a weya, oj t-xi' ccyey'ena wu'ja, kape tuj cywitzta nchin clon wiiba cywitzta tu'ntzen wela ba'n tuj cywitzta. Pero yaa'n ju'wa. Ttzki'n Dios inayena, jun ocslal ti' Cristo, ma chin yolena yaa'n tu'n wela ba'n tuj cywitzta, sino tu'ntzen ccyuwixa tuj

cyocslabla. ²⁰ Ma txi' nkba'na cykilcaj lu cyey, cuma najkel nc'u'ja cyi'ja. Kape oj npona cyxola, mintzen otk cyaj cyk'o'na cyila, bix ju' tzunj iltzen ti'j chi oquel wilena, amale cyajata tu'n nyolena cyuyey tujxix ttzyal. Oj npona, kape at k'oj cyxola. Kape min tz'oc cyc'u'ja ti' cyk'o'ja, bix kape nchi'lec cyc'u'ja ti' juntl, bix kape nbaj cypa'n cyiiba, bix kape at xtak' cyxola, bix kape nchi yolena ka' ti' juntl, bix kape nchi jaw tz'uya, bix kape yaa'n tuj tumel ete'y. ²¹ Najkel nc'u'ja, cuma kape oj npona cyxola juntl maj, at nch'ixewa twitz Dios tu'nj ka' nbint cyu'na. Kape at tu'n wook'a cyi'j ocslal mina'n tcyaj cyk'o'n pajbaj bix yaa'n ba'n bix il.

13

¹ Ojzen npona cyxola, te toxen maj te cyey'lte cyey. Tzin tkba'n tyol Dios: "Oj ncub tk'o'n cawel jun xjal tuj castiwa, il ti'j at ca'ba oxo tstiwa ti' tl xjal," tzi tyol Dios. Ju'xsen weya. Kej oxo maj nkena cyxola chi ajbel tisen oxo tstiwa cyi'ja. ² Tejtzen nx-aja cyxola tca'b maj, e xi' nkba'na cyey, "Ojzen wula juntl maj cyxola, jatzen chi ex nk'o'nja cykilcakej min cyaj cyk'o'n cyil," ntziya. Amatzele mintn-al kena cyxola, cxe'l nkba'na cyey juntl maj oj npona cyxola juntl maj, iltzen ti'j cxe'l nk'o'na cycastiwey te cykilcakej nchi binchan ka'. ³ O tzaj cykba'na il ti'j tu'n t-xi' nyeeec'ana cyey o tzaj tk'o'n Cristo wipemala tu'n wajbena te tyolelxin. Ba'n tbint wu'na, bix q'uelel cyni'ya ti'j Cristo yaa'n tu'n mintii' tipemalxin tu'n t-xi' tk'o'nxin castiwa cyey wu'na, sino at nim tipemal. ⁴ Jaxte tej tcyim Cristo twitz cruz, min chic'aj tipemalxin tu'n tcamanxin cyibaj kej nchi k'ojl ti'jxin. Pero i'tzxin ja'lewe, bix nimxsen tzin tyeeec'anxin tipemal Dios. Ju'x xsunj weya. Jwipemala e tzaj tk'o'n Cristo weya yaa'n nim e chic'ajax nejl, pero tisen te Cristo e tyeeec'an tipemal Dios mas yaj, ju'xse weya. Yajtzen cxe'l nyeeec'ana tipemal Dios cyey wu'na tu'n ncamana cyibaj kej nchi k'ojl wi'ja.

⁵ Cyk'o'nc cyc'u'ja ti'j ti' niy' tuj cyanema, tu'ntzen tel cyni'ya ti'j ka o tz'oc ke cyc'u'ja ti' Cristo. Ejee'x cyey q'uelel cyni'ya ti'j at Jesucristo tuj cyanema. Ntzki'na cykba'y ocslalkey. ⁶ Tz'elxit cyni'ya ti'j ocslalkey, cuma ka ocslalkey, q'uelel cyni'ya ti'j jun jaxxix t-xel Cristo ken weya, cuma tu'nj tkbaj tyol Dios wu'na ockey te ocslal. ⁷ Pero mas waja tu'n t-xi' cyii'na cyna'la tuj tumel twitz tu'n t-xi' nyeeec'ana wipemala te k'olte cycastiwey tu'nj ka' nbint cyu'na. Mas ba'n ka jiquenxix ete'y twitz tu'n tchic'ajax at tipemal Dios wuyena. ⁸ Yaa'n ba'n tu'n t-xi' nyeeec'ana wipemala te cawlte cyey ka tzin cynimana jaxxix tyol Dios. Ka ba'n tzin cybincha'na, jax cxe'l nk'o'na ba'n nyola te cyey. ⁹ Nchin tzalaja ka mintii' ka' nbint cyu'na, tu'ntzen mintii' il ti'j tu'n t-xi' nyeeec'ana wipemala te cawlte cyey. Oj nchin na'na Dios cyi'ja, yaa'n nxi' nkanena tu'n t-xi' nyeeec'ana wipemala cyey, sino nxi' nkanena tu'n ccywixa tuj cyocslabla.

¹⁰ Ju' tzunj nxi' nsma'na wu'ja cyey jooc'tzen mina'x npona cyxola. Waja tu'n tcyaj cyk'o'na cyila, tu'ntzen oj npona cyxola, mintii' il ti'j tu'n t-xi' nyeeec'ana cyey tipemal Dios. Waja tu'n tajben tipemal Dios weya, yaa'n te k'olte cyey tuj il, sino te cyiwsablte cyey tuj cyocslabla.

Jun k'olbebl tu'n Pablo cye ocslal tuj tnom Corinto

¹¹ Key hermano, o'cxsen nyol jlu. Aleyrexitkey. Cyk'o'nc cyipena tu'n cytzketa. Bix ccyiwsanx ke cyuyey. Tz'elxittzen cywi'y junx. Tujxittzen ttzyal chi temana. Ka nbint cyu'na ju'wa, Diostzen at cyuyey. N-octzen cyak'a te bix ja tzunxin cwel k'onte cyey tu'n cytena tuj ttzyal. ¹² Cyk'olbem ke cyuyey tuya jun ttzyalxix ti' cyanema. ¹³ Kej ocslal at wuyena tzalu nxi' cyk'o'n jun k'olbebl cyey. ¹⁴ Tenxittzen t-xtalbil Kaaw Jesucristo cyxola, bix juchxit cyc'u'ja ti' Kman Dios, bix junxiti chi e'ley tuya Espiritu Santo. O'cx nyolja.

Jun u'j e xi' ttz'i'ben apóstol Pablo cye oclsal at tuj departamento Galacia

Jun k'olbebl tu'n Pablo

¹ Inayena Pablo. Jun t-xel Jesucristo kena. Yaa'n xjal e scy'onte weya tu'n woca te jun t-xel Jesucristo, bix yaa'n xjal e samante weya. Scy'o'n kena bix sma'n kena nuk o'cx tu'n Jesucristo bix tu'n Kman Dios e jaw titz'jsa'n ja Jesucristo tuj cyamecy. ² Nxi' ntz'i'bena ja u'j lu te cykilca cloj oclsal ti' Cristo tuj departamento Galacia. Jax ju'x kej oclsal at wuyena ma txi' cyk'o'n jun k'olbebl te cyey.

³ Tzajxit t-xtalbil Kman Dios tuya Kaaw Jesucristo cyibaja, bix cyu'nxit-xin chi temey tuj ttzyal. ⁴ E xi' tk'on tiib Jesucristo tu'n tbyet tu'n kil, tu'ntzen klet tu'nxin ti'j ka' at ja'lewe twitz tx'otx'. E cyimxin cuma ju' e tajbe Kman Dios. ⁵ Jaxwit nimset Kman Dios te junx maj! Ju'xit ttena.

Mintii' juntl xnak'tzbil ti'j ti tten tu'n klet

⁶ Key oclsal, ma baj nc'u'ja ti'j ma bint cyu'na. Ma bint nuk cab k'ij oclslankey ti'j jaxxix yol e xi' nk'umena cyey. Pero ja'lewe ma tzak' cyjel cycyeyena Dios. E tzaj tk'o'n Dios tu'n cycleta nuk tu'nj xtalbil k'o'n cyey tu'n Cristo, pero cyaja tu'n cyoc lpey ti'j junxidl xnak'tzbil. ⁷ Mintii' juntl xnak'tzbil ti'j ti tten tu'n cycleta, pero at juun cyxola nchi ch'ixben nxnak'tzbila te tzpetsal cyey. Cyaxin tu'n t-xitj jjaxxix xnak'tzbil ti' Cristo. ⁸ Junx xnak'tzbil tu'n cyclet xjal, jaj e xi' nk'umena cyey. Ka at jun xjal ma t-xnak'tza juntl xnak'tzbil ti'j ti tten tu'n klet, tzajxit tsbu'n Dios ja, amale inayenta bix ka jun tsanjel Dios tuj cya'j. ⁹ Juntl maj cxe'l nkba'na jma txi' nkba'na cyey, ka at jun xjal ma t-xnak'tza juntl xnak'tzbil twitz xnak'tzbil oclslankey ti'j, itzajxit tsbu'n Dios ja!

¹⁰ Cyiw ch'in nyola, pero jey', tu'nj ja cyiw yol lu, zyaa'mpa tzinen tuj cywitz ncy'ya nuk tu'n wela ba'n tuj cywitz xjal? ¿Wajpiya tuj cywitz nuk tu'n cyyolen xjal ba'n wi'ja, tisen cykba'n juun cyxola? ¿Yaa'mpa tzinen waja nuk tu'n wela ba'n tuj twitz Dios? Nuket oc wipena nuk tu'n wela ba'n tuj cywitz xjal, yaa'ntzenle jax jun t-ak'anal Cristo kena.

Eyole Pablo ti'j ti tten tej toc te t-xel Jesús

¹¹ Key oclsal, ilxsen ti'j q'uelel cyni'ya ti'j jba'n xnak'tzbil ti'j colbil ke e xi' nk'umena cyey, yaa'n cyol xjal. ¹² Yaa'n k'o'n weya cyu'n xjal, bix min in xnak'tzana ti'j. Jax Jesucristo e tzaj tyeeec'an weya.

¹³ Cxe'l nkba'na cyey ti tten e wiik'a jxnak'tzbila tu'n Cristo. O cybyi ti e bint wu'na tej nxi' lpeya ti' cyley judío. Nimxsen in k'o'ja cxi'j t-xjal Dios tu'n cyxi'xin tuj tzee' bix tu'n cycubxin, tu'ntzen tcub xitj cyocslablxin ti' Cristo. ¹⁴ Bix mas cyiw in tiina tuj cyley judío cywitz ch'ixc'a yaa'n cykilcatl ntanema. Nim oc wipena ti'j tu'n cyniman cykil ntanema kej costumbre otk cyaj cyk'o'n ke wiy'jila.

¹⁵ Pero amale in k'o'jleta ti' Dios, pero tu'n t-xtalbilxin weya e tak'xin weya wajbena texin. Tej mitkna'x witz'ja, ya scy'o'ntl kena tu'nxin. Bix tej tpon tumel tuj twitzxin, ¹⁶ e tak'xin weya tu'n tel nni'ya ti'j Tcwalxin, tu'ntzen t-xi' nk'umena ti' Tcwalxin cyej xjal yaa'n judío. Tejtzen tel nni'ya ti' Tcwalxin, min in xi'ya cyuya xjal tu'n t-xi' nkanena ka iy'nen cyilbil ti'j. ¹⁷ Jax min in xi'ya cyuya kej t-xel Jesús tuj tnom Jerusalén, ejee'j oc te t-xel Jesús nejl nwitz. Nuk o'cx in xi'ya nakch tuj tx'otx' te Arabia tu'n ntena njunala jaa' min-al xjal. Mas yaj, in ajtz meltz'aja tuj tnom Damasco. ¹⁸ Min in xi'ya tuj Jerusalén tu'n nyolena cyuya t-xel Jesús tejxe tbint oxe jnabk'i ttzajlen tyeeec'an Dios Tcwal weya. Manc'biltzen in xi'ya Jerusalén tu'n wlontiya twitz Pedro, pero nuk olaaj k'ij in tena tuyaxin. ¹⁹ Bix min-al juntl t-xel Jesús e wila. Nuk o'cx t-xelxin Jacobo e wila, jxin titz'en Cawel kxol. ²⁰ Jnxi' nkba'na cyey, jax wu'na. Ttzki'n Dios min nchin xtak'ena.

²¹ Yajxiltzen, bix in xi'ya cyuj ke departamento Siria bix Cilicia. ²² Min in cyaja cyol niy'tl t-xel Jesús cyuj tja Dios tuj departamento Judea. Kej oclsal ti' Cristo ete' tjak' cyxnak'tzbil t-xel Jesús, mi nuket cytzki'n nwitz. ²³ Pero ejee'j oclsal el cyniy' ti'j ja jaxxix xnak'tzbil e nk'umena, cuma e cybixin cyyol kej oclsal otk chi nyajlaya nejl. Tzi kej oclsal otk chi yajlet wu'na: "Jxin xjal e tyajla ejo'o'ya nejl, ja'lewe ntk'umentlxin kocslabl, jaj kocslabl oc tipenxin ti'j nejl tu'n t-xitj," tzikexin. ²⁴ Bix tej cybinte oclsal tuj Judea ja yol lu, nimxsen e jaw cynimsa'nxin Dios wi'ja.

2

¹ Tbjalxixiltzen cyajlaaj jnabk'i nxi'lana Jerusalén tneel maj, in xi'ya juntl maj tuj Jerusalén. E xi' Bernabé wuyena, bix jax e xi' wii'na Tito. ² Pero in xi'ya nuk o'cx tu'n jun

tumel otk tzaj tk'o'n Dios weya. Min in xi'ya tu'n cyajbil xjal. Bix in yolena cyuya nejenel cye ocslal, tu'n t-xi' ntx'olba'na alcey xnak'tzibil nxi' nk'umena cyej xjal yaa'n judío, tu'ntzen mi'n chi k'ojl ti'j waak'ena nbint wu'na bix otk bint wu'na, tu'n mi'n txi' waak'ena tuj il. ³Bix e cycuyaxin wuyena mintii' il ti'j tu'n tel keset ttz'umel ttz'albil jun xjal tu'n tcllet, tisen tzin cykba'n kej xjal judío. C'oquel cyc'u'ja ti'j ti e bint ti' Tito, jxjal e xi' wii'na. Mi nuket jaxin min e cykbaxin tu'n tel keset-xin, amale yaa'nt judío. ⁴In yolena cyuya nejenel cye ocslal nuk o'cx tu'n mi'n tz'oc cyc'u'j ti'j cyool kej xjal tzin cykba'n ocslalke pero xtak'ke. Tuya xtak' cyool, ocx ke xtak' ocslal kxola, ejoo'ya ocslal tuj Jerusalén. Nuk o'cx oc cycwent-xin ti'j ka nko nimana cycostumbre judío bix ka min. Cycy'ixin tu'n ktzakpet ti' kil nuk tu'nj kmojbabl kiib tuya Cristo Jesús. Nuk o'cx cyajxin tu'n kten tjak' tley Moisés, tisen jun xjal xpo'n. ⁵Pero mi nuket jun minuto in keya tuyaj cyajbilxin, cuma ilxsen ti'j tu'n tcyaj jaxxix jxnak'tzibil ti'j colbil ke cyxola.

⁶Yaltzen kej nejenel cye ocslal tuj Jerusalén, tz'aklxix el nxnak'tzibila tuj cywitzxin. Tzin cykba'n tzpetsal ka mas tz'aklxix cyxnak'tzibil t-xel Jesús twitzj weya nxnak'tzibil, cuma e ten ke t-xel Jesús tuyaxin nejl. Pero yaa'n il ti'j tuj nwitzza ka mas jawnex niy'tl ke t-xel Jesús tuj cywitz tzpetsal cyxola, cuma tuj twitz Dios min-al jun xjal mas jawnex twitz juntl. ⁷Pero cyej t-xel Jesús tuj Jerusalén, min e k'ojlke wi'ja, sino e cycuyaxin jweya nxnak'tzibil. El cyniy'xin ti'j otk tzaj tk'o'n Dios jjaxxix xnak'tzibil ti'j colbil ke weya tu'n t-xi' nk'umena cyej xjal yaa'n judío, jax tisenj otk tzaj tk'o'nxin te Pedro tu'n t-xi' tk'umen cyej xjal judío. ⁸El cyniy'xin ti'j tisen oc tk'o'n Dios tipemal Pedro tu'n tajben te t-xel Jesús cyxol xjal judío, jax oc tk'o'n Dios wipemala tu'n wajbena te t-xel Jesús cyxol xjal yaa'n judío. ⁹Ja tzunkej ocslal crinsipal tuj cywitz cykil ocslal, ja Jacobo, Pedro, bix Juan, el cyniy'xin ti'j otk tzaj tk'o'n Dios t-xalbil weya tu'n wak'anana tuj taak'enxin. Ju' tzunj, e tzaj cyk'o'nxin cyk'abxin weya bix te Bernabé te yec'bil ba'n tuj cywitzxin tu'n t-xi' nk'umena tyol Dios tuya Bernabé cyxol xjal yaa'n judío, jooc'tzen ejee'xxin tu'n t-xi' cyk'umen cyxol judío. ¹⁰Nuk o'cx oc cyocsa'nxin nc'u'ja tu'n mi'n cyaj ncyeyena tu'n t-xi' wonena kej judío mebe, bix tu'n ja lu e ncyuana tuya cykil nc'u'ja.

Tej toc tile Pablo ja Pedro tuj tnom Antioquia

¹¹Mas yaj, e yec'j juntl maj e tzaj nxnak'tzibila tu'n Dios, yaa'n cyu'n t-xel Jesús. Tej tpon Pedro tuj tnom te Antioquia, il ti'j oc wilen xina tibajc'a twitzxin oca nkba'na, cuma min e trimaxin jaxxix jxnak'tzibil. ¹²Tuj tneel, ba'n e bint tu'nxin, cuma e waa'nxin cyuyaj cykil ocslal, amale atet juun yaa'n judío. Pero tej cypon cab judío tuj tnom sma'n tu'n Jacobo, ak' elel tpa'n tiibxin cyi' ocslal yaa'n judío, cuma at cytzi judío ti'jxin, cuma tzin cykba'n judío nchucj jun xjal twitz Dios ka ma waa'n cyuyaj xjal yaa'n judío. ¹³Bix cuma yaa'n junx j-e bint tu'nxin tuyaj e xi' tk'umenxin, bix el cypa'n cyiib niy'tl ocslal judío tuj Antioquia cyi'j ocslal yaa'n judío, amale elet cyniy'xin ti'j ba'n tu'n cywaa'nxin junx cyuya cykil ocslal. Hasta Bernabé e cub ti'j cyu'n judío tu'n mi'n waa'nxin cyuyaj ocslal yaa'n judío. ¹⁴Pero tej t-xi' ncyeyena yaa'n junx cybinchbenxin tuyaj jaxxix xnak'tzibil ti'j colbil ke, e xi' nkba'na te Pedro twitz cykil ocslal: "Jun judío tey, pero o tzakpeta ti'j cyley judío, bix nwaan na tisenx tten cyu'n xjal yaa'n judío. Ju' tzunj, ¿tikentzen tzin tyeec'ana il ti'j tu'n cyniman xjal yaa'n judío cyley judío tu'n cyel ba'n twitz Dios? ¹⁵Amale judíot ko' cuma judío ke kiy'jil, bix yaa'n jun wikxilt xjal ko' min e kiik' ley te Moisés, ¹⁶pero el kniy' ti'j jun xjal jiquen twitz Dios nuk o'cx tu'nj tocslabl ti' Jesucristo, yaa'n tu'n tbinchan alcey tzin tkba'n tley Moisés. Ju' tzunj, amale judíot ko', pero o ko ocslan ti' Cristo Jesús, tu'ntzen jiquen ko' twitz Dios tu'n kocslabl ti' Cristo. Min o ko clet tu'nj knimbil ti' tley Moisés, cuma min-al jun xjal n-el jiquen twitz Dios tu'nj tnimbil ti' tley Moisés.

¹⁷Pero ka jax cyu'n judío oc ko' te aj il tisen kej xjal yaa'n judío tej kocke jiquen twitz Dios nuk o'cx tu'n Cristo, bix yaa'ntl tu'nj jknimbil ti' tley Moisés, tu'n tzunj Cristo o ko oc aj il. Cxe'l nkanena tey, ¿tumelpa tu'n t-xi' kkba'n tu'n Cristo nko oc te aj il? ¡Min!

¹⁸Katzen ma tz'oc ke kc'u'j ti'j knimbil ti' ley tu'n koc jiquen twitz Dios, tzin kyeec'an min tz'oc kbi'n ley, ¹⁹cuma e tkba ley ki'j mlay ko oc jiquen twitz Dios tu'nj knimbil ti' ley. Ju' tzunj, ya mintl n-oc wipena ti'j tu'n woca jiquen twitz Dios tu'n ley, tu'ntzen woca jiquen nuk o'cx tu'nxin, tu'n wajbena nuk o'cx texin. ²⁰Te junx maj ma tz'oc ke nc'u'ja nuk o'cx ti' Cristo e jaw k'o'n twitz cruz te nxela. Ya mi'ntl txi' njoyo'na nchunk'lala tu'nj weya nbinchben, sino at nchunk'lala tu'n Cristo najl tuj wanema. Jchunk'lal nxi' wii'na ja'lewe, ma tzaj k'o'n weya tu'nj wocslabla ti'j Tcwal Dios, jaj xjal oc wak'a te, bix e cyimxin te nxela. ²¹Mi'n cyaj ncyeyena t-xalbil Dios weya. Nuket nko oc jiquen twitz Dios tu'nj kbinchben tjak' ley, nukettzenle ganax e cyim Cristo," ntziya te Pedro.

3

O kiik' Espíritu Santo tu'nj kocslabl ti'j e bint tu'n Cristo twitz cruz

¹ Key ocslal tuj Galacia, mintii' cynaabla. ¿Tikentzen ma che'x lpey ti' jun yol shul? Nejl, tzinenxix e xi' nk'umena cyeey tiken e cym Jesucristo twitz cruz. ² Cxe'l nkanena cyeey, ze cyiik'pey Espiritu Santo tu'nj cynimbila ti' tley Moisés, bix ka tu'nj cyocslabla ti' Cristo te cybintey ti e bint tu'nxin twitz cruz? ³ ¿Mimpatii' cynaabla? Tej cyocslana tuj tneel, ockey jiquen tu'nj e bint tu'n Espiritu Santo. ¿Tikentzen n-oc cyipena ti'j ja'lewe tu'n cyoca jiquen twitzxin tu'nj cyexa cybinchbena? ⁴ Bix juntl. Nim q'uixc'aj iy'x cyu'na tej cyocslana ti' Cristo. ¿Nukpa cyajxa iy'x ja q'uixc'aj lu cyu'na? Cutzit ka min.

⁵ Cxe'l nkanena cyeey juntl maj, oj ntzaj tk'o'n Dios Espiritu Santo cye xjal, bix nxi' tyeec'anxin jawnex tipemalxin cyoxl xjal, ¿tzimpa tk'o'nxin ju'wa cuma n-oc cybi'n xjal tley Moisés? Min. Tzin tk'o'nxin nuk o'cx tu'nj ma txi' cyocsla'na jba'n pochbal ti tten tu'n koc jiquen twitzxin.

O tz'oc ke tc'u'j Abraham nuk ti'j tyol Dios

⁶ C'oquel cye'u'ja ti'j ti toc tu'n tyol Dios ti' Abraham. Tzi cyjulu: "Oc ke tc'u'j Abraham ti' Dios. Ju' tzunj e tzaj k'o'n te Abraham tu'n toc jiquen twitz Dios," tzi tyol Dios. ⁷ Ju' tzunj, il ti'j q'uelel cyni'ya ti'j nuk o'cx kej xjal n-oc ke cye'u'j ti' Dios, ejee' tzunja t-xjal Dios tisen Abraham. ⁸ Bix c'oquel cye'u'ja ti'j jatxe tuj tneel e cub tninc'u'n Dios tu'n cyoc kej xjal yaa'n judío jiquen twitzxin ka ma chi ocslan ti'jxin. Ju' tzunj, e xi' tkba'n Dios te Abraham: "Tu'na chi oquela cykilca wik xjal wunak twitz tx'otx'," tzi Dios te Abraham, tzi tyol Dios. ⁹ Ju' tzunj, il ti'j q'uelel cyni'ya ti'j ntk'o'n Dios t-xtalbil cyej xjal n-oc ke cye'u'j ti'jxin, tisen e tak'xin te Abraham tej toc ke tc'u'j Abraham ti'jxin. ¹⁰ Bix il ti'j q'uelel cyni'ya ti'j kej xjal n-oc cyipen ti'j tu'n cycaman ti'j t-xtalbil Dios tu'nj nchi niman ley, cwel cycastiwa tu'n Dios, cuma mlay bint cykilca ley cyu'n. Tzin tkba'n tyol Dios cyjulu: "Cwel tk'oj Dios tibaj cykil kej xjal min chi binchan cykil yol tz'i'ben tuj ley," tzi tyol Dios. ¹¹ Tzinen ta' min-al jun xjal c'oquel jiquen twitz Dios tu'nj nman ley, cuma tzin tkba'n tyol Dios cyjulu: "Jiquen ta' jun xjal twitz Dios nuk o'cx tu'nj n-oc ke tc'u'j ti' Dios," tzi tyol Dios. ¹² Pero te ley, ka ma tz'oc ke kc'u'j ti' ley tu'n koc jiquen twitz Dios, mlaytltzen tz'oc ke kc'u'j ti' Dios. Tzin tkba'n tyol Dios cyjulu: "Jxjal taj tu'n tcnet tchun'lal tu'nj ley, ilxsen ti'j cbinchal entera ley," tzi tyol Dios.

¹³ Key ocslal, tu'nj min e kbinchaj tzin tkba'n ley, ju' tzunj at tsublel kcastiwa kibaj. Pero tu'n ktzakpet ti'j kcastiwa, e xi' tchjo'n Cristo chojbil kil. E xi' tiken texin kcastiwa tej tcyaj sbu'nxin twitz cruz. Sbu'n ta'xin, cuma tzin tkba'n tyol Dios cyjulu: "Jawnexsen tch'ixew jun xjal njaw c'let tk'ab jun tzee' oj n-oc tuj castiwa," tzi tyol Dios. ¹⁴ El ttzakpi'n Cristo ejoo' tuj tcwent ley tu'n tpon baj twi' jtyol Dios e cyaj tk'o'n te Abraham, jaj tu'n ttzaj tk'o'n Dios t-xtalbil te cykil wik xjal tu'nj tiy'jil Abraham. El ttzakpi'n Cristo ejoo' tu'n kiik'ente Espiritu Santo tu'nj kocslabl ti' Cristo, J-espíritu Santo e cyaj tk'o'n Dios tyol ke tu'n kiik'ente.

¹⁵ Key hermano, cxe'l nkba'na jun techel cyeey ti' nbaj cyoxl xjal. N-el kniy' ti'j mlay bint tu'n tcub xitj jun trat cyoxl xjal. Amale binnnet trat nuk cyu'n xjal, pero oj tcywix tuj juzgado, mlay bint tu'n tel xe't bix mlay bint tu'n tch'ixpet tu'n juntl xjal. ¹⁶ Ju'tzen tten tuyaj yol e cyaj tk'o'n Dios te Abraham bix te t-xe'chel. Bix tej tcyaj tk'o'n Dios tyol te Abraham bix te t-xe'chel, c'oquel cye'u'ja ti'j min tzin tkba'n tyol Dios "cye t-xe'chel." Nuk o'cx tzin tkba'n "te t-xe'chel." Tzin tkba'n ju'wa cuma nyolen ti'j jt-xe'chel Abraham, ja Cristo. ¹⁷ Cxe'l ntx'olba'na jtechel cyeey. Tisen mlay bint tu'n tcub xitj jun trat cyoxl xjal, jax mlay cub t-xiten Dios jyol e cyaj tk'o'n te Abraham, jyol e cywix tuya cyiwsabl yol. Jley e cyaj tk'o'nxin te Moisés cyaja syent tuya winaklaaj jnabk'i mas yaj, mlay tz'el tii'n tipemal jyol e cyaj tk'o'nxin te Abraham. ¹⁸ Ju' tzunj, nuket e kiik' t-xtalbil Dios nuk tu'nj knimbl ti' ley, mintetzele e kiik' t-xtalbilxin tu'nj yol e cyaj tk'o'nxin. Pero tzin tyeec'an Abraham yaa'n ju'wa. E tzaj tk'o'n Dios xtalbil te Abraham nuk o'cx tu'nj otk cyaj tk'o'nxin tyolxin.

Tej tyole Pablo ti'j ti tajbelel tley Moisés

¹⁹ Pero ka ju'wa, ¿titzzen tajbel tley Moisés? E tzaj tk'o'n Dios ley te Moisés mas yaj tu'n tel kniy' ti' kil. Pero tej ttzaj cyk'o'n tsanjel Dios tuj cya'j ley te ke tuj tk'ab Moisés, yaa'n tu'n tten ley te junx maj. E tajbe Dios tu'n tcawen ley kibaj, pero nuk o'cx mitkx n-u'la jt-xe'chel Abraham e cyaj tk'o'nxin tyolxin tu'n tul. ²⁰ Bix c'oquel cye'u'ja ti'j il ti'j ajben jun tyolel Dios tu'n t-xi' tk'o'n ley cye xjal. Pero tej ttzaj tkba'n Dios tyol te Abraham, jax Dios e yolen tuyaxin. Ja lu tzin tyeec'an mas ba'n t-xtalbil Dios e cyaj tk'o'n te Abraham twitzj ley e xi' tk'o'nxin te Moisés.

²¹ Katzen ma ko oc jiquen twitz Dios nuk o'cx tu'n t-xtalbil Dios, bix yaa'n tu'n ley, ¿q'uelelpatzen kniy' ti'j nk'o'jl ley e tzaj tk'o'n Dios te Moisés ti'j jyol e cyaj tk'o'n Dios te Abraham? ¡Min! Min k'o'jl, sino at juntl taak'en. Nuket at kipemal tu'n ley tu'n knimante, ajbentzenle ley tu'n koc jiquen twitz Dios. Pero min. ²² O cyaj tk'o'n Dios ley nuk o'cx tu'n tel kniy' ti'j o ten cykil xjal tuj tk'ab il tisen ke pres, tu'ntzen nuk tu'nj cyocslabl ti' Jesucristo ctaaal tk'o'n Dios t-xtalbil te cyej xjal n-oc ke cye'u'j ti' Jesucristo. ²³ Tej mitkna'x tpon tumel tu'n tyeec'ante Dios ti tten tu'n ktzakpet tu'nj kocslabl ti' Jesucristo, tisenca' tu'j tzee' eto'cxe,

bix ajben ley tisen jun c'ojlal cars, tu'ntzen kajbente jba'n t'pochal tu'n ktzakpet tu'n Cristo tej tul ja pochablte lu mas yaj. ²⁴ Ju' tzunj, il ti'j q'uelel kniy' ti'j ajben ley nuk tu'n t-xi' tii'n ejoo' tuya Cristo, tu'ntzen koc jiquen twitz Dios tu'nj kocslabl ti' Cristo. ²⁵ Pero ja'lewe, cuma o ko oclsan ti' Cristo, ju' tzunj mintii'tl il ti'j tu'n tajben ley tu'n t-xi' tii'n ejoo' tuya Cristo.

²⁶ Key oclsal, tcwal Dioskey tu'nj cyocslabla ti' Cristo Jesús. ²⁷ Junx ete'y tuya Cristo, ejee'xa at cymojbabl cyiiba tuyaxin, cuma o tz'oc cyk'on cyiiba tuyaxin. ²⁸ Tu'j twitz Dios, min-al jun wik xjal cyxola mas jawnex twitz juntl wik. Judío lokey, yaa'nle judíokey, ajnintz lokey, nmak lokey, xinak lokey, xuuj lokey, junx ta' cykilcakey twitz Dios, cuma junx ete'y tuya Cristo Jesús. ²⁹ Bix tu'nj junx ete'y tuya Cristo, bix t-xe'chel Abraham ja' Cristo, ju' tzunj tcwal Abrahamkey, bix at cyoclena tu'n cyiik'a jcykaba e cyaj tkba'n Dios te Abraham.

4

¹ Cxe'l nkba'na jun techel ti cytena tej mitkna'x cytzakpeta ti' tcawbil ley. Tisen jun maan mlay cawen tuj jun jaa', jaxse ju'x mlay cawen tcwal taaw jaa' ka nee'xk'a, amale c'oqueletk'a te taaw jaa' oj tock'a ma' xjal'tl. ² Jun nee' tjak' cycawbil c'ojlalte ta', bix tkabk'a tjak' cycawbil c'ojlal tek'a ta' ojxe tpon jk'ij ctkba' tmank'a tu'n tcawenk'a tuj jaa'. ³ Jaxse ju'x ke, tisen nee' yaa'n tzakpi'n ko' nejl, cuma eto' tjak' jycawbil nim ley bix xnak'tzbil at twitz tx'otx'. ⁴ Pero tej tpon jtumel otk tkba Dios tu'n tul Tcwal twitz tx'otx', e tzaj tsmá'nxin Tcwalxin. Itz'j Tcwalxin ti' jun xuuj tu'n tocxin te jun xjal, bix itz'jxin tjak' tcawbil ley. ⁵ Itz'jxin tjak' tcawbil ley tu'n kclat tjak' tcawbil ley tu'nxin, tu'ntzen kiik'ente cykilca koclen te tcwal Dios. ⁶ Ju' tzunj, tcwal Dioskey, bix o tzaj tsmá'n Dios Espíritu Santo cyuyey, jaj Espíritu e cyaj tkba'n Tcwalxin tu'n ttzaj tsmá'n cyey, tu'n tajben te jun tstiwa tuj cyanema tcwal Dioskey. Tu'nj Espíritu Santo n-el cyni'ya ti'j ka Dios Cymana, bix ju' tzunj tzin cykba'na "Kman Dios." ⁷ Ju'tzen tten yaa'ntl preskey tjak' tcawbil ley, sino tcwal Dioskey. Bix tu'nj tcwal Dioskey, ccyiik'ela jcykaba e cyaj tkba'n Dios cyey tu'n Cristo.

Tej t-xi' t'cubsa'n Pablo twitz cye oclsal tu'n mi'n chi aj meltz'aj tuj jxnak'tzbil te ootxa jaj mintii' tipemal

⁸ Pero amale tcwalet Dioskey ja'lewe, nejl min cytzki'na Dios, bix ajbenkey cyej dios yaa'n jax. ⁹ Pero ja'lewe cytzki'ntla Dios, bix ka ja Dios ma tak' tu'n texin ejee'y. Ju' tzunj, ¿tizen tten tu'n t-xi' cybi'na juntl maj jxnak'tzbil te ootxa mintii' tipemal tu'n cycleta bix mlay tu'n tk'on t-xtalbil Dios cyey? ¿Cyajpey tu'n cyoca te pres tjak' tcawbil juntl maj? ¹⁰ Ma tzak' cwel cynimana kej k'ij xjan cye judío, bix kej xjaw xjan, bix kej nink'ij xjan, bix kej jnabk'i tu'n mi'n tz'ak'anana cytx'otx'a, nuk tu'n cynimana cyley judío. ¹¹ Nbaj nc'u'ja cyi'ja, cuma ka ma cyaj cyce'yena colbil cyey tu'n Cristo, nukutzen wajxa o chin ak'anana cyxola.

¹² Key oclsal, cxe'l ncubsa'na nwitzá cyey tu'n cyxi' lpey ti'j e bint wu'na. E cyaj ncyey'ena tu'n toc ke nc'u'ja ti' ley, bix in oca tisen jun yaa'n judío tisen cyey.

C'oquel cyc'u'ja ti'j jba'n e binchankey wi'ja tej ntena cyxola nejl. ¹³ C'ulel tuj cyc'u'ja nuket mi'n e tzaj jun yabel wi'ja, minttle in tena cyxola tu'n t-xi' nk'umena t'pochal Cristo cyey. ¹⁴ Bix amale atet nyabela, pero min el cyiiq'uena inayena bix min el cylojo'na inayena, sino e cyk'olbey inayena. Tej npona cyxola, tsanjel Dios kena tuj cywitza, bix sma'n kena tu'n Cristo Jesús tuj cywitza. ¹⁵ Pero ja'lewe, ¿ti ma baj? Mintl chi tzalaja wi'ja tisen tuj tneel. Nejl, nuket ba'n e bint cyu'na wi'ja, otle jatx cyi'na t'bak' cywitza tu'n ttzaj cyk'o'na weya, tu'n ncyaja ba'n, nimitzen oc wak'a cyey. Cytzki'na jax wu'na. ¹⁶ Tzinen ta' jun tyolel Dios kena tuj cywitza nejl. Ju' tzunj, ¿tumel'pa tu'n t-xi' cykba'na ma chin oca te aj k'oj cyi'ja nuk tu'nj e nkbaya jba'n t'pochal Cristo cyey? ¹⁷ Yal kej tzpetsyal cyxola, nim n-oc cyipenxin ti'j tu'n cyelxin ba'n tuj cywitza. Pero min tzin cybincha'nxin ju'wa tu'n t-xi' cyk'o'nxin jun ba'n te cyey, sino nuk tu'n tel cypa'n cyiiba wi'ja, tu'ntzen cyoc lpey nuk cyi'jxin. ¹⁸ Ba'nte tu'n toc cyipenxin ti'j tu'n cyelxin ba'n tuj cywitza, pero yaa'n ba'nj tu'n toc cyipenxin ti'j nuk tu'n t-xi' cynaabla tuj il. Weya, oj nchin yolena cyuyey, nuk o'cx tu'n tk'oj jun ba'n te cyey wu'na. Oc wipena ti'j tu'n ccyajaja tuj ba'n tej ntena cyxola, bix tuyaj jax wajbila lu, nchin tz'ibena te cyey ja'lewe. ¹⁹ Key ncwala min tz'el cyni'ya ti'j, tisen niy'x tchyonel tu'n jun xuuj ojxe ttzaj tal, ju'xsen niy'x q'uixc'aj wu'na cyu'na. Pero niy'x q'uixc'aj wu'na tcab maj tu'n cyitz'ja. Pero q'uuyex q'uixc'aj wu'na ojxe toc cynaabla mas tisen te Cristo. ²⁰ Waja chin tena cyxola ja'lewe tu'n nyolena cyuyey, tu'n tcub cych'ixpu'na cynaabla, tu'ntzen mintii'tl il ti'j tu'n cyoc wilena. Min tz'el nni'ya ti'j ti tten tcyaj cyce'yena nxnak'tzbila.

Jun techel ti'j Sara tuya Agar

²¹ Key xjal cyaja tu'n cytena tjak' tcawbil tley Moisés, cxe'l nkanena cyey, ¿tu'n tikentzen min tz'oc cybi'na j-e cub ttz'i'ben Moisés? ²² C'oquel cyc'u'ja ti'j jun yol tz'iben tuj tley Moisés. Ul itz'j ca'ba tcwal Abraham. Jun tcwalxin e tzaj ti'j tk'opaj t-xu'lxin, Agar, jun xuuj tocx tjak' tcawbil juntl xjal, bix juntl tcwalxin e tzaj ti'j t-xu'lxin, Sara, bix yaa'ntzen k'opaj

texuj. ²³Yal talj xuuj k'opaj, itz'jk'a tisex nbaj cyxol xjal, cuma cwalx ttxuk'a. Pero jtal xuuj yaa'n k'opaj, itz'jk'a nuk o'cx tu'nj tipemal Dios otk cyaj tkba'n Dios te ttxuk'a ya tijtlxuj. ²⁴Ja tzunkej ca'ba xuuj lu cyuya cyal tzin cyechla'n kej ca'ba trat lu. Ja trat e bint twi'j witz Sinaí, nbint tu'n nuk tu'n cyten xjal tjak' jcyiw cawbil. Bix ja xuuj Agar tzin techla'n ja trat lu, cuma toctxinxin tjak' tpatróntxin. ²⁵C'oquel cyc'u'ja ti'j oc cyk'o'n kej xjal Arabe tbi jwitz Sinaí te Agar, te yec'bil junx ta' Agar cyuyaj na'l ley te ja'lewe. Tzin techla'ntxin Jerusalén, cuma tisenx jatxin yaa'n tzakpi'n tu'nj e tentxin tjak' tcawbil juntl xjal, jax ju'x yaa'n tzakpi'n kej na'l ley te Jerusalén tu'nj ete' tjak' tcawbil tley Moisés. ²⁶Pero kej xjal aj Jerusalén te tuj cya'j ko', tzakpi'n eto'. Tcwal jun tnom te tuj cya'j ko', bix tzin techla'n Sara ja tnom lu. ²⁷Tu'n tyeec'an at juntl wik Jerusalén, tzin tkba'n tyol Dios cyjulu: "Tzi Moises te Jerusalén, 'Jay xuuj mlay tz'alena ja'lewe, tzalaja. Jay xuuj min tztzi'na ti tten tu'n tiy'x tchyonel tu'na, s-ina tu'n ttz'alajehla. Jay xuuj tjunala ja'lewe, mas chi ul tala twitzj xuuj at tchmil,' tzi Dios te Jerusalén," tzi tyol Dios. Bix te ja Jerusalén lu ko' ja'lewe.

²⁸Key oclsal, tisenx ul itz'j Isaac nuk tu'nj e cyaj tk'o'n Dios tyol te Abraham, jax ju'x cyey o chi oca tcwal Dios nuk tu'nj t-xtalbil e cyaj tk'o'nxin cyey. ²⁹Bix jk'oj e baj nejl, jax nbaj ja'lewe. Nejl, jtcwal Abraham ul itz'j nuk tu'n tipen toclslabl e k'oj ti'j tcwalxin ul itz'j tu'n tipemal Dios. Jax ju'x ja'lewe, kej xjal n-oc ke cyc'u'j ti'j cyex cybinchben tu'n cyclet nchi k'oj cyil'j xjal n-oc ke cyc'u'j ti' Dios tu'n cyclet. ³⁰Pero mlay chi caman. C'oquel cyc'u'ja ti'j ti toc tu'n tyol Dios. "Xomax jxuuj ak'anal lu tuyax tal, cuma yaa'n tumel tu'n tk'oj jun kab tal jxuuj k'opaj. Nuk o'cx tal jxuuj yaa'n k'opaj at toclen tu'n tiik'ente tkab," tzi tyol Dios.

³¹Ju' tzunj, key oclsal, ejoo' oclsal yaa'n tisen tal jun xuuj k'opaj, sino tisen tal jxuuj yaa'n k'opaj.

5

Chi we'xixa cuma ma chi tzakpeta tjak' ootxa ley

¹Key hermano, cuma ma tz'el tzakpi'n Cristo ejoo' ti' ley tu'n kten tzakpi'ntl, ju' tzunj cyc'o'nc cyipena ti'j tu'n cywe'xixa cywitzj xjal cyaj tu'n cyocxa juntl maj tjak' ley tu'n cycleta, tisen oj toc yugo ti' twi' wacx. ²Inayena, Pablo, cxe'l nkba'na cyey, ka ma chi cuyana tu'n tel keset ttz'umel cytz'albila tu'n cycleta, mi'ntltzen tz'ajben Cristo cyey tu'n cycleta. ³Bix jax cxe'l nkba'na cyey, jaca juun xinak cyxola, ka cyaja tu'n tel keset ttz'umel cytz'albila tu'n cycleta, jax ilxsen ti'j tu'n tbint cykilcaxsen tley Moisés cyu'na tu'n cycleta. ⁴Key xjal ma tz'oc cyk'on cyiiba ti'j cynimbila ti' ley tu'n cyoca jiquen twitz Dios, matzen chi el tx'ometey ti' colbil cyey tu'n Cristo. Ma cyaj cycye'yena t-xtalbil Dios ⁵ntzaj k'o'n tu'n Espíritu Santo. Ko oquel jiquen twitz Dios nuk o'cx tu'nj kocslabl ti' Dios tuj kanem, bix nuk o'cx tu'n tzunj kocslabl ba'n kayon ti'j kchunk'lal te junx maj tuya Dios. ⁶Kxol oclsal ti' Jesucristo, mintii' il ti'j ka ma tz'el keset kchu'l bix ka min, cuma junx ta' cykilca ko'. Nuk kocslabl at tajbel, bix tu'n kocslabl n-oc cyak' kuya ke.

⁷Nejl, ba'n nche'x lpey ti' jaxxix yol. Pero ja'lewe, zti ma baj? Ma txi' tztzpetsa'n jun xjal ejee'y, tu'n tcyaj cycye'yena jaxxix yol. ⁸Pero jxjal ma cub cyi'ja tu'n, tu'n cyoca tjak' ley, yaa'n te Dios, cuma ma tzaj ttxco'n Dios ejee'y tu'n cytzakpeta ti' tcawbil ley. ⁹Cyc'ojlanx cyiiba cywitzj cabtl tzpetsal cyxola, cuma cxe'l tz'iy cyxnak'tzabl cyxola, tisen jun cluj k'otj te ttx'otx'el pan njaw punntz'aj oj n-ocx levadura te tk'anel. ¹⁰Cuma ma tcyiwsa Kaaw nc'u'ja, ju' tzunj c'oquel ke nc'u'ja ti'j mi'n tz'el cypa'n cyiiba ti'j ma txi' nkba'na cyey. Pero jxjal tzpetsal cyxola, amale jawnexet, pero ctzaal tk'o'n Dios tcastiwa.

¹¹Yajtzen weya, yaa'n jax cyu'n xjal ka lux kena nchin k'umen il ti'j q'uelel keset kchu'l tu'n kcler. Nuket txi' nk'umena ju'wa, tisen tzin cykba'n juun xjal, minttzenle ntzaj cyk'oj xjal judío wi'ja. Nuket e cyaj ncyeyena jyol ma chi clet xjal nuk tu'nj e cyim Cristo twitz cruz, jaxettezele ncyaj cyk'o'n judío tu'n cyk'ojl wi'ja. ¹²Kej xjal cyaj tu'n cypeta, jaxitle ba'n tu'n tel kesetzen cye cyjos.

¹³Key oclsal, o tzaj ttxco'n Dios ejee'y tu'n cytena tzakpi'n ti'j tcawbil ley. Pero min e tzaj tk'o'nxin cycolbila ti' ley tu'n cybinchana nuk tik'ch taj cyxumlala, sino tz'ajbenxit cycolbila tu'n cyonen cyiiba tuya nim tk'ak'bil cyc'u'ja. ¹⁴Chi ajbena cyxolxa ju'wa, cuma cykilca yol tuj ley njapan baj twi' tu'n ja yol lu: "C'oquel cyak' ke cyuyey cyey tisenj n-oc cyak'a cyey," tzi tyol Dios. ¹⁵Pero ka nuk nchi jaw k'ojla cyxolxa, tisen oj n-oc cytx'an cyiib txyan, cyk'o'nc cwent cyi'ja, cuma jac'a chi naja cykilca cyu'nx cyiiba.

¿Alcye tu'n tbint ku'n? ¿Jun tajbil Espíritu Santo bix ka alcyej jun tajbil kxumlal?

¹⁶Cxe'l nkba'na cyey, cyii'nx cynaabla tu'n junx q'uelela tuya tajbil Espíritu Santo, tu'ntzen mi'ntl txi' cynimana nuk tajbil cyxumlala. ¹⁷Tcy'i knaabl aj il jtaj Espíritu Santo, bix jax tcy'i Espíritu Santo jtaj knaabl aj il. Kej ca'ba lu cyajk'oj cyiib. Ju' tzunj, mi'n chi binchana nuk alcyej taj cyxumlala. ¹⁸Pero q'uelel cyni'ya ti'j, oj nche'x lpey ti'j Espíritu Santo, yaa'n ete'tla tjak' tcawbil ley, sino tjak' tcawbil Espíritu Santo.

¹⁹ Tzinente ti nbint cyu'nj xjal nche'x lpe ti'j cynaabl aj il. Nchi oc ipan cyi'j xuuj yaa'n cyxu'l'bix cyi'j xinak yaa'n cychmil. Nuk nchi jyon cyi'j pajbaj bix tik'ch taj cyxumlal. ²⁰ Nchi ocx sukel t-xee' cyken sant. Bix n-oc ke cyc'u'j cyi' chmambaj. Bix n-oc cyipen tu'n tbint ka' cyi' juntl xjal. At k'oj cyxol bix at chi'l cyc'u'j cyi' juntl xjal. Nuk ntzaj cyk'oj ti'j cykilca nbaj. Bix n-oc cyipen ti'j nuk tu'n cycaman cyibaj niy'tl xjal. Ncub ten pabl cyiib cyxol. N-el cyiiq'uen cyej xjal nchi oc lpe ti' juntl xnak'tzibil. ²¹ Nchi achen jte cyuya at. Byol xjalke. Bix nuk jaj taj cyxumlal nbint cyu'n. Bix nimtl ka' ncybincha kej xjal nchi niman cynaabl aj il. Cxe'l nkba'na cyey, tisenx e xi' nkba'na cyey tej ntena cyxola nejl, kej xjal nchi binchan jka' lu, mlay chi ocx tuj tcawbil Dios.

²² Pero cyekej xjal nche'x lpe ti'j Espiritu Santo, tzin tk'o'n Espiritu Santo cye cyjulu: N-octzen cyak' xjal cye, bix at cytzalajeb'l, bix at tuj ttzyal, bix at cypasensya. Min chi k'ojl cyi' xjal, sino n-oc cyipen ti'j tu'n tbint jun ba'n cye juntl. Nchi japan baj ti' cyyol cyuya xjal. ²³ Maansxseke oj nchi yolen cyuya xjal. Bix nchi tzyun cyiib twitz tka'yel. Kej xjal lephec ti' Espiritu Santo ju'wa, mintii' il ti'j tu'n t-xi' tkba'n jun ley alcey tu'n tbint cyu'n. ²⁴ Kej t-xjal Cristo, ma cyaj cycye'yen tachbil cyxumlal bix ti taj cynaabl aj il.

²⁵ Key ocslal, o kiik' kchunk'lal tu'n Espiritu Santo. Ju' tzunj, ko kbincha'c'a ti taj Espiritu Santo. ²⁶ Mi'n cub kbisen mas jawnex ko' cywitz juntl. Mi'n ko jyon tu'n ttzaj cyk'oj juntl. Mi'n ko achen jte kuya at bix ti' cyaak'en.

6

¹ Key ocslal, ka at tumel cyuyey at jun cyxola ma cub tz'ak tuj jun til, cywa'bajawtzen juntl maj, bix tuya mansbajil cyc'u'ja oj cyyolena tuya, key nchi nima Espiritu Santo. Pero cyc'ojlanx cyiiba, tu'ntzen mi'n chi cub tz'aka tuj til. ² Cyonenx cyiiba oj toc pena cyi'ja. Oj nchi onena ti'j cyiketx mastl ju'wa, njapan baj tajbil Cristo cyu'na.

³ Yaa'n tumel tu'n tjaw kniman kiib, cuma ka mintii' kpalte tuj kwitz, nko tzpet, cuma at kpalte. ⁴ Yaa'n tumel tu'n ktzalaj ti'j ka mas ma bint ku'n cywitz juntl. Mas ba'n tu'n kmlonte kex knaabl, bix ka ba'n ma bint ku'n, tu'n ktzalaj ti'j. ⁵ Ma k'oj te jaca juun xjal taak'en tu'n tbint tu'n. Ju' tzunj, il ti'j tu'n toc kc'u'j ti'j kex kaak'en.

⁶ Ejee'y o cyiik'a jxnak'tzibil ti' tyol Dios, ba'n tu'n t-xi' cyk'o'na ch'in waabj cye kej cyxnak'tzala bix ti'j alcey ba'n at cyuyey.

⁷ Mi'n chi el tzpeta ti'j te Dios ba'n tu'n. Mlay cub cyyajla'na jaxin. Jnbint cyu'na tisen jun awal twitzxin. Alcey ncu'x cyawa'na, jax cjawel cychmo'na. ⁸ Katzen ma cu'x cyawa'na tajbil cynaabla ka', cjaweltzen cychmo'na ccyamecya te junx maj. Pero ka ma cu'x cyawa'na tajbil Espiritu Santo, cjaweltzen cychmo'na cychunk'lala te junx maj k'o'n tu'n Espiritu Santo. ⁹ Ju' tzunj, mi'n ko sict tu'n kbinchante jba'n, cuma oj tpon tumel, cjawel kchmo'n jun ba'n tu'n Dios, ka min ma cyaj kk'o'n tu'n tbint ba'n ku'n. ¹⁰ Jatzen tyem ja'lewe tu'n tcu'x kawa'n. Ju' tzunj, kk'a'c kipen ti'j tu'n kbinchante jba'n te cykilca xjal, bix tneelxix cyekej ocslal ti' Cristo.

Njaw tnimsa'n Pablo ti'j o bint twitz cruz tu'n Kaaw Jesucristo

¹¹ Cycye'yenx ke nmak letra nxi' ntz'i'bena ja'lewe tu'n x nk'aba, tu'ntzen tbaj twi' nyola. C'oquel cyc'u'ja ti'j manc'bil nyola cyey.

¹² Kej xjal cyxola tzin cykba'n il ti'j tu'n tel keset ttz'umel cytz'albila, nchi yolenxin ju'wa nuk tu'n cyelxin ba'n tuj cywitz xjal, bix yaa'n tuj twitz Dios. Cycy'ixin tu'n ttzaj cyk'oj kej jawnex judío cyi'jxin tu'nj tzin cyk'umenxin ka nchi clet ke xjal nuk tu'nj tcyimlen Cristo twitz cruz. ¹³ Jax wu'na nuk cyajxin tu'n mi'n chi oc i'lenxin cyu'n jawnex judío, cuma amale tzint cykba'nxin il ti'j tu'n tel keset ttz'umel cytz'albila tu'n ccyuyatey tley Moisés, pero ejee'xxin min chi nimanxin cykil tley Moisés. Cyajxin tu'n cypeta nuk o'cx tu'n t-xi' cykba'nxin cyej jawnex judío aj Galacia ma cub cyi'j cyu'nxin. ¹⁴ Yal weya, min jaw nnimsan wiiba tu'nj nbint wu'na. Nuk o'cx cxe'l nk'umena ti'j o bint twitz cruz tu'n Kaaw Jesucristo. Tu'nj tcyimlenxin twitz cruz, ma naj nmojbal wiiba tuya cynaabl xjal te twitz tx'otx'. Mintii'tl wajbila tu'n wela ba'n tuj cywitz xjal te twitz tx'otx', bix jax mintii'tl wajbela tuj cywitzxin. ¹⁵ Mintii' il ti'j ka ma tz'oc jun techel ti' kxumlal bix ka min. J-il ti'j, jaj ka ma ko oc ac'aj xjal. ¹⁶ Cykilca kej xjal ma chi oc ac'aj tuj cyanem, chi temeltzen tuj ttzyal tuya Dios, bix ctzaal k'a'ben tu'j Dios cyi'jxin, bix jaxxix t-xjal Dioskexin.

¹⁷ Tetzen ja'lewe mi'ntltzen tz'oc cybi'na cyyol xtak' xnak'tzal, cuma nimxsen ma tz'oc pjet nxumlala tuj taak'en Jesús, te yec'bil inayenja kbalte jaxxix yol.

Jun k'olbebl tu'n Pablo cye ocslal aj Galacia

¹⁸ Cyiik'xita t-xtalbil Cawel kxol, Jesucristo, tuj cyanema, key hermano. O'cx nyolja.

Jun u'j e cub ttz'i'ben Pablo cye ocslal aj Efeso

Jun k'olbebl tu'n apóstol Pablo

¹ Key hermano tuj tnom te Efeso, Inayena Pablo. Scy'o'n kena tu'n Dios tu'n wajbena ti'j waak'ena te t-xel Cristo Jesús. Ncub ntz'i'bena ja u'j lu te cyeey, ejee'y n-ocxix ke cyc'u'j ti'j Cristo Jesús. ² Tzajxit t-xtalbil Kman Dios tuya Kaaw Jesucristo cyibaja, bix cyu'nxit-xin chi temey tuj ttz'yal.

Ntzaj tk'o'n Dios cykil t-xtalbilxin kibaj nuk tu'n'j o tz'el ttz'q'uel Jesús twitz cruz

³ Ko nimanxit Dios, tman Kaaw Jesucristo. Tu'n'j kmojbabl kiib tuya Cristo o tzaj tk'o'n Dios ke cykil xtalbil at tuj cya'j, bix ja Espíritu Santo ntzaj k'inte jxtalbil te ke. ⁴ Jatxe ootxa otk cub tninc'u'n Dios tu'n kco'pj tu'n kel junx tuya Cristo. Tej mitkna'x tshint twitz tx'otx', otk baj tninc'u'n Dios tu'n ttzaj tk'o'n xin'j xtalbil lu te ke. E tbincha Dios lu ki'j nuk tu'n Cristo. E cub tninc'u'nxin tu'n kel junx tuya Cristo tu'ntzen kten sakkix bix tu'n mintii' kil twitzxin. ⁵ Tu'n'j tk'ak'bil te'u'jxin ki'j, jatxe tuj tneel e baj tninc'u'nxin tu'n koc te tcwalxin tu'n Jesucristo. Ju' e cub tninc'u'nxin tu'n ttzaj tk'o'nxin ke, ⁶ tu'ntzen tjaw knimsa'n tbixin cykil t-xtalbilxin kibaj. A tanemxin ti'j Tcwalxin, bix tu'n'j kmojbabl kiib tuya Tcwalxin, jax ju'x o tiik'xin ejoo' te tcwalxin. ⁷ Tisen pres ko' tjak' kil nejl, pero ya at kmojbabl kiib tuya Cristo. Ju' tzunj ya o ko clet tuj kil. E chjet kil tu'n Tcwalxin tej tel ttz'q'uel bix e cym te kxel. Yal ja'lewe o najset kil. ⁸ ¡Nimxsen jun t-xtalbil Dios ntzaj tk'o'nxin ke! ⁸ ¡Nimxsen jun ba'n o tzaj tk'o'nxin ke! ¡Nimxsen tnaabl Dios te nic'ulte cykilcaj lu! ⁹ J-e baj tninc'u'n Dios jatxe ootxa, jaj tu'n tel cykilca junx tjak' tcawbil Cristo. Bix o tzaj tk'o'n Dios ke tu'n tel kniy' ti'j jaj e cub tninc'u'nxin jatxe tuj tneel pero e'wen ta' kwitz nejl. ¹⁰ Oj tjanan baj cykilca tk'i'jjal, o niq'uet tu'n Dios cykilcaj at tuj cya'j bix twitz tx'otx' cyjel tjak' tcawbil Cristo.

¹¹ Key hermano, tu'n kmojbabl kiib tuya Kaaw Jesús o ko oc te t-xjal Dios. Jatxe tuj tneel o tnic'u Dios tu'n kcox te t-xjalxin, bix nbint tu'nxin cykilcaj o baj tninc'u'nxin ki'j. ¹² Ejoo'tzen judío tneel tnom ayon ti'j tulel Cristo. E bint tu'n Dios tu'n koca te t-xjalxin tu'ntzen tjaw knimsa'n tbixin.

¹³ Yaltzen cyeey ocslal yaa'n judío, jax t-xjal Dioskey. Tej toc cybi'na jyol jaxxix ti'j co'pbil ke, oc ke cyc'u'ja ti' Jesús. Ju' tzunj e tzaj tk'o'n Dios Espíritu Santo tuj cyanema, tisen otk tkba Dios, tetzen techel t-xjalzten Dios ejee'y. ¹⁴ Najben Espíritu Santo ke tu'ntzen tzinen ta' alcye jun k'ij cxe'l tii'n Dios ejoo' tu'n kten tuyaxin te junx maj. Jatzen kkabj. O cub tninc'u'n Dios ju'wa tu'ntzen tjaw knimsa'n tbixin.

Tej tna'n Pablo Dios tu'n ttzaj tk'o'n Dios cynaabl ocslal

¹⁵ Cuma t-xjal Dios ejee'y, ju' tzunj min nchin we'ya nna'na Dios cyi'ja. O nbi'ya nim n-oc ke cyc'u'ja ti' Kaaw Jesús bix nim tk'ak'bil cyc'u'ja at cyi' cabtl ocslal. ¹⁶ Ojzen nna'na Dios cyi'ja, ¹⁷ nxi'xix ncubsa'na nwitzá te jawnex Kman Dios, tman Kaaw Jesucristo, tu'n ttzaj tk'o'nxin cynaabla. Bix nxi' nkaniya texin tu'n t-xi' tyeec'axin cyeey ti ttenxin, tu'ntzen tel mas cyni'ya ti'j Dios. ¹⁸ Bix nxi' ncubsa'na nwitzá texin tu'n tjkontexin cynaabla tu'ntzen tel cyni'ya ti'j cykilcaj tzin cyyo'na o tkba Dios tu'n tk'onte bix o tzaj ttcxo'nxin ejee'y te niy'belte. Ejoo' ocslal ckiik'el jun jawnex kxab te Dios. ¹⁹ Bix nxi' nkaniya texin tu'n tel cyni'ya ti'j jawnexen junx maj tipemalxin kibaj, bix mintey'xse tumel tii'n. Jtipemalxin najben texin tu'n ttzaj tonenxin ejoo', ²⁰ ju'xse tipemalxin ajben texin tej tjatz títz'jsa'nxin Cristo tuj cyamecy, bix ju'xse tipemalxin e tzaj tk'o'nxin te Cristo tu'n tcub ke tuj tmank'abxin tuj cya'j te cawel. ²¹ O tzaj tk'o'n Dios te Cristo tu'n tcawen cyibaj cykil cawel. O tzaj tk'o'nxin te Cristo tu'n tcawen yaa'n nuk tuj ja tyem lu, sino ju'x tuj jtyem tzul. ²² O cyaj tk'o'n Dios cykilca at te Cristo tu'n tten tjak' tcawbil. Bix tex Cristo o tzaj tk'o'nxin tu'n tcawen tibaj cykilca ocslal. ²³ Ejoo' ocslal tisen t-xumlal Cristo, jkwi' nk'onte kchunk'lal te junx maj. Mintii' jun lugar mintn-alxin tuj, sino at-xin.

2

Ma ko clet tu'n t-xtalbil Dios kibaj

¹ Key hermano, nejl cymne ete'y. Amale i'tzet cyxumlala, cymne ete'y, cuma e tenkey tuj cyila. ² Nejl ka' e cybinchay, tisen nbint cyu'n kej xjal lepch nuk ti' tnaabl te twitz tx'otx'. Bix e cymney taaw il, jaj taaw il ncawen cyibaj iman ete' kibajxe min chic'aj, jaj taaw il nak'anan tuj cyanem kej xjal min txi' cyniman tyol Dios. ³ Ju' e tema cykil ko' nejl. E tena ko' cyxolj xjal yaa'n ocslal. Nuk e xi' lpe ko' ti'j nuk tik'ch taj kxumlal bix ti'j nuk tik'ch ka' e cub kbisen. Ju' tzunj e tzaa' nim tk'oj Dios kibaj, tisen ja'lewe ntzaj tk'oj Dios cyibaj kej xjal min cyocsla Dios. ⁴ Nim n-oc tk'o'ntlxin lastim ke, cuma nim n-oc kak' texin. ⁵ Nejl

cyimne ko' tu'n kil. Pero tu'nj kmojbabl kiib tuya Cristo, o tzaj tk'o'n Dios ke jaxj chunk'lal e tzaj tk'o'nxin te Cristo tej tjatz titz'jsa'nxin tuj cyamecy. Tu'n tzunj t-xtalbil Dios kibaj, ma ko cleta. ⁶ At mas tipemal Cristo Jesús tu'n tcawen tibaj cykilca, bix tu'n kmojbabl kiib tuyaxin, nko cawen junx tuyaxin, tu'n kcaman ti'j taaw il. ⁷ Ejee' tzunj lu kk'inemal o tzaj tk'o'nxin te ke, ejoo' at kmojbabl kiib tuya Cristo Jesús. Bix tu'n tzunj kk'inemal tu'n Dios te ke, ejoo' t-xjalxin, cxe'l tyeeec'an Dios te cykil xjal cyuj kej tyem chi ul, nimxsen jun t-xtalbilxin te ke, ejoo' ocslal, tu'ntzen tchic'ajax tk'ak'bil tc'u'jxin ki'j. ⁸ Tu'n t-xtalbil Dios kibaj, bix cuma o tz'oc ke kc'u'j ti' Tcwalxin, o ko clet tuj il. Yaa'n ku'nx ma ko cleta, sino ja co'pbil ke jun kcotz tu'n Dios. ⁹ Yaa'n tu'n ti jilel ba'n nbint ku'n ko cletel, sino tu'nj co'pbil ke o tak' Dios, tu'ntzen min-al jun ke ba'n tu'n tjaw tniman tiib ti'j twitz Dios. ¹⁰ O ko clet nuk tu'nj t-xtalbil Dios o tzaj tk'o'n ke. Tu'nj kmojbabl kiib tuya Cristo Jesús o ko oc te t-xjal Dios, tu'ntzen tbint jun ba'n ku'n. Ti'j tzunja e tbincha' Dios ejoo' jatxe tuj tneel.

At ttxubt xjal kxol jaj tcyimlen Cristo twitz cruz

¹¹ Ju' tzunj, key hermano, cyna'mc'a yaa'n ejee'y t-xjal Dios nejl, cuma yaa'n aj Israelkey. Ncub cybisen aj Israel ja'lewe nuk ejee' t-xjal Dios, cuma at jun techel n-oc cyk'o'n ti' cyxumlal. Ejee' tzin cykba'n juntl wik xjal yaa'n te Dioskey, cuma mintii' techel n-oc ti' cyxumlala. Pero n-oc cyk'o'n techel cyi'j nuk tu'n cyex cyk'ab. ¹² Nejl ti'jxe xjal te Israel ete'y. Mintii' cymojbabl cyiiba tuya Cristo, bix mintii' tumel cyuyey ti'j cykilcaj otk tkba Dios tu'n tk'onte. E tenkey twitz tx'otx' min-al jaxxix Dios cyuyey, bix min ayonkey ti'j jun co'pbil cyey. ¹³ Pero ja'lewe at cymojbabl cyiiba tuya Cristo Jesús. Amale nakhet ete'y ti' Dios nejl, pero ja'lewe, tu'nj tcyimlen Cristo, at cyoclena tuya Dios. ¹⁴ Nejl at jun k'oj cyxol xjal judío bix kej xjal yaa'n judío. Ja k'oj lu tisen jun tappya tcu'x cyxol cyca'bel wikan. Pero ja'lewe ejee'y yaa'n judío bix ejoo' judío mintii' k'oj tcu'x kxol. Cykilca ko' at kmojbabl kiib tuya Cristo, bix ju' tzunj junx wik xjal ko'. ¹⁵ Jtappya tcu'x cyxol cyca'bel wikan xjal nejl, jatzen leyj e cyaj tk'o'n Dios te cye judío nejl nimc'a iken tu'n. Pero tej tcyim Cristo twitz cruz, bi'x el ti'n tipemal jcyey judío te pa'lte cye xjal, tu'ntzen cyoc cykil xjal te junx t-xjal Dios. Ju'tzen e cwa' tk'o'n Cristo ttxubtxjal t-xol cyca'bel wikan. ¹⁶ Tu'ntzen tcyimlen Cristo twitz cruz, ejoo' judío bix ejee'y yaa'n judío o ko oc te junx cloj xjal. Cykiltzen ko' ba'n kten tuj ttzyal tuya Kman Dios. Tu'n tcyimlen Cristo e cyma' k'oj cyxol judío bix kej yaa'n judío. ¹⁷ Tej tul Cristo twitz tx'otx', bixsen e tkbaxin tpochalj ttxubtxjal cye cykilca xjal. E tk'umexin cyey, ejee'y yaa'n judío min otk cyiik'a ley te Dios, bix e tk'umexin te cye judío otk cyiik' ley te Dios bix oc cybi'n jaca k'ij. ¹⁸ Judío'le ko', bix yaa'nle judío ko', tu'n Cristo ba'n tu'n kcox cykilca ko' twitz Dios. Bix tu'n junx Espiritu Santo at koclen tu'n kcox twitz Dios.

¹⁹ Entonces, key hermano yaa'n judío, nejl yaa'n ejee'y t-xjal Dios. Pero yaa'n ti'jxe ete'y te t-xjal Dios, sino t-xjal Dios key kuyena. Ya junx elminakey tuya Dios. ²⁰ Ejoo' t-xjal Dios tisen jun jaa'. Ke cyxnak'tzibil ke tyolel Dios bix ke t-xel Jesús o cyaj cyk'o'n ke, ejee' tzunja tisen tk'uk'lel jaa'. Bix Cristo Jesús tisentzen xcbil te tipemal, ²¹ tu'ntzen cyiw jaa', tu'ntzen mi'n tz'el xitj niy' ttx'otx'el. Tisentzen jun jaa' tlichon tiib tuya xcbil bix ju'tzen nbinne jun jaa', ju'xsen kewa ejoo' ocslal tuya Cristo. Tu'nj kmojbabl kiib tuya Cristo, junx elnina t-xjal Dios ko', tu'ntzen kajben te Dios te sakkix t-xjal. ²² Bix cyuyaxa, tu'nj cymojbabl cyiiba tuya Cristo, bix t-xjal tizen Dios ejee'y, bix atzen Espiritu Santo cyuyey.

3

Jun taak'en Pablo tu'n t-xi' tkba'n tpochal Cristo Jesús te cyey yaa'n judío

¹ Entonces, key hermano, ejee'y ocslal yaa'n judío ete'y tajlal t-xjal Dios, bix ju' tzunj inayena, Pablo, nchin na'na Dios cyi'ja. Ntiinc'tza tuj tzee' nuk ti' tk'umj tpochal Cristo Jesús te cyey yaa'n judío. ² Jatzen waak'enja o tzaj tk'o'n Dios, bix ntzki'na o cybiy ti'j ja waak'ena lu. ³ O cybiy Dios o tzaj tyeeec'an weya j-e baj tninc'u'n nejl pero min e tyeeec'a. Matzen cyaj ntz'i'bena ch'in ti'j e baj tninc'u'n Dios ki'j cykilca ko' jatxe ootxa. ⁴ Oj cyak'a xnak'tzal ti'j ma ntz'i'biya tuj wu'ja, q'uelel cyni'ya ti'j nim o tz'el weya nni'ya ti'j ti e baj tninc'u'n Dios min e chic'ajax nejl. Jatzen e cub tninc'u'n Dios ti'j, jaj tu'n tcub tk'o'n Dios cykilca at tjak' tcawbil Cristo. ⁵ Ootxa min-al jun el tniy' ti'j ti e baj tninc'u'n Dios, pero ja'lewe o tzaj tyeeec'an Dios tu'n Espiritu Santo cye ke t-xel Jesús bix ke tyolel Dios o tzaj cyk'o'n cyiib tu'n cyajben tuj taak'en Dios. ⁶ Bix alcyey o tzaj tyeeec'an Dios cye t-xel Jesús bix ke tyolel Dios ja tzunj lu: Yaa'n nuk ejee' ocslal judío, sino cyuyax ke ocslal yaa'n judío ccyiik'el cykilj o tak' Dios. Tu'nj oj toc cyocsla'n co'pbil tu'n Cristo Jesús, cyuyaxsen chi ouel tajlal t-xjal Dios.

⁷ Yaa'n inayena scy'olte tu'n tk'umj tyol Dios wu'na. Jatzen Dios o tzaj k'onte weya tu'n t-xi' nk'umena ja yol lu, bix tu'n tipemalxin nbint wu'na. ⁸ Amale inayenta mas aj il nejl twitz cykilca xjal tuj nwitz, pero o tzaj tk'o'n Dios waak'ena te cxe'l nk'umena tyol Dios cye xjal yaa'n judío. Bix jnxi' nk'umena, jaj ka ma tz'oc tk'on tiib jun xjal ti' Cristo, atzen tk'inemal tbanelxsen mi nuk binel tajlal. ⁹ O tzaj tk'o'n Dios weya tu'n t-xi' nk'umena cye

cykil xjal ti'j e baj tninc'u'n Dios jatxe ootxa tuj ewjel. Tuj tneel, jxin e binchante cykilca at min e cub tyee'c' anxin j-e baj tninc'u'nxin, ¹⁰ tu'ntzen cyjaw klee' ja'lewe cykilca ke ángel bix ke biman. E tajbe Dios tu'n kajben ejoo' ocslal te jun yec'bil cywitz kej ángel bix kej biman nchi cawen cyxol cya'j, tu'ntzen tel cyniy' ti'j nimxsen ba'n tu'n Dios. ¹¹ Cykil tzunj lu e baj tninc'u'n Dios jatxe tuj tneel, bix tu'n Cristo Jesús, Kaaw, e pja' bint. ¹² Bix at kmojbabl kiib tuya Cristo tu'nj kocslabl ti'j. Ju' tzunj tuya cykil kc'u'j bix mintii' ttzi ki'j, ba'n tu'n kocx twitz Kman Dios. ¹³ Entonces, key hermano, ntiina tuj tzee' tzalu, cuma e xi' nkba'na tyol Dios cyey. Niy'x q'uixc'aj wu'na, pero cxe'l ncubsa'na nwitza cyey mi'n baj cyc'u'ja ti pena ntiiniya, sino o'cx cxe'l cyk'o'na chjonte wi'ja.

Mlay tz'el kniy' ti'j niy' ch'in pommna tk'ak'bil tc'u'j Cristo

¹⁴ Cuma n-el nni'ya ti'j ejee'y t-xjal Dios, ju' tzunj nchin cub majeya twitz Kman Dios cyi'ja. ¹⁵ Jatzen Kmanj, bix ju' tzunj ejoo' ocslal tcwal Dios. Jaxin Cyman kej o chi pon tuj cya'j, bix Cyman cyej ete'x twitz tx'otx'. ¹⁶ Bix jawnexsen tbixin. Ojtzen nchin na'na Kman cyi'ja, tzin nkaniya texin tu'n ttzaj tk'o'nxin tipemalxin tuj cyanema tu'n Espiritu Santo, tu'ntzen tciywset cyanema. ¹⁷ Bix nchin kanena te Dios tu'n toc ke cyc'u'ja te junx maj ti'j Cristo, tu'ntzen tten Cristo tuj cyanema. Ka wi'l cyocslaba ti'j Cristo tuj cyanema ju'wa, cyiwntzen ta' tk'ak'bil cyc'u'ja, tisen jun tzee' min yucch ka wi'l tloc' junx maj tuj tx'otx'. ¹⁸ Ka nbint cyu'na ju'wa, ejee'y ocslal cyuyax cykil niy'tl ocslal q'uelel cyni'ya ti'j niy' ch'in pommna baj tk'ak'bil tc'u'j Cristo. ¹⁹ Mlay bint tmloj cuma nimxsen. Ojtzen tel cyni'ya ti'j jtk'ak'bil tc'u'j Cristo, amale mint tz'el cyni'ya ti'j entera, jax ctzketel cynaaba tisen taj Dios.

²⁰ ¡Ko nimanxiti tbi Dios! ¡Jawnnexsen tipemal Dios! Bix tuya nim tipemalxin nak'ananxin tuj kanem. Mintii' jun mi'nt bint tu'nxin. Ba'n tu'n ttzaj tk'o'nxin mastl twitzj nxi' kkanen, bix mas ba'n nbint tu'nxin twitzj ncub kbisen. ²¹ ¡Nimjxit Dios te junx maj ku'n, ejoo' t-xjal Dios at kmojbabl kiib tuya Cristo Jesús!

4

Ja Espiritu Santo k'olte jun kmojbabl kiib

¹ Entonces, key hermano, Dios o txconte cyey tu'n cyoca te t-xjalxin. Ju' tzunj nchin cubsan nwitza cyey tu'n t-xi' cyii'na jun cynaaba jiquen, cuma t-xjal Dioskey. Yaltzen weya, ntiina tuj tzee' nuk tu'n nchin ajbe'na te Kaaw. ² Mi'n jaw cyniman cyiiba, bix mi'n baj t-xelen tiib cyk'o'ja, bix tenx cypasensyey. Ka cyaja t-xi' cyee'c'ana tk'ak'bil cyc'u'ja te juntl xjal, cxe'l cyonena. ³ Mi'n txi' cyxoo'na cymojbabl cyiiba o tzaj tk'o'n Espiritu Santo cyey, sino cyiyoma tu'n tel cynaaba junx, tu'ntzen cytena tuj ttzyal. ⁴ Nxi' nkba'na cyey junx q'uelel cynaaba, cuma tuj twitz Dios nuk junx cloj elnina t-xjal. Bix nuk junx Espiritu Santo at. Bix nuk junx tcawbil Dios tzul, bix o txcon Dios ki'j te ayolte tzunj tcawbil. ⁵ Junx Kaaw at, bix nuk junx kocslabl ti' Kaaw at, bix at nuk junx bautismo, jaj junx chombil ke tu'n koc te junx cloj tuya Dios. ⁶ Bix nuk junx Kman Dios at kibaj. Jaxin ncawen tibaj cykilca ko', bix nak'ananxin kxol cykilca ko', bix at-xin tuj cykilca kanem.

⁷ Junx elnina ko', pero kaak'en tec'alex te juun. O tzaj tk'o'n Cristo te jaca juun ke tec'alex taak'en tu'n kajben cyxol ocslal, la' niy' ch'in o tak' Cristo te jaca juun ke. ⁸ C'oquel cyce'yena ti toc tu'n tyol Dios ti'j t-xtalbil Cristo cye t-xjal Dios. Tzi cyjulu: "Tej tjax Cristo tuj cya'j, e tyee'c'atzen otk tcolxin ke xjal tuj il, bix e tzaj tk'o'nxin tec'ax taak'en juun," tzi tyol Dios. ⁹ Yaltzen ti'j ti japenina jyol "e jaxxin tuj cya'j," katzen jax e jaxxin tuj cya'j, jax il ti'j e cu'tzxin tuj cya'j tuj tneel tu'n tulxin hasta maa twitz tx'otx'. ¹⁰ Jax xin e cu'tz tuj cya'j bix ul twitz tx'otx', jaxxin o japan tuj cya'j cyibajxe twitz cya'j, tu'ntzen ttenxin tibajxe cykilca. Mintii' jun lugar mint o tziy'xin tuj.

¹¹ Yaltzen ti'j ti japenina jyol "e tzaj tk'o'nxin tec'ax taak'en juun," jaj ti tten tu'n tak'anan jun ocslal tu'n tajben cye niy'tl ocslal te tajbel cye. O tzaj tk'o'nxin te juun cye tu'n cyajben te t-xelxin. Bix te juuntl o tzaj tk'o'nxin te k'umlte ti otk tyee'c'ana Dios cye. Bix te juuntl o tzaj tk'o'nxin tu'n tcub cyc'u'j kej xjal yaa'n ocslal tu'n cyocslan. Bix te juuntl o tzaj tk'o'nxin te yec'lecte cye xjal bix te xnak'tzal ti japenina tyol Dios. ¹² Bix otzen tzaj tk'o'nxin cyaak'en te cykilca, tu'ntzen cyonen cye niy'tl ocslal tu'n cyajben tuj taak'en Dios, bix tu'ntzen cyajben tu'n ttzket cynaabl ke t-xjal Cristo. ¹³ Katzen najben kaak'en te jaca juun te tajbel te cabtl, ko pomeltzen maje junx tuj kocslabl, bix q'uelel kniy' ti' Tcwal Dios, bix ctzketeltzen knaabl, hasta ojxe tpon knaabl tisenj te Cristo tnaabl. ¹⁴ Oj ttzket knaabl ju'wa, wa'lxixse ko' tuj kocslabl. Yaa'ntzen tisen jun nee' ko' mintii' tipen oj tul juntl xjal xbi'l tuya jun ac'aj t-xnak'tzbiil te ya'l'ate ke. Katzen yaa'n wa'lxix ko' tuj kocslabl, bixsen q'uiyel tiken jt-xnak'tzbiil ejoo' tu'n kpon tuj il, tisen jun cyk'i'k niy' tiken jun tii' tu'n tpon t-xoo'n nakch. ¹⁵ Mi'n kbinche tisen kej xtak' xjal, sino cxe'lxix kka'na alcyey jaxxix. Bix oj t-xi' kk'umen, il ti'j tuya jun tk'ak'bil kc'u'j. Ka nbint ku'n ju'wa, ctzketeltzen knaabl tisenj te Kaaw, ja Cristo. ¹⁶ Jaxin tisen kwi', bix ejoo' t-xjalxin tisen t-xumlalxin. Ja kwi' ncawen ti cbinel tu'n

kxumlal. Bix tec'ax juun iken tu'n kxumlal najben jaa' tu'n tajbe'na. Ka najben jaca juun iken tu'n kxumlal, n-onentzen te juntl, bix ba'ntzen ta' kxumlal ju'wa, bix ntz'iytzen. Ju'xse te ke ejoo' ocslal. Oj najben jaca juun ke, ejoo' ocslal, cye niy'tl ocslal tuyaj kaak'en o kiik' tu'n Kaaw, jatzen n-oc k'ak'en tc'u'j jun ti' juntl, bix ko cywixeltzen tuj kocslabl.

Tej kocslan ti' Dios, e tzaj tk'o'n Dios jun ac'aj kchunk'lal

¹⁷ Entonces, key hermano, tu'n tcawbil Kaaw cxe'l nkba'na cyey tu'n mi'n cybinchatla tisen kej xjal yaa'n ocslal ti' Dios. Ejee' tzunja mintii' tajbel cynaabl twitz Dios, ¹⁸ bix min tz'el cyniy' ti'j ti taj Dios. Bix nakchssen ete' ti' Dios. Nuk moš ta' cynaabl tu'n cyxi' tuj be jiquen, cuma nuk o'cx tuj be ka' nche'xa. ¹⁹ Ya mintii'tl cych'ixew oj nbint il cyu'n. O tz'oc cyk'on cyiib te nuk tik'ch cyaj. Min nchi we' tu'n nuk nchi yaʒen cyuya nuk alk'ch xjal. ²⁰ Katzen ejee'y ocslal nbint cyu'na ju'wa, pero yaa'n te Cristo kbalte tu'n tbin cyu'na ju'wa. ²¹ Ka o tz'el cyni'ya ti'j jaxxix e cyaj t-xnak'tza'n Jesús bix e cyaj tyeec'anxin tej ttenxin twitz tx'otx', bix ka cyaja che'x lpey ti' tyolxin, ²² cyk'oncjtzen tisenj cytena nejl. Ya mi'ntzen chi jyontla ti'j tik'ch e cyajbey nejl, cuma puro tz'il ootxa cychunk'lala. Niy'j cyachbila nejl nuk te sbulte cyey tu'n cyxi'y tuj il. ²³ Il ti'j cych'ixpum cynaabla tu'n toc te ac'aj. ²⁴ Tej cyocslana ti' Dios, e tzaj tk'o'n Dios cyey jun ac'aj cynaabla. Ja tzunj ac'aj cynaabla tisenj tnaabl Dios, bix jiquen bix sakkix bix tbanelxix tnaablxin. Iltzen ti'j tu'n tel cyxoo'na jk'anak bix tu'n cyocxa tuj ac'aj.

²⁵ ¿Titzen tten tu'n cyocxa tuj ac'aj cynaabla? Il ti'j cyjel cyk'o'na cyxtak'bila. Oj cyyolena cyuya ke cyuyey, pero tujxix tumel bix jaxxix cyyola, cuma ka nchi xtak'ena, bi'x chi xe'l xitja tuj cymojobabl cyiiba.

²⁶ Bix ka ma chi jaw k'o'jla, mi'n cyak'a amle'n te cyk'o'ja, sino cybincha'y tu'n tbaj tilel tex k'ij. ²⁷ Katzen tzinxax chi k'o'jla, nxi'tzen cyk'o'na amle'n te taaw il tu'n tcaman cyi'ja.

²⁸ Bix kej o chi alk'an, mi'ntzen chi alk'antl. Ba'n tu'n cyak'anaya tuj tumel tu'n cyitz'ja, bix tu'n t-xi' cyonena juntl xjal pena n-it'z'ja.

²⁹ Ojzen cyocxa tuj ac'aj cynaabla, mi'ntzen cyyoley xmeletz'tzen yol, sino chi yolela tujxix tumel, tu'ntzen tajben cyyola cye kej nchi oc ebinte.

³⁰ Mi'n cub cyk'o'na Espiritu Santo tuj bis. At Espiritu Santo te Dios cyuyey te techel ejee'y t-xjal Dios, bix najben tu'n tzinen ta' tu'n cyco'pja tu'n Dios te junx maj oj tpon alcye k'ij tu'n kco'pj. ³¹ Cybajsanc'aja cyiic'bila bix jtik'ch cyk'o'ja, bix cysitz'bila, bix jka' cyyola tzin cykba'na ti' juntl xjal. ³² Mi'ntzen cybinchay jlu, sino tk'ak'bil cyc'u'ja ti' cyuyey cbinel cyu'na, bix q'uelel cyni'ya ti'j ti ilel ta' juntl. Cwel cynajsa'na til juntl cyuyey, tisen o cub tnajsa'n Dios ke kil tu'n tcyimlen Cristo.

5

Ti tten kchunk'lal ejoo' ocslal

¹ E cub tnajsa'n Dios cyey cyil, bix ejee'y tcwal Kman Dios. Ju' tzunj cynomale tu'n tcub cynajsa'na cyil xjal, cuma tcwal Dioskey. ² Juch cyc'u'ja ti' cyuyey, tisen te Cristo oc juch tc'u'jxin ki'j. Tu'n tk'ak'bil tc'u'jxin ki'j, oc tk'on tiibxin ki'j bix e cyimxin te kxel tu'n kil. Teyimlenxin te jun obyil twitz Dios, bix ba'n e'la twitz Dios, tisen ba'n n-e'la jun c'oc'sbil c'o'cj twitz jun xjal.

³ Yaltzen ti'j achbil te aj pajlel, mi'ntzen cybinchaja cyxola. Bix mi'ntzen tz'oc cyachena jte cyuyey at. Kej xjal ocslal mlay cybinchatl kej ka' ju'wa. ⁴ Bix mi'n chi yolena ti' jun ch'ixbajil yol bix mi'n cyyoley ti' yol mintii' tajbelel, bix mi'n chi yolena tuya jawnex yol nuk nxi' xe't nuk te cynimbil cyiiba twitz cyuyey tajbelel, sino cyyeeq'uey cyyola ejee'y jun wik xjal nk'onte chjonte te Dios. ⁵ Cytzki'na kej xjal nchi yaʒen cyuya pajbaj bix kej nchi yolen tz'il yol, bix kej nuk tik'ch cyaj tisenxssen nchi niman twitz sant, ejee' tzunja mintii' tu'n cykaben tuj lugar jaa' nchi cawena Cristo tuya Kman Dios.

⁶ Atzen juun xjal tzin cykba'n ba'n tu'n tbin cykilj lu cyu'n. Pero mi'n chi cub sbu'na cyu'n, cuma ke cyej n-el iig'uyente Dios chi oqueltzen tuj jun nintzaj castiwa oj ttzaj tk'oj Dios. ⁷ Ju' tzunj mi'ntzen chi cub majey cyuya kej xjal tzin cykba'n jlu. ⁸ Nejl ete' tzuna tuj kloj, cuma min el cyni'ya ti'j ti tten tu'n t-xi' cyii'na jun cynaabla jiquen. Pero yaltzen ja'lewe, ete' tzuna tuj spi'yen, cuma ya ocslal tzunkey ti' Kaaw bix n-eltzen cyni'ya ti'j ti tajxin. Ju' tzunj chi tenc'axixa tuj tumel, cuma ya ete'y tuj spi'yen bix yaa'n tuj kloj. ⁹ Ka ete'y tuj spi'yen, k'i'ntzen jun cynaabla ba'n, bix jiquenxix chi beteley, bix jaxxix chi yoleley. ¹⁰ C'oquelixix cyc'u'ja ti'j tu'n tbin cyu'na jaj q'uelel ba'n twitz Kaaw. ¹¹ Mi'n chi cub tena cyuya kej ete' tuj kloj oj nchi binchan jun yaa'n ba'n min tz'ajben, sino cxe'lxix cyii'na tuj tumel. Katzen tuj tumel k'i'n cyu'na cywitz, cchic'ajaxeltzen cynaabl kej lu yaa'n ba'n. ¹² Ka'xsen jnbint cyu'n tuj ewjel, hasta jun kch'ixew n-el kii'n ka nko yolen ti'j nbint cyu'n. ¹³ Pero oj t-xi' cyii'na jun cynaabla jiquen, bix c'oquel maje cynaabla tuya cynaabl kej nbint ka' cyu'n tuj ewjel, cchic'ajaxeltzen cynaabl yaa'n jiquen, tisentzen tuj spi'yen

nchic'ajaxtzen ti jilel at. ¹⁴Tzin tkba'n tyol Dios cyjulu: "Ejee'y min tz'el cyni'ya ti'j, cyc'asem cyiiba, bix chi wey'tza bix cypa'mel cyiiba cyi'kej ete' tuj kloj, bix Cristo cjkolte cynaabla tu'n tel cyni'ya ti'j," tzi tyol Dios.

¹⁵Entonces, key hermano, cybisenx ti'j ti tten tu'n cybeta tuj tumel. Mi'n chi oca tisen min tz'el cyni'ya ti'j, sino q'uelel cyni'ya ti'j. ¹⁶Cybinchama jun ba'n looj lux tyem ata, cuma nim tka'yel nbaj ja'lewe. ¹⁷Ju' tzunj mi'n chi oca tisen mintii' tumel cyuyey ti'j nbaj ja'lewe, sino cyk'o'nc cyc'u'ja ti'j tu'n tel cyni'ya ti'j ti taj Kaaw tu'n tshint cyu'na te ja tyem ja'lewe.

¹⁸Oj n-oc jun xjal te bola tu'n vino, ja vino ncawen tibaj, bix nxi' tnaabl tuj il tu'n. Ju' tzunj mi'nxit cawen vino cyibaja, sino jaxit Espiritu Santo cawen cyibaja. ¹⁹Ka ete'y tjak' tcawbil Espiritu Santo, chi bitzela cyxola te Kaaw ti' jun bitz tuya cykil cyc'u'ja bix tuya jun tzalajel ntzajitz'j tuj cyanema tu'n Espiritu Santo. ²⁰Bix ti' tbi Kaaw Jesucristo cxe'l cyc'o'na chjonte te Kman Dios ti' cykilca.

Ti tten tu'n tten kmojbabl kiib tuj kja

²¹Bix cxe'l cyyeec'ana cynimbila cye xjal tu'nj nchi nimena twitz Cristo.

²²Key hermano, cxe'l nkba'na ch'in cyey ti'j ti tten tu'n t-xi' cyyeec'ana cynimbila cye xjal.

Key xuu, cxe'l cyczuyana alcye tkba cychmila, tu'ntzen t-xi' cyyeec'ana cynimbila twitz Cristo. ²³Tisenx ja Cristo ncawen kibaj ejoo' ocslal, jaxsen ju'x at tcawbil jun xinak tibaj t-xu'l. ²⁴Il ti'j jac'a chi niman ke xuu twitz cychmil tuj cykilca, tisen ejoo' ocslal n-oc kbi'n Cristo.

²⁵Yaltzen cyey xinak, c'oquel cyak' cyxu'la cyey, tisenxj oc cyak' ocslal te Cristo. Jaxin jun yec'bil te ke ti tten tu'n toc tak' jun xjal ke. Oc tk'on tiibxin kuya hasta e cyimxin ki'j, ²⁶tu'ntzen tel txjet kil ki'j, tisen tzin tkba'n tyol Dios, bix tu'ntzen koc te t-xjal Dios. ²⁷Ju'tzen tzin bint kten tu'nxin, tu'ntzen alcye jun k'ij ko pomel twitzxin mintii' ktz'ilel, bix sakkix te junx maj. Ko oquel tisen jun oybil mintii' tpattel.

²⁸Ju' tzunj, key xinak, tisen cyey c'ojla'n cyxumlala cyu'na, jaxsen ju'x cyc'ojlay ke cyxu'la. Jxinak n-oc tak' tiib te, jax ju'x n-oc tak' t-xu'lxin texin, cuma t-xu'lxin tisenx ja t-xumlalxin. ²⁹Min-al xjal n-el iiq'uyente t-xumlal, sino nuk o'cx n-oc tc'a'chen bix n-oc t'ojla'n. Ju'xsen nc'ojlan Cristo ki'j, ejoo' t-xjalxin, ³⁰cuma tisen t-xumlalxin ko'. ³¹Cycye'yenc ti toc tu'n ootxa tyol Dios. Tzi cyjulu: "Oj tpon tumel tu'n tmaje jun xinak tuya t-xu'l, mintii'xix tu'n tnajantl tuya tman bix tuya ttxu, sino ya at tu'n tnajantl tec'ax tuya t-xu'l, bix cyca'bel chi oquel te junx xumlal baj," tzi tyol Dios. ³²Ja yol lu tuj ewjel ta' ch'in bix min chic'ajax cykilca ti japenina nejl. Pero yaltzen ja'lewe jawnexsen japenina te ke. Tuj nwitzta nyolen ja yol lu ti'j tmojbabl tiib Cristo cyuya ke t-xjal. ³³Pero jax ju'x nyolen ja yol lu ti'j ti tten tmojbabl tiib jun xinak tuya t-xu'l. Ju' tzunj, key hermano, il ti'j cyey xinak tu'n toc tak' cyxu'la cyey tisen n-oc tak' cyiiba cyey, bix cyey xuu tu'n t-xi' cynimana cychmila.

6

¹Yaltzen ejee'y cwal, cxe'l cybi'na cymana, tu'ntzen t-xi' cyyeec'ana cynimbila twitz Kaaw, tu'ntzen cytena tujix tumel. ²Jtneel tcawbil Dios tuj Laaj Mandamyent tuya jun cotz tu'n Dios ka nbint cyu'n xjal, ja tzunja lu: "Cxe'l cynimana cymana bix cytxuy. ³Ka ma bint cyu'na ju'wa, chi temela tuj ttz'yal twitz tx'otx', bix nim tken cytyema at," tzi Laaj Mandamyent.

⁴Yaltzen cyey mambaj bix txuybaj, yaa'n tumel tu'n cyoc tena cyakwusalte ke cyczwala tuya jun cawbil yaa'n tuj tumel, sino cytz'isecke tuya jun cawbilcye tujix tumel, bix chi xe'l cyxnak'tza'na tu'n cyxi' lpe ti' Kaaw.

⁵Yaltzen cyey ak'anal tjak' tcawbil jun patrón, cxe'l cybi'na cypatróna ti' cyaak'ena. Chi nimela twitz cypatróna, bix chi ak'anala tuya cykil cyc'u'ja tisenxsen nchi ak'anana tjak' tcawbil Cristo. ⁶Chi ak'anala ba'n yaa'n nuk o'cx oj at cypatróna te cyey'lte cyey, sino sey'x chi ocaley, tisenxsen nchi ak'anana twitz Cristo. Chi ak'anala tuya cykil cyc'u'ja, cuma ju' taj Dios tu'n cyak'anana. ⁷Cyk'o'nc cyipey ti'j tu'n cyajbena te cypatróna, tisenxsen nchi ak'anana tuya Kaaw bix yaa'n nuk jaj nchi ak'anana cyuya xjal. ⁸Cytki'ntla alcye jun k'ij jaca juun xjal ctcaman jun tcoz tk'a' Kaaw la' alcye ak'untl otk bint tu'n, atle tpatrón, minlen-al tpatrón.

⁹Yaltzen ke cyey patrón, jax ju'x ba'nx cyse'y cynaabla cye cy-ak'anala. Cyk'oncj cyiw cynaabla cyi' ke cy-ak'anala. C'ulel tuj cyc'u'ja yaa'n nuk o'cx'a ke cy-ak'anala ete' tjak' tcawbil Kaaw at tuj cya'j, sino cyczuyaxa ete'y tjak' tcawbilxin. Chi elela junx cyuya cy-ak'anala twitzxin, cuma tuj twitzxin min-al jun mas nintzaj twitz juntl.

Ju'tzen tten tu'n t-xi' cyyeec'ana cynimbila cyxola.

Kej macbil ntzaj tk'o'n Dios ke tu'n kk'ojl cyuya kej biman

¹⁰Tu'ntzen tpon baj twi' nyola cyey, key hermano, cxe'l nkba'na cyey ti tten tu'n cychyey tibaj ka'. At cymojbabl cyiiba tuya Kaaw. Nimxsen tipemalxin at. Bix cuma at

cymojobabl cyiiba tuyaxin, ju' tzunj at tipemalxin te cyey tu'n cyxcyey tibaj ka'. Tz'ajbentzen tipemalxin cyey. ¹¹ Tisen jun soldado te twitz tx'otx' ikenxsen thanel t-xbalen bix tmacbil tuj k'oj, jaxsen ju'x cyey. Jax cyikem cyey jtbanel tipemal Kaaw tu'n tajben cyey tu'ntzen cywe'xixa twitz taaw ka' oj cyoca tuj niy'bebl tu'n, tu'n thint ka' cyu'na. ¹² Oj kk'ojl, yaa'n cyuya xjal, sino cyuya kej biman, jawnexsen cyipemal. Min chic'ajke, bix nim cybaj. Ejee'tzen bimanja ete' twitz cya'j tuj klolj. Bix nchi cawen tu'n thint ka' twitz tx'otx', bix nimxsen pomnina baj cyilbil ti'j tu'n cycaman cyibaj xjal twitz tx'otx'. ¹³ Ju' tzunj il ti'j binne cytena tuyaj tipemal Kaaw tzin tk'o'n Dios cyey. Katzen binne cytena ju'wa, ba'ntzen cypantey oj tpon jun k'ij nojne tuya ka' cyi'ja. Mintzen otk chi iy' tz'aka oj tbaj twi' cyk'oja tuya ka'. ¹⁴⁻¹⁷ Ju' tzunj, key hermano, chi ajbenxit jcymachila tzin tk'o'n Dios cyey, tisen nchi ajben cymachil soldado tuj k'oj tu'n cycaman. Jun soldado n-oc tsinch tc'u'j tu'ntzen thint tk'ojl. N-oc xbil ttzii' t-xuuc' tu'n mi'n tz'ocx twi' espada tuj. Toc t-xaab thanel tu'n mi'n cub tuj k'oj. K'i'n jun makbil tu'nxin tu'n mi'n tzak'xin cyu'n tbak' scopet oj cyoc xe't ti' tanemxin. Cjawex tpassibil tisen jo's tuyax te maksbil twitz te colbil twitz tu'n mi'n tzak' cyu'n tbak' scopet. Bix k'i'n tspada tu'n tu'ntzen t-xcye tuj k'oj. Ejee' tzunj lu najben cye soldado tu'n cyk'ojl cyuya enemiwa.

Yaltzen cyey cymachil oj cyk'ojla cyuya biman, ejee' tzunj lu. Jaj nchi yolena jaxxix. Bix jaj k'i'n cyu'na jun cynaabla jiquenxix. Bix jaj n-el cyni'ya ti'j tzul Kaaw te cawel twitz tx'otx' tu'n tten twitz tx'otx' tuj ttzyal. Bix jaj n-oc ke cyc'u'ja ti' Dios, tu'n twe' jcyniy'bebl biman n-oc cyxoo'n cyi'ja tisen tbak' scopet. Bix jaj cytzki'nntla o tcol Dios ejee'y tuj tk'ab taaw il. Bix jaj tyol Dios najben cyey tu'n cyxcyey ti'j niy'bebl ntzaj cyi'ja tu'n taaw il. Ejee' tzunj lu te cymachila tu'n tajben cyey tuj cyk'oja cyuya ke biman.

¹⁸ Tuj cykilca ti' nbaj, chi na'la Dios, bix tuya tonbil Espiritu Santo te cyey. Oj cyna'na Dios, nchi binchama tisenxsen nchi itz'le'na cyiiba, bix cypa'xixa tuj k'oj. Bix yaa'n nuk cyi'jquey chi na'la Dios, sino tuyax ti' cykilca ocslal.

¹⁹ Ojten cyna'na Dios, key hermano, tuyax wi'ja, tu'ntzen at nim tipemal nyola oj t-xi' nk'umena cye xjal j-e'wen nejl pero ya o chic'ajax tu'n Dios. Bix waja tu'n cyna'na Dios wi'ja tu'ntzen mintii' ttzi wi'ja oj t-xi' nk'umena. ²⁰ Bix tu'nj o txi' nk'umena ti'j o tyeeec'an Dios weya, ju' tzunj ntiina tuj tzee'. Ju' tzunj chi na'na Dios wi'ja tu'ntzen ttzaj tk'o'n Dios t-xtalbil wibaja, tu'ntzen mintii' ttzi wi'ja te kbalte tyol Dios mas.

Jun k'olbebl tu'n Pablo te manc'bil yol

²¹ Yaltzen weya, mi'n txi' nkba'na tuj ja wu'ja lu ti' nbaj weya, cuma jxin Tiquico cpomel cyxola, bix oj tponxin, ja tzunxin pjel k'umentexin cyey ti' nbaj weya tzalu. Nim n-oc tak' Tiquico weya, bix nim najbenxin weya tuj taak'en Kaaw. ²² Ttzki'nxin cykilca ti' nbaj wi'ja, bix ju' tzunj cxe'l nsma'na xina cyuyey, tu'ntzen t-xi' tk'umenxin cyey tii'n ntena bix tii'n cyten wuyena. Oj cybintey tii'n eto'ya tzalu, bixsen chi jaw tzalaja.

²³ Key hermano, chi tenxita tuj ttzyal tzin tk'o'n Kman Dios tuya Kaaw Jesucristo cyey, bix cyu'nxit-xin at tk'ak'bil cyc'u'ja ti' niy'tl ke hermano tu'nj cyocslabla ti' Dios bix ti' Kaaw. ²⁴ Tenxit t-xtalbil Dios cyibaj cykilcakey jn-oc tak' Kaaw Jesucristo cyey tuya jun tk'ak'bil cyc'u'ja jax.

O'cx nyolja.

U'j e xi' ttz'i'ben Pablo cye oclsal tuj tnom Filipos

Jun k'olbebl tu'n apóstol Pablo

¹ Key hermano tuj tnom te Filipos, Inayena Pablo. Cxe'l nsma'na jun u'j cyey te k'olbebl cyey. At Timoteo wuyena, bix ju'x te nxi' tsma'nxin jun k'olbebl cyey. Keya, t-ak'anal Cristo Jesús ko'ya, bix waja tu'n tpon ja u'j lu cyxola, te cyeke ak'anal cyxol oclsal tuj tnom te Filipos, tuyax te cykilca oclsal, ejee'j k'ukdec cyc'u'j ti' Cristo Jesús. ² Tu'nxit Kman Dios tuya Kaaw Jesucristo tzaj k'onte nim cyxtalbil cyey, bix cyu'nxit-xin chi cub tena tuj ttz'yal.

Tej tna'n Pablo Dios cyi'j oclsal

³ Jaca maj oj nchi ula tuj nc'u'ja, nxi' nk'o'na chjonte te Dios cyi'ja. ⁴ Min chin we'ya na'na Dios cyi'ja, bix oj nbint wu'na ju'wa, ntzalaj wanema, ⁵ cuma jatxe tuj tneel tej cyocslana bix ja'lewe nchi oney wi'ja tuj waak'ena ti' tpočaj jba'n tpočaj co'pbil ke ti' kil. ⁶ Tej cyocslana jco'pbil ke, ak' Dios ak'anal tuj cyanema tu'ntzen tcyaj cynaabla ba'n. Bix ntzki'na ctzketel cynaabla tu'n Dios oj tul meltz'aj Cristo Jesús. ⁷ Tumel ta' lu kenwe lu nchin k'on chjonte te Dios cyi'ja, cuma nim n-oc cyak'a we. Ka ntiina tuj tzee' nuk tu'n tyol Dios bix ka tzakpi'n kena tu'n t-xi' nyeeec'ana cye cawel jtyol Dios ti'j co'pbil ke jmero jaxxix, pero tzinx nchi oney wi'ja. ⁸ Bix ttzki'n Dios n-oc cyak'a weya, bix ja tzunj tk'ak'bil nc'u'ja cyi'ja ma tak' Cristo Jesús weya.

⁹ Key hermano, oj nchin na'na Dios cyi'ja, nxi' nkanena te Dios tu'n ttz'iy tk'ak'bil cyc'u'ja cyi' cabtl cyermaney oclsal, bix tu'n ttz'iy cynaabla, bix tu'n tel cyni'ya ti'j alcyey jaxxix, ¹⁰ tu'ntzen cyscy'ontey alcyey ba'n bix tu'n tcyaj cycye'yena jyaa'n ba'n, bix tu'n t-xi' cyii'na jun cychunk'lala ba'n, tu'n min-al ba'n toc te yolel jun ka' yol ti'j, tu'ntzen cyela ba'n tuj cywytz xjal hasta ojxe tul meltz'aj Cristo. ¹¹ Tu'n tipemalj o kiik' te Jesucristo ba'n t-xi' kii'n jun kchunk'lal jiquenxix, bix oj tbtint ku'n ju'wa, njaw knimsa'n tbi Dios.

Tu'nj q'uixc'ajo tziy'x tu'n Pablo ajben cuma tu'n o k'umj mas tpočaj jco'pbil ke tu'n Jesús

¹² Key hermano, lu ken ntiinc'z tuj tzee' tzal. Pero waja tu'n cybintey tuj nwitzza jq'uixc'aj niy'x wu'na tzal tuj tzee' o tz'ajben te jun ba'n, cuma o k'umj mas tpočaj co'pbil ke tu'n Jesús. ¹³ Cykilca ke cysoldado cawel bix ju'x niy'tl kej xjal nchi ak'anan ttxlaj cawel cytzki'n ntiinc'tza tuj tzee' nuk ti'j waak'ena tuj taak'en Cristo. ¹⁴ Bix ju'x, ch'ixc'a yaa'n cykilca oclsal tuj ja tnom lu, oj n-oc cycye'yen inayena tuj tzee' tzal, mas n-oc ke cyc'u'j ti' Kaaw bix at mas cyanem tu'n t-xi' cyk'umen tyol Dios mintii' ttzi cyi'j. ¹⁵ Nchi k'umen tpočaj Cristo, amale atet juntl wik nchi pochan nuk tu'n cyxq'ueybil ti'j weya nyol tu'n tel cyyol mas ba'n twitzj weya, cuma at niy' tuj cyc'u'j wi'ja. Pero at nim oclsal nk'umen tyol Dios tujxix tumel. ¹⁶ Ejee'tzen oclsalj nchi ak'anan tujxix tumel cuma n-oc wak'a cye, bix cytzki'n o tzaj tk'o'n Dios waak'ena te tyolel ti'j co'pbil ke. ¹⁷ Pero jatzen cabtl yaa'n tujxix tumel nchi k'umen tpočaj Cristo yaa'n tu'n n-oc tak'xin cye, sino tu'n cyxq'ueybil tu'n tiy' nejl cyyol nwitzza bix tu'n toc cyk'o'n tchyonel ti' wanema. Nchi binchan jlu nuk tu'nj lu kena ntiinc'z tuj tzee'we. ¹⁸ Pero mintii'we waj te. Ka tuj tumel bix ka nuk tu'n cyxq'ueybil, pero tk'umj tyol Cristo, bix nchin tzalaja ti'j.

Bix ju'x nchin tzalaja ¹⁹ cuma ntzki'na tu'n cynaabla Dios wi'ja Espíritu Santo onen ti' Jesucristo jax ju'x c'onel wi'ja tu'ntzen cykilca q'uelel ba'n wi'ja. ²⁰ Oj tpon k'ij chin pomela cywytz cawel te tx'olbal wiiba, ka tu'n wex tzakpeta bix ka tu'n ncub byeta, nuket mi'n tz'el nxoo'na Cristo tu'n witz'ja. Tuya cykil nc'u'ja waja tu'n tjaw nnimsa'na tbi Cristo tuj stis cywytz cawel, tisex tten wu'na, ka tu'n witz'ja bix ka tu'n ncyima. ²¹ Tuj nwitzza yaa'n il ti'j ka tu'n witz'ja bix ka tu'n ncyima, cuma ka ma chin itz'ja at wolena tu'n wajbena mas te Cristo twitz tx'otx', bix ka ma chin cyima jax at wolena tu'n npona tuya Cristo. ²² Cyca'bel jbe'wa ba'n tuj nwitzza. Ojattzen ttzaj k'o'n weya tu'n nscy'onteya alcyey mas ba'n, jac'a mlay tu'n nscy'onteya alcyey cyxol. Ka i'tzxe kena, chinel mas ak'untl ba'n tzal wu'na. ²³ Pero katzen ma chin aja tu'n npona tuya Cristo, mas ba'n twitzj ntiina tzal twitz tx'otx'. Ju' tzunj cyiwy ch'in tu'n tel nni'ya ti'j alcyey mas ba'n. Tu'n npona tuya Cristo masxele ba'n te weya, ²⁴ pero te cyey mas ba'n tu'n at kena cyuyey tzal twitz tx'otx'. ²⁵ Bix cuma il ti'j tu'n wajbe'na cyey, jax tuj nwitzza chin cyela cyxola tzal twitz tx'otx', tu'ntzen cyxi' wonena tu'n cytzketa bix tu'n cytzalaja tuj cyocslabla, ²⁶ bix tu'ntzen t-xi' cyk'o'na chjonte te Cristo Jesús wi'ja oj npona cyxola juntl maj.

²⁷ Key hermano, waja tu'n npona cyey'l cyey. Pero matzen oca matzen mi'na, pero at jun waja txi' ntz'i'bena cyey ilxix ti'j. Waja tu'nxix t-xi' cyii'na cychunk'lala tujxix tumel, cuma ejee'y oclsal lepchech ti' Cristo. Nbi'xita ka wa'lxix key tuj cyocslabla, bix junx cyanema, bix junx cynaabla, bix junx n-oc tilel cyu'na tu'n t-xi' cytzitpu'na tyol Dios ti'j co'pbil ke. ²⁸ Bix

nukxhit mintii' cytzi kej xjal nchi k'ojlec cyi'ja. Ka wa'lxix key tuj cyocslabla cywitz kej cicy'i Jesús, jätzen jun techel te cyej mintii' cytxolan bix ya tu'n cyxi' tuj castiwa, bix jun techel ejee'y at cytxolena bix otzen chi cleta tu'n Dios. ²⁹ O tzaj k'o'n cyey, yaa'n nuk tu'n cyocslana ti' Cristo, sino tuyax q'uuyax q'uixc'aj cyu'na ti'j. ³⁰ Ju'tzen e baj wi'ja tejntiina cyxola. E cyila jq'uixc'aj in i'yena wi'ja nejl, bix o cybyi ntiina tuj tzee' juntl maj ja'lewe.

2

O cub tmanse tiib Cristo, ju' tzunj o jaw nimsa'nxin

¹ Key hermano, katzen wermanakey, il ti'j tu'n tcyiwset nc'u'ja cyu'na, bix ka n-oc wak'a cyey, bix ka il ti'j tuj cywitz tu'n at kmojbabl kiib tu'n Espiritu Santo, bix ka cyaja tzaj cyk'uk'ba'na nc'u'ja, ² chin cybi'xix ch'ina ti'j ja nyola cxe'l nkba'na. Ka ma cybyi, nimssen chin tzalajel cyi'ja. Junx q'uelela cynaabla, bix junxxit tz'oc tak' cyuyey cyey, bix junxxit cyc'ojlan cyiiba, bix junxxit cybey, bix mojlxit cyak'mala. ³ Cyk'oncja cyxq'ueybila, bix mi'n chi jaw cyocsabla cyiiba tuj cyak'mala. Mas ba'n chi yut'eq'uey. Mi'n txi' cykba'na ka mas nintzajkey cywitz xjal, sino mas ba'n jaca juun cyey cwel bisente ti'j cykilca xjal mas il ti'j cywitz. ⁴ Jaca juun cyey mi'n chi jyon nuk te cyey jun ba'n, sino tuyax te juntl cyuyey.

⁵ Ja tzunja e tbincha Cristo Jesús. Amale jat xinj xjal Scy'o'n tu'n Dios te cawel tibaj cykilca, pero iy'x q'uixc'aj tu'nxin nuk ki'jc'a. Bix cwel kbisen ti'j alcyej ba'n te juntl xjal tisen e cub thisen Cristo Jesús cyi' xjal. ⁶ Amale Dioset-xin, pero min e tzyun xinj toclenxin te cawel tisen Dios. ⁷ Bix e cyaj ttzakpi'n xinj toclenxin cawelxin tuj cya'j, tu'ntzen tocxin te xjal tzalu twitz tx'otx'. Ulxin twitz tx'otx', yaa'n te cawelxin, sino te ajbelexin. ⁸ Bix yaa'n nuk ocxin te xjal, sino tuyax ocxin te cyiik'bil xjal. Nim el cyiij'uen xjal jaxin, hama tejde tcub cyboyo'n xjal jaxin twitz cruz tisen jun byol xjal. E tcyuaxin jlu tu'ntzen ntiimantexin ti e tajbe Dios. ⁹ Ju' tzunj o jaw tii'n Dios jaxin tu'n tocxin te mas jawnex bix tibaj cykilca, bix o tz'oc tk'o'n Dios jun tbixin mas jawnex twitz cykilca biybij, cuma jaxin taaw tibaj cykilca. ¹⁰ Tzul jun k'ij o cykil xjal cwel maje twitz Jesús, kej ete' tuj cya'j, kej ete' twitz tx'otx', bix kej ete' tjak'xe tx'otx'. ¹¹ Tuj tzun k'ij tzul, entera ke xjal q'uelel cyniy' ti'j ja Jesucristo taaw cykilca. Ojzen cykilca xjal ckbalte ju'wa, njawtzen cynimsa'n xjal tbi Kman Dios.

Ejoo' ocslal ju' ko' tisen ke che'w nchi txaken tuj klolj

¹² Ju' tzunj, key hermano, tisen Jesús e cub thisenxin cyi' xjal mas twitzj texin, jax ju'x cyey il ti'j cxe'l cyii'na ti tten tu'nxin. Amatzenle mintn-al kena cyxola ja'lewe, pero cybima nyola. Cyk'o'ntzen cyipena tu'n tcub cybincha'na jba'n te cyej cabtl cyuyey mas twitzj cyey, tu'ntzen cicyaja tuj tumel. ¹³ Jätzen Dios nak'anan tuj cyanema, tu'ntzen cyaja jtaj Dios, bix ntzaj tk'o'nxin cyipemala tu'n cybinchantey alcyej tajxin. ¹⁴ Mi'n chi labta bix mi'n chi k'ojla, ¹⁵ tu'ntzen kej xjal yaa'n ocslal ba'n cyol cyi'ja, bix tu'ntzen sakxixkej twitz Dios, cuma ejee'y t-xjal Dios. Ka nchi binchana ka' tisen kej xjal yaa'n ocslal, yaa'ntzen tumelkey te yec'bil cywitzj xjal yaa'n ocslal. Ejee' tzunkey tisen ke che'w nchi txaken tuj klolj. ¹⁶ Tisen jun luz n-el txaken tuj klolj, ju'tzen japenina ke cyey ka k'i'nxix jun tumel cyu'na, tu'ntzen cyocslante xjal tyol Dios. Ka nbint cyu'na ju'wa, chin tzalajel cyi'ja oj tul meltz'aj Cristo cyey'lte waak'ena o bint wu'na cyxola. Pero ka yaa'n ete'y tuj tumel, at nch'ixewa cyi'ja twitz Cristo, cuma minxtii' otk t'e'la waak'ena. ¹⁷ Cuma in oneya tej cyocslana ti' Jesús, kape chin cwel byet naja ti'j. Katzen ma tz'ajben ncyamecyu tu'n ttzket cyocslabla, tu'n cykil nc'u'ja tu'n ncyima. ¹⁸ Lu ken nchin tzalaj cyi'ja, bix ju'x cyey chi tzalajela wi'ja.

Timoteo bix Epafrodito

¹⁹ Key hermano, ka ma tak' Kaaw Jesús, pon nchk'o'n Timoteo cyuyey, tu'ntzen tul meltz'aj tuya cypocbala tii'n ete'y, tu'ntzen tcyiwset nc'u'ja cyi'ja. ²⁰ Cxe'l nchk'o'n Timoteo, cuma n-oc cyak'a te tisex inayena. Min-al juntl tzalu ncub thisen jba'n te cyey tisej keya. ²¹ Cykil ke ocslal tzalu nuk o'cx n-oc tak' cye ti' cyitz'jel. Min nchi jyon ti'j alcyej taj Cristo Jesús. ²² Pero te Timoteo yaa'n ju' tisen ejee'. Cytzki'nla tii'n tz'ak'ananxin. Amale atet ti il nbaj, min o cyaj tk'o'nxin taak'enixin. O tz'ak'ananxin wuyena tuj taak'en Dios te kbalte tpochal co'pbil ke tisen jun cwal najben te tman. ²³ Mintii' tumel ti pjel wi'j. Pero ojzen nbinte ti pjel wi'ja, cxe'l nsma'na Timoteo cyuyey. Cutzit nbinte naj ti pjel wi'j. ²⁴ Pero ka ma tak' Kaaw, inayentzen chin pon cyuyey.

²⁵ Pero amale mat pon Timoteo mas yaj, tuj nwitzla il ti'j tu'n tpon nchk'o'na Epafrodito cyuyey ja'lec'a naja. Chjonte cyey ma tzaj cychk'o'na ja Epafrodito te k'olte jun onbil weya cyu'na. Ba'n o tz'ajbenxin we te yolel cyi'ja te onlte weya tzalu tuj taak'en Kaaw Jesús, bix o tziy'x q'uixc'aj tu'nxin wuyena. ²⁶ E yebt-xin tzalu, bix jac'a o pon tumel cyuyey. Ju' tzunj najkelenxin. Bix ju'x nipax tc'u'jxin cyi'ja. Ju'tzen waja tz'aj nchk'o'n xina cyuyey. ²⁷ Jaxte nim e yebt-xin. Jac'a ch'ixc'a min e baj texin. Pero Dios e tzaj k'onte lastim texin, bix e tk'ana Dios jaxin, bix itz'jxin. Nuket e cyimxin, masxetzele bis oc weya. Ju' tzunj tej tzaj tk'o'n Dios lastim texin, tuyaxa te weya.

²⁸ Ju' tzunj, tu'ntzen cytzalaja oj toc cycye'na jaxin bix ba'ntlxin, tuya cykil nc'u'ja pon nchk'o'nxin cyuyey. Ojtzten nchi tzalaja ti'jxin, bix oj t-xi' nbi'na, jax ju'x weya tzalu tuj tzee' ya mi'n chin biseltla cyi'ja oj t-xi' nbi'na min chi bisena wi'ja. ²⁹ Ojtzten tponxin cyxola, cyk'imxin tuya cykil cye'u'ja bix tujxix tumel, bix nuket at ch'ın cynaabla twitzxin, cuma jaxin jun t-ak'anal Kaaw, ³⁰ bix cuma ajbenxin tuj taak'en Cristo ch'ix mi e'la twi'xin ti'j. Ejee'y min onenke wi'ja cuma nakch ete'y, pero te cyxela o tz'onen Epafrodito wi'ja tzalu, bix o tziy'x q'uixc'aj tu'nxin tu'nj e bint tu'nxin tuj taak'en Cristo.

3

Ti tten tu'n koc tz'aklxix

¹ Manc'biltzen, key hermano tuj Filipos, waja txi' nk'o'na juntl cyiwsabl cye'u'ja. Chi tzalaj tzuna tu'nj ba'n cytena twitz Kman Dios tu'n Kaaw. Ju' o txi' nk'o'na cyey nejl, pero jac'a il ti'j cxe'l nkba'na cyey juntl maj. Pero mintii' nbaj tu'n t-xi' nk'o'na tumel cyey juntl maj, cuma te cye cyey tajbebel.

² Chi elel lk'ey cyi' kej xjal tzin cykba'n tu'n cyela ba'n twitz Dios, il ti'j tu'n cynimantey jley te ootxa tu'n tel cpet twi' tz'albil xinak. Kej nchi k'umente ju'wa, ejee'tzen aj k'oj ti' Dios. iTi ttenj ju'wa c'oquel cykesena cychu'la tu'n cyoca te t-xjal Dios! ³ Ko oquel te t-xjal Dios, yaa'n tu'n toc keset kchu'l, sino tu'n kniman Dios tuj kanem. Il ti'j tu'n toc ke kc'u'j ti' Cristo Jesús, yaa'n cyi'j kbinchbil ti'jxe kanem tisen tzin cykba'n.

⁴ Ka il ti'j nim chibel ku'n tu'n koc te t-xjal Dios, inayena nim o bint wu'na twitz cykilcatl. ⁵ Te twajxakan k'ij witz'jlana e cpet nchu'la ju'wa te techel inayena t-xjal Dios, tisen tkba'n tley Moisés. Aj Israel kena, bix tiy'jil Benjamín kena, jaj mas nintzaj tiy'jil cyxol mastl cyiy'jil Israel, bix nyola hebreo, jaj cyool ke te Israel, bix mero te judío kena, yaa'n pa'n tten wiy'jil, bix cyol kej xjal nimalxix tuj tley Moisés, inayena jun mas nimalxix cywitz, cuma in tena cyxolj cloj te fariseo lepchke xjal ti'j tley Moisés. ⁶ Cyiwxsen in e'leya tuj tley Moisés bix ju' tzunj in oc lpeya cyi' ocslal te yajlalcye bix te byolcye, cuma min e cybi tley Moisés. Bix weya tuj tley Moisés, cykilxsen in nimeya. Minxsentii' e cyaj wu'na ti'jxe. ⁷ Cykil xsunj lu o bint wu'na, pero min ajben weya tu'n woca te t-xjal Dios. Amale kej nimal tuj tley Moisés nxi' cykba'n cykilj lu e bint wu'na ootxa at cyajbebel, pero ja'lewe n-el nni'ya ti'j mintii' tipemal twitz te Cristo. ⁸ Bix yaa'n o'cx kej lu, pero tuyax cykilcatl o bint wu'na bix cykilcatl at wuyena ya mintentii'tl tc'ojlalel n-oc nk'o'na twitzj tc'ojlalel n-oc nk'o'na te Waaw Cristo Jesús bix tu'n toc nk'on wiiba tuyaxin. ⁹ Jaja mas nintzaj twitz cykilcatl tu'n nwitz, jaj tu'n n-oc nk'on wiiba tuya Cristo. Mlay ncamiya tu'n wela ba'n twitz Dios tu'n n-oc nnimena tley Moisés. Jax te at tajbelj, jaj tu'n toc ke nc'u'ja ti' Cristo. Ja tzunja waja. ¹⁰ Waja tz'el nni'ya ti' Cristo jaxxix, bix tu'n t-xi' wii'na jun nchun'k'ala tz'aklxix tu'nj tipemal Dios ajben tu'n tjaw ti'n ja Jesús tuj cyamecy, bix waja tu'n tiy'x q'uixc'aj wu'na hasta ojxe ka ma chin cyima ti'j nuk tu'n nxi' lpeya ti'jxin mas twitzj tu'n nxi' lpeya ti'j alcye waja. ¹¹ Ka ma txi' wii'na nchun'k'ala ju'wa, la' alcye jun k'ij chin jawetz ti'n Dios tuj cyamecy.

¹² Pero min txi' nk'umena ya ma chin pona tz'aklxix. At-x tu'n ntzketa. Pero n-oc wipiya tu'n tzket nnaabla, cuma jaj tu'n ntzketa e tajbe Cristo Jesús tej tco'pante inayena tu'n woca te t-xjalxin. ¹³ Key hermano, jaxte mina'x ntzketa, pero ya min txi' nbisentla ti'j niy'j e baj weya nejl, sino ya ju' nxi'tl ncwenta ti'j nejl nwitza. ¹⁴ C'oquel wipena ti'j tu'n tcyaj nnaabla mas tz'aklxix, tu'ntzen ncamana ncozta te Dios. Tzin ttxco'n Dios ejoo' tuya jun nintzaj txochil tu'n kpon tz'aklxix, bix nuk tu'n Cristo Jesús ba'n thint ku'n tu'n kpon tz'aklxix.

¹⁵ Pero at juun cyxola ncub cybisena ti'j ya ma chi oca tz'aklxix. Pero nuket ba'n tu'n tsub cybisena mina'x cytzketa. Pero katzen ccyi'y ti'j nxi' nkba'na, jax Dios cwel k'onte tumel cyey mina'x cytzketa. ¹⁶ Pero amale mint tz'el cyni'ya ti'j entera ti taj Dios, pero cynimamj o bint cyu'na.

¹⁷ Key hermano, cykilcakey cyii'nx ti tten wu'na bix cynomela ti tten cyu'n kej k'i'n cyu'n tisej weya. ¹⁸ Pero cyk'o'nc cycwenta cyi'j kej nchi kbante jtcyimlen Cristo twitz cruz mintii' il ti'j. Ejee'tzen k'ojlelj ti' Cristo. Ch'ima maj o txi' nk'umena cyey tu'n mi'n tz'oc cybi'na cyool, bix juntl maj ja'lewe. Nchin ook' cyi'j, ¹⁹ cuma cha xe'l tuj castiwa. Ejee'tzen xjalja nche'x lpe nuk ti'j ti taj cyxumlal, yaa'n ti'j ti taj Dios. Tu'nj nbint cyu'n mintii' cych'ixew, sino nuk nbaj cyniman cyiib ti'j. N-oc cyk'o'n tajbel o'cx jaj at te twitz tx'otx'. ²⁰ Pero te ke ejoo' ocslal at mastl twitzja at twitz tx'otx', cuma at ktanem tuj cya'j. Bix jatztzen ctzaala jxin Co'plte ke, ja Kaaw Jesucristo, jnko ayon ti'j. ²¹ Bix oj tulxin, tuya tzunj jaj tipemalxin najben texin tu'n tcawenxin tibaj cykilca tik'ch at, cwel tch'ixbe'n xinj kxumlal tuya niy' ajnintz kchu'l at ja'lewe, tu'ntzen koc te jun xumlal baj thanelix tisej texin.

4

Tej tkbante Pablo cye ocslal tu'n cytzalaj ti' Kaaw

¹ Ju' tzunj, key hermano n-oc cyak'a weya, cyk'o'nc cyipena ti'j tu'n cywe'xixa ti' Kaaw, cuma at mastl twitzja at twitz tx'otx'. Cyi'ja nchin tzalaja. Ejee'y tisen jun ncotza tu'n waak'ena e bint wu'na cyxola.

² Pero cyxola at ca'ba xuuj ocllal nchi k'ojl, jaj Evodia tuya Sintique. Key hermano, nchin cubsan nwitz cyexuj tu'n cyczub yut'exuj bix tu'n cyczub tenxuj tuj tumel, cuma oclslalkekuj.

³ Nchin cubsan nwitz cyexuj, bix jax ju'x cyey jiquenxix tuj taak'en Dios, tu'n toc cyipena tu'n cyonena cyi'j ke ca'ba xuuj k'ojlel tu'n cytenxuj tuj ttzyal, cuma nejl ak'anantun zunkexuj cyiw wuyena tej ntena tuj cytanema tu'n nk'umenteya tpochal Jesús tuya Clemente bix cyuya cabtl ocllal. Mlay bint tz'ibj cykilca cybi tzalu tuj wu'ja, pero tz'i'ben tu'n Dios tuj tu'j jaa' ta' cybi kej xjal at cychunk'lal te junx maj.

⁴ Chi tzalajaxita cykilcakey ti'j Kaaw. Bix juntl maj nxi' nk'umena cyey, tchi tzalaja! ⁵ Tu'n tchic'ajax jun ba'n cynaabla cywitz cykil xjal.

At Kaaw nka te onlte ke. ⁶ Ju' tzunj mi'n baj cyc'u'ja ti'j ti pjel cyey. Ka at jun il ete'y, cykanenx te Dios. Pero tuj cykilca nbaj cyi'ja, cyk'onx chjonte te Dios ti'j tuj cyanema. ⁷ Ka nbint cyu'na ju'wa, a ttzyal ctemel cyanema, bix cynaabla q'uelel junx tuya tnaabl Cristo Jesús. Nintzajxsen ja tzunj ttzyal tzin tk'o'n Dios cyey tu'n tel cyajkelbila tuj cyanema.

Cwel cybisena ti'j alcyej jiquen bix sakkix

⁸ Manc'biltzen nyola te cyey hermano, jaj tu'n t-xi' cyjyo'na alcyej jaxxix bix cykilcaj ba'n tu'n tnmj. Cwel cybisena ti'j alcyej jiquen bix sakkix bix ba'n. Bix cwel cybisena jun ba'n te juntl cyuyey. Bix cwel cybisena ti'j alcyej jawnex bix ti tten tu'n tjaw cynimsa'na Dios.

⁹ Ju'tzen tzin nse'n weya bix ju'tzen nxa' nk'umena. Cyii'nxa ti tten nbint wu'na bix alcyey o cyxnak'tzay wi'ja, bix ka nbint cyu'na ju'wa, chi temela tuj ttzyal tzin tk'o'n Dios.

Tej ttzaj cyonen kej ocllal aj Filipos ja Pablo

¹⁰ Key hermano, jun nim tzalajebtl te weya tej tul jun onbil weya cyu'na. Nxi' nk'o'na chjonte te Kaaw cuma o chin tzaj cyonena. Ntzki'na e cyajbey tu'n ttzaj cyonena inayena nejl, pero mix e binne tu'n cyoney wi'ja. Pero ja'lewe matzen chin cyoney. ¹¹ Pero min tzin nkba'na at palt te witz'jela. Ma chin nik'eta tu'n ntzalaja ka at npwaka bix ka mintii' npwaka. ¹² Niy'x wu'na ka at nim witz'jela bix ka mintii', ka nojne nc'u'ja bix ka towl. Bix nuk ti'xja baj wi'ja, seya mebe kena bix ka k'ina kena, pero tuj txubtx ntiina. ¹³ Cykilca q'uiyax wu'na, cuma ja Cristo n-onen te weya. Jaxin ntzaj k'onte wipemala. ¹⁴ Pero amale niy'xet cykilca wu'na, chjonte cyey nchin tzaj cyonena tuj tzee' tzal. ¹⁵ Bix jax cucx o chi onena wi'ja, jatxe tej wak'a kbalte tpochal Jesús cyxola, hasta ja'lewe. Cytzki'na tuj k'ij tej wexa tuj cytanema tuj lugar te Macedonia, nuk ejee'y ona wi'ja. Min-al juntl cloj ocllal tuj juntl tnom ona wi'ja. O'cx ejee'y. ¹⁶ Aa, n-ul tuj nc'u'ja in tenxa tuj lugar te Macedonia, tuj tnom te Tesalónica, bix e tzaj cyonena inayena tuj jun il in temiya, bix yaa'n nuk jun maj e tzaj cyonena inayena tej ntena tuj Tesalónica. ¹⁷ Pero yaa'n tu'n n-elwe nc'u'ja ti' cyoybila. Jawe waj tu'n cyiik'entey jun ba'n cyczotza tu'n Dios tu'n nj ntzaj cyonena inayena. ¹⁸ Pero te weya, ya at nimwe npwak tu'n witz'ja, cuma o tzul tii'n Epafrodito cykilca e tzaj cyk'o'na te weya tzal. Bix jun cyonbila tisen jun c'oc'sbil njaw twitz Dios bix tisen jun cyoybila twitz Dios. ¹⁹ Ju' tzunj cchjoltte Dios nim t-xel cyey. Jaxin k'olte cykil il ti'j te cyey, cuma texin nimxsen tk'inemalxin at, bix tu'n kmojbabl kiib tuya Cristo Jesús, Dios ntzaj k'onte ke. ²⁰ tAxsen tbanel Kman Dios, bix nimjxit tbixin te junx maj. Ju'xit tzuna!

Jun k'olbebl tu'n Pablo te manc'bil yol

²¹ Cyk'o'nxa jun k'olbebl wu'na cyey cykil t-xjal Cristo Jesús jatzewe. Bix ju'x kej hermano ete' wuyena tzaluj jax at jun k'olbebl cyu'n te cykilcakey. ²² Bix ju'x te cykilca ocllal tuj ja tnom lu bix kej ocllal nchi ak'anantun tuj jaa' te cawel nxi' kk'o'na jun k'olbeblcyey te cykilca.

²³ At-xit t-xtalbil Kaaw Jesucristo cyibaja. O'cx nyolja.

Jun u'j e cub ttz'i'ben Pablo cye ocslal tuj tnom Colosas

Jun k'olbebl tu'n apóstol Pablo

¹ Inayena Pablo. Dios o scy'onte weya tu'n wajbena te jun t-xel Jesucristo. At hermano Timoteo wuyena. ² Nxi' ntz'i'bena ja u'j lu te cyeey ocslal tuj tnom te Colosas, ejee'y hermano cyiw ete'y tuj cymojbabl cyiiba tuya Cristo, jxjal e tscy'o Dios tu'n tcawen. At-xit t-xtalbil Kman Dios cyibaja, bix tzajxit tk'o'nxin cyey tu'n cytena tuj ttz'yal.

Tej tna'n Pablo Dios cyi'j ocslal

³ Jaca maj oj nchin na'na Dios, Tman Kaaw Jesucristo, nxi' nk'o'na chjonte texin cyi'ja. ⁴ Nchin k'ona chjonte texin, cuma ma nbi'ya ma tz'oc ke cyc'u'ja ti' Cristo Jesús, bix cuma n-oc cyak' cykil ocslal cyey. ⁵ Bix chjonte te Dios at jun ba'n te cyeey kayon cyi'ja tuj cya'j. Tpochalj tbanel e cub cyibi'na tej tpon jaxxix yol ti'j colbil cyey cyxola. ⁶ Bix tisen ma pon pocbaltle colbil cyey cyxola, jax ma pon tuj nimtl tnom. Bix tisen jawne njaw tz'iy jun awal, jaxse ju'x ntz'iy tyol Dios tuj cykilca twitz tx'otx'. Bix jaxse ju'x cyxola, jatxe tej cybintiya jjaxxix yol ti'j colbil cyey, bix el cyni'ya ti'j ka jaxxix, otzen cub cych'ixpu'na cynaabla.

⁷ Ja tzunj ba'n snaktzibil lu ti'j colbil cyey, jaj xin Epafra e pon k'inte cyey. Jaxin jun wuyena tuj taak'en Cristo. N-oc tak'xin weya, bix nak'anaxin cyiw tuj taak'en Dios. Ma tz'ajbenxin te jun nxela ba'n tuj ak'untl cyxola. ⁸ Bix ma tzaj tkba'nxin weya nim n-oc cyak' niy'tl ocslal cyey, cuma at Espiritu Santo cyuyey.

⁹ Yal weya, jatxe tej nbintiya e cyocslay Cristo, min ma cyaj nk'o'na tu'n nna'na Dios cyi'ja. Nchin kanena texin tu'n tel cyni'ya ti'j tajbilxin tu'nj cyilbila k'o'n tu'n Espiritu Santo bix tu'nj ti tten tu'n tel cyni'ya ti'j alcey jaxxix bix alcey xtak', ¹⁰ tu'ntzen t-xi' cyi'na cychunk'lala ba'nix twitz Kaaw, tu'n tzalajxin cyi'ja tuj cykilca nbint cyu'na. Nchin kanena texin tu'n cybinchana ba'n cye cabtl, bix tu'n tel mas cyni'ya ti'jxin. ¹¹ Nimxsen tipemalxin, bix nchin kanena texin tu'n ccywixwa tu'n jawnex tipemalxin, tu'ntzen cywe'xixa tuya pasyensya bix tzalajebtl oj n-oc q'uixc'aj cyi'ja. ¹² Bix nchin kanena te Kman Dios tu'n cyk'ontiya chjonte texin tuj cyanema. Tu'nxin ma ko ch'ixpet, tu'ntzen at kocolen tu'n kiik'ente kkab ctzaal tk'o'nxin te ke, ejoo' ocslal. ¹³ Ma ko etz tii'nxin tjak' tcawbil taaw il, bix ma cub tk'o'nxin ejoo' tuj tcawbil Tcwalxin, jxin Cristo n-oc tak' texin. ¹⁴ Nuk tu'n tcyimlen Tcwalxin ma chjet kil bix ma cub najset.

Ma bint kten tuya Dios tu'n tcyimlen Cristo twitz cruz

¹⁵ Key hermano, ja tzunj xin Tcwal Dios lu tzin techla'n te ke tii'n Dios, cuma min chic'aj Dios. Mas jawnex Tcwal Dios cyxol cykilca xjal bix at-xin tibaj cykilca. ¹⁶ Mas jawnexin, cuma tu'nxin e bint cykilca at. E tbinchaxin cykilca at twitz cya'j bix cykilca at twitz tx'otx'. E tbinchaxin cykilca chic'aj bix cykilca yaa'n chic'aj. Kej nejenel aj te tuj cya'j bix alceyjt-le nchi cawen, e tbincha Tcwal Dios cykilca. Jaxin binchalte cykilca at, bix cykilca at te tajbel texin. ¹⁷ E tenxin tuj tneel tej mitkna'x tbin twitz cya'j bix twitz tx'otx', bix tu'n tipemalxin at cykilca tuj tumel. K'i'n tu'nxin cykilca at. ¹⁸ Bix tisen ncawen kwi' tibaj kxumlal, ju'tzen nejenelxin kibaj cykilca ko' ocslal. Bix jaxin tneel xjal tu'n tjatz itz'j juntl maj tuj cyamecy te junx maj, tu'ntzen tocxin te Cawel tibaj cykilca, hasta tibaj cyamecy. ¹⁹ Tzin techla'nxin tii'n Dios, cuma e tajbe Kman Dios tu'n tk'oj texin cykilca tipemal bix tnaabl Dios. ²⁰ Bix e tajbe Dios tu'n tten cykilca at twitz cya'j tuyaj cykilca at twitz tx'otx' tuj ttz'yal tuya Dios nuk tu'n Cristo. Bix tu'n tcyamecyxin twitz cruz e bint tu'n Dios tu'n tbin kten tuya Dios.

²¹ Yaltzen cyey, nejl ccy'y Dios. Oc cyk'o'ja ti'jxin tuj cyanema, bix nuk ka' e cybinchay. ²² Pero amale aj iletkey nejl, pero ja'lewe ma bint tu'n Dios tu'n tbin cytena tuyaxin. Tu'n tcyamecy Tcwalxin tej toc te xjal, chi pomela saxe bix mintii' cyila bix mintii' cypalta twitzxin. ²³ Pero chi pomela n'ka wi'lxix cyocslabla ti' Cristo bix ka min cyaj ccyey yena tu'n cyayona ti'j tbanel ctzaal tk'o'n Dios cyey. Ja yol lu ti'j colbil cyey ma tz'oc cyibi'na, jaxj yol nk'umj tuj cykilca twitz tx'otx'. Tu'n t-xi' npocha'na ja yol lu e tscy'o Dios inayena.

Jun taak'en Pablo tu'n tajben cyxol ocslal

²⁴ Nchin tzalaja tzuu tuj tzee', cuma ma tak' Dios weya tu'n tiy'x q'uixc'aj wu'na tuj taak'en Cristo. Jq'uixc'aj niy'x wu'na najben tu'n cytz'i'ya tuj cyocslabla, bix n-el nni'ya ti'j jniy'x wu'na tuj nxumlala c'ajbel cye t-xjal Cristo. ²⁵ Jweya waak'en tu'n wajbena cye t-xjal Cristo, te cyeey ocslal yaa'n judío, cuma e jaw tscy'o'n Dios inayena tu'n wajbena cyej xjal yaa'n judío. Tajxin tu'n tabij tyolxin cyu'n cykil xjal. ²⁶ Jatxe tuj tneel, e'wen ta' ja tyolxin lu cywitz xjal. Pero ja'lewe, ma yec'aj te cyej xjal o chi oc te t-xjalxin. ²⁷ E tajbexin tu'n tyeec'anxin cye t-xjalxin jawnexsen jun xtalbil o baj tninc'u'nxin, tu'n ttzaj tk'o'nxin cyexin,

judi'ole, yaa'nle judi'io. Bix ja jawnex tyolxin lu e'wen ta' nejl, pero chic'aj ja'lewe, jaj tu'n tocx Cristo tuj kanem, tu'ntzen kpon junx tuyaxin tuya Dios.

²⁸ Ju' tzunj, nuk ti'j Cristo nchin yolena oj nxi' nk'umena cye xjal. Nxi' ncubsa'na nwitz a cye cykil xjal tu'n cyocslan ti'jxin, bix tuj tumel nxi' nk'o'na xnak'tzibil ti'jxin cye cykil xjal, tu'ntzen cypon tz'aklxix twitz Dios tu'nj cymojbabl cyiib tuya Cristo. ²⁹ Tu'n cypon tz'akl, nchin ak'anana cyiw. Nim n-oc wipena ti'j, bix ma tzaj tk'o'n Cristo tipemal weya tu'n tbint wu'na.

2

¹ Jaxte nim n-oc wipena cyi'ja. Waja tz'el cyni'ya ti'j nim nchin na'na Dios cyi'ja, bix cyi'j ocslal tuj tnom te Laodicea, bix cyi'j niy'tl ocslal min cytzki'n nwitz a. ² Nbint wu'na ju'wa tu'n cyywixa tu'nj cymojbabl cyiiba oj n-oc cyak' cyuyey cyey. Bix nchin na'na Dios tu'n telxix cyni'ya ti'j jawnex tumel ma cub tninc'u'n Kman Dios. E'wen ta' j-e cub tninc'u'n Dios nejl, pero chic'aj ja'lewe, jaj tu'n cycleta tu'n Cristo. ³ Jcynaabla taj tzaj tk'o'n Dios tisen jun k'inemal. Pero nuk tu'n Cristo ccyiik'ela ja k'inemal lu.

⁴ Ma txi' nkba'na jlu cyey tu'n mi'n chi cub tzpeta tu'nj cyeca xnak'tzibil, pero x'tak'. ⁵ Tumelte tu'n t-xi' nk'o'na ja yol lu cyey, cuma amale mintn-al kena cyxola, pero nim nchin labta cyi'ja. Pero jax nchin tzalaja cyi'ja, cuma ma nbi'ya junx ta' cynaabla bix min ma yucch cyocslabla ti' Cristo.

⁶ Cuma o tz'oc ke cyc'u'ja ti' Cristo Jesús, bix ma tz'el cyni'ya ti'j jaxin Cawel cyibaja, ju' tzunj cxe'l cyii'na cychunk'lala tuya cynimbila ti'jxin. ⁷ Cyiwxit ta' cyocslabla ti'jxin, tisen jun tzee' min yucch ka wi'lxix tloc' tuj tx'otx'. Chi tz'iyxita tuj tyol Dios tu'nj cymojbabl cyiiba tuyaxin. C'oquel cyipena ti'j tu'n cywe'xixa tuj jxnak'tzibil jaxxix k'o'n cyey. Bix nimxix cyk'onxa chjonte te Dios.

Jun ac'aj kchunk'lal o tzaj tk'o'n Cristo

⁸ Kex ocslal, cyc'ojlanx cyiiba tu'n mi'n chi cub sbu'na, cuma at xjal cyaj tu'n cyoc lpey ti'j cyex cyxnak'tzibil. Pero mintii' tajbel bix x'tak' cyxnak'tzibilxin. Jt-xee' cyxnak'tzibilxin nuk cyool xjal te ootxa bix cynaabl nuk ti'j tik'ch te twitz tx'otx'. Min tzaj cyxnak'tzibilxin ti' Cristo. ⁹ Chi oquel lpey nuk ti'jxin, cuma jaxin Dios. Tujx t-xumlalxin at cykilca tipemal bix tnaabl Dios. ¹⁰ Bix cuma at cymojbabl cyiiba tuya Cristo, tetzen junx maj ma k'oj cychunk'lala tu'n Dios. Mintii' juntl. Yaa'ntzen tumel tu'n cyocxa tjak' cycawbil juntl cawel, cuma ja Cristo Cawel cyibaj cykilca cawel. ¹¹ Bix mintii' il ti'j tu'n tel keset ttz'umel twi' cytz'albila. Nejl, cyxol aj Israel il ti'j tu'n tel keset ttz'umel twi' cytz'albil. Pero ja'lewe, ttanem Dioskey tu'nj tel tii'n Cristo jcynaabla ka' tz' cyocslana ti'jxin. ¹² Tu'nj cymojbabl cyiiba tuyaxin, tisenc'a e cu'x maketkey tuyaxin tej teyimxin. E cyim jcynaabla aj il tuyaxin. Jax tej tjatz itz'jxin juntl maj tuj cyamecy, jax tu'nj cymojbabl cyiiba tuyaxin, tisenc'a e jatz itz'jkey tuyaxin. Ma k'oj jun ac'aj cychunk'lala tu'nj cyocslana ti' Dios, ja Dios e tyeec'a tipemal tej tjatz itz'jsa'n ja Cristo tuj cyamecy. ¹³ Nejl, tisen cyimnekey tuj twitz Dios, cuma e cybinchay il bix cuma yaa'n t-xjal Dioskey. Pero ja'lewe, ma tak' Dios cychunk'lala tu'nj cymojbabl cyiiba tuya Cristo, bix ma cub tnajsa'nxin cykilca cyila. ¹⁴ Nejl, e tkba ley il ti'j tu'n kcyim te junx maj, tu'n tchjet kc'asben te Dios tu'n tlaj kil. Pero ja'lewe, ma tkba Dios mintii' tl kc'asben, cuma el tii'nxin kc'asben bix aj tk'o'nxin tibaj Cristo, tu'ntzen tchjet tu'n Cristo twitz cruz. ¹⁵ Bix tej tjatz itz'jsa'nxin ja Cristo juntl maj tuj cyamecy, el tii'nxin tipemal taaw il bix cyipemal cykil biman. E tzaj cych'ixew cywitz cykilca at tuj cya'j bix entera twitz tx'otx' tej t-xcyeyin cyibaj tu'nj tjatzlen itz'j Cristo.

¹⁶ Ju' tzunj, mi'n txi' cyk'o'na amle'n cyej xjal cyaj tu'n cynimana jley te ootxa tzin tkba'n alcyey ba'n tu'n t-xi' cywaa'na, bix alcyey ba'n tu'n t-xi' cyc'a'na, bix alcyey nink'ij il ti'j tu'n cyiy'santey, bix alcyey k'ij xjan tuj xjaw il ti'j tu'n cynimana, bix tu'n cynimana jk'ij te ajlabl. ¹⁷ Tisen n-ocx nejl tipemal jun xjal tuj jaa' twitz, kej ley te ootxa lu ajben nuk tisen jun xlequemal tej at tule. Pero ma pon baj twi' c'ajbela nuk te techel, cuma ma tzul jttxuyal, ja Cristo. ¹⁸ Mi'n tz'oc cybi'na kej xjal tzin cykba'n min pon cyyola tuya Dios. Mas ba'n tneel ju' cxe'l cye angel, t'zike, tu'n cyyeec'ana ka maanskey. Tzin cykba'nxin o tzaj tk'o'n Dios jun yec'bil tuj cywitziy'xin, bix ju' tzunj at cyoclenxin tuj cywitzxin tu'n cyaawenxin cyibaja. Pero mintii' cyoclenxin, cuma jnche'a lpexin ti'j, nuk ja cynaablxin ka' nkbante. ¹⁹ Tisen o chi el tx'omet-xin ti' t-xnak'tzibil Cristo. Q'uelel cyni'ya ti'j ma tz'iy jun xumlal baj bix ttzyun tiib cyu'n tyakayil nuk o'cx ka min ma tz'el tx'omet ti' twi'. Jax ju'x ejoo'. Tisen kwi' ja Cristo, bix ejoo' ocslal tisen toclabla Cristo. Ko tz'iyal tuj kocslab tisen taj Dios bix ko temel junx nuk o'cx ka min ma ko el tx'omet ti'j t-xnak'tzibil Cristo.

²⁰ Ma cyim cynaabla ka' tuya Cristo, bix mintii' il ti'j tu'n cyxi' lpey ti'j cynaabl xjal te twitz tx'otx' tu'n cyela ba'n twitz Dios. Ju' tzunj, ¿tikentzen nxi' cyii'na cychunk'lala tisenc'a tjak'x ley te twitz tx'otx'key? ²¹ Oj t-xi' cykba'n xjal: "Mi'n txi' cywaa'na jlu. Mi'n txi' cyniy'be'na jlu. Mi'n tz'oc cymco'na jlu. Xjan kej lu," t'zike ¿tiken nchi cuyana cyuya? ²² Min tz'ajben

kej waabj bix kej c'aabj lu tu'n tnet cychunk'lala te junx maj, cuma oj cyajben kej lu cye xjal, n-el baj cyipen. Nuk cyxnak'tzbil xjal kej ley ti'j alcyej tu'n t-xi' cywaa'na bix alcyej tu'n t-xi' cyc'a'na. ²³ Tuj cywitz, cyeca kej ley lu. Nchi yolen ti'j alcyej costumbre tu'n thint cyu'na tu'n cyela ba'n twitz Dios, bix nchi k'on tumel ti'j ti tu'n thint cyu'na tu'n cyyee'c'an cyiiba cywitz xjal ka maanskey, bix nchi xnak'tzan il ti'j tu'n toc cyk'o'na castiwa cye cyumlala. Pero amale ba'nt tcy'e'yenc cyxnak'tzbil, pero mintii' c'ajbel tu'n cytzakpeta ti'j tajbil cynaabla ka'.

3

¹ Key ocslal, cuma e jatz itz'j Cristo juntl maj tuj cyamecy, jax ju'x cyey, tu'nj cymojbabl cyiiba tuyaxin, o chi jatza tuyaxin tuya jun ac'aj cychunk'lala. Ju' tzunj, cyk'o'nc cyc'u'ja ti' Cristo tuj cya'j, jaa' k'uklexin tuj tmank'ab Dios. ² Chi jyona alcyej taj Dios. Mi'n tz'oc cyk'o'na tajbel o'cx jat te twitz tx'otx', ³ cuma ejee'y tisen jun cyimne ma tzakpet ti'j tik'ch at twitz tx'otx'. At cychunk'lala tuya Cristo. Bix cychunk'lala ac'aj tuya Cristo, yaa'n ch'ic'aj ja'lewe, cuma e'wen Cristo tuya Dios. ⁴ Jaxin K'ol cychunk'lala te junx maj, bix oj tyeec'anxin tiibxin juntl maj, cchic'ajaxeltzen ka jawnexsenxin, bix chi temela tuyaxin oj tcawenxin.

Jun ootxa kchunk'la' bix jun ac'aj kchunk'la'

⁵ Ju' tzunj, oj taj cyxumlala jka', cybyom tzuna ja tajbil lu. Tisen tzunj, ka taj cyxumlala tu'n cyjyona pajbaj, mi'n cyak'a amle'n te cyxumlala. Mi'n chi jaw meltz'aja xinak tuya xinak, xuuj tuya xuuj. Mi'n nuk tz'oc tak' xuuj te xinak, bixse xuuj ti' xinak. Mi'n tz'oc cybi'na cyxumlala oj taj jcyachbila yaa'n tumel. Bix mi'n tz'oc cyk'a'bena tik'ch at, cuma oj cyaja tik'ch at, bix yaa'n Dios, tisen'c'a nchi nimana cywitz sant. ⁶ Mi'n chi binchana kej il lu, cuma ctzaal tk'o'n Dios castiwa cyibaj kej xjal nbint cyu'n ju'wa. ⁷ Nejl, tej aj ilkey, e bint kej il lu cyu'na. ⁸ Pero ja'lewe, ocslalkey. Ju' tzunj, cyk'o'ncja kej il lu. Mi'n tzaj cyk'o'ja. Mi'n chi k'o'ja cyi' xjal. Cybajsan'aja cyiic'bila cyi' xjal. Mi'n chi yolena ka' cyi'j xjal, bix mi'n tz'oc cyk'o'na xmucc'bil cye xjal. Mi'n txi' cykba'na tz'il yol. ⁹ Bix mi'ntl chi x'tak'ena cyxola, cuma ma chi ela tjak' tcawbil cynaabla ka' nuk taj tu'n thint ka' cyu'na. ¹⁰ Ma k'o'j jun ac'aj cynaabla e bint tu'n Dios, bix cyak'anan Dios tu'n toc ja ac'aj cynaabla lu junx tuyaj tecxin tnaabl, tu'ntzen telxix cyni'ya ti'jxin. ¹¹ Bix cuma at jun ac'aj cynaabla, yaa'ntzen il ti'j ka aj griegokey bix ka yaa'n aj griegokey. Judío lokey, yaa'nle judíokey, jun wikxitl-le xjalkey, ajnintzle xjalkey, tjak'le tcawbil juntl xjal ete'y, cawel lokey, yaa'n il ti'j. Nuk o'cx ja te Cristo il ti'j. Bix jaxin at cyuya cykil ocslal.

¹² At jun ac'aj cynaabla. T-xjal Dioskey bix sakkixkey bix n-oc cyak'a te Dios. Ju' tzunj il ti'j chi yeec'ala cyanema cyi' juntl, bix tu'n cyk'ona xtalbil cye juntl, bix tu'n mi'n jaw cyniman cyiiba, sino tu'n t-xi' cyii'na jun cynaabla maans, bix tu'n tten cypasensyey. ¹³ Tziy'x cyu'na cyxolxa oj at cypaltela. Oj nbinchun jun ocslal jun ka' cyi'ja, cynajsam til. Tisen te junx maj ma cub tnajsa'n Cristo cyila, jax ju'x cyey, cynajsam cyil juntl ocslal. ¹⁴ Bix mas il ti'j twitzj cykilca, jaj tu'n toc cyak' cyiiba cyey, cuma tu'n tk'ak'bil cyc'u'ja ctemel cymojbabl cyiiba. ¹⁵ Cyk'onx cyiiba tu'n cytena tuj ttzyal tuya cykil ocslal, cuma e tscy'o Dios ejee'y tu'n cytena junx. Bix cyk'onx chjonte te Dios. ¹⁶ Cyk'o'nc cyipena ti'j tu'n tnojxsen cyanema tuya xnak'tzbil ti' Cristo. Tu'n thint jlu, cyxnak'tzam tyol Dios cyxolxa tuya cynaabla, bix cyk'onx cynaabla cyxolxa. Bix oj cybitzena ti' salmo bix ti' bitz bix ti' tyol Dios, chi bitzela tuya nim chjonte te Dios tuj cyanema. ¹⁷ Bix cykilcaj ncub cybincha'na bix nxi' cykba'na, cybinchama tisen'c'a tyolel Kaaw Jesúskey. Bix cyk'onxa chjonte te Kman Dios tu'nxin.

Ti tten tnaabl jun ocslal cyxol xjal

¹⁸ Key xuuj, cxe'l cyyee'c'ana cynimbila twitz cychmila, cuma ocslalkey, bix ju' taj Kaaw.

¹⁹ Key xinak, c'oquel cyak' cyxu'la cyey. Mi'n chi yolena cyiw cyexuy.

²⁰ Yaltzen cyey cwal, cxe'l cybi'na cymana bix cytxuy tuj cykilca, cuma ntzalaj Dios cyi'ja oj nchi nimana cymana bix cytxuy.

²¹ Yaltzen cyey mambaj bix txuybaj, mi'n tz'oc cyilena cywala ka mintii' ka' ma bint cyu'nk'a, tu'ntzen mi'n baj cyc'u'jk'a.

²² Key ak'anal, cxe'l cybi'na taaw cyaak'ena twitz tx'otx' tuj cykilca. Chi ak'anala tuj tumel yaa'n nuk o'cx oj at cypatróna te cyey'lte cyey, sino sey'x chi ak'anala, bix tuya cykil cyc'u'ja. Chi ak'anax yaa'n nuk tu'n cyela ba'n cywitz cypatróna, sino tu'n t-xi' cyyee'c'ana cynimbila twitz Dios. ²³ Cykilcaj ak'untl nbint cyu'na, cybinchama tuya cykil cyc'u'ja, tisenxsen nchi ak'anana tuya Kaaw bix yaa'n nuk jaj nchi ak'anana cyuya cypatróna. ²⁴ Amale mint tzin cyk'o'n cypatróna jun cykaba, pero chi ak'anana ba'n, cuma cytzki'ntla ctzaal tk'o'n Kaaw jun ba'n cychojbila te t-xel jcyajbela. Ja Kaaw Cristo jxjal nchi ajbena te. ²⁵ Pero kej xjal ma chi binchan ka' tuj cyaak'en, ccyiik'eltzen jun ccastiwa tu'n Cristo. Tuj twitzxin min-al jun xjal mas nintzaj twitz juntl oj t-xi' tcy'e'yenxin cyaak'en xjal.

4

¹ Key taaw ak'untl, cyk'onx jun twi' cyc'u'j cy-ak'anala jiquen, tu'ntzen ba'n tuj twitz Dios, bix ka ba'n ak'analke, jun twi' cyc'u'j ba'n, cuma cyuyaxa ete'y tjak' tcawbil cypatróna tuj cya'j, jaj Dios nxi' cyeyente cyey ka ma chi binchana cye cy-ak'anala tuj tumel.

² Key ocslal tuj Colosas, mi'n cyaj cyk'o'na tu'n cyna'na Dios. Bix chi ximala oj cyna'na Dios, bix tuya chjonte texin. ³ Bix chi na'na Dios wi'ja, tu'n ttzaj tk'o'nxin amle'n weya tu'n t-xi' nk'umena jxnak'tzbil ti' Cristo, jaj yol e'wen ta' nejl pero chic'aj tu'n Dios ja'lewe. Ntiina tuj tzee' cuma e nk'umena nejl. ⁴ Ju' tzunj, chi na'na Dios wi'ja, tu'n tchic'ajax ja xnak'tzbil lu wu'na, cuma ja weja waak'en.

⁵ Cxe'l cyii'na cychunk'lala tuya cynaabla cywitzj xjal min ma chi ocslan ti' Cristo. Cyjyonx amle'n tu'n cybinchana jun ba'n te cyexin. ⁶ Tisen tzin tk'o'n atz'en ttzyal ti' waabj, tenxit cyyola tuj ttzyal, tu'ntzen cynak'eta ti'j tu'n taj cytzak'be'na te juun xjal tuj tumel.

Jun k'olbebl tu'n Pablo cyuya ke tuya cye ocslal aj Colosas

⁷ Yaltzen weya tzalu, cxe'l ttx'olba'n jxin Tíquico ti ntena cyey. Nim n-oc tak'xin weya, bix n-oc ke nc'u'ja ti'jxin tuj ak'untl. Junx nko ak'anana tuj taak'en Kaaw. ⁸ Nxi' nchk'o'na jaxin cyuyey tu'n tel tniy'xin ti'j ti cytena, bix tu'n tcywix cyc'u'ja tu'nxin. ⁹ Jax ju'x nxi' nsma'na jxin Onésimo tuyaxin. Aj cytanema ja Onésimo, bix at nim tk'ak'bil nc'u'ja ti'jxin. Nim ma tz'ajbenxin weya. Cxe'l cyk'umenxin cyca'belxin cyey cykilcaj nbaj tzalu.

¹⁰ At Aristarco tuj tzee' wuyena, bix nxi' tk'o'nxin jun k'olbebl te cyey. Jax ju'x nxi' tk'o'n Marcos jun k'olbebl te cyey. Tcwal titz'en tman Bernabéxin. N-ul tuj cyc'u'ja j-e xi' nkba'na cyey tu'n thint cyu'na ka ma ponxin cyuyey. Cyk'imxin tuya cykil cyc'u'ja.

¹¹ Jax ju'x junxin Jesús, juntl tbixin Justo, nxi' tk'o'n jun k'olbebl te cyey. Cyxol kej ocslal n-onen wi'ja ja'lewe tuj waak'ena tzalu ti'j tu'n ttz'iy tcawbil Dios, o'cx kej oxo xjal lu aj judío. Nim ma nimset nc'u'ja cyu'nxin.

¹² Nxi' tk'o'n jxin Epafras jun k'olbebl te cyey. Aj cytanema jaxin, bix jun t-ak'anal Cristoxin. Nim nna'nxin Dios cyi'ja, tu'n cyk'on cyiiba ti'j tajbil Dios, bix tu'n cywe'xixa tuj cyocslabla. ¹³ Jax wu'na, nim nchin labta cyi'ja, bix cyi'j kej ocslal cyuj tnom te Laodicea bix te Hierápolis.

¹⁴ Jax ju'x nxi' tk'olbe'n jxin Lucas ejee'y, jaj xin k'anel n-oc tak' weya. Bix nxi' tk'o'n jxin Demas jun k'olbebl te cyey.

¹⁵ Cyk'onxa jun nk'olbebla te cyey ocslal najlke tuj Laodicea. Bix cyk'onxa jun nk'olbebla te Ninfas bix te cyey ocslal nchi chmet tuj tjaxuj.

¹⁶ Najsama, oj tbaj cyši'na ja u'j lu cyxola, cysmanxa cye ocslal tuj Laodicea, tu'ntzen tjaw cyši'nxin cyxolxin. Jax waja tu'n tjaw cyši'na j-u'j nxi' nsma'na cye ocslal tuj Laodicea.

¹⁷ Cykbanxa ja nyola lu tej xin Arquipo: "K'o'nc tc'u'ja ti'j tu'n tpon baj jtaak'ena ma k'oj tey tuj taak'en Kaaw," tzi cybela texin.

¹⁸ Inayena, Pablo, nxi' nk'o'na jun nk'olbebla te cyey, pero yaa'n jun ntz'i'bila ncub tz'i'bente, sino inayena tu'nx nk'aba. Chi na'na Dios wi'ja, cuma tuj tzee' ntiiniya. Tenxit t-xtalbil Dios cyuyey.

O'cx nyolja.

Tneel u'j e xi' ttz'i'ben Pablo cye ocslal tuj tnom Tesalónica

Jun k'olbebl tu'n apóstol Pablo

¹ Inayena, Pablo, nxi' ntz'i'bena ja u'j lu te cyey ocslal tuj tnom te Tesalónica, ejee'y at cymojbabl cyiiba tuya Kman Dios bix tuya Kaaw Jesucristo. Jax nxi' cyk'o'n Silvano tuyax Timoteo jun cykolbebl te cyey. Tzajxit tk'o'n Dios bix Jesucristo xtalbil cyey, bix tu'n cytena tuj ttzjal.

Kej ocslal te Tesalónica ajbenke te yec'bil cye cykil ocslal

² Cykilca k'ij nxi' kk'o'na chjonte te Dios ti'j cykilcakey, bix nko na'na Dios cyi'ja. ³ Nchi'ajax at cyocslabla ti' Dios, cuma ba'nxsen cybinchbena. Tuya cykil cye'u'ja nchi ak'anana tu'n cyyec'ana cyanema cye xjal, bix amale n-oquet q'uixc'aj cyi'ja, pero tuya cypasensyey nchi ayona ti'j jba'n ccyiik'ela oj tul meltz'aj Cristo. Cykilcaj lu n-ul tuj kc'u'ja oj nko oca twitz Kman Dios.

⁴ Key hermano n-oc cyak'a te Dios, tzinen ta' tuj kwitza t-xjal Dioskey, ⁵ cuma tej t-xi' kk'umena jba'n yol ti'j colbil ke cyxola, yaa'n nuk kajxa e xi' kk'umena. E cybiy kyola tuya cykil cye'u'ja, bix ak'anan Espíritu Santo tuj cyanema tu'n tcub cyi'ja, bix eljax tpochal colbil cyey tuj cywitz. E xi' ccyey'ena ejoo'ya tej tiy'x q'uixc'aj ku'na bix tu'n Kaaw Jesucristo nuk tu'n tlaj tyol Dios, jax ju'x cyey. Ma tziy'x q'uixc'aj cyu'na nuk tu'nj cyocslabla ti' Cristo. Bix amale oquet pena cyi'ja, pero oc cybi'na tyol Dios tuyaj tzalajebk'o'n tu'n Espíritu Santo. ⁷ Amale e jawet cyk'oj xjal cyi'ja, pero e cyk'umena jba'n tpochal colbil ke, bix ju' tzunj ockey jun ba'n yec'bil te cykil ocslal cyuj departamento te Macedonia bix Acaya. ⁸ Jax wu'na jun ba'n yec'bilkey, cuma cyu'na ma tz'abij jyol ti'j Kaaw, yaa'n nuk tuj Macedonia bix tuj Acaya, pero jax ju'x tuj cykilca lugar. Cykil xjal ma txi' cybi'n tpochal cyocslabla ti' Dios. Ju' tzunj, mintii' il ti'j tu'n t-xi' k'kba'na mastl yol cye xjal ti'j ti cytena. ⁹ Ejee'x xjal tuj cykil tnom tzin cykba'n weya ti tten oc cybi'na kyola, bix ti tten e cyaj cyk'o'na cysanta tu'n cyxi' lpey ti' Dios, bix ja'lewe nchi ajbena te Dios i'tz bix jaxxix. ¹⁰ Tzin cykba'nxin ti tten nchi ayona ti'j jk'ij oj tul meltz'aj Tcwalxin tuj cya'j, jxin Jesús, jax xjal e jatz titz'jsa'nxin tuj cyamecy, bix jxjal Clolte ke tuj castiwa tzul.

2

Jun taak'en Pablo e bint tuj tnom Tesalónica

¹ Key ocslal, ejee'xa cytzki'na nim ajben kyola cyey tu'n cyxi' lpey ti' Cristo. Yaa'n nuk kajxa iy'x q'uixc'aj ku'na tu'n t-xi' kk'umena tpochal Cristo cyey. ² Cytzki'na tej mitkna'x kpona cyxola, otk tziy'x nim q'uixc'aj ku'na tuj tnom te Filipos, bix nim otk chi yasen xjal ki'ja. Pero min e cyaj kcyey'ena ak'untl, sino e tcyiwsa Dios kc'u'ja tu'n t-xi' kk'umentla jba'n tyolxin tuj cytanema, amale e jawet cyk'oj xjal ki'ja juntl maj. ³ Bix cytzki'na jyol e xi' kk'o'na cye yaa'n nuk jun tzpetpajlenel, bix yaa'n tu'n kcamana cypwaka, bix yaa'n tu'n cyxi' tz'aka tuj jun xtak'bil yol. ⁴ Yaa'n ju'wa, sino jaxxix yol ti'j colbil ke tzin kk'umena, cuma e jaw tscy'o'n Dios ejoo'ya tu'n t-xi' k'pocha'na. Bix nko k'umena yaa'n tu'n kela ba'n cywitz xjal, sino o'cx tu'n kela ba'n twitz Dios, jxin n-el tniy' ti'j ti niy' tuj kc'u'j. ⁵ Cytzki'na, bix jax ju'x ttzki'n Dios, mi nuket jun maj e kbinchaya xmoxbil cyey tuya cyeca kyola tuya jun kajbila e'wen ta' ku'na tu'n tel kii'na cypwaka. ⁶ Bix bajx o kajbe'ya tu'n kjaw nimsa'na cyu'na, mi nuk cyu'n mastl xjal. Amale atet koclana tu'n kjaw nimsa'na, cuma t-xel Cristo ko'ya, ⁷ pero min e kajbe'ya jlu. Nuk e kajbe'ya tu'n kc'ojlana ejee'y tuya jun tk'ak'bil kc'u'ja cyi'ja, tisen jun txuybaj nc'ojlan cye tal cuma at tk'ak'bil tc'u'jxuj ti'j. ⁸ Tu'n tzunj tk'ak'bil kc'u'ja cyi'ja, e xi' kk'o'na jyol lu cyeey ti'j ti tten tu'n cycleta. Bix yaa'n nuk jaj lu, pero tuya cykil kc'u'ja e xi' kk'o'n kiiba tu'n konena cyi'ja, cuma il cyi'ja tuj kwitza. ⁹ Key hermano, na'nx cyu'na ti tten ak'anan ko'ya tu'n kitz'ja. Te koniyan bix te k'ij ak'anan ko'ya, tu'ntzen mi'n cub kk'o'na jun gast cyibaja. Nim e sict ko'ya nuk tu'n tabij tyol Dios cyu'na ti'j colbil cyey. ¹⁰ Cytzki'na, bix ttzki'n Dios, ti tten e xi' kii'na knaabla cyxola, ejee'y ocslal. Saxkix bix jiquenxix bix mintii' k'paltela e cyila. ¹¹ Jax ju'x cytzki'na ti tten e xi' k'kba'na cyeey tu'n t-xi' cyii'na cychunk'lala tuj tumel, bix ti tten e xi' kcyiwsa'na cye'u'ja, bix ti tten e xi' k'kba'na cyeey tu'n tcyaj cyk'o'na cyila. E kbinchaya cyey tisen nbinchan jun mambaj te jaca juun tcwal. ¹² Cykilcaj lu e bint ku'na tu'n t-xi' cyii'na cychunk'lala tuj tumel twitz Dios, jaj Dios e tzaj txconte cyey tu'n cyoca t-xjalxin, bix tajxin tu'n cypona tuj thanel najbil jaa' ta'xin.

¹³ Key ocslal, jaca k'ij nxi' kk'o'na chjonte te Dios yaa'n nuk kajxa e xi' kk'o'na tyol Dios cyey, sino e xi' cyocsla'na. Tej t-xi' cyocsla'na, cuma yaa'n nuk cyool xjal tuj cywitza. E xi' cyocsla'na cuma jaxxix tyol Dios tuj cywitza. Bix cyak'anan tyol Dios tuj cyanema tu'n tch'ixpet cynaabla, ejee'y ocslal. ¹⁴ Nchic'ajax nchi nimana jaxxix yol, cuma niy'x q'uixc'aj cyu'na nuk tu'nj cyocslabla. At xjal tuj cytanema nuk nchi k'o'j cyi'ja tu'nj cyocslabla ti' Cristo, tisenj e baj tuj Judea te cyej judío oc te t-xjal Dios tu'nj cyocslabl ti'j Cristo Jesús. Kej judío cicy'i Cristo nuk e xi' cyayajla'n kej judío otk chi ocslan. ¹⁵ Bix nejl, e cub cybyo'nxin Kaaw Jesús. Bix e cub cybyo'n ke tyolel Dios te ootxa. Jax ju'x keya, etz lojo'n ko'ya cyu'nxin. Min chi elxin ba'n tuj twitz Dios, bix nuk ka' nchi binchanxin ti'j cykil xjal. ¹⁶ N-oc cymayo'nxin ejoo'ya tu'n t-xi' kk'umena tyol Dios cyej xjal yaa'n judío, cuma cicy'ixin tu'n cyclet. Nimxsen cyil cyiy'jilxin, bix tzinx nchi chmonxin il jaca k'ij ja'lewe. Ju'tzen tten ma cub tk'o'j Dios cyibajxin, bix tzul tk'o'nxin jun nintzaj cycastiawaxin.

E tajbe Pablo tu'n t-xi' juntl maj k'olbelte cye aj Tesalónica

¹⁷ Perotzen keya, key hermano, tej ketz lojo'na tuj cytanema, tuj jun rato e kajbe'ya tu'n ktena cyuyey juntl maj. Etz cyii'n xjal ejoo'ya cyxola, pero mix etze cyii'nxin tk'ak'bil kc'u'ja cyi'ja, bix nim e kajbe'ya tu'n toc kcyey'ena cywitza juntl maj. ¹⁸ Pero tej toc kipena ti'j tu'n kpona cyuyey, oc tmayo'n taaw il ejoo'ya. Nim maj e wajbe'ya, inayena, Pablo, tu'n nxi'ya, pero mlay. ¹⁹ Kaja tu'n toc kcyey'ena cywitza cuma oj kpon twitz Kaaw Jesucristo, oj tul meltz'aj, ¿alcyetzenke c'ajbel te yec'bil c'ajbel jkaak'ena twitz tx'otx'? ¿Alcyetzenke ko tzalajela cyi'j? ¿Bix tu'nj alcyetzenke ctzaal tk'o'nxin jun kcozta tu'nj ak'anan ko'ya ba'n? ¿Yaa'mpatzen ejee'y? ²⁰ Jax ku'na. Ejee'y jyec'bil cxe'l kyeec'ana ti'j kaak'ena, bix cyu'na ko tzalajela.

3

¹ Cuma oc mayo'n kena tu'n npona cyuyey, bix cuma mlay tziy'x ku'na tu'n mi'n tz'el kni'ya ti'j ti cytena, ju' tzunj e cub kximana tu'n t-xi' ksma'na Timoteo cyuyey, bix tu'n ncyaja njunala tuj Atenas. ² Jun t-ak'anal Dios hermano Timoteo, bix nak'ananxin junx kuyena tu'n t-xi' kk'umena jba'n tpochal Cristo. E xi' ksma'na jaxin cyuyey, tu'ntzen cicywixa tuj cyocslabla, bix tu'n tcyiwset cyc'u'ja tu'nxin. ³ E xi' ksma'na jaxin tu'n mi'n baj cyc'u'ja tu'nj q'uixc'aj n-oc cyi'ja nuk tu'nj cyocslabla. Q'uelel cyni'ya ti'j il ti'j tu'n tiy'x q'uixc'aj ku'n, cuma ocslal ko'. ⁴ Ya o tz'el cyni'ya ti'j lu, cuma tej ktena cyxola, e xi' kkba'na cyey q'uelel cyii'q'uen xjal ejoo' nuk tu'nj kocslabl ti'j Cristo. Bix ju'tzen o baja, tisenj o cyila. ⁵ Tej nbintiya niy' q'uixc'aj cyi'ja, min iy'x wu'na tu'n min tz'el nni'ya ti'j ti tten cyocslabla, bix ju' tzunj e xi' nsma'na Timoteo te cyey'lte cyey. Oc niy'bebl cyi'ja tu'n taaw il tu'ntzen tcyaj cicyey'ena cyocslabla, bix e wajbe'ya tu'n tel nni'ya ti'j ka k'i'nx cyocslabla, bix ka nuk kajxa ak'anan ko'ya cyxola.

⁶ Pero ya mintl nko labta cyi'ja, cuma ma tzul meltz'aj Timoteo, bix ma tzaj tkba'nxin ba'n cyocslabla bix n-oc kak'a cyey. Ma tzaj tkba'nxin nko tzaj cyna'na tuya tzalajehl, bix cyaja tu'n toc cicyey'ena kwitza. Jax ju'x keya, kaja tu'n toc kcyey'ena cywitza. ⁷ Ju' tzunj, key hermano, ma cyiwset kc'u'ja cyu'na tu'n tiy'x jq'uixc'aj bix pena ku'na, cuma ma kbi'ya ma cywix cyocslabla. ⁸ Ma tz'el kbisa bix at tzalajehl tuj kchunk'lala cuma k'i'nxix cyocslabla ti' Kaaw. ⁹ Min cnet ku'na tu'n t-xi' kk'o'na chjonte te Dios cyi'ja, bix mintii' yol tu'n t-xi' kkba'na ktzalajebla twitz Dios cyi'ja. ¹⁰ Te k'ij bix te koniyan nxi' kkubsa'na kwitza texin tu'n ttzaj tk'o'nxin tu'n toc kcyey'ena cywitza, bix tu'n t-xi' kk'o'na jxnak'tzibil cyey min e xi' kk'o'na cyey nejl, tu'ntzen tz'akl cyocslabla.

¹¹ Jket-xittzen kbe'ya tu'n Kman Dios tuyax Kaaw Jesucristo, tu'ntzen kpona cyuyey juntl maj. ¹² Bix tak'xit-xin cyey tu'n tz'iyne tz'iy tk'ak'bil cyc'u'ja cyxolxa, bix tu'n toc cyak' cykil xjal cyey, tisen n-oc cyak'a keya. ¹³ Bix tzajxit tk'o'nxin cyey tu'n cicyaja cyiw tuj cyocslabla, tu'ntzen mintii' cypaltela twitz Kman Dios bix tu'n cytena sakxix oj tul meltz'aj Kaaw Jesucristo cyuya cykilcaj t-xjalxin.

4

Ti tten tu'n t-xi' cyii'n ocslal cychunk'lal tujxix tumel

¹ Yal ja'lewe, key ocslal, tu'nj koclana ma k'o'j keya tu'n Kaaw Jesús, cxe'l kkba'na cyey ti tten tu'n t-xi' cyii'na cychunk'lala tujxix tumel. Cxe'l kcubsa'na kwitza cyey, cyk'o'ncix cyipena ti'j tu'n xi'ne txi' cyii'na cynaabla tisenj e xi' kxnak'tza'na cyey, bix tu'n cyela ba'n twitz Dios. ² Cytzki'na ti tten tu'n cyela ba'n twitz Dios, cuma e xi' kk'o'na jxnak'tzibil cyey ti'j lu, ejee'j xnak'tzibil e tzaj tkba'n Kaaw Jesús. ³ Cytzki'na taj Dios tu'n t-xi' cyii'na jun cynaabla sakxix. Cyk'oncja cyachbila tu'n cyoc ipana cyl'j xuuj yaa'n cyxu'la bix cyi'j xinak yaa'n cychmila. ⁴ Taj Dios tu'n cytzyunte cyiiba ti'j cyxumlala, tu'ntzen tten cynaabla sakxix bix tu'ntzen cyniman xjal cynaabla. ⁵ Mi'n che'x lpey ti'j nuk tik'ch jyaa'n ba'n taj cyxumlala,

tisen nbint cyu'n kej xjal min cytzki'n Dios. ⁶ Tcy'ixin tu'n cybinchana jun ka' ti' juntl oclslal tu'nj tu'n cyoc ipana ti' t-xu'l. Ctzaal tk'o'n Kaaw castiwa tibaj cykilca kej xjal nchi oc ipan cyi'j t-xu'l juntl, tisen e xi' kkba'na cyey nejl tuya jun cyiw yol. ⁷ Min e ttxoc Dios ejoo' tu'n kbinchante jyaa'n ba'n, sino tu'n koc t-xjalxin sakkix. ⁸ Ju' tzunj, alcyej xjal tcy'i tu'n tniman ja yol lu, yaa'n nuk n-el t-xoo'n jun yol nkba'j ku'na, sino n-el t-xoo'n Dios, ja Dios e tzaj smante Espiritu Santo ke tu'n koc sakkix.

⁹ Yaltzen tk'ak'bil cyc'u'ja cyxolxa, key oclslal, mintii' il ti'j tu'n t-xi' ktz'i'bena cyey ti'j lu, cuma jax Dios ma xnak'tzante cyey tu'n toc cyak'a cyuyey cyey. ¹⁰ Tzinen ta' ma chi yeec'ana tk'ak'bil cyc'u'ja ti'j cykilca oclslal tuj entera departamento te Macedonia. Pero cxe'l kkanena cyey tu'n tz'iyne tz'iy tk'ak'bil cyc'u'ja cyi'jxin. ¹¹ Bix cyk'o'nc cyipena ti'j tu'n cytena tuj ttzaj cyuya xjal, bix nuk o'cx tu'n cyak'anana ti'j cyey cyaak'en, bix tu'n mi'n cyiik'a cy'aja, sino tu'n cyak'anana tu'n cyitz'ja, tisen e xi' kkba'na cyey nejl. ¹² Chi ak'anana, tu'ntzen mi'n chi oca te jun ch'ixbajil cywitz'j xjal yaa'n oclslal, bix tu'n cytena mintii' palt cyey.

Tej tkbante Pablo ti tten oj tul meltz'aj Kaaw Jesús

¹³ Key oclslal, ja'lewe cxe'l nkba'na cyey ti'j pjal cyej oclslal ma chi cyim, tu'n tel cyni'ya ti'j, tu'ntzen mi'n baj cyc'u'ja ti'j ti'j pjal cyi'jxin, tisen nbaj cyc'u'j kej xjal yaa'n oclslal oj nchi cyim xjal. Mi'n chi bisena. ¹⁴ C'oquel cycwenta ti'j e cyim Jesús pero ma jatz titz'jsa'n Dios jaxin tuj cyamecy. Katzen jaxxix ja lu, iltzen ti'j ctzaal ti'n Dios cykilca kej cyimne oclslal junx tuya Jesús oj tul meltz'aj Jesús. ¹⁵ Cxe'l nkba'na cyey jun tumel ma tzaj tkba'n Kaaw weya. Oj tul meltz'ajxin, kej oclslal i'tzx twitz tx'otx' oj tulxin, mlay ko'x tuyaxin nejl cywitz'j oclslal o chi cyim. ¹⁶ Jax Kaaw cweletz tuj cya'j, bix tuya jun jawnex tk'aj'ajel cwel k'ajt, cxe'l tkba'n tu'n cyjatz itz'j kej xjal oclslan ti' Cristo juntl maj tuj cyamecy tuya ac'aj cyxumlal. Bix cjawel tsi'n jtsanjel Dios mas jawnex tuj cya'j, bix ck'ajtel t-xux Dios, bix chi jawetz itz'j kej oclslal cyimne, nejl cywitz'j kej oclslal i'tz. ¹⁷ Lepchxetzen ko', ejoo'j i'tzx ko' twitz tx'otx', ko jawel k'i'n tuj muj, tu'n kchmet junx cyuyaj niy'tl oclslal, tu'ntzen kclunte kiib tuyaj Kaaw tzul. Bix ko temel tuya Kaaw te junx maj. ¹⁸ Ju' tzunj, cycyiwsam cyc'u'ja cyxolxa tu'n ja yol lu.

5

¹ Yaltzen te alcyej k'ij bix alcyej jnabk'i tu'n tul meltz'aj Kaaw, mintii' il ti'j tu'n t-xi' nxnak'tza'ntla cyey ti'j lu. ² Ya cytzki'ntla tzul meltz'aj Kaaw oj min chi ayon xjal ti'j, tisen jun alak' n-ul te koniyan. ³ Tuj tzunj k'ij tzul, cykba' xjal: "Mintii' pelke. Ko temel tuj ttzaj," tzi cybel xjal. Pero jun k'ij mintii' tumel cwel tcastiwa Dios cyibaj, bix mlay chi tzokpaj, tisen il ti'j q'uiyel tchyonex tal jun xuuj tu'n oj tpon tumel tu'n tul itz'j.

⁴ Perotzen cyey, hermano, yaa'n atl cynaabla tuj klolj, tisen cynaabl aj il. Ju' tzunj, nchi ayona ti'j jk'ij oj tul Cristo juntl maj. Yaa'n ejee'y tisen jun taaw jaa' bix ch'innche oj toc jun alak' tuj tja te koniyan, cuma n-el cyni'ya ti'j tzul jk'ij te Kaaw. ⁵ Cykilca ke cyey tuj spi'yen ete'y bix te k'ijl. Yaa'n ejoo' oclslal tisen tuj klolj bix tuj koniyan. ⁶ Ju' tzunj, mi'n ko wutan tisen ke mastl xjal. Nuk o'cx tu'n tten knaabl i'tz, tu'ntzen binne kten oj tulxin. ⁷ Mi'n ko ten tisen kej xjal nuk nchi wutan bix nchi c'an k'e'n te koniyan, bix min tz'el cyniy' ti'j ti nbaj. ⁸ Pero ke, xjal te k'ij ko', bix il ti'j tu'n kten i'tz, tisen jun soldado. Tisen n-oc xcbil ttzii' t-xuuc' soldado bix njax maksbil twitz tu'n binne tten, jax ju'x ke. Binne ko temel tu'nj n-oc ke kc'u'j ti' Dios, bix tu'n toc tak' Dios ke, bix tu'n kayon ti'j jcolbil ke ctk'a' Dios. ⁹ Ko ayol ti'j colbil ke, cuma min ma baj tninc'u'n Dios tu'n tcub tk'o'n castiwa kibaj, sino tu'n kcllet tu'n Kaaw Jesucristo. ¹⁰ E cyimxin te kxel, tu'ntzen kten tuyaxin te junx maj, ka i'tzx ko' oj tulxin, bix ka otk ko cyim. ¹¹ Ju' tzunj, cycyiwsam cyc'u'ja cyxolxa tu'nj ja yol lu, tisen nbint cyu'n nimtl cyxola.

Tej t-xi' tk'o'n Pablo cynaabl oclslal

¹² Key oclslal, cxe'l kkubsa'na kwitza cyey tu'n tel cyni'ya ti'j at c'ajbel kej t-ak'anal Kaaw cyxola. Nchi cawen cyxola bix nchi k'on xnak'tzibil cyey tuya cykil cyc'u'j. Ju' tzunj, chi nimana cyi'jxin. ¹³ Cyk'onxa cynimbila bix tk'ak'bil cyc'u'ja cyexin, cuma t-ak'anal Kaawkexin. Bix tenx cymojbabil cyiiba cyxolxa.

¹⁴ Jax cxe'l kcubsa'na kwitza cyey, key hermano, tu'n t-xi' cykba'na cyej xjal cy'aj tu'n cyak'anana, bix tu'n ccyiwsantiya cyc'u'j kej xjal at ttzi cyi'j, bix tu'n t-xi' cyonena kej xjal yaa'n cyiwxix tuj cyocslabl, bix tu'n tten cypasensyey cyi'j cykilca oclslal. ¹⁵ Ka ma tz'oc bint jun ka' cyi'ja, c'oquel cycwenta ti'j tu'n mi'n xe'len cyu'na. Nuk o'cx tu'n cybinchantiya jba'n cyxolxa bix cye cykil xjal.

¹⁶ Chi tzalajxa. ¹⁷ Mi'n chi we'y tu'n cyna'na Dios. ¹⁸ Cyk'onx chjonte te Dios ti' cykilca. Kej lu taj Dios tu'n tbint cyu'na, ejee'ja at cymojbabil cyiiba tuya Cristo Jesús.

¹⁹ Mi'n tz'oc cymayo'na tu'n tak'anana Espíritu Santo. ²⁰ Mi'n tz'el cyxoo'na cyvol kej xjal nchi k'umen jma tyeec'an Dios cyexin. ²¹ Pero oj nchi k'umenxin, cyabinx ti toc cyu'nxin, la' ka tumel bix ka mín. Katzen jaxxix, cybi'nctzen. ²² Pero cypa'mel cyiiba ti'j cykil yol yaa'n ba'n.

²³ Tzajxittzen tk'o'n Dios tu'n cytena sakkix te junx maj, jaxj Dios k'ol cyey tu'n cytena tuj txubtx. Bix tc'ojla'xit-xin cychunk'lala bix cynaabla bix cyxumlala, tu'ntzen cynceta mintii' cyila oj tul meltz'aj Kaaw Jesucristo. ²⁴ Npon baj Dios ti' cykilca tyol. Ma txconxin cyey tu'n cyoca t-xjalxin, bix cbinel tu'nxin tu'n cycleta.

Jun manc'bil yol tu'n Pablo

²⁵ Key ocslal, chi na'na Dios ki'ja.

²⁶ Cyk'onxa nim kk'olbebla cye cykil ocslal tuya jun tz'ubj witzbaj, tisex tten tu'n t-xi' kyeec'an tk'ak'bil kc'u'j kxol.

²⁷ Cxe'l nkba'na cyey tu'n tcyaj cyk'o'na cyyola twitz Kaaw tuya jun jurament tu'n tjaw cyši'na ja u'j lu cywitz cykil ocslal.

²⁸ Tenxit t-xtalbil Kaaw Jesucristo cyuyey.

O'cx nyolja.

Tcab u'j e xi' ttz'i'ben Pablo cye ocslal tuj tnom Tesalónica

Jun k'olbebl tu'n apóstol Pablo

¹ Inayena, Pablo, tuyax Silvano bix Timoteo, nxi' ntz'i'bena ja u'j lu te cyey ocslal tuj tnom te Tesalónica, key t-xjal Kman Dios bix t-xjal Kaaw Jesucristo. ² Tzajxit cyk'o'nxin xtalbil cyey bix tu'n cytena tuj ttzyal.

Oj tul meltz'aj Cristo cwel cycastiwa aj il tu'n Dios

³ Key ocslal, il ti'j bix tumel tu'n t-xi' kk'o'na chjonte te Dios jaca k'ij cyi'ja, cuma tz'iyne tz'iy cyocslabla ti' Cristo tuyax tk'ak'bil tc'u'j teeyle juun cyxola. ⁴ Ejoo'ya tzalu nim nko tzalaja cyi'ja tu'n cyocslabla ti' Cristo bix tu'nj tk'ak'bil cyc'u'ja, bix nxi' kkba'na cye t-xjal Dios at cypasensyey bix min cyaj cyk'o'na cyocslabla, amale niy'xet q'uixc'aj bix pena cyu'na nuk tu'n cyocslabla.

⁵ Pjeltzen t-xke'len Dios te cykilca xjal tuj tumel, bix tzinen ta' cxe'l tkba'nxin ba'n tu'n cyocxa tuj tcawbilxin, cuma niy'x q'uixc'aj cyu'na nuk tu'n t'aj tcawbilxin. ⁶ Cuma tuj tumel c'oquel tcye'yenxin cykil xjal, ju' tzunj ctzaal tk'o'nxin cycastiwa kej xjal nchi yajlan cyi'ja. ⁷ Bix te cyey bix te keya nko yajlaj, ctzaal tk'o'nxin co'pbil oj ttzaj tasma'nxin Kaaw Jesucristo tuj cya'j cyuyax t-ángel tuya nimxsen cypemal. ⁸ Tzulxin tuj tken k'ak' tu'n t-xi' tk'o'nxin cycastiwa kej xjal cycy'i Dios bix el cyxoo'n jcolbil e tak' Kaaw Jesucristo. ⁹ Cycastiwatzen ctzaal tk'o'nxin, jaj tu'n tel tpa'nxin ejee' ti'jxin te junx maj. Chi elel k'i'n twitzxin, bix mlay chi ten jaa' nkoptz'aj jjawnex tipemalxin. ¹⁰ Nuk ck'ojel cycastiwa oj tulxin tu'n tjaw nimsa'nxin cyu'n t-xjalxin bix tu'n cyjaw klee' cykilca ocslal ti'jxin. Bix cyuyaxa chi k'ola nimbil tegin tuj tzunj k'ij, cuma ocslankey tej kk'umena tyol Dios cyxola.

¹¹ Tu'ntzen tbint tu'n t'nimsaj tbi Kaaw cyu'na, jaca k'ij nko na'na Kman Dios cyi'ja. Nko na'na Dios tu'n cyoca jun wik t-xjal Dios tu'n ttzalajxin ti'j, bix tu'n toc cyipena ti'j tu'n tbint jba'n cyu'na, bix tu'n tonenxin cyi'ja tuya tipemalxin tu'n ttzket cyocslabla. ¹² Nko na'na Dios cyi'ja tu'ntzen tjaw nimset tbi Kaaw Jesucristo, bix tu'n cyela ba'n tuj twitzxin. Tu'nj t-xtalbil Kdios bix tu'n Kaaw Jesús, cjawel nimsa'n cybiy tuj tzunj k'ij tzul.

2

Jun jawnex xjal binchal il

¹ Key ocslal, cxe'l kcuksa'na kwitza cyey tu'n mi'n baj cyc'u'ja ti'j tu'n tul meltz'aj Kaaw Jesucristo twitz tx'otx' bix ti'j jk'ij tu'n kchmet tuyaxin. ² Mi'n chi labta bix mi'n chi jaw sey'paja ti'j cyool kej xjal tzin cykba'n ma pon jk'ij tu'n tul Kaaw te xkelte te cykil xjal. Tzin cykba'n ma cyiik' ja tyol Dios lu tu'n jun ku'ja bix ka tu'n Espiritu Santo, pero yaa'n ju'wa. ³ Mi'n chi jaw tz'aka tuj ja tzepetajlenel lu. Ktzki'n mina'x tul jk'ij tu'n tul meltz'aj Cristo, cuma mlay tzul meltz'ajxin nejl twitz'oj cyk'ojl ch'ixc'a yaa'n cykil xjal ti'j tley Dios. Bix jaj il ti'j ctyeec'a tiib jxjal cawel q'uelel t-xoo'n tley Dios te junx maj, jaj xjal cwel t-xita cykilca. ⁴ Ja xjal lu q'uelel ti'n cykil sant, bix c'oquel te cyxel sant, tu'ntzen cycub maje cykil xjal twitzxin. C'oquelxin tu'n tcawenxin tibaj cykilca, hasta tu'n tocxxin tuj jjawnex templo te Dios tu'n toc tk'o'n tuibxin tisenc'a Diosxin. ⁵ ¿Mimpa na'n cyu'na e xi' nkba'na ja xnak'tzibil lu cyey tej ntena cyxola? ⁶ Cytzki'na alj ncub twa'ban jaxin ja'lewe, tu'n mi'n chic'ajaxxin nuk o'cx oj tpon tumel. ⁷ Mina'x tk'onte Dios tu'n tyec'jxin, pero c-yec'jelxin, bix ya ma tzyet tu'n taaw il tu'n tak'anan tuj ewel tu'n cyk'ojl cykil xjal ti' Cristo. Pero at jun nmakonte te taaw il ja'lewe. Mlay tak' tipemal te ja xjal at tu'n tk'ojl ti' Cristo tu'n tcawen, bix ja xjal lu mlay tz'oc te cawel ja'lewe. ⁸ Pero oj tel k'i'n jmakolte, c-yec'jeltzen jcawel ck'ojl ti' tley Dios. Bix cwel tbyo'n Kaaw nuk tu'nj t-xew n-etz tuj ttzi. Cxitjel tu'n tipemalxin oj tulxin. ⁹ Jatzen cawelja ck'ojel ti' tley Dios, junx tnaablxin bix tbinchbenxin tuya taaw il. Cxe'l tyee'c'axin nimxsen tipemalxin bix jawnex techlal tu'n cyklee' xjal ti'jxin, pero tu'n cysbuj xjal tu'nxin. ¹⁰ Tu'nj tbinchbenxin yaa'n ba'n cwel tsbu'nxin ke xjal. Kej xjal at tu'n cyxi' tuj castiwa, chi cwel tuj xtak'bil cuma min e cyajbe jjaxxix yol, tu'ntzen cyclet. ¹¹ Cuma cycy'ixin jaj yol, ju' tzunj chi xe'l ttzokpi'n Dios tu'n cyyajlaj, bix cxe'l cyocsla'nxin jxtak'bil ctkba' jcawel binchal il. ¹² Bix ju' tzunj, cwel tk'o'n Dios cycastiwxin, cuma el cyxoo'nxin jajxix yol, bix nuk e tzalajkexin ti'j yaa'n ba'n.

Ma ko jaw scy'et tu'n Dios tu'n kcllet

¹³ Perotzen cyey, ejee'y n-oc cyak'a te Kaaw, yaa'n ju'key. Il ti'j bix tumel tu'n t-xi' kk'o'na chjonte te Dios cyi'ja jaca k'ij, cuma jatxe tuj tneel ma chi jaw scy'o'na tu'n Dios tu'n cycleta tu'nj ttzjet cyanema tu'n Espiritu Santo bix tu'nj cyocslabla ti'j jajxix yol. ¹⁴ E pon kii'na

jjol ti'j colbil cyey cyuyey cuma e tajbe Dios tu'n tk'oj cyey jun cyoclena junx tuya Kaaw Jesucristo.

¹⁵ Ju' tzunj, key ocslal, chi we'bilxixa tuj cyocslabla, bix cytzyumxa jxnak'tzibil e xi' kk'umena cyey bix e xi' ktz'i'bena cyey. ¹⁶ Tzajxit tk'o'n Kaaw Jesucristo bix Kman Dios tu'n mi'n chi yuccha tuj cyocslabla. Ma tz'oc kak' texin, bix tu'n t-xtalbilxin ma tzaj tk'o'nxin ke, mintii' tu'n ttzaj ttzi ki'j ti pjel, bix ba'n kayon ti'j jun ac'aj kchunk'lal te junx maj. ¹⁷ Tcywixxit cyc'u'ja tu'nxin tu'n tbint ba'n cyu'na ti'j cykilca nkbaj cyu'na bix nbint cyu'na.

3

Chi na'na Dios ki'ja, tzi Pablo

¹ Yaltzen ja'lewe, key ocslal, tu'n tpon baj kyola, cxe'l kcuksa'na kwitza cyey tu'n cyna'na Dios ki'ja, tu'ntzen kcamana tu'n tabij tpochal Kaaw cyu'n nim xjal, bix tu'n tnmij cyu'n xjal, tisen e baj tej tpon tpochalxin cyxola. ² Jax chi na'na Dios ki'ja tu'n kcleta tuj cyk'ab kej xjal yaa'n ba'n. At xjal ka', cuma yaa'n cykilca xjal at cyocslabl ti' Cristo.

³ Yaltzen te Kaaw, chinel tu'nxin jma tkbaxin tu'n tbint tu'nxin, bix ctzaal tk'o'nxin cyipemala tu'n mi'n cub cyi'ja tu'n taaw il. ⁴ Bix n-oc ke kc'u'ja ti'jxin tu'n ttzaj tonenxin cyi'ja tu'n tbint cyu'na jma txi' kkba'na cyey, yaa'n nuk ja'lewe, ju'x cyuj k'ij chi ul. ⁵ Bix tzajxit tk'o'n Kaaw tu'n toc tak' Dios cyey bix tu'n tten cypasensyey tisen te Cristo.

Il ti'j tu'n kak'anan

⁶ Ja'lewe, key ocslal, tu'nj kipemala k'o'n keya tu'n Kaaw Jesucristo, cxe'l kkba'na cyey tu'n tel cypa'n cyiiba cyi'j kej ocslal ccy'yi tu'n t-xi' cyk'on cyiib ti' ak'untl bix ccy'yi tu'n t-xi' cyii'n cychunk'lal tisen e xi' kxnak'tza'na cye. ⁷ Ba'n cyu'na tu'n cyxi' lpey ti'j jyec'bil e cyaj kk'o'na, cuma yaa'n cy'aj ko'ya tej ktana cyxola. ⁸ Min e waa'n ko'ya ka min e chjet ku'na. Ak'anan ko'ya te k'ij bix te koniyan bix nim e sict ko'ya tu'n kitz'ja, tu'n mi'n cub kk'o'na jun iketz cyibaja. ⁹ Amale atet koclena tu'n kwaa'na cyi'ja, pero ak'anan ko'ya tu'n tcnet kwaya, tu'ntzen t-xi' kk'o'na jun yec'bil cyey ti tten tu'n mi'n chi tena cy'aj. ¹⁰ Bix yaa'n nuk jlu, sino tuyax e xi' kxnak'tza'na cyey, ka at jun xjal tcy'i tz'ak'anan, jax mi'n waa'n. ¹¹ Nchin tz'i'bena ju'wa cuma ma kbi'ya at juun cyxola min nxi' cyii' cychunk'lal tuj tumel. Min chi ak'ananxin, sino nuk n-ex cyk'ij ttzii' cyja xjal. ¹² Tu'nj yol k'o'n keya tu'n Kaaw Jesucristo, cxe'l kkba'na cyey xjal cy'aj lu tu'n mi'n nuk tz'ex cyk'ij, sino tu'n cyak'ananxin, bix tu'n cywaa'nxin cyexxin cywaxin. ¹³ Perotzen cyey, key ocslal, mi'n cyaj cyk'o'na tu'n cybinchantiya jba'n.

¹⁴ Katzen at jun ocslal tcy'i tz'oc tbi'n ja yol ti'j ak'untl nxi' ktz'i'bena tuj ja ku'ja lu, cykbanxa cye ocslal, bix mi'n chi waa'na tuyaxin, tu'ntzen tna'ntexin tch'ixewxin. ¹⁵ Pero mi'n tz'oc cyk'o'na tisen jun aj k'o'jxin cyi'ja. Nuk o'cx tu'n t-xi' cyk'o'na xnak'tzibil texin tisen jun ocslalxin.

Jun k'olbebl tu'n Pablo te manc'bil yol

¹⁶ Nuk ja Kaaw k'olte kmojbabl kiib. Tzajxit tk'o'nxin tu'n cytena tuj ttzyal jaca k'ij. Tenxit-xin cyuyey cykilcakey.

¹⁷ Inayena, Pablo, ncub ntz'i'bena ja manc'bil yol tzalu, tisenx nbint wu'na tuj cykilca wu'ja, tu'n tel cyni'ya ti'j yaa'n juntl nxi' tz'ibente ja u'j lu, sino inayenxa. ¹⁸ Tenxit t-xtalbil Kaaw Jesucristo cyuyey cykilcakey.

O'cx nyolja.

Tneel u'j e xi' ttz'i'ben Pablo te Timoteo

Jun k'olbebl tu'n apóstol Pablo te Timoteo

¹ Inayena, Pablo, ma cub ntz'i'bena ja u'j lu te tey, Timoteo, cuma inayena sma'n tu'n Jesús te tyolel tu'n tajwalel Dios, Co'pl ke, bix tu'n tajwalel Kaaw Jesús, Scy'o'n tu'n Dios, jaj xin k'uklec kc'u'j ti'j. ² Timoteo, jaj tisen jun ncwal, cuma k'uklecix tc'u'ja ti' Jesús. Wajtzen tu'n ttzaj t-xtalbil Dios tibaja, bix nuket tzaj k'a'ben tc'u'jxin ti'ja, bix tente tuj ttzjal tu'n Kman Dios bix tu'n Kaaw Jesús.

Tej tkbante Pablo tu'n mi'n t-xi' cybi'n ocslal cyyol xnak'tzal nic'bil yol

³ At-xe k'ij tej nxi'ya tuj tx'otx' te Macedonia. Tzulc'atzen tuj tc'u'ja oc ncubsa'n nwitz tey tu'n tcyaja tuj tnom te Efeso. Ncubtzen ntz'i'ben ja u'j lu tey tu'n toc tilel tu'na tu'nx tcyaja te cawel cyibaj xjal tuj tja Dios tuj Efeso, cuma cyxol xjal tuj tja Dios at xjal nxnak'tzan nic'bil yol. Wajtzen jaj cawen cyibaj xjal tu'n thaj twi' jnic'bil yola. ⁴ Cawenxsen kej xjala tu'n mi'n tz'oc cyxnak'tza'n cypocbal ootxa xjal o baj cyniq'uen, cuma nuk nic'bil yol, nuk k'oj tzin tjyo'n, bix min pon baj twi', bix nuk amle'n nxi' tii'n. Jaxitle at amle'n cyi' xjal te tja Dios te xnak'tzalec jaxxix tyol Dios, bix tu'n toc ke cyc'u'j xjal ti'jxin. ⁵ Nxi'tzen nkba'n tey ju'wa jaj tu'n toc tak' jun xjal cye ocslal tu'n cykil cyanem, bix tu'ntzen toc tak' cye, il ti'j ctzaal tkba'n cyanem, il ti'j ctzaal itz'j ti' jun cynaabl ba'n, bix jaxxix cyu'n ka k'uklec cyc'u'j ti' Dios. ⁶ Pero kej xjal nchi xnak'tzan ti'j jnic'bil yola, lastimxse, cuma kej yol nbaj cyxnak'tza'n cye xjal, yaa'n ju' n-ocadle, sino nuk ncub meltz'ajtl cyyol te mintii' ba'n tajbe'na. ⁷ Nuk ja n-oc tak' cyej tu'n cyoc te nmak xnak'tzal tley Moisés, bix nke cyc'u'j tu'n cyyol, pero min tz'el cyniy' ti'j ti nxi' cyyolen. ⁸ Ktzki'n te ka ba'n te tley Moisés, pero ka ma tz'ajben tuj tajbel-lel tisex o tzaj tk'o'n Dios. ⁹ Tcublen bintte tley Moisés yaa'n te cye cyej xjal nuk jaj ba'n ncub cybinchen. E cub bintte ley te tzuybel cyej xjal aj il. Ejee'tzen aj ilj yuwin, bix xool cynaabl, te cyej sbu'n, bix xsunkej xjal min cybi Dios bix min cybi ti' jilel jxjan, cyej xjal ncub byonte cyman bix cytxu, cykilca kej byol, ¹⁰ te cyej xjal at cypaj, bix te cyej xinak nchi jaw meltz'aj tuya juntl xinak bix te cyej xuuj nchi jaw meltz'aj tuya juntl xuuj, te cyej tzyul xjal te q'ueybil te juntl wik, te cyej xtak', bix xsunkej xtak' tstiwa n-oc cyniq'uen ka jaj cyu'n twitz Dios, bix xsunkej xjal ncub cybinchen tik'chtl jilel tka'yel tuj tley Dios. ¹¹ Oj nxi' nkba'na jba'n tpochal Jesús, jxin oc k'onte wajwalela te kbalte cye xjal, bixse n-el cyniy' xjal ti' cyil.

Tej t-xi' tk'o'n Pablo chjonte te Kaaw Jesús

¹² Nxi' nk'o'na chjonte te Kaaw Jesús, cuma o tzaj tk'o'n wipemala tu'n npanteya tuj waak'ena, bix cuma ma ke tc'u'jxin wi'ja, bix ma chin k'o'ja te wajbelela. ¹³ Cykil ma bint tu'nxin wi'ja, bix jaj o tz'oc nk'o'na q'uixc'aj te Jesús tuya nyola, bix e njoy ke ocslal lepch ti' Jesús te biybil bix te pjetel. Pero te Kaaw Jesús e tenx texin tanem we wi'j, cuma weya mintkna'x woca te ocslal, bix min el nni'ya ti'j ti jilel e cub nbinchena, cuma e'la tuj nwitz ba'n ncub nbinchena twitz Dios, bix min el nni'ya ti'j ka ja Jesús Dios. ¹⁴ Amale otket tz'oc nbinchena ti'jxin, pero nimx t-xtalbilxin e tzaj wibaja. Ju' tzunj n-oca wocsla'n Jesús, bix n-ocx tak'xin we.

¹⁵ At jun tyol jilj cykil xjal ba'n toc ebinte. Nbyan cyjulu: "Ul Jesús twitz tx'otx' te co'pl cyej aj il," tzi tyol jilj. Cyxoltzen aj il, inayena mas aj il. ¹⁶ Bix amale inayentwe mas aj il cywitz aj il, pero te Jesús e tzaj tyeec'a texin tanemxin wi'j, tu'n toc tyeec'axin ka min jaa' ba'n toca baj tc'u'jxin. Bix tu'ntzen nim tc'u'jxin wi'ja, matzen cub tk'o'nxin jun techlal cywitz xjal at tu'n cyocslan te Jesús alcye k'ij bix ccyiik'eltzen cychunk'lal te junx maj. ¹⁷ Ju' tzunj knimac'atzen Dios, cuma jaxin Cawel, mintii' titz'jlenxin bix mi'n cyimxin, bix mlay baj twi' tu'nxin, bix mi nuketpe chic'ajax Dios, bix nuk jac'axin junx maj iy'na tilbil ti'j. Nukettzen jac'axin s-ij bix na'j te junx maj.

¹⁸ Ja'lewe, Timoteo, wey ncwala, ja tzuna o tz'oc k'o'n ti'j te xnak'tzal tyol Dios cyu'n tij tajwilel tja Dios. Yaltzen ja'lewe inayentzen chin oquel k'onte taak'ena. K'imtzen tuya cykil tc'u'ja. K'o'nc nim tipena te bajsalc'a twi'j nic'bil xnak'tza'n. K'o'nc tipena ti'j taak'ena lu cyiw, tisen oj nk'o'jl jun soldado tuj k'oj. ¹⁹ C'ojlam tiiba ti'j tajbela, bix ti'j ncub thinchena. Ba'nx tc'u'ja ti' Dios, bix tc'ojla'xa naa'bla. At cabtl xjal min txi' cyc'u'j ti' cynaabl. Ju' tzunj o txa' tz'ak cyanem ti' Dios. ²⁰ Ju'tzen e baj cye Himeneo bixse Alejandro. Ejee' tzunja weya o chin na'n Dios cyi'j tu'n tcyuante Dios tu'n cyoc tuj cawbil tu'n taaw il, Satanás, tu'n tul tuj cyc'u'j tu'n mi'n baj cyyasen Kman Dios.

2

Jun xnak'tzibil ti'j ti tten tu'n kna'n Dios

¹ Nkba'xsen tey ti ctemela tuj tja Dios. Tneelxixsen cxe'l nkba'n tey tu'n t-xi' tkba'na cye xjal cxe'lxix cycubsa'n cywitz te Dios ti' cabtl xjal, yaa'n nuk ti'jc'a cna'la Dios, bix cxe'l cyk'o'n chjonte te Dios ti'j tik'ch tzin tk'o'n Dios te cykil xjal. ² Bix cxe'l cykanen te Dios cyibaj xjal cawel bix cykilca kej tocsen cyajwalel, tu'ntzen tbint cycawen, tu'ntzen kten tuj ttzaj bix tuj txubtx, tu'ntzen kcub yut'e twitz Dios. ³ Jatzen ba'nja, bix ba'ntzen tuj twitz Dios, Clol ke. ⁴ Bix taj tzunxin tu'n cykil xjal clet tuj tk'ab il, bix tu'n tel cyniy' ti'j alcyej jaxxix, yaa'n nuk ejoo'c'a. ⁵ Junxte Dios at, bix junxte xjal at te mojbalec cye xjal tuya Dios. Ja Jesús, Scy'o'n tu'n Dios, ⁶ cuma tej tpon tumel jaxte Jesús e xi' k'onte tiib tuj cyamecy tu'n tlet cykil xjal tuj tk'ab il. Tej mintkna'x tpon tumel tu'n tcyim Jesús, min cytzki'n xjal ka taj Dios tu'n cycllet cykil xjal tuj il. ⁷ Ejee'tzen cye yol jlu jaxxix, bix jawnex, bix ke cyej yol lu yaa'n nuk te cye kej xjal judío, sino te cykil xjal twitz tx'otx'. Bix tu'ntzen tkbaj ja yola te cykil xjal, otzen chin oc tch'iquen Dios te tsanjel bix te tyolel Jesús. Jwe nxi' nkba'na jaxte, yaa'n xtak'bilte.

⁸ Yaltzen ja'lewe wajzen nuket jak'ch chi cwa' ten xinak na'l Dios. Pero wajwe chi na'lxix xinak Dios tuya jun cyanem sakxix, yaa'n nchi k'ojl. ⁹ Bix kej xuuj, tu'n cybaj bint tuya cyxbalen, pero tujxix tumel, yaa'n te cynimbil cyiib cywitz xjal. Bix mi'n txi' cyii'n nim amle'n te tbinchaj cyiib, tu'n tbaj zebat cywi', tu'n tocx tuj cyxquin, ma cycwenchj te oro ma te perla, bix ma nintzaj cyxbalen. ¹⁰ Tetzen t-xelj amle'n cxe'l tii'nj tbinchaj cyiib, ja tzunj tu'n tbintl jtbanel cyu'n. Bix jatzen te ba'nj te cyej xuuj cyaj chi nimante Dios. ¹¹ Kej xuuj, oj cyxi' tuj tja Dios, c'oquelxix cybi'n, bix nuk chi cwel yut'e, yaa'n cwel cyyeeec'an cyiib ka cutzen ba'n cyu'n. ¹² Ncy'iwa tu'n tel tii'n xuuj tipemal xinak tuj xnak'tza'n, bix ncy'iwa tu'n cychawen xuuj cyibaj xinak. Cuma ca'ba tten. ¹³ Tneel, cuma ja te Adán, xinak, e cub tbinchen Dios nejl. Tcabxiltzen tcub bintte Eva, xuuj. ¹⁴ Tcabtzen, jatzen xuuj e jkonte tbe il, cuma ja te xuuj e cub yajlet tu'n Satanás, yaa'nte Adán. ¹⁵ Ju' tzunj, e xa' k'o'n cye xuuj cychastiwa tu'n toc cytz'i'sente cye cyal. Pero amale e k'ojet cychastiwa, chi cletel, ka juchxix cyc'u'j ti' Dios, ka tu'n cykil cyanem, bix ka sakxix cyanem.

3

Ti ctemel tchun'kal jun taj tz'oc te ninc'ul ti'j tuj tja Dios

¹ O kbaj al jun taj tz'oc tk'a'ben te ninc'ul ti'j ma te cawel cyibaj xjal tuj tja Dios, ba'nte. Ba'n tocxte, ² pero al ma tz'oc te ninc'ul ti'j tuj tja Dios, tu'n mi'n yolj cyu'n xjal. Cwelxix ten tuj tbanel tuya junx t-xu'l, bix cxe'l tii'n jun tchun'kal nuk yalnix, bix cxe'lxix tbsen ti'j, ba'ntzen tbi'nc cyu'n xjal bix tcyuan tu'n twutan jun xjal tja, bix ba'n'xix te xnak'tzal cyxol xjal. ³ Jun cawel tuj tja Dios mintii' tu'n toc te bola, mitetpe jyol k'oj, bix mitetpe lmolec xjal ti'j te taj. Yaa'ntzen ju' ctemela, sino jun xinak mixbenxix k'ojl, jun xinak ba'n chewsan k'oj cyxol xjal, bix mitetpe tziy' tuj tc'u'j nuk te cambl pwak. ⁴ Cbinelxix tninc'un tuj tja, bix ebil ke tcwal. ⁵ Cuma ka jun xjal mixben ninc'un tex tja, jey', z'itzen tse' tu'n tbint tninc'un tuj tja Dios? ⁶ Jxjal ma tz'oc te tajwilel tja Dios, yaa'nt loj jun maantk tzke toclen te ocslal, cuma ch'innch'e axse q'uelela tuj twitz ma taj tuya cubsaj witzbaj, bix cwelx tz'ak, tixex tculben tz'ak Satanás tuj cya'j bix ocxin te taaw il. ⁷ Bix jax il ti'j cwel ten tuya jun tnaabl ba'n cyuyaj xjal yaa'n ocslal, tu'n mi'n jaw ikj yol ti' tja Dios cyu'n xjal. Jatzen tc'o'bel bimanj, tu'n tel iiq'uet tyol tajwilel tja Dios.

Ti ctemel tchun'kal jun diácono

⁸ Jaxse ju'x kej onlte tajwilel tja Dios, cybi'xix ch'in. Mi'n chi cub tz'ak tuj cyyol cywitz xjal, bix mitetpe tu'n cyoc bola, bix jax mitetpe tu'n cychaman pwak tuj tka'yel. ⁹ Bix cwelxix cye'u'n tyol Dios tixec'ax tten ttzajlen tk'o'n Dios, cuma cytzki'nxixa ka jax tyol Dios. ¹⁰ Ba'n cyniy'bet jxjala nejl ka ba'nke te onel. Katzen mintii' jun cyka'yel, ba'ntzen cyajben te onl tajwiyel. ¹¹ Jaxse ju'x kej xuuj onl tajwilel, ba'n'x chi cwel ten, yaa'n tu'n cychub ten xtz'iml yol, mitetpe tu'n cychub ten balk'ajel ma iken yol, sino nukxix yalnix ti' cynaabl, bix ba'n'xix toc ke cye'u'j xjal cyi'j. ¹² Jun onl tajwilel tja Dios c'oquelxix nuk te tchmil junx xuuj, bix cbinelxix tninc'un ke tcwal bix tik'ch te tuj tja. ¹³ Kej onel nbint-xix cyaak'en cyu'n tuj tja Dios, ejee' tzunj a cyanem xjal cyi'j, bix k'uklxix cye'u'j oj nchi ak' yolel ti' cyocslabl ti' Jesús cyuya xjal.

Jun kocslabl o tzaj tk'o'n Dios nimxse t-xi'len

¹⁴ Xi'man wu'na tu'n nxi' naja cyey'l tey, pero ncubtzen ntz'i'bena ja u'j lu tey ¹⁵ yaa'n ka nchin tzyetc'a, cuma wajtzen tztzki'ntla ti ctemela cynaabl jxjal te tja Dios, cuma te tja Dios te te Dios i'tz, bix cuma ejee'cye xjal te tja Dios iklte bix c'ojlal tej jax tyol Dios. ¹⁶ Jatzen jax tyol Dios, jkocslabl, o tzaj tk'o'n Dios, ma'xse t-xi'len, tisen toc tu'nj bitz: "Oc Dios te xjal, Jesús. E cub tyeec'an Espiritu Santo ka ja Jesús Scy'o'n tu'n Dios, bix cykilj e bint tu'n Jesús ba'n'xse e'la. Axse e'laxin tuj cywitz tsanjel Dios. Bix ex tpochalxin tuj cykil yol twitz tx'otx'. Bix oc cyocslal'n nim xjal jaxin. Bix e k'iijxin tuj cya'j juntl maj," tzi bitz.

4

Nim xjal q'uelel tpa'n tiib tanem ti' tyol Dios

¹ Pero tzinexix tcyaj tuj chic'aj tu'n Espiritu Santo ka cyuj k'ij chi ul nim xjal q'uelel tpa'n tiib tanem ti' tyol Dios. Ju' chi xe'l lpetl ti' cyxnak'atz jxjal lepch cyxnak'atz cyi'j xewbaj yajlal bix ma bimanj. ² Kej xjal chi cwel ten xnak'tzal cyej cynic'bil biman, ejee'tzen xjalj junx maj xtak'. Nimxse cyxtak'bil ya tzpetpajninxtltzen cynaabl. ³ Ja tzunkej xjal ju' ba'n cyu'na cycy'itltzen chi oc maje xinak tuya cyxu'l, bix n-octzen cyxnak'tza'n cye xjal ka at juun wik waabj mixben tniy'bej. Pero o cub tbincha'nte Dios cykil wik waabj cye tcwalxin tu'n t-xi' cywaa'n, bix tu'n toc chjonte te Dios ti'j. ⁴ Cykil tej e cub tbinchen Dios, ba'nte. Ju' tzunj mintii' ch'in ba'n tel cyxoo'n xjal, sino ccyiik'elxix tu'n t-xtalbil Dios. ⁵ Tu'n tna'j Dios ti' waabj, n-eltzen cyniy' xjal ti'j ka ja Dios k'oltzte, bix cuma ju' toc tu'n Dios. Bix ka o tzaj tk'o'n Dios, cyniltzen ba'n, yaa'n nuk alcyexte ba'n.

Jun tbanel xnak'tzal tu'n tajben te Jesús

⁶ Xnak'tza'nc tzunja lu cye oclsal tu'ntzen jay ba'n tajben te Jesús. Tisenj waabj tzin tk'o'n tipen kchu'l, ju'xse tzin tk'o'n tyol Dios tipemal kanem. K'o'ncxixsen tc'u'ja ti'j. ⁷ Pero mi'n txi' tc'u'ja ti'j tpochal cyu'nj xtak' xjala, a te tbi'nc pero na'c yol. Yaa'ntzen ju'wa, sino xnak'tzam tiiba tu'ntzen tnumena Dios. ⁸ Alj ma baj t-xnak'tza'n tu'n tkinpaj tchu'l, ba'nte, pero nuk te twitz tx'otx' teja. Pero tej tu'n tbaj t-xnak'tzan tiiba ti' tyol Dios, yaa'n nuk te twitz tx'otx' teja, sino te junx maj. ⁹ Jaxxix tej we ma txi' nkba'na, bix cykilcakey ba'n toc ebinte. ¹⁰ N-oc kipen tuya kyol tu'n cyco'pj xjal tuj cyil. Nko ak'anantzen bix niy'x ku'n cuma ktzki'n i'tzte Dios jaa' ma tz'oca ke kc'u'j. Ja tzunxin C'ojal cykil xjal, bix tzin tco'paxin kej xjal oclsal te tyolxin. ¹¹ Jayle tzunj yol lu ccawel bix cxnak'tzal tu'na.

¹² Amale cwalxita, pero tc'ojla' tiiba tu'n mi'n tz'el xe'ta, sino cwelxix tk'o'na jun techlal ba'n xix cywitz oclsal tuya tnaabla te yolel, tuyaxix jun they jiquen, bix tuya ba'n tanema cyi' xjal, bix juch tc'u'ja ti' Dios, bix sakkix jun tnaabla. ¹³ Jooc'tzen nchin ponwe, tenctzen te s-ilwe tyol Dios tuj u'j tuj tja Dios, bix te nimsalec cyc'u'j oclsal, bix te xnak'tzaleccye. ¹⁴ Timoteo, mi'n tz'el tuj tc'u'ja ka tu'n t-xjik'ben Dios e yolenke tyolel Dios tibaja bix e cub cyk'o'n tij xjal cawel tuj tja Dios cyk'ab tibaja tu'n toc tajwalela te xnak'tzal tyol Dios cye xjal. ¹⁵ Junx maj k'o'nc tc'u'ja ti'j, tu'ntzen toc ccyce'yen xjal jay ka xi'nen t-xi'y tuya Dios. ¹⁶ C'ojlam tiiba, bix c'ojlam ti nbaj t-xnak'tza'na, bix cwelxix we'y twitz tixja jilel. Katzen ma bint ju'wa, bix ka cuyan tey tu'n tu'n t-xi' tkba'na jyol te co'pbil, bix cmeltz'ajel te co'pbil cyej xjal ma tz'oc ebinte tey. Ju'tzen ctemela tey, yaa'ntzen tu'ntl tey ka min xi co'pj xjal tuj tk'ab il.

5

Jba'n tu'n kbinchante cyi'j mastl oclsal

¹ Cwalxa. Ju' tzunj oj tcub tilen jun tij til, mi'n tz'oc tilena. Chebe cxe'l tkba'na te tisen tmana. Bix kej xjal cwalx, ju' chi tse'y tisen jun te tjay. ² C'oquel tc'ojla'na kej xuj tij tixex ttxuy. Bix kej txin cwalx, tisen jun taneba. Mi'n tz'oc tena chilsalec cyetxin.

³ Yal tzunkej xuuj viuda, ka jaxxix ka viudakexuj, bix min-al ba'n toc c'ojlancye, ke xjaltzen te tja Dios ba'n toc c'ojlancye. ⁴ Pero ka at viuda at tal bix ma at te tchman, entonces cyna'xixse cwal bix chineltzen cyu'n tu'n toc cyc'ojla'n cytxu ma cyyaa', tu'ntzen tchjet tz'isbencye tu'n cytxu. Ja tzunja ba'n tuj twitz Dios. ⁵ Ka jun xuuj viuda jaxxix ka viuda, min-ax jun i'tztlte, bix nuk Dios tzin tyo'nxuj tu'n tcyajlal, bix min cyaj tna'nxuj Dios te k'ijl bix te koniyan tu'n tcyajlal, ba'ntzen toc cyc'ojla'n xjal te tja Dios jaxuj. ⁶ Pero jun viuda nuk n-extl tk'ij te jyoj titlte taj ma nuk tik'chtl tzin tlok'o'n ti' pwak, jatzen viudaj mixben tc'ojlaj tu'n tja Dios. ⁷ Kbanxse cykil ja lu cye xjal tu'ntzen tbin cyu'n, tu'ntzen min-al yolen cyi' xjal. ⁸ Cuma alj oclsal min tz'oc tc'ojla'n ke te tja, mix nbina tu'n tisej te Dios taj, bix maxsse iy'nan twitz jun xjal yaa'n oclsal, cuma n-ocxtlpe cyc'ojla'ncyce ke te cyja.

⁹ T-xoltzen tajlal cybi jxuj viuda nchi onj tu'n tja Dios, nuk o'cxc'a kej xuj te oxc'al jnabk'i ma masj, bix ba'nx otk chi cub tenxuj tuya junx cychmilxuj. ¹⁰ Ja tloj jun viuda itzki'n twitz tu'nj ba'no o cub tbinche, tisen tzunj: ka ba'nxix o tz'oc ttz'isen ke tal, ka ba'n tnaabl cyuyaj xjal e pon tja, ka o tz'oc tc'ojla'n tuya cykil tc'u'j kej xjal oclsal, ka o tz'oc tc'ojla'n kej xjal tuj tcyajlal e tema, bix ma ti jileltl tbanel o bint cyu'n.

¹¹ Pero yaltzen cyej xuj viuda cwalx, mi'n tz'oc tk'o'n ke xuja te tajlal, cuma la' ti taj cyc'u'jxuj, cwel cybinchexuj. Chebetzen ccyajbe'xuj cychmilxuj juntl maj. Cwatzen oj tel cypa'n cyiibxuj tuj cyaak'enxuj tuj tja Dios, ¹² ya otktzen chi cub tz'akxuj tuj cyyolxuj twitz Dios. ¹³ Bix juntl, nuk nchi iy' tzi'j jaa', bix tzin cyiik'en cy'ajel, bix yaa'ntzen nuk nchi oc te cy'aj, sino tuyaxe xtz'iml yolke, bix n-ocx cyk'on cyiib te cawel cyxol xjal, te kbalecx tej yol yaa'n tumel tu'n tocx cykba'n. ¹⁴ Ju' tzunj we tuj nwitz tu'n cymaje kej xuuj viuda cwalx juntl maj, e tten cyal, bix e toc cyc'ojla'n cyja. Katzen ma bint cyu'nj xuuj viuda ju'wa,

mintzentii' ba'n t-xi' cyyolen xjal ti' tja Dios. ¹⁵ Nxi' nkba'na ja lu cuma at xuuj viuda o cub binchen tej tka'yel, o tz'oc cybi'n tyol taaw il, Satanás.

¹⁶ Na'mc'atzen ka at jun najaj xjal ocslal, bix at jun viuda tuj tja, il ti'j c'oquel tonen, tu'ntzen mi'n tz'oc tiken tja Dios, sictzen ba'n toc tonen tja Dios kej viuda jaxxix min jaa' ba'n cyoca itz'j.

¹⁷ Kej xjal tij tajwilel nbinxix tninc'un tja Dios, ba'nxisen cyoc ocset bix cyoc c'ojet, bix ejee'xixj xin tocsen cyaak'en te kbal tyol Dios bix te xnak'tzal, cuma ncyaj cyk'o'nxin cyaak'enxin tu'n tyol Dios. ¹⁸ Ju'tzen toc tu'n tyol Dios tuj k'anak stament cyjulu: "Mi'n tz'oc tk'o'na tzuybil ttzi junjil boys ka npjunjil triwa, tu'n ba'n twaa'njil, tu'n at tipenjil te ak'anal." Bix juntl: "Tej xjal ak'anal atte tumel tu'n tchjet," tzi tyol Dios.

¹⁹ Mi'n tz'oc tbi'na til jun xjal tij tajwilel tja Dios ka min-al ca'ba ma oxe te tstiwa ti'j. ²⁰ Pero cyej xjal tajwilel tja Dios otk chic'ajax otk chi cub tz'ak tuj cyil, il ti'j cxe'l tkba'na te cywitz cykil xjal tu'n toc ttzi cyi'j. ²¹ Twitz Dios, twitz Kaaw Jesús, bix cywitz tsanjel Dios tuj cya'j, cxe'lxix nkba'n tey tu'n tbiint jma txi' nkba'n tey, bix mi'n tz'oc tcyeyena ka mas nintzaj jun twitz juntl.

²² Tu'n toc jun xjal te tajwilel tja Dios, chebe cxe'l tjo'na. Mi'n tz'oc tk'o'na naja. Ka ma tz'oc tk'o'na jun xjal te tajwilel tja Dios, bix cchic'ajaxel jxjala ka at nim til, tisec'atzen ba'n tilj xjala tuj twitz. Mi'n tz'ocx tk'on tiiba tjak'j luwe.

²³ Timoteo, nukx yaaba. Ju' tzunj yaa'n nuk a' cxe'l tc'a'na, sino tuyax ch'in vino tu'n tiy' tchyonel tc'u'ja.

²⁴ At xjal ncub bint til tuj chic'aj, bix cykil xjal itzkilte ka maxe cwel baj twi' stis twitz Dios. Bix at xjal ncub bint til tuj ewjel. Pero tixja tten ti'j, cjawel chic'ajax oj tcub bajset twi' stis twitz Dios. ²⁵ Jaxe ju'x ttena, jba'n ncub cybinchen xjal, chic'ajte. Bix amale atet thanel taak'en ncub tbinchen jun xjal tuj ewjel, mlayx bint tewj te junx maj. Ju' tzunj mi'n baj bint naj tu'na ti' tnaabl jun xjal.

6

¹ Kej ocslal nchi ak'anancx tjak' tcawbil cypatrón, ba'nxiix toc cybi'n tyol tpatrón. Mi'n chi oc te cy'aj. Ccyuyaxix cyaak'en, tu'ntzen mi'n txi' na'n tbi Dios bix tu'ntzen mi'n txi' na'n kxnak'atz cyu'n xjal. ² Bix ka at jun ocslal nak'ana'ncx tuya jun tpatrón ocslal, c'oquelx tbi'n xina tisen jun cawel. Masx c'oquel tilel tu'na tuyaxin twitz tuya junxin yaa'n ocslal, cuma alj nk'inte tkbel jtaak'ena jax ocslal, bix n-oc tak' te Dios. Bix xnak'tzanx bix kbanx xsunja lu cye xjal.

Ba'n tu'n t-xi' kniman Dios bix tu'n ktzalaj ti'j ntzaj tk'o'n ke

³ Atzen xjal nyee'c'an juntl wik xnak'atz. Axse tbi'nc cyxnak'atz, pero yaa'n junx tten cyyol tujaj xnak'atz nxi' k'inte ke te niml Dios, bix yaa'n ba'n tten cyyol tuya tyol Kaaw Jesús. ⁴ Nuk n-oc cyk'on cyiib jxjala te nintzaj, bix min tz'el cyniy' ti'j tixix ttenj jax yol. Nuk nchi jyon jaa' q'ueletza jun k'oj. Ti'j tzunja n-etza itz'j xchi'len c'u'j, k'oj, cyakwusaj xjal, ic'bil twitz xjal, ⁵ bix k'oj min pon baj twi'. Alj ma cub xnak'tzante cyej nic'bil xnak'atz, junxse maj otk tzpet ya min tz'eltl cyniy' ti'j alcyej jax, bix n-e'latzen tuj cywitz nuk te cambil pwak ocslabl ti' Dios. Cyimeltzen cyiiba cyi'j xjala.

⁶ Jaxte ju' tewa. Te kocslabl ti' Dios theyel xtalbilte, pero la' alj ntzalaj tujaj ch'in ncnet tu'n, ⁷ cuma mintii' te k'i'n ku'n ktzaj twitz ja tx'otx'a, bix mintii' te ba'n taj kii'n. ⁸ Nuk ka at ch'in ba'n t-xi' kwaa'n bix tu'n toc ch'in ki'j, ya ba'ntze tkete kc'u'j. ⁹ Yal tzunkej cyaj chi oc k'inan, mintzen cycol cyiib twitzj tka'yel ncub jlet cywitz. Tu'ntzen nuk tik'ch cyaj nchi cwa' tz'ak tuj c'o'bil, ja c'o'bilj thanel n-el tuj cy'c'u'j, bix nche'x tuj il. ¹⁰ Tej nuk pwak n-oc tak', jatzen tlo'quel nim wik tka'yel. At juun xjal nuk tu'n cyk'a'bentz ti' pwak o tzpet cyanem ti' Dios, bix tzin cynojsa'n cychunk'lal tuya nim bisbajil.

Ti tten tu'n t-xi' kii'n kchunk'lal jiquen bix tu'n toc ke kc'u'j ti' Dios

¹¹ Perotzen tey, Timoteo, najben te Dios, cteltzen ok ti'j k'a'bj pwak. Tetzen t-xel ja lu, jyonxsen te ja ba'n, bix k'inx tchunk'lala tujxix jiquen, bix ke'c tc'u'ja ti' Dios, bix c'oquel tak' cykil xjal tey, bix nimxsen tc'u'ja, bix maansx tz'oqey. ¹² Tz'ocxix tilel tu'na ti' tyol Dios bix k'oj ti'j tka'yel. Oj thint tu'na ju'wa, ju'tzen cpomela caney ti'j tchunk'lala te junx maj. Ti'j tzunj tchunk'lala te junx maj o tzaa' ttxco'n Dios jay, bix cywitz nim tstiwa o tzaa' tkba'na ka o tz'ocsla'na ti' Jesús.

¹³ Twitz Dios, nk'onte tchunk'lal tik'ch jilel at twitz tx'otx', bix twitz Jesús, Scy'o'n tu'n Dios, jxin mintii' ttzi ti'j tej ttzak'be'n te cawel Poncio Pilato alcyexin bix ti taak'enxin, cxe'ltzen nkba'n tey ¹⁴ ctbi'c'a tzuna cykilj nxi' nkba'n tey. Mi'n cub tzpeta, bix cbinelxix tu'na tu'n mi'n chi el t-xoo'na xjal ti'ja, ojxe tul jlet Kaaw Jesús juntl maj. ¹⁵ Tzultzen jlet Jesús juntl maj, pero ojxe tpon tumel tuj twitz Dios. Nuk jac'ate Kman Dios jawnex twitz tik'ch jilel, bix cy'iwla'n. Jaxin Cawel cyibaj cawel, bix Taaw cykil twitz tx'otx'. ¹⁶ Nuk jac'axin

mlay cyim. Najlxin tuj tken luz tzinxse ntxaken mas twitz tken k'ij. Min-alexse juntl ba'n tocpa canan ti'jxin. Min-al jun xjal o tz'oc cye'yente texin, bix min-alex ba'n toc cye'yente texin. Jawnexxit tzunxin, bix nimxit tipemalxin te junx maj. Ju'xit tzuna.

¹⁷ Kej ocslal nim cyk'inemal twitz ja tx'otx'a, kbanx cye tu'n mi'n tz'oc cyk'on cyiib te nintzaj, bix tu'n mi'n tz'oc ke cyc'u'j ti' cyk'inemal, cuma tej k'inemal mintii'xix ba'n toc ke c'u'jbaj ti'j. Nuk jac'ate Dios ba'n toc ke kc'u'j ti'j. Jaxin ntzaj k'onte tik'ch ke te kniy'bebl. ¹⁸ Kbanxse cye xjal k'inan tu'n yaa'n jk'inemal c'oquel tak' cye, sino tu'n toc tak' cye tu'n tbint tik'ch tbanel cyu'n, bix tu'n tcub cypa'n cyk'inemal cyuya mebe. ¹⁹ Ojzen tbint ju'wa cyu'n, nbajtzen cyninc'un cyiib tuj chunk'lal tzul, cuma tej chunk'lal tzul, jatzente chunk'lal jaxxix, bix te junx maj.

Tej t-xi' tcyiwsa'n Pablo tnaabl Timoteo ti'j alcye tu'n tbinchante

²⁰ O'cx xsunj, Timoteo. C'ojlam tzunj jax yol ma tz'oc k'o'n tuj tk'aba. C'ojlam tiiba tuj cyyol jxjal n-oc cyniq'uen tise ka cytzki'n tii'n Dios, pero mintii' txolan cyyol, bix mintii' toclen tuyaj jax yol. ²¹ Mi'n chi oc tbi'na, cuma at xjal o tz'oc lpe ti'j tise ka jax, bi'x o chi cub tzpet, bix o cub tzpet cyc'u'j ti' Dios.

Tzajxit t-xtalbil Dios cyibaja. O'cxsen nyolja.

Jun tcab u'j e xi' ttz'i'ben apóstol Pablo te Timoteo

Jun k'olbebl tu'n apóstol Pablo

¹⁻² Timoteo ncal, achena wu'n. Ntz'i'bex xsunja juntl u'j lu tey. Tzajxit cyxtalbil Kman Dios bix Kaaw Jesús tibaja, bix tzajxit k'a'ben cyc'u'jxin ti'ja, bix tente tuj ttzjal.

Inayena Pablo, tyolel Jesús. Sma'n kena tu'n Dios te kbalte cye xjal ma cyaj tk'o'n Dios tyol alj ma tz'oc maje tchunk'lal tuya Jesús, Scy'o'n tu'n Dios, at tchunk'lal te junx maj.

Il ti'j tu'n kyolen ti'j Cristo cye xjal

³ Ojzen nchin yolen tuya Dios, tzin nchin ajbenwe texin tuya jun sak nnaabl, tisex ke te njaya ootxa e xi' cyna'n cyexin Dios, nxi' nk'o'nwe chjonte te Dios ti'ja, bix nchin na'nwe Dios ti'ja te k'ijl bix te koniyan. ⁴ Tzinx n-ul tuj nc'u'j tetz ta'l twitza tej kbaj k'olben tu'n kpax. Wajxse tz'oc ncyeyen naja juntl maj, tu'n njaw tzalaj. ⁵ Tzinx n-ul tuj nc'u'j ti'j tey tanem k'i'n tu'na ti' Dios. Tneelxix oc ten tanem tyaa'y Loida bixsen ttuxuy Eunice. Ejee'tzen xuj e ten cyanem ti' Dios nejl, bix tzinen tuj nwitz ka ju'x tey.

⁶ Ju' tzunj we waj txi' wokxenan tey tu'n tjaw titz'jsa'na jtípemala te cawel tuj tja Dios o tiik'a te Dios tej tcub nk'o'n nk'ab tibaja tu'n toc tajwalela. ⁷ Bincham taak'ena tuya cykil tc'u'ja, cuma o tzaj tk'o'nte Dios Espíritu Santo ke. Ju' tzunj yaa'n ilxixte ti'j tu'n ttzaj ttzi ki'j, cuma tu'n Espíritu Santo at kipemal, bixsen kanem ti' Dios, bix tu'n t-xi' kii'n ttzolán.

⁸ Ju' tzunj mi'n tz'el ch'ixewey ti' tyol Kaaw Jesús, bix mi'n tz'el ch'ixewey wi'j, ti'j lu ken intii'nczt tuj ztee' nuk ti'jc'a tyol Jesús, sino cuyanx jtey q'uixc'aj tzul ti'j oj t-xi' tpocha'na ka ba'n cyco'pj xjal, tisenj weya lu kena intii'nczt tuj ztee'wa. Dios tey tzul k'onte tipemal tu'n tiy'x q'uixc'aj tu'na oj tcub tz'aka. ⁹ Jatzen te Dios o co'pente ke, bix o ko'x ttixco'nxin tu'n t-xi' kii'n jun kchunk'lal jiquenxix. O ko tco'pete Dios tu'n koc te t-xjalxin, yaa'n nuk tu'n kiik'ente tco'pbil Dios tu'nj ba'n ncub kbínchen, sino tu'n t-xtalbilte Dios kibaj. Ju' tcublen tniq'uexin ti'j jatxe tuj tneel. ¹⁰ Nejl min e telni'yaxte ti' e cub tniq'uexin ti'j co'pbil ke. Pero tejtzen tul jlet Jesús. Co'pl ke, twitz tx'otx', bixse e jaw ch'ic'ajax tnic'benxin ti'j tu'n kco'pj. Tejtzen tjatz itz'j Jesús juntl maj, o cyaj ttzinexin ti'j ke ocslal chi jawel itz'j juntl maj, bix te junx maj, tuya ac'aj cyxumlal mlay cyim. ¹¹ Tu'n tzunj kbaj te ja yol lu, Dios o tzaj k'onte we wajwalela te tyolelxin bix te xnak'tzal cye cykil xjal, cyuyax kej xjal yaa'n judío. ¹² Tu'nxix xsunja luxse niy' nwitz. Pero k'uklwe nc'u'j, cuma ntzki'nwe ali'j k'ukleca nc'u'j, bix ntzki'nxixwe ka cwel tc'u'n wexin wanem o txi' wokxenan texin, texaj k'ij oj npon tuyaxin.

¹³ Cye'yencxix ka jay nxi' kban te ja yol lu o tz'oc tbi'na wi'j, bix mi'n cub tch'ixbe'na, bix kbanxse tuya jun tnaabla ka k'uklec tc'u'ja ti' Jesús bix k'ak' tanema ti' Dios bix cyi' xjal, la' jaa' epomela canan tipemala tu'n Jesús. ¹⁴ Tuyatzen tonbil Espíritu Santo i'tz kuya, tc'ojla'y jcyeca tyol Dios o txi' tkba'nxin tey, tu'n min-al cub ch'ixbente.

¹⁵ Timoteo, ttzki'ntl tzuna ch'ixc'a yaa'n cykil xjal itzki' twitz Dios tuj tx'otx' te Asia jaa' ta'y, cyuyac'axtl jxin Figelo bix Hermógenes, ma cyaj cye'yente we. ¹⁶ Pero at-x juuntl xjal min cyaj cye'yente we, tisenj jun najaj te tja Onesíforo. Cy'iwla'nxitke tu'n Dios, cuma amale intii'ncztetwe tuj ztee', jatzen Onesíforo oc nimsante nc'u'j, bix min el ch'ixwe wexin wi'j. ¹⁷ Tej ttenxin Roma, min in xi' tcyeyen wexin, sino e jyonxin wi'j, tejxe ncnet tu'nxin. ¹⁸ N-el tni'ya ti'j ti tten toc tonenxin ke xjal tuj tnom te Efeso jaa' najley. Nuket tz'oc t-xel texin tu'n Kaaw Jesús oj tpon tumel tu'n kbaj tninc'u'nxin.

2

Jun tbanelxix soldado te Jesucristo

¹ Nim xjal o cyaj cye'yente Jesús. Yaltzen tey ncal, tcuya tzuna tu'n ttzaj tipemala tu'n Dios, tu'n tcub we'y twitz Dios, cuma mojlca tuya Jesús. ² Ti jilel kej yol o tz'oc tbi'na wi'j cywitiz nim xjal, kbanxse cyej xjal ba'n toc ke kc'u'j cyi'j tu'n tbnit-xix cyxnak'tzan te cabtl.

³ Tziy'xse tu'na ti jilel q'uixc'aj q'uieyey tuj taak'en Jesús, tisenj weya, bix tisenxix jun soldado niy'x tu'n tuj taak'en tcawel. ⁴ Kej soldado min tz'aj cyc'u'j ti' ti jilelt, cuma il ti'j n-oc cyc'ojla'n cyawel. Jaxse ju'x tey, mi'n tz'el tii'na tc'u'ja ti' taak'en Jesús. ⁵ Jaxse ju'x, ka at jun ajkelel tuj jun skach, ka min xbaj t-xnak'tzan tiib te ajkelel, bix ka min s-oc tc'u'j ti'j tka'yel cxe'l k'onte tuj il tuj tsakech, mlay tcama tcozt. ⁶ Jaxse ju'x cab xjal ak'anal tuj jun camon ak'untl. Ja tzunj mas nim tz'ak'anan, jaxse jaj ck'il tej tneel twitz awal. ⁷ Xi'manxse ti'j ti tzin tyeeec'an jyol cyi' soldado bix jyol ti' jun ajkelel bix jyol cyi'j ak'anal tuj camon ak'untl, bix Dioste cwel k'onte tumel tu'n tel tni'ya cyi'j techlala.

⁸ Mi'n tz'el tuj tc'u'ja ka Jesús, Scy'o'n tu'n Dios, xjal texin, jatze e'la itz'jxin cyi' te tja cawel David. Bix jax Diosxin, cuma e telni'yax tej tjatz itz'jxin tuj tcyamecyxin. Ja tzunj

lu tloq'uel jba'n tpoebal k'i'n wu'na. ⁹ Tu'n tzunj ba'n tpoebala niy'xsewe tak' wu'n, hasta nchin cub xpet tuya cadena tuj zee' tisen jun byol xjal. Pero te Dios tyol, tzakpi'nxte tu'n tel tpoebal tuj cykil twitz tx'otx'. Yaa'n xpo'nte tisenj weya. ¹⁰ Pero cykilj q'uixc'aj q'uuyax wu'n, q'uuyaxwe wu'n cuma tu'ntzen cybinte jxjal xi'nen te ocllal Jesús, tu'ntzen ba'n cyiik'ente jco'pbil o toye Jesús, bix tu'ntzen cypon tuya Jesús, tu'n cyten tuyaxin te junx maj tuj jun lugar axse banel bix tzinxse ntxakakan. ¹¹ Te ja tyol jilj lu, jax teja. Tzi cyjulu: "Ka ma txi'kk'on kiib tuj cyamecy nuk ti'jc'a Jesús, ko itz'jeltzen tuyaxin. ¹² Ka ma tziy'x q'uixc'aj ku'n nuk ti'jc'axin, attzen koclel tuyaxin tuj tcawbilxin. Ka min xcyaj kk'o'n tuj chic'aj ka te Jesús ejoo', ja tzunxin cyjel k'onte tuj chic'aj ka yaa'n texin ejoo'. ¹³ Pero texin tzinx nbint texin tu'n ti jilel tzin tkba'nxin, bix mlay cub tch'ixbe'n texin tyolxin, amale mint bint ke ku'n alcyej nxi' kyolen," tzi tyol jilj.

Jun sey' bix ba'n xnak'tzal tuj twitz Dios

¹⁴ Kbanxse ti toc wu'n cye xjal, bix tzinenxse kbanx cye twitz Dios tu'n mi'n baj cypetxen cyiib ti'j yol tuj tyol Dios. Oj cyak' petxl cyiib ju'wa, mintii' ba'n tajbe'na, bix alj ma tz'oc ebinte, nuk ak'bilcye tuj il. ¹⁵ Pjelix t-xnak'tza'na ti'j ti ctemela tu'n toca te jun xjal sey' bix ba'n twitz Dios. Oj t'bint tu'na ju'wa, mintii'xix il ti'j tjaw ch'ixewey ti'j tii'n xnak'tzana cye xjal. Xnak'tzam tyol Dios cye xjal tu'n tcyajxiz tzinen tuj cywitz.

¹⁶ Oj tak'a xnak'tzal xjal, xomel jtik'ch yolel mintii' ba'n tajbe'na, bix te twitz tx'otx', bix jun wikxiti tten tuya tyol Dios, cuma ja tzunja n-el lak'bante cye xjal mas ti' Dios. ¹⁷ Tisen veneno nxi' le'n tuj cychu'l xjal, ju'xse cyten jyola te cyanem xjal. Ju'tzen tten cyxnak'atz Himeneo bix Fileto cye xjal. ¹⁸ O chi cub tzpet tuj yol jaxxix, cuma ete'c'a kbalte cye xjal ka yaa'n ju' ttenj tyol Dios nbyan ca cjawetz itz'j kxumlal juntl maj. Cyu'n tzunj yol lu nxa' cyxoo'n cyanem xjal ti' Jesús. ¹⁹ Pero te Dios tyol o cyajte tloq'uel mlay cub xitj. Bix al tzunj ma tz'oc ebinte tyolxin, tzi'tzen Dios cyjulu: "Ttzki'nte Kman Dios al kej texin t-xjal," bix "Al kej ma chi na'nte ka ja Dios Cyaaw, il ti'j q'uelel cypa'n cyiib ti'j tka'yel," tzi Dios.

²⁰ Tuj jun jaa' te jun k'ina at lak te oro bix te plata. Ejee' tzunja nintzaj cymunel. Bix jax atte lak te zee' bix te tx'otx'. Ejee' tzunja yaa'n nintzaj cymunel. ²¹ Jaxse ju'x ka at jun xjal ma ttx'aj tiib cyuj tka'yel o byan wu'na, ba'ntlzen te tajbel-lel tuj nintzaj taak'en Dios, tisen tzunj lak nintzaj tmunel tuj twitz taaw. ²² Ju' tzunj xomel jka' tajbela tuj tcwalela. Tetzen t-xelja bincham tzunj ba'n'nxix tuj twitz Dios, c'oquelxix tak' tey, ba'nx cwel we'y twitz Jesús, bix cwel tena tuj ttzyal. Jyom tzunja lu cyuyaj xjal jaxxix cyu'n twitz Dios.

²³ Mi'n tz'oc tk'o'na tc'u'ja ti' tyol jun xjal oj tak' petxl tyol. Ttzki'ntl tzuna nuk k'oj tzin tjyo'n. ²⁴ Jun onlte Dios, mixben tcub ten tuj k'oj. Yaa'n ju' tewa, sino cwelxix tente tuj ba'n tuya cykil xjal, tbanelxix tnaabl te xnak'tzal, bix nimx tc'u'j oj toc bint jka' ti', ²⁵ bix cxe'l tkba'n tuyaxin tanem cyej xjal n-oc jyonte tuya k'oj. Oj'tzen t-xi' tkba'n onlte Dios cyej xjal jyl k'oj ju'wa, kapetzen jac'a tz'el cyniy' ti' cyil twitz Dios, bix tu'n tel cyniy' ti' alcyej yuj jax, ²⁶ tu'n tel cywatl, bix tu'n cytzokpaj tuj tk'ab taaw il, jaa'j tzyu'nake tu'n tcub cybincha'nj ti jilel tajbil taaw il.

3

Cynaabl xjal cyuj kej manc'bil k'ij

¹ Timoteo, wajtzen tz'el tni'ya ti'j cyej manc'bil k'ij chi ultzen tuya nim pena, bix wajtzen tz'el tni'ya ti'j tii'n cynaabl xjal cyuj kej k'ija. ² Ke xjal nuk ejee'x c'oquel cyak' cye, nuk pwak ccyajbe', c'oquel cyk'on cyiib te nintzaj cywitz xjal, q'uuiyel tuj cyc'u'j ka nintzajke, bix nim chi oquel chi'l ti' Dios, mi'n tz'oc cybi'n cymaan, ya mintii'tl cybanel, bix ya mi'n tz'oc tocl tyol Dios ti' cywi', ³ mintii'tl cyanem, bix ya mi'n tz'oc k'a'ben cyc'u'j ti' juntl xjal, nuk chi cwel ten xtz'iml yol, mlay bint ctyzyunte cyiib bix ya mi'n ccyuyatl tu'n toc juntl xjal te tzyulcye, chi oquel te yuwin, bix cyaj k'ojxse cykilj ba'n, ⁴ cxe'l cyk'o'n jun cyuya tuj tk'ab juntl xjal, bix cyxoo' cyiib, axse chi elela tuj cywitz, bix cxe'l cyjyo'n la' alcyey cyaj, yaa'ntl Dios cyjya'. ⁵ Bix at xjal c'oquel cyk'on cyiib te ocllal Dios nuk ti' ccyce'yenc, pero mintii' tipemal cyocslabl, cuma nuk ten cyu'n.

Tisen kej xjal ca'ba cywitz tisen kej lu matzen chi ak' jawel jlet ja'lewe. Mintzentii' toclena cyi'j xjala. ⁶ cuma cyxol tzunj xjala tocxa cabtl chi oquex tiy' cyuj jaa' te yolel ti' tyol Dios pero jun wikxiti cye cyaj. Tisen tzunj, at xuuj ba'n tcub cyc'u'j cyu'n ka jax cyxnak'atz, cuma ke cyej xuuj na'cke bix cht'ol cynaabl tu'n cyil, bix cuma ke cyej xuuj cykilcye yol n-oc cybi'n. ⁷ Ejee'tzen xuuj nuk nchi xnak'tzanx, pero mlay pon cnetj jax tyol Dios cyu'n. ⁸ Ke cyej yajlal xjal, ju'tzen ke cyeja tisen kej xin tchman cawel te Egipto nejl, jxin Janes bix Jambres, e cub bint jun techlal cyu'nxin tisenj te Moisés, pero bix oc meltz'ajkexin k'o'jlel ti' Moisés. N-oc cyxnak'tza'n cyej xjal ca'ba cywitz oclslabl, pero nchi oc meltz'ajxin k'o'jlel ti'j jax yol, cuma at ttzajaj cynaablxin, bix min tz'el cyniy'xin ti'j alcyey jax. ⁹ Nuk jaa'x chi pomela we'xin tuya cyyolxin, pero cwa mlay chi eltlin ba'n tu'n tcub tc'u'j nimtl xjal

cyu'nxin, cuma tisen kej xin chmambaj te Egipto cwa cycub tz'axxin, jaxse ju'x kej xjala lwewa cchic'ajaxel cyxtak'bil.

¹⁰ Pero tey, yaa'n ju'y. May'x tz'el tey tniy' ti'j we nxnak'atz, bix ti tten weya nnaabl, bix ti waja, bix ti tten k'uklec nc'u'j ti' Dios, bix nimxse nc'u'ja, bix tii'n tak' Dios n-oc we, bixse wipemala tu'n tiy'x wu'na, ¹¹ bix tii'nj ttzyet ntzyuja, bixse q'uixc'aj nuk ti'jc'a tyol Dios. Ttzki'ntl tzuna tik'ch e baj we bix tik'ch q'uixc'ajel in i'ya cyuj tnom te Antioquia, Iconio, bix Listra. Pero jaxse Dios e co'pante we tuj cykil il. ¹² Jaxse alj ma tajbe txi' lpe ti' Jesús q'uiyaxse tchyonel tu'n. ¹³ Pero tzunkej xjal ka' bix kej yajlal xjal mas pjel cyyajla'n xjal bix ejee'xsen q'uelel pa'n te mas cyiib ti'j jax tyol Dios. ¹⁴ Pero amale cykilet ja lu pjel, we'c'axix tey tuj cykilj ma tcana, bix ma tz'oc ke tc'u'ja ti'j, cuma ttzki'ntl tzuna min baj kxnak'tza'n key tuya nic'bil yol, ¹⁵ bix ttzki'ntla jatxe tuj tewalela ti toc tu'n tyol Dios. Jatzen tyol Dios ck'olte tnaabla tu'n tiy' tilbila ti'j, bix tzin tyec'an alcyey tbeylel co'pbil tuj tk'ab il, ti'j k'uklec kc'u'j ti' Jesús. ¹⁶ Cykilj e cu'x cytz'i'ben xjal tuj tyol Dios, cykilet oc t-xjik'en Dios. Ja te Dios e xi' k'onte cynaabl xjal te tz'iblc'ate, yaa'n ke cye xjal e kbante. Ju' tzunj najbente te xnak'tzabl tej jaxxix, bix tu'n toc ch'iquet jka', bix tu'n tel kniy' ti'j tka'yel te ninc'ul kchunk'lal, bix tu'n kbaj xnak'tzet te kajbelel te Dios, ¹⁷ bix tu'ntzen jun t-xjal Dios ba'n tbint tu'n, bix tu'n binne tten tuj cykil taak'en Dios.

4

Tej t-xi' tcyiwsa'n Pablo tnaabl Timoteo ti'j alcyey tu'n tbint tu'n

¹ Timoteo, twitz Dios bix twitz Jesús cxe'lxix wolxenan tey tu'n t-xi' tkba'na tyol Dios cye xjal, cuma la' alcyey jun k'ij tzul meltz'aj Jesús, Scy'o'n tu'n Dios, te cawel tibaj cyil jxjal i'tzx bixsen te cawel tibaj cyil cykilj xjal chi jawetz itz'j, bix cawelxin tibaj twitz tx'otx'. ² Ju' tzunj, ka cyaj xjal cybi bix ka min, pero tey binne ttena te kbalx tyol Dios, cuma Dios c'oquel cye'yente tey tii'na tuj tyolxin. K'o'nc tipena ti'j tu'n tcub tc'u'j xjal ka ka' ncub tbince, bix cxe'l tkba'na tu'n tcyaj il cyu'n, bix cxe'l tkba'na cye ti cwel bint cyu'n, bix nimx tc'u'ja oj t-xi' tkba'na.

³ Cpomel jun k'ij mlay tziy'xtl jba'n xnak'tza'na cyu'n xjal. Cxe'l cyjyo'ntl cyxnak'tzal te xnak'tzaleccye ti'j alcyey cye cyaj tz'oc cybi'n, cuma mintzentii' c'oquel tbinchen cye xjal tuj cywitz. ⁴ Nuk c'aaltz cyk'o'ntl tzalcyi'j twitzj jax tyol Dios, bix cxe'l cybi'n tik'ch nic'bil yolel. ⁵ Perotzen tey, c'u'm alcyey tbeylel, q'uiyax tchyonel tu'na, nuk xnak'tzanx cyxol xjal ti tten tpocbalj co'pbil tu'n Jesús, bix cuyamxix alcyey taak'ena.

⁶ Yal weya, ma pon tumel tu'n nbyeta nuk ti'jc'a Jesús. Ya ma tzul canan tumel ncyamecya. ⁷ Yaltzen te wajbelela te Jesús, bajx cyja' ncyey'en wexin, ox tz'oc nbi'n wexin tuj tyolxin, bix ox chin we tey twitz tyolxin. ⁸ Ju' tzunj, te tzunj k'ij oj tak' jxin Kaaw cyey'lx tumel, cwiik'elwe jun nin ncotz texin, cuma jaxin cyey'lx tumel tujxix tumel cyibaj xjal. Bix yaa'n nuk wec'awe ctzaala tk'o'n texin, sino tuyaxe te cykilj xjal n-oc tak' cye tu'n tul meltz'ajxin juntl maj.

E tkba Pablo te Timoteo alcyey tu'n tbint tu'n

⁹ Nuksama, Timoteo, tz'oc tilel tu'na tu'n tul naja cyey'l we, ¹⁰ cuma ma chin cyaj cye'yena tu'nj xin Demas tu'n tik'ch jilelj te twitz tx'otx'a, bix ma txi'xin tuj tnom te Tesalónica. Yal tej xin Crescente, o txi'xin tuj ttx'otx' Galacia. Yal tej xin Tito, ju' ma txi'lxin tuj ttx'otx' Dalmacia. ¹¹ Cyxoltzen wuyena tzalu, nukxix jac'atl Lucas at wuyena.

K'intztzen Marcos tuyey oj ttzaja, cuma at c'ajbela we.

¹² Yal jxin Tíquico, min-al tzalu, cuma o txi' nchk'o'nxin tuyey tuj tnom Efeso.

¹³ Oj ttzaja, na'mc'a tu'n ttzaj tii'na ja ncapa e cyaj nk'o'na tja Carpo tuj tnom te Troas, cyuyaxj libro, bix ejee'xixj tz'u'n tz'i'ben cywitz, ejee'xix xsunja ma il cyi'j.

¹⁴ Yal te Alejandro, jxin tsnol xchil, nimxse tka'yel ma tz'oc tbinchexin wi'j. Diostzele c'oquel k'onte t-xel texin tisenx tik'ch ma tz'oc tbinchexin wi'j. ¹⁵ Ju'x tey, c'o'jlam tiiba twitzxin, cuma may'xse tz'oc meltz'ajxin k'o'jlel ti' kxnak'atz.

¹⁶ Tej npona tnel maj te stisel twitz cawel, min-al juntl oc clonte we. Cykilca ke ocslal wuya e cyaj cye'yente we. Pero cutzit ka min s-oc tk'o'n Dios te tajlal cyil. ¹⁷ Pero te Kman Dios e ten wexin wuya, bix e tzaj tk'o'n wexin wipemal, tu'ntzen tbint nkbanteya tpocbal tyol Dios te co'pbil, tu'ntzen toc cybi'ntl nim xjal te jun wikxilt tnom tocx tuj stisbil, tu'ntzen toc cybi'n jxjal yaa'n judío mintii' tumel Dios cyuya. Ju'tzen in cleta tuj tk'ab cawel, tisenc'a in cleta tuj ttzi jun balen, tu'n Dios. ¹⁸ Yal ja'lewe Dios q'uelel k'inte naj we tuj tka'yel te junx maj, bix chin aal tii'nxin tuj cyaj'jaa' ncawenaxin. ¡Nimaxit tbi Dios te junx maj! ¡Ju' ttzuna!

Jun k'olbebl tu'n Pablo te manc'bil yol

¹⁹ K'onxa jun k'olbebl tej xuj Prisca bix te tchmilxuj Aquila bixse cye te tja Onesíforo. ²⁰ Yal tej xin Erasto, ma cyajxin tuj tnom te Corinto, bixse Trófimo ma cyajxin tuj tnom te Mileto, cuma yaabxin. ²¹ Bix tz'oc tilel tu'na tu'n tul canana te mintkna'x tul tyem te nim cyk'i'k

tibaj mar. Ma txi' jun k'olbebl tey cyu'nj xjal lu: Eubulo, Pudente, Lino, bixse Claudia, bix cabtl ocslal.

²² Tenxittzen Kaaw Jesús tuyey, bix nukxittzen tzaj tk'o'n Kman Dios t-xtalbil tibaj cykilcakey ocslal. O'cx xsunj.

Jun u'j e xi' ttz'i'ben apóstol Pablo te Tito

Jun k'olbebl tu'n Pablo te Tito

¹ Inayena, Pablo, nxi' ntz'i'bena ja u'j lu te tey, Tito. Jun t-ak'anal Dios kena, bix tuj taak'enxin, nchin ajbena te jun t-xel Jesucristo. Jweya waak'en, jaj tu'n cyocslan xjal ti' Cristo bix tu'n tel kniy' ti'j kocslabl, ejoo' t-xjal Dios, bix ti tten tu'n t-xi' kii'n knaabl tisen taj Dios. ² Ejoo' xjal ma txi' kii'n ja kocslabl lu, ba'ntzen tu'n kayon ti'j jun kchunk'lal mintii' tba'jlel, cuma cpomel baj Dios tyol ti'. Mixbe xtak'enxin. Tej mitkna'x t'aint twitz tx'otx', e tkba Dios tu'n t-xi' tk'o'nxin cychunk'lal cye t-xjalxin te junx maj. ³ Bix tej tpon tumel, e tzaj tyeec'anxin j-e baj tninc'u'nxin tuj tneel. Bix cyxol ke tyolelxin nejl te ja tyolxin lu, ma tak'xin weya tu'n t-xi' n'pocba'na. Ja te Dios, Clol ke, ma tkba weya tu'n t-xi' nk'umena.

⁴ Tey, Tito, tisen ncwaltey, bix jun ncwala jaxxix, cuma junx kocslabl bix ba'ntzen txi' lpey ti'j j-e xi' nxnak'tza'na tey. Tzajxit cyxtalbil Kman Dios tuyax Kaaw Jesucristo tibaja, bix tzajxit k'a'ben cyc'u'jxin ti'ja, bix tzajxit cyk'o'nxin tu'n ttena tuj ttzyal.

Jun taak'en Tito tuj tx'otx' te Creta

⁵ E cyaj nk'o'na jay tuj tx'otx' te Creta, cuma e waje'ya tu'n tonena cyi'j ocslal tu'n t-xi' cyii'n cychunk'lal tuj tumel, cuma at-x ch'intl tu'n t'aint cyu'na, bix tu'n tetz tscy'o'na juun cawel tuj jaca juun tnom tu'n tcyaj cyninc'u'n cyxol ocslal, tisen e nkbaya tey nejl. ⁶ Alcyekej xjal ma tz'etz tscy'o'na tu'n cyoc te cawel cyuj tja Dios, il ti'j tu'n t-xi' cyii'n cychunk'lal tujxix tumel, tu'ntzen min-al ka' tyol cyi'jxin. Chi cwelxix tenxin tuj t'banel tuya cyxu'lxin. Bix chi xe'l lpe cye walxin ti' Dios, yaa'n ti'j nuk tik'ch taj cyxumlalk'a. Bix mi'n chi k'ojk'a ti' cymank'a, tu'ntzen min ni' yoj cyu'n xjal cyi'jk'a. ⁷ Kej cawel cyxol ocslal, cuma chi oquelin te t-ak'anal Dios, ju' tzunj il ti'j cxe'l cyii'nxin cychunk'lalxin jiquenxix, tu'ntzen mintii' ka' yol cyu'n xjal cyi'jxin. Yaa'nt lo kej xin iy'nen tibaj cynaabl. Mi'n jaw cyk'o'jxin tuj ajkelbil. Mitetpe tu'n cyocxin bola. Mi'n tz'oc cypju'nxin ke xjal. Yaa'nt lo kej xin nuk cyaj tu'n cycaman pwak. ⁸ Scy'onwe kej ocslal nchi k'on posada bix waabj oj cypon xjal cyja, bix tuya cykil cyc'u'jxin cbinel jba'n cyu'nxin. Cwelxix ctyzyun cyiibxin twitz'ja. Chi temelxin jiquenxix twitz' Dios bix cywitzt xjal. Cxe'l cyii'nxin cynaablxin tisen taj Dios. Mi'n cyjoyxin tu'n cybinchanxin tka'yel. ⁹ Il ti'j tu'n cytenxin cyiw tuj jjaxxix xnak'tzibil e k'oj cyexin, tu'ntzen t-xi' cyxnak'tza'nxin alcey jaxxix cye niy'tl ocslal, bix tu'n tcub cyi'j kej tzpetsal cyu'nxin oj nchi k'ojl cyi'jxin.

¹⁰ Hermano, ilksen ti'j tu'n tcub tk'o'na cyxol ocslal ejee'j at cynaabl, cuma at nim xjal cyxola ccy'yi chi ocx tjak' cawbil cyuj tja Dios. At xjal mintii' tajbel cyxnak'tzibil bix sbul xjalke. Cyxol kej nchi sbun ju'wa, mas ncnet kej xjal judio cyxol. ¹¹ Il ti'j tu'n tmaket cytzi kej tzpetsal lu, cuma tu'nj cyxnak'tzibilxin yaa'n tumel, nxi' cyocslabl xjal tuj il cyu'nxin. At maj entera ocslal tuj jun jaa' nchi tzpet tuj cyocslabl cyu'nxin. Bix nchi k'onxin cyxnak'tzibilxin tak' nuk tu'n cycamanxin pwak cyi'j ocslal. Jun ch'ixbajil jlu.

¹² Hermano, at nim il ti'j tu'n cyaawen ke cawel cyiw tuj cyocslabl cyibaj ocslal tuj Creta. At jun maj e xi' tkba'n jun nintzaj aj Creta at tnaabl cyjulu: "Ejoo' aj Creta jun wik xjal nuk nko xtak'en. Tisen xo'j ko'. Cy'aj xjal ko', bix nko k'on kiib nuk tu'n tnoj kc'u'j," t'ixin, bix tex Cretaxin. ¹³ Jax tu'nxin. Ju' tzunj, c'oquel ilen ch'ina cyi' ocslal, tu'ntzen cytenxin cyiw tuj cyocslablxin ti'j Cristo. ¹⁴ Xnak'tzanxa ba'n, tu'n mi'ntl txi' cybi'nxin cyxnak'tzibil judio yaa'n jaxxix, bix tu'n mi'ntl cynimanxin cyley kej xjal n-el cypa'n cyiib ti'j jaxxix yol. ¹⁵ Cyxol xjal at jun yol tzin tkba'n cyjulu: "Kej xjal sakxix tuj cyanem, sak ta' cykilca tuj cywitztzin," tzi yol. Pero kej xjal yaa'n sak tuj cyanem, ejee'j min chi ocslan ti' Cristo tu'n cyclet, cykilca n-oc cyk'o'n te yaa'n ba'nj tu'n t'aint bix tu'n t-xi' cywaa'n. Mlay tz'el cyniy' ti'j alcey ba'n, cuma tz'ilx cynaablxin bix cyanemxin. ¹⁶ Tzin cykba'nxin ka ctyzki'nxin Dios, pero tu'nj ka' nbint cyu'nxin, tzenen ta' nuk ten cyu'nxin. Ka'kexin twitz' Dios. Min chi nimanxin Dios. Mlay chi ajbenxin te Dios tu'n t'aint jun ak'untl ba'n cyu'nxin.

2

Ko k'ol xnak'tzibil tuj tumelxix

¹ Pero tey, hermano, mi'n txi' t-xnak'tza'na tisen nbint cyu'n kej lu, sino xnak'tzanxa cye ocslal jaxxix tyol Dios. ² Kbanx cyej xinak tij tu'n cyyolen chebe, bix tu'n t-xi' cyii'nxin jun cynaablxin jiquen, tu'ntzen cyniman xjal cyyolxin, bix tu'n ctyzyun cyiibxin twitz' il, bix tu'n cyk'onte cyiibxin nuk tej xnak'tzibil jaxxix, bix tu'n toc cyak' xjal cyexin, bix tu'n tiy'x cyu'nxin oj n-oc pena cyi'jxin. ³ Jax cxe'l cyii'n kej xuuj tijl cychunk'lal tuj tumel twitz' Dios. Mi'n chi cub ten xtz'impl yol cyi' xjal, bix mi'n chi oc te c'al k'e'n. Cxe'l cyyeec'anxuj alcey ba'n cyej xuuj cwalx. ⁴ Cxe'l cyxnak'tza'nxuj cyetxin tu'n toc tak' cychmiltxin cyuyax

cyaltxin cyetxin, ⁵ bix tu'n cytzyun cyiibtxin, bix tu'n tten cyanemtxin sakkix, bix tu'n cyak'anantxin ba'n tuj cyjatxin, bix tu'n t-xi' cyeec'antxin cyanemtxin cye juntl, bix tu'n cynimantxin tyol cychmiltxin. Ccybincha' kej txin xuuj cykilcaj lu tu'ntzen mi'n cyyolen xjal ka' ti'j tyol Dios.

⁶ Jax ju'x kej k'a cwalx, kbanx cyek'a tu'n cytzyunte cyiibk'a twitz cykilca ka'. ⁷ Tenc'aya te jun yec'bil cywitzk'a ti tten tu'n tbin ba'n cyu'nk'a. Oj t-xnak'tzana cyek'a, yee' anx tmbilba ti'j tyol Dios, bix xnak'tzanx tyol Dios cabalxix. ⁸ C'oguel tc'u'ja ti'j tu'n mi'n tzpet jun yol yaa'n tumel tuj t-xnak'tzbila, tu'ntzen mi'n cyyolen xjal ka' ti'j. Ka ma xnak'tzana tumel ju'wa, kej xjal cycy'i jyol jaxxix, ctzaal cych'ixew oj cyyolen ka' cyi'ja ejee'y ocslal.

⁹ Yal tzunkej ak'anal tuj taak'en cypatrón, kbanx cyexin tu'n cynimanxin cyol cypatrónxin tuj cykilca, bix tu'n cyak'anaxin ba'n tuj cykilca ak'untl, tu'ntzen cytzalaj cypatrónxin cyi'jxin, bix tu'n mi'n tz'aj cytzak'be'nxin tyol cypatrónxin. ¹⁰ Bix kbanx cyexin tu'n mi'n chi alk'anxin ti' cypatrónxin. Nuk o'cx tu'n t-xi' cyii'nxin cynaablxin jiquenxix, tu'ntzen toc ke tc'u'j cypatrónxin cyi'jxin. Ka ma bint cykilcaj lu cyu'nxin, cchic'ajaxeltzen ka mejorxix jxnak'tzbil ti' Dios, Clol ke.

¹¹ Hermano, il ti'j tu'n t-xi' tkba'na cye ocslal tu'n t-xi' cyii'n cychunk'lal tuj tumel, cuma ma tzaj tyee' an Dios t-xtalbil cye cykil xjal. Tu'nj t-xtalbilxin ma tzaj tsm'a'nxin Cristo twitz tx'otx', tu'ntzen klet. ¹² Bix tu'nj t-xtalbilxin ma tzaj tk'o'nxin xnak'tzbil ke ti tten tu'n tcyaj kk'o'n jyaa'n ba'n twitzxin bix tu'n mi'ntl tz'oc tachen kc'u'j ti'j nuk tik'ch at twitz tx'otx'. Nxnak'tzanxin ke tu'n ktzyunte kiib twitzj il, bix tu'n t-xi' kii'n knaablxin jiquenxix, bix ti tten tu'n kel ba'n twitzxin jooc'tzen eto'x twitz tx'otx'. ¹³ Bix cxe'l kii'n kchunk'lal ju'wa, cuma nko ayon ti'j jun k'ij te nimxsen tzalajeb, jk'ij oj tul meltz'aj Jclol ke tuya nimxsen tipemal, jxin Jesucristo, jawnex Diosxin. ¹⁴ E xi' tk'on tiibxin tu'n tcyimxin te kxel, tu'ntzen klet tuj tk'ab il bix tu'n ttxjet kanem. E tbinchaxin jlu tu'n koc te t-xjalxin sakkix, jun ttanemxin cyaj tuya cykil cyc'u'j tu'n cybinchan jba'n.

¹⁵ Cykilcaj lu ma txi' nkba'na tey, xnak'tzanx cye ocslal. Cyiwsanx cyc'u'jxin. At tipemala tu'n t-xi' tkba'na at cyilxin, cuma t-ak'anal Diostey. Mi'n tz'el xe'ta oj cycy'i xjal t-xnak'tzbila.

3

Nuk ocx tu'n t-xtalbil Dios jiquen ko' twitzxin

¹ Cxe'ltzen nkba'na tey ti tten tu'n cyten ocslal cyxol kej xjal yaa'n ocslal. Kbanx cyexin tu'n toc cybi'nxin tley gobierno bix tu'n cynimanxin tyol cykil cawel ncawen cyibajxin tuj tnom. Xnak'tzanx cyexin tu'n tbin cyu'nxin alcyey ak'untl ba'n tu'n tbin cyu'nxin, bix tuya cykil cyc'u'jxin. ² Bix xnak'tzanx cyexin tu'n mi'n chi xoo'nxin ka' yol ti' juntl, bix tu'n mi'n chi k'ojxin cyuya xjal. Nuk o'cx tu'n cyyee' anxin cynaablxin ba'n cywitz xjal, bix tu'n cyyolenxin maans cyuya xjal.

³ Tumelte tu'n cyyee' anxin cynaablxin ba'n cywitz xjal yaa'n ocslal, cuma nejl, jax ju'x ejoo' min el kniy' ti'j. Min oc kbi'n Dios. Bix e xi' lpey ko' nuk ti'j xtak' xnak'tzbil. E ten ko' tjak' tcawbil kxumlal, bix nuk ka' e tajbe kxumlal. Ex kk'ij nuk nko binchan jyaa'n ba'n, bix nuk e chi'l kc'u'j. Oc ten ko' cyakwusalte ke xjal, bix el kii'q'uten kiib kxolx. ⁴ Pero amale nimet ka' e bint ku'n, pero e tzaj tyee' an Dios, Clol ke, tk'ak'bil tc'u'j ki'j. Oc kak' texin, ⁵ bix e co'paxin ke tuj kil. Pero yaa'n tu'nj jun kchunk'lal jiquen ma ko clet, sino nuk o'cx cuma e tzaj k'ontexin lastim ke. Ma ko clet nuk tu'nj ttxjontexin kanem, bix tej ttxjet nuk tu'nj, e kiik' jun ac'aj kchunk'lal bix jun ac'aj knaablxin tu'n Espíritu Santo. ⁶ Tuya cykil tc'u'jxin bix tu'n Jesucristo, Clol ke, e cu'tz tk'o'nxin Espíritu Santo ke. ⁷ Tu'n tzunj t-xtalbilxin, jiquen ko' twitzxin, bix atzen koclen tu'n kpon tuyaxin te junx maj. Ti'j tzunj kkab nko ayon ti'j.

⁸ Jaxxix ta' jma txi' nkba'na, bix ba'n tu'n toc ke kc'u'j ti'j. K'umexn tuya tipemala, tu'ntzen t-xi' cyk'on cyiibxin ti'j tu'n cybinchaxin ba'n te juntl.

Ba'nksen kej xnak'tzbil lu, bix at c'ajbela cye xjal. ⁹ Pero cawenx kej ocslal tu'n mi'n chi k'ojl cyi'j xnak'tzbil min chi ajben. Mi'n chi k'ojlxin ti'j alcyey cyxe'chel judío mas jawnex, bix ti'j alcyey tley Moisés tu'n cynimantexin. Pa'mel tiiba cyi'j xnak'tzbil lu, cuma nuk k'oj ntjyo'n, bix minti' tajbel. ¹⁰ Ka at jun xjal ma tak' jun xnak'tzbil yaa'n jaxxix, kbanx texin tu'n mi'ntl xnak'tzanxin tak'. Ka ma txi' tkba'na tcab maj tu'n mi'ntl cub tk'o'nxin k'oj cyxol ocslal, bix tcy'ixin tu'n t-xi' tbi'nxin tyola, ljomax cyxola. ¹¹ Il ti'j tu'n tel t-xoo'na, cuma ttzki'na ma txi' tnaablxin tuj il. Binchal ilxin, bix jaxxin njyonxin tcastiwaxin.

Tej t-xi' tkba'n Pablo te Timoteo alcyey tu'n tbin tu'n

¹² Cxe'l nsma'na jxin Artemas tuyey bix ka jaj xin Tíquico. Oj tpon jun cyxolxin tuyey, k'o'nc tipena ti'j tu'n tpon naja tuj tnom Nicópolis, cuma tuj tzunj tnom lu chin temela tuj tyem te che'w tzul.

¹³ Ja tzunj xin Zenas, jxin tx'olbal ley, tuyax jxin Apolos, oj cyetzxin tuj ttanema, k'onx ch'in onbil cyexin, tu'ntzen mintii' pena tuj cybexin. ¹⁴ Yeec'anx cye ocslal ti tten tu'n cyonen cyi'j xjal at pena ete', tu'ntzen cyajben ocslal tuj taak'en Dios.

Manc'bil yol cye ocslal

¹⁵ Cykilca kej ocslal at wuyena nxi' cyk'o'n jun cyk'olbebl cyey. K'onxa kk'olbebla cyej xjal n-oc kak'a cye bix junx cyocslabl kuyena.

Tzajxit t-xtalbil Dios cyibaja. O'cx nyolja.

Jun u'j e xi' ttz'i'ben apóstol Pablo tej xin Filemón

Jun k'olbebl tu'n apóstol Pablo te Filemón

¹ Inayena Pablo. Lu ken nti' nctz tuj tzee'wa tu'n tlaj tyol Jesús. Bix lu Timoteo, jun ocslal wuya at wuya tuj tnom tzalu. Ma cub ntz'i'bena ja u'j lu te tey, Filemón. Kca'bela tuya Timoteo ax kanema ti'ja, bix kuya kiib tuj taak'en Jesús. ² Bix ma txi' kk'o'na jun k'olbebl te Apia, jun ocslal kuya, bix te Arquipo, onl ke tuj taak'en Jesús, bixsen cye ocslal nchi chmet t'jay. ³ Jaxit Kman Dios bix Kaaw Jesús, Scy'o'n tu'n Dios, tzaj t'zitente cyxtalbilxin bix ttz'jal cyibaja.

Jun tanema Filemón bix toclabl ti' Kaaw Jesús

⁴ Tzinx nxi' nk'o'nwe chjonte te Dios ti'ja oj n-ula tuj nc'u'j, ⁵ cuma o nbiya ka a tanema bix k'uklec tc'u'ja ti' Kaaw Jesús, bix cyi' t-xjal Dios. ⁶ Bix nxi' nkanen te Dios ti'ja tu'n toc tjunena ti jilel jba'n tu'na ti' Jesús cyuya ocslal, cuma tey toclabl ju'x tisenj cye. Tej tu'n tel niy' ti'j cykilj ba'n ntzaj tk'o'n Dios cyej xjal n-oc cymojoban cyiib tuya Jesús, njaw t'z'iyte oj toc kjuna jba'n kaak'en najben te Jesús. ⁷ Nchin tzalajwe tzalu bix ma kewe nc'u'j, cuma o nbi ti'i' tanema cyi' xjal, bix ti tten n-oc tnimsa'na cyc'u'j ocslal matzewe.

Tej t-xi' tcubsa'n Pablo twitz ti'j Onésimo jaj jun tk'opaj Filemón

⁸ Ju' tzunj, amale atet wajwalela tu'n Jesús tu'n ncawen tibaja ti pjel tey cuma inayenwe tyolelxin, ⁹ nejl cxe'l ncubsa'n nwitz tey tu'n at tanema. Inayen Pablo, jun tij, toctz tuj tzee' nuk ti'jc'a Jesús, ¹⁰ cxe'l ncubsa'n nwitz tey ti' Onésimo, tk'opaja. Luxin at wuya tzalu. Jaxin tisen jun ncwal, cuma cyu'n nyola ac'aj ma jaw itz'j tanemxin ti' Dios, ti'j ma tzulxin k'olbel we tuj tzee'.

¹¹ Tej tyem o baj, Onésimo mintii'xix ajbe'naxin tey. Pero yaltzen ja'lewe, lu tzunxin najben we, bix nimxsen tajbelexin tey. ¹² Ma tz'aj nsma'nxin tuyey. K'imxin tise'c'ax inayen otk chin pon. ¹³ Wajatlwe nuket ata wuya tzalu, bix wajatlwe ma tcyaj Onésimo wuya tzalu te t-xela, jac'a tz'ajbenxin we ti'j lu ken nti' nctz tuj tzee'wa nuk tu'nc'a wocslabl ti' Jesús. ¹⁴ Pero mintii'we ba'n toc nbinche, cuma min-ala at tzalu tu'n tcyuan tey ja lu. Cuma ka ma tz'oc nc'ojla'nxin tzalu, nuk wu'nx, yaa'n tu'n tey tc'u'ja. ¹⁵ Cuyamj ti jilel o baj cyjulu. E xi' t-xoo'na tk'opaja te cab k'ij, tu'ntzen tcamana ti' jun ocslal tisen jun tiz'ena te junx maj. ¹⁶ Yaa'n nuk jun k'opajxin ja'lewe, sino mas tajbelexin twitz jun k'opaj, tisen jun tiz'ena n-oc tak' tey. Wachexsewe twitzxin. Yaltzen tey, masx ba'n toc tak'xin tey, cuma c'ajbelxin tey, bix tisen jun tiz'ena tuj ocslabl. ¹⁷ Ju' tzunj, ka kuya kiib tuj twitza, jaxse k'imxin tisenx inayen otk chin pon.

¹⁸ Katzen at o talk'a ti'ja, ma at c'asben tey, k'onc'ax ti' nbiya. ¹⁹ Yaa'n nuk tenwe nyol ti'j tu'n nchjonte. Tu'ntzen tcyaj nyol tuj chic'aj, inayen Pablo ncub ntz'i'ben ja u'j lu tuya nk'ab. Yaa'n jun secrevánt ncub tz'i'bente. Cuma e xi' nk'umena t'pochal co'pbil tey, ju' tzunj at tc'asbena we, pero min tzaj nna'nwe tey. ²⁰ Jey', Filemón, jaj jun ocslal ti' Kaaw Jesús. Bincham xtalbil wi'j tu'n tiik'entey Onésimo tuyaxix cykil tc'u'ja. Nimsa'nctzen nc'u'j, cuma ocslal ko' ti' Jesús. ²¹ Nxi' ntz'i'ben u'j tey, cuma k'uklec nc'u'j ka cbinel tu'na tisenj nxi' nkba'n tey, bix ntz'ki'n mas cbinel tu'na twitzj nxi' nkanen tey.

²² Nuksama. Bincham ch'in nposada t'jay, bix cyna'm Dios tu'n wex tzakpet tuj tzee'. K'ukl nc'u'j tu'n npon canan cyuyey.

Jun k'olbebl cyu'n ocslal te Filemón

²³ Epafra, juntl ocslal toctz tuj tzee', nxi' tk'o'n jun k'olbebl tey. ²⁴ Ju'x te Marcos, Aristarco, Demas, bixse Lucas, ejee'tzen xinj nchi ak'anan wuya tuj tnom lu, jax nxi' cyk'o'nxin jun k'olbebl tey.

²⁵ Tzajxit t-xtalbil Kaaw Jesús cyibaja. Ju'xit tzuna.

Jun u'j cye xjal aj Israel

Ma tzaj tkba'n Dios tyol ke tu'n Tcwalxin

¹ Tuj tyem ootxa Dios e k'umente cye ke kxe'chel nim maj bix ch'imac'a tten. Cyu'ntzen ke tyolelxin e tkba'xin. ² Yaltzen tuj tyem te ja'lewe, tu'n Tcwalxin o cyaj tyolenxin ke te junx maj. Bix tu'n Tcwalxin e tbincha Dios cykilca at twitz tx'otx' bix twitz cya'j. Tetzen te Tcwalxin o cyja' tk'o'nxin cykilca tuj tk'ab, bix o tz'ocxin te Taaw tibaj cykilca twitz tx'otx'. ³ Tisen tken k'ij tzin techla'n tii'n tzunj k'ij, ju'tzen Tcwal Dios tzin techla'n te ke tii'n jawnex tnaabl bix tipemal bix tbanel Dios. Ja tzunxin k'ilte te cykilca tuj tumel tu'n tipemal tyolxin. Ja tzunxin e cyim tu'ntzen txjonte kil, bix o ponxin tuj tmank'ab Dios tuj cya'j te cawel tuya Dios.

Mas nim toclen tcwal Dios cywitz ke ángel

⁴ Attzen juun xjal cyxola ncub cybisena ti'j ka jaj tley Moisés k'o'n cye ke kxe'chel mas nintzaj twitzj te Jesús ja'lewe, cuma ejee' tsanjel Dios tuj cya'j e tzaj k'onte. Pero ja te Tcwal Dios mas jawnex twitzj cyej tsanjel Dios tuj cya'j, bix ju' tzunj mas tz'akl tyolxin. ¡Jawnexsen jun tbi toclenxin! ⁵ Ktzki'n mas jawnex Tcwal Dios twitzj cye tsanjel Dios tuj cya'j cuma nuk te Tcwal e cyja' tk'umen Dios ja yol lu: "Ja'lewe c'oquel nk'o'n tbiy te Ncwal, bix tuya jawnex taak'ena." Ju' e tkba Dios te Tcwal jatxe nejl, yaa'n te jun ángel. Bix ju'x min e tk'umexin tuj tyolxin ti'j jun ángel ja yol lu: "Inayena Tmana, bix jay Ncwala," tzi tyol Dios. ⁶ Bix juntl. Oj tzaj tii'n Dios Tcwal twitz tx'otx' juntl maj tu'n toc te tneel cawel, cxe'l tkba'nxin: "Enterake tsanjel Dios tuj cya'j chi cwel maje twitz Tcwal Dios," tzi tyol Dios. ⁷ Bix cyi'j tzunj tsanjel Dios tuj cya'j tzi Dios: "Tisen jun cyk'ik c'ulel bix q'uiyel bix tisen jun tken k'ak' c'awel julen bix cwel baj, ju'tzen ke ángel nuk chi ulel ajx yec'l cyiib," tzi tyol Dios. ⁸ Pero ti'tzen Tcwal Dios, tzi Dios te Tcwal: "Tujtzen tk'uk'bila, jay Dios, ccawela te junx maj. Jun tcawbila jaxse jun cawbil jiquen. ⁹ Bix te junx maj o tjoya jun ba'n bix o tz'el t-xoo'na jun ka'. Ju' tzunj ma scy'eta te cawel wu'n. Ju' tzunj te tey at mas tzalajeb l cywitz ke ángel," tzi Dios te Tcwal, tzi tyol Dios.

¹⁰ Bix at juntl e kbet nejl. Tuj tyol Dios nk'umente: "Tzi Dios te Tcwal: 'Jay, Taaw, ja tzuna e binchante cykil twitz tx'otx' tuj tneel, bix tuya tk'aba e binne cykil twitz cya'j. ¹¹ Pero ja tzunkej e tbinchay chi na'l, twitz tx'otx' tuya cya'j, pero jay, mintii' t'ajlela. Cuma cykil keje e tbinchay tisen xbalen chi tiil. ¹² Cwel buchj tx'otx' tuya cya'j tisen jun xbalen k'anak mintii' c'ajbeletl, bix il ti'j cch'ixpetel. Pero tey, jaxa te junx maj. Mlay pon baj tteyema, bix mlay ch'ixpeta,' tzi Dios te Tcwal," tzi tyol Dios. ¹³ Dios bajx tkba' te jun tsanjel tuj cya'j tisen e xi' tk'umexin jun maj te Tcwalxin. Tzi cyjulu: "Kequey tuj nmank'aba, ojxetzen t'cub nk'o'na tjak' tkena kej xjal chi'lel ti'ja bix c'ycy'i tu'n tcawena cyibaj," tzi Dios te Tcwal, tzi tyol Dios. ¹⁴ ¡Min! Ke cye ángel nuk espírituke nchi ajben te onlte Dios. Yaa'n cawelke tisen Tcwal Dios. Jatzen Dios nxi' k'oncye te onel bix c'ojlal cyej xjal ocslal.

2

Mi'n tz'el kxoo'n jun co'pbil ke

¹ Bueno, cuma n-el kniy' ti'j Tcwal Dios mas nintzaj, il ti'j c'oquel kocsla'n tyolxin. Ju' tzunj c'oquelxix ky'u'j ti'j jaxxix yol te co'pbil o kbi, tu'ntzen mi'n ko el tzpet ti'j. ² Ja tzunj tley Moisés k'o'n cye ke kxe'chel cyu'n tsanjel Dios tuj cya'j, ilxix ti'j tu'n t'aint cyu'n. Ja tzunkej min e cynima, bix e cubke tuj castiwa jaxxix toclen. ³ Katzen o chi cub ke kxe'chel tuj castiwa tu'n min e cybi tley Moisés, jaxse ju'x ke ja'lewe, mlay ko el libre ti'j kcastiwa tzul yaj ka ma tz'el kxoo'n jun co'pbil ke mas jawnex twitzj ley nejl. Ja Kman Jesús tneel xjal e k'umente j'jol te co'pbil, bix mas yajxtil ke t-xel Jesús e cyyeec'a ke ka jax, bix kocsla'. ⁴ Jax Kman Dios e yeec'ante jax tu'n nim tipemalxin bix tu'n t'bj bint-xin bix tuya nim techlal, bix tu'n tipemal Espíritu Santo o tzaj tk'o'n ke, te teeylex juun la' alcye tk'a'xin.

Oc Cristo te jun xjal, bix n-el tniy' ti'j ti tten tu'n tniy' q'uixc'aj tu'n

⁵ Tzultzen jun k'ij oj tul jun ac'aj cawbil twitz tx'otx'. Tuj tzunj cawbil yaa'n ke ángel chi cawel twitz tx'otx', sino ja te Tcwal Dios. ⁶ K'o'nc cyc'u'ja ti'j ti toc tuj tyol Dios. Tzi jun xjal te Dios cyjulu: "Nuk xjal ko'ya, pero tey nintzaj Dios. Pero amale Diosate, ntzaj tk'o'na nimxix il ti'j ki'ja. ⁷ Tu'n tikentzen nna'najey ki'ja, bix tu'n tikentzen nlabtey ki'ja, ejoo'ya xjal? ⁷ Jay e kbante yaa'n nim tcawbil ke xjal cywitz ke ángel jun rato ja'lewe. Pero at jun k'ij tk'a'y jun tajwalel xjal tu'n tcawen, bix tibaj cykilj e tbinchay. ⁸ Cykil cyjel tjak' tcawbil tu'na. ¡Axsen tbanel jun tumel tu'na!" tzi jun xjal te Dios, tzi tyol Dios.

Ju' tzen n-e-la kniy' ti'j la' alcy'e jun k'ij Dios ctzaal k'onte cykil, cyuyax ke ángel, tuj tk'ab jun xjal. ¿Pero opa kil jlu? Mina'x. ⁹ Pero te Jesús o kil jun xjal o tz'oc ttzyu'n tu'n t'bhnt alcy'e nbyan tuj tyol Dios oc pjel. Tej tcubxin twitz tx'otx', ocxin menos ch'in cywitz ke ángel. Ocxin te xjal tu'n tcub tenxin kuya, tu'ntzen tcyimxin te t-xel cykilca xjal, tu'ntzen cyiik'ente xjal t-xtalbil Dios. Pero ya o jaw t'nimsa'n Dios ja Jesús mas t'banel bix mas nintzaj, cuma o tziy'x q'uixc'aj tuj cyamecy tu'nxin.

¹⁰ Entonces, tej tcyim Jesús, ja tzunja e baj tninc'u'n Dios. Cykil e bint tu'n Dios, bix cykilca te te Dios. Bix taj Dios cykilca ke tcwal tu'n cypon jaa' ta'xin. Ju' tzen jun tumel e tkba Dios tu'n ttzket-xix tu'n Jesús tuj q'uixc'aj, cuma ja Jesús tu'n tcub nejl cywitz xjal jaa' ta' Dios, bix te k'ilx cye xjal tuya Dios. ¹¹ Ke, o ko jaw tii'nxin tuj tz'il tu'ntzen sakkix ko' twitz Dios, ejoo'tzen tcwal Dios. Bix Tcwal Dios ja Jesús, o txjonte ke tu'n kajben te Dios. Ju'x te Jesús bix ejoo', junx Kman tuyaxin. Ju' tzunj te Tcwal Dios min ch'ixewxin tu'n tkbante hermano ko' tuyaxin. ¹² Tuj tyol Dios tzin tkba'n Tcwal Dios ka ejoo' termano. C'oquel cye'u'ja ti'j tzi Tcwal Dios te Dios cyjulu: "Chin yolela ti'ja cyuya ke wermaniya tu'n tel cyniy' ti'ja al cyey. Bix chin nimela twitza cyxol ke wermaniya tuj t'jay," tzi Tcwal Dios te Dios, tzi tyol Dios. ¹³ Bix juntl tumel. Tzi Tcwal Dios cyjulu: "Ju'x weya n-oc ke nc'u'ja ti' Dios," tzi tyol Dios. Ju' tzen tumel junx Tcwal Dios cyuya xjal. Bix tuj tyol Dios tzi Tcwal Dios cyjulu: "Lu kena ntiina cyuya ke tcwal Dios e tzaj tk'o'n Dios we." ¹⁴ Ke tcwal jun xjal jax ttz'q'uel bix tchu'l cyuya cabtl titz'en. Jaxse ju'x te Jesús oc te xjal tu'ntzen telxin junx cyuya xjal, bix tu'n t'bhnt tu'n tcyimxin tisen ke xjal nchi cyim, bix tu'ntzen t'jaw itz'jxin tuj cyamecy, tu'n tel tii'nxin tipemal taaw cyamecy. Ju' tzen e tcamaxin tibaj taaw il. ¹⁵ Ju' tzen e t'bhinchaxin tu'ntzen cytzokpaj xjal ti'j ttzi cyamecy cyi'j, cuma tu'ntzen ttzi cyamecy cyi'j ete'cx tjak' tcawbil taaw il.

¹⁶ At juntl tumel tiken il ti'j oc Tcwal Dios te xjal. Nuket ju' tajxin tu'n tonenxin cye ángel, ju'tle il ti'j tu'n tocxin te ángel. Pero ju' e labte texin te onlte cye xjal. Ju' tzunj oquexin te xjal, bix te tiy'jil ootxa kchman Abraham. ¹⁷ Ilxix ti'j tu'n ocxin junx kuya, ejoo' termanoxin, tu'ntzen t'bhnt tu'n t'ponxin twitz Dios te yolel ki'j. O ponxin twitz Dios tu'ntzen tocxin te nintzaj kpala jiquenxix bix n-oc k'ak'en tc'u'jxin ki'j, bix tu'ntzen t'chjet chojbil kil tu'nxin. ¹⁸ Otzen tziy'x q'uixc'aj tu'nxin, bix ocxin tuj niy'bebl tu'n taaw il, pero min e tkeyxin. Ju' tzunj jaxin onlte ke oj koc tuj niy'bebl.

3

Jawnex te Jesús twitz Moisés

¹ Ju' tzunj, key hermano sakkix twitz Dios bix scy'o'nkey tu'n Dios tu'n cyajbena te te t-xjal, cybisenx ti'j Jesús. Scy'o'n tu'n Dios, cuma tuj kocslabl ja Jesús sma'n tu'n Dios te onle ke bix cuma jaxin te nintzaj kpala te yolel ki'j twitz Dios. ² Cybisenx ti'j Jesús ja jun xjal ba'n tu'n toc ke kc'u'j ti'jxin. E t'bhixin te junx maj cykilj e tkba Dios, tisen te Moisés e t'bi cykilca tyol Dios tej tak'anaxin cyxol t-xjal Dios te ootxa. ³ At juun cyxola ncub cybisenca ka ja Moisés mas nintzaj twitz Jesús bix ju'x mas il ti'j tley Moisés twitz tyol Jesús. Pero yaa'n ju'wa. Ja te Jesús mas nintzajxin twitz Moisés, tisen jun binchal jaa' mas nintzaj twitz jaa'. ⁴ Jaca juun jaa' c'binel tu'n juun xjal. Pero te Dios jaxin binchalte te cykilca at. ⁵ Jatzen te Moisés e t'bi texin te junx maj cykil tyol Dios tuj taak'inxin te yolel ti'j ti c'binel tu'n Dios mas yaj, pero nuk jun ak'anaxin tuj t'ja Dios cyibaj t-xjal Dios. ⁶ Yaltzen tej Scy'o'n tu'n Dios, ju'xa e t'bi texin te junx maj cykil tyol Dios, pero yaa'n tisen jun ak'anaxin, sino Tcwal Dios texin, Taaw tibaj cykil t-xjal Dios, bix ktzki'n jun taaw mas nintzaj twitz jun ak'anal. Yaltzen ke, ejoo' t-xjal Dios ka k'i'nix ku'n tu'ntzen kcaman alcy'e nko ayon ti'j.

Ntzej tk'o'n Dios ajlabl cye ke ocslal

⁷ Wajtzen txi' nk'umena cyey jun tumel ti'j tu'n tiy'x cyu'na tu'n cyxi' lpey ti' Jesús hasta ojxe tjapan baj cyhunk'lala. Ka minx cypay, ka cab cye'u'ja cyxi'y, ju' pjel cyey tisen e baj cye kxe'chel. Cyna'ntztzen ti toc tu'n Espíritu Santo tuj tyol Dios. Tzi cyjulu: "Tzi Dios cye xjal judío: 'Ja'lewe, ka ma cybiy titzen tzin nkba'na, ⁸ mi'n tz'el cyi'iq'uena, tisen kej cyiy'jila el cyi'iq'uen j-e nkba'ya tej cybet tuj jun najbil tzkij tx'otx', bix ju'tzen oc tenke iylete weya. ⁹ Jatzen e n-oqueya tuj niy'bebl cyu'n ke cyxe'chela ka tu'n ttzaj nk'o'ja cyi'j, amale tet cya'wnak jnabk'i toclen cycye'yen cykilcaj ba'n e wak'a cye. ¹⁰ Tu'n tzunj cyniy'bebl wi'ja, e tzaj nk'o'ja cyi'j, bix e xi' nkba'n cye: Tuj cyanema nuk cyajx cyey nchi bet-xa tzpetpajninkey. Bix cye'ixa tu'n t'bhnt cyu'na tu'n cybeta tuj nbe'ya, ntzi cye cyxe'chela. ¹¹ Ju' tzen e t'zaa' nk'o'ja cyi'j, bix jaxix e nkba'ya cyexin mlayx chi oc tuj lugar te ajlabl tuj tx'otx' te Canaán at tu'n t-xi' nk'o'na cyexin, tzi Dios cye aj Israel," tzi Espíritu Santo tuj tyol Dios.

¹² Ju' tzunj, key hermano, ka n-el kxoo'n tyol jxjal jatzen mero Dios i'tz, tu'n tzunj ja lu n-el kpa'n kiib ti' Dios. K'o'nc cye'u'ja ti'j ti e baj cye ke kxe'chel ootxa tej tel cyiin cyiib

ti' tyol Kman Dios. Ju' tzunj cyc'ojlam cyiiba mi'n tz'el cypa'n cyiiba ti' Dios i'tz, bix mi'n baj cyc'u'ja ti' tyol, bix mi'n cyaj cyk'o'na cybey tuya Dios. ¹³ Nuk o'cx cynimsam cyc'u'ja cyxola jaca k'ij looj lux tyem at ja'lewe, tu'n min-al jun cyey cub tzpet tnaabl tu'n il. ¹⁴ Ka k'i'nixix ku'n ojxe kcyim tisenj tej kocslan tuj tneel, attzen mojbabl kiib tuya Jesús, Jscy'o'n tu'n Dios. ¹⁵ Cyna'ntztzen ti toc tu'n tyol Dios: "Ja'lewe, ka ma cybiy titzen ntka'n Dios, mi'n ccyiwsay cyanema, tisen e baj cyej xjal el cyxoo'n tyol Dios," tzi tyol Dios. ¹⁶ ¿Altzen cyej xjal el xoo'nte tyol Dios, amale otket cybi? Cykilca kej xjal etz tii'n Moisés tuj tx'otx' te Egipto, ejee'tzen kxe'chel. ¹⁷ ¿Bix aluyatzen e k'ojle Dios cya'wnak jnabk'i? Cyuya tzunj aj Israel min e cybi, bix cuma min e cybi, ejee' tzunja e cyim tuj najbil tzkij tx'otx'. ¹⁸ ¿Bix aluyatzen e tkba' Dios jaxxix tyol tu'n mi'n chi ocx tuj jun lugar te ajlabl otk tak' Dios te cynajbil? Cyuya tzun kej xjal min e cybi tyol Dios. ¹⁹ Tz'elc'atzen kniy' ti'j min ocxke tuj tx'otx' te Canaán tuya Dios tu'n min e cyocsla tyol Dios.

Ju'tzen min ocx ke kxe'chel tuj ajlabl, bix ju'tzen ke, mi'n ko ocx tuj jun ajlabl tzin tk'o'n Dios ka nbaj kc'u'j ti' tyol Dios.

4

¹ Tisen nejl, ju'x ja'lewe, lux tyol Dios tcyajsen kuyawe tu'n koxc tuj ajlabl tuyaxin. Ju' tzunj c'oquellix kc'u'j ti'j tu'ntzen mi nuket jun kxol cyaj tu'n mi'n tz'ocx tuj ja ajlabla. ² Ke, o tz'oc kbi'n tyol Dios te co'pl ke, tisen ke kxe'chel ootxa oc cybi'n tyol Dios. Pero min ajben cye, cuma nuk oc cybi'n bix min e cyocsla. Nuket e cyocsla, ajbentzenle cye. ³ Pero ejoo'tzen o kocsla jyol te co'pbil, ejoo' tzunja ko oquex tuj jun ajlabl tuya Dios, cuma jax at jun ajlabl ke la' alcyne jun k'ij. Ja tzunj ajlabl nbyan tuj tyol Dios tet zji Dios cyjulu: "E tzaj nk'o'ja cyi'j xjal min e cybi nyol, bix e xi' nkba'n cye jaxxix tu'n mi'n chi oc tuj ajlabl wuyena," tzi Dios. Ja tzunj yol lu nyee'ante ya at jun ajlabl te Dios nejl bi'x e baj bint jatxe te thaj bint twitz tx'otx'. ⁴ Ti'j tej tajlan Dios, tzin tkba'n tuj tyol Dios cyjulu: "E ke te'u'j Dios bix ajlanxin te twuukan k'ij thinlen cykilca taak'enxin," tzi tyol Dios. ⁵ Bix cyi'j xjal min cyocsla tu'n cypon tuj ajlabl tuya Dios, tzin tkba'n tuj tyol Dios cyjulu: "Mi'n chi octz ajlabl wuyena kej xjal n-el cyiiq'uen," tzi Dios tuj tyol.

⁶ Entonces e bint tu'n Dios tu'n cypon xjal tuj ajlabl tuyaxin. Pero tuj tneel kej oc ebinte tej ttxconte Dios cyi'j tu'n cypon, min e ponke tu'n tel-len cyxoo'n tyolxin. Ju' tzunj at-x tu'n cypon xjal tuj ajlabl lu, bix at tumel kuya lux Dios ntcon ki'j tu'n kpon tuyaxin. ⁷ N-el kniy' ti'j lux ba'n koxc tuj ajlabl tuya Dios, cuma tzi tyol Dios tu'n kpon ja'lewe. Jyol ja'lewe e tkba Dios tu'n David, e tk'umexin nim jnabk'i mas yaj twitzj tneel maj e tzaj tk'o'nxin jun k'ij tu'n cypon xjal tuyaxin. E tkba David tu'n Dios ja yol lu ya ma kba'j: "Ja'lewe, ka cybi'y jtzin tkba'n Dios, mi'n tz'el cyiiq'uena tyolxin," tzi David. ⁸ Ju' tzunj mi'n cub cybisena ka jaj tx'otx' te Canaán ajlabl e tkba Dios tu'n cypon tuj. Canaán nuk jun techel ti tten tu'n kpon tuj juntl ajlabl. Nukettzen ja Canaán manc'bil najbil te ajlabl, minttzenle e tkba Dios mas yaj ti'j jun k'ij tu'n cypon xjal tuj ajlabl tuyaxin. ⁹ Ti'j tzunj yol lu c'uelele kniy' ti'j yaa'n Canaán jaj ajlabl e tkba Dios, sino at juntl ajlabl mas jawnex tu'n koxc tuj. ¹⁰ Alcyey ocslal oj tcyim c'oquex tuj ajlabl bix cwe'bel taak'en, tisenj te Dios ajlan tej thaj bint taak'en. ¹¹ Ju' tzunj ilxix ti'j tu'n toc kc'u'j ti'j tu'n kpon tuj ajlabl tuya Dios, bix mi'n txi' ki'i'n cynaabl kej xjal el cyxoo'n tyol Dios bix min occke tuya Dios.

¹² Pero mi'ntzen cub cybisena ka ba'nj nbint cyu'na nuk tuya cytziy pero yaa'n ju' tuj cyanema, bix mi'n cub cybisena ba'n tu'n tcub cyewena ti niy' tuj cyc'u'ja tuj twitz Dios. Mlay tz'oc cyya'na Dios. Te tyol Dios i'tzxixte bix at tipemal. Tisen jun machet ca'ba ttzii' bix binne ttzii' ba'n tocx tuj kxumlal, ju'tzen elpenina jtyol Dios ba'n tocx tuj kanem. C'oquex te cye'yel cykil niy' tuj kc'u'j, ka ba'n bix ka ka'. Jniy' tuj kc'u'j xbi'k tuj twitz Dios. ¹³ Min-al jun ba'n tcub ewen twitz Dios. Cykilca chic'aj tuj twitz Dios. Bix twitz Dios kk'a' jun kumel ti xbjaj kbinche bix ti xbjaj kbisen.

Ja Jesús nintzaj kpala

¹⁴ At juntl tumel. O pon Jesús, Tcwal Dios, tuj cya'j twitz Dios. Bix ja Jesús jatzen nintzaj kpalaj. Ojtzten kpon twitz Dios te kanel, attzen Tcwal Dios te kuya te onl ke. Jatzen kpala jnintzaj te junx maj. Jatzen yolel ki'j twitz Dios. Ju' tzunj, mi'n cyaj kcolen ja Jesús, bix mi'n cyaj kcolen kocslabl. ¹⁵ Jatzen yolel ki'j twitz Dios, bix at jun tk'ak'bil te'u'jxin ki'j, cuma n-el tniy'xin ti'j ti tten j-oj nko oc tuj niy'bebl tu'n il, cuma tej tten texin twitz tx'otx' tuya t-xumlal, iy' texin twitz cykil niy'bebl tu'n il, pero min e cub tz'axxin tuj il. ¹⁶ Ju' tzunj, tu'nixix cykil kc'u'j ko lk'ex twitz Dios jaa' ncawena, tu'ntzen kiik'ente t-xalbil Dios, bix tu'ntzen ktzaj tonenxin oj kniy'bet tu'n il.

5

¹ ¿Altzen ba'n tajben te jun nintzaj pala? Tu'ntzen tajben te nintzaj pala, il ti'j jun xjal, tu'ntzen toc yolel cyi' xjal twitz Dios, bix tu'n t-xi' cyk'o'n cyoybil xjal te Dios, bix tu'n t-xi' cyk'o'n chojbil cyil xjal te Dios. ² Ti' tzunj xjal pala jax tzin tna'n bix at tpaensya oj at cytzpetpajlenel xjal bix oj nchi cub tz'ak xjal tuj il, cuma jax xsunxin n-el tniy' ti'j ti tten tu'n mintii' tipen twitz il, cuma xjalxin. ³ Oj t-xi' toyenxin chojbil il twitz Dios, ti'j texin til junx tuyaj cye xjal nxi' toyenxin, cuma xjalxin.

⁴ Bix juntl. Tu'ntzen tajben te jawnex pala, yaa'n nuk o'cx jun xjal, sino ju'x il ti'j jun xjal o scy'et tu'n Dios. Min-al jun ba'n toc tk'on tiib te nintzaj pala tu'nx, sino ja te Dios nk'umente al c'oquelte nintzaj pala, tisenj e tk'umexin ja Aarón te nintzaj pala cyxol aj Israel jatxe ootxa.

⁵ Yaltzen tej Scy'o'n tu'n Dios, jatzen xjalja o tz'oc te tneel pala, cuma min oc tk'on tiib te nintzaj pala, sino ja te Dios e k'onte taak'en tuj tk'ab te pala. Ja lu tzin yec'j tu'n tyol Dios. Cycey'yenc ti toc tu'n Dios te Tcwal: " Jay ncwala. Ja'lewe ma txi' nk'o'na tey te nintzaja," tzi Dios te Tcwal," tzi tyol Dios. ⁶ Bix at mastl tumel tuj tyol Dios ootxa te k'umbilte yaa'n Tcwal Dios e scy'onte taak'en te pala. Tzi Dios te Tcwal cyjulu: " Ja tzuna ma scy'et wu'n te pala te junx maj, bix mas jawnexa tisej te Melquisedec," tzi Dios te Tcwal," tzi tyol Dios.

⁷ Bix jatzen Jესus najben te nintzaj kpala cuma ocxin te xjal bix iy'x pena tu'nxin tisen ejoo'. Tejtzen tten Jscy'o'n tu'n Dios tzalu twitz tx'otx', tetzen jun koniyan te ch'itk tcyimxin bix ak'xin na'l Dios bix e xi' tsi'nxin te Dios tu'n tak' ti' tanemxin, tu'ntzen tcllet-xin tu'n Dios tuj cyamecy. Bix e tbi Dios, cuma otk tniimanxin tyol Dios junx maj. Pero min e tcol Dios jaxin tu'n min e cubxin, sino nuk tipemalxin e xi' tk'o'n Dios tu'n iy'x tu'nxin tuj cyamecy tu'n kil. ⁸ Amale Tcwal Dioset-xin, il ti'j tu'n iy'x q'uixc'aj tu'nxin, tu'n tyeec'antexin ti tten tu'n tniमतexin tyol Dios tuj q'uixc'aj. ⁹ Tejtzen tba j bint jlu tu'nxin, bix ju'x e tyeec'axin jaxin tz'aklxix, bixsen ocxin te Clol xjal, tu'ntzen tclontexin kej xjal nchi ocslante texin ti'j cyacastiwa te junx maj. ¹⁰ Bix oc tch'i'quen Dios jaxin te nintzaj palaxin, tetzen yolelxin ki'j twitz Dios, tisen tzunj xin nintzaj pala Melquisedec e ten nejl twitz Aarón jatxe ootxa.

Kej xjal n-el cyi'iq'uen tyol Dios, chi xe'l tuj castiwa te junx maj

¹¹ Key hermano, at nimc'atl waja txi' nkba'n cyey, pero cyiw ch'in tu'n tel cyni'ya ti'j, cuma cht'ol key tu'n toc cyxnak'tza'na. ¹² Bix kaape ootxa chi oca ocslal! Nimxe jnabk'i cyoclena. ¿Tu'n tikentzen mix n-e'la cyni'ya ti'j tyol Dios? ¿Ti nbaj cyey ti'j min tz'el cyni'ya ti'j? Lastim key mlay chi oca te xnak'tzal tyol Dios tu'n min tz'el cyni'ya ti'j, sino ilne ti'j tu'n cyxnak'tzetla juntl maj tuj tneel xnak'tzibil te cyocslabla. Cyey tisen jun nee'key tzinx ch'u'n mina'n tak' waa'l. ¹³ Jcyej cyten tuj cyocslabla nuk tisen jun nee' tzinx ch'u'n, bix min chi xcyey ti'j tu'n t'btint tej mas jawnex tuj cyocslabla. ¹⁴ Yaltzen te waabj, nuk ejee' kej ma xjal nxi' waa'nte, yaa'n ke nee'. Ju'tzen jafenina tyol Dios mas cyiw. Kej ocslal nchi xnak'tzan ti'j t-xnak'tzibil Dios mas cyiw tuj cyocslabl, ejee' tisenj jun xjal ya ma xjaltl bix nwaa'ntl, yaa'n nuk tch'u' nxi'. Ju'tzen chi tzketel ti'j ti jafenina tyol Dios, bix ti tten ttxo'lan alcy e ba'n bix alcy e ka'. Pero cyey, nuk cytenxa ajnintz cynaabla ti' tyol Dios, bix jatzen ka'ja cuma ba'n tu'n cyex jilpaja ti'j.

6

¹ Ju' tzunj kiy'xxix tu'n t'btint ku'n tu'ntzen tel kniy' ti'j cykil tyol Dios, tu'ntzen koc te tz'aklxix. Mi'n nuk ko oc ten ti'j tneel xnak'tzibil s-oc kxnak'tza'n tej xko ocslan, nuk jax nxi' kmeltz'u'n. Nuk tu'n cykil tyol Dios ko pomela tu'ntzen ttzket knaabl. Jtneel xnak'tzibil s-oc kbi'n tej xko ocslan, ejee' tzunj lu. Il ti'j q'uelel kxoo'n jniy' tik'ch nbint ku'n nxi' k'onte ke tuj cyamecy te junx maj. Bix tu'n toc ke kc'u'j ti' Dios ko cletel tu'n. ² Bix il ti'j ko yeec'al jun techel bautismo cye niy'tl xjal ka ma ko oc tuya Jesús. Bix xnak'tzibil tu'n t'cub kk'o'n kk'ab tibaj jun ac'aj ocslal te techel otktzen tiik' Espíritu Santo. Bix xnak'tzibil at jun k'ij ko jawetz itz'j tuya ac'aj kxumal tuj cyamecy juntl maj. Bix ka min xi' kocsla'n colbil ke ko oqueltzen tuj cye'ybil tu'n Dios bix ko pontzen tuj q'uixc'aj te mintii' t'bjalel twi'. Ejee' tzunj lu tneel xnak'tzibil nxi'x kmeltz'u'n. ³ Tu'ntzen ttzket knaabl, bix tu'n mi'n ko ex jilpaj tuj kocslabl, il ti'j kk'a'c kc'u'j ti' mastl, ka ma tak' Dios.

⁴ Nxi' nkba'n ka ma tak' Dios cuma kape at juun min ma tak' Dios tu'n tiik'ente jaj mastl tu'n ttzket, cuma ya ma cyaj cyk'o'n cyocslabl. Cyk'o'nc cye'u'ja ti'j tu'n mi'n tz'el cyi'iq'uena cyocslabla, cuma kej xjal o tz'el cyniy' ti'j jun jaxxix yol ti'j co'pbil cye, bix e cyiik' jun cychunk'lal mintii' t'bjalel, bix e cyiik' Espíritu Santo, ⁵ bix e cub cytz'iy'be'n t'banel tyol Dios, bix e cyiik' tipemal Dios tu'n t'btint nim techlal cyu'n, ⁶ katzen ma tz'el cyi'iq'uen Tcwal Dios, bix ka ma chi aj meltz'aj tuj cyreligión te ootxa, ya mlay tak' Dios tu'n cyaj meltz'aj juntl maj. Katzen nchi k'umen cywitz xjal ka ya o tz'el cyi'iq'uen Tcwal Dios, ju'xsen jafenina

tisen njaw cyk'o'n Jesús twitz cruz juntl maj, bix nchi xmuçchan ti'jxin cyisen kej e cub byonte Jesús e xmuçchanke.

⁷ Ti'j tzunj yol ma txi' nk'umena cyey cyjel nkba'na jun techel. Cyanem xjal tisen jun tx'otx'. Jtyol Dios n-ocx tuj cyanem tisen jun jbal ncub twitz tx'otx'. Katzen ma tak' tx'otx' jun ba'n awal te cyey xjal nchi ak'anan twitz tx'otx', jatzen jun t-xtalbil Dios. Ju'tzen japenina awal tisen tzunkej xjal oj cyiik'ente jyol te co'pbil bix chi tzketel. ⁸ Katzen ma tak' tx'otx' nuk ch'i'xc'a, ju'tzen japenina tisen tzunj kej xjal oj tel cyiiq'uen yol te co'pbil. Tisentzen ch'i'x nuk cwel patet, ju'x xsunkej xjal n-el cyiiq'uen tyol Dios il ti'j chi cyjel tjak' tcawbil Dios, bix sbu'ntltzenke tu'n Dios.

Mlay ko yucch ka ma tz'oc ke kc'u'j ti' Cristo

⁹ Jatzen cyey hermano, ma txi' nkba'na cyey tu'n mi'n txi' cybi'na cyyoł kej nchi xmoxa tu'n tcyaj cyk'o'na cyocslabla ti' Jesús. Pero min tzin nkba'na ma cyaj cyk'o'na. Ntzki'nwe nchi binchana jba'n nbint cyu'nj xjal ocslal. ¹⁰ Bix ttzki'n Dios. Bix ba'nxiç te Dios. Mlay tz'el tuj tc'u'jxin cykilj ba'n o cybinchay bix jun tk'ak'bil cyc'u'ja cyi'j kej cyermaney. Bix ncyeyen Dios o chi onena cyi'ke cyuyey tu'n cyitz'j, bix chi onenxa ju'xa. ¹¹ Pero tisenx sey'key tuj tk'ak'bil cyc'u'ja cyi'j cyermaney, ju'xsen waja sey'key tu'n tel cyni'ya ti'j jaca juun cyey jawnen chi jawela tuj mas jawnex xnak'tzbil, tu'n cytzketa, ojxe ccyima, tu'ntzen cynamana ti'j entera cycotza tzin cyyo'na. ¹² Cyk'o'nca cht'olkey. Cyii'nxa ti e baj cye kej o chi caman ti'j cycotz e tkba Dios. Cye e camanke ti'j nuk tu'n oc ke cyc'u'j ti' Dios bix tu'n minx e baj cygana. Bix ju'x ke, min tz'oc ke kc'u'j nuket mintii' il ti'j, cuma ctzketel tu'n Dios cykil tyol. ¹³ Cyii'nx tisen te Abraham. Oc ke texin tc'u'j ti' tyol Dios e cyaj tk'o'n Dios tuyaxin. Min e baj tc'u'jxin, cuma tuya jun jurament mintii' tu'n tcub tch'ixbe'n tyol e cyaj tk'o'n Dios tyol tuya Abraham. E cyaj tk'o'n Dios tyol tuya jun jurament ti' tex tbi, bix mintii'tl biybjaj mas jawnex twitz te Dios tu'n tajben te jun "tzkinn Dios jurament." ¹⁴ E tkba Dios te Abraham cyjulu: "Jax wu'na cxe'l nk'o'na nim xtalbil tibaja bix nk'a'ya nim tchmana," tzi Dios. ¹⁵ Bix oc ke tc'u'j Abraham ti' tyol Dios bix e tyo tuya chew' tnaabl, bix ju'tzen e tcamanaxin alcyey otk tkba Dios texin.

¹⁶ Ojzen taj jun xjal tu'n tcyaj tyol mas jaxxix cywitz juntl xjal tu'n tcub cyi'j, nxi' tk'o'n tipemal tyol tu'n toxç tipen ti' tipemal juntl xjal mas nintzaj twitzxin. Tisetzen tkba'n jun xjal, "Jaxxixwe wu'n, tzkinn Dios jurament," ya otktzen cyaj tyol tuj tzinen ju'wa, bix mintzentii' ba'n cycub ten txololol tu'n. ¹⁷ Yaltzen te Dios, min-al juntl xjal mas nintzaj twitzxin tu'n toxç tk'o'n tipemal tyolxin. Ccyey'yenc tej tcyaj tk'o'n Dios tyol te Abraham, tu'n t-xi' tk'o'n mas tipemal tyolxin tu'n tcyaj mas jaxxix tyolxin, nuk o'cx tu'n Dios e tzaj tipemal tyol te Abraham. "Jaxwe wu'n" tzi Dios te Abraham. Ti'j tzunj jurament lu e cyaj tuj tzinen ja Dios mlay tch'ixbe tyol te kxe'chel Abraham cyuya ke tchman. Il ti'j tu'n tbtint tu'nxin. Bix tej tcyaj tk'o'n Dios tuya Abraham ja yol ti'j xtalbil, jax yol te ke ja'lewe.

¹⁸ Ju'tzen n-el kniy' ti'j te tyol Dios o cyaj tk'o'n ke tu'n tk'onte xtalbil kibaj, jax. Tneel e cyaj tyolxin, bix n-el kniy' ti'j mlay x'tak'en Dios. Tcab, e xi' tk'o'nxin tipemal ti' tyolxin tuya jun jawnex jurament. Nuktzen kyo' ti'j t-xtalbilxin o cyaj tk'o'nxin ke, ejoj' ma ko clet tuj il. ¹⁹ Bix tej kyo' jatzen jun kchun'lal tuya Dios te junx maj. Bix jatzen Jesús o binchante jaxxix tej kyo', cuma ya o ponxin nejl kwitz tuya Dios. Jatzen mojbalecte ke tuya Dios. Jatzen e jkonte jun be kwitz tu'n kocx twitz Dios. At jun tumel. Cytzki'na tuj nintzaj tja Dios cyxol judío at jun nintzaj xbalen tcub maksbil tzi'j cwart xjanxsen jaa' e ten Dios, tu'n mi'n chi ocx xjal twitz Dios. Pero tejtzen tcyim Jesús, e cub t-xiten Dios jnintzaj xbalen. Jatzen jun techel ya ba'n kocx twitz Dios, yaa'ntzen tisen nejl. Ya ja'lewe mintzentii' maksbil kwitz tcub tu'n Dios tu'n mi'n ko ocx. ²⁰ Cytzki'na tuj cyreligiön judío te ootxa, nuk ja nintzaj pala cyxol judío oc tuj xjan cwart tujxe xbalen jaa' e ten Dios, bix nuk jun maj jaca jnabk'i. Pero tejtzen tcub rotj jxbalen tcub maksbil cywitz xjal, bixsen e pon baj twi' tu'n toxçtl tzunj nintzaj pala twitz Dios te yolel ki'j, cuma ya jatzen Jesús o pon twitz Dios tuj cyaj te yolel ki'j te junx maj. Ja tzunxin o tz'oc te kpala te junx maj, bix jaxin o jkonte be kwitz tu'n kocx twitz Dios. Jawnex bix te junx maj toclen Jesús te jawnex pala ja'lewe, tiseç te Melquisedec jun nintzaj bix te junx maj pala jatxe ootxa.

7

Cristo bix Melquisedec

¹ Jax e ten Melquisedec jun jawnex bix te junx maj pala jatxe ootxa. Bix jaxin jun techlal ti' Jesús te pala ja'lewe. Jatxe ootxa jxin Melquisedec jaxse jun xinj nintzaj cawel tuj tnóm te Salem, bix palaxin twitz Dios. Bix at jun e baj. Tejtzen tul meltz'aj Abraham cyuya ke t-ak'analin tej otk xcye Abraham tibaj jun cloj alak' cawel, bix e xi' Melquisedec te clulte Abraham tuj be. Tejtzen cymojobante cyiibxin tuya Abraham, bix e tcy'iwla Melquisedec ja

Abraham. ² Bix e xi' tk'o'n Abraham te tcotz Melquisedec jun tlajan pa' ti'j tik'ch otk tz'el tii'nxin tuj cyk'ab alak' tuj k'o'j.

Yaltzen te Melquisedec tbi, jatzen japeninaj "jiquenxix." Bix at juntl tbixin, "cawel te ttxubtxjal."

³ Bix ju'x e ten Melquisedec jun pala te junx maj mintii' t-xee' titz'jlenxin bix mintii' t-xee' tcyimlenxin, cuma mintey' tumel alcye tmanxin bix alcye ttxuin, cuma mintii' tzin tkba'n tyol Dios cyi'jxin. Bix mintii' tzin tk'umen tyol Dios tej titz'j Melquisedec bix tej tcyimxin. Ju' tzunj ja tzunxin jun techlal te Jesús, Tcwal Dios, cuma ja Tcwal Dios kpala te ja'lewe te junx maj mintii' tbajlel.

⁴ Yaltzen cyey, at juun ncuble cybisena ejee' pala cyxol tiy'jil Abraham mas jawnex twitz Jesús, kpala te ja'lewe. Pero yaa'n ju'wa. Cycye'yenczten nimssen t-xi'len Melquisedec, ja techlal te Jesús. Hasta ja kiy'jil Abraham e xi' k'onte toybil te Melquisedec, bix n-el kniy' ti'j jaj nk'inte jun toybil juntl mas jawnex twitzj nxi' k'onte. ⁵ Yaltzen cye xjal judío, ke pala cyxol ejee'j tiy'jil Leví, ke tchman Abraham. Bix tu'nj tley Moisés at cyoclen kej pala tiy'jil Leví tu'n tel cyii'n tlajan pa' cyoybil cye kej niy'tl xjal judío. Amale cyiy'jilalexix cyiib, ja ley e k'umente tu'n cykanen. ⁶ Pero jatzen te Melquisedec, amale yaa'nt tiy'jil Leví, bix e tiik' jun toybil Abraham, tij tchman Leví. Jaj lu nyee'c'an at tajwalel Melquisedec tu'n toc te pala bix tu'n tk'inte toybil jun xjal tec'ax tley Moisés.

Bix yaa'n nuk e tiik' Melquisedec toybil Abraham, bix tuyax e tcyi'wloxin ja Abraham, amale jat Abraham nimssen il ti'j tu'n tcyaj tk'o'n Dios tyol tuyaxin. ⁷ Ja lu nyee'c'an mas jawnex Melquisedec twitz Abraham, cuma jaj ncy'iwlante tibaj juntl mas jawnex twitzj ncy'iwlet.

⁸ Bix at juntl tumel tzin tyee'c'an mas jawnex Melquisedec cywitz kej pala tiy'jil Leví. Ke pala tiy'jil Leví nchi cyimke, cuma xjalke. Yaltzen te Melquisedec, mintii' tumel tcyimlen. Ja jun pala te junx maj. Bix jaj jun pala mintii' t-xee' tbajlel mas jawnex twitz kej pala nchi cyim.

Ju'tzen ja Melquisedec jun pala mas jawnex, bix jaxsen n-echlan ti' kpala Jesús te ja'lewe. ⁹ Yaa'n te Leví bix ke tcwal oc te pala mas jawnex twitz Melquisedec. Amale e cyiik'et-xin cyoybil xjal, jaj jaan ke cyexin e cyak' cyoybil te Melquisedec. Yaa'na ejee'xin e xi' k'onte, cuma mitkna'x cyitz'jxin, sino tu'n Abraham, ¹⁰ cuma tej t-xi' tk'o'n Abraham toybil te Melquisedec, icxa jaxin e yolen cyi'j cykilca tchman, cuma jaxin tiy'jil cykilca kxe'chel.

¹¹ Yaltzen cye pala tiy'jil Leví cyxol judío, ajbenke te tloc' tley Moisés. ¿Pero ajbenpake te k'ol cypemal xjal tu'n cyoc xjal tz'aklxix? Min. Cyexin cyaak'en nuk te kanlte xtalbil cyibaj xjal tuya chojbil cyil. Nuket e bint cyu'n tu'n cyoc xjal tz'aklxix bix tu'n cycy'pj xjal tuj cyil, mintetletii' il ti'j ttzaj jun wikxilt pala tisen Melquisedec, jatzen Jesús, junxilt pala yaa'n t-xe'chel Aarón, jintzaj tneel pala cyxol pala tiy'jil Leví. ¹² Ktzki'n ka o pon baj cyaak'en pala te Leví, jaj ju'x il ti'j o pon baj tley Moisés. Te ke ja'lewe, at jun wikxilt pala. ¹³⁻¹⁴ Ktzki'n tuj tley Moisés, il ti'j nuk ejeeylex ke tiy'jil Leví oc te pala. Pero te Kman Jesús, yaa'n tiy'jil Leví, cuma jat itz'ja cyxol xjal te Judá, bix at tumel min-al jun xjal tiy'jil Judá e jaw k'onte chojbil cyil xjal twi' altar tuj tja Dios. Tuj tley Moisés min-al jun xjal tiy'jil Judá oc taak'en te pala. Ju' tzunj tzinen ta' o ch'ixpet ley, cuma te Jesús yaa'n jun pala tisen Aarón. ¹⁵ Bix juntl. Mas tzinen ta' at jun ac'aj ley te ke ja'lewe, cuma o tz'oc jun wikxilt pala tisen Melquisedec. Tuj tyol Dios min nbyan at tulel jun pala tisen Aarón. Te tzin tkba'n at tulel jun pala tisen Melquisedec. ¹⁶ Bix ja tzunj pala at tulel o tzul. Jatzen Jesús. Min oc Jesús te pala tu'n tipemal jun ley nuk cyex xjal te Leví bix at tbajlel cychunk'lal, sino ocxin te pala tu'n tipemal jun chunk'lal te tex, mintii' tbajlel, tisen te Melquisedec. ¹⁷ Ju'x ttena, cuma ju' tzi Dios. Cycye'yenc juntl maj ti' toc tu'n Dios te Tcwal tuj tyol Dios: "Jay c'oquel te pala te junx maj, tisen Melquisedec," tzi Dios te Tcwal.

¹⁸ Nukettzen e bint tley Moisés ootxa tu'n ccyaj xjal jiquenxix, jaxitle k'i'n ku'n ja'lewe. ¹⁹ Pero min e bint. Ju' tzunj il ti'j cyjel ti'jxe, tu'ntzen t-xi' kii'n jun mas ba'nix, tu'ntzen kpon tz'aklxix twitz Dios. Ja tzunj lu jaj tu'n ba'n kpon twitz Dios tu'n jun nic'ul ti'j mas ba'n cywitz kej pala te ootxa.

²⁰ Jatzen nic'ul ti'j mas ba'n ja Jesús, bix jaxin mas ba'n cuma najbenxin te piador ti'j ac'aj trat, cuma ocxxin te pala tu'n tipemal tjurament Dios. ²¹ Yaltzen cyekej tiy'jil Leví, ocke te pala, pero yaa'n tu'n tipemal tjurament Dios. Bajx tkba' Dios tu'n cyoc te pala te junx maj. Nuk ti'j'c'a Jesús tzin tkba'na tyol Dios jaxix tu'n toc Jesús te pala te junx maj. Tzi tyol Dios cyjulu: "E tk'ume Dios te Tcwal tuya jun jurament yol, bix ja mlay tch'ixpetl tyolxin. Bix ja yol e tk'umexin te Tcwalxin tuya jun jurament cyjulu: 'Jay c'oquel te pala te junx maj, tisen Melquisedec,' tzi Dios te Tcwal," tzi tyol Dios.

²² Bix yaa'n nuk o'cx jun mas ba'n piador, sino tuyax jaxin o tz'oc te piador ti'j jun mas ba'n trat ki'j twitz trat te nejl.

²³ Bix juntl tumel. Ja Jesús jun pala mas ba'n yaa'n nuk ti'j e cyja' tjurament Dios, sino tuyax jaxin pala te junx maj. Nejl nimxsen cybaj pala e ten te nic'ul ti'j cyi' xjal tuya Dios. Pero bix e cyimke, bix e cyaj we' cyaak'en, bix il ti'j ocxlt cyxel. Yaa'n te junx majke. ²⁴ Pero te Jesús, mintii' tbajlelxin. Min tz'oc taak'en tuj tk'ab juntl. Min-al juntl ba'n tcyaj te t-xel. ²⁵ Ju' tzunj jaxin ba'n tco'pante ke jaxxix toclen ka ma ko'x lk'e twitz Dios nuk tu'n Jesús. Bix ka nko cubsan kwit te Dios, bix tocxsen Jesús onlte ke twitz Dios. Bix cuma te Jesús mintii' tbajlel texin, junx maj at-xin yolel ki'j twitz Dios.

²⁶ Ju' tzunj tzinenxix ti'j jatzen jun nintzaj kpala jkajbe'xix te junx maj. Jiquenxix, mintii' tilxin, bix puro sakkix, taj junxilt twitz ke'j binchal il, bix o jaxxin mas tibajxe twitz cya'j, jaa' ta' Dios. ²⁷ Te Jesús, yaa'n tisen juntl wik nintzaj pala. Ejee' tzunja il ti'j cwel cybyo'n alimaj cykil k'ij, tu'ntzen t-xi' cyoyen te Dios te chojbil il, neel ti'j cye cyil, bix tec'axtl ti'tl cye xjal cyil. Pero te Jesús, e xi' tk'o'n jun chojbil te junx maj, bix te cykil cyil xjal, jaj tej t-xi' toyen tiibxin te junx maj ti' cyil xjal twitz cruz.

²⁸ Bueno, key hermano, nejl, jtley Moisés oc tk'o'n juun xjal tu'n cyoc te pala, pero amale tocxet juun te mas nintzaj pala cyxol, mintii' cyipen tu'n tel cyxoo'n il, bix cwa ccyim. Pero ya ja'lewe, mas yaj tibajxe tley Moisés, at jun wikxilt kpala, yaa'n tu'n tley Moisés, sino tu'n tjurament Dios. Jatzen kpala jtz'aklxix bix mintii' tcyimlel, bix scyo'n tu'n Dios.

8

Jun ac'aj trat o bint tu'n Cristo mas ba'n twitzj k'anak trat

¹ Key hermano, alcey nxi' nkba'n ja tzunj lu: At jun nintzaj kpala. Jaxin mas jawnex cywitz cykil pala te ootxa. Bix nuk jac'axin jun pala il ti'j o japaxin tuj cya'j jaa' ncawen Dios tibaj cykilca, bix o cub kexin tuj tmank'ab Dios. ² Jatzen nak'anana te pala tuj mero ttxuylal tuj cya'j Dios binchalte. Yaa'ntzen nak'anana tuj nintzaj tja Dios cyxol xjal judío xjal binchalte, bix nuk techel ti'j mero ttxuylal at tuj cya'j.

³ Yaltzen cyaak'enj cykilca nintzaj pala tzalu twitz tx'otx', jatzen cyaak'enj te oylxte cotz bix chojbil il te Dios. Ju'tzen tten cyxol ke pala te twitz tx'otx', bix jax ju'x te Jesús tuj cya'j, jax il ti'j tu'n t-xi' toyen jun chojbil il cyi' xjal. Kej xin pala te twitz tx'otx', nuk nxi' cyoyen alimaj. Pero te Jesús, jaxin o txi' toyen tiibxin te junx maj.

⁴ Nukettzen tclub Jesús twitz tx'otx', yaa'ntele pala te oylxte chojbil kil, cuma tzin tkba'n tley Moisés at-x jun cloj nchi ajben te pala. Ju' tzunj min tz'ajben Jesús te pala twitz tx'otx', sino tuj cya'j.

⁵ Ootxa, jatzen Dios e cyaj tyol tu'n t'bin jun nintzaj jaa' jaa' ak'anana ke pala. E tajbexin cyoybil xjal bix tja Dios tzalu twitz tx'otx' nuk jun xlequemal tej at jawne, bix nuk jun techel ti'j jun jaxxix at tulel, jaj Kman Jesús jun mero o'cx'c'a chojbil il at pomlel twitz Dios tuj mero tlugar Dios. Kcy'e'yenc ti' toc tu'n Dios te Moisés tej tzyet t'binchante neel nintzaj tja Dios. Tzi Dios cyjulu: "K'o'nc t'u'ja ti'j tu'n t'bin tja Dios tisex e xi' nyeeec'an tey tej tjapey twi' witz," tzi Dios te Moisés. Ja lu nyeeec'an tej tcyaj tk'umen Dios te Moisés ja techel lu, nuk te jun techel ti' jun ttxuylal.

⁶ Ju' tzunj kej pala najbenke tuj tja Dios tzalu twitz tx'otx' nuk techlal tej ttxuylal at tulel. Pero yaltzen ja'lewe, ja tzunj ttxuylal at tulel o tzul, bix jax mas jawnex bix mas najben jun ttxuylal twitz techlal. Bix yaa'n nuk jaj lu, sino tuyax ti'j ac'aj trat e ninc'un Jesús tuya Dios ki'j mas ba'n twitzj trat te nejl. Mas ba'n ac'aj trat, cuma mas e bint twitzj tneel. ⁷ Tneel trat min ajben tu'n cypon xjal sakkix ti' cyil te junx maj. Nuket e bint tu'n'j tneel trat te Dios, mintle e tzaj juntl te t'cab. ⁸ Cxe'l nyeeec'ana cyey tuj tyol Dios tneel trat e cyaj cye xjal yaa'nxix tz'akl bix ju' tzunj il ti'j tu'n tul juntl ac'aj. Tuj tyol Dios tzi Dios cyjulu: "Cpomel jun k'ij oj tclub nk'o'n jun ac'aj trat cyuya xjal aj Israel bix aj Judá. ⁹ Ja tzunj ac'aj trat yaa'ntzen ju'tl tisenj e cub bint wu'na nejl cyuya kej ootxa cyxe'chel tej cyetz wii'na tuj tx'otx' te Egipto. Min e cybi tzunj trat nejl. Ju' tzunj e cyja' nk'o'nke ti'jxe. ¹⁰ Ja tzunj trat cwel nk'o'n cyuya xjal aj Israel la' alcey jun k'ij ju'tzen ctemela julu. C'oquex nk'o'n nyol tuj cyanem xjal, tu'ntzen cyocslante xjal nyol. Yaa'n tisen nejl, nuk twitz jun xak e cub bint te tz'ibbil e cyja' ntz'i'ben nyol. Bix inayen tzuna chin oquel te Cydios, bix ejee'tzen chi oquel te nxjala. ¹¹ Ojzten tel cyniy' cykil ke xjal wi'j, mintii' il ti'j tu'n toc tk'umen jun xjal cye cablt tu'n tel cyniy' wi'j, mi nuket cyeke tuya bix mi nuket cyeke te tja, cuma tuj tzunj k'ij tzul cyajbe xjal nyola yaa'n lomo'n ke xjal ti'j sino tu'n cyex cygana, tele ajnintz xjal bix tele mmak xjal. ¹² Bix cwel nnajsa'na cyil, bix mlay tzaj nna'n'tla juntl maj," tzi Dios tuj tyol Dios.

¹³ Tej tyolen Dios ti'j jun ac'aj trat, nyeeec'an ya tuj twitzxin ya k'anaktl trat te nejl. Otk tz'oc tley Moisés te k'anak, bix ktzki'n alcey n-oc k'anak, ya tu'n tex xe't, ya min tz'ajbentl.

9

¹ Yaltzen ti'j tneel trat tu'n Dios cyuya xjal at ttxo'lan ti tten tu'n cyna'n xjal Dios. Bix tu'ntzen cyna'n Dios, at jun nintzaj xjan tja Dios cyxol. ² Bix tuj nintzaj tja Dios at ca'ba cwart. Tneel cwart Xjan tbi. Bix tcab cwart maa t-xee' Masxsen Xjan tbi. Tujtzen tneel cwart at jun jawnex tucblel ten luz bix jun jawnex mes tucblel ten xjan pan. ³ Cyxoltzen jca'ba cwart at jun nintzaj xbalen ttx'u'x cyxol. Tujxe tzunj xbalen te cwart Masxsen Xjan jatztzen e tena Dios. ⁴ Ti'jxetzen xbalen tcwa' jun altar te oro te patbil incienso te Dios. Bix tujtzen cwart mas xjan tocxe jun nintzaj caxa oro ttx'otx'el. Tujxetzen caxa tcu'xa jun xara. Tujtzen xara tcu'xa jun txab jpan e tzaj ttziten Dios cye aj Israel tej cynajan tuj tzkij tx'otx'. Bix ju'x tcu'x tuj caxa tbardón Aaron j-otk tzaj xulen bix j-otk tzaj xmalacin. Bix ju'x kej ca'ba pisar te xak tcu'x tuj caxa jaa' tz'i'bena jlaaj tcawbil Dios. ⁵ Bix tcub twi' caxa at ca'ba techel jun wik querubin cybi, bix liy'pu'n cyxiicy' twi' caxa jaa' e tnajsa Dios cyil xjal. Pero ya ktzki'ntl ttxo'lan te nejl tuj tja Dios. Mintii' amle'n tu'n woc tena kbalte mastl cyey ti tten.

⁶ Kane cykilcake binne ju'wa tuj tja Dios, ocx ke pala jaca k'ij tuj xjan tneel cwart tu'n tshint cyaa'ken tuj. ⁷ Yaltzen te xjanxsen cwart tujxe xbalen, nuk ja mas nintzaj pala ocx tuj, bix nuk jun maj jaca jnabk'i, bix mlay tz'ocxxin ka mintii' tziy' k'i'n tu'nxin. Tejtzen tocxxin tuj, bix e xi' ttzitenxin tziy' te alimaj twi' caxa te chojbil jtexin til bix xsunj cye niy'tl xjal. ⁸ Cyuya ja lu, jatzen Espíritu Santo nk'onte tumel ke ka najbenx tneel cwart, cykilca xjal mintii' toquell tuj cwart xjanxsen jaa' e ten Dios. ⁹ Ja tzunj lu nk'umente katzen k'i'nx cyreligión xjal cyu'n te ootxa tu'n cypon tuya Dios, mlay chi pon. Bix ja tzunj lu tzin techla'n te ke ti nbaj ja'lewe. At-x xjal nxi' cyoyen chojbil cyil te Dios, bix at-x xjal tzin cynimanx cycostumbre n-el cytxjo'n cyk'ab te jun cynimil tuj cyley, pero min tz'ajben te tx'ajbil tuj cyanem. ¹⁰ cuma ka ntxjon jun xjal ti'j tisenj tten tu'n, nuk ti' t-xumlaxin n-el ttxjo'nxin, yaa'n tuj tanemxin. Max cyaj tanemxin tisex tten. Ju'x te cykil oybil, waabjle, c'a'pjle, bix cykiltl costumbre at, nuk techlal. Mintii' n-oc tbinchen ti' cyanem xjal. Ajben nuk te techel joo'ctzen n-ul mero jaxxix.

¹¹ Bix o tzul jaxxix. O tzul jun ac'aj ti tten tu'n ktxjet, jaj jxin Scy'o'n tu'n Dios. Bix ja tzunxin te nintzaj pala ti'j tbanel at tulel. Cxe'l nk'umena cyey ti'j ac'aj o tzul tu'n ktxjet te junx maj. Tisenj nintzaj pala cyxol judío iy' ajx tuj tneel cwart tuj tja Dios tu'n tocpan maa t-xee' jaa' e ten Dios, ju'xsente Jesús nuk iy' ajx cykilca bix o pon tuya Dios, pero yaa'n tuj jun lugar te twitz tx'otx' tbinche xjal, sino tuj jun mas jawnex lugar. ¹² Bix yaa'n ocpanxin twitz Dios tuya tziy' te chiva bix te wacx nee' tisenj cye nintzaj pala n-ocpan cyu'n, sino tuya texte ttzq'uel. Bix yaa'n ch'ima maj ocxin tuya Dios, tisen kej te twitz tx'otx', sino nuk jun maj, tu'ntzen tlok'ontexin ejo' tuj tk'ab il te junx maj. ¹³ Nejl, tej toc tztzet ttzq'uel chiva bix ttzq'uel toro cyi'j xjal, ajben tu'n tchewset cyil xjal, pero nuk te techel. Bix tej toc tztzet cyi'j xjal ttza'l nee' wacx otk baj patet twi' xjan altar, ajben te tx'ajbil ttz'ilel jun xjal tej toc tmoco'n jun anem, pero nuk te techel. ¹⁴ Katzen ajben cytzq'uel alimaj cye xjal nejl te tx'ajbil cye xjal, yaltzen ja'lewe mas jawnex tipemal ttzq'uel Jscy'o'n tu'n Dios te tx'ajbil ke. Mas tipemal ttzq'uel Jesús te chojbil il, cuma e xi' tk'o'nxin te Dios jun tchunk'laxin te junx maj, bix cuma mintii' tilxin. Jatzen ttzq'uel Jesús ntxjonte knaabl tu'n jiquen ta' knaabl, bix tu'ntzen kajben te Dios i'tzix twitz tej kajben tuj ley ootxa ya cyimnen ta'.

¹⁵ Tu'ntzen tcyimlen Jesús, o chjeten niy' tik'ch cyil xjal e baj bint tuj tcwent tneel trat te Dios ootxa, bix tu'n tcyimlenxin otzen cyaj jun cyoclen tu'n cyiik'ente chunk'lal te junx maj tetzen cyej xjal tzin cybi'n ntxcon Dios cyi'j tuj ac'aj trat te Dios.

¹⁶ Pero at junlt tajbel tcyimlen Jesús. Tu'ntzen at tipen j-ac'aj trat tuya Dios cyi' xjal, ilxix ti'j tu'n toc tziy' ti'j. Ixca tzunj cyxol xjal. Ojtzten tcyim jun xjal, ke tcwal ck'ilte cykab tuya jun tu'l tyol cyman. ¹⁷ Pero at tumel kuya mlay k'oj naj cye ka i'tzx cyman. Ojxe tcyim cyman, bixsen tcyjel cye tcwal. N-eltzen kniy' ti'j tu'n at tipen jun tu'l yol ti'j tkab, il ti'j ojxe tcyim binchal jtu'l yol. Ka mixe jun cyim, mintii' cykab tcwal. Ju'xsen tten tuya ac'aj trat tuya Dios cyi' xjal. Pero nuk tcyimlen Jesús ba'n el twitz Dios. Nuket min e cyim Jesús, mintetletii' tipen j-ac'aj trat Dios ki'j, tu'ntzen kiik'ente jun kkab tu'n Dios. ¹⁸ Ja lu nyee' an ke katzen mintii' tziy', mintii' chewsbil il, bix mintii' tipen jun trat. Ju' tzunj, tu'n tcyaj bint tneel trat te Dios ootxa, oc tk'o'n Moisés tziy' ti'j. Il ti'j e cyim jun alimaj te k'ol tipemal tneel trat nejl. ¹⁹ Cyna'ntztzen tej tk'umente Moisés cykil tley Dios cye xjal, e tzaj tii'nxin jun tzbil hisopo tbi tuya jun ttx'aka xbalen tlant carnal cyak tilbil, bix e cu'x tmu'nxin tuj ttzq'uel wacx bix ttzq'uel chiva smo'n tuya a', bixsen oc ttzitenxin ti'j jaa' tz'i'benc tley Dios twitz xak, bix ju'x oc ttzitenxin tziy' cyi' xjal, ²⁰ bix e xi' tkba'nxin cye xjal: "Ja tzunj tziy' lu ncyaj k'onte ba'n jtrat te Dios o cyaj cyuyey tu'n t-xi' cynimana," tzi Moisés cye kxe'chel tej tcyaj tneel trat te Dios cyuya xjal. ²¹ Ju'x ti'j nintzaj tja Dios, oc ttziten Moisés jtziy' ti' tja Dios tuyax cykilca macbil najben tuj tja Dios cye pala tu'n cyniman Dios.

Nuk tu'n tcyamecy Cristo n-el kil

²² N-eltzen kniy' ti'j tu'nj ley te ootxa ilxix ti'j tu'n toc tziy' ti'j cykilcaj najben cye xjal tu'n cyna'n Dios, tetzen techel tu'ntzen sakxix twitz Dios. Tuj tley Moisés, ka mintii' tziy' oc ti'j cykilca, min e tocsla Dios. Bix ka mintii' tziy' te chojbil il, min e cub najset il. ²³ Jatzzen tumel jniy' kej tik'ch ajben te cynaabl Dios il ti'j tu'n cytxjet twitz Dios tuya tziy'. Pero ja lu nuk te techel ti'j ti tten tuj cya'j tu'n kna'n Dios. Bix cykilj at tuj cya'j il ti'j tu'n tttxjet tuya jun wik chojbil mas ba'n twitz kej chojbil ajbenke te twitz tx'otx'. ²⁴ Bix ja tzunj chojbil mas ba'n jatzzen Jesús. Cuma Jscy'o'n tu'n Dios min ocx texin tuj jun xjan jaa' bincha'n nuk cyu'n xjal, bix nuk jun techel tej jaxxix xjan jaa' at, sino ju' o tz'ocx texin tuj cya'j. Jatzzen ta'xin twitz Dios te kanl xtalbil ki'j. ²⁵ Cyxol judío tuj tley Moisés, texe juun jnabk'i tz'oc jtneel pala tuj Masxsen Xjan cwart jaa' e tema Dios, tu'ntzen t-xi' toyen tziy'. Yal te Jesús, yaa'n texe juun jnabk'i n-ocx twitz Dios, cuma junx maj o tz'ocx. Bix yaa'n texin tisenj cyej nintzaj pala e xi' cyoyen tziy' nuk te alimaj, sino tex ttzq'uel. ²⁶ Nukettzen il ti'j texe juun jnabk'i cxe'l toyenxin ttzq'uelxin te Dios, jaxittzele il ti'j tu'n tcyimxin jaca jnabk'i jatxe títz'jlen twitz tx'otx'. ¡Pero min! O pon baj twi' jtyem bix jley te ootxa, bix ma tzul jun ac'aj tyem. Ja'lewe o tiik' Dios jun toybil te ttzq'uel Tcwal junx maj bix te junx maj te chojbil cykil il.

²⁷ Ju'tzen e cyma' Jesús jun maj. Bix jax ju'x jaca juun xjal il ti'j tu'n tcyim jun maj oj tpon tumel. Tetzen yaj, iltzen ti'j tu'n cyoc tuj cye'ybil tu'n Dios. ²⁸ Pero te Jesús, min tz'oclt texin tuj cye'ybil, cuma ox tchojxin tuj castiwa tu'n Dios tu'n kil. Tneel maj tej tul Jesús, te chjolte cyil xjal. Pero oj tulxin juntl maj, yaa'n te chjolte cyil xjal, sino te clolte cyej xjal nchi ayon ti'jxin tuya cykil cye'u'j.

10

¹ Ju' tzunj tzinen ta' tley Moisés mlay chi cyaj xjal jiquenxix tu'n. Cyej xjal n-oc ke cyc'u'j ti'j tley Moisés tu'n cyoc lk'e ti' Dios, mlay, cuma nuk o'cx jun techel. Tisen oj taj jun xjal tzyet t-xlequemal jun xjal twitz tu'n nxix ttzyet jac'a xjal. Tley Moisés te ootxa nuk o'cx jun xlequemal ti'j co'pbil at tulel mas yajxe tu'n Jesús. Jchojbil il nxi' tk'o'n tley Moisés, il ti'j tu'n t-xi' oyet jaca jnabk'i. Ju' tzunj mlay cyaj jiquen te junx maj cyej xjal n-oc ke cyc'u'j ti' jun chojbil cyil nuk te juun jnabk'i. ² Nukettzen e bint tu'nj chojbil cyil ttzq'uel alimaj tu'n ccyaj sakxix bix jiquenxix cynaabl xjal te junx maj, ya minttzele e chjet te juntl maj, cuma mintii' il ti'j. Bix nukettzen e cyaj ke xjal jiquenxix, minttzele na'n tu'n cye'u'j at-x cyil. ³ Pero min e bint tu'n ccyaj xjal jiquenxix. Jaj e bint tu'nj ley nuk tu'n tul tuj cyc'u'j xjal jaca jnabk'i cykil cyil. ⁴ Cuma mintii' tipemal ttzq'uel toro bix ttzq'uel chiva tu'n tel il tu'n, ⁵ ju' tzunj, tej ch'itk tul Tcwal Dios twitz tx'otx', e xi' tkba'nxin te Dios: "Tcy'iy twabl bix oybil cytzq'uel alimaj te chojbil il. Ju' tzunj o tbinchay jun xumlabaj te weya tu'n tclub te chojbil il te junx maj. ⁶ Min ncub tuj twitza ke alimaj paten tz'eynakke te chojbil cyil xjal. ⁷ Ju' tzunj nxi' nkba'n tey: Taat, lu kenwe lu tu'n t'bin wu'n ti taja, tu'ntzen t'bin cykil tyola wi'j tuj tyola," tzi Tcwal Dios te Dios.

⁸ Key hermano judío, k'o'nc cye'u'ja ti'j yol e xi' tkba'n Tcwal Dios te Dios. E xi' tkba'nxin tcy'i Dios twabl il te alimaj, bix yaa'n ba'n oybil te alimaj tuj twitz, bix tcy'i tz'eynak twi' altar te k'ilbil il, amale tleyet Dios otk tkba tu'n t'bin cykilj lu cyu'n xjal. ¿Tu'n tiken tzi Tcwal Dios yaa'n ba'n jlu tuj twitz Dios? ⁹ At tzak'beblte tej t-xi' tkba'n julu: "Taata, lu kenwe lu tu'n t'bin wu'n ti taja," tzi Tcwal Dios. Tzinen ta' n-el tii'nxin jchojbil il te alimaj tu'ntzen tocj juntl chojbil il, jaj texin. ¹⁰ Ja tzunja taj Dios. Taj Dios tu'n koc te texin, bix ja lu nuk tu'n t-xi'len tk'on tiib Tcwalxin tuj cyamecy te chojbil kil te junx maj.

¹¹ Bix juntl tumel. Cxe'l nk'umena ch'in ti'j te junx maj. Cykil kej pala cyxol judío wa'lecxke twitz altar te oylecxte chojbil cyil xjal jaca k'ij, amale mintii' n-oca tu'n tel cyil xjal. Wa'lecxke, cuma min pon baj twi' cyaak'en te oylte chojbil il. ¹² Yaltzen tej Scy'o'n tu'n Dios, jun maj bix te junx maj e xi' toyen tiib te chojbil il, bix e cub ke tuj t'bank'ab Dios. Wa'lecx ke pala, pero te Jesús, k'uklte. K'ukltexin, cuma o pon baj twi' taak'inxin te oylte chojbil il. ¹³ Lu ate nayonxin ojxe tcamanxin cyi' kej iic'l texin, tu'ntzen ccyaj tjak' tkenxin. ¹⁴ Ju'xsen Jesús, tu'n nuk jun oybil bix te junx maj, o ko cyja' ba'n twitz Dios, bix ju'x cykil kej xjal cyk'on cyiib tuya Dios.

¹⁵ N-eltzen kniy' ti'j jaxxix ja yol lu cuma nk'ontzen Espiritu Santo tipemal tuya tyol. E xi' tkba'n Dios tuj tyolxin tu'n Espiritu Santo cyjulu: ¹⁶ "Cwel nk'o'n jun trat cyi' xjal la' alcyce jun k'ij, bix ju'tzen nse'ya. C'oquex nk'o'na nleya tuj cyanem, bix c'oquex ntz'i'bena ti waja tuj cynaabl," tzi Dios. ¹⁷ Bix juntl e xi' tkba'n Dios: "Mlay tzaj nna'na cyil xjal bix yaa'n ba'n o cybincha," tzi Dios. ¹⁸ Ju'wa, cuma o cub najset kil te junx maj, mintii' tl il ti'j tu'n t-xi' oyet mastl chojbil kil. O bint.

¹⁹ Ju'tzen ttena, key hermano, nuk tu'n ttzq'uel Jesús at tu'n koc twitz Dios tuj xjan lugar jaa' ta' texin at koquel ja'lewe tuya Dios. Ju' tzunj c'oquelix ke kc'u'j tu'n kocx. ²⁰ Te nejl, e jaw jun nintzaj xbalen cywitz xjal tu'n mi'n chi ocx jaa' e tema Dios. Pero tu'nj tcyimlen Jesús, o cub rotj jmaksbil be twitz Dios te junx maj. Ya ba'n kpon tuj lugar jaa' ta' Dios, cuma

o jket jun ac'aj kbe, bix jatzen Jesús kbe. ²⁴ Bix jaxin nintzaj pala twitz Dios cyi' cykil t-xjal Dios.

²² Ju' tzunj, key hermano, cuma ba'n kocx tuya Dios bix cuma at kpala twitz Dios, ko lk'ex twitz Dios tuya cykil kc'u'j bix k'uklxix kc'u'j ti' Dios, bix mi'n tzaj kna'n kil, cuma o ko txjet ti' kil tu'n Jesús tisenj kxumlal nttxjet tuya tz'il tu'n a' sakkix. ²³ Kk'a'c kipen tu'n ktenx tuj kocslabl, bix tu'n mi'n cub ki'j tu'n kaj meltz'ajtl tuj kreligión te ootxa. Ki'x kocslabl o ko clet te junx maj. C'oquel ke kc'u'j ti'j Dios, cuma mlay tz'exxin tibaj tyolxin. ²⁴ Bix cwel kbisen ti'j ti tten tu'n kcyiwsante kiib kxol tu'n c'oquel k'ak'en kc'u'j te kuya bix tu'n kbinchante ba'n.

Jawnexsen jun ttzi ka ma ko cub tz'ak tuj tk'ab Dios I'tz

²⁵ Mi'n cyaj cycolena tu'n mi'n cub cyjunen cyiiba bix tu'n mi'n cyk'olbe cyiiba, tisen juuntl cyxola cycy'i cub cyjunen cyiib cyuya ocslal. Il ti'j tu'n tcub cyjunen cyiiba tu'n tbaj cyonen cyiiba tuj cyocslabla, bix ilxsen ti'j tu'n tbaj cyonen cyiiba mas ja'lewe twitz nejl, cuma tzajnen tzaj lk'e jk'ij oj tul meltz'aj Jesús te k'ol castiwa cyibaj kej xjal cycy'i Tcwal Dios. ²⁶ Katzen ncyaj kcyey'en manc'bil chojbil kil, ya mintentii'tl. Amale otket kocslaj jaxxix, yaj chojbil il tu'n Jesús ya mintii'tl ba'n tajbe'na ke, cuma jkil tzin kbincha'n, jaj n-el kxoo'n chjol kil, ja Jesús. ²⁷ Ka n-el kxoo'nte, o'cxsen kyo' jun cawbil jawnex bix tuj ilxsen tu'n Dios, bix tu'n kpon tuj jun k'ak' njulen jaa' chi pomela kej xjal iic'belte Dios. ²⁸ Jax tzul jun jawnex castiwa cuma cye'nja ti e baj cye xjal e ten tuj tley Moisés. Tej tel t-xoo'n jun xjal jtley, bix ka at ca'ba oxet tsiwa ti'j, junxse maj bi'x cwel byet mintii' lastim te xjal. ²⁹ Katzen at nim castiwa ti'j jun xjal el t-xoo'n nuk jaj tley Moisés, yaj tzunj xjal n-el t-xoo'n Tcwal Dios, mas jawnex til xjal ti'j, bix mas jawnex tcastiwa. Ju'tzen nbya'na jtuj k'ak'. Tcyimlen Jesús jatzen jtk'uklel j-ac'aj trat tuya Dios ki'j tu'n koc te t-xjalxin. Oj tel tiq'uen jun xjal colbil te tu'n tcyimlen Tcwal Dios bix c'aal meltz'aj tu'n toc ke tc'u'j ti' t'z'q'uel alimaj tu'n ttxjet til, ka'xsen, cuma ncub twa'ben jxjal Tcwal Dios, bix njaw ti' Espiritu Santo. ³⁰ Ju' tzunj at castiwa tu'n Dios. Ktzki'n jax Dios nk'umente tuj tyolxin: "Inayena k'olte castiwa. Bix la' alcyey jun k'ij cxe'l nk'o'na cycastlewa jaca juun ka' xjal ti' til," tzi Dios. Bix tuj juuntl tyol Dios tzi cyjulu: "Ja Dios c'oquel cye'nte ke t-xjal alcyey ba'n bix alcyey ka'," tzi tyol Dios. ³¹ Key hermano, ¡cyc'ojlanx cyiiba! Jawnexsen jun ttzi ka ma chi cub tz'aka tuj tk'ab Dios I'tz oj tul meltz'aj.

³² Ju' tzunj mi'n cub cybisena ti'j tu'n tcyaj cyk'o'na cyocslabla ti' Tcwal Dios, sino c'ulelxix tuj cye'u'ja tej cyoca te ocslal. Tuj tzunj k'ij nejl iy'x cyu'na nim q'uixc'aj nuk tu'n cyocslabla ti' Tcwal Dios. ³³ Te nejl, at juun xjal cyxola oc ílet bix oc yaset cywitz nim xjal nuk tu'n min el cyxoo'na cyocslabla ti' Tcwal Dios, bix iy'x cyu'na. Bix e xi' cyonena kej iy'x q'uixc'aj cyu'na. ³⁴ E xi' cyk'o'na jun tk'ak'bil cye'u'ja cyi' ocslal otk chi oc tuj tze' tu'n tlaj cyocslabl. Bix min e baj cye'u'ja tej tel cyii'n xjal niy' tik'ch cyey tu'n tlaj cyocslabla. Bix e xi' cyk'o'na tujxix tumel, cuma el cyni'ya ti'j at jun mas ba'n tuya Dios tuj cya'j bix te junx maj twitz n-el alk'et cyi'ja nuk te cab k'ij. ³⁵ Cykilj lu iy'x cyu'na nejl tu'n tlaj cyocslabla ti' Tcwal Dios. ¿Tu'n tiken cyaja t-xi' cytzakpi'n ja'lewe? ¡Min! Mi'n txi' cytzakpi'na cyocslabla, cuma nuk tu'n cyocslabla ccyiik'ela jun cychotza o cyaj tkba'n Dios. ³⁶ Il ti'j tu'n tiy'x ku'n tu'n tbint ku'n ti taj Dios, jaj tu'n mi'n ko aj meltz'aj, tu'ntzen kcaman kcotz e cyaj tkba'n Dios. ³⁷ Cycyeyenc ti toc tu'n Dios tuj tyolxin: "Jxjal Scy'o'n wu'na o k'umj tu'n tul, tzul. Mlay we'. Tzul. ³⁸ Bix tej xjal jiquen nwitza, jatzen junx maj n-oc ke tc'u'j ti'j Nscy'o'n, bix ccaman tchun'lal te junx maj. Pero ka ma cyaj tcolen tocslabl, ya mintii' waj te," tzi Dios tuj tyol. ³⁹ Jatzen ke, nuket yaa'n ejoo' cyjel kcolen kocslabl, tu'n kxi' tuj il, sino nuket ejoo' tisen kej k'i'nix cyu'na tu'ntzen toc ke cye'u'j ti' Dios, tu'ntzen cyclet.

11

C'oquelxix ke kc'u'j ti' Dios

¹ ¿Titzen ttenj tu'n toc ke kc'u'j ti' Dios? C'oquel ke kc'u'j ti' Dios jatzen nko ayonj, min baj kc'u'j ti'j, cykilj o cyaj tkba'n Dios. Amale mint kil, pero kocsla' alcyey e cyaj tkba'n Dios, cuma tuj kwitz, jaxxix. ²⁻³ Icxax tzunj min e kil tej tbint twitz tx'otx' tu'n Dios, pero kocsla' ja Dios binchalte. O bint twitz tx'otx' bix twitz cya'j nuk tu'n tyolxin, bix nuktzen tu'n kocslabl ti' tyolxin n-e'la kniy' ti'j jaxin binchalte.

Ke kxe'chel te ootxa, tu'n k'ukdec cye'u'jxin ti' tyol Dios ba'n e'lakexin tuj twitz Dios. Cyjel nk'o'na tumel cyey ti tten cyocslabl juun ktzan kxe'chel nejl. ⁴ Tisen tzunj te Abel. Tu'n tocslabl Abel e xi' tk'o'nxin toybilxin te alimaj te Dios, bix mas e tzalaj Dios ti'j twitz toybil Cain nuk te awal. Tu'ntzen tocslablxin ti' Dios, jiquen e'laxin tuj twitz Dios, bix e tiik' Dios toybilxin. Bix amale otet cyimxin, tzinx tkba'nxin te ke ja'lewe nuk o'cx taj Dios tziy' te chojbil il.

⁵ Bix juntl tumel te Enoc. Tu'n toclabl Enoc ti' Dios, ba'n e'laxin tuj twitz Dios, bix aj tii'n Dios jaxin tuj cya'j. Min e cyimxin. I'tzxin tej tjaw tii'n Dios jaxin tuj cya'j, bix min-altl o tz'oc cye'yente texin.

⁶ Katzen min s-oc ke kc'u'j ti' Dios, min tzalajxin ki'j. Ka taj jun xjal tu'n tpon lk'e twitz Dios, il ti'j toclabl at Dios, bix tzul ttzak'be'ntexin oj tjyonen ti'jxin.

⁷ Ju'x te Noé jun tumel ja jun xjal oc ke tc'u'jxin ti' Dios. E tkba Dios te Noé tu'n tjaw tz'iy a' twitz tx'otx' te xitbelte twitz tx'otx'. Amale bajxit tla'xin jun tponlel a' titz'jlenxin, pero tu'n tyol Dios otk cyaj tuyaxin e toclaxin at tjawlel tz'iy a', bix e jaw tbincha'nxin jun barc tu'n tclet-xin bix cyuya ke te tjaxin tibaj a'. Yaltzen niy' ke xjal, min e cyocsla tyol Dios tu'n cyclet. Tejtzen tbaj xitj twitz tx'otx' tu'n a', bix e cyim ke xjal tuj a', jatzen e chic'ajaxe otk tzep tej xjal tu'n min e cyocsla tyol Dios. Pero te Noé, tu'n oc ke tc'u'jxin ti' Dios, jaxin e cyaj itz'j. Bix tu'n tzunj toclablxin ti' tyol Dios jiquen e'laxin tuj twitz Dios.

⁸ Ju'x te Abraham. E tzaj ttxco'n Dios jaxin tu'n tecxin tuj ttanemxin, pero mintii' tumel tuyaxin jaa' tu'n tponaxin. Bix cuma oc ke tc'u'jxin ti' Dios, bix e tcuyaxin tu'n tponxin tuj jun nakch tnom, bix e cyaj tk'o'n Dios jtnom texin te tcotzxin. Amale mint e tiik' najxin, oc ke tc'u'jxin ka tu'n tajben cye tchmanxin la' alcy e jun k'ij. ⁹ Cyiw ch'in tu'n tnajanxin tuj ac'aj tx'otx', pero tu'n oc ke tc'u'jxin ti' Dios, e cyajxin. E tnimsa tc'u'jxin tu'n tnajanxin tuj jun wikxiti tnom t-xol jun wikxiti xjal. Nuk e najaxin tuj juun tjaxin nuk tal ttz'umel jil e jaw tibajxin nuk te oybil ch'in. Ju'x e baj tuya tctalxin, Isaac, bix tuya tctal Isaac, Jacob, cuma j-otk cyaj tkba'n Dios tuyax te cye tctalxin. Ju'tzen e temaxin tuj ac'aj ttx'otx'xin tisen jun te nakch xjal. ¹⁰ E tcuyaxin tu'n tnajanxin nuk jak'ch tzalu twitz tx'otx' nuk te oybil ch'in, cuma otk tz'el tniy'xin ti'j tu'n tponxin tuj jun tnajbilxin binne tu'n Dios, bix te junx maj. N-eltzen kniy' ti'j, amatzele e tiik'et-xin tx'otx' te Canaán te tcotzxin tu'n toc ke tc'u'jxin ti' Dios, pero mas e xi' tc'u'jxin ti'j jun tnajbilxin te junx maj.

¹¹ Ju'x oc ke tc'u'j Abraham ti' Dios tu'n tzaj tk'o'n Dios jun tctalxin. Amale ya ni' tijtlxuj t-xu'lxin Sara tbixuj bix bajx tzaa' jun talxuj, bix ju'x te Abraham ni' tijtlxin, e tiik' tzunxin tipemalxin te Dios tu'n toc jlet jun tctalxin, tu'n oc ke tc'u'jxin ti' Dios. ¹² Amale mintii't tu'n ttzaj jun tctalxin cuma ni' tijtlxin, pero e tzaj, bix ti'tjzen tchmanxin ma tz'iy cyabajxin ya nimitl cyabajxin ja'lewe mintetpe binner tajlaj, tisentzen arena tzii' mar mlay bint tajlaj, bix tisentzen che'w twitz cya'j mlay bint tajlaj.

¹³ Ejee' tzunkej xjal lu, Abraham, bix Isaac, bix Jacob, e ten jun cychunk'lal tuya nim cyocslabl ti' Dios, bix e cyimke. Pero tej cynajanxin, ¿e cyiik'pa alcy otk cyaj tkba'n Dios cyexin, ka tu'n tcyaj tk'o'n Dios tx'otx' te Canaán cyexin? Min. Pero e cyocslaxin la' alcy e jun k'ij at tcyajlel tk'o'n Dios. Ju'tzen e chic'ajaxexin at cyocslablxin ti' tyol Dios.

Tejtzen cynajanxin tuj Canaán, bix e cykbaxin nuk jun beten xjalkekin bix jun wikxiti xjalkekin. ¹⁴ Cuma e cykbaxin nuk jun beten xjalkekin, jaxsen jun tumel te ke tuj cywitzxin yaa'n Canaán jun manc'bil cylugarxin, sino e xi' cyc'u'jxin ti'j juntl cylugarxin te manc'bil cynajbilxin. ¹⁵ Bix jax min e cub cybisenxin tu'n cymeltz'ajxin tuj tx'otx' te Mesopotamia, jaa' itz'ja Abraham. Bixetten e cub cybisenxin ju'wa, ba'ntettzenle e'la e ponkxin jaa' otk tz'itz'ja Abraham. ¹⁶ Pero min. Jaj e cub cybisen cyexin ja jun manc'bil cynajbilxin mas ba'n, yaa'n jun tx'otx' tzalu twitz tx'otx'. Cuma e cub cybisenxin ju'wa, min el tiq'uen Dios tu'n toc te Cydiosxin, sino e tcuya Dios tu'n cyponxin tuya, bix e tbincha Dios jun cytanemxin jawnex te cyexin.

¹⁷ Bix juntl maj e xi' tyeec'an Abraham toclabl te Dios. Jatzen toc xinj tuj niy'bebl tu'n Dios. Bix e tzaj tkba'n Dios texin tu'n t-xi' tk'o'nxin o'cxc'a junx tctalxin Isaac te oybil te Dios, tu'n tchic'ajax ka at tu'n tnimantexin tyol Dios hasta tejxe tbiint jlu. Bix e xi' tk'o'nxin tctalxin. ¹⁸ Amatzele otket tz'el tniy'xin ti'j tu'n ttz'iy tiy'jilxin nuk tu'n Isaac, bix cux e tcuyaxin. ¹⁹ Oc ke tc'u'jxin ka e xi' toyenxin tctalxin, tu'n tipemal Dios at tjawlel itz'j tctalxin tuj cyamecy. Amatzele mint e cyim Isaac, tuj twitz Abraham tisex otk cyim, bix tej min e cyim Isaac, tuj twitz Abraham tisex otk jaw itz'j tuj cyamecy. Elxin ba'n tuj niy'beblte tu'n Dios cuma oc ke tc'u'jxin ti' tipemal Dios bix e tbinxin tyol.

²⁰ Ju'x te Isaac oc ke tc'u'j ti' Dios. Tu'n oc ke tc'u'jxin ti' Dios, e xi' tkba'nxin te tctalxin Jacob bix te tctalxin Esaú ti'j otk cyaj tkba'n Dios texin bix ti pjel la' alcy e jun k'ij.

²¹ Ju'x te Jacob oc ke tc'u'j ti' Dios. Tu'n oc ke tc'u'jxin ti' Dios el tniy'xin ti'j ti at tbajlel mas yaj cye tchmanxin, bix tej ch'itk tcyimxin e xi' tk'umenxin ti at tbajlel te cyca'bel tcy'aal tctalxin José. Bix jun maj tej tpon José tuyaxin, tu'n tijlel e cub tk'o'nxin tibaj twitzxin twi' thardónxin, bix tu'n toclablxin e xi' tk'o'nxin chjonte te Dios, cuma tztzki'ntlxin at tajlel meltz'aj tbalkekin maan tuj jtx'otx' otk cyaj tkba'n Dios te tiy'jilxin Abraham.

²² Ju'x te José oc ke tc'u'j ti' Dios. Tej mintkna'x tcyimxin, e xi' tkba'nxin cye ke xjal te ttanemxin tu'ntzen taj meltz'aj tbalkekin tuj Canaán, cuma oc ke tc'u'jxin ti' tyol Dios la' alcy e jun k'ij tu'n cyex xjal aj Israel tuj Egipito tu'n cypon tuj Canaán.

²³ Ju'x cye tman Moisés oc ke cyc'u'j ti' Dios. Tu'n oc ke cyc'u'jxin ti' Dios e cybixin tyol Dios mas twitzj tyol gobierno te Egipto. E tkba gobierno tu'n cybaj byet cykilca ke nee' xinak itz'j cyxol aj Israel tuj Egipto. Ju' tzunj, tej titz'j Moisés, bix xinak tzunxin, bix ni' cyeca xsunxin tej ttzaj itz'jxin, bixse el ewet-xin oxe xjaw cyu'n tmanxin.

²⁴ Ju'xsen te Moisés tej ttz'ixin oc ke tc'u'jxin ti' Dios. Tej tpon tumel tu'n t-xi' t'bisenzin ti'j jaa' c'aalaxin tuj twitzxin, bix aj tk'on tiibxin cyuya ke t-xjalxin te Israel. Tcy'ixin oc tk'on tiibxin cyuya xjal te Egipto. Ju' tzunj tcy'ixin ocxin te tal tmeel cawel tuj Egipto. ²⁵ Cuma el tniy'xin ti'j mas at tu'n tcamanxin tej tiy'x q'uixc'aj tu'nxin cyuyake te ttanemxin twitzj tu'n t'cub ttziybe'nxin il tuj Egipto, ju'tzen e tajbexin tu'n toc tk'on tiibxin cyuya ke t-xjal Dios. El tniy'xin ti'j nuk te jun rato tz'ajbenxixtl il. ²⁶ Tisej tej Scy'o'n tu'n Dios la' alcye jun k'ij at tiy'lel tak' q'uixc'aj tu'nxin nuk tu'n t-xi'xin tuj jiquen, jax ju'x tuj twitz Moisés mas k'inemal tu'n tiy'x tak' q'uixc'aj tu'nxin nuk tu'n t-xi'xin tuj jiquen twitzj tu'n tiik'entexin cykil k'inemal tuj Egipto, cuma e xi' twitzxin ti'j alcyej tk'a' Dios texin la' alcye jun k'ij. ²⁷ Tu'n oc ke tc'u'jxin ti' Dios etzxin tuj Egipto. Amale e tajbet cawel tibaj Egipto tu'n t'we'xin cyuya ke ttanemxin tuj Egipto, min e cub ttzi tk'oj cawel ti'jxin, sino oc tipenxin, cuma ttzki'nxin at Dios tuyaxin, amale mint chic'aj Dios.

²⁸ Ju'x oc ke tc'u'jxin ti' tyol Dios tej ttzaj tk'umen Dios texin at tu'n t'cub t'byo'n Dios cykilca ke tneel cyy'aal cyxol xjal te Egipto. Ju' tzunj e tkbaxin cye xjal aj Israel tu'n toc cysuu'n ttz'q'uel carnal ttzii' cyja, cuma ja Dios otk k'umente texin ejee' xinak tneel xinak tocx cyxol t'cwal jun xjal at cybyetel tu'n tsanjel Dios at ttzajlel tuj cya'j te byolcye ka mintii' tziy' ttzii' cyja. Tu'ntzen t'bin tu'nxin ju'wa, ju'tzen i'ya tiy'sa'nxin tneel nink'ij te Pascua.

²⁹ Ju'x oc ke cyc'u'j ti' Dios kej xjal aj Israel. Tej cyex jxin kxe'chel tuj Egipto, e ponke ttzii' Cyak Mar. Dios aj pa'nte mar, tu'n cyiy'x xjal tuj be tzkij, bix iy'xke, cuma oc ke cyc'u'jxin at tu'n ttzyunte Dios a' tu'n tcyaj be t-xol. Jatzen ke aj Egipto bix e xi' lpeke te tzyulcye xjal Israel, pero n-ajtz t'juptz'intl Dios a' cyibaj, bix nchi jaw jik'bantl. ³⁰ Bix mas yaj, tej cypon aj Israel tuj Canaán tu'n c'ycyxe cyibaj ke ka' xjal tisen otk tkba Dios cyexin, tu'n oc ke cyc'u'jxin e cybi j-e tkba Dios, jaj tu'n cyoc tenxin sutel wuuk k'ij ti'j tapya toc ti'j entera tnom te Jericó tuj Canaán. Tetzen twuukan k'ij bix a'c tyuch'en Dios jt'apya toc ti' t'nom, tu'ntzen cyocxxin tuj Jericó te byolcye cykil aj t'nom.

³¹ Tejtzen t'cub xitj t'nom te Jericó, nuk jac'a xuj Rahab e cyaj itz'j cyuyax ke te tjaxuj. Jatzen jun xuj mero aj paj nejl, pero tu'ntzen oc ke tc'u'jxuj ti' tyol Dios e cyaj i'tz'xuj, cuma e tocslaxuj at tu'n t-xitj ttanemxuj tu'n Dios. Ju' tzunj, te mitkna'x tocx xuchj tapya ti' Jericó, ya min oc tk'on tiibxuj cyuya ke ka' xjal aj Jericó, sino ju' oc tk'on tiibxuj cyuya ke xjal ba'n te Israel, bix e cub tewenxuj tuj tjaxuj cab ox xjal te Israel otk x-aj cye'yel tuj ewelj ti' nbaj tuj Jericó, tu'ntzen mi'n chi cubxin cyu'n aj Jericó, bix tu'ntzen cypon meltz'ajkexin cyuya ke cyuyaxin te byolcye Jericó mas yaj.

³² Bueno, cykilca tzunkej xjal lu e yeec'anke oc ke cyc'u'j ti' Dios tej cynimante ti otk tkba Dios. Pero at mastl xjal oc ke cyc'u'j ti' Dios, ¿pero jaa'le ko oca te k'umlte cykil e baj cye xjal ootxa? Mlayle ko xcyxe kk'umente jun k'ij ti e baj te Gedeón, te Barac, te Sansón, te Jeffe, te David, te Samuel, bix ke tx'olbal tyol Dios. ³³ Kej xjal lu bix cabtl xjal, tu'n cyocslabl, tec'alex taak'en juun bix e xcyeye cyibaj ke t'nom, bix at juun e cawenke ba'n, bix at juuntl e cyc'am kej otk cyaj tkba'n Dios, bix at juuntl oc cymaksi'n ttzi león tu'n mi'n tz'oc cytx'a'njl ejee'xin, ³⁴ bix at juuntl etzke tuj k'ak' mintii' otk baj tz'ey' cyexin tej cyocxxin tuj k'ak' cyu'n ka' xjal, bix at juuntl e cletke cywitz ke byol xjal, bix at juuntl mas ocx cyipen twitzj tuj tneel tej mintii'tl cyipen, bix at juuntl e xcyeye tuj k'oj cyibaj soldado te juntl wik tnom otk chi ul te alk'albil cytx'otx'. Cykilj luwe e bint cyu'n tu'n oc ke cyc'u'j ti' Dios. Bix yaa'n o'cx lu. At mastl e bint cyu'n. ³⁵ At cab xuuj bix oc c'ycyxe'yentl cywitz kej cyal e jaw itz'jke bix otk chi cyim. At cabtl xjal ocke tuj q'uixc'aj nuk ti' tyol Dios hasta e cyimxke ti'j. Min el cyxoo'nxin cyocslabl'xin ti' Dios tu'n cyclet-xin tuj cyk'ab ke byol xjal, cuma cytzki'ntl'xin at juntl chunk'lal mas ba'n bix te junx maj tuya Dios. ³⁶ Bix at cabtl iy'x q'uixc'aj cyu'n xmucc'habl, bix at cabtl e xi' tz'u'n cyi'j, bix at juuntl ocx x'petke tuya cadena tuj t'zee' cyu'n cawel. ³⁷ At cabtl bix e cub byetke tuya xak, bix at cabtl e cub keset cymij tuya sierra, bix tuya twi' cchil, bix e k'um'j te cabtl ka tu'n t-xi' cytzakpi'n cyocslabl ti' Dios mi'ntzen chi cub byet pero min e xi' cytzakpi'nxin bix e cubkexin, bix cabtl bix el okke tu'n tu'n oc ke cyc'u'jxin ti' Dios bix nuk jak'ch e betekexin. Mintii' cyi'jxin, nuk ttz'umel carnal bix ttz'umel chiva oc cyi'jxin. Niy' mehexsenke. Nim bisbajil bix nim q'uixc'aj iy'x cyu'nxin, cuma ke ka' xjal te twitz tx'otx' el cyiiq'uen ke t-xjal Dios, ³⁸ amale yaa'nt t'ba'nke cywitz ke t-xjal Dios. Bix cuma el cyiiq'uen ke xjal ke ocslal, bix e bet ke ocslal tiy' t-xol witz bix tiy' jaa' mintii' a' bix mintii' c'ul, bix e wutankekxin tiy' t-xee' xak bix tiy' tuj t-xpaa'xil xak tu'n chi ewenxin, cuma min jaa' ba'n cywe'baxin.

³⁹ Bueno, cykilj t-xjal Dios lu tu'n oc ke cyc'u'jxin ti' Dios elkexin ba'n tuj twitz Dios. Pero jooc'tzen ete'xke twitz tx'otx', min e camankekxin ti' cycotzxin otk cyaj tkba'n Dios. ⁴⁰ ¿Tiken?

Cuma tuj twitz Dios mas ba'n tu'n junx chi elc'axin kuya la' alcyce jun k'ij, tu'n kcaman junx cyuyaxin ti'j o tak' Dios ke.

12

Kk'o'nc kwitz ti' Jesús

¹ Ejee'tzen kxe'chel jlu o cyaj k'onte nim tumel te ke ti tten tu'n toc ke kc'u'j ti' Dios. Ju' tzunj il ti'j tu'n mi'n cyaj kxoo'n kocslabl ti' Jesús tu'n kaj meltz'aj tuj kreligi'ón te ootxa, cuma jaja tcub mokonte kwitz ti' Dios. O'cx tumelj, kk'a'c kipep tu'n kxcye tu'n kxi'x tuj be tzin tkba'n Dios, jaj tu'n toc ke kc'u'j ti' Jesús. ² Il ti'j cxe'l kwitz ti' Jesús, cuma jaxin nejl kwitz o ponxin tuya Dios, bix jaxin nic'ulte ke tu'n kpon tz'akl twitz Dios. Junxse ch'ixbajil tej tjaw jun xjal twitz cruz tu'n tcyim, pero te Jesús mas il ti'j e xi' tñiman alcyce e tajbe Dios twitz tu'n tel t-xoo'nxin jun tch'ixewxin tej tjawxin twitz cruz tu'n kil, cuma ttzki'ntlxin at tu'n tiik'enxin jun tcoztzxin. Bix o camanxin, cuma o ponxin tuj tmank'ab Dios tuj cya'j.

³ Ju' tzunj cybise'c'a cyey ti'j ti e baj te Jesús. Iy'x nim q'uixc'aj tu'nxin cyu'n kej xjal e jaw yolen ti'jxin. Ju' tzunj mi'n baj cypena bix mi'n chi cub xitja ojzen cysaney tuj jun q'uixc'aj. ⁴ Pero at juntl wik q'uixc'aj mina'n tul cyi'ja. Bajx cyla'y tisej te Jesús e byet tu'n cyk'ab aj il. Mina'x cylonte cyey ju'wa, pero cyk'o'nc cypena ti'j tu'n t-xi' cyii'na cyocslabla ti' Dios hasta ojxe ccyima tu'n mi'n chi cub tz'aka tuj il.

⁵ Pero cykilcaj q'uixc'aj cyla'y tec'ax juun tuya tak'mal, tu'ntzen ccyaya tz'aklxix. ¿Na'mpa cyu'na ti toc tu'n tyol Dios? At jun tumel tu'n jun mambaj n-el tñiy' ti'j ti ctemela tcwal. Tzi cyjulu: "Ncwala, mi'n tz'el t-xoo'na jun cawbil cxe'l tk'o'n Kman Dios tey, bix mi'n cub baj tc'u'ja oj toc i'l'ena tu'nxin. ⁶ Oj toc tcawenxin jay, yaa'n tu'n n-el tiq'uenxin jay, sino cuma n-oc tak'a texin, bix cuma tajxin jun ba'n te tey," tzi jun xjal n-el tñiy' ti'j te tcwal, tzi tyol Dios. ⁷ Ju' tzunj il ti'j q'uixc'aj ku'n, cuma tcwal Dios ko'. Twitz tx'otx' min-al jun cwal mintii' cawbilte tu'n tman. ⁸ Yajtzen te Dios, mas ba'n tcawbil tibaj cykilca tcwal. Katzen mintii' tcawbil Dios ki'j, yaa'ntzen tcwal Dios ko'. Nuktzen tisen sicy'bel cwal ko'. Min-al kman jaxxix. ⁹ Tejtzen nee' ko', tzintzen kbi'n kman oj ntzaj cawen ki'j. Ju' xsunj te Kman Dios tuj cya'j, masxsen cxe'l kbi'n tcawbil, tu'ntzen at kchunk'lal thanelxix. ¹⁰ Ke kman te twitz tx'otx' nchi xnak'tzan ki'j la' alcyce ba'n tuj cywitz te cye. Yaltzen te Kman Dios, masxsen tz'akl tcawbil kibaj, cuma taj te ke jun ba'n, yaa'n nuk te texin. Tajxin tu'n kten jiquenxix tisen texin, tu'ntzen koc sakxix twitzxin. ¹¹ Bix jaxsente kcy'i jun cawbil, cuma tak' tuj kwitz. Pero katzen niy'x q'uixc'aj ku'n, kamantzen jun thanelxix knaabl bix mas tuj ttzyal ko temel.

Jawnex tzi ka ma tz'el kxoo'n t-xtalbil Dios

¹² Pero at juun cyxola min tpa q'uixc'aj. Ju' tzunj ba'n tu'n t-xi' cyonena, cuma cyocslabl tisen jun cyk'ab o tz'el mejtz'aj bix tisex jun cych'ecy mintii' tipen. ¹³ Tisen jun xjal cox nxi' binchet tbe tu'n juntl xjal, ju'xsen cyi'j kej ncub baj cyc'u'j tuj te Dios, il ti'j chi xe'l onet. Bix tisen jun cox chebe tu'n tbet bix tu'n mi'n jaw tz'ak tuj tbe ka at onbil ti'j, ju'xsen tuj tbe Dios cxe'l nimset tc'u'j jun ocslal tu'n mi'n txi' tzpzet mas ka at onbil ti'j.

¹⁴ Kjyom tu'n mintii' k'oj kxol bix cyuya cykilca niy'tl xjal, pero mas jawnex twitz lu tu'n t-xi' kii'n jun kchunk'lal jiquenxix, cuma ka min s-el kiin kiib ti' il, mlay kil twitz Dios. ¹⁵ C'oquel kc'u'j ti'j tu'n min-al jun kxol cub tz'ak tuj yol lu bix cxe'l tperdere co'pbil te. Ka at jun xjal min tz'el tiin tiib ti' il, ja tzunja tisen jun veneno n-ocx tk'o'n te tyabel cabtl tuya jun tq'ueyel. ¹⁶ Jun ocslal min txi' tiin tbe tuya Jesús sino n-ex balk'aj tuj tocslabl ti' Jesús, ju'x tisenzen jun xjal tzin nach'n tuya jun tpaj. Ju'tzen e baj te kxe'chel Esaú. El tiq'uexin alcyce e tajbe Dios. Tu'n min oc tc'ojla'nxin otk cyaj tkba'n Dios, e xi' tq'ueyenxin te titz'enxin Jacob jun toclenxin te jaxin tneel cwal nuk tu'n jun twaxin. ¹⁷ Bix ktzki'ntl yajxitl, tej ch'itk tcyim tmanxin Isaac bix e pon tumel tu'n t-xi' tpa'n Isaac cyakb tcwalxin, bix e tajbetl Esaú tu'n tiik'ente jtoclen ka ja tneel cwal, pero ya min e k'o'jtl. Bix amale ook'et-xin nim ti'j tel-len t-xoo'nxin, mix e binne tu'n tch'ixbenxin tej otk tbinchaxin tuj tneel. Ju' tzunj mi'n tz'el kxoo'n te j o cyaj tkba'n Dios, tisenzen te Esaú e baj te, cuma bi'x cxe'l kxoo'n te junx maj.

¹⁸ Key hermano, nejl nim sey'pajlenel cyi' kxe'chel tej cypon lk'eke twitz xjan witz jaa' etza k'ajt tyol Dios. Tej cypon t-xee' witz, oc cyce'yenxin njulen tuya x'ak', bix at klolj, bix at nim cyk'i'k, ¹⁹ bix at tk'ajk'ajel twi' jun bocina, bix e xi' cybi'nxin jun tk'ajk'ajel yol cyibaj jawnexsen tbi'nx. Tu'n sey'pajlenel tu'nj yol bix ak'kexin cubsal cywitzxin tu'n mi'n cybixin mastl tk'ajk'ajel yol. ²⁰ Min e cypaxin tu'n cyoc tenxin e bilte jyol e cub cyibajxin tztizen cyjulu: "Alj xjal c'oquel maconete t-xee' jwitz xjan, bi'x cwel byet tuya xak bix ma tuya machet, cyuyax ke alimaj oj cypon lk'e," tzi tk'ajk'ajel yol twitz cya'j. ²¹ Ti'j si'puplxsen cykilj lu, tuyax Moisés e jaw lu'len.

²² Katzen jawnex jun sey'pajlenel tej cypon xjal twitz xjan witz nejl, yaltzen ja'lewe mas jawnex tzi tu'n kpon mero twitzc'a Dios ka yaa'n jiquenxix eto'. Ju' tzunj ilxix ti'j tu'n ko

ten jiquenxix twitz Dios, cuma ko pomel tuj tnom jaa'j ta' Dios I'tzxix, jaj Witz Sión tbi tnom bix tuyax Jerusalén Tuj Cya'j tbi, bix jaa'j at nim cyajlal tsanjel Dios tuj cya'j, ²³ bix jaa'j o chi pona cykil t-xjal Dios bix ya tz'aklxixke, bix jaa'j ta' jax Dios Nintzaj Juez, ²⁴ bix jaa'j ta' jax Jesús, jnic'ul ti'j ac'aj trat, bix jxjal ocx toyen ttz'q'uel te chojbil kil. Ttz'q'uel Jesús at tipemal te co'pbil xjal, yaa'n tisenj ttz'q'uel alimaj e xi' toyen Abel nuk ajben te techel ttz'q'uel Jesús.

²⁵ C'ouqel cycwenta ti'j tu'n mi'n tz'el cyxoo'na tyol Dios. Nejl, tej tyolen Dios twi' jun witz, min-al jun xjal el libre tuj castiwa tej tel cyxoo'n tyol Dios. Yajtzen ke, ka ma tz'el kxoo'n tyol Dios oj tyolen ki'j yaa'n nuk twi' witz sino tuj cya'j, masxsen mlay ko ttzokpi tu'n kpon tuj castiwa. ²⁶ Nejl, tu'n tk'ajk'ajel tyol e tzaj lu'len ch'in twitz tx'otx'. Pero ja'lewe tzi Dios tuj tyol Dios cyjulu: "Juntl maj ctzaal lu'len twitz tx'otx' wu'na, pero yaa'n nuk twitz tx'otx', sino tuyax cya'j," tzi Dios. Ju' tzunj cxe'l cynimana tyol Dios, cuma tzul jun k'ij cjawel ttzto'n Dios cykil at, ²⁷ cuma jyol "juntl maj" nyec'an ke oj tjaw ttzto'n Dios cykil at, cxe'l tz'ak niy' jtk'ch ba'n ttztoj, bix cyjelx nuk alcyej mixbe ttztoj. ²⁸ Jtcawbil Dios tuj kanem mixbe ttztoj. Chunk'lal o tak' Dios, jatzen te junx maj. Ju' tzunj kc'ojla'xix tu'n mi'n cyaj kxoo'n. Kc'ojla'xix tu'n kajben te Dios tu'n kna'n Dios bix tu'n kniman twitz. ²⁹ Nim c'ouqel kc'u'j ti'j, cuma Kman Dios tisen jun k'ak' te xitlte entera at.

13

Jba'n tu'n tbint ku'n tu'n ttzalaj Dios ki'j

¹ Yaltzen ja'lewe, key hermano, cxe'l nk'umena jun tumel tu'n ti tten tu'n t-xi' kii'n jun kchunk'lal tuj tumel. Cyii'nx tu'n toc tak' cyermaney ocslal cyey. ² Cxe'lxix kc'u'j ti' jun xjal oj tpon kja. Mi'n tz'etz klomo'n kja cywitz. Tu'n nxi' kk'o'n posada te juntl, kape jac'a kiik' jun nim xtalbil. Ju' e baj nejl. At juun xjal e xi' k'onte cyposada te cab xjal min cytzki'n xjal cywitz, bix yaj eltl cyniy' ti'j ángelke.

³ C'ulel tuj kc'u'j cyi'j kej ocslal ete'cx tuj tze'e' nuk ti' tyol Dios. Ko xe'l cyey'lye, tu'ntzen tel kniy' ti'j alcy'e q'uixc'aj ete'. Bix c'ulel tuj kc'u'j tu'n at lastim cyi'j kej nchi baj yaset, cuma ch'innch'e pjel ki'j ju'wa.

⁴ Cykilca ko' c'ouqel kc'u'j ti'j knajle'n. Ba'n tuj twitz Dios oj najben t-xu'lin xinak te te twetbil ka ti taj xinak tuya t-xu'lin, bix ju'x te xuuj tuya tchmil. Katzen nko jyon juntl pajbaj, ja tzunja yaa'n ba'n tuj twitz Dios. Ck'ol Dios castiwa ka ch'imac'a xuuj tzyu'n tu'n jun xjal yaa'n najlel, bix ju'x kej najlel ka nchi jyon juntl cypaj.

⁵ Mi'n ko cub ten nuk kk'inemal kaj. Mi'n tziy' tuj kc'u'j tisenj te kuya at, sino ko temel tuj tumel tuya alcy'e ch'in at kuya, nimle, ch'inle. Mi'n tz'oc ke kc'u'j ti' pwak, cuma ja Dios c'ojlal ke. Tzi Dios: "Te junx maj mlay chi cyaj nk'o'na bix mlay chi el wiq'uena." ⁶ Ju' tzunj ba'n t-xi' kk'umen tuya cykil kc'u'j jyol lu tuj tyol Dios: "Ja Kman Kaaw onl te ke. Ju' tzunj mintii' tzi ki'j alcy'e c'ouqel cybincha'n xjal ki'j."

⁷ C'ulel tuj kc'u'j ti'j kej tneel xjal ul k'inte tyol Dios ti'j Jesús te ke. Cwel kbisen ti' i'tzenke tuya cyocslabl ti' Jesús, bix kii'xse tisenj cye. ⁸ Bix cwel kbisen tisenj cye. E cykba cyjulu: "Tuj tneel bix ja'lewe bix te yaj Jesús jax. Mlay tch'ixbe tnaabl," tzi ke t-ak'anal Dios nejl. ⁹ Ju' tzunj mi'n ko oc ten ebilte niy' ti' j-ac'aj xnak'tzibil tzul kxol, tisen tzunj xnak'tzibil k'i'n cyu'nj xjal nchi xnak'tzan ke tu'n at kipemal tu'n Dios il ti'j tu'n t-xi' kii'n ttxolanj te nejl ti'j ti' cxe'l kwaa'n. Pero tej ttxolanj lu mintii' o tz'ajbe'na cyej xjal nxi' cyii'n. Ckiik'elte kipemal tu'n Dios, yaa'n tu'n t-xi' kii'n jun ley te waabj, sino tu'n t-xtalbil Jesús. ¹⁰ Kej nxi'x cyu'c'uj ti' alimaj te chojbil cyil mintii' cyoclen tu'n cyiik'ente t-xtalbil Jesús, tisenj mintii' cyoclen tu'n cyiik'ente tchu'l alimaj nxi' oyet te chojbil cyil, cuma ja tzunj chojbil cyil jatzen jun techel ti' Jesús, bix ja tzunj tchu'l chojbil cyil jatzen jun techel t-xtalbil ncyiik'ente te Jesús. Pero te ke at koclén, cuma nxi' kc'u'j ti' Jesús te chojbil kil. ¹¹ Ktzki'ntl tuj religión te ootxa o cyaj kk'o'n ke pala nxi' cyoyen ttz'q'uel alimaj te Dios twi' altar bix nxi' cychoy'n cychu'l alimaj. Pero jun maj jaca jnabk'i n-ocx jnintzaj pala tuj Masxsen Xjan Lugar te tztitlte ttz'q'uel alimaj te chojbil il. Ja tzunj alimaj nxi' oyet te k'olte jttz'q'uel bix ncub patet ti'jxe tnom jaa' najle ke xjal. Bix mintii' tu'n t-xi' cychoy'n pala t-xumlal ja alimaj lu. Min najben te k'ol tipemal cychunk'lal xjal. Ja tzunj lu jun techel. ¹² Tisenj ncub patet ke alimaj ti'jxe tnom te techel, ju'xse e cub byet Jesús ti'jxe Jerusalén, tu'ntzen toc ttz'q'uelxin te tx'ajbil cykil kil. ¹³ Ju' tzunj mi'n cub kbisen ti'j min tz'ajbentl, sino ju' ko xe'l lpe ti' Jesús. Pero cyiw ch'in. Jatzen Jesús iy'xe jun ch'ixew tu'nxin ex xe'ti'jxe tnom, bix ju'xse ke, ka eto'c tuya Jesús, il ti'j tu'n tiy'x ch'ixew ku'n. Il ti'j q'uuyax xmucchaj yol ku'n ka ma tz'el kxoo'n kreligión te ootxa tu'ntzen kxi' lpe ti' Jesús. ¹⁴ Tisen ti'jxe tnom eto' ja'lewe. Pero te ke, mintii' jun tnom twitz tx'otx' te junx maj. Alcyej tzin kyo'n ja tej tnom te junx maj.

¹⁵ Ju' tzunj, cuma tu'n Jesús at koclén tu'n kpon tuya Dios, cxe'l kk'o'n chjonte te Dios bix cjawel kniman tbi bix ko bitzen te Dios. Oj thint jlu ku'n, jatzen jun oybil nxi' kk'o'n te Dios.

¹⁶ Bix mi'n tz'el tuj kc'u'j tu'n kbinchante jun ba'n bix tu'n tbaj konen kiib. Ju'x jlu jun oybil ba'n t-xi' kk'o'n te Dios, bix ba'n tuj twitzxin.

¹⁷ Cybinx kej nchi cawen cyibaja tuj taak'en Dios. Jax cyk'a' jun cycwent te Dios, cuma ejee'tzen k'il cwent cyi'ja ti xbaj cyey tuya cynaabla cywitz. Ju' tzunj, chi elelxixa ba'n, tu'ntzen jun cyaak'en te cawel cyibaja ttzyalxix, yaa'ntzen bisbajil, bix tu'ntzen ba'n t-xi' cyk'o'n jun ba'n cycwent cyi'ja. Ka ejee'y nuk jun tq'ueyel cyexin, lastim key.

¹⁸ Chi na'nxa Dios wi'ja. Tuj nwitzba ba'n nnaabla cuma mintii' jun nka'yel n-oc tak' weya, bix waja tu'n nnaja'na jiquenxix. ¹⁹ Chi na'na Dios wi'ja tu'ntzen npon najtla cyuyey.

Jun manc'bil k'olbebl cye ke ak'anal tuj tyol Dios bix te cykilcatl ocslal

²⁰ Key hermano, Dios o tz'oc tuj jun nintzaj bix ac'aj trat ninc'u'n tu'n tcyamecy Jesús, bix o jaw titz'jsa'nxin Kaaw Jesús tuj cyamecy, bix o tz'oc tk'o'nxin Jesús te nintzaj cylel ke. Ja jun Dios tzin tk'o'n nim tbanel. ²¹ Nuket chi cub tena tuj jun ba'n cynaabla, tu'n tbint cykil tajbil Dios cyu'na. Bix nuket cyaja tu'n tak'anan Dios tuj cyanema tu'n cycyaj tz'aklxix cynaabla. Tu'n Jesús nak'anan Dios tuj cyanema. ¡Nimjxit tbi Jesús te junx maj! Nuket ju'wa.

²² Bueno, key hermano, cxe'l ncubsa'n nwitz cyey tu'n cyocslantey ja yol lu te nimsabl cyc'u'ja. Ja u'j lu cyiw ch'in tyol jilj, pero il ti'j.

²³ At jun tpochal Hermano Timoteo. O tz'etz tuj tzee'. Katzen ma pon naj wuyena, jatzele cxe'l k'inte weya oj npona cyuyey.

²⁴ Nxi' nk'o'na jun k'olbebl cyeke entera ke ak'anal tuj tyol Dios, bix cykilcatl ocslal. Bix ke ocslal te Italia at jun k'olbebl cyu'n te cyey.

²⁵ Diosxit cy'iwlante cykilcakey. O'cx nyolja.

Jun u'j e xi' ttz'i'ben Santiago

Jun k'olbebl tu'n Santiago

¹ Inayena Santiago. Jun t-ak'anal Dios kena, bix jun t-ak'anal Kaaw Jesucristo. Nxi' nk'o'na jun nk'olbebla te cyey judío ma chi el t'zitja tuj cykilca twitz tx'otx'.

Ntzej tk'o'n Dios knaabl

² Key ocslal, ka ma tzaj pena bix q'uixc'aj bix jun ka' cyi'ja, mi'n chi bisena, sino chi tzalaja, ³ cuma cytzki'na ka ma tziy'x kej q'uixc'aj lu cyu'na, nchi ajbentzen tu'n tcywix cyocslabla ti' Cristo, bix ctemel mas cypasensyey. ⁴ Iltzen ti'j tu'n tten cypasensyey, tu'ntzen tz'akl cynaabla, tu'n mintii' palt cyey tuj cyocslabla.

⁵ Katzen at jun xjal cyxola ka at-x taj tnaabl ti', kanenx te Dios, bix ctzaal tk'o'n Dios tnaablxin, cuma taj Dios tu'n ttzaj tk'o'n nim ba'n cye xjal. Min tz'oc ilen Dios ki'j oj nko kanen texin. ⁶ Pero oj t-xi' kkanen, ilksen ti'j c'oquel ke kc'u'j ti'jxin, bix mi'n baj kc'u'j, cuma ka ma baj tc'u'j jun xjal ti' Dios oj nxi' tkanen, ju'tzen tisen mar nyucch jaca maj tu'n cyk'i'k. ⁷ Ka ma txi' cykanena te Dios pero min tz'oc ke cyc'u'ja ti'jxin, mlay tzaj tk'o'nxin cyey, ⁸ cuma tuya ca'ba twi' cyc'u'ja nxi' cykanena, bix yaa'n cyiw cyc'u'ja tuj cyocslabla.

⁹ Yal kej ocslal mebe, tu'n cytzalaj, cuma ma k'oj jawnex cyoclen tu'n tiy'x q'uixc'aj cyu'n tisen iy'x tu'n Cristo. ¹⁰ Jax kej ocslal k'ine, tu'n cytzalaj, pero yaa'n ti'j cyk'inemal, sino ti'j ma tzaj tk'o'n Dios tu'n cyoc te ch'in, cuma n-el cyniy' ti'j cykilca k'ine chi pjel, tisen txmaquel c'ul. ¹¹ Oj n-ul k'ij, nk'on nim cyak, bi'x ntzkij c'ul, bix n-el tz'ak txmaquel, bix naj tilbil. Jaxsen ju'x jxjal k'ine. N-oc tk'on tiib ti' tik'ch at twitz tx'otx', pero cymel, tisen txmaquel c'ul.

Cy'iwla'n ta' jxjal mi'n cyaj tk'o'n tocslabl ti' Cristo oj n-oc q'uixc'aj ti'j

¹² Cy'iwla'n ta' jxjal min cyaj tk'o'n tocslabl ti' Cristo oj n-oc q'uixc'aj ti'j, cuma ka ma tziy'x q'uixc'aj tu'n, ck'ojeltzen tcotz, jaj tchunk'lal te junx maj o tkba Dios te cyey xjal n-oc tak' cye.

¹³ Katzen at jun xjal n-oc niy'bebl ti'j tu'n tbint jun ka' tu'n, mi'n txi' tkba'n ka ja Dios ma tz'oc cyakwusante tu'n tbint jyaa'n ba'n tu'n, cuma tcy'i te Dios tu'n tbinchante jun ka', bix bajx tzaa' tk'o'nxin jun yol te jun xjal tu'n tbint jun ka' tu'n. ¹⁴ Ti'jx tnaabl xjal n-el itz'j niy'bebl te, cuma npon tc'u'j xjal ti'j tajbil tnaabl aj il, bix nsbuj tu'n. ¹⁵ Bix oj n-oc tbi'nxin, bix nxi' tz'akxin tuj il, bix ntz'iy tilxin. Ctk'a'tzen tcyamecyxin te junx maj tu'n tilxin.

¹⁶ Key ocslal n-oc cyak'a weya, mi'n chi tzpeta ti' Dios, ¹⁷ cuma nuk jaj cotz ba'n bix nuk jaj tbanelxix tzin tk'o'n Kman Dios tuj cya'j ke. Jk'ij bix xjaw bix ke che'w e tbinchaxin, nchi bet jaca hora, bix nch'ixpet xlequen tzin cyk'o'n. Pero te Dios, min tch'ixpu tnaabl. ¹⁸ Ju' e tajbexin tu'n ttzaj tk'o'nxin ke tu'n koc te tcwalxin tu'nj jaxxix tyolxin, tu'ntzen koc te tneel ocslal cyxol xjal, tisen tneel twitz awal.

Il ti'j tu'n tbint tyol Dios ku'n yaa'n nuk o'cx tu'n toc kbi'n

¹⁹ Key ocslal n-oc cyak'a weya, cybi'nc ja yol lu. Mas ba'n tu'n t-xi' cybi'na tyol Dios twitzj tu'n t-xi' cykba'na nuk cyexa cyyola. Bix mi'n chi jaw k'ojl naja, ²⁰ cuma mlay chi ajbena te Dios tuya cyk'o'ja. ²¹ Ju' tzunj, cyk'o'ncj cykilcaj yaa'n ba'n bix jka', bix tuya jun cynaabla maans, chi lpexa ti'j tyol Dios ma cu'x awet tuj cyanema, bix at tipemal tu'n cycleta tu'n. ²² Il ti'j tu'n tbint tyolxin cyu'na, cuma ka nuk ma tz'oc cybi'na tyolxin pero min cybiy, ncubtzen cysbun cyiiba ju'wa. ²³ Alceyey xjal nuk nxi' tbi'n tyol Dios pero min bint tu'n, ju'tzen tisen jun xjal n-ocx tcyeyen twitz tuj jun respej. ²⁴ Oj t'bj tcyeyen twitz, nxi'tzen, bix n-el tuj tc'u'j ti'n tcyey'nc. ²⁵ Pero alceyey xjal n-oc tk'on tiib jaca k'ij tu'n tel tniy' ti'j tu'n t'oc tu'n tley Dios, bix min n-el tuj tc'u'j tu' t'oc tu'n ley, sino n-oc tipen ti'j tu'n tbint tu'n, cwelzten xtalbil tibaj, cuma tbanelxix tley Dios, bix nko tzakpet ti' il tu'n.

²⁶ Ka at jun xjal cyxola najben te Dios tuj twitz, pero min ttzuy tiib ti' tyol, nuk nsbun tiib, bix mintii' tajbel tocslabl. ²⁷ Chi elela ba'n tuj twitz Kman Dios ka ma chi onena cyi'j nee' mebe bix cyi'j xuuy viuda oj n-oc pena cyi'j, bix ka ma cytzuy cyiiba twitz il tzalu twitz tx'otx'.

2

Min-al jun xjal mas nintzaj twitz juntl

¹ Key ocslal, tuj cyocslabla ti'j jawnex Kaaw Jesucristo, mi'n txi' cyximana cyi'j xjal ka at jun mas nintzaj twitz juntl. ² Ka ma tz'ocx jun xjal cyxola tuj tja Dios, bix tcub t-xmulk'ab te oro, bix toc thanel t-xbalen ti'j, bix jax ju'x ka ma tz'ocx jun xjal mebe bix toc t-xbalen ttx'akan, ³ mi'n tz'oc cyk'o'na mas tajbel jxjal k'inawe. Ka ma txi' cykba'na tej xjal toc t-xbalen wi'yel ti'j: "Kequey tzalu tuj jun k'ukbil tbanelxix," bix ka ma txi' cykba'na tej xjal

mebe: “Kequey tzalu twitz tx'otx', bix ka we'q'uey jatzewe cyi'jxe xjal,” ka ma bint cyu'na ju'wa, ⁴yaa'ntzen junx ta' cyc'u'ja cyi' xjal cyxola. Matzen tz'oc cyk'on cyiiba tisen ke juez nuk cyaj tu'n cyajben cyej xjal nintzaj, tu'n cycaman pwak. Yaa'ntzen tumel cyu'na. ⁵Key ocslal n-oc cyak'a weya, c'oquel cycwenta ti'j nyola. Kej xjal mebe tuj cywitz xjal te twitz tx'otx', ma jaw tscy'o'n Dios tu'n cyoc te k'ina, cuma tu'nj cyocslabl ck'ojel cye tu'n cyoc tuj tcawbil Dios, tisen ma cyaj tkba'n Dios te cye kej xjal n-oc tak' Dios cye. ⁶Pero cyey, nuk n-el cyiiq'uena kej xjal mebe. ¿Pero alcye kej xjal nchi binchan ka' cyi'ja? ¿Yaa'mpatzen ejee'x kej xjal k'ina? ¿Yaa'mpatzen cyu'n k'ina tu'n cycambil n-el cyii'n tik'ch cyej tuj juzgado? ⁷¿Yaa'mpatzen jax kej k'ina nchi xmuccion ti'j jawnex tbi Jesús, jxjal Cyaawa?

⁸Pero ka ma tz'oc cyak' ke cyuyey cyej tisenj n-oc cyak' cyiiba cyej, ba'ntzen tzin cybincha'na, cuma nintzaj ja ley lu tuj jawnex tley Dios. ⁹Pero ka ma txi' cyeeec'ana mas nimbil cyej xjal k'ina cywitzj xjal mebe, attzen cyila, bix nchic'ajax min txi' cybi'na tley Dios. ¹⁰Ka at jun xjal ma txi' tbi'n cykilca tley Dios, pero ma tzpet tuj jun mandamyent te ley, amale nuket jun mandamyent, ya ma cub tz'ak tuj cykilca ley. ¹¹Ktzki'n ju' tten, cuma e tkba Dios tu'n mi'n cyaj cycye'yena cyxu'la tu'n juntl xuuj, bix jax Dios e kbante tu'n mi'n tz'oc cybyo'na xjal. Ju' tzunj, ka ma tz'oc cybyo'na jun xjal, amale mint chi wutana tuya juntl xuuj yaa'n cyxu'la, pero ma bint il cyu'na, cuma min ma cynima cykilca yol k'o'n tu'n Dios.

¹²Chi yolena tuya tk'ak'bil cyc'u'ja cyi' xjal, bix cybinchama ba'n cye xjal, cuma oj toc tcyeyen Dios ejee'y ka ma bint ba'n cyu'na bix ka min, cmloltzen ejee'y tii'nkey ti' ley tzin tkba'n c'oquel kk'o'n lastim cye xjal. ¹³Ka mintii' lastim cyu'na cye xjal, jax mintii' lastim tk'a' Dios cyej oj cyoca tuj xkel twitzxin. Pero ka ma tzaj k'ak'en cyc'u'ja cyi' juntl, tzul k'ak'an tc'u'j Dios cyi'ja oj cypona twitzxin.

Ka at jun xjal tzin tkba'n at tocslabl ti' Dios, pero ka mintii' n-oc tonen juntl, mintii' tajbebel tocslabl

¹⁴Key ocslal, cxe'l nkanena cyej, ka at jun xjal tzin tkba'n at tocslabl ti' Dios, pero ka mintii' tonbil nbint tu'n ti' juntl, ¿titzzen tajbel tocslabl? ¿Jac'apa clet ka min tz'ajben tocslabl? ¹⁵Cxe'l nkanena cyej, ka at jun ocslal cyxola mintii' t-xbalen bix mintii' twa, ¹⁶bix ka ma txi' cykba'na te: “Tenxita tuj ttzyal. Cutzit ka ma cnet t-xbalena bix tway tu'na,” ka tzikey te, pero mintii' onbil ma txi' cyk'o'na te, ¿ti tajbel cyyola te? ¹⁷Ju' tzunj, min tz'ajben kocslabl ka nuk nko yolena at kocslabl pero min ma txi' kyeec'an ka at-xix kocslabl tu'nj ba'n tzin kbincia'n.

¹⁸Pero kape at jun cyxola nbaj tc'u'j ti'j ja yol luwe, bix nxi' tkba'n cyjulu: “At ca'ba wik ocslal. At juun at nim cyocslabl, bix at juuntl at nim cybinchben ba'n,” tzi tzunj xjal yaa'n jax tu'n. Pero cxe'l nkba'na te, ka mintii' tbinchben ba'n jun xjal, mintzentii' tyec'bil ka at tocslabl ti' Dios. Pero ka ba'n nbint tu'n, nyeeec'antzen at tocslabl ti' Dios. ¹⁹Nchi ocslana junx Dios at, bix ba'n ja lu. Pero c'oquel cyc'u'ja ti'j jax ju'x ke biman ocsla'n cyu'n junx Dios at. Pero min tz'ajben cyocslabl, cuma min nchi binchan ba'n bix ju' tzunj nuk nchi lu'len tu'n tzi cyi'j.

²⁰Key xjal min tz'el cyni'ya ti'j, min tz'ajben cyocslabla ka mintii' ba'n nbint cyu'na. ²¹C'oquel cyc'u'ja ti' kxe'chel Abraham. ¿Mimpa e tyeeec'axin ka jiquenxin twitz Dios tu'nj tbinchbenxin? E tbinxin tajbil Dios. At jun maj e xi' toyenxin tcwalxin Isaac te Dios twi' altar, tisen e tkba Dios. ²²Tzinenxsen ta' junx ete' tbinchbenxin tuya tocslablxin, bix tu'nj e bint tu'nxin, e tyeeec'axin tocslablxin tz'aklxix. ²³Ju'tzen e japan baj Dios ti'j tyol tzin tkba'n cyjulu: “Oc ke tc'u'j Abraham ti' Dios, bix ju' tzunj e tzaj k'o'n te Abraham tu'n jiquen ta' tuj twitz Dios,” tzi tyol Dios. Bix cuma e tbincha Abraham j-e tkba Dios, ju' tzunj oc tk'o'n Dios jaxin te tuya Diosxin.

²⁴Ju' tzunj, key hermano, il ti'j q'uelel cyni'ya ti'j ka jiquen ete'y twitz Dios ka at yec'bil te cyocslabla tu'nj cybinchbena, bix yaa'n nuk tu'nj cyocslabla bix ka mintii' cyak'bila ma bint. ²⁵Ju' e cyja' jxuj xuuj Rahab aj paj jiquen twitz Dios jatxe ootxa. E tyeeec'axuj at tocslablxuj ti' Dios te e'wen ke tsanjel Dios tu'nxuj tuj tjaxuj, bix e tzaj tonenxuj ejee'xin tu'n cyel okxin, tu'n tco'pantexuj ejee'xin twitz cawel tuj tnom te Jericó. ²⁶Cytzki'na na cyimne ta' jun xjal mintii'tl t-xew. Jaxsen ju'x cyocslabla, cyimne ta' ka mintii' ba'n ma bint cyu'na.

3

Kej yol n-etz tuj ktzi

¹Key ocslal, ka yaa'n ba'n cytena, mi'n txi' cyxnak'tza'na juntl, cuma ka yaa'n junx ta' kxnak'tzibil tuya kbinchben, mastzen ctzaal tk'o'n Dios kcastiwa cywitz niy'tl xjal.

²Tzinen ta' cykilca ko' at kil. Bix mas nko binchan il tu'n kyol twitzj tu'nj k'i'n tu'n cykilcatl kxumlal. Ka at jun xjal min tzpet ti' tyol n-etz tuj tzi, jatzen xjalja tz'aklxix, bix yaa'n cyiw tu'n t-xcye tibaj cykil t-xumlal, tu'n mi'n bint ka' tu'n. ³Cycyeyenc kej tzej. Oj njax jun xjal

tibajjil, nxcyexin ti'jjil nuk tu'nj xcbil tocx tuj ttzijil. Tu'nj xcbil tocx tuj ttzi tzej, ncawentzen ti' cykil t-xumlaljil. ⁴ Jax ju'x jun barc. Amale ma tijet, bix amale cyiwet jcyk'ik n-oc ti'j, pero nxcye jun xjal ti' barc tu'n jun niy' nu'x timón. Il ti'j cxe'l barc jaa' taj xjal tu'n t-xi' tii'n. ⁵ Ju'tzen tten ktzi. Tal nu'x twitz kxumlal, pero nim nbint tu'n, tisen jun k'ak' nuk ch'in njaw itz'j nbaj tz'ey' cykilca tzee' twi' jun witz tu'n. ⁶ Nim ka' nbint tu'n ch'in k'ak', bix jax ju'x ktzi. Nim ka' nbint tu'n. Bi'xsen nxi' kxumlal tuj il tu'nj nbint tu'n ktzi, cuma tu'n kyol ntzpet cykilca kxumlal. Jka' nbint tu'n, tuya taaw il ntzaa'. ⁷ Cykilca wik alimaj, cykilca wik ch'it, cykilca wik lbaj, bix cykilca wik quís, tjak'tzen cycawbil xjal ete'. ⁸ Pero kej yol nchi etz tuj cytz' xjal, mintzen-al ba'n tcawen tibaj. Tcy'i ktzi tniman ejoo'. Tisen n-ocx veneno tuj kchu'l tu'n kxi' tuj il tu'n, jax najben kyol tu'n t-xi' cytzalajeb' cabtl tuj il tu'n. ⁹ Amale najbent ktzi tu'n tjaw knimsa'n tbi Kman Dios, pero tu'nx ktzi nko sbun xjal o cub bint tisenx te Dios. ¹⁰ Tujx ktzi n-etza yol ka'. Key ocslal, yaa'n tumel jlu. ¹¹ Nxi' nkanena cyey, ¿njatzpa a' tzi' bix a' yaa'n tzi' tuj junx twi' a'? ¹² Key ocslal, ¿jac'apa bint tu'n tel twitz olivo ti'j jun tzee' higo? ¿Bix jac'apa bint tu'n tel twitz higo ti'j jun wi' uva? Mlay. Bix jax ju'x tuj junx twi' a' mlay jatz' a' c'a bix a' tzi'. Ju' tzunj, mi'n tz'ajben cytz'iy tu'n tyolen ka' tuya ba'n.

Jun knaabl ntzaj tk'o'n Dios

¹³ ¿Atpa ocslal cyxola at cynaabl bix n-el cyniy' ti'j? Tu'n tel cyni'ya ti'j ka at cynaabl, cyce'yenxa ka nxi' cyii'n jun cychunk'lal ba'n. Ka nchi yeec'an tu'nj cybinchben ka maanske, attzen cynaabl. ¹⁴ Pero ka nchi'lec cye'u'ja cyi' juntl bix ka nuk nchi jyona cyexa cyajbila bix njaw cyniman cyiiba, mi'n txi' cykba'na at cynaabl, cuma nuk nchi x'tak'ena. ¹⁵ Oj nbint tu'n jun xjal ju'wa, ja tnaabl lu yaa'n te Dios, sino te twitz tx'otx'. Nuk n-oc lpe ja xjal lu ti'j tajbil t-xumlal. Tisen cynaabl biman tnaabl, ¹⁶ cuma jaa'j nchi'lec cye'u'j xjal cyi' juntl bix jaa'j nuk nchi jyon cyex cyajbil, yaa'ntzen ete' xjal tuj tumel, bix nuk nchi binchan cykilca ka'. ¹⁷ Pero jxjal at tnaabl ntzaj tk'o'n Dios, jatzzen xjalja sak ta' tanem, bix n-oc tipen ti'j tu'n tten tuj ttz'yal cyuya xjal, bix nyeeec'an jun tanem ba'n cywitz xjal, bix nxi' tbi'n cyyol juntl, bix n-oc tk'o'n lastim cye xjal. At ba'n tbinchben, bix yaa'n ca'ba twi' tanem, bix yaa'n xmeletz'. ¹⁸ Kej xjal at cynaabl, tuj ttz'yal bix tuj tumelxix n-oc cyipen ti'j tu'n t-xi' cyii'n cychunk'lal juntl xjal jiquen.

4

Yaa'n ba'n tu'n kxi' lpe ti'j tik'ch at twitz tx'otx'

¹ ¿Tikentzen n-el cyiiq'uen cyiiba bix nchi k'ojla? At k'oj cyxola tu'n tlay cyexa cyajbila. Jtaj cynaabl a' il nk'ojl ti'j cynaabl ma tzaj tk'o'n Dios. ² N-oc cyk'a'bena tik'ch cye cyuyey, pero min ncnct cyu'na. Ncub cybyo'na xjal, bix nuk nchi jyona cyexa cyajbila, pero min ncnct cyu'na. Nchi'lec cye'u'ja cyi' juntl, bix at nim k'oj cyxola. N-oc cyipena ti'j tu'n tcnet cyu'na, pero min txi' cykanena te Dios. Ju' tzunj, mintii' ma k'oj cyey tu'n. ³ Oj nchi na'na Dios, min txi' cykanena texin ti tten tu'n cyajbena texin. Nuk nchi k'umena texin ti cyaja. Ju' tzunj, mintii' ma k'oj cyey. ⁴ Oj cyaja nuk cyexa cyajbila bix yaa'nj te Dios, ju' key tisen jun xuuj at tchmil pero nxi' ttziyan juntl xinak. ¿Mimpa tz'el cyni'ya ti'j ka ma pon cye'u'ja nuk ti'j tik'ch at twitz tx'otx', nchi k'ojl tzuna ti' Dios? Ju' tzunj, alcyej xjal taj tu'n t-xi' lpe ti'j tik'ch at twitz tx'otx', n-oc tk'on tiib te aj k'oj ti' Dios. ⁵ ¿Ti toc cyu'na? ¿Nukpa tajx nbyan tuj tyol Dios nim taj Dios tu'n kten nuk te texin? Min. E bint ko' tu'nxin te texin. ⁶ Bix at mas tipemal Dios twitzj tipemal knaabl aj il, bix taj Dios ko tzaj tonen. Ju' tzunj, tzin tkba'n tyol Dios cyjulu: "At tk'oj Dios cyi'j ke xjal nuk nbaj cyniman cyiib, pero kej xjal n-oc cyk'on cyiib te ch'in, tzin tk'o'n Dios t-xalbil cye," tzi tyol Dios.

⁷ Ju' tzunj, mi'n chi nimana tajbil taaw il, sino cyk'onx cyiiba tjak' tcawbil Dios. Ka ma chi we'xixa twitz taaw il, q'uelelzen lk'e cyi'ja. ⁸ Ka ma chi tzaj lk'ey ti' Dios, jax ctzaal lk'e cyuyey. Key ma chi binchan il, mi'n tz'ajbent cyk'aba tu'n t'bit mas ka' tu'n. Bix key at ca'ba twi' cyanem, mi'n che'x lpey ti'j tik'ch at twitz tx'otx'. Cytzjoma cyanema. ⁹ Tu'n t-xi' cyeeec'ana ka ma cyaj cyk'ona ka', chi bisena bix chi ok'a. Tz'ocxit cyz'eb'la te cyook'bila bix cytzalajeb'la te bisajil. ¹⁰ Ka ma tz'oc cyk'on cyiiba te ch'in twitz Dios, ctzaaltzen tk'o'nxin cyey tu'n cyoca te nim.

Yaa'n ba'n tu'n kyole ka' ti'juntl ocslal

¹¹ Key ocslal, mi'n chi yolena ka' ti' juntl ocslal cyxola. Ka ma chi yolena ka' ti' juntl ocslal, nchi k'ojl tzuna ti'j jz'zin tkba'n ley, bix ju' tzunj tzin cykba'na at mas cynaabl twitz ley. Ka ma chi i'ya tibaj ley ju'wa, yaa'ntzen ete'y tjak' tley Dios, sino ma chi oca k'olte ley tisen Dios. ¹² Pero junx K'olte ley at, bix jaxin kbalte ka ba'n bix ka ka' ma bint tu'n jun xjal. Yaa'n ejee'y chi kbalte alcye kej xjal chi cletel bix alcye kej xjal chi xe'l tuj k'ak', sino jaxin.

Mi'n ko bisen ti'j ti'j p'el nchi'j

¹³Ja'lewe at jun tumel cxe'l nkba'na cyej xjal cyxola min nchi ximan ti' Dios. Tzin cykba'n cyjulu: "Ja'lewe bix ka nchi'j ko xe'l tuj jun tnom. Ko temel jun jnabk'i tu'n kq'ueyen bix tu'n kcaman nim pwak," tziike. ¹⁴Pero mintii' tumel cyuyey ti pjel tuj cychunk'lala nchi'j. Jkchunk'lal tisen ch'in muj tuj nuk jun rato n-el naj. ¹⁵Mas ba'n tu'n cykbantiya cyjulu: "Ka ma tzaj tk'o ntl Dios kchunk'lal, ckbincha'tzen jlu bix ka jaj lu," tzi cybela. ¹⁶Pero ja'lewe, min txi' cykba'na ju'wa, sino ncub cynic'u'na cychunk'lala bix min txi' cyxi'mana ti'j ka ma tzaj tk'o'n Dios cyk'i'ija. Pero yaa'n ba'n njaw cyniman cyiiba. ¹⁷Ju' tzunj, n-el cyni'ya ti'j alcyej ba'n tu'n tbin cyu'na, bix ka min ma bint cyu'na, attzen cyila ti'j.

5

Jaj jun tk'oj Dios cwel cyibaj xjal k'ine ka mi'n nxi' cybi'n tyol Dios

¹Ja'lewe at jun nyola te cyej xjal nuk ma tz'oc cyk'on cyiib tu'n tchmet cyk'inemal. Chi ook'ela bix chi s-ila, cuma cwel tk'oj Dios cyibaja. ²Pjel cyk'inemala bix cyxbalena tbanel, tisen tzunj oj nk'ey at cyey bix oj nbaj twaa'n poc' cyxbalena. ³Pjel cypwaka, tisen oj nbaj acumax jun xchil. Bix oj t'aj cypwaka, c'ajbeltzen jlu te jun yec'bil jaj ju'x cyey chi pjela, cuma chi xe'la tuj k'ak'. Cyuj k'ij ja'lewe te ja mitkna'x tul meltz'aj Kaaw, nuk o'cx n-oc tilel cyu'na tu'n tchmet cyk'inemala. ⁴Jey', zti min e xi' cyk'o'na twi' cyc'u'j kej ak'anal e jaw chmonte twitz cyawala? Nchi s-in, bix tk'ajk'ajel cywi' ma canan tuj t'xquin Dios, ja Taaw cykilca. ⁵Ma tz'oc cyk'on cyiiba nuk ti'j tu'n tiy' cynink'i'ija twitz tx'otx' bix ti'j jawnexsen tbel cyway. Pero tisen jun wacx n'waa'n bix ncub laa'nexjil nuk tu'n tcub byetjil tu'n q'uey chi'pj, jaj ju'x cyey, ch'ixc'a tul canan jk'ij tu'n Dios tu'n tcub tk'oj cyibaja. ⁶Kej xjal mintii' cyil bix mlay bint tu'n cyco'pante cyiib cywitz, ma che'x cyii'na cywitz juez tu'n cycub byet.

Il ti'j tu'n tten kpasensya bix tu'n kna'n Dios

⁷Ju' tzunj, key ocslal, ten cypasensyey. Tzul meltz'aj Kaaw. Ju' tzunj, cyk'o'nc cyipena ti'j tu'n tiy'x q'uixc'aj cyu'na ojxe tulxin. C'oquel cyc'u'ja ti'j jun awaal. At t'pasensya tu'n nayon alcyey k'ij tu'n tul canan t'zi j'bal, bix oj t'zaj j'bal, nayontzen ti'j jaatx'en c'ajbel te te. ⁸Jax ju'x cyey, ten cypasensyey, bix tu'n tke cyc'u'ja, cuma cpomel k'ij tu'n tul meltz'aj Kaaw. ⁹Ejee'y ocslal, mi'n chi yolena yaa'n ba'n cyi' juntu cyxola, tu'ntzen mi'n cub castiwa cyibaja tu'n Kaaw. Yaa'n ja cyey cyaak'ena tu'n cyoc xjal tuj xkelbil cywitz. Cpomel tej k'ij tu'n tul Kaaw, bix oj tulxin, jaxin k'balte ka ba'n bix ka yaa'n ba'n t'binchen cykilca juun ocslal. ¹⁰Ejee'y ocslal, chilpec'a ti'j yec'bil e cyaj cyk'o'n kej tyolel Dios te ootxa. Nim pena oc cyi'jxin tuj cyaak'enxin te t-xel Dios, pero iy'x cykilca cyu'nxin tuya cypasensyaxin. ¹¹Jey', cy'iwla'n tuj kwitz kej xjal ma chi xcye oj n-oc pena cyi'j. N-ul tuj cyc'u'ja jyec'bil te ktzan kiy'jil Job. Nimxsen q'uixc'aj iy' twitzxin, pero o cybiy ti e baj texin te manc'bil. Nimxsen xtalbil e tzaj tk'o'n Kaaw texin, cuma n-oc cy'ixbe tc'u'j Kaaw ki'j, bix ntzaj tk'o'nxin lastim ke.

¹²Ejee'y ocslal, ilxsen ti'j tu'n cyyolena tuya jun cyyola jaxxix. Mi'n txi' cykba'na "tzkinn Dios" tu'n tcywix cyyola. Mi'n txi' cykba'na "jax tu'n Dios tuj cya'j" bix ka jaj tu'n juntu biy'bjaj twitz tx'otx', tu'n tcywix cyyola. Ka oc, nuk o'cx cykbay ka oc. Pero ka min, nuk o'cx cykbay ka min. Cybinchama ju'wa, tu'ntzen mi'n cub castiwa cyibaja. ¹³Pero ka ma tz'oc q'uixc'aj cyi'ja, ba'ntzen tu'n ttzaj cyna'na tbi Dios. Bix ka at cytzalajeb'la, ba'ntzen tu'n cybitzena.

¹⁴Ka at jun yaab cyxola, ba'n tu'n ttzaj ttxco'n kej nejenel cyxol ocslal, tu'n tcub cyk'o'n aseyt te olivo tibaj, bix tu'n cyna'n Dios ti'j yaab, tu'ntzen tk'anj tu'n Kaaw. ¹⁵Bix oj cyna'n Dios ti' yaab, ka ma tz'oc ke cyc'u'j ti' Dios, ck'anjeltzen tu'n Kaaw, bix ka otk binchan il, cnajsetel til.

¹⁶Cykbanx cyila cyxolxa, bix chi na'na Dios cyi'ja cyxolxa, tu'ntzen ccyajaja ba'n. Nimxsen nbaj oj nna'n jun xjal jiquen twitz Dios tuya cykil tc'u'j. ¹⁷C'oquel cyc'u'ja ti'j Elias, ja tyolel Dios te ootxa. Nuk xjalxin tisen ke. Pero e na'n Dios tuya cykil tc'u'j tu'n mi'n tzaj j'bal tuj tnanem, bix mintii' j'bal e tzaj tuj oxe jnabk'i tuya wukak xjaw. ¹⁸Bix lwewa juntu maj e na'n Dios, tu'n ttzaj j'bal. Bix e tzajtzen j'bal, bix e tak' tx'otx' twitz tawal.

¹⁹Key ocslal, ka at jun cyxola ma cyaj tcyeyen jyol jaxxix, bix ka ma tzajt meltz'aj tu'n tonbil juntu ocslal, ²⁰tz'elxix cyni'ya ti'j jlu, oj ntzaj tonen jun ocslal juntu ocslal tu'n tcyaj tk'o'n jbe yaa'n ba'n, ccleteltzen ja ocslal binchal il lu twitz cyamecy te junx maj, bix cnajsetel cykilca til.

O'cx nyolja.

Jun tneel u'j e xi' ttz'i'ben apóstol Pedro

Jun k'olbebl tu'n apóstol Pedro

¹ Inayena Pedro, jun t-xel Jesucristo. Nxi' ntz'i'bena ja u'j lu te cyey ocslal cyuj departamento de Ponto, Galacia, Capadocia, Asia, bix Bitinia. Ma chi el t'zitja. Cyisen jun wikxiti xjalkey twitz tx'otx'. ² Jatxe tuj tneel ttzki'n Kman Dios alcyey xjal at c'oquel te ttanem. Ma tz'el tpa'n Espiritu Santo ejee'y cyi' niy'tl xjal tu'n cyoca te ttanem Dios. Ma chi jaw scy'o'na tu'n toc cyibi'na Jesucristo, bix tu'n cycleta tu'nj tcyamecy tej t-xi' toyen ttzq'uel te chojbil kil. Tzaxjit nim t-xtalbil Dios cyibaja, bix nimxit chi temela tu'j ttzjal.

At k'ukbabl kc'u'j ti'j kkab mintii' t'bjalel

³ Knimsa'waxittzen tbi Dios, ja tman Kaaw Jesucristo. Nimxsen ma tzaj tk'o'n Dios lastim ke, cuma ma tzaj tk'o'n jun ac'aj kchunk'lal. Cuma e jatz itz'j Jesucristo tuj cyamecy, ju' tzunj ko tzalajel cuma la' alcyey jun k'ij ko temel tuyaxin te junx maj. ⁴ Ckiik'el jun kkab mintii' t'bjalel bix mlay txi' tuj il bix mlay tzki. Ja kkab lu c'u'n tu'n Dios tuj cya'j te ke. ⁵ Cuma ma tz'oc ke cye'u'ja ti' Dios, ctzaaltzen tonen Dios ejee'y tu'n tipemal tu'n tiy'x cyu'na ojxe cyiik'entey cyocza. Bix tuj manc'bil k'ij ccyiik'ela jcolbil ma baj tninc'u'n Dios cyey.

⁶ Ju' tzunj, chi tzalajxa, amale atet maj il ti'j ja'lewe tu'n tiy'x q'uixc'aj cyu'na jun rato. ⁷ Cyocslabla tisen oro. Il ti'j tu'n tocx oro tuj k'ak', tu'ntzen tyeec'aj ka oro. Katzen il ti'j tu'n tocx oro tuj k'ak', amale pjelet oro la' alcyey jun k'ij, mas il ti'j tu'n toc pena cyi'ja, tu'ntzen tyeec'aj ka jaxxix cyocslabla ti' Dios. Amale nimxsen c'ajbel oro, pero mas c'ajbel cyocslabla. Bix oj tul meltz'aj Jesucristo, ka ma chic'aj jaxxix cyocslabla, chi elela ba'n tuj twitz, bix c'jawel tnimsa'n ejee'y, bix ctzaal tk'o'n nimbil cyey. ⁸ Bajx cyiley Jesucristo, pero n-oc tak'xin cyey. Bix amale mint n-oc cyece'yena jaxin ja'lewe, pero nimxsen nchi tzalaja ti'jxin tuya jun cytzalajebila mlay kbaj, cuma n-oc ke cye'u'ja ti'jxin, ⁹ bix cuma tu'nj ja cyocslabla ti'jxin, chi cletel tzuna.

¹⁰ Jatxe ootxa, kej tyolel Dios e cyk'ume ti'j jun xtalbil at tu'n tul, jaj colbil ma cyiik'a. Pero min el cyniy' ti'j colbil, bix nim e cub tenke ximal ti'j. ¹¹ Tu'nj Espiritu Santo e k'oj tu'n Cristo, e cyk'ume at tu'n tul jun xjal la' alcyey jun k'ij scy'o'n tu'n Dios, bix at tu'n tiy'x nim q'uixc'aj tu'n ja xjal lu, bix at tu'n toc te cawel tibaj cykilca. Bix nim e cyajbe tu'n tel cyniy' ti'j alcyey xjal scy'o'n tu'n Dios, bix alcyey k'ij tu'n tul. ¹² Tu'nj Espiritu Santo, e tyeec'aj cyexin j-e cyk'ume at tu'n t'bjaj, yaa'n tu'n t'bjaj te cye, sino mas yaj te ke. Bix ma k'umj t'pochalel ja colbil lu cyey cyu'n kbalte tyol Dios. O chi k'umenxin tu'nj tipemal Espiritu Santo o tzaj sma'n tuj cya'j, bix t'pochalel cycolbila, jax ju'x ke t-ángel Dios tuj cya'j cyaj tu'n tel cyniy' ti'j.

Ma ko txquet tu'n Dios tu'n koc te ttanem

¹³ Ju' tzunj, nuk binne cytena tu'n cybinchantiya t'bjil Dios, bix cytzyum cyiiba twitz tka'yel. Bix mi'n baj cye'u'ja ti'j xtalbil ctzaal k'o'n cyey oj tul meltz'aj Jesucristo. Nuk chi ayonxa ti'j tuya cykil cye'u'ja. ¹⁴ Cuma t'cwal Dioskey, ju' tzunj cybima tyol. Mi'n txi' cyeuyena t'bjil cyxumlala yaa'n ba'n, tisenj e cysey tej min el cyni'ya ti'j t'bjil Dios. ¹⁵ E t'xoc Dios ejee'y tu'n cyoca te ttanem Dios. Ju' tzunj, chi tena sakxix, tisen te Dios sakxix. ¹⁶ Tzin tkba'n tyol Dios cyjulu: "Chi tena sakxix, cuma sakxix kena," tzi Dios tuj tyol. ¹⁷ N-oc cyk'o'na Dios te cymana. Pero jax ju'x ja Cymana Dios c'oquel te Juez tibaj taak'en cykilca xjal. Bix oj cyoc xjal tuj xkelbil twitzxin, mi'n txi' t'cye'yenxin ka jawnex jun xjal bix ka ajnintz. Ju' tzunj, cyeeec'anx nim cynimbila twitzxin tzalu twitz tx'otx' jooctzen nchi ayona tu'n cypona tuya Dios, bix tu'n tten ba'n cykilca cybinchbena. ¹⁸ Jcychunk'lala e xi' cyi'na nejl, otk cyxnak'tza cyiy'jila cyey, pero mintii' c'ajbela. Ma chi co'pja tuj ja cychunk'lala lu, bix cytzki'na twi'j cycolbila yaa'n oro bix yaa'n pwak te plata at t'bjalel. ¹⁹ Chi lok'eta tuyaj jawnex tcyamecy Cristo tej tel t'zitj ttzq'uel ti'j, tisen oj nxi' oyet jun tal carnal mintii' t'palt bix sakxix. ²⁰ Tej mitkna'x t'btint twitz tx'otx', otk baj tninc'u'n Dios tu'n cycleta tu'n Cristo, pero maa ja'lewe ma tzaj yeec'an Cristo twitz tx'otx' tu'n t-xi' t'co'pan ejee'y. ²¹ Nuk tu'n Cristo nbint cyu'na tu'n cyocslana ti' Dios e jatz titz'jsa'n Dios ja Cristo tuj cyamecy, bix ma tzaj tk'o'n Dios t'xexin tu'n toc te mas jawnex tibaj cykilca. Nuk tu'n Cristo ba'n tu'n cyoc lpey ti' Dios, bix ba'n tu'n cyayona ti'j tu'n cytena tuya Dios.

²² Tu'nj Espiritu Santo, ma tz'oc cyibi'na jaxxix yol, bix ma chi oca sakxix. Ya ma k'oj cyipemala tu'n tocxix cyak' ke ocslal cyey. Ju' tzunj, c'oquel cyak' ke ocslal cyuyey cyey tuya cykil cye'u'ja. ²³ Ma k'oj jun ac'aj cychunk'lala. Min e tzaj ja ac'aj cychunk'lala lu ti'j cyiy'jila tej cyul itz'ja, cuma yaa'n te junx maj ja cychunk'lala lu oj n-ul itz'j jun xjal, sino ma tzaj ac'aj cychunk'lala lu tu'n tyol Dios nim tipemal mintii' t'bjalel. ²⁴ Tzin tkba'n tyol Dios cyjulu: "Cykilca xjal tisen c'ul, bix cybinchben bix cynimbil cyiib jawnex tisen t'xmaquel c'ul, bix tisen oj ntzkijtl c'ul bix t'xmaquel n-el tz'ak, ju'x xsunj p'jel cye xjal tuyaj ma bint

cyu'n. ²⁵ Pero tyol Dios ctemel te junx maj," tzi tyol Dios. Bix ja tzunj tyol Dios lu e k'umj cyey te tpon tpoctal colbil cyey cyxola.

2

¹ Cuma ma chi oca te ttanem Dios, ju' tzunj, key ocslal, cyk'o'ncj cykilca yaa'n ba'n. Mi'n cub cyyajla'na ke xjal, bix mi'n chi oca te xmelezt'. Mi'n chi'l cyc'u'ja ti' cyuyena, bix mi'n chi cub tena iken yol ka' ti' cyuyey. ² Tisen jun xlak ntzey' tc'u'j ti' cych'u', jax ju'x cyey, ntzey'xit cyc'u'ja ti'j tyol Dios sakkix yaa'n tz'il, tu'ntzen cytz'iy tu'n tuj cyocslabla. ³ Ma cyiik'a t-xtalbil Dios jun maj. Chi oca tisen jun tal nee' ma txi' jun maj tch'u', bix tajx mastl. ⁴ Tisen najben jun xak te tk'uk'lel jun jaa', jax ju'x te Kaaw. Jaxin tk'uk'lel kchunk'lal, tisen jun xak'it'z. Ju' tzunj, chil'k'etza tuyaxin. El cyiiq'uen xjal jaxin, pero te Dios, ma jaw tscy'o'n jaxin, bix nimxsen c'ajbelaxin. ⁵ Tisen oj njaw cybincha'n xjal look' tibaj tk'uk'lel jaa' tu'n tbint jun jaa', jax ju'x cyey, cymojobanx cyiiba tuya Kaaw tu'n cyoca tisen jun tja Dios jaa' najla Dios. Bix tisen tej t-xi' cyk'o'n pala oybil te Dios, ju'x cyey, chi ajbena te Dios. Oj nchi ajbena te Dios ju'wa, jax jun oybilkey te Dios, bix tiik'el Dios cyoybila, cuma at cymojobabl cyiiba tuya Jesucristo. ⁶ Ktzki'n jlu, cuma tzin tkba'n tyol Dios cyjulu: "Jey', cwel nk'o'na jun jawnex xak te cytanem nxjala, jun tk'uk'lel jaa' scy'o'n wu'na, bix kej xjal n-oc ke cyc'u'j ti'j ja xak lu, yaa'n nuk cyajx c'oquel ke cyc'u'j ti'j," tzi tyol Dios. ⁷ Ju' tzunj, cyey ma chi ocslana, jawnexen ja xak lu tuj cywitz. Pero te cyej xjal min ma chi ocslan, tzin tkba'n tyol Dios cyjulu: "Jxak el cyiiq'uen kej binchal jaa', ma tz'oc te tk'uk'lel jaa', bix jawnex," tzi tyol Dios. ⁸ Jax tzin tkba'n: "Tuj cywitz xjal, ti'j Clol cye cxe'l nk'o'na, tisen jun xak tcub tuj cybe nchi jaw pitc'aj ti'j, bix tisen jun tzlom nchi jaw jilpaj xjal twitz," tzi tyol Dios. Nchi jaw tz'ak ti'j cuma cycy'i tu'n toc cybi'n. Ju' tzunj, il ti'j nchi jaw tz'ak.

Ejee' kej xjal scy'o'n tu'n Dios

⁹ Perotzen cyey, t-xjal Dioskey. Scy'o'nkey tu'n Dios tu'n cyajbena te kbalte tyolxin cyxol xjal bix tu'n cyajbena tuj taak'en jrey tibaj cykilca. Ttanem Dios sakkixkej, bix taj Dios tu'n cytena nuk te texin. Ma txcen Dios ejee'y tu'n cyetza tuj kloj bix tu'n cytena tuj spi'yen, tu'ntzen t-xi' cykba'na jawnex colbil cye xjal o bint tu'n Dios. ¹⁰ Nejl, yaa'n ttanem Dioskey. Pero ja'lewe, ma chi oca te ttanem Dios. Nejl, min e cyiik'a tlastim Dios. Pero ja'lewe, ma cyiik'a.

Il ti'j cbinel tajbil Dios ku'n

¹¹ Key ocslal n-oc cyak'a weya, tisen jun wikxilt xjalkej cyxol xjal te twitz tx'otx'. Nuk jun rato ete'y tzalu. Ju' tzunj, cxe'l ncubsa'na nwitza cyey tu'n mi'n txi' cynimana tajbil cynaabla aj il, cuma nk'o'jl cynaabla aj il ti' cyanema. ¹² Cxe'l cyii'na cychunk'lala tuj tumel cywitz xjal yaa'n ocslal, tu'ntzen toc cycyeyen cybinchbena ba'n. Amale nchi yolet ka' cyi'ja ja'lewe, pero la' alcye jun k'ij cjawel cynimsa'n tbi Dios, cuma tu'nj n-oc cycyeyen jba'n nbint cyu'na, chi ocslaltzen ti' Dios.

¹³ Il ti'j cxe'l cynimana cykilca cawel tcub cyxol xjal, cuma ju' taj Kaaw. Cynimanx jnintzaj cawel, ¹⁴ bix jax cynimanx ke gobernador, cuma sma'nke tu'n cawel tu'n cyk'onte cycastiwa kej xjal binchal ka', bix tu'n cyyolen ba'n cyi'j xjal binchal ba'n. ¹⁵ Taj Dios tu'n cybinchantiya ba'n tu'n tmaket cytzi kej xjal cycy'i jaxxix yol cuma mintii' cynaabl ti'j. ¹⁶ Ma ttzakpi Dios ejee'y, pero yaa'n tu'n cyxi' lpey ti'j tik'ch cyaja, sino tu'n tbint tajbil Dios cyu'na. ¹⁷ Ju' tzunj, cyk'onx nimbil te cykilca. C'oqu'uelxix cyak' ocslal cyey. Cybi'y Dios. Bix cynimanxa kej cawel.

¹⁸ Yaltzen key xjal nchi ak'anana tjak' tcawbil cypatróna, tu'n toc cybi'na cyyol, yaa'n nuk o'cx tu'n t-xi' cynimana ke patrón ba'n cynaabl, pero jax ju'x tu'n t-xi' cynimana ke patrón cyiw. ¹⁹ Amale cyiwet tcawbil cypatróna cyibaja, pero cynimanxa jaxin tuya cypasensyey, tu'n cynimana Dios, cuma ba'n jlu tuj twitz Dios. ²⁰ Ka ma chi binchana jun ka' ti' cypatróna, bix ma tz'oc cypju'n ejee'y tu'n t'aj cyila, z'ti c'ajbela ka ma tziy'x cycastiwiya cyu'na tuya cypasensyey? Pero ka ma chi binchana nuk ba'n, pero n-ocx tpu'u'n cypatróna ejee'y, bix ka ma tziy'x ja q'uixc'aj lu cyu'na tuya cypasensyey, ba'ntzen nchi e'ley tuj twitz Dios. ²¹ At-xit cypasensyey, cuma ma chi txqueta tu'n Dios tu'n cyxi' lpey ti'j yec'bil e cyaj tk'o'n Cristo. Iy'x q'uixc'aj tu'n Cristo, bix tu'nj q'uixc'aj iy'x tu'nxin, ma tz'el ba'n te cyey. ²² Mintii' il e tbinchaxin, bix min e x'tak'enxin. ²³ Tej toc cyxmuccha'n xjal jaxin, mintii' ak'xin. Tej tiy'x q'uixc'aj tu'nxin cyu'n xjal, min e xi' tkanenxin te Dios tu'n tcub cycastiwa. Nuk o'cx e xi' tk'on tiibxin tuj tk'ab Dios, jxin binchal cykilca jiquenxix. ²⁴ Jaxxin e xi' ikente kil tej tjaw k'o'n t-xumlalxin twitz cruz, tu'ntzen tel ttzakpi'nxin ejoo' ti'j knaabl aj il, tu'n kbinchante ba'n. Tu'nj tcyimlenxin ma ko cleta. ²⁵ Nejl, otk chi el tzipeta tisen ke carnel. Pero ja'lewe, ma chi ul meltz'aja tuya Cristo, ja cyelc cyey bix c'o'jal cyanema.

3

Ti tten tu'n tnajan xinak tuya t-xu'l

¹ Jax ju'x cyey xuuj, il ti'j chi yee'ala cynimbila. Cyniman'x cychmila. Ka yaa'n ocslal ke cychmila, bix ka cycy'i cyyolena ti' tyol Dios, pero ka ma cub cycuyana cyyol, kape at jun k'ij chi ocslal ti' Dios tu'nj cynimbila. ² Kape chi ocslal oj toc cycye'yen cynimbila bix jun cychunk'lala sakxix. ³ Mi'n cybinchay nuk tu'n ba'n cycye'nquey. Cxebjil cywi'y, bix cycwencha oro, bix cyxbalena wi'yel, pero mi'n tz'oc cyk'o'na te cynimbil cyiiba. ⁴ Mas il ti'j tu'n tocxix cycwenta ti'j cyanema, ka ba'n bix ka yaa'n ba'n. Tenxit cyanema maans bix txubtx. Pjel cyxbalena, pero cyanema tbanelxix, mi'n baj, bix mas il ti'j jlu tuj twitz Dios. ⁵ Jatxe ootxa, kej xuuj cyxol ttanem Dios mas oc cyk'o'nxuj cywcent ti'j tten cyanemxuj twitz ti'n cycye'ncxuj. Oc kexuj cyc'u'jxuj ti' Dios, bix e xi' cynimanxuj cychmilxuj. Ju' tzunj, chi oquel lpey ti'j cyyec'bilxuj. ⁶ Jun yec'bil te cyey e cyaj tk'o'n Sara, t-xu'l Abraham te ootxa. Oc thi'nxuj tyol tchmilxuj, bix oc tk'o'nxuj tbinxin te "Taata." Chi oquela tisen Sara ka ma chi binchay jba'n bix mintii' tzen ttzi cychmila cyi'ja.

⁷ Yaltzen cyey chmilbaj, chi ten tzuna tuj tumel. Chi najana tuya cyxu'la tuya cynaabla ba'n. Q'uelel cyni'ya ti'j yaa'n nimxix cyipenxuj cywitza. Cyk'onxa nimbil cyexuj, tu'ntzen mi'n ten jun xitbil oj nchi na'na Dios, cuma cyca'bela ma cyiik'a cychunk'lala te junx maj.

Kej niy'x q'uixc'aj cyu'n tu'nj nchi binchan ba'n

⁸ Yaltzen te cykilca key, chi bet-xita cykilcakey junx. At-xit cyanema cyxola, bix c'oquel cyak' ocslal cyey, cuma tisen cyitz'en cyiiba tu'nj cyocslabla. Q'uelel cyni'ya ti'j ka at il ta' juntl, bix chi oca maans. ⁹ Mi'n xe'len cyu'na oj toc bint jun ka' cyi'ja bix oj cyoc yasen xjal cyi'ja, sino cykanenx te Dios tu'n tk'onte jun ba'n te cye. E tzaj ttxco'n Dios ejee'y tu'n ttzaj tk'o'n jun ba'n te cyey. Ju' tzunj, cyk'o'nxa jun ba'n te cykilca. ¹⁰ Tzin tkba'n tyol Dios cyjulu: "Alcye taj tu'n tten nim k'ij twitz tx'otx', bix tu'n tnoj tchunk'lal tuya ba'n, il ti'j tu'n t'cub ttzyu'n ttzi, tu'n mi'n yolen yaa'n ba'n, bix tu'n mi'n cub tsbu'n juntl. ¹¹ Bix il ti'j tu'n tcyaj tcyeyen jka' bix tu'n tbinchante ba'n bix tu'n toc tipen ti'j tu'n tten tuj ttzyal cyuya xjal. ¹² Cyk'o'nc cyipena ti'j tu'n t'binx t'jlu cyu'na, cuma tzin t'ojla'n Dios kej xjal ba'n nbint cyu'n, bix tzin t'binx Dios oj nchi na'na ti'jxin. Pero kej xjal ka' nbint cyu'n, ka'ke tuj twitz Dios," tzi tyol Dios.

¹³ Cxe'l nkanena cyey, ka ma tz'oc cyk'on cyiiba tu'n cybinchantiya nuk jaj ba'n, z'nchi k'ojlelpale xjal cyi'ja? Min. ¹⁴ Pero ka ma k'ojl jun xjal cyi'ja tu'n t'aj tzin cybincha'na ba'n, jun xtabil jlu tu'n niy'x q'uixc'aj cyu'na tuj taak'en Dios. Ju' tzunj, mi'n tzaj ttzi cyi'ja, bix mi'n baj cyc'u'ja. ¹⁵ Mi'n chi xoba cywitz xjal, sino nuket chi nimanxa Cristo tuj cyanema, cuma Kaaw. Bix binne cytena tu'n t-xi' cytx'olba'na cye xjal ka ma tzaj cykanen cyey tiken ma tz'oc ke cyc'u'ja ti' Cristo. Pero chebe cykbanxa cye, bix tuya cynimbila cywitz.

¹⁶ Cybinchama nuk jaj ba'n, tu'n junx ta' cybinchbena tuyaj tzin tkba'n cyanema. Ojtzten tchic'ajax mintii' cypaltiya, ctzaaltzen cych'ixew kej xjal nchi yasen cyi'ja tu'n cybinchbena ba'n bix cyocslabla ti' Cristo. ¹⁷ Ka taj Dios, mas ba'n tu'n tiy'x q'uixc'aj cyu'na tu'n t'aj jba'n nbint cyu'na, twitz tu'n t'cub castiwa cyibaja tu'n t'aj jyaa'n ba'n nbint cyu'na. ¹⁸ Cycye'yenxa jun yec'bil e cyaj tk'o'n Cristo. Mintii' til, pero e cyim tu'n klaj yaa'n t'z'aklxix ko', tu'n tchjet kil te junx maj, tu'ntzen kpon tii'n tuya Dios. E cub byet t-xumlal, pero e jatz titz'jsa'n Espiritu Santo jaxin tuj cyamecy. ¹⁹ Bix tuj ja tyem lu, e cu'x Cristo tu'n t-xi' tk'umen cyej xjal otk chi cyim bix jpu'nke tjak' tx'otx'. ²⁰ Jatxe ootxa min e cybi kej xjal lu Dios. Tisen tzunj, tej t'ajw tbincha'n Noé jun barc, nim ayon Dios cyi'j xjal tu'n cyajtz meltz'aj tuya Dios, bix tuya nim cypasensya, pero cycy'i. Nuk wajxak xjal e clet tuj barc tuj a'. ²¹ Bix tisen e clet ke Noé tu'n barc, ma chi cleta tu'nj cymojbabl cyiiba tuya Jesucristo, cuma e jatz itz'jxin juntl maj tuj cyamecy. Min e cletkey tu'nj costumbre tu'n t'ajw a' cywi'y, sino cuma e xi' cykanena te Dios tu'n ttzaj tk'o'n cyey jun ac'aj bix sakxix cynaabla. ²² Yal te Jesucristo, ma pon tuj cya'j, bix at tuj tmank'ab Dios. Bix at cykilca ángel bix biman bix cawel tjak' tcawbil.

4

Tu'n kajben tuya jun koclen o tzaj tk'o'n Dios

¹ Cuma iy'x q'uixc'aj tu'n Cristo tuya t-xumlal bix e cyim tu'n tchjet kil, ju' tzunj il ti'j tu'n tten jun cynaabla tisen te Cristo. Cuma tu'nj cymojbabl cyiiba ti'j tcyimlen Cristo, mintii'tl cyaja ti' il. ² Ma cyaj cyk'o'na il tu'n cyxi' lpey ti'j tajbil Dios cykilca k'ij twitz tx'otx', yaa'n ti'j cykilca taj cyxumlala. ³ Nejl, nim ka' e bint cyu'na, tisenj nbint cyu'n kej xjal min cytzi'n Dios. Min e cytzyu cyiiba twitz'aj tajbil cyxumlala, sino oc cybi'na tik'ch taj cynaabla aj il. Nuk jaj pajbaj lepckey ti'j. E bolayinkej, bix nim sitz'bil yaa'n tumel ete'y. Bix juntl ka' e bint cyu'na. Oc na'nkey cywitz sant. ⁴ Bix cuma ma cyaj cycye'yena cykilca ja lu, bix mi'ntl nchi binchana ka' cyuya kej cyuyey te nejl, nchi jawtzen klee' cyi'ja, bix nchi xmucchan

cyi'ja. ⁵ Pero tzul jun k'ij cyk'a' xjal cycwent twitz Cristo, jaj xjal binne tten tu'n tul k'olecte stis te cykilca xjal, kej xjal i'tzx oj tul, bix kej xjal otk chi cyim. ⁶ Yal tzunkej ttanem Dios o chi cyim, mi'n baj cyc'u'ja cyi'j, cuma e k'umj yol te colbil cye, tu'ntzen tten cychunk'lal te junx maj, tisenj te Dios, amale ilet ti'j e cyimke tisen niy'tl xjal.

⁷ Ntzej lk'e jk'ij tu'n tzej cykilca. Ju' tzunj, tenx cynaabla bix cwelxix cytzyun cyiiba, tu'ntzen tbinnt cyu'na tu'n cyna'na Dios. ⁸ Mas il ti'j, c'oquel cyak' cyuyey cye tuya cykil cyc'u'ja, cuma ka at tk'ak'bil cyc'u'ja cyi' cabtl, yaa'n cyiw tu'n tnajset cyil cyu'na. ⁹ Cyk'onxa posada cyxola, bix yaa'n tuya nbaj cyc'u'ja. ¹⁰ Bix chi ajbenxa cye ocslal tuya la' alceyey cyaak'ena ma tak' Dios cyey, tu'n cyajbena te Dios, cuma o tzaj tk'o'n te jaca juun cyey tuya jun ak'untl ba'n tbinnt cyu'na. ¹¹ Ka ma tzaj tk'o'n Dios cyey tu'n t-xi' cyk'umena tyol cywytz ocslal, chi k'umenxita jaxxix tyol Dios. Bix ka ma tak' Dios cyey tu'n cyajbena cye cabtl, chi ajbena tuya cykil cyipena ma tak' Dios cyey, tu'ntzen tjaw nimsa'n Dios tuj cykilca nchi binchana tu'n Jesucristo. Jawxit nimset tbi Dios, bix cawenxit te junx maj. Ju' ttena.

Q'uiyey q'uixc'aj ku'n cuma ocslal ko'

¹² Key ocslal n-oc cyak'a weya, mi'n chi jaw klee'y oj n-oc pena cyiw cyi'ja tisen jun k'ak'. C'oquel q'uixc'aj cyi'ja tu'n tel niy'bij cyi'ja, bix yaa'n jun wixxitl jlu. ¹³ Oj nbaj jlu, chi tzalaja, cuma at cyoclena tu'n tiy'x q'uixc'aj cyu'na tisen e bint tu'n Cristo. Ka ma tziy'x q'uixc'aj tu'n tlaj cyocslabla ti'j Cristo, nim chi tzalajela oj tyeec'an tiib Cristo tu'n ttzyet tcawbil jawnex. ¹⁴ Ka ma chi yasen xjal cyi'ja cuma ocslalkey ti'j Cristo, chi tzalaja, cuma tceb jawnex Espiritu Santo cyibaja, sma'n tu'n Dios te yec'bil ttanem Dioskey. Xmucca'n Espiritu Santo cyu'n xjal, pero cyey, njaw cynimsa'na tbi. ¹⁵ Ka at jun cyey niy'x q'uixc'aj tu'n, cutzit ka yaa'n tu'n tlaj nbyon, bix ka tu'n tlaj n-alk'an, bix ka tu'n tlaj nbinchana yaa'n ba'n, bix ka tu'n tlaj nuk n-xi' tzi cyja xjal. ¹⁶ Pero ka ma tziy'x q'uixc'aj cyu'na cuma ocslalkey, mi'n tzaj cych'ixewa. O'cx tu'n t-xi' cyk'o'na chjonte te Dios ti'j ocslalkey ti' Cristo.

¹⁷ Key ocslal, ma pon tumel tu'n ttzaj tk'o'n Dios castiwa cyibaj xjal. Katzen ma tak' Dios tu'n toc pena ki'j, ejoo' tcewal Dios, zti pjel cyej xjal min ma chi niman jyol ti'j colbil cye ma tzaj tk'o'n Dios? ¹⁸ Tzin tkba'n tyol Dios te ootxa cyjulu: "Ka ma tzaj tk'o'n Dios tu'n toc pena ti'j jun xjal jiquen twitz Dios, yaj tzunj xjal yaa'n jiquen bix aj il, zti pjel te?" tzi tyol Dios.

¹⁹ Ju' tzunj, oj tiy' q'uixc'aj cywitza cuma taj Dios, mi'n cyaj cycye'yena tu'n cyokxenena cyiiba ti'j, bix tu'n cybinchana ba'n, cuma jaxin binchalte cykilca, bix ba'n tu'n toc ke cyc'u'ja ti'jxin.

5

Tej t-xi' tk'o'n Pedro cynaabl kej nejenel cyxol ocslal

¹ Key nejenel cyxola, jaj ju'x weya jun nejenel cyxol ocslal kena cyuyey. Oc ncyey'ena tej tiy'x q'uixc'aj tu'n Cristo. Bix jaan kena cyuyena cwiik'ela jun jawnex nchunk'lala oj tyeec'an tiib Cristo. Ju' tzunj, nxi' nk'o'na consejo cyey. ² Tisen jun cylel nc'oila'n ke tcarnel tu'n, cyc'ojlanxa ke ocslal ma cyaj tk'o'n Dios tuj cycwenta. Mi'n chi cawena cyibaj cuma ja cyaak'ena, sino tu'n nxi' cykil cyanema, bix yaa'n nuk tu'n cynamana twi' cyc'u'ja, sino tuya cykil cyc'u'ja. ³ Bix mi'n t'oc cyan'na cyiiba nuk tu'n cyoca te cawel cyibaj kej ocslal ete' tyol cycwenta. Mas ba'n tu'n cyoca te jun yec'bil ba'n, tu'n cyoc lpe ocslal cyi'ja. ⁴ Ojzen tul meltz'aj Nejenel cye cylel, ccyiik'ela jun cycotza jawnex mintii' t'ajlel.

⁵ Yaltzen key xinak cwalx, cxe'l cyeeec'ana cynimbila cye nejenel tuj tja Dios. Bix cykilca key, chi oca maans cyxolxa, cuma at tk'oj Dios cyi' kej xjal nuk nbaj cyniman cyiib, pero kej xjal n-oc cyk'on cyiib te ch'in, tzin tk'o'n Dios t-xalbil cye. ⁶ Ju' tzunj, c'oquel cyk'on cyiiba te ch'in twitz jawnex Dios te nim tipemal, tu'ntzen ttzaj tk'o'n cyey tu'n cyoca te nim oj tpon tumel. ⁷ Bix cykilca najkelen cyc'u'ja ti'j, cyk'onxa tuj tcewnt Dios, cuma tzin c'ojlan Dios cyi'ja.

⁸ Cytzyun cyiiba twitz il, bix cyc'ojlanx cyiiba, cuma nk'ojl taaw il cyi'ja, bix tisen n-oc lpe jun leon ti'j jun masat tu'n t-xi' t'cho'n, jaj ju'xa n-oc tipen taaw il ti'j ti' tten tu'n cytzyeta tu'n tuj tk'ab. ⁹ Pero chi we'xixa twitz, bix chi tena cyiw tuj cyocslabla, cuma cytzi'na cykilcatl ocslal twitz tx'otx' niy'x q'uixc'aj cyu'n tisen niy'x cyu'na. ¹⁰ Cyabajlencixitzen yaa'n cab k'ij, ctz'aksaltzen Dios cyey, bix cjawel twa'bxin ejee'y, bix k'olte cyipemala, bix cyiwsalte cyey, jaj Dios ntzej k'onte cykil xtalbil, bix ma ttxoc ejoo' tu'n kten tuya te junx maj tuj jawnex tcawbil tu'n Jesucristo. ¹¹ Jawxit nimset tbi Dios, bix tu'n tcewnt tibaj cykilca te junx maj! Ju'xit tzuna.

Manc'bil yol cye ocslal

¹² Cxe'l tii'n jxin Silvano ja u'j lu cyey, cuma n-oc kexix nc'u'ja ti'jxin. Tu'n ja ca'ba oxe yol lu ma txi' ntz'i'bena cyey, cutzit cywix cyocslabla tu'n, bix tu'n mi'n cyaj cycye'yena jaxxix yol ti'j t-xalbil Dios. ¹³ Kej ocslal tzalu tuj Babilonia, junx ete' cyuyey tuj cyocslabla, bix nxi' cyk'o'n jun cyk'olbebl te cyey. Jax ju'x ncwala Marcos, nxi' tk'o'n tk'olbebl te cyey. ¹⁴ Jax ju'x

cyey cyxola, cyk'olben cyiiba tuya tk'ak'bil cye'u'ja cyel cyiiba. Chi tenxita tuj ttžyal, ejee'y at cyocslabla ti' Cristo.

Jun tcab u'j e xi' ttz'i'ben apóstol Pedro

Jun k'olbebl tu'n apóstol Pedro

¹ Inayena Simón Pedro. Jun t-ak'anal bix jun t-xel Jesucristo kena. Nxi' ntz'i'bena ja u'j lu te cyey xjal ma chi ocllana ti' Cristo tisen keya, ejoo'ya t-xel Jesús. Clol ke bix Diosxin, bix cuma jiqenxin, ma k'oj ke tu'n koc te ocllal. ² Tzaxit nim xtalbil cyey bix chi tenxita tuj ttz'yal tu'nj cytzki'na Dios tuya Kaaw Jesús.

Ti tten cychunk'lal ke ocllal

³ Tu'nj tipemalxin bix tu'nj ktzki'n jaxin, ma tzaj tk'o'nxin ke cykilca najben tu'n tten kchunk'lal te junx maj bix tu'n t-xi' kii'n kchunk'lal tisen taj Dios. Ma ttococin ejoo' tu'n kten tuyaxin tuj tcawbilxin jawnex bix tu'n koc te ttanemxin tbanelxix. ⁴ Tu'nj tipemalxin bix tu'nj ktzki'n jaxin, ma cyaj tk'o'nxin jawnex tyolxin te ke tu'n t-xi' kii'n jun knaabljiquen tisenj texin Dios bix tu'n ktzakpet ti'j tik'ch yaa'n ba'n at twitz tx'otx'.

⁵ Cuma ma tzaj tk'o'n Dios xtalbil te ke tu'n koc te ttanem jiquen, ju' tzunj, yaa'n nuk chi ocllala ti' Cristo, pero jax ju'xa c'oquel cyipena ti'j tu'n cytena jiquenxix. Bix yaa'n nuk jaj lu, sino jax ju'x cyk'o'nc cyipena ti'j tu'n tel cyni'ya ti'j. ⁶ Bix yaa'n nuk tu'n tel cyni'ya ti'j. Jax ju'x cyk'o'nc cyipena ti'j tu'n ttzyunte cyiiba twitz il. Bix yaa'n o'cx tu'n ttzyun cyiiba. Jax ju'x tu'n tten cypasensyey. Bix yaa'n nuk o'cx jlu. Jax ju'x tu'n t-xi' cyii'na cynaabla tisen taj Dios. ⁷ Bix yaa'n nuk o'cx jlu. Jax ju'x tu'n toc cyak' ke niy'tl ocllal cyey. Bix yaa'n nuk o'cx tu'n toc cyak' ocllal cyey. Jax ju'x tu'n toc cyak' cykilca xjal cyey. ⁸ Katzen ma bint cykilca jlu cyu'na bix ka tz'iyne tz'iy cynaabla ju'wa, nchi ajben tzuna, bix c'ajbel jlu tu'n cytzki'na ja Kaaw Jesucristo. ⁹ Pero ka min nbint cyu'na tu'n cytz'iyia tuj cyocslabla ju'wa, tisentzen sjuman ti' cywitza min nak', bix ka moškey, cuma ma t'el tuj cyc'u'ja o chi txjeta tu'nxin ti' cyila te ootxa. ¹⁰ Ju' tzunj, key ocllal, juntl maj cxe'l nkba'na cyey tu'n toc cyipena ti'j tu'n cytena jiquenxix, tu'ntzen ccyaj tena tuj cyocslabla. E ttoc Dios ejee'y bix e tscy'oxin ejee'y tu'n cyoca te t-xjalxin. Ka ma tz'oc cyipena ti'j ju'wa, mi'n che'xa tuj il. ¹¹ Cykilcaj ma txi' nkba'na cyey, ka nbint cyu'na ju'wa, tuya cykilc tu'u'j Kaaw Jesucristo, Clol ke, ctk'a' tu'n cyoca tuj lugar jaa' ccawel te junx maj.

¹² Ilxsen ti'j jyol ma txi' nkba'na cyey, tu'n ccywixia mas tuj cyocslabla. Ju' tzunj, mi'n cyaj nk'o'na tu'n t-xi' nkba'na ja consejo lu nim maj te cyey, amale elet cyni'ya ti'j bix ma cub cyi'ja wu'na ja'lewe ka jaxxix nyola. ¹³ Ti'j lux kena i'tza, ba'n tuj nwitzu tu'n tcyaj nk'umena cyey ti'j lu, tu'ntzen tjaw cyitz'jsa'na cynaabla bix tu'n tul tuj cyc'u'ja. ¹⁴ Il ti'j cyjel nk'umena cyey, cuma n-el nni'ya ti'j ch'ixc'a tu'n taj wanema cjawetz tuj nxumlala, cuma o tzaj tyeec'an Kaaw Jesucristo weya. ¹⁵ Lo'j lux kena i'tza, c'oquel wipena ti'j tu'n tcyaj wokxenena cyey, tu'ntzen tul nyola tuj cyc'u'ja oj ncyima.

Kej apóstol o cyil tipemal Jesucristo

¹⁶ Tej t-xi' kk'umena cyey, ejoo'ya t-xel Kaaw Jesucristo, ti'j tipemalxin bix ti'j tu'n tul meltz'ajxin juntl maj, yaa'n nko yolena tisenj nic'bil yol tzin cyxnak'tza'n juuntl xnak'tzal xbi'lke pero xtak'ke, cuma oc kcyey'ena tej tul jlet-xin kwitza tuya jawnex tipemalxin. ¹⁷ Oc kcyey'ena tej ttzaj tk'o'n Kman Dios nimbil te Jesús bix e jaw tñimsa'nxin tbi. Bix e kbi'ya tej ttzaj tkba'n Dios jawnex ti'j Tcwal cyjulu: "Ja weya Ncwal jlu n-oc tak' weya. Nimxsen nchin tzalaja ti'j," tzi Dios. ¹⁸ Ejoo'xa e binte kej yol lu tej ttzaj kbet tuj cya'j, tej k'apana twi' witz tuya Jesús jaa' e c'u'la ten Dios. ¹⁹ Bix yaa'n nuk ejoo'ya at kyola ti' Cristo. Jax ju'x at cyol tej tyolel Dios te ootxa jaxxixsen. Ba'n tu'n toc cyc'u'ja ti'j yol jaxxix, tu'ntzen tel cyni'ya ti'j alcey'jiquen bix alcey'xtak'. Tej yol jaxxix tisen jun jul tzaj, tu'n tchic'ajax tik'ch jilel tuj kloj. Cynimanxa jaxxix ojxe tul meltz'aj Kaaw bix q'uelel cyni'ya ti'j te junx maj tuj cyanema, tisen oj n-el kloj oj n-ul k'ij. ²⁰ Il ti'j q'uelel cyni'ya ti'j tej tcub cytz'i'ben ke tyolel Dios tyol Dios twitz t-xak u'j, yaa'n cyexxin cyol e cub cytz'i'ben. ²¹ Bajx cwa' cytz'i'ben ke tyolel Dios cyex cyajbil, sino nuk o'cx ajbenke te Dios. K'i'nkexin tu'n Espíritu Santo, bix nuk tyol Dios e cub cytz'i'benxin.

2

Kejnchi xnak'tzan xtak' yol kxol

¹ Pero cyxol xjal te ootxa, yaa'n nuk o'cx e cypocba tyolel Dios jaxxix. Jax ju'x e ten kej xjal e xi' cykba'n ka tyolel Dioske, pero yaa'n jax cyu'n. Bix jax ju'x ja'lewe, at xnak'tzal xtak' cyxola. Chebe chebe tzin chi xnak'tzan tuya cynaabl xbi'lke pero xtak'ke bix te xitelke. Tzin cykba'n ka mintii' c'ajbela jchojbil tu'n Kaaw tu'n kclet ti' kil. Ju' tzunj, tzin cyjyo'n tu'n tcub castiwa cyibaj, bix ch'innch'e oj tcub. ² Nim xjal cyxola chi oquel lpe ti'j cyyec'bil, tu'n

tbint nuk jaj tajbil cyxumlal cyu'n, bixsen chi yolel xjal yaa'n ba'n ti'j kocslabl jaxxix. ³ Kej xnak'tzal xtak' cyaj tu'n tel cyii'n cypwaka, bix ju' tzunj, tzin cyyajla'nkey tuya cyol xtak'.

Pero jatxe ootxa e cub tñinc'u'n Dios tu'n tcub tk'o'n cycastiwa, bix ch'ix tpon tumel tu'n cyxi' tuj il. ⁴ Jaxxix cwel tk'o'nxin cycastiwa, cuma jaxxix e xi' tk'o'nxin cycastiwa kej tsanjelxin tuj cya'j tej cybinchante il. E cu'tz t-xoo'nxin ejee' maa tuj jun lugar kloj Tártaro tbi, te c'u'lcye joo'c'tzen nchi ayon jk'ij tu'n cyocx tuj k'ak'. ⁵ Jax ju'x e tazaj tk'o'n Dios cycastiwa kej xjal e teni jatxe ootxa. Tej tcub tmaxi'nxin entera twitz tx'otx' tuya a', e cub baj cykilca xjal aj il. O'cx tej xin tyolel Dios jiquen, Noé, tuya wuuktl ke te tjaxin, e clet tu'n Dios. ⁶ Jax ju'x e tazaj tk'o'n Dios cycastiwa kej aj Sodoma bix kej aj Gomorra. E cu'tz k'ak' cyibaj, bi'x e cub tza'jex kej ca'ba tñom lu, tu'n cyajben te jun yec'bil te cyej xjal cycy'i Dios te mas yaj. ⁷ Pero e clet jxin Lot tu'n Dios twitz k'ak'. Jiquenxix te Lot, bix e tazaj nim tbixsin tu'n tlaj cybinchben xinak ka'xsen tej cyoc ipan cyi'j xinakxtl. ⁸ Najl Lot cyxol xjal lu, bix cykil k'ij, tej toc tcye'yenxin cybinchben ka' bix tej tbintexin, ocxsen nim bis tuj tanemxin, cuma ba'n xjalxin bix jiquenxsen tnaablxin.

⁹ Katzen o bint tu'n Dios tu'n e cub tk'o'n cycastiwa aj il te nejl, bix ka o tco'pan ttanem tuj cyk'ab binchal il, jaxsen ju'x cbinel tu'nxin ja'lewe tu'n mi'n chi cub tz'aka tuj j-il cyaj xnak'tzal xtak' tu'n tbint cyu'na, bix at tipemalxin tu'n tcub ttzyu'nxin ejee' ojxe tpon tumel tu'n cyxi' tuj k'ak' te junx maj. ¹⁰ Bix mas ctzaal tk'oj Dios cyi' kej xjal nche'x lpe nuk ti'j tajbil cyxumlal bix kej xjal n-el cyiiq'uen ley. Kej xnak'tzal lu, mintii' tzi cyi'j, bix iy'nen tibaj cynaabl. Mintii' ch'in tzi cyi'j tu'n cyxmucchan cyi'j ke jawnex cawel. ¹¹ Pero ke tsanjel Dios tuj cya'j, amale atet mas cyipemal bix mas cyoclen cywitz xnak'tzal, pero min chi yolen ka' cyi'j xnak'tzal xtak' twitz Dios.

¹² Pero kej xnak'tzal xtak' lu, tisen jilke nchi itz'j nuk tu'n cytzyet bix tu'n ccyyim. Min chi ximan ti'j, sino nuk nche'x lpe ti'j alcye tzin tkba'n cyxumlal. Nchi yolen xnak'tzal ka' ti'j jmin tz'el cyniy' ti'j, pero tisen nchi cub byet ke jil cyu'n xjal, ju'xsen chi xe'l xnak'tzal tuj castiwa tu'n Dios. ¹³ Tuj cywitz, chi camal tu'nj cybinchben, pero cxe'l tz'ak cyczotz nchi ayon ti'j. Yaa'n nuk te koniyan, sino jax ju'x te k'ij nche'x lpe ti'j nuk tik'ch taj cyxumlal. Ejee' tzunja tisen jun tz'il ti' xbalen sakxix, cuma oj nchi chmet cyuyey te iy'salte santa cena, nuk o'cx cyaj ti'j tu'n cynoj. ¹⁴ Oj n-oc ccyce'yen ke xuuj, nuk nchi k'a'bec tu'n tbint pajlel cyu'n. Min tz'el cygana tu'n cybinchan il cyuya xuuj. Ncub cyi' kej ocslal yaa'n cyiw tuj cyocslabl cyu'n tu'n cybinchante jyaa'n ba'n cyuya. Ma nak'et cyanem nuk tu'n toc cyk'a'ben nuk tik'ch cye cyuyey. Cwel tk'o'n castiwa Dios cyibaj. ¹⁵ Ma cyaj ccyce'yen jbe jiquen, bix ma chi tzpet. Ma chi oc lpe ti'j tyec'bil jxin tyolel Dios Balaam, tcwal Beor. Tu'n tcambilxin pwak, e tajbe Balaam tu'n tcyaj tsbu'n ttanem Dios. ¹⁶ Pero cuma e tajbe Balaam tu'n thinchin il, at jun oc ilente jaxin. Oc ile't-xin tu'n thurxin mixbe yolen. E yolenjil tisen jun xjal, tu'n mi'n tz'oc taawjil te jun yuwin xjal.

¹⁷ Kej xnak'tzal xtak' lu tisen jun twi' a' mintii' a' tzin tk'o'n bix tisen jun muj k'i'n tu'n cyk'i'k pero mintii' jbal tzin tk'o'n, cuma mintii' cynaabl n-etz oj nchi yolen. At jun jawnex kloj nayon cyi'j. ¹⁸ Nchi yolen tuya jawnex cyol pero mintii' cynaabl ti'j, tu'ntzen tcub cyi' ocslal cyu'n tu'n cyxi' lpe ti'j nuk tik'ch ka' taj cyxumlal. Bix mas n-oc cyipen ti'j tu'n tcub cyi' kej ocslal cyu'n, ejee'x o chi etz ok cyxol kej tzpetsal xjal pero yaa'n cyiwke tuj cyocslabl. ¹⁹ Tzin cykba'n mintii' il ti'j tu'n cyten xjal tjak' tley Dios, cuma at tzakpibl tu'n tbint nuk tik'ch taj kxumlal. Pero tu'nj lu n-el cyiiq'uen tcawbil Dios. Ete'cxsen tjak' tcawbil cyxumlal, cuma ka cyk'on cyiib tuya alcye taj cyxumlal, jatzen cyaawa. ²⁰ Nejl, el tzakpetke ti'j ka' at twitz tx'otx' tu'nj cytzki'n Clol ke, Kaaw Jesucristo, pero ja'lewe ma chi cub tz'ak juntl maj tu'nj il bix ma chi ocx tjak' tcawbil. Ju' tzunj, masxsen tuj il ete' twitz nejl. ²¹ Masxsetle ba'n te cye nuket min e xi' cyii'n be jiquen twitz tu'n tcyaj ccyce'yen xjan tley Dios ti'j colbil e tazaj k'o'n te cye. ²² Jma bint cyu'n tisenj nbyan ti' jun yol nkbaj cyxol xjal. Tzin tkba'n cyjulu: "Ke txyan nchi aj meltz'aj lo'lte cyxa'b." Bix at juntl yol tzin tkba'n cyjulu: "Ke boch oj nbaj txjet cyi'j, nche'x juntl maj tuj xook'l," tzi yol. Ju'tzen e baj cyej xin xnak'tzal xtak' aj meltz'ajkexin tjak' tcawbil taj cyxumlal.

3

Oj tul juntl maj Kaaw

¹ Key ocslal n-oc cyak'a weya, ja tcab u'j lu nxi' ntz'i'bena te cyej tu'n tcyaj nk'umena te cyej ti'j xnak'tzibil jaxxix, tu'ntzen t-xi' cyii'na jun cynaabla tz'aklxix. ² Mi'n tz'el cyool jxin xjan tyolel Dios te ootxa tuj cye'u'ja, bix jyol e tkba jxin Kaaw, Clol ke, bix jk'i'n cyu'nj xin t-xel Jesús cyej. ³ Ilxix ti'j q'uelel cyni'ya ti'j cyuj manc'bil k'ij chi ul juntl wik xjal te xmucchalte cyej cuma nchi ayona oj tul meltz'aj Jesús. Cuma nuk tik'ch cyajbil yaa'n ba'n cbinel cyu'n. ⁴ Cykba' cyjulu: "Tzin tkba'n tyol Dios tzul meltz'aj Cristo, pero nuk ten. ¿Ti ma baj ti'j yol lu? Jatxe tej ccyyim t-xel Jesús, tenx cykilca tisex tej tbint twitz tx'otx'," tzi

cybel. ⁵ Pero yaa'n jax cyyol ka ttenx cykilca jatxe tej tbint twitz tx'otx', cuma el cyiiq'uen e cub xiten Dios twitz tx'otx' jun maj. Tej tbinchante Dios twitz cya'j bix twitz tx'otx' tuya tyol tuj tneel, e xi' tkba'n tu'n tcub pax a', tu'n tcyaj jun tkiy' a' te jawne tibajxe cya'j, bix tu'n tcyaj juntl tkiy' a' te cubne. ⁶ Tu'nj a' e cyaj tibajxe cya'j, e cub xiten Dios cykilca twitz tx'otx' tej tcyaj twitz tx'otx' tjak' a'. ⁷ Jax ju'x cwel xiten Dios twitz cya'j bix twitz tx'otx' te ja'lewe. Tzyu'nke tu'nx tyol Dios tu'n cyocx tuj k'ak' oj tpon k'ij tu'n cypon ke aj il tuj xkel twitz Dios.

⁸ Key ocslal n-oc cyak'a weya, kape tuj cywitza nimxsen tyem nayon Kaaw ti'j tu'n tul meltz'aj. Pero tz'el cyni'ya ti'j lu: Tuj twitz Kaaw, jun k'ij junx ta' tisen jun mil jnabk'i, bix jun mil jnabk'i junx ta' tisen jun k'ij. ⁹ Mi'n yajtl Cristo tu'n tjapan baj tuya jun yol tu'n tul meltz'aj, tisen tzin cykba'n juun xjal, sino nayon cyi'ja tuya pasensya. Tcy'ixin tu'n t-xi' jun xjal tuj il. Nuk o'cx tajxin tu'n cyajtz meltz'aj cykilca xjal tuya Dios. ¹⁰ Jaxxixsen tzul meltz'aj Kaaw, bix tzulxin jun k'ij mintii' tumel, tisen jun alak' ch'innch'e oj ntzaj te koniyan. Bix tuj tzunj k'ij lu oj tul meltz'ajxin, pjel twitz cya'j tuya jun tk'ajk'ajel tisen oj najkelen tken k'ak' tuj c'ul. Cwel patet ke che'w tuyax xjaw tuyax k'ij, bix pjel tz'ey' twitz tx'otx' tuya cykilca at twitz tx'otx'.

¹¹ Key ocslal, il ti'j pjel cykilca ju'wa. Ju' tzunj, mas ba'n tu'n t-xi' cynimana Dios bix tu'n tel cypa'n cyiiba ti'j yaa'n ba'n. ¹² Cuma cwel tz'ey' twitz cya'j tu'n k'ak' bix cwel ulj cykilca che'w bix xjaw bix k'ij bix twitz tx'otx' tu'n k'ak' oj tul meltz'aj Kaaw, ju' tzunj, bincham cytena, bix tuya cykil cyc'u'ja chi ayona ti'j k'ij oj tul meltz'aj. ¹³ Pjel twitz cya'j bix twitz tx'otx' te ja'lewe, pero ma cyaj tkba'n Dios cbinel jun ac'aj twitz cya'j bix jun ac'aj twitz tx'otx', jaa' tumel chi temel nuk o'cx kej ba'n. Bix nko ayon ti'j lu.

¹⁴ Key ocslal n-oc cyak'a weya, cuma nchi ayona cyi'j ac'aj twitz cya'j bix twitz tx'otx', ju' tzunj c'oquel cyc'u'ja ti'j tu'n cytena tuj ttz'yal oj tul meltz'aj Kaaw, bix tu'n sakkix ta' cyanema, tu'ntzen mintii' ch'in tz'il cyi'ja bix mintii' cypaltela. ¹⁵ Bix q'uelel cyni'ya ti'j nayon Kaaw tu'n tul meltz'aj, tu'n t-xi' tk'o'n amle'n cye kej xjal kxol mina'x tlet, tu'n ccyajtz meltz'aj tuya Dios.

Jax ju'x Pablo n-oc tak' ke, o txi' ttz'i'ben cyey ti'j ti'j pjel, bix jyol e cub ttz'i'ben, e k'oj te tu'n Dios. ¹⁶ Tuj cykilca u'j nxi' tsm'a'n Pablo, nyolen ti'j ti'j tten oj tul meltz'aj Kaaw bix tu'n binne cytena oj tul. At juun tyol Pablo cyiw tu'n tel kniy' ti'j, bix ju' tzunj, kej ocslal min tz'el cyniy' ti'j bix yaa'n cyiwke tuj cyocslabl, nuk nbaj cymeltz'u'n kej yol lu, tisen nuk nbaj cymeltz'u'n yol tz'i'ben tuj tyol Dios. Ka ma che'x lpe ti'j xtak' yol ju'wa, chi xe'ltzen tuj il.

¹⁷ Key ocslal n-oc cyak'a weya, cuma ya n-el cyni'ya ti'j cyaj xnak'tzal xtak' tu'n cytzpeta tuj cyocslabla, ju' tzunj cyc'ojlanxix cyiiba, tu'ntzen mi'n baj cyc'u'ja ti'j jaxxix yol oj nchi xtak'en, tu'n mi'n cyaj ccyey'ena cyocslabla. ¹⁸ Mas ba'n tu'n cytz'iynen cytz'iyia tuj cyocslabla tu'nj tel cyni'ya ti'j xtalbil o k'oj te cyey tu'n Clol ke, bix tu'nj tel cyni'ya ti' Kaaw Jesucristo. ;Chi nimanxita tbi ja'lewe bix te junx maj! Ju'xit ttena.

Tneel u'j e xi' ttz'i'ben apóstol Juan

Jun Yol I'tz K'olte Kchunk'lal te Junx Maj

¹ Nxi' ntz'i'bena cyey ti'j Cristo, Yol I'tz K'olte Kchunk'lal te Junx Maj. Tej mitkna'x tshint twitz cya'j bix twitz tx'otx', ya attl. O kbi'na jaxin, ejoo'ya t-xelxin, bix o kila tu'n tbak' kwitza. O tz'oc kcyey'ena, bix o tz'oc kmoco'na tu'n kk'aba. ² E tzaj tyeec'an jun chunk'lal tzin tk'o'n Dios, bix oc kcyey'ena. Jaxxix ku'na. Bix keya kaak'en tu'n t-xi' kk'umente cyey ti tten kchunk'lal ntzaj tk'o'n Dios te junx maj. E ten jxjal k'ilte kchunk'lal tuya Kman Dios, bix e tzaj tyeec'an te keya ti tten tnaabl Dios. ³ Bix j-o kila bix j-o kbiya, ja tzunja nxi' kk'umena te cyey, tu'ntzen jax ju'x cyey tenxit cymojbabl cyiiba tuya K'olte cychunk'lala, tisen keya at kmojbabl kiiba. Tzin nkba'na at kmojbabl kiib tuya Kman Dios bix tuya Tcwalxin, Jesucristo. ⁴ Nxi' ntz'i'bena kej yol lu tu'n cytzalaja kuyena.

Ja te Kman Dios jun spi'yen

⁵ Jatzen yolja e kbiya te Jesucristo bix nxi' kk'umena te cyey, cyjulu: Ja te Dios spi'yen, bix mintii' ch'in kloj at tuya. ⁶ Ka nxi' kkba'n at kmojbabl kiib tuya Dios pero ka nko bet tuj kloj, nko xtak'entzen, bix min nko'x lpe ti'j yol jaxxix. ⁷ Pero ka nko bet tuj spi'yen, tisen te Dios at tuj spi'yen, attzen kmojbabl kiib kxolx, bix txjo'n ko' ti' cykilca kil tu'n tcyamecy Jesucristo, Tcwal Dios.

⁸ Katzen nxi' kkba'n mintii' kil, ncub ksbun kiib, cuma min nxi' kocsla'n yol jaxxix ti'j ti kten. ⁹ Pero ka nxi' kkba'n kil twitz Dios, cnajseteltzen kil tu'nxin, bix q'uelel ttxjo'nxin kanem ti' cykilca il, cuma cbinel jma cyaj tkba'nxin, bix at toclen tu'n tcub tnajsa'nxin kil, cuma ma cyim Tcwalxin tu'n tchjet kil. ¹⁰ Pero ka nxi' kkba'n min nko binchan il, nxi' kkba'n ka xtak' Dios, bix min nxi' kocsla'n yol ti'j ti kten.

2

Ja te Cristo jun Onel ke nyolen te kxel twitz Kman Dios

¹ Key wuya nim n-oc cyak'a weya, nxi' ntz'i'bena jyol lu te cyey tu'ntzen mi'n chi binchana il. Pero ka ma chi binchana il, at jun Onel ke nyolen te kxel twitz Kman Dios, ja te Jesucristo. At toclen tu'n tyolen twitz Dios, cuma mintii' til, ² bix cuma e cyim te chojbil kil. Bix yaa'n nuk o'cx tu'n tlaj kil e cyim. E cyim te chojbil cyil cykilca xjal twitz tx'otx'.

³ Ojzten n-oc kbi'n tyol Cristo, n-eltzen kniy' ti'jxin. ⁴ Ka nxi' tkba'n jun xjal: "Ntzki'na Cristo," ka tzi, pero min nbint tley Cristo tu'n, jun xtak' xjal. Min ma tz'ocx yol jaxxix tuj tanem. ⁵ Pero nuk la' alcyexja jun xjal ma tz'oc tbi'n tyol Cristo, tzin tyeec'an ma tzket-xix tk'ak'bil tc'u'j ti' Dios. Tu'nj knimbil ti' Cristo n-el kniy' ti'j at kmojbabl kiib tuya. ⁶ Alcyey xjal tzin tkba'n junx ta' tuya Cristo, ilxix ti'j tu'n t-xi' tii'n tnaabl tisen e bint tu'n Cristo tej tten twitz tx'otx'. ⁷ Key ocslal n-oc cyak'a weya, ja mandamyent lu yaa'n jun ac'aj ley bajx cybiy, sino jun yol o cybiy te ootxa, ja jun yol o cybiy jatxe tuj tneel.

Jun ac'aj ley

⁸ Pero ja'lewe cxe'l ntz'i'bena cyey ti'j jun ley ac'aj, jaj tu'n toc cyak' cyuey cyey. Ja ley lu o cyaj yeec'at tu'n Jesucristo, bix jax ju'x cyey ma cyaj cyueec'ana. Tzinen ta' jlu, cuma nbaj tilel tyem te kloj, bix ma tzyet tyem te spi'yen. ⁹ Ka at jun ocslal tzin tkba'n ka nbet tuj spi'yen, pero n-el tiiq'uen juntl ocslal, lux nbet tuj kloj. ¹⁰ Yaltzen te cyey ocslal n-oc tak' niy'tl ocslal cye, jatzen ocslalja nbet tuj spi'yen. Bix mlay jaw tz'ak tuj tbe, tisen tej tbet tuj kloj nejl. ¹¹ Pero j-ocslal n-el tiiq'uen juntl ocslal, jatzzen ta' tuj kloj bix nbet tuj kloj. N-el tzpet tuj tbe, cuma tisen jun moš tuj kloj.

¹² Key wuya nim n-oc cyak'a weya, nxi' ntz'i'bena cyey cuma o najset cyila tu'n Dios tu'nj o bint tu'n Cristo. ¹³ Key ocslal mas tij, nxi' ntz'i'bena cyey cuma cytzki'na Cristo, jaj xjal at jatxe tuj tneel. Key ocslal maa cwalx, nxi' ntz'i'bena te cyey cuma ma chi xcyey tibaj taaw il.

Key ocslal n-oc cyak'a weya, nxi' ntz'i'bena te cyey cuma ma cytzki'na Kman Dios. ¹⁴ Key ocslal mas tij, nxi' ntz'i'bena cyey cuma cytzki'na jxjal ya attl tej mitkna'x tshint twitz tx'otx', ja te Cristo. Key ocslal maa cwalx, nxi' ntz'i'bena te cyey cuma cyiw ete'y tuj cyocslabla, bix cuma nak'anan Dios tuj cyanema tu'nj tyolxin, bix cuma ma chi xcyey ti'j taaw il.

¹⁵ Mi'n tz'oc cyk'a'bena ti'j achbil te twitz tx'otx' bix tik'ch at twitz tx'otx'. Ka nuk o'cx taj jun xjal tik'ch at twitz tx'otx', min tz'oc tak' Kman Dios te. ¹⁶ Mi'n tz'oc cyk'a'bena alcyey taj kxumlal bix alcyey taj tbak' kwitz, bix mi'n tz'oc cyk'on cyiiba te nintzaj bix tu'n tcnet nimc'a cyu'na, tu'n tjaw nimsan cyiiba, cuma yaa'n junx ta' tk'ak'bil kc'u'j ti'j tik'ch at twitz

tx'otx' tuya tk'ak'bil kc'u'j ti' Dios. ¹⁷ Pjel twitz tx'otx' tuyax cykilca achbil at twitz tx'otx'. Pero tej xjal nbinchan tajbil Dios, ctemel te junx maj.

Tzul jun jawnex x'tak' xjal k'ojlel ti' Cristo

¹⁸ Key wuya n-oc cyak'a weya, ma ko ocx cyuj manc'bil k'ij. O cybiy cyuj manc'bil k'ij tzul jun jawnex x'tak' xjal k'ojlel ti' Cristo. Pero ya ja'lewe ma chi ul jlet nim xjal x'tak' nchi k'ojl ti' Cristo. Ju' tzunj, n-el kniy' ti'j o ko ocx cyuj manc'bil k'ij. ¹⁹ Kxol ma chi exke. Pero amale e tentke kxol, pero mintii' kmojbabl kiib cyuya. Nuket at cymojbabl cyiib kuyake, jaxitle ete' kxol. Pero ma chi ex, bix ju' tzunj e cyyeec'a yaa'n junx ete' kuya.

²⁰ Perotzen cyey, yaa'n tisen ejee'. Ma k'oj Espiritu Santo te cyey, bix cykilca key n-el cyni'ya ti'j yol jaxxix. ²¹ Ju' tzunj, min nxi' ntx'i' b'ena tu'n tel cyni'ya ti'j, cuma ma tz'el cyni'ya ti'j yol jaxxix, bix n-el cyni'ya ti'j mlay tzaj jun yol x'tak' ti'j yol jaxxix. ²² Cxe'l nkba'na cyey alcey xjal tzin tkba'n yaa'n Jesús ja Scy'o'n tu'n Dios te cawel, jatzen x'tak' xjal. Alcey xjal tzin tkba'n jlu, jatzen xjalja aj k'oj ti'j Kman Dios bix ti'j Tcwalxin. ²³ Alcey xjal n-el tiq'uen ja Cristo te Clol te, yaa'ntzen t-xjal Kman Dios. Pero alcey xjal tzin tkba'n Tcwalte Dios ja Cristo, atzen Kman Dios tuya.

²⁴ Yaltzen cyey, cyaj tenxix tuj cyanema ja jaxxix yol e cybiy tej tpon tpochal Cristo cyxola. Ka ma cyaj ten ja jaxxix yol tuj cyanema, atzen cymojbabl cyiiba tuya Tcwal Dios bix tuya Kman Dios. ²⁵ Bix j-o cyaj tkba'n Jesucristo tu'n ttzaj tk'o'n ke, ja kchunk'lal te junx maj.

²⁶ Kej yol lu nxi' ntx'i' b'ena cyey tu'n cyc'ojlan cyiiba cywytz kej x'tak' xnak'tzal n-oc cyk'on cyiib tu'n n-el tzipeta. ²⁷ Cyey, ja Espiritu Santo e tzaj tk'o'n Jesucristo cyey at cyuyey. Ju' tzunj, mintii' il ti'j tu'n cytena tjak' juntl wik xnak'tzal yaa'n jiquen. Nxnak'tzan Espiritu Santo cykilca jaxxix te cyey. Jaxxix t-xnak'tzibil, yaa'n x'tak' yol. Ju' tzunj, junx chi tena tuya Cristo, tisen ma txi' t-xnak'tza'n Espiritu Santo cyey.

²⁸ Key wuya nim n-oc cyak'a weya, ja'lewe cxe'l nkba'na cyey tu'n cycyaj tena junx tuya Cristo, tu'ntzen mintii' t'tzi cyi'ja bix mintii' cych'ixewa twitzxin oj tul meltz'ajxin.

²⁹ N-el cyni'ya ti'j jiquenxix te Dios. Ju' tzunj, oj nxi' tii'n jun xjal tnaabl jiquenxix, n-eltzen cyni'ya ti'j jatzen xjal ja tcwal Dios.

3

Ma ko oc te tcwal Dios

¹ Nimxsen ma tzaj tyeeec'an Kman Dios tk'ak'bil tc'u'j ki'j, cuma ma tak' te ke tu'n koc te tcwal Dios. Tu'n tzunj tcwal Dios ko', min tz'el cyniy' xjal te twitz tx'otx' ki'j. Ka min tz'el cyniy' xjal ti'j Kman Dios, jax ju' x min tz'el cyniy' ki'j, ejoo'j tcwalxin. ² Key ocslal n-oc cyak'a weya, amale mat ko oc te tcwal Dios ja'lewe, pero mina'x tchic'ajax ti ko oquela. Pero n-el kniy' ti'j oj tul jlet Tcwal Dios juntl maj, bix oj klonte tii'n tcy'e'ncxin, ko oqueltzen sakxix tisex texin. ³ Bix alcey xjal nayon ti'j Cristo, ncyajtzen tcy'e'yen il, tu'n toc sakxix tisen te Cristo sak.

⁴ Alcey xjal nbinchan il, nk'ojl ti'j tley Dios, cuma tu'nj nbinchan il, junx ta' tuyaj n-el tiq'uen ley. ⁵ Ba'n cyu'na ul Cristo twitz tx'otx' tu'n tel tii'n kil, bix ba'n cyu'na mintii' il e cub thinch'a'n. ⁶ Ju' tzunj, alcey xjal mojl ta' tuya Cristo, min nbinchan il. Kej xjal binchal il, min cytzki'n jaxin. ⁷ Key wuya n-oc cyak'a weya, mi'n chi o lpey cyi' kej xjal x'tak'. Alcey xjal nbint ba'n tu'n, tzin tyeeec'antzen ka jiquenxix ta', bix ntyeeec'an ka lepch ti'j Cristo, cuma jiquenxix te Cristo. ⁸ Alcey xjal nbinchan il, tzin tyeeec'antzen ka lepch ti'j taaw il, cuma ja te taaw il binchal il jatxix tej tjaw tk'oj tuya Dios. Pero ul Tcwal Dios twitz tx'otx' tu'n tcub xitj cykilca taak'en taaw il.

⁹ Ka ma tz'oc jun xjal te tcwal Dios, ncyaj tcy'e'yen il, cuma nxi' tii'n tnaabl Dios. Il ti'j cyjel tcy'e'yen il, cuma tcwal Dioste. ¹⁰ Tzinen ta' alcey xjal tcwal Dios bix alcey xjal n-oc lpe ti'j taaw il, cuma kej xjal min nbint ba'n cyu'n bix min n-oc cyak' ocslal cye, yaa'n tcwal Dioske. ¹¹ Jatxe tej tpon tpochal colbil cyxola, o cybiy il ti'j tu'n tten tk'ak'bil cyc'u'ja cyxola. ¹² Mi'n ko oc tisenj xin Caín. Lepchxin ti'j taaw il, bix e cub thyo'nxin titz'enxin. ¿Tikentzen e cub thyo'nxin? Cuma ka' thinchbenxin. Yal tzunj te titz'enxin, ba'n texin thinchben titz'en, bix ju' tzunj e tzaj chi'l tc'u'jxin ti'j titz'enxin. ¹³ Key ocslal, mi'n chi jaw klee'y ka ma tz'el cyiit'uen kej xjal yaa'n ocslal ejoo'. ¹⁴ Pero kxol, at tk'ak'bil kc'u'j, bixsen tziin tyeeec'an jlu ma ko etz tuj jun be nxi' k'inte ke tuj cyamecy, bix ma ko ocx tuj jun be nxi' tii'n ejoo' tuj kchunk'lal. Alcey xjal min n-oc cyak' ocslal te, nbetten tuj jun be nxi' tii'n tuj cyamecy. ¹⁵ Alcey ocslal n-el tiq'uen juntl ocslal, byol xjaltze, bix n-el kniy' ti'j min-al jun byol xjal at tchunk'lal te junx maj. ¹⁶ N-eltzen kniy' ti'j ti tten tu'n toc cyak' ocslal ke, cuma e cyaj tk'o'n Cristo jun yec'bil te ke, jaj tej tcyimxin te kxel. Jax ju' x ke, ba'n tu'n t-xi' kk'on kiib tu'n keyim tu'nj tk'ak'bil kc'u'j ti' juntl ocslal ka at-xix il ti'j. ¹⁷ Ka at jun ocslal mintii' titz'jel, bix ka ma til juntl ocslal at te titz'jel, pero min ma txi' tonen ocslal mebe, ¿ti toc cyu'na? ¿Atpa tk'ak'bil tc'u'j tisej te Dios? Mintii'.

¹⁸ Key wuya n-oc cyak'a weya, yaa'n nuk o'cx cxe'l kkba'n n-oc cyak' xjal ke, sino cxe'l kyeec'an ka jaxxix kyol ti'j tk'ak'bil kc'u'j tuya kbinchben. ¹⁹ Tu'nj toc cyak' oclsal ke tuya cykil kc'u'j, q'ueleltzen kniy' ti'j ka ma ko oc lpe ti' yol jaxxix, bix q'uelel kniy' ti'j ka jiquen eto' twitz Dios. ²⁰ Amale atet maj nxi' tkba'n kanem yaa'n ba'n jnbint ku'n, pero mas nim t-xtalbil Dios twitz kil, bix ba'n tu'n Dios cykilca il nbint ku'n.

²¹ Key oclsal n-oc cyak'a weya, ka ba'n ku'n mintii' il nbint ku'n, ba'ntzen tu'n t-xi' kcubsa'n kwitz te Dios tuya cykil kc'u'j. ²² Bix alcyey nxi' kkanen texin, ctaaal tk'o'nxin te ke, ka ma tz'oc kbi'n jtzin tkba'nxin bix nbintzen tajbilxin ku'n. ²³ Bix jtaj Dios tu'n tbint ku'n, cyjulu: Tu'n t-xi' kocsla'n ka Tcwal Dios jxin Jesucristo, bix tu'n tten tk'ak'bil kc'u'j kxol, tisen ma kbaj tu'nxin te ke. ²⁴ Alcyey xjal ma tz'oc tbi'n jma txi' tkba'n Dios, attzen tmojbabl tiib tuya Dios, bix at Dios tuya. Bix tu'ntzen Espiritu Santo ma tzaj tk'o'nxin te ke, ma tz'el kniy' ti'j at kmojbabl kiib tuya Dios.

4

Kej xnak'tzal at Espiritu Santo cyuya bix kej nchi xnak'tzan xtak' yol

¹ Key oclsal n-oc cyak'a weya, mi'n txi' cyocsla'na tyol jaca xnak'tzal tzin tkba'n tyolel Dioste. Oj nyolen jun xnak'tzal, cyk'o'nc cypena ti'j tu'n tel cyni'ya ti'j ka nyolen tu'n Espiritu Santo bix ka min, cuma at nim xnak'tzal xtak' nchi bet cyxol xjal. ² Tz'elxitzen cyni'ya ti'j tyol jun xnak'tzal ti'j Jesucristo ka nyolen tu'n Espiritu Santo. Ka nxi' tk'umen ul Tcwal Dios twitz tx'otx' bix oc te jun xjal, Jesucristo, tetzen Dios xnak'tzal lu. ³ Pero ka min nxi' tk'umen jun xnak'tzal yaa'n Tcwal Dios te Jesús, yaa'ntzen te Dios, sino junx ta' tyol tuya tyol nintzaj xtak' xjal nk'ojl ti' Cristo. O cybiy ka tzul, bix kej nchi oc lpe ti'j ya ete'tl twitz tx'otx'.

⁴ Key wuya nim n-oc cyak'a weya, te Dioskey, bix min ma che'x lpey cyi'j xnak'tzal xtak', cuma at mas tipemal Espiritu Santo at cyuyey twitz taaw il nchi oc lpe xnak'tzal xtak' ti'j. ⁵ Kej xnak'tzal xtak', aj ilke, bix ju' tzunj, nchi yolen tu'n tel cyyol ba'n tuj cywitz ke aj il, bix nxi' cybi'n aj il cyyol. ⁶ Perotzen keya, te Dios ko'ya, ejoo'ya xnak'tzal jaxxix. Kej xjal cytzki'n Dios, n-octzen cybi'n kyola. Pero kej xjal yaa'n te Dios, min tz'oc cybi'n kyola. Ka ma tz'oc tbi'n jun xjal kyola, ma tz'el kniy' ti'j lepchexsen ti'j yol jaxxix. Pero ka tcy'i txi' tbi'n ki'ja, ktzki'n ka taj tz'oc lpe ti'j yol xtak'.

At tk'ak'bil tc'u'j Dios ki'j

⁷ Key oclsal n-oc cyak'a weya, tz'ocxit cyak' kuya ke, tu'ntzen tchic'ajax tnaabl Dios k'i'n ku'n, cuma ka ma tz'oc tak' kiib ke, tzin tyeeec'an jlu tcwal Dios ko'. Alcyey xjal n-oc cyak' tcwal Dios te, ntyeeec'antzen tcwal Dioste bix tzki'ntzen ja Dios. ⁸ Alcyey xjal min n-oc cyak' oclsal te, ntyeeec'antzen min tzki'n ja Dios. Yaa'n tnaabl tisen tnaabl Dios, cuma n-oc cyak' tcwal Dios te. ⁹ E tzaj tyeeec'an Dios tk'ak'bil tc'u'j ki'j tej tzaj tsma'n junx Tcwal kxol twitz tx'otx', tu'ntzen kten kchun'k'lal te junx maj tu'nj e bint tu'n Tcwalxin. ¹⁰ Yaa'n tz'aklxix tk'ak'bil kc'u'j ti' Dios. Pero ya te Dios tk'ak'bil tc'u'j ki'j, tz'aklxix. E tzaj tsma'nxin Tcwalxin kxol, tu'ntzen tcyim te chojbil kil, tu'ntzen tel tii'n tk'oj Dios ki'j. ¹¹ Key oclsal n-oc cyak'a weya, cuma e tzaj tyeeec'an Dios tk'ak'bil tc'u'j ki'j tu'nj tzaj tsma'n Tcwal tu'n tcyim te kxel, ju' tzunj ilxsen ti'j c'oquel kak' kiib kxol. ¹² Amale mint o kil twitz Dios, pero n-el kniy' ti'j najl Dios tuj kanem ka n-oc kak' kxol. Ka ma bint ku'n ju'wa, nbintzen tajbil Dios ku'n. ¹³ Bix jax n-el kniy' ti'j at kmojbabl kiib tuya Dios bix at Dios kuya tu'nj ma tzaj tk'o'n Dios Espiritu Santo te ke. ¹⁴ Bix jax ba'n ku'n at Dios kuya, cuma o kila Tcwal Dios bix nxi' kk'umena e tzaj tsma'n Dios Tcwal tu'n toc te Clolte cye xjal. ¹⁵ Alcyey xjal nxi' tkba'n tuya cykil tc'u'j ja te Jesús Tcwal Dios, attzen Dios tuya, bix at tmojbabl tiib tuya Dios. ¹⁶ Ejoo'ya t-xel Cristo, n-el kni'ya ti'j tten tk'ak'bil tc'u'j Dios ki'j, bix ju' tzunj o tz'oc ke kc'u'ja ti'j.

Tnaabl Dios, jaj tu'n toc cyak' xjal te. Ju' tzunj, alcyey oclsal n-oc cyak' xjal te, attzen tmojbabl tiib tuya Dios, bix attzen Dios tuya. ¹⁷ Ka at kmojbabl kiib tuyaxin ju'wa, n-octzen cyak' xjal ke tisen taj Dios, bix mintii' ttzi ki'j oj kocx twitz Dios tuj xkel, cuma nxi' kii'n kchun'k'lal twitz tx'otx' tisen te Cristo. ¹⁸ Mintii' ttzi ki'j ka ma tz'oc cyak' xjal ke. Ka tz'aklxix tk'ak'bil kc'u'j ju'wa, mlaytzen tten ttzi ki'j, cuma min ko ayon castiwa ki'j tu'n Dios. Ka min n-oc cyak' xjal te jun xjal tisen taj Dios, attzen ttzi castiwa ti'jxin.

¹⁹ N-oc tak' Dios ke cuma tneel oc kak' te Dios. ²⁰ Ka ma txi' tkba'n jun xjal, "N-oc tak' Dios weya," ka tzi ju'wa pero n-el tiig'uen juntl oclsal, xtak' xjal lu, cuma ka min tz'oc tak' jun oclsal te ba'n tu'n toc tcyeyen, mlaybint tu'n toc tak' Dios te, cuma bajx tz'oc tcyeyen. ²¹ Bix yaa'n nuk o'cx jlu, bix jax ju'x ma cyaj tk'o'n Dios ja ley lu ke: Alcyey xjal n-oc tak' Dios te, ilxsen ti'j tu'n toc cyak' oclsal te.

5

Tu'n kocslabl tzin ncub ti' il at twitz tx'otx' ku'n

¹ Alcyey xjal tzin tkba'n ja te Jesús ja Scy'o'n tu'n Dios te cawel tibaj cykilca, tcwaltzen Dios ja xjal lu. Bix ka jax tu'n ka n-oc tak' Dios te, jax c'oquel tak' Tcwal te. ² ¿Bix ti tten q'uelel kniy' ti'j ka ma tz'oc cyak' tcwal Dios ke? Ka ma tz'oc tak' Dios te bix ka nko binchan tley Dios, q'uelelzen kniy' ti'j n-oc cyak' ocslal ke. ³ Bix il ti'j q'uelel cyni'ya ti'j ka kaj tz'oc tak' Dios ke, il ti'j cbinel tley ku'n. Pero yaa'n cyiwix tu'n tbint tley. ⁴ Yaa'n cyiw, cuma alcyey xjal tcwal Dios, attzen tipen tu'n t'cub ti'j cykilcaj yaa'n ba'n twitz tx'otx' tu'n. Bix tu'n tbint tley Dios ku'n, at kocslabl ti' Cristo. ⁵ ¿Bix alj xjal ncub ti'j ka' twitz tx'otx' tu'n? Nuk jaj xjal ma txi' tocsla'n ka ja te Jesús Tcwal Dios.

Ja Espiritu Santo nyole jaxxix ti'j tcwal Dios

⁶ Ja Jesucristo lu el itz'j ti' ttxu tisex tten itz'j jun xjal, bix lwewa el ttz'q'uel tej tcyim. Yaa'n nuk ul itz'j. Jax ju'x e cyim, te yec'bil oc Tcwal Dios te jun xjal. ⁷ Bix jax ju'x tzin tkba'n Espiritu Santo ka Tcwal Dios ja Jesús, bix ktzki'n mlay x'tak'en Espiritu Santo. ⁸ Ju' tzunj, at oxe tumel tzin cykba'n oc Tcwal Dios te xjal. At Espiritu Santo, at titz'jlen Jesús, bix at tcyimlen Jesús. Junx ta' cyyec'bil cyoxel. ⁹ Oj nchi yolen xjal ti'j jma cyil tuya tbak' cywitz, tzintzen kocsla'n cyool. Tejtzen ttzaj yolen Dios ti' Tcwal, zyaa'mpatzen mas il ti'j tu'n t-xi' kocsla'n tyol, cuma mas jawnex? Bix ma tkba Dios ja Jesús Tcwal. ¹⁰ Alcyey xjal nxi' tocsla'n ka Tcwal Dios ja Jesús, tzin tkba'n tanem nxi' tocsla'n ti' yol jaxxix. Pero alcyey xjal min txi' tocsla'n ja yol lu, tzin tkba'n x'tak' Dios, cuma min txi' tocsla'n jma tzaj tkba'n Dios ti' Tcwal. ¹¹ Bix jma tzaj tkba'n Dios ti'j Tcwal, cyjulu: Ma tzaj tk'o'n Dios kchunk'lal te junx maj, bix nuk tu'nj Tcwal ma zaa' tk'o'n. ¹² Alcyey xjal o tiik' Tcwal Dios, attzen tchunk'lal te junx maj. Pero alcyey xjal min o tiik' Tcwal Dios, mintii' tchunk'lal te junx maj.

Tej t-xi' tk'o'n Juan juntl maj cynaabl ocslal

¹³ Key ma chi ocslana ti'j Tcwal Dios, ma txi' ntz'i'bena ja u'j lu te cyey, tu'ntzen tel cyni'ya ti'j at cychunk'lala te junx maj. ¹⁴ Bix alcyey nxi' kkanen twitz Dios, bix ka junx ta' t'kanbil tuyaj tajbil Dios, ktzki'n nko tzaj tbi'n. ¹⁵ Bix ka ma tzaj tbi'n kkanbil junx ta' tuya tajbil, jax ju'x ktzki'n ckiik'el jma txi' kkanen.

¹⁶ Ka ma cyila oj nbinchán jun ocslal jun il, pero yaa'n ja il tu'n tel tpa'n ocslal ti'j tchunk'lal te junx maj, ba'n tu'n t-xi' cycubsa'na cywitza te Dios ti'j ocslal nbinchán il, tu'ntzen tnajset til tu'n Dios. Pero at jun il tu'n t-xi' tii'n jun ocslal tuj cyamecy te junx maj, jaj tu'n n-el tiiq'uen ja Cristo. Ka at jun ocslal nbinchán ja il lu, mi'n txi' cycubsa'na cywitza te Dios ti'j tu'n tnajset ja til lu. ¹⁷ Cykilcaj yaa'n tuj tumel, jatzen ilja tuj twitz Dios. Pero nuk jaj il lu nxi' tii'n jun xjal tuj cyamecy te junx maj.

¹⁸ Ktzki'n kej xjal ma chi oc te tcwal Dios yaa'n binchal ilke. C'ojla'n ko' tu'n Tcwal Dios, bix ju' tzunj mlay cub ki'j tu'n taaw il. ¹⁹ Ktzki'n ka te Dios ko', bix cykilca xjal twitz tx'otx' at tjak' tcawbil taaw il. ²⁰ Bix ktzki'n ul Tcwal Dios twitz tx'otx', bix ma tzaj tk'o'n knaabl, tu'ntzen ktzki'n ja, jaj Tcwal Dios jaxxix. Bix at kmojbabl kiib tuya jaxxix Tcwal Dios, Jesucristo. Jatzente Dios jaxxix, ja K'olte kchunk'lal te junx maj.

²¹ Key wuya nim n-oc cyak'a weya, mi'n chi na'na Dios cywitz sant.

O'cx nyolja.

Tcab u'j e xi' ttz'i'ben apóstol Juan

Jun k'olbebl tu'n apóstol Juan

¹ Inayena, jun nejenel cyxol ocslal, nxi' ntz'i'bena te cyey ocslal. Ejee'y tisen jun jawnex xuuj ma scy'et tu'n jun cawel te t-xu'l. N-oc cyak'a weya tuya cykil wanema, bix yaa'n nuk o'cx weya, pero n-oc cyak'a cye cykilca xjal ma chi ocslan ti' yol jaxxix. ² N-oc cyak'a weya cuma junx ta' knaabl tu'nj tocx yol jaxxix tuj kanem. Bix ctemel yol jaxxix tuj kanem te junx maj. ³ Tzajxit xtalbil cyibaja tu'n Kman Dios tuyax Kaaw Jesucristo, Tcwal Kman Dios. Bix tzajxit k'a'ben cyc'u'j cyi'ja, bix tu'n cytena tuj ttzyal cyu'n. Cbinel jlu ka ma tz'oc cybi'na yol jaxxix bix ka ma tz'oc cyak' cyuyey cyey.

At nim tzpetsal cyxol kej xnak'tzal

⁴ Nim in tzalaja tej t-xi' nbi'na nchi oc lpey ti'j yol jaxxix, tisen e tzaj tkba'n Kman Dios ke. ⁵ Key ocslal, ja'lewe cxe'l ncubsa'na nwitzá cyey tu'n toc cyak' cyuyey cyey. Jnxi' nkanena cyey yaa'n jun ac'aj tley Dios. Jatxe tuj tneel o tajbe Dios tu'n toc cyak' cyuyey cyey. ⁶ Bix tu'n toc cyak' cyuyey cyey, il ti'j cbinel cyu'na cykilcaj ma tkba Dios tu'n tbint cyu'na. Juntl maj cxe'l nkba'na cyey, jatxe tuj tneel o tkba Dios tu'n toc cyak' cyuyey cyey.

⁷ At nim xnak'tzal xtak' nchi bet twitz tx'otx'. Tzin cykba'n ka nuk ten jyol oc Jscy'o'n tu'n Dios te jun xjal Jesús tbi. Pero jun xjal nyolen ju'wa, nuk jun xnak'tzal xtak' bix jun aj k'oj ti' Dios. ⁸ O ko ak'anana tu'n cyiik'ena t-xtalbil Dios. Cyc'ojlanx cyiiba tu'n mi'n tz'el cyxoo'na ja xtalbil lu.

⁹ Alcyey xjal ncyaj tcyey'en t-xnak'tzibil Cristo, sino n-oc lpe ti' juntl xnak'tzibil, min-altzen Dios tuya. Pero alcyey xjal ncyaj ten tujx xnak'tzibil ti'j Cristo, attzen Kman Dios tuya bix Tcwalxin.

¹⁰ Ka at jun xnak'tzal xtak' taj tz'ocx tuj cyjay tu'n tyolen cyuyey ti'j jun xnak'tzibil yaa'n junx ta' tuya yol jaxxix ti' Cristo, mi'n txi' cyk'o'na amle'n tu'n tocx. Mi'n txi' cykanena t-xtalbil Dios tibaj, ¹¹ cuma alcyey xjal nxi' tkanen t-xtalbil Dios tibaj, tzin tyeec'an n-el jtbinchben ba'n tuj twitz.

Manc'bil yol

¹² At nimtl waja txi' nkba'na cyey. Pero mas waja tu'n t-xi' nkba'na cyey oj toc ncyey'ena cywitzá twitz tu'n tcub ntz'i'bena mas twitz ja u'j lu. Waja chin pona cyuyey, tu'ntzen ktzalaj nim. ¹³ Kej ocslal tzalú nxi' cyk'o'n jun cyk'olbebl cyey.

Toxen u'j e xi' ttz'i'ben apóstol Juan

Jun k'olbebl tu'n apóstol Juan

¹ Inayena, jun nejenel cyxol ocslal, nxi' ntz'i'bena ja u'j lu te tey, Gayo. N-oc tak'a weya tuya cykil nc'u'ja.

² Hermano, nchin cubsana nwitzta te Dios ti'ja, tu'n tel ba'n cykilcaj te tey bix tu'n ba'n ta'y, tisen ba'n ta' tchunk'lala tuya Dios. ³ Ntzki'na ba'n ta' tanema tuya Dios, cuma ul cab ocslal te kbalte weya ti ttena, bix nim in jaw tzalaja tej ttzaj cykba'n k'i'nxix yol jaxxix tu'na. ⁴ Jawnex ntzalajebila jaca maj oj nbintiya ka nchi oc lpe ti'j jaxxix yol kej xjal ocslan tu'nj waak'ena.

Tej tyole Juan ba'n ti'j jxin Gayo

⁵ Hermano, ba'nxix nbint tu'na, cuma nxi' tonena cyi'j ocslal. Amale mint ttzki'na cywitz t-ak'anal Dios nchi bet cyuj tnom, pero nxi' tonena cyi'j. ⁶ Tej cyul tzalu, e xi' cyk'umen cywitz ke ocslal ti tten e xi' tyeec'ana tnaabla cye. Cxe'l ncubsa'na nwitzta tey tu'n t-xi' tk'o'ntla ch'in onbil cye oj cypon tuyey, tu'ntzen cyitz'j tuj cybe oj cyiy' ttanema tu'n tk'umj tyol Dios cyu'n, cuma nchi ajben te Dios. ⁷ Nchi bet cyuj tnom tu'n ttz'itpaj yol ti'j colbil cye xjal tu'n Cristo, bix mintii' ch'in onbil ccyiik'el cyu'n ke xjal yaa'n ocslal. ⁸ Ju' tzunj, ilxix ti'j tu'n t-xi' kk'o'n onbil cyej t-ak'anal Dios lu, tu'ntzen kak'anan junx cyuya tuj cyaak'en te kbalte tpocbal Cristo.

Jun tley Diótrefes yaa'n ba'n

⁹ E xi' ntz'i'bena jun wu'ja cye ocslal jaa' ta'y, pero nuk wajxa e xi' nsma'na, cuma at jxin Diótrefes cyxola. Tajxin tu'n tocxin te nejenel cyxol ocslal, bix ju' tzunj min oc tbi'nxin nyola. ¹⁰ Ju' tzunj, ka ma chin pona cyxola, cxe'l nkba'na cywitz ocslal jma tbinchaxin, tu'n tchic'ajax ti ttenxin. Nyolnxin ka' yol wi'ja, pero xtak'. Bix yaa'n nuk jaj lu, pero jax ju'x tcy'ixin tu'n ttzaj tk'o'nxin cyposada t-ak'anal Dios. Bix ka at ocslal cyaj tu'n t-xi' cyk'o'n cyposada t-ak'anal Dios, mintii' nxi' tkba'nxin cye tu'n t-xi' cyk'o'n cyposada, sino nuk n-etz tlojo'nxin ejee' cyxol ke ocslal.

Jun tbanel tbinchben jxin Demetrio

¹¹ Hermano, mi'n tz'oc lpey ti'j ka', nuk o'cx ti'j ba'n. Kej xjal nchi binchan ba'n, te Dioske, pero kej xjal nchi binchan ka', min cytzki'n Dios.

¹² K'onx tonbila tej xin Demetrio. Cykilca xjal nchi yolen ba'n ti'jxin. Junx ta' tbinchbenxin tuyaj yol jaxxix, bix chic'aj jiquen jun xjal. Jax ju'x weya, ntzki'na ka ba'n jun xjal, bix cytzki'na ba'n tu'n toc ke cyc'u'ja ti'j nyola.

Manc'bil k'olbebl

¹³ At nimtl waja txi' nkba'na tey, pero ncy'iya tu'n tcub ntz'i'bena twitz jun t-xak u'j. ¹⁴ Waja mas tu'n npona tuyey tu'n nyolena tuyey oj toc ncyey'ena twitzta tuj cabtl k'ij.

¹⁵ Tenxita tuj ttzyal. Kej ocslal tzalu cytzki'n twitzta nxi' cyk'o'n cyk'olbebl tey. K'onxa jun nk'olbebla cye ocslal at tuyey, teeyle juun.

Jun u'j e cub ttz'i'ben Judas, jun t-ak'anal Jesucristo

C'ojla'n ko' tu'n Dios

¹ Key Hermano,

Inayena Judas. Jun t-ak'anal Jesucristo kena, bix titz'en Santiago kena. Bix nxi' ntz'i'bena j-u'j lu te cyey ocslal, ejee'y t-xjal Kman Dios, ejee'y n-oc cyak'a te Dios, bix ejee'y c'ojla'n tu'n Cristo twitz il. ² Jaxit Kman Dios tzaj k'onte cyey jun tk'ak'bil tc'u'jxin cyibaja, bix tu'nxit-xin chi temeley tuj ttzyal, bix tu'nxit-xin at jun tk'ak'bil cye'u'ja cyxola.

Il ti'j tu'n toc kipen tu'n mi'n ch'ixpet kocslabl cuma at nim xjal kxol nox cytz'ilsa'n jun jaxxixyol

³ Key Hermano, at tsublel ntz'i'bena jun u'j cyey ti'j co'pbil ke ti' kil, tu'nzten tel mas cyni'ya ti'j tzunj kocslabl. Nimc'a waja e xi' ntz'i'bena cyey ti'j co'pbil ke, bix otk tzyet ttz'ibj wu'na, pero mlay chin xcyeya ti'j cuma at juntl mas il ti'j. Bix ja tzunj mas il ti'j, ju'tzen cyjulu. O cyaj tk'o'n Dios tyol tuj tzinen te ke ocslal, bix tajxin tu'n t-xi' kniman tyolxin. Ju' tzunj cxe'l ncubsa'n nwitz cyey tu'n cyk'o'nc cyipena tu'n mi'n ch'ixpet cyocslabl tuya xtak' xnak'tzibil. ⁴ Nxi' nkba'na ju'wa cuma cyxola chebe chebe o chi ocx juun xjal n-ocx cytz'ilsa'n tu'n xtak' cyool kxnak'tzibil o kiik'en tu'n Kaaw Jesús. Nchi yolenxin tisen ocslalxexin, pero yaa'n jax. Tzin cykba'n ba'n tu'n kbinchan cykil il cuma cwel tnajsa'nte Dios, tzi cybel. Bix tzin cykba'n mintii' il ti'j tu'n toc kocsla'n tyol Jesucristo, bix yaa'n o'cx jaxin Kaaw. Pero mintzen tkba'n kxnak'tzibil ju'wa. Kej nxi' cyii'n jun cynaabl ju'wa chi pon tuj castiwa, jaj castiwa o byan tuj tyol Dios kaape ootxa.

⁵ Cxe'l nk'o'na cyey oxo tumel ti'j kej kiy'jil min e cybi Kaaw bix e xi'ke tuj castiwa. Tneel tumel, amale cytzki'nta ti tten cyocbal kej kiy'jil, ctzaal nna'na cyey ti e baj cyey kiy'jil tej tetz tcolpan Kaaw ejee'xin tuj tx'otx' te Egipto. Tej cytenxin tuj tzki'j tx'otx', min oc ke cyu'jxin ti' Kaaw, bix ju' tzunj Kaaw e cyaj k'onte cyexin tuj cyamecy tuj ja lugar, bix e cub bajkexin cykilcakej min e cybi. ⁶ Tcab tumel, at cab cyxol ke tsanjel Dios tuj cya'j jatxe ootxa min e cybi tcawbil Dios bix ju' tzunj o txi' cyxoo'n cyaak'en tuj cya'j, bix yaa'n ete'tl tuj cya'j. Mlay chi pon tuj cya'j juntl maj, sino ti'jxe cya'j tuj klolj ete', bix Dios c'u'lye jooc'tzen npon jawnex k'ij tu'n cyxi' tuj ccastiwa te junx maj. ⁷ Toxen tumel, na'n ku'n ti e baj cye tnom te Sodoma bix Gomorra bix cye cabtl tnom cyi'j. Ke xjal cyuj ja tnoma e cybincha nim ka'. Nim e ya'enke, hasta xinak tuya xinaxk. Ka'xsen el tuj twitz Dios. Ju'tzen e tzaa' tk'o'n Dios k'ak' cyibaj, bi'x e cub bajke te junx maj. Ejee' tzunj lu te jun tumel te ke ja'lewe at jun k'ak' te junx maj jaa' chi pomela kej xjal min cybi Dios.

⁸ Cykilke tzunkej lu e cybincha il bix e xi'ke tuj castiwa. Ju'xsen chi xe'l tuj castiwa kej ete'cx cyxola min cybi Kaaw Jesús. Tisen kej aj il te ootxa ba'n e'la tuj cywitzj e cub cybincha'n pero yaa'n ba'n, ju'x ja'lewe. Kej xtak' ete'cx cyxola tuj cywitz ba'n tu'n cybinchan il bix mintii' ccastiwa ti'j tuj cywitz. Nim ka' nbint cyu'n. N-el cyxoo'n tcawbil Cristo, bix ju'x n-oc cyilen ke tsanjelxin.

⁹ Jatxe ootxa mi nuk ja mas nintzaj tsanjel Dios tuj cya'j, Miguel tbi, e ttzuy tcawbil Dios jun maj tej tk'ojxin tuya taaw il. E xi' tkba'n taaw il te Miguel t-xumlal ktzan Moisés te texxin, yaa'n te Dios. Pero Miguel mintii'xix e tkba te taaw il, sino nuk e xi' tkba'nxin: "Jaxit Dios c'ocuel ila tey," t'zixin te taaw il. Min oc tile Miguel ja taaw il, cuma tcy'ixin tziy' nejlxin twitz toclen Dios. ¹⁰ Pero ejee' tzen xtak' cyxola min ncub cybisen ti'j toclen Dios ju'wa. Nuk nchi yolenxin xmucchbil ti' aleyej min tz'el cyniy' ti'j. O'cx n-el cyniy'xin ti'j la' alcyey taj cychu'lxin, bix nxi' cynimanxin alcyey taj cychu'lxin, tisen ke alimaj nxi' cyniman alcyey taj cychu'ljlil. Pero ja tachbil cychu'lxin lu chi xe'l tii'n ejee'xin tuj castiwa. ¹¹ Ju' tzunkexin tisen Cain jatxe ootxa. Tcy'ixin e bint tisenj taj Dios. Bix ju' tzunkexin tisen Balaam. Nuk pwak e tajbexin. Bix ju' tzunkexin tisen Coré. O'cx e tajbexin tu'n tocxin cyiw ti' tley Dios. jAx lo kej xina cyxola tzin cybincha'nxin tisen kej xin nchi byan ootxa! cuma nbint cyu'n tisen Cain bix Balaam bix Coré jatxe ootxa, bix chi xe'l tuj castiwa tisen tzunkej xin te ootxa o che'x tuj castiwa.

¹² Oj nchi chmeta te waa'l bix te iy'salte santa cena, ete'c'xxin xtak'el cyxola. Min ncub cybisenxin ti'j ti elpenina santa cena, sino nuk ncub cybisenxin nuk jaj cyexin tu'n cynojxin. Mintii' tzin cyyee'axin jun cynimbilxin ti'j. Ju' tzunj jun ch'ixbajil n-ocx cyk'o'nxin cyi'ja oj nchi chmeta tu'n cynimantey santa cena. Bix mintii' ba'n cya'jbe'na, tisen jun muj min najben oj tiy' kibaj tu'n cyk'i'k pero mintii' jbal tzin tk'o'n. Bix jun tzee' tken lo'pj oj min tak' twitz min najben, bix il ti'j cjawetz lequet tloc' tu'nx tcyim junx maj, ju'tzen chi pomel tuj castiwa jxjal cyxola min cybi tyol Dios. ¹³ Bix tisen tswaqueyil mar ncyaj t-xoo'n tz'is twitz tx'otx', ju'x xsunkej xjal lu nuk n-ul cyk'at'z jun tka'yel oj cyocxin

cyxola. Bix tisen kej che'w iken tjee' nchi el tz'ak twitz cya'j mintii' cylugar tu'n cywe' bix jun rato chi ocx baj tuj jun nintzaj klolj, ju'xsen ejee'j xtak' yaa'n tuj tumel ete'xin bix chi pomel baj tuj castiwa.

¹⁴ Ju' e tkba Enoc jatxe ootxa. Enoc te twuukan xe'ch elniz itz'j ti' Adán. E tkba Enoc cyjulu: "Tzul Kaaw cyuya nim tajlal tsanjel Dios tuj cya'j, miles y miles cybaj, ¹⁵ te cyey'lte cykil xjal kej ba'n bix kej min, bix te k'olte castiwa cyibaj kej xjal ka' tu'n ka' e cybincha bix tu'n cyiw nchi juben yol ti' Dios," tzi Enoc tuj u'j. Cyi'j tzen xjal tisen kej xtak' cyxola e yolena Enoc.

¹⁶ Ju' tzunj, kej o chi ocx cyxola yaa'n k'i'nxix tyol Dios cyu'n. Ejee' tzunja tisen kej cyiw cynaabl ootxa. Min n-oc ke cyc'u'j ti' Dios, sino nuk nchi txololonx tu'n. O'cx at cygane ti'j cyex cyajbil. Nim nchi yolen te nimbil cyiib. Tzin cyyeec'an cywitz ba'n cye xjal, pero tuj cyanem, min, cuma nuk tu'n cycaman cyi' cabtl te cye.

Cjawel jlet jun wik xjal kxol te xmucchalte tyol Dios

¹⁷ Pero yaltzen key, hermano, tzulc'a ch'in tuj cyc'u'ja cyool ke t-xel Kaaw Jesucristo cyey. ¹⁸ Ch'ima maj e cykba cyey cyjulu: "Tzul jun k'ij chi ul cyxola jun wik xjal te xmucchalte tyol Dios. O'cx nuk tik'ch jun cyajbil yaa'n ba'n cbinel cyu'n," tzi ke t-xel Jesús ke nejl. ¹⁹ Otzen chi ul jlet cyxolj jun wik xjal. Ejee' tzunja nchin k'onte k'oj cyxola tu'n cypaxa. Nuk jaj ka' te twitz tx'otx' lepchke ti'j, cuma mintii' Espíritu Santo cyuya.

²⁰ Jatzen cyey, hermano, mi'ntzen chi oca tisen kej lu, sino cyk'o'nc cyc'u'ja ti'j tu'n tbint tajbil Dios, tu'ntzen cycywixa tuj kocslabl, cuma ja jun kocslabl sakkix twitz Dios. At Espíritu Santo cyuyey, bix jatzen k'ilte cyey oj cyna'na Dios. ²¹ Mi'n cyaj cycyeyena Dios, cuma n-oc kak' te Dios. Q'uiyax cyu'na tu'n t-xi' cyii'na kocslabl hasta manc'bil k'ij, cuma at tk'ak'bil tc'u'j Kaaw Jesucristo ki'j, bix tzulxin juntl maj k'olte jun kchunk'lal te junx maj.

²² Pero cyxola at juun ocslal n-oc cybi'n cyool xtak' xjal tzin cykba'n ba'n tu'n kbinchan cykil il. Ch'ixc'a tcub cyi'j tu'n cyxi' lpe cyi'j. Cxe'ltzen cyonen cyey ejee'j yaa'n cyiw tuj cyocslabl tu'ntzen mi'n che'x lpe cyi'j xtak'. ²³ Bix at juuntl ocslal cyxola ya ma che'x lpe cyi'j xtak' xjal. C'oquel cyipena cyi'j tu'n cyaj meltz'aj tuj jiquen be, tisen n-etz cykiten key tuj k'ak'. Pero at juun may'x che'x tz'ak tuj il. C'oquel cyk'o'na lastim cye, pero q'uelel cyxoo'nja tzin cybincha'n, tisen n-el cyxoo'na jun xbalen mintii'tl tajbel bix tz'ilxsen. Cyc'ojla'tl cyey cyiib tu'n mi'n chi cub tz'aka tuj cyila tisenj cye.

Njaw tnimsa'n Judas tbi Dios

²⁴ Pero Kman Dios at tipemal te c'ojlalte cyey tu'n mi'n chi cub tz'aka tuj il, bix at tipemalxin tu'n t-xi' tii'nxin ejee'y sakkixkey bix aleyrekey twitzxin, jawnex Diosxin, la' alcye jun k'ij. ²⁵ Jaxin o'cx jun Dios. Min-al juntl at. Bix jaxin co'pbil te ke tu'n Kaaw Jesucristo. Tbanelxix Dios, bix nimxsen tipemal at, bix tibaj cykil tcawbil. Nimjxit tbi te cykil tyem. Ju'xit tzuna. O'cx nyolja.

Jaj u'j lu e cub ttz'i'ben apóstol Juan ti'j ti pjel la' alcyce jun k'ij

Jun tumel e tzaj tyeec'an Cristo te apóstol Juan

¹ Jntz'i'ben tuj ja u'j lu, jatzen tumel'j e xi' tk'o'n Dios te Jesucristo ti'j ti pjel la' alcyce jun k'ij, tu'ntzen t-xi' tyeec'anxin cye t-ak'analxin twitz tx'otx'. Bix e tzaj tsma'n Jesucristo jun tsanjelxin tuj cya'j tu'n ttzaj tyeec'an ja tumel lu weya, inayena, t-ak'analxin Juan. ² Bix ma cub ntz'i'bena cykilca ma wila twitz ja t-xak u'j lu. Ntzki'na jaxxix jtyol Dios lu, cuma e tzaj tk'umen Jesucristo weya. ³ At t-xtalbil Dios cyibaj kej xjal njaw cyi'n ja tyol Dios lu ti'j ti pjel, bix at t-xtalbil Dios cyibaj kej xjal nchi bin oj nš-ij bix jax nxi' cyniman jntz'i'ben, cuma tzajne ttzaj lk'e jk'ij tu'n tjapan baj cykilcaj tyol Dios.

Jun k'olbebl cye wuuk cloj ocslal at tuj tnom te departamento te Asia

⁴ Inayena, Juan, nxi' ntz'i'bena j-u'j lu te cyey ocslal ete'y tuj wuuk tnom te departamento te Asia. Tzajxit t-xtalbil Dios cyibaja, bix chi tenxita tuj ttzjal tu'nxin. Jaxin at nejl bix at ja'lewe bix tzul. Bix chi tenxita tuj ttzjal k'o'n cyu'n wuuk espíritu cycub twitz tk'ukbil Dios jaa' ncawena, ⁵ bix k'o'n tu'n Jesucristo, tej xjal ba'n n-oc ke kc'u'j ti'j tyolxin, bix jaxin tneel xjal o jatz itz'j tuj cyamecy te junx maj, bix cawel tibaj cykilca rey twitz tx'otx'.

Cjawel knimsa'n Jesucristo, cuma n-oc kak' texin, bix ma ko tzakpet tu'nxin tuj kil tu'nj ttzq'uelxin el tztij tej tcyimxin, ⁶ bix ma tak'xin ke tu'n kcawen tuyaxin bix tu'n kajben te Dios, Tmanxin. Tu'nxit tnmset-xin bix tu'n tcawenxin tibaj cykilca te junx maj. Ju'xit ttena.

⁷ Jey', tzulxin tuj muj. Cykilca xjal twitz tx'otx' c'oquel cyce'yen jaxin, cyuyax kej xjal e cub hyonte texin. Bix cykilca xjal twitz tx'otx' chi ook'el oj tul meltz'ajxin. Ju'xit ttena.

⁸ Tzin tkba'n Kaaw Kman Dios cyjulu. "Inayena tneel bix manc'bil. Inayena at nejl bix at ja'lewe bix chin temelxwe te junx maj. At cykilca wipemala," tzi Kman Dios.

E cub tyeec'an Cristo tiib twitz Juan tisen tuj jun witziy'

⁹ Yal weya, inayena Juan, jun ocslal kena tisen ejee'y, bix ma tziy'x nimc'a q'uixc'aj wu'na tisex cyey. Junx ko cawel cyuyey tuj tcawbil Dios, bix junx niy'x ku'n tu'n tipemal Jesucristo.

In tena pres tuj jun ch'in tx'otx' tmi'j mar. Patmos tbi tx'otx'. In ocxa pres tu'n tlaj e xi' nk'umena tyol Dios bix ji e baj ti'j Jesús. ¹⁰ At jun domingo e tzaj tk'o'n Dios tipemal weya tu'n toc ncyeyena jyaa'n chic'aj cywitz xjal. E nbi'ya tk'ajk'ajel tyol jun xjal wi'jxiya. E k'ajt-xsen cyiw. Tisen xux twi'. ¹¹ Bix e tzaj tkba'n weya:

—Inayena tneel bix manc'bil. Tz'i'bec'ax tuj u'j jc'oquel tcey'yena, bix smanxa j-u'j lu cye ocslal ete' tuj wuuk tnom te departamento te Asia: Efeso, Esmirna, Pérgamo, Tiatira, Sardis, Filadelfia, bix Laodicea—tzi Jesús.

¹² Bix aj ncyeyena alj nyolen wuyena. Bix e wila wuuk cantil te oro. ¹³ Cyxoltzen wuuk cantil, e wila jun xinak, jaj Sma'n tu'n Dios tu'n tten cyuya xjal. Toc t-xbalenxin jawnex cupeninx maa t-xee' tkenxin, bix toc jun xipbelte te oro ttzi' t-xuuc'xin. ¹⁴ Jtwi'xin bix ttzmal twi'xin sakxsen tisen sak lant bix tisen skbaken. Bix ke tbak' twitzxin nchi koptz'aj tisen tken k'ak'. ¹⁵ Nkoptz'aj tkenxin tisen xcbil bronce oj n-ocx tuj k'ak'. Bix tk'ajk'ajel twi'xin tisen jun nima' oj n-etz wajtz'aj twitz xak. ¹⁶ Bix tcub wuuk che'w tuj tmank'abxin, bix tetz jun machet ca'ba ttzi' binne tten tuj ttzixin. Bix tcey'nc twitzxin tisen tken k'ij oj nkoptz'aj cyiw te chil k'ij.

¹⁷ Tej t-xi' ncyeyena jaxin, in cub tz'aka t-xee' tkenxin tisenca cyimne in oca. Bix e cub tk'o'nxin tmank'abxin wibaja, bix e tzaj tkba'nxin weya:

—Mi'n tzaj ntziya ti'ja, cuma inayena jxjal tneel bix jxjal manc'bil. ¹⁸ I'tz kena te junx maj. In cyima, pero o chin jatz itz'ja te junx maj. Bix inayena nchin cawena tibaj cyamecy bix tibaj cynajbil cyimne. ¹⁹ Ju' tzunj, tz'i'benc'a jma tila, j-at ja'lewe, bix jpel mas yaj. ²⁰ Yaltzen cyi'j wuuk che'w xi' tcey'yena tuj nmank'aba bix kej wuuk cantil te oro, cxe'l nkba'na tey ti japenina. Kej wuuk che'w, jatzen japenina kej wuuk tneel xjal cyxol ocslal ete' tuj wuuk tnom. Bix kej wuuk cantil, jatzen japenina kej ocslal ete' tuj wuuk tnom—tzi Jesús weya.

2

Jun tumel cye ke ocslal tuj tnom Efeso

¹ Bix e tzaj tkba'ntl Jesús weya:

—Tz'i'benc'a te tej nejenel cye ocslal tuj Efeso cyjulu: "Inayena, jxjal at wuuk che'w tuj nmank'aba, bix nchin beta cyxol wuuk cantil te oro, tzin nkba'na cyjulu: ² Ntzki'na cykilcaj ba'n ma bint cyu'na bix jcyaa'ena tuj taak'en Dios ma bint cyu'na tuya pasensya. Mi'n cyc'ama ke xjal ka', bix tej cyten jun xjal e cykba ka nxela pero yaa'n ju'wa, octzen cyipena

ti'j tu'n tel cyni'ya ti'j ka nuk tenx cyu'n. ³ At cypasensyey, bix amale mat tz'oc nim q'uixc'aj cyi'ja tu'n tlaj cyocslabla wi'ja, pero min ma cyaj cyk'o'na cyocslabla. ⁴ Pero at jun cyila tuj nwitzza. Ya min n-octl wak'a cyey tuya cykil cyc'u'ja tisenj nejl. ⁵ Ju' tzunj, cyna'ntza jaa' ma chi cwa tz'aka bix chi meltz'aja juntl maj wuyena tuya cykil cyc'u'ja, tu'ntzen toc wak'a cyey tisen tuj tneel. Ka min ma tz'oc wak'a cyey tisen nejl, chin ula cyuyey tu'n tel wii' na cyncantila cyxol wuuk cantil. ⁶ Pero at jun tzin cybincha'na ba'n. N-el cyiiq'uena cybinchben ke nicolaíta. Jax ju'x weya, ka'xsen cybinchben tuj nwitzza. ⁷ Cyjkom cyxquina tu'n tel cyni'ya ti'j ti jilel tzin tkba'n Espíritu Santo te cyey, ejee'y oclsal. Alcyekej ma chi xcyey ti'j taaw il, cxe'l nk'o'na cyoclen tu'n t-xi' cywaa'n twitzj tzee' te chunk'lal te junx maj at tuya Dios tuj cya'j, tzi Jesús cyey aj Efeso," tz'i'beq'uey.

Jun tumel cye ke oclsal tuj tnom Esmirna

⁸ Yaltzen te tej nejenel cye oclsal tuj Esmirna, tz'i'beq'uey cyjulu: "Inayena, jxjal tneel bix manc'bil, in cyima bix o chin jatz itz'ja juntl maj, tzin nkba'na cyjulu: ⁹ 'Ntzki'na at nim q'uixc'aj n-oc cyi'ja bix mebe xjalkey. Pero k'inakey tuj cya'j. Bix ntzki'na at xjal tzin cykba'n ka t-xjal Dioske bix nchi yolen ka' cyi'ja. Pero yaa'n t-xjal Dioske, sino nche'x lpe ti'j tajbil taaw il. ¹⁰ Mi'n tzaj ttzi cyi'ja ti'j q'uixc'aj tzul cyi'ja. Q'uelel cyni'ya ti'j at juun cyxola at tu'n cyocxk'o'n tuj tzee' tu'n taaw il, cuma taj taaw il tu'n tcyaj cycyey'ena cyocslabla. Chi yajlal cyi'ja laaj k'ij. Ke cyc'u'ja cyuj yajbil luwe hasta ojxe ccyima. Bix cxe'l nk'o'na cyncotza, jatzenj cychunk'lala te junx maj. ¹¹ Cyjkom cyxquina tu'n tel cyni'ya ti'j ti jilel tzin tkba'n Espíritu Santo te cyey, ejee'y oclsal. Alcyekej ma chi xcyey ti'j taaw il, mlay che'x tuj k'ak' te junx maj, jatzen tcyab cyamecyj, tzi Jesús cyey aj Esmirna," tz'i'beq'uey.

Jun tumel cye ke oclsal tuj tnom Pérgamo

¹² Yaltzen te tej nejenel cye oclsal tuj Pérgamo, tz'i'beq'uey cyjulu: "Inayena, jxjal tetz jun machet ca'ba ttzi' binne tten tuj ntziya, tzin nkba'na cyjulu: ¹³ 'Ntzki'na jba'n ma bint cyu'na, bix ntzki'na najlkey tuj jun tnom at tjak' tcawbil taaw il. Amale ncawent Satanás tuj cytanema, pero tzinx chi oclslana wi'ja. Min ma cyaj cycyey'ena cyocslabla wi'ja, amale e cubet byet jxin Antipas tu'n tlaj oclslalxin wi'ja. Iy'x q'uixc'aj tu'n nxin tejxe tcyimxin tuj cyk'ab xjal nchi oc lpe ti'j taaw il. ¹⁴ Pero at cyila tuj nwitzza, cuma at juun cyxola nche'x lpe ti'j t-xnak'tzibil jxin Balaam, jxin tyolel Dios jxtak'xin e t-xnak'tza tej rey Balac ti tten tu'n ccyub tz'ak aj Israel tuj il. E xi' tkba'nxin cyexin tu'n t-xi' cywaa'nxin jwaabj o'yen cywitz sant bix tu'n cybinchantexin pajlel. ¹⁵ Jax ju'x cyey, at juun cyxola nche'x lpe ti'j cyxnak'tzibil aj nicolaíta, jatzenj xnak'tzibil junx tuyaj t-xnak'tzibil Balaam. Ka' ja xnak'tzibil lu tuj nwitzza. ¹⁶ Ju' tzunj, mi'ntl che'x lpey ti'j cyxnak'tzibilxin. Ka ma che'x lpetla ti'j, tzul jk'ij oj wula cyxola tu'n nk'ojla cyi'jxin tuyaj machet tetz tuj ntziya. ¹⁷ Cyjkom cyxquina tu'n tel cyni'ya ti'j ti jilel tzin tkba'n Espíritu Santo te cyey, ejee'y oclsal. Alcyeke ma chi xcyey ti'j taaw il, cxe'l tzen nk'o'na jwaabj te tuj cya'j cye. Bix cxe'l nk'o'na jun xak sakxix tzin tyee'c'an ka nxjalake. Twitztzen juun xak tz'i'betl jun ac'aj biybjaj, bix nuk o'cx jxjal cjk'lte xaka q'uelel tniy' ti'j jbiybjaj tz'i'bet twitz xak, tzi Jesús cyey aj Pérgamo," tz'i'beq'uey.

Jun tumel cye ke oclsal tuj tnom Tiatira

¹⁸ Yaltzen te tej nejenel cye oclsal tuj Tiatira, tz'i'beq'uey cyjulu: "Inayena, jxjal Tcwal Dios, jxin tzin tyee'c'an tbak' twitz nchi koptz'aj tisen tken k'ak' bix nchi koptz'aj ke tkenxin tisenj xcbil bronce oj n-ocx tuj k'ak', ntzi tzuna julu: ¹⁹ 'Ntzki'na jba'n ma bint cyu'na. Bix ntzki'na at cyc'u'ja wi'ja, bix ka n-oc ke cyc'u'ja wi'ja. Bix ntzki'na cyaak'ena tuj taak'en Dios, bix at cypasensyey oj n-oc q'uixc'aj cyi'ja. Bix ntzki'na mas ba'n cybinchbena ja'lewe twitzj nejl. ²⁰ Pero at jun cyila tuj nwitzza. At jun xtak' xnak'tzibil cyxola tzin tkba'n ka ba'n tu'n t-xi' cywaa'na jwaabj o'yen cywitz sant bix ba'n tu'n cybinchantiya pajlel. Pero yaa'n ka' ja xnak'tzibil lu tuj cywitzza, bix at juun cyxola nche'x lpe ti'j. Nche'x tuj il tu'n, tisenj tej cyxi' tuj il kej xjal nejl e cybincha tajbil jxuuj Jezabel. ²¹ E xi' nk'o'na amle'n cye tu'n tajtz ti' cyanem, pero ccyi' tu'n tcyaj cyk'o'n cyil. ²² Jey', kej xjal nche'x lpe ti'j xnak'tzibil ti'j pajlel, ka min ma cyaj cycyey'en cyil, chi xe'l nk'o'na tuj nim yajbil. ²³ Bix cwel nbyo'na cykilca kej xjal nche'x lpe ti'j ja ka' xnak'tzibil lu. Bix q'uelel cyni' cykilca oclsal ti'j ka inayena jxjal n-oc ncyey'ena ti' niy' tuj cyc'u'j xjal bix ti'n ta' cynaabl. Bix cxe'l nk'o'na te juun cyey cyncotzey ti' cybinchbena, la' alcye ma bint cyu'na. ²⁴ Ja ka' xnak'tzibil lu jun jawnex t-xnak'tzibil Dios tuj cywitz sbul xjal pero nuk t-xnak'tzibil taaw il. Pero cxe'l nkba'na te cyej min che'x lpe ti'j ja ka' xnak'tzibil lu, mi'n cwel nk'o'na juntl al xnak'tzibil cyibaja. ²⁵ Pero jcyocslabla nxi' cyii'na, mi'n cyaj cycyey'ena, tu'ntzen at-x cyocslabla oj wul meltz'aja. ²⁶ Alcyekej ma chi xcyey ti'j taaw il, bix al ma binchante wajbila hasta ojxe tcyim, cxe'l nk'o'na cye tu'n cycawen wuyena tibaj cykilca tnom, ²⁷ tisenxj weya ma tzaj k'o'n woelena tu'n Nmana Dios. Chi cawel cyibaj tuya nim cypemal, tisenj jun cylel ncawen cyibaj carnel, bix chi cwel xitj kej aj il tjak' cyaawbil, tisenj oj tcyub buchj jun wiq'uil yaa'n ba'n tu'n junxin binchal lak. ²⁸ Bix

cxel nk'o'na jche'w te klax oj ntzaj t-xee' cya'j cye. ²⁹ Cyjkom cyxquina tu'n tel cyni'ya ti'j ti jilel tzin tkba'n Espiritu Santo te cyey, ejee'y ocslal,' tzi Jesús cyey aj Tiatira,' tz'i'bec'a—tzi Jesús weya.

3

Jun tumel cye ke ocslal tuj tnom Sardis

¹ Bix e tzaj tkba'ntl Jesús weya:

—Tz'i'beq'uey te tej nejenel cye ocslal tuj Sardis cyjulu: “Inayena, at wuuk espíritu te Dios wuyena, bix wuuk che'w at wuyena, tzin nkba'na cyjulu: ‘Ntzki'na jma bint cyu'na. Tuj cywitz xjal, at cychunk'lala tuya Dios. Pero ntzki'na tisenç'a cyimnekey. ² C'c'asem cyiiba, bix ccyiwsam cychunk'lala at tuya Dios, cuma at tu'n tnaj. Ma wila cybinchbena, bix yaa'n tz'aklxix twitz Dios. ³ Ju' tzunj, c'o'quél c'c'u'ja ti'j jxnak'tzibil e cybiy bix e cyocslay tuj tneel, bix mi'n cyaj cyk'o'na. Tajt'z' cyanema. Ka min ma tz'el cyelsa'na cywatla, tzul jk'ij oj t'cub nk'o'na castiwa cyibaja, bix min chi ayona ti'j, tisen min chi ayon xjal ti' jun alak' oj tocx tuj cyja te koniyan. ⁴ Pero at juun xjal cyxola tuj Sardis min ma tz'ilex tu'n ka'. Ejee' tzunkej lu chi betel wuyena toc cyxbalen sak cyi'j, cuma at cyoclen ti'j ja xtalbil lu. ⁵ Alcyekkej ma chi xcye ti'j taaw il, ejee' tzunja ck'ojel cye tu'n toc cyxbalen sak. Bix mlay tz'el wii'na cybi tuj u'j jaa' tz'i'bena cykilca cybi bjal at cychunk'lal te junx maj. Bix cxel nk'umena twitz Nmana Dios bix cywitz tsanjel tuj cya'j ka nxjalke. ⁶ Cyjkom cyxquina tu'n tel cyni'ya ti'j ti jilel tzin tkba'n Espiritu Santo te cyey, ejee'y ocslal,' tzi Jesús cyey aj Sardis,” tz'i'beq'uey.

Jun tumel cye ke ocslal tuj tnom Filadelfia

⁷ Yaltzen te tej nejenel cye ocslal tuj Filadelfia, tz'i'beq'uey cyjulu: “Inayena, jxjal xjan, jxjal jaxxix, jxjal kbalte alcyekkej xjal chi o'quél tuj tnom te David, jxjal jkol tlemel jaa' bix min-al jun xjal jac'a bint tu'n tlemet tu'n, bix jxjal l'mol tlemel jaa' bix min-al jun xjal jac'a bint tu'n tjket tu'n, tzin nkba'na cyjulu: ⁸ ‘Ntzki'na jba'n ma bint cyu'na. Lu ma jket wu'na jun tzi jaa' cywitz, bix min-al jun xjal jac'a bint tu'n tlemet tu'n, cuma amale yaa'nt nim cyipemala, pero ma chi binchana nyola, bix min ma cub cyewena cyocslabla wi'ja cywitz xjal. ⁹ C'o'quél c'c'u'ja ti'j lu. Kej xjal tzin cykba'n ka cytanem Dios pero nchi x'tak'en cuma nuk o'cx nche'x lpe ti'j tajbil taaw il, la' alcyej jun k'ij chi tzaal wii'na cywitz tu'n c'cub maje cywitz, tu'ntzen tel cyni'j ti'j ka oc cyak'a weya. ¹⁰ Cuma ma tziy'x q'uixc'aj cyu'na tu'n tlaj cyocslabla wi'ja, ju' tzunj cxel nc'o'jla'na ejee'y oj tul j'jawnex pena tibaj cykilca xjal twitz tx'otx' tu'n tchic'ajax tu'n tnaabil teyle juun xjal. ¹¹ Tujx najtl oj wul meltz'aja. Jcyocslabla nxi' cyii'na, mi'n cyaj c'cye'yena, tu'ntzen mi'n tel k'i'n cycotza oj wula. ¹² Alcyekkej ma chi xcye ti'j taaw il, cxel nk'o'na cye tu'n c'cyaj ten te junx maj tuya Nmana Dios, tisenj jun tken jaa' mlay tz'etz. Bix c'o'quél ntz'i'bena tbi Nmana Dios tibaj cywitz, tuyax tbi jtnom te Dios cweletz tu'n Dios tuj cya'j, jaj ac'aj Jerusalén, tu'ntzen tchic'ajax ka t-xjal Dioske bix ka ttanem Dioske. Jax ju'x c'o'quél ntz'i'bena j-ac'aj nbi'ya tibaj cywitz. ¹³ Cyjkom cyxquina tu'n tel cyni'ya ti'j ti jilel tzin tkba'n Espiritu Santo te cyey, ejee'y ocslal,' tzi Jesús cyey aj Filadelfia,” tz'i'beq'uey.

Jun tumel cye ke ocslal tuj tnom Laodicea

¹⁴ Yaltzen te tej nejenel cye ocslal tuj Laodicea, tz'i'beq'uey cyjulu: “Inayena, jxjal jaxxix, jxjal njapan ti' tyol, jun tstiwa jiquenxix, bix jxjal e tak' Dios te tu'n t'cub tbinchan twitz tx'otx' bix twitz cya'j, tzin nkba'na cyjulu: ¹⁵ ‘Ntzki'na jma bint cyu'na. Yaa'n chew' ete'y bix yaa'n cyakxix ete'y. Ba'nxitpele chew' ete'y bix ka cyak ete'y. ¹⁶ Cuma yaa'n chew' ete'y bix yaa'n cyak ete'y, sino nuk o'cx sk'ula ete'y, ju' tzunj q'ueletz ntzu'bena ejee'y tuj ntziya. ¹⁷ Tzin cykba'na ka k'inakey bix at nim cyk'inemala, bix mintii'tl ch'in palt cyey, tzikey. Min tz'el cyni'ya ti'j ka tuj bis ete'y bix mintii' ba'n at te cyey. Mebekey, bix moškey, bix mintii' cyxbalena. ¹⁸ Ju' tzunj, nuk nkba'na cyey cylok'onxa oro weya, jun wik oro ma cyaj sak tu'n k'ak', tu'ntzen cyoca k'ina. Bix cylok'onxa sak xbalen weya tu'n toc cyi'ja, tu'ntzen mintii' cych'ixewa. Bix cylok'onxa remeda ti' tbak' cywitz weya, tu'ntzen c'cye'yena. ¹⁹ Kej xjal n-oc cyak' weya, chi o'quél ncawena bix ctzaal tk'o'n jun c'cystiwa, tu'ntzen cyxi' tuj tumel. Ju' tzunj, c'o'quélxix tak' Dios cyey tuya cykil c'c'u'ja, bix cyjel cyk'o'na cyila. ²⁰ Lu kena ntiina tzi' cyanema bix n-oc n'co'na tlemel cyanema. Ka at jun xjal ma tz'abinte nyola bix ka ma tz'ocx tjko'n tlemel jaa' nwitz, chin o'quexa tuya, bix chin waa'la tuya. Bix jax c'waa'l wuyena. ²¹ Alcyekkej ma chi xcye'y ti'j taaw il, cxel nk'o'na cye tu'n c'cub ke wuyena jaa' chin cawela tuj nk'ukbila, tisenj weya in xcye'ya bix e tzaj tk'o'n Nmana Dios weya tu'n ncub keya tuyaxin jaa' ncawenxin tuj tk'ukbilxin. ²² Cyjkom cyxquina tu'n tel cyni'ya ti'j ti jilel tzin tkba'n Espiritu Santo te cyey, ejee'y ocslal,' tzi Jesús cyey aj Laodicea,” tz'i'beq'uey —tzi Jesús weya.

4

Njaw nimset tbi Dios tuj cya'j

¹ Tbaflenxilttzen tkba'n Kaaw jlu, oc ncyeyena, bix e wila jun ttzi jaa' otk tjket tuj cya'j. Bix e xi' nbi'na juntl maj tk'ajk'ajel tyol cyiwxix jxjal otk k'ajt nejl bix tisen jun xux tk'ajk'ajel tyol. Bix e tzaj tkba'n weya:

—Tjatza tzalu tuj cya'j, bix cxe'l nyeec'ana tey ti pjel la' alcye jun k'ij—tzi Kaaw weya.

² Tujx najtl tej nxi' k'i'na tuj cya'j tu'n Espíritu Santo, bix e wila jun jawnex k'ukbil tuj cya'j, bix jax Dios k'ukl tuj k'ukbil. ³ Ntxakakanxin tisenj xak diamante, bix tcyeyncxin tisenj cyak xak cornalina. Bix jun arc toc ti'jxe tk'ukbilxin. Cha'x tilbil arc tisenj xak esmeralda. ⁴ Bix ttxlaj tk'ukbil Dios toc winacyajatl k'ukbil. Bix e wila k'ukl winacyaja tij cyuy toc cyxbalen sakkix. Tjax cycorona te oro tuj cywi'. ⁵ Bix tuj tk'ukbil Dios nchi etz koptz'aj tken k'ancyok tuyax nim tk'ajk'ajel sitz' bix tuyax nim njucucun k'ancyok. Bix twitz tk'ukbil Dios ntxakakan wuuk cantil, jatzen japeninaj wuuk espíritu te Dios. ⁶ Bix twitzj k'ukbil at jun chk'ajlaj tcub spi'yaxsen tisen mar bix tisen viiyre.

Ti'jalaxsen tk'ukbil Dios te juun plaj ete'c'a cyaja wik i'tzke. Nimxsen tbak' cywitz toc cywitz. Jax ju'x tzalcyi'j at nim tbak' cywitz. ⁷ Jneel wik tcyeync tisen jun León. Jatzen tcab wik tcyeync tisen jun tal wacx. Jatzen toxen wik at twitz tisenj twitz jun xinak. Jatzen tcyaa'n wik tisen jun ikel ey' npuraj. ⁸ Kej cyaja wik lu, teeylex juun toqule wukak t-xiicy', bix at nim tbak' cywitz toc ti'jele ti' cyxiicy' bix tjak' cyxiicy'. Bix cykil k'ij bix cykil koniyax nchi bitzen cyjulu: “Xjante, xjante, xjante Kman Dios tuya cykil tipemal. At ootxa, bix at ja'lewe, bix tzul,” tzi ke. ⁹ Cykilca maj oj njaw cynimsa'n tbi Dios, jaj Dios k'ukl tuj jawnex tk'ukbil mlay cym, bix oj nxi' cyk'o'n cynimbil te bix tzin nxi' cyk'o'n chjonte te, ¹⁰ jax ju'x kej winacyaja tij nchi cub maje twitz Dios k'ukl tuj tk'ukbil, tu'ntzen tjaw cynimsa'n tbi Dios i'tz te junx maj, bix ncub cyk'o'n cycorona te oro twitz tk'ukbil. Bix nxi' cykba'n cyjulu: ¹¹ “Jay Kaawa bix Kdiosa, at nim toclena tu'n tjaw nimset tbiy, bix tu'n tk'oj nimbil tey, bix tu'n tkbaj cyu'n xjal at cykil tipemala, cuma jay e binchante cykilca, bix cuma nuk tu'nj tajbila at cykilca bix e cub tbincha'na,” tzi ke tij.

5

J-u'j wuuk xipbelte

¹ Bix e wila jun u'j te wuuk plaj tcub tuj tmank'ab Dios, jk'ukl tuj tk'ukbil. Tz'i'ben tujxe u'j bix ti'jxe, bix jpu'n tuya wuuk xipbelte. ² Bix e wila jun jawnex tsanjel Dios tuj cya'j. E jaw tsi'n cyiw:

—¿Alcye jun at toclen tu'n tel tii'n kej xipbelte ti'j libro bix tu'n tel tjko'n?—tzi ángel.

³ Pero min-al jun e cnet tu'n tjkonte j-u'j lu bix tu'n tcu'x tcyeyen twitz t-xak u'j, mi nuk ejee'j ete' tuj cya'j, bix mi nuk ejee'j ete' twitz tx'otx', bix mi nuk ejee'j ete' tjak'xe twitz tx'otx'. ⁴ Bix in ak'a ook'el nim, cuma min-al jun e cnet at toclen tu'n tel tjko'n u'j lu, tu'ntzen tcyeyen tuj u'j. ⁵ Cyxol tzunj winacyaja tij, e tzaj tkb'an jun weya:

—Mi'n tz'ook'a, cuma at jun xjal at toclen tu'n tel tii'n jwuuk xipbelte bix tu'n tel tjko'n j-u'ja, jaj tzunj xjal León Tiy'jil Judá bix T-xe'chel Jrey David. Ma xcyey ti'j taaw il, bix ju' tzunj, at toclen tu'n tjkonte libro lu—tzi tij.

⁶ Bix e wila Jtal Carnel e xi' oyet te kxel lu wa'l twitz tk'ukbil Dios. Bix lu tcub cyxol kej cyaja wik bix cyxol kej winacyaja tij. Tcyeync tisen'c'a otk cub byet, bix at wuuk tcache bix wuuk tbak' twitz, jatzenj japenina wuuk espíritu te Dios bix sma'n tuj cykilca twitz tx'otx'. ⁷ Bix e pon lk'e Tal Carnel ti' tk'ukbil Dios, bix e tzaj ttzyu'n libro tuj tmank'ab Dios. ⁸ Tejzen ttzaj ttzyu'n libro, e cub maje kej cyaja wik i'tz bix kej winacyaja tij twitzj Tal Carnel. Teeyle juun tij k'i'n jun arpa cyu'n tuyax jun lak te oro. Nojne kej lak tuya incienso, jatzen japeninaj cyna'j Dios ocslal twitz Dios. ⁹ Bix e xi' cybitzen jun ac'aj bitz. E xi' cykba'n cyjulu: “At toclena tu'n ttzaj ttzyu'n libro bix tu'n tel tii'na ke xipbelte ti'j, cuma e cub byeta, bix tu'n ttz'quela el tztiz ti'ja tej tcyima, ma txi' tchjo'na te Dios jchojbilte tu'n cyten xjal tuya Dios, kej xjal te cykilca wik tiy'jil xjal bix te cykilca wik yol bix te cykilca wik xe'chel bix te cykilca tnom. ¹⁰ Ma tz'oc tk'o'na cyoclen tu'n cycawen bix tu'n cyajben te Kman Dios, bix chi cawel tibaj twitz tx'otx',” tzi bitz, tzi ke cyaja wik cyuyax winacyaja tij.

¹¹ Bix oc ncyeyentla, bix e xi' nbi'na tk'ajk'ajel cywi' nimxsen tsanjel Dios tuj cya'j. Ete' ttxa'nele tk'ukbil Dios tuyax cyaja wik cyuyax winacyaja tij. Nimxsen tajlal cybaj, millones bix millones cybaj mlay bint cybaj. ¹² Bix e xi' cykba'n tuya jun cyool cyiwxix: “At toclen Tal Carnela e cub byet tu'n tiik'ente tipemal, tu'n toc te jun k'ina, tu'n tiik'ente tnaabl, tu'n toc te jawnex, tu'n tiik'ente nimbil, tu'n tjaw nimset tbi, bix tu'n tiik'ente cy'iwlabl,” tzi ke ángel.

¹³ Bix e xi' nbi'na cyool cykilca xjal e bint tu'n Dios. Cykilca at tuj cya'j bix twitz tx'otx' bix tjak' tx'otx' bix tuj mar e xi' cykba'n cyjulu: “Te Dios tuj tk'ukbil bix te Tal Carnel, xi' k'o'nxit

cy'iwlabl, nimbil, bix tu'n tjaw nimset cybi, bix tu'n cycawen te junx maj," tzi ke cykilca wik xjal e cub tbincha'n Dios.

¹⁴ Bix kej cyaja wik e xi' cykba'n, "Ju'xit ttena." Bix kej winakcyaja tij e cub majeke bix e jaw cynimsa'n ja Diosj mintii' tbajlel.

6

Kej wuuk xipbelte

¹ Bix oc ncy'e'yena, bix el tii'n Tal Carnel jtneel xipbelte cyxol wuuk. Tejtzen tel tii'n, e xi' nbi'na tej tjaw tsi'n tneel wik i'tz cyxolj cyaja. Tk'ajk'ajel tisenj k'ancyok. E xi' tkba'n:

—iTzaja bix cye'nc!

² Bix e wila jun tzej sak. Jtjax tibajjil tzej k'i'n jun xoobl tu'n te tk'ojbil. Bix e jax k'o'n jun corona tuj twi'. Bix ex tu'n t-xcye tibaj cykilca, bix e xcye.

³ Tejtzen tel tii'nxin tcab xipbelte, e xi' nbi'na tcab wik i'tz. E xi' tkba'n:

—iTzaja bix cye'nc!

⁴ Bix etz juntl tzej. Cyak tilbil. Jtjax tibajjil e xi' k'o'n te tu'n mi'n chi ten xjal tuj ttzyal, bix tu'n tbaj cybyon cyiib xjal cyxolx. Bix e xi' k'o'n jun ma tij espada te.

⁵ Tejtzen tel tii'nxin toxen xipbelte, e xi' nbi'na toxen wik i'tz. E xi' tkba'n:

—iTzaja bix cye'nc!

Bix e wila jun tzej k'ek. Jtjax tibajjil jun malbil tuj tk'ab. ⁶ Bix e xi' nbi'na jun tk'ajk'ajel n-etz cyxol ke cyaja jwik i'tz. E xi' tkba'n tej tjax tibaj tzej k'ek:

—Bincham tu'n tbint tu'n jun xjal tu'n tlok'onte ca'ba libra triwa bix ka kak libra cebada nuk tu'nj twi' tc'u'j ctcama te jun k'ij. Pero txi' tkba'na tu'n cyxilanx xjal lo'pj te olivos bix uva—tztizen.

⁷ Tejtzen tel tii'n Tal Carnel tcyaa'n xipbelte, e xi' nbi'na tk'ajk'ajel tyol tcyaa'n jwik i'tz. E xi' tkba'n:

—iTzaja bix cye'nc!

⁸ Bix e wila jun tzej spela k'ent. Jtjax tibajjil toc tbi Cyamecy, bix lepch Cynajbil Cyimne ti'j. Jaa'xa iy'yake kej ca'ba lu, e cyim xjal cyu'n. E xi' k'o'n cye tu'n tcub cybyo'n tcyaa'n tkiy' xjal tu'n k'oj, tu'n weyaj, tu'n yabel, bix cyu'n jil twitz tx'otx'.

⁹ Tejtzen tel tii'n Tal Carnel tjwe'yan xipbelte, e wila cyanem kej xjal otk chi cub byet cuma otk chi ocslan tyol Dios bix cuma otk chi k'umen tyol Dios. Tocx cyanem tjak' altar.

¹⁰ Ejee' tzunj lu e jaw §-in cyiw:

—Jay Kman Dios xjan bix jaxxix, ¿jte'tltzen tyem tyo'y tu'n tcub cyk'o'na cycastiwa xjal twitz tx'otx', tu'ntzen cyk'oj cye t-xel kcyamecy?—tzi ke xjal otk chi cub byet cyu'n aj il twitz tx'otx'.

¹¹ E xi' k'o'n te teeyle juun jun xbalen sak, bix e xi' tkbaj cye tu'n cyayon ch'intl, ojxe cybyet cykilcatl ocslal at tu'n tcub byet tisenx cye otk chi cub byet.

¹² Bix e wila tej tel tii'n Tal Carnel twukakan xipbelte. Bix e tzaj jun xcyaklajnab cyiwxsen. Bi'x oc k'ij k'ek tisen jun xbalen k'ek te bisbajil. Bi'x oc xjaw cyak tisen tziy'.

¹³ Bi'x e cu'tz tz'ak ke che'w twitz cya'j. Nuk nlu'le twitz cya'j tisen yucch jun tken higo tu'n nim cyk'i'k bix ntzaj tz'ak twitz. ¹⁴ E tzaj tz'ak cya'j tisen jun u'j oj njaw balk'et. Bix cykilca ke witz bix cykilca ke ch'in tx'otx' tmij mar iy' k'i'nke tuj cylugar. ¹⁵ Bix ke cawel twitz tx'otx' cyuyax cykilca nejenel cye xjal cyuyax capitán cyuyax ke k'ina cyuyax ke jawnex xjal cyuyax cykilca ak'anal bix kej xjal yaa'n ete' tjak' tcawbil taaw ak'untl, cykilca kej lu ocx ewenke cyuj jul bix ti' t-xee' xak cywi' witz. ¹⁶ Bix e xi' cykba'n cye xak bix cye witz:

—Cytzaj tz'aka kibaja, tu'ntzen mi'n chic'aj ko'ya twitzj Dios k'uklec tuj tk'ukbil, bix tu'ntzen mi'n tzaj tk'oj Jtal Carnel kibaja—tzi ke xjal. ¹⁷ E jaw yolenke ju'wa cuma otk tzul cana jjawnex k'ij tu'n tcub tk'o'n Dios tk'oj tibaj twitz tx'otx', bix min-al jun xjal at tipemal tu'n tiy'x tu'n.

7

Kej xjal c'oquel jun techel cyi'j cyxol aj Israel

¹ Tbjlaxnitltzen jlu, e wila cyaja tsanjel Dios tuj cya'j wa'lke tuj cyaja plaj ttxa'n twitz tx'otx'. Nchi makon cywitzj cyaja wik cyk'i'k nchi xumen twitz tx'otx', tu'ntzen mi'n chi xumen twitz tx'otx' mi nuk twitz mar mi nuk cyi' tzee'. ² Bix e wila juntl tsanjel Dios tuj cya'j te ocne. E jaw jaa' njatza k'ij. Tej tjatz ángel, k'i'n jsello te Dios i'tz tu'n. Bix e jaw tsi'n cyiw cyi'j cyajatl ángel k'o'n cyipemal tu'n cyq'uixbisante twitz tx'otx' bix mar. ³ E xi' tkba'n cye:

—Mi'n cyq'uixbisaya twitz tx'otx' mi ti' mar mi cyi'j tzee', cuma tneelxix il ti'j c'oquel kk'o'na jtchel tibaj cywitz ke t-ak'anal Dios, te yec'bil ka te Dioske—tzi ángel.

⁴ Bix e xi' nbi'na cyajlal kej otk tz'oc sello cyi'j. Ciento cuarenta y cuatro mil otk tz'oc sello cyi'j cyxol cykilca cyiy'jil aj Israel. ⁵ Cyxol ke tiy'jil Judá at cablaaj mil oc sello cyi'j. Jax cyxol ke tiy'jil Rubén at cablaaj mil oc sello cyi'j. Jax cyxol ke tiy'jil Gad at cablaaj mil oc sello cyi'j. ⁶ Jax cyxol ke tiy'jil Aser at cablaaj mil oc sello cyi'j. Jax cyxol ke tiy'jil Neftalí at cablaaj mil oc sello cyi'j. Jax cyxol ke tiy'jil Manasés at cablaaj mil oc sello cyi'j. ⁷ Jax cyxol ke tiy'jil Simeón at cablaaj mil oc sello cyi'j. Jax cyxol ke tiy'jil Leví at cablaaj mil oc sello cyi'j. Jax cyxol ke tiy'jil Isacar at cablaaj mil oc sello cyi'j. ⁸ Jax cyxol ke tiy'jil Zabulón at cablaaj mil oc sello cyi'j. Jax cyxol ke tiy'jil José at cablaaj mil oc sello cyi'j. Jax cyxol ke tiy'jil Benjamin at cablaaj mil oc sello cyi'j.

Nimxsen cyajlal xjal toc cyxbalen sak

⁹ Tbjalenziltzen jlu, oc ncyeyena, bix e wila nimxsen cyajlal xjal. Min-al jun xjal jac'a bint tajlante. Otk chi tzaj cyuj cykilca tnom bix cykilca cyiy'jil xjal bix te cykilca wik xe'chel bix te cykilca wik yol. Wa'lke twitz jawnex tk'ukbil Dios bix twitz Jtal Carnel. Toc cyxbalen sak, bix tzyu'n tk'ab xa'j cyu'n. ¹⁰ Bix cyiwix e jaw cyi'n:

—Ma ko clet tu'n Kman Dios k'ukl tuj tk'ukbil bix tu'nj Tal Carnel—tzikexin.

¹¹ Cykilcatzen ke tsanjel Dios tuj cya'j wa'lke ti'jele tk'ukbil Dios bix cyi'jele ke tij bix cyi'jele ke cyaja wik i'tz. E cub mutzk'ajke twitz tk'ukbil Dios tu'n tjaw cynimsa'n jaxin. ¹² E xi' cykba'n:

—At toclen Dios tu'n tiik'ente cy'iwlabl bix tu'n tjaw nimset tbixin. At tnaabl, bix tipemal, bix tipen, bix k'o'nxit chjonte te tuyax nimbilte. Ju'xit tten te junx maj—tzi ke ángel.

¹³ At jun cyxol kej tij e tzaj tkanen weya:

—¿Alcye kej lu toc cyxbalen sak, bix jaa' ma chi tzaa'?—tzi jun tij weya.

¹⁴ Bix aj ntzak'be'na te:

—Taat, ja tey etzkilte—ntziya.

Bix e tzaj tkba'n weya:

—Kej xjal lu, ejee' tzunja ma chi ex tuj nintzaj yajbil. Ma txjet cyxbalen tu'nj ttz'q'uel Tal Carnel, tu'ntzen toc cyxbalen sakxix. ¹⁵ Ju' tzunj, lu ke ete' twitz tk'ukbil Dios, bix nchi ajben texin te k'ij bix te koniyen tuj lugar jaa' ta'xin, bix at cynajbil tuyaxin, bix c'ojla'nke tu'nxin. ¹⁶ Mintii'tl weyaj bix tak' a' cyi'j, bix mintii'tl q'uixc'aj cyi'j tu'n tken k'ij bix mintii'tl tak' cyak cyi'j, ¹⁷ cuma Jtal Carnel tcub twitz tk'ukbil Dios, ja te c'ojlal cye, cxe'l tii'n ejee' jaa' nchi jatza itz'j twi' a' te chunk'lal. Bix ja te Dios q'uelel su'nte cykil ta'l cywitz—tzi tij.

8

Tej tel tii'n twuukan xipbelte bix tej tlonte Juan juntl tsanjel Dios k'i'n jun tcubel incienso tu'n

¹ Tejzten tel tii'n Jtal Carnel twuukan xipbelte, yut'l cykilca tuj cya'j niy'jan hora. ² Bix e wila kej wuuk tsanjel Dios tuj cya'j wa'lke twitz Dios. E xi' k'o'n wuuk xux cye. ³ Bix ul juntl tsanjel Dios tuj cya'j, bix e cub we' twitz altar, k'i'n jun tcubel incienso tu'n. Nim incienso e xi' k'o'n te, tu'ntzen toc te tmoj cyna'j Dios cykilca ocslal, tu'n t-xi' toyet twi' altar te oro tcub twitz tk'ukbil Dios. ⁴ Bix tuj tk'ab ángel e jaw tsibel incienso, junx tuyaj cyna'j Dios ocslal, bix e pon twitz Dios. ⁵ E jawtzen tii'n ángel tcubel incienso, bix e cu'x tnojsa'n tuya k'ak' tcub twi' altar, bix e cu'tz t-xoo'n twitz tx'otx'. Ntzajltzen k'ancyok nrumumun tuyax nim sitz' tuyax tken k'ancyok bix tuyax jun xcyaklaj nab.

Kej wuuk xux

⁶ Entonces, kej wuuk tsanjel Dios tuj cya'j k'i'n wuuk xux cyu'n, e bint cyten tu'n toc cyxuxen. ⁷ Tej toc t-xuxen tneel ángel, e tzaj skbaken tuyax k'ak' cysmo'n cyiib tuya tziy'. Bix e cu'tz t-xoo'n twitz tx'otx', bix e baj tz'ey' toxen pa' twitz tx'otx' bix toxen pa' tzee' bix cykilca cha'x c'ul e baj tz'ey'.

⁸ Tejzten toc t-xuxen t'ab ángel, e wila jun ma tij k'ak', tisenc'a jun ma tij witz, e cu'tz xoo'n tuj mar. Bix toxen pa' mar oc te tziy'. ⁹ Bix e cyim toxen pa' jil ete' tuj mar, bix toxen pa' barc e baj.

¹⁰ Tejzten toc t-xuxen toxen ángel, e tzaj tz'ak jun ma tij che'w tuj cya'j. Njululun tisen jun tzaj, bix e tzaj tz'ak cyibaj toxen pa' nima' bix cyibaj twi' a'. ¹¹ Jatzen tbi che'w C'a Itzaaj. Toxen pa' a' twitz tx'otx' oc puro c'a. Nim xjal e cyim tu'n tlaj a' otk tz'oc te c'a.

¹² Tejzten toc t-xuxen tcyaa'n ángel, oc q'uixbisa'n jtoxen pa' k'ij tuyax toxen pa' xjaw tuyax toxen pa' che'w. Ju' tzunj, e cubxsen kloj toxen pa' cywitz, tu'n mi'n ten spi'yenal cyaja hora te k'ij, bix ju'x toxen pa' koniyen.

¹³ Bix e wila jun ikel ey' npurpan twitz cya'j tuj lugar mas jawnex. Bix e xi' tkba'n tuya tk'ajk'ajel tyol cyiwix:

—iAyxsen, ayxsen, ayxsen cyej xjal najl twitz tx'otx'! cuma ch'ixc'a cyoc xuxet oxet xux cyu'n oxetl ángel—tziitzen ikel ey'.

9

¹ Tejzten toc t-xuxen jwe'yan ángel, e wila jun ma tij che'w otk tzaj tz'ak tuj cya'j bix e cu'x twitz tx'otx'. Bix e xi' k'o'n tal jaa' te tu'n tjkct tzi jul jaa'len ponina baj t-xee'. ² Tej tjkct tzi jul jmintii' tumel t-xee' tu'n, e jatz sib tuj jul, tisen oj njatz sib tuj jun ma tij jorno. Bix oc kloj twitz k'ij tuyax twitz cya'j tu'n sib e jatz tuj jul. ³ Tujzten sib etz nimjil cuchi'. E xi'kejil twitz tx'otx'. E xi' k'o'n cyejil cyoclenjil tu'n cytx'a'njil, tisen ke jil si'cy at twitz tx'otx'. ⁴ E xi' kbet cyejil tu'n mi'n t'z'oc cytx'a'njil t'z'im bix cha'x c'ul bix tzee' at twitz tx'otx'. Nuk o'cx tu'n toc cytx'a'njil cyi' kej xjal mintii' techel Dios toc tibaj cywitz. ⁵ Min e xi' k'o'n cyejil tu'n cybyon xjal. Nuk o'cx tu'n toc q'uixc'aj cyi' xjal tuj jwe' xjaw cyu'njil. Bix j'q'uixc'aj iy'x cyu'n xjal tisenj išnjn niy'x tu'n jun xjal oj n-oc ttx'a'n jun si'cy ti'j. ⁶ Tuj ja tyem lu, cxe'l cucusan xjal cywitz tu'n ccyim, pero mlay chi cyim. Tuya cykil cyc'u'j chi oquel cyipen tu'n ccyim, pero mlayx chi cyim. ⁷ Ccyec'nc cuchi' tisenj ke tzej binne cyten tu'n cyxi' tuj k'oj. Bix tjax tuj cywi'jil tisenca corona te oro. Bix cywitzjil tisen cywitz xinak. ⁸ Jatzen ttzmal cywi'jil tisen ttzmal cywi' xujj, bix twitz cyejil tisen twitz cye león. ⁹ Bix toc cyxhalenjil ttzii' cyxuuc'jil tisenca ttx'otx'el xchil. At cyxiicy'jil, bix tzinxsen rinininjil cyxiicy'jil tisen nchi rininin nimxsen carwaj no'n cyu'n tzej nchi ajkelen tuj k'oj. ¹⁰ At cyjee'jil tisen cyjee' si'cy, tu'ntzen toc cytx'a'njil cyi'j xjal. At tipemal cyjee'jil tu'n cyq'uixbisanjil cyi' xjal tuj jwe' xjaw. ¹¹ At jun cycaweljil tu'n tcawen, jatzenj ángel ncawen tibaj jul mintii' tumel t-xee'. Tuj yol hebreo, Abadón thi cawel, bix tuj yol griego, Apolyón thi.

¹² Jtneel q'uixbisabl ma tziy'. Pero at-x ca'batl q'uixbisabl chi ul tibajxe jlu.

¹³ Tejzten toc t-xuxen twukakan ángel, e xi' nbi'na jun yol etz k'ajtl cyxol kej cyaja cache ete'ca a twi' altar te oro tcub twitz Dios. ¹⁴ E xi' tkba'n te twukakan ángel k'i'n xux tu'n:

—Tzakpimela kej cyaja biman xpo'ne ttzii' jnintzaj nima' Eufrates thi—tzi.

¹⁵ Bix el tzakpet kej cyaja biman, tu'ntzen tcub cybyo'n toxen tkiy' xjal, cuma nuk binne cyten tu'n ccyim toxen tkiy' xjal cyu'n tej tpon j-hora bix jk'ij bix jxjaw bix jnabk'i. ¹⁶ E xi' cyii'n nimxsen soldado tjax cyibaj tzej. Jatzen cyajlal xinj soldado ca'ba syent millón. E nbi'ya cyajlal. ¹⁷ Tej ttzaj tyeec'an Dios weya ke tzej cyuyax soldado tjax cyibaj, e wila cyjulu: Tilbil xchil ttzii' cyxuuc' soldado cyak tisen k'ak' bix cha'x bix k'ent. Cywi' tzej tisen cywi' león, bix tuj cytzi etz k'ak' tuyax sib tuyax azufre. ¹⁸ Bix tu'nj k'ak' bix sib tuyax azufre etz tuj cytzi, e baj cyim toxen tkiy' xjal. ¹⁹ At cypemal tzej tuj cytzi, tu'n cybyonjil xjal, pero jax ju'x at cypemal tuj cyjee'jil. Cyjee'jil tisen ke lbaj, bix at cywi'jil ti'j cyjee'jil. Bix cyu'n tzunj luwe nchi q'uixbisanjil xjal. ²⁰ Pero amale e cyimet nim xjal, pero ke niy'tl xjal min e cub byetke cyu'n kej q'uixbisabl lu, min e cyaj cyk'o'n tu'n mintl chi na'n cywitz biman. Cuc e na'n ke Dios cywitzy biman bix ke sant te ttx'otx'el oro bix plata bix bronce bix xak bix tzee', kej mlay chi cye'yen bix mlay chi bin bix mlay chi bet. ²¹ Bix min e cyaj cyk'o'n tu'n mintet e byontl ke xjal bix tu'n cyxi' lpe cyi' chmambaj bix tu'n cyašen bix tu'n cyalk'an.

10

Juntl jawnex tsanjel Dios tocx jun ch'in u'j tuj tk'ab

¹ Bix e wila juntl jawnex tsanjel Dios tuj cya'j. Nimxsen tipemal, bix e cu'tz tuj cya'j tuj muj. Bix tjax arc tuj twi', bix ntxakakan twitz tisen tken k'ij. Jatzen ke tken tisen tken k'ak'. ² Tuj tk'ab at jun ch'in u'j. Jko'n u'j. Bix e cub tk'o'n tken te tmank'ab tibaj mar, bix tken te tne'x e cub tk'o'n tibaj twitz tx'otx'. ³ Bix cyiwxsen e jaw tsi'n, tisen oj njaw tsi'n jun león. Tej tjaw tsi'n, e k'ajt kej wuuk k'ancyok. ⁴ Tej cybaj k'ajt kej wuuk k'ancyok, at tu'n tcub ntz'i'bena j-otk txi' cykba'n wuuk k'ancyok. Pero e xi' nbi'na jun tk'ajk'ajel tuj cya'j e tzaj tkba'n weya:

—E'wencia jma cykba wuuk k'ancyok. Mi'n cub ttz'i'bena—tzi jun weya.

⁵ Bix j-ángel e wila wa'lc'a tibaj mar bix tibaj twitz tx'otx', e jaw tk'o'n tmank'ab twitz cya'j, ⁶ bix e cywix tyol tu'nj tjurament ti' Dios i'tz te junx maj, jDios e binchante twitz cya'j bix twitz tx'otx' bix mar tuyax cykilcaj at cyuj. Bix e tk'ume ángel:

—Mlay tu'n twe'tl jk'ij tu'n tjapan baj jma cub tninc'u'n Dios. ⁷ Oj toc t-xuxen twuukan ángel xux, at tu'n tchic'ajax jma cub tninc'u'n Dios jatxe tuj tneel, tisen e tk'ume cye tyolel—tzi jawnex tsanjel Dios tuj cya'j.

⁸ Bix juntl maj e xi' nbi'na tk'ajk'ajel tuj cya'j. E tzaj tkba'n weya:

—Cu txi'y, bix q'ueletz tii'na j-u'j tjko'n ta' tuj tk'ab j-ángel wa'lc'a tibaj mar bix tibaj twitz tx'otx'—tzitzen weya.

⁹ Ju' tzunj, in pon lk'eya ti'j ángel, bix e xi' nkanena te tu'n ttzaj tk'o'n jnee' ch'in u'j weya. Bix e tzaj tkba'n ángel weya:

—K'ii'nxa, bix waa'nxa. C'a c'oquel tuj tc'u'ja, pero jatzen tuj tziy, tisen ta'l xii'—tzi ángel.

¹⁰ Bix e tzaj wii' na jnee' ch'in u'j tuj tk'ab ángel, bix e xi' nwaana. Bix tzi' e'la u'ja tuj nntziya tisen ta'l xii'. Pero tej tcu'x tuj nc'u'ja, e jawxsen q'ueybe tuj nc'u'ja. ¹¹ Bix e tzaj tkba'n weya: —At mastl tu'n t-xi' tk'umena cye nim wik xjal bix tnom bix yol bix cawel—tzi ángel weya.

11

Kej ca'ba tyolel Dios

¹ Bix e tzaj k'o'n weya jun ptz'unt te echquete, bix e tzaj kbet weya:

—Wey'tza, bix mlonxa tja Dios tuyax altar, bix ajlanxa jte' xjal nchi na'n Dios tuj. ² Pero mi'n cub tml'o'na twitz pe'n ti'jxe tja Dios, cuma o txi' k'o'n cye jun wikxilt xjal yaa'n judío. Nuk pjel cywa'ben jtnom xjan te cya'wnak tuya ca'ba xjaw. ³ Bix cxe'l nk'o'na wipemala cyaj ca'ba nyolela, bix cxe'l cyk'umen jnyola jun mil tuya ca'ba syent tuya oxc'al k'ij. Bix toc cyxbalen te bisbajil—tzi Dios.

⁴ Kej ca'ba tyolel Dios lu, jatzen kej ca'ba tzee' olivo bix kej ca'ba cantil wa'lke twitz Taaw twitz tx'otx'. ⁵ Ka at jun xjal taj tz'oc ipan cyi'j, q'ueletz k'ak' tuj cytzi tu'n tcub tz'ey'. Alcye kej xjal cyaj tz'oc ipan cyi'j, il ti'j chi cymel tu'n k'ak' n-etz tuj cytzi. ⁶ At cypemal ca'ba tyolel Dios lu tibaj twitz cyaj' tu'n mi'n ttzaj jbal cyuj k'ij nchi k'umen tyol Dios. Bix at cypemal cyibaj nima' bix mar tu'n cyoc te tziy', bix tu'n cyq'uixbisante twitz tx'otx', bix tibaj cykilca xitbil, nuk jte' xja maj cyaj. ⁷ Ojzen tjapan baj cyaak'enj xin kbalte tyol Dios, jawel tzunjil jil tuj jul mintii' tumel t-xee'. Ka' xsunjil. Bix k'ojlel jil cyi'jxin. Bix cwel cyi'jxin tu'njil, bix cwel tbyo'njil ejee'xin. ⁸ Yaltzen cyxumlal cyimnewe, tx'ilchc'a cywytz xjal tuj jnintzaj tnom yaa'n ba'n. Cynaabl xjal te ja tnom lu tisen cynaabl xjal te Sodoma bix te Egipto nejl, bix e cub cybyo'n Kaaw twitz cruz. ⁹ Kej xjal te cykilca wik tiy'jil bix te cykilca wik xe'chel bix te cykilca wik yol bix te cykilca tnom, oc cycye'yen ti' cyxumlal kej e cyim oxe k'ij tuya niy'jan. Min e cycuya tu'n cycu'x maket. ¹⁰ Kej xjal te twitz tx'otx' chi tzalajel ti'j cycyamecyxin, bix chi iy'sal jun nink'ij tu'nj otk chi cyimxin. Cxe'l cyk'o'n cotz cye cyuya te iy'sal nink'ij te cycyamecyxin, cuma kej ca'ba tyolel Dios lu nim otk chi yolen ti'j cyil xjal najl twitz tx'otx'. ¹¹ Pero oj t'bjax oxe k'ij tuya niy'jan, ctzaal tk'o'n Dios cyxewxin, bix chi jawel itz'jxin, bix nimxsen ctzaal cytzixin cyi'j xjal n-oc cycye'yen ejee'xin. ¹² Bix cxe'l cybi'n ca'ba tyolel Dios jun cyiw tk'ajk'ajel ctzaal tuj cyaj':

—Cyjatza tzalu—tzi tbel Dios. Bix chi jawex tuj cyaj' tuj jun muj, bix c'oquel cycye'yen ke cyaj k'oj oj cyjax. ¹³ Bix jaxj hora ctzaal jun nintzaj xcyaklajnab, bix tlajan tkiy' tnom cwel xitj. Wuuk mil xjal chi cymel tu'nj xcyaklajnab. Jatzen kej niy'tl xjal, chi jawel sey'paj, bix cxe'l cykba'n at nim tipemal Dios tuj cyaj'.

¹⁴ Tcab q'uixbisabl ma tziy'. Pero at-x toxen q'uixbisabl tzul naj tibaj jlu.

Ti pjel oj tk'ajt xux tu'n twuukan ángel

¹⁵ Tejzen toc t-xuxen twuukan ángel, e jaw jun cyiwix tk'ajk'ajel cywi' kej ete' tuj cyaj'. E xi' cykba'n:

—Ma pon tumel tu'n cyoc kej tnom ete' twitz tx'otx' tjak' tcawbil Kman Dios bix tcawbil Jscy'o'n tu'nxin. Bix ccawel te junx maj—tzi ke.

¹⁶ Kej winakcyaja tij k'uklke tuj cyk'ukbil twitz Dios, e cub mutzk'ajke twitz Dios, bix e jaw cynimsa'n jaxin. ¹⁷ E xi' cykba'n:

—Cxe'l kk'o'na chjonte tey, Kman Dios. At tipemala tu'n t'bhnt cykilca tu'na. Ata ja'lewe bix ma tena te junx maj. Cxe'l kk'o'na chjonte tey cuma ma tz'ak'a cawel tuya nim tipemala. ¹⁸ Nejl, e jaw cyk'oj xjal ti'ja, pero ja'lewe, ma pon tumel tu'n tjaw tk'oja cyi'j. Ma pon tumel tu'n ttzaj tk'o'na cycastiwa kej xjal ma chi cyim, bix tu'n ttzaj tk'o'na cotz cyej t-ak'anala, bix kej tyolela, bix cykilca ocsal bix cykilca xjal nchi niman t'by, jawnexleke, ch'inleke. Bix ma pon tumel tu'na tu'n cyxi' tuj il kej xjal e cybincha ka' ti'j twitz tx'otx'—tzi ke tij.

¹⁹ Bix e jket ttzi tja Dios tuj cyaj', bix tuj tja Dios e chic'ajax jcaxa jaa' e cyja' tk'o'n Dios tyol cyuya xjal. E tzaj tken k'ancyok tuyax nim sitz' tuyax k'ancyok nrininin, tuyax jun xcyaklajnab tuya nim skbaken.

12

Jun xuuj bix jil alimaj dragón tbi

¹ Bix e tzaj jlet jun jawnex techel twitz cyaj'. At jun xuuj toc k'ij ti'j tisen jun xbalen, bix tcub xjaw tjak' tken. Tjaj jun corona tuj twi', bix toc cablaaj che'w ti'j tcorona. ² At tal tuj tc'u'j, bix e jaw ši'n tu'n t'chyonel tal, cuma tu'n talen.

³ Bix e tzaj jlet juntl techel twitz cyaj'. At jun nintzaj jil, dragón tbi. Cyak ti'j, bix at wuuk twi' bix laaj tcache. Bix tjax juun tcorona tuj juun twi'. ⁴ Tu'n tjee' etz tmso'n toxen tkiy' che'w twitz cyaj' bix e cu'tz t-xoo'n twitz tx'otx'. Bix e cub we' dragón twitzj xuuj at tu'n talen, tu'nntzen t-xi' t'chyo'n tal jxuuj oj tul itz'j. ⁵ Bix ul itz'j jun talxuj xinak. Ja talxuj tu'n tcawen tibaj cykilca tnom twitz tx'otx' tuya nim tipemal, tisenj jun xinj cylel ncylenxin

cyi' carnel tuya jun bardón cyiw. Bix e jaw k'i'n talxuj tu'n Dios bix e ponxin tuj jawnex tk'ukbilxin. ⁶ Yaltzen te xuuj, el ok tuj jun lugar yaa'n nimxix xjal tuj, jatztzen ta' jun tnajbilxuj otk bint tu'n Dios, tu'ntzen títz'jxuj tuj ja lugar lu jun mil k'ij tuya ca'ba syent tuya ox'c'al.

⁷ Tbjalxixiltzen jlu, oc jun k'oj twitz cya'j. Jjawnex ángel Miguel cyuyax ke t-ángel e k'oj ti'j jil dragón. Jax ju'x e k'oj dragón cyuyax thiman cyi' Miguel. ⁸ Pero min e xcyeke cyi' Miguel. Ju' tzunj, min e cyaj tentilke twitz cya'j. ⁹ Etz xoo'n jnintzaj jil dragón, jlbaj te ootxa, jtaaw il Satanás tbi nsbun cykilca xjal twitz tx'otx'. E cu'tz xoo'n twitz tx'otx' cyuyax ke thiman. ¹⁰ Bix e xi' nbi'na jun cyiwxix tk'ajk'ajel tuj cya'j. E xi' tkba'n:

—Ja'lewe ma pon tumel tu'n ttzaj tyee'c'an Kdios tcolbil bix tipemal bix tcawbil bix tcawbil jscy'o'n tu'n, cuma ma tz'ex xoo'n taaw il. Te k'ij bix te koniyan min e we' yol tu'n tyolen ka' cyi'j ocslal twitz Kdios. ¹¹ E cub ti'j taaw il cyu'n tu'nj ttzq'uel Tal Carnel tej tcyim bix tu'nj cyool ka junx ete' tuya Tal Carnel. Min e cyaj cyk'o'n cyocslabl ti'j, amale e cyimetke tu'n. ¹² Cuma ma tz'ex xoo'n taaw il, ju' tzunj, chi tzalaja ejee'y najl tuj cya'j. Pero ay xsunkej xjal najl twitz tx'otx', cuma ma cu'x taaw il cyuya. Nimxsen tk'oj, cuma n-el niy' ti'j yaa'n nim k'ij tu'n ttentl tu'n tk'ojl cyi'j ocslal—tzi keje ete' tuj cya'j.

¹³ Tejtzen tel tniy' dragón ti'j otk cu'x xoo'n twitz tx'otx', oc ten k'ojlel ti'j xuuj otk tzul tiz'j tal xinak. ¹⁴ Bix oc k'o'n ti' xuuj ca'ba t-xiicy' ikel ey', tu'ntzen tel purpan twitz lbaj. E pon purpan tuj lugar min-al xjal najl tuj, jatztzen e tak' Dios tlugar, tu'ntzen títz'j oxo jnabk'i tuya niy'jan. ¹⁵ Jatzen te lbaj, etz t-xupan a' tuj tzi tisen jun nima'. E xi' t-xupan a' ti'j xuuj tu'n t-xi' iken xuuj tu'n a'. ¹⁶ Pero e tzaj tonen tx'otx' ja xuuj. El c'abch tx'otx', bix e xi' tc'a'n tx'otx' a' e jatz tuj tzi dragón. ¹⁷⁻¹⁸ Ju' tzunj, e tzaj nimxix tk'oj dragón ti'j xuuj, bix e xi' k'ojlel cyi'j niy'tl tal xuuj, kej n-oc cybi'n tley Dios bix kej nche'x lpe ti'j jaxxix tyol Jesús.

13

Ca'ba xinak ka'xsen cycye'nc tisen jun jil ntzaj nim txobajil k'ij

¹ Yajc'atltzen bix in cub we'ya tibaj ttxa tz'a'n ttzii' mar, bix e wila jun ka'xsen jil njatz tuj mar. At laaj tcache bix wuuk twi'. Tjaj juun corona twi' jaca juun tcache. Bix tz'i'bec yasbil te Dios ti' jun twi'. ² Tcye'ncjil tisen jun tiire. Tkenjil tisen tken jun oso, bix ttzijil tisen tzi jun León. Bix e xi' tk'o'n dragón nim tipemal bix tajwalelil tu'n tcawenjil. ³ Bix e wila jun twi'jil tisen'c' otk tiik' jun isjnin tu'n tcyimjil. Pero e k'anj twi'jil. Ju' tzunj, cykilca xjal twitz tx'otx' e jaw klee'ke ti'jil, bix oc lpeke ti'jil. ⁴ Bix a jaw cynimsa'n ja dragón otk txi' tk'o'n tipemal tejil. Jax ju'x e jaw cynimsa'n jajil. E xi' cykba'n:

—Min-al tisen jil. Min-al jac'a bint t-xcye ti'jil tuj jun k'oj—tzi ke xjal.

⁵ Bix e k'oj tejil jun tnaablil tu'n tjaw niman tiibjil bix tu'n tyasenjil ti'j Dios, bix tu'n tcawenjil cya'wnak xjaw tuya ca'ba. ⁶ Bix oc tenjil yasel ti'j Dios bix ti' tbi bix ti' tja bix cyi'j kej najl tuj cya'j. ⁷ E k'oj tejil tu'n tk'ojil cyi'j ocslal bix tu'n tcub cyi'j tu'njil. Bix e k'oj toclenjil te tu'n tcawenjil tibaj cykilca wik tiy'jil xjal bix cykilca wik xe'chel bix cykilca wik yol bix cykilca tnom. ⁸ Bix cykilca xjal twitz tx'otx' cjawel cynimsa'n jajil, kej yaa'n tz'i'ben cybi tuj u'j te chunk'lal jatxe tbtinten twitz tx'otx', jatzetzen tcub ttz'i'ben Dios cybi kej xjal at tu'n cyclet tu'nj tcyimlen jtal Carnel. ⁹ Cyjkom cyx'quina tu'n tel cyni'ya ti'j kej yol lu. ¹⁰ Alcey' ocslal ma k'umj cyi'j tu'n cyocx tuj tze'e', il ti'j chi oquex tuj tze'e'. Bix alcey' ocslal ma k'umj cyi'j tu'n cyub byet tu'n espada, il ti'j tu'n cyub byet tu'n espada. Ju' tzunj, il ti'j tu'n cyten ocslal cyiw tuj cyocslabl bix tu'n tten cypasensya.

¹¹ Tbjalxixiltzen jlu, e wila juntl jil njatz twitz tx'otx'. At ca'ba tcachejil tisen tcache jun tal carnel, pero e yolenjil tisen junjil dragón. ¹² Junx ta' tipemaljil tuyaj jil tneel, bix najbenjil te tyoleljl tneel. Taak'enjil tcaab tu'n tbtinchantejil tu'n tjaw cynimsa'n cykilca xjal najl twitz tx'otx' ja jil tneel e tiik' jun jawnex isjnin tu'n tcyim pero e k'anj. ¹³ Jax ju'x tzin tyee'c'anjil jawnex tipemaljil, hasta tu'n tcu'tz k'ak' twitz cya'j tu'njil cywitz xjal. ¹⁴ Cyu'nj techel lu nk'oj tejil tu'n tbtint tu'njil twitz jil tneel, nsbunjil cye xjal najl twitz tx'otx'. Nxi' tkba'njil cye xjal tu'n tcub cybincha'n jun tsant jil tneel e tiik' jun isjnin tu'n tcyim tu'n jun espada pero e cyaj itz'j. ¹⁵ Bix e k'oj tipemal jil tcaab tu'n tocx tk'o'n t-xew tsant jil tneel, tu'ntzen tbtint tyolen tsant. Bix e tkba tsant tu'n tcub tbyet ejee'j xjal min e jaw cynimsa'n tsant. ¹⁶ Bix e tkba jil tcaab tu'n toc jun techel ti'j cymank'ab bix ka ti'j tibaj cywitz cykil xjal. Ajnintzleke, jawnexleke, k'inalleke, mebeleke, tzakpi'neleke, ak'anal-leke, cykilca, il ti'j c'oquel jun techel cyi'j. ¹⁷ E tkbajil tu'n mi'n cylok'on xjal bix tu'n mi'n cyq'ueyen ka min ma tz'oc techel jil tneel cyi'j. Jatzen techel tbiijil, jatzen tajlal tbiijil.

¹⁸ C'oquel cyc'u'ja ti'j jlu. Alcey'kej at cynaabl, chi ximanx ti'j alcey' tajlal tzin techla'n jil. Jtaljal tzin techla'n jil, jatzenj tajlal tzin techla'n jun xjal, jatzen tajlal wukak syent tuya ox'c'al tuya wukak.

14

144,000 xjal wa'lc'ake twi'j witz Sión

¹ Bix juntl maj oc ncyeyena, bix jey', wa'ltej Tal Carnel twi'j witz Sión, bix at jun syent cya'wnak tuya cyaja mil xjal tuya. Tz'i'benc tbi Jtal Carnel tibaj cywitz bix tuyax tbi Tman. ² Bix e xi' nbi'na tk'ajk'ajel cywi' nim tuj cya'j. Tk'ajk'ajel cywi' tisen jun nima' oj n-etz wajtz'aj twitz xak bix tisen k'ancyok oj ntininin cyiw bix tisen oj chi chimban xjal ti' arpa. ³ E xi' cybitzen jun ac'aj bitz twitz tk'ukbil Dios bix cywitz kej cyaja wik i'tz bix kej jawnex tij. Yaltzen cye xjal twitz tx'otx', min-al e bint tu'n tu'n tbitzen ti'j bitz. Nuk o'cx kej syent cya'wnak tuya cyaja mil xjal otk chi clet. ⁴ Ejee'tzen xjal jlu min o chi chucj cyuya xuuj. Sakkix cynaabl. Ejee'tzen kej lu nchi oc lpe ti'j Tal Carnel nuk jaa'xja nxa'. Ma chi clet cyxol xjal tu'n cyajben te jun oybil te Dios bix tej Tal Carnel. ⁵ Min tzaj x'tak' yol tuj cytzi, bix mintii' cyil.

Jcyol oxé ángel

⁶ Bix e wila juntl tsanjel Dios tuj cya'j npurpaj tmij cya'j. E xi' tk'umen jba'n tpochal colbil te junx maj cyej xjal najl twitz tx'otx'. E tk'ume cye xjal te cykilca wik tiy'jil xjal bix te cykilca wik xe'chel bix te cykilca wik yol bix te cykilca tnóm. ⁷ Bix e tzaj tkba'n tuya jun tyol cyiw: —Cynimanx Dios bix cynimajaw jaxin, cuma ma pon tumel tu'n tcub tk'o'nxin cycastiwa xjal. C'oquel cybi'na ja Dios e cub tbincha'nxin twitz cya'j bix twitz tx'otx' bix mar bix cywi' a'—tzi ángel.

⁸ Bix e tzaj juntl tsanjel Dios tuj cya'j ti'j tneel ángel. E xi' tkba'n:

—Ch'ixc'a tcub baj jnintzaj tnóm te Babilonia. Tuya cykil tc'u'j ma tz'oc lpe Babilonia ti'j yaa'n ba'n, bix ma chi oc lpe cykilca tnóm ti'j yaa'n ba'n tu'n, tisen n-oc tz'ey'xix oj nchi'len tc'u'j jun bolo ti' k'e'n—tzi tcab ángel.

⁹ Bix e tzaj toxén tsanjel Dios tuj cya'j cyi'j. E xi' tkba'n tuya jun tyol cyiw:

—Alcye kej xjal ma jaw cynimsa'n jajil jila tzul jlet bix cywitz tsantjil, bix alcye kej xjal ma cyiik' jtecheljil tibaj cywitz bix ka ti'j cyk'ab, ¹⁰ cweltzen jawnex tk'oj Dios cyibaj. Cxe'lksen cyc'a'n xjal tk'oj Dios, tisen nxi' tc'a'n jun bolo k'e'n, cuma nojnexsen vaso tuya tk'oj Dios. Cycastiwa cwel cyibaj, jatzen tu'n cytz'ey' tu'n k'ak' bix tu'n azufre cywitz ke ángel xjan bix twitz Tal Carnel. ¹¹ Bix tsibel k'ak' nq'uixbisan ejee' njatz te junx maj. Mintii' cyajlabl kej xjal lu e jaw cynimsa'n jajil jil ul jlet bix jtsantjil bix e cyiik' jtechel tbi. Nimxsen q'uixc'aj cyi'j te k'ij bix te koniyan—tzi toxén ángel.

¹² Ju' tzunj, il ti'j tu'n cyniman ocslal tley Dios bix tu'n cyten cyiw tuj cyocslabl ti'j Jesús.

¹³ Bix e xi' nbi'na tk'ajk'ajel jun tyol tuj cya'j. E tzaj tkba'n weya:

—Tz'i'beq'uey jlu: “At t-xtalbil Dios tibaj kej xjal junx ete' tuya Cyaaw tu'nj ccyim tuj ja tyem lu, cuma ya mintii' q'uixc'aj chi i'yela, bix cxe'l tk'o'n Dios cyxel jq'uixc'aj iy'x cyu'n tu'n tlaj cybinchben ba'n,” cwel ttz'i'bena—tzi Espíritu Santo weya.

Jawnex tawal Dios twitz tx'otx'

¹⁴ Tej toc ncyeyena juntl maj, e wila jun muj sak, bix k'uklc'a tibaj jmu'j ja xjalja Sma'n tu'n Dios tu'n tten cyuya xjal. Tjax jun tcorona te oro tuj twi', bix tzyu'n jun semel tu'n bix binne ttzii'. ¹⁵ Bix etz juntl tsanjel Dios tuj cya'j tuj tja Dios tuj cya'j, bix e xi' tkba'n tuya jun tyol cyiw tej xjal k'ukl tibaj muj:

—Binchamxsen tiiba tuya tsemela tu'n tjaw chmet twitz awal, cuma ma pon tumel tu'n tchmet twitz awal. Ma tzkij twitz awal twitz tx'otx'—tzi ángel.

¹⁶ Bix jxjal k'ukl tibaj muj e tzaj tnukpi'n tk'ab tuyax semel, bix e cub tchmo'n awal twitz tx'otx'.

¹⁷ Yajxilttzen bix etz juntl tsanjel Dios tuj cya'j tuj tja Dios at tuj cya'j. Jax ju'xte, tzyu'n jun semel tu'n binne ttzii'. ¹⁸ Bix etz j-ángel at taak'en tu'n tc'o'jlan jk'ak' twi'j altar tuj cya'j. Etz twitz altar, bix e xi' tkba'n tuya jun tyol cyiw tej ángel tzyu'n semel tu'n binne ttzii':

—Binchanxsen tiiba tuya tsemela binne ttzii', tu'n tel joset ke tzk'aj uva twitz tx'otx', cuma ma chi tzkij—tzi ángel.

¹⁹ Bix e baj tchmo'n ángel twitz awal twitz tx'otx' tuya tsemel, tu'n tel keset tzk'aj uva twitz tx'otx', bix e cub tk'o'n ke uva tuj jun ttemlel, tu'ntzen tel yetz'et ta'l, jatzen elpeninaj jawnex tk'oj Dios. ²⁰ Bix e baj wa'bet uva ti'jxe tnóm, bix etztzen tziy' tuj ttemlel uva jaa' e cwa' chmet. E jaw t'ziy' tziy', bix e japan tpiman maa tuj ttzi tzej, bix jun mutx' ajlab jaa' e pon baj tziy'.

15

Kej wuuk tsanjel Dios bix k'i'n wuuk xitbil cyu'n

¹ Bix e wila juntl jawnex techel twitz cya'j in jaw klee'ya ti'j. At wuuktl tsanjel Dios tuj cya'j, bix k'i'n wuuk xitbil tchyonelxsen cyu'n, jatzen manc'bil xitbil jlu, cuma ojtzen

tjapan baj kej lu, otktzen japan baj tk'oj Dios tuj ja tyem lu. ² Jax ju'x e wila jun chk'ajlaj tisenca'a jun mar te viiyre smo'n tuya k'ak'. Wa'lke tibaj ja mar lu kej ocslal min otk chi ten tjak' tcawbiljil jil ka'xsen bix twitz tsantjil bix tajlal tbijil. Tzyu'n cyu'n kej arpa otk tzaj tk'o'n Dios cye. ³ Bix e bitzenke jun bitz, jatzenj bitz e t-xnak'tza Moisés, jt-ak'anal Dios, cye xjal jatxe ootxa, jbitz e cybitze xjal tej Tal Carnel mas yaj. Tzin tkba'n bitz cyjulu: "Jawnex bix nintzaj thinchbena, jay Kaaw Dios te cykil tipemala. Jiquenxix bix jaxxix jnbint tu'na, jay Cawel tibaj cykilca tnóm. ⁴ Kman Dios, cykilca xjal il ti'j chi nimal jay bix il ti'j chi nimsal tbiy, cuma nuk o'cx jay xjan. Cykilca xjal tuj cykilca tnóm chi pomel cywitza tu'n cysuken t-xee' tkena, cuma ma cub tk'o'na cycastlewa xjal ka' kwitza," tzi bitz.

⁵ Tbjalxentiltzen jlu, oc ncyeyena juntl maj, bix e wila tej tjket jcwart mas xjan tuj tja Dios, jatztzen tocx jxak tz'i'ben tley Dios twitz. ⁶ Bix etz tuj tja Dios kej wuuk ángel k'i'n kej wuuk xitbil tchionelxsen cyu'n. Toc cyxbalen sakxix bix nkoptz'aj, bix toc jun cyq'uelbil ttzii' cyxuuc' te oro. ⁷ Bix jun wik cyxol kej cyaja jawnex wik i'tz e xi' tk'o'n wuuk lak te oro cyej wuuk ángel, jun te jaca juun. Nojne ke lak tuya tk'oj Dios i'tz te junx maj. ⁸ Bix e noj tja Dios tuya sib tu'nj tspi'yen Dios bix tipemal, bix min-al jun ba'n tu'n tocx tuj tja Dios tejde tbaj kej wuuk xitbil tchionelxsen k'i'n cyu'n wuuk ángel.

16

Kej wuuk lak tcu'x nimxsen tchionel cyuj

- ¹ Bix e xi' nbi'na jun yol cyiw etz k'ajt tuj tja Dios. E xi' tkba'n cye wuuk ángel:
—Cu txi'y bix cykonxa twitz tx'otx' jtcu'x tuj wuuk lak, jatzen tk'oj Dios—tzi yol.
- ² Bix e xi' tneel ángel, bix e xi' tko'n twitz tx'otx' jtcu'x tuj lak. Bix e tak' jun wik yabel cyakc'un cyi' xjal. Nimxsen chionel te cyej xjal toc techel jil jil ul jlet cyi'j cyxumlal bix kej e na'n dios twitz tsantjil.
- ³ Bix e xi' tko'n tcab ángel jtcu'x tuj lak tibaj mar. Bix oc mar te tziy' tisen ttzq'uel jun cyimne, bix e baj cyim cykilca kej najl tuj mar.
- ⁴ Bix e xi' tko'n toxen ángel jtcu'x tuj lak cyibaj nima' bix cyibaj twi' a'. Bix ocke te tziy'.
- ⁵ Bix e xi' nbi'na tu'n tyol jtsanjel Dios tuj cya'j c'ojlal cykilca a'. E xi' tkba'n:
—Jay Dios xjan, ata ja'lewe bix ma tena te junx maj, jiquen jma bint tu'na. Jiquen ta'y tu'n t-xi' tk'o'na tziy' cye xjal tu'n t-xi' cyc'a'n, ⁶ cuma ma tz'el cytzq'uel ocslal bix ke tyolela cyu'n. Ju' tzunj, ma txi' tk'o'na tziy' tu'n t-xi' cyc'a'n te t-xel, cuma cyilx jlu—tzi ángel taaw a'.
- ⁷ Bix e xi' nbi'na tyol j-ángel c'ojlal altar. E xi' tkba'n:
—Jax tu'na tej tbint ju'wa tu'na, jay Kman Dios te cykil tipemal. Jiquen ta'y tu'n tcub tk'o'na cycastlewa xjal tu'nj cyoc nima' bix cywi' a' te tziy'—tzi ángel c'ojlal altar.
- ⁸ Bix e xi' tko'n tcyaa'n ángel jtcu'x tuj lak ti'j k'ij, bix e xi' k'o'n tipemal k'ij tu'n cytz'ey' ke xjal tu'n tk'ak'el. ⁹ Bix e baj tz'ey' ke xjal tu'n nim cyak. Pero min e cyaj cyk'o'n xjal cyil tu'n tjaw cynimsa'n ja Dios. Nuk o'cx oc ten yolel ka' ti'j Dios, jatzen Dios at tipemal tu'n tk'onte kej xitbil lu nimxsen cychionel.
- ¹⁰ Bix e xi' tko'n tjwe'yan ángel jtcu'x tuj lak tibaj tk'ukbiljil jil ul jlet, jatztzen ncawen. Bi'x e cyaj ten tuj kloj cykilca lugar jaa' ncawen, bix e cub cytx'a'n xjal cyaak' tu'n tak' q'uixc'aj.
- ¹¹ Bix e jaw yolen ka' ti'j Dios tuj cya'j tu'n tak' cyq'uixc'aj bix cyakc'un cyi'j. Min e cyaj cyk'o'n cybinchben ka'.
- ¹² Bix e xi' tko'n twukakan ángel jtcu'x tuj tlak. E xi' tko'n tibaj jnintzaj nima' Eufrates tbi. Bi'x e tzki'j nima', tu'ntzen tajben cye cawel te ocne tu'n cyiy'x tibaj nima' cyuya soldado.
- ¹³ Bix e wila oxe biman etz tuj ttzi dragón bix tuj ttzi jil ka' bix tuj ttzi xtak' tyolel jil ka'. Ccyce'nc biman tisen woo'. ¹⁴ Biman ke cyoxele, bix nchi yee'c'an nimxsen cypemal. Bix nchi pon cyuya cawel tuj cykilca twitz tx'otx', tu'ntzen toc cychmo'n ejee', tu'ntzen cyk'ojl cawel cyuya soldado ti'j Dios te cykilca tipemal tuj jk'ij oj tchic'ajax at mas tipemal Dios.
- ¹⁵ C'oquel cyc'u'ja ti'j ja tyol Jesús lu: "Chin ul meltz'aj jun k'ij mintii' tumel, jac'aj min chi ayon xjal wi'ja, tisen min chi ayon xjal ti' jun alak' oj tocx tuj cyja te koniyan. At t-xalbil Dios cyibaj kej xjal nchi ayon wi'ja bix binne cyten, yaa'n tisen jun xjal x'bikl tten oj tul alak' bix tzul tch'ixew," tzi Jesús.
- ¹⁶ Yaltzen cyej biman, oc cychmo'n ke cawel cyuyax cysoldado tuj jun lugar Armagedón tbi tuj yol hebreo.
- ¹⁷ Jatzen te twuukan ángel, e xi' tko'n jtcu'x tuj lak tuj cyk'i'k. Bix etz jun tk'ajk'ajel yol cyiwix tuj tja Dios tuj cya'j, jatztzen ta' tk'ukbil Dios. E xi' tkba'n:
—O'cx xsunj. Ma pon tumel tu'n tbaj cykilca—tzi Dios.
- ¹⁸ Bix e tzaj tken k'ancyok tuyax nim shitz' bix tuyax ntininin k'ancyok. Bix e tzaj jun nintzaj xcyaklajnab. Bajx tzaa' jun xcyaklajnab cyiwixsen tisen ja lu jatxe tej tbint xjal twitz tx'otx'. Jawnexsen jun xcyaklajnab, tuya nimxsen tipemal. ¹⁹ Bi'x e cub pax jawnex tnóm.

Te oxe e'la. Bix e cub xitj cykilca tnom twitz tx'otx'. Cykilcaj til tnom te Babilonia ul tuj tc'u'j Dios, bix e tzaj nim tk'oj Dios tibaj. Tisen jun vaso nojnexsen tuya vino bix n-el koj, ju'tzen ttena jtk'oj Dios e tzaj cyibaj ka' aj Babilonia. ²⁰ Cykilca kej nee' ch'in tx'otx' tmij mar e baj cyuyax cykilca witz. ²¹ Bix e tzaj jun jawnex skbaken twitz cya'j tu'n tcub cyibaj xjal. Jun syent libra talem jun twitz skbaken. Bix e jaw yolen ke xjal ka' ti'j Dios tu'nj skbaken, cuma nimxsen jun skbaken.

17

Jxuuj aj paj

¹ Bix ul wuyena jun cyej wuuk ángel cyxol kej k'i'n wuuk lak cyu'n, bix e tzaj tkba'n weya: —Ju' tzaja tzalú. Cxe'l nyeeec'ana tey jcastiwa cwel tibaj jxuuj aj paj, jxuuj k'ukl cyibaj nim a'. ² Tuya cykil cyc'u'j, ke cawel twitz tx'otx' ma chi oc lpe ti'j jyaa'n ba'n e tkba ja xuuj lu, bix ke xjal najl twitz tx'otx' ma chi oc lpe ti'j ka', tisen oj n-oc tz'ey'xix tc'u'j jun bolo ti'j k'e'n—tzi ángel weya.

³ Bix e xi' ti'i'n ángel wanema tuj jun lugar min-al xjal najl tuj. Bix e wila jun xuuj k'ukljawx tibaj jun jil cyak tilbiljil. Nimxsen yol ka' ti'j Dios tz'i'ben ti'j jil, bix at wuuk twi'jil tuyax laaj tcachejil. ⁴ Toc t-xbalen xuuj puro tbanelxix bix wi'yelxix. E cyaj tbint tuya oro cyuyax nintzaj xak cyuyax perla. Tzyu'n jun vaso te oro tu'n. Nojnexsen tvaso tuyaj ka' bix jpajbaj e bint tu'nxuj. ⁵ Tz'i'ben jun biybjaj tibaj twitzxuj, pero jun biybjaj mintii' tumel ti japenina. Tzi cyjulu: “Jnintzaj tnom Babilonia, jaa' ta' cytXu aj paj, bix jaa' n-it'ja kej ka' nbint twitz tx'otx'.” ⁶ E wila otk tz'oc xuuj tisenc'a jun bolo, cuma otk txi' tc'a'nxuj cytZq'uel kej otk chi cyim tu'nxuj tu'n tlaj cyocslabl ti' Jesús. Tej nlontiya jaxuj, nim in jaw klee'ya. ⁷ Bix e tzaj tkba'n ángel weya:

—¿Tikentzen njaw klee'ya? Cxe'l nkba'na tey ti'j ti japenina jxuj xuuj tuyax jil ekl texuj bix at wuuk twi'xuj tuyax laaj tcachexuj. ⁸ Jjil e tila, jatzenj jil e ten nejl pero mintii'tl ja'lewe. Ch'ixc'a tpon tumel tu'n tjatz tuj jul mintii' tumel t-xee' bix tu'n t-xi'jil tuj il te junx maj. Yaltzen kej xjal twitz tx'otx', kej yaa'n tz'i'ben cybi jatxe tej tbint twitz tx'otx' tuj u'j te chunk'lal te junx maj, chi jawel klee' oj toc cyeye'yen jajil, cuma e tenjil pero min-altljil bix tzuljil juntl maj. ⁹ Alcyekaj at cynaabl, c'oquell cyc'u'ja ti'j jlu. Kej wuuk wi'ybjaj, jatzen japeninjaj kej wuuk witz cwel ke xuuj cyibaj. ¹⁰ Ejee' tzunj lu tzin cyechla'n wuuk cawel. Jwe' cawel ma chi el. Jun at-x ja'lewe. Jatzen juntl, mina'x tul. Ojtzen tul, ilxix ti'j tu'n tten, pero yaa'n nim k'ij. ¹¹ Yaltzenj jil e ten nejl bix min-altl ja'lewe, ja tzunja twajxakan cawel. Jax jun cyxol kej wuuk, bix cxe'l tuj il te junx maj. ¹² Yaltzen kej laaj cache e tila, tzintzen cyechla'n laaj cawel. Mina'x cyoc te cawel. Pero oj tul jletjil tzul, chi cawel tuyajil jun ni' rato. ¹³ Junx cynaabl kej laaj cawel lu, jatzenj tu'n t-xi' cyk'o'n cyaawbil tej jil ul jlet. ¹⁴ Kej cawel lu chi k'ojlel ti'j Tal Carnel. Pero cwel cyi'j tu'nj Tal Carnel, cuma jatzen Cawel cyibaj cykil cawel bix Rey cyibaj cykil rey. Bix tuyaj Tal Carnel oj tcub cyi'j tu'n, ete' kej t-xjal Dios min e cyaj cyk'o'n cyocslabl ti'jxin—tzi ángel weya.

¹⁵ Bix e tzaj tkba'ntl weya:

—Kej a' xtila jaa' ncuaba kej xuuj aj paj, xjalke. Tzin cyechla'n a' nim xjal bix tnom bix cykilca wik yol. ¹⁶ Yaltzen kej laaj cache tuyax ja jil jil xtila, q'uelel cyiiq'uen ja xuuj aj paj, bix q'uelel cyii' n tipemal bix t-xbalen wi'yelxix. Cxe'l cycho'o'n tchu'lxuj, bix cwel cypaten jaxuj tuya k'ak'. ¹⁷ Ma tak' Dios tuj cyanem tu'n cybinchante jtaj Dios tu'n tbint cyu'n, jatzenj tu'n tten jun cynaabl junx bix tu'n t-xi' cyk'o'n cyaawbil tej jil ka', ojxe tjapan baj cykilca tyol Dios. ¹⁸ Yaltzen jxuuj xtila, tzintzen techla'n jawnex tnom ncawen cyibaj cawel ete' twitz tx'otx'—tzi ángel weya.

18

Oj tcub xitj jnintzaj tnom Babilonia

¹ Tbjalxenitlzen jlu, e wila juntl tsanjel Dios ncu'tz tuj cya'j. At nim tipemal, bix e cub spi'yen twitz tx'otx' tu'n tspi'yenal. ² Bix e jaw tsi'n tuya jun yol cyiw:

—Ma cub xitj, ma cub xitj jnintzaj tnom Babilonia. Ma tz'oc nuk o'cx te jun cynajbil biman bix tisen jun cynajbilkejil cykilca wik ch'it ka'. ³ Tuya cykil cyc'u'j ma chi oc lpe cykilca tnom ti'j yaa'n ba'n tuya, tisen oj n-oc tak' k'e'n te jun bolo. Ma chi oc lpe ti'j ka' ke cawel twitz tx'otx' tuya, bix ke q'ueyel ma chi oc k'ina tu'nj cyc'a's ti'j. Pero ja'lewe ma cub xitj —tzi ángel.

⁴ Bix e xi' nbi'na juntl tk'ajk'ajel yol e tzaj tuj cya'j. E tzaj tkba'n:

—Key nxjala, cyetza cyxol kej xjal te tnom lu, tu'ntzen mi'n cybinchana il junx cyuya, bix tu'n mi'n cytena cyuya oj tcub cyaawbil. ⁵ Ma chmet-xix ke til ja tnom lu maa japan baj tuj cya'j, bix ma tzul tuj tc'u'j Dios tu'n t-xi' tk'o'n castiwa te t-xel—tzi Dios cye tnanem.

⁶ Bix e xi' tkba'n Dios:

—Cyk'onxa t-xel te ja tnom lu tisenx ma tzaj tk'o'n ka' cyey. Cyk'onxa ca'ba maj t-xel cybinchben ka'. Tuj jvaso jaa' e cu'xa tk'o'n jc'a'bj jka', cybinchama cab maj t-xel, bix cyk'onxa te tc'a. ⁷ Cyk'onxa q'uixc'aj bix bisbajil te ti' nimbil tiib bix ti' tachbil. Tzin tkba'n tuj tanem: “Jawnex cawel kena, yaa'n jun mebe viuda kena. Mlay chin jaw ook'a, cuma mintii' bis wi'ja,” tzi. ⁸ Cuma ju'tzen ncub tbsen ju'wa, ju' tzunj, cpol jk'ij oj tcub castiwa tibaj. Tzul cyamecy. Tzul bisbajil. Tzul weyaj. Bix c'oquex patet tuj k'ak', cuma at nim tipemal Dios k'olte castiwa. ⁹ Bix chi ook'el ke cawel twitz tx'otx' oj cylonte otk cub xitj ja tnom lu. El cyii'uen ja Dios tuyax Babilonia bix ocke te k'ina tu'nj cyc'a's te. Ju' tzunj, oj cylonte njaw tsibel jk'ak' ncub tpaten ja, nimxsen chi bisel. ¹⁰ Chi tzaal we' cyey'lte nakch ti'j, tu'n mi'n cub tcastiwa cyibaj, bix cxe'l cykba'n: “jLastim jawnex tnom! jLastim Babilonia nim tipemal nejl! Te junx hora ma cub tcastiwa,” tzi cybel. ¹¹ Jax ju'x kej q'ueyel twitz tx'otx' nim chi ook'el ti'j, cuma min-altl tu'n tlok'onte cyc'a's. ¹² Min-altl tu'n tlok'onte cyc'a's oro bix plata bix xak wi'yelxix bix perla bix xbalen sakxix bix jawnex, bix xbalen te seda, bix xbalen cyak, bix tzee' tzin tk'o'n c'oc'sbil, bix cotz nbint te twitz cye nmak jil, bix tzee' tbanelxix, bix bronce, bix xcbil, bix xak mármol, ¹³ bix canela, bix c'oc'sbil, bix sbo's, bix remeda, bix juntl wik c'oc'sbil incienso thi, bix vino, bix aseyyt te olivo, bix harina, bix triwa, bix wacx, bix carnel, bix tzej, bix carwaj, bix ak'anal, bix te k'opaj. ¹⁴ Yaltzen key xjal aj Babilonia, cykilcaj ba'n cyaja ma tz'el k'i'n cyey. Cykilcaj at tajbil cyey bix cyk'inemala ma cub naj. Mlayx chi cnet juntl maj cyu'na. ¹⁵ Kej xjal e q'ueyen kej c'asjel lu, kej oc k'ina tu'nj cyq'ueyen cyej aj Babilonia, chi tzaal we' nakch ti'j tnom, tu'ntzen mi'n cub tcastiwa cyibaj. Ook'ke bix at nim cybis. ¹⁶ Cxe'l cykba'n: “Lastim, lastim, jawnex tnom. Toc t-xbalen sakxix bix jawnex bix cyak, bix e bajxse bint tuya oro tuyax xak wi'yelxix tuyax perla ti'j. ¹⁷ Te junx hora ma cub naj cykilca tk'inemal.” Ke capitán te barc, cyuyax ke onel ti'j, cyuyax ke cykilca nchi ak'anan tuj mar, el lk'eke ti'j. ¹⁸ Tej cylonte tej tjaw tsibel jk'ak' ncub tpaten tnom, e jaw cysi'n: “Mintii'tl jun tnom jawnex tisen ja tnom lu,” tzi. ¹⁹ Bix e jax kuk tuj cywi', bix e jaw si'nke, bix ook'ke, bix e xi' cykba'n: “Lastim, lastim, jawnex tnom. Cykilca taaw barc tuj mar ocke k'ina tu'nj tk'inemal ja tnom lu. Lastim, cuma te junx hora ma cub naj tnom,” tzi. ²⁰ Key najl tuj cya'j, bix key ocslal cyuyax t-xel Jesús cyuyax tyolel Dios, chi tzalaja, cuma ma txi' tk'o'n Dios castiwa tibaj ja tnom lu, cuma nim ma yasen cyi'ja—tzitzen yol e tzaj tuj cya'j.

²¹ Bix at jun tsanjel Dios tuj cya'j nim tipemal e xi' ttzyu'n jun ma tij xak tisen jun cyaa', bix e cub t-xoo'n tuj mar. Bix e xi' tkba'n:

—Tisenj e cu'x xak tjak' mar, ju'tzen pjel te Babilonia. Cwel xitj tuj jun rato bix cyiw t-xi'len, bix mlayx cnet juntl maj. ²² Mi'ntl tz'oc arpa bix xux bix trompeta cyu'n xjal, bix mi'n chi bitzetl. Mi'n chi ak'ananl xjal, bix mi'n chi tzee'ntl xuuj ti' cyaa'. ²³ Mi'n tentl tken luz tu'n tk'on spi'yen, bix mintii'tl mejoblanel c'oquel tuj. Cwel xitj, cuma kej xin at cyc'a's najl tuj, e cawenkexin cyibaj cykilcatl xjal, bix cuma e sbun ke aj Babilonia cykilcatl tnom. ²⁴ Tuj ja tnom lu ma cnet cytz'q'uel ke tyolel Dios bix ke ocslal bix cykilca xjal o cub cybyet twitz tx'otx'—tzi ángel.

19

Oj tjaw nimset tbi Dios

¹ Tbjalnxitltzen lu, e xi' nbi'na tk'ajk'ajel cyyol nimxsen cyajlal xjal tuj cya'j. Cyiwix e xi' cykba'n:

—jJawnexxit Kman Dios! Nuk tu'n Dios ma ko clet. Nimsxen tipemal. Nimjxit tbi, ² cuma jiquenxix bix tuj tumel jcastiwa ma txi' tk'o'n. Ma txi' tk'o'n tcastiwa jawnex aj paj e xi' tii'n kej xjal twitz tx'otx' tuj il tu'nj tbinchben ka'. Bix ma tzaj tk'o'n Dios t-xel te xuuj tu'nj ccyamecy t-ak'anal—tzi ke xjal tuj cya'j.

³ Bix e xi' cykba'ntl:

—jJawnexxit Dios! cuma te junx maj njaw tsibel jk'ak' ncub tpaten tnom—tzi. ⁴ Jax ju'x kej winakcyaja tij cyuyax cyaja jwik i'tz e cub mutzk'aj twitz Dios k'ukl tuj jawnex tk'ukbil tu'n tjaw cynimsa'n jaxin. E xi' cykba'n:

—Ju'xit ttena. Jawnexxit Dios—tzi. ⁵ Bix e tzaj tkba'n jun nka tcub tk'ukbil Dios:

—Cykilca key t-ak'anal Dios cyuyax key at cynimbil Dios cyuyax key ch'in bix key nintzaj, cynimsanx Kdios—tzi jun tcub nka ttxalj Dios.

⁶ Bix e xi' nbi'na cyol jun nimxsen cyajlal aj tuj cya'j, tisen tk'ajk'ajel jun nima' oj n-etz wajt'aj twitz xak bix ka oj ntininin cyiw k'ancyok. E xi' cykba'n:

—jJawnexxit Dios! cuma at tu'n tcawen Kman Dios tuya cykil tipemal. ⁷ Ko tzalajxix bix ko tenx aleyre bix ko nimsal ja Dios, cuma ma pon tumel tu'n tten Jtal Carnel, ja Jesús, cyuya t-xjal. Ma bint cyten t-xjal, tisen oj nbint tten jun xuuj tu'n tmaje tuya tchmil. ⁸ Ma tzaj k'o'n

amle'n cye t-xjal tu'n toc cyxbalen sak bix ntxakakan, te techel ka jiquenxix—tzi kej ete' tuj cya'j.

Mejoblenel te Tal Carnel

⁹ Bix e tzaj tkba'n ángel weya:

—Tz'i'beq'uey cyjulu: “At t-xtalbil Dios cyibaj kej xjal txco'nke tu'n cywaa'n tuj mejoblenel tej Tal Carnel,”—tzi ángel.

Bix e tzaj tkba'ntl weya:

—Kej yol lu jaxxix tyol Dioske—tzi weya.

¹⁰ Bix in cub majeya t-xee' tken ángel tu'n nnimsana jaxin. Pero e tzaj tkba'n weya:

—Mi'n tbinchaya jlu, cuma nuk jun t-ak'anal Dios kena tisen jay bix tisen ke niy'tl ocslal nxi' cyk'umen yol ti'j Jesús. Jyol ti'j Jesús junx ta' tuyaj yol e cyk'ume tyolel Dios—tzi ángel.

Jun xjal tjax tibaj tzej sak

¹¹ Tbjalxixiltzen jlu, e wila tej tjket twitz cya'j. Bix e wila jun tzej sak, bix tjax tibaj tzej xjal jaxxix bix njapan tyol tu'n. Tuj tumelxix ncawen, bix jiquenxix tk'oj cyi'j aj k'oj ti'j. ¹² Ke tbak' twitz tisen tken k'ak', bix tjax nim corona tuj twi'. Bix tz'i'ben jun biybjaj ti'j. Min-al jun xjal n-el tniy' ti'j biybjaj, nuk o'cx jaxin. ¹³ Bix toc jun t-xbalen otk cu'x me't tuj tziy', bix Tyol Dios tbi. ¹⁴ Bix nche'x lpe nimxsen cyajlal kej ete' tuj cya'j ti'j, tisen soldado. Toc cyxbalen sak, mintii' tz'il cyi'j, bix ete'wex cyibaj tzej sak. ¹⁵ Bix n-etz jun machet binne tten tuj ttzixin, tu'ntzen tajben texin tu'n t-xi' tk'o'nxin castiwa cye tnom. Ccawelxin cyibaj tuya nim tipemalxin, tisenj jun cylel ncylen cyi' carnel tuya jun bardón cyiw. Cwel tk'o'nxin tcastiwa binne tu'n Dios at cykilca tipemal, tisen oj nbaj wa'bet uva tuj ttemlel uva. ¹⁶ Bix tz'i'ben ti'j tcux-xin bix ti'j t-xbalenxin, jatzen tbi jlu: Rey tibaj cykilca rey bix Cawel tibaj cykilca cawel.

¹⁷ Bix e wila jun tsanjel Dios tuj cya'j wa'l'ca twitz k'ij. Bix tuya jun cyiw tyol e xi' tkba'n te cykilca ch'it nchi purpaj twitz cya'j:

—Cytzaja tzalu, bix cychmon cyiiba tu'n cytena tuj jun nin waa'n cxe'l tk'o'n Dios. ¹⁸ Cxe'l cycho'na cychu'l cawel bix capitán bix jawnex xjal bix tzej bix kej xjal otk chi jax cyibaj bix cykilca xjal, ak'anal-le, yaa'nle ak'anal, ch'inle, jawnexle—tzi ángel cye ch'it.

¹⁹ Yajc'atltzen, bix e wila jiljil ul jlet cyuyax ke cawel twitz tx'otx' cyuyax cysoldado. Otk baj cychmon cyiib tu'n cyk'oj ti'j xjal tjax tibaj tzej bix cyi'j ke nim xjal tuya. ²⁰ Bix e tzyetjil jil tuyax tyolel xtak' otk yee'c'an tipemal twitzjil tu'ntzen tsbun cye xjal, ejee'j otk cyiik' techeljil tuj cyxumlal bix otk chi nimsan tsantjil. Cyca'bel jlu e cu'x xe'tke i'tzke tuj tnijabel k'ak' te azufre. ²¹ Jatzen ke mastl xjal ete' tuyajil jil, e cub byet tu'n machet n-etz tuj ttzi jxjal tjax tibaj tzej, bix cykilca ch'it twitz cya'j e nojke tu'n cychu'l kej cyimne.

20

Kej mil jnabk'i

¹ Tbjalxixiltzen jlu, e wila juntl tsanjel Dios tuj cya'j. E cu'tz tuj cya'j, bix k'i'n tal jaa' tu'n te tej ttzi jul mintii' tumel t-xee', bix tuyax jun ma tij cadena tzyu'n tu'n tuj tk'ab. ² Bix e cub ttzyu'n ja dragón, jatzen lbaj te ootxa, jatzenj taaw il, jatzenj Satanás. Bix e xi' t'xpo'n ja taaw il, tu'n tten xpo'n jun mil jnabk'i. ³ Bix e cu'x t-xoo'n tuj jul mintii' tumel t-xee', bix e cyaj tlomo'n ttzi jul. Bix e cub tk'o'n jun tlemel ttzi jul, tu'ntzen mi'n jatz taaw il tu'n tsbuntl cyi' xjal. Pero oj t'bj mil jnabk'i, il ti'j ctzakpetel, pero yaa'n nimtl k'ij.

⁴ Bix e wila nim k'ukbil jawnex. Bix k'uklke tuj k'ukbil ke ocslal at tu'n cycawen. Cyxoltzen ke ocslal ete' kej otk tz'el tx'omet cywi' tu'n t'aj cyocslabl ti' Jesús bix tu'n tyol Dios, bix ete' kej min otk chi cub maje twitz jil jil bix twitz tsantjil, bix min otk tz'oc techeljil tibaj cywitz bix ka ti' cyk'ab. Otk chi jaw itz'j tuj cyamecy juntl maj, bix oc chi cawel tuya Cristo jun mil jnabk'i. ⁵ Yaltzen ke niy'tl xjal yaa'n ocslal, min e jatz itz'j juntl maj ojxe t'bj mil jnabk'i. Min e jatz itz'j tuj tneel maj tej cyjatz itz'j ocslal tuj cyamecy. ⁶ At t-xtalbil Dios tibaj kej xjal nchi jatz itz'j tneel maj, cuma t-xjal Dioske. Oj ccyyim xjal te junx maj, ja t'cab cyamecy lu. Mintii' tipemal cyibaj ke t-xjal Dios lu. Nuk o'cx chi ouel te pala tu'n cyajben te Dios bix te Cristo, bix chi cawel tuya Cristo jun mil jnabk'i.

⁷ Ojzen t'bj mil jnabk'i, cjawetzzen tzakpet taaw il, ja Satanás, tuj jul mintii' tumel t-xee'. ⁸ Q'uelextzen sbul cykilca tnom ete' twitz tx'otx', jtnom te Gog tuyax Magog. Chi ouel tchmon cyiib tu'n cyk'oj ti'j Cristo. Nimxsen cybaj aj k'oj ti'j Cristo, tisenzen ttxa tz'a'n ttzii' mar mlay bint cyajlaj. ⁹ Bix e baj tzaj tuj cykilca twitz tx'otx', bix e baj cytxolban cyiib ti'jxe cynajbil ocslal bix ti'jxe jtnom n-oc tak' te Dios. Pero e cu'tz k'ak' tuj cya'j tu'n Dios, bi'x e cub tz'ey' cykilca tu'n. ¹⁰ Bix taaw il, j-e sbun cye, e cu'x xoo'n tuj tnijabel k'ak' bix azufre, jatzen ete'jil jil tuyax tyolel xtak'. Bix chi tel tuj q'uixc'aj te k'ij bix te koniyan cykilca tyem te junx maj.

Jun castiwa twitz nintzaj k'ukbil sak

¹¹ Bix e wila jun nintzaj k'ukbil sak. Bix e wila jk'ukl tuj. El ok twitz tx'otx' tuyax twitz cya'j twitzxin. E cub najke. ¹² Bix e wila ke cyimne, kej jawnex bix kej ch'in. Wa'lke twitz Cristo. Bix e jket ke u'j. Bix at juntl u'j e jket, j-u'j jatzzen tz'i'ben cybi xjal at cychunk'lal te junx maj. Bix e cykba u'j cybinchben xjal. Bix e k'oj castiwa cye xjal, teeyle juun la' alcye otk bint tu'n. ¹³ E tak' mar kej cyimne e cyim tuj. Jax ju'x e tak' cykilca camposant bix cynajbil cyimne ke xjal otk chi cyim. Bix e tak' Dios castiwa te cykilca, teeyle juun la' alcye otk bint tu'n. ¹⁴ Bix cyamecy tuyax cynajbil cyimne e cu'x xoo'n tuj tnijabel k'ak'. Ja tnijabel k'ak' lu, jatzenj tcab cyamecy lu. ¹⁵ Alcye kej xjal min e cnet cybi tuj ja u'j jaa' tz'i'bena cybi kej xjal at cychunk'lal te junx maj, e cu'x xe'tke tuj tnijabel k'ak'.

21*Ac'aj twitz cya'j bix ac'aj twitz tx'otx'*

¹ Tbjalxixiltzen jlu, e wila jun ac'aj twitz cya'j bix ac'aj twitz tx'otx'. Otk chi baj tneel twitz cya'j tuyax tneel twitz tx'otx' tuyax mar. ² Bix e wila jnintzaj tnom xjan, j-ac'aj Jerusalén tbi, ncu'tz tuj cya'j. Ju' e tzaj tuya Dios. Binnessen tten tisen jun xuuj binne tten tuya t-xbalen cyeca tu'n tmaje tuya tchmil. ³ Bix e xi' nbi'na jun cyiwix tk'ajk'ajel tuj cya'j. E xi' tkba'n:

—Ma tzul Dios tu'n tten cyuya xjal. Ma pon tumel tu'n tnajan Dios cyuya xjal. Chi oquel xjal te t-xjal Dios, bix jax Dios ctemel cyuya te Cydios. ⁴ Bix ja te Dios q'uelel su'nte cykil ta'l cywitz. Mintii'tl cyamecy. Mintii'tl bis. Mintii'tl ook'el. Mintii'tl q'uixc'aj. Kej pena te nejl, ma chi baj te junx maj—tzi jun aj cya'j.

⁵ Bix e tzaj tkba'n Dios k'ukl tuj tk'ukbil:

—Jey', cykilca oquel te ac'aj wu'na. Tz'i'beq'uey jma tila, cuma jaxxix kej yol lu, bix ba'n tu'n tke cyc'u'ja ti'j—tzi Dios weya.

⁶ Bix e tzaj tkba'ntl Dios weya:

—Ma bint. Inayena tuj tneel bix manc'bil. Alcye kej xjal at tak' a' cyi'j, cxe'l nk'o'na a' cye nuk cotz, jaj twi' a' te chunk'lal te junx maj. ⁷ Alcye kej xjal ma chi xcyte tibaj cykilcaj luwe, ccyiik'el ja cotz lu te cykab. Bix chin oquela te Cydios, bix chi oquel te ncwala. ⁸ Pero kej xjal at ttzi cyi'j tu'n cyxi' lpe wi'ja, bix kej min n-oc ke cyc'u'j wi'ja, kej at cyil, kej byol xjal, kej nchi binchan pajlel, kej chmambaj, kej nchi suuken cyxee' cyken sant, kej xtak'el, cykilca kej lu chi xe'l tuj tnijabel k'ak' bix azufre, jatzen tcab cyamecy—tzi Dios weya.

J-ac'aj Jerusalén

⁹ E tzajzen jun tsanjel Dios tuj cya'j wuyena, jun cyej wuuk ángel e wila nejl k'i'n wuuk lak cyu'n nojne tuya wuuk jxitbil te tchyonel. E tzaj tkba'n weya:

—Quixtey. Cxe'l nyeeec'ana tey jxuuj tu'n tmaje tuyaj Tal Carnel—tzi ángel.

¹⁰ Bix e xi' tii'n ángel wanema twi' jun jawnex witz te nim twe', bix e tzaj tyeec'an jnintzaj xjan tnom, ja Jerusalén. Ncu'tz tuj cya'j ntzaj tuya Dios. ¹¹ Nkoptz'aj tnom tu'n tspi'yemal Dios. Ntxakakanxsen tisen jun xak wi'yelxix, tisenj jun wik xak diamante. ¹² At jun tapya ti'j tnom te nim twe', bix at cablaaj ttzi pwert. At juun ángel ttzi juun ttzi pwert. Tz'i'ben cybi jcablaaj cyiy'jil aj Israel cyi' kej ttzi pwert. ¹³ At oxe ttzi pwert ttxlaj tnom te ocne, bix at oxe ttzi pwert ttxlaj tnom te cubne, bix at oxe ttzi pwert ttxlaj tnom te jawne, bix at oxe ttzi pwert ttxlaj tnom te elne. ¹⁴ Bix tjak' tapya at cablaaj xak te t-xee' tapya. Tz'i'ben cybi kej cablaaj t-xnak'atz Jtal Carnel ti'j juun xak t-xee' tapya. ¹⁵ J-ángel e yolen wuyena jun tal ptz'unt k'i'na tu'n tu'n t'cub tml'o'n tnom cyuyax ttzi pwert tuyax tapya. ¹⁶ Junelne cykena kej cyaja plaj te tnom. Tej tcub tml'o'n jtnom tuya ptz'unt, at wukak syent ajlab tkene. Junx ta' t'we' tisenx tkene tuya twitz tuya t'we'. ¹⁷ Bix e cub tml'o'n ángel jtapya. Oxc'al tuya cablaaj bara t'we'. Amale ángelet, pero e cub tml'o'n tisen jun xjal. ¹⁸ Ttx'otx'el jtapya tisenj xak diamante. Yaltzen te tnom, ttx'otx'el purooxsen oro, bix tisen viiyre tu'n tex kcye'yen tuj. ¹⁹ Yaltzen kej cablaaj xak ajben te tk'uklel tnom, e baj bint tuya juun wik xak wi'yelxix. Jtneel xak, diamante. Jatzen tcab xak, zafiro. Jatzen toxen xak, ágata. Jatzen tcyaa'n xak, esmeralda. ²⁰ Jatzen tjwe'yan xak, ónice. Jatzen twukakan xak, cornalina. Jatzen twuukan xak, crisólito. Jatzen twajxakan xak, berilo. Jatzen theljajan xak, topacio. Jatzen tlajan xak, crisoprasa. Jatzen tjunlajan xak, jacinto. Bix jatzen tcablajan xak, amatista. ²¹ Yaltzen kej cablaaj ttzi pwert, perla cytx'otx'el. Jaca juun ttzi pwert jun perla. Yaltzen ke be tuj tnom, puro oro cytx'otx'el, bix tisen viiyre, tu'n tex kcye'yen tuj. ²² Bix mintii' tja Dios e wila tuj tnom, cuma at Kman Dios te cykilca tipemal tuj, tuyax Jtal Carnel, tu'ntzen cyjaw nimsaj. ²³ Mintii' il ti'j tu'n tk'on k'ij bix xjaw cyken luz tuj tnom, cuma tu'nx tspi'yemal Dios bix Jtal Carnel spi'yenxsen ta'. ²⁴ Tu'nj spi'yel lu, cykilca xjal twitz tx'otx' nchic'ajaxsen tuj cybe. Bix cykilca cawel twitz tx'otx' chi k'ol nimbil te tnom. ²⁵ Mintii' koniyan, nuk o'cx k'ij. Ju' tzunj, mlay chi lmet ttzi pwert. ²⁶ Cykilca xjal twitz tx'otx' cxe'l cyk'o'n nimbil bix cyk'inemal te

tnom. ²⁷ Pero mlay tz'ocx jun tz'il tuj. Min-al jun binchal il bix ka xtak'el chi oquex tuj. Nuk o'cx kej xjal tz'i'ben cybi tuj tu'j Jtal Carnel tzin tkba'n alceyej ma tiik' tchunk'lal te junx maj.

22

¹ Bix e tzaj tyeec'an ángel jun nima' weya n-etz twitz tk'ukbil Dios bix tuyaj Tal Carnel, j-a' te chunk'lal te junx maj. Nkoptz'aj a' tisen viiyre. ² Nbet nima' tmij be tej tnom. Bix tuj cyca'bel tzii' nima' tcub jun wiy' tzee' te chunk'lal te junx maj. Tzin tk'o'n twitz cablaaj maj tuj jnabk'i. Cykilca xjaw tzin tk'o'n twitz. Bix t-xak tzee' najben te k'anel cye cykilca xjal. ³ Mintii'tl castiwa. Bix jawnex tk'ukbil Dios bix Jtal Carnel ctemel tuj tnom. Bix chi ajbel t-xjal te. ⁴ C'oquel cycye'yen twitz, bix c'oquel tbi tibaj cywitz. ⁵ Mintii'tl koniyan. Bix mintii'tl il ti'j tu'n cyajben cantil bix k'ij cye xjal, cuma jax Kman Dios ctemel tu'n tk'on spi'yen cye xjal. Bix chi cawel xjal tuya Dios te junx maj.

Tzi Cristo cyjulu chin ul meltz'aj naja

⁶ Bix e tzaj tkba'n ángel weya:

—Jaxxix kej yol lu, bix ba'n tu'n tke cyc'u'ja cyi'j. Ja te Dios, Jkaaw, jatzenj Dios e tzaj tk'o'n tyol cye tyolel nejl tu'nj Espiritu Santo, ma tzaj tsma'n tsanjel tuj cya'j ja'lewe tu'n ttzaj tyeec'an cye t-xjal j-at tu'n tul. ⁷ Ma txi' tkba'n Jesucristo: “Chin ul naja,” tzi. At t-xtalbil Dios cyibaj kej xjal nxi' cyniman kej yol ma cub ttz'i'bena tuj u'j—tzi ángel weya.

⁸ Inayena, Juan, e nbi'ya bix e wila cykilcaj lu, bix tej t-xi' nbi'na bix e wila, in cub mutzk'aja t-xee' tken j-ángel otk tzaj tyeec'an jlu weya. ⁹ Pero e tzaj tkba'n weya:

—Mi'n tbinchaya ju'wa, cuma nuk jun t-ak'anal Dios kena tisen jay bix tisen ke niy'tl ocslal nxi' cyk'umen tyol Dios bix tisen kej nchi niman kej yol k'o'n tey tu'n Dios. Nuk o'cx nimsanwe Dios—tzi ángel weya.

¹⁰ Bix e tzaj tkba'ntl ángel weya:

—Mi'n cub tewena ja u'ja lu jaa' ma cub ttz'i'bena tyol Dios, cuma tzul tyem tu'n tjapan baj cykilcaj ma cub ttz'i'bena. ¹¹ Bix oj tjapan baj cykilcaj, kej xjal aj il, tu'n cyten aj il. Bix kej xjal tz'il, tu'n cyten tz'ilx. Pero kej xjal jiquen, tu'n cybinchante jtz'aklxix. Bix kej xjal sakkix, tu'n cyajben o'cx te Dios—tzi ángel weya.

¹² Ma txi' tkba'n Cristo cyjulu: “Jey', chin ul meltz'aj naja. Bix tzul wii'na chojbil te teylex juun la' alceyej xbint tu'n. ¹³ Inayena tuj tneel bix manc'bil, t-xee' tneel bix bajsbil, tisen kej letra A bix Z. ¹⁴ At t-xtalbil Dios cyibaj kej xjal n-el cytxjo'n ti'j cyxbalen, tu'ntzen at cyoclen ti'j twitzj tzee' te chunk'lal te junx maj, bix tu'n cyocx ttzi pwertel te tnom. ¹⁵ Pero kej xjal at tz'il cyi'j, ke chmambaj, ke aj pajlel, ke byol xjal, kej nchi suuken t-xee' tken sant, bix cykilca xjal cyaj tu'n cyxtak'en, mintii' cyoclen tu'n cyocx tuj tnom. ¹⁶ Inayena, Jesús, ma tzaj nsma'na n-ángela tu'n ttzaj tk'umen cyey ocslal cykilcaj lu ti'j ti pjel. Inayena tcwal jrey David, jche'w njawen te skixa ntxakakan,” tzi Cristo.

¹⁷ Tzin tkba'n Espiritu Santo tuyax cykilca ocslal, jt-xu'l Jtal Carnel, cyej xjal yaa'n ocslal: “Cytzaja.” Bix kej xjal n-oc cybi'n ja yol lu, chi tzajxit. Chi tzajxit kej xjal at cyajbil tu'n cyc'an j-a' te chunk'lal te junx maj. Chi c'anxit. Mintii' twi'.

¹⁸ Cxe'l nkba'na cyej xjal nxi' cybi'n kej tyol Dios ma cub ntz'i'bena tuj ja u'j lu, ka at jun xjal ma tz'oc k'o'n mi nuk juntl yol tibaj jyol tz'i'ben tuj ja u'ja, ctzaal tk'o'n Dios te kej xitbil tz'i'ben tuj ja u'j lu. ¹⁹ Bix ka at jun xjal ma tz'el k'inte mi nuk jun tyol Dios tz'i'ben tuj ja u'j lu, q'ueletzen ti'n Dios toclen ti'j jtzee' te chunk'lal te junx maj, bix mintii'tl toclen tu'n tocx tuj nintzaj tnom xjan.

²⁰ Jxjal ma tzaj tk'o'n kej yol tz'i'ben tuj ja u'j lu, ja Jesús, tzin tkba'n: “Chin ul meltz'aj naja.” Ju'xit ttena. Ctzaja, Kaaw Jesús.

²¹ Tenxittzen t-xtalbil Kaaw Jesucristo tibaj cykilcakey. O'cx nyolja.